



Topẽ vĩ rá

Kaingang New Testament

Contents

Mateus tỹ rá	1
Marcos tỹ rá	61
Lucas tỹ rá	94
João tỹ rá	159
Apóstolo ag tỹ nén han kãme	201
Roma tá ke ag mỹ carta	253
Corinto tá ke ag mỹ carta ve	279
Corinto tá ke ag mỹ carta ã	304
Galácia tá ke ag mỹ carta	319
Éfeso tá ke ag mỹ carta	328
Filipos tá ke ag mỹ carta	336
Colossos tá ke ag mỹ carta	342
Tessalônica tá ke ag mỹ carta ve	348
Tessalônica tá ke ag mỹ carta ã	353
Timóteo mỹ carta ve	356
Timóteo mỹ carta ã	363
Tito mỹ carta	368
Filemom mỹ carta	371
Hebreu ag mỹ carta	373
Tiago mỹ carta	392
Pedro tỹ carta han vén	399
Pedro tỹ carta han măn	406
João tỹ carta han vén	410
João tỹ carta han măn	416
João tỹ carta ã han măn	417
Judas tỹ carta	418
João tỹ ẽg tỹ nén venh ke mũ rá	420



Topẽ vĩ rá

New Testament in Kaingang (BR:kgp:Kaingang)

Language: Kaingang

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

© 2011, Wycliffe Bible Translators, Inc. All rights reserved.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

16af52c8-0e45-5e91-b36c-cd314d36d7fc

ISBN: 978-1-5313-0328-0

MATEUS TỸ RÁ

Jesus jóg'jóg ve ag

(Lc 3.23-28)

1 Jesus Cristo jóg'jóg ve ag rán ke vë. **2** Jesus Cristo vỹ tỹ Davi krë'krë nĩ, kỹ Davi vỹ tỹ Abraão krë'krë nĩ. **3** Abraão vỹ Isaque han. Kỹ Isaque vỹ Jacó han. Kỹ Jacó vỹ Judá han, ti mré ke ag ke gé. **4** Kỹ Judá vỹ Peres han. Zera ti ke gé. **5** Kỹ Prũ tỹ Tamar fi ki tóg ag hyn han, Judá ti. Kỹ Peres vỹ Esrom han. Kỹ Esrom vỹ Arão han. **6** Kỹ Arão vỹ Aminadabe han. Kỹ Aminadabe vỹ Nasom han. Kỹ Nasom vỹ Salmom han. **7** Kỹ Salmom vỹ Boaz han, ã prũ tỹ Raabe fi ki. Kỹ Boaz vỹ Obede han, ã prũ tỹ Rute fi ki. Kỹ Obede vỹ Jessé han. **8** Kỹ Jessé vỹ pã'i mág tỹ Davi ên han.

Kỹ pã'i mág tỹ Davi vỹ Salomão han, ã prũ ên fi ki, ù tỹ Urias prũ ja nĩ ên fi ki. **9** Kỹ Salomão vỹ Roboão han. Kỹ Roboão vỹ Abias han. Kỹ Abias vỹ Asa han. **10** Kỹ Asa vỹ Josafá han. Kỹ Josafá vỹ Jorão han. Kỹ Jorão vỹ Uzias han. **11** Kỹ Uzias vỹ Jotão han. Kỹ Jotão vỹ Acáz han. Kỹ Acáz vỹ Ezequias han. **12** Kỹ Ezequias vỹ Manassés han. Kỹ Manassés vỹ Amom han. Kỹ Amom vỹ Josias han. **13** Kỹ Josias vỹ Jeconias han, ti jãvy ag ke gé. Israel ag tỹ cidade Babilônia ra mũ ên kã tóg ag hyn han, Israel ag tỹ sigse kỹ mũ ên kã.

14 Ag tỹ cidade ên tá vỹnvỹn ke kar kỹ Jeconias vỹ Salatiel han. Kỹ Salatiel vỹ Zorobabel han. **15** Kỹ Zorobabel vỹ Abiúde han. Kỹ Abiúde vỹ Eliaquim han. Kỹ Eliaquim vỹ Azor han. **16** Kỹ Azor vỹ Sadoque han. Kỹ Sadoque vỹ Aquim han. Kỹ Aquim vỹ Eliúde han. **17** Kỹ Eliúde vỹ Eleazar han. Kỹ Eleazar vỹ Matã han. Kỹ Matã vỹ Jacó han. **18** Kỹ Jacó vỹ José han, Maria fi mén ên ti. Maria ên fi ki Je- sus tóg mur ja nĩ, hã vỹ: Cristo, he mũ.

19 Hã kỹ ag tóg 14 (ke) nỹtĩ, Abraão krë'krë ag, Davi mré nĩgrén kỹ. Kỹ Davi krë'krë ag tóg 14 (ke) nỹtĩ gé, ag tỹ ag sigse kỹ nỹtĩ tá ag nĩgrén kỹ, ag tỹ cidade tỹ Babilônia tá sigse kỹ nỹtĩ tá ag nĩgrén kỹ. Tag pãte ag krë'krë vỹ 14 (ke) nỹtĩ gé, Cristo mré nĩgrén kỹ. Cristo jóg'jóg ve ag hã vë.

Jesus Cristo mur

(Lc 2.1-7)

1 Jesus Cristo mur vỹ ge nĩ, ha mẽ. Ti mỹnh fi vỹ tỹ José prũnh ke fi nĩ, hã ra fag tóg ver jagnë mré nỹ ja tũ nĩ. Ên kã fi tóg kufy nĩ ha. Topë kuprĩg tỹ fi mỹ gĩr han jan hã vë. **2** Kỹ José tóg mēg mũ sir, fi tỹ kufy nĩ ti, kỹ tóg ti mỹ e ti. Ûn jykré kuryj vë mỹr, José ti, hã kỹ tóg fi mỹ'ag han sór tũ nĩ, kỹ tóg fi to vĩ tũ nĩ sir. Hã ra tóg fi pin kỹ fi mỹ: “kỹ inh hỹn ã tỹ prũ ninh ke tũ nĩ ha.” he sór mũ sir.

3 Ti tỹ ver fi tovãnh to jykrén kỹ Topë tỹ jënë jafã tóg ti mỹ vênh ven mũ sir, ti vênh pėti kỹ. Kỹ tóg ti mỹ: “José,” he mũ. “Tỹ ã Davi krë'krë ag kã ù nĩ,” he tóg. “Maria fi to jykrén kónãnh tũg nĩ. Jatun mỹ fi tỹ prũg nĩ, fi tovãnh tũg nĩ. Û tũ pijé, fi kósín ti. Topë kuprĩg tỹ fi mỹ han ja vë. **4** Ti mur kỹ tóg gré nỹnh mũ, ha vemnĩ. Kỹ ti mỹ: Jesus, hemnĩ. ã povo krenkren han jé tóg ke mũ, ag tỹ Topë vĩ mranh mũ ra,” he tóg, José mỹ, Topë tỹ jënë jafã ti.

5 Hã ra Topë vỹ vãsỹ ã vĩ tó ti ù mỹ tag tó ja nĩ, ha mẽ. **6** “Ûn mén ja tũ fi vỹ kufy ninh mũ,” he ja tóg nĩ. “Fi kósín fi ki mur ken kỹ ag tóg ti to: Emanuel, henh ke mũ,” he ja tóg nĩ, Topë vỹ tỹ rãn kỹ nĩ ki. Emanuel to ke vë, hã vỹ: “Topë vỹ ěg ki rĩr há han mũ,” he mũ, ěg vĩ ki, hã vỹ: Emanuel, he mũ. José vỹ Topë vỹ tag ve ja nĩ.

7 Kỹ José tóg rĩr mũ sir, ti vênh pėti kar kỹ. Kỹ tóg Topë tỹ jënë jafã ên vĩ ki króm mũ sir. Vênh prũg han tóg mũ, Maria fi mré. **8** Hã ra tóg ver fi mré nỹ

tū nīgtī. Kejēn fi tóg ā kósín vég mū. Kĩ José tóg ti jijin kĩ ti mĩ: Jesus, he mū. Fi tĩ ti ve kar kĩ tóg vāhā fi mré nĩ mū sir.

Pā'i ag tĩ Jesus venh kāmū

2 Fi tĩ Jesus ve ēn kā fag tóg cidade tĩ Belém tá nĩtĩ, ga tĩ Judéia tá. Herodes vỹ tĩ pā'i tĩ rei nĩ, fi tĩ ti ve ja ēn kurā ki. Kĩ kejēn ũ ag tóg Jerusalém tá junjun mū. Kuvar há tá ag tóg kāmū ja nĩ, rā jur ja tá, ājag jamā tá. Ũn estudo mág han mū ag vē, krīg to ag tóg estudar he mág han tĩ. ² Ag tĩ Jerusalém tá junjun kĩ ag tóg sir: “ũ tĩ ũri mur mū vỹ tĩ Israel ag pā'i mág nĩnh mū,” he mū. “Ti kri ěg krīg vé, ěg tĩ ěg jamā tá nĩtĩn kĩ, rā jur ja tá nĩtĩn kĩ. ěg tĩ ti venh kāmū vē, ěg tĩ ti mĩ nén ũ há vin sór vē. ěg hĩn hē tá ti venh ke mū?” he ag tóg, ũ tĩ kuvar há tá kāmū mū ēn ag.

³ Ag vĩ tag vỹ pā'i tĩ Herodes mĩ e tĩ, kĩ tóg krĩ kufy nĩ sir. Jerusalém tá ke kar ag mĩ tóg e tĩ gé. ⁴ Kĩ Herodes tóg Topē tũ ki rĩr tĩ to pā'i ag jé prēr mū sir, Topē vĩ to professor ag ke gé. Kĩ tóg ag mĩ: “Cristo hĩn hē tá mur ke mū nēji?” he mū. ⁵ Kĩ ag tóg ti mĩ: “Belém tá ke nēji, ga tĩ Judéia tá,” he mū. “Topē vĩ tó tĩ ũ vỹ vāsỹ ti to tag rán ja nĩ, ha mē,” he ag tóg. ⁶ “Sĩ ti nĩ, cidade tĩ Belém ti, ga tĩ Judéia tá, he ja tóg nĩ. Ti sĩ nĩ ra tóg cidade mág ag kar káfór kar nĩ, pā'i mág ēn tĩ tá mur kenh ke tugrĩn. Pā'i mág ēn vỹ tĩ ěg povo tĩ Israel kri pā'i mág jēnh ke mū, ũ tĩ Belém tá mur ke mū ēn ti, he ja tóg nĩ, Topē vĩ tĩ rán kĩ nĩ ki,” he ag tóg, professor ag, Herodes mĩ. “Hā kĩ tóg Belém tá mur ke mū, Cristo ti,” he ag tóg, professor ag.

⁷ Kĩ Herodes tóg vēnh péju kĩ fóg ēn ag mré vēmén mū sir, ũ tĩ krīg to estudo mág han mū ēn ag mré. Kĩ tóg ag mĩ: “kurā tĩ hē ki ājag krīg ēn ve vén?” he mū. ⁸ Ag tĩ ti mĩ kurā tó kĩ tóg Belém ra ag jēgnēg mū sir. “Ājag tĩ

tá junjun kĩ ti jāvānh nĩ,” he tóg. “Vēnh kar ki ti jēmēmĩ. Ājag tĩ ti ve kĩ inh mĩ tónh kāmūmĩ. Kĩ sóg ti venh tĩg sór mū gé, sỹ ti mĩ nén ũ há nĩm jé,” he tóg, Herodes ti.

⁹ Ag tĩ pā'i ēn vĩ mē kar kĩ ag tóg mū mū sir, Belém ra. Ag mū ēn ki ag tóg krīg ēn ve mǎn mū gé sir, ag tĩ rā jur ja tá krīg vég mū ēn. Krīg ēn vỹ ag jo tĩ mū. Ag tĩ Belém tá junjun kĩ krīg tóg ũn sĩ nĩgja kri hā sa nĩ sir. ¹⁰ Ag tĩ krīg ēn ve kĩ ag fe tóg mrin ke mū sir. ¹¹ Ĩn kǎra ge kĩ ag tóg ũn sĩ ti vég mū, ti mĩnh fi ke gé. Kĩ ag tóg ti krēm grĩnhgrĩnh ke mū, ti mĩ: “tĩ ā Topē kósín nĩ,” he jé. Kĩ ag tóg sir ti mĩ ājag tũ ti vin mū, ouro ti, ka jēnjo tĩ incenso ti ke gé, ěg tĩ ti pũn kĩ ger há han jafā ēn, kar kĩ ka tĩ mirra jēnjo ke gé, ěg tĩ ti pũn kĩ ger há han jafā ũ vē gé.

¹² Hā ra Topē tóg, ag vēnh pétĩ ki (tóg) ag mĩ: “Herodes mĩ tó tũg nĩ,” he mū sir. Hā kĩ ag tóg ěpỹ ũ jagma mū mū, ěmĩn ũ jagma mū kĩ ag tóg ājag jamā ra vỹnvỹn ke mū sir, rā jur ja ra.

José fag tĩ vēnh pigju

¹³ Ag mū kar kĩ José tóg kejēn Topē tĩ jēnē jafā vég mū, ti vēnh pétĩ kĩ. Kĩ Topē tĩ jēnē jafā tóg ti mĩ: “nĩ ra,” he mū. “Ũn sĩ va tĩg, ga tĩ Egito ra, ti mĩnh fi mré. Herodes vỹ ũn sĩ tag tén sór mū. Hā kĩ vēnh péju kĩ Egito ra tĩg. Kejēn sóg ā mĩ: ha vỹn ké, hēnh ke mū. Egito tá inh vĩ jāvānh nĩ,” he tóg, Topē tĩ jēnē jafā ti, José mĩ. Ti vēnh pétĩ kĩ tóg ti mĩ ke mū.

¹⁴ Kĩ José tóg kuty ēn kā jēgnē kĩ fag tatĩn tĩ mū sir, ga tĩ Egito ra, vēnh péju jé. ¹⁵ Tá tóg nĩ nĩ. Herodes tĩ kejēn ter kĩ tóg tá vỹn ke mū. Hā ra ti tĩg ja tag vỹ rán kĩ nĩ gé. Vāsỹ Topē tóg ā vĩ tó tĩ ũ mĩ: “tag rán ra,” he ja nĩ, hā vỹ: “ga tĩ Egito ra sóg vēnh vĩ jēnē, inh kósín tĩ tá vỹn ke jé,” he mū.

Herodes tỹ gĩr ag kygrẽn

¹⁶ Hã ra Herodes tóg fagrĩnh mỹ fóg ẽn ag jãvãnh ja nĩ, ùn estudo mág han mũ ẽn ag. Vãhã tóg: “ag tỹ inh mỹ tó tũg hỹn,” he mũ. Kĩ ti fe tóg gỹm ke mũ sir. Kĩ tóg ã pã'i ag mỹ: “ha mũ jẽg, Belém ra,” he mũ. “Tá gĩr ag kygrẽn kãn nĩ, ùn grẽ ag, ùn kri prỹg tỹ 2 anos tá krỹg tũ ẽn ag,” he tóg, ag mỹ. Ag mỹ tóg 2 anos tó, fóg ag tỹ ti mỹ: “1 ano kãfór ti nĩ ha, ẽg tỹ ti kri krĩg ve ja ti,” hen kỹ. Kĩ polícia ag tóg gĩr ag kãgtẽn mũ mũ sir.

¹⁷ Hã ra tag tóg rãn kỹ nĩ gé. Vãỹ Topẽ vĩ tó tĩ tóg tag rãn ja nĩgtĩ, ti jiji hã vỹ: Jeremias, he mũ. Ẽn tóg tag rãn ja nĩ, ha mẽ: ¹⁸ “cidade tỹ Ramá tá ẽg tóg vẽnh kygfỹ mẽg mũ, vẽsỹrẽnh mág ke gé. Raquel fi vỹ vẽsỹrẽnh mũ, fi krẽ ag jé. Ag tỹ fi mỹ: fỹ tũg nĩ, he mũ ra fi tóg vẽsỹrẽnh mũ. Fi krẽ ag vỹ tũ' he kãn, hã kỹ fi tóg fỹ mũ, vẽsỹrẽnh mũ,” he ja tóg nĩ, Jeremias ti. Hã ra tóg tag ri ke nĩ, polícia ag tỹ gĩr ag kygrẽn mũ ti.

José fag tỹ Egito tá vỹn ke

¹⁹ Kejẽn Herodes ẽn vỹ ter mũ gé sir, pã'i ti. Kỹ Topẽ tỹ jẽnẽ jafã vỹ José mỹ vẽnh ven mũ, ti vẽnh pėti kỹ. Ga tỹ Egito tá tóg ti mỹ venh ven mũ. Tá fag tóg nỹtĩ nĩ, ga tỹ Egito tá. Tá tóg ti mỹ vẽnh ven mũ, José mỹ, Topẽ tỹ jẽnẽ jafã ti. ²⁰ Kĩ tóg ti mỹ: “nĩ ra,” he mũ. “Gĩr va tĩg, ti mỹnh fi pẻre tĩg gé, ga tỹ Israel ra. Ủ tỹ fi kósin tén sór mũ ẽn vỹ hur ter,” he tóg, Topẽ tỹ jẽnẽ jafã ti, José mỹ.

²¹ Kĩ tóg jẻgnẽ kỹ tĩ mũ sir. Gĩr va tóg tĩ mũ, ti mỹnh fi pẻre tóg tĩ mũ gé. Kỹ fag tóg Israel ag ga ra mũ mũ sir. ²² Tá jun kỹ tóg pã'i mág tãg jyjy jẻmẻg mũ, José ti. Hã ra tóg tỹ Arquelaui nĩ. Ti panh tỹ Herodes ri kẻn tóg tỹ pã'i tỹ rei nĩ, ga tỹ Judéia tá. Kỹ tóg ti kamẻg mũ. Kỹ Topẽ tóg ti vẽnh pėti kỹ ti mỹ: “ga tỹ Judéia tá nĩ mãn sór tũg,” he mũ. Kỹ tóg tũg mãn kỹ ga tỹ Galiléia ra tĩ mũ sir. ²³ Kĩ tóg

cidade tỹ Nazaré tá jamãn mũ sir. Hã ra tóg rãn kỹ nĩ gé, Nazaré ti. Vãỹ Topẽ vĩ tó tĩ ù tóg tag rãn ja nĩ gé, kỹ tóg: “ti to ag tóg: Nazaré tá ke vẻ, henh ke mũ,” he ja tóg nĩ, Topẽ vĩ tỹ rãn kỹ nĩ ki, Jesus to. Hã ra tóg ge nĩ.

João Batista tỹ ag jyvẽn

(Mc 1.1-8; Lc 3.1-18; Jo 1.19-28)

3 Kejẽn João tóg ẻmã tũg ja ra tĩ mũ, ga tỹ Judéia tá ga kẻrẻg ra. João Batista ẽn vẻ. Ga kẻrẻg tá jẻ kỹ tóg ag jyvẽn mũ sir. ² “Ajag jykre tovãnh nĩ, ù tỹ kanhkã tá nĩ ẽn tỹ tỹ ajag pã'i nĩ jẻ,” he tóg, João ti. ³ João ẽn to tóg tag rãn ja nĩ, vãỹ Topẽ vĩ tó tĩ ẽn ti, Isaías he mũ ẽn, ha mẽ. “ẻmã tũg ja tá tóg jẻnh ke mũ, ga kẻrẻg tá,” he ja tóg nĩ. “Tá tóg ag mỹ jamã hár(a) ke mũ sir. “ẻg Senhor kãtĩg ke jo vẻnh jãnhkrikgĩg nĩ,” he jẻ tóg ke mũ. “ẻpry kurẻg ajag tóg tĩ, ẻmĩn kurynh ajag tóg tĩ gé, ajag pã'i mág jun ken kỹ. Kỹ tag ri ke han nĩ, ajag jykre pãno togvãnh nĩ, ẻg Senhor kãtĩg ken jo,” he jẻ tóg ke mũ,” he ja tóg nĩ, Isaías ti, João to.

⁴ Jo João ẽn kur tóg tỹ cavalo pãnĩ sỏr kyki tỹ há nĩ. Nẻn ù fãr tỹ tóg vẻsẻgfĩn ja han tĩ gé. ẻpã hã ko ti tĩ, mỹg mrẻ hã, João ti.

⁵ Kỹ ag tóg ti tá junjun kãn mũ sir, cidade tỹ Jerusalẻm tá kãmũ kỹ, ga tỹ Judéia kar tá kãmũ kỹ, goj tỹ Jordão tá ke kar ag ke gé. João tá ag tóg junjun kãn mũ sir. ⁶ Kỹ tóg ag kygpẻg mũ sir, goj tỹ Jordão ki, ag tỹ: “Topẽ vĩ mranh ja sỏg nĩgtĩ,” hen kỹ.

⁷ Kỹ ù tỹ Fariseu he mũ ag vỹ ti tá junjun mũ gé sir, ù tỹ Saduceu he mũ ag ke gé, pã'i ag. ẻn kỹ ag tóg ti to kãmũ mũ, ti tỹ ag kygpe jẻ. Kỹ tóg ag jyvẽn tar han mũ sir, João ti. “Pỹn ri ke ajag tóg nỹtĩ, ajag jykre pãno tãvĩ nĩn kỹ,” he tóg ag mỹ. “Ủ nỹ ajag mỹ: “Topẽ jũ venh ke tũ ajag nĩ,” he tĩ? ⁸ Ajag jykre si tovãnh nĩ, ajag tỹ ti jũ ve jãvãnh tĩn kỹ. Vẻnh jykre

há han nĩ, ěg tỹ ājag jykre tǎg hǎ ve jé. ⁹Hǎ ra ājag tóg jagně mỹ: “Abraão vỹ tỹ ěg jóg'jóg ve nĩ, kỹ Topě hỹn tóg ěg to jũnh ke tũ nĩ, ěg tỹ tỹ Abraão krě'krě nỹtĩn tugrĩn,” he tĩ. Ke tũ vě hǎ ra. Ājag jykre kórég ěn to ājag tóg jagtar ke mũ, ha vemnĩ. Topě vỹ Abraão krě'krě hỹn han ki kanhró nĩ, pó tag tỹ mỹr, ti tỹ Abraão krě'krě ve sór kỹ, Topě ti. ¹⁰Hǎ ra tóg ājag tỹ tũ' henh ke mũ, ājag tỹ ājag jykre kórég tovǎnh tũ nĩn kỹ. ěg tỹ ka gỹn ri ke tóg nĩ. Ti kaněn vǎnh kỹ ěg tóg ti gỹn tĩ, ti tỹ pĩ han jé. Ri ke han jé tóg ke mũ, Topě ti, ājag tỹ věnh jykre há han sór tũ nĩn kỹ. Kỹ tóg pĩ ki ājag vǎm ke mũ, Topě ti,” he tóg ag mỹ, João ti, Fariseu ag mỹ, Saduceu ag mỹ ke gé.

¹¹Kỹ João tóg věnh kar mỹ: “goj hǎ tỹ sóg ājag kygpég tĩ, ājag tỹ ājag jykre tovǎnh kỹ,” he mũ. “Inh nón tóg kǎtig mũ hǎ ra, Cristo ti. Inh kǎfór ti nĩ. Tỹ sóg ti camarada nĩ jǎvǎnh nĩ, sỹ tỹ ti krēm ke pě jěn kỹ. ěg camarada ag vỹ ěg pěn né gé mǔgtĩ, ěg pěn to ró ti. Sỹ ti mỹ gé tĩg ke vě vě, hǎ ra sóg tỹ ti krēm ke pě nĩ, ti tỹ inh kǎfór nĩn kỹ. ěn hǎ tóg Topě kuprĩg tỹ ājag jagrě han ke mũ. Kỹ tóg tỹ pĩ nĩ ve nĩ. Ti tỹ ājag kygpenh ken hǎ vě,” he tóg, João ti, Jesus to.

¹²“Ti kǎtig vỹ ěg tỹ rǎgró rěn ri ke nĩ. Ti rěn kar kỹ ěg tóg ti fǎr pũn tĩ. Ti kaně hǎ vin han ěg tóg tĩ. Cristo kǎtig ken kỹ tóg ge nĩnh mũ. Ti to há nỹtĩ ag mỹ tóg: “ha kǎmũ jěg,” henh ke mũ. Ti to há nỹtĩ tũ ag vǎm jé tóg ke mũ, pĩ ki, hǎ ra tóg nhyn kenh ke tũ pě nĩ,” he tóg, João ti.

João tỹ Jesus kypé

(Mc 1.9-11; Lc 3.21-22)

¹³Ěn kǎ kejěn Jesus tóg João tá jun mũ gé sir, goj tỹ Jordão tá. Ga tỹ Galiléia tá tóg kǎtĩ mũ. Kỹ tóg João mỹ: “ha inh kypé gé,” he mũ sir. ¹⁴Hǎ ra tóg João mỹ e tĩ, kỹ tóg ti mỹ: “ǎ hǎ tỹ inh kypenh ke vě vě,” he mũ. “Inh mỹ tóg e tĩ, ǎ tỹ inh mỹ: ha inh kypé, henh kỹ,” he tóg mũ,

João ti, Jesus mỹ. ¹⁵Hǎ ra Jesus tóg ti mỹ: “hỹ,” he mũ. Hǎ ra tóg isỹ věnh jykre kuryj han kǎn há tĩ,” he tóg, João mỹ. Kỹ tóg ti kypég mũ sir.

¹⁶Ti tỹ Jesus kype kar kỹ ag tóg goj kǎtǎ kǎpa mũ sir. Kỹ Jesus tóg kanhkǎ nor nĩ ěn vég mũ, ha mẽ, kỹ tóg Topě kuprĩg kǎtère ěn vég mũ. Sórǎg ri ke tóg nĩ, ti kǎtère ti. Jesus kri tóg kǎtère mũ. ¹⁷Kỹ věnh vỹ tóg mẽ há tĩ, kanhkǎ tá, kỹ tóg: “inh kósĩn pĩr věgtĩ,” he mũ. “Inh fe pě věgtĩ,” he tóg, ũ tỹ kanhkǎ tá vỹ mũ ti.

Japo tỹ Jesus krĩn kónǎn sór

(Mc 1.12-13; Lc 4.1-13)

4 Kỹ Topě kuprĩg vỹ Jesus mỹ: “ěmǎ tũgja ra tĩg,” he mũ. Kỹ tóg tĩ mũ. Ěmǎ tũgja tá nĩn kỹ Japo vỹ ti tỹ ǎ jóg vỹ mranh han sór mũ, hǎ ra Jesus tóg ke jǎvǎnh nĩ. ²Kurǎ tỹ 40 (ke) han tóg, ěmǎ tũgja tá nĩn ki. Kỹ tóg jěg tũ nĩ, kurǎ tỹ 40 (ke) ěn ki, kuty mré ke gé. Kar kỹ tóg sir kókĩr mũ, vějěn tũ nĩn kỹ. ³Kỹ Japo tóg ti to kǎtĩ mũ sir, ũ tỹ ěg tỹ Topě vỹ mranh han sór mũ ěn ti. Kỹ tóg Jesus mỹ: “Topě kósĩn vỹ tỹ ǎ nĩ,” he mũ. “ǎ tỹ tỹ Topě kósĩn nĩn kỹ pó tag tỹ ěmĩ han, ǎ tỹ kon jé,” he tóg ti mỹ, Nén-Kórég ti, Jesus mỹ. ⁴Kỹ Jesus tóg ti mỹ: “hǎ ra tag tóg rǎn kỹ nĩ, ha mẽ,” he mũ. “Ěg pi(jé) ěmĩ tǎvĩ jaměn kỹ rĩnrĩr mǔgtĩ, hǎ ra ěg tóg Topě vỹ hǎ jaměn kỹ rĩnrĩr mǔgtĩ, he tóg, Topě vỹ tỹ rǎn kỹ nĩ ki. Kỹ tóg isỹ ti vỹ mranh jǎvǎnh tĩ, ěmĩ to,” he tóg, Jesus ti, Nén-Kórég mỹ.

⁵Kỹ Japo vỹ ti pére tĩ mũ, Jerusalém ra, cidade mǎg ěn ra. Tá ag tóg Topě jo ĩn kri nỹtĩnh mũ mũ. Hǎ ra kǎgnó tóg tá nĩ, Topě jo ĩn mã tá. ⁶Kỹ Japo tóg Jesus mỹ: “ǎ hǎ ne tóg tỹ Topě kósĩn nĩ,” he mũ. “Ha kema ki hũm,” he tóg. “Topě vỹ ki tag tóg rǎn kỹ nĩ, hǎ vỹ: ǎ tỹ jěgně jafǎ ag mỹ tóg tónh mũ, Topě ti, kỹ ag tóg ǎ jỹ nĩgǎn mũ, he mũ. Kỹ ǎ tóg rỹj ke tũ nĩ. ǎ pěn vỹ rỹj ke tũ nĩ, ag tỹ ǎ ki rĩr kỹ, he

tóg, Topê vî tỹ rán kỹ nĩ ki. Kỹ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topê kósín nĩn kỹ,” he tóg, Nén-Kórég ti, Jesus mỹ. ⁷ Kỹ Jesus tóg ti mỹ: “kỹ tag vỹ rán kỹ nĩ gé, ha mẽ,” he mũ. “Topê mỹ: ã mỹ ã tỹ tóg ja ên han mũ vỹ? he tũg nĩ, he tóg mũ gé, Topê vî tỹ rán kỹ nĩ ki. Hã kỹ sóg ti tỹ inh mỹ nén to: “han ra,” he mũ ên hã han tĩ, kỹ sóg hũm ke tũ nĩ,” he tóg, Jesus ti, Nén-Kórég mỹ.

⁸ Kỹ Japo tóg ti mré tĩg mĩn mũ. Pãnónh téj ra ag tóg mũ mũ sir. Kỹ Japo tóg ti mỹ ga kar ven kãn mũ, ga kri mũ kar ag ke gé. Ti sĩnvĩ kar ên ven tóg ti mỹ. ⁹ Kỹ tóg ti mỹ ke mũ. “Isũ vễ, tag kar ti,” he tóg. “Hã ra sóg ã mỹ tovãnh kãn sór mũ, ã tỹ ã jakrĩ tỹ krỹ’ hen kỹ, inh krēm, inh mỹ: Topê vỹ tỹ ã nĩ, he jé,” he tóg, Nén-Kórég ti, Jesus mỹ. ¹⁰ Kỹ Jesus tóg ti mỹ: “ha tĩg, Satanás,” he mũ. “Êg pã’i tỹ Topê hã krēm êg tóg êg jakrĩ tỹ krỹ’ he tĩ, ti hã to êg tóg: Topê vễ, he tĩ, hã kỹ tóg rán kỹ nĩ, Topê vî tỹ rán kỹ nĩ ki,” he tóg, Jesus ti, Nén-Kórég mỹ.

¹¹ Kỹ Japo vỹ tóg sir tĩ mũ, ti tovãnh kỹ. Kỹ Topê tỹ jěgně jafã ag tóg sir ti tá junjun mũ, Jesus ki rĩr jé. Ā jóg vĩ mranh ja tũ tóg nĩ.

Jesus tỹ Galiléia tá Topê vĩ tó

(Mc 1.14-15; Lc 4.14-15)

¹² Kejẽn ag tóg Joã sếg mũ sir, kỹ Jesus tóg mẽg mũ, ag tỹ ti se ti. Kỹ tóg ga tỹ Galiléia ra tĩ mũ, vễnh pếju jé. ¹³ Cidade tỹ Nazaré tá kãkutě kỹ tóg cidade tỹ Cafarnaum ra tĩ mũ, tá nĩ jé, goj nig tá, Zebulom ag jamã tá, Naftali ag jamã tá. ¹⁴ Hã ra tag tóg rán kỹ nĩ gé. Vãşỹ Topê vĩ tó tĩ tóg tag rán ja nĩ, Isaiás ti, kỹ tóg: ¹⁵ “Zebulom ag jamã tá ti nĩnh mũ, Naftali ag jamã tá, goj nig tá, goj tỹ Jordão mã tá. Fóg ag jamã tá ti nĩnh mũ, Israel tũ ag jamã tá, ù tỹ Topê ki kagtĩg ag jamã tá, goj nig tỹ Galiléia fyr ki. ¹⁶ Tá ag tóg Topê ki kagtĩg nỹtĩ, hã kỹ tóg tá ag kri kuty ri ke nĩ. Ti tỹ tá jun kỹ tóg ag kri

kurãg ên ri ke han mũ, ag kanhrãn kỹ. Ag kãgter ke vễ vễ, hã ra tóg ag kanhrãn mũ ag krenkren jé,” he tóg, Topê vĩ rán ki. Kỹ tóg ge nĩ, Jesus tỹ tá nĩn kỹ. ¹⁷ Ga ên tá nĩ kỹ tóg ag jyvẽn mũ, kỹ tóg ag mỹ: “ãjag jykre si tovãnh ra,” he mũ, “ãjag tỹ ùri ù tỹ kanhkã tá nĩ ên tỹ tỹ êg pã’i nĩ ve jé,” he tóg, Jesus ti. Ti tỹ ù tỹ ki kagtĩg ag mỹ Topê vĩ tón hã vễ.

Jesus tỹ ã mré mũ tĩ ag jé prěr

(Mc 1.16-20; Lc 5.1-11)

¹⁸ Kỹ tóg kejẽn goj nig tỹ Galiléia ên fyr jagma tĩ mũ. Kỹ tóg tá ùn rếgre ag vếg mũ. Û vỹ tỹ Simão nĩ, ag tỹ ù to: Pedro, he mũ tag ti. Kỹ ti jãvy vỹ tỹ André nĩ. Kur tỹ pirã kugmĩ jafã tỹ ag tóg goj kãki fón mũ, pirã kugmĩ jé. Ag rãnhraj vễ, pirã kugmĩg tĩ ag vễ. ¹⁹ Kỹ Jesus tóg ag ve kỹ (tóg) ag to tĩ mũ sir. Kỹ tóg ag mré vĩ mũ. “Inh mré kãmũjěg,” he tóg mũ ag mỹ. “Pirã kugmĩ há ãjag nỹtĩ. Ājag kanhrãn jé sóg ke mũ, ãjag tỹ êprã ke ag tỹ inh ki ge han jé,” he tóg ag mỹ, Jesus ti. ²⁰ Kỹ ag tóg vếşymér ãjag tỹ nén tovãnh kỹ mũ mũ, ti mré, Pedro ti, André ti ke gé.

²¹ Kỹ ag tóg mũ mũ, goj fyr jagma. Ag mũ sĩ han mũ ra Jesus tóg ùn rếgre ù ag ve mĩn mũ gé. Tỹ ti Tiago nĩ, Zebedeu kósín, kỹ ti jãvy vỹ tỹ Joã nĩ gé. Canoa kãki ag nỹtĩ, kur tỹ pirã kugmĩ jafã ki ag tóg han nỹtĩ nĩ. Ag panh vỹ ag mré nĩ nĩ. Kỹ Jesus tóg ag jé prěr mũ sir. ²² Kỹ ag tóg vếşymér (ag tóg) ãjag tỹ nén tovãnh kỹ ti to kãmũ mũ, canoa tovãnh kỹ, ãjag panh ti tovãnh kỹ ke gé. Jesus mré ag tóg mũ mũ, Tiago ti, ti jãvy tỹ Joã ti ke gé.

Jesus tỹ ag tỹ há’ he

(Lc 6.17-19)

²³ Kỹ Jesus tóg ga tỹ Galiléia kar mĩ tĩ mũ sir, ag mré. Judeu ag vễnh kanhrãn jafã krēm tóg ag kanhrãn mũ. Ag mỹ tóg Topê vĩ sér tó mũ, ù tỹ kanhkã tá nĩ tỹ tỹ êg pã’i nĩ tĩ. Ûn kagyga kar ag hyn han

tóg, fag kar ke gé, gír kar ke gé. ²⁴Hã ký ti kãme tóg vènh kar kri rûm mû sir, ga tỹ Síría tá ke kar kri. Ký ag tóg sir ùn kagyga ag tatĩn kãmũ mû, ti to, vènh kaga vènhmỹ han mû ag mré hã, ký tóg ag tỹ há' he kãn mû sir. Vènh jagrê kórég ag pan kãn tóg mû gé. Û tỹ ter tĩ han mû ag tỹ hághá' he tóg mû gé, ùn grĩngrĩn ký nỹtĩ ag tỹ ke gé, fag kar tỹ ke gé. ²⁵Hã ký ùn tỹ hèn ri ke ag tóg ti mré mû mû sir. Û ag tóg ga tỹ Galiléia tá kãmũ mû, ký ù ag tóg cidade tỹ Decápolis tá kãmũ mû gé, cidade tỹ Jerusalém tá ke gé, ga tỹ Judéia tá ke gé, goj tỹ Jordão mã tá ke gé.

Jesus tỹ ag kanhrãn

(Lc 6.20-23)

5 Ûn e ag tỹ Jesus venh kãmũ ký tóg ag mré pãnónh ra tãpřy mû. Tá tóg nĩ mû, ký ti mré mû tĩ ag tóg ti mré nĩgnĩ mû, ti rã hã. ²Kỹ tóg sir ag kanhrãn mû, ag mỹ kãmén ký. Ký tóg ag mỹ tag tó mû, ha mẽ.

³“Topê vỹ ājag ve há han mû, ājag tỹ: kórég inh nĩ, hen ký. Sỹ Topê kupřĩg tỹ jagrẽn ký nĩ tũ nĩ ra sóg tỹ ùn kórég ninh mû vè, hemnĩ. Ký Topê vỹ ājag ve há han mû. Ký ājag tóg ti tỹ tỹ ěg pã'i nĩ venh ke mû, kanhkã tá,” he tóg, Jesus ti.

⁴“Topê vỹ ājag ve há han mû, ājag fỹn ký. Ký tóg ājag fỹ ěn tỹ tũ' henh ke mû,” he tóg.

⁵“Topê vỹ ājag ve há han mû, ājag tỹ vènh kar mỹ komẽr hã vĩn ký. Ký ājag tóg ga kar kri tỹ pã'i nỹtĩn ke mû, ùn mág pẽ,” he tóg.

⁶“Topê vỹ ājag ve há han mû, ājag tỹ vènh jykře kuryj ve sór nỹtĩn ký, ti tỹ ājag mỹ ājag kókĩr ri ke tĩn ký, ājag tỹ vènh jykře kuryj ve sór ninh ký. Ký ājag tóg venh ke mû,” he tóg.

⁷“Topê vỹ ājag ve há han mû, ājag tỹ jagnẽ jagãgtãn ký. Ký Topê vỹ ājag jagãgtãn ke mû gé,” he tóg.

⁸“Topê vỹ ājag ve há han mû, ājag jãnhkři nỹtĩn ký. Ký ājag tóg Topê venh mû, ājag jãnhkři nỹtĩn ký,” he tóg.

⁹“Topê vỹ ājag ve há han mû, ājag tỹ jagnẽ křĩ tỹ kãnhvy' hen ký. Ký Topê tóg ājag to: “inh křẽ ag vè,” henh ke mû, ājag tỹ jagnẽ křĩ tỹ kãnhvy' hen ký,” he tóg.

¹⁰“Topê vỹ ājag ve há han mû, ag tỹ vènh jykře kuryj to ājag vóg kónãn mû ra. Topê vỹ tỹ kanhkã tá ājag pã'i ninh mû, ag tỹ ti tugřĩn ājag vóg kónãn mû ra,” he tóg.

¹¹“Topê vỹ ājag ve há han mû, ag tỹ isugřĩn ājag mỹ vĩ kónãn mû ra, ag tỹ ājag vóg kónãn mû ra. Ag tỹ ón ký ājag to vĩ vĩ he ký tóg há tĩ, ag tỹ ón ký ājag jykře pãno tó mû ra, isugřĩn. ¹²Mỹ sér nỹtĩmnĩ, ājag fe tỹ há' hemnĩ, ag tỹ ón ký ājag kato vĩn ký. Kanhkã tá ājag tóg nén kar há venh ke mû, vènh kato. Ge ja ag tóg nĩgtĩ vãsỹ, Topê vĩ tó tĩ ag mỹ, ājag jo ke ag mỹ. Ag ri kén ājag tóg tag venh ke mû,” he tóg, Jesus ti.

Sa to comparação

(Mc 9.50; Lc 14.34-35)

¹³“Sa ri ke ājag nỹtĩ, ājag tỹ ga kri mũn ký. Sa kãhór ninh ký ěg tóg ti tỹ sa há han mãn ki kagtĩg nỹtĩ. Kórég ti nĩgtĩ, ti kãhór ninh ký. Ký ěg tóg ti vãm tĩ sir, ký tóg tũ' he tĩ sir,” he tóg, Jesus ti. Ti tỹ ěg tỹ ti jykře továnh ke tũ kãmén hã vè.

Jẽngřẽ kãme

(Mc 4.21-23; Lc 8.16-17)

¹⁴“Ga kri mũn ký ājag tóg jẽngřẽ ri ke nỹtĩ, ājag tỹ vènh jykře há han ký, ag tỹ ājag ki ve jé, Topê jykře há ti. Cidade mág vỹ ve há tĩgtĩ, kuvar há tá jẽ ký, ti tỹ pãnónh kri nỹn ký. Ti pi(jé) vènh pėju ký nỹ'. ¹⁵Ri ke ti nĩ, néj gru ti. ěg tỹ ti grug ký ěg pi(jé) lata krẽm ti fẽg tĩ'. Ti fẽg jafã kri ěg tóg ti fẽg tĩ. Ký vènh kar tóg ěn vėg tĩ sir, ĩn kãtã nỹtĩ kar ěn ti. ¹⁶Gemnĩ, néj gru ri ke nỹtĩmnĩ. Topê jykře han nĩ, vènh kar tỹ ājag ki ve jé, ājag jykře há

ti. Hã k̄y ag tóg ěg jóg t̄y Topě m̄y v̄i há han m̄ũ, ěg jóg t̄y kanhkā tá nĩ ěn m̄y,” he tóg, Jesus ti.

Topě t̄y Moisés m̄y v̄enh jykre n̄v

¹⁷ “Ājag h̄yn iso: ti hã ne tóg Moisés t̄y ěg m̄y n̄n tó ja t̄y t̄ũ' he sór m̄ũ', he m̄ũ, ti hã ne tóg Topě jykre ěn t̄y t̄ũ' he sór m̄ũ', he ājag h̄yn t̄i. Vās̄y Topě v̄i tó ti ag v̄y ěg m̄y tó ja n̄gt̄i, Topě jykre ěn ti, hã ra tóg t̄y t̄ũ' he sór m̄ũ', he ājag h̄yn t̄i iso. Hã t̄ũ v̄e. S̄y ki króm k̄an sór v̄e, Moisés t̄y n̄n tó ja ěn ki, s̄y ki króm k̄y sóg t̄y ājag kanhr̄anr̄an k̄an ke m̄ũ,” he tóg. ¹⁸ “Topě v̄y ā jykre ěn t̄y t̄ũ' h̄enh ke t̄ũ nĩ, ha m̄e. Ga t̄y ver kanhkā mr̄e n̄yn k̄y tóg ā jykre t̄y t̄ũ' h̄enh ke t̄ũ nĩ, ga t̄y ver t̄ũ' he t̄ũ n̄n k̄y. S̄y ki króm k̄an ke v̄e, k̄y tóg ki krov k̄an k̄y n̄ynh m̄ũ, Topě jykre kar ti m̄ȳr, ha m̄e,” he tóg. ¹⁹ “K̄y ājag t̄y t̄y t̄ũ' he sór k̄y tóg kórég n̄y, ājag t̄y ti v̄i pir t̄y t̄ũ' he sór k̄y. Ājag t̄y ti v̄i pir to ũ m̄y: han t̄ũg nĩ, h̄en k̄y ājag tóg t̄y ũn k̄asir n̄ȳt̄inh m̄ũ, v̄enh kar krēm, kanhkā ki. Ājag t̄y hã ra han k̄an k̄y ājag tóg t̄y ũn mág n̄ȳt̄inh m̄ũ, ājag t̄y v̄enh kar m̄y: “ki króm k̄an sór m̄nĩ,” h̄en k̄y. K̄y ājag tóg t̄y ũn mág n̄ȳt̄inh m̄ũ, kanhkā tá,” he tóg, Jesus ti.

²⁰ “Fariseu ag ri ke n̄ȳt̄i sór t̄ũg nĩ. Topě v̄i to professor ag ri ke n̄ȳt̄i sór t̄ũg nĩ gé. Ón k̄y ag tóg Topě v̄i ki króm t̄i, hã ra ag tóg ki króm há han t̄ũ n̄gt̄i. Ag jykre pi(jé) kuryj n̄y'. Ājag t̄y kanhkā ve sór n̄ȳt̄in k̄y v̄enh jykre kuryj han nĩ,” he tóg, Jesus ti.

Ěg t̄y jagnē to há n̄ȳt̄inh ke to v̄enh jykre

²¹ “Topě t̄y vās̄y ěg si ag jyv̄en m̄e ājag huri, hã v̄y: ũ t̄en t̄ũg nĩ, he m̄ũ. Ā t̄y ũ t̄en k̄y ag tóg ā senh ke m̄ũ, ā t̄y ti mr̄e ter jé, he ja tóg nĩ, Topě v̄i t̄y rán k̄y nĩ ki. ²² S̄y ũri ājag jyv̄en hã v̄e, ha m̄e. Ā régre to ā fe t̄y ḡym ke t̄ũg nĩ. Ā t̄y ā régre to ā fe t̄y ḡym ke k̄y tóg ā t̄y ti t̄en ri ke nĩ. K̄y

tóg inh m̄y há t̄inh m̄ũ, ag t̄y tag to ā se k̄y. K̄y ā régre m̄y v̄i kónān t̄ũg nĩ gé. Ā t̄y ā régre m̄y v̄i kónān k̄y tóg inh m̄y há t̄inh m̄ũ, ag t̄y tag to p̄ā'i mág m̄y ā ven k̄y. K̄y ā régre m̄y f̄éf̄en t̄ũg nĩ gé. Ā t̄y ā régre m̄y f̄éf̄en k̄y ā tóg n̄ũgme ki kut̄enh ke m̄ũ, inferno ki, p̄i ěn ki,” he tóg, Jesus ti.

²³ “Tag to jykren nĩ, ā t̄y Topě m̄y n̄n ũ p̄un sór k̄y. Topě jo ĩn krēm. Ā t̄y tá j̄en k̄y ā régre kar m̄i ěkr̄en nĩ. “Ũ m̄y iso jykren kónān t̄ũ nĩ v̄y?” he jé ā tóg ke m̄ũ. “Inh m̄y ũ j̄ũ han t̄ũ nĩ v̄y?” he jé ā tóg ke m̄ũ. ²⁴ Ũ t̄y ā to jykren kónān k̄y ti v̄enh t̄ũg nĩ ver, Topě m̄y n̄n ũ p̄un tovānh nĩ ver. Ā régre ěn m̄y: “inh m̄y v̄enh p̄āte fón nĩ,” h̄em̄nĩ ver. Kar k̄y Topě m̄y n̄n ũ p̄un sór m̄nĩ sir, ā t̄y ā régre mr̄e v̄i kar k̄y,” he tóg, Jesus ti.

²⁵ “Kej̄en ā tóg ā mr̄e ke ũ m̄y n̄v(e) j̄e, k̄y tóg p̄ā'i ag m̄y ā k̄ām̄en t̄ũg ke m̄ũ. Ti t̄y p̄ā'i ag m̄y tónh t̄ũg ke m̄ũ ěn ti to hã ti mr̄e v̄im̄nĩ, ti m̄y: “kajām̄ jé sóg ke m̄ũ,” h̄em̄nĩ. Ke t̄ũ nĩ (m̄ũ) ra p̄ā'i v̄y ā jykre p̄āno v̄enh ke m̄ũ, k̄y tóg pol̄icia m̄y: “ti se ra,” h̄enh ke m̄ũ sir, k̄y tóg sir ā senh m̄ũ. ²⁶ Ha m̄e, ki hã sóg tó m̄ũ. Tá ā k̄ānhmar k̄akut̄ē m̄an ke t̄ũ nĩ. Ā t̄y kajām̄ k̄an kar ā tóg k̄akut̄ē m̄an m̄ũ, tá, h̄en ri ke m̄un,” he tóg, Jesus ti.

Ā pr̄ũ t̄ũ fi mr̄e n̄y t̄ũ to v̄enh jykre

²⁷ “Topě t̄y ěg si ag jyv̄en ũ tag m̄e ājag huri, ke gé, hã v̄y: “ā pr̄ũ t̄ũ fi mr̄e n̄y t̄ũg nĩ,” he m̄ũ. ²⁸ S̄y ũri ājag jyv̄en hã v̄e, ha m̄e: ā t̄y ũn t̄ȳt̄á ũ fi ki v̄e'ĩ k̄y tóg ā t̄y fi mr̄e n̄y s̄y han ěn ri ke nĩ sir, ā t̄y fi ki v̄e'ĩ m̄ũ ti. Ā t̄y ũn t̄ȳt̄á ũ fi mr̄e n̄r sór k̄y tóg ā t̄y fi mr̄e n̄r ri ke nĩ sir, ā t̄y fi to ěn m̄ũ ti. Ke t̄ũg nĩ. ²⁹ Ā t̄y n̄n ũ ki v̄e'ĩ tugr̄in Topě v̄i mranh k̄y ā kanē t̄y nám kem̄nĩ, ā t̄y ki v̄e'ĩ jagy han m̄an t̄ũ nĩ jé. Ā kyvó n̄n k̄y tóg jagy t̄i gé v̄e v̄e. Ā t̄y hã ra n̄ũgme ki kut̄ē k̄y tóg jagy k̄āfór nĩ. Jagy p̄e ti nĩ, ā t̄y inferno ki kut̄ē ti. K̄y tag hã ve sór t̄ũg nĩ. ³⁰ Ā t̄y ā n̄ḡe t̄y n̄n

ũ kórég han kŷ ã nĩgnó kym nĩ, ã tŷ ke mǎn tũ nĩ jé. Ā nĩgnó pir nĩn kŷ tóg jagy tĩ gé. Ā tŷ hã ra nũgme ki kutē kŷ tóg jagy kǎfór nĩ sir, kŷ tag hã kamēg nĩ,” he tóg, Jesus ti.

Ā prũ fón tũ to vènh jykre

(Mt 19.9; Mc 10.11-12; Lc 16.18)

³¹ “Tope tŷ ěg si ag jyvèn ũ hã vŷ nŷ gé, hã vŷ: “ã tŷ ã prũ fi fón sór nĩn kŷ tóg há tũ nŷ,” he mũ. “Ā tŷ ge ra fi fón sór nĩn kŷ fi mŷ vènh rán kŷ nĩm nĩ, fi tŷ vènh rán ma tũg jé,” he ja tóg nĩ. ³² Sŷ ũri ājag jyvèn hã vè, ha mē: ājag prũ fón tũg nĩ. Ā tŷ fi fón kŷ fi tŷ ũ mré nŷ mǎn kŷ fi tóg ã tugrĩn Topē vĩ mranh mũ sir, ã tŷ tŷ fi mén pē ra. Fi tŷ ã jãvo vēsóg ki ũ mré nŷ ja nĩn kŷ tóg há sĩ nŷ, ã tŷ fi mŷ: ha tũg, hen kŷ. Kŷ fi mén tŷ fi fón kŷ fi tŷ prũg sór tũg nĩ gé. Ā prũ tũ fi vè, fi mén tŷ fi fón ja nĩn kŷ,” he tóg, Jesus ti.

Jagnē to ón ke tũ to vènh jykre

³³ “Vāsŷ Topē tŷ ěg si ag jyvèn ũ tag mē ājag tóg huri ke gé, hã vŷ: “jagnē mŷ ón tũg nĩ,” he mũ. “Ā tŷ ũ mŷ: Topē vŷ ki kanhró nĩ, hen kŷ ti mŷ ón sór tũg nĩ. Kŷ hã han nĩ gé, ã tŷ Topē mŷ: tag hã han jé sóg ke mũ, hen kŷ. Ón kŷ vĩ tũg nĩ,” he ja tóg nĩ, ěg si ag mŷ, Topē ti. ³⁴ Sŷ ũri ājag jyvèn hã vè, ha mē: “Topē vŷ ki kanhró nĩ,” he sór tũg nĩ, ón kŷ. “Ũ tŷ kanhkã tá nĩ ěn vŷ ki kanhró nĩ,” he sór tũg nĩ gé, ón kŷ. Topē nĩgia vè, kanhkã tá, kŷ ón kŷ tag tó sór tũg nĩ. ³⁵ Kŷ: “ũ tŷ ga kri ke ěn vŷ ki kanhró nĩ,” he tũg nĩ gé. Topē tũ vè, ga ti, hã kŷ ón kŷ tag tó sór tũg nĩ. Kŷ: “ũ tŷ Jerusalém tá ke ag ki rĩr tĩ ěn vŷ ki kanhró nĩ,” he tũg nĩ gé. ěg pǎi mág tũ vè mŷr, Jerusalém ti, hã kŷ ón kŷ tag tó sór tũg nĩ. ³⁶ Kŷ: “ũ tŷ inh krĩ han mũ ěn vŷ ki kanhró nĩ,” he tũg nĩ gé. Ā tŷ ã gǎnh kuprig sór mũ ra ã tóg ã tŷ nén tŷ ã gǎnh kuprig ke mũ ěn ki kagtĩg nĩ, ã tŷ ã gǎnh sán sór mũ ra ã tóg ã tŷ nén tŷ sán ke mũ ěn ki kagtĩg

nĩ gé. Hã kŷ ón kŷ tag tó sór tũg nĩ gé. ³⁷ Ki hã tómni, jagnē mŷ, ón sór tũg nĩ. Ón kŷ Topē jiji tó sór tũg nĩ gé. Ũ tŷ ã mŷ ki hã tó kŷ: hŷ, hemnĩ. Ti tŷ ki hã ke tũ nĩn kŷ: vó, hemnĩ gé. Ā tŷ han ke nĩn kŷ: hej, hemnĩ. Ā tŷ han ke tũ nĩn kŷ: nejé, hemnĩ. Ki hã tómni, jagnē mŷ. Ā tŷ ón sór kŷ ã tóg Nén-Kórég jykre hã han ke mũ. Ke tũg nĩ,” he tóg, Jesus ti.

Ěg tŷ vènh kajām ke tũ to vènh jykre

(Lc 6.29-30)

³⁸ “Topē tŷ ěg si ag jyvèn ũ tag mē ājag huri, hã vŷ: “ũ tŷ ã kanē pir ki tǎnh kŷ vènh kato ti kanē pir ũ ki tǎnh nĩ gé,” he ja tóg nĩ. “Ũ tŷ ã jã pir ki tǎnh kŷ mranh kŷ vènh kato ti jã pir ki tǎnh kŷ mranh nĩ gé. Pátén tũg nĩ,” he ja tóg nĩ, Topē ti. ³⁹ Sŷ ũri ājag jyvèn mũn hã vè, ha mē: ũ tŷ ã vóg mũ ra ti vóg tũg nĩ. Ti tŷ ã jamē ki tǎnh kŷ ti mŷ ã jamē ũ ti ven nĩ, ti tŷ ã mŷ ki tǎnh jé gé. ⁴⁰ Ti tŷ ã palitó mǎn sór kŷ ti mŷ ã camisa mré nĩm nĩ gé. ⁴¹ Ti tŷ ã mŷ: “mũ nŷ, tag tá, kakó ja tá inh fón nĩ,” hen kŷ ti mré tũg nĩ, hã ra ti mŷ: “kór há tá inh ã fón tũg mũ ha,” hemnĩ. ⁴² Ti tŷ ã mŷ nén ũ to: “inh mŷ nĩm,” hen kŷ ti mŷ nĩm nĩ. Ti tŷ ã mŷ: “inh mŷ prestar hemnĩ,” hen kŷ ti mŷ: vó, he tũg nĩ,” he tóg, Jesus ti.

Ěg tŷ ěg kato vāsǎn mũ ag tó há nŷtĩnh ke

(Lc 6.27-28, 32-36)

⁴³ “Topē tŷ ěg si ag jyvèn ũ mē ājag huri, hã vŷ: “ã mré ke ag to há nĩmnĩ, kŷ ũ tŷ ã kato vāsǎnsǎn mũ ag to jũ nĩmnĩ gé,” he ja tóg nĩ, Topē ti. ⁴⁴ Isŷ ũri ājag jyvèn hã vè, ha mē: ũ tŷ ājag kato vāsǎnsǎn mũ ag to há nŷtĩmnĩ, ũ tŷ ājag vóg kónǎn mũ ag to Topē mré vĩmnĩ. ⁴⁵ Hã ki ājag tóg tŷ Topē krē nŷtĩ, ti ri ke han kŷ, ājag jóg tŷ kanhkã tá nĩ ěn ri ke han kŷ. Ti hã ne tóg rã han', ti tŷ vènh kar kri jēngrēg kŷ san jé, ũn jykre kuryj ag kri, ũn jykre pǎno ag kri ke gé. Ta han ti

ke gé, ti tỹ vênh kar há han jé, ùn jykre kuryj ag, ùn jykre pāno ag ke gé. Ver tóg vênh kar to há nĩ, Topẽ ti,” he tóg, Jesus ti.

⁴⁶ “Ājag mré ke ù ag tóg ājag to há nỹtĩ. Ājag tỹ tag ag hā to há nỹtĩn kỹ tóg tỹ nén ù tũ tĩ ver. Ùn jykre kórég ag vỹ ge nỹtĩgtĩ gé, governo mỹ jānkamy mǎg tĩ ag. Û tỹ ājag to há nỹtĩ ag hā to ag tóg há nỹtĩ, vênh kato. Há ti nĩ, hā ra tóg tỹ nén ù tũ nĩ ver. ⁴⁷ Kỹ ājag tỹ ājag mré ke ag hā mỹ: ā mỹ há? hen kỹ tóg tỹ nén ù tũ nĩ gé ver. Û tỹ Topẽ vĩ ki kagtĩg ag vỹ ge nỹtĩgtĩ gé. Ājag mré ke ag hā mỹ ag tóg: ā mỹ há? he tĩ gé, hā ra tóg tỹ nén ù tũ nĩ ver. ⁴⁸ Hā kỹ vênh kar to vênh jykre kuryj han kỹ nỹtĩmnĩ, ù tỹ ājag kato vāsānsān mũ ag mré hā, ěg jóg tỹ kanhkā tá nĩ ěn ri ke han nĩ. Ti hā ne tóg vênh kar to vênh jykre kuryj han kỹ nĩ nĩ. Ti ri ke han nĩ,” he tóg, Jesus ti.

Ēg tỹ ù jagāgtān ke to vênh jykre

6 “Kỹ ājag tỹ Topẽ jykre han sór kỹ ù tỹ vênh jykre pāno han mũ ag jykre ri ke han tũg nĩ. Ón kỹ ag tóg vênh kar rĩnve Topẽ jykre han sór tĩ, vênh kar tỹ ag ve jé, ag tỹ Topẽ jykre han mũ ěn ti. Kar kỹ ag tóg hā ra hā tũ han tĩ sir. Kỹ ag ri ke han tũg nĩ, ke tũ nĩ (mũ) ra ěg jóg tỹ kanhkā tá nĩ ěn vỹ tóg ājag mỹ ven ke tũ nĩ, ājag tỹ ěg jóg jykre han mũ ěn kaja ti,” he tóg. ² “Hā kỹ ājag tỹ ùn jagāgtar ag jagāgtān kỹ ù mỹ: “ag jagāgtān inh tĩ,” he tũg nĩ. Û tỹ vênh jykre régre han mũ ag jykre ri ke han tũg nĩ. Ag tỹ ón kỹ ù jagāgtān kỹ ag tóg ěpry jagma mũ kỹ (ag tóg) vênh kar mỹ: “ag jagāgtān inh tĩ,” he tĩ. Ēg vênh kanhrān jafā jo ĩn krēm ag tóg tag tó tĩ gé. Ag tỹ ěprā ke ag tỹ ag mỹ vĩ há han ve sór vẽ, hā jé ag tóg ón kỹ ùn jagtar ag jagāgtān tĩ. Ag ganho hā vẽ, ěprā ke ag tỹ ag mỹ vênh vĩ há tó mũ ěn ti. Kanhkā tá ag ganho ù ve mǎn ke tũ nĩ ha. Ājag mỹ sóg ki hā tó mũ, ha mẽ,” he tóg, Jesus ti.

³ “Ag ri ke han tũg nĩ. Ûn jagtar ag jagāgtān nĩ. Û mỹ tó tũg nĩ, ājag tỹ ùn jagāgtān mũ ěn ti, ājag mré ke fag mỹ tó tũg nĩ gé. ⁴ Kỹ ājag tỹ ag jagāgtān kỹ ěg jóg tỹ kanhkā tá nĩ ěn tóg ājag vэг mũ sir, kỹ tóg ājag mỹ nĩm ke mũ sir, ājag ganho ti. Ēg tỹ vênh vatánh tá nén han mũ ěn ve kǎn tóg tĩ (mỹr), Topẽ ti,” he tóg, Jesus ti.

Ēg tỹ Topẽ mré vēmén to vênh jykre (Lc 11.2-4)

⁵ “Kỹ ājag tỹ Topẽ mré vēmén kỹ ù tỹ vênh jykre régre han mũ ěn ag jykre ri ke han tũg nĩ gé. Ag tỹ ón kỹ Topẽ mré vĩ kỹ ag tóg ěg vênh kanhrān jafā jo ĩn kǎki jěgĩ kỹ nỹtĩ, ke tũ nĩ kỹ ěmĩn kri, ĩn to hā. Kỹ vênh kar vỹ ag tỹ Topẽ mré vĩ mũ tag vэг mũ sir. Kanhkā tá ag tóg ganho ù ve mǎn ke tũ nĩ ha. Ājag mỹ sóg ki hā tó mũ, ha mẽ. ⁶ Ag jǎvo ājag tỹ Topẽ mré vēmén kỹ ājag ĩn kǎra gemnĩ. Kỹ jānkā nĩfénh nĩ. Kỹ tá Topẽ mré vĩmnĩ sir, ěg jóg mré, ěg tỹ ùn vэг tũ ěn mré. Kỹ tóg kanhkā tá ājag mỹ nĩm ke mũ, ājag ganho ti. Ēg tỹ vênh vatánh tá nén han mũ ěn vэг tóg tĩ (mỹr), Topẽ ti,” he tóg, Jesus ti.

⁷ “Ājag tỹ ti mré vēmén kỹ fagrĩn mỹ ti mré vēmén mǎg han tũg nĩ. Û tỹ Topẽ vĩ ki kagtĩg ag ri ke han tũg nĩ. Ājag jǎn-jǎn kỹ ag tóg ón kỹ vĩ mǎg han tĩ. “Ēg tỹ vĩ mǎg han kỹ ti hỹn ěg vĩ mềg mũ,” he ag tóg tĩ, ón kỹ. ⁸ Ag ri ke han tũg nĩ. Ēg jóg vỹ nén kar ki kanhró nĩ, ājag tỹ ti mỹ tó tũ ra tóg ki kanhró nĩ,” he tóg.

⁹ “Ājag tỹ Topẽ mré vĩ kỹ tag tómnĩ, ha mẽ:

“Ēg jóg mǎg, kanhkā tá ā tóg nĩ nĩ.

Ā jiji tó ěg tóg tĩ, kỹ vênh kar jé ā tỹ tỹ ùn mǎg nĩ vé.

¹⁰ Ēg jé kǎnhmar ā tỹ tỹ ěg pǎ'i nĩ vé.

Vênh kar jé ā tỹ nén to jykren mũ ěn han sór, ga tá ke kar, ag jé kanhkā tá ke kar ag ri ke han.

¹¹ Ëg mý ũri ãg jẽn ti nĩm, ãg tỹ kurã kar ki ko tĩ ãn.

¹² Kỹ ãg mý vẽnħ pãte fón nĩ, ãg tỹ ã vĩ mranh ja ti.

Hã jẽ ãg tóg ãg tỹ jagnẽ to jũ tỹ jagnẽ mý vẽnħ pãte fón ke mũ gé.

¹³ Kỹ ãg tỹ ã vĩ mranh sór kỹ ãg kren han nĩ, ãg tỹn mranh tũ nĩ jẽ.

Nẽn-Kórég jo ãg vemnĩ.

Ã hã ne tóg tar nĩ'.

Ã hã ne tóg mág nĩ inhhã'.

Ã jykre tóg tũ' henħ ke tũ nĩ,"

hemnĩ, Topẽ mý," he tóg, Jesus ti.

¹⁴ "Hỹ, ge ti nĩ," he tóg. "Ũ tỹ ãjag to jũ kỹ ti mý vẽnħ pãte fón nĩ. Ũ tỹ ãjag mý vĩ kónãn kỹ ti mý vẽnħ pãte fón nĩ gé. ãjag tỹ gen kỹ ãg jóg vĩ ãjag mý vẽnħ pãte fón ke mũ gé. ¹⁵ ãjag tỹ tag han tũ nĩn kỹ, kỹ ãg jóg tóg ãjag mý vẽnħ pãte fón ke tũ nĩ gé, ãjag tỹ ti vĩ mranh ja ti," he tóg, Jesus ti.

Ëg vãkre to vẽnħ jykre

¹⁶ "Kỹ ãjag vãkre kỹ fe ũ nỹtĩ tũg nĩ, ãjag tỹ Topẽ mý há nỹtĩ jẽ jẽg tũ nỹtĩn kỹ. Vãkre ki ũ tỹ vẽnħ jykre régre han mũ ag jykre ri ke han tũg nĩ. Ag tỹ ón kỹ vãkre kỹ ag tóg fe ũ nỹtĩnħ mũ sir, vẽnħ kar tỹ ag vãkre ve jẽ. Ag ganho hã vẽ. Kanhkã tá ag tóg ganho ũ vẽnħ ke tũ nĩ ha. ãjag mý sóg ki hã tó mũ, ha mẽ. ¹⁷ ãjag vãkre kỹ ãjag gãnħ tãg nĩ, ãjag jamẽ kupemnĩ, festa han nỹtĩ ve nĩmnĩ, ãjag vãkren kỹ. ¹⁸ Hã kỹ ag tóg vég tũ nĩ, ãjag vãkrég mũ ti. Ëg jóg hã ne vég mũ inhhã', ãg tỹ ũn vég tũ ãn hã vĩ vég mũ. Kỹ tóg kanhkã tá ãjag mý nĩm ke mũ, ãjag ganho ti. Ëg tỹ vẽnħ vatãnh tá nẽn han mũ vég tóg tĩ (mỹr), Topẽ tĩ," he tóg, Jesus ti.

Ëg rico to vẽnħ jykre

(Lc 12.33-34)

¹⁹ "Ga kri mũn kỹ ricon ke to vãsãn sór tũg nĩ. Ga vĩ ãjag tỹ nẽn kar ti konħ ke mũ, ãjag tỹ rico hã to vãsãn mũ ra. Kỹ

ãjag jãnkamy vĩ vẽso jãgfanħ ke mũ gé sir, ti e nỹtĩn kỹ. Kỹ ag tóg pigju kỹ ma mũnħ ke mũ gé sir, ãjag tỹ nẽn ti, ti e nỹtĩn kỹ. ²⁰ ãjag tỹ inhhã kanhkã tá tũ mág pẽ nỹtĩn kỹ tóg inhhã ãjag mý há tĩnħ mũ. Tá ti pi(jẽ) tỹ ga nĩ', ãjag tũ ti, tá ti pi(jẽ) vẽso jãgfanħ mũ'. Tá ag pi(jẽ) pẽju kỹ ma mũnħ mũ'. Hã kỹ tá ãjag tũ vin han sórmnĩ. ²¹ ãjag tỹ ga kri tỹ nẽn ũ mág nỹtĩn kỹ ãjag tóg ga kri mũ mág sór mũ. ãjag tỹ hã ra kanhkã tá tỹ nẽn ũ mág nỹtĩn kỹ ãjag tóg kanhkã ra mũ sór mũ, kỹ tag hã ne há nĩ'," he tóg, Jesus ti.

Ëg kanẽ tỹ ãg mý kurã han

(Lc 11.34-36)

²² "Ëg kanẽ tỹ ãg vég tĩ. Kỹ tóg tỹ ãg mý kurã ri ke nĩ, ãg kanẽ ti, ti há nĩn kỹ. Tỹ ãg tóg kurã ve há han tĩ, ãg kanẽ há nĩn kỹ. ²³ Ëg kanẽ kórég nỹtĩn kỹ tóg ãg mý kuty tĩnħ mũ. Kỹ tóg ãg mý kurã vég tĩ ãn mý (tóg) kuty nĩ sir, kỹ kuty tag vĩ kuty kar kãfór nĩ. Ge ti nĩ, ãg jykre kórég nĩn kỹ. Ëg kanẽ kórég ri ke vẽ sir, ãg jykre kórég ti," he tóg, Jesus ti.

Ëg tỹ ga kri rico to vãsãn sór ke tũ

(Lc 16.13; 12.22-31)

²⁴ "Ã jagrẽ régre nĩn kỹ tóg vẽnħmỹ tĩ. ã tỹ Topẽ hã tỹ jagrẽ nĩn kỹ jãnkamy tãn ãn tỹ jagrẽ nĩ sór tũg nĩ. ã tỹ jãnkamy e ve sór kỹ ti hã mĩ êkrén kỹ ti hã vĩ tỹ ã jagrẽ nĩnħ mũ. Kỹ ãg tóg Topẽ tỹ ãg mý nẽn tó mũ ãn to jykrén há han tũ nĩgtĩ. ã tỹ Topẽ to há nĩn kỹ ã tóg sir ga kri rico to vãsãn sór ke tũ nĩ. ã tỹ ga kri rico nĩ sór kỹ ã tóg Topẽ mĩ êkrég tũ nĩ, hã vemnĩ," he tóg, Jesus ti. ²⁵ "Hã kỹ sóg ãjag mý tó mũ. ãjag tỹ nẽn ve sór mág mũ to kri kufy han tũg nĩ. "Inħ hỹn ũri ne konħ mũ', inħ hỹn ne tunħ mũ'?" he tũg nĩ. Topẽ tỹ ãg han ja vẽ mýr, ãg tỹ ga kri mũ jẽ. Hã kỹ tóg ãg mý ãg jẽn ki rĩr mũ gé sir, ãg kur ki ke gé, Topẽ ti. ²⁶ Sēsĩ to jykrén nĩ. Ag mý êkrãn tĩ? Vó. Ag mý pãjó krēm vin tĩ? Vó, ke tũ ag tóg nĩgtĩ.

Ge ra ěg jóg tỹ kanhkā tá nĩ ěn tóg ag ki rĩr nĩ nĩ. Ājag mỹ jēsĩ káfór tũ nỹtĩ, Topě mỹ? Vó, sēsĩ káfór ājag tóg nỹtĩ. ²⁷ Topě tỹ ěg kã ũ jé prēr kỹ ěg tóg ter ke mũ, ěg ter sór tũ ra. Ter jé ěg tóg ke mũ gé, ěg tỹ to krĩ kufy han mũ ra. ěg krĩ kufy ěn pi(jé) ěg kren han mũ'.

²⁸ Kỹ kur to krĩ kufy han tũg nĩ gé. Ka fej hã to jykrén nĩ. Jatun mỹ tóg mog tĩ. Rãnrhãr tũ tóg nĩgtĩ, kur han tũ tóg nĩgtĩ. ²⁹ Hã ra tóg sĩnvĩ nỹtĩ, ka fej ti. Kỹ pã'i mág tỹ Salomão kur tóg ri ke tũ nĩgtĩ, ti sĩnvĩ ra, vėnh kar kur sĩnvĩ káfór ti nĩ, Salomão kur ti. Hã ra tóg ka fej sĩnvĩ ri ke tũ nĩ. Ki hã sóg tó mũ mỹr. ³⁰ Topě hã ne ka fej sĩnvĩ han, tỹ tóg kur sĩnvĩ ri ke nĩ, ka fej ti. Hã ra tóg kãnhmar kãgter tĩ, ka fej ti, ti sĩnvĩ ra. Ũri tóg há nỹtĩ. Kỹ tóg vaj kỹ kógungun kỹ pũr mũ sir, re mré. Hã kỹ Topě tóg ājag ki rĩr káfór han mũ, ājag kur mré hã. Hã kỹ Topě ki ge kỹ nỹtĩmnĩ, ti vĩ kri fi kỹ. ³¹ Krĩ kufy han tũg nĩ. “Inh hỹn ne konh mũ? Inh hỹn ne kron mũ? Inh hỹn ne tunh mũ?” he tũg nĩ. ³² Ũ tỹ Topě vĩ ki kagtũg ag vỹ tag to jykrén mág tĩ, hã ra ěg jóg tỹ Topě vỹ ěg vėg tĩ, ěg tỹ nén ve sór mág mũ ti. Kỹ to krĩ kufy han tũg nĩ. Ti hã ne ěg vėg mũ, ěg jóg tỹ Topě ti. ³³ Topě tỹ tỹ ěg pã'i nĩ ěn hã ve sórmnĩ. Kỹ tag hã to vāsãn nĩ. Ti jykre kuryj tag hã to vāsãn nĩ. Kỹ tóg ājag mỹ ājag tỹ nén ve sór mág mũ ěn tỹ ājag mỹ vin ke mũ sir. ³⁴ Hã kỹ ājag tỹ vaj kỹ nén venh ke to krĩ kufy han tũg nĩ. Vaj kỹ ājag tóg venh ke mũ, kỹ ājag tóg to jykrén ke mũ sir. Ũri ājag tỹ nén tỹ ũri vėg mũ hã to jykrén há han nĩ. Ājag tỹ ũri nén ũ jagy vėg mũ vỹ há nĩ, kỹ ājag tỹ vaj kỹ nén venh ke to jykrén tũg nĩ, ũri,” he tóg, Jesus ti.

Ěg tỹ ũ to jykrén kónãn ke tũ

(Lc 6.37-38, 41-42)

7 “Ā régre to jykrén kónãn tũg nĩ, ti jykre kórég ra. Kỹ Topě vỹ ā to jykrén kónãn ke tũ nĩ gé. ² Ā tỹ ũ to

jykrén mũ ěn ri ke han jé tóg ke mũ, Topě ti, ā mỹ. Ā tỹ ũ mỹ kãmũn mũ ri ke han jé tóg ke mũ, ā mỹ, Topě ti. ³ Jykre kórég mág ā tóg nĩ gé, hã ra ā régre jykre pãno sĩ ěn ne ā mỹ kórég nỹ'. ⁴ Kỹ ā hã ne tóg ā régre mỹ: ā jykre kórég kurynh jé sóg ke mũ, he mũ', ā tỹ ā jykre pãno tãvĩ ěn kurynh jãvãnh (hã) ra'. ⁵ Ke tũg nĩ. Ke tũ nĩ (mũ) ra ā tóg jykre régre nỹtĩ. Ā jykre kurynh vėn nĩ. Kar kỹ ā tóg sir ā régre jykre kurynh há han mũ,” he tóg, Jesus ti.

⁶ “Hã ra cachorro jykre ri ke ag mỹ Topě jykre sĩnvĩ tó tũg nĩ. Porco jykre ri ke ag mỹ Topě jykre sĩnvĩ ěn tó tũg nĩ gé. Jykre kavėj ag nỹtĩ, hã kỹ ag tóg Topě jykre to é henh ke mũ. Ti tỹ tũ' he sór ag tóg tĩ, ti sãn kỹ, Topě jykre sĩnvĩ ěn ti. Kar kỹ ag tóg sir ā mré vėnh génh sór mũ gé, ha vemnĩ, ā tỹ ag mỹ Topě jykre sĩnvĩ ěn tó kỹ,” he tóg, Jesus ti.

Topě tỹ tỹ ũn vĩ há nĩ

(Lc 11.9-13)

⁷ “Topě mỹ nén kar to vĩmnĩ, kỹ tóg ājag mỹ han mũ. Ājag tỹ ti mỹ nén ũ to vĩ mũ ěn jãvãnh nĩ, kỹ ājag tóg venh ke mũ. Ti mré vĩ kỹ ěg tỹ ti jãnkã tỹ tórón tórón ke ěn ri ke han nĩ. Kỹ tóg ājag mỹ nón ri ke han mũ sir, ti tỹ ājag mỹ ājag tỹ nén to vĩ mũ ěn han kỹ. ⁸ Hỹ, hã vė. Ājag tỹ ti mỹ nén (ũ) to vĩn kỹ tóg ājag mỹ han mũ sir. Ājag tỹ ti jãvãnh kỹ ājag tóg ti venh mũ sir. Ājag tỹ ěg tỹ jãnkã tỹ tórón tórón ke ri ke han kỹ tóg ājag mỹ nón ri ke han mũ sir,” he tóg.

⁹ “Kejėn ājag kósĩn tóg ājag mỹ ěmĩ to vĩ mũ. Kỹ ājag pi(jé) ti mỹ pó nĩm ke mũ'. Ti mỹ ājag tóg ěmĩ hã nĩm ke mũ. ¹⁰ Ājag kósĩn tỹ ājag mỹ pirã to vĩn kỹ, kỹ ājag pi(jé) ti mỹ pỹn nĩm ke mũ'. Pirã hã nĩm jé ājag tóg ke mũ. ¹¹ Jykre pãno ājag nỹtĩ. Ge ra ājag tóg ājag krė mỹ nén ũ há vin tĩ. Ge ti nĩ gé, ājag tỹ Topě mỹ nén ũ to vĩn kỹ. Nén ũ há hã nĩm jé tóg ke mũ. Hã ra tóg ājag káfór han tĩ, ěg jóg

tỹ kanhkā tá nĩ ti. Ājag tỹ ti mỹ nén (ũ) to vĩn kỹ tóg ājag mỹ nén ũ há tãvĩ han tĩ mỹr,” he tóg.

¹²“Ājag tỹ ājag mré ke ũ to: “ti tỹ ěg mỹ tag han há tóg tĩ vế,” he mũ ra ěg hã tóg ti mỹ han ke mũ. Moisés tỹ ěg jyvẽn hã vế, Topẽ vĩ tó tĩ ag tỹ ěg jyvẽn hã vế,” he tóg, Jesus ti.

Jānkā régre

(Lc 13.24)

¹³“Ũ tỹ inh ki rã mũ vỹ tỹ jānkā sĩ fin rãm ke ri ke nĩ. Jānkā sĩ fin rãm jé ěg tóg vāsãn tĩ. Ri ke ti nĩ, ũ tỹ inh ki rãnh ke mũ ti. Jānkā mág vỹ nĩ gé. Hã ra ũ tỹ fin rãm ke mũ ag vỹ kãgter pẽ han ke mũ. Ājag tỹ jānkā mág ěn fin rãm sór kỹ tóg ver jagy tũ nĩ, fin rãm há tóg tĩ. Kỹ nũgme to ěpry jagma tĩg, pĩ to ěmĩn jagma tĩg pi(jé) jagy tĩ, ti mág pẽ nĩn kỹ. Hã kỹ ũ tỹ hẽn ri ke ag vỹ jagma mũ mũ. Kar kỹ ag tóg kãgter pẽ han mũ sir, pĩ ki vár kỹ. ¹⁴Ag jãvo jānkā sĩ ěn fin rãm nĩ, ājag tỹ rĩr krỹg ja tũ ve jé. Sĩ ti nĩ, kanhkā to ěpry ti, kanhkā to ěmĩn ti. Ũn pipir ag vỹ jagma mũnh mũ. Ā sĩ san kỹ tóg vég tũ sag tĩ, hã kỹ ũ tỹ jagma mũnh ke mũ ag vỹ pipir nỹtĩ,” he tóg, Jesus ti.

Ōn kỹ Topẽ vĩ tó tĩ ag

(Lc 6.43-44)

¹⁵“Ōn kỹ Topẽ vĩ tó tĩ ěn ag vĩ kri fig tũg nĩ. Há nỹtĩ ve ag tóg nỹtĩ, hã ra ag tóg ājag kókén sór nỹtĩ. Ājag kókén sór to ag tóg mĩg jũ ěn ri ke nỹtĩ, mỹr, ha mẽ. ¹⁶Ājag tỹ ag jykre tugnỹm kỹ ājag tóg ag tỹ Topẽ vĩ mranh mũ ěn ki kanhró nỹtĩ. Ha vé, vãnh tỹ jóhó ki ěg tóg uva vég tũ nĩgtĩ mỹr. Kỹ ěg tóg sónh ki pẽnva vég tũ nĩgtĩ gé. ¹⁷Ka vỹ ge nỹgtĩ. Ti há nĩn kỹ tóg kanẽ há han tĩ, kỹ ěg tóg ko tĩ. Ti kórég nĩn kỹ tóg kanẽ kórég han tĩ, kỹ ěg pi(jé) ko tĩ. ¹⁸Ka há vỹ kanẽn kónãn ki kagtĩg nĩ, kỹ ka kórég vỹ kanẽ há han ki kagtĩg nĩ gé. ¹⁹Kỹ ěg tóg ka kórég ěn gỹn tĩ, tỹ ěg pĩ han tĩ. Ka tỹ kanẽ há han vãnh

ẽn tỹ ěg pĩnh ti. ²⁰Ge ti nĩgtĩ, ón kỹ Topẽ vĩ tó tĩ ag tỹ. Ag tỹ Topẽ vĩ mrynhmranh kỹ ag tóg ón kỹ Topẽ vĩ tó tĩ. Ag tỹ nén han mũ ki ěg tóg ag jykre kórég vég mũ,” he tóg, Jesus ti.

Ěg tỹ Topẽ vĩ ki króm ke

(Lc 13.25-27)

²¹“Vẽnh kar tóg iso: “pã'i vế, pã'i vế,” he tĩ. Hã ra ũ ag tóg Topẽ tỹ nén tó mũ ěn han vãnh nỹtĩgtĩ. Hã kỹ ag tóg Topẽ tỹ tỹ ěg pã'i mág nĩ venh ke tũ nĩ. Ũ tỹ inh jóg vĩ han mũ ěn ag hã vỹ Topẽ tỹ tỹ ěg pã'i nĩ venh ke mũ. ²²Kurã ěn kã, isỹ vẽnh kar jykre tugnỹm ke kurã ěn kã ag tóg inh mỹ tag tónh mũ, ha mẽ. “Senhor, Senhor, ã jykre tó ěg mỹr,” he jé ag tóg ke mũ. “Ā jykre hã ki ěkrén kỹ ěg tóg ěg tỹ nén han vãnh han ja nĩgtĩ mỹr. Ā jykre hã tỹ ěg tóg vẽnh jagrẽ kórég pan mỹr,” he jé ag tóg ke mũ, inh mỹ. ²³Hã ra sóg ag mỹ: “ājag pi(jé) tỹ inh mré ke nỹtĩ,” henh ke mũ. “Ājag ki kagtĩg sóg nĩ mỹr. Ha mũ jęg. Jykre kórég ājag tóg nỹtĩ,” he jé sóg ke mũ, ũ tỹ inh panh vĩ han vãnh ag mỹ,” he tóg, Jesus ti.

Ĭn nũna gunh gunh kãme

(Lc 6.47-49)

²⁴“Ha mẽ, inh vĩ mẽg ājag tóg nỹtĩ,” he tóg. “Ājag tỹ inh vĩ ki króm kỹ ājag tóg sir ũn há ri ke nỹtĩ. Ĭn han ken kỹ tóg to jykrén mũ. To jykrén há nĩn kỹ tóg ga kũm kỹ pãró kri Ĭn nũna ka fęg mũ sir. ²⁵Kỹ vãhã ta tóg kutẽ mũ, kỹ goj vỹ var mũ sir. Kóho jũ vỹ kãtĩ mũ, Ĭn to, hã ra tóg kutẽ tũ nĩ sir, Ĭn ti. Pãró kri tóg nỹtĩ, ti nũna ti, hã kỹ tóg kutẽ tũ nĩ. Ge ti nĩ, ājag tỹ inh vĩ kri fi kỹ. ²⁶Ājag tỹ inh vĩ mẽg mũ ra ki króm tũ nĩn kỹ ājag tóg ũn jykre kórég ri ke nỹtĩ. Ĭn han ken kỹ tóg to jykrén kónãn mũ, kỹ tóg ga tỹ rỹnhryĩ hã ki ka fęg mũ, krĩg mỹ, Ĭn nũna ti. ²⁷Kỹ ta tóg kutẽ mũ, kỹ goj vỹ var mũ sir. Kóho jũ vỹ kãtĩ mũ gé, Ĭn to, kỹ Ĭn tóg vom ke tére kỹ kutẽ mũ sir.

Mráj kân tóg mũ sir, ìn ti. Ge ti nĩ, ajag tỹ ình vĩ kri fig tũ nĩn kỹ,” he tóg, Jesus ti.

Jesus vĩ tỹ vãnh kar vĩ kăfór nĩ

²⁸ Hã ki Jesus tóg krỹg he mũ sir, ag kanhrân ki. Kỹ tóg vãnh kar mỹ e tĩ sir, ti vĩ ti. ²⁹ Ti vĩ tóg vãnh kar vĩ kăfór nĩ, Topê vĩ to professor ag vĩ kăfór ti nĩ, kỹ tóg pã'i vĩ kăfór pẽ nĩ gé, ti vĩ ti. Hã kỹ tóg ki hã tó mũ. Kỹ tóg ag mỹ e tĩ sir.

Jesus tỹ ùn kaga kren vãnh tỹ há' he

(Mc 1.40-45; Lc 5.12-16)

8 Jesus tỹ ag mỹ tó kân kỹ tóg pănónh ãn to tére mũ sir. Kỹ ùn e ãn ag tóg ti nón mũ mũ sir. ² Kỹ vãnh ù tóg ti tá jun mũ. Vãnh kaga kren vãnh han kỹ tóg nĩ, vãnh kaga tỹ lepra he mũ ãn, ù tỹ tá jun mũ ti. Kỹ tóg ti krêm grĩnh ke kỹ ã jakrĩ tỹ jẽ nĩ, kỹ tóg ti mỹ: “Senhor,” he mũ. “Á mỹ isỹ há' he sór tũ nĩ? Á hã tóg isỹ há henh mũ, ã tỹ isỹ há' he sór kỹ,” he tóg ti mỹ.

³ Kỹ Jesus tóg ti mỹ: “hej,” he mũ. “To há sóg nĩ, há' he ja há ã tóg nĩ,” he tóg ti mỹ, Jesus ti. Kỹ tóg ti kaga kren vãnh ãn tỹ kren han mũ vėsýmér. Jãnhkri tóg nĩ, ti fár ti. ⁴ Kỹ Jesus tóg ti mỹ: “ker ù mỹ tó hẽ, ã han tag ti,” he mũ. “Ha tĩg, Topê tũ ki rĩr tĩ to. Tĩ hã mỹ tómni. Kỹ ti mỹ nẽn ù nĩm nĩ, ti tỹ Topê mỹ pũn jé, Moisés tỹ vãsỹ ãg mỹ nẽn tó ja ãn ti. Hã tugrĩn vãnh kar vỹ ã tỹ há' he mũ tag ki kanhrân mũ,” he tóg ti mỹ, Jesus ti. Kỹ tóg tĩ mũ, há' hen kỹ.

Jesus tỹ pã'i mág camarada tỹ há' he

(Lc 7.1-10)

⁵ Kỹ Jesus tóg kejẽn cidade tỹ Cafarnaum tá jun mũ. Kỹ fóg tỹ capitão tóg ti venh kãtĩ mũ, ti mỹ nẽn ù to vĩ jé. ⁶ Kỹ tóg ti mỹ: “Senhor,” he mũ. “Ình camarada tóg nỹ nĩ, ình ìn tá. Kãnhgrĩn kân kỹ tóg nỹ nĩ, hã ra tóg kaga jagy nỹ,” he tóg ti mỹ, capitão ti, Jesus mỹ. ⁷ Kỹ Je-

sus tóg ti mỹ: “kỹ ình hỹn tóg ti venh tĩg ha, ã mré, sỹ ã mỹ ti han jé,” he mũ. ⁸ Hã ra capitão tóg Jesus mỹ ke mãn mũ. “Á mỹn hỹn jagy nĩ, ã tỹ ình ìn kãki sãn ke ti, isỹ tỹ fóg nĩn kỹ,” he tóg ti mỹ. “Á vĩ pir ki ình camarada vỹ há' henh mũ. Á vĩ hã tỹ ã tóg ti tỹ há' henh ke mũ,” he tóg, capitão ti. ⁹ “Ha vé, tỹ sóg pã'i krêm ke nĩ gé, kỹ soldado ag tóg tỹ ình krêm ke nỹtĩ gé. Hã kỹ sóg pã'i jykre ki kanhrô nĩ. Isỹ soldado ù mỹ: kutĩg, hen kỹ tóg ti mũ. Sỹ ti mỹ: kunĩg, hen kỹ tóg kãtĩ mũ gé. Isỹ ình camarada mỹ: tag han ra, hen kỹ tóg han mũ. Ình vĩ tỹ sóg ag jẽgnẽg tĩ. Hã kỹ sóg ki kanhrô nĩ. Á vĩ tỹ ã tóg ình camarada tỹ há' he há nĩ,” he tóg, capitão ti, Jesus mỹ. ¹⁰ Kỹ tóg Jesus mỹ e tĩ, ti vĩ tag ti. Kỹ tóg ã mré mũ ag mỹ: “ha mẽ, Israel ag vỹ ti ri ke tũ nỹtĩ,” he mũ. “Kĩ kanhrô tóg nĩ (mỹr), kỹ tóg ình ki rã kỹ jẽ. Ge ve ja tũ sóg nĩ,” he tóg. ¹¹ “Ha vé, ù tỹ hẽn ri ke ag vỹ kãmũnh ke mũ, rã jur ja tá ag kãmũnh mũ, rã pur ja tá ke gé. Abraão mré ag tóg ù tỹ kanhkã tá nĩ ãn tỹ tỹ ãg pã'i nĩ venh ke mũ, Isaque mré, Jacó mré ke gé, Topê tóg ag ki rĩr ke mũ. ¹² Ag jãvo Israel krẽkrẽ ag tóg kuty ki vár ke mũ. Ag tỹ ù tỹ kanhkã tá nĩ ãn tỹ tỹ ãg pã'i nĩ venh ke vẽ vẽ, hã ra ag tóg venh ke tũ nĩ. Kỹ ag tóg vėsýrẽnh ke mũ, ajag jã tỹ ag gãngán ke mũ, tỹ gangan ke mũ, vėsô jũn kỹ,” he tóg, Jesus ti. Á mré nỹtĩ ag mỹ tóg ke mũ.

¹³ Kỹ tóg capitão mỹ: “ha tĩg ge,” he mũ. “Ình ki rã kỹ ã tóg jẽ nĩ, hã kỹ ã tóg venh ke mũ sir, ã tỹ nẽn ve sór mũ ti. Á camarada tỹ ình hur há' hẽ,” he tóg, Jesus ti, capitão mỹ. Kỹ tóg tĩ mũ sir. Hã ra ti camarada tóg há' he mũ. Hora ãn ki tóg há' he mũ, Jesus tỹ hora ki tó mũ ãn ki.

Jesus tỹ ùn kagyga ag tỹ hághá' he

(Mc 1.29-34; Lc 4.38-41)

¹⁴ Kỹ Jesus tóg sir Pedro ìn kãra rã mũ. Kỹ tóg ti prũ fi mỹnh fi vэг mũ. Kaga fi

tóg nỹ nĩ, rỹg kỹ. ¹⁵Kỹ tóg fi nĩgé mēg mũ sir. Kĩ fi rỹg ẽn tóg tũ' he mũ sir. Kĩ fi tóg nĩ kỹ ag ki rĩr mũ sir. ¹⁶Kuty ẽn kã ag tóg ùn jagrẽ kórég ag tatĩn kãmũ mũ ti to. Kĩ tóg ag mỹ vĩ mũ, kỹ ag tóg pa kãn mũ sir, vẽn jagrẽ kórég ag. Ùn kagyga ag hyn han tóg mũ gé sir, Jesus ti. ¹⁷Hã ra tag tóg rãn kỹ nĩ gé. Vãsỹ Topẽ vĩ tó tĩ tỹ Isaiás vỹ tag rãn ja nĩ, ha mē: “ẽg kaga nỹtĩn kỹ tóg ẽg han, kỹ ẽg tóg há' he kãn mũ, ti tỹ ẽg jagfy jagtar tugrĩn,” he ja tóg nĩ, Isaiás ti. Hã ra tóg ge nĩ.

Ủ tỹ Jesus mré mũ sór mũ ag

(Lc 9.57-62)

¹⁸Kejẽn ag tóg Jesus pẽnĩn e nỹtĩ, kỹ Jesus tóg ag ve kỹ: “mũ jé ha,” he mũ, ã mré mũ tĩ ag mỹ. “Goy kafã ù ra ẽg mũnh mũ,” he tóg.

¹⁹Ag mũnh ke to hã Topẽ vĩ to profes-sor ù tóg ti mré vĩnh kãtĩ mũ. “Senhor,” he tóg. “Sỹ ã mré tĩg há tóg tĩ. ã tỹ hẽ ra tĩg kỹ sóg ã mré tĩ mũ,” he tóg. ²⁰Hã ra Jesus tóg ti mỹ: “hã ra tóg jagy tĩ,” he mũ. “In tũ sóg nĩ,” he tóg. “Mĩg vỹ kré nỹtĩgtĩ. Sēsĩ vỹ jagfe nỹtĩgtĩ gé. Ag jãvo isỹ hẽ tá nũr ke tóg tũ tĩ. Tỹ sóg ẽprã ke fi kósĩn nĩ,” he tóg, Jesus ti.

²¹Kỹ Jesus mré tĩ ù tóg Jesus mỹ vĩ mũ gé. “ã mré sóg tĩ mũ, hã ra sóg ver inh panh tỹ ga ki ti fón sór mũ,” he tóg, Jesus mỹ. ²²Kỹ Jesus tóg ti mỹ: “vó,” he mũ. “Tĩ kénh tĩ tũg,” he tóg. “Inh mré kãtĩg,” he tóg. “Inh ki ge tũ ag vỹ ã panh ti kej han mũnh mũ. ã tỹ inhhã inh mré kãtĩg há tóg tĩ,” he tóg, Jesus ti. ²³Kỹ tóg sir canoa kãki rã mũ. Kỹ ti mré mũ tĩ ag tóg ti mré ki ge mũ gé sir, goj kafã ù ra mũ jé.

Jesus tỹ kóho jũ tỹ tũ' he

(Mc 4.35-41; Lc 8.22-25)

²⁴Ag tỹ goj kãmĩ mũ (hã) ra kóho jũ tóg sir krog he mũ, ha mē. Kỹ goj tóg canoa kãki krém krém ke mũ, ti fãn sór tóg mũ. Hã ra Jesus tóg nũr kỹ nỹ nĩ.

²⁵Kỹ ag tóg ti rĩn kỹ ti mỹ: “Senhor,” he mũ. “Èg kren han nĩ,” he ag tóg. “Èg kãgter ha mē tóg tĩ,” he ag tóg.

²⁶Kỹ Jesus tóg ag mỹ: “ãjag tỹ neje mũmẽgmẽg nẽ?” he mũ. “ãjag mỹ inh ki ge há han tũ’?” he tóg. Kỹ tóg nĩ kỹ jẽgnẽ mũ sir, kỹ tóg goj mỹ vĩ mũ sir, kóho mỹ. Kỹ tóg tũ' he mũ sir. Katy' he tóg mũ, katy tãvĩ tóg tĩ mỹr, ha mē. ²⁷Kỹ tóg vẽn kar mỹ e tĩ. “Tĩ jykre tóg ẽg mỹ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

Jesus tỹ vẽn jagrẽ kórég pan

(Mc 5.1-20; Lc 8.26-39)

²⁸Kỹ tóg goj fin rãm kỹ nig kafã ù tá jun mũ sir, Gadara tá, Jesus ti, ti mré mũ tĩ ag ke gé. Kỹ ùn rẽgre ag tóg ti kato tẽgtẽ mũ, ùn jagrẽ kórég ag. Vẽn kej tá ag tóg kãmũ mũ. Ag jamã vẽ, vẽn kej ti. Jũ mē ag tóg nỹtĩ, kỹ ù ag tóg hẽn ra mũ vãn nỹtĩ, ag kamẽg kỹ. ²⁹Jesus kato ag tóg kãmũ mũ, ùn jagrẽ kórég ẽn ag. Ti ve kỹ ag tóg sir prẽr mũ, ha mē. “!..ã hỹn ẽg tỹ hẽ ri kenh mũ ha, Topẽ kósĩn'..!” he ag tóg mũ. “!..ã mỹ ẽg vóg kónãn sór mũ ha, ẽg kurã to hã..!” he ag tóg. Jesus mỹ.

³⁰Hã ra porco tóg ki e nỹtĩ. Kakó tá ag tóg jẽg nỹtĩ. ³¹Kỹ Nén-Kórég ag tóg Jesus mỹ: “ã tỹ ẽg pan kỹ ã tỹ porco to ẽg jẽgnẽn hã tóg tĩ,” he mũ. ³²Kỹ tóg ag mỹ: “hej,” he mũ. “Ha mũ jẽg ge,” he tóg. Kỹ ag tóg ẽn ag togvãn kỹ porco ki ge mũ sir, Nén-Kórég ag. Kỹ vãhã porco ag tóg rãn ki re kãn mũ sir, goj nig ki ag tóg vãr kãn mũ. Nãgnãr kãn ag tóg mũ sir, tũ' he ag tóg mũ sir, porco ẽn ag, mỹr, ha mē. ³³Kỹ porco ki rĩr tĩ ag tóg pêtẽ kãn mũ sir, cidade ra, kamẽg kỹ. Tá ag tóg kãmén kãn mũ. Nén-Kórég tỹ jagrẽ ja ẽn ag tó ag tóg mũ sir, Jesus tỹ ag pan ẽn ti.

³⁴Kỹ vãhã cidade tá ke kar ag tóg sir Jesus vẽn kãmũ mũ. Kãmũ kãn ag tóg mũ. Kỹ ag tóg tá junjun kỹ (ag tóg) Jesus

mỹ to vĩ mũ, ti tỹ tá kutē jé, ti tỹ ag rā hā nĩ tũ nĩ jé, hā kỹ tóg tĩ mũ.

Jesus tỹ ũn kãnhgrĩn kỹ nỹ tỹ há' he

(Mc 2.1-12; Lc 5.17-26)

9 Kỹ Jesus tóg canoa ki rā kỹ goj nig kafā ũ ra tĩg măn mũ. Kỹ tóg ā jamā tá jun mũ. ² Ti tỹ ā jamā tá jun kỹ vāhā ag tóg ti mỹ ũ vyn kỹ junjun mũ, ũn kónhgrĩn kỹ nỹ ên, ha mẽ. Ā cama kri tóg nỹ nĩ. Kỹ Jesus tóg ag tỹ ti ki ge mũ vэг mũ sir. Hā kỹ tóg ũn kãnhgrĩ mỹ: “inh kósĩn,” he mũ. “Ā fe tỹ há' hé. Ā tỹ Topē vĩ mranh ja ên tỹ tũ' hen hā vè ha,” he tóg, ti mỹ, ũn kónhgrĩ mỹ.

³ Hā ra Topē vĩ to professor ag vĩ tá nỹtĩ gé. Ti vĩ mẽ kỹ ag tóg to jykrén mũ. “Topē to vĩ kónăn tóg mũ mỹr. Vēsỹ tóg Topē han mũ mỹr,” he ag tóg mũ, Jesus to, ti tỹ ti mỹ: “ā tỹ Topē vĩ mranh ja ên tỹ tũ' hen hā vè,” hen kỹ. Kỹ tóg ag mỹ tỹ ũ nỹ, ti jykre ti.

⁴ Hā ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “ājag ne tog nén ũ vènhmỹ to jykrén mũ,” he mũ. ⁵ “Ne nỹ ājag mỹ vènhmỹ nỹ?” he tóg. “Ũn tĩg vānh tag mỹ sóg: “ā tỹ Topē vĩ mranh ja ên tỹ tũ' hen hā vè ha,” he mũ mỹr. Kỹn mỹ ājag mỹ vènhmỹ?” he tóg. “Sỹ ti mỹ: “nĩ ra, tĩg ra,” henh ke vè gé. Kỹn mỹ ājag mỹ vènhmỹ ke gé?” he tóg. ⁶ “Hā ra isỹ ājag mỹ inh jykre ven sór vè. Tỹ sóg êprā ke fi kósĩn nĩ. Tá sóg krỹg ke mũ, Topē vĩ mranh tỹ vènh pāte fón ke tá, ũn kãnhgrĩ tag mỹ. Sỹ tá krỹg mũ ven jé sóg ke mũ, ājag mỹ,” he tóg.

Hā kỹ tóg ũn kónhgrĩ mỹ: “nĩ ra, jэг ra, ā kur gé (g) tĩg ra, ā ĩn ra,” he mũ. ⁷ Kỹ tóg vym ke nĩ mũ, kỹ tóg sir jэгnē kỹ tĩ mũ. Ā ĩn ra tóg tĩ mũ (mỹr) sir, ha mẽ. ⁸ Kỹ vènh kar ag tóg vэг mũ. Kỹ tóg ag mỹ e tāvĩ tĩ. Topē mỹ ag tóg vĩ há han mũ, ti tỹ Jesus mỹ vènh jykre há nĩm kỹ. Ēg mré ke vè mỹr, Jesus ti, êprā ke, hā

ra Topē tóg ti tar han, hā kỹ tóg ti tỹ há' he mũ.

Jesus tỹ Mateus mré vĩ

(Mc 2.13-17; Lc 5.27-32)

⁹ Kỹ Jesus tóg ā jamā tá kã kutē kỹ tĩ mũ sir. Kỹ tóg Mateus vэг mũ sir. Governo mỹ tóg jãnkamy mäg tĩ, imposto kaja ti, kỹ tóg ā rãnhraj han kỹ nĩ nĩ. Kỹ Jesus tóg ti mỹ: “inh mré kãtĩg,” he mũ, Mateus mỹ. Kỹ tóg jэгnē kỹ ti mré tĩ mũ sir.

¹⁰ Kỹ tóg kejēn ti mré jэг mũ, Jesus ti. Kỹ ũ tỹ hēn ri ke ag tóg tá vènh măn mũ, ti ĩn krēm, governo mỹ jãnkamy mäg tĩ ag, Topē vĩ mranh tĩ ag. Jesus mré ag tóg jэгjэг mũ, Jesus mré mũ tĩ ag mré ke gé.

¹¹ Kỹ Fariseu ag tóg vэг mũ. Kỹ ag tóg ti mré mũ tĩ ag mỹ vĩ mũ. “Ājag pã'i ne tóg ag mré jэг mũ', governo mỹ jãnkamy mäg tĩ ag mré. Topē vĩ mranh tĩ ag mré hā tóg jэг mũ',” he ag tóg, Fariseu ag, Jesus mré mũ tĩ ag mỹ.

¹² Hā ra Jesus tóg mэг mũ, ag vĩ ti. Kỹ tóg ag mỹ kãmén mũ, ha mẽ. “Ũn kagyga tũ ag vĩ méđico venh mũ tũ nĩgtĩ,” he tóg. “Hā ra ũn kagyga ag hā vĩ ti venh mũ tĩ,” he tóg. ¹³ “Ha vé, tag to jykrén, Topē vĩ tag to, ha mẽ. “Ājag tỹ jagnē jagāgtān kỹ tóg inh mỹ há tĩ inhā,” he tóg, Topē ti. “Ājag tỹ inh mỹ nén ũ pũn kãfór tóg nĩ, ājag tỹ jagnē jagāgtān mũ ti,” he tóg, Topē ti. Hā kỹ jagnē jagāgtān nĩ, ag to vĩ tũg nĩ,” he tóg, Jesus ti. “Inh pi(jé) ũ tỹ vènh jykre kuryj han mũ ag mỹ: “ājag jykre tovānh nĩ,” he sór tĩ. Ũ tỹ Topē vĩ mranh ja nĩ ên ag hā mỹ sóg: “ājag jykre kórég tovānh nĩ,” he sór tĩ. Hā jé sóg ājag mỹ vènh ven,” he tóg, Jesus ti.

Jesus tỹ эг vākre kãmén

(Mc 2.18-22; Lc 5.33-39)

¹⁴ Kỹ João mré mũ tĩ ag tóg ti tá junjun mũ sir, Jesus tá. Kỹ ag tóg ti ki jēmэг mũ. “Ēg hā ne tóg vākreg tĩ', Fariseu mré

ke ag ke gé. Ëg jãvo ã mré mũ tĩ ag tóg vãkre vãnħ nỹtĩgĩ. Hẽ ri ke jé?” he ag tóg, Jesus mỹ, João mré mũ tĩ ag.

¹⁵ Kĩ Jesus tóg ag mỹ: “hỹ,” he mũ. “Vẽnħ kyprũg to kãmũ ag pi(jé) vãkrég tĩ,” he tóg. “Festa vẽ mỹr, vẽnħ prũgprũg ti, kĩ ti mré ke ag tóg ùn prũg mũ ěn venħ kãmũ tĩ. Hã ra sóg ùn prũg mũ ěn ri ke nĩ, hã kĩ tóg inh mré mũ tĩ ag mỹ sér ti ver,” he tóg. “Vãhã tóg jun mũ, inh kurã ti. Kĩ hã ag tóg inh pére mũnħ mũ. Ěn kã hã ag tóg ajag vãkrenħ ke venħ mũ, kurã ěn kã, inh mré mũ tĩ ag,” he tóg, Jesus ti.

¹⁶ “Ti si fag pi(jé) vãfe kygnej tũ tỹ kur si jar ki hyn han tĩ ja nỹtĩgĩ. Ûn kygnej tũ tỹ ki hyn han mũ ra tóg jaran kenh mũ. Kĩ kur si jar ěn tóg mág mũ. Ûn kygnej hã tỹ fag tóg ki han han tĩ, kĩ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vẽ, hã ra tóg kur kygnej ja tũ ri ke nĩ.

¹⁷ Kĩ tóg ag mỹ: “kỹ vinho vỹ ge nĩgtĩ gé,” he mũ gé. “Ëg pi(jé) vinho kajãg mũ tỹ ti fãr si tỹ sago ki kujẽg tĩ. Ke tũ nĩ (mũ) ra tóg kunãnh kỹ jaran ke mũ, kógnãj kỹ. Kĩ vinho ěn tóg tũ’ he mũ, sago ke gé. Vinho kajã tỹ ti fãr tãg tỹ ki kujẽn ke vẽ mỹr,” he tóg, Jesus ti. Ti tỹ ã jykre tãg tó vẽ, hã ra tóg vinho kajãg mũ ri ke nĩ gé.

Jesus tỹ ùn kagyga fag tỹ há' he

(Mc 5.21-43; Lc 8.40-56)

¹⁸ Ti tỹ ver ag mré vẽnħn kỹ pã'i ù tóg tá jun mũ, ha mẽ. Ti krẽm tóg grĩnh ke mũ. Kĩ tóg ti mỹ: “ha vé,” he mũ. “Inh kósĩn fi tóg ter ke mũ. Fi venħ kãtĩg. ã tỹ ã nĩgé tỹ fi mẽ kỹ fi fe tóg mĩn kenh ke mũ, ha vemnĩ,” he tóg, pã'i ti, Jesus mỹ. ¹⁹ Kĩ Jesus tóg jẽgnẽ kỹ ti mré tĩ mũ sir. Jesus mré mũ tĩ ag vỹ ti mré mũ mũ gé sir. ²⁰ Ti tỹ ti mré tĩg mũ ra ù fi tóg ti tá jun mũ, ùn kaga ù fi. Kyvẽnħ krỹg ja tũ han kỹ fi tóg nĩ, prỹg tỹ 12 (ke) ki. Jesus vatãnħ tá fi tóg ti kur mẽg mũ sir, ti kur

mráj ki. ²¹ “Sỹ hẽn ri ke mũn ti kur mẽ kỹ inh hỹn han mũ,” he fi tóg, to jykrẽn kỹ. Hã kỹ fi tóg ti kur mẽnħ kãtĩ mũ. ²² Hã ra Jesus tóg vĩrĩn ke kỹ fi vếg mũ. Kĩ tóg fi mỹ: “inh kósĩn’,” he mũ. “Kamẽg tũg nĩ,” he tóg mũ. “ã tỹ inh ki rã hã kỹ ã tóg há' he mũ,” he tóg. Kĩ fi tóg há' he mũ sir vẽnỹmẽr, ha mẽ.

²³ Kĩ tóg tĩg mãn mũ, Jesus ti. Kĩ ag tóg pã'i ěn ĩn tá junjun mũ sir. Kĩ tóg tá fõr nĩ, ùn kygfỹ mũ fag tỹ, ag tỹ ěg jẽnky tỹ vãkyr ěn kynkyn tĩ ag tỹ ke gé, ti kósĩn fi ter kỹ. Kĩ Jesus tóg fag vếg mũ. ²⁴ Kĩ tóg: “ha mũ jẽg,” he mũ. “Gĩr sĩ fi vỹ ter tũ nĩ. Nũr fi nỹ nĩ,” he tóg. Hã ra fag tóg ti nyg mũ. ²⁵ Hã ra tóg fag pan kãn mũ sir. Kĩ tóg gĩr fi nĩgé kãgmĩg mũ sir. Kĩ fi tóg nĩ mũ sir. ²⁶ Kĩ tag kãmẽ tóg vẽnħ kar kri rũm ke mũ, ga ěn kar mĩ hã, Jesus tỹ fi rĩn mãn mũ ti.

Jesus tỹ ùn kyvó ag tỹ ěvãnħ há hyn han

²⁷ Kĩ Jesus tóg tá kãkutẽ mũ sir. Kĩ ùn kyvó rėgre ag tóg ti nón mũ mũ. Ti nón mũ kỹ ag tóg ti jé prẽr mũ: “!..Davi kósĩn'..!” he ag tóg. “!..Ëg jagãgtãn ra..!” he ag tóg, prẽrprẽr kỹ.

²⁸ Kĩ Jesus tóg ĩn kãra rã mũ sir. Kĩ ùn kyvó ěn ag tóg ti nón ge mũ gé sir, ĩn kãra. Kĩ Jesus tóg ag mỹ: “inh mỹ ajag mỹ ajag hyn han há nĩ?” he mũ. Kĩ ag tóg ti mỹ: “hỹ,” he mũ. ²⁹ Kĩ Jesus tóg ag kanẽ mẽg mũ sir, ã nĩgé tỹ. Kĩ tóg ag mỹ: “ajag tỹ inh ki ge kỹ nỹtĩn kỹ ajag tóg há' henh mũ,” he mũ. ³⁰ Kĩ ag kanẽ tóg mĩn ke mũ sir. Ěvãnħ há' he ag tóg mũ. Kĩ Jesus tóg ag mỹ vĩ tar han mũ. “Ker ù mỹ tó hẽ,” he tóg ag mỹ. ³¹ Hã ra ag tóg mũ kỹ (ag tóg) vẽnħ kar mỹ tugtó mũ. Kĩ ti kãmẽ ěn tóg vẽnħ kar kri rũm ke mũ sir.

Jesus tỹ ùn vĩ vãnħ vĩn

³² Kĩ ag mũ kỹ ù tóg ti tá jun mũ gé, ùn jagrẽ kórég. Ti jagrẽ tóg ti vĩ vãnħ han.

³³Kỹ Jesus tóg ti jagrê kórég kutêm mũ sir. Ti tỹ ti kutêm kỹ tóg sir vi há han mũ sir, ùn vi vãnh ja ên ti. Kỹ tóg vãnh kar mỹ e ti. “Ge ve ja tũ êg tóg nỹti, êg povo tỹ Israel kãmĩ,” he ag tóg mũ.

³⁴Hã ra Fariseu ag tóg mêng mũ. Kỹ ag tóg ón kỹ Jesus to vi kónân mũ. “Vãnh jagrê kórég pan há tóg nĩgtĩ. Hã ra tóg vãnh jagrê kórég ag pã'i jykre tỹ ag pan ti nĩ, ti tỹ tỹ Japo mré ke nĩn kỹ,” he ag tóg, ón kỹ, Fariseu ag. Ag tỹ Jesus to ón há vễ.

Jesus mỹ ùn jagtar ag

³⁵Kỹ Jesus tóg cidade kar mĩ ti mũ, êmã kar ên mĩ. Êg vãnh kanhrân jafã krêm tóg ag kanhrân ti. Ag mỹ tóg ù tỹ kanhkã tá nĩ ên tỹ tỹ êg pã'i nĩ ên tó ti sir. Kỹ tóg ùn kagyga ag hyn han ti gé sir. ³⁶Vãnh e ên tóg ti mỹ jagăgtar nỹti. Û tỹ ag ki rĩr há han ke tóg tũ tĩgtĩ, jo ag tóg vãnh ki rĩr há han ki kagtĩg nỹti gé. Ti tỹ ag ve kỹ tóg carneiro tỹ mêng mĩ êkrég mũ sir. Û tỹ carneiro tỹ mêng ki rĩr tũ nĩn kỹ ag tóg véké mũgtĩ. Tag ri ke ag tóg nỹti, Jesus mỹ, ùn e ên ag. ³⁷Kỹ tóg ã mré mũ ti ag mỹ: “sỹ ag ve kỹ sóg êg jakré mĩ êkrég ti,” he mũ. “Ti e nĩn kỹ êg tóg kejên kre kân tũ nĩgtĩ, êg pir nỹtĩn kỹ. Ge ti nĩgtĩ. Ûn e ag tóg inh ki ge to há nỹti, hã ra tóg ver ù tỹ ag mỹ tónh ke tóg tũ ti,” he tóg, Jesus ti. ³⁸“Hã kỹ Topê mré vi, ti tỹ ù jěgně jé, ag tỹ ag mỹ ti vi tó jé,” he tóg, Jesus ti, ã mré mũ ti ag mỹ.

Jesus tỹ apóstolo ag kuprêg mũ

(Mc 3.13-16; Lc 6.12-16)

10 Kĩ Jesus tóg ùn tỹ 12 (ke) ag jé prěr mũ sir, ti mré mũ ti ên ag jé. Kỹ tóg ag mỹ vãnh jykre nĩm mũ, ag tỹ vãnh jagrê kórég pan jé, ag tỹ ùn kagyga ag hyn han jé ke gé. Vãnh kaga kar tỹ ag tóg hẽ ri ke mũ sir, ti tỹ ag mỹ tag to vãnh jykre nĩm kỹ. ² Û tỹ 12 (ke) ag jĩjin hã vễ, ha mẽ, Jesus tỹ ùn vin mũ ag

jygjyn hã vễ, ha mẽ. Ûn ve vỹ tỹ Simão nĩ, kỹ ti jiji ù hã vỹ: Pedro, he mũ. Kar kỹ ti jãvy vỹ nĩ gé, hã vỹ: André, he mũ, Tiago ke gé, Zebedeu kósın tag ti, ti jãvy tỹ João ke gé, ³Filipe ke gé, Bartolomeu ke gé, Tomás ke gé, Mateus ke gé, gov-erno mỹ jänkamy mąg tĩ tag ti, Tiago ù ke gé, Alfeu kósın tag ti, Tadeu ke gé, ⁴Simão ke gé, ag tỹ ù to: Zelote, he mũ tag ti, kar kỹ Judas Iscariotes ke gé, Jesus vatánh tá pã'i ag mỹ ti kãmén ke tag ti.

Jesus tỹ apóstolo ag jěgně

(Mc 6.7-13; Lc 9.1-6)

⁵Ên ag jěgněg tóg mũ sir, Jesus ti, ag tỹ vãnh kar mỹ Topê kãmén jé. Û tỹ 12 (ke) ên ag jěgněg tóg mũ, Jesus tỹ ùn kuprêg ja ên ag. Kỹ tóg ag mỹ: “ver fóg ag mỹ inh kãmén mũ tũg nĩ, kanhgág ag mỹ kãmén tũg nĩ gé ver,” he mũ. “Kỹ Samaria tá ke ag jamã ki ge tũg nĩ gé,” he tóg. ⁶“Israel ag tăvi mỹ tómnĩ inhhã. Topê mỹ ag tóg tỹ carneiro vãfor ri ke nỹti, kỹ ag hã mỹ tómnĩ ver,” he tóg. ⁷“Ăjag tỹ ag mỹ tó kỹ tag tómnĩ, ha mẽ. Û tỹ kanhkã tá nĩ ên tỹ tỹ ajag pã'i nĩnh ke vễ ùri, hemnĩ, ag mỹ. ⁸Ûn kagyga ag hyn han nĩ gé. Ûn kăgter mũ ag rĩn-rĩn măn nĩ. Ûn kaga kren vãnh ên kren han nĩ. Vãnh jagrê kórég ag pan nĩ. Ajag mỹ sóg ge ra inh jykre nĩm mũ, kỹ ge ra ag mỹ han nĩ gé. Ag mỹ: inh mỹ kajãm, he tũg nĩ. ⁹Kỹ jänkamy ma mũ tũg nĩ, jänkamy mág, jänkamy sĩ ke gé. ¹⁰Kỹ saco ma mũ tũg nĩ gé, bolso ên. Kur tỹ vãnh kri rĩnh tũg nĩ, pẽn né ù gé mũ tũg nĩ gé, pẽn to ró ên. Kỹ vătó vyn tũg nĩ gé, kătó ti. Inh rãnhraj han ajag tóg mũ. Kỹ ag tóg to ajag jẽn ke mũ, vãnh kato, ha vemnĩ,” he tóg, Jesus ti.

¹¹“Kỹ ajag tóg kejên êmã ù tá junjun ke mũ. Tá ùn jykre há jãvãnh nĩ. Kỹ ên ãn ra gemnĩ. Ên ãn krêm ajag tỹ kurã ki kã panh ke ên tá krỹg nĩ. ¹²Kỹ ãn ên krêm nỹti fag mỹ: “Topê jé ajag ki rĩr, kỹ ajag

jé jatun mý nýtí nĩ,” hemnĩ. ¹³Fag tỹ ājag mý vĩ há han kỹ fag tóg jatun mý nýtí. Fag tỹ ājag mý vĩ há han tũ nĩn kỹ fag tóg jatun mý nýtí tũ nĩ. Fag javo ājag tóg jatun mý nýtí. ¹⁴Kejēn ũ tóg ājag mý: “kāge jēg ra,” henh ke tũ nĩ, ěmā ũ tá. Kỹ tá kāpamnĩ, ag tỹ ājag vĩ mẽ jāvānh nýtĩn kỹ. Tá kāpa kỹ ājag pēn hā kykũnh nĩ. Kỹ ag tóg ki kanhró nýtí, Topē tỹ ag to kórég nĩ ti. ¹⁵Ha mẽ, ki hā sóg tó mũ. Kurā tỹ ěgno ki, isỹ vēnh kar jykre tugnỹm ke kurā ěn ki ag tóg jagāgtar nýtĩnh mũ sir, ag tỹ ājag vĩ mẽ jāvānh nýtĩn kỹ. Cidade tỹ Sodoma tá ke ag tóg jykre pāno nýtí ja nĩgtĩ, cidade tỹ Gomorra tá ke ag ke gé. Kỹ ag tóg jagāgtar nýtĩnh mũ gé, kurā ěn kã. Hã ra ũn tỹ ājag vĩ mẽ jāvānh ěn ag tóg ag jagāgtar kãfór han ke mũ (mỹr), ha mẽ,” he tóg, Jesus ti.

Ag tỹ Jesus tugerĩn ěg to jũnh ke

(Mc 13.9-13; Lc 21.12-17; 12.11-12)

¹⁶“Carneiro vĩ vēnh jy nĩgān han ki kagtĩg nýtí, mĩg tỹ ag mǎn sór nĩn kỹ. Carneiro ri ke ājag nýtí, hã ra sóg ājag jēgnēg mũ, ũ tỹ mĩg ri ke ag to, kỹ Topē hã tóg ājag jy nĩgān ke mũ sir. Hã kỹ vēnh ki rĩr há han nĩ. Pỹn jykre han nĩ. Vājig ti tĩ, pỹn ti, kỹ ěg tóg kǎnhmar ti tỹ hē ri ke tũ nĩgtĩ. Pỹn ri ke han nĩ. Kỹ sórāg jykre han nĩ gé. Jũ vānh pē ti nĩ, nén ũ vēnhmỹ han tũ ti nĩ. Kỹ sórāg ri ke han nĩ gé. ¹⁷Ěprā ke ag tóg ājag vóg kónān ke mũ, isugrĩn. Ājag pǎ'i ag mý ag tóg ājag kāmén ke mũ, ag tỹ ājag vóg kónān jé. Ājag vēnh kanhrānrān jafā krēm ag tóg ājag mrānmrān ke mũ. Hã kỹ vēnh ki rĩr há han nĩ. ¹⁸Fóg tỹ pǎ'i mág mý ag tóg ājag ven ke mũ, pǎ'i mág ũ ag mý ke gé. Isugrĩn ājag tóg vēnh jagtar tag venh ke mũ, ājag tỹ ag mý inh vĩ ti tó jé, fóg ag kar mý ke gé, kanhgág ag mý ke gé. ¹⁹Pǎ'i ag tỹ ājag jé ke kỹ to jykrén tũg nĩ, ājag tỹ ag mý nén tónh ke mũ ěn ti to. Topē kuprĩg hã ne ājag krĩn ke mũ, kỹ ājag tóg ti tỹ ājag mý nén tó

mũ ěn hã tónh ke mũ, hora ěn kã. ²⁰Hã kỹ ājag tỹ tó tũ vē sir. Ěg jóg kuprĩg tỹ ājag tỹ vēmén hã vē,” he tóg.

²¹“Hã ra ũ ag tóg ājag mré pafa mũ fag kāmén ke mũ, pǎ'i ag mý, ag tỹ fag kǎgtén jé. Kỹ ũ ag tóg ājag krē kāmén ke mũ gé. Kỹ ũ ag tóg ājag han mũ fag kāmén ke mũ gé, pǎ'i ag mý, ag tỹ fag kǎgtén jé, mýr, ha mẽ. ²²Vēnh kar vĩ ājag to jũ kỹ ājag vóg sór nýtí, isugrĩn. Hã ra ũ tỹ isovānh tũ ěn hã krenkren ke mũ, kurā tỹ ěgno ki,” he tóg, Jesus ti.

²³“Ag tỹ cidade ũ tá ājag vóg kónān kỹ, kỹ cidade ũ ra pētēmĩnĩ. Ki hã sóg tó mũ, ha mẽ. Israel ag cidade fin rǎm kǎn ke tũ ājag nĩ, kurā ěn kã. Sĩ ti nĩ, ag tỹ ājag vóg kónān ke kurā ti. Kǎtĩg jé sóg ke mũ, ag tỹ ge kỹ ājag vóg kỹ, mýr, ha mẽ. Tỹ sóg ěprā ke fi kósĩn nĩ, mýr, ha mẽ. ²⁴Aluno pi(jé) ā professor kǎfór nĩ. Ũn camarada pi(jé) ā patrão kǎfór nĩ. ²⁵Aluno tỹ ā professor ri ke nĩn kỹ tóg há tĩ. Ũn camarada tỹ ā patrão ri ke nĩn kỹ tóg há tĩ gé. Iso ag tóg: Belzebu, he ja nĩgtĩ, inh kato vāsānsān mũ ag, hã vĩ: Japo, he mũ, hã vĩ: Belzebu, he mũ. Tỹ sóg ājag professor ri ke nĩ, ājag patrão ri ke. Ag tỹ iso: Japo, hen kỹ ag tóg ājag to vĩ kónān ke mũ gé, ha vemnĩ, ājag tỹ inh jykre hã han ti kỹ,” he tóg, Jesus ti.

Ěg tỹ Topē hã kamēg ke

(Lc 12.2-7)

²⁶“Ge ra ag kamēg tũg nĩ, pǎ'i ag. Ěg tỹ pēju kỹ nén han mũ tóg vēnh ven kǎn ke mũ, ěg tỹ vēnh kar vatánh tá nén to jykrén mũ tóg vēnh ven kǎn ke mũ. ²⁷Isỹ vēnh kar vatánh tá ājag mý nén tó mũ tag tỹ vēnh kar mý tó kǎn nĩ. Isỹ komēr hã ājag mý nén tó mũ tag tỹ vēnh kar mý jamā há ra tómnĩ. ²⁸Mũmēg tũg nĩ, ag kamēg tũg nĩ, pǎ'i ag. Ěg tén há ag nýtí, hã ra ag tóg nũgme ki ěg vām ke kagtĩg nýtí, pǎ'i ag. Ũn pir kamēg nĩ, hã vĩ: Topē, he mũ. Tĩ hã ne ěg tén kar kỹ nũgme ki ěg vām ki kanhró nĩ, in-

ferno ki, kŷ ti hã kamêg nĩ. ²⁹ Ha vé. Sēsĩ vender he ag tĩ, jãnkamy to, kŷ ag tóg ùn régre to jãnkamy pir mǎg tĩ. Hã ra Topê tóg jēsĩ ag ki rĩr tĩgtĩ. Tĩ tŷ: “hej,” hen kŷ êg tóg ag pin tĩ, ke tũ nĩn kŷ êg tóg ag krenkren tĩ. ³⁰ Hã ki Topê tóg ag ki rĩr tĩgtĩ, sēsĩ ag ki. Êg ki rĩr tóg tĩ gé, Topê ti. Êg tŷ nén vég mũ kar ki kanhró tóg nĩ. Hã kŷ tóg êg gǎnh kar nĩgkrén ja nĩ gé, Topê ti. ³¹ Hã kŷ pã'i ag kamêg tũg nĩ. Jēsĩ kǎfór ājag tóg nŷtĩ, Topê mŷ. Ājag kǎmĩ ùn pir tóg sēsĩ e kǎfór nĩ, ti mŷ,” he tóg, Jesus ti.

Êg tŷ Jesus kǎmén ke

(Lc 12.8-9)

³² “Hã kŷ inh kǎmén nĩ, ěprã ke ag mŷ. Ājag tŷ ag kamêg tũ nĩn kŷ ag mŷ inh kǎmén kŷ sóg inh jóg tŷ kanhkã tá nĩ ěn mŷ ājag kǎmén ke mũ gé, kurã ěn kǎ. ³³ Ājag tŷ hã ra inh kǎmén tũ nĩn kŷ sóg inh jóg tŷ kanhkã tá nĩ ěn mŷ ājag kǎmén ke tũ nĩ gé, kurã ěn kǎ, ājag tŷ iso: “ti ki kagtĩg sóg nĩ,” hen kŷ,” he tóg, Jesus ti.

Êg tŷ êg jykre fĩnh ke

(Lc 12.51-53; 14.26-27)

³⁴ “Ājag hŷn iso: “vênh kar tŷ jagnê to há han jé tóg ke mũ,” he tĩ. Hã tũ vê, ù tŷ hên ri ke tŷ jagnê to jũ han jé sóg ke mũ, ha vemnĩ. ³⁵ Hã kŷ ù tóg ă panh kato tênh mũ, kŷ ù fi tóg ă mŷnh fi kato tênh mũ gé. Kŷ ù fi tóg ă má fi kato tênh mũ gé, mŷr, ha mē. ³⁶ Tĩ mré ke ag vŷ tŷ tĩ kato vāsānsān mũ ag nŷtĩnh mũ, kŷ fi mré ke fag tóg fi kato vāsān ke mũ gé, ha mē. ³⁷ Iso há kǎfor nŷtĩmnĩ, ājag han mũ fag kri, ke tũ nĩ (mũ) ra ājag tóg inh mŷ há tũ nŷtĩ. Iso há kǎfór nŷtĩmnĩ, ājag krê kri, ke tũ nĩ (mũ) ra ājag tóg inh mŷ há tũ nŷtĩ. ³⁸ Isŷ inh cruz va tĩg ri ke han nĩ gé, isŷ tá ter ke ti, hã vŷ: iser ěn ri ke han sór mũ, he mũ. Ke tũ nĩ (mũ) ra ājag tóg inh mŷ há tũ nŷtĩ. ³⁹ Ājag tŷ iser ri ke han sór tũ nŷtĩn kŷ ājag tóg nũgme ki kutênh mũ, ājag tŷ ājag jykre tovǎnh sór tũ nŷtĩn

kŷ. Ājag tŷ isugrĩn kǎgter sór kŷ ājag tóg rĩr krŷg ja tũ ěn venh ke mũ, ājag tŷ ājag jykre tovǎnh kŷ,” he tóg, Jesus ti.

Topê tŷ êg mŷ nén ù há tónh ke

(Mc 9.41)

⁴⁰ “Ũ tŷ ājag mŷ: hej, hen kŷ tóg inh mŷ: hej, he mũ gé sir, kŷ tóg inh ki rã mũ sir. Tĩ tŷ inh ki rã kŷ tóg ù tŷ inh jênêg mũ ěn ki rã mũ gé sir, hã vŷ: Topê, he mũ. ⁴¹ Ũ tóg Topê vĩ tó ti ag mŷ: “hã kǎrã,” he tĩ, ag tŷ Topê vĩ tó tĩ tugrĩn. Tĩ tŷ ag mŷ vĩ há han kŷ tóg Topê mŷ há nĩ sir. Kŷ tóg kejên ti mŷ nén ù há tónh ke mũ, Topê tĩ, ù tŷ tĩ vĩ tó tĩ ag mŷ: “hã kǎrã,” he mũ ěn mŷ. Ũ tóg ùn jykre kuryj ag mŷ: “hã kǎrã,” he tĩ, ag jykre kuryj nŷtĩ tugrĩn. ěn mŷ tóg nén ù há tónh ke mũ gé, Topê ti. ⁴² Ũ tóg kejên ùn sĩ mŷ nén ù nĩm tĩ, goj hên ri ke mũn. Ũn sĩ tŷ inh ki rã nĩ tugrĩn tóg ti mŷ nén ù nĩm tĩ. ěn mŷ tóg nén ù há tónh ke mũ gé, Topê ti. Tĩ pi(jé) to nén ù há venh ke tũ nĩ,” he tóg, Jesus ti.

João Batista tŷ Jesus ki jēmē

(Lc 7.18-35)

11 Jesus tŷ ă mré mũ tĩ ag mŷ tó kǎn kŷ tóg tá kǎkutê mũ sir, ù tŷ 12 (ke) ag mré. Kŷ tóg cidade kar mĩ tĩ mũ sir, vênh kar kanhrǎn kŷ, ag mŷ Topê vĩ tón kŷ. ² Kŷ kejên João tóg ti kǎme mēg mũ. Se kŷ tóg nĩ nĩ, João ti, hã ra tóg Jesus tŷ nén han mũ mēg mũ sir. Kŷ tóg Jesus mŷ vênh vĩ jênêg mũ, ă mré mũ tĩ ag tŷ, João ti. ³ Kŷ tóg Jesus mŷ: “ă hã mŷ?” he mũ. “Êg tŷ ùn jāvǎnh mũ mŷ tŷ ă nĩ?” Topê tŷ ùn jênêg mũ hã mŷ tŷ ă nĩ?” he tóg. “Êg mŷ ù jāvǎnh mǎn ke tũ nĩ ha', ă pǎte?” he tóg, João Batista ti, Jesus mŷ.

⁴ Kŷ Jesus tóg ti mŷ vênh vĩ jênêg mũ gé sir. “Ha João mŷ ājag tŷ nén vég mũ tag ti tómnĩ, ājag tŷ nén mēg mũ tag ti, ha mē,” he tóg. ⁵ “Tag han inh tĩ, ha mē: ùn kyvó ag vŷ isugrĩn ěvǎnh há nŷtĩ. Ũn

kānhgrī ag vỹ mũ há han mũ, ũ tỹ vênh kaga kren vánh han mũ ên ag krenkren han inh tĩ, lepra han mũ ag. Ũn kutu ag vỹ êmê há nỹtĩ ha, ũn kăgter mũ ag vỹ rĩnrĩr măn nỹtĩ. Ũn jagăgtar ag vỹ Topê vỹ mễg tĩ, ũ tỹ kanhkă tá nĩ ên tỹ tỹ êg pã'i nĩnh ke to. ⁶Kỹ tóg ti tỹ iso jykrén kónăn tũ nĩn kỹ há' he mũ. Kỹ Topê tóg ti ve há han mũ. Tag tómni, João mỹ,” he tóg, Jesus ti. ⁷Kỹ ag tóg sir mũ mũ, João mỹ tó jé, ti mré mũ ti ag.

Ag mũn kỹ Jesus tóg vênh e ag mỹ João kămén mũ. “Ăjag tỹ êmă tũg ja ra mũn kỹ, ti ve jé, kỹ ti jykre hỹn ne ri ke nĩ, ăjag mỹ?” he tóg. “Kejên kăka tóg goj jagma kră tỹ man man ke tĩ. João jykre mỹ ăjag mỹ tag ri ke tũ nĩ? Hỹ, ri ke tũ ti nĩ. ⁸Kỹ ti jykre hỹn ne ri ke nĩ, ăjag mỹ? Ti mỹ ăjag mỹ ũn kur sĩnvĩ ag jykre ri ke nĩ? Vó, ũn kur sĩnvĩ ag vỹ cidade mág tá nỹtĩ, pã'i mág ĩn krêm. ⁹Kỹ ti jykre hỹn ne ri ke nĩ, ăjag mỹ? Ti jykre mỹ ăjag mỹ Topê vỹ tó tĩ jykre ri ke nĩ? Hỹ, Topê vỹ tó tĩ vỹ mỹr. Hă ra tóg Topê vỹ tó tĩ ag kăfór kar nĩ, João ti. ¹⁰Topê vỹ João jênê, ti tỹ ỉo tĩg jé. Hă kỹ tag tóg ti to rán kỹ nĩ, Topê vỹ ki, ha mẽ. “Ha vé, ă jo sóg ũ jênênh mũ, ti tỹ vênh kar jykre tỹ há' hen jé, ă tĩg ken jo,” he ja tóg nĩ, Topê ti, João to, iso ke gé,” he tóg, Jesus ti. “Ag jyvên jé tóg ke mũ, kỹ tóg êpyr kure ri ke nĩ, êmĩn kuryñh ri ke,” he ja tóg nĩ, Topê vỹ tỹ rán kỹ nĩ ki, João to. ¹¹Ki hă sóg tó mũ, hă kỹ sóg ke mũ, ha mẽ. Êpră ke ag kăfór kar ti nĩ, João ti, Topê vỹ tón ki. ũ tỹ ga kri mũ ag kăfór kar ti nĩ. Hă ra ũ tỹ hên ri ke ag tóg ũ tỹ kanhkă tá nĩ ên tỹ tỹ êg pã'i nĩnh ke ên venh ke mũ. Ag tỹ venh ke mũ (hă) ra ag tóg kăsir nỹtĩnh mũ. Ũn kăsir ên ag tỹ êgno pẽ ên tóg João kăfór nĩnh mũ, hă ra,” he tóg, Jesus ti.

¹²“João Batista kătĩg kar kỹ êg tóg văsân kỹ (êg tóg) ũ tỹ kanhkă tá nĩ ên tỹ tỹ êg pã'i nĩ venh ke mũ. Êg văsân kỹ êg tóg venh ke mũ. ¹³Topê vỹ tó tĩ ag

kar vỹ Topê vỹ tó ja nĩgtĩ. Kỹ tóg rán kỹ nĩ gé, Topê tỹ êg jyvên mũ ti. Kỹ João tóg tó ja nĩ, ag nón. ¹⁴João vỹ Elias ri ke nĩ. Tag to jykrén. Rán kỹ tóg nĩ, Topê vỹ tỹ rán kỹ nĩ ki, Elias kătĩg măn ke ti, Cristo kătĩg ken jo. Ti hă vỹ, João hă vỹ, Elias kătĩg măn ên ti. ¹⁵Ũ nĩgrêg nỹtĩ tỹ tỹ jêmê jé, to jykrén jé,” he tóg, Jesus ti.

¹⁶“Ũri ke ag vỹ ge nỹtĩ gé, ha mẽ. Gĩr ag ri ke ag tóg nỹtĩ. Gĩr ag vỹ jagnê mré kanhinnhir mũgtĩ. Kỹ ag tóg ăjag mré ke ag jé prêr tĩgtĩ, “mũ nỹ, kanhinnhir jé,” hen kỹ. Kỹ ag tóg kejên jũgũ tĩ. ¹⁷“Ăjag mỹ êg tóg văkyn, kanhinnhir kỹ, hă ra ăjag ne vênh gringrén jăvánh nỹtĩ,” he ag tóg tĩ, gĩr ag, jagnê mỹ. “Ăjag vênh gringrén jăvánh nỹtĩnh kỹ êg tóg vêsỹrénh mũ sir, êg kanhinnhir kỹ, hă ra ăjag tóg êg mré fỹ jăvánh nỹtĩ gé,” he ag tóg tĩ gé, ón kỹ jagnê to jũ kỹ, gĩr ag. ¹⁸Gĩr tag ag ri ke ăjag nỹtĩ, João to, iso ke gé. João vỹ văkre ja nĩgtĩ, jên mág tũ, kron tũ. Kỹ ăjag tóg ti to: “jagrê kórég ti nĩ,” he ja nĩgtĩ, ti văkre to. ¹⁹Ti jăvo sóg văkrég tũ nĩgtĩ, jêg sóg nĩgtĩ, kron sóg nĩgtĩ, kỹ ăjag tóg iso: “ti hă ne jên mág nĩgtĩ, ti hă ne kronkron nĩgtĩ, ti hă ne governo mỹ jănkamy mág tĩ ag to há nĩgtĩ, ti hă ne Topê vỹ mranh tĩ ag hă to há nĩgtĩ,” he ăjag tóg sir, iso, êpră ke fi kósĩn to. Kỹ João jykre tóg ăjag mỹ kórég nỹ, ti văkre to. Jăvo inh jykre tóg ăjag mỹ kórég nỹ gé, inh văkrég tũ to. Hă ra êg tỹ ũ jykre tugnỹm kỹ êg tóg ti jykre há ên ki kanhró nỹtĩ sir. Kỹ tóg tỹ Topê krê nĩ sir, ũn jykre há ti, kỹ êg tóg ti ki Topê jykre ki kanhró nỹtĩ sir,” he tóg, Jesus ti. Ti tỹ ag mỹ João kămén hă vỹ.

Jesus tỹ cidade ũ tá ke ag mỹ vỹ kónăn
(Lc 10.13-15)

²⁰Kỹ Jesus tóg cidade tá ke ag mỹ vỹ kónăn mũ sir. Cidade tỹ hên ri ke ki tóg êg tỹ nén han vánh hyn han ja nĩgtĩ, mi-lagre ti, hă ra ag tóg ăjag jykre továnh sór ja tũ nĩgtĩ, ti ki ag tóg ge sór ja tũ

nĩgtĩ. Hã kũ tóg sir ag to vĩ kónān ja nĩ, ha mẽ. ²¹ “Sỹ cidade tỹ Corazim ki ke ag mỹ tag tó sór mũ, ha mẽ,” he tóg. “Kórég ve jé ājag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ, ha mẽ,” he tóg. “Kórég ve jé ājag tóg ke mũ gé,” he tóg. “Milagre tỹ hēn ri ke hyn han isóg ājag mỹ, hã ra ājag tóg ājag jykre tovānh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg ěg tỹ nēn han vānh ěn hyn han ja tũ nĩ. Sỹ tá milagre ěn hyn han mũ ra ag tóg ājag jykre tovānh mũ vễ, vāsỹ,” he tóg. “Kygfỹ ag mũ vễ, ājag mỹ e tĩn kũ, ag jykre pāno ěn, sỹ ag mỹ tó (hã) ra. Ag jāvo ājag tóg tovānh sór tũ nĩ, to jykren sór tũ nĩ,” he tóg. ²² “Tiro tá ke ag vỹ vēsỹrēnh ke mũ, kurā tỹ ěgno ěn ki, Sidom tá ke ag ke gé, ag jykre pāno to. Hã ra ājag tóg ag vēsỹrēnh kǎfór han ke mũ, ha vemnĩ, ājag tỹ inh vэг mũ ra inh ki ge sór ja tũ nĩn kũ. Ki hã sóg tó mũ,” he tóg, Jesus ti.

²³ “Sỹ cidade tỹ Cafarnaum ki ke ag mỹ tag tó sór mũ, ha mẽ,” he tóg. “Ũri tóg ver ājag mỹ sér ti,” he tóg. “Ājag tỹ kanhkā jykre vэг nỹti ra ājag tóg to jykren tũ nĩ, hã kũ ājag tóg nũgme ki vǎr ke kǎn mũ. Cidade tỹ Sodoma tá ke ag vỹ ājag jykre pāno to kǎgter. Ag tỹ sỹ ājag mỹ nēn han mũ vэг mũ ra ag vāsỹ to jykren mũ vễ, kũ ag kǎgter ke tũ nĩ vễ. Kũ ěg tỹ ũri ag jamā ve vễ vễ. ²⁴ Kurā tỹ ěgno ki ag tóg vēsỹrēnh ke mũ, Sodoma tá ke ag. Hã ra ājag tóg ag vēsỹrēnh kǎfór han ke mũ, sỹ vēnh kar jykre tugnỹm ke kurā ěn kǎ, ājag tỹ inh vэг mũ ra inh ki ge sór tũ nỹtin kũ,” he tóg, Jesus ti.

Jesus tỹ ěg krĩ tỹ kǎnhvỹ' henh ke
(Lc 10.21-22)

²⁵ Kũ Jesus tóg tag tó mũ gé, ha mẽ. “Jóg’,” he tóg. “Tỹ ā tóg kanhkā tǎn ag kǎfór kar nĩ, kar ā tóg tỹ ěprā ke ag kǎfór kar nĩ gé,” he tóg. “Inh mỹ tóg há tĩ, ā tỹ nēn han mũ ti. Ũ tỹ: “ki kanhró mág inh

nĩ,” he mũ ag mỹ ā tóg ā jykre ven ja tũ nĩ. Ag mỹ ā tóg kāmén ja tũ nĩ. Ũ tỹ gĩr ri ke ki kagtĩg ag hã mỹ ā tóg ven ja nĩ, ā jykre ti,” he tóg.

²⁶ “Hỹ, hã vễ. Ā tỹ nēn to jykren mũn hã vễ, hã kũ ā tóg ag hã mỹ ā jykre ti nĩm. Hã ra tóg há tǎvĩ nĩ, jóg’,” he tóg, Jesus ti.

²⁷ Kũ tóg ag mỹ: “inh jóg tóg inh mỹ tovānh kǎn, ā tỹ nēn han ja kar ti,” he mũ. “Kỹ ũ pi(jé) ti kósin ki kanhró nĩ’. Inh jóg hã ne inh ki kanhró nĩ’. Kũ ũ pi(jé) inh jóg ki kanhró nĩ gé’. Inh hã ne ti ki kanhró nĩ, isỹ tỹ ti kósin nĩn kũ. Hã ra sóg ājag mỹ ti kāmén jé kǎti mũ, inh jóg ti. Isỹ tag to ũn kupręg mũ ag hã mỹ sóg ti kāmén tĩ, inh jóg ti,” he tóg. ²⁸ “Ājag jagǎgtar nỹtin kũ, ājag tỹ Topě vĩ ki króm ki kagtĩg nỹti tugrĩn jagtar nỹtin kũ iso kāmũ jęg. Nēn ũ tỹ ājag mỹ jagy tĩn kũ iso kāmũ jęg. Ājag krĩ tỹ sóg kǎnhvỹ’ henh mũ mỹr, ha mẽ,” he tóg. ²⁹ “Inh mré kāmũ jęg. Ājag kanhrān jé sóg ke mũ. Komēr hã sóg vĩ tĩ. Inh pi(jé) vēsỹ ũn mág han tĩ, vĩ tar han vānh sóg nĩgtĩ. Ājag tỹ iso kāmũ kũ ājag krĩ tóg há’ henh mũ, ha vemnĩ. Kuprā’ he jé tóg ke mũ, ājag krĩ ti, ha vemnĩ,” he tóg. ³⁰ “Inh jykre pi(jé) kufy nĩ, ājag mỹ’. Isỹ ājag mỹ nēn tó mũ pi(jé) han kórég nĩ,” he tóg, Jesus ti.

Jesus tỹ vēnhkǎn ke kurā to pǎ’i

(Mc 2.23-28; Lc 6.1-5)

12 Kejēn Jesus tóg trigo jo ěpỹ mĩ tĩ mũ, ti mré mũ tĩ ag tóg ti mré mũ mũ. Vēnhkǎn ke kurā ki ke vễ, hã ra ag tóg kókĩnkĩr mũ, vējēn vэг tũ nĩn kũ. Hã kũ ag tóg trigo mó ěn tỹ kam ke kũ ko mũ sir. ² Kũ Fariseu ag tóg ag vэг mũ. Kũ ag tóg Jesus mỹ vĩ mũ. “Ha vé,” he ag tóg mũ ti mỹ. “Ā mré mũ tĩ ag ne tóg ājag tỹ nēn han ke tũ han mũ ha’, vēnhkǎn ke kurā ki’. Vēnh rǎnhrǎj vễ mỹr, ag tỹ trigo tỹ kam ke ti,” he ag tóg, Jesus, mỹ.

³Hã ra Jesus tóg ag mý: “vó,” he mû. “Davi tỹ nén han mû to jykrén nĩ,” he tóg. “Tĩ kókĩr nĩn kỹ tóg ã tỹ nén han ke tũ han gé, ti mré mû tĩ ag mré, hã ra Topê pi(jé) ti to jũ mû, ti tỹ ã tỹ nén han ke tũ han mû ra. ⁴Tag han ja ti nĩ, ha mẽ. Topê jo ãn kãra rã kỹ tóg tá Topê jamĩ ên kó, tỹ ã tỹ konh ke tũ ra. Kỹ tóg ã mré mû tĩ ag mý vin gé, Topê jamĩ ên. Topê tũ ki rĩr tĩ ag tỹ konh ke ja vè vè, Topê jamĩ ên, hã ra tóg ko ja nĩ, ti tỹ tỹ Topê tũ ki rĩr tĩ tũ ra, Davi ti. Hã kỹ tóg rãn kỹ nĩ, Topê vĩ tỹ rãn kỹ nĩ ki,” he tóg, Jesus ti.

⁵“Kỹ Topê tũ ki rĩr tĩ ag jykre to jykrén nĩ gé. Tỹ vènhkán ke kurã ra ag tóg rãnrhãj mũgtĩ, Topê jo ãn krêm, hã ra ag tóg Topê tũ ki rĩr tĩ. Hã kỹ ag tóg tỹ vènhkán ke kurã ra ki vènhkán tũ nĩgtĩ gé, ge ra ag jykre tóg há nĩ, Topê mý. Hã kỹ tóg rãn kỹ nĩ gé, Topê vĩ tỹ rãn kỹ nĩ ki. ⁶Ha mẽ, Topê jo ãn vỹ tỹ Topê tũ nĩ. Kỹ ag tóg ti tũ ki rĩr tĩ, tỹ vènhkán ke kurã ra. Hã ra sóg Topê jo ãn kãfór nĩ, Topê mý. Hã kỹ inh mré mû tĩ ag tóg Topê mý há nỹtĩ, ag tỹ vènhkán ke kurã ki vènhkán tũ ra,” he tóg, Jesus ti.

⁷“Kỹ Topê vĩ tag to jykrén nĩ gé, ha mẽ. “Ājag tỹ jagnẽ jagãgtãn kỹ tóg inh mý há ti,” he ja tóg nĩ. Topê ti. “Kỹ tag tóg inh mý ājag tỹ inh mý nén ã pũn kãfór nĩ, ājag tỹ jagnẽ jagãgtãn tag ti,” he ja tóg nĩ. Topê ti. Ājag tỹ tag to jykrén mũ ra ājag tóg inh mré ke ag to jũnh ke tũ nĩ vè. Ag kókĩr vè mýr. Nén ã kórég han ja tũ ag tóg nĩ,” he tóg, Jesus ti. ⁸“Hã ra sóg tỹ vènhkán ke kurã to pã'i nĩ. Tỹ sóg êprã ke fi kósín nĩ” he tóg, Jesus ti, Fariseu ag mý.

Jesus tỹ ãn nĩgé tóg tỹ há' he

(Mc 3.1-6; Lc 6.6-11)

⁹Kỹ tóg ėmã ėn tá kutẽ kỹ ėmã ã ra tĩ mũ, kỹ tóg ėg vènh kanhrãn jafã kãra rã mũ sir. ¹⁰Tã ã tóg nĩ nĩ, ti nĩgé tóg tóg ja nĩ. Kỹ ag tóg Jesus mý: “mý há nỹ

vỹ, ėg tỹ vènhkán ke kurã ki ã kygtag ke ti?” he mũ. Hã ra ag tóg pã'i ag mý: “vènhkán ke kurã ki tóg Topê vĩ mranh tĩ, ã kygtag kỹ,” he sór mũ. Hã kỹ ag tóg ti ki jēmēg mũ. Ag mý tóg tỹ vènh rãnrhãj nĩ, ã kygtag ti. Vènhkán ke kurã ki ėg nēji ã kygtag ke tũ nĩ.

¹¹Hã ra Jesus tóg ag mý: “ājag mēg tỹ vènhkán ke kurã ki kãgnó ki kutẽ kỹ, ājag mý ti kunũnh ke tũ nĩ, tỹ vènhkán ke kurã nĩn kỹ?” he mũ. “Tĩ kunũnh jé ājag tóg ke mũ. Kỹ to jykrén nĩ. ¹²Ėg mré ke vỹ ėg mēg kãfór nĩ,” he tóg. “Kỹ tóg há nĩ, ėg tỹ ėg mré ke kygtag kỹ, tỹ vènhkán ke kurã ra,” he tóg.

¹³Kỹ tóg ãn nĩgé tóg ėn mý: “ã nĩgé tỹ krỹg' hé,” he mũ. Kỹ tóg tỹ krỹg' he mũ sir. Hã ra tóg há' he mũ. Tĩ nĩgé há ėn hã ri ke tóg nĩ, ti nĩgé kórég ja ti.

¹⁴Kỹ Fariseu ag tóg jũgũ kỹ pa mũ sir, ãn ėn ki. “Ėg hỹn hẽ ri kenh mũ, ti tén jé?” he ag tóg mũ, Jesus to. ¹⁵Hã ra Jesus tóg ki kanhró nĩ, ag tỹ ti tén sór mũ ti. Kỹ tóg sir tá kãkutẽ mũ, ėmã ã ra tĩg jé.

Isaías tỹ Jesus kãmén ja

Tĩ tĩg kỹ ãn tỹ hèn ri ke ag tóg ti nón mũ mũ sir, ãn kagyga ag ke gé, fag ke gé. Kỹ tóg ag tỹ há' he kãn mũ sir, fag tỹ ke gé, Jesus ti. ¹⁶Kỹ tóg ag mý: “ker isỹ ājag tỹ há' he kãmén hẽ,” he mũ. ¹⁷Hã ra tóg rãn kỹ nĩ gé, ti tỹ ag tỹ há' he mũ tag ti. Isaías ti, ã tỹ vãsỹ Topê vĩ rãn tĩ ėn hã vỹ Jesus to tag rãn ja nĩ, ti tỹ Topê vĩ tó kỹ. ¹⁸Topê vĩ tag tó ja ti nĩ, ha mẽ: “ha vé, sỹ ãn kuprēg mũ ėn,” he tóg, Topê ti,” he ja tóg nĩ, Isaías ti. “Inh camarada ri ke ti nĩ, ti tỹ isỹ nén tó mũ ėn ki króm há han kỹ. Inh fe pẽ vègtĩ, sỹ ti ve kỹ tóg inh mý sér tĩ. Tĩ hã mý sóg inh kuprĩg jēnēnh mũ, kỹ tóg inh vĩ tónh mũ sir. Fóg ag mý tóg tónh mũ, kanhgág ag mý ke gé, isỹ ag jykre tugnỹm ke ti,” he tóg, Topê ti,” he ja tóg nĩ, Isaías ti. ¹⁹“Vĩ jũ han ke tũ ti nĩ, jũ kỹ vĩ tar han ke tũ ti nĩ gé. Re tá ag tóg ti vĩ mēnh ke tũ nĩ gé. Komēr hã

tóg vīnh mū,” he tóg, Topē ti. ²⁰ “Ēprā ke ag t̃y inh vī mranh k̃y ag tóg vān t̃y ā t̃y tóg’ he k̃y kam ke ěn ri ke ñt̃i. Hā ra ti pi(jé) ag t̃y kam ke k̃an ke mū’, is̃y ũ to: inh fe, he mū ěn ti. Něj gru t̃y nhyn ke sór ri ke ag ñt̃i gé. Ti pi(jé) ag t̃y nhyn kenh ke mū’, hā ra’. Ag m̃y tóg vī há han ke mū. Tag kar k̃y sóg kejēn vēnh kar jykre tugñm ke mū. ²¹ Ēn k̃a ũ t̃y ti ki ge k̃y ñt̃i ag hā ṽy krenkren ke mū, fóg ag mré hā, kanhgág ag mré hā,” he tóg, Topē ti,” he ja tóg ñi, Isaiás ti, Jesus to. Hā ra tóg ge ñgt̃i.

Jesus t̃y Japo jykre tó

(Mc 3.20-30; Lc 11.14-23)

²² Kejēn ag tóg Jesus to ũ pére kāmū mū, ũn kyvó. Vī vānh tóg ñi gé. Hā ra tóg jagrē kórég ñi gé, hā k̃y tóg ge ñgt̃i. K̃y Jesus tóg ti t̃y há’ he mū sir. K̃y tóg vī há’ he mū sir. Ve há’ he tóg mū gé sir. ²³ K̃y tóg vēnh kar m̃y e tāṽi t̃i. K̃y ag tóg jagnē m̃y: “Davi kósin ěn t̃y m̃y?” he mū sir, Jesus to. “Ũ t̃y vās̃y rán k̃y ñi ěn t̃y m̃y?” he ag tóg mū. Ag m̃y tóg ti hā ñi ve ñi.

²⁴ K̃y Fariseu ag tóg mēg mū sir, Jesus t̃y ti t̃y há’ he mū ti. Hā ra ag tóg Jesus to: “jagrē kórég ti ñi,” he mū. “Nén-Kórég ag p̃a’i t̃y ti jagrē ñi, Belzebu ěn t̃y,” he ag tóg mū. “Hā k̃y tóg Nén-Kórég ag pan t̃i, hā k̃y tóg ag jagrē kórég ag pan t̃i. Nén-Kórég ag p̃a’i jykre t̃y tóg ag pan t̃i,” he ag tóg, Fariseu ag.

²⁵ Hā ra Jesus tóg ki kanhró ñi, ag t̃y ñen to jykrén mūn ki. K̃y tóg ag m̃y: “p̃a’i pir krēm ke ag t̃y jagnē kato tēgtē k̃y ag tóg jagnē k̃agtēn k̃an ke mū,” he mū. “Ēm̃a pir ki ke ag t̃y jagnē kato tēgtē k̃y, ĩn pir krēm ke fag t̃y jagnē kato tēgtē k̃y fag tóg vēnh k̃ap̃am k̃y ñt̃inh mū, k̃y fag tóg jagnē k̃agtēn k̃an ke mū. ²⁶ Ge ti ñi gé, Nén-Kórég ag. Nén-Kórég t̃y Nén-Kórég ũ kutēm k̃y tóg Nén-Kórég ag t̃y jagnē kato tēgtē han mū sir. K̃y ag tóg jagnē t̃y t̃u’ henh ke mū gé, Satanás ag.

²⁷ “Belzebu t̃y tóg Nén-Kórég ag pan t̃i,” he ājag tóg t̃i iso. Jāvo ājag mré ke ag h̃yn vēnh jykre t̃y ne t̃y vēnh jagrē kórég ag pan t̃i? Ag m̃y Nén-Kórég ag jykre ki ag pan mū gé, Topē jykre ki m̃y vó? Topē jykre ki ag tóg ag pan t̃i. Ājag t̃y tag to jykrén k̃y ājag tóg inh jykre há ki kanhrān ke mū vē,” he tóg ag m̃y, Jesus ti. ²⁸ “Topē kuprīg jykre t̃y sóg Japo ag pan t̃i m̃y. Topē kuprīg t̃y Japo ag pan k̃an k̃y Topē tóg t̃y ěg p̃a’i ñi vē m̃y. Tag to jykrén ñi,” he tóg, Jesus ti.

²⁹ m̃an sór k̃y, ti ĩn tá, k̃y ěg tóg ti se vén t̃i, ke t̃u ñi (mū) ra tóg ā t̃u ki r̃ir ke mū, k̃y ěg tóg ti t̃u m̃an t̃y h̃e ri kenh ke t̃u ñgt̃i, ti tar ñin k̃y. ěg t̃y ti se kar k̃y ěg tóg ti t̃u m̃ag mū sir,” he tóg. “Ge ti ñgt̃i, s̃y ñen han mū ti. Tar ti ñi, Japo ti. Hā ra sóg hur ti sé, hā k̃y sóg ti t̃u ag kygvān ke mū sir. Ag jagrē kórég pan sóg mū sir,” he tóg, Jesus ti.

³⁰ “Ājag t̃y t̃y inh mré ke t̃u ñt̃inh k̃y ājag tóg inh kato tēgtē mū. Ājag t̃y inh mré ěprā ke ag t̃y Topē to kāmū han t̃u ñin k̃y ājag tóg ag kāmū kamēg mū,” he tóg.

³¹ “Hā k̃y sóg ājag m̃y tó mū. Ājag t̃y Topē vī mranh mū ra tóg ājag m̃y vēnh p̃ate fón sór mū, Topē ti. Ājag t̃y Topē to vī kónān mū ra tóg ājag m̃y vēnh p̃ate fón sór mū gé. Ājag t̃y hā ra Topē kuprīg to: “Japo t̃y ěg jagrē vē,” hen k̃y tóg ājag m̃y vēnh p̃ate fón m̃an ke t̃u ñi ha sir, Topē ti,” he tóg, Jesus ti. ³² “Ājag t̃y iso vī kónān mū. Ājag t̃y hā ra Topē kuprīg to vī kónān k̃y tóg ājag m̃y vēnh p̃ate fón m̃an ke t̃u ñi ha. Ājag t̃y ga kri mūn k̃y tóg ājag m̃y vēnh p̃ate fón m̃an ke t̃u ñi, Topē ti, ājag ter kar k̃y tóg ājag m̃y vēnh p̃ate fón m̃an ke t̃u ñi gé,” he tóg, Jesus ti.

Ka to comparação

(Lc 6.43-45)

³³ “Ēg t̃y ka kanē ko há krān k̃y ti kanē ṽy ko há ñi, ěg t̃y ka kanē ko vānh krān

kỹ ti kanē vỹ ko kórég nĩ gé. Ēg tỹ ti kanē ve kỹ ěg tóg: “ũn kanē ko vānh ja vē,” henh ke mũ. Ge ti nĩgtĩ, ěg jykre ti. Ũn jykre há tóg há nĩ, ũn jykre kórég tóg kórég nĩ gé. ³⁴ Pỹn ri ke ājag nỹtĩ. Kórég tāvĩ ājag nỹtĩ, hã ra ājag tóg ón kỹ nén ũ há tó sór tĩ. Ēg jēnky ki tóg kutē tĩ, ěg tỹ nén to jykrén mũ ti. Ēg jykre kórég tāvĩ nĩn kỹ ěg tóg nén ũ kórég tāvĩ tó tĩ. Hã kỹ ājag pi(jé) tó há han tĩ. ³⁵ Ũn jykre há vỹ nén ũ há kar to jykrén tĩ, kỹ tóg ěg mỹ tó há han tĩ gé sir, Ũn jykre kórég vỹ nén ũ kórég kar to jykrén tĩ, kỹ tóg ěg mỹ tó kónān tĩ gé sir,” he tóg, Jesus ti.

³⁶ “Ki hã sóg tó mũ ājag mỹ, hã kỹ sóg ke mũ kurā tỹ ěgno ki, sỹ vēnh kar jykre tugnỹm ke kurā ěn ki sóg ājag vỹ tugnỹm ke mũ. Kỹ ājag tỹ ón kỹ vỹ ja nĩn kỹ sóg ěn venh ke mũ gé. Ājag tỹ nén tó ja kar tugnỹm jé sóg ke mũ, ha vemnĩ,” he tóg, Jesus ti. ³⁷ “Ājag tỹ vỹ há han ja nĩn kỹ ājag tóg inh mỹ há nỹtĩ gé. Ājag tỹ vỹ kórég han ja nĩn kỹ ājag tóg inh mỹ kórég nỹtĩ. Kỹ ā kato tē mũ ag mỹ Topē jykre tón hã vē.

Ag tỹ milagre ve sór

(Mc 8.11-12; Lc 11.29-32)

³⁸ Kỹ Topē vỹ to professor ũ ag tóg Fariseu ũ ag mré Jesus mỹ: “Senhor,” he mũ. “Ēg tỹ ā tỹ milagre han venh há tóg tĩ,” he ag tóg mũ, Jesus mỹ.

³⁹ Kỹ Jesus tóg ag mỹ: “kórég ājag nỹtĩ,” he mũ. “Topē ki ge sór vānh ājag tóg nỹtĩ,” he tóg. “Ājag tỹ milagre ve sór mũ tag venh ke tũ ājag tóg nĩ. Nén pir hã ve jé ājag tóg ke mũ, hã vỹ: Jonas tỹ nén ve ja ěn ri ke, he mũ, vāsỹ Topē vỹ tó tĩ ěn tỹ nén ve ja ěn ri ke. ⁴⁰ Jonas ěn vỹ goj tân nug kākā nĩ ja nĩ, kurā tăgtũ ki, kuty tăgtũ ki ke gé. Tag ri ke ve jé sóg ke mũ gé. Ga krēm sóg nỹnh mũ, kurā tăgtũ ki, kuty tăgtũ ki ke gé. Tỹ sóg ěprā ke fi kósín nĩ,” he tóg, Jesus ti.

⁴¹ “Kỹ Nínive tá ke ag vỹ ājag kato vĩnh ke mũ sir, kurā tỹ ěgno ki, ha

vemnĩ. Ag tỹ Jonas vỹ mẽ kỹ ag tóg ājag jykre kórég tovānh, Nínive tá ke ag. Tỹ sóg Jonas káfór nĩ, hã ra ājag tóg ājag jykre kórég tovānh sór tũ nĩ, sỹ Nínive tá ke ag jāvo ājag mỹ tó mũ ra. Hã kỹ ag tóg ājag jykre kórég tónh ke mũ, kurā ěn kã, ha vemnĩ. ⁴² Kỹ pã'i mág ěn fi, pã'i tỹ rainha ěn fi, ũ tỹ kanhkã fyn ja tá kătĩg ja ěn fi vỹ nĩnh ke mũ gé, kurā tỹ ěgno kã. Ājag mré fi tóg jēnh ke mũ, kỹ fi tóg ājag to vỹ kónān ke mũ gé. Kanhkã fyn ja tá fi tóg kătĩg ja nĩ, vāsỹ, fi tỹ Salomão vỹ mẽ jé. Salomão káfór vỹ tỹ inh nĩ, hã ra ājag tóg inh vỹ jēmē jāvānh nỹtĩ,” he tóg, Jesus ti.

Vēnh jagrē kórég jykre

(Mc 11.24-26)

⁴³ “Kejēn sóg vēnh jagrē kórég ũ kutēm mũ. Kỹ sóg ga kórég mĩ tĩ mũ, ti jagrē ěn tĩ. Goj venh ke tũ tóg nĩ tá. Vēnhkán ke tũ tóg nĩ gé, ti tỹ hē ri ken kỹ vēnhkán ke tũ tĩn kỹ. ⁴⁴ Kỹ tóg vāhã to jykrén mũ sir. “Inh hỹn ěn ra tĩg mǎn ha, sỹ ũ tá kăkutē ja ěn ra. Inh mỹ tóg tỹ ĩn ri ke ja nĩ. Kỹ inh hỹn tóg ti kăra rǎ mǎn ha,” he tóg mũ sir, ti jagrē ja ěn tĩ. Kỹ tóg ti venh tĩ mũ sir. Hã ra tóg sir krĩ há nĩ, kỹ tóg ti mỹ ĩn há ri ke nĩ sir, ĩn prur, ĩn kuprǎ, ĩn sǐnvĩ ri ke. ⁴⁵ Kỹ tóg Nén-Kórég tỹ 7 (ke) ag mỹ tónh tĩ mũ sir. “Ha kāmũ jēg he tóg mũ sir. Hã ra ag jykre pǎno tóg ti jykre pǎno káfór nĩ. Kỹ ag kar tóg ũ ěn kǎge mũ, tỹ ag ti jagrē nỹtĩ, isỹ ũn mỹ ti jagrē pir kutēm ja ěn tĩ. Hã kỹ to, kórég tāvĩ nĩ sir. Ti jagrē pir kutēm inh nĩ vē, hã ra tỹ 8 (ke) ag tóg sir tỹ ti jagrē nỹtĩ, ti tỹ inh ki rǎ tũ nĩn kỹ. Ājag mỹ tóg ge nĩnh mũ, kurā tỹ ěgno ki. Ũri ājag jykre vỹ pǎno nỹ. Hã ra kurā ěn ki tóg sir pǎno káfór nỹnh mũ. Kỹ ājag tóg sir to jagtar tāvĩ nỹtĩnh mũ,” he tóg, Jesus ti.

Jesus mré ke pë fag

(Mc 3.31-35; Lc 8.19-21)

⁴⁶Ti tỹ ver tỹ vēmén kỹ ti mỹnh fi tóg tá jun mũ sir, ti jāvỹ ag mré. Ti mỹ fag tóg vênh vĩ jēnēg mũ, fag tỹ ti mré vēmén jé. ⁴⁷Kỹ ũ tóg ti mỹ tónh kătĩ mũ. “Ă mỹnh fi vĩ re tá jē, ă jāvỹ ag mré. Fag tỹ ă mré vēmén ke nējĩ,” he tóg, Jesus mỹ. ⁴⁸Kỹ tóg ũ tỹ ti mỹ tó mũ ěn mỹ: “inh mỹnh fi mỹ inh ve sór mũ, inh jāvỹ ag mré?” he mũ. “Inh mỹnh pẽ fi pijé, inh jāvỹ pẽ ag pijé,” he tóg. ⁴⁹Kỹ tóg ti mỹ ă mré mũ ti ag ven mũ sir, ă nĩgẽ tỹ. Kỹ tóg ti mỹ: “inh mỹnh pẽ fi hã vẽ, inh jāvỹ pẽ ag hã vẽ,” he mũ, ă mré mũ ti ag to. ⁵⁰“Ũ tỹ inh panh tỹ kanhkã tá nĩ ěn vĩ ki króm mũ vĩ tỹ inh jāvỹ pẽ ag nỹtĩnh mũ, inh ve pẽ fag ke ge, inh mỹnh pẽ fi ke gé,” he tóg, Jesus ti.

Nén fy to comparação

(Mc 4.1-9; Lc 8.4-8)

13 Kurã ěn kã Jesus tóg ĩn tá kãkutẽ mũ, kỹ tóg goj nig ra ti mũ. Tá tóg nĩ nĩ sir. ²Kỹ ũ tỹ hẽn ri ke ag vĩ tá vênh măn mũ sir, ti rã hã, kỹ tóg canoa kãkã nĩ mũ sir, jo ũn e ěn ag tóg nig fyr tá nỹtĩ. ³Kỹ tóg ag kanhrãn mũ sir. Ag mỹ tóg comparação tỹ hẽn ri ke hyn han mũ. Kỹ tóg ag mỹ: “ũ tỹ Topẽ vĩ tó mũ vĩ ge nỹtĩnh mũ, ha mẽ,” he mũ. “Kejẽn ũ tóg nẽn ũ fy vāvãm tĩ mũ,” he tóg. ⁴“Ti tỹ vāvãm kỹ ti fy ũ tóg ěpry kri, ěmĩn kri kutẽ mũ, kỹ sēsĩ tóg ti ko mũ sir. ⁵Ti fy ũ tóg pãró kri kutẽ mũ, ga e tũ ki. Kỹ tóg kãnhmar mur mũ vẽ, ga sĩ ěn ki. ⁶Hã ra rã tóg ă tỹ ěg nĩno kã sa kỹ (tóg) ti pũn mũ. Ti jãre han tũ nĩn kỹ tóg tóg mũ. ⁷Ti fy ũ tóg sónh kãki kutẽ mũ, kỹ sónh tóg ti mré mur mũ, kỹ tóg ti kri rũm mũ. Kỹ tóg tũ’ he mũ sir. ⁸Ti fy ũ tóg ga há kri kutẽ mũ, kỹ tóg mur há han mũ, mog há han tóg mũ, kanẽ há han tóg mũ gé. Ũ tóg kanẽ tỹ 100 (ke) han, jo ũ vĩ tóg kanẽ tỹ 60 (ke) han, jo ũ vĩ tóg kanẽ tỹ

30 (ke) han. ⁹Ũn nĩgrẽg nỹtĩ tỹ tỹ jēmẽ jé,” he tóg, Jesus ti.

Ěg tỹ comparación to vênh kanhrãn ke

(Mc 4.10-12; Lc 8.9-10)

¹⁰Kỹ ti mré mũ ti ag tóg ti to kãmũ mũ, kỹ ag tóg ti mỹ: “ă tỹ ne tó nẽ?” he mũ.

¹¹Kỹ Jesus tóg ag mỹ: “ăjag hã ne ũ tỹ kanhkã tá nĩ ěn tỹ tỹ ěg pã’i nĩ ěn ki kanhró nỹtĩnh mũ,” he mũ, “ũ tỹ inh jo nẽn tó ja tũ ěn ti,” he tóg mũ. “Hã ra ũn e ěn ag vĩ ki kanhrãn kãn ke tũ nĩ,” he tóg. ¹²“Hã kỹ tóg ge nĩ. Ũ tỹ nẽn to jykrẽn há han kỹ tóg ũ to jykrẽn măn, ũ to jykrẽn măn’ he mũ. Komẽr hã tóg to jykrẽn kãn ke mũ. Ũ tỹ nẽn to jykrẽn tũ nĩn kỹ tóg ti mỹ tũ’ he mũ, ti tỹ to jykrẽn sĩ han kỹ. ¹³Hã kỹ sóg ũn e ěn ag mỹ comparación han mũ, ag tỹ mẽ há han sór tũ nỹtĩn kỹ. Kỹ ag tóg ón kỹ mẽg mũ ra ki kagtĩg nỹtĩ, to jykrẽn tũ ag nỹtĩ sir. ¹⁴Hã ra tóg rãn kỹ nĩ gé. Isaías tỹ vãsỹ Topẽ vĩ tó kỹ tóg tag tó ja nĩ, ha mẽ. “Mẽ jé ăjag tóg ke mũ ón kỹ, hã ra ăjag tóg to jykrẽn tũ nĩnh mũ, kỹ ăjag tóg ki kagtĩg nỹtĩnh mũ. ¹⁵Povo tag ag vĩ krĩ tũ nỹtĩ, nĩgrẽg kutu ag tóg nỹtĩ gé, kanẽ kyvó ag tóg nỹtĩ gé, ag tỹ nẽn ũ ve sór tũ nỹtĩn kỹ, ag tỹ jēmẽ sór tũ nỹtĩn kỹ, ag tỹ to jykrẽn sór tũ nỹtĩn kỹ ke gé. Hã kỹ ag tóg inh ki ge sór tũ nỹtĩ gé, kỹ sóg ag tỹ há’ henh ke tũ nĩ gé,” he ja tóg nĩ, Isaías ti, povo tag to,” he tóg, Jesus ti.

¹⁶“Ag jãvo ăjag hã vĩ nĩgrẽg há nỹtĩ, hã kỹ ăjag tóg ag jãvo jēmẽ há han mũ. ¹⁷Ha mẽ, ũ tỹ hẽn ri ke ag vĩ inh ve sór e ja nĩgtĩ, vãsỹ, ăjag tỹ ũri vэг mũ tag ti. Hã ra ag tóg inh kătĩg ke jo kãgter. Topẽ vĩ tó ti ag vẽ. Jykre kuryj ag nỹtĩ ja nĩ, hã kỹ ag tóg ăjag tỹ nẽn vэг mũ tag ve sór e ja nĩgtĩ. Hã ra ag tóg ve ja tũ nĩgtĩ, mẽ ja tũ ag nĩgtĩ, ăjag tỹ ũri nẽn mẽg mũ ti. Ag tỹ vэг tũ ra ag tóg kãgter. ăjag hã ne mẽg mũ, inhã,” he tóg, Jesus ti. Ti mré mũ ti ag mỹ tóg ke mũ.

Jesus tỹ nén fy to comparação kāmén

(Mc 4.13-20; Lc 8.11-15)

¹⁸ “Kỹ sóg ajag mỹ kāmén mũ, nén fy kanē tag ti, ha mẽ. ¹⁹ Ủ tóg kejēn ón kỹ Topē vĩ mẽg mũ, ti tỹ tỹ ẽg pã'i nĩ ti. Hã ra tóg to jykrén tũ nĩ, ã tỹ ón kỹ mèn kỹ. Kỹ Nén-Kórég vĩ ti mỹ tỹ tũ' he mũ sir, ti tỹ mẽ ja ti tỹ. Kã jatu tóg nĩ sir. Ẽpyr kri, ẽmĩn kri kutē mũ ẽn hã vễ. ²⁰ Kỹ ti fy ủ tóg pãrô kri kutē mũ. Ủ vễ gé. Topē vĩ mẽg tóg mũ gé. Kỹ tóg kãnhmar: “hej,” he mũ sir. Ti mỹ tóg sér tĩ. ²¹ Hã ra tóg tỹ nén kré jãre tũ ri ke nĩ mỹr. Kỹ tóg tĩg sĩ han mũ, Topē mré. Nén ủ jagy kutē kỹ tóg Topē tovãnh mũ sir, ủ tỹ Topē vĩ tugrĩn ti kato tẽ kỹ. Kãnhmar tóg tovãnh mũ. ²² Ti fy ủ tóg sónh kãki kutē mũ. Ủ vễ gé. Topē vĩ mẽg tóg mũ gé. Hã ra tóg ã rãnhrãj hã mĩ ẽkrég mũ sir. Nén kar to ẽn tóg mũ sir, ón kỹ rico nĩ sór jé. Hã kỹ Topē vĩ tóg ti mỹ katy tĩ sir. Kỹ tóg han tũ nĩ sir, kanē ti. ²³ Ti fy ủ tóg ga há kri kutē mũ. Ủ vễ gé. Topē vĩ mẽg tóg mũ gé. Mẽ kỹ tóg to jykrén mũ sir. Kỹ tóg kanē han mũ sir. Kỹ ủ vĩ tóg kanē tỹ 100 (ke) han, jo ủ vĩ tóg kanē tỹ 60 (ke) han, jo ủ vĩ tóg kanē tỹ 30 (ke) han,” he tóg, Jesus ti.

Vãnh to comparación

²⁴ Kỹ tóg comparación ủ han kỹ: “Nén-Kórég tỹ inh rãnhrãj kókén sór mũ vĩ ge nỹnh mũ, ha mẽ,” he mũ. Kỹ tóg: “ủ tỹ kanhkã tá nĩ ẽn tỹ tỹ ẽg pã'i nĩ vĩ ge nĩ, ha mẽ,” he mũ. “Kejēn ủ tóg nén fy vãvãm mũ, ti japỹ tá, tỹ ti jakré nỹ jé. ²⁵ Kỹ tóg nũr tĩ mũ, ti camarada ag ke gé. Kỹ ti kato tẽ mũ ẽn tóg kutyg kỹ ra tĩ mũ, ti japỹ ẽn ra, kỹ tóg vãnh fy vãvãm mũ, trigo fy ẽn kãmĩ. Kỹ tóg tĩ mũ sir, vãnh fy ẽn vãvãm kar kỹ. ²⁶ Kỹ trigo tóg mur mũ, mog tóg mũ, kanē han tóg mũ sir. Hã ra vãnh tóg ti mré mur mũ gé. ²⁷ Kỹ ti camarada ag tóg ajag patrão mỹ

tónh mũ mũ. “Trigo fy vãvãm ẽg tóg mũ vễ, hã ra vãnh tóg ti mré mur mũ. Ne nẽ hỹn?” he ag tóg ti mỹ.

²⁸ Kỹ tóg ag mỹ: “ẽg kato tẽ mũ ẽn rãnhrãj hã vễ,” he mũ. “Ẽn hã ne isũ kókég’,” he tóg. Kỹ ag tóg ti mỹ: “kỹ ẽg mỹ vãnh ẽn kunũnh ke tũ nĩ?” he mũ.

²⁹ Kỹ tóg ag mỹ: “hỹ,” he mũ. “Ajag tỹ vãnh ủ kunũnh kỹ tóg ajag tỹ ti pẽn ủ kunũnh ha mẽ tĩ, vãnh mré. Kỹ kunũnh tũg nĩ. ³⁰ Vãnh hỹn tóg trigo mré mog mũ gé. Kỹ ẽg tỹ kre kỹ sóg ủ tỹ krég mũ mỹ tónh ke mũ. “Vãnh kre vén nĩ,” he jé sóg ke mũ. “Ti kre kar kỹ ti tógfĩ, ẽg tỹ ti pũn jé. Kar kỹ ajag tóg trigo krenh ke mũ, sỹ pãjó krēm vin han jé,” he jé sóg ke mũ,” he tóg, ag patrão ti,” he tóg, Jesus ti. Ti tỹ ủ tỹ ón kỹ Topē ki ge kỹ nỹtĩ ẽn ag tó jan hã vễ.

Mostarda fy to comparación

(Mc 4.30-32; Lc 13.18-19)

³¹ Kỹ tóg ag mỹ nén ủ tó mũ gé sir. “Ủ tỹ kanhkã tá nĩ tỹ tỹ ẽg pã'i nĩ vĩ ge nĩnh mũ, ha mẽ,” he tóg. “Ka tỹ mostarda fy ri ke tóg nĩ. Ti krãn ẽg tóg tĩ, ẽg japỹ ki, ka tỹ mostarda fy ti. ³² Kãsir ti nỹtĩ, ti fy ti. Ủ fy vĩ ti sĩ ri ke tũ nĩ. Ti krãn kar kỹ tóg mog mũ. Kỹ tóg ẽgóho ag kãfór nĩ. Pẽ mág ti nỹtĩ, hã kỹ sēsĩ ag vĩ kri kręg tĩ, ti pẽ kri,” he tóg, Jesus ti. Ti tỹ ẽg tỹ ti vĩ tó vén kar kỹ vẽn kar kri rũm ke mũ kãmén hã vễ.

Fermento to comparación

(Lc 13.20-21)

³³ Kỹ tóg ag mỹ comparación ủ tó mũ gé sir, kỹ tóg: “Topē tỹ tỹ ẽg pã'i nĩ vĩ tag ri ke nĩnh mũ, ha mẽ,” he mũ. “Ủn tỹtã fag tóg pão han tĩ. Pão han jé fag tóg pão jęgja jafã tỹ fermento ẽn tỹ farĩnh mré jęgjäg tĩ. Fermento sĩ ẽn tỹ pão kar ẽn tóg són ke kãn tĩ,” he tóg, Jesus ti. Ti vĩ tỹ vẽn kar kri rũm ke kãmén hã vễ.

Jesus tỹ comparação tỹ ěg kanhrân

(Mc 4.33-34)

³⁴ Comparação tỹ ge han tóg tĩ, Jesus ti, vênh kar mỹ. “Topẽ tỹ tỹ ěg pã'i nĩnh ke mũ vỹ ge nĩnh mũ,” he tãvĩ han tóg tĩ ag mỹ. ³⁵ Hã ra tóg rân kỹ nĩ gé, Jesus tỹ comparação han ke mũ ti. Vãvỹ Topẽ vĩ tó tĩ ù tóg Jesus kãmén kỹ tag tó ja nĩ ti to, ha mẽ. “Comparação han jé sóg ke mũ. Inh jo tó ja tĩ ãn tó jé sóg ke mũ. Û vỹ tag mẽ ja tũ nĩ ver, sỹ tónh ke mũ tag,” he ja tóg nĩ, Topẽ vĩ tó tĩ ěn, Jesus to. Hã ra tóg hã tó tĩ, Jesus ti.

Jesus tỹ vãnh to comparação kãmén

³⁶ Ag mỹ kãmén kãn kar Jesus tóg vênh e ěn ré kỹ ĩn kãra rã mũ. Kỹ ti mré mũ tĩ ag tóg ti to kãmũ mũ, ti ki jẽmẽ jé. “Ěg mỹ ã tỹ ag mỹ kãmén ja ěn ti tó mãn nĩ, ã tỹ ag mỹ trigo mré vãnh tó ja ěn ti. Ěg tỹ ver to jykrén tũ tóg tĩ,” he ag tóg mũ, Jesus mỹ.

³⁷ Kỹ tóg ag mỹ kãmén mũ. “Ěprã ke fi kósın vỹ trigo fy vãvãm mũ. Inh hã vẽ,” he tóg mũ. ³⁸ “Ga hã to sóg: ěpỹ, he mũ. Kỹ trigo ěn vỹ Topẽ krẽ ag ri ke nỹtĩ, kỹ vãnh vỹ Nén-Kórég krẽ ag ri ke nỹtĩ. ³⁹ Û tỹ ag han mũ vỹ tỹ Japo ti nĩ, Nén-Kórég ěn krẽ ag. Ti colher ke kurã hã vỹ: kurã tỹ ěgno, he mũ. Û tỹ trigo colher ke mũ ag vỹ tỹ Topẽ tỹ jẽgnẽ jafã ag nỹtĩ. ⁴⁰ Kurã tỹ ěgno ki ag tóg ěg tỹ vãnh pũn ěn ri ke han ke mũ, Japo tũ ag tỹ. ⁴¹ Ěprã ke fi kósın ěn, inh hã vỹ isỹ jẽgnẽ jafã ěn ag jẽgnẽnh ke mũ sir, kỹ ag tóg ù tỹ vênh jykre pãno han mũ kar ag gẽnĩ kãn ke mũ, ù tỹ ù ag mỹ: “ha jatun mỹ Topẽ vĩ mranh,” he mũ kar ag ke gé. ⁴² Ag gẽnĩ kỹ ag tóg pĩ gru mág ěn ki ag vãm ke mũ sir. Tá ag tóg vẽsỹrénh tãvĩ han tĩ. Ājag jã tỹ ag tóg gyngyn henh ke mũ, gangan ke jé ag tóg ke mũ, jũ kỹ, vẽsỹrénh kỹ ke gé. ⁴³ Kỹ ùn jykre kuryj ag vỹ há pẽ nỹtĩnh mũ, sĩnvĩ, kókov, rã gru ri ke, ag tỹ ājag jóg tá nỹtĩnh ken kỹ sir, ag tỹ ù

tỹ kanhkã tá nĩ ěn tỹ tỹ ěg pã'i nĩ ven kỹ. Ûn nĩgrẽg nỹtĩ tỹ tỹ jẽmẽ jé,” he tóg, Jesus ti.

Ěpỹ ki jãnkamy to comparação

⁴⁴ “Kỹ ěg tỹ ù tỹ kanhkã tá tỹ ěg pã'i nĩ venh ke vỹ tag ri ke nĩ gé, ha mẽ. Û tỹ ã patrão japỹ tá jãnkamy ne kunũnh kỹ pēju mãn kỹ nĩm ri ke tóg nĩ. Ti pēju mãn kỹ tóg ã tỹ nẽn kar fón kãn mũ sir, ti kaja to ěpỹ ěn vyn jé sir. Ěpỹ ěn vyn kar kỹ jãnkamy ěn vỹ tỹ ti tũ nĩ sir,” he tóg, Jesus ti. Ti tỹ ěg mỹ ěg tỹ ti ki rã sór kỹ ěg tũ fón kãn tón hã vẽ.

Pérola to comparação

⁴⁵ “Ěg tỹ ù tỹ kanhkã tá nĩ ěn tỹ tỹ ěg pã'i nĩ venh ke vỹ tag ri ke nĩ gé, ha mẽ,” he tóg mũ gé. “Negociante ù tóg jãnka han jafã tỹ negociar he tĩ, pérola tỹ. Hã kỹ tóg ùn há kuprẽg tĩgtĩ. ⁴⁶ Kejẽn tóg ùn há pẽ ù vég mũ sir, ùn kaja e. Kỹ tóg ã tũ vãm kãn mũ sir, ã tỹ ùn sĩnvĩ pẽ ěn kajãm jé, ti tỹ tỹ tũ nĩ jé,” he tóg, Jesus ti. Ti tỹ ěg mỹ ěg tỹ ti ki rã sór kỹ ěg tũ vãm kãn tó mãn hã vẽ gé.

Rede to comparação

⁴⁷ “Ěg tỹ ù tỹ kanhkã tá nĩ ěn tỹ tỹ ěg pã'i nĩ venh ke to comparação vẽ gé, ha mẽ,” he tóg mũ gé. “Rede ri ke tóg nĩ, ěg tỹ tỹ pirã kugmĩ jafã ěn. Ti fig ěg tóg tĩ, goj kãkã, ěg tỹ pirã kugmĩ jé, kãkofár ke gé. ⁴⁸ Ki ti fón kar kỹ ěg tóg nỹgnỹn mũ sir, goj ki ěg tóg pirã mré kãkofár gég tĩ. Gẽnĩ kỹ ěg tóg ùn mág ag hã kuprẽg tĩ, ma mũ jé. Ûn kãsir ěn togvãnh ěg tóg tĩ. ⁴⁹ Ge ti nĩgtĩ, kurã tỹ ěgno ki. Topẽ tỹ jẽgnẽ jafã ag tóg ùn jykre kuryj ag kuprẽg ke mũ, Topẽ mỹ. ⁵⁰ Ûn jykre pãno ag vãvãm jé ag tóg ke mũ, pĩ gru mág ěn ki. Tá ag vẽsỹrénh vẽ sir. Ājag jã tỹ ag tóg gyngyn henh ke mũ, tỹ ag gangan kej ke mũ, jũ kỹ, vẽsỹrénh kỹ,” he tóg, Jesus ti. Ti tỹ ag mỹ ěg tỹ ti ki rã sór jé kãmén hã vẽ.

Ėg panh to comparação

⁵¹ Kĩ tóg ã mré mĩ ti ag mĩ: “ãjag mĩ tag to jykrén kân mĩ, sỹ ãjag mĩ nén kâmén mĩ tag ti?” he mĩ. Kĩ ag tóg ti mĩ: “hỹ,” he mĩ sir.

⁵² Kĩ tóg ag mĩ: “kĩ tóg há tí,” he mĩ. “Ũ tỹ Topẽ vĩ to professor ên, ti tỹ kanhkã tá nĩ ên jykre ki rân kĩ tóg ge nĩ, ha mẽ,” he tóg. “Ėg panh ri ke tóg nĩ, ti tỹ tỹ nén ũ mág nĩn kĩ. Ėg panh tóg ke-jên Ėg mĩ ã tỹ nén sĩnvĩ ven tĩ, ti tỹ ũri mág mĩ ti, ti tỹ vãsỹ mãn ja ên ke gé,” he tóg, Jesus ti. Ti tỹ Ėg mĩ Ėg tỹ Topẽ vĩ ki kanhrân ke tó vẽ. Ėg tỹ to estudo han kĩ Ėg tóg vãsỹ rân kĩ nĩ ên tónh ke mĩ, kĩ Ėg tóg ũ tỹ ũri tó mĩ tag tónh ke mĩ gé. Jesus tỹ tag to Ėg mĩ comparação han hã vẽ.

Jesus tỹ Nazaré ra vỹn ke

(Mc 6.1-6; Lc 4.16-30)

⁵³ Ag mĩ kâmén kân kar kĩ tóg tá kákutẽ mĩ sir. ⁵⁴ Kĩ tóg ã jamã ra tí mĩ sir. Tá jun kĩ tóg Ėg vênh kanhrân jafã ki ag kanhrân mĩ. Kĩ tóg ag mĩ e tí, ti vĩ ti. Kĩ ag tóg ti to vĩ kónân mĩ. “Hên tán hỹn ki kanhrân, vênh jykre tag ki? Ũ nỹ hỹn ti kanhrân, ti tỹ nén han vánh tag hyn han jé?” he ag tóg ti to. ⁵⁵ “Īn han tí ên kósĩn vẽ mỹr,” he ag tóg. “Tĩ mỹnh fi vỹ tỹ Maria fi nĩ, kĩ ti jãvy ag vỹ ki nỹtĩ, Tiago, José, Simão, Judas. ⁵⁶ Kĩ ti ve fag vỹ tag ki nỹtĩ gé, Ėg mré. Tĩ tỹ ne jé Ėg káfór nĩ sór nẽ hỹn?” he ag tóg mĩ sir, Jesus to.

⁵⁷ Kĩ tóg ag mĩ tỹ ũ nỹ. Kĩ Jesus tóg ag mĩ: “ẽmã ũ tá ke ag tóg Topẽ vĩ tó tí to é he tũ nĩgtĩ mỹr,” he mĩ. “Tĩ jamã tá ke ag tóg ti to é he tí jãvo, ti mré ke ag, ti kanhkã ag,” he tóg.

⁵⁸ Kĩ tóg tá milagre e hyn han tũ nĩ. Ũn kaga nỹtĩ pir ag tỹ há' he tóg, ũn e tỹ há' he tũ ti nĩ, ag tỹ ti ki ge jãvánh nỹtĩn kỹ.

João Batista ter

(Mc 6.14-29; Lc 9.7-9)

14 Kĩ kejên pã'i mág tỹ governador tỹ Herodes vỹ mẽg mĩ, Jesus kãme ti. ² Kĩ tóg ã camarada ag mĩ: “João Batista vẽ hỹn, ãjag tỹ inh mĩ ũ tó mĩ ti,” he mĩ. “Tĩ hỹn tóg rĩr mãn, sỹ ti tén kar kĩ, hã kĩ tóg milagre tỹ hên ri ke hyn han tigĩ,” he tóg, Herodes ti, ã camarada ag mĩ, Jesus to.

³ Herodes vỹ João se ja nĩ, vese ja kãki tóg ti fón ja nĩ, Herodias fi tugnĩn. Tĩ jãvy tỹ Filipe prũ fi ja vẽ, hã ra tóg fi kunũnh kĩ fi tỹ prũg mĩ, Herodes ti. Kĩ João tóg ti mĩ. ⁴ “ã hã ne tóg ã mré ke prũ fi tỹ prũg mĩ,” he ja nĩ. “Fi ki ã tóg Topẽ vĩ mranh mĩ,” he tóg, João ti, Herodes mĩ.

⁵ Kĩ Herodes tóg ti tén sór mĩ, hã ra tóg vênh kar kamẽg mĩ. Vênh kar tóg João to: “Topẽ vĩ tó tí ũ vẽ,” he tí. Kĩ Herodes vỹ ag kamẽg mĩ. ⁶ Hã ra tóg ke-jên Herodes mur ja kurã tá krỹg mĩ. Kĩ festa ên kã Herodias fi kósĩn fi vỹ ag jo vênh grén mĩ sir, ti mré jẽg mĩ ag jo. Kĩ tóg Herodes mĩ sĩnvĩ tí. ⁷ Kĩ tóg fi mĩ: “ã tỹ nén to vĩ kar nĩm jé sóg ke mĩ ã mĩ, sỹ ke há vẽ,” he mĩ, Herodes ti.

⁸ Kĩ fi tóg ã mỹnh fi mĩ ke mĩ. Kĩ fi mỹnh fi tóg fi krĩn mĩ, fi tỹ João krĩ to vĩ jé. Kĩ fi tóg to vĩ mĩ sir. “Īnh mĩ ũri João Batista krĩ tỹ pẽnky kãkã nĩm,” he fi tóg mĩ, Herodes mĩ.

⁹ Kĩ tóg ti mĩ e tí sir, ti tỹ ti tén jé. Hã ra tóg fi mĩ: “sỹ ke há vẽ,” he ja nĩ, kĩ ti mré jẽg mĩ ag vỹ mẽ kân ja nĩ. Kĩ tóg fi mĩ: “hej,” he mĩ sir. ¹⁰ Kĩ tóg soldado jẽnẽg mĩ sir, ti tỹ João krĩ kym jé. Hã ra João tóg vese ja kãkã nĩ nĩ. ¹¹ Kĩ tóg ti krĩ kym mĩ sir. Pẽnky kãkã nĩm kĩ tóg fi mĩ nĩm mĩ, tátãg fi mĩ, ti krĩ ti. Kĩ fi tóg fi mỹnh fi mĩ ma tí mĩ. ¹² Kĩ ti mré mĩ ti ag tóg mẽ kĩ ti vyn kãmũ mĩ, vênh kej tá ti fón jé. Tĩ fón kar kĩ ag tóg Jesus mỹ tónh kãmũ mĩ.

Jesus tỹ ũn e jẽn

(Mc 6.30-44; Lc 9.10-17; Jo 6.1-14)

¹³ Jesus tỹ João ter mē kỹ tóg tá kākutē mũ, canoa kāmĩ. Kỹ tóg ěmā tũg ja ra tĩ mũ sir, ă pir mỹ nĩ jé. Hã ra vênh e ěn tóg ti tĩg mēg mũ. Kỹ ag tóg ti nón mũ mũ, ăjag pẽn kă, ěmā kar tá kāmũ kỹ. ¹⁴ Kỹ Jesus tóg kafă ũ tá vag ke mũ, kỹ tóg tá ũn e ěn ag vэг mũ sir, ti nón kāmũ mũ ag. Kỹ ag tóg ti mỹ jagăgtar nỹtĩ. Ag jagăgtan kỹ tóg ũn kagyga ag tỹ há' he mũ sir.

¹⁵ Ti tỹ ũn e tỹ hágha' hen kỹ tóg răké nỹ sir, ti tỹ ag kanhrăn ki. Kỹ ti mré mũ ti ag tóg ti mỹ tó jé kāmũ mũ. “Răké ti nỹ ha,” he ag tóg mũ, ti mỹ. “Tag mĩ tóg ěmā tũ tĩ. Kỹ tóg ă tỹ ag jěgněnh há tĩ, ag tỹ ěmā ũ ra mũ jé, vějěn comprar he jé,” he ag tóg mũ, Jesus mỹ.

¹⁶ Hã ra Jesus tóg ag mỹ: “ha inhhã ag jẽn, kỹ ag tóg hẽ ra mũnh ke tũ nĩ.” he mũ.

¹⁷ Kỹ ag tóg ti mỹ: “hã ra tóg tũ tĩ, vějěn tĩ,” he mũ. “Păo tỹ 5 (ke) vỹ ki nỹtĩ, piră régre ke gé,” he ag tóg.

¹⁸ Kỹ tóg ag mỹ: “inh mỹ ma kāmũ jěg ge,” he mũ. ¹⁹ Kỹ tóg ũn e ěn ag mỹ tó mũ, ag tỹ re tá nĩgnĩ kỹ nỹtĩ jé. Kỹ tóg păo tỹ 5 (ke) ěn măg mũ, piră régre ěn ke gé. Kỹ tóg kanhkă ki ěvănũ mũ sir, vějěn ěn to tóg Topě mré vĩ mũ sir. Kỹ tóg păo kénh kỹ ă mré mũ tĩ ag mỹ vĩn mũ sir, ag tỹ vênh ken jé sir, ũn e ěn ag mỹ. ²⁰ Kỹ vênh kar tóg ko kăn kỹ funfór mũ sir. Hã ra tóg kén mũ. Kěj tỹ 12 (ke) făn ag tóg mũ, ti ke tỹ. ²¹ Păo ko mũ ěn ag tóg tỹ mĩl tỹ 5 (ke) nỹtĩ, ũn tỹtă mré tó tũ, fag krě mré tó tũ, hã ra fag tóg tá e nỹtĩ gé mỹr, ha mẽ.

Jesus tỹ goj kri tĩg

(Mc 6.45-52; Jo 6.15-21)

²² Kỹ tóg ă mré mũ tĩ ag mỹ tó mũ, ag tỹ canoa kāmĩ mũ jé, ag tỹ ti jo kafă ũ ra mũ jé. “Isỹ ver ũn e tag ag mỹ: ha mũjěg,

henh ke vẽ,” he tóg ag mỹ. ²³ Kỹ tóg ũn e ag mỹ: “ha mũjěg,” he mũ sir. Kỹ tóg pănónh to tăpřy mũ, Topě mré vĩ jé. ă pir mỹ tóg tá nĩ nĩ. Kỹ tóg kutyg mũ sir. Hã ra Jesus tóg pănónh tá nĩ nĩ. ²⁴ Kỹ canoa tóg nig kāmĩ tĩ mũ sir, kafă ũ ra. Nig fyr tóg kór gy nĩ sir, kuvar gy ti nĩ ha. Kỹ goj tóg krém krém ke sa nĩ, kỹ tóg ag kutăn kỹ nĩ nĩ, goj ti. Kăka vỹ ag kato tẽ mũ, hă kỹ ag tóg mũ kónăn mũ. ²⁵ Kỹ kură ke ra Jesus tóg ag to kăti mũ, goj kri tĩg kỹ, ă pẽn kă. ²⁶ Kỹ ti mré mũ tĩ ag tóg ti vэг mũ, ti tỹ goj kri tĩg kỹ, kỹ ag fe tóg jũrũn ke mũ. “Vênh kupřig vẽ,” he ag tóg mũ. Kaměg kỹ ag tóg věkřěnkřě mũ sir. ²⁷ Hã ra Jesus tóg ag mré vēmén mũ sir. “Kaměg tũg nĩ, inh hă vẽ,” he tóg. “Jũrũn ke tũg nĩ,” he tóg.

²⁸ Kỹ Pedro tóg ti mỹ: “ă hă mỹ?” he mũ. “Kỹ inh mỹ tó, isỹ ă to tĩg jé, goj kri tĩg kỹ,” he tóg, Pedro ti, Jesus mỹ.

²⁹ Kỹ Jesus tóg ti mỹ: “kunĩg ge,” he mũ. Kỹ Pedro tóg canoa ki kutě kỹ goj kri tĩ mũ sir, Jesus to. ³⁰ Goj kri tĩg kỹ tóg văhă kăka ki ěvănũ mũ, kỹ tóg kaměg mũ sir. Kaměg kỹ tóg goj ki pun ke mũ. Kỹ tóg prěr mũ. “Senhor, inh kren han nĩ,” he tóg mũ, prěr kỹ.

³¹ Kỹ Jesus tóg vēsýmér ti kăgmĩg mũ. Kỹ tóg ti mỹ: “inh ki ră há han tũ ă tóg nĩ, vỹ,” he mũ. “Ă hă ne tóg: inh mỹ tá jun mũ vỹ? he mũ’, hă kỹ ă tóg ki pun ke kren mũ,” he tóg, Jesus ti, Pedro mỹ.

³² Kỹ ag tóg canoa kăki ge mũ sir. Ag tỹ ki ge kỹ kăka tóg tũ’ he mũ, kóho ěn. ³³ Kỹ tóg ag mỹ há tĩ, canoa kăki nỹtĩ ag mỹ. Kỹ ag tóg Jesus ki ge há han kỹ ti mỹ vĩ há han mũ sir. “Topě kósĩn vỹ tỹ ă nĩ, mỹr,” he ag tóg mũ sir ti mỹ.

Jesus tỹ Genesaré tá jun

(Mc 6.53-56)

³⁴ Kỹ ag tóg kafă ũ tá junjun kỹ (ag tóg) vag ke mũ sir, ěmā tỹ Genesaré tá. ³⁵ Tá ke ag tóg ăjag tỹ Jesus ve kỹ ti ki kanhrăn mũ. Kỹ ag tóg ti to vênh vĩ jěněg

mũ sir, vênh kar mỷ, ga kar ẽn mĩ hã. Kỷ ag tóg ùn kagyga ag tatĩ kãmũ mũ, Jesus to. ³⁶Kỷ ag tóg Jesus mỷ to vĩ mũ, ag tỹ hên ri ke mũn ti kur mráj mẽ jé. Kỷ ag tóg há' há' he kãn mũ sir, ag tỹ ti kur mên kỷ.

Judeu ag jykre si

(Mc 7.1-13)

15 Kỷ kejên Fariseu ù ag tóg Jerusalém tá junjun mũ, Jesus tá, Topê vĩ to professor ag mré hã. Jesus mỷ ag tóg vĩ mũ. ²“Ă mré mũ tĩ ag ne tóg ẽg jykre si mranh tĩ,” he ag tóg. “Êg jykre si ki ẽg tóg nĩgpég tĩ, ẽg jên ke jo, hã ra ag tóg nĩgpég tũ ra jęg tĩ,” he ag tóg.

³Kỷ Jesus tóg ag mỷ: “ăjag hã vĩ Topê vĩ mranh tĩ, ăjag tỹ ăjag jykre si han kỷ,” he mũ. ⁴“Topê tỹ ẽg mỷ tón hã vê, ha mẽ: “ă mỷnh fi mré ă panh kamêg nĩ, fag jagăgtân nĩ,” he ja tóg nĩ. Kỷ tóg tag tó gé, ha mẽ: “ũ tỹ ă han mũ fag mỷ vĩ kónân mũ ẽn tén jé ă tóg ke mũ,” he ja tóg nĩ gé, Topê ti. ⁵Ti jăvo ăjag tóg tag tó tĩ, ha mẽ: “ă panh mỷ nén ù nĩm tũg nĩ, ă mỷnh fi mỷ nén ù nĩm tũg nĩ, ă tỹ fag mỷ: “sỹ ăjag mỷ nén ù nĩm ke vê vê, hã ra sóg Topê mỷ nĩm sór mũ,” hen kỷ. Û tỹ tag han kỷ tóg há tĩ,” he ăjag tóg tĩ. ⁶Hã kỷ ăjag tóg Topê vĩ tỹ tũ' he tĩ, ăjag tỹ ăjag jykre si hã han kỷ,” he tóg, Jesus ti.

⁷“Krĩ régre ăjag nỹtĩ, ha mẽ. Hã kỷ Isaiás vĩ ăjag to vĩ ja nĩgtĩ, ti tỹ tag tó kỷ, ha mẽ. ⁸“Povo tag vĩ ăjag nũnê hã tỹ inh mỷ vĩ há han tĩ, hã ra ag jykre pi(jé) tỹ inh jykre nỹ’,” he ja tóg nĩ. ⁹“Fagrĩnh mỷ ag tóg iso grĩnh ke tĩ, hã ra ag tóg ẽpră ke ag jykre to: Topê tỹ tón hã vê, he tĩ,” he ja tóg nĩgtĩ, Isaiás ti,” he tóg, Jesus ti. “Ki hã tó ja tóg nĩ, ăjag to, ăjag krĩ régre nỹtĩn kỷ,” he tóg, Jesus ti.

Ne tỹ ẽg kavénh

(Mc 7.14-23)

¹⁰Kỷ tóg vênh kar jé prêr mũ sir, ag tỹ ti rã hã nỹtĩ jé, ti vĩ jêmê há han jé. Kỷ tóg ag mỷ: “ha mẽ, sỹ nén tó mũ ti, kỷ to jykrén nĩ gé,” he mũ. ¹¹“Êg jên pi(jé) ẽg kavénh tĩ’,” he tóg. “Êg jênky kã ra ẽg tóg rãg tĩ, vễjên tĩ. Nén ù tỹ ẽg ki kãpa hã vĩ ẽg kavénh tĩ, ha mẽ,” he tóg.

¹²Kỷ ti mré mũ ti ag ti to kãmũ kỷ ti mỷ: “ha mẽ,” he mũ. “Fariseu ag vĩ ă to jũ nỹtĩ, ă tỹ ag mỷ: vễjên pi(jé) ẽg kavénh tĩ’, hen kỷ,” he ag tóg ti mỷ.

¹³Kỷ tóg ag mỷ: “ẽg jóg mág tỹ nén krăn ja tũ vãm kỷ nĩ kãn ke vê, ẽg jóg tỹ kanhkã tá nĩ tỹ nén krăn ja tũ ẽn ti,” he mũ. “Ag pi(jé) tỹ Topê krê nỹtĩ’, Fariseu ẽn ag, hã kỷ tóg ag vãm ke mũ,” he tóg. ¹⁴“Hã kỷ ag to jykrén tũg nĩ. Ûn kyvó ag mỷ ag tóg: “sỹ ă jãmĩ tũg ke vê,” he tĩ, hã ra ag tóg ti kóm kyvó nỹtĩ gé, kỷ ùn kyvó tỹ ùn kyvó jãmĩ tũg kỷ ag tóg kăgnó ki văr ke mũ, ha vemnĩ,” he tóg, Jesus ti. Ag tỹ nũgme ki văr to ken hã vê, hã vĩ: kăgnó ki văr ke mũ, he mũ.

¹⁵Kỷ Pedro tóg ti mỷ: “ẽg mỷ kãmén há han nĩ, ă vĩ tag,” he mũ. ¹⁶Kỷ Jesus tóg ti mỷ: “kỹ ăjag mỷ ver ki kanhrăn tũ nỹtĩ’?” he mũ. ¹⁷“Mỷ ăjag tỹ to jykrén tũ tĩ’?” he tóg. “Ha vé, ẽg tỹ ẽg jên tỹ ẽg jênky kãra rãg kỷ tóg ẽg nug kãra rã mũ, kar ẽg tóg gón mũ sir. ¹⁸Nén ù tỹ ẽg ki kãpa vĩ tỹ ẽg jykre nĩ, hã kỷ tóg ẽg kavénh tĩ. ¹⁹Nén ù tỹ ẽg ki kãpa hã vê, ha mẽ: jykrén kónân, ù tén, ă prũ tũ fi mré nỹ, ă mén tũ mré nỹ, ùn mén tũ fag to ẽn, nén ù pēju, ù to ón, ù to vĩ kónân. ²⁰Nén ù tỹ ẽg ki kãpa hã vê, ẽg kavénh tĩn hã vê. Êg tỹ nĩgpég tũ ra jên kỷ ti pi(jé) ẽg kavénh tĩ’,” he tóg, Jesus ti.

Canaã tá ke fi tỹ Jesus mré vēmén

(Mc 7.24-30)

²¹ Kĩ Jesus tóg tá kutē kĩa (tóg) ga ũ ra tĩ mũ, cidade tỹ Tiro ra, cidade tỹ Sidom ra. ²² Ti tỹ tá jun kĩa ũ fi tóg ti venh kãtĩ mũ. Ga tỹ Canaã tá ke fi vė. Kĩ fi tóg Jesus tá jun mũ, kĩa fi tóg prėr mũ. “!..Senhor, Davi kósın..!” he fi tóg. “!..Inh jagãgtãn ra..!” he fi tóg. “!..Inh kósın fi vỹ jagrė kórég tãvĩ nĩ, ã tỹ inh mỹ ti kutēm há tóg te..!” he fi tóg, prėr kĩa.

²³ Hã ra Jesus tóg fi mỹ vỹ tũ nĩ. Kĩ ti mré mũ tĩ ag tóg ti to kãmũ kĩa ti mỹ: “ã mỹ fi ve sór tũ nĩ, fi tỹ kar kĩa ã ãn ra tĩg jé?” he mũ. “Ēg nón fi tóg ěg jé prėr mũ, kĩa tóg ěg mỹ e tĩ,” he ag tóg, Jesus mỹ.

²⁴ Hã ra tóg ag mỹ: “vó,” he mũ. “Topė vỹ inh jēnė, sỹ Israel ag tỹ há' he jé inh-hã, ũ tỹ Israel kãmĩ Topė vỹ mranh mũ ag tỹ,” he tóg, Jesus ti. Hã ra fi tóg tỹ fóg nĩ, hã kĩa tóg fi ve sór tũ nĩ.

²⁵ Kĩa fi tóg ti tá jun mũ sir. Ti krēm fi tóg grĩnh ke mũ. Kĩa fi tóg ti mỹ: “Senhor,” he mũ. “Ă mỹ inh jagãgtãn ke tũ?” he fi tóg.

²⁶ Hã ra Jesus tóg fi mỹ: “há tũ tóg nĩ, ã tỹ nén to vỹ mũ ti,” he mũ. “Ēg krė jamĩ vỹ tỹ ěg krė tũ nĩ, kĩa ěg tóg cachorro mỹ fón vãnh nigťĩ, ěg krė jamĩ ti,” he tóg, Jesus ti.

²⁷ Kĩa fi tóg ti mỹ: “hỹ,” he mũ. “Hã ra cachorro sĩ ag tóg ěmĩ mru ěn ko tĩ, mesa krēm,” he fi tóg, Jesus mỹ. “Hã kĩa inh kósın fi tỹ há' hemnĩ, ěg tỹ tỹ cachorro ěn ri ke nỹtĩ kĩa,” he fi tóg, Jesus mỹ.

²⁸ Kĩa tóg ũn tỹtã ěn fi mỹ: “inh ki rã tãvĩ han ja ã tóg nĩ,” he mũ. “Hã kĩa sóg ã mỹ han mũ, ã tỹ inh mỹ nén to vỹ mũ tag,” he tóg fi mỹ. Ti tỹ tag tó kĩa fi kósın fi tóg há' he mũ, hora ěn kã.

Jesus tỹ ũn e ag tỹ há' he

²⁹ Kĩ Jesus tóg cidade tá kãkutē kĩa (tóg) goj nig fyr jagma tĩ mũ, nig tỹ

Galiléia ěn fyr jagma. Kĩa tóg pãnónh to tãpry mũ, kĩa tóg nĩ mũ. ³⁰ Kĩa ũn tỹ hėn ri ke ag vỹ junjun mũ, ũn kagyga ag ke gé, ũn kãnhgrĩ ag ke gé, ũn tĩg vãnh ag ke gé, ũn kaga ũ ag ke gé. Ti ki ag tóg junjun mũ, kĩa tóg ag tỹ hághá' he kãn mũ. ³¹ Kĩa tóg vėnh kar ěn mỹ e tĩ, ag tỹ tag ven kĩa. Ũn vỹ vãnh ag tóg vỹ há nỹtĩ, ũn kónhgrĩ ag tóg mũ há nỹtĩ, ũn kyvó ag tóg ěvãnh há nỹtĩ. Kĩa ag tóg Topė mỹ vỹ há han mũ sir, Israel ag.

Jesus tỹ ũn e ũ jėn mãn

(Mc 8.1-10)

³² Kĩ Jesus tóg ã mré mũ tĩ ag jé prėr mũ. Kĩa tóg ag mỹ: “inh mỹ ag tóg jagãgtar nỹtĩ, ũn e tag ag,” he mũ. “Kurã tagťũ han ag tóg mũ ěg mré. Hã ra ag tóg vėjėn ve ja tũ nigťĩ. Kĩa tóg sỹ ag jėg tũ ra ag jėgnė jãvãnh tĩ, ag jamã ra. Ag mũn kĩa ũ ag hỹn kãgter ke mũ, kókĩnkĩr kĩa,” he tóg.

³³ Kĩa ti mré mũ tĩ ag tóg ti mỹ: “ki ti ěmã tũ nĩ, ki ti ga kórég nĩ,” he mũ. “Ēg hỹn hė tá vėjėn venh mũ, ěg tỹ ũn e tag ag jėn jé?” he ag tóg ti mỹ.

³⁴ Kĩa Jesus tóg ag mỹ: “ěmĩ tỹ hė ri ke nỹ ki nỹtĩ ge?” he mũ. Kĩa ag tóg: “ũ tỹ 7 (ke) vė, kãkufár pipir ke gé,” he mũ.

³⁵ Kĩa tóg ũn e ag mỹ tó, ag tỹ nigĩnĩ kĩa nỹtĩ jé, ga kri. ³⁶ Kĩa tóg ěmĩ tỹ 7 (ke) mąg mũ, pirã mré, kĩa tóg to Topė mré vỹ mũ. Kĩa tóg vėnh kãkėnh mũ, ěmĩ ti. Kĩa tóg ã mré mũ tĩ ag mỹ vĩn mũ, ag tỹ vėnh kar mỹ kã vėnh ken jé. Kĩa ag tóg kã vėnh ken mũ mũ. ³⁷ Kĩa ag tóg ko kãn mũ, funfór ag tóg mũ, hã ra tóg kén mũ. Kre tỹ 7 (ke) ěn fãn tóg mũ sir, ěmĩ kén ti, Jesus mré mũ tĩ ag tỹ gėnh kĩa. ³⁸ Ũ tỹ ko mũ ag vỹ ũ tỹ 4 mil (ke) nỹtĩ, ag tãvĩ, ũn tỹtã mré tó tũ, ag krė mré tó tũ. Hã ra fag tóg tá e nỹtĩ gé.

³⁹ Kĩa Jesus tóg ag jėgnėg mũ sir, ag jamã ra. Kĩa tóg canoa ki rã mũ sir, ěmã tỹ Magadã tá ga ra tĩg jé, ã mré mũ tĩ ag mré.

Ag tỹ Jesus mỹ milagre to vĩ

(Mc 8.11-13; Lc 12.54-56)

16 Kỹ Fariseu ù ag tóg Jesus tá jun-jun mũ, Saduceu ag mré hã. Ag tỹ ón kỹ ti ki jēmē sór vê, ag tỹ kar ti kato vĩ jé. Kỹ ag tóg ti mỹ milagre to vĩ mũ. Ag tỹ ti jykre to: “Topê jykre mỹ vỹ?” he sór vê. ²Hã ra Jesus tóg ag mỹ: “ta to jykrén há ãjag nỹtĩ, êmé to ke gé,” he mũ. “Rākānh kỹ ãjag tóg kanhkā ki êvānh tĩ. Rāren kỹ ãjag tóg: “ēmān ke vê,” he tĩ. ³Kỹ kusā ki ãjag tóg kanhkā ki êvānh tĩ gé. Kanhkā pũr kỹ ãjag tóg sir: “ta vỹ kutēnh mũ, kanhkā vỹ pũr mũ,” he tĩ. Tó há han ãjag tóg tĩ, rāre ve kỹ, kanhkā pũr ven kỹ ke gé. Hã ra ãjag tóg inh ki kagtĩg nỹtĩ, ãjag tỹ sỹ nén han mũ vэг mũ ra. Hã kỹ ãjag tóg: “Topê jykre mỹ vỹ?” he tĩ. ⁴Kórég ãjag nỹtĩ, ãjag tỹ Topê ki ge jāvānh nỹtĩn kỹ. Ûri ke kar vỹ ãjag ri ke kórég nỹtĩ. Milagre venh ke tũ ãjag tóg nĩ. Vāsỹ Topê vĩ tó tĩ ù tóg nĩgtĩ, hã vỹ: Jonas, he mũ. Jonas tỹ nén ve ja ri ke hã ve jé ãjag tóg ke mũ, ùri,” he tóg, Jesus ti. Kỹ tóg ag ré kỹ tĩ mũ sir.

Fermento to comparação ù

(Mc 8.14-21)

⁵Kỹ tóg ã mré mũ tĩ ag mré tĩ mũ, goj nig kafā ù ra. Ag tỹ kafā ù tá junjun kỹ ag tóg êmĩ to jykrén mũ sir, Jesus mré mũ tĩ ag. Kã jatun kỹ ag tóg nỹtĩ ja nĩ, kỹ tóg tũ tĩ sir, êmĩ tĩ. ⁶Kỹ Jesus tóg ag kanhrān mũ. “Fariseu ag tỹ fermento há(r) kamêg nĩ, Saduceu ag tỹ fermento há(r) ke gé,” he tóg mũ, Jesus ti.

⁷Kỹ ag tóg jagnē mré vĩ mũ sir, Jesus vĩ tag to. “Tĩ tỹ êg tỹ pảo mǎg tũ ên tó hỹn,” he ag tóg mũ, jagnē mỹ.

⁸Hã ra Jesus tóg ki kanhró nĩ, ag tỹ nén tó mũn ki. Kỹ tóg ag mỹ tó mǎn mũ. “Inh ki ge há han tũ ãjag tóg nĩ ver,” he tóg. “Hã kỹ ãjag tóg jagnē mỹ: pảo tũ, he mũ. ⁹Ver tóg ãjag tỹ to jykrén tũ tĩ. Pảo tỹ 5 (ke) ên mĩ êkrén nĩ. Û tỹ mil tỹ

5 (ke) ag tóg ko kǎn, hã ra tóg kén, ag kar tỹ ko mũ ra. Tĩ ke hỹn kěj tỹ hẽ ri ke fǎn?” he tóg. Kỹ ag tóg ti mỹ tó mũ sir. ¹⁰Kỹ tóg ag mỹ: “jo pảo tỹ 7 (ke) ên ti. Û tỹ mil tỹ 4 (ke) ag vỹ kó, hã ra tóg kén, ag kar tỹ ko mũ ra. Tĩ ke hỹn kěj tỹ hẽ ri ke fǎn?” he tóg. Kỹ ag tóg ti mỹ tó mũ gé sir. ¹¹Kỹ tóg ag mỹ: “kỹ inh vĩ to jykrén nĩ,” he mũ. “Pảo tó tũ sóg nĩ. Fermento pẽ tó tũ sóg nĩ. To jykrén há han nĩ, ha mẽ. Fariseu ag tỹ fermento há(r) kamêg nĩ, Saduceu ag tỹ fermento há(r) kamêg nĩ gé, he sóg mũ ãjag mỹ,” he tóg, Jesus ti.

¹²Kỹ ag tóg to jykrén há han mũ sir vǎhã. Tĩ tỹ fermento pẽ tó pijé. Tĩ tỹ Fariseu ag jykre tó ja vê, Saduceu ag jykre ke gé. Ag jykre hã to tóg: “ên kamêg nĩ,” he ja nĩ, Jesus ti.

Pedro tỹ Jesus kāmén

(Mc 8.27-30; Lc 9.18-21)

¹³Kỹ Jesus tóg cidade tỹ Cesaréia Filipe tá ga ra tĩ mũ, ti mré mũ tĩ ag mré. Kỹ tóg ag mỹ: “tỹ sóg êprā ke fi kósin nĩ,” he mũ. “Kỹ ag iso hẽ ri ke tĩ?” he tóg mũ, ag mỹ.

¹⁴Kỹ ag tóg ti mỹ. “ù ag tóg ã to: João Batista vê, he tĩ,” he mũ. “Jǎvo ù ag tóg: Elias vê, he tĩ, ã to. Jǎvo ù ag tóg: Jeremias vê, he tĩ gé, jǎvo ù ag tóg: Topê vĩ tó tĩ ù vê, he tĩ gé, ã to,” he ag tóg, Jesus mỹ.

¹⁵Kỹ tóg ag mỹ: “ag jǎvo ãjag hẽ ri ke tĩ, iso?” he mũ.

¹⁶Kỹ Simão Pedro tóg ti mỹ: “tỹ ã Cristo nĩ,” he mũ. “Topê kósin vỹ tỹ ã nĩ. Topê vỹ rĩr nĩ, kỹ ã hã vỹ tỹ ti kósin nĩ,” he tóg, Pedro ti, Jesus mỹ.

¹⁷Kỹ Jesus tóg ti mỹ: “Simão,” he mũ, “João kósin,” he tóg. “Êprā ke tỹ ã mỹ tó pijé,” he tóg. “Inh jóg tỹ kanhkā tá nĩ ên tỹ ã mỹ tó vê, isỹ tỹ ti kósin nĩ ti. Hã kỹ tóg ã ve há han mũ, Topê ti,” he tóg, Pedro mỹ. ¹⁸“Ha mẽ, tỹ ã Pedro nĩ, hã vỹ: pó, he mũ. Pǎró tag kri sóg isũ han

mũ, tỹ ìn ri ke ên, hã vỹ: ã tỹ ag mỹ ình vỹ tó tugrĩn ag tóg ình ki genh ke mũ, he mũ. Kĩ ù tỹ ình ki ge kỹ nỹtĩ ag vỹ tỹ ìgreja ri ke nỹtĩ. Ag fár tỹ tũ' he mũ ra ag tóg rĩnrĩr măn ke mũ. Tũ' henh ke tũ ag nĩ. ¹⁹ Êprã ke ag vỹ kanhkã ra mũnh mũ, ã vĩ ki. Jãnkã ri ke ti nĩ, kanhkã ra ge jafã ti, kỹ sóg ã hã mỹ ti nón jafã ti fig mũ sir, ti chave ti. Kĩ ã tỹ ù mỹ: “kanhkã ra tĩg ke tũ ã tóg nĩ,” hen kỹ tóg ra tĩg ke tũ nĩ. Kĩ ã tỹ ù mỹ: “kanhkã ra ã tóg tĩg ke mũ,” hen kỹ tóg ra tĩg ke mũ,” he tóg, Jesus ti, Pedro mỹ.

²⁰ Kĩ tóg ã mré mũ ti ag mỹ tó mũ, ag tỹ ti kãmén tũ nĩ jé ver. “Ker ù mỹ sỹ tỹ Cristo nĩ tó hẽ” he tóg mũ ag mỹ.

Jesus tỹ ã ter ke tó vén

(Mc 8.31–9.1; Lc 9.22–27)

²¹ Kĩ tóg ag mỹ ã jagtar ke kãmén nĩ. ã mré mũ ti ag mỹ tóg komẽr hã tó mũ. “Kãnhmar sóg Jerusalém ra tĩg mũ ha,” he tóg mũ. “Tá sóg hã ra jagtar ke mũ. Kófa ag vỹ iso kórég nỹtĩnh mũ, ha vemnĩ, Topẽ tũ ki rĩr ti to pã'i ag, Topẽ vỹ to professor ag ke gé. Ag tỹ isén ke vẽ, kỹ sỹ kurã tăgtũ ki rĩr măn ke vẽ,” he tóg, Jesus ti.

²² Kĩ Pedro tóg ti pin kỹ ti mré vỹ mũ, ti tỹ tag to jykrén tũ nĩ jé. “Senhor,” he tóg, “Topẽ jé ã jy nĩgã, ã tỹ ã jagtar ke tag vég tũ nĩ jé,” he tóg, Pedro ti, Jesus mỹ.

²³ Hã ra Jesus tóg vësỹjãm êvãnh kỹ ti mỹ vỹ tar han mũ sir, ti to jũ kỹ. “Kutĩg, Satanás,” he tóg, Pedro mỹ. “Isỹ Topẽ vỹ mranh han sór ã tóg mũ,” he tóg. “Ã pi(jé) Topẽ jykre tó mũ! Êprã ke jykre vẽ, ã tỹ ình mỹ nén tó mũ tag ti,” he tóg, Jesus ti, Pedro mỹ.

²⁴ Kĩ tóg ã mré mũ ti ag mỹ vỹ măn mũ. “Ajag tỹ ình mré kãmũ kỹ tóg há tĩnh mũ,” he tóg. “Kỹ ajag jykre tovãnh nĩ, ajag tỹ isũ tâvĩ hã han jé. Ha vé, ag tỹ ình cruz tỹ ình kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vẽnh nenh

ke tũ sóg nĩ. Isỹ tag han ri ke han nĩ, ajag tỹ ình mré mũ sór nỹtĩn kỹ,” he tóg. ²⁵ “Ajag tỹ ajag jykre hã han kỹ ajag tỹ nũgme ki vár ke vẽ. Jãvo ajag tỹ isugrĩn ajag jykre tovãnh kỹ ajag krenkren ke vẽ, ajag kãgter ke mũ (hã) ra. ²⁶ Hẽn ri ke mũn ajag hỹn mundo ki nén ù kar ganhar henh ke mũ, hã ra ajag kuprĩg vỹ vãfor ke mũ. Kỹ tóg kórég nỹ. Êg tỹ ne tỹ êg kuprĩg kajãm ke tóg tũ ti, êg tỹ ti ve măn jé,” he tóg. ²⁷ “Tỹ sóg Êprã ke fi kósin nĩ. Kãtĩg măn jé sóg ke mũ, kanhkã tá, isỹ jẽgnẽ jafã ag mré, ình jóg tỹ isỹ ùn mág han ti kỹ. Kỹ sóg vẽnũ kar mỹ ajag tỹ nén han ja kaja ên ven ke mũ. ²⁸ Ha vé, ki hã sóg tó mũ. Ajag kãmĩ ù ag tóg Topẽ tỹ tỹ êg pã'i nĩ venh ke mũ, ajag ter ke to hã, tag ki êg mré nỹtĩ ù ag. Êprã ke fi kósin ên ve jé ag tóg ke mũ, ti tỹ tỹ pã'i nĩ ti. ình hã vẽ,” he tóg, Jesus ti.

Jesus tỹ Moisés mré Elias mré vēmén

(Mc 9.2-13; Lc 9.28-36)

17 Kar kurã tỹ 6 (ke) tũg kỹ Jesus tóg ag mỹ: “mũ nỹ, vyr mỹ,” he mũ. Pedro mỹ tóg ke mũ. Tiago mỹ ke gé, ti jãvy tỹ João mỹ ke gé. Ag hã mré tóg ti mũ, pãnónh ra. ² Kĩ tóg ag jo vẽnũ ve ù han mũ sir, kỹ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kópréj nĩ gé, jẽngrẽ ri ke. ³ Kỹ vãhã Moisés tóg ag mỹ vẽnũ ven mũ sir, Elias ti ke gé. Jesus mré ag tóg vēmén mũ. ⁴ Kỹ Pedro tóg Jesus mỹ: “Senhor,” he mũ. “Tag ki tóg sér ti,” he tóg. “Êg mỹ pãjõ tăgtũ han mũ', ã mỹ', Moisés mỹ', Elias mỹ ke gé?” he tóg, Pedro ti, Jesus mỹ.

⁵ Pedro tỹ ver vēmén mũ ra kanhkã góg kókov tóg ag kri rũm ke mũ. Kỹ vẽnũ vỹ tóg mẽ há' he mũ, kanhkã góg kãtã, kỹ tóg: “ình kósin pir hã vẽ,” he mũ. “Ti vỹ jẽmẽ ra,” he tóg, Topẽ ti.

⁶ Kỹ Jesus mré mũ ti ag tóg mẽg mũ, kỹ tóg ag mỹ e ti. Ag mỹ e tĩn kỹ ag tóg mũg ke mũ sir. ⁷ Kỹ Jesus tóg ag to kãtĩg kỹ ag mẽg mũ sir, ã nĩgé tỹ, kỹ tóg ag

mỹ: “nīgnī ra,” he mū. “Mūmēg tūg nī,” he tóg mū.

⁸ Kĩ ag tóg mĩ ēvānh mū, hā ra ag tóg Jesus hā vэг mū. Tì mré vēmén mū ag ve mǎn tū ag tóg nī, kanhkā tá kāmū ēn ag.

⁹ Kĩ ag tóg pānónh tá kǎre mū sir. Ag mūn kĩ Jesus tóg ag mĩ: “ker ũ mĩ tó hē,” he mū. “Ājag tỹ ũri nén vэг mū tag tó tūg nī ver,” he tóg. “Sỹ iser ja tá vyn ke kar hā kāmén nī,” he tóg, Jesus ti.

¹⁰ Kĩ ti mré mū tĩ ag tóg ti mĩ: “hā ra Topē vĩ to professor ag tóg Elias tó tĩ,” he mū. “Kātīg jé tóg ke mū nējì, Cristo kātīg ke to hā, Elias ti. Hā mĩ?” he ag tóg mū, Jesus mĩ.

¹¹ Kĩ tóg ag mĩ: “hỹ,” he mū. “Kātīg jé tóg ke mū mĩr, nén kar han mǎn jé, Elias ti. ¹² Ha mē, kātīg ti huri. Hā ra ag tóg ti ki kagtīg ja nỹtĩgtĩ. Hā kĩ ag tóg ti vóg kónān ja nĩgtĩ, ag tỹ ti vóg kónān sór kĩ. Hā kĩ ēprā ke fi kósìn ēn tóg, inh hā tóg ag tugrĩn jagtar ke mū gé, ag tỹ inh vóg kónān ken kĩ,” he tóg, Jesus ti.

¹³ Kĩ ag tóg vāhā ti tỹ nén tó mū to jykrén mū, ti mré mū tĩ ag. “João Batista to ke ja vэ, ēg kygpэг tĩ ēn to ke ja vэ, hā vỹ: Elias, he mū, ti tỹ Elias ēn ri ke ja nĩn kĩ,” he ag tóg mū sir, Jesus mré mū tĩ ag.

Jesus tỹ kyrũ tỹ há' he

(Mc 9.14-29; Lc 9.37-43a)

¹⁴ Kĩ ag tóg vènh e ēn tá junjun mū sir. Kĩ ũ tóg Jesus to kātĩ mū, ag kāmĩ ũ. Tì krēm tóg grĩnh ke mū, ā jakrĩ tỹ, kĩ tóg ti mĩ: ¹⁵ “Senhor,” he mū. “Inh kósìn jagāgtān nĩ,” he tóg. “Ter tĩ tóg nĩgtĩ, to tóg jagtar tāvĩn tĩ. Kejēn tóg pĩ ki kutē tĩ, ter tĩ ēn han kĩ, kejēn tóg goj ki kutē tĩ,” he tóg. ¹⁶ “Kỹ sóg ā mré mū tĩ ag mĩ ti ven ja nĩgtĩ, ag tỹ ti tỹ há' he jé, hā ra ag tóg ti tỹ hē ri ke tũ nĩ,” he tóg, Jesus mĩ.

¹⁷ Kĩ Jesus tóg ti mĩ: “ājag ne tóg inh ki rā há han tũ nĩgtĩ,” he mū. “Jykre

pāno ājag tóg nỹtĩ,” he tóg. “Kysā tỹ hēn ri ke ki inh hỹn ājag mré tĩnh ke mū’? Kysā tỹ hēn ri ke ki inh hỹn ājag to fe tĩnh mū’?” he tóg. “Inh mĩ ti pére kātīg,” he tóg, Jesus ti, ti panh mĩ.

¹⁸ Ag tỹ ti mré kāmū kĩ Jesus tóg ti jagrē mĩ vĩ jũ han mū sir, ti tỹ ti tovānh jé. Kĩ tóg vēsỹmér ti ki kākutē mū sir, kĩ tóg há' he mū vāhā, kyrũ ti.

¹⁹ Kĩ Jesus mré mū tĩ ag tóg ti ki jēmē sór mū. Vyr mĩ ag tóg Jesus mĩ: “ēg ne tóg ti tỹ há' he ja tũ nĩ,” he mū. “Hē ri ken kĩ hỹn?” he ag tóg mū, Jesus mĩ.

²⁰ Kĩ tóg ag mĩ: “ājag tỹ inh ki ge tũ nỹtĩ tugnĩn ke vэ, ājag tỹ inh vĩ kri fig tũ tugrĩn ke vэ,” he mū. “Ha mē, ājag tỹ inh ki ge sĩ han kĩ nỹtĩ ra ājag tóg pānónh tag mĩ: “ha tag ra tīg,” he há nỹtĩnh mū vэ. Ājag tỹ pānónh mré vĩ kĩ tóg tīg ke mū vэ, ha mē, ājag tỹ inh ki ge sĩ nỹtĩ ra. Ka tỹ mostarda fy vỹ sĩ tāvĩ nĩ. Ājag tỹ inh ki ge sĩ nỹtĩ ra, ka tỹ mostarda fy sĩ ēn ri ke nỹtĩ ra tóg há tĩnh mū vэ. Kĩ ājag tóg pānónh tĩn há nỹtĩnh mū vэ. Nén kar han há ājag nỹtĩnh mū vэ, ājag tỹ inh ki ge kĩ nỹtĩ ra. ²¹ Hā ra vènh jagrē kórég tỹ ge kutēm tóg jagy nĩ. Topē mré ēg tóg vĩnh ke mū, kĩ ēg tóg ti mré vĩ kĩ vākrenh ke mū gé, nén ũ ko tũ jé ēg tóg ke mū, kĩ tóg vāhā kutēnh mū, vènh jagrē kórég tỹ ge ti,” he tóg, Jesus ti.

Jesus tỹ ā ter ke tó mǎn

(Mc 9.30-32; Lc 9.43b-45)

²² Tag kar kĩ ag tóg ga tỹ Galiléia tá nỹtĩ. Kĩ Jesus tóg ag mĩ: “ēprā ke fi kósìn vỹ jagtar nĩnh mū. Inh hā vэ,” he mǎn mū. “Ēprā ke ag vỹ ājag tỹ isỹ nén han sór mū ēn han ke mū. ²³ Ag tỹ isén ke vэ. Ag tỹ isén kar kĩ sóg hā ra rĩr mǎn mū, kurā tāgtũ tūg kĩ,” he tóg, Jesus ti. Ag tỹ ti vĩ tag mē kĩ tóg ag mĩ e tāvĩ tĩ sir. Fe kaj ag tóg mū sir, ti mré mū tĩ ag.

Jesus tỹ imposto kajām

²⁴ Kĩ ag tóg mũ mǎn kĩ (ag tóg) cidade tỹ Cafarnaum tá junjun mũ sir. Kĩ imposto kaja mǎg tĩ ag tóg Pedro mĩ vĩ mũ, Topẽ jo ın jé imposto mǎg tĩ ag. Imposto ẽn kaja hǎ vỹ: jǎnkamy rėgre, he mũ. Pedro mĩ ag tóg: “ǎjag Senhor mĩ kajām tũ nĩgtĩ?” he mũ.

²⁵ Kĩ tóg ag mĩ: “vó, kajām ti tĩ,” he mũ. Kĩ tóg ả ın tá jun mũ sir, Pedro ti. Kĩ Jesus tóg ti mĩ vĩ mũ, imposto to, hǎ ra Pedro tóg ti mĩ nén ũ tó ja tũ nĩ ver. Kĩ Jesus tóg ti mĩ: “Simão,” he mũ. “Pǎi ag mĩ ả mĩ: “ha imposto kajām,” he ja tũ nĩ?” he tóg, Jesus ti. “Tag to jykrén, ha mẽ. Ag mĩ ǎjag krẽ mĩ: “kajām nĩ,” henh ke mũ, ǎjag mré ke tũ ag mĩ, vó?” he tóg, Jesus ti, Pedro mĩ. ²⁶ Kĩ Pedro tóg ti mĩ: “ǎjag mré ke tũ ag mĩ ag tóg: “kajām nĩ,” he tĩ,” he mũ. Kĩ Jesus tóg ti mĩ: “hỹ, hǎ vẽ,” he mũ. “Kĩ ag krẽ hỹn kajām ke tũ nĩ vẽ. ²⁷ Hǎ ra ag tóg ẽg to jykrén kónǎn sór mũ, ẽg tỹ kajām tũ to, ẽg tỹ tỹ Topẽ mré ke nỹtĩ ra. Ag tỹ ẽg to jykrén kónǎn sór kỹ ẽg hỹn tóg kajām ke mũ, Topẽ jo ın jé imposto ẽn, ẽg tỹ tỹ Topẽ krẽ nỹtĩ ra, Israel krẽ ke gé. Hǎ kỹ pirǎ sygsam tĩg, nig ẽn tá. Sygsam kỹ jẽ kỹ ả tóg pirǎ kǎgmĩnũ. ả tỹ ũn kǎgmĩ vẽn mũ ẽn jẽnky tugnỹm nĩ. Jǎnkamy vỹ kǎkǎ nĩ, ti jẽnky kǎkǎ, ả tỹ ẽg jo kajām jé, ả jo, ỉjo ke gé,” he tóg, Jesus ti. Kĩ Pedro tóg tĩ mũ sir. Jǎnkamy vėg tóg mũ sir. Kĩ tóg tỹ imposto kajām tĩ mũ, Pedro ti.

Ủ tỹ ẽg kǎfór nĩ

(Mc 9.33-37; Lc 9.46-48)

18 Kejẽn Jesus mré mũ tĩ ag tóg ti mĩ vĩ mũ, kỹ ag tóg: “kejẽn ẽg tóg Topẽ tỹ tỹ ẽg pǎi nĩ venh ke mũ,” he mũ. “Ẽg tỹ ti ve kỹ ũ tỹ hẽ nỹ hỹn ẽg kǎfór kar nĩ?” he ag tóg, Jesus mĩ. ² Kĩ Jesus tóg gĩr ũ jé prěr mũ, kỹ tóg ag kujũ kǎ ti fėg mũ, gĩr ti. ³ Kĩ tóg ag

mỹ tag tó mũ, ha mẽ. “Gĩr ri ke han nĩ, ǎjag tỹ Topẽ tỹ tỹ ẽg pǎi nĩ ve sór kỹ, ke tũ nĩ (mũ) ra ǎjag tóg venh ke tũ nĩ. Hǎ kỹ ǎjag jykre tovǎnh nĩ, gĩr jykre han jé,” he tóg. ⁴ “Gĩr pi(jé) ũn sanh kǎfór sór nĩ. Kỹ ti ri ke han nĩ. Jagnẽ kǎfór nĩ sór tũg nĩ. “Ủn sĩ vỹ tỹ ınh nĩ, gĩr ri ke vỹ tỹ ınh nĩ,” hemnĩ, ǎjag tỹ kar kỹ tỹ ũn mǎg kǎfór kar nỹtĩ jé, Topẽ tỹ tỹ ẽg pǎi nĩn kỹ,” he tóg. ⁵ “ǎjag hǎ vỹ tỹ ınh mré ke nỹtĩ. ǎjag tỹ ınh mré ke nỹtĩn tugnĩn gĩr tỹ ge jẽỹn nĩ, to há nỹtĩmnĩ, isugrĩn. ǎjag tỹ isugrĩn ử tỹ ge to há nỹtĩn kỹ ǎjag tóg iso há nỹtĩ gé,” he tóg, Jesus ti.

Inferno ki kutẽ mũ vỹ jagy pẽ nĩ

(Mc 9.42-48; Lc 17.1-2)

⁶ “Ủn sĩ tag tóg ınh ki rǎ kỹ jẽ. Kejẽn ử tóg ũn sĩ tỹ ınh vĩ mranh han sór mũ. Ẽn jykre vỹ kórég tǎvĩ nĩ. Ẽn hǎ mĩ tóg há nỹnh mũ vẽ, ử tỹ pó mǎg tỹ ti nunh to sa kỹ goj nig ki ti fón jé, ti tỹ goj ki ter jé. Jagy tǎvĩ tóg tĩ, ử tỹ gĩr tỹ isovǎnh han kỹ,” he tóg, Jesus ti. ⁷ “Topẽ vỹ ag ve kónǎn pẽ han ke mũ, ag tỹ ử tỹ iso há nỹtĩ ag krĩn kónǎn kỹ. Ag tỹ ag krĩn kónǎn kỹ tóg ag tỹ ınh vĩ mranh ha mẽ tĩ. Ủ tỹ hẽn ri ke ag tóg ag krĩn kónǎn tĩ. Hǎ ra ag tóg to jagǎgtar tǎvĩ han ke mũ gé. Topẽ vỹ ag ve kónǎn pẽ han ke mũ, ag tỹ ử krĩn kónǎn kỹ,” he tóg, Jesus ti.

⁸ “Ả tỹ nén ử vóg kỹ Topẽ vĩ mranh kỹ ả nĩgnó kym nĩ, ả tỹ ke mǎn tũg jé. Ả tỹ hẽ kǎ tá tĩg kỹ Topẽ vĩ mranh kỹ ả pẽn kym nĩ, ả tỹ ke mǎn tũg jé. Jagy ti nỹ, ả nĩgnó pir ti, ả tĩg vǎnh ti ke gé. Ả tỹ nĩgnó rėgre ra nũgme ki kutẽ kỹ tóg jagy kǎfór nĩ, ả tỹ pẽn rėgre ra inferno ki kutẽn kỹ, pĩ nhyr vǎnh ẽn ki kutẽn kỹ mỹr. Ả tỹ rĩr krỹg ja tũ venh ke tóg hǎ ra há tĩ,” he tóg. ⁹ “Ả tỹ nén ử ki vẽtĩ kỹ Topẽ vĩ mranh kỹ ả kanẽ ử nám nĩ, ả tỹ ke mǎn tũg jé. Jagy ti nỹ, ả kyvó ti. Ả tỹ kanẽ rėgre ra nũgme ki kutẽ kỹ tóg jagy kǎfór nĩ, ả tỹ inferno ki kutẽn kỹ, ả tỹ pĩ nhyr vǎnh ẽn ki kutẽn kỹ. Ả tỹ rĩr krỹg ja

tũ ên ve kÿ tóg hã ra há tĩ,” he tóg, Jesus ti.

Carneiro vãfor to comparação

(Lc 15.3-7)

¹⁰“Hã kÿ gĩr to é he tũg nĩ. Û tÿ ag ki rĩr mũ ag vỹ kanhkã tá nỹtĩ, mÿr, ha mẽ. Topẽ tÿ jẽnẽ jafã ù ag vẽ, ù tÿ gĩr ag ki rĩr mũ ag. Inh jóg mré ag tóg nỹtĩ, ti vég ag tóg nỹtĩ, ù tÿ gĩr ag ki rĩr mũ ag. Hã kÿ gĩr ag to é he tũg nĩ. ¹¹Tÿ sóg êprã ke fi kósın nĩ. Ûn vãgfor mũ ên ag krenkren han hã jé sóg jun ja nĩ, mÿr, ha mẽ,” he tóg, Jesus ti.

¹²“Tag to jykrén nĩ. Û tóg carneiro tÿ 100 (ke) tÿ mễg nĩ. Kejẽn ti mễg pir tóg vãfor ja nĩ. Kÿ tóg ùn pir ên kanênh tĩ mũ sir, ti jãvãnh tĩ tóg mũ sir. Ti mễg e ên tóg pãnónh tá nỹtĩ. Ag ré kÿ tóg tĩ mũ sir, ùn vãfor mũ ên jãvãnh jé, ùn pir ên ti. ¹³Kÿ tóg ti vég mũ sir. Kÿ tóg ti mÿ sér pẽ tĩ sir, ha mẽ. Ti mễg e ên tóg ti mÿ há nỹtĩ, ù tÿ 99 (ke) ên. Hã ra ti tÿ ùn pir ên ve măn kÿ tóg ti mÿ há tãvĩ nĩ sir, ùn e ên tÿ ti mÿ há nỹtĩ kãfór. Kÿ ti fe tóg mrin ke mũ. ¹⁴Hã kÿ tóg Topẽ mÿ kórég nĩ, ùn sĩ pir vãfor kÿ, ti kren tũ nĩn kÿ, gĩr sĩ pir mÿr. Topẽ pi(jé) tag to há nĩ, inh jóg tÿ kanhkã tá nĩ ti,” he tóg, Jesus ti.

Êg mré ke ù tÿ Topẽ vĩ mranh

¹⁵“Kejẽn ã régre vỹ Topẽ vĩ mranh mũ. Kÿ ti venh tĩg nĩ, ã tÿ ti mré vēmén jé, to. Vyrmÿ ti mré vēmén vén nĩ. Hên ri ke mũn tóg ã vỹ jēmēnh mũ, kÿ ã tóg ti kren han mũ sir, ã régre ti. ¹⁶Ti tÿ ã vỹ jēmē sór tũ nĩn kÿ ù mÿ: inh mré ti jyvēn tĩg, hemnĩ, ùn pir mÿ, ke tũ nĩ kÿ ùn régre ag mÿ. Kÿ ti mré vēmén măn nĩ, ag rĩnve, ag tÿ ã tÿ ti mré vĩ mẽ jé. ¹⁷Ti tÿ ãjag vĩ mẽ sór tũ nĩn kÿ vēnh kar mÿ tómnĩ sir, inh mré ke kar ag mÿ. Ti tÿ vēnh kar vĩ mẽ sór tũ nĩn kÿ ti mré vĩ măn tũg nĩ sir. “Topẽ vĩ ki kagtĩg ti nĩ, fóg kórég ag ri ke ti nĩ,” hemnĩ ti to. “Topẽ vĩ mranh

sór ti mũ, governo mÿ jãnkamy mǎg tĩ ag ri ke,” hemnĩ ti to. ¹⁸Ki hã sóg tóg mũ, hã kÿ sóg ãjag mÿ ke mũ, ha mẽ. ãjag tÿ tag ki ù mÿ: “kanhkã venh ke tũ ã tóg nĩ,” hen kÿ tóg venh ke tũ nĩ. ãjag tÿ ù mÿ: “kanhkã ve jé ã tóg ke mũ,” hen kÿ tóg venh ke mũ,” he tóg, Jesus ti.

¹⁹“Ha mẽ, sÿ ãjag mÿ nén tónh ke mũ ti. Kejẽn ãjag kãmĩ ùn régre ag tóg nén ù to jykrén, ag tÿ Topẽ mÿ nén to vĩ jé. Kÿ ag tóg ti mÿ nén to vĩ mũ sir. Tÿ ag êprã ke nỹtĩ, hã ra ag tóg Topẽ mÿ nén ù to vĩ mũ. Kÿ inh jóg tÿ kanhkã tá nĩ tóg ag mÿ han ke mũ, ag tÿ nén to vĩ mũ ên ti,” he tóg. ²⁰“Kejẽn ãjag kãmĩ ùn régre ag vỹ iso vēmén tĩ, kejẽn ùn tãgtũ ag. Inh jiji tóg jé ag tóg vēnhmăn kÿ nỹtĩ. Kÿ sóg ag mré nĩ nĩ sir, ag tÿ inh vég tũ ra. Hã kÿ Topẽ tóg ag mÿ han ke mũ, ag tÿ ti mÿ nén to vĩ mũ ti,” he tóg, Jesus ti.

Û camarada kórég to comparação

²¹Kÿ Pedro tóg ti to kãtĩg kÿ ti mÿ: “Senhor,” he mũ. “Kejẽn inh régre tóg vēnh jykre pãno han ja nĩ. Kÿ inh mÿ ti mÿ vēnh pãte fón e han mũ? Vēnh pãte fón tÿ hē ri ke nÿ hÿn há nĩnh mũ? Ke tÿ 7 (ke) mÿ há nĩ?” he tóg, Pedro ti, Jesus mÿ.

²²Kÿ Jesus tóg ti mÿ: “vó,” he mũ. “Vēnh pãte fón tÿ 7 (ke) vỹ pir nĩ,” he tóg. “Vēnh pãte fón tÿ 70 tÿ 7 (ke) vỹ pãgsĩ nĩ,” he tóg. ²³“Ha vé, ù tÿ kanhkã tá nĩ ên tÿ tÿ êg pã'i nĩ to comparación ù vẽ, sÿ tónh ke tag, ha mẽ. Pã'i mǎg ri ke ti nĩ. Camarada e ti nĩ, pã'i mǎg ên ti. Kÿ tóg kejẽn ag tũ ve sór mũ, ag tÿ ti mÿ név(e) ti. ²⁴Kÿ tóg vég mũ. Hã ra ti camarada ù tóg ti mÿ név(e) mǎg jẽ, hã vỹ: 10 mil (ke), he mũ. ²⁵Hã ra ti tÿ ne tÿ kajām ke tóg tũ tĩ, kÿ ti patrão vỹ ti fón sór mũ, jãnkamy to, ti prũ fi ke gé, ti krẽ ke gé, ti tũ kar mÿr, ti tÿ ã kaja to ã név(e) kajām jé. ²⁶Hã ra tóg ti mÿ jagy tĩ, kÿ tóg ti krēm grĩnh ke kÿ ã jakrĩ tÿ jẽ mũ. Ti krēm grĩnh ke kÿ tóg ti mÿ: “Sen-

hor,” he mǔ. “Ver isovǎnh sǐ han, kajǎm jé sóg (ke) mǔ vǎhǎ,” he tóg.

²⁷ Kǐ ti patrǎo tóg ti jagǎgtǎn mǔ sir, ǎ camarada ti, kǐ tóg ti tovǎnh mǔ. Ti mǔ tóg ti név(e) tǔ tǔ he mǔ. “Ha tǐg, jatun mǔ,” he tóg mǔ sir. ²⁸ Kǐ ti camarada ǎn tóg ti mǔ sir. Kǐ tóg ǎ mré camarada ũ vég mǔ sir. Ti ki tóg név(e) sǐ jǎ, cruzeiro pir mǔr. Kǐ tóg ti mǎg mǔ sir. Ti nunh kǎ tóg ti kǎgǔg mǔ, kǐ tóg ti mǔ: “inh mǔ kajǎm, ǎ név(e) ti,” he mǔ, ũn név(e) mǎg ja ǎn ti, ũ tǔ ǎ mǔ név(e) sǐ ǎn mǔ.

²⁹ Kǐ tóg ti krēm grǐnh ke kǐ ǎ jakrǐ tǔ jǎ mǔ. Kǐ tóg ti mǔ: “ver isovǎnh, vǎhǎ sóg kajǎm kǎn ke mǔ ha,” he mǔ.

³⁰ Hǎ ra tóg mǎ jǎvǎnh nǐ. Kǐ tóg vǎse jafǎ kǎtǎ ti fón mǔ sir, ti tǔ ti mǔ kajǎm jé, ti név(e) ti. ³¹ Hǎ ra ti mré camarada ũ ag vǔ vég mǔ, kǐ tóg ag mǔ e tǐ. Kǐ ag tóg ǎjag patrǎo mǔ tó kǎn mǔ sir, ti tǔ nén han mǔ ti. ³² Kǐ ti patrǎo tóg ti jé prǎr mǔ sir. Kǐ tóg ti to jǔ mǔ. “Jykre kórég pǎ han ǎ,” he tóg. “ǎ név(e) mǎg tǔ sóg tǔ he vǎ, ǎ tǔ inh mǔ to vǐn kǐ. ³³ Kǐ ǎ tǔ ǎ mré camarada ǎn jagǎgtǎn ke vǎ vǎ, isǔ ǎ jagǎgtǎn ri ke,” he tóg. ³⁴ Kǐ tóg ti to jǔ mǎg han mǔ sir, ti patrǎo ti. Kǐ tóg ti ség mǔ. Ag mǔ tóg: “ha ti vóg kónǎn,” he mǔ gé, ti tǔ ǎ patrǎo mǔ kajǎm kǎn jé, ti név(e) mǎg ǎn ti,” he tóg, Jesus ti.

³⁵ “Hǎ han jé tóg ke mǔ, inh jóg tǔ kanhkǎ tá nǐ ti, ǎjag tǔ ǎjag régre ag mǔ vǎnh pǎte fón pǎ han sór tǔ nǐn kǐ, ag tǔ kygnǎ ja ti,” he tóg, Jesus ti.

Ēg tǔ Ēg prǔ fón ke tǔ

(Mc 10.1-12)

19 Kǐ Jesus tóg tó kǎn ja nǐ, ti tǔ ag mǔ nén tó sór mǔ ti. Kǐ tóg Galiléia tá kǎkutǎ kǐ goj tǔ Jordǎo mǎra tǐ mǔ sir. Israel ag jamǎ ũ vǎ gé. ² Kǐ ũn e ag tóg ti nón mǔ mǔ. Kǐ tóg tá ag kygtǎg kǎn mǔ sir.

³ Kǐ Fariseu ag tóg ti tá junjun mǔ gé sir. Ag tǔ ón kǐ ti vǎme mǎ sór vǎ, vǎnh

prǔ ke fón to. Kǐ ag tóg ti mǔ: “mǔ ěg tǔ nén ũ ti to ěg prǔ fag fón jé há nǐ?” he mǔ.

⁴⁻⁵ Kǐ tóg ag mǔ kǎmén mǔ. “Topǎ vǐ rá ki vemnǐ,” he tóg. “Tá tóg rán kǐ nǐ, Topǎ tǔ nén han mǔ ti. Ti tǔ nén kar han ve ki tóg ti mré fi han. Hǎ kǐ tóg tag tó mǔ, ha mǎ. “Hǎ kǐ ũn gré tóg ǎ prǔ fi to ǎ panh ré kǐ tǐnh mǔ, ǎ mǔnh fi ré kǐ ke gé. ǎ prǔ fi mré tóg tǐnh mǔ. Fi mré tóg tǔ ũn pir nǐ sir, ǎ prǔ fi mré,” he tóg, Topǎ ti. ⁶ Hǎ kǐ fag tóg tǔ ũn pir nǐtǐ. Fag pi(jé) tǔ ũn régre nǐtǐ. Hǎ kǐ fag tǔ vǎnh kǎpǎm tǔg nǐ. Topǎ tǔ fag tǔ ũn pir han vǎ mǔr,” he tóg, Jesus ti.

⁷ Kǐ ag tóg ti mǔ ke mǎn mǔ. “Hǎ ra Moisés tóg ěg mǔ: “fi mǔ vǎnh rá nǐm kar kǐ fi fón nǐ,” he ja nǐ. Ti tǔ ne jé ěg mǔ tag tó ja nǎ?” he ag tóg mǔ, Jesus mǔ.

⁸ Kǐ tóg ag mǔ: “hǔ,” he mǔ. “Tag tó ja ti nǐ, ǎjag mǔ, ǎjag tǔ vǎnh kanhrǎn sór tǔ nǐtǐn kǐ, hǎ kǐ tóg ǎjag mǔ: ha fi fón ge, he ja nǐ. Hǎ ra Topǎ tóg tag han ja tǔ nǐ, ti tǔ nén kar han ve ki. ⁹ Hǎ kǐ sóg ǎjag mǔ ke mǔ. ǎjag tǔ ǎjag prǔ fi fón kǐ ũ fi tǔ prǔg mǎn kǐ ǎjag prǔ tǔ fi vǎ sir, ha mǎ. ǎjag tǔ fi tǔ ũ mré nǔ tugrǐn fi fón kǐ tag hǎ ne pǎgsǐ nǔ,” he tóg, Jesus ti.

¹⁰ Kǐ ti mré mǔ ti ag mǔ tóg e tǐ, ti vǐ tag, hǎ kǐ ag tóg ti mǔ: “ge nǐn kǐ tóg tǔ ũ nǔ, ěg prǔg kǐ,” he mǔ. “Ēg tǔ ěg prǔ fi fón sór mǔ ra fi fón tǔ nǐn kǐ tóg vǎnhmǔ nǔ, kǐ ěg hǔn prǔg sór tǔ nǐ,” he ag tóg.

¹¹ Kǐ tóg ag mǔ: “ũn pipir ag tóg tag han ke mǔ,” he mǔ. “Topǎ tóg ũ ag mǔ: ha prǔg tǔg, hǎnh ke mǔ, ǎn ag hǎ vǔ prǔg ke tǔ nǐ,” he tóg. ¹² “Ũ ag tóg kurǐ nǐtǐ, ag mur mǔ kǎ. Kǐ ũ ag tóg kurǐ nǐtǐ gé, ag tǔ ag grǎfy kym kǐ. Kǐ ũ ag tóg kurǐ ri ke nǐtǐ gé, ag tǔ Topǎ to jykrén kǐ, ag tǔ ũ tǔ kanhkǎ tá nǐ ǎn tugrǐn prǔg sór tǔ nǐtǐn kǐ. Ũ tǔ to jykrén mǔ ǎn jé to jykrén,” he tóg, Jesus ti.

Jesus tỹ gĩr ag to há nĩ

(Mc 10.13-16; Lc 18.15-17)

¹³ Kĩ fag tóg gĩr tatĩ kāmũ mũ, ti tỹ ă nĩgĩ tỹ ag mĩ jĩ, ti tỹ ag to Topĩ mrĩ vĩ jĩ. Hã ra Jesus mrĩ mũ tĩ ag tóg fag to jũ mũ, ũ tỹ ag tatĩ kāmũ mũ fag to. ¹⁴ Hã ra Jesus tóg ag mỹ: “vĩ tũg nĩ, gĩr ag mỹ,” he mũ, “gĩr ag tỹ iso kāmũ kamĩg tũg nĩ,” he tóg. “Ũ tỹ ge hã vỹ ũ tỹ kanhkã tá nĩ ěn tỹ tỹ pã'i nĩ ěn krĩm nĩtĩ nĩ,” he tóg. ¹⁵ Kĩ tóg ag mĩgmĩ kãn mũ sir, ă nĩgĩ tỹ. Ag mĩgmĩ kãn kĩ tóg tá kãkutĩ mũ sir.

Kyrũ rico kãme

(Mc 10.17-31; Lc 18.18-30)

¹⁶ Kĩ vãhã ũ tóg ti tá jun mũ sir. Kĩ tóg ti mỹ: “Senhor,” he mũ. “Hã ă tóg jĩ,” he tóg. “Sỹ inh rĩr krĩg ja tũ venh há tóg tĩ. Ti ve jĩ inh hĩn vẽnĩ jykre há tỹ hĩ ri ke han ke mũ?” he tóg.

¹⁷ Kĩ Jesus tóg ti mỹ: “ă tỹ ne jĩ inh ki vẽnĩ jykre há jĩmĩ sỏr nĩ?” he mũ. “Ũn pĩr tóg há nĩ, ha mĩ. Ti tỹ ěg jyvĩn ěn ki krỏm nĩ, ă tỹ rĩr krĩg ja tũ ve sỏr kĩ,” he tóg.

¹⁸ Kĩ tóg ti mỹ: “ti tỹ ěg jyvĩn tỹ hĩ ri ke nĩ?” he mũ. Kĩ Jesus tóg ti mỹ: “ti tỹ ěg jyvĩn tag hã vĩ, ha mĩ: ũ tĩn tũg nĩ, ă prũ tũ fi mrĩ nỹ tũg nĩ, nĩn ũ pĩju(g) tũg nĩ, ũ to ỏn tũg nĩ, ¹⁹ ă nỹ mrĩ ă jỏg kamĩg nĩ, ă rĩgre ki rĩr há han nĩ, ă tỹ vẽnĩ ki rĩr há ri ke han nĩ, ă rĩgre ki,” he tóg, Jesus ti.

²⁰ Kĩ kyrũ tóg ti mỹ: “tag kar ki sỏg krỏm tĩ,” he mũ. “Kĩ ne nỹ hĩn ver inh mỹ tũ tĩ?” he tóg. ²¹ Kĩ Jesus tóg ti mỹ: “ă tỹ vẽnĩ jykre há han sỏr kĩ tag han nĩ, ha mĩ,” he mũ. “Ă tũ kar vãm tĩg. Kĩ ũn jagãgtar ag mỹ vĩn, jãnkamy ti, kĩ ă tóg kanhkã tá tũ mág nĩ sir. Kar kãtĩg nĩ, ă tỹ inh mrĩ tĩg jĩ,” he tóg, Jesus ti. ²² Kyrũ ěn tỹ ti vĩ tag mĩ kĩ tóg fe kaj han kĩ tĩ mũ sir. Ti tũ vỹ e nỹtĩ, hã kĩ tóg ti mỹ vẽnĩmỹ tĩ.

²³ Kĩ Jesus tóg ă mrĩ mũ tĩ ag mỹ kãmĩn mũ sir. “Sỹ ke há vĩ, hã kĩ sỏg ke mũ. Jagy ti nỹ, ũn rico tỹ ũ tỹ kanhkã tá nĩ ěn tỹ tỹ ěg pã'i nĩ venh ke ti,” he tóg. ²⁴ “Hã kĩ sỏg ăjag mỹ ke mãn mũ. Cavalo pãnĩ sỏr vỹ prĩj nor fin kutĩ tũ nĩ mỹr,” he tóg. “Tĩ tỹ fin kutĩ há nĩ ra tóg ver jagy tĩ vĩ, ũn rico tỹ ũ tỹ kanhkã tá nĩ ěn tỹ tỹ ěg pã'i nĩ venh ke ti,” he tóg, Jesus ti.

²⁵ Kĩ tóg ti mrĩ mũ tĩ ag mỹ e tĩ, ti vĩ tag. Kĩ ag kanĩ tóg jur mũ. “Kỹ ũ hĩn kren ke tũ nĩ,” he ag tóg. ²⁶ Kĩ Jesus tóg ag ki ěvãnĩ mũ, kĩ tóg ag mỹ: “ěprã ke ag vỹ vĩsỏg ki tá jun ke tũ nĩ,” he mũ. “Topĩ hã tóg ăjag tỹ tá jun han ki kanhrỏ nĩ, ti tỹ nĩn ũ kar tỹ hĩ ri ken há nĩn kĩ,” he tóg, Jesus ti.

²⁷ Kĩ Pedro tóg ti mỹ: “ha vĩ,” he mũ. “Nĩn kar rĩ kĩ ěg mũ mũ, ă mrĩ. Tag to ěg hĩn ne venh ke mũ?” he tóg.

²⁸ Kĩ Jesus tóg ag mỹ: “sỹ ke há vĩ, hã kĩ sỏg tỏ mũ,” he mũ. “Inh mrĩ ăjag tóg mũ mũ. Tỹ sỏg ěprã ke fi kỏsin nĩ. Kejĩn sỏg inh nĩgja kri nĩnĩ mũ, isỹ vẽnĩ kar jykre tugnỹm jĩ. Sĩnvĩ inh nĩnĩ mũ, kurã ěn kã. Nĩn kar han mãn jĩ sỏg ke mũ, kurã ěn kã. Kĩ ăjag tóg ăjag nĩgja kri nĩnĩgĩ kĩ nỹtĩnĩ mũ gĩ, nĩgja tỹ 12 (ke) kri, ăjag tỹ povo tỹ Israel kar jykre tugnỹm jĩ, povo tỹ 12 (ke) tag ag jykre,” he tóg. ²⁹ “Jỏ ũ tóg isugrĩn ă jamã rĩ kĩ tĩ mũ, ă kãke, ă jãvy, ă ve, ă panh, ă mỹnh, ă japỹ rĩ kĩ tóg tĩ mũ, inh jykre tugrĩn. ěn vỹ tóg vẽnĩ kato ă tỹ ěprã rĩ kĩ tĩg ja ěn e ri ke venh ke mũ, tag ki, ěprã. Kĩ tóg rĩr krĩg ja tũ ěn venh ke mũ gĩ,” he tóg. ³⁰ “Jãvo tag ki ũn mág ũ ag kãsir nỹtĩnĩ ke vĩ, tá tĩre kĩ, kĩ tag ki ũn kãsir ũ ag tỹ tỹ ũn mág nỹtĩnĩ ke vĩ, tá tỹ pã'i nĩnĩ ke vĩ,” he tóg, Jesus ti. Ti tỹ ag mỹ kanhkã jykre tỏ vĩ.

Uva ki rãnrãj tĩ ag to comparação

20 Kĩ Jesus tóg ag mỹ: “ũ tỹ kanhkã tá nĩ ěn tỹ tỹ ěg pã'i nĩ vỹ ge nĩ,

ha mē,” he mū, to comparação han kŷ. “Patrão ri ke tóg nĩ. Kusã ki tóg tĩ mū, 6 horas ki, camarada ag jāvānh jé, ag tŷ ti jakré ki rĩr jé. ²Kŷ tóg ũ ag vég mū sir. Ag mré tóg vēnh rānhraj kaja to jykrén mū, hã vŷ: jānkamy pir, he mū, por dia kaja ti. Kŷ tóg ag mŷ: “ha ki rĩr mŷjēg,” he mū sir. ³Kŷ ag tóg mū mū. Hora tăgtũ tŷg kŷ, 9 horas ki tóg tŷg măn mū, ũ ag jāvānh jé gé. Kŷ tóg ũ ag vég mū gé sir. Véké ag tóg ěmă kuju tá nŷtĩ, rānhraj tũ kŷ. ⁴Kŷ tóg ag mŷ: “inh mŷ inh jakré ki rĩr mŷjēg,” he mū gé. “Kajām jé sóg ke mū, ti kaja tŷ,” he tóg. ⁵Kŷ ag tóg mū mū.

Hora tăgtũ ũ tŷg kŷ, meio dia ki tóg ũ ag jāvānh tŷg măn mū, 3 horas ki tóg tŷg măn mū gé. Ag ve kŷ tóg ag mŷ ke mū gé, kŷ ag tóg mū mū gé, ti jakré ki rĩr jé. ⁶Vāhã tóg rākānh mū sir. 5 horas ki tŷg măn kŷ tóg ũ ag vég mū gé, véké jēgĭē kŷ nŷtĩ ag. Kŷ tóg ag mŷ: “ājag tŷ ne jé rānhraj tũ nĩ nē?” he mū. “Kurā kar ki ājag tóg ki nŷtĩ, rānhraj tũ nŷtĩ ra,” he tóg ag mŷ. ⁷Kŷ ag tóg ti mŷ: “hã ra ũ tóg ěg mŷ: ha inh rānhraj han, he ja tũ nĩ,” he mū. Kŷ tóg ag mŷ: “ha inh jakré ki rĩr mŷjēg ge,” he mū sir. Kŷ ag tóg mū mū gé.

⁸Kuty kŷ ag patrão tóg ā tũ ki rĩr tĩ ěn mŷ: “ha ag jé prēr,” he mū, 6 horas da tarde ki. “Ag mŷ ti kaja ti nĩm,” he tóg. “Ũn tŷ rākānh kŷ kāmũ mū ag mŷ nĩm vén, kar kŷ ũ tŷ kusã ki kāmũ mū ag mŷ nĩm rén,” he tóg ti mŷ. Kŷ tóg ke mū, ti tũ ki rĩr tĩ ti.

⁹Kŷ ũ tŷ rākānh kŷ junjun mū ag vŷ ājag kaja ti măn mū, hã vŷ: jānkamy pir, he mū. Ag rānhraj sĩ ra ag tóg por dia kaja vég mū sir. ¹⁰Kŷ ũ tŷ kusã ki rānhraj mū ag tóg to jykrén mū. “Ti hŷn ěg mŷ ti kaja kăfór han ke mū, ěg tŷ kurā kar ki rānhraj kŷ,” he ag tóg mū, to jykrén kŷ. Hã ra tóg ag mŷ jānkamy pir ěn nĩm mū gé sir, por dia kaja ěn. ¹¹Ag tŷ jānkamy ěn măn kŷ ag tóg ti to jũ mū, ājag patrão

to. ¹²Kŷ ag tóg ti mŷ vĩ mū. “Tag ag vŷ hora pir ki rānhraj, jāvo ā tóg ag mŷ ěg kaja ri ke han. Kurā kar ki ěg tóg rānhraj mŷr, to ěg ron, ti rŷ jagy ra ěg tóg to krónh ke ja tũ nĩ,” he ag tóg, ājag patrão mŷ.

¹³Kŷ tóg ag kāmĩ ũ mŷ ke mū, ag patrão ti. “Sŷ ā ki kygnē pijé’,” he tóg. “Inh mré ā tóg jānkamy pir to jykrén ja nĩ, hã kŷ sóg ā mŷ nĩm mū, jānkamy pir ti. ¹⁴Kŷ ā tũ măn kŷ tŷg. Hã ra sóg ag mŷ nĩm sór mū gé, sŷ ā mŷ nĩm ja ěn ri ke. ¹⁵Isũ vē mŷr, jānkamy ti, kŷ sóg sŷ tŷ nén han sór mū ěn han mū. Ā mŷ jũ’, isŷ ag mŷ vĩ há han to?” he tóg ti mŷ, patrão ti.

¹⁶Hã kŷ ěgno tá kāmũ ag vŷ ũn kāmũ vén mū ag ri ke nŷtĩnh mū, tăpry kŷ, jāvo ũn kāmũ vén mū ag vŷ ěgno tá kāmũ mū ag ri ke nŷtĩnh mū gé,” he tóg, Jesus ti.

Jesus tŷ ā ter ke tó măn

(Mc 10.32-34; Lc 18.31-34)

¹⁷Kŷ Jesus tóg Jerusalém ra tŷg sór mū. Kŷ tóg vyrmŷ ũ tŷ 12 (ke) ěn ag mré vēmén mū. Ag tŷ ā mré ěpry jagma mŷn kŷ tóg ag mré vēmén mū, ag tŷ ěmĩn jagma mŷn kŷ. ¹⁸“Ha vé,” he tóg. “Jerusalém ra ěg tóg mū mū,” he tóg. “Ěpră ke fi kósĩn ěn vŷ jagtar ke mū. Inh hã vē. Topē tũ ki rĩr tĩ to pă’i ag tóg ājag tŷ isŷ nén han sór mū ěn han ke mū, Topē vĩ to professor ag ke gé. Ag tŷ iso: “ter jé tóg ke mū,” henh ke vē. ¹⁹Kŷ ag tóg fóg ag mŷ inh fēg ke mū sir, ěn ag tŷ iso é he jé, ag tŷ inh mrānmrān jé, ag tŷ ka to isa jé. Kurā tăgtũ ki sóg hã ra rĩr măn ke mū,” he tóg, Jesus ti.

Ũn régre ag tŷ tŷ ũn mág nŷtĩ sór

(Mc 10.35-45)

²⁰Kŷ Zebedeu krē ag mŷnh fi tóg Jesus venh kătĩ mū, fi krē ag mré. Ti krēm fi tóg mŷg ke mū, fi tŷ ti mŷ nén (ũ) to vĩ sór kŷ. ²¹Kŷ tóg fi mŷ: “ă tŷ ne to vĩ sór nē?” he mū. Kŷ fi tóg ti mŷ: “kejēn ā tóg

tỹ pã'i nĩnh mũ," he mũ. "Kỹ inh krê tag ag tỹ ã rã hã nỹtĩnh há tóg tĩ, ù tỹ ã pẽgja tá nĩ jé, kỹ ù tỹ ã jakãnh tá nĩ jé," he fi tóg, ti mỹ.

²² Kỹ Jesus tóg ag mỹ: "ãjag tỹ nén to vĩ mũ ki kagtĩg ãjag tóg nỹtĩ," he mũ. "Jagy ti nỹ. Ajag mỹ inh ri kén jagtar sór mũ? Ajag mỹ tovãnh ke tũ nĩ?" he tóg. Kỹ ag tóg ti mỹ: "hỹ," he mũ. "Tovãnh ke tũ ãg nĩ," he ag tóg, ti mỹ. ²³ Kỹ tóg ag mỹ: "hỹ, jagãgtar jé ãjag tóg ke mũ, inh ri kén," he mũ. "Hã ra isũ tũ vễ, sỹ ãjag mỹ: hej, he ti," he tóg. "Ha inh pẽgja tá nĩ, henh ke tũ sóg nĩ. Ha inh jakãnh tá nĩ, henh ke tũ sóg nĩ gé, isũ tũ vễ. Topẽ tỹ ùn mỹ: ha ti rã hã nỹtĩ, henh ke mũ ên ag hã tỹ inh rã hã nỹtĩnh ke vễ," he tóg, Jesus ti.

²⁴ Hã ra ù tỹ 10 (ke) ag tóg mễg mũ, ùn rẻgre ag tỹ Jesus mỹ tag to vĩ ja ti. Kỹ ag tóg ag to jũ mũ. ²⁵ Hã ra Jesus tóg ag jé prẻr kãn mũ, kỹ tóg ag mỹ: "fóg ag pã'i ag jykre ki kanhrỏ ãjag tóg nỹtĩ," he mũ. "Vẻnh kar jẻgnẻg ag tóg ti mỷr, kỹ ag mág ag tóg vẻnh kar mỷ: gemnĩ, ge tũg nĩ, he tĩ, vĩ tar han kỹ," he tóg. ²⁶ "Ag ri ke han tũg nĩ. Ajag mỹ tỹ ùn mág nỹtĩ sór mũ? Kỹ tỹ jagnẻ camarada ri ke nỹtĩmnĩ, jagnẻ tũ ki rửr kỹ. ²⁷ Ajag mỹ tỹ pã'i nỹtĩ sór mũ? Kỹ tỹ jagnẻ krẻm ke nỹtĩmnĩ, tỹ ùn kãsir nỹtĩmnĩ. ²⁸ Hã kỹ sóg camarada tũ nĩ gé. Sỹ tỹ camarada nĩ jẻ sóg kãtĩg, sỹ ãjag ki rửr jẻ. Tỹ sóg ẻprỏ ke fi kỏsin nĩ. Hã kỹ sóg vẻnh kar jagfỷ ter ke mũ, sỹ ag krenkren han jẻ," he tóg, Jesus ti.

Jesus tỹ ùn kyvỏ ag tỹ há' he

(Mc 10.46-52; Lc 18.35-43)

²⁹ Hã ki ag tóg Jerusalem ra mũ mũ. Kejẻn ag tóg cidade tỹ Jericỏ fin rằm kỹ ag tóg tá pa mũ, hã ra ù tỹ hẻn ri ke ag tóg Jesus nỏn mũ mũ. ³⁰ ẻprỷ ên tá, ẻmỉn ên tá ùn kyvỏ ag tóg nẻgnẻ kỹ nỹtĩ nĩ, ùn rẻgre ag. Vẻhỏ ag tóg Jesus tỹ jagma tũg mễg mũ. Kỹ ag tóg ti jẻ

prẻr mũ. "!.Senhor..!" he ag tóg. "!.Davi kỏsin', ẻg jagãgtỏn ra..!" he ag tóg. ³¹ Kỹ ag tóg ag to jũgũ mũ, ti nỏn mũ ù ag. "Mẻ kỏ nỹtĩ," he ag tóg mũ. Hã ra ag tóg prẻr mỏn', prẻr mỏn' he mũ, jamỏ hỏr(a). "!.Senhor, Davi kỏsin', ẻg jagãgtỏn ra..!" he ag tóg mũ.

³² Kỹ Jesus tóg krẻg he mũ, kỹ tóg ag jẻ prẻr mũ. Kỹ tóg ag mỷ: "ne to ãjag vĩ, sỹ ãjag mỷ han jẻ?" he mũ. ³³ Kỹ ag tóg ti mỷ: "ẻg tỹ ẻvẻnh há tóg ti," he mũ. ³⁴ Kỹ Jesus tóg ag jagãgtỏn mũ sir. Ag kanẻ mẻgmẻg tóg mũ sir. Kỹ ag tóg ẻvẻnh há han mũ sir. Ti nỏn ag tóg mũ mũ sir.

Jesus tỹ Jerusalem tá jun

(Mc 11.1-11; Lc 19.28-40; Jo 12.12-19)

21 Ag mủn kỹ ag tóg Jerusalem kakỏ tá junjun mũ, ẻmỏ tỹ Betfagẻ tá, krử tỹ Oliveiras tá. Kỹ Jesus tóg ã mrẻ mũ tĩ rẻgre ag jẻgnẻg mũ, ẻmỏ ên ra. ² Kỹ tóg ag mỷ: "ẻmỏ ên ra mủjẻg, ẻg jo ẻmỏ nẻ ên ra," he mũ. "Tỏ ãjag tóg burrica fi venh mũ. Se kỹ fi jẻ. Fi kỏsin vĩ fi mrẻ jẻ nẻ. Ên fi kavỏn kỹ fi pẻrẻ kỏmủmnĩ. ³ Hẻn ri ke mủn ag tóg ãjag mỷ vĩ sỏr mũ, fi to. Kỹ ag mỷ: "ẻg Senhor vĩ fi ve sĩ han sỏr mũ. Kỏnhmar tóg fi jẻnẻ mỏn mũ," hemnẻ," he tóg, Jesus ti.

⁴ Hã ra tóg rỏn kỹ nẻ gé, tag. Topẻ vĩ tỏ tĩ tóg tag rỏn ja nẻ, ha mẻ. ⁵ "Siỏo tá ke fag mỷ tag tỏmnẻ, ha mẻ. Hỏ vẻ, ã pã'i tỹ rẻi tóg ã ki jun ke mũ, hemnẻ. Vẻnh kar to tóg fe há nẻ, jũ vẻnh nửn kỹ, ã Senhor ti. Burrica kri tóg nẻ nẻ, fi kỏsin kri, ẻg tu tĩ ên fi kỏsin kri mỷr," he tóg, Topẻ vĩ tỹ rỏn kỹ nẻ ki. Hã ra tóg ge nẻ.

⁶ Kỹ ti mrẻ mũ tĩ ag tóg mũ mũ, burrica fi mỏn jẻ. ⁷ Fi pẻrẻ ag tóg kỏmủ mũ, fi kỏsin mrẻ. Kỹ ag tóg ãjag kur tỹ kri vằm mũ, kỹ tóg kri nẻ mũ. ⁸ Kỹ vẻnh e ên ag tóg ãjag kur tỹ ẻprỷ kri kugẻn mũ, ẻmỉn kri. Kỹ ù ag tóg ka fẻj kre kỹ ẻprỷ kri vằvằm mũ sir. Ag tỹ ti jamỏn sỏnvỉ han sỏr vẻ. ⁹ Kỹ ù ag tóg ti jỏmỉ mũ mũ, jo ù ag ti nỏn mũ mũ. Ên ag tóg prẻnprẻr mũ

sir. “!..Viva, Davi kósín..!” he ag tóg mû. “!..Sér tóg tí, pã'i vỹ ãg tá jun, ãg Senhor mág tỹ ti jẽnẽn kỹ..! !..Topẽ tá tóg kãtĩg, ù tỹ kynhmỹ nĩ ãn tá, viva..!” he ag tóg, prẽnprẽn kỹ.

¹⁰Hã ki ag tóg Jerusalém tá junjun mû. Kỹ tá ke kar ag vỹ ti venh kãmũ mû. Ag mỹ tóg e tí, kỹ ag tóg ti to: “ũ nẽ?” he mû. ¹¹Kỹ ti mrẽ kãmũ mû ag vỹ ag mỹ: “Topẽ vỹ tó ti ãn vỹ,” he mû. “Jesus vỹ, Nazarẽ tá ke ãn vỹ, Galiléia tá ke ãn,” he ag tóg mû sir.

Jesus tỹ Topẽ jo ãn krẽm ag pan

(Mc 11.15-19; Lc 19.45-48; Jo 2.13-22)

¹²Kỹ Jesus tóg Topẽ jo ãn kãra rã mû. Kỹ tóg tá ke ag pan kãn mû sir, nẽn vender he tí ag, nẽn comprar he tí ag ke gé. Topẽ jo ãn krẽm ag tóg negociar he tí, jãnkamy trocar he ag tóg tí gé. Ag tỹ nẽn kri vin jafã tỹ tóg vyryn ke mû sir. Sórãg vender he tí ag nĩnĩ jafã tỹ tóg vyryn ke mû gé sir. ¹³Ag mỹ tóg: “Topẽ vỹ rá to jykrẽn nĩ,” he mû. “Tag vỹ rán kỹ nĩ, ha mẽ. “Inh ãn jiji vỹ tỹ Topẽ mrẽ vỹ jafã nĩ,” he tóg, Topẽ vỹ rá ki. Hã ra ãjag tóg Topẽ mrẽ vỹ jafã tag krẽm nẽn kar pigju(g) mũgtĩ, kỹ tóg bandido ag jamã ri ke nĩ sir,” he tóg, Jesus ti. Ag pan kỹ tóg ke mû, Jesus ti.

¹⁴Kỹ ùn kyvó ag tóg ti to junjun mû sir, ùn kónhgrĩ ag ke gé, ti tỹ Topẽ jo ãn krẽm jẽn kỹ. Kỹ tóg ag tỹ há' he kãn mû sir. ¹⁵Hã ra Topẽ tũ ki rĩr tí ag tóg tá nỹtĩ, Topẽ vỹ to professor ag ke gé. Tĩ tỹ ag tỹ há' he vỹ ag tóg mû. Gĩr ag vỹ mẽg ag tóg mû gé. Topẽ jo ãn krẽm ag tóg nỹtĩ, gĩr ag, kỹ ag tóg Jesus mỹ prẽnprẽn mû. “!..Viva, Davi kósín..!” he ag tóg mû, prẽnprẽn kỹ. Kỹ pã'i ag tóg jũgũ mû, Jesus to. ¹⁶Hã kỹ ag tóg ti mỹ vỹ mû. “Ã mỹ ag prẽnprẽn mẽg tũ?” he ag tóg. Kỹ Jesus tóg ag mỹ: “vó,” he mû. “Hã ra Topẽ vỹ rá to jykrẽn nĩ,” he tóg. “Ùn kãsir ag vỹ iso vỹ há han tí,” he tóg, Topẽ vỹ ki. “Ùn pafa mû ag vỹ ãn mỹ vỹ há pẽ han tí. Ã

hã ne tag han', ùn kãsir ag tỹ ãn mỹ vỹ há han jé,” he tóg, Topẽ mỹ, Topẽ vỹ tỹ rán kỹ nĩ ki,” he tóg, Jesus ti.

¹⁷Tag tó kỹ tóg ag ré kỹ tí mû sir. Cidade tá tóg kãkutẽ mû, ãmã tỹ Betfagẽ ra tĩg jé. Tá tóg sir nũr mû.

Ka tỹ figueira tóg

(Mc 11.12-14, 20-24)

¹⁸Tỹ vaj kỹ kusã ki tóg cidade ra tĩg mãn mû. Ã tĩg kỹ tóg kókĩr mû. ¹⁹Kỹ tóg ka tỹ figueira vỹg mû sir, kỹ tóg ra tí mû, ti kanẽ ko jé. Hã ra tóg kanẽ tũ nĩ. Fěj tãvĩ tóg jẽ, kỹ tóg ti mỹ vỹ mû. “Kanẽ han mãn ke tũ ã nĩ ha,” he tóg mû. Kỹ tóg tóg mû sir vỹsỹmẽr, ka ti. ²⁰Kỹ ti mrẽ mû tí ag tóg vỹg mû sir, ti tóg mû ti. Kỹ tóg ag mỹ e tí. “Vỹsỹmẽr tóg tóg ja nĩ,” he ag tóg. “Tĩ hẽ ri kẽ?” he ag tóg.

²¹Kỹ Jesus tóg ag mỹ kãmẽn mû sir. “Ki hã sóg tó mû, hã kỹ sóg ke mû,” he tóg. “Inh ri ke han jé ãjag tóg ke mû. Isỹ ka tỹ figueira mỹ: “tóg ra,” hen kỹ tóg tóg ja nĩ. Inh vỹ tag ri ke han jé ãjag tóg ke mû, ãjag tỹ ãn ki ge há han kỹ. Hã ra to: “Topẽ mỹ ãn vỹ mẽg mû vỹ?” he tũg nĩ. “Hỹ mỹ vỹ?” he tũg nĩ. Kỹ ãjag tỹ kejẽn pãnónh mỹ: ha kutẽ, goj nig ki, hen kỹ tóg kutẽ mû, ãjag tỹ ti kutẽnh ke to: “hỹ mỹ vỹ?” he tũ nĩn kỹ. ²²Kỹ ãjag tỹ Topẽ mỹ nẽn ù to vĩn kỹ to: “han jé tóg ke mû,” hemnĩ. Kỹ tóg ãjag mỹ han mû, ãjag tỹ ti mỹ nẽn to vỹ mû ãn ti,” he tóg, Jesus ti.

Jesus tỹ ù tỹ ã jẽnẽg mû tó tũg

(Mc 11.27-33; Lc 20.1-8)

²³Kỹ tóg cidade tá jun kỹ (tóg) Topẽ jo ãn kãra rã mãn mû sir. Kỹ Topẽ tũ ki rĩr tí to pã'i ag vỹ ti to kãmũ mû, kófa ag mrẽ hã. Ag tỹ ti ki jẽmẽ sór vỹ, hã kỹ ag tóg ti mỹ: “ũ nỹ ã mỹ: tag han nĩ, hẽ?” he mû. “Ù nỹ ã jẽnẽ?” he ag tóg mû, Jesus mỹ.

²⁴Kỹ Jesus tóg ag mỹ: “ãjag ki sóg jẽmẽnh ke mû gé, vẽnẽh kato,” he mû.

“Ājag tỹ inh mỹ tó há han kỹ sóg ājag mỹ ũ tỹ inh jēnēg mũ tónh ke mũ gé,” he tóg. ²⁵ “João vỹ ag kygpég tĩ ja nĩgtĩ. Kỹ ti mỹ kanhkā tá vēnh jykre han ja nĩgtĩ, ēprā vēnh jykre vó? Ũ nỹ ti jēnē?” he tóg, Jesus ti.

Kỹ ag tóg ti vỹ to jykren mũ jagnē mré. “Ēg tỹ ti mỹ: Topē tỹ ti jēnē ja vē, hen kỹ tóg ēg mỹ: kỹ ājag tỹ ne jé ti vỹ kri fig tũ nĩ nē? henh ke mũ. ²⁶ Ēg tỹ hā ra ti mỹ: ēprā ke jykre ja vē, hen kỹ ēg tóg vēnh kar kato tē mũ sir. Ag kar vỹ João to: Topē vỹ tó tĩ pē ja vē, he tĩ. Kỹ ēg tóg ag kamēg mũ, vēnh e ēn,” he ag tóg mũ, jagnē mỹ, pā'i ag. ²⁷ To jykren kỹ ag tóg Jesus mỹ: “ēg pi(jé) João jykre ki kanhró nỹtĩ,” he mũ. Ōn kỹ ag tóg ke mũ. Kỹ tóg ag mỹ: “kỹ sóg ājag mỹ tónh ke tũ nĩ gé, ũ tỹ inh jēnēg mũ ti,” he mũ. Ā kato tē mũ ag mỹ tóg ke mũ, Jesus ti.

Ũn krē régre to comparação

²⁸ Kỹ tóg ag kanhrān kỹ ag mỹ: “tag to jykren nĩ, ha mē,” he mũ sir. “Ũ tóg kósín régre nĩ. Kejēn tóg ũn sanh to tĩg kỹ ti mỹ: “inh kósín,” he mũ. “Ũri inh jakré tugnỹgnỹm tĩg,” he tóg. ²⁹ Kỹ tóg ā panh ti mỹ: “vó,” he mũ. Kar kỹ tóg to jykren mǎn kỹ (tóg) tĩ mũ sir, ēpỹ ra. ³⁰ Kỹ ti panh tóg ti jāvy mỹ ke mũ gé sir. “Ũri inh jakré tugnỹgnỹm tĩg,” he tóg mũ gé. Kỹ ti jāvy tóg: “hej,” he mũ, ā panh ti mỹ. Hā ra tóg tĩ tũ nĩ. ³¹ Kỹ ũ tỹ hē nỹ ti panh vỹ ki króm hỹn?” he tóg, Jesus ti. Kỹ ag tóg ti mỹ: “ũn sanh ti,” he mũ. Kỹ Jesus tóg ag mỹ: “hỹ, hā vē,” he mũ. “Hā kỹ sóg ājag mỹ ke mũ. Ũ tỹ governo mỹ jānkamy mǎg tĩ ũ ag vỹ Topē vỹ mranh, hā ra ag tóg to jykren mǎn kỹ (ag tóg) ājag jykre tovānh. Kỹ ũn mén e ũ fag vỹ ājag jykre kórég tovānh gé. Hā kỹ ag tóg Topē tỹ tỹ ēg pā'i nĩ venh ke mũ, fag ke gé. Ti kósín sanh ri ke ag hā vē. Ag jāvo ājag tóg kanhkā venh ke tũ nĩ, ājag tỹ ón kỹ Topē mỹ: “hej,” he mũ ra. ³² João vỹ ājag mỹ Topē vỹ tó ja nĩgtĩ, ājag tỹ ti

jykre kuryj jagma mũ jé. Hā ra ājag tóg ti vỹ kri nĩm ja tũ nĩ. Ājag jāvo ũ tỹ governo mỹ jānkamy mǎg tĩ ag vỹ ti vỹ kri fi ja nĩ, ũn mén e fag ke gé. Tag ve ājag mỹr. Ge ra ājag tóg ājag jykre tovānh tũ nĩ, João vỹ kri nĩm tũ ājag nĩ,” he tóg, Jesus ti.

Ũn camarada kórég ag to comparação

(Mc 12.1-12; Lc 20.9-19)

³³ Kỹ Jesus tóg ag mỹ: “sỹ ājag mỹ ājag tỹ Topē tovānh to comparação han mǎn ke vē, ha mē,” he mũ. “Kejēn ũ tóg nĩgtĩ. Uva krān tóg nĩgtĩ, nén kanē tỹ vinho han jafā ēn. Ā jakré tag to tóg rón mũ. Kỹ tóg kũm kỹ uva jēgmĩ jafā han mũ. Kỹ tóg ki pājó han mũ gé. Kỹ tóg ũ tỹ ki rĩr tĩ ag mỹ tovānh mũ, ag tỹ ti mré ti kanē vēnh kǎpām jé. Kỹ tóg tĩ mũ, ga ũ ra. ³⁴ Ti kanēn kỹ tóg ā camarada ag jēgnēg mũ, ag tỹ ag mỹ ti tũ vin jé, uva kanē ti. ³⁵ Hā ra ag tóg ag vóg kónān mũ sir, ti camarada ag. Ũ mrānmrān ag tóg mũ, ũ tén ag tóg mũ, ũ pin ag tóg mũ, pó tỹ. ³⁶ Kỹ tóg ag mỹ ā camarada ũ ag jēgnē mǎn mũ gé sir, ũn e ag sir, hā ra ag tóg ag vóg kónān kǎn mũ. ³⁷ Vāhā tóg ag mỹ ā kósín jēnēg mũ. “Ag hỹn ti kamēg mũ, inh kósín ti,” he tóg, hā kỹ tóg ti jēnēg mũ. ³⁸ Kỹ ag tóg ti vég mũ, ti kósín ti. Kỹ ag tóg jagnē mỹ: “kejēn ēkré tag vỹ tỹ ti tũ ninh ke mũ,” he mũ. “Mũ nỹ, ti tén jé, ti tũ tag tỹ tỹ ēg tũ nỹnh jé,” he ag tóg mũ, patrão kósín to. ³⁹ Kỹ ag tóg ti kǎgmĩg mũ sir. Ró pāte ag tóg ti kutēm kỹ (ag tóg) ti tén mũ sir.

⁴⁰ Kejēn ag patrão vỹ kǎtĩg ke mũ, ũ tỹ nén krān ja ēn. Kỹn hỹn hē ri kenh mũ, ā camarada ag tỹ?” he tóg, Jesus ti. ⁴¹ Kỹ ũ tỹ ti vỹ mēg mũ ag tóg ti mỹ: “vēnh jykre pāno han ag tóg mũ mỹr, uva ki rĩr tĩ ag,” he mũ. “Ag kǎgtén jé tóg ke mũ, jũ kỹ, ag patrão ti, kỹ tóg uva kré ēn tỹ ũ mỹ tovānh ke mũ, ag tỹ ti mré vēnh kǎpām jé, ti kanē ti,” he ag tóg ti mỹ. Ũ tỹ ti vỹ mēg mũ ag tóg ke mũ, Jesus mỹ.

⁴² Kĩ tóg ag mĩ: “hỹ,” he mũ. “Kĩ Topẽ vĩ rá tag to jykrén nĩ gé, ha mẽ: pó tỹ ìn han jafã fón ag tóg, pó tỹ ìn han tĩ ag. Ag mĩ tóg kórég ja nĩ, pó ãn ti. Hã ra Topẽ tóg pó ãn hã tỹ ìn nũna han mũ. Ëg Senhor mág tỹ há vẽ mỹr, hã kĩ tóg ãg mĩ e tĩ, ãg tỹ ve kĩ,” he ja tóg nĩ, Topẽ vĩ rá ki,” he tóg, Jesus ti, vëso pó tỹ comparação ù han kĩ.

⁴³ “Hã kĩ sóg ãjag mĩ ke mũ. ãjag tỹ Topẽ tỹ tỹ ãg pã'i nĩ venh ke vẽ vẽ, hã ra ãjag tóg venh ke tũ nĩ. Û ag vỹ venh ke mũ, povo ù ag, ag tỹ ình vĩ kri fi kĩ,” he tóg. ⁴⁴ “Û tỹ hẽn ri ke ag vỹ pó tag kri vár ke mũ, kĩ ag tóg kri vár kĩ tũ' henh ke mũ. Kĩ pó tag vỹ ù tỹ hẽn ri ke ag kri kutẽnh ke mũ gé, kĩ tóg ag tỹ námnam ke kãn mũ, ag kri kutẽ kĩ,” he tóg, Jesus ti. Ti tỹ ag tỹ ti ki rá tũ tũgrĩn nũgme ki vár ke tón hã vẽ.

⁴⁵ Kĩ ag tóg mẽg mũ sir, Jesus vĩ ti. Topẽ tũ ki rĩr tĩ to pã'i ag vỹ mẽg mũ, Fariseu ag ke gé. Mẽ kĩ ag tóg vãhã to jykrén mũ sir. “Ëg hã to tóg uva ki rĩr tĩ kórég ag to comparação tag han ja nĩ,” he ag tóg mũ sir, ki kanhrãn kĩ. ⁴⁶ Hã kĩ ag tóg ti se sór mũ. Hã ra ag tóg vẽnẽ e ãn kamẽg mũ. “Topẽ vĩ tó tĩ pẽ vẽ,” he ag tóg, Jesus to, vẽnẽ e ãn, hã kĩ pã'i ag tóg povo ãn ag kamẽg kĩ ti sэг tũ nĩ ver.

Vẽnẽ prũg to comparação

(Lc 14.15-24)

22 Kĩ Jesus tóg ag mĩ comparação ù han mãn mũ sir. ² “Û tỹ kanhkã tá nĩ ãn tỹ tỹ ãg pã'i nĩ vỹ ge nĩ, ha mẽ,” he tóg. “Tỹ tóg pã'i mág ri ke nĩ. Ti kósin prũg ken kĩ tóg to festa mág han sór mũ, pã'i mág ti. ³ Hã kĩ tóg ã camarada ag jẽgnẽg mũ, ag tỹ ti tỹ ùn mỹ tó ja ag mĩ: “ha kãmũ jẽg, festa kon jé,” he jé. Hã ra ag tóg kãmũ jãvãnh nỹtĩ. ⁴ Kĩ tóg ag mĩ ã camarada ù ag jẽgnẽ mãn mũ. “Ag mĩ: “kãn ình huri, vjẽn ti, he ti, ãg patrão ti,” hemnĩ,” he tóg. “Boi kãgtén ình huri, boi tãgy ãn mré hã. Nén kar vỹ kynkar

kĩ nỹtĩ. Kãmũ jẽg ra, ình festa to, he ti, ãg patrão ti,” hemnĩ ag mĩ,” he tóg, pã'i mág ti, ã camarada ag mĩ. Kĩ ag tóg mũ mũ.

⁵ Hã ra ag tóg kãmũ sór tũ nĩ, kĩ ag tóg ti camarada ag to é he mũ. Û tóg ã japỹ ra tĩ mũ, ù tóg ã negócio nón tĩ mũ. ⁶ Û ag tóg hã ra ti camarada ag kugmĩ kĩ (ag tóg) ag vóg kónãn mũ gé sir, ag kãtén ag tóg mũ sir. ⁷ Kĩ pã'i mág tóg ag to jũ mũ. Kĩ tóg ã krẽm pã'i ag jẽgnẽ kĩ ag kãgtén mũ gé sir, ù tỹ ti camarada kãgtén ja ãn ag. Ag ìn kugprũg ag tóg mũ sir. ⁸ Kĩ tóg ã camrada ag mĩ: “ình festa vỹ kar kĩ nĩ ha,” he mũ. “Hã ra ag tóg kãmũ jãvãnh nỹtĩ, isỹ ùn mỹ vẽnẽ vĩ jẽnẽ ja ag, ag kórég nỹtin kĩ. ⁹ Ha mũjẽg, ãpỹ ra, ãmĩn vẽnẽ kãpóv (ja) ra ke gé. ãjag tỹ ù ve kĩ ti mĩ: “ha festa venh kãtig,” hemnĩ,” he tóg, pã'i mág ti, ã camarada ag mĩ. ¹⁰ Kĩ ag tóg mũ mũ. ãjag tỹ ãpỹ tá ù ve kĩ ag tóg ag mĩ ke mũ. Vẽnẽ kar mĩ ag tóg tó mũ sir, ùn jykre há ag mĩ, ùn jykre kórég ag mĩ ke gé. Hã kĩ tóg fór mũ sir, clube ti.

¹¹ Kĩ pã'i mág tóg kãrã mũ sir, ag vjẽge jé, ù tỹ festa to kãmũ ag. Kĩ ù tóg tá jẽ nĩ, hã ra tóg festa to kur tu tũ nĩ. ¹² Kĩ tóg ti mĩ: “festa to kur tu tũ ã tóg nĩ, vỹ,” he mũ. “Ã hã ne tóg kur kórég tu sór mũ', ình festa ki',” he tóg, ti mĩ. Hã ra tóg vĩ tũ nĩ sir. ¹³ Kĩ pã'i mág tóg ã camarada ag mĩ: “ha ti mrĩnh, ti pẽn, ti nĩgẽ, ha ti fón, re tá,” he mũ. Re tán kuty nĩ. Tá ag tóg jagtar tĩ. ãjag jã tỹ ag tóg gyngyn ke tĩ sir, gangan ke ag tóg tĩ sir, vëso jũgũ kĩ. ¹⁴ Ge ti nĩ. Û tỹ hẽn ri ke jé sóg prẽr tĩ, hã ra ti pipir nỹtĩ, ùn kuprẽg kĩ nỹtĩ ag,” he tóg, Jesus ti. Ti tỹ ãg tỹ kanhkã tá festa venh ke tón hã vẽ.

Ag tỹ imposto to ti ki jẽmẽ

(Mc 12.13-17; Lc 20.20-26)

¹⁵ Kĩ Fariseu ag tóg jagnẽ mré Jesus to jykrén mũ sir. Ag tỹ ti vĩ to ti se sór vẽ. Hã kĩ ag tóg: “ti vỹ tỹ hẽ to ãg hỹn ti

senh mǔ?” he mǔ. ¹⁶ Tag to jykrén kǵ ag tóg sir Jesus mǵ ājag mré ke ũ ag jěgněg mǔ, Herodes mré ke ũ ag mré hǎ, ag tǵ ón kǵ ti ki jēmē jé, ag tǵ ti vǐ to ti se jé. Ēn ag tǵ Jesus tá junjun kǵ ag tóg ti mǵ: “Senhor,” he mǔ. “Ā jykre kuryj nǐn ki kanhró ěg tóg nǵtǐ,” he ag tóg. “Hǎ kǵ ā tóg Topē to ěmǐn ki ěg kanhrǎn hǎ han tǐ. Věnh jykre pir hǎ han ā tóg tǐ. Ũ tǵ věnh jykre hǎ hǎ han ve nǐ mǔ ra ā tóg ti jykre ki kanhró kar nǐ,” he ag tóg mǔ, ón kǵ, Jesus mǵ. ¹⁷ “Hǎ kǵ, ěg mǵ ā tǵ nén to jykrén mǔ tómnǐ. Mǵ ha nǵ, ěg tǵ pǎ'i mág tǵ imperador mǵ jǎnkamy ěn nǐm ti', imposto kajǎm jé? ěg mǵ hǵn nǐm mǔ', vó mǵ vó?” he ag tóg mǔ, ón kǵ ti ki jēmēn kǵ.

¹⁸ Hǎ ra Jesus tóg ag jykre pǎno ki kanhró nǐ. Hǎ kǵ tóg ag mǵ: “ājag ne tóg ón kǵ inh ki jēmē sór mǔ'.” he mǔ. “Jykre régre ājag nǵtǐ mǵr,” he tóg. ¹⁹ “Inh mǵ jǎnkamy jun, imposto kajǎm jǎfǎ ěn ti,” he tóg. Kǵ ag tóg ti mǵ ũ jun mǔ sir, jǎnkamy ti. ²⁰ Kǵ tóg ag mǵ: “ũ jiji nǵ kǎ nǐ, ũ kǎgrǎ nǵ kǎ nǐ?” he mǔ. ²¹ Kǵ ag tóg ti mǵ: “pǎ'i mág tǵ imperador kǎgrǎ vē,” he mǔ. Kǵ tóg ag mǵ: “kǵ pǎ'i mág mǵ ti tǔ nǐm nǐ, hǎ ra Topē mǵ ti tǔ nǐm nǐ gé,” he mǔ sir.

²² Ag tǵ ti vǐ mē kǵ ti jykre tóg ag mǵ e tǐ sir. Kǵ ag tóg ti tovǎnh kǵ mǔ mǔ sir.

Ěg tǵ ěg ter ja tá vǵn kenh ke

(Mc 12.28-34; Lc 10.25-28)

²³ Kǵ kejēn Saduceu ag tóg Jesus tá junjun mǔ gé, kurǎ ěn kǎ. Ag tǵ ón kǵ ti ki jēmē sór vē gé. Hǎ ra Saduceu ag tóg: “ěg ter ja tá ěg vǵnvǵn kenh ke tǔ nǐ,” he tǐ. “Rǐr mǎn ke tǔ ěg tóg nǐ,” he ag tóg tǐ. Ēn ag vǵ ón kǵ Jesus ki jēmē sór mǔ gé. ²⁴ “Senhor,” he ag tóg mǔ gé. “Moisés tǵ ěg mǵ vēnh jykre nǐm kǵ tóg ěg mǵ: “ā régre tǵ ā krē tǔ ra ter kǵ ā tǵ ti prǔ fi tǵ prǔg ke vē,” he mǔ. “Ā tǵ ā régre mǵ ā krē han ke vē, fi ki,” he ja tóg nǵtǐ, Moisés ti,” he ag tóg mǔ, Saduceu

ag, Jesus mǵ. ²⁵ “Kǵ ũ tǵ jagnē mré pafa ja tǵ 7 (ke) vǵ nǵtǐgtǐ. Ag kǎke tóg prǔg mǔ, hǎ ra tóg ā kósín tǔ ra ter mǔ. Kǵ ti jǎvy tóg fi tǵ prǔg mǔ sir. Hǎ ra tóg ā kósín tǔ ra ter mǔ gé. Kǵ ti jǎvy ũ tóg fi tǵ prǔg mǔ gé sir. ²⁶ Hǎ ra tóg ā kósín tǔ ra ter mǔ gé, ti jǎvy ũ ke gé, hǎ ki ag kar vǵ kósín tǔ ra kǎgter kǎn mǔ sir. ²⁷ Kǵ vǎhǎ ag kar prǔ fi tóg ter mǔ gé sir. ²⁸ Kǵ fag kǎgter ja tá rǐnrǐr mǎn kǵ fi hǵn mén tǵ 7 (ke) nǐnh mǔ vē. Ag kar vǵ fi tǵ prǔg ja nǐ mǵr. Hǎ kǵ tóg vēnhmǵ nǵ, ag tǵ: rǐr mǎn jé ěg tóg ke mǔ, hen kǵ,” he ag tóg, Saduceu ag, Jesus mǵ.

²⁹ Hǎ ra Jesus tóg ag mǵ: “kygnē ājag huri,” he mǔ. “Ājag pi(jé) Topē vǐ tǵ rǎn kǵ nǐ ki kanhró nǵtǐ', ājag pi(jé) Topē jykre ki kanhró nǵtǐ',” he tóg. ³⁰ “Ěg rǐnrǐr mǎn kǵ ěg tóg prǔg mǎn ke tǔ nǐ sir, kǵ ěg mén mǎn ke tǔ nǐ gé. Topē tǵ jěgnē jǎfǎ ri ke ěg nǵtǐ, kǎnhkǎ tá,” he tóg.

³¹ “Kǵ Topē vǐ rá ũ to jykrén nǐ, ti tǵ ěg ter ja tá vǵn ke tó ti. Topē hǎ ne tǵ vēmén ja nǐ mǵr, hǎ kǵ tóg tag tó ja nǐ, ha mē. ³² “Abraão vǵ iso: Topē, he tǐ, Isaque ke gé, Jacó ke gé,” he ja tóg nǐ, Topē ti. Kǎgter ag huri, Abraão, Isaque, Jacó. Hǎ ra Topē tóg: “tǵ inh ag Topē nǐ,” he ja nǵtǐ, ag ter kar kǵ. Hǎ kǵ ag tóg rǐnrǐr nǵtǐ, Topē tǵ ũn rǐnrǐr nǵtǐ ag hǎ kri ke nǐn kǵ,” he tóg, Jesus ti. ³³ Kǵ ag tóg ti vǐ mēg mǔ sir, kǵ ti jykre tóg ag mǵ e pē tǐ, ti vǐ tǐ.

Topē tǵ ěg jyvěn kǎfór

(Mc 12.28-34; Lc 10.25-28)

³⁴ Kǵ Fariseu ag tóg mēg mǔ, Jesus tǵ Saduceu ag mǵ vǐ hǎ han ja ti. Tǐ tǵ ag mǵ vǐ hǎ han kǵ ag tǵ ti mǵ hē ri ken kǵ kǎfǎn ke tóg tǔ tǐ sir. Hǎ mēg ag tóg mǔ, Fariseu ag. Kǵ ag tóg Jesus to vēnhmǎn mǔ sir. ³⁵ Kǵ ag kǎ ũ tóg ti mré vǐ mǔ. Topē vǐ to professor vē, ũ tǵ Jesus mré vǐ mǔ ti. Kǵ tóg Jesus mǵ: ³⁶ “Senhor,” he mǔ. “Topē tǵ ěg jyvěn tǵ hē nǵ hǵn ti tǵ ěg jyvěn kar kǎfór nǵnh mǔ?” he tóg mǔ

sir. ³⁷ Kĩ Jesus tóg ti mĩ: “Topê to, êg jóg mág to há tâvĩ nĩtĩmnĩ, ti ki ge há han nĩ, ti to jykre pir nĩtĩmnĩ,” he mũ. ³⁸ “Topê tĩ êg jyvẽn káfór kar hã vẽ. ³⁹ Kĩ ti tĩ êg jyvẽn ù tóg hã ri ke nĩ gé, hã vỹ: ájag régre ki rĩr nĩtĩmnĩ, ájag tĩ vẽn ki rĩr há han ri ke, he mũ,” he tóg. ⁴⁰ “Vẽn jyvẽn tag vỹ vẽn jyvẽn kar káfór nĩtĩ. Régre ti nĩtĩ, Topê tĩ êg jyvẽn káfór nĩtĩ ti. Êg tĩ tag ki króm kĩ êg tóg Topê jykre ki króm kãn mũ. Ti tĩ êg jyvẽn mũ han kãn êg tóg mũ, Topê vi tó tĩ tĩ êg jyvẽn mũ mré hã, êg tĩ tag ki króm kĩ,” he tóg, Jesus ti.

Cristo tĩ tĩ Davi kósín nĩ

(Mc 12.35-37; Lc 20.41-44)

⁴¹ Hã ra Fariseu ag vỹ vẽn mãn kĩ nĩtĩ, kĩ Jesus tóg ag ki jẽmẽ sór mũ gé sir. ⁴² Kĩ tóg ag mĩ: “Cristo to ájag hẽ ri ke tĩ?” he mũ. “Ú kósín nẽ hỹn, Cristo ti?” he tóg, Jesus ti. Kĩ ag tóg ti mĩ: “Davi kósín vẽ,” he mũ. ⁴³ Kĩ tóg ag mĩ: “hã ra Davi tóg ti to: inh Senhor, he ja nĩ,” he mũ. “Topê kuprĩg tĩ ti krĩn kĩ tóg tag tó ja nĩ, ha mẽ: ⁴⁴ “êg jóg tĩ Topê vỹ inh Senhor mĩ: “nĩ ra ver, inh pẽgia tá,” he mũ, “sỹ ã kato vãsãnsãn mũ ag tĩ ã krẽm vin ke vẽ, kĩ ag sigse vẽ sir. Tag jãvãn nĩ ver,” he tóg mũ, Topê ti, inh Senhor mĩ,” he ja tóg nĩgtĩ, Davi ti,” he tóg mũ, Jesus ti. ⁴⁵ “Hã kĩ Davi tóg Cristo to: “inh Senhor,” he ja nĩ. Ti tĩ tĩ ti kósín nĩ ra ti kósín mĩ tĩ ti kri ke nĩnh mũ vẽ?” he tóg, Jesus ti. Ti tĩ Fariseu ag ki jẽmẽg mũn hã vẽ. ⁴⁶ Hã ra ag tĩ ti mĩ ne tónh ke tóg tũ tĩ, ag tĩ ti vĩ kafãn sór mũ ra. Vãhã ag tóg ti ki jẽmẽ sór mãn tũ nĩ. Ti kamẽg ag tóg mũ, hã kĩ ag tóg ti ki jẽmẽ sór mãn tũ nĩ.

Ón kĩ Topê vĩ to professor ag jykre

(Mc 12.38-39; Lc 11.43-46; 20.45-46)

23 Kĩ Jesus tóg vẽn kar kanhrãn mũ sir, ti mré mũ tĩ ag mré hã. Kĩ tóg ag mĩ: ² “Moisés vỹ êg jóg ag

kanhrãn ja nĩgtĩ,” he mũ. “Ti nón Topê vĩ to professor ag tóg êg kanhrãn sór mũ, Fariseu ag ke gé,” he tóg. ³ “Ag tĩ ájag mĩ nén tó mũ ên ki króm nĩ. Ag vĩ kri fimnĩ. Ag tĩ nén han mũ ri ke han tũg nĩ jãvo, ag jykre kórég ên han tũg nĩ. Ájag kanhrãn há han ag tóg tĩ, hã ra ag tóg ki króm sór tũ nĩgtĩ, ájag vĩ há ên ki. ⁴ Ájag mĩ ag tóg vẽn jykre kufy vin ti, hã ra ag há tóg han sór tũ nĩgtĩ, vẽn jykre kufy ên ti. ⁵ Ag tĩ nén ù há han kĩ ag tóg tĩ ùn mág nĩtĩ sór mũ sir, vẽn kar tĩ ag vigve jé. Ag tĩ Topê mré vĩ jé ag tóg ti vĩ rá tĩ ájag nĩgẽ tógfĩg tĩ, ájag kakã ke gé. Vẽsógfĩn ja tãpér tĩ ag tóg vẽnógfĩg tĩ. Topê jykre han jé ag tóg kur tón mág tu tĩ gé. ⁶ Festa ki ag tóg jẽn vén sór tĩ. Vẽn kanhrãn jafã krẽm ag tóg vẽn kãpov kĩ nĩtĩ. ⁷ Cidade kuu ki vẽn kar tóg ag mĩ: “ã mĩ há?” he tĩ, kĩ tóg ag mĩ sér tĩ. Kĩ ag tóg ag to: “Senhor,” he tĩ gé, kĩ tóg ag mĩ sér tĩ. ⁸ Ag jãvo jagnẽ mĩ: “Senhor,” he sór tũg nĩ, kĩ ag tĩ ájag mĩ: “Senhor,” he mũ ra ag mĩ: “inh pí(jé) tĩ ùn mág nĩ,” hemnĩ. Ùn pir vỹ tĩ ájag kri ke nĩ, hã vỹ: Topê, he mũ, jó ájag tóg tĩ jagnẽ mré ke nĩtĩ. ⁹ Kĩ ù mĩ: “êg jóg,” he tũg nĩ gé, êprã. Ùn pir vỹ tĩ ájag jóg nĩ, hã vỹ: Topê, he mũ, kanhkã tá nĩ ên ti. ¹⁰ Kĩ ù tĩ ájag mĩ: “êg kri tĩ ùn mág nĩmnĩ,” he kĩ ag mĩ: “vó, kenh ke tũ inh nĩ,” hemnĩ gé. Ùn pir vỹ ájag kri tĩ ùn mág nĩ, hã vỹ: Cristo, he mũ. ¹¹ Ájag kãmĩ ùn mág ag jé ájag ki rĩr há han, ájag camarada tĩ ájag ki rĩr há han tĩ ên ri ke. ¹² Ájag tĩ tag ki vẽn tĩ ùn mág han sór nĩtĩn kĩ ájag tóg tá térenh ke mũ, ha vemnĩ. Ájag tĩ hã ra: “tĩ inh ùn sĩ nĩ,” hen kĩ ájag tóg tá jãpryn h ke mũ, tĩ ùn mág ájag nĩtĩn mũ, ha vemnĩ,” he tóg, Jesus ti.

Topê vĩ to professor ag jagtãr ke

(Mc 12.40; Lc 11.39-42, 52; 20.47)

¹³ “Ón kĩ Topê vĩ to professor,” he tóg. “Fariseu,” he tóg. “Jykre régre ájag

nýtĩ,” he tóg. “Topê vỹ ājag ve kónān,” he tóg. “Ũ ag tóg ũ tỹ kanhkā tá nĩ ěn tỹ tỹ ěg pā’i nĩ ve sór nýtĩ, hā ra ājag tóg ag mỹ kanhkā ti nenh tĩ. Ag jāvo ājag tóg ve sór tũ nĩgtĩ. Ājag tỹ kanhkā ve sór tũ nĩn kỹ ājag tóg ũ ag mỹ nenh tĩ gé, ag tỹ vэг tũ nĩ jé, ājag ri ke,” he tóg, Jesus ti.

¹⁴“Ōn kỹ Topê vỹ to professor’,” he tóg. “Fariseu’,” he tóg. “Jykre régre ājag nýtĩ,” he tóg. “Topê vỹ ājag ve kónān,” he tóg. “Ājag ne tóg ũn mén ter ja fag tũ mǎn kǎn tĩ. Kar kỹ ājag tóg ón kỹ Topê mré vỹ téj han mǔgtĩ, ěg tỹ ājag to: “há ag nýtĩ,” he jé. Hā kỹ Topê vỹ ājag vóg kónān kǎfór han ke mǔ,” he tóg, Jesus ti.

¹⁵“Ōn kỹ Topê vỹ to professor’,” he tóg. “Fariseu’,” he tóg. “Jykre régre ājag nýtĩ,” he tóg. “Topê vỹ ājag ve kónān,” he tóg. “Ājag ne tóg kuvar há ra mǔ tĩ, ga mĩ, goj mĩ ke gé, ājag tỹ ũ tỹ Israel ag jykre han sór mǔ ũ jāvǎnh jé. Hā jé ājag tóg mǔ mág han tĩ. Kỹ ājag tỹ ũ ven kỹ ājag tóg ti tỹ Japo krē han mǔ sir, ti tỹ ón kỹ Topê vỹ mē jé, ājag ri kén, ti tỹ nũgme ki kutē jé, inferno ěn ki. Kỹ ti jykre pǎno vỹ ājag jykre pǎno kǎfór nỹ sir,” he tóg, Jesus ti.

¹⁶“Topê vỹ ājag ve kónān mỹr,” he tóg. “Kyvó ājag nýtĩ, hā ra ājag tóg ũ tỹ ki kagtĩg ag tatĩn mǔ sór mǔ. Hā kỹ ājag tóg kygnēg tĩ. Kỹ ājag tóg ag kanhrǎn kónān tĩ. “Ěg tỹ ón kỹ: tag han jé sóg ke mǔ, he sór kỹ ěg tóg: “Topê jo ĩn krēm nĩ ěn vỹ ki kanhró nĩ,” henh ke mǔ,” he ājag tóg tĩ. “Ěg tỹ hā ra: Topê jo ĩn krēm ouro tǎn ěn vỹ ki kanhró nĩ, hen kỹ ěg tóg ón ke tũ nĩ,” he ājag tóg tĩ gé. ¹⁷Vēnhmỹ ti nĩ, ājag vỹ tag. Krĩ tũ ājag tóg nýtĩ, kyvó ājag tóg nýtĩ. Ouro mỹ Topê jo ĩn kǎfór nĩ? Vó’. Ouro vỹ tỹ Topê tũ nĩ, ti tỹ Topê jo ĩn krēm nĩn kỹ. Hā kỹ tóg tỹ Topê tũ kar nĩ sir, ouro ti, ti jo ĩn ti ke gé. Ōn kỹ: “Topê hā vỹ ki kanhró nĩ,” he tũg nĩ,” he tóg, Jesus ti. ¹⁸“Ājag vỹ vēnhmỹ ũ vỹ nĩ gé. “Ōn kỹ ěg tóg: ěg tỹ mesa kri ũn mỹ nén ũ pũn mǔ ěn vỹ ki kanhró nĩ,

henh ke mǔ,” he ājag tóg tĩ gé. “Ěg tỹ hā ra: ěg tỹ ũn mỹ ěg mēg pũn tĩ ěn vỹ ki kanhró nĩ, hen kỹ ěg ón ke tũ nĩ,” he ājag tóg tĩ gé. ¹⁹Vēnhmỹ ti nĩ gé, ājag vỹ tag ti. Kyvó ājag nýtĩ mỹr. Ěg tỹ Topê mỹ ěg mēg pũn mǔ mỹ mesa kǎfór nĩ? Vó’. Topê jo ĩn krēm mesa kri ěg tóg ěg mēg ti pũn tĩ, hā kỹ tóg Topê mỹ há tĩ, ěg mēg ti, ěg tỹ ti jo ĩn tá ti mỹ mesa kri ti pũn tugrĩn. ²⁰Ājag tỹ Topê jo ĩn krēm mesa tón kỹ, kỹ ājag tóg ěg tỹ ěg mēg tỹ mesa ěn kri pũn mǔ ěn tó tĩ gé. ²¹Ājag tỹ Topê jo ĩn tón kỹ, kỹ ājag tóg Topê ti tó tĩ gé. ²²Ājag tỹ kanhkā tón kỹ, kỹ ājag tóg Topê nĩgja tó tĩ gé, kỹ ājag tóg Topê ti tó tĩ gé sir. Nén ũ pir vě, ti kar ti. Hā kỹ ón kỹ: Topê hā vỹ ki kanhró nĩ,” he tũg nĩ,” he tóg, Jesus ti.

²³“Ōn kỹ Topê vỹ to professor’,” he tóg. “Fariseu’,” he tóg. “Krĩ régre ājag nýtĩ, kỹ Topê vỹ ājag ve kónān,” he tóg. “Ōn kỹ ājag tóg Topê mỹ ājag jakré ki dízimo vin tĩ. Ājag jakré tỹ hortelā tỹ 10 (ke) nýtĩn kỹ ājag tóg Topê mỹ ũn pir nĩm tĩ, ājag jakré tỹ erva doce tỹ ke gé, ājag jakré tỹ cominho tỹ ke gé. Há ti nĩnh mǔ vě. Hā ra ājag tóg ti tỹ ěg jyvēn mǔ ěn han tũ nĩgtĩ. Vēnh jykre kuryj han tũ ājag tóg nĩgtĩ. Ũn jagǎgtar ag jagǎgtǎn tũ ājag tóg nĩgtĩ. Topê vỹ kri fig tũ ājag tóg nĩgtĩ. Ājag tỹ ti vỹ ki króm tag tóg ĩnh mỹ há nĩnh mǔ vě, ha mē. Ājag tỹ ti tỹ ěg jyvēn ki króm mré hā ājag jakré ki dízimo vin (hā) ra tóg ĩnh mỹ há nĩnh mǔ vě, ha mē. Hā ra ājag tóg ki króm sór tũ nĩgtĩ. ²⁴Kyvó ājag nýtĩ, hā ra ājag tóg ag tatĩn mǔ sór nýtĩ. Topê vỹ ũ ki króm sór ājag tóg tĩ, ti tỹ Topê mỹ tỹ nén ũ sĩ (hā) ra, kỹ ājag tóg ti vỹ ũ mrynhmranh tĩ, ti tỹ Topê mỹ kórég pē (hā) ra. Kỹ tóg goj ki ka ri ke nĩ. Ājag tỹ ka gón tũ nĩ jé ājag tóg kur ki kujēg tĩ, kỹ tóg pan tĩ, goj ti. Hā ra ājag tóg cavalo tỹ goj ki ter mǔ ra (ājag tóg) goj kórég ěn kron tĩ,” he tóg, Jesus ti.

²⁵ “Ón kŷ Topē vī to professor’,” he tóg. “Fariseu’,” he tóg. “Krī régre ājag nŷtī, kŷ Topē vŷ ājag ve kónān,” he tóg. “Copo venja kupég ājag tóg tī, pénky venja, hā ra ti kátá tóg kavéj nī. Kŷ ājag vŷ ge nŷgtī gé. Jykre há nī ve ājag tóg nŷgtī gé, hā ra ājag tóg vēnh jykre pāno han tī, hā vŷ: jānkamy to ag lograr he tī, he mŷ, ājag prŷ tū fag mré nŷ tī, he mŷ gé. ²⁶ Kyvó ājag nŷtī, ājag tŷ tŷ Fariseu nŷtī ra. Ājag jykre pāno továnh nī, ājag jānhkri nŷtī jé. Kŷ vāhā vēnh kar vŷ ājag jykre há vég mŷ,” he tóg, Jesus ti.

²⁷ “Ón kŷ Topē vī to professor’,” he tóg. “Fariseu’,” he tóg. “Krī régre ājag nŷtī, kŷ Topē vŷ ājag ve kónān,” he tóg. “Vēnh kej sīnvī ri ke ājag nŷtī. Sīnvī nī ve ti nī, vēnh kej ti, ěg tŷ pó tŷ kri tam kŷ, kar tinta tŷ pó to tīn kŷ. Tī sīnvī nī ve nī ra ti kátá tóg kórég nī. Vēser vŷ krēm nŷ nī, vēser vag mŷ ti, ti kuka. ²⁸ Tag ri ke ājag nŷtī. Há nī ve ājag nŷtī. Jykre kuryj nī ve ājag nŷtī, hā ra ājag kátá tóg kórég nī, ājag jykre régre nŷtīn kŷ, ājag tŷ Topē vī ki króm sór tū nŷtīn kŷ mŷr, ha mē,” he tóg, Jesus ti.

Ūn jykre régre ag jagāgtar ke

(Lc 11.47-51)

²⁹ “Ón kŷ Topē vī to professor’,” he tóg. “Fariseu’,” he tóg. “Krī régre ājag nŷtī, kŷ Topē vŷ ājag ve kónān,” he tóg. “Ājag jóg’jóg ag vŷ Topē vī tó tī ag kăgtén ja nŷgtī. Jāvo ājag tóg ag kej sīnvī han tī, ūn jykre kuryj han ja ag kej ti. ³⁰ Kŷ ājag tóg ag to: “ěg tŷ ěg jóg’jóg ag mré ga kri mŷ hā ra ěg tóg ag kăgtén ke tū nī vē,” he ti. “Ag mré ěg ag vóg ke tū nī vē,” he ājag tóg tī, ón kŷ. ³¹ Hā ki ājag tóg ājag jóg’jóg ag tó tī. “ěg jóg’jóg ag vŷ ag kăgtén, Topē vī tó tī ag,” he ājag tóg tī. “Ū tŷ ag kăgtén mŷ ag krē’krē vŷ tŷ ěg nŷtī,” he ājag tóg tī. ³² Kuri ājag jóg’jóg ag ri ke han nī, kuri ājag jóg’jóg ag tŷ ūn kăgtén ja tū ěn ag kăgtén nī, ājag tŷ tŷ ājag jóg’jóg ag krē’krē nŷtīn kŷ,” he tóg,

Jesus ti. ³³ “Pŷn ri ke ājag nŷtī, mŷg ri ke ājag nŷtī. Ājag pi(jé) nŷgme ki văr ke tū nŷnh ke mŷ, inferno ki’,” he tóg. ³⁴ “Hā kŷ sóg ājag mŷ Topē vī tó tī ag ĵegnēnh ke mŷ, vēnh vī há tó mŷ ag, Topē vī rán tī ag. Ag ĵegnē jé sóg ke mŷ, ag tŷ ājag jŷvēn jé. Kŷ ājag tóg ag kăgtén ke mŷ gé, ha vemnī. Ka to ājag tóg ag sanh ke mŷ. Ag mrānmrān jé ājag tóg ke mŷ, ājag tŷ vēnh kanhrān jāfā krēm. Cidade kar ki ājag tóg ag nón mŷnh mŷ, ājag tŷ ag vóg kónān jé. ³⁵ Hā kŷ tóg ājag tŷ ūn jykre kuryj kar kăgtén mŷ ri ke nī. Ūn tŷ hēn ri ke ag kăgtén ag tóg huri, ěprā ke ag, hā ra tóg ājag tŷ ag kăgtén kân ri ke nī sir, Abel, Abel nón ke ag mré hā, Zacarias ěn mré hā, Baraquias kósín ěn. ěn tŷ ājag tóg Topē jo ěn jo ti tén ja nī, Topē mŷ nén ū pŷn jāfā ěn tá ājag tóg ti tén ja nī, Zacarias ěn. ³⁶ Ājag mŷ sóg tó mŷ, ha mē. Ājag hā to ti jŷnh ke mŷ, Topē ti, ājag jóg’jóg ag tŷ ag kăgtén tugrīn, ājag tŷ ag kăgtén tugrīn ke gé,” he tóg, Jesus ti.

Jesus tŷ Jerusalém tá ke ag to há nī

(Lc 13.34-35)

³⁷ Kŷ tóg Jerusalém ki ke ag to vēmén mŷ. Fe kaj han tóg, ag to, kŷ tóg: “Jerusalém tá ke ag mŷ sóg tag tó sór mŷ, ha mē,” he mŷ. “Topē vī tó tī ag kăgtén ag tóg tī. Topē tŷ ag mŷ ūn ĵegnēg tī ag pin ag tóg tī, pó tŷ, ag tŷ ag kăgtén jé. Isŷ ag vēnh măn há tóg tī vē, isŷ ag ki rīr jé, Jerusalém tá ke ag, hā kŷ sóg ag jé prēr tŷ hēn ri ke han mŷ. Garīnh fi jykre ri ke han sór isóg mŷ vē, ag mŷ. Garīnh fi vŷ ā krē kri jē nī, fi tŷ ag vēsŷrēnh tū nī jé ke vē. ěn ri ke han sór sóg mŷ vē, hā ra ag tóg ke jāvānh nŷtī. ³⁸ Hā kŷ ag tóg ag jamā pŷn kân ke mŷ, kŷ vāpŷr vē sir. Ū vŷ kănhmar tá nŷg măn ke tū nī ha, ag tŷ cidade kókén ja tá. ³⁹ Hā kŷ sóg ag mŷ ke mŷ. Inh ve măn ke tū ag nī ha (mŷr). Kejēn ag tóg iso: “Topē tŷ ti jēnē ja vē,” hēnh ke mŷ. “Topē vŷ ti ve há han, ti tŷ

ti jiji tó kătĩg kŷ,” he jé ag tóg ke mũ iso, kejèn. Ën kã ag tóg inh ve măn ke mũ,” he tóg, Jesus ti.

Topê jo ïn kókén kŷ ninh ke

(Mc 13.1-2; Lc 21.5-6)

24 Kŷ Jesus tóg Topê jo ïn tá kăkutê kŷ ti mũ sir. Kŷ ti mré mũ ti ag tóg ti tá junjun mũ, kŷ ag tóg ti mŷ Topê jo ïn ãn ag venven mũ sir. ² Kŷ Jesus tóg ag mŷ: “ăjag mŷ pó tŷ ïn mág tag ag vigvêg mũ?” he mũ. “Kejèn pó tóg jagnê kri nŷti măn ke tũ nĩ ha. Ag tŷ gũm ke kăn ke vê. Ki hã sóg tó mũ,” he tóg, Jesus ti.

Ëg jagtar ke

(Mc 13.3-13; Lc 21.7-19)

³ Kar kŷ tóg krĩ tŷ Oliveiras ra ti mũ sir. Ti tŷ tá nĩ kŷ ti mré mũ ti ag tóg vyr mŷ ti ki jêmênh kãmũ mũ. Kŷ ag tóg ti mŷ: “êg mŷ ti kurã ti tó,” he mũ. “Ëg tŷ ne ve kŷ êg ti kurã ki kanhró nŷtinh mũ, ã kătĩg măn ke kurã ãn ti, nén kar tũg ke kurã ãn ti?” he ag tóg ti mŷ. ⁴ Kŷ tóg ag mŷ: “ker ù âjag lograr hé hê,” he mũ. ⁵ “Cristo vŷ tŷ inh nĩ,” he jé ag tóg ke mũ, inh jyjy tó kŷ. Û tŷ hên ri ke ag tóg tag tónh ke mũ, kŷ ù tŷ hên ri ke ag tóg ag vĩ kri nĩm ke mũ. ⁶ Vênh génh to vême mē jé âjag tóg ke mũ, tag ki vênh génh to, kuvar há tá vênh génh to ke gé. To jũrũn ke tũg nĩ, hã ra. Vênh génh enh ke vê. Hã ra kurã tŷ êgno to hã ke vê ver. ⁷ Nação ag tŷ jagnê kato tēgtēnh ke vê, pã'i krēm ke ag tŷ pã'i ù krēm ke ag to jũnh ke vê. Kŷ ga tŷ ragra ke tŷ hên ri ke han ke vê, êmã tŷ hên ri ke ki. Vējēn tŷ tũ' henh ke vê gé. ⁸ Hã ra âjag jagăgtar ke vênh ven vén vê ver,” he tóg, Jesus ti.

⁹ “Kar kŷ âjag jagtar ke mũ, âjag tŷ inh ki ge kŷ nŷti tugrĩn. Ājag vóg kónân jé ag tóg ke mũ, âjag kăgtén jé ag tóg ke mũ gé. Nação kar vŷ âjag to vĩ kónân ke mũ gé, âjag tŷ inh jiji tó tugrĩn. ¹⁰ Kŷ ù tŷ hên ri ke ag vŷ isogvăn̄h ke mũ sir, ãn kã. Ājag mré ke fag tó jé ag tóg ke

mũ, inh kato vāsānsān mũ ag mŷ, kŷ ag tóg jagnê to vĩ kónân tãvĩ han ke mũ gé.

¹¹ Őn kŷ inh vĩ tó tŷ ag vŷ junjun ke mũ gé, kŷ ag tóg ùn e krĩnkrĩn ke mũ sir, ag tŷ isogvăn̄h jé. ¹² Kŷ vênh kar vŷ vênh jykre pāno to há nŷtinh mũ, hã kŷ ù tŷ ón kŷ iso há sĩ nŷti ãn ag tóg isogvăn̄h ke mũ gé, ùn e ag. ¹³ Hã ra ù tŷ isovăn̄h tũ pē ãn ag tóg krenken ke mũ. ¹⁴ Kŷ nação kar vŷ vênh vĩ sér mên̄h mũ, ga kar mĩ hã, kŷ ag tóg Topê tŷ tŷ êg pã'i ninh ke ãn mên̄h mũ ha. Ag tŷ mē kăn kŷ kurã tŷ êgno vê sir,” he tóg, Jesus ti.

Ëg jagăgtar mág pē ti

(Mc 13.14-23; Lc 21.20-24)

¹⁵ “Kejèn âjag tóg vāhã sir âjag tŷ nén (ũ) kamêg tŷ ãn venh ke mũ, êg kavénh mũ ãn ti,” he tóg. “Topê vĩ tó tŷ tŷ Daniel vŷ ti tó ja nĩgtĩ. Topê jo ïn tá tóg jên̄h mũ, êg kavénh mũ ãn ti,” he tóg, Jesus ti. (Û tŷ vên̄h rá tag to ke mũ ãn jé ki kanhró nĩ.) ¹⁶ Ājag tŷ ti ve kŷ ga tŷ Judéia ki ke kar ag jé vên̄h pigũnh mũjêg, pānónh ra, fag mré hã. ¹⁷ Û tŷ re tá nĩ ãn jé kãra rã tũg nĩ, ti ïn ki, ti tũ măn jé. ¹⁸ Kŷ ù tŷ ã japŷ tá jē ãn jé vŷn ke tũg nĩ gé, ti kur măn jé. ¹⁹ Ûn kufy fag jagtar mág ke vê, kurã ãn kã, ù tŷ gĩr pygfãm mũ fag ke gé. ²⁰ Topê mré vīm̄nĩ, ti tŷ kusa kã vên̄h ven tũ nĩ jé, ti tŷ vên̄hkán ke kurã kã vên̄h ven tũ nĩ jé. ²¹ Jagtar mág tŷ ge han ja tũ êg tóg nŷti, Topê tŷ mundo han jãn ki. Kŷ êg ge han măn ke tũ nĩ gé, kar kŷ. ²² Ëg tŷ kurã ki jagtar ke mũ ãn vŷ e nŷtinh mũ vê, hã ra tóg térem kŷ nŷti nĩ, Topê tŷ ùn kuprêg ja ãn ag tugrĩn. Ti tŷ térem tũ nĩ (mũ) ra ù vŷ kren ke tũ nĩ vê, ag jagtar mág ãn to,” he tóg, Jesus ti.

²³ “Ën kã ù tŷ âjag mŷ: Cristo vŷ tag kã jē nĩ, he mũ ra kri nĩm tũg nĩ, ag tŷ: tātá ti jē nĩ, he mũ ra. ²⁴ Őn kŷ Cristo ag vŷ vên̄h venven ke mũ, ón kŷ Topê vĩ tó tŷ ag ke gé. Ëg tŷ nén han vānh hyn han jé ag tóg ke mũ, milagre tŷ hên ri ke ti, ón kŷ Cristo ãn ag. Ag tŷ vên̄h kar krĩn

kónān sór vē, ag tỹ kygnē jé, Topē tỹ ũn kuprēg ja ēn ag mré hā, hēn ri ke mūn.
²⁵ Ājag mỹ sóg tó kán mū, ti kutēnh ke to hā,” he tóg, Jesus ti.

²⁶ “Kejēn ag tóg ājag mỹ: ēmā kórég tá tóg jē, Cristo ti, hēnh ke mū. Ra ti venh mū tūg. Ag tỹ ājag mỹ: ĩn kátá tóg nĩ nĩ, he mū ra kri fi tūg nĩ. ²⁷ ĩnh kātīg mǎn ke vỹ ta tỹ kóm kóm ke ri ke nĩ. Ti tỹ kóm kóm ke kỹ ěg tóg nēn kar vėg tĩ, rā jur ja tá, rā pur ja tá ke gé. ĩnh kātīg mǎn ke vỹ ri ke nĩnh mū. Tỹ sóg ěprā ke fi kósín nĩ,” he tóg, Jesus ti.

²⁸ “Nén ũ ter nỹgja ri ke ti nĩ gé. Hā tá tóg vėnh mǎn tĩ, jātā ti. Tag ri ke ti nĩnh mū, ĩnh kātīg mǎn ke ti,” he tóg, Jesus ti.

Topē kósín kātīg mǎn ke

(Mc 13.24-27; Lc 21.25-28)

²⁹ “Jagtar ēn kar kỹ rā vỹ nhyr ke mū, kỹ kysā vỹ jėngre he mǎn ke tũ nĩ gé. Krĩg vỹ vār ke mū gé, kanhkā krēm. ěg tỹ kanhkā tá nēn vėg tũ kar ēn vỹ ragra ke kán mū gé. ³⁰ Kỹ vāhā ěprā ke fi kósín vỹ vėnh ven ke mū, kanhkā tá. Kỹ ga kri mū kar ag vỹ kygfỹ kán ke mū sir, povo kar ti, ag tỹ ĩnh kātīg ven kỹ. Kanhkā góg kāmĩ sóg térenh ke mū. Kỹ sóg tar pē nĩnh mū, ha vemnĩ, kỹ ĩnh ve vỹ kókov pē nĩnh mū gé. ³¹ Kỹ sóg isỹ jėgnē jafā ag jėgnėnh mū, ag tỹ ténténtén kynkyn jé, kỹ ag tóg isỹ ũn kuprēg mū ag jé prėn-prėr kán ke mū sir, ga kar mĩ hā, kanhkā fyr mĩ hā,” he tóg, Jesus ti.

Ka tỹ figueira to comparaçāo

(Mc 13.28-31; Lc 21.29-33)

³² “Ka tỹ figueira to ki kanhrān nĩ, to comparaçāo han kỹ. Ka tỹ figueira pē tánh kỹ, ti fėj tag han kỹ tóg kakó tĩ sir, ěkré tygtánh kurā ti. ³³ Ri ke ti nĩ, ājag tỹ ĩnh kātīg mǎn ke kurā ki kanhró nỹtĩnh ke mū ti. Ājag tỹ isỹ ājag mỹ nēn tó mū tag ve kỹ tóg sir kakó tĩnh ha, kakó tǎvĩ

tóg tĩnh ha, ĩnh kātīg mǎn ke ti, ēn kǎ.
³⁴ Sỹ ke há vē, hā kỹ sóg tag tó mū, ha mē: ũri ũn rĩnrĩr mū ag tỹ nēn kar ēn venh ke vē, ag kǎgter ke to hā. ³⁵ Kanhkā vỹ tũ' hēnh ke mū, ga ti ke gé. Jāvo ĩnh vỹ vỹ tũ' hēnh ke tũ nĩ,” he tóg, Jesus ti.

Jesus kātīg mǎn ke kurā

(Mc 13.32-37; Lc 17.26-30, 34-36)

³⁶ “Hā ra ũ pi(jé) isỹ kurā ki kātīg mǎn ke mū ki kanhró nĩ, hora ki ke gé. Topē tỹ jėgnē jafā ag pi(jé) ki kanhró nỹtĩ. ĩnh pi(jé) ki kanhró nĩ gé. ěg jóg mág hā vỹ ā pin kỹ ki kanhró nĩ, kurā kǎ nēn kutėnh ke mū ēn ki. ³⁷ ĩnh kātīg mǎn ke kurā vỹ Noé tỹ ga mĩ tĩg ja ēn ri ke nĩnh mū. ³⁸ Ta kutē to hā ag tóg jēn ja nĩgtĩ, kron ja nĩgtĩ, jagnē tỹ prũg ja nĩgtĩ, jagnē tỹ mén ja nĩgtĩ, Noé mré ke ag. ěn kǎ kejēn Noé tóg barco tỹ ĩn kǎra rā mū. ³⁹ Hā ra tóg ag mỹ tỹ nēn ũ tũ tĩ, ti tỹ barco kǎra rā mū ti. Kejēn ta tóg kutē mū, kỹ goj tóg var mū sir. Kỹ ag tóg kǎgter kán mū sir vāhā. Ge ti nĩnh mū, ěprā ke fi kósín kātīg mǎn kỹ, ĩnh kātīg mǎn kỹ mỹr. ⁴⁰ ěn kǎ ũn régre ag vỹ ājag japy ki rǎnhrāj ke mū. ĩnh kātīg mǎn kỹ sóg ũn pir jé prėr ke mū, jāvo ti régre vỹ tá jėnh mū sir. ⁴¹ ũn régre fag vỹ ěgtynyn nỹtĩnh mū, jagnē mré, kurā ēn kǎ. Kỹ sóg ũn pir fi jé prėr ke mū, jāvo fi régre fi vỹ tá jėnh mū gé sir. ⁴² Vėnh ki ěmēmni, nũr tũ ri ke han nĩ. ĩnh kātīg ke hora ki kagtĩg ājag tóg nỹtĩ. Ājag Senhor vỹ tỹ ĩnh nĩ,” he tóg.

⁴³ “Kỹ tag to jykrén nĩ, ha mē. ěg pi(jé) ũ tỹ ěg tỹ nēn pėju sór mū kātīg ke ki kanhró nỹtĩ. ěg tỹ ti kātīg ke tỹ hora ki kanhró nỹtĩ ra ěg tóg to ěg tỹ nēn ki rĩr mū vē, kỹ ũ pi(jé) ěg ĩn kǎra rǎnh ke mū vē. Hā ra ěg tóg ki kagtĩg nỹtĩ. ⁴⁴ Ge ti nĩ, ĩnh kātīg mǎn ke ti. Ha vėnh kán, ha vėnh ki ěmē. ěprā ke fi kósín vỹ kātīg ke mū, ājag tỹ ĩnh kātīg ke to jykrén tũ ra,” he tóg, Jesus ti.

Ũn camarada ag to comparação

(Lc 12.41-48)

⁴⁵ Kĩ tóg ag mĩ ã kătĩg mǎn ke tó mǎn mũ. “Kejẽn patrão ù tóg hẽ ra tĩg sór mũ,” he tóg. “Kĩ tóg ã camarada ag kã ù tĩ pã'i han mũ, ti tĩ ti jo ã mré camarada ag ki rĩr jé. Û tĩ ã rǎnrǎj ki rĩr há han ti ẽn kuprẽg tóg mũ, ti tĩ ag mĩ vejẽn ven jé, vejẽn ke horan ki. ⁴⁶ Ti tĩ ag ki rĩr há han kĩ ti patrão vỹ ti mĩ vỹ há han ke mũ, ti kătĩg mǎn ken kã. ⁴⁷ Ti tĩ pã'i han jé tóg ke mũ, ti tĩ ti tũ ki rĩr kǎn jé sir. Ki hã sóg tó mũ, ha mẽ. ⁴⁸ Kejẽn ti camarada ù tóg hã ra jykre pǎno nĩ. Kĩ tóg tag to jykren mũ. “Êg patrão vỹ kătĩg vǎnh han mũ,” he tóg mũ sir, ùn jykre pǎno ẽn. ⁴⁹ Kĩ tóg ã mré camarada ag vóg kónǎn mũ sir, ag mrǎnmrǎn kĩ. Kĩ tóg ùn kronkron ti ag mré kron mũ gé sir, jẽn mág han tóg mũ gé sir. ⁵⁰ Kĩ ti patrão vỹ ti kǎnhmỹ kătĩg ke mũ sir, ti tĩ ti kătĩg ke kurã ki kagtĩg nĩn kĩ, ti horan ke gé, ùn jykre kórég ẽn ti. ⁵¹ Æ kătĩg kĩ tóg ti kapǎn ri ke han ke mũ sir, kĩ tóg ti fón ke mũ gé sir, ùn jykre régre ag mré. Tá ag tóg jagtar ke mũ, ãjag jã tĩ ag tóg gyngyn ke mũ, tĩ ag tóg gangan ke mũ, jũ kĩ, ùn jykre kórég ẽn ag,” he tóg, Jesus ti. Ti tĩ ù tĩ ti rǎnrǎj han kónǎn mũ kǎmẽn hã vẽ.

Tátãg tĩ 10 (ke) fag to comparação

25 Kĩ Jesus tóg ag mĩ ã kătĩg mǎn ke ẽn kǎmẽn mǎn mũ, kĩ tóg ag mĩ: “ẽn kã ù tĩ kǎnhkã tá nĩ ẽn tĩ tĩ ẽn pã'i nĩnh ke vỹ ge nĩnh mũ, ha mẽ,” he mũ. “Tátãg fag ri ke ti nĩnh mũ. Û tĩ 10 (ke) fag vỹ nĩtĩ, tátãg fag. Vẽn kypřũg ve jé fag tóg lampiǎo vyn kĩ mũ mũ, ùn přũg mũ ẽn kato. ² Fag tĩ 5 (ke) fag vỹ jykre kórég nĩtĩ, jǎvo ù fag vỹ jykre há nĩtĩ, ù tĩ 5 (ke) ù fag. ³ Kĩ ùn jykre kórég fag vỹ vỹrmỹ azeite ma mũ ja tũ nĩ, hã ra tóg sĩn kĩ lampiǎo kǎkã nĩ nĩ. ⁴ Fag jǎvo ùn jykre há fag vỹ azeite ma mũ mũ,

vỹrmỹ. ⁵ Hã ra tóg kătĩg vǎnh han mũ, ùn přũg mũ ti. Kĩ tóg kejẽn fag nũgnũr há tĩ sir, ti jun tũg ki, kĩ fag tóg nũgnũr kǎn mũ sir. ⁶ Meia noite ki vẽn vỹ tóg mẽ há tĩ, kĩ tóg: “!..nĩgnĩ ra..!” he mũ. “!.. Ûn přũg mũ vỹ kǎteg..!” he tóg. “!.. Ha ti vẽn kǎmũ jeg..!” he tóg. ⁷ Kĩ tátãg ẽn fag vỹ nĩgnĩg kĩ fag lampiǎo grug-grug mũ sir. ⁸ Kĩ ùn jykre kórég fag vỹ ùn jykre há fag mĩ azeite to vỹ mũ. “Êg mĩ ãjag azeite vẽn kǎpǎm. Nĩn ke ti nĩtĩ ha, ẽn lampiǎo ti,” he fag tóg mũ. ⁹ Hã ra ùn jykre há fag tóg fag mĩ: “vó,” he mũ. “Êg tĩ ãjag mĩ vẽn kǎpǎm kĩ tóg ẽn mĩ kã kyn ke mũ gé, ãjag ri kén. Negócio ra mũjẽg, ãjag tĩ azeite ven jé,” he fag tóg mũ. ¹⁰ Kĩ fag tóg mũ mũ. Fag gunja tá tóg jun mũ sir, ùn přũg mũ ti. Kĩ fag tóg ti mré mũ mũ sir, ùn lampiǎo gru nĩtĩ fag. Vẽn kypřũg ve jé fag tóg mũ mũ, kĩ ag tóg jǎnkã ti nĩfẽn mũ sir, ùn jykre kórég fag jy. ¹¹ Kĩ vǎhã tátãg ù fag vỹ tá junjun mũ gé sir, kĩ fag tóg ti mĩ: “Senhor', Senhor',” he mũ sir. “Êg mĩ nón,” he fag tóg. ¹² Hã ra tóg fag mĩ: “ãjag ki kagtĩg sóg nĩ, mĩr, ha mẽ,” he mũ,” he tóg, Jesus ti. ¹³ “Hã kĩ sóg ãjag mĩ: vẽn ki rĩr, nũr tũ ri ke han kĩ, he mũ. Kătĩg jé sóg ke mũ. Hã ra ãjag tóg inh kătĩg ke kurã ki kagtĩg nĩtĩ, inh hora ki ke gé. Hã kĩ inh jǎvǎnh to krónh ke tũg nĩ,” he tóg, Jesus ti.

Ũ camarada ag to comparação

(Lc 19.11-27)

¹⁴ Kĩ Jesus tóg: “inh kătĩg mǎn ke vỹ tag ri ke nĩnh mũ gé, ha mẽ,” he mũ. “Kejẽn ù tóg ga ù vẽn tũg sór mũ, kĩ tóg ã camarada ag jé přer mũ, ti tĩ ag mĩ ã tĩ nẽn kar vẽn kǎpǎm jé, ã jǎnkamy kar. ¹⁵ Û mĩ tóg jǎnkamy kǎmur tĩ 5 (ke) vin mũ, ù mĩ tóg ti kǎmur régre vin mũ, ù mĩ tóg ti kǎmur pir nĩm mũ. Ûn krĩ há ẽn mĩ tóg ti kǎmur e vin mũ, ùn krĩ pǎgsĩ ẽn mĩ tóg ti kǎmur pir nĩm mũ. ¹⁶ Kĩ ù tĩ ti kǎmur tĩ 5 (ke) mǎg mũ ẽn vỹ tĩ mũ.

Jānkamy ěn tỹ rānhrāj mág han kỹ tóg kejĕn ũ tỹ 5 (ke) ũ mág mũ, kỹ ti tũ vỹ tỹ ti kāmur tỹ 10 (ke) nỹtĩ sir. ¹⁷ Kỹ ũ tỹ ti kāmur régre mág mũ ěn vỹ tỹ rānhrāj mũ gé. Ti kāmur régre ũ mág tóg mũ sir, ā rānhrāj to, kỹ tóg tỹ 4 (ke) nỹtĩ. ¹⁸ Ag jāvo ũ tỹ ti kāmur pir mág mũ ěn vỹ ā tũ nĕg ti mũ sir. Ā patrāo tỹ ti mỹ jānkamy nĩm ěn nĕg tóg mũ, mỹr, ha mĕ.

¹⁹ Kejĕn ag patrāo vỹ vỹn ke mũ sir, si há ti kỹ. ²⁰ Kỹ ti camarada tóg ti venh kātĩ mũ, ũ tỹ ti kāmur tỹ 5 (ke) mǎn ja ěn ti. Kỹ tóg ti mỹ ũ tỹ 5 (ke) ũ ěn ven mũ sir, ti ganho ti, kỹ tóg ā patrāo mỹ: “ũ tỹ 5 (ke) vin ā tóg inh mỹ,” he mũ, “hǎ ra sóg tỹ rānhrāj kỹ ũ tỹ 5 (ke) ũ mǎn ja nĩ,” he tóg. ²¹ Kỹ ti patrāo tóg ti mỹ: “jykre há ā tóg nĩ,” he mũ. “Ā tũ ki rĩr há han ā tóg nĩ mỹr. Nĕn sĩ ki rĩr há han ja ā tóg nĩgtĩ, kỹ sóg ā mỹ nĕn ũ e vin sór mũ, ā tỹ ki rĩr jé. Ā patrāo fe tỹ mrin ke ā mỹr. Hǎ inh mré kātĩg,” he tóg, ti patrāo ti. ²² Kỹ ti camarada ũ tóg jun mũ gé, ũ tỹ ti kāmur régre mǎn ja ěn ti. Kỹ tóg ti mỹ: “inh mỹ ā tóg ti kāmur régre vin ja nĩ,” he mũ. “Tỹ rānhrāj kỹ sóg ũn régre ũ mǎ. Hǎ vĕ ha,” he tóg. ²³ Kỹ ti patrāo tóg ti mỹ: “jykre há ā tóg nĩ,” he mũ gé. “Ā tũ ki rĩr há han ā tóg nĩ mỹr. Nĕn sĩ ki rĩr há han ja ā tóg nĩgtĩ, kỹ sóg ā mỹ nĕn ũ e vin sór mũ, ā tỹ ki rĩr jé. Ā patrāo fe tỹ mrin ke ā mỹr. Hǎ inh mré kātĩg,” he tóg, ti patrāo ti.

²⁴ Kỹ ti camarada ũ tóg jun mũ gé sir, ũ tỹ ti kāmur pir mǎn ja ěn ti. Kỹ tóg ti mỹ: “Senhor,” he mũ. “Vĩ tar han ā tóg tĩgtĩ, ki kanhró sóg nĩ. Ā tỹ nĕn krǎn ja tũ ěn mǎg ā tóg tĩgtĩ, ā tỹ ti fy vǎm tũ ra ā tóg ti kanĕ ve sór tĩgtĩ. ²⁵ Hǎ kỹ sóg mũmĕg kỹ ti kāmur né. Ā tũ ti hǎ vĕ ha,” he tóg, ti patrāo mỹ. ²⁶ Kỹ ti patrāo tóg ti mỹ: “jykre kórég ā tóg nĩ,” he mũ. “Ā tũ ki rĩr kónǎn ā tóg nĩ mỹr. Inh mỹ isỹ nĕn krǎn ja tũ mǎg tĩgtĩ? Inh mỹ isỹ nĕn ũ fy vǎm tũ ra ti kanĕ ve sór tĩgtĩ? Hǎ ki kanhró ā mỹ nĩ?” ²⁷ Ā tỹ ne jé inh jānkamy tỹ

banco ki rānhrāj tĩ ag mỹ vin ja tũ nĩ nĕ? Kỹ sỹ ti juro ven kỹ sóg isũ kǎfór mǎn ke vĕ vĕ. ²⁸ Ti tũ ma ra,” he tóg mũ sir, polícia ag mỹ. “Inh camarada ũ mỹ nĩm, sỹ ti mỹ nĩm ja ěn ti. Ũ tỹ ti kāmur tỹ 10 (ke) mág mũ ěn mỹ nĩm, ti kāmur pir tỹ, sỹ ũn jykre kórég tag mỹ nĕn nĩm ja ěn ti,” he tóg, ag patrāo ti, polícia ag mỹ,” he tóg, Jesus ti. ²⁹ “Ge ti nĩ. Ũn tũ mág vỹ mǎn mǎn mũ, kỹ tóg ti mỹ tũ hĕnh ke tũ pĕ nĩ. Ũn tũ tũ ěn tũ sĩ mǎn jé ag tóg ke mũ, kỹ tóg tỹ tũ tũ nĩ sir,” he tóg, patrāo ti. ³⁰ “Kỹ inh camarada kórég tag fón, kutyg ja ěn kǎkǎ. Tá ag tóg jagtar ti, ājag jā tỹ ag gyngyn ke tĩ, vĕso jũ kỹ,” he tóg, patrāo ti,” he tóg, Jesus ti, ā tỹ ā kātĩg mǎn ke kǎmĕn kỹ.

Jesus tỹ vĕnh kar jykre tugnỹm ke

³¹ Kỹ Jesus tóg ag mỹ: “ĕprǎ ke fi kósın ěn kātĩg mǎn kỹn ge nĩnh mũ, ha mĕ,” he mũ. “Inh kātĩg mǎn kỹ sóg tar pĕ kātĩ mũ, sĩnvĩ. Isỹ jĕgnĕ jafǎ ag vỹ inh mré kǎmũnh ke mũ. Kỹ sóg inh nĩgja kri nĩnh ke mũ sir, kỹ inh jykre tar vỹ vĕnh ven ke mũ. ³² Kỹ ĕprǎ ke kar vỹ inh jo vĕnh mǎn kǎn ke mũ sir. Kỹ sóg vĕnh kar vĕnh kǎpǎm ke mũ sir, ha mĕ. Carneiro mré cabrito ki rĩr tĩ ěn vỹ kejĕn ā mĕg vĕnh kǎpǎm tĩ. Carneiro ag tỹ tóg vyrmỹ vin tĩ, cabrito ag tỹ ke gé. ³³ Kỹ tóg carneiro ag tỹ ā pĕgja tá vin tĩ, jó tóg cabrito ag tỹ ā jakǎnh tá vin tĩ. Tag ri ke han jé sóg ke mũ. ³⁴ Tỹ sóg vĕnh kar kri pǎĩ mág nĩnh mũ, kurǎ ěn kǎ. Kỹ sóg inh pĕgja tá nỹtĩnh ke mũ ag mỹ: “hǎ inh mré kǎmũ jĕg,” hĕnh ke mũ. “Inh panh vỹ ājag to vĩ há han mũ mỹr. Topĕ tỹ ga tǎg mré kanhkǎ tǎg venh kǎmũ jĕg. Topĕ tỹ ga han kurǎ ěn kǎ tóg ājag hǎ kuprĕg ja nĩ, ājag tỹ ti tỹ ga tǎg mré kanhkǎ tǎg tag ve jé. ³⁵ Kejĕn sóg kókĩr nĩ ja nĩgtĩ, kỹ ājag tóg inh jĕn. Isỹ kron há nĩn kỹ ājag tóg inh mỹ goj jun. Isỹ ājag ĩn tá jun kỹ ājag tóg inh mỹ: “hǎ kǎrǎ, ĕg mré nĩ,” he ja nĩgtĩ gé. ³⁶ Inh kur tũ nĩn kỹ ājag tóg inh

mỹ kur vin. Inh kaga nĩn k̄y ājag tóg inh venh kāmũ ja nĩgtĩ. Ise k̄y jē k̄y ājag tóg inh venh kāmũ ja nĩgtĩ gé,” he jé sóg ke mũ ag m̄y,” he tóg.

³⁷ “K̄y ũn jykre kuryj tag ag vỹ inh m̄y: “Senhor,” henh ke mũ. “Ēg hē k̄a ā kókĩr vé, Ēg t̄y ā m̄y vējēn ven jé? Ēg hē k̄a ā kron há ti vé, Ēg t̄y ā m̄y goj ven jé? ³⁸ Ā hē k̄a Ēg ĩn tá jun, Ēg t̄y ā m̄y: “ha k̄arā,” he jé? Ēg hē k̄a ā kur tũ vé, Ēg t̄y ā m̄y kur vin jé? ³⁹ Ēg hē k̄a ā kaga vé, Ēg hē k̄a ā se vé, Ēg t̄y ā venh kāmũ jé? Ki kagtĩg Ēg n̄tĩ,” he jé ag tóg ke mũ, inh m̄y.

⁴⁰ K̄y sóg ag m̄y: “ũn jagāgtar ag jagāgtān ja ājag tóg nĩgtĩ, inh mré ke ag, h̄a ra tóg ājag t̄y inh jagāgtān ri ke nĩ, ājag t̄y ag jagāgtān ja ti, ki h̄a sóg tó mũ,” he jé sóg ke mũ, is̄y t̄y p̄aĩ mág nĩn k̄y,” he tóg, Jesus ti.

⁴¹ “K̄y sóg inh jakānh tá n̄tĩ ag m̄y: “ha m̄jēg, t̄ara,” henh ke mũ gé. “Inh panh vỹ ājag m̄y vĩ kónān. Pĩ nhyr vānh ra m̄jēg. Nén-Kórég m̄y tóg kar k̄y nĩ, pĩ nhyr vānh ěn ti, Nén-Kórég t̄y jēgnē jafā ag m̄y tóg kar k̄y nĩ gé. Ēn ra m̄jēg.

⁴² Inh kókĩr ra ājag pi(jé) inh m̄y vējēn ven'. Is̄y kron há ra ājag pi(jé) inh m̄y goj jun'. ⁴³ Is̄y ājag ĩn tá jun mũ ra ājag pi(jé) inh m̄y: “ha k̄arā,” he ja nĩgtĩ'. Is̄y kur tũ ra ājag pi(jé) inh m̄y ũ vin'. Inh kaga n̄y ra, ise k̄y jē ra ājag pi(jé) inh venh kāmũ ja nĩgtĩ,” he jé sóg ke mũ,” he tóg.

⁴⁴ “K̄y ag tóg inh m̄y kenh ke mũ gé. “Senhor,” he jé ag tóg ke mũ gé. “Ēg hē k̄a ā kókĩr vé, ā kron ha ti? Ā hē k̄a Ēg ĩn tá jun? Ēg hē k̄a ā kur tũ vé, ā kaga ti', ā se ti', Ēg t̄y ā ki rĩr jé? Ki kagtĩg Ēg n̄tĩ,” he jé ag tóg ke mũ gé.

⁴⁵ K̄y sóg ag m̄y: “ũn jagāgtar ag jagāgtān ja tũ ājag tóg nĩgtĩ,” henh ke mũ, “h̄a k̄y tóg ājag t̄y inh jagāgtān tũ ri ke nĩ, ki h̄a sóg tó mũ, m̄y, ha mē,” he jé sóg ke mũ. ⁴⁶ K̄y ag tóg jagāgtar kenh ke mũ, h̄a ra tóg tũ henh ke tũ nĩ, ag jagtar

ke ti. Ag jāvo ũn jykre há ag vỹ rĩr krỹg ja tũ venh ke mũ,” he tóg, Jesus ti.

Ag t̄y Jesus tén sór

(Mc 14.1-2; Lc 22.1-2; Jo 11.45-53)

26 Vāhā tóg tó k̄an ja nĩgtĩ, ti t̄y nén tónh ke ja ti, Jesus ti. K̄y tóg ā mré mũ t̄i ag m̄y: ² “kurā régre tũg k̄y tóg Ēg festa mág t̄y Páscoa nĩ,” he mũ. “Ēn k̄a ag tóg ěprā ke fi kósĩn ti senh ke mũ, k̄y ag tóg ti fēg ke mũ, ka to ti sa jé. Inh h̄a vé,” he tóg, Jesus ti.

³ H̄a ra Topē tũ ki rĩr t̄i to p̄aĩ mág ag vỹ vēnh m̄an mũ sir, Topē v̄i to professor ag mré h̄a, kófa ag mré ke gé. P̄a'ĩ mág ĩn tá ag tóg vēnh m̄an mũ sir, p̄a'ĩ ěn jijin h̄a vỹ: Caifás, he mũ. ⁴ K̄y ag tóg Jesus se to jykren mũ sir. Ag t̄y ti vatánh tá ti k̄agm̄ĩ sór vé, ti se jé, ti tén jé. ⁵ K̄y ag tóg to jykren k̄y: “festa tag to mē jé Ēg tóg ke mũ ver,” he mũ. “Ēg t̄y festa k̄a ti se k̄y vēnh génh mág h̄yñ tóg kutēnh mũ, ha vemnĩ,” he ag tóg mũ sir jagnē m̄y.

Jesus t̄y Betânia tá nĩ

(Mc 14.3-9; Jo 12.1-8)

⁶ Ēn k̄a Jesus tóg kejēn ěmā t̄y Betânia tá nĩ nĩ, Simão ĩn krēm, vēnh kaga kren vānh han ja ěn ĩn krēm. ⁷ Ti jēg nĩ ra ũ fi tóg tá jun mũ, garrafa m̄an k̄y. Pó kupri t̄anāj t̄y tóg há nĩ, garrafa ti. Ti ki nĩ vỹ t̄y nén kar t̄ag nĩ, ger há ěn, ũn kaja e ěn. Ti gānh t̄ag fi tóg mũ, ger há ěn t̄y. ⁸ K̄y ti mré mũ t̄i ag tóg fi vég mũ, h̄a ra tóg ag m̄y kórég nĩ. Fi to jũ k̄y ag tóg: “fi t̄y ne jé nén kaja e kókén nē?” he mũ. ⁹ “Ēg t̄y ger há tag fón ke vé vé, kaja há to, Ēg t̄y ũn jagāgtar ag m̄y vin jé,” he ag tóg mũ.

¹⁰ K̄y Jesus tóg mēg mũ, ag v̄i ti, k̄y tóg ag m̄y: “ājag t̄y ne jé fi m̄y kaga han nē?” he mũ. “Inh jykre ki króm fi tóg. ¹¹ Inh h̄a tóg ver nĩ s̄ĩ han mũ, ājag mré, jāvo ũn jagāgtar ag vỹ kurā kar ki ājag mré n̄tĩ nĩ. ¹² Fi t̄y inh k̄an vé, ag t̄y vēnh kej tá inh fón jé h̄a jé fi tóg ger há tag t̄y

inh kri kujêg. ¹³ Ag tỹ vênh vĩ sér tugtón kỹ ag tóg fi tỹ nén han mũ tag tónh ke mũ gé, ga kar mĩ hã, kỹ vênh kar vĩ fi tỹ nén han mũ mênh ke mũ, ha vemnĩ. Ki hã sóg tó mũ,” he tóg, Jesus ti.

Judas tỹ pã'i ag mỹ Jesus ven ke

(Mc 14.10-11; Lc 22.3-6)

¹⁴ Kar kỹ ù tỹ 12 (ke) ag kã ù tóg Topê tũ ki rĩr ti to pã'i ag venh ti mũ. Ûn tĩg mũ jỹjn hã vĩ: Judas Iscariotes, he mũ. ¹⁵ Tá jun kỹ tóg ag mỹ: “sỹ ãjag mỹ Jesus ven ke vê, ãjag tỹ ti se jé,” he mũ. “Ãjag mỹ inh mỹ kajãm ke tũ, sỹ ãjag mỹ ti ven ke ti?” he tóg. Kỹ ag tóg ti mỹ: “vó,” he kỹ jãnkamy tỹ 30 (ke) tỹ kajãm mũ sir. ¹⁶ Ti tỹ jãnkamy ên măn kar kỹ tóg to jykrén mũ. “Inh hỹn hẽ ri kenh mũ, isỹ vênh kar vatánh tá ag mỹ Jesus ven jé?” he tóg mũ sir, Judas ti, ón kỹ Jesus mré ti mũ ên ti.

Jesus tỹ Páscoa ko

(Mc 14.12-21; Lc 22.7-14, 21-23; Jo 13.21-30)

¹⁷ Kejên tóg pảo jêgja tũ konh ke kurã tá krỹg mũ, kỹ Jesus mré mũ ti ag tóg ti mỹ: “êg hỹn hẽ tá ã mỹ carneiro sĩ tân h mũ, êg tỹ kon jé?” he mũ. ¹⁸ Kỹ tóg ag mỹ: “êmã mág tag ra mũjêg,” he mũ. “Tá ù tóg nĩ nĩ. Ti mỹ: “êg Senhor vĩ ã mỹ vênh vĩ jênêg mũ,” hemnĩ. “Inh kurã vĩ kakó ti ha, kỹ sỹ ã ãn krêm Páscoa konh há tóg ti, inh mré mũ ti ag mré,” he tóg mũ,” hemnĩ ti mỹ,” he tóg, Jesus ti. ¹⁹ Kỹ ag tóg mũ mũ sir, ti mré mũ ti ag. Ti tỹ ag mỹ tó mũ han ag tóg mũ sir. Cordeiro tân h ag tóg mũ sir, ag tỹ Páscoa kã ko ti ên.

²⁰ Rã pur kar kỹ tóg tá jun kỹ ù tỹ 12 (ke) ag mré nĩ mũ sir, jên jé. ²¹ Ag jên kã tóg ag mỹ: “ãjag kãmĩ ù tóg pã'i ag mỹ inh ven ke mũ, ag tỹ ise jé, ki hã sóg tó mũ,” he mũ. ²² Kỹ tóg ag fe kaj ti sir, kỹ

ag tóg ti mỹ: “inh mỹ vó? Inh mỹ vó?” he kãn mũ sir.

²³ Kỹ tóg ag mỹ: “ũ tỹ inh mré pảo tỹ kã punpun mũ ên hã vê,” he mũ. “Û tỹ ã nĩgê tỹ pénky kãki pảo tỹ kã punpun mũ ên hã vê. Ên hã vĩ ag mỹ inh ven ke mũ,” he tóg. ²⁴ “Tĩg jé sóg ke mũ, isỹ tỹ êprã ke fi kósın nĩn kỹ. Hã kỹ tóg rãn kỹ nĩ, isĩg ke ti. Hã ra ù tỹ ag mỹ inh ven ke mũ ên mỹ tóg vĩ kónãn tãvĩ han ke mũ, Topê ti. Ti tỹ mur ja tũ nĩ ra tóg ti mỹ há ti vê,” he tóg, Jesus ti.

²⁵ Kỹ Judas tóg ti mỹ ke mũ gé sir, ù tỹ pã'i ag mỹ ti ven ke mũ ên ti. Ên tóg ti mỹ: “Senhor', inh hã mỹ?” he mũ gé. Kỹ tóg ti mỹ: “ki hã ã tóg tó mũ,” he mũ, Jesus ti.

Santa Ceia

(Mc 14.22-26; Lc 22.15-20; 1Co 11.23-25)

²⁶ Kỹ ag tóg jêg mũ. Ag jên nỹtĩ ra Jesus tóg êmĩ mág mũ sir. Topê mré tóg vĩ mũ sir, êmĩ to, kỹ tóg vênh kã kugpãn kỹ ag mỹ vênh kãpãm mũ sir, ti mré mũ ti ag mỹ. Kỹ tóg: “té, ha kó,” he mũ. “Inh hã vê,” he tóg, êmĩ to.

²⁷ Kar kỹ tóg copo vãng mũ gé sir, vinho tỹ ki jên kỹ. To tóg Topê mré vĩ mũ gé. Ag mỹ copo jun kỹ tóg: “ha kronkron,” he mũ. ²⁸ “Inh kyvénh hã vê,” he tóg, vinho to. “Inh kyvénh tỹ vênh kar jagfỹ kutên hã vê. Sỹ vênh e mré vênh jykre tãg han to ke hã vê, hã vĩ tỹ inh kyvénh ti nĩ. Inh kyvénh tag to Topê vĩ ãjag mỹ vênh pãte fón ke mũ, ãjag tỹ ti vĩ mranh ja ti,” he tóg. ²⁹ “Ha mẽ, uva me kron măn ke tũ inh nĩ ha. Kejên sóg kron măn ke mũ, inh panh tỹ tỹ êg pã'i nĩnh ke kurã ên kã. Kỹ sóg ãjag mré kron măn ke mũ, ha vemnĩ,” he tóg, Jesus ti.

³⁰ Kỹ ag tóg jãn mũ gé sir, ag jên kar kỹ. Ag tỹ Topê jé tó kar kỹ ag tóg krĩ tỹ Oliveiras ra mũ mũ sir.

Jesus tỹ Pedro mỹ tó

(Mc 14.27-31; Lc 22.31-34; Jo 13.36-38)

³¹ Ag tỹ ra mũn kỹ Jesus tóg ag mỹ kāmén mũ. “Kuty tag kã ājag tóg inh fón kỹ mũ kãn ke mũ,” he tóg mũ, ā mré mũ tĩ ag mỹ. “Hã kỹ tóg rãn kỹ nĩ. “Ũ tỹ carneiro ki rĩr tĩ ěn tãnħ jé sóg ke mũ, kỹ ti mēg ag vỹ krig ke kãn ke mũ,” he tóg, Topē vĩ tỹ rãn kỹ nĩ ki,” he tóg, Jesus ti. “Hã ve jé ājag tóg ke mũ. ³² Hã ra sóg iser kar kỹ rĩr mãn ke mũ. Ěn kã sóg ājag jo tĩg ke mũ, ga tỹ Galiléia ra,” he tóg, Jesus ti.

³³ Kỹ Pedro tóg ti mỹ: “inh pi(jé) ā fón kỹ tĩg ke mũ, ag kar tỹ ā ré kỹ mũ mũ ra,” he mũ. ³⁴ Hã ra Jesus tóg ti mỹ: “ha vé,” he mũ. “Ũri, kuty tag kã ā tóg iso: ti ki kagtĩg sóg nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti. ³⁵ Hã ra Pedro tóg ti mỹ: “sỹ ā mré ter ke mũ ra sóg ā to: ti ki kagtĩg sóg nĩ, henh ke tũ pē nĩ,” he mũ. Kỹ ti mré mũ tĩ ag tóg hã tó kãn mũ gé sir.

Getsēmani tá

(Mc 14.32-42; Lc 22.39-46)

³⁶ Kỹ Jesus tóg ka krãn ja tá jun mũ sir, ag mré, ka krãn ja ěn jijin hã vỹ: Getsēmani, he mũ. Kỹ tóg ā mré mũ tĩ ag mỹ: “ha ver nĩgnĩ, tag ki,” he mũ. “Sỹ ver Topē mré vĩnh ke vẽ, tãtã,” he tóg. ³⁷ Kỹ tóg Pedro mré Zebedeu krē ag mỹ: “inh mré kãmũ jěg,” he mũ. Kỹ tóg fe kaj nĩ sir. Mũmēg tóg mũ sir. ³⁸ Kỹ tóg ag mỹ: “inh fe kaj mág tóg tĩ,” he mũ, “kỹ inh fe kaj tóg inh mỹ iser ri ke nĩ,” he tóg. “Tag ki nỹtĩmnĩ, nũgnũr tũg nĩ, inh ri kén,” he tóg, Jesus ti.

³⁹ Kỹ tóg tĩg sĩ han mãn kỹ mũg ke mũ sir, Jesus ti, kỹ tóg ga kri nỹ mũ. Topē mré tóg vĩ mũ. “Panh’,” he tóg mũ. “Mỹ ā tỹ inh jagtar ke tag tỹ tũ he jãvãnh?” he tóg. “Hã ra isỹ ā mỹ nén to vĩ mũ tag han tũg nĩ. Ą tỹ nén han ke mũ ěn hã han nĩ,” he tóg, Jesus ti.

⁴⁰ Kar kỹ tóg ā mré mũ tĩ ag venh tĩ mũ sir, hã ra ag kar tóg nũgnũr ja nĩ. Kỹ tóg Pedro mỹ: “mỹ ājag mỹ hora pir ki nũr tũ kórég?” he mũ. ⁴¹ “Nũr tũg nĩ, Topē mré vĩmnĩ, ājag tỹ ti vĩ mranh tũ nĩ jé, ũ tỹ ājag kutãn mũ ra. Ąjag tỹ mranh sór tũ vẽ vẽ, hã ra ājag tóg to krój nỹtĩ, hã kỹ ājag tóg mranh ke mũ,” he tóg, Jesus ti.

⁴² Kỹ tóg tĩg mãn mũ sir, kỹ tóg Topē mré vĩ mãn mũ. Kỹ tóg: “panh’,” he mãn mũ. “Ą tỹ inh jagtar ke tag tỹ tũ henh jãvãnh nĩn kỹ sóg jagtar ke mũ. Ą tỹ isỹ nén han ke mũ ěn han nĩ,” he tóg. ⁴³ Kỹ tóg ag venh tĩg mãn mũ gé sir, hã ra ag tóg nũgnũr mãn nỹtĩ, ag nũr há pē tĩn kỹ. ⁴⁴ Kỹ tóg ag mỹ vĩ tũ ra tĩ mũ sir, Topē mré vĩ mãn jé. Ti mỹ tóg ā tỹ tó ja ěn tó mãn mũ. ⁴⁵ Kỹ tóg ā mré mũ tĩ ag venh tĩg mãn mũ gé sir, kỹ tóg ag mỹ: “ājag ne tóg nũgnũr ja nĩ” he mũ, “vẽnhkãn ja ājag tóg nĩ,” he tóg mũ. “Pétēm ti huri, hora ti. Ti tỹ ag mỹ inh fěg ke nē ha, Topē vĩ mranh tĩ ag mỹ, isỹ tỹ ěprã ke fi kósĩn nĩn kỹ,” he tóg. ⁴⁶ “Nĩgnĩ ra, mũ jé ha. Ũ tỹ ag mỹ inh ven mũ vỹ jun ke mũ ha,” he tóg, Jesus ti.

Ag tỹ Jesus se

(Mc 14.43-50; Lc 22.47-53; Jo 18.3-12)

⁴⁷ Ti tỹ ver tỹ vēmén jě ra Judas tóg jun mũ sir. Ũ tỹ 12 (ke) ag kã ũ ěn vẽ, Judas ti. Ti mré polícia ag tóg kãmũ mũ. Rógro génh kỹ ag tóg kãmũ mũ, ka kykyv génh kỹ ke gé. Topē tũ ki rĩr tĩ to pã’i ag tỹ ag jěgnē vẽ, kófa ag tỹ ke gé. ⁴⁸ Hã ra ũ tỹ ag mỹ Jesus ven ke mũ ěn tóg ag mỹ: “ti ki sóg nhun kenh mũ,” he ja nĩ. “Sỹ ũn ki nhun ke mũ ěn hã semnĩ,” he ja tóg nĩ ag mỹ. ⁴⁹ Hã kỹ tóg vēsỹmér Jesus to grěn ke kỹ ti mỹ: “ā mỹ há, Senhor?” he mũ. Kỹ tóg ti ki nhun ke mũ, Judas ti. ⁵⁰ Hã ra Jesus tóg ti mỹ: “régre’,” he mũ. “Ą tỹ nén han ke mũ ěn han nĩ,” he tóg.

Kỹ polícia ag tóg vėsýmér ti to ge ký ti ség mũ sir, Jesus ti. ⁵¹ Ký Jesus mré tí tí ù tóg rógro kunũnh ký polícia ù nĩgrêg kym mũ sir. Topê tù ki rĩr tí to pã'i mág camarada vê, ti tỹ ùn nĩgrêg kym mũ ên ti. ⁵² Hã ra Jesus tóg ti mỹ: “ã rógro fêg han ra,” he mũ. “Êg tỹ rógro tỹ ke ký ag tóg rógro tỹ êg tén ke mũ gé, ha vemnĩ,” he tóg. ⁵³ “Isỹ inh panh mỹ to vĩ mũ ra tóg inh mỹ ã tỹ jêgnê jafã ag jêgnênh ke mũ vê, ùn e ên, 12 mìl (ke) káfór, ag tỹ ijy nĩgãn jé. ⁵⁴ Hã ra sóg ve sór mũ, nén tỹ iso rán ký nĩ ên ti, hã ký sóg ti mỹ tag to vĩ tù nĩ. Ve jé sóg ke mũ ha, inh jagtar ke ti,” he tóg, Jesus ti.

⁵⁵ Ên kã tóg polícia ag mỹ: “ãjag ne tóg rógro génh ký kãmũ mũ, ka kykyv mré, ãjag tỹ ise jé,” he mũ. “Inh pi(jé) tỹ bandido nĩ. Kurã kar ki sóg ãjag mré jê ja nĩgtĩ, Topê jo ìn krêm. Vênh kar kanhrãn ký sóg tá nĩ ja nĩgtĩ, hã ra ãjag tóg tá iség tù nĩ vê mỹr,” he tóg. ⁵⁶ “Hã ra sóg nén tỹ iso rán ký nĩ ên vэг mũ, Topê vĩ tó tí ag tỹ iso nén rán ja ên ti, hã ký ãjag tóg ke mũ,” he tóg, Jesus ti.

Kỹ ti mré mũ tí ag tóg ti ré ký pétê kãn mũ sir, vènh pigju jé, mỹr, ha mẽ.

Pã'i ag tỹ Jesus ki jēmẽ

(Mc 14.53-65; Lc 22.54-55, 63-71; Jo 18.12-14, 19-24)

⁵⁷ Ký ù tỹ ti ség mũ ag tóg ti pére mũ mũ, Topê tù ki rĩr tí to pã'i mág ra, hã vỹ: Caifás, he mũ. Tá ag tóg vènh mãn ký nỹtĩ, Topê vĩ to professor ag, kófa ag ke gé.

⁵⁸ Hã ra Pedro tóg Jesus nón kãtĩ mũ, kuvar há tá, ký tóg Topê tù ki rĩr tí to pã'i mág ìn kãra rã mũ sir. Polícia ag mré tóg tá nĩ nĩ. Ti tỹ ag tỹ Jesus tỹ hên ri kenh ke mũ ên ve sór vê.

⁵⁹ Ký Topê tù ki rĩr tí to pã'i ag tóg ù ag jãvãnhvãnh mũ, ag tỹ Jesus jykre kórég tó jé. Ti vĩ to ag tóg ti tén sór mũ, kófa ag, vènh jyvên tí kar ag. ⁶⁰ Hã ra ag tóg ù tỹ ki hã tó mũ vэг tù nĩ. Û tỹ hên ri ke ag

tóg ón ký ti jykre kórég tó mũ, hã ra tóg ag mỹ ki krov tù nĩ. Ký vãhã ùn rêgre ag tóg tá junjun ký ón ký ti to vĩ mũ. ⁶¹ Ên ag vỹ tóg sir: “tĩ vĩ vènhmỹ mẽ êg,” he mũ. “Topê jo ìn kókén há inh nĩgtĩ, he ja tóg nĩ. Kókén kar sóg ù han mãn ke mũ. Kurã tãgtũ ki tóg kar ký nĩ, ìn ti, ha vemnĩ, he ja tóg nĩ, Jesus ti,” he ag tóg mũ, ón ký ti to vĩ ký.

⁶² Ký Topê tù ki rĩr tí to pã'i mág vỹ jêgnê mũ sir, ký tóg ti mỹ: “ã tỹ nén tónh ke mỹ tũ?” he mũ. “Ag hã ne ã vĩ kónãn tag tó ja nĩ gé,” he tóg. ⁶³ Hã ra Jesus tóg hun ke mũ, nén ù tó mẽ kã. Ký pã'i mág tóg ti mỹ: “Topê vỹ rĩr nĩ,” he mũ. “Ủn rĩr nĩ vỹ êg vэг mũ. Ti rĩnve sóg ã ki jēmэг mũ. Á mỹ tỹ Cristo nĩ, ã mỹ tỹ Topê kósìn nĩ? Ha êg mỹ tó,” he tóg, pã'i mág ti. ⁶⁴ Ký Jesus tóg ti mỹ: “ki hã ã tóg tó mũ,” he mũ. “Kỹ sóg ãjag mỹ tag tó mũ gé, ha mẽ. Êprã ke fi kósìn ên vỹ tỹ inh nĩ,” he tóg. “Kỹ ãjag tóg ù tỹ nén (ũ) kar han mũ ên pэгja tá inh venh ke mũ. Ký sóg kanhkã góg kãmĩ kãtérènh ke mũ gé,” he tóg, Jesus ti.

⁶⁵ Ký pã'i mág ên tóg ã kur tỹ jaran' ke mũ sir, jũ ký. Ký tóg: “Topê kato vĩ kónãn ti huri,” he mũ. “Mẽ kãn êg mỹr, ký êg tóg ù tỹ ti jykre kórég tónh ke ù jãvãnh mãn ke tù nĩ ha,” he tóg. ⁶⁶ “Êg hỹn ti tỹ hê ri kenh mũ ha?” he tóg. Ký ag tóg ti mỹ: “ter jé tóg ke mũ, ti vĩ tag to,” he kãn mũ sir. ⁶⁷ Ký ag tóg ti kakã to sugrug mũ sir, ti kakã ki tãnħ ag tóg mũ gé sir. Ag kã ù tóg ti vatãnħ tá ti tãnħ ký ti mỹ: ⁶⁸ “Cristo nêji tỹ ã jê, ký ã nêji nén kar ki kanhró nĩ,” he mũ. “Ủn ã tãnħ?” he tóg mũ gé. Ti tãnħ ký tóg ke mũ. Gen ký ag tóg ti to é he mũ.

Pedro tỹ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vỹ re tá nĩ nĩ, ìn vãso kã. Ký pã'i camarada ù fi tóg ti ve jé kãkutê mũ, ký fi tóg ti mỹ: “Jesus mré ã tóg tỹ

mũ gé, Galiléia tá ke ên mré,” he mũ.
⁷⁰Hã ra tóg: “vó,” he mũ. “Á tỹ ne tó nẽ hỹn?” he tóg mũ, Pedro ti. Kĩ ag kar vỹ ti vỹ mēg mũ. ⁷¹Kĩ tóg jänkã fin rãm sór mũ. Hã ra ù fi tóg ti vég mũ gé, kũ fi tóg tá ke ag mỹ: “Jesus mré ke ù vẽ, Nazaré tá ke ên mré ke ù vẽ,” he mũ gé. ⁷²Hã ra tóg: “vó,” he măn mũ. “Ti ki kagtĩg sóg nĩ, Topẽ vỹ ki kanhró nĩ,” he tóg, Pedro ti. ⁷³Si há ke tũ ra ù tỹ tá nỹti ag kã ù ag tóg ti vênh kãmũ kũ ti mỹ hã tóg măn mũ gé. Kĩ ag tóg Pedro mỹ: “ha mẽ, ag kã ù vỹ tỹ ã nĩ,” he mũ. “Á vĩ ki ěg tóg ã ki kanhrãn mũ,” he ag tóg mũ. ⁷⁴Hã ra tóg: “vó,” he măn mũ. “Inh pi(jé) ti ki kanhró nĩ. Inh ón mũ ra Topẽ vỹ inh vóg kónãn mũ vẽ,” he tóg, Pedro ti. Hã ra vēsýmér galo tóg kyr mũ. ⁷⁵Kĩ Pedro tóg Jesus vỹ to jykrén mũ, ti tỹ ti mỹ: “iso ã tóg: ti ki kagtĩg sóg nĩ, he tăgtũ han ke mũ, galo kyr ke to hã,” he ja ěn mĩ. Tag mĩ ěkrén kũ tóg tá kãkutẽ mũ sir, hã ra tóg fỹ jagy han mũ sir, Pedro ti.

Ag tỹ Pilatos mỹ Jesus ven

(Mc 15.1; Lc 23.1-2; Jo 18.28-32)

27 Tỹ vaj kũ kusã ki ag tóg Jesus to jykrén mũ sir, Topẽ tũ ki rĩr tĩ to pã'i ag, kófa ag mré hã. Ag tỹ ti tén sór vẽ. ²Kĩ ag tóg ti mrĩnh mũ sir. Ti pére mũn kũ ag tóg pã'i mág tỹ governador mỹ ti fēg mũ sir, Pilatos ěn mỹ.

Judas ter

(Hk 1.16-19)

³Hã ra Judas tóg vég mũ. Pã'i ag mỹ tóg Jesus ti ven ja nĩ, ag tỹ ti se jé. Kĩ tóg ag tỹ ti tén sór mũ tag vég mũ, Judas ti. Kĩ tóg to jykrén măn mũ sir. Vãhã tóg ti mỹ e tĩ. Kĩ tóg jänkamy tỹ prata ěn ma kãtĩ mũ sir, ù tỹ 30 (ke) ěn. Ma kãtĩg kũ tóg Topẽ tũ ki rĩr tĩ to pã'i ag mỹ ven mũ, kófa ag mỹ. ⁴Kĩ tóg ag mỹ: “ti kórég han inh,” he mũ. “Ti pi(jé) nén ù kórég han ja nĩgtĩ, hã kũ tóg vênhmỹ nĩ, ti tỹ inh vĩ to ter kũ,” he tóg.

⁵Hã ra ag tóg ti mỹ: “ěg tũ pijé,” he mũ. “Á tũ hã nẽ,” he ag tóg mũ. Kĩ tóg jänkamy ěn vãm mũ sir, Topẽ jo ěn krēm, kũ tóg hên ra tĩ mũ sir. Tá tóg ã nunh kã vênh jājãn mũ sir, kũ tóg ter mũ sir.

⁶Kĩ Topẽ tũ ki rĩr tĩ to pã'i ag vỹ jänkamy ěn măn kũ to jykrén mũ. “Ěg tỹ Topẽ mỹ jänkamy tag vin kũ tóg vênhmỹ tĩ. Vênh kyvénh kajãm ja ti nĩ, hã kũ ěg tóg Topẽ mỹ vin sór tũ nĩ,” he ag tóg mũ sir, jänkamy ěn to. ⁷Kĩ ag tóg to vênh măn kũ to jykrén mũ. To jykrén kũ ag tóg tỹ ěpỹ kajãm mũ, ag tỹ tá go'or vég tĩ ěn. Tá ag tóg fóg ag kej han sór mũ, fóg tỹ Jerusalém ra pasa tĩ ag mỹ. ⁸Hã kũ ěg tóg ěpỹ ěn to: “ěpỹ kyvénh,” he tĩ.

⁹Hã ra Topẽ vỹ tó tĩ tỹ Jeremias vỹ Judas to tag rãn ja nĩ, ha mẽ: “jänkamy tỹ 30 (ke) tỹ ag tóg ěpỹ kajãm ke mũ. Jänkamy ěn tỹ ag tóg ěprã ke ù kajãm vén ke mũ, Israel ag, ti kaja tag tỹ ag mỹ há nỹn kũ. ¹⁰Ěprã ke ěn tỹ kajãm kar kũ ag tóg tỹ ěpỹ kajãm mũ sir, ag tỹ tá go'or vég tĩ ěn. Hã tó ja tóg nĩ, inh mỹ, ěg jóg tỹ Topẽ ti,” he ja tóg nĩgtĩ, Jeremias ti. Hã ra tóg ge nĩ.

Pilatos tỹ Jesus ve

(Mc 15.2-5; Lc 23.3-5; Jo 18.33-38)

¹¹Hã ra Jesus tóg fóg tỹ pã'i mág rã jẽ nĩ. Kĩ pã'i mág tóg ti ki jēmẽ sór mũ, kũ tóg: “ã mỹ tỹ Judeu ag pã'i nĩ?” he mũ. Kĩ Jesus tóg ti mỹ: “ki hã ã tóg tó mũ,” he mũ. ¹²Kĩ Topẽ tũ ki rĩr tĩ to pã'i ag tóg ti kato vỹ mág han mũ, kófa ag ke gé, hã ra tóg hun ke kũ jẽ nĩ. ¹³Kĩ Pilatos tóg ti mỹ: “mỹ ã mỹ tỹ nén ù tũ nĩ, ag tỹ ã kato vỹ mág han mũ tag ti?” he mũ. ¹⁴Hã ra Jesus tóg vỹ măn tũ nĩ, kũ tóg Pilatos mỹ e tĩ sir.

Ag tỹ Jesus to: ter jé tóg ke mũ, he

(Mc 15.6-15; Lc 23.13-25; Jo 18.39-19.16)

¹⁵Hã ra Pilatos tóg ag mỹ vése ag kar kã ùn pir kavãg tĩ, festar tỹ Páscoa kar ki.

Ti jykre vë. Ag tỹ ùn to vĩ mũ ên kyvãg tóg tĩ. ¹⁶ Kĩ ù tóg se kĩ jẽ nĩ, ên kã. Ûn vênhmỹ vë, ù tỹ ag ri ke tũ, ti jijin hã vỹ: Barrabás, he mũ.

¹⁷ Jãvo ag tóg tá vênhmãn kĩ nỹtĩ, Judeu kar ag. Kĩ Pilatos tóg ag mỹ: “inh hỹn ù kavãn ha?” he mũ. “Ủ nỹ ajag mỹ há nĩ? Barrabás mỹ, Jesus mỹ vó, ag tỹ ù to: “Cristo vỹ tỹ ti nĩ,” he tĩ ên?” he tóg, Pilatos ti. ¹⁸ Pã'i ag tỹ vếkẽ Jesus to jũ nỹtĩn ki kanhró tóg nĩ, Pilatos ti. Ti há nĩn hã kĩ ag tóg ti to jũ mũ, hã kĩ tóg ti kavãn sór mũ, Pilatos ti.

¹⁹ Fóg tỹ pã'i ên tỹ vênh jyvẽn jafã tá nĩn kĩ ti prũ fi tóg ti mỹ vênh vĩ jẽnẽg mũ, kĩ fi tóg ti mỹ: “vênh jykre kuryj han ti tĩ,” he mũ, Jesus to. “Hã kĩ ti vóg sór tũg nĩ. Kuty tag kã sóg ti to vênh pėti kónãn, ẽg jagtar ke ti ve inh, inh vênh pėti ki,” he fi tóg, Pilatos mỹ vênh vĩ jẽnẽn kĩ, hã kĩ tóg ti kavãn sór tãvĩ han mũ, Pilatos ti. ²⁰ Hã ra Topẽ tũ ki rĩr tĩ to pã'i ag tóg vênh kar krĩn mũ sir, kófa ag mré, vênh kar ag tỹ Barrabás kavar kĩ jẽ ve sór jé, ag tỹ Jesus ter ve sór jé.

²¹ Kĩ fóg tỹ pã'i tóg ag ki jẽmẽ mãn mũ. “Inh hỹn ùn rếgre tag ag kã ù tỹ hẽ kavãn mũ ha?” he tóg. Kĩ ag tóg ti mỹ: “Barrabás ti,” he mũ. ²² Kĩ Pilatos tóg ag mỹ: “kỹ inh Jesus tỹ hẽ ri kenh mũ?” he mũ. “Ag tỹ ù to: “Cristo vỹ tỹ ti nĩ,” he tĩ ên tỹ inh hẽ ri kenh mũ?” he tóg. Kĩ ag tóg ti mỹ: “cruz to ti sã,” he kãn mũ sir. ²³ Kĩ fóg tỹ pã'i tóg ag mỹ: “ti kórég tỹ ne han ti?” he mũ. Hã ra ag tóg prẽnprẽn mũ sir. “!..Cruz to ti sã..!” he ag tóg mũ sir, prẽnprẽn kĩ.

²⁴ Ag tỹ hẽ ri ke tũ tóg nĩ, Pilatos ti, hã kĩ tóg ag mỹ hã han sór mũ. Vênh gẻnh kutẽ nĩ ve tóg nĩ, hã kĩ tóg goj jẽ prẽn mũ. Kĩ tóg kã nĩgpẻg mũ sir, vênh kar rĩnve, Pilatos ti, kĩ tóg ag mỹ: “inh jykre pijé,” he mũ. “Inh nĩgẽ kavẻnh ke tũ ti nĩ, ti kyvẻnh ti. Ûn jykre kuryj vë, kĩ sóg ti tẻn jãvẻnh nĩ. Ajag jykre vë,” he tóg, Pilatos ti. ²⁵ Kĩ vênh kar ag tóg ti

mỹ: “ẽg jykre vë,” he kãn mũ. “Ẽg hã ne ti tẻn sór mũ'. Kĩ Topẽ ẽg hã vóg kónãn ke mũ, ẽg krẻ ag ke gẻ, ti tỹ ti ter to ù vóg kónãn ken kĩ,” he ag tóg, vênh kar ên ag.

²⁶ Kĩ Pilatos tóg Barrabás kavãn mũ sir. Jesus to tóg soldado ag mỹ: “ha ti mrẻnmẻn,” he mũ sir. Ag tỹ ti mrẻnmẻn kar kĩ Pilatos tóg ag mỹ ti fẻg, soldado ag tỹ ka to ti sa jẻ.

Soldado ag tỹ Jesus vóg kónãn

(Mc 15.16-20; Jo 19.2-3)

²⁷ Kĩ fóg tỹ pã'i krẻm soldado ag tóg Jesus pẻre mũ mũ, pã'i ỉn ra, ỉn tỹ Palácio do Governador ên ra. Kĩ ag tóg soldado ù ag jẻ prẻr kãn mũ. ²⁸ Ti kur kunũg ag tóg mũ, kĩ ag tóg kur kusũg tỹ ti kri fỏn mũ. ²⁹ Sỏnh pirẻn kĩ ag tóg tỹ ti krẻ tógfẻg mũ sir, krẻ tógfẻn ja rẻr tỹ. Vẻn tỹ ag tóg ti nĩgẻ kã fẻg mũ, ti pẻgja tá. Kĩ ag tóg ti krẻm grẻnhgrẻnh ke mũ sir, ón kĩ. Ti to é he ag tóg mũ, hã kĩ ag tóg: “viva, Judeu ag pã'i,” he mũ. ³⁰ Kĩ ag tóg ti to sugsgug mũ gẻ. Vẻn ên tỹ ag tóg ti krẻ mĩ mrẻnmẻn mũ sir.

³¹ Ag tỹ ti nyg kar kĩ ag tóg ti ki kunũg mũ, kur ên ti. Kĩ ag tóg ti tũ pẻ tỹ ti kãra rẻg mãn mũ sir. Kĩ ag tóg ti pẻre mũ mũ, ag tỹ cruz to ti san jẻ sir.

Jesus tỹ cruz to sa

(Mc 15.21-32; Lc 23.26-43; Jo 19.17-27)

³² Ag mủn kã ag tóg ù kato tẻ mũ, Cirene tá ke ù, ti jijin hã vỹ: Simão, he mũ. Ẽn mỹ ag tóg vĩ tar han mũ, ti tỹ Jesus cruz vyn jẻ ti jo, hã kĩ tóg vyn kĩ tĩ mũ.

³³ Gen kĩ ag tóg Gỏlgota tá junjun mũ sir. Gỏlgota to ẽg tóg: vênh krẻ kuka, he tĩ, ẽg vĩ ki. ³⁴ Tá junjun kĩ ag tóg ti mỹ vinagre ven mũ, nẻn ù tỹmẻ jynh mrẻ ha. Kĩ tóg kron sĩ han mũ, hã ra tóg kron sór tũ nĩ, vẻnhkagta tag. ³⁵ Kĩ ag tóg cruz to ti sẻg mũ sir. Ti kur tỹ ag tóg jagnẻ mỹ vênh kápẻm mũ sir, to ag tóg jogar

he mû gé, ti kur to, soldado ag. ³⁶ Kÿ ag tóg nîgnîg kÿ nÿtî, ti ki rîr jé, soldado ag. ³⁷ Ag tÿ nén tÿ ti kato vî mû vÿ rán kÿ nî, hã vÿ: “Jesus, Judeu ag pã'i tÿ rei vë,” he mû. Ti kri tóg sa, vënh rán ti. Ti tÿ nêji vësÿ pã'i tÿ rei han mû to ag tóg ti tén mû. ³⁸ Ti kóm ag tóg ùn régre ag tÿ cruz to sãg mû gé, bandido ag. Kÿ ù tóg ti pëgia tá sa, jó ù tóg ti jakânh tá sa.

³⁹ Kÿ ù tÿ mî mû mû ag tóg ti nyg' he mû gé, vÿn vÿn hen kÿ. ⁴⁰ “Ã mÿ Topê jo ìn kókén sór mû?” he ag tóg mû. “Ã mÿ kurã tãgtû ki ù han măn sór mû? Vënh kren han ra kema', cruz to kâtére kema', ã tÿ tÿ Topê kósín nîn kÿ,” he ag tóg ti mÿ. ⁴¹ Ge ag tóg mû gé. Topê tû ki rîr ti to pã'i ag, Topê vî to professor ag mré hã, kófa ag mré hã. Ti nyg ag tóg mû gé, kÿ ag tóg jagnê mÿ: ⁴² “ù ag krenkren han tóg, hã ra tóg vënh hã kren han ki kagtîg nî,” he mû. “Israel pã'i tÿ rei jé cruz to kâtére kema', ãg tÿ ve jé, ãg tÿ ti ki ge jé,” he ag tóg. ⁴³ “Topê ki ti nêji rã kÿ jê, kÿ Topê jé ti kren han, ti tÿ ti to há nîn kÿ. “Topê kósín vÿ tÿ inh nî,” he ti mÿr,” he ag tóg ti to, ti nyg kÿ, Judeu pã'i ag. ⁴⁴ Kÿ bandido ag, ù tÿ ti kóm cruz to nÿtî ãn ag tóg ti nyg mû gé.

Jesus ter

(Mc 15.33-41; Lc 23.44-49; Jo 19.28-30)

⁴⁵ Rã tÿ ãg nîno kã sa ra tóg kuty' he mû sir, ga kar mî hã. Kuty ãn tóg hora tãgtû tûg mû. ⁴⁶ 3 hora ki Jesus tóg prër mû sir, kÿ tóg: “Eli, Eli, lemá sabactani?” he mû. ãg vî ki ãg tóg tag to: “Topê, Topê, ã tÿ ne jé isovãnh nê?” he mû. ⁴⁷ Kÿ ù tÿ tá nÿtî ag tóg mēg kÿ (ag tóg) jagnê mÿ: “Elias jé tóg prër mû,” he mû. ⁴⁸ Kÿ ù tóg vënhvãg mû sir, kÿ tóg esponja tÿ vinho prãg mû, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mû sir, ti tÿ ki ùnh' ùnh' ke jé. ⁴⁹ Hã ra ù ag tóg: “toreg',” he mû. “Hên ri ke mûn Elias kâtîg mû, ti

kren han jé,” he ag tóg. ⁵⁰ Hã ra Jesus tóg prër mág han măn kÿ hun ke mû sir.

⁵¹ Hã ra Topê jo ìn krêm kur tÿ jãnkã nîfe tóg jaran ke mû, ha mē, ti jar tóg vënh kākÿm ke kãn mû sir, ha mē. ⁵² Kÿ ga tóg ragra ke mû gé sir, pãró vÿ gÿm ke mû, vënh kej tÿ hên ri ke vÿ nugnor mû, kÿ ù tÿ Topê ki ge kÿ nÿtî tÿ hên ri ke ag tóg rînrîr măn mû gé, ùn kãgter ja ag. Ájag kej tá ag kãpa mû. ⁵³ ãn ag vÿ Jesus rîr măn kar kÿ tá kãpa kÿ cidade tÿ Jerusalém kãra ge mû, kÿ ag tóg ùn mÿ vënh venven mû sir, kÿ ù tÿ hên ri ke ag tóg ag vigvég mû, Jerusalém tá ke ag.

⁵⁴ Hã ra capitão tóg soldado ag mré Jesus ki rîr jê nî. Ga tÿ ragra ke ãn vég ag tóg mû, nén kar ti, Jesus ter ãn kã. Kÿ tóg ag mÿ e tî. Kÿ ag tóg: “hã ja vë,” he mû. “Topê kósín ja vë mÿr,” he ag tóg mû, capitão ag.

⁵⁵ Kÿ ùn tÿtã fag vÿ tá nÿtî gé, ù tÿ hên ri ke fag. Kuvar há tá nÿtî kÿ fag tóg ti vég nÿtî nî. Ti mré fag tóg kãmû ja nî, ga tÿ Galiléia tá. Ti ki fag rîr ja nîgtî. ⁵⁶ Fag kã ù fi vÿ tóg tÿ Maria Madalena fi nî, kÿ ù fi tóg tÿ Maria fi nî gé, José mré Tiago mÿnh tag fi. Kÿ ù fi vÿ tÿ Zebedeu krê ag mÿnh fi nî gé. Fag mré ke ù fag vÿ tá nÿtî gé.

Ag tÿ vënh kej kākã Jesus fi

(Mc 15.42-47; Lc 23.50-56; Jo 19.38-42)

⁵⁷ Rãkê tóg nÿ ha, kÿ ùn há tóg tá jun mû. Arimatéia tá tóg kâtîg ja nî. Ti jîjin hã vÿ: José, he mû. Jesus mré ke ù vë gé. ⁵⁸ ãn vÿ tóg Pilatos venh tî mû, kÿ tóg ti mÿ Jesus to vî mû, ti ter kar kÿ. Kÿ Pilatos tóg soldado ag mÿ: “ha ti mÿ ti fi,” he mû. ⁵⁹ Kÿ José tóg Jesus va tîg kÿ ti pãg mû sir, kur jãnhkri tÿ. ⁶⁰ Kÿ tóg ã kej kākã ti fig mû sir. Pó kākã tóg han ja nîgtî, vënh kej ti, hã ra tóg tãg nî. José tû vë, vënh kej ãn ti. ãn kākã tóg ti fig mû sir, kÿ tóg pó tãpér tîn mû, vënh kej jãnkã to, pó ãn tÿ tóg ti kej nífénh mû sir, José ti. Kÿ tóg tî mû. ⁶¹ Hã ra Maria

Madalena fi vỹ tá nĩ nĩ, Maria ù ên fi ke gé. Ti kej rã fag tóg nĩgnĩ kỹ nỹti nĩ.

Ag tỹ ti kej ki rĩr

⁶²Tỹ vaj kỹ, festa kurã kã Topẽ tũ ki rĩr tĩ to pã'i ag tóg vênh măn măn mũ sir, Fariseu ag mré hã. Kỹ ag tóg Pilatos venh mũjẽg. ⁶³Ti mỹ ag tóg: "governador," he mũ. "Vênh kar krĩn kónãn tĩ ên tóg tag tó ja nĩ, ha mẽ: "kurã tãgtũ ki sóg rĩr măn ke mũ," he ja ti nĩ. Ëg tỹ tag to jykrẽn kỹ ãg tóg ã mỹ nén ù to vĩ sór mũ gé ver. ⁶⁴Soldado ag tỹ ti kej ki rĩr há tóg tĩ, kurã tãgtũ ki. Ëg mỹ tóg ti mré mũ tĩ ag tỹ ti to nón kỹ ti péjunh ha mẽ tĩ. Ëg mỹ tóg ag tỹ ti péju kar vênh kar mỹ: "rĩr măn ti, ã ter kar kỹ," henh ha mẽ tĩ gé. Kỹ vênh ó tãg tag vỹ ti ón ja ên kãfór pẽ nỹnh ke mũ. Hã kỹ soldado ag jẽgnẽ, ag tỹ ti kej ki rĩr jé," he ag tóg, Pilatos mỹ. ⁶⁵Kỹ Pilatos tóg ag mỹ: "hej," he mũ. "Vỹ nỹti, ti kej ki rĩr ke mũ ag," he tóg, soldado ù ag to. "Ti kej ki rĩr há han nĩ, ge kỹ," he tóg. ⁶⁶Kỹ ag tóg mũ kỹ ti kej to ag vịn mũ, ti kej ki rĩr ti ên ag. Ti kej nífénh mũ ên ség ag tóg mũ gé, vãfe tỹ, pãró to. Kỹ ag tóg go'or tỹ vãfe ên kri tỹ tam ke mũ, ù tỹ ti kej nife kunũg tũ nĩ jé.

Jesus rĩr măn

(Mc 16.1-10; Lc 24.1-12; Jo 20.1-10)

28 Vênhkãn ke kurã tỹ vaj kỹ, se-mana tỹ kurã ve tag ki Maria Madalena fi tóg ti kej venh tĩ mũ, kusã ki, Maria ù ên fi mré hã. ²Hã ra ga tóg ragra ke tar han mũ sir. Kỹ Topẽ tỹ jẽnẽ jafã tóg kanhkã tá kãtère mũ. Ti kej tá jun kỹ tóg pó tỹ jãnkã nife ên tĩn mũ, kỹ tóg kri nĩ mũ sir, pó ên kri. ³Hã ra tóg tỹ ta tỹ kóm kóm ke ve nĩ, anjo ên ti. Ti kur vỹ kóprẽj nĩ, kukryr kó kupri ri ke. ⁴Kỹ soldado ag tóg jũrũn ke mũ, kamẽg kỹ ag tóg kãgter nỹti ve nĩ. ⁵Kỹ Topẽ tỹ jẽnẽ jafã tóg ùn tỹtã fag mỹ vĩ mũ, kỹ tóg: "kamẽg tũg nĩ," he mũ. "Jesus jãvãnh ãjag nỹti, ag tỹ cruz to ùn sãg

mũ ên ti. ⁶Ki ti tũ nĩ, rĩr ti huri, hã kỹ tóg ãjag mỹ tó ja nĩgtĩ. Ki ti nỹ ja nĩgtĩ, ha kãge jẽg, ãjag tỹ ti nỹgia ve jé," he tóg mũ, fag mỹ, anjo ti. ⁷"Kuri, ti mré mũ tĩ ag mỹ tónh mũjẽg, ti rĩr măn ti, ti ter kar kỹ. Ha vé, ãjag jo tóg tũg mũ, Galiléia ra. Tá ãjag tóg ti venh mũ, ha vemnĩ. Inh vĩ kã jatu' he tũg nĩ," he tóg, Topẽ tỹ jẽnẽ jafã ti. ⁸Kỹ fag tóg ti kej tá kãpa mũ sir, to fũrũrũn kỹ. Fag mỹ tóg e tĩ. Fag mỹ tóg sér pẽ tĩ, hã kỹ fag tóg pêtẽ mũ sir, fag tỹ Jesus mré mũ tĩ ag mỹ tó jé.

⁹Fag mũ ra Jesus hã ne fag kato jun ke mũ, kỹ tóg fag mỹ: "mỹ sér nỹtĩmĩ," he mũ. Kỹ fag tóg ti to grẽn ke mũ, ti pẽn kãgmĩg fag tóg mũ sir. Ti krẽm fag tóg mũg ke mũ gé. ¹⁰Kỹ Jesus tóg fag mỹ: "kamẽg tũg nĩ," he mũ. "Ha mũjẽg, inh régre ag mỹ tónh mũjẽg, ag tỹ ga tỹ Galiléia ra mũ jé. Tá ag tóg inh venh ke mũ," he tóg, Jesus ti. Kỹ fag tóg mũ mũ.

Soldado ag ón

¹¹Fag mũn kỹ soldado ên ag tóg cidade ra mũ mũ, soldado tỹ Jesus kej ki rĩr mũ ên ag. Tá junjun kỹ ag tóg Topẽ tũ ki rĩr tĩ to pã'i ag mỹ tó kãn mũ, ag tỹ nén vég mũ ên ti. Kỹ tóg ag mỹ e tĩ. ¹²Kỹ ag tóg kófa ag mré vênh măn mũ sir, ag tỹ to jykrẽn jé. "Ëg hỹn hẽ ri kenh mũ, vênh kar tỹ ti rĩr măn tag to: ag ón vẽ, he jé?" he ag tóg mũ jagnẽ mỹ. Ag tỹ to jykrẽn kar kỹ ag tóg soldado ag mỹ jãnkamy e ven mũ sir. ¹³"Jãnkamy tag to vênh kar mỹ un'ón," he ag tóg mũ, pã'i ag, soldado ag mỹ. "Un'ón kỹ vênh kar mỹ: ãg nũgnũr mũ jãvo Jesus mré mũ tĩ ag tóg ti péju ja nĩ, kuty si há tá, hã kỹ tóg ki tũ nĩ ha, hemnĩ," he ag tóg, pã'i ag, soldado ag mỹ. ¹⁴"Hẽn ri ke mũn ãjag pã'i tỹ governador tóg mẽnũ mũ, ãjag nũgnũr ja ti. Kỹ ãg tóg ti mré vẽnẽn ke mũ, ti tỹ ãjag vóg kónãn tũ nĩ jé," he ag tóg, Topẽ tũ ki rĩr tĩ to pã'i ag, soldado ag mỹ. ¹⁵Kỹ soldado ag tóg jãnkamy ên măn kỹ mũ mũ sir. Vênh kar mỹ ag tóg un'ón mũ mũ

sir, Jesus mré mũ tĩ ag to. Hã kỹ Judeu ag tóg ver tag tó tĩ, ùnri.

Jesus tỹ ã mré mũ tĩ ag mỹ vãnh ven

(Mc 16.14-18; Lc 24.36-49;
Jo 20.19-23; Hk 1.6-8)

¹⁶Hã ra ti mré mũ tĩ ag tóg ga tỹ Galiléia ra mũ mũ, pănónh ù ra, Jesus tỹ ag mỹ: “ên ra mữjêg,” he ja ên ra. ¹⁷Kỹ ag tóg tá ti vэг mũ sir, kỹ ag tóg ti krêm mữgmữg ke mũ sir. Hã ra ag kãmĩ ù ag mỹ tóg vãnhmỹ tĩ, ag tỹ ti vэг mũ ra, kỹ tóg ag mỹ ki hã ke tũ nĩ. ¹⁸Kỹ Jesus tóg ag rã hã jun mũ, kỹ tóg ag mré

vẻmẻn mũ sir. “Nẻn kar vỹ tỹ inh krẻm ke nĩ ha, kanhkã tá ke kar, ga tá ke kar ke gẻ,” he tóg, Jesus ti. ¹⁹“Hã kỹ mữjêg, povo kar kanhrẻn jẻ, ag tỹ inh ki ge jẻ. Ag tỹ inh ki ge kỹ nỹtĩn kỹ ag kygpẻm nĩ gẻ. Inh panh jiji tẻm nĩ, ag kygpe kỹ, kỹ ti kẻsin jyjy tẻm nĩ gẻ, kỹ Topẻ kuprẻg jiji tẻm nĩ gẻ, ảjag tỹ ag kygpe kỹ. ²⁰Kỹ isỹ ảjag mỹ nẻn tẻ mũ kẻmẻn kẻn nĩ gẻ, ag tỹ ki krẻm jẻ. Ha mẻ, ảjag mrẻ sẻg jẻ nĩ, kurẻ kar ki, ga tữg ke kurẻ ki ke gẻ. ảjag tovẻnh ke tũ sẻg nĩ ha,” he tóg, Jesus ti. Ti tỹ ã mrẻ mũ tĩ ag jẻgnẻg mủn hã vẻ.

MARCOS TỠ RÁ

João Batista tỠ Jesus tó

(Mt 3.1-12; Lc 3.1-18; Jo 1.19-28)

1 SỠ Jesus Cristo kâme sér tónh ke vễ, Topê kósín ti. ² VāsỠ Jesus tóg rán kỠ nĩ, João ke gé, Jesus jo tĩnh ke ti. Topê vĩ tó tĩ tỠ Isafas vỠ Jesus rán ja nĩ, kỠ tóg: “ha vễ, ă jo sóg ũ jẽnẽnh mũ, ti tỠ vẽnẽh kar kân jế, ă tĩg ken jo,” he ja nĩ. “Ag jyvẽn jế tóg ke mũ, kỠ tóg ẽpry prun ri ke nĩ, ẽmĩn kurynh ri ke. ³ Ẽmã tũg ja tá tóg jẽnẽh ke mũ, ga kórég tá. Tá tóg ag mỠ kâmén ke mũ. “Ẽg Senhor kâtĩg ke jo vẽnẽh jãnhkrigkrig nĩ,” he tóg mũ. “Ẽpry kurég ăjag tóg tĩ, ẽmĩn kurynh ăjag tóg tĩ, ăjag chefe jun ken kỠ. KỠ tag ri ke han nĩ, ăjag jykre pãno togvãnh kỠ, ẽg Senhor kâtĩg ken jo,” he tóg, ă jo tĩnh ke ti,” he ja tóg nĩ, Isafas ti, João to.

⁴ KỠ João tóg jế mũ, ẽmã tũg ja ki, ag kygpég tĩ ti. Ag jyvẽn tóg jếgtĩ, kỠ tóg: “ă kype jế sóg ke mũ, ă tỠ ă jykre kórég togvãnh kỠ, Topê tỠ ă tỠ ti vỹ mranh tỠ ă mỠ vẽnẽh pãte fón jế,” he tóg mũ sir, vẽnẽh kar mỠ.

⁵ KỠ ag tóg ti to kãmũ kân mũ sir, ga tỠ Judéia tá, cidade tỠ Jerusalém tá ke gé. KỠ tóg ag kygpég mũ sir, goj tỠ Jordão ki, ag tỠ: “Topê vỹ mranh sóg nĩgtĩ, tag han kỠ,” hen kỠ. ⁶ Jó João kur tóg cavalo pãnĩ sór kyki tỠ há nĩ. Nén ũ fár tỠ tóg vėsógfĩn ja han tĩ gé. Ópã hã ko ti tĩ, mỠg mrế, João ti. ⁷ KỠ tóg Jesus kâmén kỠ (tóg) ag mỠ: “ũ tóg inh nón kâtĩ mũ, ha mễ,” he mũ. “Inh kãfór ti nĩ. SỠ tỠ ti camrada nĩnh ke vễ vễ, sỠ ti pẽn né kunũnh ke vễ vễ, ti pẽn to ró ti, hã ra sóg tỠ ti krêm ke pế jế. ⁸ Goj hã tỠ sóg ăjag kygpenh ke mũ. Ũ tỠ inh nón kâtĩg ke ẽn tóg sir Topê kuprĩg tỠ ăjag jagrế han ke mũ. Ti tỠ ăjag kygpenh ken hã vễ,” he tóg, João ti, vẽnẽh kar mỠ.

João tỠ Jesus kype

(Mt 3.13-17; Lc 3.21-22)

⁹ KỠ kejẽn Jesus tóg João tá jun mũ gé. Cidade tỠ Nazaré tá tóg kâtĩ mũ, ga tỠ Galiléia tá. Tá jun kỠ João tóg ti kypég mũ sir, goj tỠ Jordão ki. ¹⁰ Ti tỠ goj kâtã kãkutế kỠ kanhkã vỠ nor mũ sir vėsỹmẻ. Hã ra Jesus tóg vếg jế nĩ. KỠ tóg Topê kuprĩg vếg mũ. Sórãg ri ke ti nĩ, ti kâtẻ ti. Kâtẻ kỠ tóg Jesus kri nĩ nĩ sir. ¹¹ KỠ tóg kanhkã tá vẽnẽh vỹ mễg mũ gé sir, kỠ tóg: “tỠ ă inh kósín pir jế, tỠ ă inh fe pế jếgtĩ,” he mũ, vẽnẽh vỹ tỠ mễ há ẽn ki.

Satanás tỠ Jesus krĩn kónãn sór

(Mt 4.1-11; Lc 4.1-13)

¹² KỠ vėsỹmẻ Topê kuprĩg tóg Jesus krĩn mũ, ti tỠ ẽmã tũg ja ra tĩg jế. ¹³ Kurã tỠ 40 (ke) tũg tóg mũ, ẽmã tũg ja ki, Jesus ti. Tá nĩn kỠ Satanás tóg ti tỠ ă jóg vỹ mranh han sór mũ, hã ra tóg ke tũ nĩ. Nẽn kãmĩ bicho ag vỹ tá mũgtĩ gé, ẽmã tũg ja ki. Hã ra Topê tỠ jẽnế jafã ag tóg ti ki rĩr mũ sir, tá.

Jesus tỠ Galiléia ra vỹn ke

(Mt 4.12-22; Lc 4.14-15; 5.1-11)

¹⁴ Kejẽn ag tóg João ség mũ. Ag tỠ ti se kar kỠ Jesus tóg ga tỠ Galiléia ra ti mũ. Tá tóg ag mỠ Topê tỠ tỠ ẽg pã'i nĩnh ke kâmén mũ, vẽnẽh kãmẻ sér ẽn ti. ¹⁵ KỠ tóg: “Topê vỹ tỠ pã'i nĩ,” he mũ. “Pétẻm ti huri, ti kurã ti, ẽg tỠ ti tỠ tỠ ẽg pã'i nĩ ẽn ve jế. KỠ ăjag jykre kórég togvãnh nĩ. Ti vỹ kri fimnĩ, ăjag tỠ ti tỠ tỠ ẽg pã'i nĩ ẽn ve jế,” he tóg ag mỠ, Jesus ti.

¹⁶ Kejẽn Jesus tóg nig fyr tỠ Galiléia he mũ ẽn jagma tĩ mũ. Ẽ tỠ ti fyr mĩ tĩ ra tóg Simão Pedro vếg mũ, ti jãvỹ tỠ André ke gé. Kur tỠ pirã kugmĩ jafã tỠ ag tóg goj kãki fón mũ, rede tỠ, pirã kugmĩ jế. Ag rãnhrãj hã vễ.

¹⁷ KỠ Jesus tóg ag ve kỠ ag mỠ: “inh mrế kãmũmnĩ,” he mũ. “Pirã kugmĩ há ăjag nỹtĩ,” he tóg. “Ăjag kanhrãn jế sóg

ke mũ, ãjag tỹ ãprã ke ag tỹ inh ki ge han jé,” he tóg ag mỹ, Jesus ti. ¹⁸ Vēsỹmēr ag tóg ti mré mũ mũ, ãjag rede tovãnh kỹ, Pedro ti, André ti ke gé.

¹⁹ Kỹ ag tóg mũ mũ, goj fyr jagma. Ag mũ sĩ han mũ ra ag tóg ùn régre ù ag vég mũ gé. Û vỹ tỹ Tiago nĩ, kỹ ù vỹ tỹ João nĩ, ti jãvy. Zebedeu krê ag vê. Canoa kãki ag nỹtĩ, pirã kugmĩ jafã ki han kỹ. ²⁰ Ag vê kỹ tóg vēsỹmēr ag jé prēr mũ, Jesus ti. Kỹ ag tóg ãjag panh ré kỹ mũ mũ, Zebedeu ti. Ag camarada ag vỹ ag panh mré canoa kãki nỹtĩ nĩ. Ag ré kỹ ag Jesus mré mũ mũ sir, Tiago ti, João ti ke gé.

Jesus tỹ vãnh jagrê kórég kutēm

(Lc 4.31-37)

²¹ Kỹ ag tóg cidade tỹ Cafarnaum ki ge mũ sir. Vẽnkhán ke kurã ki tóg vēsỹmēr Judeu ag vãnh kanhrãn jafã kãra rã mũ, ag kanhrãn jé, Jesus ti. ²² Ti tỹ ag kanhrãn kỹ tóg ag mỹ e tĩ, ti vĩ ti. Vãnh kar vĩ kãfór ti nĩ. Topê vĩ to professor ag vĩ kãfór ti nĩ gé. Hã kỹ tóg ki hã tó mũ. Kỹ tóg ag mỹ e tĩ. ²³ Hã ra ù tóg tá nĩ nĩ, Judeu ag vãnh kanhrãn jafã tá. Jagrê kórég ti nĩ. ²⁴ Æ tỹ Jesus ve kỹ tóg prēr mũ. “Æ tỹ ãg tỹ hẽ ri ke nẽ, Nazaré tá Jesus?” he tóg. “Æ mỹ ãg kókén sór tũ? Æ ki kanhró sóg nĩ. Tỹ ã tóg ã pir mỹ Topê mré ke nĩ, ti tũ pẽ vỹ tỹ ã nĩ,” he tóg, ùn jagrê kórég ti.

²⁵ Hã ra Jesus tóg ti mỹ vĩ tar han mũ, kỹ tóg: “vĩ tũg ra,” he mũ. “Ti tovãnh ra,” he tóg.

²⁶ Kỹ ti jagrê kórég ãn tóg ti ter tĩ han mũ sir, prēr tóg mũ sir. Kỹ tóg ti tovãnh mũ. ²⁷ Kỹ tóg vãnh kar mỹ e tĩ mỹr sir. Jagnẽ mỹ ag tóg: “ne nẽ vé?” he mũ. “Vãnh vĩ tãg mỹ vó?” he ag tóg mũ. “Vãnh jagrê kórég ag mỹ tóg vĩ tĩ, kỹ ag tóg ki ke tĩ, ti kamẽg kỹ. Ag kri ke hỹn,” he ag tóg mũ, Jesus to.

²⁸ Kỹ ti vême tóg vãnh kar kri rũm mũ, Galiléia tá ke kar kri.

Jesus tỹ Pedro má fi tỹ há' he

(Mt 8.14-15; Lc 4.38-39)

²⁹ Kar tóg Judeu ag vãnh kanhrãn jafã ki kutẽ mũ, Jesus ti, kỹ tóg Simão Pedro ãn ra rã mũ sir. André mré ti ãn vê. Tiago vỹ João mré ra rã mũ gé. ³⁰ Hã ra Pedro prũ fi mỹnh fi vỹ kaga nỹ nĩ, rỹg nỹ fi nĩ. Kỹ ag tóg Jesus mỹ fi tó mũ. ³¹ Kỹ tóg fi venh ti mũ. Fi nĩgẽ kãgmĩ kỹ tóg fi nĩm mũ. Kỹ fi rỹg ãn tóg tũ' he mũ sir. Ag ki rĩr fi tóg mũ sir, Pedro má fi.

Jesus tỹ ùn kagyga ag tỹ há' he

(Mt 8.16-17; Lc 4.40-41)

³² Kurã ãn kã kuty tá ag tóg ùn kagyga ag tatĩ kãmũ mũ, ùn jagrê kórég ag mré hã. ³³ Cidade ãn ki ke kar ag vĩ ti ãn jãnkã tá nỹtĩ mũ. ³⁴ Kỹ Jesus tóg ag tỹ há' he kãn mũ sir, fag tỹ ke gé. Vãnh jagrê kórég pan kãn tóg mũ gé. Kỹ ag tóg ti tó sór mũ, ag tỹ ti ki kanhró nỹtĩ kỹ. Hã ra tóg ag mỹ: “vĩ tũg nĩ,” he mũ.

Jesus tỹ ã jóg mré vĩ

(Lc 4.42-44)

³⁵ Tỹ vaj kỹ tóg kurã ke ra (tóg) rĩr mũ, Jesus ti. Kỹ tóg ãmã tũ ra tĩ mũ sir, Topê mré vĩ jé. ³⁶ Kỹ Simão tóg ti kanẽg tĩ mũ, ti jãvãnh kỹ. Ti mré ke ag mré tóg tĩ mũ. ³⁷ Kỹ ag ti vég mũ sir. Kỹ ag tóg ti mỹ: “vãnh kar vĩ ã kanẽgnẽg mũ, ã jãvãnhvãnh kỹ,” he mũ. ³⁸ Kỹ Jesus tóg ag mỹ: “mũ nỹ, cidade ù ra,” he mũ, “sỹ ag mỹ Topê vĩ tó jé gé. Hã jé sóg kãtĩg,” he tóg mũ ag mỹ, Jesus ti.

³⁹ Kỹ tóg ga tỹ Galiléia kar mĩ tĩ mũ. Vãnh kanhrãn jafã krêm tóg ag mỹ Topê vĩ tó mũ sir. Ag jagrê kórég pan tóg mũ gé sir.

Jesus tỹ ùn kaga kren vãnh tỹ há' he

(Mt 8.1-4; Lc 5.12-16)

⁴⁰ Kỹ kejẽn ùn kaga kren vãnh vĩ ti to kãtĩ mũ, vãnh kaga tỹ lepra he mũ ãn han mũ ãn. Kỹ tóg ti krêm grĩnh ke mũ,

ti mý nén ũ to ví jé. Ký tóg: “ã mý isý há’ he sór tũ nĩ?” he mũ. “Ã hã tóg isý há’ henh mũ, ã tỹ isý há’ he sór ký,” he tóg ti mý. ⁴¹ Ký tóg Jesus mý jagtar tĩ. Ký tóg ã nĩgê tỹ ti mēg ký ti mý: “hej,” he mũ. “To sóg há nĩ. Há’ he ja há ã tóg nĩ,” he tóg ti mý.

⁴² Ký tóg ti kaga kren vãnh ěn kren han mũ sir vēsýmér. Ký tóg jãnhkri nĩ sir, ti fár ti. ⁴³ Ký Jesus tóg ti mý ví tar han mũ, ti tĩg jé. ⁴⁴ Ký tóg ti mý: “ker ũ mý tó hê,” he mũ. “Ha tĩg, Topê tũ ki rĩr tĩ to. Ti hã mý tómnĩ, ký Topê mý nĩm nĩ, Moisés tỹ vāsý ěg mý nén tó ja ti, ã jãnhkri to. Hã tugrĩn vãnh kar vỹ ã tỹ há’ he mũ tag ki kanhrãn mũ,” he tóg ti mý, Jesus ti.

⁴⁵ Hã ra tóg vãnh kar mý tó mũ sir. Ký vême ěn vỹ vãnh kar kri rũm mũ. Hã ký Jesus tóg ěmã ũ ki rã tũ nĩgtĩ, vãnh ven jé. ěmã tũ mĩ tóg tĩgtĩ, hã ra ag tóg ěmã kar tá ti to kãmũ tĩ.

Jesus tỹ ãn grĩngrĩn ký nỹ tỹ há’ he

(Mt 9.1-8; Lc 5.17-26)

2 Kãnhmar Jesus tóg kejěn cidade tỹ Cafarnaum tá jun mãn, ký ag tóg mēg mũ sir, ti tỹ tá nĩn ki, ti tỹ hê tá nĩ ěn tá. ² Ký ãn e ag vỹ ti to vãnh mãn, ký tóg fór nĩ, jãnkãn mĩ hã. Ký Jesus tóg ag mý Topê ví tó jě nĩ. ³ Hã ra ũ ag tóg tá jun-jun mũ gé sir, ãn grĩngrĩn ký nỹ vyn ký, ũ tỹ 4 (ke) ag vě. ⁴ Hã ra ag tóg ti pětěm tũ nĩ sir, ti tỹ ag jy fór tĩn ký. Ký ag tóg ĩn kunũg mũ, ti kri. Nor ěn ki ag tóg ãn grĩngrĩn ký nỹ ěn ti těrem mũ, kur kãkã nỹ ti. ⁵ Ký Jesus tóg ag jykre vég mũ sir, ag tỹ ti ki ge ký nỹtĩ ti. Ký tóg ãn grĩngrĩn ký nỹ ěn mý: “inh kósĩn,” he mũ. “Ã tỹ Topê ví mranh ja tỹ tũ’ he vě ha,” he tóg ti mý, Jesus ti.

⁶ Hã ra Topê ví to professor ũ ag vỹ tá nỹtĩ gé. Ti ví to ag tóg jykren mũ sir. ⁷ “Ne ně hỹn’, ti tỹ tó tag ti?” he ag tóg mũ, koměr hã. “Topê to ví kónãn vě,” he ag tóg. “Topê hã ne ã pin ký ěg tỹ Topê ví mranh ěn tỹ tũ’ he há nĩnh mũ. Ti hỹn

vēsý Topê han mũ,” he ag tóg mũ, ti to jykren ký.

⁸ Hã ra Jesus tóg ki kanhró nĩ, ã fe tỹ, ag jykren ki. Ký tóg ag mý: “ãjag tỹ ne to jykren kónãn ně?” he mũ. ⁹ “Ne nỹ ãjag mý věnhmý nỹ?” he tóg. “Ûn grĩngrĩn ký nỹ tag mý sóg: ã tỹ Topê ví mranh ja ěn tỹ tũ’ he vě ha, hě,” he tóg. “Kỹn mý ãjag mý věnhmý?” he tóg. “Sỹ ti mý: nĩ ra, ã kur gé(g) tĩg, henh ke ně ha,” he tóg. “Kỹn mý ãjag mý věnhmý ke gé?” he tóg. ¹⁰ “Hã ra isý ãjag mý ĩnh jykre ven sór vě ha. Tỹ sóg ěprã ke fi kósĩn nĩ. Tá sóg krỹg ke mũ, Topê ví mranh tỹ věnh pãte fón ke tá. Sỹ tá krỹg mũ ven jé sóg ke mũ, ãjag mý,” he tóg. Hã ký tóg ãn grĩngrĩn ký nỹ ěn mý: ¹¹ “nĩ ra, ã kur gé(g) tĩg,” he mũ, Jesus ti.

¹² Ký tóg jěgně mũ sir, ã kur gég tóg mũ sir vãhã, ký tóg ag rĩnve tĩ mũ sir, ãn grĩngrĩn ký nỹ ja ěn ti.

Vãnh kar mý tóg e tĩ, ký ag tóg Topê to: “ěg jykre kãfór ti nĩ,” he mũ. “Ge ve ja tũ ěg nỹtĩ,” he ag tóg mũ sir.

Jesus tỹ Levi jé prěr

(Mt 9.9-13; Lc 5.27-32)

¹³ Ký Jesus tóg tĩg mãn mũ, goj nig tỹ Galiléia ra. Ký vãnh kar ag tóg ti pěnĩn vãnh mãn mãn mũ sir. Ký tóg ag kanhrãn mũ gé. ¹⁴ ã tĩg mãn ký tóg Levi vég mũ, Alfeu kósĩn. Governo mý imposto kaja mǎg ti tĩ, hã ra tóg ã rãnrãj han nĩ nĩ. Ký Jesus tóg ti mý: “ĩnh mrě kãtĩg,” he mũ. Ký tóg jěgně ký ti mrě tĩ mũ sir.

¹⁵ Ký tóg kejěn ti ĩn krěm jěg mũ, Jesus ti, Levi ĩn krěm. Hã ra ti mrě ag e nỹtĩ, governo mý jãnkamy mǎg tĩ ag, Topê ví mranh tĩ ag ke gé. Jesus mrě ag nĩgnĩg ký nỹtĩ, ti mrě mũ tĩ ag mrě ke gé. E tãvĩ ag nỹtĩ, ti nón mũ ag.

¹⁶ Hã ra Topê ví to professor ũ ag vỹ tỹ Fariseu nỹtĩ gé. Jesus vég ag tóg mũ, ti tỹ Topê ví mranh tĩ ag mrě jěn ký. Ký ag tóg Jesus mrě mũ tĩ ag mý ví mũ. “Tĩ hã ne tóg ag mrě jěg mũ” he ag tóg. “Governo

mỹ jänkamy mǎg tĩ ag mré tóg jĕg mũl,” he ag tóg, “Topĕ vĩ mranh tĩ ag mré ke gé,” he ag tóg.

¹⁷ Hǎ ra Jesus tóg mĕg mũ, ag vĕme ĕn ti. Kĩ tóg ag mỹ: “ũn kagyga tũ ag vĩ mĕdico venh mũ tũ nĩgtĩ,” he mũ. “Hǎ ra ũn kagyga ag hǎ vĩ ti venh mũ tĩ,” he tóg ag mỹ, Jesus ti. “Inh pi(jé) ũ tỹ vĕnh jykre kuryj han mũ ag mỹ: “ǎjag jykre tovǎnh nĩ,” he sór tĩ. Ũ tỹ Topĕ vĩ mranh ja nĩ ĕn ag hǎ mỹ sóg: “ǎjag jykre kórég tovǎnh nĩ,” he sór tĩ. Hǎ jé sóg ǎjag mỹ vĕnh ven,” he tóg ag mỹ, Jesus ti.

Vǎkre

(Mt 9.14-17; Lc 5.33-39)

¹⁸ Hǎ ra João mré mũ tĩ ag tóg kejĕn vǎkrég mũ, jĕg tũ ag nĩ, ag tỹ Topĕ mỹ há nỹtĩ jé. Kĩ Fariseu ag vǎkrég mũ gé. Kĩ ag tóg Jesus mỹ: “João mré mũ tĩ ag vĩ tóg vǎkrég mũ, Fariseu mré mũ tĩ ag ke gé,” he mũ. “Jo ǎ mré mũ tĩ ag ne tóg vǎkrég tũ nĩ. Vǎkre kurǎ vĕ mỹr,” he ag tóg ti mỹ, tá nỹtĩ ũ ag.

¹⁹ Kĩ Jesus tóg ag mỹ comparação han mũ. “Vĕnh kyprũg to kǎmũ ĕn ag pi(jé) vǎkrég tĩ,” he tóg. “Festa vĕ mỹr, vĕnh prũgprũg ti, kĩ ti mré ke ag tóg ũn prũg mũ ĕn venh kǎmũ tĩ,” he tóg. “Ge ti nĩ, inh mré mũ ag mỹ. Isỹ ag mré nĩn kĩ tóg ver ag mỹ sér tĩ,” he tóg ag mỹ, Jesus ti. ²⁰ “Vǎhǎ tóg jun mũ, inh kurǎ ti, kĩ ag tóg inh pére mũnh mũ, ĕn kǎ hǎ ag tóg ǎjag vǎkrenh ke venh mũ, kurǎ ĕn kǎ, inh mré mũ tĩ ag,” he tóg.

²¹ “Ti si fag pi(jé) vǎfe kygnej tũ tỹ kur si jar ki hyn han tĩ ja nỹtĩgtĩ. Ũn kygnej tũ tỹ ki hyn han mũ ra tóg jaran kenh mũ. Kĩ kur si jar ĕn tóg mǎg mũ. Ũn kygnej hǎ tỹ fag tóg ki han han tĩ, kĩ tóg jaran ke tũ nĩ,” he tóg, Jesus ti. Ti tỹ ǎ jykre tǎg tón hǎ vĕ, hǎ ra tóg kur kygnej tũ ri ke nĩ.

²² Kĩ tóg ag mỹ: “Kĩ vinho vĩ ge nĩgtĩ gé,” he mũ gé. “Ēg pi(jé) vinho kajǎg mũ tỹ ti fǎr si tỹ sacco ki kujĕg tĩ mỹr,” he tóg.

“Ke tũ nĩ (mũ) ra tóg kugnǎj kĩ jar mũ, kógnǎj kĩ. Kĩ vinho tóg tũ he mũ, sacco ti ke gé mỹr. Vinho kajǎ tỹ ti fǎr tǎg tỹ ki kujĕn ke vĕ mỹr,” he tóg. Jesus tỹ ǎ jykre tǎg tón hǎ vĕ.

Vĕnhkǎn ke kurǎ

(Mt 12.1-8; Lc 6.1-5)

²³ Kejĕn Jesus tóg ĕpỹ mĩ tĩ mũ, trigo kré mĩ. Ti mré mũ tĩ ag tóg ti mré mũ mũ. Vĕnhkǎn ke kurǎ vĕ. Ag mũ kĩ ti mré mũ tĩ ag vĩ trigo mugmó tỹ kam ke mũ, ko jé. ²⁴ Kĩ Fariseu ag tóg Jesus mỹ: “hǎ vé,” he mũ. “Ag tỹ ne jé ǎjag tỹ nĕn han ke tũ han nĕ, vĕnhkǎn ke kurǎ ki?” he ag tóg mũ. “Vĕnh rǎnhraj vĕ mỹr, ag tỹ trigo tỹ kam ke ti,” he ag tóg, Jesus mỹ.

²⁵ Kĩ tóg ag mỹ: “vó,” he mũ. “Davi tỹ nĕn han mũ to jykrĕn nĩ,” he tóg. “Ti kókĩr nĩn kĩ tóg ǎ tỹ nĕn han ke tũ han gé, ǎ mré mũ tĩ ag mré, hǎ ra Topĕ pi(jé) ti to jũ mũl, tag han tugrĩn, ha mĕ. ²⁶ Topĕ jo ĩn kǎra tóg rǎ, Davi ti, Abiatar tỹ Topĕ tũ ki rĩr tĩ to pǎi nĩn kĩ. Tá tóg Topĕ jamĩ ĕn kó, tỹ ti tỹ konh ke tũ ra, Topĕ tũ ki rĩr tĩ ag hǎ tỹ konh ke vĕ vĕ. Hǎ ra tóg kó, ti mré mũ ag mỹ tóg vĕnh ken gé, Davi ti,” he tóg, Jesus ti. “Rǎn kĩ tóg nĩ nĩ,” he tóg.

²⁷ Kĩ Jesus tóg ag mỹ: “Topĕ vĩ ĕg mỹ vĕnhkǎn ke kurǎ nĩm, ĕg tỹ ki vĕnhkǎn jé,” he mũ. “Hǎ ra tóg tỹ kurǎ kórég han tũ nĩ, vĕnhkǎn ke kurǎ tỹ,” he tóg. ²⁸ “Hǎ kĩ sóg tỹ vĕnhkǎn ke kurǎ to pǎi nĩ gé. Tỹ sóg ĕprǎ ke fi kósin nĩ mỹr,” he tóg ag mỹ, Jesus ti.

Jesus tỹ ũn nĩgĕ tóg tỹ há' he

(Mt 12.9-14; Lc 6.6-11)

3 Kejĕn Jesus tóg vĕnh kanhrǎn jafǎ ra rǎ mǎn mũ. Tá ũ tóg jĕ nĩ, ti nĩgĕ tóg tóg ja nĩ. ² Kĩ ag tóg ti tugnỹm mũ sir, “kema ĕg tỹ ti tỹ vĕnhkǎn ke kurǎ kǎ ti tỹ há' he ve jé,” he ag tóg mũ sir. Hǎ ra ag tóg pǎi ag mỹ ti tó sór mũ, ti tỹ vĕnhkǎn

ke kurā to Topē vī mranh kŷ. ³Hā ra Jesus tóg ũn nĭgē kórég ěn mŷ: “kunĭg,” he mŷ. ⁴Kŷ tóg ag mŷ: “vĕnhkán ke kurā ki ěg hŷn ne han mŷ?” he mŷ, “ěg tŷ Topē vī ki króm jé,” he tóg. “ěg mŷ hŷn nĕn ũ há han mŷ?” he tóg. “ěg tŷ ũ tŷ kókén kŷn mŷ kórég tŷ nĭnh mŷ?” he tóg ag mŷ. “ěg mŷ ũ kren han mŷ hŷn?” he tóg. “ěg tŷ ũ tĕn kŷn mŷ há nĭnh mŷ hŷn?” he tóg. Hā ra ag tóg ti mŷ katy tŷ sir.

⁵Kŷ tóg ag ki ěvānh kŷ jŷ mŷ sir, fe kaj tóg nŷ sir, ag krĭ tŷ nŷtĭn kŷ. “Ā nĭgē tŷ krŷg' hé,” he tóg ti mŷ, ũn nĭgē tóg ěn mŷ. Kŷ tóg tŷ krŷg' he mŷ sir, há' he tóg mŷ sir, vāhā, ũn nĭgē tóg ja ěn ti.

⁶Kŷ vāhā Fariseu ag mŷ mŷ sir, jagnĕ mré ti to jykrĕn jé, pā'i mág tŷ Herodes mré ke ag mré ke gé. “ěg hŷn hĕ ri ken kŷ ti tŷg mŷ?” he ag tóg mŷ, Jesus ti to.

Jesus tŷ goj nig fyr tá ag kanhrān

⁷Hā ra Jesus tóg ti mré mŷ tŷ ag mré goj nig tŷ Galiléia ra tŷ mŷ, vĕnh e tŷg ja ra. Hā ra vĕnh e ag tóg ti nón mŷ mŷ. Ga tŷ Galiléia tá ag tóg kāmŷ mŷ, ga tŷ Judéia tá ke gé, ⁸cidade tŷ Jerusalém tá, ga tŷ Iduméia tá, goj tŷ Jordāo mā tá, cidade tŷ Tiro tá, cidade tŷ Sidom tá ke gé. E tāvĭ ag nŷtĭ, e pĕ. Ti tŷ nĕn hŷn han kar mĕ kŷ ag tóg ti to kāmŷ mŷ. ⁹Kŷ Jesus tóg ti mré mŷ tŷ ag mŷ tó mŷ, ag tŷ ti mŷ canoa jāján jé. Ti kutān ag tóg, vĕnh kar ěn ti, hā kŷ tóg canoa to vī mŷ. ¹⁰Ũ tŷ hĕn ri ke tŷ há' he ja tóg nŷ, ũn kagyga ag tŷ, fag tŷ ke gé. Hā kŷ ag tóg ti kutān mŷ. Ag tŷ ti mĕ sór vĕ, ājag nĭgē tŷ. ¹¹Kŷ ũn jagrĕ kórég ag vŷ tá nŷtĭ gé. Ag tŷ Jesus ve kŷ ag tóg prĕnprĕr mŷ sir. “!..Tŷ ā Topē kósĭn ne..!” he ag tóg mŷ, prĕnprĕr kŷ. ¹²Kŷ Jesus tóg ag mŷ vī tar han tŷ. “Ker inh kāmĕn hĕ,” he tóg tŷ, ag mŷ.

Jesus tŷ ũ tŷ 12 (ke) ag vin

(Mt 10.1-4; Lc 6.12-16)

¹³Kejĕn tóg pānónh ra tŷ mŷ, Jesus ti. Kŷ tóg ag jé prĕr mŷ, ag kuprĕg kŷ. Kŷ ag tóg ti to mŷ mŷ. ¹⁴Kŷ tóg ũ tŷ 12 (ke) ag vin mŷ sir, ag tŷ tŷ ti mré mŷ tŷ nŷtĭ jé, ti tŷ ag jĕgnĕ jé ke gé, “Topē vī tó jé,” he tóg. ¹⁵Ag mŷ tóg vĕnh jykre nĭm mŷ, ag tŷ vĕnh jagrĕ kórég pan jé. ¹⁶Ũ tŷ 12 (ke) ag hā vĕ, ha mĕ: Simāo, Jesus tŷ ti jyjy ũ hā vŷ: Pedro, he mŷ, ¹⁷Tiago ke gé, ti jāvy tŷ João mré, Zebedeu krĕ tag ag. Jesus tŷ ag jiji ũ hā vŷ: Boanerges, he mŷ, ěg vī ki ke hā vŷ: ta tŷ tŷrŷrŷ he ri ke ag, he mŷ, ¹⁸André ke gé, Filipe ke gé, Bartolomeu ke gé, Mateus ke gé, Tomé ke gé, Tiago ke gé, Alfeu kósĭn tag ti, Tadeu ke gé, Simāo ke gé, ag tŷ ũ to: Zelote, he mŷ tag ti, ¹⁹Judas Iscariotes ke gé, ũ tŷ pā'i ag mŷ Jesus ven ke ti.

Topē vī to professor ag tŷ Jesus to vī kónān

(Mt 12.22-32; Lc 11.14-23; 12.10)

²⁰Kŷ Jesus tóg ag mré ā jamā tá jun mŷ. Kŷ vĕnh kar tóg sir tá vĕnh mĕn mŷ, kŷ tóg ag jĕn ke mŷ ra vĕnhmŷ tŷ, Jesus mré mŷ ag. ²¹Kŷ Jesus kanhkā fag vŷ ti vĕme mĕ kŷ ti kĕgmĭnh kāmŷ mŷ. “Krĭ vĕnhmŷ nŷ ve ti nŷ,” he fag tóg, hā kŷ fag tóg ti kĕgmĭ sór mŷ. Hā ra tóg fag mré ti tŷ nŷ.

²²Kŷ Topē vī to professor ag tóg tá jun jun mŷ gé. Jerusalém tá ag tóg kāmŷ jĕg, ti ve jé. Kŷ ag tóg ti to: “jagrĕ kórég ti hŷn nŷ,” he mŷ. “Hā kŷ tóg vĕnh jagrĕ kórég ag pā'i ěn jykre han mŷ, vĕnh jagrĕ kórég ag pan jé,” he ag tóg. “Belzebu jykre tŷ tóg ag pan mŷ, Nĕn-Kórég jykre tŷ,” he ag tóg, Jesus to, Topē vī to professor ag.

²³Kŷ Jesus tóg ag jé prĕr kŷ ag mŷ comparaçāo han mŷ, kŷ tóg: “Satanás vŷ vĕnh jagrĕ kórég pan tŷ nĭgtĭ mŷr,” he mŷ, Jesus ti. ²⁴“Pā'i pir krĕm ke ag tŷ

jagnē kato tēgtēn k̄y ag tóg jagnē k̄agtēn k̄ān ke m̄ū,” he tóg. ²⁵ “Īn pir k̄ā ki ke ēn fag t̄y jagnē kato tē k̄y fag tóg jagnē k̄agtēn k̄ān ke m̄ū gé,” he tóg. ²⁶ “Satanás krēm ke ag t̄y jagnē kato tē k̄y ag tóg jagnē t̄y t̄ū’ henh ke m̄ū gé, k̄y tóg t̄ū’ he m̄ū sir, Satanás ti,” he tóg. ²⁷ “Ēg t̄y ū t̄y nēn ū m̄ān sór k̄y, ti ĩn tá, k̄y Ēg tóg ti se vēn t̄i, ke t̄ū n̄i (m̄ū) ra tóg ā t̄ū ki r̄ir ke m̄ū, k̄y Ēg tóg ti t̄ū m̄ān t̄y hē ri kenh ke t̄ū n̄igt̄i, ti tar n̄in k̄y. Ēg t̄y ti se kar k̄y Ēg tóg ti t̄ū m̄āg m̄ū sir,” he tóg. “Ge ti n̄igt̄i, s̄y nēn han m̄ū ti. Tar ti n̄i, Japo ti, h̄a ra sóg hur ti sé, h̄a k̄y sóg ti t̄ū ag kygvāg m̄ū sir, ag jagrē kórég pan sóg m̄ū sir,” he tóg, Jesus ti.

²⁸ “S̄y ke há vē, h̄a k̄y sóg tó m̄ū,” he tóg. “Topē v̄y ājag m̄y vēnh p̄āte fón k̄ān m̄ū, ājag t̄y ti v̄i m̄ranh kar ēn t̄y, ājag t̄y ti kato v̄i kónān mré h̄a,” he tóg. ²⁹ “Jāvo ājag t̄y Topē kuprīg kato v̄i kónān k̄y tóg ājag m̄y vēnh p̄āte fón m̄ān ke t̄ū n̄i ha, Topē ti,” he tóg. “Ājag t̄y Topē v̄i m̄ranh ēn v̄y ājag h̄a k̄ā n̄i n̄i, kurā t̄ū ti n̄i,” he tóg, Jesus ti.

³⁰ Ag m̄y tóg ke m̄ū, Jesus ti, ag t̄y ti to: “jagrē kórég ti h̄yēn n̄i,” hen k̄y.

Jesus mré ke pē fag

(Mt 12.46-50; Lc 8.19-21)

³¹ K̄y ti m̄yñh fi tóg ti jāvy ag mré ti venh k̄āt̄i m̄ū. Re k̄ā fi jē ag mré, k̄y ag tóg ū jēnēg m̄ū, ti jé prēr jé. ³² Jesus pēn̄in vēnh e v̄y tóg n̄yt̄i, n̄ign̄ig k̄y, k̄y ag tóg: “ha mē, ā m̄yñh fi v̄y re k̄ā jē, ā jāvy ag mré,” he m̄ū. “Fag t̄y ā mré vēmēn sór vē. Ā jé prēr fag tóg m̄ū,” he ag tóg ti m̄y.

³³ H̄a ra Jesus tóg: “inh m̄yñh fi m̄y inh ve sór m̄ū, inh jāvy ag mré?” he m̄ū. “Inh m̄yñh fi vē vē, inh jāvy ag vē vē, h̄a ra ag tóg t̄y inh mré ke pē t̄ū n̄yt̄i,” he tóg. ³⁴ K̄y tóg ūn n̄ign̄ig k̄y n̄yt̄i ag ki ēvānh k̄y tóg: “inh m̄yñh fi h̄a vē, inh jāvy ag h̄a vē gé,” he m̄ū. ³⁵ “Ū t̄y Topē v̄i han m̄ū ēn ag v̄y t̄y inh jāvy n̄yt̄i, inh

ve fag ke gé, inh m̄yñh ke gé,” he tóg ag m̄y, Jesus ti.

Nén fy to comparação

(Mt 13.1-9; Lc 8.4-8)

4 Kejēn Jesus tóg goj nig t̄y Galiléia fyr tá ag kanhr̄ān m̄ān m̄ū. H̄a ra vēnh e v̄y ti pēn̄in n̄yt̄i, vēnh e tāv̄i, h̄a k̄y tóg canoa k̄āra r̄ā m̄ū, goj k̄āki, k̄y tóg canoa k̄āk̄ā n̄i m̄ū, h̄a ra ag kar v̄y tar tá vēnh m̄ān k̄y n̄yt̄i, nig fyr tá. ² Ag m̄y tóg vēnh v̄i e tó m̄ū, comparação han k̄y. ³ K̄y tóg kejēn ag m̄y: “ha mē,” he m̄ū. “Ū tóg nēn ū fy krigkrig t̄i m̄ū,” he tóg. ⁴ “Ti t̄y krigkrig k̄y ti fy ū tóg ěm̄in kri kutē m̄ū, ěp̄ry kri. K̄y sēs̄i tóg ti ko m̄ū sir. ⁵ Ti fy ū tóg p̄ārō kri kutē m̄ū, ga e t̄ū ki, k̄y tóg k̄ānhmar mur m̄ū vē, ga s̄i ēn ki. ⁶ H̄a ra r̄ā tóg ā t̄y ěg n̄ino k̄ā sa k̄y (tóg) ti p̄ūn m̄ū. Ti jāre han t̄ū n̄in k̄y tóg tóg m̄ū. ⁷ Ti fy ū tóg sónh k̄āki kutē m̄ū, k̄y sónh tóg ti mré mur m̄ū, ti kri r̄ūm tóg m̄ū sir k̄y tóg kanē han t̄ū n̄i. ⁸ Ti fy ū tóg ga há kri kutē m̄ū k̄y tóg mur há han m̄ū, mog há han tóg m̄ū, kanēn ha han tóg m̄ū gé, ū tóg kanē t̄y 30 (ke) han, jo ū v̄y kanē t̄y 60 (ke) han, jo ū v̄y kanē t̄y 100 (ke) han. ⁹ Ū n̄igrēg n̄yt̄i t̄y t̄y jēmē jé,” he tóg, Jesus ti.

Jesus t̄y nēn fy to comparação kāmēn

(Mt 13.10-23; Lc 8.9-15)

¹⁰ Ūn e ēn ag m̄ūn kar k̄y ti mré n̄yt̄i ag tóg ti ki jēmēnh kām̄ū m̄ū, nēn fy kāmēn ti. K̄y ag tóg ti m̄y: “ā t̄y ěg m̄y ne tó nē?” he m̄ū.

¹¹ K̄y tóg ag m̄y: “ājag h̄a tóg Topē t̄y t̄y ěg pa’i n̄i ki kanhrō n̄yt̄inh m̄ū, ijo tó ja t̄ū ēn ki,” he m̄ū. “H̄a ra sóg ēn ag m̄y comparación tāv̄i han m̄ū. ¹² Ag m̄y sóg tó há han ke t̄ū n̄i, ón k̄y mēg m̄ū ag m̄y, k̄y ag tóg ājag t̄y vэг m̄ū ra ki kagt̄ig n̄yt̄i, ājag t̄y mēg m̄ū ra ag tóg to jykrēn t̄ū n̄yt̄i, k̄y ag tóg Topē ki ge t̄ū n̄yt̄i gé, k̄y Topē tóg ag m̄y vēnh p̄āte fón ke t̄ū n̄i gé,” he tóg, Jesus ti, ū ag to.

¹³ Kĩ tóg ag mĩ: “ājag tĩ to jykrén tũ tóg tĩ,” he mũ, “sĩ ājag mĩ nén fy kāmén kĩ,” he tóg. “Kĩ ti mĩ ājag tĩ ũ to jykrén há nĩnh mũ, sĩ ājag mĩ comparação ũ han kĩ?” he tóg.

¹⁴ Kĩ tóg jamā hár(a) ag mĩ kāmén mũ. “Ũ tóg nén fy vāvām tĩ, kĩ ti tĩ Topē vĩ tó vễ, hã vỹ: vāvām, he mũ, nén fy ri ke vễ,” he tóg. ¹⁵ “Ti fy ũ vỹ ěmĩn kri kutē mũ. Kĩ Topē vĩ mềg mũ ũ ag vỹ ěpĩy ri ke nỹtĩ,” he tóg. “Ag tĩ Topē vĩ mềg mũ ra tóg ag mĩ tĩ tũ’ he mũ, Satanás tĩ, Topē vĩ tĩ. Vēsỹmér tóg ag mĩ tĩ tũ’ he mũ, ag mĩ Topē vĩ tó tĩ. Kĩ ěmĩn ri ke vễ sir. ¹⁶ Hã ri ken hã vễ gé, ti tĩ pǎró kri vāvām ěn ti. Ag tĩ Topē vĩ mề kĩ ag tóg vēsỹmér: hej, he mũ sir. Ag mĩ tóg sér tĩ. ¹⁷ Hã ra ag tóg nén kré jǎre tũ ri ke nỹtĩ, kĩ ag tóg mũ sĩ han mũ, Topē mré. Nén ũ jagy kutē kĩ ag tóg sir Topē tovǎnh mũ vēsỹmér, ũ tĩ Topē tugrĩn ag kato tề kĩ. ¹⁸ Ti tĩ sỏnh kǎki vǎm ěn hã vễ gé, hã vỹ tĩ Topē vĩ mềg mũ ag nỹtĩ gé. ¹⁹ Hã ra ag tóg ājag rǎnhrǎj hã mĩ ěkrég mũ, ón kĩ rico nĩ sỏr jé. Nén ũ kar to ag ěn, hã kĩ Topē vĩ tóg ag mĩ katy’ he mũ sir. Kĩ ag tóg kanē há han tũ nĩ. ²⁰ Hã ra ti tĩ ga há kri vāvām mũ ěn vỹ tĩ Topē vĩ mềg mũ ag nỹtĩ gé. Hej, he ag tóg mũ sir, kanē há han ag tóg mũ, ũ tóg kanē tĩ 30 (ke) han mũ, ũ tóg kanē tĩ 60 (ke) han mũ, ũ tóg kanē tĩ 100 (ke) han mũ,” he tóg, Jesus ti, ag mĩ.

Jěngrě to comparación

(Lc 8.16-18)

²¹ Kĩ Jesus tóg ag mĩ: “ĕg pi(jé) néj gru ma kāmũ kĩ kěj krēm fềg tĩ, ĕg pi(jé) cama krēm fềg tĩ,” he mũ. “Ti fềg jafǎ kri ĕg tóg fềg tĩ. ²² Hã kĩ ĕg tĩ nén vэг tũ ěn vẻnh ven kǎn ke vễ, hã jé tóg ver pẻju kĩ nĩ. ĕg tĩ nén ki kagtũ ěn vẻnh ven kǎn ke vễ,” he tóg. ²³ “Ũn nĩgrẻg nỹtĩ tĩ tĩ jẻmẻ jẻ,” he tóg.

²⁴ “Hã kĩ jẻmẻ há han,” he tóg. “Ājag mrẻ ke ag jykre tugnỹm ājag tóg tĩ, kĩ

ājag tóg ag mĩ vĩ tar han tĩ. Kĩ Topẻ vỹ ājag mĩ vĩ tar han ke mũ gé, ājag tĩ ājag mrẻ ke ag jykre ri ke nỹtĩn kĩ. Hã ra tóg ājag mĩ vĩ tar kǎfỏr han ke mũ, ha vẻmnĩ,” he tóg. ²⁵ “Ũ tĩ nén ũ to jykrén há han kĩ tóg ũ to jykrén mǎn’, ũ to jykrén mǎn’, he mũ sir. Ũ tĩ nén ũ to jykrén há han tũ nĩn kĩ tóg ti mĩ tũ’ he mũ sir, ti tĩ nén to jykrẻn sĩ han mũ ra,” he tóg, Jesus ti.

Nén krẻ to comparación

²⁶ Kĩ Jesus tóg ag mĩ: “Topẻ tĩ tĩ ĕg pǎi nĩ vỹ ge nỹnh mũ, ha mẻ,” he mũ. “Ũ vỹ nén ũ fy vāvām tĩg mũ, ĕpỹ ki,” he tóg. ²⁷ “Ũ tĩ vāvām mũ vỹ nử mũ sir, kutyg kĩ, tĩ vaj kĩ tóg rửr mǎn mũ sir. Hã ra ti fy ěn vỹ mur mũ, mog tóg mũ, jo ũ tĩ vāvām mũ tóg ki kagtĩg nĩ. “Ti hẻ ri ken kĩ mur?” he tóg. ²⁸ Jǎvo tóg vẻsỏg ki mog, kar tóg mó han, kĩ vǎhǎ ti kanẻ vẻ sir, ti mó kǎki. ²⁹ Ti kanẻn kar kĩ tóg ag mĩ: “ha kre jafǎ va kāmũ jẻg,” he mũ sir. Kĩ ti krenh ke kurǎ vẻ sir. Topẻ tĩ tĩ ĕg pǎi nĩ ri ken hã vễ,” he tóg, Jesus ti, ǎ kǎtĩg mǎn ke tón kĩ.

Ka tĩ mostarda fy to comparación

(Mt 13.31-32, 35; Lc 13.18-19)

³⁰ Kĩ Jesus tóg: “inh hỹn tóg tag tónh mũ ha, sĩ Topẻ tĩ tĩ ĕg pǎi nĩ kāmẻn jẻ,” he mũ. ³¹ “Ka tĩ mostarda fy ri ke ti nĩ, Topẻ tĩ tĩ ĕg pǎi nĩ ti,” he tóg. “Ti krǎn ĕg tóg tĩ, ĕg japỹ ki. Kǎsir ti nĩ, ti fy ti. Ũ fy vỹ ti sĩ ri ke tũ nỹtĩ. ³² Ti krǎn kar kĩ tóg mog mũ, kĩ tóg ĕgỏho kar kǎfỏr nĩ. Pẻ mǎg ti nỹtĩ, hã kĩ sẻsẻ ag vỹ kǎki krẻg tĩ, ti fẻnja ki,” he tóg, Jesus ti.

³³ Comparǎo tĩ hẻn ri ke hyn han tóg, ag mĩ Topẻ vĩ tón ki, ag tĩ to jykrẻn sỏr kĩ. ³⁴ “Tag vỹ ge nỹnh mũ,” he hã han tóg ag mĩ, Jesus ti. Ag mĩ tóg jamā hár(a) nén ũ tó tũ nĩ, ũn e ag mĩ. Hã ra tóg ǎ mrẻ mũ tĩ ag mĩ kāmẻn há han mũ, ag pin kĩ.

Jesus tỹ kóho tỹ tũ he

(Mt 8.23-27; Lc 8.22-25)

³⁵ Hã tỹ kuty tá tóg ag mỹ: “mũ nỹ, goj nig kafã ù ra,” he mũ.

³⁶ Hã kỹ ag tóg vênh e ẽn ré kỹ mũ mũ sir, canoa kãmĩ, Jesus tỹ kākã nĩn kỹ. Hã ra ù ag tóg ti mré mũ mũ gé, canoa ù kãmĩ. ³⁷ Hã ra kākã tar tãvĩ vỹ tóg vãhã krog he mũ, kóho ti. Kỹ goj tóg canoa kākĩ krém krém ke mũ. Ti fãn sór tóg mũ sir. ³⁸ Hã ra Jesus tóg nữ nỹ, fakrĩnh kỹ, canoa nér tá. Kỹ ag tóg ti rĩn kỹ ti mỹ: “Senhor,” he mũ. “Èg mỹ èg kãgter ha mẽ tóg tí. Mỹ ã mỹ tỹ nén ù tũ?” he ag tóg ti mỹ.

³⁹ Kỹ tóg rĩr mũ sir, kỹ tóg kóho mỹ vĩ tar han mũ, ti mỹ: “krỹg he ra,” hen kỹ. Kỹ kóho tóg tũ he mũ, katy' he tóg mũ. ⁴⁰ Kỹ tóg ag mỹ: “ãjag tỹ ne jé kanẽ jur nẽ?” he mũ. “Ãjag mỹ inh ki rã há han tũ?” he tóg ag mỹ. ⁴¹ Kỹ tóg ag mỹ e (pẽ) tãvĩ tĩ sir. Jagnẽ mỹ ag tóg: “ti jykre tóg èg mỹ e tĩ,” he mũ. “Kóho vỹ ti vĩ han, goj ti ke gé,” he ag tóg.

Jesus tỹ vênh jagrẽ kórég tỹ mil ag pan

(Mt 8.28-34; Lc 8.26-39)

5 Kỹ ag tóg goj nig kafã ù tá junjun mũ sir, Gerasa tá ke ag tá. ² Jesus tỹ canoa ki vag ke mũ ra ù tóg ti kato tẽ mũ. Jagrẽ kórég ti nĩ. Vênh kej tá tóg kãkutẽ mũ. ³ Tá tóg ẽmã nĩ, vênh kej tá. Ag tỹ ti ség mũ ra tóg vênh mỹ nĩ, ferro mré hã. ⁴ Ti se tỹ hẽn ri ke han ja ag tóg nĩgtĩ vẽ, ti nĩgé, ti pẽn ke gé, ferro tỹ. Hã ra tóg ferro tỹ kam ke ja nĩgtĩ, ã pẽn se ja ti mrynhmranh kãn ja tóg nĩgtĩ. Ag tỹ ti kanhrãn ke mũ ra ag tóg ti tỹ hẽ ri ke ja tũ nĩgtĩ. ⁵ Kuty ki kurã mré tóg prẽr tĩgtĩ, vênh kej ki. Pãró ẽn ki pó génh kỹ tóg vêsãnh tĩgtĩ. ⁶ Ti tỹ kuvar há tá Jesus ve kỹ tóg ti to vênhvãg tĩ mũ, kỹ tóg ti krêm

grĩnh ke mũ. ⁷ Jamã hár(a) tóg prẽr mũ, kỹ tóg: “!..ã isỹ hẽ ri kenh mũ, Jesus'..!” he mũ, “!..kynhmỹ Topẽ kósĩn'..!” he tóg. “!..Ã mỹ sóg to vĩnh mũ, ã tỹ inh vóg kónãn tũ nĩn jé, kỹ Topẽ vỹ inh vĩ mẽg mo..!” he tóg. ⁸ Hã ra Jesus tóg ti mỹ: “ti tovãnh ra, Nén-Kórég’,” he ja nĩ.

⁹ Kỹ Jesus tóg ti mỹ: “ã jỹjy hẽ ri ke tĩ,” he mũ. Kỹ tóg: “Mil,” he mũ. “E tãvĩ èg nỹtĩ,” he tóg, Nén-Kórég ti.

¹⁰ Kỹ tóg to vĩ, to vĩ, he mũ, Jesus tỹ ẽmã ẽn ki ti kutẽm tũ nĩ jé.

¹¹ Hã ra ag mẽg tỹ porco ag tóg jẽg nỹtĩ, pãnónh ẽn kri. ¹² Kỹ Nén-Kórég ag tóg Jesus mỹ: “ag mẽg to èg jẽgnẽ, èg tỹ ag kākĩ ge jé,” he mũ.

¹³ Kỹ tóg ag mỹ: “hej,” he mũ. Kỹ Nén-Kórég ag tóg ẽn ti tovãnh mũ sir, porco ag ki ge ag tóg mũ sir. Kỹ ag tóg re mũ sir, porco ag. Rãn ki ag tóg re mũ, kỹ ag tóg nỹgnỹr kãn mũ sir, goj nig ki. Kãgter kãn ag tóg mũ. Porco tỹ mil régre ag vẽ, hỹn.

¹⁴ Kỹ porco ki rĩr tĩ ag tóg sir pêtẽ mũ, cidade ra. Tá ag tóg kãmén kãn mũ, Nén-Kórég tỹ jagrẽ ja ẽn ti. Kỹ ag tóg Jesus to mũ kãn mũ sir, nén ẽn ve jé. ¹⁵ Jesus tá ag tóg junjun mũ sir, kỹ ag tóg ùn jagrẽ kórég ja ẽn vэг mũ, kur tu kỹ. Krĩ há' he tóg mũ, ù tỹ mil tỹ jagrẽ kórég ja ẽn ti. Kỹ ag fe tóg jũrũn ke mũ. ¹⁶ Kỹ ù tỹ vэг mũ ag tóg kãmén mũ sir ag mỹ Ùn jagrẽ kórég ja tĩ, porco ag. ¹⁷ Hã kỹ ag tóg Jesus mỹ to vĩ mũ, ti tỹ tá kutẽ jé, ag rã hã nĩ tũ nĩ jé.

¹⁸ Ti tỹ canoa kākĩ rã kỹ ùn jagrẽ kórég ja tóg: “nhỹ ã mré tĩg mũ,” he mũ, Jesus mỹ. ¹⁹ Hã ra tóg ti mỹ nenh. “Ha tĩg, ã ãn ra, ã tỹ ã mré ke ag mré nĩ jé,” he tóg ti mỹ. “Ag mỹ kãmén nĩ, èg jóg mág tỹ ã tỹ há' he mũ ti, ti tỹ ã jagãgtãn mũ ti,” he tóg ti mỹ. ²⁰ Kỹ tóg tĩ mũ. Ẽmã tỹ 10 (ke) ki ga tá tóg kãmén mũ, Jesus tỹ ã tỹ há' he ti. Kỹ tóg ag kar mỹ e tĩ.

Jairo tỹ Jesus mỹ ã kósín fí to vĩ

(Mt 9.18-19; Lc 8.40-42)

²¹ Kĩ Jesus tóg kafã ra tĩg măn mũ, canoa kãmĩ. Kĩ vênh e tóg ti jo vênh măn mũ. Hã ra tóg goj nig fyr tá jẽ nĩ. ²² Kĩ ù tóg kãtĩ mũ, ti jiji hã vỹ: Jairo, he mũ. Judeu ag vênh kanhrãn jafã to tóg tỹ pã'i nĩ. Ti tỹ Jesus ve kỹ tóg ti krêm mũg ke mũ. ²³ Ti mỹ tóg: “inh kósín sĩ fi vỹ tũg sór mũ,” he mũ. “Kunĩg, ã tỹ ã nĩgẽ tỹ fi mẽ jé, fi tỹ há' he jé, fi kren jé,” he tóg. ²⁴ Kĩ tóg ti mré ti mũ. Hã ra ùn e ag tóg ti nón mũ kỹ ti kutãn mũ.

Ủn tỹtá kaga fi

(Mt 9.20-22; Lc 8.43-48)

²⁵ Jo ùn tỹtá ù fi tóg tá nĩgtĩ. Kyvénh krỹg tũ han kỹ fi tóg nĩ, prỹg tỹ 12 (ke) ki. ²⁶ Médico ag tỹ fi vēsỹrénh mág han, to fi tóg ã tỹ nén vãm kãn, hã ra fi tóg há' he tũ nĩ, ke han han fi tóg. ²⁷ Hã ra fi tóg Jesus kãme mẽ ja nĩgtĩ, kỹ fi tóg vênh e kãmĩ tũg kỹ ti nón ti kur mễg mũ sir. ²⁸ “Sỹ hên ri ke mũn ti kur mẽ kỹ inh hỹn han mũ,” he fi tóg.

²⁹ Fi tỹ ti kur mẽ kỹ fi kyvénh tóg gym ke mũ sir vãhã, kỹ fi tóg ki kanhró nĩ, fi kaga tỹ há' he ên ki. ³⁰ Hã ra Jesus tóg ã fe tỹ ki kanhró nĩ, ã jykre kutẽ ên ki. Kĩ tóg vênh e kãki vĩrĩn ke mũ sir. “Ủn nỹ inh kur mẽ?” he tóg.

³¹ Kĩ ti mré mũ ti ag tóg ti mỹ: “vênh kar tỹ ã kutãn vẽ,” he mũ. “Jo ã tóg: ù nỹ inh kur mẽ? he mũ,” he ag tóg ti mỹ. ³² Kĩ tóg tãmĩ ẽvãnh mũ, ù tỹ ã mễg mũ fi ve jé. ³³ Hã ra ùn tỹtá fi tóg ki kanhró nĩ, fi han mũn ki. Kĩ fi tóg kamễg kỹ, jũrũn ke kỹ mũg ke mũ, ti krêm. Kĩ fi tóg ti mỹ kãmén kãn mũ sir.

³⁴ Hã ra tóg fi mỹ: “inh kósín,” he mũ. “Ã tỹ inh ki rã kỹ ã tóg há' hé,” he tóg. “Ha tũg, jatun mỹ, ã han vẽ ha,” he tóg, fi mỹ.

Jairo kósín fí rĩr măn

(Mt 9.23-26; Lc 8.49-56)

³⁵ Ti tỹ ver fi mré vēmén jẽ ra ù ag tóg tá junjun mũ, pã'i tỹ Jairo ên ìn tá. “Ã kósín fi vỹ hur ter,” he ag tóg. “Tũg ja fi tóg nĩ ha,” he ag tóg. “Hã kỹ ti mỹ: kunĩg, he măn tũg nĩ, ti kutãn măn tũg nĩ,” he ag tóg, Jairon mỹ.

³⁶ Hã ra Jesus tóg mễg mũ, kỹ tóg: “kamễg tũg nĩ, inh vĩ hã kri nĩmĩ,” he mũ, pã'i ên mỹ. ³⁷ Kĩ tóg ùn e ag tỹ ti ìn ra mũ kamễg. “Pedro vỹ tũg mũ inh mré, Tiago ke gế,” he tóg, “Tiago jãvy tỹ João ke gế,” he tóg.

³⁸ Ag tỹ Jairo ìn tá junjun mũ ra Jesus tóg vênh e vếg mũ sir, kygfỹ mũ fag, vēsỹrénh jagy han mũ fag. ³⁹ Kĩ tóg kã rã kỹ fag mỹ: “ãjag tỹ ne jé kygfỹ nẽ, ãjag tỹ ne jé vēsỹrénh nẽ?” he mũ. “Ter tũ fi nĩ, nũr fi nỹ nĩ,” he tóg.

⁴⁰ Hã ra fag tóg ti nyg mũ. Hã ra tóg fag pan mũ sir, kỹ tóg fi panh mré, fi mỹnh fi mré fi vênh tĩ mũ, ti mré kãmũ mũ ag mré. ⁴¹ Fi nĩgẽ kãgmĩ kỹ tóg fi mỹ: “talítá cumi,” he mũ. Êg vĩ ki ke vẽ, hã vỹ: nĩ ra, jỹ, he mũ.

⁴² Kĩ vãhã gĩr fi tóg nĩ mũ sir, kãnẽ tĩ fi nĩ sir. Kri prỹg tỹ 12 (ke) fi nĩ. Kĩ tóg ag mỹ e tãvĩ tĩ. ⁴³ Hã ra tóg ag mỹ vĩ tar han, ag tỹ ù mỹ tó tũg jé. “Ha fi mỹ vễjên ven,” he tóg. Hã ra tóg fi ter kỹ nỹ ra fi rĩn măn.

Jesus jamã tá ke ag tỹ ti to é he

(Mt 13.53-58; Lc 4.16-30)

6 Kĩ Jesus tóg tá kãkutẽ kỹ ã jamã tá jun mũ sir. Ti mré mũ ti ag tóg ti mré mũ mũ gế. ² Vênhkãn ke kurã ki tóg ag vênh kanhrãn jafã ki ag kanhrãn mũ. Ag tỹ ti vĩ mẽ kỹ tóg ag mỹ e tĩ. “Hẽ tán hỹn ki kanhrãn, vênh jykre tag ti ki? Ủn nỹ hỹn ti kanhrãn?” he ag tóg, ti jamã tá ke ag. “Êg tỹ nén han vãnh hỹn han tóg tũgtĩ,” he ag tóg. ³ “Ìn han tĩ ên vẽ mỹr,” he ag tóg. “Maria fi kósín vẽ mỹr, Tiago

kāke, José, Judas, Simão kāke, kŷ ti ve fag vŷ ěg mré nŷtĩ gé mŷr. Ti tŷ ne jé tŷ ěg kāfór nĩ sór nê?” he ag tóg. Kŷ tóg ag mŷ tŷ ũ nŷ.

⁴Kŷ Jesus tóg ag mŷ: “ěmā ũ tá ke ag tóg Topê vĩ tó tĩ to é he tũ nĩgtĩ mŷr,” he mŷ. “Tĩ jamā tá ke ag tóg ti to é he tĩ jăvo, ti mré ke ag, ti kanhkā ag,” he tóg. ⁵Kŷ Jesus tóg tá nén ũ han tũ nĩ sir. Ũn kaga pipir ag hā tŷ há’ he tóg, ā nĩgé tŷ ag mē kŷ. ⁶Ag tŷ ti ki ge tũ tóg ti mŷ e tĩ, ti jamān ki. Kŷ tóg ěmā kāsir mĩ tĩg kŷ ag kanhrān tĩ nĩ sir.

Jesus tŷ ũ tŷ 12 (ke) ag jĕgnĕ

(Mt 10.5-15; Lc 9.1-6)

⁷Kŷ Jesus tóg ũ tŷ 12 (ke) ag jé prĕr mŷ. Kŷ tóg ag mŷn mŷ, ũn régre tĩn', ũn régre tĩn' he tóg. Ag mŷ tóg vĕnh jykre nĩm mŷ, ag tŷ vĕnh jagrĕ kórég pan mŷ jé. ⁸Kŷ tóg ag mŷ: “ājag mŷn kŷ pāo ma mŷ tũg nĩ,” he mŷ, “bolsa ke gé, jänkamy ke gé,” he tóg. ⁹“Vátó hā va mŷmni, kátó ti, pĕ né ke gé, pĕn to ró ti,” he tóg. ¹⁰Kŷ tóg ag mŷ: “ājag tŷ ěmā ũ tá jun kŷ, ājag tŷ ĩn ra rā mŷ hā ki nũgnũr hemnĩ,” he mŷ, “hā ki ājag tŷ kurā ki panh ke mŷ ěn tá krŷgkrŷg nĩ,” he tóg. ¹¹“ěmā ũ tá ke ag tóg kejĕn ājag mŷ: kăgemni, henh ke tũ nĩ, ag tŷ ājag vĩ mē jăvānh nŷtĩn kŷ. Kŷ ājag pĕn hā kykũnh nĩ, ājag tŷ tá pa kŷ,” he tóg, “ag tŷ ve kŷ to ki kanhró nŷtĩ jé, Topê tŷ ag mŷ: vó', he ti,” he tóg ag mŷ. “Ha mē, ki hā sóg tó mŷ. Kurā tŷ ěgno ki, isŷ vĕnh kar jykre tugnŷm ke kurā ěn ki ag tóg jagăgtar nŷtĩnh mŷ, ag tŷ ājag vĩ jĕmē jăvānh nŷtĩn kŷ,” he tóg, Jesus ti.

¹²Kŷ ag tóg mŷ mŷ sir, ũ tŷ 12 (ke) ag. “Ājag jykre tovānh nĩ,” he ag tóg mŷ, vĕnh kar mŷ. ¹³Vĕnh jagrĕ kórég pan ag tóg mŷ, ha mē. Ũn kagyga ag to tĩn ag tóg mŷ, azeite tŷ, kŷ ag tóg tŷ há' he kân mŷ sir.

João Batista ter

(Mt 14.1-12; Lc 9.7-9)

¹⁴Kŷ pā'i mág tŷ rei tóg Jesus kâme mĕg mŷ sir. Vĕnh kar vŷ ti kâmén tĩ, hā kŷ tóg mĕg mŷ. Pā'i mág tŷ rei ěn jijin hā vŷ: Herodes, he mŷ. Kŷ tóg: “João hŷn (tóg),” he mŷ, “ũ tŷ ag kygpég tĩ ěn ti,” he tóg. “Ā ter jan tán hŷn vŷn kĕ,” he tóg. “Hā kŷ tóg ěg tŷ nén han vānh kar ěn hŷn han ti,” he tóg, Jesus to, Herodes ti.

¹⁵Hā ra ũ tóg Jesus to: “Elias vĕ,” he mŷ. Kŷ ũ tóg: “Topê vĩ tó tĩ vĕ, vāsŷ Topê vĩ tó tĩ ag ri ke vĕ,” he mŷ gé.

¹⁶Hā ra Herodes tóg ti kâme mē kŷ: “João hŷn ā ter ja tá vŷn kĕ, sŷ ũn krĩ kym ja ěn ti,” he mŷ.

¹⁷Herodes vŷ João se ja nĩ, vĕse jafā kăki tóg ti fón ja nĩ, Herodias fi tugrĩn. Tŷ fi Filipe prũ fi nĩ, ti jăvy, hā ra tóg ti tŷ prũg mŷ, Herodes ti.

¹⁸Kŷ João tóg Herodes mŷ: “ā hā ne tóg ā mré ke prũ fi tŷ prũg mŷ,” he ja nĩ. “Fi ki ā tóg Topê vĩ mranh mŷ,” he ja tóg nĩ, João ti, Herodes mŷ. ¹⁹Tag to Herodias fi tóg ti to kórég nĩ, ti tén ke to fi tóg jykrĕn nĩgtĩ, hā ra fi tóg ti tŷ hē ri ke tũ nĩ, ²⁰Herodes tŷ ti kamĕg kŷ. João vŷ tóg tŷ ũn jykre kuryj nĩ. Topê jykre hā han tóg ti. Hā kŷ Herodes tóg ti jy nĩgān tĩ, ti tŷ ti jykre há ki kanhró nĩn kŷ. João vĩ tóg ti mŷ vĕnhmŷ tĩ, ge ra tóg ti mŷ mē há tĩ, Herodes mŷ.

²¹Kejĕn tóg fi mŷ ti tén ke ki króm ke mŷ. Herodes tóg ā mur ja kurā ěn ki festa mág han mŷ, tenente ag mŷ, soldado ag pā'i ag mŷ ke gé, ũn rico ag mŷ ke gé, Galiléia tá ke ag mŷ.

²²Kŷ Herodias fi kósĩn fi tóg ag jo vĕnh gringrĕn mŷ, hā ra tóg ag mŷ sĩ tăvĩ tĩ, Herodes mŷ, ti mré nŷtĩ ag mŷ ke gé, ti mré jĕg mŷ ag mŷ. Kŷ tóg fi mŷ: “ā tŷ nén to vĩ mŷ tŷ sóg ā mŷ nĩm mŷ,” he mŷ. ²³Fi mŷ tóg: “sŷ ke há vĕ,” he mŷ. “Ā tŷ nén to vĩ mŷ kar nĩm jé sóg ke mŷ,

isỹ nén kar kuju mré hã,” he tóg, tátãg fi mĩ.

²⁴ Hã ra fi tóg ã mýnh fi to tĩ mũ sir. “Inh hýn ne to vính mũ?” he fi tóg mũ, ã mýnh fi mĩ. Kĩ fi tóg: “João krĩ to vĩmnĩ,” he mũ, “ũ tỹ ag kygpég tĩ ên krĩ to,” he fi tóg, ã kósín fi mĩ, Herodias fi.

²⁵ Kĩ fi tóg vèsýmér pã'i mág ên to vênhvãg tĩ mũ. “Inh mĩ ùri João Batista krĩ nĩm, pénky kãkã,” he fi tóg mũ.

²⁶ Kĩ Herodes tóg fe kaj mág han mũ sir. Hã ra tóg fi mĩ: “sỹ ke há vè,” he ja nĩ, hã kỹ tóg fi mĩ han sór mũ, ti mré nýtĩ ag tỹ mē kãn ja nĩn kỹ. ²⁷ Hã kỹ tóg polí-cia ù jēnēg mũ, ti tỹ ti krĩ ma kãtig jé. Kỹ tóg ti krĩ kym mũ sir, vèse ja kãtã. ²⁸ Kỹ tóg ti krĩ ma kãtĩ mũ sir, pénky kãkã nĩm kỹ. Kỹ tóg fi mĩ nĩm mũ, tátãg fi mĩ. Kỹ fi tóg ã mýnh fi mĩ ma kãtĩ mũ, Herodias fi mĩ.

²⁹ Kỹ João mré mũ tĩ ag tóg ti vènh mũ mũ, ti ter mē kỹ. Kỹ ag tóg ti há va mũ mũ, vènh kej ra. Tá ag tóg ti péju mũ sir.

Jesus tỹ ù tỹ 5 mil (ke) ag jên

(Mt 14.13-21; Lc 9.10-17; Jo 6.1-14)

³⁰ Kejēn Jesus tỹ ùn vin mũ ag tóg Jesus to vỹnvỹn ke mũ, ti mĩ kãmén jé, ag tỹ vènh kar mĩ nén tó ja ên ti, ag tỹ nén ù han mũ kar ên ke gé. ³¹ Kỹ tóg ag mĩ: “mũ nỹ, êg pir mĩ êmã tũg ja ra mũ jé, êg vènhkãn sĩ han jé,” he mũ. Kãmũ ag tóg nỹ nĩ, e ag tóg tĩ ha, kỹ tóg ag jên ke mũ ra vènhmỹ tĩ sir. ³² Kỹ ag tóg canoa kãmĩ mũ mũ sir, êmã tũg ja ra, ãjag pir mĩ.

³³ Hã ra ùn e ag tóg ag mũ ve kỹ ag ki kanhrãn mũ, kỹ ag tóg ãjag pēn kã ag jy pētē mũ, êmã kar tá kãmũ kỹ. Ag jo ag tóg tá junjun mũ sir, vènh e ên ti. ³⁴ Jesus tỹ tá jun kỹ tóg sir ùn e ag vég mũ, kỹ ag tóg ti mĩ jagtar nýtĩ. Ti mĩ ag tóg tỹ êg mēg tỹ mé, êg mēg tỹ carneiro ri ke nýtĩ. Û tỹ êg mēg ki rĩr tũ nĩn kỹ tóg jagãgtar nýtĩgtĩ, êg mēg ti. Tag ri ke ag nýtĩ, ùn e

ên ag, Jesus mĩ, ag tỹ Topē vĩ ki kagtĩg nýtĩn kỹ.

³⁵ Hã ra tóg rãké nỹ sir, kỹ ti mré mũ tĩ ag tóg ti mĩ: “ki ti êmã tũ nĩ, rãké ti nỹ ha,” he mũ. ³⁶ “Ã tỹ ag mũn kỹ tóg há tĩ vè. Kỹ ag tóg êmã kar mĩ mũnh mũ, vējēn jãvãnh jé,” he ag tóg ti mĩ. ³⁷ Hã ra tóg ag mĩ: “ha inhhã ag jên ge,” he mũ. Hã ra ag tóg: “kỹ êg mĩ jãnkamy tỹ hên ri ke tỹ pão kajãm mũ?” he mũ, “êg tỹ ag jên jé?” he ag tóg ti mĩ.

³⁸ Kỹ tóg ag mĩ: “pão tỹ hê ri ke nỹ ki nýtĩ?” he mũ. “Ha vènh mũ jēg,” he tóg. Ag tỹ ve kỹ ag tóg: “ũ tỹ 5 (ke) vè,” he mũ, “pirã régre ke gé,” he ag tóg.

³⁹ Kỹ tóg ag mĩ: “nĩgnĩ ra, re gỹnh tánh kri, mrugmru kri,” he mũ, “vènhmãn kỹ,” he tóg, vènh kar ên mĩ. ⁴⁰ Kỹ ag tóg vènhmãn kỹ nĩ, vènhmãn kỹ nĩ he mũ, ù vỹ tóg 100 (ke) nĩ he mũ, jo ù tóg 50 (ke) nĩ he mũ, ag vènhmãn ù. ⁴¹ Kỹ tóg pão tỹ 5 (ke) génh kỹ, pirã régre génh kỹ kanhkã ki êvãnh mũ, kỹ tóg Topē mré vĩ mũ sir, kỹ tóg pão kénh mũ sir, ã mré mũ tĩ ag mĩ tóg vin mũ, ag tỹ ùn e ên mĩ vènh kãpãpãm jé. Pirã régre tỹ tóg vènh kãpópãm mũ gé sir. ⁴² Kỹ vènh kar vỹ ko kãn kỹ funfór mũ sir. ⁴³ Kēj tỹ 12 (ke) fãn ag tóg mũ sir, pão ke tỹ, pirã ke tỹ. ⁴⁴ Pão ên ko mũ ag tóg tỹ 5 mil (ke) nýtĩ, ùn týtã fag tó tũ.

Jesus tỹ goj kri tĩg

(Mt 14.22-33; Jo 6.15-21)

⁴⁵ Kỹ Jesus tóg vèsýmér ã mré mũ tĩ ag mĩ tó mũ, ag tỹ canoa kãmĩ mũ jé, ag tỹ ti jo kafã ù ra mũ jé, êmã tỹ Bet-saida ra. “Isỹ ùn e tag ag mĩ: ha mũjēg, henh ke vè ver,” he tóg ag mĩ. ⁴⁶ Kỹ tóg ag mĩ: “ha mũjēg,” he mũ sir. Ag mũn kar tóg pãnónh to tãpřy mũ, Topē mré vĩ jé. ⁴⁷ Kutỹ ên kỹ canoa tóg ver tĩ nĩ, goj kãmĩ. Jo Jesus tóg tar tá jē nĩ ver, ã pir mĩ. ⁴⁸ Hã ra ag tóg canoa vóg kỹ ronron mũ sir, mũ kónãn ag tóg mũ sir, kãka tỹ

ag kato tēn kŷ. Hã ra tóg ag ronron vég mŭ sir, Jesus ti. Kŷ tóg kurã ke ra ag to kãtĩ mŭ, goj kri tŷg kŷ, ã pēn kã mŷr. Hã ra tóg ag tá jun mŭ sir, kŷ tóg ag pãtēn sór nĩ ve nĩ. ⁴⁹ Ag tŷ goj kri ti tŷg ve kŷ ag tóg: “vēnh kuprīg vē,” he mŭ. Kŷ ag tóg vēkrēnrēr mŭ, ⁵⁰ ag tŷ jŭrŭn ken kŷ, ag kar tŷ ti ve kŷ. Hã ra tóg vēsŷmér ag mré vĩ mŭ, kŷ tóg ag mŷ: “kamēg tŷg nĩ,” he mŭ. “Inh hã vē, jŭrŭn ke tŷg nĩ,” he tóg.

⁵¹ Kŷ tóg canoa kãkĩ rã mŭ sir ag mré, Jesus ti. Kŷ kãka tóg tŷ he mŭ sir. Kŷ tóg ag mŷ e (pē) tãvĩ tĩ. ⁵² Hã kŷ tóg ag tŷ to jykrēn tũ tĩ. Ver ag tóg krĩ tũ nŷtĩ, hã kŷ ag tóg Jesus jykre ki kagtŷg nŷtĩ ver, ti tŷ pão pir tŷ ũn e jēn ja ra.

Jesus tŷ Genesaré mĩ tŷg

(Mt 14.34-36)

⁵³ Ag tŷ canoa kãmĩ pa kŷ ag tóg ga tŷ Genesaré tá junjun ja nĩ. Kŷ ag tóg canoa nŷgnŷn mŭ sir. ⁵⁴ Ag tŷ canoa kãmĩ pa kar kŷ tá ke ag tóg vēsŷmér ti ki kanhrãn mŭ, Jesus ki. ⁵⁵ Kŷ ag tóg ĩn kar mĩ pētē mŭ sir, kŷ ag tóg ũn kagyga ag gé kãmũ mŭ. Ti jēg jan ra ag tóg ti nón mŭ mŭ, ag tŷ ti jēg ja mē kŷ. ⁵⁶ Ti tŷ ěmã ũ tá jun kŷ ag tóg vēnh kaga gé kãmũ tĩ, kŷ ag tóg ĩn prur ki ag vin tĩ, ěmã kãsir ki, ěmã mág ki ke gé, vãnħ kãmĩ ke gé. “Mŷ ã mŷ há, ěg tŷ hēn ri ke mŭn ã kur mráj mē jé?” he ag tóg ti mŷ. Kŷ ag tóg há’ há’ he kãn mŭ sir, ag tŷ ti kur mēn kŷ.

Ti si ag jykre ti

(Mt 15.1-9)

7 Kejēn Fariseu ag tóg Jesus to vēnhmãn mŭ, Topē vĩ to professor ag mré. Jerusalém tá ag kãmũ ja nĩ. ² Hã ra ag tóg Jesus mré mŭ tĩ ũ ag jēn vég mŭ. Nŷgpég tũ ja ag tóg nĩ, hã kŷ tóg Fariseu ag mŷ jēggryg tĩ. ³ Fariseu ag tóg nŷpe kar kŷ tŷ jēg tĩ, Israel kar

ag ke gé, ag tŷ ti si ag jykre han kŷ. ⁴ Ag tŷ negocio tá kãmũ kŷ ag tóg vēso tŷ kó he tĩ, goj tŷ, vēso tŷ kó he kar hã ag tóg ko tĩ. Vēnh jykre si tŷ hēn ri ke hyn han ag tóg tĩ, caneca kupég tĩ, kukrũ kupég tĩ, lata kupég tĩ ke gé. ⁵ Kŷ Fariseu ag tóg Jesus mŷ ke mŭ, Topē vĩ to professor ag mré hã. “Á mré mŭ tĩ ag tŷ hē ri ke jé ti si ag jykre han tũ nĩ nē?” he ag tóg mŭ. “Ag tŷ ne jé ājag nŷgē jēggry ra jēn nē?” he ag tóg mŭ.

⁶ Hã ra tóg ag mŷ: “Isaías vŷ ājag to vĩ ja nĩ, vãsŷ,” he mŭ, “kŷ tóg rãn kŷ nĩ,” he tóg. “Ti vin hã vē, ha mē: povo tag vŷ ājag nŷnē hã tŷ inh mŷ vĩ há han tĩ, hã ra ag jykre pi(jé) tŷ inh jykre nŷ’.” ⁷ Fagrĩnh mŷ ag tóg iso grĩnh ke tĩ, hã ra ag tóg ěprã ke ag jykre to: Topē tŷ tón hã vē, he tĩ, he ja tóg nŷgtĩ, Isaías ti,” he tóg, Jesus ti. “Hã kŷ tóg ājag to ki hã tó ja nĩ, ājag jykre régre nŷtĩn kŷ,” he tóg, Jesus ti. ⁸ “Topē vĩ tovãnħ ājag tóg mŭ,” he tóg. “Hã ra ājag tóg ěprã ke jykre han tĩ,” he tóg, Jesus ti.

⁹ Kŷ tóg ag mŷ: “ājag hã ne tóg Topē vĩ mranh tĩ,” he mŭ, “ājag tŷ ājag jykre si hã han jé,” he tóg. “Hã ra tóg ājag mŷ há nŷ, ājag jykre si ěn ti,” he tóg, ag mŷ. ¹⁰ “Moisés tŷ ājag mŷ Topē vĩ tó kŷ tóg ājag mŷ: “ã mŷnh fi mré ã panħ kamēg nĩ, fag jagãgtãn nĩ,” he ja nŷgtĩ. “Ũ tŷ ã han mŭ fag mŷ vĩ kónãn mŭ ěn tēn jé ã tóg ke mŭ,” he ja tóg nŷgtĩ, Moisés ti,” he tóg, Jesus ti. ¹¹⁻¹² “Moisés jãvo ājag jykre vŷ ge nĩ, ha mē. Ũ tóg kejēn ã han mŭ fag jagãgtãn sór tũ nĩ. Kŷ tóg fag mŷ ón kŷ: “Topē tũ vē,” he tĩ, ti tŷ fag mŷ nĩm jafã ěn to. Kŷ tóg fag ki rĩr ke tũ nĩ, kŷ tóg fag to é he mŭ sir. Ājag jykre kórég hã vē,” he tóg, Jesus ti. ¹³ Kŷ Jesus tóg ag mŷ: “Topē vĩ mranh ājag tóg tĩ, ti jēgja kã ājag tóg ěprã ke ag jykre hã ki króm sór tĩ. Ge tŷ hēn ri ke han ājag tóg tĩ,” he tóg ag mŷ, Jesus ti.

Nén tỹ ẽg kavénh mũ

(Mt 15.10-20)

¹⁴ Kĩ tóg vènh kar jé prêr măn kĩ ag mỹ: “inh vĩ jẽmẽ ra,” he mũ, “ājag kar tỹ ki kanhrân jé,” he tóg. ¹⁵ “Vějẽn pi(jé) ẽg kavénh tĩ,” he tóg, “ẽg tỹn ko kĩ,” he tóg. “Nén tỹ ẽg ki kãpa vĩ ẽg kavénh tĩ, ẽg tỹ nén ù vènhmỹ han ên vĩ ẽg kavénh tĩ,” he tóg. ¹⁶ “Ủ nĩgrẽg nỹtĩ tỹ tỹ jẽmẽ jé,” he tóg, Jesus ti.

¹⁷ Tĩ tỹ ã pir mỹ ãn kãra rã kĩ ti mrẽ mũ tĩ ag tóg ti ki jẽmẽg mũ. “Ẽg mỹ kãmén há han nĩ, ã vĩ tag,” he ag tóg ti mỹ.

¹⁸ Kĩ tóg ag mỹ: “kỹ ājag mỹ ki kanhrô tũ nỹtĩ ver?” he mũ. “Ẽg jẽn tỹ ẽg jẽnky kãra rã kĩ tóg ẽg kavénh tũ nĩgtĩ mỹr,” he tóg. ¹⁹ “Ẽg nug kãra tóg rã mũ, kar ẽg fón mũ. Ẽg krĩ kãra tóg rã tũ nĩgtĩ,” he tóg. Hã kĩ Jesus tóg vějẽn kar to: “há ti nĩ,” he mũ.

²⁰ Kĩ tóg: “nén tỹ ẽg ki kãpa vĩ ẽg kavénh tĩ,” he mũ. ²¹ “Nén tỹ ẽg ki kãpan hã vỹ, hã vĩ: jykrén kónãn, he mũ, ùn mén tũ fag to én, he mũ, nén ù pēju, he mũ, ù tén, he mũ, ã prũ tũ fi mrẽ nỹ, he mũ, ã mén tũ mrẽ nỹ, he mũ. ²² nén kar to én, he mũ, vènh jykre pãno han, he mũ, ã tỹ nén ù nenh (ka)mẽ, he mũ, ù kato vĩ kónãn, he mũ, vènhmỹ inh ag kãfór kar nĩ, he tĩ, he mũ, krĩ tũ, he mũ. ²³ Nén kar kórég ên tóg ẽg ki kãpa tĩ, hã kĩ tóg ẽg kavénh tĩ,” he tóg, Jesus ti.

Jesus tỹ tátãg sĩ fi jagrẽ kórég kutẽm

(Mt 15.21-28)

²⁴ Kĩ Jesus tóg tá kãkutẽ mũ sir, ga ù ra tĩg jé, cidade tỹ Tiro ra, cidade tỹ Sidom ra ke gé. Tá tóg ãn ù krẽm nĩ mũ, hã ra tóg: “ker ù inh nĩgja ki kanhrân hẽ,” he mũ. Ge ra ag tóg ki kanhrân mũ.

²⁵ Kĩ vỹsỹmẽr ùn tỹtã ù fi tóg kãtĩ mũ. Fi kósĩn fi vĩ jagrẽ kórég nĩ. Fi tỹ ti kãmẽ kĩ fi tóg kãtĩ mũ. Kĩ fi tóg ti krẽm mũg ke mũ sir, ùn tỹtã fi. ²⁶ Hã ra fi vĩ vĩ tỹ Grego nĩ, ù tỹ Siro-Fenício krẽ vĩ

tỹ fi nĩ. Kĩ fi tóg to vĩ măn', to vĩ măn', he mũ, ti tỹ fi kósĩn fi jagrẽ kórég ên kutẽm jé.

²⁷ Kĩ Jesus tóg fi mỹ: “ẽg jẽn vĩ tỹ ẽg krẽ tỹ ko jafã nĩ,” he mũ. “Vènhmỹ ti nĩ, ẽg tỹ ẽg krẽ pão tỹ cachorro mỹ fón kĩ,” he tóg, fi mỹ.

²⁸ Hã ra fi tóg Jesus ti mỹ: “hỹ,” he mũ. “Hã ra cachorro sĩ ag tóg ẽg krẽ pão vãr ên ko tĩ, mesa krẽm,” he fi tóg ti mỹ. ²⁹ Kĩ Jesus tóg fi mỹ: “tó há han ã tóg,” he mũ. “Ha tĩg, fi jagrẽ kórég tóg hur kutẽ, ã kósĩn fi ki,” he tóg mũ.

³⁰ Kĩ fi tóg ã ãn ra tĩ mũ sir. Fi tỹ tá jun kĩ fi kósĩn fi tóg nỹ mũ, cama krĩ, hã ra fi jagrẽ kórég ên vĩ kutẽ ja nĩ.

Jesus tỹ ùn vĩ vãnẽ vĩn

³¹ Kĩ Jesus tóg cidade tỹ Tiro ki ga ki kutẽ mũ, kĩ tóg cidade tỹ Sidom fĩn rãm mũ gé sir, kĩ tóg ga tỹ Galiléia ki goj nig ra tĩ mũ sir, cidade tỹ 10 (ke) fĩn rãm kĩ. ³² Kĩ ag tóg ù péré kãmũ mũ, ti to, ùn kutu, ùn vĩ kar vãnẽ. Kĩ ag tóg ti mỹ ti tó mũ, ti tỹ ã nĩgẽ tỹ ti mẽ jé. ³³ Hã ra Jesus tóg ti péré tĩ mũ, ti pin kĩ, kĩ tóg ã nĩgẽ juféj tỹ ti nĩgrẽg nor nĩgfhẽ mũ, kĩ tóg ti nũnẽ to sug mũ sir. ³⁴ Kĩ tóg kanhkã ki ẽvãnẽ kĩ ỹnh' ỹnh' he mũ sir, kĩ tóg ti mỹ: “efatã,” he mũ. Ẽg vĩ ki ke hã vĩ: “tĩ nĩgrẽg jé nor hẽ,” he mũ. ³⁵ Kĩ ti nĩgrẽg tóg nor' he mũ sir, ti nũnẽ tóg kavar mũ sir. Vĩ tóg mũ sir, há' he tóg mũ sir. ³⁶ Kĩ Jesus tóg ag tỹ tó kamẽg, hã ra ag tóg tugtó kãn mũ, ti tỹ: “ker tó hẽ', ker tó hẽ,” he mũ ra. ³⁷ Kĩ ag fe tóg hẽn ri ke mũ. “Tĩ tỹ nén kar há vĩ tóg há tãvĩ nỹtĩ,” he ag tóg, Jesus to. “Ủn kutu ag ẽmẽ hyn han tóg, ùn vĩ vãnẽ ag vĩ hyn han tóg ke gé,” he ag tóg, Jesus to.

Jesus tỹ ù tỹ 4 mil (ke) ag jẽn

(Mt 15.32-39)

8 Kejẽn ùn e ag tóg vènhmãmãm mũ, hã ra ag tỹ nén ù konh ke tóg tũ tĩ. Kĩ Jesus tóg ã mrẽ mũ tĩ ag jé prêr mũ sir, kĩ

tóg ag mý: ²“inh mý ag tóg jagtar nýtí, ùn e tag ag,” he mû. “Kurã tãgtũ han ag tóg huri, ěg mré, hã ra ag tóg vĕjĕn ve ja tũ nĩgtĩ,” he tóg. ³“Sý ag kókĩr ra ag mý: ha mũjĕg, hen ký inh mý ũ ag kãgter ha mĕ tóg tĩ, ěmĩn kri, ěpřy kri, ag tỹ ājag jamã ra vỹnvỹn ke jĕ,” he tóg. “Kuvar gy tóg nĩ, ũ ag jamã ti,” he tóg, Jesus ti.

⁴Ký ti mré mũ ti ag tóg ti mý: “ěg hĕ ri ken ký pão venh mũ, ěmã tũg ja tag ti ki, ěg tỹ ag jĕn jĕ?” he mũ.

⁵Hã ra tóg ag mý: “pão tỹ hĕ ri ke nỹ ki nýtĩ ge?” he mũ. Ký ag tóg ti mý: “ũ tỹ 7 (ke) vỹ nĩ,” he mũ.

⁶Ký tóg vĕnh kar mý: “nĩgnĩ ra, ga kri,” he mũ. Ký tóg pão tỹ 7 (ke) ěn mãn ký (tóg) Topĕ mré vĩ mũ. “Inh mý tóg há tĩ,” he tóg. Ký tóg kupãg' he mũ sir, pão ti, ģ mré mũ ti ag mý tóg vin mũ sir, ag tỹ vĕnh kar ken jĕ. Ký ag tóg vĕnh kar ken mũ sir. ⁷Kãkufár pipir vỹ ki nýtĩ gé. Ký tóg to Topĕ mré vĩ mũ gé, ký tóg ag mý: “ha vĕnh ken,” he mũ gé, ģ mré mũ ti ag mý. ⁸Ký ag tóg ko kãn mũ sir, funfór ag tóg mũ, hã ra tóg kén mũ sir. Kre tỹ 7 (ke) ěn fãn tóg mũ, ti kén ti, Jesus mré mũ ti ag tỹ génh ký. ⁹Ũ tỹ 4 (ke) ag vĕ, hĕn ri ke mũn, pão ko mũ ag.

¹⁰Kar ký Jesus tóg ag mý: “ha mũjĕg,” he mũ. Ký tóg vĕsýmér canoa kãki rã mũ, ti mré mũ ti ag mré, ký ag tóg Dalmanuta tá ga ra mũ mũ.

Fariseu ag tỹ milagre ve sór

(Mt 16.1-4)

¹¹Ký Fariseu ag tóg ti tá junjun mũ. Ag tỹ ón ký ti ki jĕmĕ sór vĕ, ag tỹ kar ti kato vĩ jĕ. Ký ag tóg ti mý to vĩ mũ, ti tỹ ag mý kanhkã tá vĕnh jykře ven jĕ, ti tỹ ag mý ěg tỹ nĕn han vãnh han jĕ. Ag tỹ ti jykře to: “Topĕ jykře mý vỹ?” he sór vĕ.

¹²Ký Jesus tóg jĕnger jagy han, ģ fe tỹ, ký tóg ag mý: “ājag ne tóg ěg tỹ nĕn han vãnh hã ve sór mũ,” he mũ. “Sý ke há vĕ, hã ký sóg ke mũ: venh ke tũ ājag nĩ.

Ũri ke ag vỹ ěg tỹ nĕn han vãnh venh ke tũ pĕ nĩ,” he tóg, ag mý, Jesus ti. ¹³Ký tóg ag ré ký ti mũ sir, canoa kãki tóg rã mãn mũ, ký tóg kafã ũ ra ti mũ sir.

Fermento to comparação

(Mt 16.5-12)

¹⁴Hã ra ti mré mũ ti ag tóg pão mĩ ěkrĕn ja tũ nĩ. Pão pir hã vỹ kã nĩ nĩ, canoa kãkã.

¹⁵Hã ra Jesus tóg ag kanhrãn ký ag mý: “ha mĕ,” he mũ. “Fariseu tỹ fermento há(r) kamĕg nĩ,” he tóg, “Herodes tỹ fermento há(r) kamĕg nĩ gé,” he tóg.

¹⁶Ký ag tóg jagnĕ mý: “pão kã ěg jatun,” he mũ, “hã ký tóg tag tó mũ,” he ag tóg mũ.

¹⁷Hã ra Jesus tóg ki kanhró nĩ, ký tóg ag mý: “pão tũ ti tĩ, he tũg nĩ,” he mũ. “Inh vĩ ki kagtĩg nýtĩ ve ājag tóg nýtĩ, sý nĕn han mũ to jykrĕn tũ nýtĩ ve ājag tóg nýtĩ,” he tóg. “Křĩ tũ nýtĩ ve ājag tóg nýtĩ,” he tóg. ¹⁸“Ājag kanĕ ra ājag kyvó nýtĩ ve nýtĩ,” he tóg. “Ājag nĩgrĕg ra ājag tóg kutu nýtĩ ve nýtĩ,” he tóg. “Mĩ ěkrĕn nĩ, ¹⁹sý pão tỹ 5 (ke) tỹ ùn e jĕn ja ěn mĩ. Ũ tỹ 5 mĩl (ke) ag vỹ kó, mýr, hã ra tóg kén,” he tóg. “Ājag kĕj tỹ hĕn ri ke fãn ti, pão ke ti?” he tóg ag mý. Ký ag tóg: “kĕj tỹ 12 (ke),” he mũ.

²⁰Ký tóg: “ký pão tỹ 7 (ke) to jykrĕn nĩ gé,” he mũ. “Ũ tỹ 4 mĩl (ke) ag vỹ kó,” he tóg, “hã ra kre tỹ hĕ ri ke nỹ fór, ti ke tỹ?” he tóg. Ký ag tóg: “kre tỹ 7 (ke),” he mũ.

²¹Ký tóg ag mý: “ge ra ājag tóg ki kagtĩg nýtĩ,” he mũ. Ti tỹ ag mý Fariseu ag jykře tó jan hã vĕ, Herodes jykře ti. Ag jykře hã to tóg: ag tỹ fermento há(r), he ja nĩ.

Jesus tỹ ùn kyvó tỹ há' he

²²Ký tóg kafã ũ tá jun mũ sir, ěmã tỹ Betsaida tá, ti mré mũ ti ag mré. Ký tá ke ag tóg ùn kyvó pére kãmũ mũ. Jesus mý ag tóg to vĩ mũ, ti tỹ ti mĕ jĕ, ģ nĩgĕ tỹ.

²³ Kĩ tóg ùn kyvó nìgè kãgmĩ kĩ ti pére kuté mũ, ěmā ki. Kĩ tóg ti mĩ: “ã mĩ nén ù vég mũ?” he mũ.

²⁴ Kĩ tóg ěvānh kĩ ti mĩ: “ag ve inh,” he mũ, “hã ra ag tóg inh mĩ tĩ ka mũ ěn ve nĩtĩ,” he tóg.

²⁵ Kĩ tóg ã nìgè tĩ ti kanē mẽ măn mũ, kĩ tóg ěvānh há han mũ sir. Há’ he tóg mũ. Tãmĩ tóg ve há han kăn mũ, ùn kyvó ja ti. ²⁶ Kĩ Jesus tóg ti mĩ: “ha vèsymer ã jamā ra tĩg,” he mũ. “Ěmā tag ki rã tũg nĩ,” he tóg ti mĩ, Jesus ti. Kĩ tóg ti mũ sir.

Pedro tĩ Jesus tó

(Mt 16.13-20; Lc 9.18-21)

²⁷ Kĩ Jesus tóg ã mré mũ tĩ ag mré tĩg măn mũ gé sir, ěmā tĩ Cesaréia Filipe tá ga ra. Ěmĩn jagma tĩg kĩ, ěpry jagma tĩg kĩ tóg ã mré mũ tĩ ag ki jēmēg mũ, Jesus ti. “Ag iso hē ri ke tĩ?” he tóg.

²⁸ Kĩ ag tóg ti mĩ ke mũ. “João Batista vè, he ag tóg ti ã to,” he ag tóg mũ sir. “Jãvo ù ag tóg: Elias vè, he tĩ. Jãvo ù ag tóg: Topē vĩ tó tĩ ù vè, he tĩ, ã to,” he ag tóg ti mĩ.

²⁹ Kĩ tóg ag mĩ: “ag jãvo ãjag iso hē ri ke tĩ?” he mũ. Kĩ Pedro tóg ti mĩ: “tĩ ã Cristo nĩ,” he mũ. ³⁰ Kĩ tóg ag jyvēn mũ, ag tĩ ù mĩ kãmén tũ nĩ jé.

Jesus tĩ ã jagtar ke tó

(Mt 16.21-28; Lc 9.22-27)

³¹ Kĩ tóg ag kanhrān mũ sir. “Tĩ sóg ěprā ke fi kósín nĩ,” he tóg. “Ijagtar jagy han ke vè,” he tóg. “Kófa ag tĩ iso: kórég ti nĩ, henh ke vè, Topē tũ ki rĩr tĩ ag ke gé, Topē vĩ to professor ag ke gé,” he tóg. “Ag tĩ isén ke vè, kurā tãgtũ tũg mũ ra sóg rĩr măn mũ hã ra,” he tóg mũ, ã mré mũ tĩ ag mĩ. ³² Kĩ ag tóg ki kanhrān kăn mũ, ti tĩ ag mĩ nén tó mũn ki.

Hã ra Pedro tóg ti pin kĩ ti mré vĩ mũ, kĩ tóg: “vĩ tĩ ge han tũg nĩ,” he mũ. ³³ Hã ra Jesus tóg vèsyjam ěvānh kĩ ti mré mũ tĩ ag ki ěvānh mũ. Kĩ tóg Pedro to jũ mũ.

“Kutĩg, Satanás’,” he tóg. “Ã pi(jé) Topē jykre tó mũ’,” he tóg. “Ěprā ke jykre vè, ã tĩ inh mĩ nén tó mũ tag ti,” he tóg, Pedro mĩ.

³⁴ Kĩ Jesus tóg ã mré mũ tĩ ag mré vènh kar jé prēr mũ, kĩ tóg ag mĩ kãmén mũ. “Ājag tĩ inh mré kãmũ kĩ tóg há tĩnh mũ,” he tóg. “Kĩ ãjag jykre tovānh nĩ, ãjag tĩ isũ tãvĩ han jé. Ha vé, ag tĩ inh cruz tĩ inh kri fi kĩ sóg tĩg ke mũ, ag tĩ to isa kĩ isén jé, ha vemnĩ. Vènh nenh ke tũ sóg nĩ. Isy tag han ri ke han nĩ, kurā kar ki, ãjag tĩ inh mré mũ sór nĩtĩn kĩ,” he tóg. ³⁵ “Ājag tĩ ãjag jykre hã han sór kĩ ãjag tĩ nũgme ki vār ke vè,” he tóg. “Jãvo ãjag tĩ isugrĩn ãjag jykre toyānh kĩ ãjag krenkren ke vè,” he tóg, “ãjag tĩ vènh vĩ sér tugrĩn kãgter ke mũ (hã) ra,” he tóg. ³⁶ “Hēn ri ke mũn ãjag hĩn mundo ki nén ù kar ganhar henh ke mũ, hã ra ãjag kuprĩg tóg vāfor ke mũ. Kĩ tóg kórég nĩ. ³⁷ Ěg tĩ ne tĩ ěg kuprĩg kajām ke tóg tũ tĩ, ěg tĩ ti ve măn jé,” he tóg, Jesus ti. ³⁸ “Ūri ke ag tóg vyr mĩ Topē ù hyn han tĩ, kĩ ag tóg Topē vĩ mranh tĩ gé,” he tóg. “Ag kãmĩ iso mĩ’ãg tũg nĩ, inh vĩ to. Ājag tĩ ūri iso mĩ’ãg kĩ sóg ãjag to mĩ’ãg ke mũ gé, inh kãtĩg măn kĩ,” he tóg. “Ājag to sóg mĩ’ãg ke mũ, sỹ Topē tĩ jēnē mág ag mré kãtĩg ken kĩ. Ijóg vỹ tóg isy ùn mág han ke mũ, inh kãtĩg măn ti kĩ,” he tóg. “Tĩ sóg ěprā ke fi kósín nĩ,” he tóg, Jesus ti.

9 Kĩ tóg ag mĩ: “ha vé, ki hã sóg tó mũ,” he mũ. “Ājag kãmĩ ù ag vỹ Topē tĩ tĩ ěg pã’i nĩ venh ke mũ, ãjag ter ke to hã, tag ki ěg mré nĩtĩ ù ag. Topē vỹ tar nĩ. Ti tar nĩ ve jé ag tóg ke mũ, ãjag ter ke to hã,” he tóg, Jesus ti.

Jesus tĩ vènh ve ù han

(Mt 17.1-13; Lc 9.28-36)

² Kar kurā tĩ 6 (ke) tũg kĩ Jesus tóg ag mĩ: “mũ nỹ, vyr mỹ,” he mũ. Pedro mỹ tóg ke mũ, Tiago mỹ ke gé, João mỹ ke

gé. Ag hã mré tóg pānónh ra tĩ mũ. Kĩ tóg ag jo vènh ve ù han mũ.

³ Tĩ kur vỹ tóg kókov tâvĩ nĩ sir, kópréj tâvĩ, fag tỹ kur kupri fãg mũ ên kupri kãfór tóg nĩ, ga kar mĩ hã.

⁴ Kĩ Elias tóg sir vènh ven mũ, Moisés ke gé. Jesus mré ag tóg vēmén mũ.

⁵ Kĩ Pedro tóg Jesus mỹ: “Senhor,” he mũ. “Tag ki tóg ha nĩ,” he tóg. “Ëg tỹ tag ki pãjó tãgtũ han kȳn hȳn ha ninh mũ, ã mỹ, Moisés mỹ, Elias mỹ ke gé,” he tóg. Pedro ti.

⁶ Hã ra ag fe tỹ jũrũn ke kỹ tóg ti tỹ nén tónh ke ki kagtĩg nĩ, Pedro ti.

⁷ Kĩ kanhkã góg vỹ sir ag kri rũm ke mũ, kỹ, vènh vỹ tóg mẽ há’ he mũ, kanhkã góg kátá, kỹ tóg: “inh kósín hã vè,” he mũ. “Inh fe pẽ vè,” he tóg. “Ti vỹ jẽmẽ ra,” he tóg, vènh vỹ ti, Topẽ ti.

⁸ Kĩ vãhã ti mré mũ tĩ ag tóg ki ãvãnh mãn mũ sir, kỹ ag tóg Jesus hã vэг mũ sir, ti mrẽ nỹtĩ ag ve mãn tũ ag tóg nĩ.

⁹ Kĩ ag tóg pānónh tá kãre mũ sir. Kĩ Jesus tóg: “ker ù mỹ ãjag tỹ ùri nén vэг mũ tó hẽ,” he mũ. “Ëprã ke fi kósín tỹ ã ter ja tá vȳn ke kar hã inh kãmén nĩ,” he tóg, Jesus ti.

¹⁰ Hã kỹ ag tóg ti vỹ han mũ sir. “Ne nẽ hȳn, ti tỹ: iser ja tá vȳn ke, he mũ tag ti?” he ag tóg mũ, jagnẽ mỹ.

¹¹ Kĩ ag tóg Jesus mỹ: “hã ra Topẽ vỹ to professor ag tóg Elias kãtĩg mãn ke tó tĩ. “Kãtĩg jé tóg ke mũ, Cristo kãtĩg ke to hã,” he ag tóg tĩ, Elias to. Hã mỹ?” he ag tóg mũ, Jesus mỹ.

¹² Kĩ tóg ag mỹ: “hỹ,” he mũ, “kãtĩg jé tóg ke mũ, Elias ti, nén kar han mãn jé,” he tóg. “Hã ra sóg rán kỹ nĩ gé. Tỹ sóg ãprã ke fi kósín nĩ mỹr,” he tóg. “Jagtar jagy mẽ jé sóg ke mũ. Ag tỹ iso é henh ke,” he tóg.

¹³ “Kỹ Elias vỹ hur kãtĩg gé, kỹ ag tóg ti tỹ han, ag tỹ nén han sór mũ ên ti,” he tóg. “Hã kỹ tóg rán kỹ nĩ,” he tóg, Jesus ti.

Jesus tỹ kyrũ jagrẽ kórég kutẽm

(Mt 17.14-21; Lc 9.37-43a)

¹⁴ Kĩ ag tóg mũ mũ sir. Kĩ ag tóg vãhã Jesus mré mũ tĩ ù ag tá junjun mũ sir. Kĩ ag tóg vènh e vэг mũ, ag pẽnĩn, kỹ Topẽ vỹ to professor ag tóg ag vỹ kato vỹ ù han mũ, Jesus mré mũ tĩ ag mỹ.

¹⁵ Kĩ tóg vãhã vènh e ên ag mỹ e tĩ, ag tỹ ti ven kỹ. Kĩ ag tóg ti to pэтẽ kãmũ mũ sir, ti mỹ: “ã mỹ há?” he jẽ.

¹⁶ Kĩ Jesus tóg ag mỹ: “ãjag tỹ ne tỹ vēmén nẽ?” he mũ.

¹⁷ Kĩ ag kã ù tóg ti mỹ: “Senhor,” he mũ. “Inh kósín pére sóg kãtĩ, ã to,” he tóg. “Jagrẽ kórég ti nĩ, hã kỹ tóg vỹ vãnh (pẽ) nĩ,” he tóg.

¹⁸ “Ti jagrẽ kórég tỹ ti kã vyryn ke kỹ tóg kutẽ tĩ, kỹ tóg jãrãn tĩ, ã jã tỹ tóg gyngyn ke tĩ, tar’ he tóg,” he tóg. “Ã mré mũ tĩ ag mỹ sóg to vỹ vè, ag tỹ ti jagrẽ kórég kutẽm jé, hã ra ag tóg tỹ hẽ ri ke tũ nĩ,” he tóg, Jesus mỹ.

¹⁹ Kĩ Jesus tóg ag mỹ: “ãjag ne tóg inh ki rã há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tỹ hèn ri ke ki inh hȳn ãjag mré tĩ nĩ? Kysã tỹ hèn ri ke ki inh hȳn ãjag to fe tĩg nĩ?” he tóg. “Inh mỹ ti pére kãmũjэг,” he tóg.

²⁰ Kĩ ag tóg ti mỹ ti pére kãmũ mũ sir. Jesus tỹ ti jagrẽ kórég vэг mũ ra tóg kyrũ kã vyryn ke mãn mũ gé, kỹ tóg kutẽ mãn mũ gé sir, vĩrĩn’, vĩrĩn’ ke tóg mũ gé sir, jãrãn tóg mũ gé sir.

²¹ Kĩ Jesus tóg ti panh ti mỹ: “mỹ si há tĩ ha?” he mũ. Kĩ tóg: “ã sĩ kã tóg ge nĩ,” he mũ, ti panh ti.

²² “Kejẽn ti jagrẽ kórég tóg pĩ ki ti fón mũ, goj ki ke gé, ti tỹ ti tén jé,” he tóg. “Ã tỹ hẽ ri ken há nĩn kỹ ãg jagãgtãn nĩ, ti tỹ há’ hemnĩ,” he tóg.

²³ Kĩ Jesus tóg ti mỹ: “ã tỹ hẽ ri ken hã nĩn kỹ, he tũg nĩ, inh mỹ,” he mũ. “Û tỹ Topẽ ki rã mũ ên tỹ hẽ ri ken há han mũ, nén kar tỹ,” he tóg, Jesus ti.

²⁴ Kĩ vēsȳmér kyrũ panh tóg: “ti ki sóg rãnh mũ,” he mũ, jamā hár(a). “Isȳ ti ki rã tũ ên ti tỹ inh ki tỹ tũ’ hemnĩ,” he tóg.

²⁵ Hã ra Jesus tóg ũ tỹ hên ri ke vênhmãn vэг mũ, kĩ tóg ti jagrê kórég to jũ mũ. “Vênh jagrê vĩ vãnh,” he tóg, “vênh jagrê kutu’,” he tóg, “ha kăkutê, ti ki rã măn tũg,” he tóg, Jesus ti.

²⁶ Kĩ tóg prêr mũ sir, ti tỹ jũrũn ke han tóg mũ sir. Kĩ tóg kyrũ ki kăkutê mũ sir. Kĩ kyrũ tóg ter ve nĩ, kĩ ag tóg ti to: “tũg ja ti nĩ,” he mũ.

²⁷ Hã ra Jesus tóg ti nĩgê kăgmĩ kĩ ti nĩm mũ sir, kĩ tóg jěgnê mũ sir.

²⁸ Kĩ Jesus tóg tí mũ. Ti tỹ ĩn kăra rã kĩ ti mré mũ tí ag tóg ti pin kĩ ti mỹ vĩ mũ. “Ēg ne tóg ti tỹ há’ he ja tũ nĩ’. Hê ri ken kĩ, hỹn?” he ag tóg, Jesus mỹ.

²⁹ Kĩ tóg ag mỹ: “vênh jagrê kórég tỹ ge kutêm tóg jagy nỹ ěg mỹ,” he mũ. “Topê mré ěg vĩ tí, kĩ ěg tóg mrê văkrég tí gé sir. Kĩ tóg văhă kăkutê tí,” he tóg, Jesus ti.

Jesus tỹ ă ter ke tó măn

(Mt 17.22-23; Lc 9.43b-45)

³⁰ Kĩ ag tóg tá kăpa kĩ Galiléia mĩ mũ mũ. Hã ra tóg: “ker ũ ěg tỹ mĩ mũ ki kanhrăn hê’,” he mũ.

³¹ Ti tỹ ti mré mũ tí ag kanhrăn sór vê, hă kĩ tóg ke mũ. Kĩ tóg ag mỹ: “ěpră ke fi kósĩn ěn vĩ jagtar ninh mũ,” he mũ. “Īnh hă vê. Ēpră ke ag vĩ ag tỹ isȳ nén han sór mũ ěn han ke mũ,” he tóg. “Ag tỹ isén ke vê. Ag tỹ isén kar kĩ sóg hă ra rĩr măn mũ, kură tăgtũ tũg kĩ,” he tóg, Jesus ti.

³² Kĩ tóg ag tỹ ti tỹ nén tó mũ tag to jykrên tũ tí, hă ra tóg ag tỹ ti ki jēmêg tũ nỹtĩ, ag tỹ ti kamêg kĩ.

Ũ tỹ tỹ ũn mág nĩ

(Mt 18.1-5; Lc 9.46-48)

³³ Kĩ ag tóg mũ măn kĩ cidade tỹ Cafarnaum tá junjun mũ sir. Tá ag tóg ĩn ũ krêm nỹtĩ. Īn ěn tá junjun kĩ Jesus tóg ag

mỹ: “ăjag tỹ ne tó mũ nê, ěpry jagma?” he mũ.

³⁴ Hã ra ag tóg ti mỹ tó tũ nĩ. Ēmĩn jagma mũ kĩ ag tóg jagnê mỹ: “ũ nỹ hỹn ěg kăfór kar jê?” he ja nỹtĩ.

³⁵ Kĩ Jesus tóg nĩ mũ, kĩ tóg ũ tỹ 12 (ke) ag jê prêr mũ sir, kĩ tóg ag mỹ: “ăjag mỹ tỹ ũn mág nỹtĩ sór mũ?” he mũ. “Kỹ vēsȳ ũn sĩ ri ke nỹtĩmĩ,” he tóg.

³⁶ Kĩ tóg gĩr sĩ mỹ: “kunĩg,” he mũ. Ag kuju kă tóg ti fêg mũ, kĩ tóg ti jagma ă pê fón mũ sir, kĩ tóg ũ tỹ 12 (ke) ag mỹ: “ăjag hă vĩ tỹ inh mré ke nỹtĩ,” he mũ.

³⁷ “Ăjag tỹ tỹ inh mré ke nỹtĩ kĩ gĩr tỹ ge jê’ȳn nĩ, ti to há nỹtĩmĩ, isugrĩn. Ăjag tỹ isugrĩn ti to há nỹtĩn kĩ ăjag tóg iso há nỹtĩ gé,” he tóg. “Ăjag tỹ iso há nỹtĩ kĩ ăjag tóg ũ tỹ ĩjēnêg mũ ěn to há nỹtĩ gé sir,” he tóg, Jesus ti.

Ũ tỹ Jesus kato tẽ tũ nĩ kĩ ti mré ke

(Lc 9.49-50)

³⁸ Kĩ João tóg Jesus mỹ: “Senhor,” he mũ. “Ũ ve ěg tóg, kĩ ěn tóg ă jyjy tó kĩ vênh jagrê kórég pan tí, ěg tỹ ũn vэг mũ ěn tí,” he tóg mũ, Jesus mỹ. “Hã ra tóg ěg mré tí tũ nĩgtĩ, kĩ ěg tóg ti mỹ: “vênh jagrê kórég pan sór tũg nĩ,” hê,” he tóg, João ti, Jesus mỹ.

³⁹ Hã ra Jesus tóg ti mỹ: “ti tỹ vênh jagrê kórég pan kamêg tũg nĩ,” he mũ. “Ũ tỹ inh jiji tó kĩ nén han vãnh han kĩ tóg kar kĩ iso vĩ kónăn ke tũ nĩ,” he tóg.

⁴⁰ “Ũ tỹ ěg kato tẽ nĩ tũ nĩn kĩ ěg mré ke vê sir,” he tóg.

⁴¹ “Sȳ ke há vê, hă kĩ sóg tó mũ: kejēn ũ tóg ăjag mỹ goj fêg mũ, isugrĩn, ăjag tỹ tỹ inh mré ke nỹtĩ tugrĩn. Ēn tóg vênh kato nén ũ há venh ke mũ ge,” he tóg, Jesus ti.

Ēg tỹ Topê vĩ mranh

(Mt 18.6-9; Lc 17.1-2)

⁴² Kĩ tóg ag mỹ ke măn mũ. “Ũn sĩ tag vĩ inh ki rã kĩ jê. Kejēn ũ tóg ti tỹ inh vĩ mranh han sór mũ. Ēn jykre vĩ kórég

tāvi nỹ,” he tóg. “Ēn hã mỹ tóg há nỹnh mũ vễ, ù tỹ pó mág tỹ ti nunh to sa kỹ goj nig ki ti fón jé, ti tỹ goj ki ter jé. Jagy tāvi tóg tũ, ù tỹ gĩr tỹ isovãnh han kỹ,” he tóg.

⁴³ “Á tỹ nén ù vóg kỹ Topê vĩ mranh kỹ ã nĩnó kym nĩ, ã tỹ ke măn tũ nĩ jé. Jagy tóg nỹ, ã nĩnó pir ti. Jãvo tóg há nĩ, ã tỹ rĩr krỹg ja tũ venh ke mũ ti. Á tỹ ã nĩnó régre ra nũgme ki kutên kỹ tóg jagy kãfór tĩnh mũ, inferno ki kutên kỹ, pĩ nhyr vãnh ki kutên kỹ.

⁴⁴ Tá ga ga tóg ã konh mũ gé, hã ra tóg tỹ tũ' henh ke tũ nĩ. Tá pĩ ěn nhyr ke tũ nĩ gé.

⁴⁵ Á tỹ hẽ kátá tĩg kỹ Topê vĩ mranh kỹ ã pẽn kym nĩ, ã tỹ ke măn tũ nĩ jé. Jagy ti nỹ, ã tĩg vãnh ti. Hã ra tóg há nĩ, ã tỹ rĩr krỹg ja tũ venh ke mũ ti. Á tỹ ã pẽn régre ra nũgme ki kutên kỹ tóg jagy kãfór tĩnh mũ, inferno ki kutên kỹ.

⁴⁶ Tá ga (ga) tóg ã konh mũ gé, hã ra tóg tỹ tũ' henh ke tũ nĩ. Tá pĩ ěn nhyr ke tũ nĩ gé.

⁴⁷ Á tỹ nén ù ki vễĩ kỹ Topê vĩ mranh kỹ ã kanẽ tỹ nám kemnĩ, ã tỹ ke măn tũ nĩn jé. Jagy ti nĩ, ã kyvó ti. Jãvo tóg há nĩ, ã tỹ Topê tỹ tỹ ěg pã'i nĩ ven kỹ. Á tỹ ã kanẽ régre ra nũgme ki kutên kỹ tóg jagy kãfór tĩnh mũ, inferno ki kutên.

⁴⁸ Tá ga (ga) tóg ã konh mũ, hã ra tóg tỹ tũ' henh ke tũ nĩ. Tá pĩ ěn nhyr ke tũ nĩ gé,” he tóg, Jesus ti.

Sa to comparação

(Mt 5.13-16; Lc 14.34-35)

⁴⁹ “Pĩ tỹ ěg pũn ri ke ti nĩ, ěg jagãgtar ti. Kỹ ãjag jagãgtar nỹtĩn kỹ isugrĩn, kỹ ãjag jagãgtar ěn ki ãjag jykre tóg kuryj nỹ sir. Kỹ tóg sa ri ke nĩ,” he tóg.

⁵⁰ “Sa vỹ há nĩ. Hã ra sa kãhór nĩn kỹ tóg hã ra kórég nĩ, kỹ ěg tỹ ne tỹ ti tỹ kajã' henh ke tóg tũ tĩ, tỹ sa' he măn ke tóg tũ tĩ,” he tóg. “Kỹ sa há ri ke nỹtĩmnĩ. Jagnẽ to krĩ kusa nỹtĩmnĩ,” he tóg, Jesus ti.

Ěg tỹ ěg prũ fi fón ke tũ

(Mt 19.1-12; Lc 16.18)

10 Kỹ Jesus tóg tá kutẽ mũ, kỹ tóg ga tỹ Judéia ra tĩ mũ sir, goj tỹ Jordão mãra. Kỹ vãnh e ag tóg ti to vẽnhmãmãm mũ sir, kỹ tóg ag kanhrãn mãm mũ gé. Ti tỹ nén han tĩ ěn han mãm tóg mũ. ² Kỹ Fariseu ag tóg ti tá junjun mũ gé sir. Ag tỹ ón kỹ ti ki jẽmẽ sór vễ, vãnh prũ fón ke to. Kỹ ag tóg ti mỹ: “ěg tỹ ěg prũ fi mỹ: ha tĩg, he tag mỹ kuryj nỹ?” he mũ. Ag tỹ ón kỹ ti vĩ mẽ sór vễ hã ra.

³ Kỹ tóg ag mỹ: “Moisés ãjag mỹ hẽ ri kẹ?” he mũ.

⁴ Kỹ ag tóg ti mỹ: “Moisés hã tóg ěg mỹ: ã tỹ ã prũ fi fón sór kỹ fi mỹ vãnh rãn kỹ nĩm, fi tỹ kar kỹ tĩg jé, he ja nĩ, Moisés ti,” he ag tóg.

⁵ Hã ra Jesus tóg ag mỹ: “ãjag fe kórég nỹtĩn kỹ, hã kỹ tóg ãjag mỹ tag tó ja nĩ, vãnh rãn ki, Moisés ti,” he mũ. ⁶ “Topê tỹ nén kar han ve ki tóg ti mré fi han,” he tóg. ⁷ “Hã kỹ ùn gré tóg ã prũ fi to ã panh re kỹ tĩnh mũ, ã mỹnh fi ré kỹ ke gé. Á prũ fi mré tóg tĩnh mũ. ⁸ Fi mré tóg tỹ ùn pir nĩ sir, ã prũ fi mré, he tóg. Topê ti. Hã kỹ fag tóg tỹ ùn pir nỹtĩ. Fag pi(jé) tỹ ùn régre nỹtĩ”. ⁹ Hã kỹ fag tỹ vãnh kãpãm tũg nĩ. Topê tỹ fag tỹ ùn pir há(r) vễ mỹr,” he tóg, Jesus ti.

¹⁰ Ag tỹ ěn kátá nỹtĩn kỹ ti mré mũ ti ag tóg ti ki jẽmẽ mãm mũ, vãnh prũ fón to. ¹¹ Kỹ Jesus tóg ag mỹ: “ãjag tỹ ãjag prũ fi fón kar kỹ ù fi tỹ prũg mãm kỹ ãjag prũ tũ fi vễ, ha mẽ,” he mũ. ¹² “Kỹ fi tỹ ã mén fón kar ù tỹ mén mãm kỹ fi mén tũ vễ gé,” he tóg, Jesus ti.

Jesus tỹ gĩr mỹ vĩ há han

(Mt 19.13-15; Lc 18.15-17)

¹³ Jo fag tóg gĩr tatĩ kãmũ mũ, Jesus tỹ ã nĩgé tỹ ag mẽ jé. Hã ra ti mré mũ ti ag tóg fag to jũ mũ, ù tỹ ag tatĩ kãmũ mũ fag to.

¹⁴ Hã ra Jesus tóg vég mû, kÿ tóg ã mré mû tĩ ag to jũ mû. Kÿ tóg ag mÿ: “vĩ tũg nĩ, gĩr ag mÿ,” he mû, “gĩr ag tÿ iso kãmũ kamẽg tũg nĩ,” he tóg. “Û tÿ ge hã vÿ ãg Senhor tÿ Topẽ krẽm nÿtĩ nĩ,” he tóg. ¹⁵ “Sÿ ke há vẽ, hã kÿ sóg tó mû: gĩr ag vÿ iso há pẽ nÿtĩ. Ûn kãsir tag ag ri ke nÿtĩmni, ke tũ nĩ (mũ) ra ãjag tóg venh ke tũ (pẽ) nĩ, Topẽ tÿ tÿ ãg pã'i nĩ ti,” he tóg.

¹⁶ Kÿ tóg gĩr jagma ã pẽ fón mû sir, ã nĩgẽ tÿ tóg ag mẽ kãn mû sir, ag to tóg Topẽ mré vĩ mû sir.

Ûn rico kãme

(Mt 19.16-30; Lc 18.18-30)

¹⁷ Kÿ Jesus tóg tĩg mãn mû gé sir. Ti tÿ tĩg ke jẽ ra ù tóg ti to vẽn hvãg kãti mû, kÿ tóg ã jakrĩ tÿ jẽ mû, kÿ tóg ti mÿ: “Senhor,” he mû. “Hã pẽ ã tóg nĩ,” he tóg. “Sÿ inh rĩr krÿg ja tũ venh há tóg tĩ. Sÿ ti ve jé inh hÿn vẽn jykre há tÿ hẽ ri ke han mû?” he tóg.

¹⁸ Kÿ Jesus tóg ti mÿ: “ã tÿ ne jé iso: há ã nĩ, he nẽ?” he mû. “Ëg pi(jé) há nÿtĩ” he tóg. “Topẽ hã ne ã pir mÿ há nĩ,” he tóg. ¹⁹ “Topẽ tÿ nẽn to ãg jyvẽn ki kanhró ã tóg nĩ, hã vÿ: ù tén tũg nĩ, he mû, ã prũ tũ fi mré nÿ tũg nĩ, he mû, nẽn ù pēju(g) tũg nĩ, he mû, ù to ón tũg nĩ, he mû, vẽn mÿ mẽ nĩ tũg nĩ, he mû, ã nÿ mré ã jóg kamẽg nĩ, he mû,” he tóg ti mÿ, Jesus ti.

²⁰ Hã ra tóg Jesus ti mÿ: “tag kar ki sóg króm kãn, isĩn kã,” he mû, kyrũ ti.

²¹ Kÿ Jesus tóg ti ki ãvãnh mû, kÿ tóg tÿ ti fe jẽ. Kÿ tóg ti mÿ: “nẽn ù pir vÿ tũ nĩ ver,” he mû. “Ã tũ kar vãm tũg, ã tÿ ùn jagãgtar ag mÿ vin jé, jãnkamy ti. Kÿ ã tóg kanhkã tá tũ mág nĩ sir. Kar kãtĩg nĩ, ã tÿ inh mré tĩg jé,” he tóg, Jesus ti. ²² Kÿ tóg ti mÿ vẽn hmÿ tĩ, Jesus vĩ ti. Kÿ tóg fe kaj tĩ mû sir, ti tũ e nĩn kÿ.

²³ Kÿ Jesus tóg vẽn pẽnĩn ãvãnh kÿ ã mré mû tĩ ag mÿ ke mû sir. “Jagy ti nÿ, ùn rico tÿ Topẽ tÿ tÿ ãg pã'i nĩ venh ke ti,” he tóg. ²⁴ Kÿ ti vĩ tóg ti mré mû tĩ ag

mÿ e tĩ. Hã ra Jesus tóg ag mÿ ke mãn mû. “Inh krẽ,” he tóg. “Jagy tãvĩ ti nÿ mÿr, Topẽ tÿ tÿ ãg pã'i nĩ venh ke ti,” he tóg. ²⁵ “Cavalo pãnĩ sór vÿ prẽj nor fin kutẽ tũ nĩ,” he tóg. “Ti tÿ fin kutẽ há nĩn ra tóg ver jagy tĩ vẽ, ùn rico tÿ Topẽ tÿ tÿ ãg pã'i nĩ venh ke ti,” he tóg.

²⁶ Kÿ tóg ag mÿ e (pẽ) tãvĩ tĩ. “Kÿ ù hÿn kren ke tũ pẽ nĩ,” he ag tóg, jagnẽ mÿ.

²⁷ Kÿ Jesus tóg ag ki ãvãnh kÿ ag mÿ: “ẽprã ke ag vÿ vẽn krenkren han ki kagtĩg nÿtĩ,” he mû. “Ag jãvo Topẽ tóg ãg krenkren han ki kanhró nĩ,” he tóg. “Topẽ hã tóg nẽn kar han ke ki kanhró nĩ inhhã,” he tóg, Jesus ti.

²⁸ Kÿ Pedro tóg ti mÿ: “ha vé,” he mû. “Ëg tÿ nẽn ù kar ré kÿ ãg tóg ã mré mû mû,” he tóg ti mÿ.

²⁹ Kÿ Jesus tóg ag mÿ ke mãn mû. “Sÿ ke há vẽ, hã kÿ sóg tó mû,” he tóg mû. “Û tóg kejẽn isugrĩn ã jamã ré kÿ tĩ mû, ã jãvy ré kÿ tĩ mû, ti kãke, ti ve, ti mÿnh, ti panh, ti krẽ, ti japÿ ré kÿ tĩ mû gé, isugrĩn, vẽn vĩ sér tugrĩn,” he tóg. ³⁰ “Ën vÿ tóg sir vẽn kato ù tÿ 100 (ke) venh ke mû, ùri hã ra, hã vÿ: ãmã kar, he mû, jãvy kar, kãke kar, ve kar, mÿnh kar, ẽpÿ kar ve jé tóg ke mû. Hã ra ag tóg ti vóg kónãn ke mû gé. Kar kÿ tóg vãhã sir rĩr krÿg ja tũ venh ke mû gé,” he tóg.

³¹ “Jãvo tag ki ùn mág ù tÿ tá tÿ ùn kãsir nÿtĩnh ke vẽ, tere kÿ, kÿ tag ki ùn kãsir ù tÿ tá tÿ ùn mág nÿtĩnh ke vẽ,” he tóg, Jesus ti.

Jesus tÿ ã jagtar ke tó mãn

(Mt 20.17-19; Lc 18.31-34)

³² Kar kÿ ag tóg mû nĩ sir, Jerusalém ra, Jesus mré mû tĩ ag, kÿ Jesus tóg ag jãmĩ tĩ nĩ. Hã ra tóg ag mÿ e tĩ, ti nón mû ag tóg mũmẽg mû sir, ag tÿ Jerusalém ra mũn kÿ. Kÿ Jesus tóg ù tÿ 12 (ke) ag mÿ vẽn kãmén mãn mû, vyr mÿ. Ti tÿ ag mÿ ã tÿ nẽn venh ke ãn tó mãn sór vẽ. ³³ Kÿ tóg ag mÿ: “ha vé, Jerusalém ra ãg

tóg mū mū,” he mū. “Ēprā ke fi kósín ěn vỹ jagtar ke mū. Inh hā vē. Ōn kỹ Topē tū ki rĩr tĩ to pā’i ag tóg ag tỹ isỹ nén han sór mū ěn han ke mū, Topē vĩ to professor ag ke gé,” he tóg. “Ag tỹ iso: ter jé tóg ke mū, henh ke vē,” he tóg. “Kar kỹ ag tóg fóg ag mỹ inh fēg ke mū,” he tóg. ³⁴ “Kỹ ěn ag tỹ iso é henh ke vē, iso sug ke vē, inh mrānmrān ke vē gé, isén ke vē gé. Kar kurā tǎgtū ki sóg hā ra rĩr mǎn mū sir,” he tóg, Jesus ti.

Tiago mré João tỹ tỹ pā’i jě sór

(Mt 20.20-28)

³⁵ Kỹ Tiago mré João ag tóg ti kukām mū mū, Zebedeu krē ag. “Senhor,” he ag tóg ti mỹ. “Ēg mỹ ěg tỹ nén to vỹ tag ti han,” he ag tóg, Jesus mỹ.

³⁶ Kỹ tóg ag mỹ: “ne nē, sỹ ājag mỹ han ke ti?” he mū.

³⁷ Kỹ ag tóg ti mỹ: “kejēn ā tóg tỹ pā’i nĩnh mū,” he mū. “Kỹ sỹ ā pēgja tá nĩnh há tóg tĩ vē,” he tóg, jo ũ tóg: “sỹ ā jakānh tá nĩnh há tóg tĩ vē,” he mū gé. “Ēg tỹ ā rā hā nỹtĩnh há tóg tĩ vē, ā tỹ tỹ pā’i nĩn kỹ,” he ag tóg ti mỹ.

³⁸ Hā ra Jesus tóg ag mỹ: “ājag tỹ nén to vỹ mū ki kagtĩg ājag tóg nỹtĩ,” he mū. “Ājag mỹ inh ri kén jagtar sór mū?” he tóg. “Ājag mỹ ājag jagtar jagy tag to krónh kenh ke tũ nĩ vỹ?” he tóg.

³⁹ Kỹ ag tóg ti mỹ: “hỹ, ke jé ěg tóg ke mū,” he mū. Hā ra Jesus tóg ag mỹ: “hỹ, jagtar jé ājag tóg ke mū, inh ri kén,” he mū. “Vēsỹrénh jé ājag tóg ke mū, inh ri kén,” he tóg. ⁴⁰ “Hā ra isũ tũ vē, sỹ ājag mỹ: hej, he ti,” he tóg. “Ha inh pēgja tá nĩ, henh ke tũ sóg nĩ,” he tóg. “Ha inh jakānh tá nĩ, henh ke tũ sóg nĩ gé,” he tóg. “Isũ tũ vē. Ũ tỹ inh rā nỹtĩnh ke ěn ag tỹ inh rā nỹtĩnh ke vē,” he tóg.

⁴¹ Hā ra ũ tỹ 10 (ke) ag tóg mēg mū, kỹ ag tóg ag to jũ mū, João mré Tiago to.

⁴² Kỹ Jesus tóg ag jé prēr kǎn mū, kỹ tóg ag mỹ kāmén mū. “Fóg ag pā’i ag

jykre ki kanhró ājag tóg nỹtĩ,” he tóg. “Vēnh kar jēgnēg ag tóg tĩ, kỹ ag mág ag tóg vēnh kar mỹ: kemnĩ, ke tũg nĩ, he tĩ, vỹ tar han kỹ,” he tóg. ⁴³ “Ag ri ke han tũg nĩ. Ājag mỹ tỹ ũn mág nỹtĩ sór mū? Kỹ tỹ jagnē camarada ri ke nỹtĩmnĩ, jagnē tũ ki rĩr kỹ. ⁴⁴ Ājag mỹ tỹ pā’i nỹtĩ sór mū? Kỹ jagnē krēm ke nỹtĩmnĩ, tỹ ũn kāsir nỹtĩmnĩ. ⁴⁵ Hā kỹ sóg camarada tũ nĩ gé,” he tóg. “Sỹ tỹ camarada nĩ jé sóg kǎtig, sỹ ājag ki rĩr jé. Tỹ sóg ěprā ke fi kósín nĩ. Hā kỹ sóg vēnh kar jagfy ter ke mū, sỹ ag krenkren han jé,” he tóg, Jesus ti.

Ũn kyvó tỹ há’ he

(Mt 20.29-34; Lc 18.35-43)

⁴⁶ Kejēn ag tóg ěmā tỹ Jericó tá junjun mū. Ag tỹ Jerusalém ra mū vē. Kar kỹ tóg Jericó ki kutē mū gé, Jesus ti. Ti mré mū tĩ ag tóg ti mré mū mū, vēnh e kar ag ke gé. Hā ra Bartimeu tóg ěpry kri nĩ nĩ. Kyvó ti nĩ, hā kỹ tóg ěmĩn fyr kri nĩ kỹ: “inh mỹ nén ũ nĩm,” he nĩgtĩ, Timeu kósín tag ti. ⁴⁷ Ēn tóg Jesus tỹ ěpry jagma tĩg mēg mū sir, Nazaré tá Jesus ti. Kỹ tóg prēr mū sir. “!..Jesus!..!” he tóg. “!..Davi kósín!..! !..Ijagǎgtǎn ra..!” he tóg.

⁴⁸ Hā ra ag tóg ti to jũgĩũ mū. “Mē kǎ nĩ nĩ,” he ag tóg ti mỹ. Hā ra tóg prēr mǎn’, prēr mǎn’, he mū. “!..Davi kósín!..!” he tóg. “!..Ijagǎgtǎn ra..!” he tóg.

⁴⁹ Kỹ Jesus tóg ti to krỹg he mū. Kỹ tóg ti jé prēr’ he mū sir. Kỹ ag tóg ũn kyvó ěn jé prēr mū sir. “Ā fe tỹ há’ hé, jēg ra, ā jé prēr tóg mū,” he ag tóg ti mỹ. ⁵⁰ Kỹ tóg ā palitó fón kỹ jēgnē mū sir, Jesus to tóg tĩ mū sir.

⁵¹ Kỹ Jesus tóg ti mỹ: “inh ā tỹ hē ri kenh ke?” he mū. Kỹ ũn kyvó tóg: “Senhor,” he mū. “Sỹ venh há tóg tĩ,” he tóg. ⁵² Kỹ Jesus tóg ti mỹ: “hej,” he mū. “Ā tỹ há’ henh ke nē ha,” he tóg. “Ā tỹ inh ki rā kỹ ā há’ henh ke mū,” he tóg. Kỹ tóg vēsỹmēr ěvǎnh há’ he mū sir, kỹ tóg ti nón tĩ mū sir, ěpry jagma.

Jesus tỹ Jerusalém tá jun

(Mt 21.1-11; Lc 19.28-40; Jo 12.12-19)

11 Vāhā ag tóg cidade tỹ Jerusalém kakó tá nỹtĩ. Kỹ ag tóg ěmā tỹ Betânia tá junjun vén mũ, ěmā tỹ Betfagé tá, krĩ tỹ Oliveiras tá ke gé. Kỹ Jesus tóg ā mré mũ tĩ régre ag jěgněg mũ, ag tỹ ěmā ěn ra mũ jé. ²“Ha ěmā ěn ra mũjěg,” he tóg, “ěg jo ěmā nĩ ěn ra. Ājag tỹ tá jun kỹ ājag tóg burrica fi krě venh ke mũ. Se kỹ tóg jě,” he tóg. “Ũ vỹ ver ti kri nĩ ja tũ nĩ,” he tóg. “Ti kavān kỹ ti pére kāmũmnĩ,” he tóg. ³“Hěn ri ke mũn ag tóg ājag mỹ: ājag tỹ ne jé ti kyvān ně? henh mũ. Kỹ ag mỹ: ěg Senhor tóg ti ve sĩ han sór mũ, hemnĩ. Kānhmar tóg ti jěně mǎn mũ, hemnĩ,” he tóg ag mỹ, Jesus ti.

⁴Kỹ ag tóg mũ mũ sir. Burrica krě vég ag tóg mũ, jānkā rā tóg se kỹ jě, ěmĩn kri. Kỹ ag tóg ti kavāg mũ sir.

⁵Kỹ ag tóg ag mỹ ke mũ. “Ājag tỹ ne jé burrica sĩ kyvān ně?” he ag tóg ag mỹ.

⁶Kỹ ag tóg Jesus tỹ ājag mỹ nén tó ja ěn ti tó mũ, kỹ ag tóg: “ha ma mũjěg ge,” he mũ. ⁷Kỹ ag tóg burrica krě ma mũ mũ sir, Jesus to. Ājag kur tỹ ag tóg ti kri kugjén mũ sir, jumento sĩ ěn kri, kỹ tóg kri nĩ mũ sir, Jesus ti. ⁸Kỹ vėnh kar tóg ājag kur kugjén mũ sir, ěpry kri, jo ũ ag tóg ka féj krég mũ gé, ěpỹ tá, ti jo vāvām jé. ⁹Kỹ ũ ag tóg ti jāmĩ mũ mũ, jo ũ ag tóg ti nón mũ mũ. ěn ag tóg prěnpřer mũ sir. “!..Viva..!” he ag tóg, “!..pā'i vỹ ěg tá jun, ěg Senhor mág tỹ ti jěněn kỹ..! ¹⁰!..Sér tǎvĩ tóg tĩ..! !..Ěg pā'i vė mỹr, ěg jóg'jóg tỹ Davi ri kén..! !..Topě tá tóg kǎtĩg, ũ tỹ kynhmỹ nĩ ěn tá, viva..!” he ag tóg mũ, prěnpřer kỹ.

¹¹Kỹ tóg Jerusalém ra rā mũ sir, Jesus ti. Topě jo ěn ra tóg rā mũ sir. Nén kar ki ěvānh kar tóg Betânia ra tĩg mǎn mũ, ũ tỹ 12 (ke) ag mré, rǎké ra.

Ka tỹ figueira

(Mt 21.18-19)

¹²Tỹ vaj kỹ, ag tỹ Betânia tá kāmũ kỹ tóg kókĩr mũ, Jesus ti. ¹³Hā ra tóg ka tỹ figueira féj vég mũ sir, tǎtǎ. Kỹ tóg to tĩ mũ sir, ti kaně ko jé. Tá jun kỹ tóg vég mũ, hā ra tóg féj tǎvĩ jé. Ti kaněn ke pétēm tũ tóg nĩ ver. ¹⁴Kỹ tóg ka tỹ figueira mỹ: “ũ tóg ā kaně ko mǎn ke tũ nĩ ha,” he mũ. Hā ra ti mré mũ tĩ ag tóg ti vĩ měg mũ.

Jesus tỹ Topě jo ěn krēm ag pan

(Mt 21.12-17; Lc 19.45-48; Jo 2.13-22)

¹⁵Kỹ ag tóg mũ mǎn kỹ Jerusalém tá junjun mũ sir. Topě jo ěn ra tóg rā mũ sir, Jesus ti, kỹ tóg tá ag pan kǎn mũ sir, nén ũ vender he tĩ ag, nén ũ comprar he tĩ ag ke gé. Topě jo ěn krēm ag tóg negociar he tĩ, jānkamy trocar he tĩ ag ke gé. Ag mesa tỹ tóg vyryn ke mũ, Jesus ti. Sórāg vender he tĩ ag nĩgnĩ jafǎ tỹ tóg vyryn ke mũ gé sir. ¹⁶Kỹ tóg ag tỹ Topě jo ěn ěn nén gé mũ kaměg mũ gé sir. ¹⁷Kỹ tóg ag kanhrān kỹ ag mỹ: “Topě vĩ rá to jykrén nĩ,” he mũ. “Inh ěn jiji vỹ: nação kar mỹ Topě mré vĩ jafǎ, he mũ, he tóg, Topě vĩ rá ki,” he tóg, Jesus ti. “Hā ra ājag tóg Topě mré vĩ jafǎ tag krēm nén kar pigju(g) mũgtĩ, kỹ tóg bandido ag jamā ri ke nĩ,” he tóg. Ag pan kỹ tóg ke mũ, Jesus ti.

¹⁸Hā ra Topě tũ ki rĩr tĩ to pǎ'i ag vỹ Jesus vĩ měg mũ, Topě vĩ to professor ag ke gé. Kỹ ag tóg: “ěg hỹn ti tỹ hěn ri kenh ke mũ?” he mũ, “ěg tỹ ti tỹ tũ' he jé?” he ag tóg mũ. Hā ra ag tóg ti kaměg mũ. Vėnh kar mỹ tóg há tĩ, ti tỹ ag kanhrān kỹ. Hā kỹ ag tóg ti vóg tũ nĩ.

¹⁹Kutyg kỹ ag tóg cidade mág ki pa mǎn mũ sir, Jesus ti, ti mré mũ tĩ ag ke gé.

Ka tỹ figueira tóg

(Mt 21.20-22)

²⁰Tỹ vaj kỹ ag tóg cidade ra mũ mãn mũ sir. Mũ kỹ ag tóg sir ka tỹ figueira ên vэг mũ, hã ra tóg tóg ja nĩ, ti jãre mré hã.

²¹Kỹ Pedro tóg Jesus vĩ ki jykrén kỹ ti mỹ: “ha vé, Senhor,” he mũ. “Ã vĩ ja ên hã vè,” he tóg. “Ã tỹ ka to vĩ kónân ên vỹ tóg ja nĩ, ka tỹ figueira ên ti,” he tóg.

²²Kỹ Jesus tóg ag mỹ: “Topê ki ge pẽ han nĩ,” he mũ. ²³“Sỹ ke há vè, hã kỹ sóg tó mũ: kejẽn ãjag tóg krĩ tag ti mỹ: ha goj nig ki kutẽ, henh ke mũ. Kỹ tóg ki kutẽn mũ, pãnónh ti, ãjag tỹ ãjag fe tỹ: ti mỹ ki kutẽn mũ vỹ? he tũ nĩn kỹ,” he tóg. “Inh vĩ han jé tóg ke mũ, pãnónh ti, hemnĩ, kỹ tóg kutẽn ke mũ, ha vemnĩ,” he tóg, Jesus ti. ²⁴“Hã kỹ sóg ãjag mỹ ke mũ,” he tóg. “Ãjag tỹ Topê mỹ nén ù to vỹ kỹ to: han jé tóg ke mũ, Topê ti, hemnĩ, kỹ ãjag tóg venh ke mũ sir, ãjag tỹ ti mỹ nén ù to vỹ mũ ti,” he tóg. ²⁵“Ãjag tỹ kejẽn Topê mré vĩ jẽ ra ù tỹ ãjag to jũ mũ ên tỹ ti mỹ vènh pãte fón nĩ,” he tóg. “Ãjag tỹ gen kỹ tóg ãjag mỹ vènh pãte fón ke mũ gé, ãg jóg mág ti,” he tóg. “Ãjag tỹ ti vỹ mranh mũ ra tóg vènh kato ãjag mỹ vènh pãte fón ke mũ, ù tỹ kanhkã tá nĩ ti, ãjag tỹ ãjag mré ke ag mỹ vènh pãte fón kỹ,” he tóg. ²⁶“Ãjag tỹ hã ra ag mỹ vènh pãte fón tũ nĩn kỹ ãg jóg mág vỹ vènh kato ãjag mỹ vènh pãte fón ke tũ nĩ gé, ù tỹ kanhkã tá nĩ ti,” he tóg, Jesus ti.

Jesus tỹ ù tỹ ã jẽnẽg mũ tó tũg

(Mt 21.23-27; Lc 20.1-8)

²⁷Kỹ ag tóg mũ mãn kỹ Jerusalém tá junjun mãn mũ sir. Topê jo ãn tá tóg êvãnh tĩ mũ, Jesus ti. Kỹ Topê tũ ki rĩr tĩ to pã'i ag tóg ti venh kãmũ mũ, Topê vĩ to professor ag ke gé, kófa ag ke gé. ²⁸“Û nỹ ã mỹ: tag han nĩ, hé?” he ag tóg, ti mỹ. “Û nỹ ã jẽnẽ?” he ag tóg.

²⁹Kỹ Jesus tóg ag mỹ: “ãjag ki sóg jẽmẽnh ke mũ gé, vènh kato,” he mũ. “Ãjag tỹ inh mỹ tó há han kỹ sóg ãjag mỹ ù tỹ inh jẽnẽg mũ tónh ke mũ gé,” he tóg. ³⁰“João vỹ ag kygpég tĩ ja nĩgtĩ. Ti mỹ kanhkã tá vènh jykre han, ãjag mỹ, ãprã ke jykre vó? Û nỹ ti jẽnẽ?” he tóg ag mỹ, Jesus ti. “Inh mỹ tó,” he tóg.

³¹Kỹ ag tóg jagnẽ mré to jykrén mũ. “Ëg tỹ ti mỹ: Topê tỹ ti jẽnẽ ja vè, hen kỹ tóg ãg mỹ: ãjag tỹ ne jé ti vỹ kri fig tũ ja nĩ nẽ? henh ke mũ,” he ag tóg jagnẽ mỹ. ³²“Ëg tỹ hã ra ti mỹ: ãprã ke jykre ja vè, hen kỹ tóg vènhmỹ nỹ gé,” he ag tóg, ag tỹ vènh kar kamẽg kỹ. Vènh kar tóg João to: “Topê vĩ tó ti pẽ vè,” he tĩ. ³³Hã kỹ ag tóg Jesus mỹ: “ãg pi(jé) ki kanhró nỹtĩ,” he mũ. “Ón kỹ ag tóg ke mũ. Kỹ Jesus tóg ag mỹ: “kỹ sóg ãjag mỹ tónh ke tũ nĩ gé, ù tỹ inh jẽnẽg mũ ti,” he mũ. ã kato tẽ mũ ag mỹ tóg ke mũ.

Ûn camarada kórég ag to comparação

(Mt 21.33-46; Lc 20.9-19)

12 Kỹ Jesus tóg ag kanhrãn kỹ (tóg) ag mỹ comparação ù han mũ sir, kỹ tóg: “kejẽn ù tóg nĩgtĩ,” he mũ. “Nén kanẽ tỹ uva krãn ja tóg nĩgtĩ,” he tóg. “Pénĩn tóg rón ja nĩ, kãki tóg kũm ja nĩgtĩ, uva jẽgmĩ jafã han jé. Ki tóg pãjó han ja nĩ gé, kỹ tóg ù tỹ ki rĩr tĩ ag mỹ ré kỹ tĩg ja nĩ, ga ù ra. Ag mré tóg jykrén ja nĩ, ag tỹ ti mré êkré ên kanẽ vènh kãpãm jé,” he tóg, Jesus ti. ²“Ti tỹ kejẽn kanẽ kỹ tóg ag mỹ ã camarada ù jẽnẽg mũ, ti tũ ki rĩr tĩ ag mỹ, ag tỹ ti mỹ vènh kãpãm jé, uva ti.

³Hã ra ag tóg ti kãgmĩg mũ sir, ti mrãnmrãn ag tóg mũ sir, kỹ ag tóg ti mỹ: “ha tĩg,” he mũ sir, ti mỹ nén ù nĩm mẽ kã. ⁴Kỹ tóg ag mỹ ã camarada ù jẽnẽ mãn mũ gé sir, kỹ ag tóg ti krĩ ki tãnh mũ sir, ti to é he ag tóg mũ sir. ⁵Kỹ tóg ag mỹ ù jẽnẽ mãn mũ gé sir, hã ra ag tóg ti tén mũ gé sir. Ti camarada kar to ag

tóg jũ mũ, ù mrânmrân ag tóg, ù tén ag tóg.

⁶Kỹ hã ra ù tóg kén mũ, hã ra ti kósin vë, ti fe pë vë hã ra. Kỹ tóg vâhã ag mý ti jênêg mũ sir. “Hên ri ke mûn ag inh kósin kamêg mũ,” he tóg, hã kỹ tóg ti jênêg mũ.

⁷Ti tỹ tá jun kỹ ag tóg ti to jykrén mũ, jagnê mré. “Kejên êkré kar vỹ tỹ ti tũ ninh mũ, ha vemni,” he ag tóg ti to. “Mũ nỹ, ti tén jé, ti tũ tag tỹ tỹ êg tũ nỹnh jé,” he ag tóg, jagnê mý. ⁸Kỹ ag tóg ti kâgmĩ kỹ ti tén mũ sir, ró mãtã ag tóg ti fón mũ sir,” he tóg, Jesus ti.

⁹“Kỹ êkré tỹ tũn mũ ên hê ri kenh ke mũ?” he tóg. “Jun jé tóg ke mũ, ã camarada ag kâgtén jé. Kỹ tóg êkré ki rĩr tĩ ù ag mý finh ke mũ, ti tũ ti,” he tóg. Jesus ti, ag mý comparação han kỹ.

¹⁰Kỹ tóg ag mý: “Topê vĩ rá tag to jykrén nĩ, ha mẽ,” he mũ. “Pó tỹ ãn han jafã fón ag tóg, pó tỹ ãn han tĩ ag. Ag mý tóg kórég ja nĩ, pó ên ti. Hã ra Topê tóg po ên hã tỹ ãn nũna han mũ. ¹¹Êg Senhor mág tỹ há vë, hã kỹ tóg êg mý e tĩ, êg tỹ ven kỹ, he tóg, Topê vĩ tỹ rán kỹ nĩ ki,” he tóg ag mý, Jesus ti. Ti tỹ ã kato vãsãnsãn mũ ag mý vênh kãmén hã vë.

¹²Kỹ ag tóg ki kanhró nỹtĩ, ti tỹ ag kato vĩ mũ ti. Hã kỹ ag tóg ti se sór mũ, hã ra ag tóg vênh e ên kamêg mũ, kỹ ag tóg ti ség tũ nĩ ha. Kỹ ag tóg sir mũ mũ, ti ré kỹ.

Êg tỹ imposto kajãm ke

(Mt 22.15-22; Lc 20.20-26)

¹³Hã ra ag tóg ti to ù ag jêgnêg mũ sir, Fariseu ù ag, Herodes mré ke ù ag ke gé, ag tỹ ti vĩ to ti se jé, Jesus ti. ¹⁴Ag tỹ ti tá junjun kỹ ag tóg ti mý: “Senhor,” he mũ. “Ã jykre kuryj nĩn ki kanhró êg tóg nỹtĩ,” he ag tóg, ón kỹ. “Vênh jykre pir hã han ã tóg tĩ, vênh kar mý. Kỹ ag ve tóg ã mý tỹ nén ù tũ nĩ. Hã kỹ ã tóg Topê jamĩn to, Topê japry to ã tóg êg kanhrãn há han tĩ,” he ag tóg, ón kỹ, Jesus mý. “Mý há

nỹ, êg tỹ governo mý jãnkamy nĩm ke ti', imposto kajãm ke ti'? ¹⁵Êg mý hỹn nĩm mũ, vó mý vó?” he ag tóg.

Hã ra Jesus tóg ki kanhró nĩ, ag jykre régre nỹtĩn ki. Kỹ tóg ag mý: “ãjag ne tóg ón kỹ inh ki jêmê sór mũ,” he mũ. “Inh mý jãnkamy jun, sỹ ve jé,” he tóg. ¹⁶Kỹ ag tóg ti mý ù jun mũ sir. Kỹ tóg: “ũ jiji nỹ kã nĩ?” he mũ. “ũ kâggrã nỹ kã nĩ?” he tóg. Kỹ ag tóg ti mý: “pã'i mág tỹ imperador kâggrã vë,” he mũ.

¹⁷Kỹ Jesus tóg ag mý: “kỹ pã'i mág mý ti tũ nĩmni, hã ra Topê mý ti tũ nĩmni gé,” he mũ. Kỹ ti vĩ tóg ag mý e tĩ. Ag tỹ nén ù to ti se sór mũ vëg tũ ag tóg nĩ.

Êg tỹ êg ter ja tá vỹn kenh ke

(Mt 22.23-33; Lc 20.27-40)

¹⁸Kỹ Saduceu ag tóg ti tá junjun mũ gé, ti ki jêmê jé. Hã ra Saduceu ag tóg: êg ter ja tá êg vỹn kenh ke tũ nĩ,” he tĩ. Kỹ ag tóg Jesus tá jun kỹ ti mý: ¹⁹“Senhor,” he mũ gé. “Moisés tóg êg mý tag tó ja nĩ, êg tỹ tỹ jykre nỹtĩ jé,” he ag tóg. “Êg mý tóg: ã régre tỹ ã krê tũ ra ter kỹ, ã tỹ ti prũ fi tỹ prũg ke vë, he mũ. ã tỹ ã régre mý ã krê han ke vë, fi ki, he ja tóg nĩ, Moisés ti,” he ag tóg, Jesus mý, Saduceu ag. ²⁰“Kỹ ù tỹ jagnê mré pafa ja tỹ 7 (ke) ag vỹ nỹtĩ ja nĩgtĩ,” he ag tóg. “Ag kãke tóg prũg mũ, hã ra tóg ã kósin tũ ra ter mũ sir,” he ag tóg. ²¹“Kỹ ti jãvy tóg fi tỹ prũg mũ, hã ra tóg ã kósin tũ ra ter mũ gé sir. Kỹ ti jãvy ù vĩ fi tỹ prũg mũ gé,” he ag tóg. ²²“Hã ra ag kar tóg fi kósin tũ ra kãgter kãn mũ sir, ag kãke ti nón, ù tỹ 7 (ke) ên ag. Kejên fi tóg vâhã ter mũ gé sir,” he ag tóg. ²³“Kỹ fag kãgter ja tá vỹnvỹn ke kỹ fi hỹn mén tỹ 7 (ke) ninh mũ vë. Ag kar vĩ fi tỹ prũg ja nỹtĩgtĩ. Hã kỹ tóg vênhmý nỹ, ag tỹ: rĩr mãn jé êg tóg ke mũ, hen kỹ,” he ag tóg, Jesus ti mý, Saduceu ag.

²⁴Hã ra Jesus tóg ag mý: “ãjag pi(jé) Topê vĩ tỹ rán kỹ nĩ ki kanhró nỹtĩ,” he mũ, “Topê jykre ki kagtĩg ãjag nỹtĩ,” he

tóg. “Hã kÿ ãjag tóg kygnê ja nĩ,” he tóg ag mÿ. ²⁵ “Ëg tÿ ãg ter ja tá vÿn ke kÿ ãg prüg ke tũ nĩ, kÿ ãg mên ke tũ nĩ gé,” he tóg. “Topê tÿ jëgnê jafã ri ke ãg nÿtĩ, kanhkã tá,” he tóg. ²⁶ “Topê vĩ ù to jykrén nĩ, ti tÿ ãg tÿ ãg ter ja tá vÿn ke kãmén kÿ. Moisés tÿ rán ki tag tóg rán kÿ nĩ, Topê tÿ Moisés mÿ nén tó ja tag ti, vãnh pür kãmén jan ki,” he tóg. “Topê tóg ti mÿ: Abraão vÿ iso: Topê, he tĩ, he ja nĩ, Isaque ke gé, Jacó ke gé, he ja tóg nĩ, Topê ti. Kãgter ag huri, Abraão, Isaque, Jacó. Hã ra Topê tóg: tÿ inh ag Topê nĩ, he ja nĩ, ag ter kar kÿ. ²⁷ Hã kÿ ag tóg rĩnrĩr nÿtĩ mÿr, Topê tÿ ùn rĩnrĩr nÿtĩ ag hã kri ke nĩn kÿ,” he tóg, Jesus ti. “Hã kÿ ãjag tóg kygnê tâvĩn mũ,” he tóg, Jesus ti, Saduceu ag mÿ.

Topê tÿ ãg jyvên kãfór

(Mt 22.34-40; Lc 10.25-28)

²⁸ Hã ra Topê vĩ to professor ù tóg tá jun mũ gé sir. Kÿ tóg ag tÿ jagnê mré vĩ mæg mũ, Jesus tÿ Saduceu ag mÿ tó há han ja ên ti. Hã kÿ tóg: “Topê tÿ ãg jyvên tÿ hê nÿ hÿn ti tÿ ãg jyvên kar kãfór nÿnh mũ?” he mũ, Jesus mÿ.

²⁹ Kÿ Jesus tóg ti mÿ: “ù tÿ kãfór nÿn hã vê, hã mē,” he mũ. “Ha mē, povo tÿ Israel,” he tóg mũ. “Ëg pã'i vÿ tÿ Topê nĩ, ãg pã'i vÿ tÿ ùn pĩr nĩ,” he tóg. ³⁰ “Topê to, ãg jóg mág to há tâvĩ nÿtĩmnĩ,” he tóg, “ti ki ge há han nĩ, ti to jykre pĩr nÿtĩmnĩ, krĩ pĩr, ti to tar nÿtĩmnĩ,” he tóg. ³¹ “Kÿ ti tÿ ãg jyvên ù tóg hã ri ke nĩ gé, hã vÿ: ãjag régre ki rĩr nÿtĩmnĩ, ãjag tÿ vãnh ki rĩr há han ri ke, he mũ,” he tóg. “Ti tÿ ãg jyvên ù pi(jé) tag kãfór nĩ,” he tóg, Jesus ti, Topê vĩ to professor ên mÿ.

³² Kÿ Topê vĩ to professor ên tóg ti mÿ: “ke tóg tĩ,” he mũ. “Ã tÿ ke há vê. Pĩr ti nĩ, Topê ti, ù pi(jé) ti ri ke nĩ,” he tóg. ³³ “Ëg jé ti to fe há nÿtĩgtĩ, ãg jé ti to krĩ há nÿtĩgtĩ gé, jykre pĩr ke gé. Ëg jé ti to tar nÿtĩ gé. Ëg jé ãg régre ki rĩr nÿtĩ gé,

ãg tÿ vãnh ki rĩr há han ri ke. Hã vÿ tóg nén kar kãfór nĩ,” he tóg. “Ëg tÿ Topê mÿ nén ù pũn kãfór tóg nĩ, ãg tÿ ti to há nÿtĩ ên ti, ãg tÿ ti mÿ nén ù tãnh kãfór tóg nĩ gé,” he tóg, Topê vĩ to professor ên ti.

³⁴ Kÿ Jesus tóg ti tÿ tó há nĩ ve kÿ (tóg) ti mÿ: “nén ù sĩ tóg tũ nĩ ver,” he mũ, “ã tÿ Topê tÿ tÿ ãg pã'i nĩ vênh ke jé,” he tóg. Kar kÿ ù tóg Jesus ki jëmê măn tũ nĩ sir. Ti kamæg ag tóg mũ sir, hã kÿ ag tóg ti ki jëmê măn tũ nĩ sir.

Cristo tÿ tÿ Davi kósĩn nĩ

(Mt 22.41-46; Lc 20.41-44)

³⁵ Kÿ Jesus tóg Topê jo ĩn krêm ag kanhrãn jé ag ki jëmæg mũ. “Topê vĩ to professor ag tÿ ne jé: Cristo vÿ tÿ Davi kósĩn nĩ, he nê?” he tóg ag mÿ. ³⁶ “Davi vÿ Cristo tó ja nĩ, Topê kuprĩg tÿ ti krĩn kÿ, kÿ tóg: ãg jóg mág tÿ Topê vÿ inh Senhor mÿ tag tó ja nĩ, hã kÿ tóg: “nĩ ra ver, inh pëgja tá,” he ja nĩ. “Sÿ ã kato vãsãnsãn mũ ag tÿ ã krêm vin ke vê, kÿ ag sigse vê sir. Tag jãvãnh nĩ ver,” he ja ti nĩ, Topê ti, inh Senhor mÿ, he ja tóg nĩ, Davi ti,” he tóg ag mÿ, Jesus ti. ³⁷ “Hã kÿ Davi tóg Cristo to: inh Senhor vê, he tĩ. Ti tÿ tÿ ti kósĩn nĩ ra ti kósĩn mÿ tÿ ti kri ke nĩnh mũ vê?” he tóg, Jesus ti. Hã ra ag tóg ti mÿ tó tũg. Ag tÿ ne tónh ke tóg tũ tĩ, ti kato vãsãnsãn mũ ag mÿ. Hã ra vênh kar mÿ ti vĩ tag tóg há nÿ.

Ôn kÿ Topê vĩ to professor ag tÿ jagtar ke

(Mt 23.1-36; Lc 20.45-47)

³⁸ Kÿ Jesus tóg ag kanhrãn kÿ: “ôn kÿ Topê vĩ to professor ag kamæg nĩ,” he mũ. “Kur téj rĩnh ka(mê) ag nÿtĩ,” he tóg. “Kÿ vênh kar tÿ ag mÿ: ã mÿ há? he kÿ tóg ag mÿ sér tĩ, ag tÿ cidade kuu kãmĩ mũn kÿ,” he tóg. ³⁹ “Ëg tÿ vênh kanhrãn jafã krêm ag tóg vênh kãpãm kÿ nÿtĩgtĩ, festa ki ag tóg jên vén tĩ, ag tÿ tÿ pã'i nÿtĩn kÿ,” he tóg. ⁴⁰ “Hã ra ag tóg ùn mên ter ja fag tũ măn kãn tĩ. Fag tũ măn kãn

kỹ ag tóg ón kỹ Topē mré vī mág han mūgtī, ěg tỹ ag to: ũn há vỹ tỹ ag nỹtī, he jé,” he tóg. “Hã to ag vēsýrénh mág tãvī han ke mū,” he tóg, Jesus ti.

Ũn jagtar fi tỹ ã tũ vin kãn

(Lc 21.1-4)

⁴¹Kỹ Jesus tóg kejĕn Topē mỹ jãnkamy vin jafã kato nĩ mū. Kỹ tóg ag tỹ kãki nén vin mū vэг mū sir. Ũn rico ag tóg jãnkamy mág tỹ kãki vin mū. ⁴²Kỹ ũn jagtar fi tá jun mū gé, ũn mén ter ja fi. Hã ra fi tóg jãnkamy kãsir régre hã vin mū sir, hã vỹ: 1 centavo, he mū.

⁴³Kỹ Jesus tóg ã mré mū tĩ ag jé prĕr mū sir, kỹ tóg ag mỹ: “ve ra ha,” he mū. “Ũn rico tỹ vin kãfór han fi tóg, fi tũ sĩ (hã) ra. Tỹ nén ũ tũ fi tóg nĩ, fi mén vỹ hur ter. ⁴⁴Kỹ fi tóg ã tũ vin kãn ja nĩ, fi jĕn mré hã. Jãvo ũn rico ag vỹ ãjag tũ ke hã tỹ Topē mỹ vin mág tĩ. Hã ki fi tóg ag tỹ nĩm kãfór han, fi tỹ nĩm sĩ pĕ han mū ra. Ki hã sóg tó mū mỹr,” he tóg, Jesus ti.

Ag tỹ Topē jo ĩn kókén ke

(Mt 24.1-2; Lc 21.5-6)

13 Kỹ Jesus tóg Topē jo ĩn tá kãkutĕ mū sir. Re tá ti mré tĩ ũ tóg ti mỹ: “ve ra ha, Senhor,” he mū. “Pó sĩnvĩ tỹ tóg há nỹtĩ, kỹ tóg sĩ(nvĩ) tãvĩ nỹtĩ, ĩn ti,” he tóg, Topē jo ĩn to.

²Hã ra Jesus tóg ti mỹ: “ã mỹ ĩn mág tag ti vigvэг mū?” he mū. “Kejĕn ũ pó tỹ jagnĕ kafãn mãn ke tũ nĩ,” he tóg. “Ag rãnhráj kãn ke vĕ,” he tóg Jesus ti.

Vĕnh jagãgtar to rã

(Mt 24.3-14; Lc 21.7-19)

³Kar kỹ Jesus tóg krĩ tỹ Oliveiras ra tĩg kỹ tá nĩ nĩ sir, Topē jo ĩn kakãm. Kỹ ag tóg ag pin kỹ ti mỹ ke mū, Pedro, Tiago, João, André ke gé. ⁴“Ĕg mỹ ti kurã ti tó,” he ag tóg ti mỹ. “Ĕg ne ve kỹ ti kurã ki kanhró nỹtĩnh mū? Kurã tỹ hĕ ki ěg hỹn

nén kar tag venh ke mū?” he ag tóg ti mỹ.

⁵Kỹ Jesus tóg ag mỹ kãmén mū sir. “Ker ũ ãjag lograr hé hĕ,” he tóg. ⁶“Cristo vỹ tỹ ĩnh nĩ,” he jé ag tóg ke mū, ĩjĩi tó kỹ. Ũ tỹ hĕn ri ke ag tóg tag tónh mū, kỹ ũ tỹ hĕn ri ke ag tóg ag vĩ kri nĩm ke mū,” he tóg. ⁷“Vĕnh génh to vĕme mĕ jé ãjag tóg ke mū, tag ki vĕnh génh ke to, kuvar há tá vĕnh génh to ke gé. To jũrũn ke tũg nĩ hã ra. Vĕnh génh enh ke vĕ. Hã ra kurã tỹ ěgno to hã ke vĕ ver,” he tóg. ⁸“Nação ag tỹ jagnĕ kato tĕgtĕnh ke vĕ. Pã'i krĕm ke ag tỹ pã'i ũ krĕm ke ag to jũnh ke vĕ gé. Kỹ ga tỹ ragrag ke tỹ hĕn ri ke han ke vĕ gé, ěmã tỹ hĕn ri ke ki. Vĕjĕn tỹ tũ' henh ke vĕ gé. Hã ra ãjag jagãgtar ke vĕnh ven vĕn vĕ ver,” he tóg, Jesus ti.

⁹“Ãjag kanĕ nĩm nĩ,” he tóg. “Ãjag jyvĕn tar han jé ag tóg ke mū, pã'i ag, vĕnh kanhrãn jafã krĕm. ãjag mrãnmrãn jé ag tóg ke mū. ãjag jé prĕr jé ag tóg ke mū, pã'i mág tỹ ãjag ve jé, pã'i mág kar ti, isugrĩn, ãjag tỹ pã'i ag mỹ ĩnh vĩ tugtó jé,” he tóg. ¹⁰“Kỹ ĩnh kãtĩg ke to hã povo kar vỹ ĩnh vĩ sér mĕnh ke mū,” he tóg. ¹¹“Ag tỹ vãhã sir ãjag sigse kỹ, ãjag gé kãmũ jé, kỹ ãjag tỹ nén tónh ke mū to jykřn tũg nĩ, kã jatu' hemnĩ. Ag tỹ ãjag ki jĕmĕn kỹ ãjag tóg tónh ke mū, Topē kuprĩg tỹ ãjag nĩgrĕg ki vĩ mū ěn ti,” he tóg. “Ãjag tỹ tó tũ vĕ sir, ti tỹ tó vĕ sir,” he tóg. ¹²“Ũ vỹ tóg ã régre senh ke mū, ti ter jé, ěn kã,” he tóg. “Kỹ ũ panh tóg ã kósĩn senh ke mū gé, ti ter jé,” he tóg. “Kỹ ũ krĕ ěn tóg ã han mū fag sigsenh ke mū gé, fag kãgtĕn jé,” he tóg. ¹³“Vĕnh kar vỹ tóg ãjag to vĩ kónãn ke mū gé, ĩnh jĩi tugrĩn,” he tóg. “Hã ra ũ tỹ isovãnh ke tũ (pĕ) ěn kren ke vĕ,” he tóg.

Vēsýrénh mág ke

(Mt 24.15-28; Lc 21.20-24)

¹⁴Kỹ Jesus tóg ag mỹ: “kejĕn ãjag tóg vãhã ãjag tỹ nén ũ kamĕg tĩ ěn venh ke

mũ,” he mũ, “ëg kavénh mũ ên ti,” he tóg. “Topê ví tó tí tỹ Daniel vỹ ti tó ja nĩtĩ. Ti jénh ke tũ tá tóg jénh mũ,” he tóg. “Ủ tỹ to ke mũ ên jé ki kanhró nĩ. “Kỹ Judéia ki ke kar ag jé vènh pigjunh mũjêg, pănónh ra, fag mré hã,” he tóg. ¹⁵ “Ủ tỹ re tá nĩ ên jé kãra rã tũg nĩ, ti ãn ki, ti tũ măn jé. ¹⁶ Kỹ ủ tỹ ã japỹ tá jé ên jé vỹn ke tũg nĩ gé, ti kur măn jé,” he tóg. ¹⁷ “Ủn kufy fag tỹ vēsýrénh ke vè, kurã ên kã, ủ tỹ gĩr pygfãm mũ fag ke gé,” he tóg. ¹⁸ “Topê mré vĩmnĩ, ti tỹ kusa kã vènh ven tũ nĩ jé. ¹⁹ Vēsýrénh tỹ ge ve ja tũ ãg nỹtĩ, Topê tỹ ãg mundo han jan ki. Kỹ ãg ge venh ke tũ nĩ gé, kar kỹ,” he tóg. ²⁰ “Ëg tỹ kurã ki vēsýrénh ke mũ ên vỹ e nỹtĩnh mũ vè, hã ra tóg térem kỹ nỹtĩ nĩ, Topê tỹ ãn kuprêg ja ãn ag tugrĩn. Ti tỹ térem tũ nĩ (mũ) ra ủ vỹ kren ke tũ nĩ vè, ag vēsýrénh ên to,” he tóg.

²¹ “Kỹ ủ tỹ ãjag mỹ: ha vé, Cristo vỹ tag kã jé nĩ, he mũ ra kri fig tũg nĩ, ti tỹ: tátá ti jé nĩ, he mũ ra,” he tóg. ²² “Ón kỹ Cristo vỹ vènh venven ke mũ, ón kỹ Topê ví tó tí ag ke gé. Ón kỹ milagre hyn han jé ag tóg ke mũ, milagre tỹ hèn ri ke ti, ón kỹ Cristo ãn ag. Ag tỹ vènh kar krĩn kónãn sór vè, ag tỹ kygnê jé, Topê tỹ ãn kuprêg ja ãn ag mré hã, hèn ri ke mũn. ²³ Ha vé, sỹ ãjag mỹ tó kãn vè, ti kutênh ke to hã,” he tóg, Jesus ti.

Topê kósín kătĩg măn ke

(Mt 24.29-31; Lc 21.25-28)

²⁴ “Hã ra kurã ên kã, vēsýrénh ên kar kỹ rã vỹ nhyr ke mũ, kỹ kysã vỹ jèngrẽ he măn ke tũ nĩ gé. ²⁵ Kỹ krĩg vỹ vár ke mũ gé, kanhkã krêm. Ëg tỹ kanhkã tá nén vég tũ kar ãn vỹ ragrag ke kãn mũ gé. ²⁶ Kỹ vãhã vènh kar vỹ ãn kătère venh ke mũ sir, kanhkã góg jagma, ãn jykre tar (pê) nĩn kỹ,” he tóg. “Tỹ sóg êprã ke fi kósín nĩ mỹr,” he tóg. “Ính ve vỹ kókov (pê) kătĩ mũ,” he tóg. ²⁷ “Kỹ sóg sỹ jègnê jafã ag mỹ: ha mũjêg, hèn ke mũ, ag tỹ sỹ ãn kuprêg ja ag vènhmãn

jé, ga kar tá, kanhkã fyr mĩ hã,” he tóg, Jesus ti.

Ka tỹ figueira to comparação

(Mt 24.32-35; Lc 21.29-33)

²⁸ “Ka tỹ figueira to ki kanhrãn nĩ, to comparación han kỹ,” he tóg. “Ti pê tánh kỹ, ti fėj tag han kỹ tóg kakó tí sir, êkré tygtánh kurã ti. ²⁹ Rĩ ke ti nĩ, ãjag tỹ ãn kătĩg măn ke kurã ki kanhró nỹtĩnh ke mũ ti. ãjag tỹ sỹ ãjag mỹ nén tó mũ tag ve kỹ tóg kakó távĩ tí ha, ãn kătĩg măn ke ti,” he tóg. ³⁰ “Sỹ ke há vè, hã kỹ sóg tag tó mũ, ha mẽ. Ủrĩ ãn rĩnrĩr mũ ag tỹ nén kar ãn venh ke vè, ag kăgter ke to hã,” he tóg. ³¹ “Kanhkã vỹ tũ' hèn ke mũ, ga ti ke gé. Jãvo ãn vỹ tũ' hèn ke tũ nĩ,” he tóg, Jesus ti.

Jesus kătĩg măn ke kurã

(Mt 24.36-44)

³² “Hã ra ủ pi(jé) isỹ kurã ki kătĩg măn ke ki kanhró nĩ, hora ãn ki ke gé,” he tóg. “Topê tỹ jègnê jafã ag pi(jé) ki kanhró nỹtĩ. Ính pi(jé) ki kanhró nĩ gé, isỹ tỹ Topê kósín ra,” he tóg. “Ëg jóg mág hã vỹ ã pin kỹ ki kanhró nĩ, kurã kã nén kutênh ke mũ ên ki,” he tóg. ³³ “ãjag kanê vĩn han nĩ, vènh rĩnfĩg nĩ,” he tóg. “Topê mré ví, ãjag tỹ ti kurã ki kagtĩg nỹtĩn kỹ,” he tóg. ³⁴ “Ủ pasa ri ke vè,” he tóg. “ã tỹ ã ãn ki kutê kỹ tóg ã camarada ag mỹ: “ĩjo ki rĩr,” he mũ, “ĩnh rãnrãj ki,” he tóg. Kỹ tóg ủ tỹ jãnkã ki rĩr tí ãn mỹ: “ã kanê nĩm han nĩ,” he mũ gé. ³⁵ Hã kỹ sóg ãjag mỹ: “ãjag kanê nĩm han nĩ,” he mũ gé,” he tóg. “ãjag pi(jé) ti jun ke ki kanhró nỹtĩ, ãn tãn ti,” he tóg. “Hèn ri ke mũn tóg kutyg ke ra jun mũ, hèn ri ke mũn tóg kuty kujũ ki jun mũ, hèn ri ke mũn tóg galo kyr mũ ra jun mũ, hèn ri ke mũn tóg kusã ki jun mũ,” he tóg. ³⁶ “Vènh ki ãmēmĩnĩ, nũr tũg nĩ. ãjag tỹ ãjãvãnh tũ ra sóg jun mũ, vēsýmêr,” he tóg, Jesus ti. ³⁷ “Vènh kar mỹ sóg tó

mũ, sý ãjag mý tó mũ tag, hã vỹ: vênh ki ãmẽmnĩ, he mũ,” he tóg, Jesus ti.

Ag tỹ Jesus tén sór

(Mt 26.1-5; Lc 22.1-2; Jo 11.45-53)

14 Hã ra festa tỹ Páscoa kurã kátá kurã tagtũ vẽ sir, pão jẽgja tũ konh ke kátá. Kỹ Topẽ tũ ki rĩr ti ag tóg Jesus vatánh tá ti se sór mũ, vênh kar tỹ ti se vэг tũ nĩ jé. Topẽ vi to professor mré ag tóg ti se sór mũ gé, ti tén jé. ² Hã ra ag tóg: “festa tag to mẽ jé ẽg tóg ke mũ ver,” he mũ. “Ẽg tỹ festa kã ti se kỹ vênh gẻnh mág hỹn tóg kutẻnh mũ, ha vemnĩ,” he ag tóg.

Maria fi tỹ Jesus gẻnh tẻg

(Mt 26.6-13; Jo 12.1-8)

³ Ẽn kã Jesus tóg kejẻn ẻmã tỹ Betânia tá nĩ nĩ, Simão ỉn krẻm, vẻnh kaga tỹ lepra han ja ẻn ỉn krẻm. Ti jẻg nĩ ra ử fi tóg tá jun mũ, garrafa vyn kỹ. Pó tỹ alabastro tỹ tóg há(r) nĩ, garrafa ti. Ti ki jẻ vỹ tóg tỹ nẻn kar tẻg nĩ, hã vỹ: nardo, he mũ. Nardo pẻ vẻ, kaja e pẻ ti nĩ, ger há ẻn ti. Garrafa ẻn mranh fi tóg mũ, kỹ fi tóg ti ki jẻ ẻn tỹ Jesus gẻnh kri kugjẻg mũ sir.

⁴ Hã ra ử tỹ tá nỹtĩ ag kã ử ag tóg jagnẻ mỹ: “fi tỹ ne jẻ nẻn kaja e tag kókẻn nẻ?” he mũ. ⁵ “Ẽg tỹ nẻn ger há tag fón ke vẻ vẻ, kaja há to, jẻnkamy tỹ hẻn ri ke to,” he ag tóg. “Ẽg tỹ ửn jẻgẻgtar ag mỹ vịn ke vẻ vẻ,” he ag tóg. Kỹ ag tóg fi mỹ vĩ tar han mũ sir.

⁶ Hã ra Jesus tóg ag mỹ: “fi mỹ vĩ tẻg,” he mũ. “Ảjag tỹ ne jẻ fi fe kaj han nẻ?” he tóg. “Ỉnh ki fi krov nĩ, ỉnh jykre ki,” he tóg. ⁷ “Ảjag mrẻ sóg nẻg sĩ han mũ, jẻvo ửn jẻgẻgtar mũ ag vỹ ẻjag mrẻ nỹtẻg mág han tĩ,” he tóg. “Ỉsẻg kar kỹ ag mỹ nẻmnĩ, ẻjag tỹ ag mỹ nẻn nẻm ke ti,” he tóg. ⁸ “Ả tỹ nẻn han ke mũn han fi tóg huri,” he tóg. “Ỉnh kẻn fi tóg huri, vẻnh kej tá ỉnh fón ke to,” he tóg. ⁹ “Ag tỹ vẻnh vĩ sér tẻgtó kỹ ag tóg fi tỹ nẻn han mũ tag ti

tẻnh ke mũ gé, kỹ vẻnh kar vỹ fi tỹ nẻn han mũ tag mẽgmẻnh mũ sir, ha vemnĩ. Ki hã sóg tó mũ,” he tóg, Jesus ti.

Ag tỹ Jesus vatánh tá ti kẻgmẻnh ke to jykẻn

(Mt 26.14-16; Lc 22.3-6)

¹⁰ Kar kỹ Judas Iscariotes tóg tĩ mũ, Topẻ tũ ki rĩr ti ag ra, ag mrẻ Jesus jẻn-jẻn ke to jykẻn jẻ. Hã ra ử tỹ 12 (ke) ag kã ử vẻ, Judas ti. ¹¹ Ag tỹ ti vĩ mẽ kỹ tóg ag mỹ sér tĩ sir. “Ả mỹ ẻg to jẻnkamy vịn mũ,” he ag tóg ti mỹ. Hã kỹ tóg: “ỉnh hỹn hẻ ri kẻnh mũ, ag tỹ ti kẻgmẻ jẻ?” he mũ, Judas ti.

Ag tỹ Páscoa ko mũ

(Mt 26.17-25; Lc 22.7-14, 21-23; Jo 13.21-30)

¹² Pão jẻgja tũ konh ke kurã ve vẻ sir, cordeiro tẻnh ke kurã vẻ sir, Páscoa kã. Kỹ ti mrẻ mũ tĩ ag tóg Jesus mỹ: “ẻg hỹn hẻ tá ả mỹ carneiro sĩ tẻnh mũ, ẻg tỹ kon jẻ?” he mũ. ¹³ Kỹ tóg ửn rẻgre ag jẻgnẻg mũ, ti mrẻ mũ tĩ ag. Kỹ tóg ag mỹ: “ha ẻmã mág ra mủjẻg,” he mũ. “Tá ẻjag tóg ử vẻnh ke mũ, goj vyn kỹ jẻ ử. Ẽn nẻn mủmnĩ,” he tóg. ¹⁴ “Tĩ tỹ ỉn kẻra rẻ kỹ ỉn tẻn ẻn mrẻ vẻmnĩ,” he tóg. “Tĩ mỹ tag tẻmnĩ,” he tóg. “Ẽg Senhor vỹ ả mỹ vẻnh vĩ jẻnẻg mũ, hemnĩ. Tĩ tỹ ả ỉn krẻm Pẻscoa konh há tóg tĩ, ti mrẻ mũ tĩ ag mrẻ, hemnĩ ti mỹ,” he tóg, Jesus ti. ¹⁵ “Kỹ tóg ẻjag mỹ ven ke mũ, kroggrog tỹ kynhmỹ nỹ ẻn ti,” he tóg. “Ẽhẻ tĩ nĩ. Tá nẻn kar vỹ kynkar kỹ nỹtĩ. Ẽg nẻgja vỹ tá nỹtẻ gẻ. Tá ẻg mỹ han nĩ,” he tóg, ti mrẻ mũ tĩ rẻgre ag mỹ.

¹⁶ Kỹ ag tóg mũ mũ sir, ẻmã mág ra, kỹ ag tóg sir vẻg mũ, Jesus tỹ ag mỹ nẻn tó ja ti. Kỹ ag tóg vẻjẻn kẻn mũ sir, ag tỹ cordeiro ẻn ko jẻ.

¹⁷ Rẻ pur kar kỹ Jesus tóg ử tỹ 12 (ke) ag mrẻ tá jun mũ sir. ¹⁸ Ag jẻg mũ jẻvo Jesus tóg ag mỹ: “ẻjag kẻki ử tóg ỉnh vatánh tá ỉnh kato vẻsẻnsẻn mũ ag mỹ

inh ven ke mŭ,” he mŭ. “Inh mré jêg mŭ ũ vê, ki hã sóg tó mŭ,” he tóg. ¹⁹ Kŷ ag tóg fe kaj' he mŭ sir. Ti mŷ ag tóg: “inh mŷ vó? Inh mŷ vó?” he kân mŭ sir. ²⁰ Hã ra tóg ag mŷ: “ājag kã ũ vê,” he mŭ. “Inh mré pãu tŷ kã punpun mŭ vê, pénky kãki,” he tóg. “Ēn vê mŷr,” he tóg. ²¹ “Ter jé sóg ke mŭ, isŷ tŷ êprã ke fi kósín nŷn kŷ. Hã kŷ iser ke vŷ rán kŷ nŷ,” he tóg. “Vãsŷ sóg to rán kŷ nŷ,” he tóg. “Hã ra ũ tŷ pã'i ag mŷ inh ven ke ěn mŷ tóg vŷ kónãn tãvi han ke mŭ. Ti mur tũ nŷn ran há tŷ vê,” he tóg, Jesus ti.

Santa Ceia

(Mt 26.26-30; Lc

22.15-20; 1Co 11.23-25)

²² Ag jêg nŷtŷ ra Jesus tóg ěmŷ mǎg mŭ sir, kŷ tóg Topê mré vŷ mŭ sir, ěmŷ to. Kŷ tóg vênh kã kugpãn kŷ ag mŷ vênh kãpãm mŭ sir, ti mré mŭ tŷ ag mŷ. “Inh hã vê,” he tóg, ěmŷ to.

²³ Kar kŷ tóg copo vǎg mŭ gé sir, vinhô tŷ ki jên kŷ. To tóg Topê mré vŷ mŭ gé sir, kŷ tóg ũn pir mŷ ven', ven', he mŭ sir. Kŷ ag tóg kãmê kân mŭ sir. ²⁴ Kŷ tóg ag mŷ: “inh kyvénh hã vê,” he mŭ. “Vênh kar jagfŷ tóg inh ki kãkutênh ke mŭ, inh kyvénh ti,” he tóg. “Topê vŷ vênh kar to há nŷ sór mŭ, inh kyvénh tugrŷn,” he tóg. ²⁵ “Ha mē,” he tóg. “Inh pi(jé) vinhô kron mǎn ha'. Kejên sóg kron mǎn ke mŭ, Topê tŷ tŷ ěg pã'i nŷ ěn kã sóg kron mǎn mŭ,” he tóg.

²⁶ Ag jên kar kŷ ag tóg Topê mŷ jãn mŭ sir. Jãn kar kŷ ag tóg sir krŷ tŷ Oliveiras ra mŭ mŭ.

Jesus tŷ Pedro mŷ tó

(Mt 26.31-35; Lc 22.31-34; Jo 13.36-38)

²⁷ Kŷ Jesus tóg ag mŷ: “ājag kar vŷ inh ré kŷ mŭ kân ke mŭ,” he mŭ. “Hã kŷ tóg rán kŷ nŷ, hã mē. “Ũ tŷ carneiro ki rŷr tŷ ěn tǎnh jé sóg ke mŭ, kŷ ti mēg vŷ krig ke kân ke mŭ,” he tóg, iso, Topê ti, ti vŷ rá ki,” he tóg, Jesus ti. “Hã ve jé ājag tóg

ke mŭ. ²⁸ Hã ra sóg iser kar kŷ rŷr mǎn ke mŭ. Ēn kã sóg ājag jo tŷnh ke mŭ, ga tŷ Galiléia ra,” he tóg, Jesus ti.

²⁹ Kŷ Pedro tóg ti mŷ: “ag kar tŷ ā ré kŷ mŭ mŭ ra isóg ā ré kŷ tŷg ke tũ nŷ,” he mŭ, Pedro ti. ³⁰ Hã ra Jesus tóg ti mŷ: “ha vé,” he mŭ. “Ũri, kuty tag kã ā tóg iso: ti ki kagtŷg sóg nŷ, he tǎgtũ han ke mŭ, galo kyr régre han ke to hã. Ki hã sóg tó mŭ,” he tóg.

³¹ Hã ra Pedro tóg vŷ tar han. “Sŷ ā mré ter ke mŭ ra sóg ā to: ti ki kagtŷg sóg nŷ, henh ke tũ pē nŷ,” he tóg, Pedro ti. Kŷ ti mré mŭ tŷ ag tóg hã tó kân mŭ gé sir.

Getsêmani tá

(Mt 26.36-46; Lc 22.39-46)

³² Kŷ ag tóg ka kré ra mŭ mŭ sir. Ka kré ěn jŷjŷn hã vŷ: Getsêmani, he mŭ. Kŷ tóg ā mré mŭ tŷ ag mŷ: “nŷgnŷ ra ver, tag ki,” he mŭ. “Sŷ ver Topê mré vēmén ke vê,” he tóg, Jesus ti. ³³ Kŷ tóg Pedro, Tiago, João ag mŷ: “inh mré kãmũ jêg,” he mŭ. Kŷ tóg ti mŷ e tŷ sir, jŷrŷn ke tóg mŭ sir, Jesus ti. ³⁴ Kŷ tóg ag mŷ: “inh fe kaj mǎg tóg tŷ,” he mŭ, “kŷ inh fe kaj tóg inh mŷ tŷ iser ri ke nŷ,” he tóg. “Tag ki nŷtŷmŷnŷ, nŷgnŷr tŷg nŷ,” he tóg. ³⁵ Kŷ tóg tŷg sŷ han mǎn kŷ mŷg ke mŭ, ga kri nŷ tóg mŭ sir. Ā jóg mré tóg vŷ mŭ sir, “isŷ hên ri ke mŷn nén venh ke mŭ ěn vég tũ nŷ jé, hora ěn ki,” he tóg. ³⁶ Kŷ tóg: “Aba', panh',” he mŭ. “Nén kar han ki kanhró ā tóg nŷ,” he tóg. “Inh jagtar ke tag tŷ tŷg' hemnŷ,” he tóg. “Hã ra isŷ ā mŷ nén to vŷ mŭ tag han tŷg nŷ, ā tŷ nén han ke mŭ ěn hã han nŷ,” he tóg. ³⁷ Kŷ tóg ā mré mŭ tŷ ag venh tŷ mŭ, hã ra ag tóg nŷgnŷr ja nŷ, kŷ tóg Pedro mŷ: “Simão, ā mŷ nŷr?” he mŭ, “ā mŷ hora pir hã ki nŷr tũ kórég?” he tóg ti mŷ. ³⁸ “Nŷr tŷg nŷ,” he tóg. “Topê mré vŷmŷnŷ, ājag tŷ ti vŷ mranh tũ nŷ jé, ũ tŷ ājag kutǎn mŭ ra. Ājag tŷ mranh sór tũ vê vê, hã ra ājag tóg krój nŷtŷ, hã kŷ ājag tóg mranh ke mŭ,” he tóg.

³⁹ Kĩ tóg tíg măn mủ sir, Topê mỷ tó măn jé. Tỉ vĩ ên hã tó măn tóg mủ. ⁴⁰ Kĩ tóg ag tá jun măn mủ gé sir, hã ra ag tóg nũgnũr măn nỹtĩ, ag kanê krój nỹtĩn kỹ. Hã kỹ ag tỹ ti mỷ vĩnh ke ên tóg tũ tĩ. ⁴¹ Kĩ tóg tá jun tãgtũ han măn mủ. Kĩ tóg ag mỷ: “ãjag ne tóg nũgnũr ja nĩ, vênhkãn ja ãjag tóg nĩ,” he mủ. “Gen kỹ,” he tóg. “Pétẽm ti huri, hora ti,” he tóg. “Ủ tỹ Topê vĩ mranh ti ag tỹ isenh ke nê ha,” he tóg. “Tỹ sóg êprã ke fi kósin nĩ mỷr,” he tóg. ⁴² “Nĩgnĩ ra, mủ jé ha. Ủ tỹ ag mỷ inh ven mủ tóg jun ke kãtĩg ha,” he tóg.

Ag tỹ Jesus se

(Mt 26.47-56; Lc 22.47-53; Jo 18.3-12)

⁴³ Jesus tỹ ver tỹ vēmẽn jẽ ra Judas tóg vēsỹmẽr jun mủ sir. Ủ tỹ 12 (ke) ag kã ù vễ, Judas ti. Tỉ mrẽ polícia ag tóg kãmũ mủ gé. Rógro génh kỹ ag kãmũ mủ, ka kykyv génh kỹ ke gé. Topê tũ ki rĩr tĩ ag pã'i ag vỹ ag jẽgnẽ, Topê vĩ to professor ag ke gé, kófa ag ke gé. ⁴⁴ Judas ên, ù tỹ ag mỷ Jesus ven mủ ên vỹ ag mỷ vênh jykre nĩm ja nĩ. “Sỹ ùn ki nhun ke mủ ên hã semnĩ. Ên hã pére mũmĩn,” he ja tóg nĩ, Judas ti. ⁴⁵ ã tỹ tá jun kỹ tóg vēsỹmẽr Jesus to grẽn ke kỹ ti mỷ: “Senhor,” he mủ. Kĩ tóg ti ki nhun ke mủ sir, Judas ti, ón kỹ.

⁴⁶ Kĩ ag tóg ti kãgmĩ kỹ ti ség mủ sir. ⁴⁷ Jesus mrẽ tĩ tĩ ù tóg rógro kunũnh kỹ polícia ù nĩgrẽg kym mủ sir. Topê tũ ki rĩr tĩ to pã'i mág camarada vễ, ti tỹ ùn nĩgrẽg kym mủ ên ti.

⁴⁸ Kĩ Jesus tóg ag mỷ: “ãjag ne tóg rógro génh kãmũ mủ,” he mủ, “ka kykyv génh kỹ ke gé” he tóg. “Inh pi(jé) tỹ bandido nĩ,” he tóg. ⁴⁹ “Kurã kar ki sóg ãjag mrẽ jẽ ja nĩgtĩ, mỷr, Topê jo ãn krẽm,” he tóg. “Vênh kanhrãn kỹ isóg tá nĩ ja nĩgtĩ, hã ra ãjag tóg tá iség tũ nĩ vễ mỷr,” he tóg. “Hã ra vãsỹ iso nén rãn kỹ nĩ ên ki kenh ke hỹn,” he tóg.

⁵⁰ Kĩ ti mrẽ mủ tĩ ag tóg ti ré kỹ pétẽ kãn mủ, vênh pigu jé, mỷr, ha mễ.

⁵¹ Hã ra kyrũ ù tóg ti nón tĩ mủ. Vênh kãtor tãvĩ ti nĩ. Tỉ kãgmĩg ag tóg mủ gé. ⁵² Hã ra tóg kamẽg kỹ ã kur ré kỹ vênh hvãg mủ, ti kator ra.

Pã'i tỹ Jesus mrẽ vĩ

(Mt 26.57-68; Lc 22.54-55, 63-71; Jo 18.13-14, 19-24)

⁵³ Kĩ ag tóg Jesus pére mủ mủ, Topê tũ ki rĩr tĩ to pã'i mỷ. Tỉ ãn tá ag tóg vênhmãn kãn kỹ nỹtĩ, Topê tũ ki rĩr tĩ to pã'i ag, kófa ag mrẽ hã, Topê vĩ to professor ag mrẽ hã.

⁵⁴ Hã ra Pedro tóg Jesus nón kãtĩ mủ, kuvar há tá. Kĩ tóg Topê tũ ki rĩr tĩ to pã'i ãn vãso ra rã mủ gé. Kĩ tóg polícia ag mrẽ pĩ to tón nĩ nĩ, Pedro ti.

⁵⁵ Kĩ Topê tũ ki rĩr tĩ to pã'i ag tóg ù jãvãnhvãnh mủ, ù tỹ ón kỹ Jesus jykre kórég tó mủ ên. Tỉ vĩ tugrĩn ag tóg Jesus ti tén sór mủ. Hã ra tóg ag mỷ ki krov tũ nĩ. Vênh jyvẽn tĩ kar ag tóg ù jãvãnhvãnh mủ, hã ra tóg ag mỷ ki krov tũ nĩ gé. ⁵⁶ Ủ tỹ hẽn ri ke ag tóg ón kỹ Jesus jykre kórég tó mủ, hã ra tóg ag mỷ ki krov tũ pẽ nĩ sir, ag tỹ vênh jykre ù tó', vênh jykre ù tó' he mủ ra.

⁵⁷ Kĩ ù ag tóg vãhã jẽgĩg kỹ nỹtĩn kỹ (ag tóg) ón kỹ ti jykre kórég ù kãmẽn mủ sir. ⁵⁸ “Tĩ tỹ tó mễ ẽg,” he ag tóg. “Topê jo ãn tag kókẽn jé sóg ke mủ, he ja tóg nĩ, vênh nĩgẽ tỹ há tag ti, he ja tóg nĩ, hã ra sóg kurã tãgtũ ki ù han măn ke mủ, ẽg tỹ ẽg nĩgẽ tỹ han vãnh ên han jé sóg ke mủ, he ja tóg nĩ,” he ag tóg, Jesus to. ⁵⁹ Ge ra tóg ag mỷ ki krov tũ nĩ, ti jykre kórég ên vэг tũ ag tóg nĩ.

⁶⁰ Kĩ Topê tũ ki rĩr tĩ to pã'i mág tóg jẽgnẽ kỹ (tóg) ag kuju kã jẽ mủ sir. “ã tỹ nén ù tónh ke mủ mỷ ã mỷ tũ?” he tóg mủ. “Ag hã ne tóg ã vĩ kónãn tag tó ja nĩ gé,” he tóg, Jesus mỷ. ⁶¹ Hã ra tóg hun ke mủ, nén ù tó tũ tóg nĩ. Kỹ pã'i mág ên tóg ti mỷ ke măn mủ. “ã mỷ tỹ Cristo

nĩ?” he tóg, “ëg tỹ ù to: há ti nĩ, he mũ ên kósín mỹ tỹ ã nĩ? Æ mỹ tỹ Topẽ kósín nĩ?” he tóg.

⁶² Kĩ Jesus tóg ti mỹ: “hỹ, inh hã vë,” he mũ. “Ëprã ke fi kósín ên vỹ tỹ inh nĩ. Inh ve jé ãjag tóg ke mũ ha. Û tỹ nén kar han mũ ên pëjja tá sóg nĩnh ke mũ. Kanhkã góg kãmĩ sóg kãtérénh ke mũ gé,” he tóg.

⁶³ Kĩ pã'i mág ên tóg ã kur tỹ jaran' ke mũ sir, jũ kỹ. Kĩ tóg: “ũ tỹ ti jykre kórég tónh ke ù jãvãnh măn ke tũ ãg nĩ ha,” he mũ. ⁶⁴ “Ti tỹ Topẽ kato vỹ kónã ja ên mẽ ãg huri,” he tóg. “Ëg hỹn ti tỹ hẽ ri kenh mũ ha?” he tóg.

“Ter jé tóg ke mũ, ti vỹ tag tugrĩn,” he ag tóg, ag kar ên.

⁶⁵ Kĩ ù ag tóg ti to sugsgug mũ sir. Ti kanẽ pãg ag tóg mũ gé sir, kỹ ag tóg ti tãnh kỹ ti mỹ: “ũ nỹ ã tãnh?” he mũ. Kar kỹ polícia ag tóg ti tãnh mũ gé sir, ti kakã ki.

Pedro tỹ Jesus to ón

(Mt 26.69-75; Lc 22.56-62; Jo 18.15-18, 25-27)

⁶⁶ Hã ra Pedro tóg ãn vãso kã nĩ nĩ, Topẽ tũ ki rĩr tĩ to pã'i ên ãn tá. Hã ra pã'i ên camarada fag vỹ tá nỹti gé, kỹ fag kã ùn pĩr fi tóg Pedro to kãti mũ. ⁶⁷ Kĩ fi tóg ti vég mũ sir, ti tỹ pĩ to tón nĩ ra. Kĩ fi tóg ti tugnỹm kỹ ti mỹ: “Jesus mré ã tóg tĩg mũ gé,” he mũ, “Nazaré tá ke ên mré,” he fi tóg ti mỹ.

⁶⁸ Hã ra Pedro tóg: “vó,” he mũ. “Inh pi(jé) ti ki kanhró nĩ,” he tóg. “Æ tỹ ne tó nẽ?” he tóg. Kĩ tóg ãn jãnkã ra tĩ mũ sir, ãn kãra rã jé. Hã ra galo tóg kyr mũ.

⁶⁹ Hã ra fi tóg tá ti vég mũ gé. Kĩ fi tóg tá nỹti ag mỹ ke măn mũ sir. “Tá jẽ ên tóg tỹ ag kã ù jẽ gé,” he fi tóg, Pedro to.

⁷⁰ Hã ra tóg: “vó,” he măn mũ. Kar kỹ tá nỹti ag tóg Pedro mỹ ke măn mũ. “Æ hỹn tỹ ag kã ù nĩ,” he ag tóg ti mỹ. “Tỹ ã Galiléia tá ke nĩ mỹr,” he ag tóg. “Æ vỹ vỹ tá ke ag vĩ ri ke nĩ,” he ag tóg.

⁷¹ Hã ra Pedro tóg ag mỹ: “ãjag tỹ nén tó mũ ên ki kagtĩg sóg nĩ mỹr,” he mũ. “Inh ón mũ ra Topẽ tóg inh vóg kónã ke mũ vë, hã kỹ sóg ón ke tũ pé nĩ,” he tóg.

⁷² Hã ra vësỹmér galo tóg kyr măn mũ. Kĩ Pedro tóg Jesus vỹ to jykren mũ sir, Jesus tỹ ti mỹ nén tó ja ên to, hã vỹ: “iso ã tóg: ti ki kagtĩg sóg nĩ, he tãgtũ han ke mũ, galo kyr régre han to hã,” he mũ. Tag mĩ êkren kỹ tóg vënh péju kỹ nĩ kỹ fỹ nĩ nĩ sir, Pedro ti. Vãhã tóg ti mỹ e tĩ.

Pilatos tỹ Jesus mré vĩ

(Mt 27.1-2, 11-14; Lc 23.1-5; Jo 18.28-38)

15 Tỹ vaj kỹ ag tóg kusã ki Jesus ti jykren mũ jagnẽ mré, Topẽ tũ ki rĩr tĩ to pã'i ag, kófa ag mré hã, Topẽ vỹ to professor ag mré hã ke gé, vënh jyvën tĩ kar ên ag. Kĩ ag tóg Jesus mrĩnh kỹ ti pére mũ mũ, Pilatos mỹ ti fëg jé. ² Kĩ Pilatos tóg ti mỹ: “ã mỹ tỹ Judeu ag pã'i nĩ?” he mũ. Kĩ tóg: “ki hã ã tóg tó mũ,” he mũ, Jesus ti.

³ Hã ra Topẽ tũ ki rĩr tĩ to pã'i ag tóg ti kato vỹ tỹ hën ri ke han mũ sir. ⁴ Kĩ Pilatos tóg ti mỹ ke măn mũ. “Mỹ ã tỹ ag mỹ nén ù tó jãvãnh,” he tóg. “Ha mẽ, ã to ag tóg vỹ kónã mág kỹ nỹti,” he tóg, Pilatos ti. ⁵ Hã ra Jesus tóg vỹ măn tũ nĩ, kỹ tóg Pilatos mỹ e tĩ sir.

Ag tỹ Jesus to: ter jé tóg ke mũ, he

(Mt 27.15-26; Lc 23.13-25; Jo 18.39-19.16)

⁶ Hã ra Pilatos tóg ag mỹ Vëse ag kar kã ùn pĩr kavãg tĩ, festa tỹ Páscoa kar ki. Ti jykre vë. Ag tỹ ù to vỹ mũ ên kavãg tóg tĩ. ⁷ Hã ra ù tóg se kỹ nĩ, ti jĩjin hã vỹ: Barrabás, he mũ. Vënh génh kutëm ti ag mré tóg se kỹ jẽ nĩ, vënh génh kỹ ag tóg ù tén ja nĩ, hã kỹ ag tóg nĩgfhénh kỹ nỹti. ⁸ Kĩ vënh kar ên ag tóg Pilatos to mũ mũ sir, ti mỹ: “ëg mỹ ã tỹ nén han tĩ ên han nĩ,” he jé.

⁹ KỠ Pilatos tóg ag mỷ: “mỷ ăjag mỷ sỷ Judeu ag pǎ'i kyvăn há?” he mủ. ¹⁰ Topê tũ ki rĩr tĩ to pǎ'i ag tóg véké Jesus to jũ nỹtĩ, hă kỷ ag tóg nén (ũ) tũ to ti se ja nĩ. Hă ra Pilatos tóg ki kanhrô nĩ, hă kỷ tóg ti kavăn sór mủ. ¹¹ Hă ra Topê tũ ki rĩr tĩ to pǎ'i ag tóg vênh kar ag krĩn ja nĩ, ag tỹ Pilatos mỷ: “Barrabás hă kava ra,” he jé.

¹² Kỷ Pilatos tóg ag mỷ ke măn mủ. “Kỷ sóg ti tỹ hê ri kenh mủ, ăjag tỹ ù to: Judeu ag pǎ'i, he mủ ên tỹ?” he tóg. ¹³ Kỷ ag tóg prênprêr mủ sir. “!..Cruz to ti sǎ..!” he ag tóg mủ sir, prênprêr kỷ.

¹⁴ Kỷ Pilatos tóg ag mỷ: “e ri ken kỷ?” he mủ. “Ti kórég tỹ ne han ti?” he tóg ag mỷ. Hă ra ag tóg prêr măn', prêr măn' he mủ sir. “!..Cruz to ti sǎ..!” he ag tóg, prênprêr kỷ.

¹⁵ Kỷ Pilatos tóg ag mỷ hă han sór mủ sir, kỷ tóg ag mỷ Barrabás kyvăg mủ sir. Jesus mrănmrăn tóg mủ sir, mrăn ke jafă tỹ, kỷ tóg ag mỷ ti fêg mủ sir, ag tỹ ka to ti sa jé.

Soldado ag tỹ Jesus vóg kónăn

(Mt 27.27-31; Jo 19.2-3)

¹⁶ Kỷ soldado ag tóg pǎ'i mág ĩn kăra Jesus pére mủ mủ sir, ag vênh jyvên jafă ên kăra. Kỷ ag tóg soldado kar ag jé prêr mủ sir. ¹⁷ Ti kri ag tóg kur fón mủ, kur kusũg tỹ. Sónh pirĩn kỷ ag tóg ti krĩ tógfig mủ sir. ¹⁸ Kỷ ag tóg ti mỷ: “viva, Judeu ag pǎ'i,” he mủ sir, ti nyg kỷ. ¹⁹ Kỷ ag tóg vãn tỹ ti krĩ mĩ mrănmrăn mủ sir, ti to ag tóg sugsg mủ sir, kỷ ag tóg ti jo grĩnhgrĩnh ke mủ sir, ag tỹ ón kỷ ti to: “Senhor,” hen kỷ. ²⁰ Ag tỹ ti nyg kar ag tóg ti ki kunũg mủ, kur kusũg ên ti. Kỷ ag tóg ti kur pẽ tỹ ti kăra răg mủ sir. Kỷ ag tóg ti pére mủ mủ, ag tỹ cruz to ti san jé.

Jesus tỹ cruz to sa

(Mt 27.32-34; Lc 23.26-43; Jo 19.17-27)

²¹ Hă ra ù tóg vánh kătă kătĩ mủ, hă vỹ: Cirene tá Simão, he mủ. Alexandre panh vê, Rufo panh vê gé. Ti tỹ mĩ mủ ra ag tóg ti mỷ vĩ tar han mủ, ti tỹ Jesus cruz vyn jé.

²² Kỷ ag tóg Gólgota tá junjun mủ sir ti mré. Gólgota to ken hă vê, hă vỹ: vênh krĩ kuka, he mủ êg vĩ ki. ²³ Kỷ ag tóg ti mỷ vinho ven mủ, Jesus mỷ, ka tỹ mirra jênjo grór mré hă, hă ra tóg kron jăvăn nĩ, vênh kagta ti. ²⁴ Kỷ ag tóg cruz to ti sǎg mủ sir. Ti kur tỹ ag tóg jagnê mỷ vênh kăpăm mủ sir, to ag tóg jogar he mủ gé, ti kur to, soldado ag.

²⁵ Kusă ki 9 hora vê sir, kỷ tóg cruz to ti sǎg mủ. ²⁶ Ag tỹ nén tỹ kato vĩ tóg răn kỷ nĩ, hă vỹ: “Judeu ag pǎ'i tỹ rei vê,” he mủ. Ti kri tóg sa, vênh răn ti. Ti tỹ nêji vêsỹ pǎ'i tỹ rei han mủ to ag tóg ti tén mủ. ²⁷ Ti kóm ag tóg ùn régre ag tỹ cruz to sǎg mủ gé, bandido ag. Û vỹ ti pêgja tá sa, jó ù vỹ ti jakăn hă tá sa. ²⁸ Hă kỷ tóg nén tỹ ă to răn kỷ nĩ ên vê, hă vỹ: “ag mỷ tóg tỹ ùn jykre păno ag mré ke nĩ,” he mủ, Topê vĩ răn ki. Hă ra tóg ge nĩ.

²⁹ KỠ ù tỹ mĩ mủ mủ ag tóg ti nyg' he mủ gé, vỹn vỹn he kỷ. “Ó,” he ag tóg mỷ. “ă hă ne tóg: Topê jo ĩn kókén jé sóg ke mủ, he gé,” he ag tóg. “Kură tăgtũ ki sóg ù han mủ, he ă tóg mủ gé,” he ag tóg. ³⁰ “Vênh kren han ra kema'. Cruz to kătêre kema',” he ag tóg ti mỷ.

³¹ Ge ag tóg mủ gé, Topê tũ ki rĩr tĩ to pǎ'i ag, Topê vĩ to professor ag mré. Ti nyg ag tóg mủ gé, kỷ ag tóg jagnê mỷ: “ũ krenkren han tóg, hă ra tóg vênh hă kren han ki kagtĩg nĩ,” he mủ. ³² “Cristo jé cruz to kătêre kema', Judeu ag pǎ'i ti', êg tỹ ve jé, êg tỹ ti vĩ kri nĩm jé,” he ag tóg. Kỷ bandido ag, ù tỹ ti kóm cruz to nỹtĩ ên ag tóg ti nyg mủ gé.

Jesus ter

(Mt 27.45-56; Lc 23.44-49; Jo 19.28-30)

³³ Rã tỹ ãg nĩno kã sa ra tóg kuty' he mũ sir, ga kar mĩ hã. Kĩ kuty ãn tóg hora tãgtũ tũg mũ. ³⁴ 3 hora ki Jesus tóg prẽr mũ sir, jamã hár(a), kĩ tóg: “Eloí, Eloí, lemá sabactani?” he mũ. Ëg vĩ ki ãg tóg tag to: “Topẽ, Topẽ, ã tỹ ne jé isovãnh nẽ?” he mũ.

³⁵ Kĩ tá nỹti ù ag tóg jẽmẽ kĩ (ag tóg) jagnẽ mỹ: “ha vẽ, Elias jé tóg prẽr mũ,” he mũ. ³⁶ Kĩ ù tóg vẽn hvãg mũ sir, kĩ tóg esponja tỹ vinho prãg mũ, vinho kaja pir tỹ. Ka jurỹn kĩ tóg tỹ kusón kĩ vinho kãra rãg kĩ ti mỹ ven mũ sir, ti tỹ ki ãnh' ãnh' ke jé. “Toreg',” he tóg. “Hẽn ri ke mũn Elias kãti mũ, ti kãtẽrem jé,” he tóg.

³⁷ Hã ra Jesus tóg prẽr mág (pẽ) han kĩ hun ke mũ sir. ³⁸ Hã ra Topẽ jo ãn krẽm kur tỹ jãnkã nĩfe tóg jaran ke mũ, ti jar tóg vẽn kãkym ke kãn mũ sir.

³⁹ Hã ra capitão tóg ti vэг jẽ nĩ. Ti prẽr mэг tóg mũ, ti tỹ hun ke ãn mэг tóg mũ, kĩ tóg: “vẽn vĩ há ja vẽ,” he mũ. “Topẽ kósın ja vẽ” he tóg.

⁴⁰ Kĩ ãn tỹtã fag tóg tá nỹti gé. Kuvar há tá nỹti kĩ fag tóg ti vэг nỹti nĩ. Fag kã ù fi vỹ tóg tỹ Maria Madalena fi nĩ, kĩ ù fi tóg tỹ Salomé fi nĩ gé, kĩ ù fi tóg tỹ Maria fi nĩ gé, José mré Tiago sĩ mỹnh tag fi. ⁴¹ ãn tỹtã ãn fag tóg ti nón mũ ja nĩgtĩ, ti tỹ Galiléia mĩ tĩ mũn kĩ. Tá fag tóg ti ki rĩr ja nĩgtĩ gé. Kĩ ãn tỹtã tỹ hẽn ri ke fag tóg ti ve kĩ nỹti gé, ti tỹ cruz to sa kĩ, ti mré Jerusalém ra mũ ja ãn fag.

Ag tỹ vẽn kej tá ti fi

(Mt 27.57-61; Lc 23.50-56; Jo 19.38-42)

⁴² Rãkẽ tóg nỹ ha, nẽn kar han jé kurã vẽn sir, hã vỹ: vẽn kãn ke jo kurã ãn, he mũ. ⁴³ Hã ki Arimatéia tá José tóg Pilatos mỹ ke mũ, ti tỹ ti mỹ Jesus fãr fi jé. Arimatéia tá José tóg tỹ vẽn jyvẽn tĩ ag kã ù nĩ. Jykre kuryj tóg nĩ. Topẽ tỹ tỹ ãg pã'i

nĩ ve sór tóg tĩ gé. Ën hã vỹ tóg mũmэг vẽn kĩ Pilatos mỹ Jesus fãr to vĩ mũ.

⁴⁴ Kĩ Pilatos tóg: “kĩ ti mỹ ter huri?” he mũ. Kĩ tóg capitão jé prẽr kĩ ti mỹ: “ti mỹ ter huri?” he mũ, “mỹ vãsỹ?” he tóg.

⁴⁵ Kĩ capitão tóg: “hỹ,” he mũ. “Ter ti huri,” he tóg. Kĩ Pilatos tóg José mỹ Jesus fãr ti fig mũ sir. ⁴⁶ Kĩ tóg sir kur kupri kym mũ, ãn há tãvĩ. Kĩ tóg Jesus kãtẽrem mũ. Kur ãn tỹ tóg ti pãg mũ. Kĩ tóg vẽn kej kãtã ti fĩnh tĩ mũ sir, pãró nor kãkã. ag tỹ pãró nor han ja kãkã. Kĩ tóg pó tỹ nĩfẽn mũ sir, ti jy. ⁴⁷ Hã ra Maria Madalena fi tóg vэг mũ sir, ag tỹ ti fi ti, Maria fi mré hã, José mỹnh fi.

Jesus rĩr mãn

(Mt 28.1-8; Lc 24.1-12; Jo 20.1-10)

16 Vẽn kãn ke kurã tũg kĩ Maria Madalena fi tóg nẽn ger há mэг mũ, Salomé fi ke gé, Maria fi ke gé, Tiago mỹnh ãn fi. Fag tỹ ti fãr ger há han sór vẽ. ² Kĩ semana kurã ve ki fag tóg kusã (pẽ) ki ti kej ra mũ mũ, rã tỹ jun ke kĩ sa ra. ³ Mũn kĩ fag tóg jagnẽ mỹ: “ũ nỹ hỹn ãg mỹ ti kej ti nón mũ, tá, pó tỹ nĩfe ãn ti?” he mũ. ⁴ Hã ra fag tóg vẽn jo vэг mũ, ti kej tá, hã ra tóg nor nỹ nĩ, pó mэг ãn tóg tĩn kĩ nĩ nĩ sir.

⁵ Tá junjun kĩ fag tóg ti kej kãra ge mũ sir, kĩ fag tóg kãtã kyrũ vэг mũ, hã ra tóg ti nỹgia pэгja tá nĩ nĩ, kur kupri tu kĩ. Kĩ tóg fag mỹ e tĩ, mỹr, ha mẽ. ⁶ Kĩ kyrũ ãn tóg fag mỹ: “vẽn mỹ” he tũg,” he mũ. “Ãjag hỹn Jesus jãvãn mũ, Nazaré tá ke ti,” he tóg, “ag tỹ cruz to ãn sãg mũ ãn ti,” he tóg. “Rĩr ti jẽ nĩ, tag ki ti tũ nĩ ha,” he tóg. “Ag tỹ ti fi ja hã vẽn ha,” he tóg. ⁷ “Kur Pedro mỹ tónh mũ jэг, ti mré mũ tĩ kar ag mỹ ke gé,” he tóg. “Ag mỹ: ãjag jãmĩ tóg tũg mũ něji, hemnĩ, Galiléia ra, hemnĩ. Tá ãjag ti venh mũ, hã kĩ tóg ãjag mỹ to ja nĩ, hemnĩ,” he tóg, fag mỹ, kyrũ ti.

⁸ Kĩ fag tóg ti kej tá fūrūrũn kĩ pa mũ. Pétê fag tóg sir mũ mũ, fag mũ e tĩn kĩ, fag tĩ jūrũn ke kĩ. Kĩ fag pí(jé) ũ mũ nén ũ tó mũ mĩr', fag kanê jur kĩ.

Maria Madalena fi tĩ ti ve

(Mt 28.9-10; Jo 20.11-18)

⁹ Jesus tĩ kusã ki rĩr mĩn kĩ, ti tĩ semana ki kurã ve ên ki rĩr mĩn kĩ tóg Maria Madalena fi mũ vênh ven vên mũ, ti tĩ ũn ki vėjagrê kórég tĩ 7 (ke) pan ja ên fi mũ. ¹⁰ Kĩ fi tóg ti mũ, ti mré nĩtĩ ag mũ tó jé, ag fe kaj nĩtĩn kĩ, ag kygfĩ' hen kĩ. ¹¹ Hã ra ag tóg kri nĩm tũ nĩ, fi tĩ ag mũ kãmén mũ ra, ti tĩ rĩr nĩ ên ti, fi tĩ ã tĩ ti ve ja ên kãmén mũ ra.

Ũn régre ag tĩ ti ve

(Lc 24.13-35)

¹² Kar kĩ tóg ũn régre ag mũ vênh ven mũ gé sir. Ag mũ tóg vēsĩ ũn kĩ tĩ nĩ. Ag mũ ra ag tóg ěprĩ kri ti vэг mũ. ¹³ Kĩ ag tóg vỹnvỹn ke kĩ (ag tóg) ũ tĩ tá nĩtĩ ag mũ tó mũ gé sir, Jesus mré mũ tĩ ũ ag mũ, hã ra ag tóg ag vĩ kri fig tũ nĩ gé.

Jesus tĩ ã mré mũ tĩ ag mũ vênh ven

(Mt 28.16-20; Lc 24.36-49;

Jo 20.19-23; Hk 1.6-8)

¹⁴ Vãhã tóg ũ tĩ 11 (ke) ag mũ vênh ven mũ gé, ag pĩn kĩ, ag jêg nĩtĩ ra. Kĩ tóg ag mũ vĩ tar han mũ, ag tĩ kri nĩm jãvãnh nĩtĩn kĩ, ag tĩ to jykřn tũ nĩtĩn

kĩ. “Ăjag hã ne tóg ũ tĩ inh vэг mũ ên fi vĩ kri fi ja tũ nĩ, ũ tĩ inh vэг mũ ên ag vĩ kri nĩm ja tũ ajag nĩ gé,” he tóg. “Ag tĩ inh rĩr mĩn vэг mũ ra ajag tóg kri fi ja tũ nĩ,” he tóg. ¹⁵ Kĩ tóg ag mũ: “ga kri mũ kĩ ěmã kar mĩ vênh vĩ sér kãmén nĩ, Topê tĩ há(r) ag kar mũ,” he mũ. ¹⁶ “Ũ tĩ ajag vĩ kri fig mũ ên ag vĩ krenkren ke mũ, ũ tĩ inh ki ge kĩ kygpe kĩ nĩtĩ ên ag vĩ krenkren ke mũ,” he tóg. “Hã ra ũ tĩ kri fig tũ ên vĩ kren ke tũ nĩ, ũ tĩ inh ki rã tũ ên vĩ kren ke tũ nĩ,” he tóg, Jesus ti. ¹⁷ “Ũ tĩ inh ki ge mũ ên ag vĩ milagre venh ke mũ inhhã,” he tóg. “Tag ve jé ag tóg ke mũ, ha mẽ. Vênh jagrê kórég pan jé ag tóg ke mũ, ijkre tĩ,” he tóg. “Ũn vĩ ũ ag vĩ tó jé ag tóg ke mũ,” he tóg. ¹⁸ “Ag tĩ kejẽn pỹn kãgmĩg mũ ra, ag tĩ kejẽn veneno kron mũ ra tóg ag tĩ hẽ ri kenh ke tũ nĩ,” he tóg. “Ũn kaga ag mẽgmẽ jé ag tóg ke mũ gé, ag nĩgé tĩ, kĩ ag tóg sir ag tĩ há' henh ke mũ,” he tóg, Jesus ti.

Jesus tĩ ã jóg ra tĩg

(Lc 24.50-53; Hk 1.9-11)

¹⁹ Jesus tĩ ã mré mũ tĩ ag mũ tag tó kar kĩ tóg kanhkã ra tãprĩ mũ sir, kĩ tóg tá jun kĩ (tóg) Topê pějja tá nĩ mũ. ²⁰ Kĩ ag tóg mũ mũ sir, ěmã kar mĩ hã, ti mré mũ tĩ ag. Kĩ ag tóg tugtó mũ, vênh vĩ sér ên ti, kĩ ěg Senhor tóg ag mré han tĩ nĩ, ag vĩ kóm tóg vênh kar tĩ nén han vãnh ên hyn han mũ. Hã vẽ.

LUCAS TỸ RÁ

1 Lucas tỹ rá vë. Sỹ ã mỹ rán vë, Teó-filo'. Ủ tỹ hên ri ke ag vỹ to jykrén, ag tỹ kãmén jé, ẽg tỹ Jesus to nén ki kanhró nỹtĩ ên ti, Topê tỹ ti jênê ja ên ti, kỹ ag tóg rán huri. ²Ủ tỹ ti vég mũ ag tóg ẽg mỹ kãmén ja nĩgtĩ, ủ tỹ ti vĩ tó ti ag, ủ tỹ ti mré mũ ja ên ag. Ên ag tỹ nén tó rán ag tóg huri, ủ ag. ³Kỹ sóg vậhã rán to jykrén mũ gé sir, ha mẽ. Jesus kãme mẽ kãn ja inh nĩ ha, ti mur mré hã, kỹ sóg ti tỹ nén han mũ mẽ kãn gé. Hã kỹ sóg ã mỹ Jesus kãme rán mũ sir. Komêr hã sóg rán kãn sór mũ.

Tỹ ã tóg pãi' mág nĩ, Teófilo'. ⁴Mẽ ã huri, Jesus kãme ti. Sỹ ã mỹ rán vë, ã tỹ ti tỹ ki hã tó ja mên jé sir.

João Batista mur ke tóg

⁵Kejên Herodes tóg tỹ Israel ag pãi' mág tỹ rei nĩ, ga tỹ Judéia tá. Kỹ Topê tũ ki rĩr tĩ ủ tóg nĩ nĩ, ti jiji hã vỹ: Zacarias, he mũ. Ti jóg'jóg ve jyjyn hã vỹ: Abias, he mũ. Arão krê'krê ủ vë, Abias ti. Semana pir ki tóg Topê tũ ki rĩr tĩgtĩ, Abias ti. Ti semana ki ti krê'krê tỹ Zacarias ên tỹ ki rĩr vë, ti tỹ tỹ Abias krê'krê nĩn kỹ.

Prũ ti nĩ, Zacarias ti, kỹ ti prũ fi jiji hã vỹ: Isabel, he mũ. Arão krê'krê fi vë gé, Isabel fi.

⁶Ên fag vỹ vênh jykre kuryj han tĩ, kỹ fag jykre vỹ kuryj nỹtĩ, Topê mỹ. Ti vĩ ki króm fag tóg tĩ, ẽg Senhor vĩn ki. Ti tỹ ẽg jyvên han fag tóg tĩ, kygnê sór tũ fag tóg nĩgtĩ. ⁷Hã ra fag krê tóg tũ tĩ. Kurĩ fi tóg nĩ, Isabel fi, hã kỹ fag tóg krê tũ nỹtĩ. Krê tũ nỹtĩ ki fag tóg kófa nỹtĩ ha.

⁸Kejên Zacarias tóg ã semana pêtêm mũ sir, ti tỹ Topê tũ ki rĩr jé. Kỹ tóg cidade tỹ Jerusalém ra tĩ mũ, Topê tũ ki rĩr jé. Tá jun kỹ ag tóg jogar he mũ, ag tỹ ủ tỹ Topê mỹ ger há pũn ke mũ ên ve jé, incenso ên ti. ⁹Ag jykre vë, ag tỹ to jogar he sór ti. Ag tỹ to jogar hen kỹ tóg

tỹ Zacarias nĩ sir, kỹ tóg Topê jo ãn kãra rá mũ sir, ti mỹ pũn jé, ger há ên ti. ¹⁰Ti tỹ Topê jo ãn krêm pũn kỹ vênh kar tóg re tá nỹtĩ nĩ, Topê mré vĩn kỹ. Zacarias tỹ Topê mỹ pũn kỹ ag tóg Topê mré vĩ nỹtĩ nĩ, re ki, ùn e ên ag.

¹¹Kỹ tóg ti mỹ pũn mũ sir. Kỹ Topê tỹ jênê jafã vỹ ti mỹ vênh ven mũ. Topê mỹ ger há pũn jafã vỹ tá jê nĩ, ãn kátá. Mesa ên pẽgia tá tóg jê nĩ, Topê tỹ jênê jafã ti. ¹²Zacarias tỹ ti ve kỹ tóg jũrũn ke mũ. Ti mỹ tóg e tĩ, ti tỹ ti ven kỹ. ¹³Hã ra tóg ti mré vĩ mũ, Topê tỹ jênê jafã ti. Kỹ tóg ti mỹ: “Zacarias,” he mũ. “Kamêg tũg nĩ,” he tóg. “Topê vỹ ã tỹ ti mỹ nén to vĩ mũ ên mẽ, kỹ tóg ã mỹ han ke mũ ha. Fi kufyg jé ã tóg ke mũ, ã prũ fi, Isabel fi. Fi tỹ ti ve kỹ tóg gré nỹnh mũ, ã kósin ti, ha vemnĩ,” he tóg, Topê tỹ jênê jafã ti. “Kỹ ã tỹ ti jyjy han kỹ: João, hemnĩ,” he tóg mũ. ¹⁴“Kỹ tóg ã mỹ sér tĩnh mũ. ã fe tóg mĩn kenh mũ. Ủ tỹ hên ri ke ag mỹ tóg há tĩnh mũ, fi tỹ ti ven kỹ. ¹⁵Topê vỹ ti tỹ ùn mág han ke mũ. Vinho vóg ke tũ tóg nĩ, goj fa vóg ke tũ tóg nĩ gé. Ti vãkre vë. Topê kuprĩg vỹ tỹ ti jagrê nĩnh mũ, fi tỹ ver ti vég tũ ki. ¹⁶Israel ag mỹ tóg Topê vĩ tónh mũ, kỹ ủ tỹ hên ri ke ag vỹ ti vĩ mẽ kỹ kri fi kỹ ãjag jykre továnh ke mũ. Topê jykre hã han jé. ¹⁷Êg Senhor jo tóg tĩg ke mũ gé. Vãsỹ Topê vĩ tó ti tỹ Elias jykre han jé tóg ke mũ. Elias vỹ Topê kuprĩg tỹ jagrê ja nĩgtĩ, kỹ tóg jykre tar han ja nĩgtĩ. Ên jykre han jé tóg ke mũ. ã kósin tag tỹ ag jyvên kỹ ag panh tóg ãjag krê mré vênh jykre pir han ke mũ. Ủ tỹ Topê vĩ mranh tĩ ên tóg vênh jykre kuryj han sór ke mũ gé, ủ tỹ Topê vĩ ki króm tĩ ên ri ke. Hã ki tóg vênh kar jykre tỹ há' henh ke mũ, ag kugrynh kỹ, ã kósin tag ti. Topê mỹ tóg ag jykre tỹ há' henh mũ, Cristo tỹ kătĩg ken jo, ag tỹ ti jãvánh jé,” he tóg mũ, Topê tỹ jênê jafã ti, Zacarias mỹ.

¹⁸Kỹ Zacarias tóg ti mỹ: “hã ra sóg kófa nĩ ha,” he mũ. “Kar inh prũ fi vỹ

kófa nĩ gé, inh mré. Kĩ inh hĩn hē ri kenh mũ? Inh mĩ tá kr̥g mũ vỹ?” he tóg. ¹⁹ Kĩ Topē tỹ jēnē jafā tóg ti mỹ: “tỹ sóg Gabriel nĩ,” he mũ. “Topē nĩgia tá inh jēgtĩ. Hã ra tóg inh jēnē, sỹ ã mré vĩ jé, sỹ ã mỹ vênh vĩ sér tag tó jé,” he tóg. ²⁰ “Ha vé, vỹ vánh nĩ jé ã tóg ke mũ ha, ha vemnĩ. Vĩ vánh nĩ ki ã tóg isỹ ã mỹ nén tó mũ kurā ěn pétēm ke mũ. Ā hã ne tóg sỹ ã mỹ vĩ kri nĩm tũ nĩ. Ti kurā ki ã tóg venh mũ, sỹ ã mỹ nén tó ja ti. Ā tỹ inh vĩ kri fig tũ nĩn kỹ ã tóg vỹ vánh nĩn mũ ha,” he tóg, Topē tỹ jēnē jafā ti.

²¹ Hã ra vênh kar ěn tóg re tá nỹtĩ nĩ, Zacarias jāvánh kỹ. Ag mỹ tóg e tĩ, ti kākutē vánh han kỹ, Topē jo ĩn kátá. ²² Váhã tóg kākutē mũ, hã ra tóg sir vỹ vánh jē. Kĩ tóg ag mỹ ven mũ, ã nĩgé tỹ. Hã ki ag tóg ki kanhrān mũ sir, ti tỹ nén nē ve ja ěn ti, Topē jo ĩn kátá.

²³ Ti vỹ vánh nĩn ki ti rānrhāj tóg kejēn tũ' he mũ sir, ti tỹ Topē tũ ki rĩr ěn ti. Kĩ tóg ã ĩn ra tĩ mũ sir. ²⁴ Ti tỹ ã ĩn tá jun kar kỹ ti prũ fi tóg kejēn kufyg mũ sir, Isabel fi. Kĩ fi tóg vênh péju kỹ nĩ nĩ sir, fi mỹ sér tĩn kỹ. Kysā tỹ 5 (ke) han fi tóg, vênh péju kỹ nĩ ki. ²⁵ “Topē hã ne inh jagāgtān’,” he fi tóg mũ. “Inh ve tóg, kỹ tóg inh mỹ’āg tỹ tũg’ hé. Inh kurĩ to fag tóg: “Topē hĩn fi to kórég nĩ,” he ja nĩgtĩ. Hã ra tóg fag vỹ tỹ tũg’ hé, Topē ti,” he fi tóg mũ. Hã kỹ fi tóg kufyg mũ sir, ã kósín vánh (hã) ra.

Jesus mur ke tó

²⁶ Fi kufy nĩ ki kysā tỹ 6 vế sir, kỹ Topē vỹ ã tỹ jēnē jafā jēnēg mũ, ti tỹ Jesus mur ke tónh tĩg jé, Gabriel ěn ti. Kĩ tóg ga tỹ Galiléia ra tĩ mũ, cidade tỹ Nazaré ra. ²⁷ Tá tátāg ũ fi tóg nĩ nĩ. Ũn mén ja tũ fi vế. Fi jĩjĩn hã vỹ: Maria, he mũ. Fi mén ken hã vỹ: José, he mũ. Davi krēkrē ũ vế, José ti, fi mén ke ěn ti. ²⁸ Fi hã mỹ tóg vênh ven mũ sir, Gabriel ti, kỹ tóg fi mỹ: “ã mỹ há?” he mũ. “Topē vỹ ã jagāgtān, kỹ tóg ã vég mũ,” he tóg mũ. ²⁹ Fi tỹ ti

ve kỹ fi tóg jūrũn ke mũ. Ti vỹ tóg fi mỹ e tĩ, kỹ fi tóg to jykrén mũ sir, ti vỹ to. “Ti tỹ ne tó nē, hĩn?” he fi tóg mũ, to jykrén kỹ.

³⁰ Kĩ Topē tỹ jēnē jafā tóg fi mỹ: “kamēg tũg ra,” he mũ. “Topē vỹ ã jagāgtān mỹr,” he tóg. ³¹ “Ha vé, kufyg jé ã tóg ke mũ,” he tóg. “Kỹ ã tóg kósín ke mũ. Ā tỹ ti jyjyn kỹ ti mỹ: Jesus, hemnĩ,” he tóg, Topē tỹ jēnē jafā ti, fi mỹ. ³² “Tỹn ũn mág jēnh ke mũ, ã kósín tag ti, kỹ ag tóg ti to: ũ tỹ kynhmỹ nĩ ěn kósín, henh ke mũ. Kỹ ěg jóg tỹ Topē vỹ ti tỹ pã'i mág han ke mũ, vāsỹ ti jógjóg ve tỹ Davi jēgja kã. ³³ Kĩ tóg tỹ pã'i nĩ sir, Jacó krē kar to pã'i. Ti tỹ tỹ pã'i nĩ tag vỹ tũ' henh ke tũ nĩ. Tỹ pã'i han kỹ tóg nĩ nĩ,” he tóg, Gabriel ti.

³⁴ Kĩ fi tóg ti mỹ: “hã ra sóg ũ mré nỹ ja tũ nĩ ver,” he mũ. “Kỹ inh hē ri kenh mũ?” he fi tóg ti mỹ. ³⁵ Kĩ tóg fi mỹ: “Topē kuprĩg vỹ ã kri tĩn mũ,” he mũ, “kỹ ti kánhvég vỹ ã kri tĩn mũ gé, kỹ tóg ã jykre tỹ ã kósín ti han ke mũ, Topē ti. Hã kỹ ag tóg ti to: Topē tũ, henh ke mũ, ã tỹ ũn venh ke ěn to. Topē kósín, he jé ag tóg ke mũ, ti to. ³⁶ Ha vé, ã mré ke fi vỹ kufy nĩ, Isabel fi. Ũn gré ve jé fi tóg ke mũ. Ā kófa (hã) ra fi tog kufy nĩ. Kysā tỹ 6 (ke) han fi tóg huri, kufy nĩ ki. Fi to ājag tóg: kurĩ fi tóg nĩ, he tĩ vế, hã ra fi tóg kufy nĩ ha. ³⁷ Topē hã ne nén kar han há nĩ, hã kỹ tóg fi mỹ han. Kỹ tóg ã mỹ han ke mũ gé, sỹ ã mỹ tó mũ tag ti,” he tóg, Gabriel ti. ³⁸ Kĩ fi tóg ti mỹ: “há ti nĩ,” he mũ. “Tỹ sóg Topē camarada nĩ mỹr, ti tũ pē. Kĩ tóg inh mỹ há tĩ, ã tỹ inh mỹ tó mũ tag ti,” he fi tóg ti mỹ. Kĩ tóg tĩ mũ sir, Topē tỹ jēnē jafā ti.

Maria fi tỹ Isabel fi venh tĩ

³⁹ Ti tĩg kar kỹ Maria fi tóg tĩ mũ gé sir, Isabel fi jamā ra. Pānónh e tá tóg nĩ, fi jamā ti, ga tỹ Judéia tá. Fi tỹ ra tĩg kỹ fi tóg fūrũn tĩ mũ. ⁴⁰ Fi tỹ Zacarias ĩn tá jun kỹ fi tóg Isabel fi mỹ: “ã mỹ há?”

he mû. ⁴¹ Kĩ Isabel fi tóg fi vĩ mẽg mû, kĩ fi kósin tóg vo mû, fi kăki. Kĩ Topê kuprĩg vĩ fi krĩn mû. ⁴² Kĩ fi tóg prêr mû. “Topê tóg ã ve há han, fag kar kămĩ tóg ã kuprêg,” he fi tóg fi mĩ. “Kĩ Topê vĩ ã kósin ve há han mû gé, ã tĩ ùn venh ke ti. ⁴³ Inh Senhor mĩnh fi hã ne tóg inh venh kătĩ mû, kĩ tóg inh mĩ e tĩ,” he fi tóg fi mĩ. ⁴⁴ “Ha vê, isy ã vĩ mẽ kĩ inh kósin tóg vo ja nĩ, inh kăki. Ti mĩ tóg sér tĩ, ã vĩ ti. ⁴⁵ ã hã ne tóg Topê vĩ kri fi, ti tĩ ã mĩ vênh vĩ jênên kĩ. Hã kĩ tóg ã ve há han, Topê ti. ã tĩ ti vĩ kri nĩm kĩ ã tóg venh ke mû, ti tĩ ã mĩ nén tó ja ti,” he fi tóg, Isabel fi, Maria fi mĩ.

Maria fi jãn

⁴⁶ Kĩ Maria fi tóg ke mû gé. “Topê mĩ sóg vĩ há han sór mû,” he fi tóg. “Inh mĩ tóg tĩ ùn mág nĩ, ãg Senhor ti. ⁴⁷ Kĩ inh fe tóg mĩn ke mû, isy tĩ Topê tũ nĩn kĩ, isy tĩ ãg kren han tĩ ên tũ nĩn kĩ. ⁴⁸ Inh ki tóg êvănĩ mĩr. Tĩ sóg ti camarada nĩ. Tĩ sóg ùn sĩ nĩ, hã ra tóg inh ki êvănĩ. Kĩ vênĩ kar tóg iso: “Topê vĩ fi ve há han,” hênĩ ke mû, inh krêkrê kar ke gé, êprã ke krê kar ke gé. ⁴⁹ Topê hã ne inh mĩ ãg tĩ nén han vãnĩ han. Tar ti nĩ, Topê ti, hã kĩ tóg han, inh mĩ. Jykre kuryj ti nĩ, Topê ti, kĩ ti jiji tóg ãg mĩ mẽ há ti. ⁵⁰ ãg jagăgtãn tóg nĩgtĩ, ãg jógjóg ve ag ke gé, ãg panĩ ag ke gé, ãg ke gé, ãg krê kar ke gé. Û tĩ ti kamêg mû kar jagăgtãn tóg nĩgtĩ mĩr, ha mẽ. ⁵¹ Jykre (ka)mẽ tóg nĩ, kĩ tóg ãg tĩ nén han vãnĩ hyn han tĩ. Û tĩ: “vêsóg ki inh nén kar han tĩ,” he mû ên ag jykre tĩ tóg tũg' hênĩ ke mû,” he fi tóg. ⁵² “Pã'i mág ag tĩ tóg ùn kãsĩr han, Topê ti. Kĩ tóg ùn kãsĩr ag tĩ ùn mág han. ⁵³ Ûn jagăgtar ag fónfan tóg mû, nén ù há tĩ, ù tĩ ti vĩ mẽ sór mû ag. Ûn rico ag mĩ tóg: “ha mũ jêg,” hé, kĩ tóg ag mĩ nén ù nĩm tũ nĩ, kĩ ag tóg jagăgtar nĩtĩ ha, ù tĩ ti vĩ mẽ jăvănĩ ên ag. ⁵⁴ Israel ag jagăgtãn tóg

mũ, ã camarada ag, ã tĩ văsỹ ag jagăgtãn tĩ ên to jykrên kĩ. ãg hã vê, ãg jagăgtãn tóg. ⁵⁵ ãg jógjóg ve ag mĩ tóg tó ja nĩ, Abraão mĩ, ti krê ag mĩ ke gé, ti tĩ ãg jagăgtãn ke ti. Kĩ tóg ã vĩ ên to jykrên kĩ han, ti tĩ văsỹ nén tó ja ti. Ti tĩ ãg jagăgtãn ke ên tóg tũg' he jăvănĩ nĩ,” he fi tóg, Maria fi. Fi tĩ Topê mĩ vĩ há han hã vê.

⁵⁶ Kar fi tóg kysã tăgtũ han mũ sir, Isabel fi mrê, kĩ fi tóg ã jamã ra vỹn ke mũ sir.

João Batista mur

⁵⁷ Fi tũg kar Isabel fi vĩ fi kósin venh ke kurã pétêm mũ sir, kĩ fi tóg vэг mũ. Hã ra tóg gré nỹ, fi kósin ti. ⁵⁸ Kĩ fi rã nỹtĩ fag vĩ vэг mũ, fi kanhkã fag ke gé. Topê tĩ fi jagăgtãn mẽg fag tóg mũ. Kĩ tóg fag mĩ sér tĩ sir, fi mrê, fi kósin to.

⁵⁹ Kurã tĩ 8 (ke) ki ag tóg fi tá junjun mũ, ag tĩ ti gré junun făr kym jé. Kĩ ag tóg ti jyjy to jykrên mũ gé, hã vỹ: Zacarias, he mũ. Ti panĩ jiji tó sór ag tóg mũ, ti mĩ. ⁶⁰ Hã ra ti mĩnh fi tóg: “vó,” he mũ. “João, he jé tóg ke mũ, ti jyjy ti,” he fi tóg mũ. ⁶¹ Kĩ ag tóg fi mĩ: “ã kanhkã jiji tũ vê hã ra,” he mũ. ⁶² Kĩ ag tóg ti panĩ ki jêmẽ sór mũ. Ajag nĩgé tĩ ag tóg ti mĩ: “ti jyjy hỹn hẽ ri kenh mũ?” he mũ, ti panĩ mĩ, ag nĩgé tĩ. ⁶³ Kĩ tóg ki rãn jafã to vĩ mũ, Zacarias ti, kĩ tóg rãn mũ. “Ti jijin hã vỹ: João, he mũ,” he tóg, vênĩ rãn ki. Kĩ tóg ag mĩ e tĩ sir. ⁶⁴ Kĩ vãnã ti vĩ tóg punh ke mũ. Ti nũnẽ tóg krónĩ ke mũ, kĩ tóg vĩ mũ sir, Topê mĩ vĩ há han tóg mũ, ti mĩ sér tĩn kĩ.

⁶⁵ Kĩ fag rã nỹtĩ kar vĩ kamêg mũ. Kĩ vênĩ vĩ ên tóg vênĩ kar kri rũm mũ, ga tĩ Judéia kar mĩ hã. Vênĩ kar tóg tĩ vêmên kãn mũ. ⁶⁶ Kĩ ù tĩ mẽg mũ fag vĩ to jykrên mũ. “Gĩr tag hỹn hẽ ri kenh mũ,” he fag tóg mũ. Topê vĩ ti ki rĩr há han, hã kĩ tóg fag mĩ e tĩ.

Zacarias tȳ Topē mȳ vĩ há han

⁶⁷ Kȳ Topē kuprĩg vȳ ti panh tȳ Zacarias krĩn mũ, kȳ tóg tag tó mũ, ha mē.

⁶⁸ “Tȳ ti ũn mág jē, ēg povo tȳ Israel kri, ēg Senhor ti, hã vȳ: Topē, he mũ. Ēg ki tóg ěvãnh nĩgtĩ, Topē ti, ti tȳ ti tũ ag krenkren han jé. Ēg hã vȳ tȳ ti tũ nĩtĩ,” he tóg. ⁶⁹ “Ti camarada tȳ Davi krēkrē ěn vȳ ēg krenkren han ke mũ, ēg tȳ ti vĩ jēmēn kȳ. Ũn mág pē vē, Davi krēkrē ěn ti. Topē tȳ ēg mȳ nén han hã vē. ⁷⁰ Hã kȳ tóg tó ja nĩ, vāsȳ. Ti vĩ tó ti ag vȳ tugtó ja nĩ, vāsȳ, ēg si ag, ti tũ ag. ⁷¹ Ũ tȳ hēn ri ke ag vȳ ēg kato tēgtē mũgtĩ, hã ra tóg ēg krenkren han mũ, ag to, ũ tȳ ēg to kórég tãvĩ nĩtĩ ag to. ⁷² Ti tȳ ēg jóg'jóg ve ag mȳ tó ja ěn han ja tóg nĩ, ēg jagãgtãn kȳ, Topē ti. Ag mré jykrén ja tóg nĩ, Topē ti. Ěn to jykrén ja tóg nĩ, kȳ tóg ki króm ja nĩ sir, Topē ti. ⁷³ Ēg jóg'jóg ve tȳ Abraão mȳ tóg vėnh vĩ mág han ja nĩ, Topē ti. ⁷⁴ Kȳ tóg ti mȳ: “ag krenkren han jé sóg ke mũ, ã krē ag, ag kato tēgtē mũ ag to, ha vemnĩ,” he ja nĩ. “Sȳ ke há vē. Sȳ ag krenkren han kȳ ag tóg sir jatun mȳ isũ han ke mũ, mũmēg tũ nĩn kȳ,” he ja tóg nĩgtĩ, Topē ti. ⁷⁵ “Nén ũ vėnhmȳ han ke tũ ag tóg nĩgtĩ, kurã kãtig ke mũ ěn kã. Vėnh jykre kuryj tãvĩ han jé ag tóg ke mũ, isũ han kȳ. Ag tȳ ga kri mũn kȳ ag tóg han ke mũ, isũ ti. Kurã kar ki ag tóg sir inh jykre hã han ke mũ,” he ja tóg nĩgtĩ, Topē ti, Abraão mȳ,” he tóg, Zacarias ti.

⁷⁶ Kȳ tóg ã kósın mȳ: “ha vé, vȳ,” he mũ. “Sĩ ã tóg nĩ ver. Ũ tȳ kynhmȳ nĩ ěn vĩ tó jé ã tóg ke mũ, kȳ ag tóg ã to: “Topē vĩ tó ti tĩ,” hēnh ke mũ. “Ēg Senhor jo ã tóg tĩnh mũ, ã tȳ ti japry kure ri ke han jé, ã tȳ ti jamĩn kurynh ri ke han jé, ã tȳ vėnh kar mȳ Topē vĩ tón kȳ,” he tóg. ⁷⁷ “Ag kanhrãn jé ã tóg ke mũ, Topē tȳ ēg krenkren han sór ěn to. Ēg tȳ ti vĩ mranh tȳ tóg ēg mȳ vėnh pãte fón ke mũ, hã ki

tóg ēg krenkren han ke mũ, Topē ti,” he tóg, Zacarias ti. ⁷⁸ “Topē tȳ ēg jagãgtãn hã vē, ti tȳ ēg to há tãvĩ nĩn kȳ. Ēg ve jé tóg kãtig ke mũ, kȳ tóg rã tȳ jun ke ri ke nĩ, Cristo mur ke ti. ⁷⁹ Kutȳ ri ke ti nĩ, ēg mȳ, ēg tȳ ti ki kagtĩg nĩtĩn kȳ. Ti kãtig kȳ tóg ēg mȳ kurã ri ke nĩ sir. Kãgtȳ jé ēg tóg ke mũ, kȳ tóg ēg mȳ kutȳ ri ke nĩ sir. Hã ra tóg ēg mȳ ã japry ven ke mũ, ã jamĩn ti. Jagma mũn kȳ ēg tóg ti jykre kusa vėnh ke mũ,” he tóg, Zacarias ti. Ti tȳ ã kósın mȳ tón hã vē.

⁸⁰ Hã kȳ fi tóg João ve ja nĩ, ti han mũ fag tȳ kófa (hã) ra. Kȳ tóg mog mũ sir, kȳ tóg tar jē sir. Krĩ há tóg nĩ gé. Ěmã tũ mĩ tóg ti mũ ver, ã kurã tȳ tá krȳg ki. Ā kurã ki tóg Israel ag mȳ vėnh ven mũ, ag mȳ Topē vĩ kãmén jé.

Jesus Mur

(Mt 1.18-25)

2 João mur kar kȳ ga kri pã'i mág tȳ imperador tȳ Augusto vȳ kejēn vėnh vĩ jēnēg mũ, vėnh kar ag tȳ ãjag jyjȳ rãn mũ jé. Ga kri mũ kar ag mȳ tóg vėnh vĩ ěn jēgnēg mũ, pã'i mág tȳ Augusto ti. ² Vėnh jiji rá ve vē, ge han ja tũ ag nĩtĩ. Cirênio vȳ tȳ ga tȳ Sírĩa kri pã'i tȳ governador nĩ, Augusto tȳ vėnh vĩ ěn jēnēg mũn kã. Tȳ tóg Augusto krēm ke nĩ, Cirênio ti. Ti tȳ tȳ pã'i nĩn kȳ ag tóg sir ãjag jyjȳ rãnrãn vėn mũ. ³ Kȳ ag tóg mũ kãn mũ, ãjag jóg'jóg ve ag jamã ja ra. Tá ag tóg ãjag jiji rá vĩn mũ sir.

⁴⁻⁵ Kȳ José tóg tĩ mũ gé, ã prũnh ke fi mré, hã vȳ: Maria, he mũ. Cidade tȳ Nazaré tá fag tóg pa mũ, ga tȳ Galilėia tá. Kȳ fag tóg ga tȳ Judėia ra mũ mũ, cidade tȳ Belém ra. Davi krēkrē vē, José ti, hã kȳ tóg Belém ra tĩ mũ, ã jyjȳ rá nĩm jé. Davi jamã ja vē, Belém ti. Hã kȳ tóg ra tĩ mũ. Kȳ ti prũnh ke fi vȳ ti mré tĩ mũ, hã ra fi tóg kufȳ jagȳ nĩ. ⁶ Fag tȳ tá nĩtĩ ki fi tóg ã kurã pétēm mũ. ⁷ Kȳ fi tóg ã kósın vėg mũ sir. Gré ti nȳ, fi kósın ve tag ti. Kȳ fi tóg ti pãg kȳ koso kãkã ti fig

mũ. Ìn vỹ funfór nỹtĩ, hã kỹ fag tóg vènh mēg jo ìn krēm nỹtĩ ja nĩgtĩ.

Mé ki rĩr tĩ ag

⁸Kỹ ù tỹ mé ki rĩr tĩ ag vỹ tá nỹtĩ gé, carneiro ki rĩr tĩ ag. Ag japỹ ja tá ag nỹtĩ, ājag mēg ki rĩr jé, kuty ěn kã. ⁹Kỹ vāhã Topē tỹ jēnē jafã vỹ ag mỹ vènh ven mũ, kanhkã tá. Topē tỹ jēngrē vỹ ag kri rùm ke mũ. Kỹ ag tóg kamēg kỹ jürün ke mũ sir. ¹⁰Kỹ Topē tỹ jēnē jafã tóg ag mỹ: “kamēg tũg ra,” he mũ. “Sỹ ājag mỹ nén ù tónh ke vè. Vènh vỹ há tó jé sóg ke mũ, kỹ tóg ājag mỹ sér tĩnh mũ. Vènh kar vỹ mēnh mũ, ình vỹ ti, povo kar, kỹ ag fe tóg mrin ke mũ sir. ¹¹Ājag krenkren han tĩ vỹ ũri mur, hã vỹ: Cristo, he mũ. Ēg Senhor vè ha mỹr. Davi jamã ja tá tóg mur mũ. ¹²Ha mũ jēg, ājag tỹ gĩr ěn ve jé. Koso kākã tóg pāg kỹ nỹ nĩ. Hã ki ājag tóg ti ki kanhró nỹtĩnh mũ,” he tóg ag mỹ, Topē tỹ jēnē jafã ti.

¹³Kỹ vāhã ù tỹ hén ri ke ag tóg vènh ven mũ sir. Topē tỹ jēnē jafã ag, kanhkã tán ag. Ēn ag vỹ Topē mỹ vỹ há han mũ. ¹⁴“Topē vỹ tỹ ùn mág pē nĩ,” he ag tóg mũ. “Kynhmỹ ti nĩ, vènh kar kãfór ti nĩ, kỹ ěprã ke ag vỹ jatun mỹ nỹtĩ, ājag krĩ kusa tĩn kỹ, Topē tỹ ù tó há ag,” he ag tóg mũ. ¹⁵Kar ag tóg tũg' he mũ sir, ag tỹ kanhkã ra mũn kỹ.

Ag tỹ tũg' hen kỹ ù tỹ carneiro ki rĩr tĩ ag vỹ jagnē mỹ: “mũ nỹ, Belém ra, ěg tỹ ve jé, Topē tỹ nén han ja ti, ěg Senhor tỹ ěg mỹ vènh vỹ jēnē ja ěn ti,” he mũ. ¹⁶Kỹ ag tóg fűrürün mũ mũ sir. Tá ag tóg junjun mũ. Kỹ ag tóg vég mũ, Maria fi, José ti ke gé, gĩr ti ke gé. Koso kākã tóg nỹ nĩ, Maria fi kósín ěn ti. ¹⁷Hã kỹ ag tóg vég mũ. Hã kỹ ag tóg kāmén mũ, vènh kar mỹ. Topē tỹ ag mỹ vènh vỹ jēnē ja ěn kāmén ag tóg mũ, gĩr ěn to. ¹⁸Kỹ tóg ù tỹ mēg mũ ag mỹ e tĩ sir. ù tỹ mé ki rĩr tĩ ag vỹ mēg ag tóg mũ, kỹ tóg ag mỹ sér tĩ. ¹⁹Kỹ Maria fi tóg vènh vỹ tag to jykrén mũ gé sir. Fi pi(jé) kã jatun mũ,

ag tỹ nén tó ja ěn ti. To jykrén kỹ fi tóg nĩ nĩ, Maria fi.

²⁰Kỹ carneiro ki rĩr tĩ ag tóg sir ājag mēg to vỹnvỹn ke mũ gé. Topē mỹ ag tóg vỹ há han mũ. “Tĩ hã ne tóg ěg mỹ vènh vỹ jēnē ja nĩ, ā tỹ jēgnē jafã ag tỹ, kỹ ěg tóg vé,” he ag tóg mũ sir, Topē to.

Fag tỹ Jesus jijin

²¹Kar kurã tỹ 8 (ke) vỹ tũg mũ. Kỹ tóg ti gré junun fār kym ke kurã pétēm mũ sir, gĩr sĩ ěn ti. Kỹ fag tóg ti jijin kỹ ti mỹ: “Jesus,” he mũ. Topē tỹ jēnē jafã vỹ ti jyjy tag tó ja nĩ, ti mỹnh fi tỹ ver ti tỹ kufyg tũ ra. Hã kỹ fag tóg sir tỹ ti jijin mũ.

Fag tỹ Topē mỹ Jesus ven

²²Kejēn fag vākre tóg tá krỹg mũ, kỹ fag tóg vènh kykũnh sór mũ. Moisés vỹ tag rán ja nĩ, gĩr mur kar kỹ fag tỹ vènh kykũnh ke ti. Judeu ag jykre hã vè. Fag tỹ vènh kykũnh jé fag tóg cidade tỹ Jerusalém ra mũ mũ, fi tỹ Topē mỹ ā kósín ven jé, tá. “Ā tũ vè,” he sór fag tóg mũ, Topē mỹ, fi kósín ěn to. ²³Topē vỹ ki tag vỹ rán kỹ nĩ, hã vỹ: “fi kósín ve tỹ gré nỹn kỹ tóg tỹ ěg jóg mág tỹ Topē tũ nỹ,” he mũ, Topē vỹ tỹ rán kỹ nĩ ki. ²⁴Hã kỹ fag tóg Topē jo ìn ra mũ mũ, Topē mỹ nén ù pũn jé. Rán kỹ tóg nĩ nĩ, ěg jóg mág vĩn ki, fag tỹ ne tỹ ti mỹ pũn ke ti, hã vỹ: sórãg régre, ke tũ nĩ kỹ ton régre, he mũ gé. Ēn ma fag tóg mũ mũ, fag tỹ Topē mỹ pũn jé. Topē tũ ki rĩr tĩ ag mỹ fag tóg vĩn tĩ, sórãg ti, kỹ ag tóg tãnh kỹ Topē mỹ pũn tĩ.

²⁵Kỹ Jerusalém tá ù tóg nĩ nĩ, ti jyjy hã vỹ: Simeão, he mũ. ùn jykre kuryj vè, Simeão ti. Topē kamēg tóg tĩgtĩ, Topē kuprĩg tỹ tóg jagrē nĩ. Topē tỹ Israel ag krenkren han mũ ěn jāvãnh tóg nĩgtĩ, Simeão ti. ²⁶Kỹ Topē kuprĩg vỹ ti mỹ: “Cristo ve jé ā tóg ke mũ, ā ter ke to hã, ěg Senhor tỹ ti jēnēn kỹ,” he ja nĩgtĩ ti mỹ.

²⁷ Topê kuprīg tỳ ti krīn kỳ tóg kejēn Topê jo īn kāra tĩ mũ. Kỳ tóg tá jē nĩ, hā ra fag tóg Jesus ma kāmũ mũ, fag tỳ Topê mỳ sórāg pũn jé, Moisés tỳ Judeu ag mỳ nén tó ja ti. ²⁸ Ā tỳ Jesus ve kỳ tóg ti vāg mũ sir, kỳ tóg ti to Topê mỳ vĩ há han mũ, Simeão ti. ²⁹ “Ēg jóg mág,” he tóg, Topê mỳ. “Vāhā ā tóg inh jé prēr ke mũ, kỳ sóg jatun mỳ tīg mũ ha,” he tóg. “Ā tỳ inh mỳ nén tó jan han ā tóg huri,” he tóg. ³⁰ “Ve inh huri, ā tỳ ěg krenkren han ke mũ ti. Cristo ve inh huri,” he tóg, Simeão ti. ³¹ “Vēnh kar rĩnve ā tóg han, ā tỳ ěg krenkren han ke mũ ti. ³² Kỳ tóg ěg mỳ jēngre ri ke nĩ, Cristo mur ti. Kỳ povo kar vỹ vэг mũ, fóg ag kar, kanhgág ag kar ke gé, ā tỳ ag krenkren han ke mũ ti. Ēg povo tỳ Israel tỳ ā tóg ũn mág han huri, vēnh kar rĩnve, Cristo tỳ ěg mré ke nĩn kỳ,” he tóg, Simeão ti, Topê mỳ.

³³ Kỳ Jesus jóg vỹ ti vỹ mэг mũ, Jesus m̃nh fi ke gé, kỳ tóg fag mỳ e tĩ, ti tỳ Jesus to nén tó mũ ěn ti.

³⁴ Kỳ Simeão vỹ fag mỳ vēnh vỹ há tó mũ gé. “Topê vỹ ājag ve há han mũ,” he tóg mũ fag mỳ, Simeão ti. Kỳ tóg Maria fi mỳ: “ha vé,” he mũ. “Israel tỳ hēn ri ke ag vỹ ti tugrĩn mũ há han ke mũ, jāvo ũ tỳ hēn ri ke ag vỹ ti tugnĩn mũ kónān ke mũ gé. Kỳ ag tóg ti kato vĩnh ke mũ gé, Topê tỳ ti jēnē ja ra. ³⁵ Kỳ ā tóg ti tugrĩn vēs̃yrēnh kenh ke mũ, jỹ, kỳ tóg rógro tỳ ā fe tỳ gynh ke ri ke nĩnh ke mũ, ā vēs̃yrēnh ke ti. Kỳ ěg tóg venh ke mũ, ag tỳ nén to ti to jykren mũ ti,” he tóg, Maria fi mỳ, Simeão ti.

³⁶ Kỳ ũ fi tóg tá nĩ gé, Topê jo īn krēm, fi jiji hā vỹ: Ana, he mũ. Topê vỹ tó tĩ fi vē gé. Fanuel kósĩn fi vē. Kỳ fi jógjóg ve vỹ tỳ Aser nĩ. Kófa fi nĩ ha, kófa tāvĩ. Ā mén kỳ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar. ³⁷ Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ēn fi vỹ Topê jo īn krēm nĩ nĩ, kurā kar ki fi tóg tá nĩ nĩ sir. Tá fi tóg Topê tũ han nĩgtĩ, ti mré vĩ

kỳ. Jēg tũ fi nĩgtĩ, fi tỳ Topê mré vỹ jé. Kutý tá fi tóg ke tĩ, kurā tá ke gé. ³⁸ Ēn fi vỹ hora ěn kā Topê jo īn krēm jē mũ, Simeão tỳ Jesus ven kỳ. Kỳ fi tóg Jesus vэг mũ gé sir, Ana fi. Ti ve kỳ fi tóg Topê mỳ vỹ há han mũ. “Inh mỳ tóg há tĩ, sỹ ti ven kỳ,” he fi tóg mũ, Topê mỳ. Vēnh kar mỳ fi tóg tó mũ, ũn krenkren sór mũ ag mỳ, Jerusalém tá.

Fag tỳ Nazaré ra vỹn ke

³⁹ Kỳ fag tóg sir Moisés tỳ vēnh kykũnh to nén rán ja ěn han kān mũ sir, Jesus m̃nh fi, Topê tỳ Judeu fag mỳ vēnh jykre nĩm ja ěn ti. Kar kỳ fag tóg sir cidade tỳ Nazaré ra vỹnvỹn ke mũ, ga tỳ Galiléia ra, fag jamā ra ke vē sir. ⁴⁰ Kỳ gĩr sĩ ěn tóg mog mũ sir, komēr hā tóg tar jē sir. Kỳ tóg vēnh kanhrān há han mũ, kỳ Topê vỹ ti ve há han mũ gé, hā kỳ tóg vēnh kanhrān mág mũ sir, ũn sĩ ěn ti.

Jesus tỳ ā pir mỳ Topê jo īn tá nĩ

⁴¹ Jesus m̃nh fag tóg prỹg kar ki Jerusalém ra mũ tĩ, fag tỳ festa tỳ Páscoa venh mũ jé. Fag jykre hā vē. ⁴² Jesus tỳ 12 anos han kỳ tóg fag mré tĩ mũ gé, fag tỳ festa ěn venh mũn kỳ, Jerusalém ra. ⁴³ Festa tỳ tũ ken kỳ fag tóg vỹnvỹn ke mũ, hā ra Jesus tóg Jerusalém tá nĩ nĩ. Hā ra fag tóg ki kagtīg nỹtĩ, ti tỳ Jerusalém tá nĩ ěn ki. ⁴⁴ Kỳ fag tóg: “tĩ hỹn ũ tỳ ěg mré kāmũ mũ fag mré vyr, ěg jo,” he mũ. Kỳ fag tóg kurā pir ki mũ mũ, fag jamā ra vỹnvỹn ke kỳ. Fag tỳ ājag mré ke fag tá junjun kỳ fag tóg ti jāvānh mũ, ājag to há kar fag kāmĩ. ⁴⁵ Hā ra fag tóg tá Jesus vэг tũ nĩ. Kỳ fag tóg Jerusalém ra vỹnvỹn ke mān mũ gé, ti jāvānh jé. ⁴⁶ Vāhā fag tóg ti vэг mũ, kurā tǎgtũ tũ kỳ. Topê jo īn krēm tóg nĩ nĩ, professor ag mré. Ag vỹ mэг tóg nĩ nĩ, kỳ tóg ag ki jēmэг mũ gé, “ne nē?” hen kỳ. ⁴⁷ Ũ tỳ ti vỹ mэг mũ ag mỳ tóg e tĩ. To jykren há han tóg, Jesus ti, kỳ tóg ag mỳ

tó há han mũ. Ag tỹ ti vĩ mẽ kỹ tóg ag mỹ e tĩ, professor ag mỹ.

⁴⁸ Ti mỷnh fag tỹ ti ve kỹ tóg fag mỹ e tĩ gé sir. Kỹ ti mỷnh fi tóg ti mỹ: “inh kósin’,” he mũ. “Á tỹ tag kã ne han nĩ nê’? Á jóg mré sóg ă jăvănĥ jagy han. Á jăvănĥ to ěg tóg kaně jur, ěg tỹ ă vėg tũ nĩn kỹ,” he fi tóg ti mỹ. ⁴⁹ Hã ra tóg fi mỹ: “ă tỹ ne jé inh jăvănĥ ja nê?” he mũ. “Hẽ ri ken kỹ hỹn’?” he tóg. “Inĥ panĥ pẽ ĩn krēm sóg nĩ nĩ mỷr, kỹn mỹ ăjag mỹ vėnhmỹ?” he tóg, ă mỷnh fag mỹ. ⁵⁰ Hã ra tóg fag tỹ to jykrén tũ tĩ, fag kósin vĩ to.

⁵¹ Kỹ tóg fag mré tĩ mũ, cidade tỹ Nazaré ra. Tá tóg fag mré nĩ nĩ sir, ti tỹ fag vĩ jēměn kỹ. Kỹ ti mỷnh fi pi(jé) vėnh vĩ kar tag kã jatun nĩ’.

⁵² Kỹ Jesus tóg mog mũ sir. Krĩ há tăvĩ tóg nĩ. Topẽ vĩ ti ve há han mũ gé. Kỹ tóg vėnh kar mỹ há tĩ sir, ag tỹ ti jykre ven kỹ.

João Batista ti

(Mt 3.1-12; Mc 1.1-8; Jo 1.19-28)

3 Kejěn tóg Tibério tỹ pã’i mág tỹ imperador nĩ kri 15 anos han mũ. Ti tỹ Roma tá tỹ pã’i mág nĩ ěn kã Pôncio Pilatos vĩ tỹ ga tỹ Judéia kri pã’i tỹ governador nĩ, Tibério krēm. ěn kã Herodes vĩ tỹ Galiléia kri pã’i tỹ governador nĩ gé, Tibério krēm. Herodes jăvy tỹ Filipe vĩ tỹ ga tỹ Ituréia tá pã’i tỹ governador nĩ gé, ga tỹ Traconites tá ke gé, Tibério krēm. Jăvo Lisânicas vĩ tỹ ga tỹ Abilene tá pã’i tỹ governador nĩ, Tibério krēm.

² ěn kã Caifás vĩ tỹ Topẽ tũ ki rĩr tĩ ag pã’i mág nĩ, Anás mré hã. Kỹ văhã Topẽ vĩ João mré vĩ mũ sir, Zacarias kósin ěn mré. ěmã tũg ja mĩ tóg tĩ mũ, João ti. Kỹ Topẽ tóg ti mỹ: “ha Israel ag mỹ vėnh ven tĩg,” he mũ. ³ Kỹ tóg sir tĩ mũ. Goj tỹ Jordão jagma tóg tĩ mũ. Tĩg kỹ tóg vėnh kar jyvěn mũ, kỹ tóg ag mỹ: “ă kype jé sóg ke mũ, ă tỹ ă jykre kórég tovănĥ sór

kỹ, Topẽ tỹ ă tỹ ti vĩ mranĥ tỹ ă mỹ vėnh păte fón jé,” he tóg mũ sir, vėnh kar mỹ.

⁴ João tóg rán kỹ nĩ, văsỹ. Topẽ vĩ tó tĩ tỹ Isaías vĩ João to tag rán ja nĩ, ha mẽ: “ěmã tũg ja tá tóg jěnh ke mũ, ga kórég tá,” he ja tóg nĩ, Isaías ti. “Tá tóg ag mỹ tónĥ ke mũ. “Ěg Senhor kătĩg ke jo vėnh jănhkriĥkriĥ nĩ,” he jé tóg ke mũ. “Ěpyr kúrég ăjag tóg tĩ, ěmĩn kuryĥn ăjag tóg tĩ, ăjag chefe jun ken kỹ. Kỹ tag ri ke han nĩ, ăjag jykre păno togvănĥ kỹ, ěg Senhor kătĩg ken jo. ⁵ Ti kăgnó tỹ ăjag tóg kyjer’ he tĩ, kar ăjag tóg ěpyr sór kar kũm ke tĩ gé, ěmĩn sór ti. Ti jonĥor kugryĥn kăn ăjag tóg tĩ, ti sunsór văvăm kăn ăjag tóg tĩ gé, ăjag tỹ ěpyr han kỹ, ěmĩn han kỹ. Kỹ tag ri ke han nĩ, ăjag jykre kórég to. ⁶ Hã kỹ ěpră ke kar vĩ venĥ ke mũ, Topẽ tỹ ěg krenkren han ke ti,” he jé tóg ke mũ, kỹ vėnh kar vĩ ti vĩ měnh mũ,” he ja tóg nĩ, Isaías ti, João to.

⁷ Hã kỹ João tóg sir ag jyvěn mũ sir, ag tỹ ti venĥ kămũn kỹ, ti tỹ ag kygpe jé. E tăvĩ ag nỹtĩ, ũ tỹ ti venĥ kămũ mũ ag. Ag jyvěn kỹ tóg ag mỹ: “pỹn ri ke ăjag tóg nỹtĩ, ăjag jykre păno tăvĩ nĩn kỹ,” he mũ. “Ũ nỹ ăjag mỹ: “Topẽ jũ venĥ ke tũ ăjag nĩ,” he tĩ’? ⁸ ăjag jykre si togvănĥ ra, ăjag tỹ ti jũ ve jăvănĥ tĩn kỹ. Vėnh jykre há han ra, ěg tỹ ăjag jykre tăg ve jé. Hã ra ăjag tóg jagně mỹ: “Abraão vĩ tỹ ěg jóg’jóg ve nĩ,” he mũ, “kỹ Topẽ hỹn ěg to jũnh ke tũ nĩ, ěg tỹ tỹ Abraão krě’krě nỹtĩn tugrĩn,” he ăjag tóg tĩ. Hã tũ vě hã ra. ăjag jykre kórég ěn to ăjag tóg jagtar ke mũ, ha vemnĩ. Topẽ vĩ Abraão krě’krě hyn han ki kanhró nĩ, pó tag tỹ mỷr, ti tỹ Abraão krě’krě ve sór kỹ, Topẽ ti. ⁹ Hã ra tóg ăjag tỹ tũ’ henĥ ke mũ, ăjag tỹ ăjag jykre kórég tovănĥ tũ nĩn kỹ,” he tóg, João ti.

“Ěg tỹ ka gỹn ri ke tóg nĩ. Ti kaněn vănh nĩn kỹ ěg tóg ti gỹn tĩ, tỹ pĩ han jé. Tag ri ke han jé tóg ke mũ, Topẽ ti, ăjag mỹ, ăjag tỹ vėnh jykre há han tũ nĩn kỹ.

Kỹ tóg pĩ ki ājag vām ke mũ, Topẽ ti,” he tóg ag mỹ, João ti.

¹⁰ Kĩ ùn e ag tóg ti ki jēmēnh kāmũ mũ sir, João ki. Kĩ ag tóg ti mỹ: “kỹ ěg hỹn hẽ ri kenh mũ ha, Topẽ jykre han jé?” he mũ. ¹¹ Kĩ tóg ag mỹ: “ā kur régre nĩn kỹ ā kur pir nĩmĩ, ùn kur tũ ěn mỹ,” he mũ. “Ā jẽn tỹ ùn kókĩnkĩr ag mỹ vėnh kápópam nĩ gé,” he tóg.

¹² Kĩ ù tỹ governo mỹ imposto kaja mǎg ti ag vỹ João to kāmũ mũ gé, ti tỹ ag kygpe jé. Kĩ ag tóg ti mỹ: “professor,” he mũ. “Ēg hỹn hẽ ri kenh mũ?” he ag tóg mũ gé. ¹³ Kĩ João tóg ag mỹ: “pǎi mǎg tỹ ājag mỹ nén tó mũ ěn hã ri ke mǎn nĩ, jǎnkamy ti,” he mũ. “Ker ti kǎfór mǎn sór hẽ,” he tóg ag mỹ.

¹⁴ Kĩ soldado ag vỹ tá junjun mũ gé. “Kỹ ěg hỹn hẽ ri kenh mũ?” he ag tóg mũ gé sir, soldado ag. Kĩ tóg ag mỹ: “ag tũ mǎn sór tũg nĩ,” he mũ. “Ag to vāsǎn ājag tóg tĩ, ù to ón ājag tóg tĩ gé, ājag tỹ ag jǎnkamy ve jé. Ke tũg nĩ. Ājag rǎnhraj to ājag tóg jǎnkamy vėg tĩ. Ti kǎfór mǎn sór tũg nĩ,” he tóg, João ti, soldado ag mỹ.

¹⁵ Kĩ vėnh kar ag tóg ti to jykrén mũ, João to. “Ti mỹ tỹ Cristo tũ nĩ vỹ?” he ag tóg mũ sir ti to. João to ag tóg ke mũ, ag tỹ Cristo kǎtig jǎvǎnh kỹ. ¹⁶ Kĩ João tóg ag mỹ: “inh pí(jé) tỹ Cristo nĩ,” he mũ. “Goj hã tỹ sóg ājag kygpég ti. Inh nón tóg kǎtig mũ, Cristo ti, ha mẽ. Inh kǎfór ti nĩ. Sỹ tỹ ti camarada nĩnh ke vė vė, sỹ ti pėn né kunũ jé, ti pėn to ró ti. Hã ra sóg tỹ ti krēm pẽ jẽ. Ēn vỹ tóg Topẽ kuprĩg jēmēnh ke mũ, ti tỹ tỹ ājag jagrẽ nĩ jé, kỹ tóg pĩ jēngrẽ ri ke nĩ. Ti tỹ ājag kygpenh ken hã vė,” he tóg, João ti. mũ, ti tỹ tỹ ājag jagrẽ nĩ jé, kỹ tóg pĩ jēngrẽ ri ke nĩ. Ti tỹ ājag kygpenh ken hã vė,” he tóg, João ti.

¹⁷ “Ti kǎtig vỹ tỹ ěg tỹ rǎgró rėn ri ke nĩ. Ti rėn kar kỹ ěg tóg ti fǎr vām tĩ, ěg tỹ pǎjó kuprǎg jé. Ti kanẽ há vin han ěg tóg tĩ. Ti fǎr pũn ěg tóg tĩ. Cristo kǎtig

kỹ tóg ri ke nỹ. Ũ tỹ ā to há ag mỹ tóg: “ha kāmũ jęg,” henh ke mũ. Ũ tỹ ā to kórég ag vām jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti. ¹⁸ Hã kỹ tóg vėnh kar mỹ Topẽ vĩ sér tó mũ, ag jyvėn kỹ, João ti.

¹⁹ Kĩ tóg pǎi mǎg tỹ Herodes jyvėn mũ gé, ti prũ fi to, hã vỹ: Herodias ti, he mũ. Tỹ fi ti jǎvy prũ ja nĩ, hã ra tóg fi pėju kỹ fi tỹ prũg mũ, Herodes ti. Nén ù vėnhmỹ e han tóg ti, hã kỹ João tóg ti jyvėn mũ. ²⁰ Kar tóg sir nén ù vėnhmỹ ù han mǎn mũ gé, Herodes ti. João ség tóg mũ, ti tỹ ti jyvėn to.

João tỹ Jesus kype

(Mt 3.13-17; Mc 1.9-11)

²¹ Hã ra tóg kǎgmĩ kỹ jẽ tũ nĩ ver, João ti. Kĩ tóg ag kygpe kǎn mũ. Kĩ tóg kejėn Jesus kypég mũ gé. Kĩ Jesus tóg jẽ nĩ, ti tỹ Topẽ mré vĩn kỹ, João tỹ ti kype kar kỹ. Kĩ vǎhǎ kanhkǎ tóg nor' he mũ. ²² Kĩ Topẽ kuprĩg vỹ kanhkǎ tá kǎtėre mũ, ti kri. Tỹ sórǎg ve ti nĩ, Topẽ kuprĩg ti. Kĩ kanhkǎ tá vėnh vĩ tóg mẽ há tĩ, kỹ tóg: “tỹ ā inh kósĩn pir jẽ, tỹ ā tóg inh fe pẽ jēgtĩ,” he mũ, vėnh vĩ ti, Topẽ ti.

Jesus jóg'jóg ve ag

(Mt 1.1-17)

²³ Jesus vỹ 30 anos han mũ, ti tỹ vėnh kar mỹ Topẽ kǎmėn ve ki. “José kósĩn vė,” he ag tóg tĩ ti to, hã ra tóg tỹ ti kósĩn tũ nĩgtĩ. Eli kósĩn vė, Jesus ti, kỹ Eli ěn vỹ tỹ ti vovô nĩ. ²⁴ Eli vỹ tỹ Matate kósĩn nĩ. Matate vỹ tỹ Levi kósĩn nĩ. Levi vỹ tỹ Malqui kósĩn nĩ. Malqui vỹ tỹ Janai kósĩn nĩ. Janai vỹ tỹ José kósĩn nĩ. ²⁵ José vỹ tỹ Matatias kósĩn nĩ. Matatias vỹ tỹ Amós kósĩn nĩ. Amós vỹ tỹ Naum kósĩn nĩ. Naum vỹ tỹ Esli kósĩn nĩ. Esli vỹ tỹ Nagai kósĩn nĩ. ²⁶ Nagai vỹ tỹ Maate kósĩn nĩ. Maate vỹ tỹ Matatias kósĩn nĩ. Matatias vỹ tỹ Semei kósĩn nĩ. Semei vỹ tỹ José kósĩn nĩ. José vỹ tỹ Joda kósĩn nĩ. ²⁷ Joda vỹ tỹ Joanǎ kósĩn nĩ. Joanǎ vỹ tỹ Resa

kósin nĩ. Resa vỹ tỹ Zorobabel kósin nĩ. Zorobabel vỹ tỹ Salatiel kósin nĩ. Salatiel vỹ tỹ Neri kósin nĩ. ²⁸Neri vỹ tỹ Melqui kósin nĩ. Melqui vỹ tỹ Adi kósin nĩ. Adi vỹ tỹ Cosã kósin nĩ. Cosã vỹ tỹ Elmadão kósin nĩ. Elmadão vỹ tỹ Er kósin nĩ. ²⁹Er vỹ tỹ Josué kósin nĩ. Josué vỹ tỹ Eliézer kósin nĩ. Eliézer vỹ tỹ Jorim kósin nĩ. Jorim vỹ tỹ Matate kósin nĩ. Matate vỹ tỹ Levi kósin nĩ. ³⁰Levi vỹ tỹ Simeão kósin nĩ. Simeão vỹ tỹ Judá kósin nĩ. Judá vỹ tỹ José kósin nĩ. José vỹ tỹ Jonã kósin nĩ. Jonã vỹ tỹ Eliaquim kósin nĩ. ³¹Eli-aquim vỹ tỹ Meleá kósin nĩ. Meleá vỹ tỹ Mena kósin nĩ. Mena vỹ tỹ Matata kósin nĩ. Matata vỹ tỹ Natã kósin nĩ. Natã vỹ tỹ Davi kósin nĩ. ³²Davi vỹ tỹ Jessé kósin nĩ. Jessé vỹ tỹ Obede kósin nĩ. Obede vỹ tỹ Boaz kósin nĩ. Boaz vỹ tỹ Sala kósin nĩ. Sala vỹ tỹ Nassom kósin nĩ. ³³Nassom vỹ tỹ Aminadabe kósin nĩ. Aminadabe vỹ tỹ Admim kósin nĩ. Admim vỹ tỹ Arni kósin nĩ. Arni vỹ tỹ Esrom kósin nĩ. Esrom vỹ tỹ Peres kósin nĩ. Peres vỹ tỹ Judá kósin nĩ. ³⁴Judá vỹ tỹ Jacó kósin nĩ. Jacó vỹ tỹ Isaque kósin nĩ. Isaque vỹ tỹ Abraão kósin nĩ. Abraão vỹ tỹ Tera kósin nĩ. Tera vỹ tỹ Nacor kósin nĩ. ³⁵Nacor vỹ tỹ Seruque kósin nĩ. Seruque vỹ tỹ Ragaú kósin nĩ. Ragaú vỹ tỹ Faleque kósin nĩ. Faleque vỹ tỹ Éber kósin nĩ. Éber vỹ tỹ Sala kósin nĩ. ³⁶Sala vỹ tỹ Cainã kósin nĩ. Cainã vỹ tỹ Arfaxade kósin nĩ. Arfaxade vỹ tỹ Sem kósin nĩ. Sem vỹ tỹ Noé kósin nĩ. Noé vỹ tỹ Lameque kósin nĩ. ³⁷Lameque vỹ tỹ Metusalém kósin nĩ. Metusalém vỹ tỹ Enoque kósin nĩ. Enoque vỹ tỹ Jarete kósin nĩ. Jarete vỹ tỹ Maleleel kósin nĩ. Maleleel vỹ tỹ Cainã kósin nĩ. ³⁸Cainã vỹ tỹ Enos kósin nĩ. Enos vỹ tỹ Sete kósin nĩ. Sete vỹ tỹ Adão kósin nĩ. Adão vỹ tỹ Topê tỹ há nĩ. Jesus jóg'jóg ve ag hã vẽ.

Jesus tỹ Topê vĩ mranh tũ

(Mt 4.1-11; Mc 1.12-13)

4 Kĩ Topê kuprĩg vỹ tỹ Jesus jagrê nĩ. Kĩ Jesus vỹ goj tỹ Jordão tá vỹn ke mũ, ã kype kĩ jên kĩ. Ti tĩg kĩ Topê kuprĩg vỹ ti krĩn mũ. ²Kĩ tóg ti tỹ ti krĩn kĩ ěmã tũg ja ra ti mũ sir, ga kórég ra. Tá tóg kurã tỹ 40 (ke) han mũ, ěmã tũg ja ki. Kĩ Japo vỹ ti tỹ ã jóg vĩ mranh han sór mũ, tá, hã ra Jesus tóg ke tũ nĩ. ěmã tũg ja tá nĩn kĩ tóg jęg tũ nĩ, kurã tỹ 40 ěn ki. Kar kĩ tóg sir kókĩr mũ. ³Ti kókĩr nĩn kĩ Japo vỹ ti mỹ vĩ mũ. “Tỹ ã Topê kósin nĩ mỹr,” he tóg. “Ã tỹ tỹ Topê kósin nĩn kĩ pó tag tỹ ěmĩ han nĩ, ã tỹ kon jé,” he tóg ti mỹ, Nén-Kórég ěn ti, Jesus mỹ. ⁴Kĩ Jesus tóg ti mỹ: “hã ra tag tóg rãn kĩ nĩ, ha mẽ,” he mũ. “Ěmĩ tãvĩ jamẽn kĩ ěg rĩnrĩr tũ nỹtĩ, Topê vĩ jamẽn kĩ ěg rĩnrĩr nỹtĩ. Hã kĩ tóg sỹ ti vĩ mranh jãvãnh tĩ, ěmĩ to,” he tóg, Jesus ti, Nén-Kórég ěn mỹ.

⁵Kĩ Japo vỹ ti mrê tãpry mũ. Kĩ tóg ti mỹ mundo ven kãn mũ, ù tỹ kri ke kar ag ke gé. Ven pir ki tóg ti mỹ ven kãn mũ. ⁶Kĩ tóg ti mỹ: “isũ vẽ mỹr,” he mũ, Japo ti. “Ã mỹ sóg tovãnh kãn sór mũ, ã tỹ tỹ vênh kar tag ag pã'i jê jé. Kĩ ti sĩnvĩ tag kar vỹ tỹ ã tũ nĩnh mũ. Isũ vẽ mỹr, ù tỹn han ja ěn tỹ inh mỹ: “té,” hen kĩ. Kĩ sóg sỹ ùn kuprêg mũ ěn mỹ vin tĩ sir. ⁷Ã hã mỹ sóg tovãnh sór mũ ha, ã tỹ inh krêm grĩnh ken kĩ, ã tỹ iso: “Topê vỹ tỹ ã nĩ,” hen kĩ,” he tóg, Nén-Kórég ti, Jesus mỹ. ⁸Kĩ Jesus tóg ti mỹ: “tag vỹ rãn kĩ nĩ, ha mẽ,” he mũ. “Ěg pã'i tỹ Topê hã krêm ěg tóg ěg jakrĩ tỹ krỹ” he tĩ, ti hã to ěg tóg: Topê vẽ, he tĩ,” he tóg, Topê vĩ tỹ rãn kĩ nĩn ki. Hã kĩ sóg mranh jãvãnh nĩ,” he tóg, Jesus ti, Nén-Kórég mỹ.

⁹Kĩ Japo tóg ti mrê tĩg mãn mũ, cidade tỹ Jerusalém ra. Tá tóg ti mỹ: “Topê jo ĩn kri jěmnĩ, ti krĩ kri,” he mũ. Kĩ tóg ke mũ. Hã ra kãgnó tóg tá nĩ, Topê jo ĩn jo. Japo tóg Jesus mỹ: “Topê

kósin vỹ tỹ ă nĩ,” he mũ. “Kỹ hũm hemnĩ.
¹⁰ Tag vỹ rán kỹ nĩ, ha mẽ: “ă tỹ jẽnẽ jafã ag mỹ tóg tónh mũ, Topẽ ti, kỹ ag tóg ă ki rĩr ke mũ. ¹¹ Ājag nĩgẽ tỹ ag tóg ă vyn ke mũ, kỹ ă tóg rỹj ke tũ nĩ. Ā pẽn vỹ rỹj ke tũ nĩ gẽ, hã jé ag tóg ă ki rĩr ke mũ,” he tóg, Topẽ vỹ rán kỹ nĩ ẽn ki. Kỹ jatun mỹ hũm nĩ,” he tóg, Nén-Kórég ti, Jesus mỹ. ¹² Kỹ Jesus vỹ ti mỹ ke mũ gẽ. “Kỹ tag vỹ rán kỹ nĩ gẽ, ha mẽ,” he tóg. “Topẽ mỹ: ă mỹ ă tỹ nẽn tó ja ẽn han mũ vỹ? he tũg nĩ,” he tóg mũ gẽ, Topẽ vỹ rán kỹ nĩ ẽn ki. Hã kỹ sóg Topẽ hã tỹ inh mỹ nẽn tó mũ ẽn han ke mũ, kỹ sóg hũm ke tũ nĩ, ti tỹ inh mỹ tó tũ nĩn kỹ,” he tóg, Jesus ti, Nén-Kórég mỹ.

¹³ Kỹ Japo vỹ ă tỹ nẽn tónh ke ẽn tó kãn ja nĩ, hã kỹ tóg Jesus tovãnh mũ ver, ti tỹ kurã ũ kã ti mrẽ vỹ mãn jé, kejẽn, ti tỹ ti mỹ há tĩ ve nĩn kỹ, Japo mỹ.

Jesus tỹ Galiléia tá ag kanhrãn

(Mt 4.12-17; Mc 1.14-15)

¹⁴ Kỹ Jesus tóg tĩ mũ sir, Topẽ kuprĩg tỹ ti krĩn kỹ. Ga tỹ Galiléia ra tóg tĩ mũ. Kỹ vãnh kar ti kãme mẽ kãn mũ sir, ga ẽn tá ke kar ag. ¹⁵ Kỹ tóg ag kanhrãn mũ sir, Jesus ti, ag vãnh kanhrãn jafã krẽm. Krẽm ag tóg Topẽ vỹ tó tĩ, Judeu ag. Jesus tỹ ag kanhrãn kỹ tóg ag mỹ e tĩ, ti vỹ ti. Hã kỹ ag tóg ti to vỹ há han mũ sir.

Jesus tỹ Nazaré ra vỹn ke

(Mt 13.53-58; Mc 6.1-6)

¹⁶ Kỹ Jesus tóg Nazaré tá jun mũ gẽ, ă jamã tá. Tá tóg mog ja nĩ, cidade tỹ Nazaré tá. Kỹ tóg ă tỹ nẽn han tĩ ẽn han mũ. Ag vãnh kanhrãn jafã ra tóg tĩ mũ, vãnh kãn ke kurã ki. Tá tóg sir jẽgnẽ mũ, culto ki, ag vãnh mãn kỹ nỹtĩ ẽn ki. Ti tỹ Topẽ vỹ to ke sór vẽ, hã kỹ tóg jẽgnẽ mũ, Jesus ti. ¹⁷ Ti jẽ kỹ ag tóg ti mỹ livro nĩm mũ, Isafas tỹ rán ja ẽn ti, vãsỹ Topẽ vỹ tó tĩ tỹ rán ja ẽn ti. Kỹ tóg livro tỹ vym ke mũ. Kỹ tóg ă tỹ to ke sór mũ ẽn vэг mũ, Isafas tỹ tó ja ti, ha mẽ. ¹⁸ “Topẽ kuprĩg

vỹ inh krĩn mũ,” he tóg. “Inh jagrẽ vẽ mỹr, hã kỹ tóg inh krĩn mũ. “Ũn jagãgtar ag mỹ inh vỹ tómnĩ,” he tóg inh mỹ. Inh jẽnẽg tóg mũ, isỹ ũn sigse kỹ nỹtĩ ag kygvãn jé, isỹ ũn kyvó ag tỹ ẽvãnh (há) han jé, isỹ ag tỹ ũn vóg kónãn mũ ag ki rĩr há han jé, ag jatu nỹtĩ jé, ¹⁹ isỹ vãnh kar mỹ: “ũri ẽg jóg mág vỹ ẽg kren han sór mũ,” he jé,” he tóg, Isafas ti, vãnh rá ki. Hã to ke tóg mũ, Jesus ti. ²⁰ Tag to ke kar kỹ tóg livro ẽn kri tỹ tam ke mãn mũ. Livro ki rĩr tĩ ẽn mỹ tóg jun mũ, livro ti. Kỹ tóg nĩ mũ sir.

Hã ra vãnh kar ag tóg ti ki ẽvãnh mũ. ²¹ Kỹ tóg ag mỹ kãmén mũ, kỹ tóg: “vãsỹ rán kỹ nĩ ja tag mẽ ājag tóg,” he mũ. “Ũri ke vẽ, ũri ājag tóg vэг mũ, vãsỹ rán kỹ nĩ ja ẽn ti,” he tóg. “Inh hã to tóg tag tó ja nĩ, Isafas ti,” he tóg, Jesus ti.

²² Ag tỹ ti vỹ mẽ kỹ tóg ag mỹ e tĩ sir. “Ki hã tóg tó mũ, hã kỹ tóg ẽg mỹ e tĩ,” he ag tóg mũ. Kỹ ag tóg ti to vỹ mũ gẽ. “José kósin vẽ mỹr, ẽg mrẽ ke ẽn, hã ra tóg ẽg vỹ kãfór han sór mũ,” he ag tóg mũ ti to.

²³ Kỹ Jesus tóg ag mỹ: “ājag hỹn iso jykrén sór mũ,” he mũ. “Médico mỹ ẽg tóg: “kur vēsỹ há’ hé, ă tỹ tỹ médico nĩ sór nĩn kỹ,” he tĩ. Ājag hỹn tag tó sór mũ inh mỹ. Ājag hỹn inh mỹ: “cidade tỹ Cafarnaum tá ă tóg ag tỹ há’ hé, ũn kagyga ag tỹ, kỹ kur tag ki ẽg tỹ há’ hemnĩ gẽ, ă jamã tag ki, ă tỹ vãnh kar tỹ há’ he sór nĩn kỹ,” he sór ājag hỹn mũ inh mỹ,” he tóg, Jesus ti.

²⁴ Kỹ tóg ag mỹ: “ti jamã tá ke ag ne tóg Topẽ vỹ tó tĩ ẽn to é he tĩ,” he mũ. “Ti tỹ ke há vẽ. Hã kỹ ājag tóg iso é he tĩ,” he tóg ag mỹ, Jesus ti. ²⁵⁻²⁶ “Ha mẽ, sỹ nẽn tó mũ ti. Elias to jykrén nĩ. Ti tỹ ga kri tĩ mũ kỹ tóg ta kutẽ vãnh han ja nĩgtĩ, prỹg tăgtũ kri kysã tỹ 6 (ke) ki. Kỹ tóg prỹg tĩ sir, ga ẽn mĩ, vějẽn tóg tũ’ he mũ sir. Kỹ Topẽ tóg Elias mỹ tó, ti tỹ cidade tỹ Sarepta ra tĩg jé, cidade tỹ Sidom kakó ra. Tá fóg fi tóg nĩ nĩ, ũn mẽn ter ja fi.

Fi mré tóg jêg tĩ sir, Elias ti, fi tỹ ti mỹ vễn tỹ vễn kăpăm kỹ, prỹg ra. Topê pi(jé) Israel fi to ti jênê ja nĩgtĩ. Ti pi(jé) ti jamă ra ti jênê ja nĩgtĩ. Tá fag tóg e nỹtĩ ja nĩgtĩ gé, ùn mên ter ja fag. Hă ra Topê tóg fóg ên fi to ti jênê ja nĩgtĩ, fi tỹ ti ki rĩr jé,” he tóg, Jesus ti.

²⁷ “Kỹ Eliseu to jykren nĩ gé, văsỹ Topê vĩ tó tĩ ên to. Ti tỹ ga kri tĩ nĩn kỹ ùn kagyga ag tóg e ja nỹtĩgtĩ gé, êg povo tỹ Israel kămĩ, vễn kaga kren vễn han mũ ag, vễn kaga tỹ lepra han mũ ag. Hă ra ag tóg ti mỹ to vĩ ja tũ nĩgtĩ, ti tỹ ag tỹ há’ hen jé. Kuvar há tá tóg kătĩg ja nĩgtĩ, fóg ti, Naamă ti, ga tỹ Sírĩa tá ke ên ti. Kĩ ti hă ne tóg Eliseu mỹ to vĩn kỹ há’ he mũ sir inhă. Ti kaga kren vễn ên tóg tũ’ he mũ sir. Ge âjag tóg nĩgtĩ iso. Kuvar há tá ke fag vĩ inh ki ge tĩ, jăvo âjag tóg inh ki ge jăvăn nỹtĩ, âjag tỹ tỹ inh jamă tá ke nỹtĩ ra,” he tóg ag mỹ, Jesus ti.

²⁸ Kĩ ù tỹ ti vĩ mễg mũ ag fe tóg gỹm ke mũ sir, Jesus to, ù tỹ vễn kanhrăn jafă ên krêm nỹtĩ ag. ²⁹ Jêg jêg nẻgnẻ ag tóg mũ sir. Kăpa ag tóg mũ sir. Ti vóg ag tóg mũ sir, pănónh ra. Nazarẻ vỹ pănónh tá nĩ, ag jamă ti. Pănónh ên to jăpry kỹ ag tóg tá ti kutẻm sỏr mũ, kăgnỏ ki ti ter jẻ. ³⁰ Hă ra Jesus tóg ag rẻ kỹ tĩ mũ, ag jămĩ. Ti tỹ hẻ ri ke tũ ag tóg nĩ sir, kỹ tóg ag fĩn rằm kỹ ag rẻ kỹ tĩ mũ.

Hă ra ag tóg ti vĩ kri fi jăvăn nỹtĩ, ti jamă tá ke ag.

Jesus tỹ vễn jagrẻ kỏrẻg kutẻm

(Mc 1.21-28)

³¹ Kĩ Jesus tóg cidade tỹ Cafarnaum ra tĩ mũ. Ga tỹ Galilẻĩa tá ti nĩ, Cafarnaum ti. Tá jun kỹ tóg ag kanhrăn mũ, vễn kán ke kură ki. ³² Kĩ tóg ag mỹ e tĩ, ag tỹ ti vĩ mẻn kỹ. Ti vĩ vỹ vễn kar vĩ kăfỏr nĩ, hă kỹ tóg ag mỹ e tĩ.

³³ Kĩ vễn kanhrăn jafă ên krêm ù tóg nĩ nĩ. Jagrẻ kỏrẻg ti nĩ. Kỹ tóg prẻr mũ, kỹ tóg: ³⁴ “hă mẻ, ă tỹ ẻg tỹ hẻ ri kenh ke nẻ, Nazarẻ tá Jesus?” he mũ. “Ă mỹ

ẻg tũg sỏr mũ?” he tóg. “Ă ki kanhrỏ sỏg nĩ. Tỹ ă tóg ă pir mỹ Topẻ mrẻ ke nĩ, ti tũ pẻ vĩ tỹ ă nĩ,” he tóg, ùn jagrẻ kỏrẻg ti. ³⁵ Hă ra Jesus tóg ti mỹ vĩ tar han mũ, kỹ tóg: “vĩ tũg ra,” he mũ. “Ti tovăn h ra,” he tóg. Kỹ ti jagrẻ kỏrẻg ên tóg ti ter tĩ han mũ, vễn kar rĩnve, kỹ tóg ti ki kutẻ mũ sir. Ti kỏkẻg tũ tóg nĩ, ti jagrẻ kỏrẻg ti.

³⁶ Kĩ tóg vễn kar mỹ e pẻ tăvĩ tĩ sir. Jagnẻ mỹ ag tóg: “ne nẻ hẻn vẻ?” he mũ. “Vễn jagrẻ kỏrẻg ag mỹ tóg vĩ tĩ, Jesus ti, kỹ ag tóg sir ki krỏm tĩ, ti vĩ ki, ti kamẻg kỹ, ti tỹ ag pan kỹ. Ti hẻn tỹ ag kri ke nĩ,” he ag tóg mũ sir, Jesus to. ³⁷ Kỹ ti kămẻ tóg vễn kar kri rửm ke kăn mũ sir, ga ên tá.

Jesus tỹ ùn kagyga e ag tỹ há’ he

(Mt 8.14-17; Mc 1.29-34)

³⁸ Kĩ Jesus tóg vễn kanhrăn jafă ên ki kutẻ kỹ Simăo ĩn ra tĩ mũ. Hă ra Simăo prử fi mẻnh fi tóg kaga nỹ nĩ. Rỹ jagy fi nỹ nĩ. Kỹ ag tóg Jesus mỹ fi tó mũ. ³⁹ Kỹ tóg fi vễn tĩ mũ. Fi kri tá jẻ kỹ tóg fi mỹ: “rỹg măn tũg nĩ,” he mũ. Kỹ fi rỹ ên tóg tũ’ he mũ sir. Kỹ fi tóg vẻsỹmẻr nĩ nĩ. Ag ki rĩr fi tóg mũ sir, Simăo má fi.

⁴⁰ Kĩ tóg sir kutyg mũ, ră tỹ pun ke kỹ. Kỹ ag tóg ùn kagyga ag tatĩn kămũ kăn mũ. Kỹ tóg ă nẻgẻ tỹ ag mẻ kăn mũ, Jesus ti, kỹ ag tóg hághă’ he kăn mũ. ⁴¹ Vễn jagrẻ kỏrẻg pan kăn tóg mũ gé, ag to jũ kỹ. Ag panh ke to hă ag tóg prẻr mũ, kỹ ag tóg: “Topẻ kỏsin vĩ tỹ ă nĩ,” he tĩ. Hă ra tóg ag mỹ: “vĩ tũg ra,” he mũ. Ti ki kanhrỏ ag tóg nỹtĩ, ti tỹ tỹ Cristo nĩ ti. Hă kỹ tóg ag mỹ: “vĩ tũg ra,” he mũ, Jesus ti.

Jesus tỹ Topẻ vĩ tó

(Mc 1.35-39)

⁴² Tỹ vaj kỹ Jesus tóg tá kutẻ kỹ ẻmă tũg ja ra tĩ mũ. Kỹ vễn kar ag tóg ti jăvăn kăn mũ. Hă ra ag tóg ti vẻg mũ. Ti ve kỹ ag tóg ti mỹ: “ẻg rẻ kỹ tĩ tũg nĩ,”

he mũ. ⁴³Hã ra tóg ag mý: “vó,” he mũ. “Cidade ù ra sóg tũg mũ, sý ag mý Topê vĩ tó jé gé, Topê tỹ tỹ ẽg pã'i nĩnh ke ti. Hã jé Topê tóg inh mý: “ha ag mý vênh ven,” he ja nĩ,” he tóg ag mý, Jesus ti. ⁴⁴Kỹ tóg tĩ mũ sir. Ga tỹ Judéia mĩ tóg tĩ mũ. Vênh kanhrăn jafã krêm tóg ag mý Topê vĩ tó tĩ mũ sir, Jesus ti.

Jesus tỹ Pedro kanhrăn

(Mt 4.18-22; Mc 1.16-20)

5 Kejên Jesus tóg goj nig tỹ Genesaré fyr tá jẽ nĩ, Topê vĩ kãmén kỹ. Kỹ vênh kar vỹ ti pênĩn nỹtĩ nĩ, kỹ ag tóg ti kutăn mũ sir, ag e tãvĩ nỹtĩn kỹ, ag tỹ Topê vĩ mẽ sór kỹ. ²Ag tỹ ti kutăn kỹ tóg canoa régre vigvég mũ, nig fyr tá. Pirã kugmĩg tĩ ag vỹ tá kãpa kỹ nỹtĩ nĩ. Goj kãki jẽg jẽg kỹ ag tóg pirã kugmĩ jafã kunũnh kỹ kupég nỹtĩ nĩ. ³Kỹ Jesus tóg canoa kãra rã mũ. Simão tũ vẽ, canoa ẽn ti. Kỹ tóg Simão mý: “tĩg sĩ han ra, canoa kãmĩ, goj kuju ra,” he mũ. Kỹ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kỹ tóg ag kanhrăn mũ sir, vênh kar ẽn ag, ù tỹ ti kutăn ja ẽn ag. Goj fyr tá ag tóg nỹtĩ.

⁴Ti tỹ ag kanhrăn kãn kỹ tóg Simão mý: “goj kuju ra tũg, ti nig ja ra,” he mũ. “Tã ã rede tỹ goj kãki fón, ã tỹ pirã kugmĩ jé,” he tóg. ⁵Kỹ Simão tóg ẽg Senhor mý: “hã ra ẽg tóg kuty tag kã goj ki ti fón', fón' he ja nĩgtĩ, fagrĩnh mý,” he mũ. “Nén ù kãgmĩg tũ ẽg tóg nĩ mýr,” he tóg. “Hã ra sóg ã vĩ tugrĩn ki fón sór mũ ha,” he tóg, Simão ti. ⁶Kỹ tóg ke mũ sir. Kỹ tóg kugmĩ mág mũ. Fór tóg nĩ, rede ti, kỹ tóg jaran ke mũ, ti kufy jagy tãvĩ nĩn kỹ, pirã e tugnĩn. ⁷Kỹ ag tóg ajag régre ag mý ven mũ, ag tỹ canoa ù kãki kãmũ jé. Ag tỹ tá junjun kỹ ag tóg canoa régre ẽn fãn mũ, pirã tỹ. Funfór ti nỹtĩ, hã kỹ tóg ki punpun ke kren mũ sir, canoa régre ẽn ti.

⁸Kỹ Simão tóg Jesus krêm grĩnh ke mũ. Ti mý tóg e tĩ, pirã e ẽn to, kỹ tóg

Jesus krêm grĩnh ke mũ. Kỹ tóg ti mý: “Senhor’,” he mũ. “Ã hỹn inh ré kỹ tũg mũ ha. Topê vĩ mranh ja inh nĩgtĩ, kỹ inh hỹn ã mý kórég nĩ ha,” he tóg, Simão ti, Jesus mý. ⁹Ti mý tóg e pẽ tãvĩ tĩ, ti tỹ pirã e ẽn ven kỹ, ti tỹ Jesus jykre ven kỹ. Ti mré ke ag mý tóg e tĩ gé, ¹⁰Tiago mý ke gé, João mý ke gé, Zebedeu krê tag ag mý. Simão régre ag vẽ, Zebedeu krê tag ag, ti companheiro ag vẽ.

Kỹ Simão tóg Jesus mý: “ã hỹn inh ré kỹ tũg mũ ha,” he mũ. Hã ra Jesus tóg ti mý: “kamẽg tũg nĩ,” he mũ. “Pirã kugmĩ há ã tóg jẽ. ã kanhrăn jé sóg ke mũ, ã tỹ ẽprã ke ag tỹ inh ki ge han jé,” he tóg, Simão mý, Jesus ti.

¹¹Kỹ ag tóg ajag canoa vóg mũ, goj fyr ra. Tá junjun kỹ ag tóg ajag tũ kar ré kỹ mũ mũ sir, Jesus mré.

Jesus tỹ ùn kaga kren vãnh tỹ há' he

(Mt 8.1-4; Mc 1.40-45)

¹²Kỹ tóg kejên cidade ù tá nĩ nĩ. Kỹ ù tóg ti tá jun mũ, ù tỹ vênh kaga kren vãnh han kỹ nĩ ti, vênh kaga tỹ lepra he mũ ẽn. Ti kri tóg rũm ke kãn ja nĩ, vênh kaga ti. Ẽn tóg Jesus tá jun kỹ ti krêm mũg ke mũ, kỹ tóg ti mý: “Senhor’,” he mũ. “Ã mý isỹ há' he sór tũ nĩ?” he tóg. “Ã hã tóg isỹ há' henh mũ, ã tỹ isỹ há' he sór kỹ,” he tóg ti mý.

¹³Kỹ Jesus tóg ã nĩgẽ tỹ ti mẽg mũ, kỹ tóg ti mý: “hej,” he mũ. “To sóg há nĩ, há' he ja há ã tóg nĩ,” he tóg ti mý. Kỹ tóg ti kaga kren vãnh tỹ há' he mũ sir vễsỹmẽr. Jãnhkri' he tóg mũ, ti fãr ti. ¹⁴Kỹ Jesus tóg ti mý ke mũ, ti tỹ ù mý tó tũg jé, ti tỹ há' he tag ti. “Ha tũg,” he tóg. “Topê tũ ki rĩr tĩ to tũg. Ti hã mý tómnĩ, kỹ ti mý nén ù nĩm nĩ, ti tỹ Topê mý pũn jé, Moisés tỹ vẫsỹ ẽg mý nén tó ja ẽn ti, ã jãnhkri to. Hã tugrĩn vênh kar vỹ ã tỹ há' he mũ tag ki kanhrăn mũ,” he tóg ti mý, Jesus ti.

¹⁵Ge ra ti kãmẽ tóg vênh kar kri rũm ke mũ, kỹ ù tỹ hẽn ri ke ag tóg vênh mãn mũ sir. Ag tỹ ti vĩ mẽ sór vẽ, ag tỹ ajag

tỹ há' he ên ve sór vê gé. Hã jé ag tóg sir vênh măn mũ. ¹⁶ Hã ra Jesus tóg êmã tũg ja ra tĩ mũ, Topê mré vēmén jé.

Jesus tỹ ùn tĩg vãnh tỹ há' he

(Mt 9.1-8; Mc 2.1-12)

¹⁷ Kejēn tóg ag kanhrānrān măn mũ. Kĩ Fariseu ù ag tóg ti vĩ mēgmēg mũ gé sir, Topê vĩ to professor ag mré hã. Kór há tá ag tóg kāmũ ja nĩ, ga tỹ Galiléia tá, ga tỹ Judéia tá ke gé, cidade tỹ Jerusalém tá ke gé. Jesus pēnĩn ag tóg nĩgnĩ kỹ nỹtĩ nĩ. Hã ra Topê tóg ti tar han ja nĩ, hã kỹ tóg ù tỹ hēn ri ke ag tỹ há' he mũ, ùn kagyga ag tỹ, Jesus ti.

¹⁸ Kĩ vāhã ù ag tóg tá junjun mũ gé. Û va ag tóg kāmũ jēg, kur kã, ùn kãnhgrĩ, ùn kónhgrĩ. Ag tỹ Jesus mỹ ti ven sór vê, ag tỹ ti krēm ti fi sór vê. ¹⁹ Hã ra tóg fór tãvĩ nĩ, tá, kỹ ag tóg ti tá junjun tũ nĩ sir, Jesus tá. Kỹ ag tóg ìn to jãpry kỹ ti kri ìn kunũg mũ. Ti nor ên ki ag tóg ti térem mũ, Jesus jē ên kukām. ²⁰ Kĩ Jesus tóg ag tỹ ti ki ge kỹ nỹtĩ tag vég mũ. Hã kỹ tóg ùn kãnhgrĩ mỹ: “ã tỹ Topê vĩ mranh ja ên tỹ tũ' he vê ha, vỹ,” he mũ.

²¹ Hã ra ti vĩ tag tóg Topê vĩ to professor ag mỹ e tĩ, Fariseu ag mỹ ke gé. Kỹ ag tóg ti vĩ tag to jykrén kónān mũ. “Tĩ tỹ ne tó nē hỹn?” he ag tóg mũ. “Topê to vĩ kónān vē mỹr, ti vĩ tag to,” he ag tóg. “Topê hã ne ã pin kỹ Topê vĩ mranh ên tỹ tũg' he há nĩnh mũ', kỹ ti tỹ vēsỹ tỹ Topê han vē sir, ti mỹ vênh pāte fón sór kỹ,” he ag tóg mũ, to jykrén kónān kỹ.

²² Hã ra Jesus tóg ag tỹ nén to jykrén mũ vég mũ. Kỹ tóg ag mỹ: “ājag tỹ ne jé to jykrén kónān nē?” he mũ. ²³ “Ne nỹ ājag mỹ vēnhmỹ nỹ?” he tóg. “Ùn tĩg vãnh mỹ sóg: “ã tỹ Topê vĩ mranh ja ên tỹ tũ' he vê ha,” hé. Kỹn mỹ ājag mỹ vēnhmỹ?” he tóg. “Sỹ ti mỹ: “nĩ ra, tĩg ra,” hēnh ke vê gé. Kỹn mỹ ājag mỹ vēnhmỹ ke gé?” he tóg, tag to. ²⁴ “Hã ra sỹ ājag mỹ ình jykre ven sór vê ha. Tỹ sóg ēprã ke fi kósĩn nĩ. Tá sóg krỹg ke

mũ, Topê vĩ mranh tỹ vênh pāte fón ke tá. Sỹ tá krỹg mũ ven jé sóg ke mũ ājag mỹ,” he tóg. Hã kỹ tóg ùn kónhgrĩ mỹ: “nĩ ra, ã kur gég tĩg, ã ìn ra,” he mũ, Jesus ti. ²⁵ Kỹ tóg vēsỹmēr jēgnē mũ sir. ã kur gég tóg mũ vāhã, ag rĩnve. ã ìn ra tóg tĩ mũ, Topê mỹ vĩ há han kỹ, ùn kãnhgrĩ ja ên ti.

²⁶ Kỹ tóg vênh kar mỹ e tãvĩ tĩ. Topê mỹ ag tóg vĩ há han mũ gé, ti to: “ēg kãfór ti nĩ,” hēn kỹ. “Ge ve ja tũ ēg nỹtĩ, kỹ ēg tỹ ne to jykrén ke tóg tũ tĩ,” he ag tóg mũ sir, Jesus tỹ ùn kãnhgrĩ ja ên tỹ há' hēn kỹ.

Jesus tỹ Levi jé prēr

(Mt 9.9-13; Mc 2.13-17)

²⁷ Kar kỹ Jesus tóg tĩg măn mũ. Kỹ tóg ù tỹ governo mỹ jãnkamy mǎg tĩ ù vég mũ, imposto mǎg tĩ ên ti. Ti jijin hã vỹ: Levi, he mũ. ã rãnhřāj han kỹ tóg nĩ nĩ, ti rãnhřāj jafã krēm, Jesus tỹ ti ve kỹ. Kỹ tóg ti mỹ: “ình mré kãtĩg,” he mũ. ²⁸ Kỹ tóg jēgnē mũ sir. Tĩ mré tóg tĩ mũ sir, ã tũ kar ré kỹ.

²⁹ Kỹ Levi tóg ti mỹ festa mǎg han mũ, ti ìn tá. Kỹ ti tỹ festa to ùn jé prēr mũ ag vỹ tỹ ù tỹ hēn ri ke nỹtĩ, festa venh kāmũ mũ ên ag. Governo mỹ jãnkamy mǎg tĩ ù ag vê, ag mré ke ù ag mré hã. Jesus mré ag tóg jēg mũ.

³⁰ Kỹ Fariseu ag tóg vég mũ, Topê vĩ to professor ag ke gé, kỹ tóg ag mỹ kórég tĩ. Kỹ ag tóg ù tỹ Jesus mré mũ tĩ ag to vĩ mũ gé. Ag mỹ ag tóg: “ājag hã ne tóg governo mỹ jãnkamy mǎg tĩ ag mré jēg mũ,” he mũ. “Topê vĩ mranh tĩ ag mré ājag tóg jēg mũ,” he ag tóg, ù tỹ Jesus mré mũ tĩ ag mỹ.

³¹ Hã ra Jesus tóg ag mỹ kāmén mũ. “Hỹ, ag mré sóg jēg mũ,” he tóg. “Hã ra ùn kagyga tũ ag vỹ médico venh mũ tũ nĩgtĩ,” he tóg mũ. “Ùn kagyga ag hã vỹ ti venh mũ tĩ,” he tóg. ³² “Ình pi(jé) ù tỹ vênh jykre kuryj han mũ ag mỹ: “ājag jykre továnh ra,” he sór tĩ'. Û tỹ Topê vĩ

mranh ja ên ag hã m̃y sóg: “ājag jykre kórég tovānh ra,” he sór tĩ. Hã jé sóg ājag m̃y vėnh ven,” he tóg, Jesus ti.

Vākře

(Mt 9.14-17; Mc 2.18-22)

³³ K̃y Fariseu ag tóg ti m̃y ke m̃an m̃ũ. “João mré m̃ũ tĩ ag ṽy vākře (ka)m̃e ñỹt̃g̃t̃ĩ, ṽj̃ēn ki, k̃y ag tóg Topē mré ṽĩ (ka)m̃e han tĩ gé, ag vākře k̃y. K̃y Fariseu mré ke ag tóg ge ñỹt̃g̃t̃ĩ gé. Hã ra ā mré m̃ũ tĩ ag tóg ge tũ ñỹt̃ĩ. J̃ēg ag tóg m̃ũg̃t̃ĩ, kurā kar ki. Vākře vānh ag ñỹt̃ĩ, ěg vākře kurā ki,” he ag tóg m̃ũ sir, Jesus m̃y. ³⁴ K̃y tóg ag m̃y: “h̃y,” he m̃ũ. “Hã ra vėnh pr̃ũg t̃y festa to k̃am̃ũ ag pi(jé) vākreg̃ t̃ĩ,” he tóg. “Festa ṽe m̃ỹr, vėnh pr̃ũg ti, k̃y ti mré ke ag tóg ũn pr̃ũg m̃ũ ěn ri ke ñĩ, hã k̃y tóg inh mré m̃ũ tĩ ag m̃y sér t̃ĩ,” he tóg. ³⁵ “Vāhā tóg jun m̃ũ, inh kurā ti. Ěn k̃a ag tóg inh pére m̃ũnh m̃ũ. Ěn k̃a hã ag tóg ājag vākrenh ke venh m̃ũ, kurā ěn k̃a, inh mré m̃ũ tĩ ag,” he tóg, Jesus ti.

³⁶ K̃y tóg ag m̃y comparação han m̃ũ, k̃y tóg: “inh jykre t̃ag ṽy ge ñỹnh m̃ũ,” he m̃ũ. “Ěg pi(jé) ěg kur t̃ag kókég t̃ĩ, ěg t̃y ěg kur si jar k̃a ñĩm jé,” he tóg. “Ke tũ ñĩ m̃ũ ra ěg tóg ěg kur há ěn kókég m̃ũ, hã ra tóg ěg kur si ěn ki par tũ ñĩg̃t̃ĩ gé, ũn há ti. K̃y ěg kur tóg kórég kar ñỹt̃ĩ ñĩ sir,” he tóg. Ti t̃y ā jykre t̃ag tó ṽe, hã ra tóg kur t̃ag ri ke ñĩ.

³⁷ K̃y tóg ag m̃y: “vinho ṽy ge ñĩg̃t̃ĩ gé,” he m̃ũ gé. “Ěg pi(jé) vinho kaj̃ag m̃ũ t̃y ti f̃ar si t̃y s̃aco ki kuj̃ēg t̃ĩ, vinho t̃ag ěn t̃ĩ. Ke tũ ñĩ m̃ũ ra tóg kunānh k̃y jar m̃ũ. K̃y vinho ěn tóg tũ he m̃ũ, bolsa ke gé sir. ³⁸ Vinho kaj̃ag m̃ũ t̃y ti f̃ar t̃ag t̃y bolsa ki kuj̃ēn ke ṽe m̃ỹr,” he tóg. Ti t̃y ā jykre t̃ag tó ṽe, hã ra tóg vinho kaj̃ag m̃ũ ri ke ñĩ.

³⁹ K̃y tóg ag m̃y: “ěg pi(jé) vinho si kron k̃y ũn kaj̃ag kron sór t̃ĩ, ũn t̃ag ěn t̃ĩ,” he m̃ũ gé. “Ti si hã tóg ěg m̃y há ñĩ,”

he ěg tóg t̃ĩ,” he tóg, Jesus ti. Ti t̃y ā jykre t̃ag tó ṽe, hã ra ag jykre si tóg ag m̃y há t̃ĩ, ũ t̃y ti ṽĩ m̃ēg m̃ũ ag m̃y.

Vėnhkán ke kurā ki vėnh jykre

(Mt 12.1-8; Mc 2.23-28)

6 Kej̃ēn tóg vėnhkán ke kurā tá kr̃ỹg m̃ũ. K̃y Jesus tóg ěp̃y m̃ĩ t̃ĩ m̃ũ, trigo jo ěp̃y m̃ĩ. Ti mré m̃ũ tĩ ag tóg ti mré m̃ũ m̃ũ. Hã ra ag tóg sir trigo mó ěn t̃y kam ke m̃ũ sir. Ājag ñĩg̃é t̃y ag tóg r̃ynhranh m̃ũ, ag t̃y ti kañé kó jé. ² Hã ra Fariseu ũ ag tóg ag ṽēg m̃ũ. Ag m̃y vėnh r̃ānhraj̃ ṽe, ag t̃y trigo r̃ynhranh m̃ũ ti. Hã ki ag tóg ag m̃y Topē ṽĩ mranh m̃ũ, ag t̃y vėnhkán ke kurā ki r̃ānhraj̃ k̃y. Hã k̃y ag tóg ag m̃y: “ājag ne tóg ñēn han ke tũ han m̃ũ ñĩ, vėnhkán ke kurā ki,” he m̃ũ. “Vėnh r̃ānhraj̃ ṽe m̃ỹr, ājag t̃y ñēn han m̃ũ ti,” he ag tóg, Jesus mré m̃ũ tĩ ag m̃y.

³ Hã ra Jesus tóg ag m̃y: “vó,” he m̃ũ. “Ag kókĩnk̃ir ṽe m̃ỹr,” he tóg. “Davi to jykreñ ñĩ, ti mré m̃ũ tĩ ag to ke gé. Ti kókĩr k̃y tóg ā t̃y ñēn han ke tũ han gé, hã ra Topē pi(jé) ti to jũ m̃ũ,” he tóg. ⁴ “Topē jo ĩn k̃a ra tóg r̃ā, Davi ti. Tá tóg Topē jam̃ ěn kó. Ti t̃y konh ke tũ ṽe ṽe, Topē tũ ki r̃ĩr t̃ĩ ag hã t̃y konh ke ṽe ṽe. Hã ra tóg kó, ā mré m̃ũ tĩ ag m̃y tóg vėnh k̃apóp̃am̃ gé, Davi ti. Rán k̃y tóg ñĩ ñĩ m̃ỹr,” he tóg, Jesus ti. ⁵ K̃y tóg ag m̃y: “t̃y sóg vėnhkán ke kurā to p̃ā'i ñĩ m̃ỹr,” he m̃ũ. “T̃y sóg ěpr̃ā ke fi kósĩn ñĩ,” he tóg ag m̃y, Jesus ti.

Jesus t̃y vėnhkán ke kurā k̃a ũ t̃y há' he

(Mt 12.9-14; Mc 3.1-6)

⁶ Vėnhkán ke kurā ũ k̃a Jesus tóg Israel ag t̃y vėnh kanhr̃ān jaf̃ā k̃āra r̃ā m̃ũ, ag kanhr̃ān jé. Tá ũ tóg j̃ē ñĩ. Ti ñĩg̃é ṽy tóg ja ñĩ. ⁷ K̃y Topē ṽĩ to professor ag tóg Jesus tug̃ñỹm m̃ũ, Fariseu ag ke gé, ag t̃y ti t̃y há' he m̃ũ ěn ven jé. “Ti m̃y ti t̃y há' he sór tũ, t̃y ěg vėnhkán ke kurā (hã) ra'?” he ag tóg. “Ti t̃y ti t̃y há' he k̃y ěg tóg ti

kāmén mū, pā'i ag mý, ti tỹ vènhkán ke kurā kā rānhraj mū ti," he ag tóg. Hã kỹ ag tóg ti tugnȳm mū.

⁸ Hã ra Jesus tóg ag tỹ nén to jykrén vég jẽ nĩ. Kỹ tóg ùn nĩgẽ tóg ên mý: "kunĩg," he mū. "Tag kā jènh nĩ," he tóg ti mý. Kỹ tóg kätig kỹ kā jẽ mū sir. ⁹ Kỹ tóg ag mý: "sỹ ājag ki jēmènh há tóg tĩ," he mū. "Vènhkán ke kurā ki èg hỹn ne han mū?" he tóg, "èg tỹ Topẽ vi ki króm jé?" he tóg. "Èg mý nén ù há han mū? Èg tỹ ù tù kókén kỹn mý kórég tù nỹnh mū hỹn?" he tóg. "Èg mý ù kren han mū hỹn? Èg tỹ ù tén kỹn mý kórég tù nĩnh mū hỹn?" he tóg. Hã ra ag tóg ti mý nén ù tó tù nĩ.

¹⁰ Kỹ tóg ag ki èvānh kãn kỹ ùn nĩgẽ tóg ên mý: "ã nĩgẽ tỹ krỹg hé," he mū. Kỹ tóg tỹ krỹg he mū sir. Ti tỹ tỹ krỹg he kỹ tóg há' he mū, ti nĩgẽ tóg ên ti. ¹¹ Kỹ tóg vènh kar mý e tĩ. Ag fe tóg gỹm ke mū, kỹ ag tóg jagnẽ mré vēmén mū. "Èg hỹn ti tỹ hẽ ri kenh mū hỹn', ti kăgmĩnh mū vó?" he ag tóg, Jesus to. Hã ra tóg ùn nĩgẽ tóg ên tỹ há' he ja nĩ sir.

Jesus tỹ apóstolo ag kuprẽg

(Mt 10.1-4; Mc 3.13-19)

¹² Ên kā Jesus tóg kejèn pānónh ra ti mū, ti tỹ Topẽ mré vēmén jé. Kutỹ ên kā tóg Topẽ mré vi nĩ ki kurāg mū. ¹³ Tỹ vaj kỹ tóg ã mré mū ti ag jé prër kãn mū, kỹ tóg ag kāmĩ ù tỹ 12 (ke) ên ag kuprẽg mū. Ag to tóg: "sỹ ùn vìn mū ên ag," he mū, hã vỹ: apóstolo, he mū. ¹⁴ Ag hã vẽ, ha mẽ: Simão, Jesus tỹ ti jyjy ù hã vỹ: Pedro, he mū, ti jāvỹ tỹ André ke gé, Tiago ke gé, ti jāvỹ tỹ João mré, Filipe ke gé, Bartolomeu ke gé, ¹⁵ Mateus ke gé, Tomé ke gé, Tiago ke gé, Alfeu kósín tag ti, Simão ke gé, ag tỹ ù to: Zelote, he mū tag ti, ¹⁶ Judas ke gé, Tiago kósín tag ti, Judas Iscariotes ke gé, ù tỹ Jesus vatánh tá pā'i ag mý ti kāmén ke tag ti.

Jesus tỹ ùn e ag ki rĩr

(Mt 4.23-25)

¹⁷ Kỹ Jesus tóg ag mré pānónh ên to tére mū sir, kỹ tóg kyjer tá jẽ nĩ. Kỹ ti mré mū tỹ hèn ri ke ag vỹ tá nỹtĩ gé. Û tỹ hèn ri ke ag vỹ ti ki junjun ja nĩgtĩ, ga tỹ Judéia tá kāmũ kỹ, cidade tỹ Jerusalém tá ke gé, goj kafā tù fyr tá ke gé, hã vỹ: cidade tỹ Tiro, he mū, cidade tỹ Sidom, he mū gé. Ên kar vỹ ti ki junjun ja nĩgtĩ, ti tỹ ag tỹ há' he jé. Kỹ tóg fór pẽ nĩ, tá, ag tỹ e pẽ tāvĩ nỹtĩn kỹ. ¹⁸ Ûn jagrẽ kórég ag tỹ tóg há' he mū gé, ag jagrẽ pan tóg mū, Jesus ti, fag mré hã. ¹⁹ Kỹ vènh kar vỹ ti kã krỹ' he sór mū sir, hã jé ag tóg ti ki junjun mū. Kỹ ù tỹ ti kã krỹ' he mū ên ag vỹ há' he kãn mū, ti tỹ ã jykre tar tỹ ag tỹ hághá' hen kỹ. Hã jé ag tóg vènh mãn ja nĩ. Hã kỹ ag tóg ti pénĩn e tĩ sir.

Jesus tỹ ag kanhrân

(Mt 5.1-12)

²⁰ Kỹ tóg ã mré mū ti ag ki èvānh mū, kỹ tóg ag mý kāmén mū, Jesus ti, kỹ tóg: "Topẽ vỹ ājag ve há han mū, ājag tỹ: "kórég eg tóg nỹtĩ," hen kỹ," he mū. "Kỹ ājag tóg Topẽ tỹ tỹ èg pā'i nĩ venh ke mū," he tóg. ²¹ "Topẽ vỹ ājag ve há han mū, ājag tỹ: "inh kókĩr ri ke tóg tĩ, sỹ vènh jykre kuryj ve sór tĩ ên ti," hen kỹ. Kỹ ājag tóg venh ke mū," he tóg. "Topẽ vỹ ājag ve há han mū, ājag vèsýrènh mũn kỹ, èprā. Ājag mý sér nĩ jé tóg ke mū, tá," he tóg. ²² "Topẽ vỹ ājag ve há han mū, ag tỹ ājag to kórég nỹtĩn kỹ isugnĩn, ag tỹ ājag mý: "ha mū jèg," hen kỹ, isugrĩn. Ag tỹ isugnĩn ājag mý vĩ kónān kỹ tóg há tĩ, ag tỹ ón kỹ ājag jykre kórég tó kỹ. Tỹ sóg èprā ke fi kósín nĩ mýr," he tóg, Jesus ti. ²³ "Mý sér nỹtĩmnĩ, ājag fe tỹ mrin kemnĩ, ag tỹ isugrĩn ājag vóg kónān mū ra. Kỹ ājag tóg kanhkā tá nén ù há kar venh ke mū, vènh kaja jé, isugnĩn. Ge ja ag tóg nỹtĩ ja nĩgtĩ, ù tỹ ājag vóg mū ag jóg'jóg ag, vāsỹ Topẽ vĩ tó tĩ ag mý. Ag

vóg kónān ja ag tóg nĩ gé. Vās̄y Topē vĩ tó tĩ ěn ag ri ke ājag tóg nỹtĩ, ag krēkrē tỹ ājag vóg kónān kỹ,” he tóg, Jesus ti.

²⁴ “Hā ra Topē vỹ ājag ve kónān mũ, ājag tỹ: “há ěg tóg nỹtĩ,” hen kỹ. Ga kri mũn kỹ ājag tóg nén ũ há vég tĩ, kỹ ājag tóg kanhkā tá jun ke tũ nĩ,” he tóg.

²⁵ “Topē vỹ ājag ve kónān mũ, ājag tỹ vėnh jykre kuryj ve sór tũ nỹtĩn kỹ, ti tỹ ājag mỹ ājag kókĩnkĩr ri ke tũ nĩn kỹ, ěprā. Kỹ ājag tóg venh ke tũ nĩ. Kỹ tóg ājag kókĩnkĩr ri ke tĩnh mũ, tá,” he tóg. “Topē vỹ ājag ve kónān mũ, ti tỹ ājag mỹ sér tĩn kỹ, ěprā. Vės̄yrénh jé ājag tóg ke mũ, kygfỹ jé ājag tóg ke mũ, tá,” he tóg.

²⁶ “Topē vỹ ājag ve kónān mũ, vėnh kar tỹ ājag to vĩ há han mũn kỹ. Ājag mỹ ti há tĩ, vėnh kar tỹ ājag to vĩ há han mũn kỹ, há ra tóg Topē mỹ kórég nĩ. Ge ja ag tóg nỹtĩgtĩ, ũ tỹ ājag mỹ vĩ há han mũ ěn jóg’jóg ag, ón kỹ Topē vĩ tó (ka)mē ěn ag mỹ, vās̄y. Ag mỹ ag tóg vĩ há han ja nĩ gé. Ag ri ke ājag tóg nỹtĩ, ón kỹ Topē vĩ tó (ka)mē ěn ri ke ājag tóg nỹtĩ, vėnh kar tỹ ājag mỹ vĩ há han kỹ. Hā kỹ tóg ājag ve kónān mũ, Topē ti,” he tóg, Jesus ti, ag mỹ.

Ěg tỹ ěg kato tē mũ ag to há nỹtĩnh ke
(Mt 5.38-48)

²⁷ “Ājag jyvėn sóg mũ, ājag tỹ inh vĩ jēmėn kỹ, ha mē. ũ tỹ ājag kato vās̄ānsān mũ ěn ag to fe nỹtĩmnĩ jāvo. ũ tỹ ājag to jũ mũ ag mỹ nén ũ há han nĩ jāvo. ²⁸ ũ tỹ ājag mỹ vĩ kónān mũ ag mỹ vĩ há han nĩ gé. ũ tỹ ājag mỹ fėfėn mũ ag to Topē mré vĩmnĩ gé. ²⁹ ũ ag tỹ ājag jamē ki tĩnh kỹ ag mỹ ājag jamē ũ ti ven nĩ gé, ag tỹ ājag mỹ ki tĩnh jé gé. ũ ag tỹ ājag capa mĩn sór mũ ěn ag mỹ ājag camisa nĩm nĩ gé. ³⁰ ũ ag tỹ ājag mỹ nén ũ to: “inh mỹ nĩm,” he kỹ ag mỹ nĩmnĩ. ũ ag tỹ ājag tỹ nén ũ mĩn kỹ ag mỹ: “inh mỹ isũ nĩm,” he tũg nĩ. ³¹ Ājag tỹ ājag mré ke ũ to: “ti tỹ ěg mỹ tag han há tóg tĩ vė,”

he mũ ra ěg há tóg ti mỹ han ke mũ,” he tóg.

³² “ũ ag tóg ājag to há nỹtĩ. Ājag tỹ tag ag há to há nỹtĩn kỹ tóg tỹ nén ũ tũ tĩ ver. Vėnh kar ag vỹ ge nỹtĩ gé. ũ tỹ ājag to há nỹtĩ ěn ag to ag tóg há nỹtĩ gé, vėnh kato, ũ tỹ Topē vĩ mranh mũ ag vỹ tag han tĩ. Tag vỹ há nĩ, há ra tóg tỹ nén ũ tũ nĩ ver. ³³ ũ ag tóg ājag mỹ vĩ há han tĩ. Ājag tỹ ěn ag há mỹ vĩ há han kỹ tóg tỹ nén ũ tũ nĩ ver. Ge ag tóg nỹtĩ gé, Topē vĩ mranh tĩ ag. Ājag tỹ ag mỹ vĩ há han kỹ ag tóg ājag mỹ vĩ há han mũ gé, vėnh kato. Há tĩ nĩ, há ra tóg tỹ nén ũ tũ nĩ ver. ³⁴ ũ ag vỹ, ājag tỹ ag mỹ prestar hen kỹ ag tóg ājag mỹ nĩm mĩn mũ, ājag tũ ti. Ājag tỹ ag há mỹ prestar he mĩn kỹ tóg tỹ nén ũ tũ nĩ ver. Topē vĩ mranh tĩ ag vỹ ge nỹtĩ gé. Ājag tỹ ag mỹ nĩm mĩn kỹ ag tóg ājag mỹ prestar he mĩn mũ sir, ājag tũ ti. Há tĩ nĩ, há ra tóg tỹ nén ũ tũ nĩ ver.

³⁵ Ag jāvo ũ tỹ ājag kato vās̄ānsān mũ ag to há nỹtĩmnĩ, ha mē. Vėnh kar mỹ vĩ há han kĩn nĩ. Vėnh kar mỹ prestar he kĩn nĩ, ag tỹ ājag mỹ ājag tũ nĩm tũ (hā) ra. Kỹ ājag tóg kanhkā tá venh ke mũ, ājag tỹ ũri nén han mũ tag ri ke ti. Hā ki ājag tóg tỹ ũ tỹ kynhmỹ nĩ ěn krē nỹtĩ, ājag tỹ ti ri ke han kỹ. Ti há ne vėnh kar mỹ vĩ há han kĩn tĩ ver’, ũn jykre kórég kar ag mré há, ag tỹ ti mỹ: “ěg mỹ tóg há tĩ,” he tũ (hā) ra, ag tỹ vėnh há ki rĩr há han mũ (hā) ra tóg ag mỹ vĩ há han tĩ ver, Topē ti. ³⁶ Vėnh kar jagāgtān kĩn nĩ, ěg jóg ri ke. Ěg jóg tỹ vėnh kar jagāgtān kóm vėnh kar jagāgtān nĩ gé,” he tóg, Jesus ti.

Ěg tỹ kānhmar ũ to vĩ kónān ke tũ
(Mt 7.1-5)

³⁷ “Kānhmar ũ to vĩ kónān tũg nĩ, kỹ Topē vỹ ājag to vĩ kónān ke tũ nĩ gé. Kānhmar ũ to: “kórég ti nĩ,” he tũg nĩ, kỹ Topē vỹ ājag to: “kórég ti nĩ,” henh ke tũ nĩ gé. Vėnh kar mỹ vėnh pāte fón

nĩ, ke tũ nĩ mũ ra Topê vỹ ājag mỹ vẽnħ pāte fón ke tũ nĩ gé. ³⁸ Ag mỹ nén ũ há kar nĩmnĩ, kỹ Topê vỹ ājag mỹ nén ũ há kar nĩm ke mũ gé sir, hã ra tóg ājag mỹ ěn kǎfór nĩm ke mũ. Ājag mỹ nĩm mág han jé tóg ke mũ, Topê ti. Nĩm mág pẽ han jé tóg ke mũ, nén ũ há kar tỹ. Hỹ, ge ti nĩ. Ājag tỹ ag mỹ nén ũ há han kỹ Topê vỹ ājag mỹ nén ũ há han ke mũ gé. Ājag tỹ ag mỹ nén ũ kórég han kỹ tóg ājag mỹ hã ri ke han ke mũ gé,” he tóg, Jesus ti.

³⁹ Kỹ tóg ag mỹ: “ũ tỹ ki kagtĩg ra tỹ ājag pǎi nỹti sór mũ tag vỹ ge nỹnh mũ, ha mẽ,” he mũ gé. Kỹ tóg: “ũn kyvó tỹ ũn kyvó ũ mỹ: “sỹ ǎ pére tĩg ke vẽ,” hen kỹ ag tóg ag mũn kỹ kǎgnó ki vǎr kǎn ke mũ. Ge ag tóg tĩ, ājag pǎi ag. Ājag tỹ ũn ki kagtĩg ag mré mũn kỹ ājag tóg mũ kónǎn kǎn ke mũ. ⁴⁰ Aluno pi(jé) ǎ professor kǎfór nĩnh mũ. Ti tỹ kanhrǎn há han kỹ tóg kejẽ ǎ professor ri ke nĩnh mũ, hã ra ti pi(jé) ti kǎfór nĩnh mũ. ⁴¹ Jykre kórég mág ājag tóg nỹti, hã ra ājag régre jykre pǎno sĩ ěn ājag mỹ kórég nỹ. ⁴² Kỹ ājag hã ne tóg ājag régre ag mỹ: “sỹ ǎ mỹ ǎ jykre kórég kurynh há tóg tĩ,” he tĩ, ājag tỹ ājag jykre pǎno tǎvĩ ěn kurynh jǎvǎnh (hã) ra. Ke tũg ra mỹr, ke tũ nĩ mũ ra ājag tóg jykre régre nỹti. Ājag jykre kurynh vén nĩ, kar ājag tóg ājag régre ag jykre kurynh há han mũ,” he tóg, Jesus ti.

Ka to comparação

(Mt 7.16-20; 12.33-35)

⁴³ “Ha vé, ka há pi(jé) kanẽ kórég han tĩ. Kỹ ka kórég pi(jé) kanẽ há han tĩ gé. ⁴⁴ Ēg tỹ ti kanẽ ve kỹ ěg tóg: “ũn kanẽ ko há ja vẽ,” henh ke mũ, ke tũ nĩn kỹ ěg tóg: “ũn kanẽ ko vǎnh ja vẽ,” henh ke mũ. Sónħ to ěg tóg pẽnva vég tũ nĩgtĩ mỹr, kar ěg tóg vǎnh tỹ jóhó to uva vég tũ nĩgtĩ gé, ha mẽ. ⁴⁵ Ge tóg nỹgtĩ, ěprǎ ke ag jykre ti. Ũn jykre há vỹ nén ũ há kar to jykrén tĩ, ti jykre kuryj nĩn kỹ. Kỹ tóg ěg mỹ tó há han tĩ gé sir. Kỹ ũn jykre

kórég vỹ ũ kórég kar to jykrén tĩ, ti jykre pǎno nĩn kỹ. Kỹ tóg ěg mỹ tó kónǎn tĩ gé sir. Hỹ, ge ti nỹgtĩ. Ēg tỹ nén to jykrén tĩ ěn kǎmẽn ěg tóg tĩ mỹr,” he tóg, Jesus ti.

Ĩn to comparação

(Mt 7.24-27)

⁴⁶ “Ājag ne tóg inh mỹ: “Senhor', Senhor',” he tĩ. Hã ra ājag tóg isỹ ājag mỹ nén tó mũ ěn han vǎnh nỹtĩgtĩ. Kỹ tóg vẽnħmỹ nỹ. ⁴⁷ Inh ki ge kỹ ājag nỹti. Inh vĩ ki kanhró ājag tóg nỹti. Ājag tỹ ki króm kỹ ājag tóg sir tag ri ke nỹtĩnh mũ, ha mẽ. ⁴⁸ ĩn han mũ ri ke vẽ. Ũ tóg, ti tỹ ĩn han jé tóg kũm tĩ, kǎ há tá. Kũm kỹ tóg pǎró kri ĩn han mũ sir, pǎró kri tóg ti nũna gunħgunħ mũ sir. Kỹ vǎhã goj tóg var mũ, kỹ tóg ĩn kri rũm ke mũ, goj var ti. Hã ra ĩn tóg jẽ nĩ. Ti kókég tũ tóg nĩ, goj var ti. Ti tỹ pǎró kri jẽ hã kỹ tóg tar jẽ. Ge ti nĩ, ājag tỹ inh vĩ ki króm kỹ. ⁴⁹ Ājag tỹ inh vĩ ki króm tũ nĩn kỹ ājag tóg sir tag ri ke nỹtĩnh mũ, ha mẽ. Ũ tóg ĩn han mũ gé, hã ra tóg jo kũm tũ nĩ, ti nũna vỹ jǎvo krĩgmỹ nỹti. Kỹ vǎhã goj var vỹ ĩn kri rũm ke mũ sir, kỹ tóg kutẽ mũ sir, ĩn ti. Kỹ tóg mráj mũ sir, ha mẽ, ti nũna tỹ krĩgmỹ nỹtĩn kỹ. Ge ti nĩ, ũ tỹ inh vĩ jẽmẽ jǎvǎnh ěn ti,” he tóg, Jesus ti.

Fóg tỹ capitão tỹ Jesus ki rǎ

(Mt 8.5-13)

7 Jesus tỹ ag kar kanhrǎn kǎn kar tóg cidade tỹ Cafarnaum ra tĩ mũ. ² Tá fóg tỹ capitão tóg nĩ nĩ. Ti camarada tóg kaga nỹ nĩ. Vẽnħmỹ tóg nỹ, kỹ capitão tóg: “ti hỹn ter mũ ha,” he mũ. Hã ra tóg ti mỹ ti fe ri ke nĩ, ti camarada ti, capitão ěn mỹ. ³ Hã kỹ tóg Jesus kǎme mẽ kỹ Israel kófa ag jěgněg mũ, Jesus to, ag tỹ ti mỹ: “ti venh kǎtĩg,” he jé. Jesus tỹ ti camarada tỹ há he jé tóg ti mỹ vẽnħ vĩ jěněg mũ, fóg tỹ capitão ěn ti. ⁴ Kỹ ag tóg Jesus tá junjun mũ, Israel kófa ěn ag.

Kỹ ag tóg Jesus mý tó mũ. “Ă mý ti venh tĩg ke tũ nĩ?” he ag tóg mũ, Jesus mý. “Ũn há vë. ⁵Ēg povo to tóg há tãvĩ nĩ, ti tỹ tỹ fóg (hã) ra. Ēg mý tóg ĩn han ja nĩ, Ēg tỹ krēm Topẽ vĩ tó jafã ti, ti tỹ tỹ fóg (hã) ra,” he ag tóg mũ, Jesus mý, fóg tỹ capitão ĩn to.

⁶Kỹ Jesus tóg: “hej,” he mũ. Kỹ tóg ag mré ti mũ. Kỹ tóg ti ĩn kakó ki jun mũ. Kỹ capitão tóg ti mý vënh vĩ jënẽ măn mũ gé. Ā mré ke ag jëgnëg tóg mũ, Jesus to. Kỹ ag tóg ti mý: “Senhor,” he mũ. “Ti venh kārānh ke tũ Ā nējĩ nĩ, ti tỹ tỹ fóg nĩn kỹ,” he ag tóg. “Ă mýn hỹn jagy nỹ, Ā tỹ fóg ĩn kākĩ sãn ken kỹ, Judeu ag tỹ fóg ĩn sãn jãvānh nỹtĩn kỹ,” he ag tóg. ⁷“Hã kỹ ti nējĩ Ā venh kãtĩg tũ nĩ gé, hã ra tóg Ā mý vënh vĩ jënẽg mũ. Ā vĩ pir ki ti camarada nējĩ há' henh mũ, Ā tỹ Ā vĩ tỹ ti tỹ há' henh há nĩn kỹ,” he ag tóg. ⁸“Ha vé, tỹn jĩ pã'i krēm ke nĩ gé, kỹ soldado ag nējĩ tỹ ti krēm ke nỹtĩ gé. Hã kỹn jĩ tóg pã'i jykre ki kanhró nĩ. Ti tỹ soldado ũ mý: “kutĩg,” hen kỹn jĩ tĩ mũ, ti tỹ ti mý: “kunĩg,” hen kỹn jĩ kãtĩ mũ gé. Ti tỹ Ā camarada mý: “tag han ra,” hen kỹn jĩ han mũ. Ti vĩ tỹn jĩ ag jëgnëg tĩ. Hã kỹn jĩ ki kanhró nĩ. Ā vĩ tỹ Ā nējĩ ti camarada tỹ há' he há nĩ,” he ag tóg mũ, Jesus mý, capitão mré ke ag.

⁹Kỹ tóg Jesus mý e tĩ, ti vĩ tag ti. Kỹ tóg Ā mré mũ tĩ ag mý ke mũ, ũn a ag mý, ti nón kãmũ ĩn ag mý. Kỹ tóg ag mý: “Israel ũ pi(jé) ti ri ke nĩ, ti tỹ tỹ fóg (hã) ra’,” he mũ. “Ki kanhró tóg nĩ mýr, kỹ tóg inh ki rã kỹ jë. Ge ve ja tũ sóg nĩ. Há' he kỹ ti nĩ ha, ti camarada ti,” he tóg, Jesus ti.

¹⁰Kỹ ag tóg vỹnvỹn ke mũ, capitão ĩn ra, capitão tỹ ũn jëgnëg mũ ag. Hã ra ti camarada ĩn tóg há' he ja nĩ sir, ag tỹ tá junjun mũ ra.

Jesus tỹ ũn ter mũ rĩn măn

¹¹Kãnhmar Jesus tóg tĩ mũ gé sir, ĩn ki. Kỹ tóg cidade tỹ Naim ra tĩ mũ. Ti mré

mũ tĩ ag tóg ti mré mũ mũ, ũn e a g ke gé. Ti nón ag tóg mũ mũ. ¹²Kỹ tóg cidade ĩn fyr ki jun mũ, cidade to ró jãnkã ki. Kỹ ag tóg vëser va kãmũ nĩ, ha mẽ. Ti mýnh fi kósin pir vë mýr. TI panh tóg ter ja nĩ. Kỹ ũ tỹ hën ri ke fag vỹ fi mré mũ nĩ, cidade tá kãmũn kỹ. ag tỹ ti pėjunh mũ vë, vënh kej tá.

¹³Kỹ Jesus tóg fi vëg mũ, kỹ fi tóg ti mý jagtar nĩ. Kỹ tóg fi mý: “fỹ tũg nĩ,” he mũ. ¹⁴Kỹ tóg vëser venh tĩ mũ, kỹ tóg tá jun kỹ ti męg mũ. Kỹ ũ tỹ ti va mũ ĩn ag vỹ kryg'kryg' he mũ. Kỹ Jesus tóg vëser mý: “kyrũ,” he mũ. “Nĩ ra, he sóg mũ Ā mý,” he tóg mũ, vëser mý, Jesus ti. ¹⁵Kỹ tóg nĩ mũ (mýr) sir, ha mẽ, vëser ĩn ti, kỹ tóg vĩ mũ sir, ũn ter ja ĩn ti. Kỹ Jesus tóg ti mýnh fi mý ti fëg mũ.

¹⁶Kỹ tóg vënh kar mý e tĩ, kỹ ag tóg Topẽ to vĩ há han mũ sir. “Topẽ vĩ tó tĩ kãfór vỹ Ēg ki jun,” he ag tóg mũ, “Topẽ vỹ Ēg ve há han, hã kỹ tóg ti jënẽ,” he ag tóg mũ, Jesus to. ¹⁷Kỹ ti vëme tóg vënh kar kri rũm ke mũ sir, ga tỹ Judéia kar tá, ga kar ĩn kãmĩ ke gé, Jesus tỹ ũn ter ja ĩn rĩn măn ja ti.

João Batista tỹ Jesus mý vënh vĩ jënẽ (Mt 11.2-19)

¹⁸Ēn kã João vỹ se kỹ jë nĩ, João Batista ti, ũ tỹ ag kygpég tĩ ti. Kỹ João mré mũ tĩ ag tóg ti mý tó kãn mũ sir, Jesus tỹ nén han mũ ti. ¹⁹Kỹ tóg ti mý e tĩ. Kỹ tóg Jesus to: “Topẽ tỹ ũn jënẽg mũ hã mý vỹ?” he mũ. Hã kỹ tóg Ā mré mũ tĩ régre ag jëgnëg mũ, ag tỹ Jesus venh mũ jé, ag tỹ ti ki jëmẽ jé, ti mý: “Ā hã mý?” he jé. “Ēg tỹ ũn jãvānh mũ mý tỹ Ā nĩ? Topẽ tỹ ũn jënẽg mũ hã mý tỹ Ā nĩ? Ēg mý ũ jãvānh măn ke tũ nĩ ha', Ā pãte?” he sór ag tóg mũ, Jesus mý.

²⁰Kỹ ag tóg Jesus tá junjun mũ. Kỹ ag tóg ti mý: “João Batista vỹ Ēg jëgnë, Ēg tỹ Ā ki jëmẽ jé,” he mũ. “Ā hã mý?” he tóg. Ēg tỹ ũn jãvānh mũ ĩn hã mý tỹ Ā nĩ? Ēg mý ũ jãvānh măn ke tũ nĩ ha', Ā

pâte? he tóg, João ti, ã mý,” he ag tóg mû, Jesus mý.

²¹ Hã ra Jesus tóg ùn kaga ag tỹ há' he mû, ag tỹ ti mré vînh kãmû ký. Vênh jagrê kórég pan tóg mû gé, kurã ên kã. Ûn kyvó ag tỹ há' he tóg mû gé, ag kanê tỹ. ²² Ký tóg João mré mû ti ag mý: “Ha João mý tag tómnî, ha mē,” he mû. “Ăjag tỹ nén vэг mû ta g tómnî, ăjag tỹ nén mэг mû ti ke gé,” he tóg. “Tag han inh tĩ, ha mē: ùn kyvó ag vỹ isugrîn êvânh há nỹti ha. Ûn kânhrĩ ag vỹ mû há han mû ha, ùn kónhrĩ ên ag. Û tỹ vênh kaga kren vânh han mû ag krenkren han inh tĩ, ù tỹ lepra han mû ag. Ûn kutu ag vỹ êmê há nỹti ha. Ûn kăgter mû ag vỹ rĩnrĩr măn gé. Ûn jagăgtar e ag vỹ Topê vĩ sér mэг mû ha ke gé, Topê tỹ tỹ êg pã'i nĩnh ke to. ²³ Ký tóg ti tỹ iso jykrên kónăn tũ nĩn ký há' he mû. Ký Topê tóg ti ve há han mû sir. Tag tómnî, João mý,” he tóg, Jesus ti. ²⁴ Ký João tỹ ùn jêgnêg mû ag tóg mû mû sir, João mý tó jé, mýr, ha mē.

João tỹ ùn jêgnêg mû ên ag mû kar ký Jesus tóg ùn e ên ag kanhrân mû sir, ký tóg ag mý João kãmén mû. “Êmã tũ ja ra ăjag tóg mû ja nĩgtĩ, João ve jé,” he tóg. “Kỹ ti jykre hỹn ne ri ke nĩ, ăjag mý? Kejên kăka tóg goj jagma krã tỹ man man ke tĩ. João jykre mý ăjag mý tag ri ke tũ nĩ? Hỹ, ri ke tũ ti nĩ. ²⁵ Ký ti jykre hỹn ne ri ke nĩ ăjag mý? Ti mý ăjag mý ùn kur sĩnvĩ ag jykre ri ke nĩ? Vó. Ûn kur sĩnvĩ ag vỹ cidade mág tá nỹti, pã'i mág ĩn krêm, ùn jên mág mû ag. Ag pĩ(jé) êmã tũg ja mĩ mû tĩ. ²⁶ Ký ti jykre hỹn ne ri ke nĩ ăjag mý? Ti jykre mý ăjag mý Topê vĩ tó tĩ ag jykre ri ke nĩ? Hỹ, ri ke ti nĩ. Topê vĩ tó tĩ vê mýr, hã ra tóg Topê vĩ tó tĩ ag kăfór kar nĩ, João ti. ²⁷ Topê vỹ João jênê, ti tỹ ijo tũg jé. Hã ký tag tóg ti to rân ký nĩ, Topê vĩ ki, ha mē. “Ha vé, ă jo sóg ù jênênh mû, ti tỹ vênh kar tỹ há' he jé, ă tũg ken jo. Ag jyvên jé tóg ke mû, ký tóg êpyr kure ri ke nĩ, êmĩn kurynh ri

ke,” he tóg, Topê vĩ tỹ rân ký nĩ ki, João to, ti tỹ ijo tũg ke tag to,” he tóg, Jesus ti, ag mý. ²⁸ “Kĩ hã sóg tó mû, hã ký sóg ke mû, ha mû. Êprã ke ag kăfór kar ti nĩ, João ti, Topê vĩ tón ki. Û tỹ ga kri mû kăfór kar ti nĩ. Hã ra ù tỹ hên ri ke ag tóg Topê tỹ tỹ êg pã'i nĩ vênh ke mû mýr. Ag tỹ vênh ke mû (hã) ra ag tóg kăsir nỹti. Ký ùn kăsir ên ag tỹ êgno pē ên tóg João mág kăfór nĩnh mû hã ra,” he tóg, Jesus ti, João to.

²⁹ “Jo João vĩ mэг mû e ên ag tóg João vĩ mē há han ja nĩgtĩ, hã ký ag tóg Topê vĩ tag ti to: “kĩ hã ă tóg tó mû,” he ja nĩgtĩ, João tỹ ag mý nén tó ja to. Hã ký tóg ag kygpe ja nĩgtĩ, João ti, ù tỹ gov-erno mý imposto tỹ jănkamy măg tĩ ag mré hã. ³⁰ Hã ra Fariseu ag tóg João vĩ jêmê jăvânh ja nỹtĩgtĩ, Topê vĩ to profes-sor ag ke gé. Hã ký ag tóg Topê tỹ ag mý nén han sór mû ên tỹ ti mý nenh ja nĩgtĩ gé. Hã ký João tóg ag kygpe ja tũ nĩgtĩ gé,” he tóg, Jesus ti.

³¹ “Ûri ke ag vỹ ge nỹti gé, ha mē. ³² Gĩr ag ri ke ag tóg nỹti. Gĩr ag vỹ jagnê mré kanhinnhir mũgtĩ. Ký ag tóg ăjag mré ke ag jé prêr tũgtĩ, ag mré kanhinnhir jé. Ký ag tóg kejên jũ tĩ. “Ăjag mý êg tóg văkyn, kanhinnhir ký, hã ra ăjag ne tóg vênh gringrên jăvânh nỹti,” he ag tóg tĩ, gĩr ag, jagnê mý. “Ăjag tỹ vênh gringrên jăvânh nỹtin ký êg tóg ón ký vêsýrénh mû sir, êg kanhinnhir ký, hã ra ăjag ne tóg êg mré fỹ jăvânh nỹtĩgtĩ gé,” he ag tóg tĩ gé, ón ký jagnê to jũ ký, gĩr ag. ³³ Gĩr tag ag ri ke ăjag tóg nỹti, João to, iso ke gé,” he tóg, Jesus ti. “João vỹ văkre ja nĩgtĩ, jên mág tũ, kron tũ. Ký ăjag tóg ti to: “jagrê kórég tóg nĩ,” he ja nĩgtĩ, ti văkre to. ³⁴ Ti jăvo sóg văkrég tũ nĩgtĩ. Jêg sóg nĩgtĩ, kron sóg nĩgtĩ. Ký ăjag tóg iso: “ti hã ne jên mág tĩ,” he tĩ. “Ti hã ne kronkron tĩ, ti hã ne governo mý imposto tỹ jănkamy măg tĩ ag to há nĩ, ti hã ne Topê vĩ mranh tĩ ag to há nĩ,” he ăjag tóg tĩ iso, êprã ke fi kósın

to. Kŷ João jykre tóg ājag mŷ kórég nĩ, ti vākre to, jāvo inh jykre tóg ājag mŷ kórég nĩ gé, inh vākreg tũ to. ³⁵ Hã ra ěg tŷ ũ jykre tugnŷm kŷ ěg tóg ti jykre há ěn ki kanhró nŷtĩ sir. Kŷ tóg tŷ Topē krē nĩ sir, kŷ ěg tóg ti ki Topē jykre ki kanhró nŷtĩ sir, ti jykre há ěn tugrĩn,” he tóg, Jesus ti. Ti tŷ ag mŷ João kāmén hã vĕ.

Jesus tŷ Simão ĩn krēm jĕg

³⁶ Kejĕn Fariseu ũ tóg Jesus mŷ tó mũ, ti tŷ ti mré jĕn jé. Kŷ tóg ti mũ, Fariseu ěn ĩn ra. Tá tóg ti mré jĕg mũ sir.

³⁷ Ti tŷ mré jĕg nĩ ra ũ fi tóg ti ki jun mũ, cidade tá ke ũ fi. Hã ra fi tóg mén ja e nĩ, Topē vĩ mranh kŷ. Jesus tŷ Fariseu ěn ĩn krēm jĕ mĕg fi tóg mũ, hã kŷ fi tóg garrafa va kãtĩ mũ. Garrafa kãki tóg ěg tãg jafã nĩ, nén ger há tŷ. Pó kupri tŷ tóg han kŷ nĩ nĩ, garrafa ěn, pó tãñaj tŷ. ³⁸ ěn va kãtũg kŷ fi tóg ti pĕn to jĕ nĩ sir. Hã ra Jesus tóg cama kri nŷ kŷ jĕg mũ. Ag jykre vĕ, ag tŷ nŷ kŷ jĕn ke mũ ěn ti. Kŷ fi tóg ti pĕn to jĕ kŷ fŷ mũ. Fi tŷ Topē vĩ mranh ja ěn tugrĩn fi tóg fŷ mũ. Kŷ fi tóg ģ kanĕ var tŷ ti pĕn kupég mũ, kŷ fi tóg ģ gãnh tŷ ti pĕn kykũg mũ gé. Ti pĕn ki nhun ke fi tóg mũ gé. Kŷ fi tóg ti pĕn tãg mũ sir, garrafa ki jĕ ěn tŷ.

³⁹ Kŷ Fariseu ěn tóg vég mũ, ũ tŷ Jesus mŷ: “inh mré jĕn kãtũg,” he ja ěn ti. Kŷ tóg to jykrén mũ, ũn tŷtã fi to, Jesus to ke gé. “Ti tŷ tŷ Topē vĩ tó tĩ nĩ ra tóg fi ki kanhró nĩnh mũ vĕ,” he tóg. “Hã ra tóg ki kagtũg nĩ ve nĩ. Ũn mén ja e fi vĕ mŷr, Topē vĩ mranh fi tóg tũgtĩ mŷr, hã ra tóg fi tŷ ģ pĕn mĕ ěn kamĕg tũ nĩ, Jesus i,” he tóg, to jykrén kŷ, Fariseu ěn ti.

⁴⁰ Hã ra Jesus tóg ki kanhró nĩ. Kŷ tóg ti mŷ: “Simão,” he mũ. “Sŷ ģ mré vĕmén ke vĕ,” he tóg. Kŷ tóg ti mŷ: “ha tó,” he mũ sir, Jesus mŷ. ⁴¹ Kŷ tóg: “kejĕn patrão ũ tóg nĩgtĩ,” he mũ. “Ti camarada régre ag tóg ti mŷ név(e) nŷtĩ. Ũn név(e) ěn vŷ tŷ 500 (ke) nĩ, kar ũn név(e) vŷ tŷ 50

(ke) nĩ gé. ⁴² Hã ra ag tŷ ne tŷ kajãm ke tóg tũ tĩ, kŷ tóg ag mŷ tŷ tũg' he mũ, ag név(e) tŷ, ag patrão ti. Kŷ ti camarada tŷ hĕ nŷ hŷn ti to há kãfór nĩ?” he tóg, Jesus ti, ti tŷ Simão ki jĕmĕn kŷ.

⁴³ Kŷ Simão tóg ti mŷ: “ũn név(e) mág ja ěn hŷn tóg ti to há kãfór nĩ,” he mũ. Kŷ Jesus tóg ti mŷ: “ki hã ģ tóg tó mũ,” he mũ. ⁴⁴ Kŷ tóg fi jé vĩrĩn ke mũ sir, ũn tŷtã kórég ěn fi jé, kŷ tóg Simão mŷ: “ģ mŷ fi vég mũ?” he mũ. “ģ kanĕ var tŷ fi tóg inh pĕn kugpég mũ, kar fi tóg ģ gãnh tŷ inh pĕn kykũg mũ gé,” he tóg. “Fi jāvo ģ tóg inh mŷ goj ven tũ nĩ, isŷ inh pĕn kugpe jé, sŷ ģ ĩn kãra rã kŷ,” he tóg. ⁴⁵ “Inh ki nhun ke ja tũ ģ tóg nĩ, ģ jāvo fi tóg inh pĕn ki nhun ke mũ, to fi krónh ke tũ nĩ jāvo,” he tóg. ⁴⁶ “ģ pi(jé) inh gãnh tãg ja nĩ, ģ jāvo fi tóg inh pĕn tãg,” he tóg. ⁴⁷ “Hã kŷ sóg ģ mŷ tó mũ. Topē vĩ mranh tŷ hĕn ri ke han fi tóg. Hã ra tóg fi mŷ vĕnh pãte fón kãn mũ sir, Topē ti, fi tŷ iso há tãvĩ nĩn kŷ, sŷ tŷ fi fe nĩn kŷ. Ũ mŷ tóg kejĕn vĕnh pãte fón pir han tĩ, Topē ti, ũ tŷ patrão ki név(e) sŷ ěn ri ke mŷ. Kŷ ěn tóg ti to há sŷ nĩ gé sir, fi tŷ iso há tãvĩ jāvo,” he tóg. ⁴⁸ Kŷ tóg fi mŷ: “ģ tŷ Topē vĩ mranh ja ěn tŷ sóg vĕnh pãte fón mũ,” he mũ, Jesus ti.

⁴⁹ Kŷ ti mré jĕg mũ ag tóg to jykrén mũ sir, ti vĩ to. Kŷ ag tóg jagnĕ mŷ ke mũ. “Ti hã mŷ ěg tŷ Topē vĩ mranh kŷ vĕnh pãte fón ke mũ vŷ?” he ag tóg mũ. “Topē hã ne vĕnh pãte fón há nĩ, hã kŷ tóg ěg mŷ vĕnhmŷ tĩ,” he ag tóg. ⁵⁰ Hã ra Jesus tóg fi mŷ ke mãm mũ. “ģ tŷ inh ki rã kŷ sóg ģ kren han mũ,” he tóg. “Ha jatun mŷ tũg,” he tóg, Jesus ti, ũn tŷtã kórég ja ěn fi mŷ.

Ũn tŷtã fag tŷ Jesus ki rĩr

8 Tag pãte Jesus vŷ cidade kar mĩ tũg kãn mũ, ěmã kãsir mĩ ke gé. Topē vĩ tó tóg tĩ mũ. Ag mŷ tóg: “Topē tŷ tŷ ājag pã'i nĩ sór vĕ,” he mũ. Kŷ ũ tŷ 12 (ke) ag tóg ti mré mũ mũ. ² Kŷ ũn tŷtã fag tóg ti

mré mū mū gé sir. Jesus tóg fag tỹ há' he ja nĩ. Ũ fag tóg kaga ja nỹtĩtĩ, kỹ ũ fag tóg jagrê kórég ja nỹtĩtĩ gé. Hã ra Jesus tóg fag tỹ hághá' he kãn ja nĩ. Ũ fi vỹ tỹ Maria fi nĩ, Madalena he mū tag fi. Jesus vỹ fi jagrê kórég pan ja nĩ, ũ tỹ 7 (ke) vễ, ha mễ, fi jagrê kórég ag. ³ Kar ũ fi vỹ tỹ Joana fi nĩ gé, Cuza prũ fi vễ, pã'i mág tỹ Herodes tũ vэг nĩ ền prũ fi vễ. Kar ũ fi vỹ tỹ Suzana fi nĩ gé. Kar ũ fag vỹ ti mré mū mū gé, ti mỹ vẹjẹn han jé. Ājag tũ tỹ fag tóg ti mỹ vẹjẹn han tĩ, kar ti mré mū ti ag mré hã.

Nén fy to comparação

(Mt 13.1-9; Mc 4.1-9)

⁴ Kejẹn ũn e ag vỹ vẹnh măn mū sir, ẽmã tỹ hẹn ri ke tá kãmũ kỹ. Jesus to ag tóg vẹnh măn mū. Kỹ tóg ag kanhrănřan kỹ ag mỹ: “ũ tỹ Topẽ vĩ tó ti vỹ ge nỹnh mū, ha mễ,” he mū. ⁵ “Kejẹn ũ tóg trigo fy vãvãm tĩ mū. Ti tỹ vãvãm kỹ ti fy ũ tóg ẹpyri kri, ẽmĩn kri vár mū, kỹ ag tóg ti sãn mū, kỹ sẹsĩ ag vỹ ko mū gé sir, jẹsĩ tóg tỹ tũg' ke mū sir. ⁶ Ti fy ũ tóg pãró kri vár mū. Kỹ tóg mur mū vễ, hã ra tóg tóg mū sir. Ga tỹ sĩ nĩn kỹ tóg goj ve ja tũ nĩ, hã kỹ tóg tóg mū sir. ⁷ Ti fy ũ tóg sỏnh kãki vár mū. Kỹ sỏnh tóg ti mré mur mū, ti kri tóg rũm ke mū sir. Kỹ tóg ter mū sir, sỏnh kãki. ⁸ Ti fy ũ tóg ga há kri vár mū. Kỹ tóg mur há han mū, kanẽ há ke gé. Kanẽ tỹ 100 (ke) han tóg mū sir, ga há kri,” he tóg, Jesus ti. Kỹ tóg tag tó kar kỹ prẹr mū. “!..Ũ nĩgrẹg nỹtĩ ag tỹ ki ẽmẽn jé..!” he tóg, prẹr kỹ, Jesus ti.

Jesus tỹ nẻn fy to comparación kãmẻn

(Mt 13.10-23; Mc 4.10-20)

⁹ Kỹ ti mré mū tĩ ag tóg ti ki jẻmẻg mū. “Ne to ke nẻ, trigo fy kãmẻ tag ti?” he ag tóg mū, Jesus mỹ. ¹⁰ Kỹ tóg ag mỹ: “ājag hã mỹ sỏg Topẽ tỹ tỹ ẹg pã'i nĩ ền kãmẻn há han ke mū, ỉo tó ja tũ ền ti,” he mū. “Hã ra sỏg ũ ag mỹ comparación tãvĩ han mū. Ag mỹ sỏg tó há han ke tũ nĩ, ũ tỹ

ỏn kỹ mẻg mū ag mỹ, kỹ ag tóg ājag tỹ vэг mū ra ki kagtũg nỹtĩ, ājag tỹ mẻg mū ra ag tóg to jykrẻn tũ nỹtĩ, kỹ tóg ag tỹ to jykrẻn ke tũ tĩ,” he tóg.

¹¹ Kỹ tóg ag mỹ kãmẻn mū. “Nẻn fy kãmẻ vỹ ge nỹnh mū, ha mễ,” he tóg. “Topẽ vỹ vỹ trigo fy ri ke nẻ. ¹² Ũ ag tóg Topẽ vỹ jẻmẻg tĩ. Jẻmẻ kar kỹ Japo tóg ag mỹ tỹ tũg' he tĩ, Topẽ vỹ tỹ. Kỹ ag tóg sir ti ki ge tũ nĩtĩ, krenkren ke tũ ag nĩtĩ sir. Kỹ tóg ẹpyri ền, ẽmĩn kri vár mū ền ri ke nẻ, ền ti. ¹³ Kar ũ ag tóg pãró kri vár mū ền ri ke nỹtĩ gé. Mẻg ag tóg tĩ vễ, Topẽ vỹ ti. Kỹ ag tóg: “hej,” he mū. Ag mỹ tóg sẻr tĩ sir. Hã ra ag tóg tỹ nẻn krẻ jãre tũ ri ke nỹtĩ mỹr, ha mễ. Mũ sĩ han ag tóg mū, Topẽ mrẻ. Nẻn ũ jagy kutẻ kỹ ag tóg Topẽ tovãnh mū sir, ag tỹ Topẽ vỹ mranh sỏr kỹ. ¹⁴ Kar ti tỹ sỏnh kãki vár mū vỹ ge nỹtĩtĩ gé. Topẽ vỹ mẻg ag tóg tĩ gé. Hã ra ag tóg mū mū sir, ājag rãnhrãj nỏn. Ỏn kỹ ag tóg rico nỹtĩ sỏr mū, ājag rãnhrãj to. Hã to ag tóg kri kufy nỹtĩ. Nẻn kar to ẻn ag tóg tĩ, kỹ tag hã ne ag mỹ há tĩ'. Hã kỹ ag tóg Topẽ vỹ to jykrẻn măn tũ nĩtĩ sir. Hã kỹ ag tóg kanẻ há han tũ nĩ gé sir. ¹⁵ Kar ga há kri vár mū vỹ ge nẻ gé. Jẻmẻg ag tóg tĩ gé, Topẽ vỹ ti. Kỹ ag tóg ājag fe tỹ ti ki rãg mū sir, ag tỹ ti vỹ ki krỏm jẻ. Kỹ ag tóg kanẻ há han mū sir. Komẻr hã ag tóg kanẻ há han', han', he mū, ag tỹ nẻn ũ jagy vэг mū ra,” he tóg. Ti tỹ ag mỹ ẹg tỹ Topẽ tovãnh ke tũ kãmẻn hã vễ, Jesus ti.

Lampião to comparación

(Mc 4.21-25)

¹⁶ Kỹ tóg ag mỹ: ẹg tỹ lampião grug kỹ ẹg pi(jẻ) kẻj krẻm fẻg tĩ', he mū. “Ẽg pi(jẻ) cama krẻm fẻg tĩ gé', nẻj gru ti. Ti fẻg jãfã kri ẹg tóg ti fẻg tĩ. Kỹ vẻnh kar tóg vэг mū sir, ag tỹ ẹg ỉn kãra kãgen kỹ. ¹⁷ Ge ti nẻ, sỹ ājag mỹ nẻn tó mū kar ti. Ver ājag tóg to jykrẻn tũ nĩtĩ. Ājag tỹ vãhã to jykrẻn kãn ke vễ. Ver ājag tóg ki kagtũg nỹtĩ. Ājag tỹ vãhã ki kanhrăn kãn

ke vë,” he tóg. ¹⁸ “Hã kÿ jëmê há han nĩ. Û tÿ to jykrén há han kÿ tóg ù to jykrén măn', ù to jykrén măn', henh ke mû. Û tÿ inh vĩ to jykrén há han tũ nĩn kÿ tóg ti mÿ tũg' he kãn mû, ti tÿ nén ù to jykrén mû kar ên mré hã,” he tóg. Ti tÿ ag mÿ êg tÿ ti vĩ to jykrén há han ke kãmén hã vë, Jesus ti.

Jesus mré ke pë fag

(Mt 12.46-50; Mc 3.31-35)

¹⁹ Kejën Jesus mÿnh fi vÿ ti venh kãti mû, ti jãvy ag mré. Hã ra fag tóg ti ki junjun tũ nĩ. Ti pénin tóg fór tâvĩ tĩ, hã kÿ ag tóg ti ki junjun tũ nĩ, ti mÿnh fi mré hã. ²⁰ Kÿ ù tóg ti mÿ: “ã mÿnh fi vÿ re tá jê, ã jãvy ag mré,” he mû. “Fag tÿ ã venh kãmũ vë,” he tóg, Jesus mÿ. ²¹ Hã ra Jesus tóg ti mÿ: “mê',” he mû. “Hã ra ù tÿ Topê vĩ jëmêg mû fag vÿ inh mÿnh pë ri ke nÿtĩ, inh jãvy pë ri ke ke gé, ù tÿ Topê vĩ ki króm mû ag,” he tóg, Jesus ti.

Jesus tÿ kóho tÿ tũg' he

(Mt 8.23-27; Mc 4.35-41)

²² Kejën tóg canoa kãra rã mû, ti mré mû ti ag mré. Kÿ tóg ag mÿ: “mũ nÿ, goj nig kafã ù ra,” he mû. Kÿ ag tóg mû mû, canoa kãmĩ. ²³ Ag mûn ki Jesus tóg nũr mû sir. Kÿ vãhã kóho jũ tóg kraug he mû sir. Króg ke tóg mû sir, kóho ti. Kÿ goj tóg canoa kãki krém ke mû. Ti fãn sór tóg mû sir. Kÿ tóg ag mÿ ag kãgter ha mẽ tĩ. ²⁴ Kÿ ag tóg ti rĩn mû mû. Ti mÿ ag tóg: “Senhor', Senhor',” he mû. “Êg mÿ êg kãgter ha mẽ tóg tĩ,” he ag tóg ti mÿ. Kÿ tóg rĩr mû sir. Kÿ tóg kóho mÿ vĩ mû, goj mÿ ke gé, goj vóg nén ên mÿ. Kÿ tóg krÿg' he mû sir, kóho ti. Katy' he tóg mû sir. ²⁵ Kÿ tóg ag mÿ ke mû. “Ajag tÿ ne jé inh ki ge há han tũ nĩ nê?” he tóg. Kÿ ag tóg kanê jur nÿtĩ nĩ. Ag mÿ tóg e tĩ, kÿ ag tóg jagnê mÿ: “ti jykre tóg êg mÿ e tĩ,” he mû. “Kóho mÿ tóg vĩ mû, Kÿ tóg ki hã ke mû, kóho ti, goj ti ke gé,” he ag tóg mû, jagnê mÿ.

Jesus tÿ ùn jagrê kórég tÿ há' he

(Mt 8.28-34; Mc 5.1-20)

²⁶ Kóho tÿ tũg' hen kÿ ag tóg Gerasa ag jamã tá junjun mû sir. Goj nig kafã ù tá tóg nĩ, ga tÿ Galiléia to hã. ²⁷ Kÿ tóg canoa kãki kãkutê mû, Jesus ti. Kÿ ù tóg ti kato tẽ mû, cidade tá ke ù, hã ra tóg jagrê kórég tÿ hên ri ke nĩ. Si há tóg tĩ ha, ti jagrê e nĩ ti. Kÿ tóg kur tũ nĩ. Kato r tóg nĩ. Ìn tũ ti nĩ gé. Vênh kej tá tóg jêgtĩ, pãró tÿ vênh kej tá. ²⁸ Ên tóg Jesus kato tẽ mû. Kÿ tóg ti krêm mũg ke mû. Prêr kÿ tóg: “!..ã isÿ hê ri kenh mû, Jesus'..!” he mû. “!..Kynhmÿ Topê kósín'..!” he tóg. “!..Ã mÿ sóg to vính mû, ã tÿ inh vóg kónãn tũ nĩ jé..!” he tóg, prêr kÿ, ùn jagrê kórég ên ti. ²⁹ Hã ra Jesus tóg Nén-Kórég mÿ: “ti ki pa jêg,” he ja nĩ, hã kÿ tóg prêr mû. Ti ki vĩrĩn ke', ti ki vĩrĩn ke' tÿ hên ri ke han ja ag tóg nĩgtĩ, Nén-Kórég ag. Kÿ ti mré ke ag tóg ti se ja nĩgtĩ gé, ti mrĩnh kÿ, ferro tÿ, ti nĩgé, ti pên ke gé. Hã ra tóg ã se ja kykym kãn ja nĩgtĩ. Kÿ Nén-Kórég ag tóg êmã tũg ja ra ti tũn ja nĩgtĩ. Hã kÿ tóg vênh kej mĩ tĩgtĩ, ùn jagrê kórég ên ti.

³⁰ Kÿ Jesus tóg ti mÿ: “ã jiji hê ri ke tĩ?” he mû. Kÿ tóg: “Mĩl,” he mû. Nén-Kórég tÿ hên ri ke ag tÿ tóg jagrê nĩ, hã kÿ tóg: “Mĩl,” he mû.

³¹ Kÿ ag tóg Jesus mÿ to vĩ mû, Nén-Kórég ag, ti tÿ nũgme ra ag jêgnêg tũ nĩ jé, inferno ra. ³² Hã ra porco tÿ hên ri ke tóg tá jêg nÿtĩ nĩ, pãnónh tá. Kÿ Nén-Kórég ag tóg Jesus mÿ to vĩ e han, ti tÿ ag mÿ: “ha porco ki ge jêg, ge kÿ,” he jé. Kÿ tóg ag mÿ ke mû. ³³ Kÿ ag tóg ên ki kãpa mû sir, Nén-Kórég ag. Porco ag ki ag tóg ge mû sir. Kÿ porco ag tóg mer ki re mû, rãn ki, goj nig ra. Goj ki ag tóg vár mû sir. Nãgnãr kÿ ag tóg tũ' he kãn mû sir.

³⁴ Kÿ ù tÿ porco ki rĩr tĩ ag tóg vég mû. Kÿ ag tóg pêtê mû, cidade ra. Tá ag tóg kãmén mû, êmã kãsir mĩ hã ke gé. ³⁵ Kÿ

tá ke ag tóg ra mũ kãn mũ, ag vĩ mẽg mũ ag. Ag tỹ nẽn ẽn ve sór vễ. Ra mũ kỹ ag tóg Jesus tá junjun mũ. Kỹ ag tóg ti vếg mũ sir, ừn jagrê kórég ja ti. Nĩ tóg mũ ha, Jesus rã hã. Kur tóg nĩ ha, kri há tóg nĩ ha. Kỹ ag fe tóg jũrũn ke mũ sir. ³⁶ Ừ tỹ Jesus tỹ ti tỹ há' he mũ vếg mũ ẽn ag tóg kãmén kãn mũ sir, ừ tỹ ừi ti venh kãmũ mũ ẽn ag mỹ. Ừn jagrê kórég tó ag tóg mũ, ag mỹ, Jesus tỹ ti han ja ti, porco kãgter ja ti ke gé. ³⁷ Kỹ tá ke ag tóg ti mỹ to vĩ mũ, Jesus mỹ, ti tỹ tá kãkutế jé. Gerasa tá ke kar ag tóg kanẽ jur nỹtĩ, hã kỹ ag tóg ti mỹ: “ã tĩg kỹ tóg ẽg mỹ há tĩnh mũ,” he mũ. Kỹ tóg canoa kãra rã kỹ tĩg sór mũ, ti mré mũ tĩ ag mré. ³⁸ Kỹ ừn jagrê kórég ja tóg ti mỹ to vĩ e han mũ, “nhỹ ã mré tĩg mũ,” hen kỹ, Jesus mỹ. Hã ra Jesus tóg ti pẽre tĩg jãvãnh nĩ. ³⁹ “Ã jamã ra vỹn ké,” he tóg ti mỹ. “Tá ag mỹ kãmén nĩ, Topẽ tỹ ã tỹ há' he ja tag ti,” he tóg, Jesus ti. Kỹ tóg tĩ mũ sir, ừn jagrê kórég ja ti. Cidade kar mĩ tóg tĩ mũ. Ag mỹ tóg kãmén mũ sir, Jesus tỹ ti tỹ há' he ja ẽn ti.

Jesus tỹ Jairo kósin fi rĩn mãn

(Mt 9.18-26; Mc 5.21-43)

⁴⁰ Kỹ Jesus tóg vỹn ke mũ, nig kafã ừ ra. Kỹ tóg vễnh e ẽn mỹ sér tĩ, ag tỹ ti ven kỹ. Ti jãvãnh ja ag tóg nĩ, hã kỹ tóg ag mỹ sér tĩ, ag tỹ ti ven kỹ. ⁴¹ Kỹ vãhã ừ tóg ti ki jun mũ, Jesus ki. Israel ag vễnh kanhrãn jafã to pã'i vễ, ti jyjyn hã vỹ: Jairo, he mũ. Ẽn tóg Jesus krẽm mũg ke mũ, ã jakrĩ tỹ tóg jẽ mũ, kỹ tóg ti mỹ vĩ mũ, ti tỹ ti ỉn ra tĩg jé, Jesus ti. ⁴² Ti kósin pir fi vỹ kaga tãvĩ nỹ, kỹ fi kaga tãvĩ ẽn vỹ fi tén sór mũ. Kri prỹg tỹ 12 (ke) fi nĩ, Jairo kósin pir ẽn fi. Kỹ tóg ti mré tĩ mũ, Jesus ti.

Ti tĩg kỹ ừn e ag tóg ti nón mũ mũ. ⁴³ Kỹ ag kã ừ fi tóg ag pêtẽm mũ. Kyvẻnh krỹg tũ han kỹ fi tóg nĩ, prỹg tỹ 12 (ke) ki. Hã ra ag tóg fi kaga tỹ hẽ ri ke ja tũ nĩ, ag tỹ fi kygtãg mũ ra, médico ag.

⁴⁴ Ẽn fi tóg ti nón ti kur mrãj vóg mũ. Kỹ vễsỹmẻr fi kyvẻnh tóg tũ' he mũ. ⁴⁵ Kỹ Jesus tóg: “ừ nỹ inh kur vóg?” he mũ. Hã ra vễnh kar tóg: “inh hã tũ vễ, inh hã tũ vễ,” he mũ. Kỹ Pedro tóg ti mỹ vĩ mũ, Jesus mrẻ mũ tĩ ag kar ke gé. Ti mỹ ag tóg: “ã kur mẽ kãn ẽg tóg, hã ra ã tóg: “ừ nỹ inh kur vóg?” he mũ,” he tóg, Pedro ti, Jesus mỹ. ⁴⁶ Hã ra Jesus tóg: “vó,” he mũ. “Ừ tóg inh kur vóg,” he tóg. “Inh kuprĩg tóg inh ki kãtẻre, hã kỹ sóg ki kanhrãn mũ,” he tóg. ⁴⁷ Kỹ ừn tỹtã ẽn fi tóg to jykrẻn mũ sir. “Ti hỹn tóg inh vẻ,” he fi tóg. Hã kỹ fi tóg jũrũn ke kỹ kãtĩ mũ. Jesus krẽm fi tóg mũg ke mũ. Kỹ fi tóg ti mỹ tó kãn mũ, vễnh kar rĩnve. Ti mỹ fi tóg ã kaga ja ẽn kãmén kãn mũ, fi tỹ ti kur vóg ja ẽn ti ke gé, fi tỹ há' he ja ti ke gé. “Isỹ ã kur vóg kỹ sóg vễsỹmẻr há' hé,” he fi tóg, Jesus mỹ. ⁴⁸ Kỹ tóg fi mỹ vĩ há han mũ, Jesus ti. “Inh kósin’,” he tóg. “Ã tỹ inh ki rã kỹ ã tóg há' hé. Ha tĩg, jatun mỹ. Há ã tóg nĩ ha,” he tóg fi mỹ, fi han kar kỹ, Jesus ti.

⁴⁹ Ti tỹ ver fi mrẻ vẻmẻn jẻ ra ừ tóg jun mũ, pã'i tỹ Jairo ẽn ỉn tá. “Ã kósin fi hur ter,” he tóg, pã'i mỹ. “Tũg ja fi tóg nĩ ha,” he tóg, Jairon mỹ. “Hã kỹ ti mỹ: kunĩg, he mãn tũg nĩ, ti kutãn mãn tũg nĩ,” he tóg.

⁵⁰ Hã ra Jesus tóg mẽg mũ, kỹ tóg ti mỹ: “mũmẻg tũg nĩ,” he mũ. “Inh vĩ hã kri fimnĩ, kỹ ã kósin fi tóg há' hẻnh mũ,” he tóg. ⁵¹ Kỹ ag tóg mũ kỹ ti ỉn tá junjun mũ sir, Jairo ỉn tá. Kỹ Jesus tóg ag tỹ ỉn kãra ge kamẻg mũ. “Pedro vỹ ỉn ra rãnh mũ, inh mrẻ, João ke gé, João kãke tỹ Tiago ke gé, gĩr fi panh ke gé, fi mỹnh fi ke gé,” he tóg, Jesus ti. ⁵² Hã ra ừn e fag vỹ tá nỹtĩ nĩ gé, kygfỹ fag nỹtĩ nĩ, vễsỹrẻnh kỹ, Kỹ Jesus tóg fag mỹ: “kygfỹ tũg ra,” he mũ. “Fi pi(jẻ) ter mũ'! Fi nữr vễ,” he tóg. ⁵³ Hã ra fag tóg ti nyg mũ. Fi ter ki kanhrỏ fag tóg nỹtĩ, hã kỹ fag tóg ti nyg mũ. Hã ra Jesus tóg fag mỹ: “ha mũjẻg,” he mũ.

⁵⁴ Fag mün kar kŷ Jesus tóg fi nĩgê kăg-mĩg mũ, kŷ tóg prēr mũ sir. “!..Nĩ ra, já..!” he tóg, jamă hár(a). ⁵⁵ Kŷ fi kuprĩg tóg fi to vŷn ke mũ. Nĩ fi tóg mũ sir, mŷr, ha mẽ, ũn ter mũ ên fi. Kŷ Jesus tóg fag mŷ tó mũ, fag tŷ fi mŷ vējēn ven jé. ⁵⁶ Kŷ tóg fi han mũ fag mŷ e tăvĩ tĩ sir. Hã ra Jesus tóg fag mŷ tó mũ, fag tŷ ũ mŷ tó tũg jé, fi rĩr măn ja tag ti. Hã ra tóg fi ter mũ ra fi rĩn, Jesus ti.

Jesus tŷ ã mré mũ tĩ ag jěgně

(Mt 10.5-15; Mc 6.7-13)

9 Kŷ Jesus tóg ũ tŷ 12 (ke) ag jé prēr mũ, ti tŷ ũn vin mũ ên ag, ag vėnh măn jé. Ag vėnh măn kŷ tóg ag tar han mũ sir, ag tŷ vėnh jagrē kórég pan jé, ag tŷ ũn kagyga ag tŷ há' he jé gé. ² Kŷ tóg ag jěgněg mũ sir, ag tŷ Topē tŷ tŷ ěg pã'i nĩ ên kămén jé, vėnh kar mŷ, ag tŷ ũn kagyga ag tŷ há' he kăn jé gé. ³ Hã kŷ tóg ag mŷ ke mũ sir. “Ăjag mün kŷ nén ũ ma mũ tũg nĩ, vătó va mũ tũg nĩ, sacon ke gé, bolsa ên, pảo ke gé, jănkamy ke gé. Kur régre rĩnh tũg nĩ gé,” he tóg. ⁴ “Ăjag tŷ ĩn ra ge mũ hã ki nũgnũr' hemnĩ, hã ki ajag tŷ kură ki kăpanh ke tá krŷg nĩ,” he tóg. ⁵ “Ag tŷ ajag mŷ: “kăge jěg ra,” he jăvănĥ nĩn kŷ tá kăpamnĩ. Tá kăpa kŷ ajag pēn hã kykũnhkũnh nĩ, ag tŷ to ki kanhró nŷtĩ jé sir, Topē tŷ ag tovănĥ ken ki,” he tóg, Jesus ti.

⁶ Tĩ tŷ ag jěgněn kŷ ag tóg mũ sir, ũ tŷ 12 (ke) ag. Ěmă kar mĩ ag tóg mũ sir. Topē kămén ag tóg mũ mũ sir. Ũn kagyga ag tŷ há' he kăn ag tóg mũ gé sir, fag ke gé.

Jesus kăme tŷ pã'i tŷ Herodes mŷ e

(Mt 14.1-12; Mc 6.14-29)

⁷ Kŷ pã'i mág tŷ governador tŷ Herodes vŷ mẽg mũ sir, Jesus tŷ nén han mũ ti. Kŷ tóg ti mŷ e tĩ. Kŷ ti tŷ ne to jykrén ke tóg tũ tĩ. Hã ra ũ ag tóg Jesus to: “João Batista vė,” he tĩ. “João hŷn tóg ã ter kŷ rĩr măn,” he ag tóg tĩ, Jesus to. ⁸ Jo ũ ag

tóg ti to: “Elias vė,” he tĩ gé. “Tĩ hŷn vėnh ven măn, văsŷ Topē vĩ tó tĩ ên, Elias ti,” he ag tóg tĩ gé, Jesus to. Kŷ ũ ag tóg ti to: “văsŷ Topē vĩ tó tĩ ũ hŷn rĩr măn,” he tĩ gé. ⁹ Hã jēmē tóg, Herodes ti, kŷ tóg to jykrén kŷ: “João mŷ vó?” he mũ, Jesus to. “Hã ra sóg João krĩ kym, kŷ tóg tũ' he mũ. Kŷ ũ nē, hŷn'?” he tóg. “Nén han vãnĥ tŷ hēn ri ke hŷn han tóg huri. Ũ nē, hŷn'?” he tóg. Herodes ti. Kŷ tóg kejēn ti ve sór mũ, ti tŷ ti mŷ e tĩn kŷ, hã ra Jesus vŷ ti vėnh tĩ tũ nĩ.

Jesus tŷ ũ tŷ 5 mil (ke) ag jěn

(Mt 14.13-21; Mc 6.30-44; Jo 6.1-14)

¹⁰ Kejēn Jesus tŷ ũn vin mũ ag vŷ Jesus to vŷnvŷn ke mũ, ti tŷ ag jěgně ja ên tá. Tĩ mŷ ag tóg kămén mũ sir, ag tŷ nén han ja ên kar ti. Kŷ tóg ag mré vėnh péju kŷ tĩ mũ, ěmă tŷ Betsaida ra, vyr mŷ ag mré vēmén jé. ¹¹ Hã ra ũn e ên ag tóg mẽg mũ, Jesus tĩg ti, kŷ ag tóg ti nón mũ mũ. Ag tŷ ti pétēm kŷ tóg ag mŷ vĩ há han mũ, Jesus ti. Ag mŷ tóg kămén mũ, Topē tŷ tŷ ěg pã'i nĩ sór ti. Ag kămĩ ũn kagyga tŷ há' he tóg mũ gé, fag mré hã.

¹² Tĩ tŷ ag mŷ tó jē ki tóg rākē nŷ sir, kŷ ũ tŷ 12 (ke) ag tóg Jesus to kămũ mũ. Tĩ mŷ ag tóg: “ã tŷ ag jěgněnh há tóg tĩ,” he mũ, “ag tŷ ěmă kar mĩ mũ jé, pảo comprar he jé, tá nũgnũr jé ke gé. Tag ki tóg ěmă tũ nĩ,” he ag tóg, Jesus mŷ. ¹³ Hã ra Jesus tóg ag mŷ: “vó,” he mũ. “Ha inhĥa ag jěn,” he tóg. Kŷ ag tóg ti mŷ: “hã ra vējēn tóg ěg mŷ tũ tĩ,” he mũ. “Pảo tŷ 5 (ke) hã vŷ ki nŷtĩ, piră régre mré ke gé. Ěg mŷ ag jo comprar henh mũ vŷ, vējēn ti?” he ag tóg, Jesus mŷ. ¹⁴ Ũ tŷ mil tŷ 5 (ke) ag vė, ag tăvĩ, fag mré tó tũ ra. Hã ra fag tóg tá e nŷtĩ gé, gĩr mré ke gé.

Ag tŷ ti mŷ ke kŷ Jesus tóg ã mré mũ tĩ ag mŷ: “ag mŷ tugtó, ag nĩgnĩ jé,” he mũ, “ag tŷ vėnh nĩkrén jé, ũ tŷ 50 (ke) pâte ũ tŷ 50 (ke) ũ pâte nĩgnĩ jé,” he tóg, Jesus ti, ã mré mũ tĩ ag mŷ. ¹⁵ Kŷ ag tóg

ke mũ sir. Kĩ vênh kar tóg nĩgnĩ mũ sir.
¹⁶ Kĩ tóg pảo tỹ 5 (ke) in gég mũ, pirã régre ên mré. Kĩ tóg kanhkã ki êvãnh mũ, kĩ tóg Topê mré vĩ mũ sir. Kĩ tóg pảo vênh kãpópãm mũ sir. Kĩ tóg ã mré mũ tĩ ag mỹ vin mũ, ag tỹ ùn e ên mỹ vênh kãpópãm jé, pirã ên mré hã. ¹⁷ Kĩ vênh kar tóg ko kãn kĩ funfór mũ sir. Kĩ ag tóg ti ke ên gég mũ. Kēj tỹ 12 (ke) fãn tóg, vėjên mru ên ti. Hã kĩ Jesus tóg pảo tỹ 5 (ke) tỹ ùn e ag fónfãn ja nigti.

Pedro tỹ Jesus tó

(Mt 16.13-19; Mc 8.27-29)

¹⁸ Kējên Jesus tóg Topê mré vĩ mũ, ã pin kĩ. Hã ra ti mré mũ tĩ ag tóg ti mré nỹtĩ nĩ. Kĩ tóg ag mỹ ke mũ. “Ag iso hẽ ri ke tĩ?” he tóg ag mỹ, Jesus ti. ¹⁹ Kĩ ag tóg ti mỹ: “ũ ag vỹ: João Batista vê, he tĩ, jãvo ù ag vỹ: Elias vê, he tĩ gé, jãvo ù ag vỹ: vãsỹ Topê vĩ tó tĩ ù vỹ rĩr mãn, he tĩ gé, ã to,” he ag tóg, Jesus mỹ. ²⁰ Kĩ tóg ag mỹ: “ag jãvo ãjag hẽ ri ke tĩ, iso?” he mũ. Kĩ Pedro vỹ tĩ mỹ kãmén mũ. “Tỹ ã Cristo nĩ, Topê tỹ êg mỹ ùn jẽnêg mũ ên vỹ tỹ ã nĩ,” he tóg, Pedro ti, Jesus mỹ. ²¹ Kĩ tóg ti mỹ vĩ tar han mũ, Jesus ti, ag tỹ ù mỹ tó tũ nĩ jé ver, ti tỹ tỹ Cristo nĩ ên.

Jesus tỹ ã jagtar ke tó vén

(Mt 16.20-28; Mc 8.30-9.1)

²² Kĩ tóg ag mỹ kãmén mũ. “Tỹ sóg êprã ke fi kósin ên nĩ,” he tóg. “Ijagtar jagy han ke vê,” he tóg. “Kófa ag tỹ iso: kórég ti nĩ, henh ke vê, Topê tũ ki rĩr tĩ to pã'i ag ke gé, Topê vĩ to professor ag ke gé. Ag tỹ isén ke vê. Kurã tagtũ tũg mũ ra sóg rĩr mãn mũ hã ra,” he tóg, Jesus ti.

²³ Kĩ Jesus tóg vênh kar mỹ tó mũ. “Ajag tỹ inh mré kãmũ kĩ tóg há tĩnh mũ,” he tóg. “Kĩ ãjag jykre tovãnh nĩ, ãjag tỹ isũ tãvĩ han jé. Ha vé, ag tỹ inh cruz tỹ inh kri fi kĩ sóg tũg ke mũ, ag tỹ to isa kĩ isén jé, ha vemnĩ. Vênh nenh

ke tũ sóg nĩ. Isỹ tag han ri ke han nĩ, kurã kar ki, ãjag tỹ inh mré mũ sór nỹtĩn kĩ,” he tóg. ²⁴ “Ajag tỹ ãjag jykre hã han sór kĩ ãjag tỹ nũgme ki vár ke vê. Jãvo ãjag tỹ isugrĩn ãjag jykre tovãnh kĩ ãjag krenkren ke vê, ãjag kãgter ke mũ (hã) ra. ²⁵ Ajag tỹ ga kri mũn kĩ ãjag tóg nén kar ganhar he sór mũ. Kĩ ãjag kuprĩg vỹ vãfor ke mũ. Kĩ tóg kórég nỹ sir, ãjag rico tãvĩ nỹtĩ ra. Ganho hã vênh ke tũ ãjag tóg ke mũ, gen kĩ. ²⁶ Iso mỹ'ag tũg nĩ, inh vĩ to. Ajag tỹ ùri iso mỹ'ag kĩ sóg ãjag to mỹ'ag ke mũ gé, inh kãtig mãn ken kĩ. Tỹ sóg êprã ke fi kósin ên nĩ. Sĩnvĩ ti nĩnh mũ, inh kãtig mãn kĩ, inh jóg tỹ inh jẽnên kĩ, ti tỹ isỹ ùn mág han kĩ. Kĩ ti tỹ jěgně jafã ag vỹ inh mré kãmũnh mũ gé, Topê tũ ag. Ên kã sóg ãjag to mỹ'ag ke mũ, ãjag tỹ ùri iso mỹ'ag kĩ,” he tóg. ²⁷ “Ki hã sóg tó mũ, ha mẽ. Ajag kãmĩ ù ag vỹ Topê tỹ tỹ êg pã'i nĩ vênh ke mũ, ag ter ke to hã, tag ki êg mré nỹtĩ ù ag,” he tóg, Jesus ti.

Jesus tỹ vênh ven ù han

(Mt 17.1-13; Mc 9.2-8)

²⁸ Jesus tỹ tag tó kar kĩ kurã tỹ 8 (ke) vỹ tũg mũ. Kĩ tóg kējên ag mỹ: “mũ nỹ, vỹrmỹ,” he mũ. Pedro mỹ tóg ke mũ, João mỹ ke gé, Tiago mỹ ke gé. Ag hã mré tóg tĩ mũ, pãnónh ra, Topê mré vēmén jé. ²⁹ Tá jun kĩ tóg Topê mré vĩ mũ sir. Kĩ tóg vãhã vênh ven ù han mũ, vênh ven kupri han tóg mũ. Ti kur tóg kóprėj nĩ, kókov tóg nĩ, ti kur ên ti. ³⁰ Kĩ ùn régre ag tóg vãhã tá vênh ven mũ sir. Kĩ ag tóg Jesus mré vēmén mũ sir. Moisés vê, Elias mré hã, ùn régre ên ag. ³¹ Ag ve vỹ ti ve ri ke nĩ gé, Moisés mré Elias ti. Jesus mré ag tóg vēmén mũ, ti ter ken kãmén ag tóg mũ sir, ti tỹ Jerusalém tá ter ke mũ ên ti.

³² Pedro ag mỹ tóg nũr há tãvĩ tĩ, ge ra ag tóg ag vэг mũ sir, ag mỹ nũgnũr há (hã) ra. Hã kĩ ag tóg Jesus tỹ ag mỹ vênh ven ù han mũ ên vэг mũ sir, ti kókov

ên ti, ti mré vēmén mû ag ke gé. ³³ Kĩ ù tỹ Jesus mré vēmén kĩ nỹtĩ ag tóg mû sór mû sir. Kĩ Pedro tóg Jesus mỹ: “Senhor,” he mû. “Tag ki tóg há nĩ,” he tóg. “Êg tỹ tag ki pājó tǎgtũ han kỹn hỹn há nĩnh mû, ã mỹ, Moisés mỹ, Elias mỹ ke gé,” he tóg, Pedro ti. Hã ra tóg krĩ tũ nĩ, hã kĩ tóg pājó tó mû.

³⁴ Pedro tỹ ver ti mỹ vēmén kĩ kanhkã góg vỹ ag kri rúm ke mû sir. Kĩ ag tóg kamẽmẽg mû, kanhkã góg ên ti. ³⁵ Kĩ vênh vi tóg mẽ há' he mû, kanhkã góg ên kátá, kĩ tóg: “inh kósín hã vễ,” he mû. “Inh fe pẽ hã vễ,” he tóg. “Ti vi jẽmẽ ra,” he tóg, vênh vi ti, Topẽ ti.

³⁶ Ag tỹ tag mẽ kar kĩ Jesus tóg ã pir mỹ tá jẽ nĩ sir. Ti mré vēmén ja ên ag ve mǎn tũ ag tóg nĩ sir, Pedro ag. Kĩ ag tóg mû mû. Hã ra ag tóg ù mỹ tó tũ nĩ ver, ag tỹ nén ve ja ti. Tỹ vēmén tũ ag tóg nĩ ver, ag tỹ kanhkã tá vênh jykre ve ja ên ti.

Jesus tỹ kyrũ jagrẽ kórég kutẽm

(Mt 17.14-21; Mc 9.14-29)

³⁷ Tỹ vaj kĩ ag tóg pǎnónh ên tá kǎre mû, Jesus mré. Kĩ ag tóg ù tỹ hên ri ke ag vigvẽg mû sir. Jesus kato ag tóg kāmũ mû. ³⁸ Kĩ vǎhã ù tóg ag kāmĩ prẽr mû, ha mẽ. “!..Senhor..!” he tóg. “!..Inh kósín ve ra..! Inh kósín pir vễ. ³⁹ Jagrẽ kórég ti nĩ, ha mẽ. Kĩ tóg kejẽn ti kǎ vỹryn ke tĩ, kĩ tóg prẽr tĩ, kĩ tóg ti ter tĩ han tĩ gé, kĩ tóg jǎrǎn mû. Jǎrǎn kĩ tóg jũrũn' jũrũn' ke tĩ gé, kĩ tóg kejẽn ti tovǎnh mû sir, komẽr hã, ti rỹj kar kĩ. ⁴⁰ ã mré mû ti ag mỹ sóg to vỹ mû vễ, ag tỹ ti jagrẽ kórég tag kutẽm jé, hã ra ag tóg ti tỹ hẽ ri ke tũ nĩ,” he tóg, ti panh ti, Jesus mỹ.

⁴¹ Kĩ Jesus tóg ti mỹ: “ajag ne tóg inh ki ge há han tũ nĩgtĩ,” he mû. “Jykre pǎno ajag nỹtĩ,” he tóg. “Kysǎ tỹ hên ri ke ki inh hỹn ajag mré tĩ nĩ? Kysǎ tỹ hên ri ke ki inh hỹn ajag to fe tĩg nĩ?” he tóg.

“Inh mỹ ti péré kǎtĩg nĩ,” he tóg, Jesus ti, ti panh mỹ. ⁴² Kĩ ag tóg ti péré kāmũ mû. Ti jun kĩ ti jagrẽ tóg ti kǎ vỹryn ke mû. Ti tỹ jũrũn', jũrũn' ke han tóg mû sir. Kĩ Jesus tóg ti jagrẽ mỹ vỹ jũ han mû, ti tỹ ti ki kǎkutẽ jé. Hã ki tóg kyrũ ên tỹ há' he mû sir. Kĩ tóg ti panh mỹ: “té,” he mû sir.

⁴³ Kĩ tóg vênh kar mỹ e tǎvĩ tĩ. “Topẽ ne tóg tỹ ùn mág tǎvĩ nĩ', ti jykre tóg há tǎvĩ nĩ,” he ag tóg mû sir, ag tỹ Jesus tỹ nén han mû to jykrén kĩ.

Jesus tỹ ã jagtar ke tó mǎn

(Mt 17.22-23; Mc 9.30-32)

Kĩ Jesus tóg ã mré mû tĩ ag mỹ: ⁴⁴ “ha mẽ há han,” he mû. “Êprǎ ke fi kósín ên vỹ jagtar nĩnh ke mû. Inh hã vễ,” he tóg. “Êprǎ ke ag vỹ ajag tỹ inh ki nén han sór mû ên han ke mû,” he tóg, Jesus ti. ⁴⁵ Hã ra tóg ag tỹ ti tỹ ã ter ke kǎmén tag to jykrén tũ nĩgtĩ. Ag tỹ to jykrén mû ra ag tóg ki kagtĩg nỹtĩ. Kĩ ag tóg ajag tỹ ti ki jẽmẽ sór mû ra ti kamẽg mû gé, hã kĩ ag tóg ti mỹ: “ã tỹ ne tó nẽ?” he tũ nĩ, Jesus mỹ.

Ủn mág

(Mt 18.1-5; Mc 9.33-37)

⁴⁶ Kejẽn Jesus mré mû ag vỹ jagnẽ mỹ vỹ jũ han mû. “Êg kǎ ù tỹ hẽ nỹ jagnẽ kǎfór nĩ?” he ag tóg jagnẽ mỹ. Tag to ag tóg jagnẽ mỹ vỹ jũ han mû. ⁴⁷ Hã ra Jesus tóg vếg mû, ag tỹ nén to jykrén mû ti. Kĩ tóg gĩr jé prẽr mû, ti tỹ ti mré jẽ jé. ⁴⁸ Kĩ tóg ag mỹ tag tó mû, ha mẽ. “Gĩr tỹ ge jẽ'yn nĩ, ti to há nỹtĩmĩ, isugnĩn,” he tóg. “Ajag tỹ isugrĩn ti to há nỹtĩn kĩ ajag tóg iso há nỹtĩ gé sir. Ajag tỹ iso há nỹtĩn kĩ ajag tóg ù tỹ inh jẽnẽg mû to há nỹtĩ gé sir. Kĩ ajag tỹ ẽgno kar vỹ tỹ ajag mág kǎfór kar nĩnh mû, ha mẽ, ajag tỹ tỹ ùn mág nỹtĩ sór kĩ. Tag to jykrén nĩ,” he tóg, Jesus ti, ag mỹ.

Ũ tỹ ęg kato tẽ tũ ag

(Mc 9.38-40)

⁴⁹ Kĩ João tóg Jesus mĩ: “Senhor’,” he mũ. “Ũ ve ęg tóg vênh jagrẽ pan tĩ, ã jiji tó kĩ, ęg tỹ ùn vég mũ ẽn ti,” he tóg, Jesus mĩ. “Hã ra tóg ęg mré tĩ tũ nĩgtĩ, hã kĩ ęg tóg ti mĩ: “vênh jagrẽ kórég pan sór tũg nĩ,” hé,” he tóg, João ti, Jesus mĩ. ⁵⁰ Kĩ Jesus tóg ti mĩ: “ũ mĩ: “vênh jagrẽ kórég pan tũg nĩ,” he tũg nĩ,” he mũ. “Ũ tỹ ęg kato tẽ tũ nĩn kĩ ęg mré ke vẽ sir,” he tóg, Jesus ti, João mĩ.

Samaria tá ke ag tỹ Jesus mĩ:**“kãrã ra,” he sór tũ**

⁵¹ Kejẽ Jesus ter ke kurã tóg kakó nĩ sir. Kĩ tóg to jykrẽn kĩ Jerusalém ra tĩg sór mũ, ag tỹ tá ti tén jé. Kĩ tóg tĩg kĩ ù ag jẽgnẽg mũ, vênh jo, ag tỹ ti jun ke tó jé, cidade kãsir tá. ⁵² Kĩ ag tóg mũ mũ, ag tỹ tón jé. Kĩ ag tóg cidade sĩ ù ki jun mũ. Samaria tá ke ag jamã ù vẽ. Tá ag tóg ti nũr ke ve sór mũ. ⁵³ Hã ra tá ke ag tóg ag mĩ nenh mũ. Ag mĩ ag tóg: “ãjag tỹ hẽ ra mũ nẽ?” he mũ. Kĩ ag tóg: “Jerusalém ra,” he mũ. Kĩ tóg ag mĩ kórég nĩ, hã kĩ ag tóg ag mĩ cama ven sór tũ nĩ. ⁵⁴ Kĩ Tiago tóg jũ mũ, João ke gé, Jesus mré mũ tĩ ag. Kĩ ag tóg Jesus mĩ: “Senhor’,” he mũ. “Ēg mĩ tóg há nỹnh mũ, ęg tỹ Topẽ mĩ: “kanhkã tá pĩ tỹ ag pũn nĩ,” hen kĩ. Mĩ ã mĩ há nỹnh mũ?” he ag tóg. “Ēg tỹ Elias tỹ nẽn han ja ẽn han há tóg tĩ,” he ag tóg, Jesus mĩ. ⁵⁵ Hã ra Jesus tóg ag jé vĩrĩn ke kĩ ag mĩ: “vĩ tũg ra,” he mũ. “Topẽ jykre pijé’, ãjag tỹ nẽn han sór mũ tag ti. Inh pi(jé) ag tũg sór mũ’. Isỹ ag kren han sór vẽ jãvo, hã jé sóg kãtĩ mũ, inh, hã vỹ: tỹ sóg ẽprã ke fi kósĩn ẽn nĩ, he mũ,” he tóg, Jesus ti, ag mĩ. ⁵⁶ Kĩ ag tóg cidade ù ra mũ mũ, tá nũgnũr jé sir.

Ēg tỹ Jesus mré mũnh ke

(Mt 8.18-22)

⁵⁷ Ag mũn kĩ ù tóg Jesus mĩ: “sỹ ã mré tĩg há tóg tĩ,” he mũ. “Ā tỹ hẽn ra tĩg kĩ sóg ã mré tĩg ke mũ,” he tóg. ⁵⁸ Kĩ Jesus tóg ti mĩ: “hã ra tóg jagy tĩ,” he mũ. “Īn tũ sóg nĩ. Mĩg vỹ kré nỹtĩgtĩ, jẽsĩ vỹ jagfe nỹtĩgtĩ gé, ag jãvo isỹ hẽ tá nũr ke tóg tũ tĩ. Tỹ sóg ẽprã ke fi kósĩn ẽn nĩ,” he tóg, Jesus ti.

⁵⁹ Kĩ Jesus tóg kejẽn ù mĩ: “mũ nỹ, inh mré,” he mũ. Hã ra tóg ti mĩ: “inh hỹn ver tĩg mũ ha, sỹ inh panh ter kĩ ga ki ti fón jé ver,” he mũ. ⁶⁰ Hã ra Jesus tóg ti mĩ: “vó,” he mũ. “Inh ki ge tũ ag vỹ ã panh kej han mũnh mũ. Ā tỹ inhnhã inh mré tĩg há tóg tĩ, ã tỹ Topẽ tỹ tỹ ęg pã’i nĩnh ke ẽn kãmén jé,” he tóg ti mĩ, Jesus ti.

⁶¹ Kĩ ù tóg ti mĩ ke mũ gé sir, Jesus mĩ. “Sỹ ã mré tĩg há tóg tĩ,” he tóg. “Hã ra sóg inh jamã ra tĩg sór mũ ver, sỹ inh mré ke fag mĩ isĩg ke tó jé,” he tóg, Jesus mĩ. ⁶² Kĩ Jesus tóg ti mĩ: “vó,” he mũ gé. “Ēg tỹ arado tỹ ga kũm kĩ ęg pi(jé) vēsỹjãm ẽvãnh tĩ,” he tóg. “Ge ti nĩ, ã tỹ inh mré tĩg sór kĩ. Inh mré ã tóg tĩg mũ. Ā tỹ ã tũ han sór tĩn kĩ ã tóg Topẽ tỹ tỹ ęg pã’i nĩ tá krỹg ke tũ nĩ,” he tóg, Jesus ti, ù tỹ ti mré tĩg sór mũ mĩ.

Ũ tỹ 70 (ke) ag tỹ Jesus vĩ kãmén mũ

10 Kĩ Jesus tóg ù ag vĩn mũ gé sir, ù tỹ 70 (ke) ag. Kĩ tóg ag jẽgnẽg mũ sir, ag tỹ ti jo mũ jé. Ūn régre tĩn’, ùn régre tĩn’ he tóg. Ag mĩ tóg ke mũ, ag tỹ ẽmã kar mĩ Topẽ kãmén mũn jé, cidade kar mĩ ke gé. Ag nón tóg ra tĩg sór mũ gé, Jesus ti. ² Kĩ tóg ag mĩ: “inh mĩ ag tóg ẽkré ri ke nỹtĩ, ãjag tỹ ùn mĩ tónh ke mũ ag,” he mũ. “Kejẽn ęg jakré tóg ẽhé nỹgtĩ, hã ra ag pipir nỹtĩ, ù tỹ krenh ke mũ ag. Kĩ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ūn e ag tóg inh ki ge sór mũ nĩ, hã ra ù

tý ag mý tónh ke tóg tú tí,” he tóg. “Hã ký Topê mré vîmnî, ti tý ù ag jêgnên jé, ag tý ag mý tugtón jé, ti ví tí,” he tóg, Jesus ti, ã mré mũ tí ag mý.

³ “Ha mũjêg. Ha vé, carneiro krê vỹ vênh jy nîgân ki kagtîg nýtî, mîg tý ag mân sór ký. Mé krê ên ri ke âjag nýtî, hã ra sóg âjag jêgnêg mũ, ký Topê vỹ âjag jy nîgân mũ,” he tóg. ⁴ “Ký âjag mũn ký saco ma mũ tũg nĩ, bolso ên, jãnkamy tú ke gé, pên né vênh kafã gé(g) mũ tũg nĩ gé, pên to ró ên. Ký âjag tý ù ven ký ti mý: “ã mý há?” he tũg nĩ gé. Jatun mý mũmnî,” he tóg.

⁵ “Kejên âjag tóg êmã ù tá junjun ke mũ. Ký âjag tý ìn ù ra ge ký tá ke fag mý: “Topê jé âjag ki rĩr, ký âjag jé jatun mý nýtî nĩ,” hemnî fag mý,” he tóg, Jesus ti, ag mý. ⁶ “Ký tá ke ù tý inh ki rã ký tóg jatu' he mũ sir, ti tý tý Topê kósìn nĩn ký. Tá ke ù tý inh ki rã jãvân h nĩn ký tóg jatu' he mũ sir. Ti jãvo âjag tóg jatu' he mũ sir inhhã.

⁷ Ìn ên krêm nũgnũrmnî, âjag tý kãra ge ja ên krêm. Fag tý âjag mý nén nĩm mũ ên komnî gé. Ûn rãnhraj han mũ ên tóg ti kaja venh ke mũ, ti rãnhraj kaja ti, hã ký ag tóg âjag jên ke mũ sir, vênh kaja jé. Ìn ù kãra ge tũg nĩ, êmã ên tá. ⁸ Ájag tý êmã ù tá junjun ký ìn pir krêm nýtĩmnî, tá ke ag tý âjag mý: “kãge ra,” hen ký. Ag vjên hã komnî. ⁹ Ûn kagyga ag tý há' hemnî. Ag mý: “Topê vỹ tý âjag pã'i nĩnh mũ, ùn ri,” hemnî.

¹⁰ Kejên êmã ù tá ke ag tóg âjag mý: “kãge ra,” he jãvân h nýtĩnh mũ. Ký êmã ên fĩn rãm ký ag mý tag tómñî, ha mẽ: ¹¹ “ha vé, êg pên nug hã kykũnh êg tóg mũ, âjag tý êg kavénh tú nĩ jé,” hemnî. “Ge ra êg tóg âjag mý tó mũ, êg tý âjag mý nén tónh kãmũ jan ki, hã vỹ: “Topê vỹ tý êg pã'i nĩnh mũ, ùn ri,” he mũ,” hemnî ag mý,” he tóg, Jesus ti. ¹² “Ha mẽ, kurã tý êgno ki ag tóg vjêsyrénh ke mũ, ag tý âjag vỹ mẽ jãvân h ký. Cidade tý Sodoma tá ke ag vjêsyrénh kãfór han

jé ag tóg ke mũ, kurã ên kã, ha vemñî,” he tóg, Jesus ti, ag mý.

Jesus tý ù ag mý vỹ kónân

(Mt 11.20-24)

¹³ Ký tóg: “sỹ cidade tý Corazim ki ke ag mý tag tó sór mũ, ha mẽ,” he mũ. “Kórég ve jé âjag tóg ke mũ,” he tóg. “Sỹ cidade tý Betsaida ki ke ag mý tag tó sór mũ gé, ha mẽ. Kórég ve jé âjag tóg ke mũ gé,” he tóg. “Êg tý nén han vánh tý hên ri ke hyn han isóg âjag mý, milagre tý hên ri ke, hã ra âjag tóg âjag jykre továnh sór tú nĩgtî,” he tóg. “Cidade tý Tiro tá, cidade tý Sidom tá sóg êg tý nén han vánh ên hyn han tú nĩ. Sỹ tá milagre hyn han mũ ra ag tóg âjag jykre kórég továnh mũ vjê, vjês,” he tóg. “Ájag jykre pãno to ag jykrén ke mũ vjê, kygfỹ ag mũ vjê, ag mý ti e tĩnh mũ vjê, sỹ ag mý tó mũ ra. Ag jãvo âjag tóg továnh sór tú nĩ, to jykrén sór tú pẽ nĩ,” he tóg, Jesus ti. ¹⁴ “Tiro tá ke ag vỹ vjêsyrénh kãn ke mũ, kurã tý êgno ên ki, Sidom tá ke ag ke gé, ag jykre pãno to. Ag vjêsyrénh kãfór han jé âjag tóg ke mũ jãvo, ha mẽ,” he tóg, Corazim tá ke ag to, Betsaida tá ke ag to ke gé.

¹⁵ Ký tóg: “sỹ cidade tý Cafarnaum ki ke ag mý tag tó sór vjê, ha mẽ,” he mũ. “Ûri tóg ver âjag mý sér tí,” he tóg. “Kanhkã ve jé êg tóg ke mũ,” he âjag tóg tí, ón ký. Hã ra âjag tóg nũgme ki vãr ke mũ jãvo, inferno ki,” he tóg, Jesus ti. Ti tý ã vỹ jẽmẽ jãvân h mũ ag mý vỹ kónân hã vjê.

¹⁶ Ký tóg ã mré ke ag mý tag tó mũ. “Û tóg âjag vỹ mẽ sór mũ, ha vemñî,” he tóg. “Ký tóg sir inh vỹ mẽg mũ gé, ti tý âjag vỹ mên ký. Û tóg âjag vỹ mẽ sór tú nĩ, ha vemñî. Ký tóg inh vỹ mẽnh ke tú nĩ gé. Ti tý inh vỹ mẽnh ke tú nĩn ký tóg ù tý inh jênêg mũ ên vỹ mẽnh ke tú nĩ gé sir, Topê ví ti,” he tóg, Jesus ti. Ti tý ã mré mũ tí ag mý tón hã vjê, ag tý ti vỹ kãmén mũ jé, kór há mĩ, kuvar há mĩ.

Kỹ ag tóg sir mũ mũ, ù tỹ 70 (ke) ên ag.

Ủ tỹ 70 (ke) ag tỹ Jesus to vỹnvỹn ke

¹⁷ Kejên ag tóg ti to vỹnvỹn ke mũ, kỹ ag tóg ti mỹ vĩ sér han mũ sir. “Senhor,” he ag tóg mũ. “Vênh jagrê kórég ag vỹ êg vĩ ki han tĩ. Ả jiji tó kỹ êg tóg ag mỹ vĩ ti, kỹ ag tóg ki hã han tĩ,” he ag tóg mũ, Jesus mỹ.

¹⁸ Kỹ tóg ag mỹ: “vãsỹ inh Japo vé, ti tỹ kanhkã tá kãtêr kỹ,” he mũ. “Ti fin rãm sóg, hã kỹ sóg ti fón. Ta tỹ kómkóm ke ri ke nĩ ja ti nĩ, ti kutê ja ên ti. ¹⁹ Ti kri ke vỹ tỹ inh nĩ. Ha vé, ajag to sóg vãsãn mũ, pỹn tỹ ajag kókén tũ nĩ jé, ajag tỹ ti sãn mũ ra, pỹn kakrã ke gé, Nén-Kórég kar ag ke gé. Ủ vỹ ajag kókén ke tũ pẽ nĩ gé. ²⁰ Hã ra tag to mỹ há nỹtĩ tũg nĩ ver. Tag vỹ tỹ nén ù tũ nĩ ver. Vênh jagrê kórég vỹ ajag vĩ han, vênh kuprĩg ke gé. Hã ra tag to mỹ sér nỹtĩ tũg nĩ. Nén ù vỹ há pẽ nĩ, kỹ tag hã to mỹ sér nỹtĩmnĩ. Ajag jyjy vĩ ránrán kỹ nỹtĩ, Topẽ livron ki, kanhkã tá, ajag tỹ kanhkã tá junjun jé. Kỹ tag hã to mỹ sér nỹtĩmnĩ,” he tóg, Jesus ti.

Jesus tỹ ùn kãsir ag to há

(Mt 11.25-27; 13.16-17)

²¹ Kỹ tóg Jesus mỹ sér tĩ, hora ên kã. Topẽ kuprĩg tỹ ti krĩn kỹ tóg ti mỹ sér tĩ: “jóg’,” he mũ. “Tỹ ả tóg kanhkã tân ag kãfór kar nĩ, kar ả tóg tỹ êprã ke ag kãfór nĩ gé,” he tóg. “Inh mỹ tóg há tĩ, ả tỹ nén han mũ ti. Ủ tỹ: “ki kanhró mág inh nĩ,” he mũ ag mỹ ả tóg ả jykre ven ja tũ nĩ. Ag mỹ ả tóg kãmén ja tũ nĩ. Ủ tỹ gĩr ri ke ki kagtĩg ag hã mỹ ả tóg ven ja nĩ, ả jykre ti,” he tóg. “Hỹ, hã vế. Ả tỹ nén to jykrén mũn hã vế, hã kỹ ả tóg ag hã mỹ ả jykre ti nĩm. Hã ra tóg há tãvĩ nĩ, jóg’,” he tóg, Jesus ti. ²² Kỹ tóg ả mré mũ tĩ ag mỹ: “inh jóg tóg inh mỹ tovãnh kãn, ả tỹ nén han ja kar ti,” he mũ. “Kỹ

ủ pi(jé) ti kósin ki kanhró nĩ’. Inh jóg ne inh ki kanhró nĩ’. Kỹ ù pi(jé) inh jóg ki kanhró nĩ gé’. Inh hã ne ti ki kanhró nĩ’, isỹ tỹ ti kósin nĩn kỹ. Hã ra sóg ajag mỹ ti kãmén jé kãtĩ mũ, inh jóg ti. Isỹ tag to ùn kuprêg mũ ag hã mỹ sóg ti kãmén tĩ, inh jóg ti,” he tóg, Jesus ti.

²³ Kỹ tóg ả mré mũ tĩ ag mỹ nén ù kãmén mũ gé. Vyrmy tóg ag mỹ ke mũ, kỹ tóg: “ajag hã ne vég mũ’, Topẽ jykre ti, hã kỹ Topẽ tóg ajag ve há han mũ,” he mũ. “Sér pẽ ti tĩ, ù tỹ ti jykre vég mũ ag mỹ,” he tóg, Jesus ti. ²⁴ “Ki hã sóg tó mũ, ha mẽ. Ủ tỹ hẽn ri ke ag vỹ inh ve sór tãvĩ ja nỹtĩgtĩ, vãsỹ, ajag tỹ ùri nén vég mũ tag ti. Hã ra ag tóg inh mur ken jo kãgter kãn. Topẽ vĩ tó tĩ ag ja vế, pã’i mág ag ja vế, hã kỹ ag tóg ajag tỹ nén vég mũ ve sór tãvĩ ja nỹtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ajag tỹ ùri nén mềg mũ ti. Ajag hã ne mềg mũ inhhã’,” he tóg, Jesus ti, ti mré mũ tĩ ag mỹ.

Samaria tá ke to comparação

²⁵ Kỹ vãhã Topẽ vĩ to professor ù vỹ ag kãmĩ jègnê mũ, kỹ tóg Jesus ki jèmê sór mũ. Ti tỹ ón kỹ ti vĩ mẽ sór vế, hã kỹ tóg ti mỹ: “Senhor,” he mũ. “Inh hỹn hẽ ri kenh mũ, isỹ rĩr krỹg ja tũ ve jé?” he tóg, Jesus mỹ.

²⁶ Kỹ Jesus tóg ti mỹ: “ne nỹ hỹn rán kỹ nĩ, Topẽ vĩ ki?” he mũ. “Topẽ jykre tỹ ne han jé ả ke mũ hỹn?” he tóg. “To ke há ả tóg nĩ, ha inh mỹ tó,” he tóg.

²⁷ Kỹ tóg ti mỹ: “Topẽ vỹ tỹ ả kri ke nĩ, kỹ ti hã to há nĩmnĩ, ti ki rã há han nĩ, ti to jykre pir nĩmnĩ, ti to tar nĩmnĩ, ti mỹ ả tỹ nén han mũ kar ên han nĩ, ha mẽ. Kỹ ả régre kar ki rĩr nĩmnĩ gé, ả tỹ vênh ki rĩr há han ri ke. Topẽ tỹ nén tón hã vế,” he tóg, Topẽ vĩ to professor ti.

²⁸ Kỹ Jesus tóg: “hỹ,” he mũ. “Ki hã ả tóg tó mũ,” he tóg. “Tag han ra, kỹ ả tóg rĩr krỹg ja tũ venh ke mũ,” he tóg.

²⁹ Hã ra tóg ti mý há tũ nĩ, Jesus ví tag ti, hã kýtóg ti mý: “kýtũ nýtĩnh régre nĩ?” he mũ.

³⁰ Kýt Jesus tóg ti mý tag tó mũ, ha mẽ. “Kejẽn ù tóg nĩgtĩ. Hã ra tóg Jerusalém tá kătĩg kýt Jericó ra tĩ mũ. Ēpry jagma, ěmĩn jagma ùn jykre kórég ag tóg ti jo vājĩg mũ, bandido ag. Kýt ag tóg ti kăgmĩ kýt ti kur kunũg mũ. Tĩ mrănmrăn ag tóg mũ. Tĩ tén kren ag tóg mũ, kýt ag tóg hã ki ti tovănh kar mũ mũ sir, ti tũ măn kăn kýt. Kýt tóg tá nýt nĩ sir.

³¹ Tĩ týt tá nýt ra ù tóg ěpry ěn jagma kătĩ mũ gé. Topẽ tũ ki rĩr tĩ ù vẽ. Tĩ végtóg mũ, ùn vėsýrénh kýt nýt ěn ti, hã ra tóg ti venh rã tũ nĩ. Ěmĩn jagma tóg tĩ mũ.

³² Kýt văhã Levi krẽ ù tóg ěpry jagma kătĩ mũ gé. Tá jun kýt tóg ti végtóg mũ gé, hã ra tóg ti venh rã tũ nĩ gé. Ěmĩn jagma tóg tĩ mũ gé sir.

³³ Kýt văhã Samaria tá ke ù tóg ěpry jagma kătĩ mũ gé. Kýt tóg tá jun mũ, kýt tóg ti végtóg mũ. ³⁴ Kýt tóg ti venh rã mũ inhã. Tĩ kytăg tóg mũ sir, azeite týt, vinho týt ke gé, ti mýt to tĩn kýt. Ā kur týt tóg ti păg mũ sir. Kýt tóg Ā mẽg kri ti nĩm mũ, Ā týt ti ma tĩg jé. Hã kýt tóg ag týt ĩn krēm nũr jafă tá jun mũ sir. Kýt tóg tá ti ki rĩr mũ.

³⁵ Týt vaj kýt tóg tĩg măn sór mũ, hã kýt tóg ù týt ĩn ki rĩr mũ ěn mýt jănkamy régre vĩn mũ, kýt tóg ti mýt: “tĩ ki rĩr há han,” he mũ. “Jănkamy tag týt Ā mýt tá krýt tũn kýt sóg Ā mýt kajăm măn mũ, sýt vỹn ken kýt,” he tóg. “Kajăm kăn jé sóg ke mũ, sýt vỹn ken kýt,” he tóg, Samaria tá ke ěn ti. Tĩ týt ùn kaga ki rĩr mũn hã vẽ,” he tóg, Jesus ti.

³⁶ Kýt tóg: “kýt ùn tăgtũ ag výt ti ve ja nĩ. Ag kă ù týt hẽ nýt týt ti régre ja nĩ, ag týt ùn vóg kónăn ja ěn régre? Ha to jykrén (ke)ma,” he tóg, Jesus ti, Topẽ vỹ to professor ěn mýt.

³⁷ Kýt ù týt ti ki jēmẽg mũ ěn tóg ti mýt: “ũ týt ti jagăgtăn mũ ěn výt týt ti régre ja nĩ,” he mũ.

Kýt Jesus tóg ti mýt: “hýt, tó há han Ā,” he mũ. “Kýt ěn ri ke han nĩ. Ûn vėsýrénh mũ ag jagăgtăn kăn nĩ, ti ri kén,” he tóg, Jesus ti. Tĩ týt ù týt ón kýt ti ki jēmẽg mũ mýt tón hã vẽ.

Jesus týt Maria mré Marta fag venh tĩg

³⁸ Kejẽn ag tóg mũ mũ, Jesus ag, kýt ag tóg ěmă sĩ ù ki junjun mũ. Tá ù fi tóg nĩ nĩ, fi jijin hã výt: Marta, he mũ. ěn fi výt Jesus mýt: “inh ĩn kăra ge jęg, Ājag týt ěg mré nýtĩ jé,” he mũ.

³⁹ Kýt fi jăvy fi výt nĩ gé, hã výt: Maria, he mũ. Kýt Maria fi výt Jesus mré nĩ nĩ, ti vỹ jēmẽ jé. ⁴⁰ Hã ra Marta fi výt rănhrăj (ka)mẽ nĩ, Jesus ag mýt vějẽn han jé. Jăvo Maria fi tóg nĩ nĩ.

Kýt Marta fi tóg Jesus mýt: “Senhor,” he mũ. “Rănhrăj mág han tĩ sóg nĩ, hã ra fi tóg nĩ nĩ. Fi mýt ké, fi týt inh mré vějẽn ki rĩr jé,” he fi tóg mũ.

⁴¹ Hã ra Jesus tóg ti mýt: “krĩ kufy Ā tóg nĩ, nén ù tũ to, hã ra fi tóg inh vỹ jēmẽg nĩ nĩ,” he mũ, Marta fi mýt. “Vějẽn to vėnh kutăn tũg nĩ. ⁴² Nén ù pir hã ne há nĩ, hã výt: inh vỹ, he mũ. Maria fi výt inh vỹ hã jēmẽ sór mũ, kýt sóg fi mýt: “ha nén ù han,” he jăvăn nĩ. Nén ù há kupręg fi tóg, fi týt inh vỹ mẽ sór kýt,” he tóg, Jesus ti, Marta fi mýt.

Ěg týt Topẽ mré vēmén

(Mt 6.9-15; 7.7-11)

11 Kejẽn tóg Topẽ mré vỹ mũ, Jesus ti, ěmă ù tá nĩ kýt. Tĩ týt Topẽ mré vēmén kar kýt ti mré mũ tĩ ag tóg ti mré vĩnh kămũ mũ. Kýt ag tóg ti mýt: “Senhor,” he mũ. “Ěg kanhrăn nĩ, ěg týt Topẽ mré vỹ há han jé. João výt Ā mré mũ tĩ ag kanhrăn. Ge ki ěg kanhrăn nĩ gé,” he ag tóg, Jesus mýt.

² Kýt tóg ag kanhrăn kýt ag mýt:

“Topê mré vī kŷ tag tómnī, ha mē,” he mū.

“Ēg jóg mág, ã jyyj tó ěg tóg tĩ.

Kŷ vênh kar jé ã tŷ tŷ ũn mág nĩ vé.

Ēg jé kánhmar ã tŷ tŷ ěg pã'i nĩ vé.

³Ēg mŷ ěg jên ti nĩm, kurā kar ki, ěg tŷ kurā kar ki ko tĩ ěn.

⁴Kŷ ěg mŷ vênh pāte fón nĩ, ěg tŷ ã vĩ mranh ja ti, hã jé ěg tóg ěg tŷ jagnē to jũ tŷ jagnē mŷ vênh pāte fón ke mū gé.

Kŷ ěg tŷ ã vĩ mranh sór kŷ ěg kren han nĩ, ěg tŷ mranh tũ nĩ jé,” hemnĩ,” he tóg, Jesus ti.

⁵Kŷ tóg ag mŷ ěg tŷ Topê mré vēmén tĩ ěn kāmén mǎn mū. Kŷ tóg ag mŷ: “kejēn ũ tóg nĩgtĩ,” he mū. “Kuty si há tá tóg ã régre ĩn ki jun mū. Kŷ tóg ti mŷ: “régre’,” he mū. “Inh mŷ ěmĩ tǎgtũ nĩm, sŷ kar ã mŷ ti ri kén kŷ nĩm jé,” he tóg. ⁶“Inh mré ke ũ vŷ jun. Kór há tá tóg kǎtig, kuvar há tá. Hã ra sŷ ti mŷ ne han ke tóg tũ tĩ,” he tóg, ã régre mŷ.

⁷Kŷ ti régre tóg ti mŷ: “hã ra sóg nũr nŷ nĩ,” he mū. “Kar inh krē tóg inh mré nũgnũr nŷtĩ gé. Jǎnkā vŷ nĩfénh kŷ jē nĩ. Hã kŷ tóg inh mŷ vênhmŷ tĩ, inh nĩnh ke mū ra, sŷ ã mŷ ěmĩ nĩm jé. Ũ ki jǎvǎnh,” he tóg ti mŷ.

⁸Hã ra tóg sir to vĩ mǎn', to vĩ mǎn' he mū. Hã kŷ tóg nĩ kŷ ti mŷ nĩm mū sir, ti tŷ ti mŷ ěmĩ to vĩ mū ti. Tĩ régre vē, ũ tŷ ti mŷ to vĩnh kǎtĩ mū ti. Ge ra tóg ti mŷ nĩm ke tũ nĩ vē, ti tŷ tŷ ti régre ra. Tĩ tŷ ti mŷ to vĩ mǎn', to vĩ mǎn' he tugrĩn tóg sir ti mŷ nĩm mū jǎvo. Ēg tŷ Topê mré vĩ ri ken hã vē,” he tóg, Jesus ti.

⁹“Ha mē, sŷ ājag mŷ nén tó mū tag ti. Topê mŷ nén kar to vĩmnĩ, kŷ tóg ājag mŷ han mū sir. Ājag tŷ ti mŷ nén ũ to vĩ mū ěn jǎvǎnh nĩ, kŷ ājag tóg vênh ke mū sir. Tĩ mré vī kŷ ěg tŷ ti jǎnkā tŷ tórón tórón ke ri ke han nĩ, kŷ tóg ājag mŷ ti róm ri ke han mū, ti tŷ ājag mŷ ājag tŷ nén to vĩ mū ěn han kŷ. ¹⁰Hŷ, hã vē. Ājag tŷ ti mŷ nén to vĩn kŷ tóg ājag mŷ han

mū. Ājag tŷ ti jǎvǎnh kŷ ājag tóg vênh ke mū. Ājag tŷ ěg tŷ jǎnkā tŷ tórón tórón ke ri ke han kŷ tóg ājag mŷ ti róm ri ke han mū. ¹¹Kejēn ājag kósin tóg ājag mŷ pirā to vĩ mū. Kŷ ājag pi(jé) ti mŷ pŷn nĩm ke mū'. Pirā hã nĩm jé ājag tóg ke mū. ¹²Kejēn tóg ājag mŷ garĩnh ovo to vĩ mū, ājag kósin ti. Kŷ ājag pi(jé) ti mŷ pŷn kakrā nĩm ke mū'. Garĩnh ovo hã nĩm jé ājag tóg ke mū. ¹³Jykre pǎno ājag nŷtĩ. Ājag jykre pǎno (hã) ra ājag tóg ājag krē mŷ nén ũ há nĩm tĩ. Ge ti nĩ gé, ājag tŷ Topê mŷ nén ũ to vĩn kŷ. Nén ũ há hã nĩm jé tóg ke mū. Hã ra tóg ājag kǎfór han tĩ, ěg jóg tŷ kanhkā tá nĩ ti. Ājag tŷ ti mŷ to vĩn kŷ tóg ã kuprĩg tŷ ājag jagrē han ke mū mŷr, Topê ti,” he tóg, Jesus ti.

Jesus tŷ Topê jykre hã han kŷ tar nĩ

(Mt 12.22-30; Mc 3.20-27)

¹⁴Kejēn tóg ũn jagrē kórég mŷ ti jagrē kutēm mū. Tĩ vŷ vǎnh han ja tóg nĩ, ti jagrē ti. Jesus tŷ ti kutēm kar tóg vŷ há nĩ sir. Kŷ tóg vênh kar mŷ e tĩ sir, ag mŷ tóg sér tĩ sir. ¹⁵Hã ra ũ ag tóg ti to: “jagrē kórég ti nĩ,” he mū. “Nén-Kórég ag pã'i vŷ tŷ ti jagrē nĩ, Satanás ěn, Belzebu he mū ěn,” he ag tóg mū, ón kŷ. “Hã kŷ tóg Nén-Kórég ag pan tĩ, ag jagrē kórég ag. Nén-Kórég ag pã'i jykre tŷ tóg ag pan tĩ,” he ag tóg ón kŷ, Jesus to. ¹⁶Hã ra ũ ag tóg ón kŷ ti jykre ve sór mū gé, kŷ ag tóg ti tŷ ěg tŷ nén han vǎnh han mū ve sór mū sir, ti tŷ ag mŷ kanhkā jykre ven jé.

¹⁷Hã ra Jesus tóg ki kanhró nĩ, ag tŷ nén to jykren mūn ki. Hã kŷ tóg ag mŷ: “pã'i pir krēm ke ag tŷ jagnē kato tēn kŷ ag tóg jagnē kǎgtēn kǎn ke mū,” he mū. “Ĩn pir krēm ke fag tŷ jagnē kato tēn kŷ fag tóg jagnē kǎgtēn kǎn ke mū gé sir. ¹⁸Ge ti nĩ, Nén-Kórég ag jykre ti. Nén-Kórég ag tŷ jagnē kato tēn kŷ ag tóg jagnē tŷ tũ' henh mū gé vē, Satanás ag. Hã kŷ tóg vênhmŷ nĩ, ājag vŷ ti, ājag tŷ iso: “Satanás jykre tŷ, Belzebu ěn jykre tŷ

tóg Nén-Kórég ag pan tĩ,” he mũ ti. Ag tỹ jagnē kato tēgtē to ken hã vē sir, ha mẽ,” he tóg, Jesus ti. ¹⁹ “Belzebu jykre tỹ tóg ag pan mũ, Nén-Kórég ag,” he ājag tóg tĩ iso. Ājag mré ke ag to jykrén nĩ. Nén-Kórég ag pan ag tóg tĩ gé, ājag mré ke ag. Ag pi(jé) Satanás jykre ki ag pan tĩ. Topē jykre ki ag tóg ag pan tĩ (mỹr') Ājag tỹ tag to jykrén kỹ ājag tóg inh jykre há ki kanhrān ke mũ vē,” he tóg ag mỹ, Jesus ti. ²⁰ “Topē kuprĩg jykre tỹ sóg Japo ag pan tĩ mỹr, ha mẽ. Topē kuprĩg tỹ Japo ag pan kãn kỹ Topē tóg tỹ ěg pã'i nĩ vē, mỹr. Tag to jykrén nĩ,” he tóg, Jesus ti.

²¹ “Ũ tỹ é he (ka)mẽ ag tóg ājag tũ ki rĩr há han ti. Ag rógro vỹ jēgtĩ, kỹ ag tóg ājag ĩn ki rĩr tĩ sir, ũ tỹ ag tũ mǎg tũ nĩn jé. Kỹ ũ tóg ag tũ vóg ke tũ nĩ gé, ag tỹ ki rĩr há han kỹ. ²² Kejēn ũ tóg ũ tóg ũ tỹ é he (ka)mẽ ěn in tá jun mũ, ũ tỹ ti tar kǎfór nĩ ti. Ti rǎrá kǎfór nĩn kỹ tóg ti tỹ hēn ri kenh mũ sir. Kỹ tóg ti rógro vǎg mũ. Ti tỹ ũn kǎgtén jafǎ vǎg tóg mũ, kỹ tóg ti tũ mǎn kãn mũ gé sir. Ge ti nĩ, isỹ nén han mũ ěn ti. Ũ tỹ é he (ka)mẽ ri ke ti nĩ, Japo ti, hã ra sóg ũn tar ěn ri ke nĩ,” he tóg.

²³ “Ājag tỹ tỹ inh mré ke tũ nỹtĩn hã kỹ ājag tóg inh kato tēgtē mũ. Ājag tỹ inh mré ěprǎ ke ag tỹ Topē to kǎmũ han tũ nĩn kỹ ājag tóg ag kǎmũ kamēg mũ,” he tóg.

Vēnh jagrē kórég vỹn kenh ke

(Mt 12.43-45)

²⁴ “Kejēn sóg vēnh jagrē kórég ũ kutēm mũ. Kỹ tóg ga kórég mĩ tĩ mũ, ti jagrē ěn ti. Goj venh ke tũ tóg nĩ, tá. Vēnhkǎn ke tũ tóg nĩ gé, ti tỹ hē ri ken kỹ vēnhkǎn ke tũ tĩn kỹ. Kỹ tóg vǎhǎ to jykrén mũ sir. “Inh hỹn ěn ra tĩg mǎn ha, sỹ ũ tá kǎkutē ja ěn ra. Inh mỹ tóg tỹ ĩn ri ke ja nĩ, kỹ inh jé hỹn ti kǎra rǎ mǎn ha,” he tóg mũ, ti jagrē ěn ti. ²⁵ Kỹ tóg ti venh kǎtĩ mũ. Hã ra tóg sir krĩ há nĩ. Kỹ tóg ti mỹ ĩn há ri ke nĩ sir, ĩn prur, ĩn

sĩnvĩ ri ke. ²⁶ Kỹ tóg Nén-Kórég tỹ 7 (ke) ag mỹ tónh tĩ mũ sir. “Ha kǎmũ jēg,” he jé tóg ke mũ. Hã ra ag jykre pǎno tóg ti jykre pǎno kǎfór nĩ. Kỹ ag tóg sir ũ ěn kǎge ge mũ, tỹ ag tóg ti jagrē nỹtĩ sir, isỹ ũn mỹ ti jagrē pir kutēm ja ěn ti. Hã kỹ tóg kórég tǎvĩ nĩ sir. Ti jagrē kórég pir kutēm inh nĩ vē, hã ra ũ tỹ 8 (ke) ag tóg tỹ ti jagrē nỹtĩ, ti tỹ inh ki rǎ tũ nĩn kỹ,” he tóg, Jesus ti. Ti tỹ ag mỹ vēnh jagrē jykre tón hã vē.

Topē tỹ ěg ve há han ke

²⁷ Kỹ ũ tỹ ti vỹ mēg mũ ũ fi tóg prēr mũ sir, fi tỹ ti vỹ tag mē kỹ. Ũn e ěn kǎmĩ fi tóg jē nĩ, kỹ fi tóg ti mỹ ke mũ. “!..Topē vỹ ģ mỹnh fi ve há han, fi tỹ ģ han tugrĩn, fi tỹ ģ pafǎm tugnen..!” he fi tóg, prēr kỹ. ²⁸ Kỹ Jesus tóg fi mỹ: “hỹ,” he mũ. “Hã ra Topē vỹ ģ ve há han ke mũ gé, ģ tỹ ti vỹ jēmēn kỹ. Hã kỹ ģ tỹ ti vỹ mē kỹ ke króm nĩ, kỹ tóg ģ ve há tǎvĩ han ke mũ,” he tóg, Jesus ti, ũ tỹ prēr mũ ěn fi mỹ.

Jesus tỹ ón kỹ milagre han ke tũ

(Mt 12.38-42)

²⁹ Hã ra ũ tỹ hēn ri ke ag tóg sir tá jun-jun mũ, ti vỹ mē jé. Kỹ tóg fór tǎvĩ tĩ. Kỹ Jesus tóg ag mỹ: “kórég ājag nỹtĩ,” he mũ. “Ón kỹ ājag tóg nén han vǎnh ve sór mũ. Venh ke tũ ājag tóg nĩ. Nén ũ pir hã ve jé ājag tóg ke mũ, hã vỹ: Jonas tỹ nén ve ja ěn ri ke, he mũ,” he tóg. ³⁰ “Jonas vỹ cidade tỹ Nínive tá ke ag mỹ Topē vỹ tó ja nĩ, kỹ ag tóg ti vỹ mē há han ja nĩ. ěn ri ke han jé sóg ke mũ, ājag mỹ. Tỹ sóg ěprǎ ke fi kósĩn ěn nĩ,” he tóg. ³¹ “Kỹ pã'i mǎg ěn fi, kanhkǎ tǎpér tỹ sul tá kǎtĩg ja ěn fi, tá tá kǎtĩg ja ěn fi vỹ nĩnh ke mũ gé, kurǎ tỹ ěgno ki, sỹ vēnh kar jykre venh ke kurǎ ěn ki. Ājag mré fi tóg jēnh mũ, kỹ Topē tóg ājag mỹ vỹ kónǎn ke mũ, fi ve kỹ. Kanhkǎ fyr ja tá fi tóg kǎtĩg ja nĩ, vǎsỹ, fi tỹ pã'i mǎg tỹ Salomǎo vỹ mē jé. Salomǎo kǎfór vỹ tỹ inh nĩ, hã ra ājag tóg inh vỹ mē jǎvǎnh nỹtĩ fi jǎvo,” he tóg.

³² “Kỹ Topê vỹ Nínive tá ke ag ve kỹ ãjag mỹ vĩ kónân ke mũ gé, kurã tỹ ãgno ên ki, ha vemni. Nínive tá ke ag tỹ Jonas vĩ mẽ kỹ ag tóg ãjag jykre togvãnh ja nĩ. Tỹ sóg Jonas kãfór nĩ, hã ra ãjag tóg ãjag jykre togvãnh jãvãnh nỹtĩ, sỹ ãjag mỹ tó tĩ (hã) ra,” he tóg, Jesus ti.

Jẽngrẽ ri ke ẽg nỹtĩ

(Mt 5.15; 6.22-23)

³³ “Êg tỹ lampião grub kỹ ẽg pi(jé) ỉn krẽm pẽju kỹn fẽg tĩ, ẽg pi(jé) kěj krẽm fẽg tĩ. Ti fẽg jafã kri ẽg tóg fẽg tĩ, lampião gru ti. Kỹ ẽg tóg ti gru tỹ ve há jẽgtĩ, ẽg tỹ ỉn kãtã kãmũ kỹ,” he tóg, Jesus ti.

³⁴ “Êg kanẽ hã tóg tỹ ẽg tỹ ve jafã nĩ. Kỹ tóg ẽg jo kurã han tĩ, ẽg kanẽ ti, ti há nĩn kỹ. Kỹ tóg ẽg jo kurã kar nĩ sir, ẽg kanẽ há nĩn kỹ. Êg kanẽ kórég nĩn kỹ tóg ẽg jo kuty ke kãn mũ sir. Kỹ tóg ge nĩ, ẽg jykre kórég ti. Êg kanẽ kórég ri ke ti nĩ, ẽg jo kuty han tóg tĩ. ³⁵ Kỹ vãnh kanhrãn nĩ. Ke tũ nĩ mũ ra tóg ãjag jo kuty ri ke nĩ. Vãnh jykre kórég hã vẽ. Kỹ vãnh jykre kórég han sór tũg nĩ. ³⁶ ãjag jo kurã nĩn kỹ tóg há tãvĩ nĩ, ãjag jo kuty tũ nĩn kỹ, ãjag jo kuty sĩ tũ nĩn kỹ ke gé. ãjag jykre há tãvĩ nĩn kỹ tóg ãjag jo kurã ri ke nĩ. Kỹ ãjag tóg sir lampião gru ri ke nỹtĩ gé. Lampião gru mág nĩn kỹ tóg kómkóm ke tĩ, ẽg kanẽ jo, kỹ tóg ẽg mỹ jẽngrẽ há han tĩ. Ge ẽg nỹtĩ, ẽg jykre há tãvĩ nĩn kỹ, ti kórég sĩ tũ nĩn kỹ,” he tóg, Jesus ti. Ti tỹ ag mỹ Topê jykre há tón hã vẽ.

Jesus tỹ ũn jykre rẽgre ag mỹ vĩ kónân

(Mt 23.1-36; Mc 12.38-40)

³⁷ Ti tỹ ag mrẽ vẽnẽn kar Fariseu ũ tóg ti mỹ: “inh mrẽ jẽn kãtũg,” he mũ. Kỹ tóg ti mrẽ tĩ mũ, ti mrẽ jẽn jẽ, Jesus ti. ³⁸ Hã ra Jesus tóg Judeu ag jykre han ja tũ nĩ, ag jẽn jẽ ag tóg vãnh nĩgpég tĩ. Kỹ tóg Fariseu ên mỹ e tĩ. Kỹ tóg to jykrẽn kónân mũ sir.

³⁹ Kỹ Jesus tóg ki kanhró nĩ, kỹ tóg ti mỹ kãmẽn mũ. “Fariseu vỹ tỹ ãjag nỹtĩ,” he tóg. “Kỹ ãjag tóg copo ven ja kugpég tĩ, pẽnky ven ja ke gé, hã ra ti kãtã ke tóg kavėj nĩ. Kỹ ãjag jykre vỹ ge nỹtĩ gé. Jykre há nĩ ve ãjag tóg nỹtĩ, hã ra ãjag tóg vãnh jykre pãno han tĩ, hã vỹ: jãnkamy to ag lograr he tĩ, he mũ, ãjag prũ tũ fag mrẽ nỹ, he mũ gé. ⁴⁰ Kri tũ pẽ ãjag nỹtĩ. Ủ tỹ ẽg ven ja han mũ vỹ ẽg jykre han mũ gé mỹr. Êg jykre há nĩn kỹ ẽg ven ja vỹ há nĩ gé. ⁴¹ Ủ jagãgtãn ra, ãjag tỹ nẽn ũ tỹ. Vãnh jykre há kar han ra, kỹ tóg ãjag tỹ nẽn ũ kar jãnhkri nĩ ri ke nĩ sir,” he tóg.

⁴² “Fariseu', Topê vỹ ãjag ve kónân. Ôn kỹ ãjag tóg Topê mỹ ãjag jakré tỹ dízimo han kãn tĩ. ãjag jakré tỹ hortelã tỹ 10 (ke) nĩn kỹ ãjag tóg Topê mỹ ũn pir nĩm tĩ, dízimo han kỹ. ãjag jakré tỹ arruda tỹ ãjag tóg dízimo nĩm tĩ gé, ãjag jakré tỹ vãnh kagta kar tỹ mỹr, ãjag tỹ nẽn ũ kar mrẽ hã. Nẽn ũ kar tỹ ãjag tóg dízimo vin tĩ, Topê mỹ. Hã ra ãjag tóg vãnh jykre kuryj han tũ nĩ jãvo. Topê to há tũ ãjag tóg nỹtĩ, ti vĩ jẽnẽ jãvãnh ãjag tóg nỹtĩ. ãjag tỹ ti tỹ ẽg jyvẽn ki króm mrẽ hã ãjag jakré tỹ dízimo vin ra tóg há tãvĩ nĩn mũ vẽ, ha mẽ. Hã ra ãjag tóg ki króm sór tũ nĩgtĩ,” he tóg.

⁴³ “Fariseu', Topê vỹ ãjag ve kónân. Vãnh kanhrãn jafã krẽm ãjag tóg vãnh kãpãm kỹ nỹtĩ, vãnh kar tỹ ãjag ve jẽ. Cidade kũju tá ãjag tóg mũgtĩ, kỹ vãnh kar tỹ ãjag mỹ: “Senhor, ã mỹ há?” hen kỹ tóg ãjag mỹ sér tĩ. ⁴⁴ Topê vỹ ãjag ve kónân mỹr. Vãnh kej sĩ ri ke ãjag nỹtĩ, vãnh kej to ró tũ ri ke. Kri mũ ag tóg tĩ, vãnh kar, kỹ ag tóg ki kagtũg nỹtĩ, ti tỹ tỹ vãnh kej nĩ ti. Kỹ ag tóg vãnh vatánh tá vãnh kavẽn tĩ. Tag ri ke ãjag tóg nỹtĩ. Kỹ ãjag krẽm ke ag vỹ Topê vĩ mranh tĩ, ãjag ven kỹ,” he tóg, Jesus ti, Fariseu ag mỹ.

⁴⁵ Kỹ Topê vĩ to professor ũ tóg Jesus mỹ: “ã tỹ Fariseu ag mỹ tag tó kỹ ã tóg

эг to vi kónān ti nĩ gé, ag mré,” he mũ, ěg Senhor mĩ.

⁴⁶ Kĩ tóg: “ón kĩ Topě vi to professor,” he mũ. “Hĩ, Topě vỹ ājag ve kónān gé,” he tóg. “Věnh kar mĩ ājag tóg věnh jykre kufy nĩm ti. Kufy jagy ti nỹ, věnh jykre ěn ti, kĩ ājag tóg han sór tũ nĩgtĩ. Ge ra ājag tóg ag mĩ: “ha ki króm,” he ti. ⁴⁷ Topě vỹ ājag ve kónān mĩr. Ājag jóg’jóg ve ag vỹ Topě vi tó ti ag kăgtén. Jăvo ājag tóg ag kej ki rĩr há han ti. ⁴⁸ Hă ki ājag tóg ājag jóg’jóg ve ag tỹ ag kăgtén to: “há ti nĩ,” he ti. Hă ki tóg ājag mĩ há nĩ mĩr, ag tỹ ag kăgtén ja tugrĩn. Ag há vỹ ag kăgtén ja nĩ, kĩ ājag há nỹ ag kej ki rĩr há han ti,” he tóg. ⁴⁹ “Hă kĩ Topě vỹ ājag to vi ja nĩ. Ki kanhró ti nĩ, Topě ti, há kĩ tóg ājag to vi kónān ja nĩ, ha mē. “Inh vi tó ti ag jěgně jé sóg ke mũ ag mĩ, isỹ ũn vin mũ ag ke gé, ag tỹ ag mĩ inh vi tó jé. Hă ra ag tóg ag vóg kónān ke mũ, ag kăgtén jé ag tóg ke mũ,” he ja tóg nĩ, Topě ti. ⁵⁰ Ājag jóg’jóg ve ag vỹ ag kygrěn kăn, há ra tóg ājag mĩ há ti, há kĩ Topě vỹ to ājag vóg kónān ke mũ. Ũ tỹ hěn ri ke ag kygrěn ag tóg, ājag jóg’jóg ve ag, Topě tỹ ěpră ke ag han kar kĩ. ⁵¹ Ti kăke tóg Abel tén. Ti nón ke ag kăgtén ja ag tóg nĩ gé, ājag jóg’jóg ve ag, Zacarias mré há. Topě ĩn jănkă krēm ag tóg ti tănĥ, Topě mĩ nén ũ pũn jafă ěn ki, Zacarias ti. Topě tỹ jěgněg mũ ag kăgtén tovănh tũ pě ag nỹti, ājag jóg’jóg ve ag. Hă ra tóg ājag mĩ há ti. Ājag tỹ ag kygrěn kăn ri ke ti nĩ. Ũn kăgter mũ tag jagfy kajăm kăn jé ājag tóg ke mũ, ha vemnĩ. Ājag mĩ sóg tó mũ mĩr,” he tóg, Jesus ti.

⁵² “Ón kĩ Topě vi to professor, Topě vỹ ājag ve kónān. Topě vi tỹ ěg kanhrăn mũ ěn ki ge jăvănĥ ājag tóg nỹti mĩr’. Kĩ ũ tỹ ki ră sór mũn kĩ ājag tóg ti mĩ tó kónān ti, ti tỹ ki věnh fón tũ nĩn jé. Kĩ tóg ěg tỹ ũ jo ĩn nifenĥ ěn ri ke nĩ, ājag tỹ ag tỹ Topě ki ge kaměg ti,” he tóg, Jesus

ti. Ti tỹ ũ tỹ ón kĩ Topě vi to professor ag mĩ vi kónān há vē.

⁵³ Ti tỹ tag tó kar kĩ tóg hěn ra ti mũ sir. Tag păte Topě vi to professor ag tóg ti mré mũ kĩ ti tugnỹm ti, Fariseu ag ke gé. Ag tỹ ti vi to ti se sór vē. Hă kĩ ag tóg ón kĩ ti ki jēměgměg mũ. ⁵⁴ Ón kĩ ag tóg ti vi jēměg ti gé sir, ag tỹ ti vi to ti kăgmĩn jé.

Ũn jykre régre ag

(Mt 10.26-27)

12 Hă ra ũ tỹ hěn ri ke ag vỹ věnh măn kĩ nỹti nĩ. E tăvi ag tóg ti ha, mil tỹ hěn ri ke ag. Kĩ ag tóg jagně sănsăn mũ sir, ag e nỹtĩn kĩ. Kĩ Jesus tóg ag kanhrăn răn mũ. Ā mré mũ ti ag kanhrăn vén tóg mũ, kĩ tóg ag mĩ: “Fariseu ag jykre han sór tũg nĩ,” he mũ. “Păo jěgja jafă ri ke ti nĩ, ag jykre ti, há kĩ tóg Topě mĩ kórég nĩ. Ag jykre há vē, ha mē: jykre régre ag nỹti. Kĩ tag tóg Topě mĩ kórég tăvi nĩ,” he tóg. ² “Ěg tỹ péju kĩ nén han mũ vỹ věnh ven kăn ke mũ, ěg tỹ věnh kar vatănh tá nén to jykren mũ vỹ věnh ven kăn ke mũ, kură tỹ ěgno ki,” he tóg. ³ “Ājag tỹ věnh kar vatănh tá vēmén ja ěn mē kăn jé ag tóg ke mũ, věnh kar. Ājag tỹ kékén kĩ nén tó ja ěn tó kăn jé ag tóg ke mũ, jamă hăr(a), ājag tỹ ĩn kătă nén tó ja ěn. Hă kĩ věnh jykre régre han tũg nĩ,” he tóg.

Ěg tỹ ěpră păi ag kaměg ke tũ

(Mt 10.28-31)

⁴ “Ha mē, iso há ājag nỹti. Ag kaměg tũg nĩ, ũ tỹ ěg tén ti ag, păi ag. Ag tỹ ěg tén kar kĩ ag tóg ěg tỹ hē ri kenh ke tũ nĩ sir. Hă kĩ ag kaměg tũg nĩ. ⁵ Ājag mĩ sóg tónĥ mũ ha, ājag tỹ ũn kaměg ke ti, há vỹ: Topě, he mũ. Ti há ne ěg tén kar nũgme ki ěg văm ki kanhró nĩ, mĩr ha mē’. Kĩ ti há kaměg nĩ. ⁶ Sēsĩ văm ag tóg ti, jănkamy kato, ěg tỹ ko jé. Jēsĩ tỹ 5 (ke) kato ěg tóg jănkamy pir măg ti. Hă ra Topě pi(jé) ag kă jatun mũ’. Ag ki rĩn nĩ

tóg nĩ, sēsĩ ěn ag ki. ⁷ Ěg ki rĩr tóg nĩ gé, Topē ti. Ěg tĩ nén vég mũ kar ki kanhró tóg nĩ. Hã kĩ tóg ěg gānh ki kanhró nĩ gé. Nĩkrén kãn ja tóg nĩ, Topē ti, ěg gānh ti. Jēsĩ kǎfór ājag tóg nĩtĩ, Topē mĩ. Ājag kāmĩ ũn pir tóg sēsĩ e kǎfór nĩ, ti mĩ. Hã kĩ ag kamēg tũg nĩ, ũ tĩ ěg tén sór mũ ag,” he tóg.

Ěg tĩ Jesus kāmén ke

(Mt 10.32-33; 12.32; 10.19-20)

⁸ “Hã kĩ sóg ājag mĩ tag tó mũ. Ěprā ke ag mĩ: “tĩ sóg ti mré ke nĩ,” hemnĩ, iso. Ag kamēg tũg nĩ. Kĩ sóg ājag tónh ke mũ gé, Topē tĩ jēnē jafā ag mĩ, kurā ěn kǎ, ājag tĩ tĩ inh mré ke nĩtĩ ti. Tĩ sóg ěprā ke fi kósin ěn nĩ, ha mē. ⁹ Ājag tĩ ěprā ke ag mĩ inh kāmén tũ nĩn kĩ sóg ājag tónh ke tũ nĩ gé, Topē tĩ jēnē jafā ag mĩ, ājag tĩ iso: “ti ki kagtĩg sóg nĩ,” hen kĩ,” he tóg.

¹⁰ “Tĩ sóg ěprā ke fi kósin ěn nĩ. Ag tĩ iso veme jũ han kĩ sóg ag mĩ vėnh pāte fón sór mũ. Ag tĩ hã ra Topē kuprĩg to veme jũ han kĩ Topē tóg ag mĩ vėnh pāte fón mǎn ke tũ nĩ ha,” he tóg.

¹¹ “Ājag vin jé ag tóg ke mũ, pǎ'i ag mĩ, governador ag mĩ ke gé, ag tĩ ājag sigse jé. Ěg vėnh kanhrǎn jafā krēm ag tóg ājag ki jēmē sór ke mũ, ājag tĩ inh ki ge kĩ nĩtĩ ti, ha vemnĩ. Hã ra to krĩ kufy han tũg nĩ, ājag tĩ ag mĩ inh kāmén ke ěn to. ¹² Topē kuprĩg hã ne ājag kanhrǎn ke mũ', kurā ěn kǎ. Hã kĩ ājag tóg tónh ke mũ sir,” he tóg, Jesus ti, ā mré mũ ti ag mĩ.

Ěg tĩ nén ũ to ěn ke tũ

¹³ Kĩ ũn e ag kāmĩ ũ tóg Jesus mĩ: “Senhor,” he mũ. “Inh jo inh kǎke mré vĩmnĩ, ěg tĩ ěg panh ter ja tĩ nén kar vėnh kǎpām jé, ti kuge ti,” he tóg, Jesus mĩ.

¹⁴ Hã ra Jesus tóg ti mĩ: “vó,” he mũ. “Isũ pijé,” he tóg. “Inh pi(jé) ā mĩ ā kuge

ve sór mũ'. Inh pi(jé) ā tũ tĩ vėnh kǎpām sór mũ,” he tóg.

¹⁵ Kĩ tóg ag kar mĩ: “ker nén ũ to ěn hē',” he mũ. “Ěg tĩ nén kar pi(jé) ěg rĩr han ke mũ'. Ěg tũ mág nĩ ra ěg pi(jé) mũ há han ke mũ',” he tóg.

¹⁶ Kĩ tóg ag mĩ: “vėnh jykre há vỹ ge nỹnh mũ, ha mē,” he mũ. “Ũn rico tóg nĩ ja nĩgtĩ mĩr,” he tóg. “Tĩ japy vỹ nén kar kanē e han ja nĩgtĩ. ¹⁷ Kĩ tóg to jykrén mũ sir, ũn rico ti. “Inh hỹn ne han mũ ha?” he tóg. “Inh pǎjó mág vó, inh pǎjó kǎsa vó, sỹ krēm isũ kar rǎg jé?” he tóg. ¹⁸ “Inh pǎjó kókén jé sóg ke mũ, sỹ ti jėgja ki ũn mág han jé, kĩ sóg krēm isũ kar vin mũ, inh jakré kanē kar ti,” he tóg mũ, to jykrén kĩ. ¹⁹ “Kĩ sóg jatu nĩ sir. Isũ vỹ prỹg tĩ hėn ri ke pétēm mũ, kĩ sóg rǎnhřǎj mǎn ke tũ nĩ ha. Jatun mĩ sóg jėg nĩnh ke mũ, kron nĩ jé inh ke mũ gé. Inh mỹn sėr tĩ sir, sỹ jatu nĩn kĩ,” he tóg, to jykrén kĩ, ũn rico ti.

²⁰ Hã ra Topē tóg ti mĩ vĩ mũ. “Krĩ tũ ā nĩ,” he tóg ti mĩ. “Kuty tag kǎ ā tóg ter ke mũ ha, kĩ ā tũ mág tag tĩ tĩ ũ tũ nĩnh ke mũ ha ke gé. Ma tĩg ke tũ ā tóg nĩ. Ā ter ke vė,” he tóg ti mĩ, Topē ti,” he tóg, Jesus ti, ũ tĩ ā panh tũ mǎn sór mũ ěn mĩ. ²¹ “Ge tóg tĩ, ěg tĩ ga kri nén ũ há ve sór kĩ, ěg tĩ kanhkǎ tá tĩ nén ũ tũ nĩn kĩ, Topē mré. Ěg pi(jé) ga kri ěg tũ mág ěn ma mũnh mũ'. Ěg tĩ kanhkǎ tá tũ mág nỹtin kĩ tag hã tóg há nĩ,” he tóg, Jesus ti.

Ěg tĩ nén ũ to krĩ kufy han ke tũ

(Mt 6.25-34)

²² Kĩ tóg ā mré mũ tĩ ag mĩ: “ha vé,” he mũ. “Vėjėn to jykrén kĩ krĩ kufy tũg nĩ,” he tóg. “Inh hỹn ũri ne konh mũ? Inh hỹn ne tunh mũ?” he tũg nĩ. ²³ Topē tĩ ěg han ja vė, ěg tĩ ga kri mũ jé. Hã kĩ tóg ěg jėn ki rĩr ke mũ gé, ěg kur ki ke gé. ²⁴ Sēsĩ to jykrén nĩ. Ag mĩ ěkrǎn tĩ? Vó. Ag mĩ ājag jakré kunũg tĩ? Vó. Ag mĩ pǎjó han tĩ? Vó, ke tũ ag tóg nĩgtĩ,

ge ra Topê tóg ag jên tĩ. Jēsĩ káfór ājag tóg nýtĩ, Topê mý, hã kýt tóg ājag jên ke mũ gé. ²⁵ Kýt, Topê týt ěg jé prēr kýt ěg tóg mũnh mũ gé. ěg pi(jé) mũnh ke tũ nĩ, ti týt ěg jé prēr kýt'. ěg týt to krĩ kufy han mũ ra ěg tóg tũg mũ. ²⁶ ěg pi(jé) ěg krĩ kufy tugrĩn, ěg krĩ há tugnĩn mũnh ke tũ nĩ. Mũ jé ěg tóg ke mũ, ti týt ěg jé prēr kýt. Hã kýt nén ũ ũ to krĩ kufy han tũg nĩ.

²⁷ Ka fej to jykrén nĩ gé. Jatun mýt tóg mog tĩ. Rãnrãj tũ tóg nĩgtĩ, kur han tũ tóg nĩgtĩ. Hã ra tóg sĩnvĩ nýtĩgtĩ, ka fej ti, kýt pãĩ mág týt Salomão ěn kur tóg ri ke tũ nýtĩ ja nĩgtĩ, ti sĩnvĩ ja ra, vẽn kar kur sĩnvĩ káfór ti nĩ, Salomão kur ti. Ki hã sóg tó mũ mýt. ²⁸ Topê hã ne ka fej sĩnvĩ han tĩ'. Hã ra tóg kãnhmar kãgter tĩ, ka fej ti, ti sĩnvĩ ra. Ũri tóg há nýtĩ, týt vaj kýt tóg kógungun tĩ. Topê týt ka fej sĩnvĩ han kýt tóg ājag kur ki rĩr ke mũ gé, ha vemnĩ. Kýt ti to: “ti mýt ěg mýt kur nĩm mũ výt?” he tũg nĩ. ²⁹ “Inh hýt ne konh mũ, ũri?” he tũg nĩ gé. To krĩ kufy han tũg nĩ. ³⁰ Topê ki ge tũ ag výt tag to jykrén mág tĩ. Hã ra ěg jóg týt Topê výt ěg ki kanhró nĩ, ěg týt nén konh ke mũ ti, ěg kur ti ke gé. Kýt to krĩ kufy han tũg nĩ. ³¹ Topê týt týt ěg pãĩ nĩ ěn hã ve jé vãsãnsãn nĩ. Kýt tag hã to jykrén nĩ. Kýt Topê výt ājag mýt ājag týt nén ve sór mág ěn vin ke mũ sir,” he tóg, Jesus ti.

Kanhkã tá ěg tũ

(Mt 6.19-21)

³² “Kamẽg tũg nĩ, ājag pipir nýtĩ ra. ěg jóg týt Topê výt ājag to há nĩ, hã kýt tóg ājag mýt kanhkã ti ven sór mũ, ha mẽ. ³³ Ājag týt nén kar vin nĩ, ũn vēsýrénh mũ ag mýt. Hã kýt ājag tóg kanhkã tá týt nén ũ mág nýtĩnh mũ. Tá ājag kuge tóg tũ' henh ke tũ nĩ. Tag ki ěg tóg ěg jãnkamy fón tĩ, nén ũ kar to. Tá tóg tũ' he jãvãnh nĩ, ěg kuge ti. Tá ũ tóg péjunh kãtig ke tũ nĩ gé, tá ti ga tóg kaggranh ke tũ nĩ gé. Kanhkã tá ěg tũ výt ge nĩ. Tũg jãvãnh

ti nĩ. ³⁴ Ājag týt ga kri týt nén ũ mág nýtĩn kýt ājag tóg ga kri mũ mág sór mũ. Ājag týt hã ra kanhkã tá týt nén ũ mág nýtĩn kýt ājag tóg kanhkã ra mũ sór mũ, kýt tag hã ne há nĩ,” he tóg, Jesus ti.

Ěg týt Jesus kãtig mãn jãvãnh ke

³⁵ “Ěg kur týt ěg tóg vēsógfig tĩ, ěg týt rãnrãj há han jé. Ěg lampião grug ěg tóg tĩ, kuty kã, ěg týt ve há han jé. Ěn ri ke han nĩ, ājag týt inh kãtig mãn ke jãvãnh kýt. ³⁶ Kýt ājag tóg ũn camarada ri ke nýtĩ. Kejẽn ag patrão výt hẽn ra tũg mũ, ã prũ ke festa mág han jé. Kýt ti camarada ag výt ti týt tá výt ke jãvãnh nýtĩ. Ag týt ti jãvãnh há han kýt tóg há tĩ, ag nũgnũr tũ nĩn kýt. Kýt ag tóg kãnhmar ti týt jãnkã týt tórón tórón ke kýt mẽnũ mũ, kýt ag tóg ti mýt róm ke mũ sir, ti jun kýt. ³⁷ Kýt tóg kejẽn jun mũ sir, ag patrão ti. Kýt tóg sér tĩ, ti camarada ag týt ti jãvãnh nýtĩn kýt. Kýt tóg ag mýt vĩ há han ke mũ sir. Kýt tóg vēsóg fin kýt ag mýt: “nĩgnĩ ra ver, mesa to,” henh ke mũ sir. Kýt tóg ag mýt vėjẽn ven ke mũ. Ag patrão hã ne ã camarada ag mýt vėjẽn ven ke mũ', ha vemnĩ. Ki hã sóg tó mũ,” he tóg, Jesus ti. ³⁸ “Hẽn ri ke mũn tóg meia noite ki jun ke mũ, hẽn ri ke mũn tóg galo kyr mũ ra jun ke mũ. Ti camarada ag týt ti jãvãnh kýt nýtĩn kýt tóg ag mýt vĩ há tãvĩ han ke mũ sir, ha vemnĩ,” he tóg, Jesus ti.

³⁹ “Kýt tag to jykrén nĩ, ha mẽ. Inh kãtig mãn ke výt ũ týt nén ũ pigju(g) tĩ kãtig ri ke nĩnh mũ. ũ týt ti ĩn krẽm nĩ ěn pi(jé) ki kanhró nĩ, hora kã ti kãtig ke mũ ti. ũ týt ti týt nén ũ péju sór mũ tóg ěn ge nĩ, ha mẽ. Ti týt ti kãtig ke hora ki kanhró nĩ (hã) ra tóg ã kanẽ fãn mũ vẽ, ti týt ti ĩn kãra rã tũ nĩ jé. Hã ra tóg ki kãtig nĩ. ⁴⁰ Ge ti nĩ, inh kãtig mãn ke ti. Vẽn ki rĩr, vẽn ki ěmẽ. Ěprã ke fi kósĩn výt kãtig ke mũ, ājag týt ti kãtig ke to jykrén tũ (hã) ra,” he tóg, Jesus ti.

Ũn camarada to comparação

(Mt 24.45-51)

⁴¹ Kĩ Pedro vỹ ti mĩ: “Senhor,” he mũ. “Ã tỹ ù mĩ ke nẽ, ã tỹ tó ja tag ti? Ã tỹ ù tỹ ã ki ge tũ ag mĩ ke mĩ, ěg mĩ ke mĩ vó?” he tóg, Pedro ti, Jesus mĩ.

⁴² Kĩ ěg Senhor tóg ti mĩ: “hỹ,” he mũ. “Kejẽn patrão tóg hẽn ra tĩg sór mũ, kỹ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Ũ tỹ ã rãnrãj ki rĩr há han ti ěn kuprẽg tóg mũ, ti tỹ ag mĩ vễjẽn ven jé, vễjẽn ke horan ki. ⁴³ Ti tỹ ag ki rĩr há han kỹ ti patrão vỹ ti mĩ vĩ há han ke mũ, ti kãtĩg mãn kỹ, ù tỹ ag ki rĩr há han mũ ěn mĩ. ⁴⁴ Tỹ pã'i mág han jé tóg ke mũ, ti tỹ ti tũ ki rĩr kãn jé sir. Ki hã sóg ke mũ, ha mẽ. ⁴⁵ Ti camarada ěn jykre kórég nĩn kỹ tóg vẽnhmỹ nĩ jãvo, ha mẽ. To jykren kỹ tóg: “ẽg patrão vỹ kãtĩg vãnhan mũ,” he mũ. Kỹ tóg ã mré camarada ag vóg kónãn kỹ ag mrãnmrãn mũ sir, fag ke gé. Kỹ tóg jatun mĩ jẽn mág han mũ, ùn kronkron tĩ ag mré tóg kronkron kỹ pépév tĩ nĩ gé sir. ⁴⁶ Kỹ ti patrão vỹ ti kãnhmỹ jun ke mũ, ha vemnĩ, ti tỹ ti jun ke kurã ki kagtĩg nĩn kỹ, ti hora ti ke gé, kỹ tóg ti vóg kónãn ke mũ gé sir, ti patrão ti, kỹ tóg ti fón ke mũ, Topẽ vĩ mranh tĩ ag mré hã,” he tóg.

⁴⁷ “Topẽ camarada ù vỹ ã patrão kãtĩg ken jo ki rĩr há han tũ nĩgtĩ, ti patrão tỹ ti mĩ tó mũ ra. Ã patrão vĩ ki króm tũ ti nĩgtĩ. Ti mrãnmrãn mág jé tóg ke mũ, ti patrão ti, Topẽ ti. ⁴⁸ Ũ tóg ã tỹ nén han ke mẽ ja tũ nĩ, ti patrão vĩ ti, ti camarada ù ti. Hã ra tóg kórég han mũ gé. Kỹ ti patrão tóg ti mrãnmrãn ke mũ gé. Ti mrãnmrãn sĩ han jé tóg ke mũ jãvo. Ũ tóg vẽnhan kanhrãn mág han tĩ. Kỹ Topẽ tóg vẽnhan jykre há tãvĩ ve sór mũ sir, ti tỹ ki kanhrãn mág han mũ ěn to. Ũ mĩ ti vĩ mág tĩ, Topẽ ti, kỹ tóg ti tỹ ki króm há han ve sór mũ gé sir,” he tóg, Jesus ti.

Ũ tỹ Jesus tigrĩn ěg kato tẽnhan ke

(Mt 10.34-36)

⁴⁹ “Ga kri inh mur, isỹ re pũr tĩg ri ke han jé, hã vỹ: ùn e tỹ inh ki ge mũ, he mũ. Sỹ re pũr tĩg ri ke ěn venh há tóg tĩ, hã ra tóg ver gru tũ nĩ. ⁵⁰ Ti grug to hã sóg vễsỹrẻnh ke mũ. Iser ke vễ, kỹ tóg inh mĩ e tĩ. Sỹ ve jãvãnhan tóg tĩ, inh vễsỹrẻnh ke ti,” he tóg, Jesus ti.

⁵¹ “Ãjag hỹn iso: “vẽnhan kũ tỹ jagnẽ to há han jé tóg ke mũ,” he tĩ. Hã tũ vễ. Ũ tỹ hẽn ri ke tỹ jagnẽ kato tẽnhan jé sóg ke mũ, ha vemnĩ. ⁵² Ha vé, ĩn pĩr krẻm ke fag vỹ jagnẽ kato tẽnhan ke mũ. Ũn tãgtũ fag vỹ ùn rẻgre fag kato tẻgtẻnh mũ ha. Kar ùn rẻgre ěn fag vỹ ùn tãgtũ fag kato tẻgtẻnh mũ gé sir. ⁵³ Jagnẽ kato fag jagnẽ to jũgũnh mũ. Ũ tóg ã kósĩn kato tẽnhan ke mũ, kỹ ù tóg kejẽn ã panh kato tẽnhan ke mũ gé. Ũ fi vỹ ã kósĩn fi kato tẽnhan ke mũ, kỹ fi vỹ ã mỹnh fi kato tẽnhan ke mũ gé. Kỹ ù tóg ã má fi kato tẽnhan ke mũ, kỹ fi tóg ã jamrẻ kato tẽnhan ke mũ gé sir. Ge ti nĩgtĩ,” he tóg, Jesus ti.

Jesus jykre ki kanhrãn

(Mt 16.2-3)

⁵⁴ Kỹ tóg vẽnhan kar mỹ tó mãn mũ gé, kỹ tóg ag mỹ: “kanhkã ve kỹ ajag tóg ta ki kanhró nỹtĩ,” he mũ. “Kanhkã góg tỹ tãtã kãtĩn kỹ ajag tóg: “ta vỹ kutẻnh mũ,” he tĩ. Ki kanhró ajag tóg nỹtĩgtĩ. ⁵⁵ Kar ajag tóg kãka ki kanhró nỹtĩ gé. “Tag tán kãtĩ mũ, kãka ti, kỹn hỹn jũ jagy nĩnh mũ, ha vemnĩ,” he ajag tóg tĩ gé. ⁵⁶ Ki kanhró ajag tóg nỹtĩ, ta jykre ti, kãka jykre ti, ga jykre ti ke gé. Hã ra ajag tóg inh jykre ki kanhrãn rãn sór tũ nĩ, sỹ ùri ajag mỹ tó mũ tag ti. Kutu ajag nỹtĩ, ha mẽ, hã kỹ ajag tóg ki kanhrãn rãn sór tũ nĩ,” he tóg, Jesus ti.

Ĕg tỹ jagnē mỹ vēnh pāte fón

(Mt 5.25-26)

⁵⁷ “Kỹ ājag tóg vēnh jykre kuryj to jykren tũ nĩ gé, ājag tỹ jagnē mỹ vēnh pāte fón jé, ājag tỹ ver ga kri mũn kỹ.
⁵⁸ Kejēn ājag tóg jagnē mỹ vēnh jykre vēnhmỹ tó ti. Kỹ ājag tóg pā'i mỹ tónh mũ sir. Ā tỹ ũ to jũ mũ ěn vỹ ā tónh tĩg sór mũ. Tĩ tỹ pā'i tá jun ke to hā ti mré vĩmĩ. Tĩ mỹ: “inh mỹ vēnh pāte fón,” hemnĩ. Ke tũ nĩ mũ ra pā'i vỹ ā jykre pāno venh ke mũ, kỹ tóg polĩcia mỹ: “ti se ra,” henh ke mũ. Kỹ tóg ā senh ke mũ sir.
⁵⁹ Ha mẽ, tá ā kǎnhmar kǎkutē mǎn ke tũ nĩ. Ā tỹ kajām kǎn kar kỹ ā hēn ri ke mũn tá kǎkutē mǎn ke mũ sir,” he tóg. Jesus tỹ ěg tỹ jagnē mỹ vēnh pāte fón kǎmēn hā vē.

Ĕg tỹ ěg jykre tovānh ke

13 Kejēn ũ ag tóg Jesus tá junjun mũ, hā ra ag tóg ti vĩ mẽ kỹ nỹtĩ. Kurā ěn kǎ ũ ag tóg ti mỹ Galilėia tá ke ag tó ja nĩ, fóg tỹ pā'i tỹ Pilatos tỹ ũn kǎgtén ja ěn ag. Topē mỹ ag tóg ājag mēg tǎnh ja nĩ, ti mỹ pũn jé, hā ki Pilatos tóg ag kygrēn ja nĩ, hā kỹ ag kyvénh tóg ājag mēg kyvénh mré kutē ja nĩ. Hā kǎmēn ag tóg, Jesus mỹ, ti tỹ ag mỹ e tĩn kỹ, ag tỹ ũn kǎgter mũ ag to: “ag hỹn Topē vĩ mranh mǎg,” hen kỹ.
² Kỹ Jesus tóg ag mỹ: “ājag hỹn Galilėia tá ke ěn to jykren sór mũ, ũn kǎgter mũ ěn ag to,” he mũ. “Topē vĩ mranh mǎg tĩ ag vē,” he ājag tóg mũ ag to. “Ag hỹn vēnh jykre pāno han mũ nĩ, ag hỹn Galilėia tá ke ag jykre pāno kǎfór han mũ nĩ, hā kỹ Topē hỹn tóg ag vóg kónān mǎg,” he ājag tóg tĩ ag to.
³ Ke tũ vē hā ra. Ājag ri ke ag tóg nỹtĩ, mỹr, ha mẽ. Ājag tỹ ājag jykre tovānh tũ nĩn kỹ ājag tóg nũgme ki vǎr ke mũ, ha vemnĩ,” he tóg.
⁴ “Ũ tỹ 18 (ke) ěn ag to jykren nĩ, ũ tỹ goj tỹ Siloé tá kǎgter mũ ěn ag. Īn tėj ěn tóg ag kri kutē, ĩn vag jē ěn ti, hā kỹ ag kǎgter mũ. Jerusalém

tá ke kar ag jykre ri ke ja ag tóg nỹtĩ. Ag pi(jé) ag jykre pāno ěn kǎfór ja nỹtĩ. Ag ri ke han ja ag nỹtĩ, ha mẽ.
⁵ Kỹ sóg ājag mỹ ke mũ. Ājag tỹ ājag jykre pāno tovānh tũn kỹ ājag tóg nũgme ki vǎr ke mũ,” he tóg, Jesus ti.

Ka tỹ figueira to comparação

⁶ Kỹ tóg ag mỹ: “ũ tỹ Topē jykre han sór tũ ag vỹ ge nỹtĩnh mũ, ha mẽ,” he mũ. “Kejēn ũ tóg nĩgtĩ. Ka há krān ja tóg nĩgtĩ, ka tỹ figueira. Ka kanē ũ vē, ko há ti jē. ěn krān ja tóg nĩ. Uva kǎmĩ tóg ti krān ja nĩ. Kỹ tóg kejēn ti kanē ko sór mũ, kỹ tóg venh kǎtĩ mũ. Hā ra tóg kanēn ja tũ nĩ.
⁷ Kỹ tóg uva ki rĩr tĩ mỹ: “ti gỹn ra,” he mũ. “Prỹg tǎgtũ tóg nĩ ha, sỹ ti kanē vég tũ ki. Kanēn vānh ti hỹn jē. Tĩ gỹn ra, ti tỹ ga kókég tũ nĩn jé,” he tóg.
⁸ Hā ra tóg ā patrāo mỹ: “ti tovānh ra ver,” he mũ, uva ki rĩr tĩ ti. “Tĩ pēnĩn sóg kũm mũ ver, sỹ ti krēm ga jēgja han jé ver.
⁹ Hēn ri ke mũn tóg kanē há hyn han ke mũ ha. Ke tũ nĩn kỹ sóg ā mỹ ti gỹn ke mũ vāhā,” he tóg mũ, uva ki rĩr tĩ ti,” he tóg, Jesus ti. Tĩ tỹ ũ tỹ ā jykre kórég tovānh sór tũ tón hā vē.

Jesus tỹ vēnhkǎn ke kurā ki ũn kaga tỹ há' he

¹⁰ Kejēn tóg ag vēnh kanhrān jafā krēm ag kanhrān mũ, Jesus ti, vēnhkǎn ke kurā ki.
¹¹ Kỹ ũ fi tóg tá jē nĩ. Jagrē kórég fi nĩ, hā kỹ fi tóg pǎnh ke kỹ jē nĩ. Vēnh ra hā jē kórég fi tóg nĩ, fi jagrē tugnĩn. Prỹg tỹ 18 (ke) han fi tóg, fi jagrē tỹ fi kagāg tĩ ki.
¹² Kỹ Jesus tóg fi vég mũ, kỹ tóg fi jé prēr mũ. “Kunĩg, jỹ,” he tóg. “Ā kaga tỹ sóg tũ' henh mũ,” he tóg fi mỹ.
¹³ Kỹ tóg ā nĩgé tỹ fi kri fig mũ. Kỹ fi tóg vēnh ra hā jēg há han mũ, ha mẽ. Kỹ fi tóg Topē to vĩ há han mũ sir.

¹⁴ Hā ra vēnh kanhrān jafā to pā'i tóg Jesus to jũ mũ, ti tỹ vēnhkǎn ke kurā ki fi tỹ há' hen kỹ. Tĩ mỹ tóg tỹ vēnh rǎnhraj nĩ, fi tỹ há' he mũ tag ti, hā kỹ tóg Je-

sus to jũ mũ. Kĩ tóg vĩ mũ sir. Vênh kar jyvên kĩ tóg ag mĩ: “kurã tỹ 6 (ke) hã ki ěg tóg rânhrãj ke mũ ha,” he mũ. “Hã kĩ kurã tỹ 6 (ke) ěn ki kãmũmnĩ, ti tỹ ajag tỹ há’ hen jé. Vênhkán ke kurã ki vênh kytgãg kãmũ tũg nĩ,” he tóg mũ, pã’i ti.

¹⁵ Hã ra Jesus tóg ti vĩ kãfãn mũ, kĩ tóg: “jykre régre ã nĩ (mỹr),” he mũ. “Vênhkán ke kurã kã ajag tóg ajag mềg ki rĩr ti gé, monh ki, cavalo ki ke gé, ha mề. Ajag mềg kygvãn ajag tóg ti, ajag tỹ ti kron mũn jé, ti tỹ ĩn kãkã se kĩ jé kĩ, cocho to. ¹⁶ Kĩ tag fi vĩ se kĩ jé ěn ri ke jé ja nĩ gé, ha mề. Satanás hã vĩ fi sé’, prỹg tỹ 18 (ke) ki. Ěg jóg’jóg ve tỹ Abraão kósĩn ũ fi vễ, ěg mềg kãfór fi tóg jé, hã ra ã tóg jũ sór mũ, isỹ vênh kán ke kurã ki fi tỹ há’ hen kĩ, isỹ fi kavãn ri ke han kĩ. Vênh jykre vênhmỹ han sór ã tóg nĩ,” he tóg, Jesus ti, pã’i ti mỹ.

¹⁷ Ti vĩ tag to ag tóg mỹ’ãg’ãg mũ sir, ti kato tẽ mũ ag. Hã ra tóg vênh e ěn mỹ sér ti sir. Ag mỹ tóg nén ũ kar há han ti, hã kĩ tóg ag mỹ sér ti sir.

Mostarda fy to comparação

(Mt 13.31-32; Mc 4.30-32)

¹⁸ Kĩ Jesus tóg ag mỹ: “Topẽ tỹ tỹ ěg pã’i ninh ke vĩ ge nĩ, ha mề,” he mũ.

¹⁹ “Vãnh tỹ mostarda fy ri ke ti nĩ. Sĩ ti nĩ, ti fy ti. Ěg japỹ ki ěg tóg krãn ti, kĩ tóg mog ti. Kĩ tóg ka ri ke nĩ, ti tỹ pẽ téj nĩn kỹ. Hã kĩ sễsĩ tóg kri jagfẻnh ke mũ, ti pẽ kri, ti pẽ mág nĩn kỹ. Topẽ tỹ tỹ ěg pã’i nĩ kãmẽ tỹ vênh kar kri rũm ke to ken hã vễ,” he tóg, Jesus ti.

Fermento to comparación

(Mt 13.33)

²⁰ Kĩ tóg ag mỹ: “Topẽ tỹ tỹ ěg pã’i nĩn kĩ tóg tag ri ke ninh mũ, ha mề,” he mũn mũ. ²¹ “Ũn tỹtã fag vĩ pảo han ti, farĩnh tỹ. Pảo han jé fag tóg pảo jẻgja jãfã tỹ fermento ěn tỹ farĩnh mrẻ jẻgjãg ti. Ke-jẻn ũ fi tóg farĩnh e kãki ti jãgja jãfã pir tỹ kãki vãm ja nĩ, hã ra tóg tỹ són ke kãn,”

he tóg, Jesus ti. Ti vĩ tỹ vênh kar kri rũm ke kãmẻn hã vễ.

Jãnka sĩ to comparação

(Mt 7.13-14, 21-23)

²² Kĩ Jesus tóg ti mũ. Cidade e fin rãm tóg mũ, ěmã kãsĩr fin ke gé. Tĩg kĩ tóg ag kanhrãn rãn mũ sir. Ge kĩ tóg komẻ hã cidade tỹ Jerusalẻm kukãm ti mũ.

²³ Kĩ ũ tóg ti mỹ: “Senhor,” he mũ. “Ũn krenkren mũ ag mỹ pipĩr nỹtĩ, e nỹtĩ vớ?” he tóg ti mỹ. Kĩ tóg ti mỹ: ²⁴ “hỹ,” he mũ. “Inh ki rã vĩ jãnka sĩ ra rã ri ke nĩ,” he tóg. “Vãsãn nĩ, ã tỹ ra rã jẻ. Kejẻn ũ tóg ra rã mãn ke tũ nĩ ha. Ěn kã ũ tỹ hẻn ri ke ag vĩ ra ge sór mũ, hã ra ag tóg tỹ hẻ ri kenh ke tũ nĩ ha sir. ²⁵ ĩn ki rĩr ti ěn tỹ nẻfẻnh ja vễ mỹr, hã kĩ ag tóg ĩn kãra genh ke tũ nĩ ha. Kanhkã to ken hã vễ, ĩn ti. ĩn ki rĩr ti ěn hã ne nẻfẻnh ke mũ, kĩ ajag tóg sir re tá nỹtẻnh kĩ tỹ tórón’ tórón’ kenh ke mũ. “Senhor’, ěg mỹ róm, ěg mỹ nón, jãnka ti,” he jẻ ajag tóg ke mũ. Hã ra tóg sir ajag mỹ: “ajag ki kagtĩg sóg nĩ,” hẻnh ke mũ, ĩn ki rĩr ti ti. “Ajag tỹ ũ nỹtĩ?” he jẻ tóg ke mũ.

²⁶ Kĩ ajag tóg ti mỹ: “ã mỹ ěg ki kagtĩg?” hẻnh ke mũ. “Ěg hã vĩ ã mrẻ jẻn ja nĩ, ěg hã vĩ ã mrẻ kron ja nĩ, ěg kanhrãn ja ã tóg nĩ, ěg jamã tá. Ěg hã vễ,” he jẻ ajag tóg ke mũ, ajag tỹ re tá nỹtẻn kỹ. ²⁷ Hã ra tóg ajag mỹ: “inh pi(jẻ) ajag ki kanhrỏ nĩ,” hẻnh ke mũ. “Ajag pi(jẻ) tỹ inh mrẻ ke nỹtĩ. Ha mủjẻg. Vênh jykre pảo han ajag tóg mủgtĩ,” he jẻ tóg ke mũ, ĩn ki rĩr ti ti, ajag mỹ. ²⁸ Ajag tỹ ra mũnh ke tá ajag tóg vẻsỹrẻnh ke mũ, tá ajag jã tóg gyngyn ke mũ, gangan ke jẻ ajag tóg ke mũ, tá. Kỏr há tá ajag tóg Abraão vẻnh ke mũ, tá, Isaque ke gé, Jacỏ ke gé, Topẻ vĩ tỏ ti ag kar ke gé. Ěn ag kar vĩ Topẻ tỹ tỹ ěg pã’i nĩ vẻnh mũ sir, ajag jãvo. ²⁹ Ěn kã Topẻ ki ge kĩ nỹtĩ kar ag tóg kãmủnh mũ, rã jur ja tá, rã pur ja tá, kanhkã fyr tá, rã krẻm tũg ja tá. Kãmũ kĩ ag tóg Topẻ tỹ tỹ ěg pã’i nĩ vẻnh ke mũ, ti tỹ ag ki rĩr

nĩ ti, k̄y ag tóg tá jēg n̄tĩnh m̄ ājag jāvo.
³⁰ K̄y tag ki ũn k̄asir ũ ag tóg mág n̄tĩnh m̄, tá p̄i n̄tĩnh m̄. K̄y tag ki ũn mág ũ ag tóg k̄asir n̄tĩnh m̄ gé, tá, tére k̄y,” he tóg, Jesus ti.

Jesus t̄y Jerusalém tá ke ag to há nĩ
(Mt 23.37-39)

³¹ Kurā ěn k̄a Fariseu ũ ag tóg tá junjun m̄, Jesus mré vēmén jé. Ti m̄y ag tóg: “ha mē,” he m̄. “P̄i mág t̄y Herodes v̄ ģ tén sór m̄. H̄a k̄y v̄nh p̄ju t̄g, ěm̄ ũ ra,” he ag tóg m̄ sir, Jesus m̄y.

³² K̄y tóg ag m̄y: “m̄g s̄i ri ke ti nĩ, Herodes ti,” he m̄. “H̄a k̄y tóg ke m̄. Ver sóg v̄nh jagrē kórég pan m̄, ũn kagyga ag t̄y há’ he jé sóg ke m̄, ũri, vaj k̄y ke gé, kurā t̄y h̄en ri ke ki. K̄anhmar sóg ter ke m̄, inh kurā ki, ha vemnĩ.
³³ Ūri sóg ver t̄g m̄, vaj k̄y ke gé, vaj ũn k̄y ke gé. Iser ken k̄y sóg Jerusalém tá ter ke m̄. Tag ki ke pijé’. Topē v̄i tó t̄i v̄y t̄y inh nĩ, jo Jerusalém tá ke ag tóg ag k̄agtén t̄i, Topē v̄i tó t̄i ag. H̄a k̄y sóg Jerusalém tá ter t̄g ke m̄ gé. Tag tómnĩ, Herodes m̄y,” he tóg, Jesus ti.

³⁴ K̄y tóg Jerusalém ki ke ag to vēmén m̄. Fe kaj han tóg, ag to, k̄y tóg: “Jerusalém tá ke ag m̄y sóg tag tó sór m̄, ha mē,” he m̄. “Topē v̄i tó t̄i ag k̄agtén ag tóg t̄i. Topē t̄y ag m̄y ũn j̄egn̄g t̄i ag pin ag tóg t̄i, pó t̄y, ag t̄y ag k̄agtén jé. Is̄y ag v̄nh m̄n há tóg t̄i v̄e, is̄y ag ki r̄ir jé, Jerusalém tá ke ag, h̄a k̄y sóg ag jé pr̄er t̄y h̄en ri ke han m̄. Gar̄inh fi jykri ri ke han sór isóg m̄ v̄e, ag m̄y. Gar̄inh fi v̄y ģ kr̄e kri j̄e nĩ, fi t̄y ag v̄es̄yr̄enh t̄i nĩ jé ke v̄e. ěn ri ke han sór sóg m̄ v̄e, h̄a ra ag tóg ke jāv̄anh n̄t̄i. ³⁵ H̄a k̄y ag tóg ag jamā p̄un k̄an ke m̄, k̄y v̄ap̄ur v̄e sir. Ū v̄y k̄anhmar tá n̄g m̄n ke t̄i nĩ ha, ag t̄y cidade kókén ja tá. H̄a k̄y sóg ag m̄y ke m̄. Inh ve m̄n ke t̄i ag nĩ ha (m̄yr). Kej̄en ag tóg iso: “Topē t̄y ti j̄enē ja v̄e,” h̄en ke m̄. “Topē v̄y ti ve há han, ti t̄y ti j̄iji tó k̄at̄ig k̄y,” he jé ag tóg ke m̄ iso.

ěn h̄a k̄a ag tóg inh ve m̄n ke m̄,” he tóg, Jesus ti.

Jesus t̄y v̄enhkán ke kurā ki ũ t̄y há’ he

14 Kej̄en tóg v̄enhkán ke kurā tá kr̄y m̄. K̄y tóg p̄i ũ ģn kr̄em n̄ nĩ. Fariseu ag p̄i v̄e. Ti t̄y ti ģn kr̄em j̄en ke v̄e. H̄a ra ag tóg tá ti t̄y r̄ir m̄, “ti m̄y v̄enhkán ke kurā ki r̄anh̄r̄aj ke t̄i?” he ag tóg m̄.

² H̄a ra ũ tóg tá nĩ gé, ũn kaga ũ. K̄anhpar k̄an k̄y tóg j̄e. Jesus r̄in ja tá tóg j̄e nĩ.
³ K̄y Jesus tóg Topē v̄i to professor ag m̄y ke m̄, Fariseu ag m̄y ke gé. Ag m̄y tóg: “ěg t̄y v̄enhkán ke kurā k̄a ũ t̄y há’ h̄en m̄y há nĩ, m̄y kórég n̄ vó?” he m̄. ⁴ H̄a ra ag tóg ti m̄y n̄n ũ tó t̄i nĩ. K̄y Jesus tóg ũn kaga ěn kri ģ n̄ḡe fi k̄y ti t̄y há’ he m̄ sir. K̄y tóg ti m̄y: “ha t̄g ge,” he m̄.
⁵ K̄y tóg ag m̄y: “kej̄en ājag kós̄in ũ tóg goj ki kut̄enh m̄,” he m̄, “goj nig ki, ke t̄i n̄n k̄y ājag m̄g t̄y monh. V̄enhkán ke kurā ki tóg goj ki kut̄enh m̄, h̄en ri ke m̄n. K̄y ājag tóg ti kun̄g t̄i gé, ti t̄y v̄enhkán ke kurā k̄a ki kut̄en k̄y. K̄y ājag t̄y ne jé iso j̄u sór n̄e?” he tóg. ⁶ K̄y tóg ag t̄y ti m̄y n̄n tónh ke tóg t̄i t̄i sir.

Festa to comparaç̄ao

⁷ K̄y Jesus tóg v̄enh kar kanhr̄an jé tag tó m̄ sir, ha mē. Ti mré j̄eḡj̄en k̄y n̄t̄i ag m̄y tóg k̄amén m̄. Ag j̄en vén sór v̄e, ag t̄y t̄y ũn mág n̄t̄i jé. H̄a v̄ég tóg m̄, h̄a k̄y tóg ag kanhr̄anr̄an sór m̄, Jesus ti. ⁸ K̄y tóg ag m̄y: “kej̄en ũ tóg ājag m̄y: “kurā ěn k̄a sóg v̄enh pr̄ug ke to festa han ke m̄. Ha inh mré j̄en k̄at̄ig,” h̄en ke m̄. K̄y ti festa k̄a j̄en vén sór t̄ug nĩ. H̄en ri ke m̄n ģ k̄afór n̄ ũ tóg ki jun m̄. ⁹ K̄y festa ki r̄ir m̄ tóg ģ m̄y: “toreg ver’,” h̄en ke m̄. “Ti j̄en kar k̄y ģ tóg j̄en ke m̄. M̄e k̄y j̄e n̄ ver,” he jé tóg ke m̄ ģ m̄y, ũ t̄y festa ki r̄ir t̄i ti. K̄y tóg ģ m̄y’a t̄inh m̄ sir, ha mē. ¹⁰ K̄y ģ t̄y festa v̄enh t̄ig k̄y m̄e k̄y n̄mn̄i ver, v̄ej̄en jāv̄anh k̄y. K̄y festa ki r̄ir m̄ v̄y ģ m̄y: “ha j̄en vén,

fag mré,” henh ke mû. Kÿ ã pi(jé) mÿ'äg ke mû,” he tóg ag mÿ, Jesus ti. ¹¹ “Hã kÿ tóg ù tÿ ag káfór nĩ sór mû térem ke mû, vësÿkã, Topê ti, ha vemñĩ. Jãvo tóg ù tÿ: “tÿ inh ùn sĩ nĩ,” he mû ên jãnfin ke mû, ha vemñĩ,” he tóg, Jesus ti.

Ëg tÿ ùn jagtar ag jagãgtãn

¹² Kÿ tóg ù tÿ ã kógfin mû ên mÿ kãmén mû gé. Tĩ mÿ tóg: “ã tÿ festa han sór kÿ ùn rico ag mÿ tó sór tũg nĩ, ã mré ke fag mÿ, ã kãke ag mÿ, ã jãvy ag mÿ, ã rã nÿtĩ ag mÿ tó tũg nĩ gé,” he mû. “Ã tÿ ùn rico ag mÿ tó mû ra ag tóg vênh kaja jé ã mÿ festa han sór mû gé. Kÿ ã tóg ã festa kaja ti vég mû sir, êprä. ¹³ ã tÿ festa han sór kÿ ùn kaga kÿ rãnhraj vãnh ag mÿ tómnĩ, ùn kãnhgrĩ ag mÿ, ùn kyvó ag mÿ. ¹⁴ ã tÿ tag han kÿ Topê vÿ ã ve há han ke mû, ha vemñĩ. ã mÿ ag tóg festa han ke tũ nĩ, ag tÿ nén ù tũ nĩn kÿ. Kÿ ã tóg ã rĩr măn ken kÿ ti kaja venh ke mû, Topê tÿ ùn jÿkre kuryj kar rĩnrĩr măn ke kurã ên kã,” he tóg, Jesus ti.

Festa mág to comparação

(Mt 22.1-10)

¹⁵ Kÿ tóg tá nĩ ù mÿ mẽ há tĩ, Jesus vĩ tag ti. Tá nĩg kÿ tóg ag mré jêg mû gé, hã kÿ tóg Jesus vĩ mẽg mû. Kÿ tóg ti mÿ: “ù tÿ Topê tÿ tÿ êg pãlĩ nĩ vég mû mÿn hÿn sêr pẽ tĩnh mû, ù tÿ tá festa vég mû ên mÿ,” he mû.

¹⁶ Kÿ Jesus tóg ti kanhrãn kÿ ti mÿ: “kanhkã tá festa vÿ ge nĩnh mû, ha mẽ,” he mû. “Kejên ù tóg nĩgtĩ. Festa mág han sór tóg mû, kÿ tóg ù tÿ hên ri ke ag mÿ tó ja nĩ, ti tÿ festa han ke to hã. ¹⁷ Tĩ festa kurãn kã tóg ã camarada jênêg mû, ti tÿ ùn kógfin kÿ nÿtĩ ag mÿ: “ha kãmũjêg,” he jé. “Kar kÿ tóg nĩ ha, inh festa ti,” hemñĩ,” he tóg, ã camarada mÿ. Kÿ tóg ag mÿ tónh tĩ mû sir. ¹⁸ Hã ra ag tóg ve sór tũ nĩ, ag kar ti, hã kÿ ag tóg ti mÿ vĩ mû. ù tóg ti mÿ: “ga kajãm inh,” he

mû. “Hã kÿ sóg iÿapÿ venh tĩ mû ver. Ûri tóg inh mÿ vênhmÿ tĩ. Sÿ festa venh tĩg ke vẽ vẽ, hã ra tóg vênhmÿ tĩ,” he tóg mû. ¹⁹ Kÿ ù tóg ti mÿ: “monh génh sóg, monh tÿ 5 (ke) régre,” he mû gé. “Kÿ sóg ag venh tĩ mû ver. Sÿ festa venh tĩg ke vẽ vẽ, hã ra tóg vênhmÿ tĩ,” he tóg mû gé sir, ù tĩ. ²⁰ Kÿ ù tóg ti mÿ: “ũri sóg prũg mû ha, hã kÿ tóg vênhmÿ tĩ,” he mû gé.

²¹ Kÿ ti camarada tóg ti mÿ tónh kãti mû, ã patrão mÿ. Kÿ tóg jũ mû. Tĩ mÿ tóg: “êpry ra tĩg, êmĩn mág ra, êpry kãsir ra ke gé, êmã kar ki,” he mû. “Kÿ ùn jagtar ag tatĩ kãtĩg, ùn kónhgrĩ ag, ùn kyvó ag, ùn tĩg vãnh ag ke gé,” he tóg. ã camarada mÿ tóg ke mû. ²² Kÿ tóg tĩg măn mû, ti camarada ti. Kÿ tóg tá vÿn ke kÿ ã patrão mÿ: “ke kãn inh huri,” he mû. “Ag tatĩ kãtĩg inh huri, hã ra tóg fór tũ nĩ ver, festa jo ãn ti,” he tóg mû, ti camarada ti, ti patrão mÿ.

²³ Kÿ ti patrão tóg ti mÿ: “vësÿkã tĩg măn ge,” he mû. “Vãnh kãmĩ tĩg, êmã kãsir pẽ kãmĩ ke gé, êpry ra, êmĩn jagma,” he tóg. “Tá ag mÿ tugtónh tĩg. Ag kutãn nĩ, ag kãmũ jé, festa jo ãn fór jé,” he tóg, patrão ti, ã camarada mÿ,” he tóg, Jesus ti.

²⁴ “Hã kÿ sóg ãjag mÿ ke mû,” he tóg. “Û mÿ sóg tó vén ja nĩ, hã ra ag tóg inh festa venh ke tũ pẽ nĩ, sÿ ù mÿ tó vén ja ag,” he tóg. Jesus tÿ Fariseu ag mré jên kÿ ag mÿ kãmén hã vẽ.

Ëg tÿ êg jÿkre tovãnh

(Mt 10.37-38)

²⁵ Kejên ùn e ag tóg Jesus nón mû mû. Kÿ tóg ag jé vĩrĩn ke kÿ ag mÿ: ²⁶ “hã mẽ,” he mû. “Û tÿ inh mré tĩg pẽ han sór mû jé inh hã to há káfór nĩ, ã han mû fag kri, ti prũ fi kri, ti krê kri, ti kãke ag kri, ti jãvy ag kri, ti ve fag kri, vênh kri ke gé, mÿr, ha mẽ,” he tóg. “Ke tũ nĩ mû ra tóg inh mré kãtĩg ke tũ nĩ, kÿ tóg tÿ inh mré ke nĩnh ke tũ nĩ gé. ²⁷ Ha vé, ag tÿ inh cruz tÿ inh kri fi kÿ sóg tĩg ke mû,

ag tỹ to isa kỹ isén jé, ha vemñĩ. Vènh nenh ke tũ sóg nĩ. Ủ tỹ inh ri ke han sór tũ nĩn kỹ tóg inh mré kâtĩg ke tũ nĩ, kỹ tóg tỹ inh mré ke nĩnh ke tũ nĩ gé,” he tóg, Jesus ti,

²⁸ “To jykrén, ù tỹ ìn téj han sór mũ ên to. Ti tỹ ìn téj han sór kỹ tóg ã jänkamy nĩkrén vén ke mũ. Kỹ tóg ìn kaja to jykrén ke mũ gé sir. Kar kỹ tóg ìn han sór ke mũ vánh. ²⁹ Ti tỹ to hã to jykrén há han tũ ra tóg vènhmỹ ti. Kỹ tóg ìn jęg ken ki kũm kỹ ti króggróg han ke mũ sir. Ti króggróg han kỹ ti jänkamy tóg tũ' henh ke mũ, kỹ tóg továnh ke mũ sir, ti tỹ ìn han ti. Kỹ ti mré ke ag tóg ti to vĩ kỹ ti nynh mũ sir. ³⁰ Ti to ag tóg: “ha mẽ, ìn téj han sór tóg mũ vế, hã ra tóg to jykrén há han ja tũ nĩ, hã kỹ tóg kar tũ nĩ,” henh ke mũ, ti régre ag,” he tóg.

³¹ “Kar pã'i mág to jykrén nĩ gé. Pã'i ù tỹ ti mré vènh génh sór kỹ tóg ã krêm ke ag nĩkrén ke mũ gé sir, vènh génh ke to hã. “10 mil (ke) ãg nỹtĩ,” he jé tóg ke mũ. “Êg mỹ ag tỹ hèn ri kenh mũ vỹ?” he jé tóg ke mũ. “20 mil (ke) ag nỹtĩ. Ag mỹ ãg tỹ tũ' he kãn ke tũ nĩ vỹ? Êg kãfór ag tóg nỹtĩ. Êg hỹn hẽ ri kenh mũ, ag tỹ ãg továnh jé?” he jé tóg ke mũ, pã'i ti. ³² Ti tỹ tag to jykrén kỹ tóg pã'i ù ên mỹ vènh vĩ jènènh mũ, ti tỹ kór há tá nĩ (hã) ra, kuvar há tá. Ti mỹ vènh vĩ jènèn kỹ tóg ti mỹ: “ã mỹ ãg továnh ke tũ nĩ?” he mũ. “Inh ã mỹ ne nĩm mũ, ã tỹ isovánh jé?” he jé tóg ke mũ, pã'i ên mỹ,” he tóg, Jesus ti.

³³ “Hã kỹ to jykrén nĩ, ãjag tỹ inh mré mũ pẽ han ke to. Iso há kãfór nỹtimnĩ, ãjag tũ kar kri. Ke tũ nĩ mũ ra ãjag pi(jé) inh mré mũ pẽ han mũ,” he tóg, Jesus ti.

Sa to comparação

(Mt 5.13; Mc 9.50)

³⁴ “Sa vỹ há nĩ. Hã ra sa kãhór tĩn kỹ ãg tỹ ne tỹ ti tỹ kaja' henh ke tóg tũ tĩ,

tỹ sa' he mãn ke tũ tóg tĩ,” he tóg. ³⁵ “Ti kãhór tĩn kỹ tóg kórég nĩ, kỹ ãg tóg fón tĩ. Êg pi(jé) ãg japy ki ti fón tĩ, ti tỹ ãg jakré tỹ há' he tũ nĩn kỹ, sa kãhór ti. Ti fón pẽ han jé ãg tóg ke mũ. Ri ke ãjag nỹtĩ, ãjag tỹ inh mré mũ pẽ han tũ nĩn kỹ. Jẽmẽ há han nĩ, sỹ ãjag mỹ nẽn tóg mũ tag ti,” he tóg, Jesus ti.

Ovelha vãfor to comparação

(Mt 18.12-14)

15 Kejèn ù tỹ imposto mág tĩ ag tóg ti to kãmũ mũ, Topẽ vĩ mranh tĩ ag ke gé. Ag tỹ ti vĩ mẽ sór vế. ² Kỹ tóg Fariseu ag mỹ kórég nỹ, Topẽ vĩ to professor ag mỹ ke gé. Kỹ ag tóg ti to vĩ vĩ he mũ sir. “Topẽ vĩ mranh tĩ ag to tóg há nĩgtĩ, tag ti,” he ag tóg mũ. “Ag mré tóg jęg tĩ mỹr,” he ag tóg mũ, Jesus to.

³ Kỹ tóg ag kanhrãn jé ag mỹ: “ũ tỹ Topẽ vĩ mranh mũ tỹ ã jykre kórég továnh kỹ tóg ge nỹnh mũ, ha mẽ,” he mũ. ⁴ “Ủ tóg nĩ ja nĩgtĩ,” he tóg. “Ti męg tỹ mé vỹ tỹ 100 (ke) nỹtĩ, ti męg tỹ ovelha ti. Kỹ ti męg pir tóg vãfor mũ. Hã ra tóg ti kanøg tĩ mũ, ti jãvánh tĩ tóg mũ, ha mẽ. Ûn e ên továnh kỹ tóg ùn pir ên nón tĩ mũ. Ga kórég tá ag nỹtĩ, ti męg kar ên ag. Ag togvánh kỹ tóg ùn pir ên nón tĩ mũ, ha mẽ. ⁵ Kỹ tóg ti vég mũ sir, ti męg vãfor ja ên ti. Kỹ tóg ã nunh kri ti fi kỹ ma tĩ mũ. Ti fe tóg mrin ke mũ sir. ⁶ Kỹ tóg ã ìn tá jun mũ. Tá tóg ã kanhkã fag jé prër mũ, ti rã hã nỹtĩ fag kar. Kỹ tóg fag mỹ tóg mũ. “Inh mré ti to mỹ sér,” he tóg. “Inh męg vỹ vãfor ja nĩ, hã ra sóg ti ve mãn mũ ha,” he tóg mũ, ã męg to,” he tóg, Jesus ti. ⁷ “Hã ra tóg ge nĩ, ha mẽ. Ủ tỹ 99 (ke) ag tỹ vènh jykre kuryj han kỹ tóg há tĩ sir, kỹ tóg mỹ sér tĩ sir, kanhkã tá ke ag mỹ. Hã ra tóg mỹ sér kãfór tĩ, ùn pir tỹ ã jykre kórég továnh kỹ, ti tỹ ã tỹ Topẽ vĩ mranh mũ ên továnh kỹ, ha mẽ. Kỹ isũ ag vỹ e nỹtĩ,” he tóg, Jesus ti.

Jānkamy vāfor to comparação

⁸ “Kỹ ũn týtá to vême vỹ ge nĩ, ha mẽ,” he tóg. “Jānkamy tỹ 10 (ke) tỹ fi tũ nĩ, jānkamy tỹ por dia kaja tỹ 10 (ke) tỹ. Kejēn ũn pir tóg fi mỹ vāfor mũ, kỹ fi tóg lampiāo grub mũ sir. Fi in kāmĩ fi tóg prun kân mũ. Ve há han fi tóg mũ, jānkamy ěn kanĕg jé, in péno kar mĩ há. ⁹ Vāhā fi tóg kejēn ve măn mũ sir. Kỹ fi tóg ģ mré ke kar fag jé prēr mũ, fi rā há nýtĩ fag kar ke gé. Kỹ fi tóg fag mỹ: “inh mré to mỹ sér,” he mũ. “Inh jānkamy vỹ vāfor ja nĩ, há ra sóg ve măn mũ ha,” he fi tóg mũ. ¹⁰ Hā ra tóg ge nĩ, kanhkā tá, ha mẽ. Topē tỹ jēnē jafā ag mỹ tóg sér tāvĩ tĩ, ũ tỹ ģ jykre kórég to jũn kỹ, ti tỹ ģ tỹ Topē vỹ mranh ěn tovānh kỹ, ha mẽ,” he tóg, Jesus ti.

Ũn kósin vāfor to comparação

¹¹ Kỹ tóg ag mỹ tag tó mũ gé sir, ha mẽ. “Ũ vỹ tóg kósin régre ja nĩgtĩ,” he tóg. ¹² “Kỹ ti kósin tỹ ěgno tóg ģ panh mỹ: “panh’,” he mũ. “Inh mỹ ũri isũ nĩm, ģ tỹ inh mỹ nén nĩm ke mũ ěn ti,” he tóg, ģ panh mỹ. Ti tỹ to vĩnh ke tũ vē vē, há ra tóg to vỹ mũ. Ge ra ti panh tóg ģ krē mỹ ģ tũ vēnh kápām mũ sir. ¹³ Kānhmar ti kósin kyrũ tóg ģ tũ măn kỹ kór há ra, kuvar há ra tĩ mũ, ga ũ ra. Tá tóg ģ tũ vām kân mũ, nén ũ kórég kar to. ¹⁴ Vām kân ja tóg nĩgtĩ, ti jānkamy ti. Kỹ tóg kejēn tá prỹg han mũ sir, ga ěn tá. Kỹ kyrũ ěn tóg kókĩr mũ gé. ¹⁵ Kỹ tóg tá ke ũ mré vēmén tĩ mũ, ti tỹ ti mỹ vēnh rānhřāj nĩm jé. Kỹ tóg ti jēnĕg mũ, ti tỹ ti porco ki rĩr jé sir, ti safra tá. ¹⁶ Kỹ tóg porco jēn ko sór mũ, ti kókĩr nĩn kỹ. Hā ra ag tóg ti mỹ nén ũ nĩm tũg mũ, ti tỹ ko jé. Hā kỹ tóg kókĩr tāvĩ nĩ sir. ¹⁷ Kỹ tóg kejēn krĩ há han mũ. To jykren tóg mũ sir. “Inh panh mỹ rānhřāj tĩ ag vỹ pāo mág ko tĩ. Ag mỹ tóg kén tĩ, ag jén tĩ. Jo sóg kókĩr kỹ ter ke mũ,” he tóg, kyrũ ti, ģ pir mỹ nĩn kỹ. ¹⁸ “Inh jé hỹn inh panh kukām tĩg

ha,” he tóg. “Kỹ sóg ti mỹ: “panh’,” henh ke mũ. “Kanhkā tá nĩ ěn vỹ mranh inh, ģ vỹ ti ke gé. ¹⁹ Kỹ sóg vēnhmỹ tỹ ģ kósin tũ nĩ. Sỹ tỹ ģ camarada nĩnh há tóg tĩ,” he jé sóg ke mũ, inh panh mỹ,” he tóg mũ, kyrũ ti. ²⁰ Kỹ tóg tĩ mũ sir, ģ panh kukām.

Hā ra ti panh tóg kór há tá, kuvar há tá ti vėg mũ, kỹ tóg ti kato tē mũ. Ti kato tē kỹ tóg ti ki póm ke mũ sir, ti ki nhun ke tóg mũ gé sir. ²¹ Kỹ ti kósin tóg ti mỹ: “panh’,” he mũ. “Kanhkā tá nĩ ěn vỹ mranh inh, ģ vỹ ke gé. Hā kỹ sóg vēnhmỹ tỹ ģ kósin tũ nĩ ha,” he tóg, ti panh mỹ.

²² Hā ra ti panh tóg ti mỹ: “vó, vēnh pāte fón kỹ tóg nĩ,” he mũ. Kỹ tóg ģ camarada ag mỹ: “kur há tāvĩ ěn ma kāmũjĕg,” he mũ, “ti tỹ kur tåg ra rā jé. Ti mỹ nĩgē kānĩm ja nĩm gé. Pēn né ěn tỹ, pēn to ró ěn tỹ ti mỹ jun gé. ²³ Monh tāgy ěn venh mũjĕg. Ti tānh ra, ěg tỹ ko jé, ěg fe tỹ mrin ke jé. ²⁴ Inh kósin vỹ inh mỹ ter ja ri ke han, há ra tóg rĩr măn ri ke han. Vāfor ti vē vē, há ra tóg kātĩg măn huri,” he tóg, ti panh ti. Kỹ tóg ag mỹ sér tĩ sir, ag tỹ festa han kỹ.

²⁵ Hā ra ti kósin sanh tóg ti japỹ tá rānhřāj jē. Kỹ tóg vāhā tá kātĩg kỹ ģ in tá jun mũ. Tá jun kỹ tóg vākыр mĕg mũ, fag vēnh gringrén ěn ti. ²⁶ Kỹ tóg ģ camarada jé prēr mũ. Ti mỹ tóg: “festa tỹ ne nē?” he mũ. ²⁷ Kỹ tóg ti mỹ: “ģ jāvy vỹ jun, kỹ ģ panh vỹ monh tāgy ěn tānh,” he mũ. “Ti mỹ tóg sér tĩ, ti tỹ ti ve măn kỹ. Kaga tũ tóg jē, há tóg jē, há kỹ tóg ģ panh mỹ sér tĩ,” he tóg, ti camarada ti. ²⁸ Kỹ tóg jũ mũ sir. Kỹ tóg in kāra rā tũg mũ, jũ kỹ.

Kỹ ti panh tóg ti mré vēmén tĩ mũ. Ti mỹ tóg: “ěg mré festa venh kārā,” he mũ. ²⁹ Hā ra tóg ti mỹ: “vó,” he mũ. “Prỹg tỹ hēn ri ke ki sóg ģ rānhřāj ti han, ha mẽ. Inh pi(jé) ģ vỹ mranh ja nĩgtĩ. Ge ra ģ tóg inh mỹ nén ũ nĩm ja tũ nĩ. Ā pi(jé) inh mỹ cabrito fĕg tĩ, sỹ inh mré ke ag mỹ festa han jé. ³⁰ Hā ra ģ kósin ěn tóg

jun mũ sir, jo ã tóg ti mý monh tăgy ên tănĥ. Kórég ti nĩ, ã kósın ên ti. Ā tũ fón kăn tóg mýr, ũn týtá kórég fag to, hã ra ã tóg festa mág han mũ, ti kătĩg ký,” he tóg, ti kósın sanh ti, ã panh mý.

³¹ Hã ra ti panh tóg ti mý: “vó,” he mũ. “Inh mré ã tóg jê nĩ, ký tóg inh mý sér ti. Ký isũ kar vỹ tỹ ã tũ nýtĩ, mýr, ha mẽ. ³² Hã ra festa tag vỹ há nĩ, ha mẽ. Ēg mý tóg sér tăvĩ tĩ. Ā jăvy vỹ inh mý ter ja ri ke han, hã ra tóg rĩr măn ri ke han. Văfor ti vễ vễ, hã ra tóg kătĩg măn huri,” he tóg, ti panh ti, ã kósın sanh mý,” he tóg, Jesus ti. Ti tỹ Topê kămén hã vễ.

Ēg tỹ Ēg tũ vênh kăpăm ke

16 Ký Jesus tóg ã mré mũ ti ag mý tag tó mũ, ha mẽ. “Kejên ěpră ke ũ tóg nĩgtĩ, ũn rico. Ký ti tũ ki rĩr ti tóg nĩgtĩ gé. Ti patrăo mý név(e) nýtĩ ag vég ti tĩ, ti mý, ti tũ ki rĩr ti ti. Kejên ag tóg ti camarada ên to vĩ mũ, ti tũ ki rĩr ti ên to. Ti lograr ke (ka) mẽ ti něji nĩ, ti tũ to, ti camarada ti. ² Ký tóg ti jé prěr mũ, ký tóg ti mý: “ã tỹ han mũ mẽ inh,” he mũ. “Sỹ ã rănhrăj tugnỹm ke vễ. Ki rĩr măn ke tũ ã tóg nĩ ha,” he tóg mũ ti mý. ³ Ký tóg to jykrén mũ sir, ti camarada ti. “Inh hỹn hẽ ri kenh mũ ha?” he tóg mũ. “Inh patrăo vỹ inh kutêm, inh rănhrăj ki. Ký inh hỹn ne konh ke mũ ha? Inh ěpỹ jé sóg krój nĩ. Ký sóg vênh kar mý: “inh mý nén ũ nĩm, inh mý jănkamy nĩm,” he sór tũ nĩ gé. Inh mý a tóg tĩ, sỹ ag mý tónh ke ti,” he tóg. ⁴ Kejên tóg: “ũri hã sóg ki kanhró nĩ ha, sỹ nén han ke ti,” he mũ. “Sỹ tag han ký ag tóg iso há nýtĩnh mũ, ký ag tóg inh mý: “inh mré nĩnh kătĩg,” henh ke mũ, inh patrăo tỹ inh fón kar ký,” he tóg mũ, ti camarada kórég ti. ⁵ Ký tóg ũ tỹ ã patrăo mý név(e) nýtĩ ên ag jé prěr kăn mũ sir. Ký tóg ũ mý: “ã név(e) hẽ ri ke nĩ?” he mũ. ⁶ Ký tóg ti mý: “azeite tỹ lata tỹ 100 (ke) ki inh név(e) jê,” he mũ. Ký tóg ti mý: “hỹn, ã vênh răn ti, sỹ ã mý ã név(e) térem ký 50 (ke) răn jé,” he mũ.

Ký tóg răn mũ sir. ⁷ Ký tóg ũ ũ mý: “jo ã?” he mũ gé. “Ā név(e) hẽ ri ke nĩ?” he tóg mũ gé. Ký tóg ti mý: “trigo tỹ saco tỹ 100 (ke) ki inh név(e) jê,” he mũ. Ký tóg ti mý: “hỹn, ã vênh răn ti, sỹ ã mý ã név(e) térem ký 80 (ke) răn jé,” he mũ gé. Ký tóg răn mũ gé sir.

⁸ Ký ti patrăo tóg mễg mũ, ti camarada tỹ nén han mũ ti. Ký tóg ti mý: “jykre (ka)mẽ ã tóg nĩ, ký ã tóg ũ tỹ hẽn ri ke tỹ ã to há nĩ han, ã tỹ ag mý ag név(e) rem ký,” he mũ, ti patrăo ti,” he tóg, Jesus ti.

“Ký hã vễ. ũ tỹ inh ki ge tũ ag vỹ ģag tũ to jykrén há han tĩ, inhã, ha mẽ. ģag krĩ há kăfór han ag tóg tĩ ag tũ to jykrén ki. ģag tỹ inh ki ge mũ ra ag tóg ģag krĩ há kăfór han tĩ. Tỹ ag ěpră ke nýtĩ, hã ký ag tóg tag ki nén to jykrén há han tĩ,” he tóg.

⁹ “Hã ký sóg ģag mý tó mũ. Ti camarada ên ri ke han nĩ, ģag tũ tỹ ũn mý vênh kăpăm nĩ, ģag tỹ ga kri mũn ký. Ký ag tóg ģag to há nýtĩnh mũ. Kejên ģag tóg ģag tũ ré ký mũnh mũ. Ēn kă ģag tóg mũ há han ke mũ gé. Ký ģag tóg kanhkă tá junjun ke mũ sir, ģag tỹ ag mý ģag tũ tỹ vênh kăpăm ký. ¹⁰ ũ tỹ nén ũ sĩ ki rĩr há han ký tóg nén ũ ki rĩr há han kăn ke mũ gé. Jăvo ũ tỹ nén ũ sĩ ki rĩr kónăn ký tóg nén ũ ki rĩr kónăn kăn ke mũ gé sir. ¹¹ Ēg tỹ ga kri nén vég mũ vỹ kănhmar tũ’ he mũ. ģag tỹ hã ra ga kri ģag tũ ki rĩr há han tũ ký ģag tóg kanhkă tá tỹ nén ũn tũ nýtĩnh mũ gé. ¹² ģag tỹ ěpră nén vég mũ vỹ tỹ Topê tũ nĩ. Ti hã mý ģag tóg ki rĩr ke mũ. ģag tỹ ti tũ ki rĩr há han tũ ký tóg sir ģag mý ģag tũ pẽ ên nĩm ke tũ nĩ gé, kanhkă tá,” he tóg.

¹³ “Ā jagrê régre nĩn ký tóg vênhmý tĩ. Ā tỹ Topê hã tỹ jagrê nĩn ký jănkamy tăn ên tỹ jagrê nĩ sór tũg nĩ. Ā tỹ jănkamy e ve sór ký ti hã mĩ ěkrén ký ti hã vỹ tỹ ã jagrê nĩnh mũ. Ký ěg tóg Topê tỹ ěg mý nén tó mũ ên to jykrén há han ke tũ nĩgtĩ. Ā tỹ Topê to há nĩn ký ã tóg sir ga

kri rico to vāsān sór ke tū nī. Ā t̃y ga kri rico nī sór k̃y ā tóg Topē mī ēkrég tū nī, ha vemnī,” he tóg, Jesus ti. Ti t̃y ēg t̃y ti tū hā to jykrén há to jykrén há han ke tón hā vē.

Topē jykre

(Mt 11.12-13; 5.31-32; Mc 10.11-12)

¹⁴ Hā ra Fariseu ag tóg mēg mū, ti t̃y nén tó mū ti. Jānkamy mág hā to ag tóg há n̄tī, rico ke sór ag n̄tī, Fariseu ag. K̃y ag tóg Jesus vī tag mē k̃y ag tóg ti to é he mū. ¹⁵ Hā ra Jesus tóg ag m̄y: “ēprā ke ag m̄y ājag tóg há n̄tī ve n̄tī,” he mū. “Hā ra Topē v̄y ājag t̃y nén to jykrén mū ēn vэг nī. Ón k̃y ājag tóg há n̄tī. Ēprā ke kāmī ājag tóg t̃y ūn mág n̄tī. Topē m̄y ājag tóg kórég n̄tī jāvo, ti m̄y kavėj ājag tóg n̄tī,” he tóg.

¹⁶ “Moisés t̃y ēg m̄y Topē vī tó ja ēn v̄y João tá kr̄y, vās̄y Topē vī tó t̃i ag t̃y ēg m̄y nén tó ja kar ēn ti. João tá ti kr̄y, ēg kygpég t̃i ēn tá. João tá jun k̃y vēnh ū t̃y hēn ri ke ag tóg vāsānsān t̃i, ag t̃y ve jé.

¹⁷ Hā ra Topē jykre si ēn tóg tū' hēnh ke tū nī gé, Moisés t̃y ēg m̄y nén tó mū ēn ti. Ga v̄y tū' hēnh ke tū nī. Ki króm k̄n k̃y tóg n̄nh mū,” he tóg.

¹⁸ “Ēg pr̄ug k̃y tóg ge nī, ha mē. Ā t̃y ā prū fi fón kar k̃y ū ti t̃y pr̄ug m̄n k̃y ā prū tū fi vē sir. K̃y fi mēn t̃y fi fón k̃y ū t̃y fi t̃y pr̄ug m̄n k̃y fi mēn tū vē gé sir,” he tóg, Jesus ti. Ti t̃y Topē jykre kāmén hā vē.

Ū t̃y Topē vī mē jāvānh ag t̃y nūgme ki vār

¹⁹ K̃y Jesus tóg ag m̄y: “kejēn ū tóg n̄gtī, ūn rico pē,” he mū. “Kur kaja e tu ti t̄gtī, ūn tánh sá, kur ha pē. Kurā kar ki tóg vējēn há ko t̃i. Festa ri ke han tóg t̃i, kurā kar ki.

²⁰ K̃y ūn jagtar tóg n̄gtī gé. Ti jiji hā v̄y: Lázaro, he mū. Vēnh kaga fugfo han vānh han tóg t̃i, k̃y tóg n̄y nī, ūn rico jānkā ki. ²¹ Ēn v̄y kókīr t̄gtī, ā kaga to.

K̃y tóg ūn rico jēn vār ko sór t̄gtī, ti jēn mru, hā ra tóg ti m̄y n̄m t̄g t̃i. Cachorro hā ne ti pēnīn e n̄tī. Vēnh fugfo han vānh ēn tugmān ag tóg t̃i. ²² Kejēn tóg ter mū, ūn jagtar ēn ti. K̃y Topē t̃y jēnē jafā ag v̄y ti va mū mū, ti kuprīg ti, kanhkā ra. Tá Abraão tóg nī nī, ēg jóg' jóg ve ti, k̃y tóg ti mré nī nī sir, ti t̃y t̃y ti krē'krē n̄n k̃y.

Kar ūn rico tóg ter mū gé sir. K̃y ag tóg ga kātá ti péju(g) mū. ²³ Hā ra tóg nūgme ki kutē mū, ti kuprīg ti. Inferno tá ti vēs̄yrénh jagy han mū sir. Kejēn tóg kanhkā ki ēvānh mū, k̃y tóg tá Abraão vэг mū, Lázaro ke gé, ti t̃y Abraão mré n̄n k̃y, kuvar há tá. ²⁴ K̃y tóg ag m̄y prēr mū. K̃y tóg Abraão m̄y: “!..Ijóg'..!” he mū. “!..Abraão..!” he tóg “!..Ijagāgtān ra..!” he tóg. “Lázaro jēnē ra, ti t̃y ā nī(gé) juja junun mrān k̃y inh nūnē mrān sī han jé. Inh m̄y tóg r̄jgy tāvī t̃i, pī kākī,” he tóg, Abraão m̄y, ūn rico ja ēn ti.

²⁵ K̃y Abraão tóg ti m̄y: “inh kósīn,” he mū. “Ā t̃y ga kri t̄g ja ēn ki ēkré. Tá ā tóg há t̃i ja n̄gtī, jāvo Lázaro tóg jagtar ja n̄gtī. K̃y tóg tag ki há han t̃i nī, jo ā tóg vēs̄yrénh jē nī, ā t̃y ti jagāgtān ja tū n̄n k̃y. ²⁶ K̃y ēg k̄ju ki tóg t̃y k̄gnó nī, k̃y ū tóg p̄ate rānh ke tū nī. Tag ki ke pi(jé) ēn ra t̄g mū', ēn tá ke pi(jé) tag ra kātīg mū gé', k̄gnó tag tugrīn',” he tóg, Abraão ti, ūn rico ja ēn m̄y.

²⁷ K̃y ūn rico ja tóg ā jóg t̃y Abraão m̄y: “k̃y sóg ā m̄y nén ū tó sór mū, ha mē,” he mū. “Ā m̄y inh jóg īn ra ti jēnēnh ke tū? Tá inh mré ke ag v̄y n̄tī. ²⁸ 5(ke) ag n̄tī, inh mré pafa ja ag. Ti t̃y ag m̄y tónh t̄g jé, ag t̃y tag ki junjun tū nī jé, ag t̃y inh mré vēs̄yrénh tū n̄n jé,” he tóg, ūn rico ja ti, Abraão m̄y.

²⁹ K̃y Abraão tóg ti m̄y: “tá ag tóg Moisés t̃y ēg m̄y nén tó ja ēn mēnh mū, Topē vī tó t̃i kar ag vī ke gé. Hā k̃y ag tóg Topē vī jēmēnh mū, ag t̃y mē sór k̃y,” he tóg.

³⁰ Hã ra tóg ã jóg tỹ Abraão ti mỹ: “vó” he mũ. “Vësêr tỹ ag tá jun mũ ra ag jëmê há han ke mũ vê, kỹ ag tóg ãjag jykre pãno ên tovãnh ke mũ vê, vësêr tỹ ag mỹ tó mũ ên ti,” he tóg.

³¹ Hã ra tóg: “vó,” he mũ gé. “Ag tỹ Moisés vĩ jëmê sór tũ nĩn kỹ ag tóg vësêr vĩ mênh ke tũ nĩ gé, ag tỹ Topê vĩ tó ti ag vĩ mẽ jãvãnh nỹtĩn kỹ,” he tóg, Abraão ti, ùn rico ja ên mỹ,” he tóg, Jesus ti. Ti tỹ ag mỹ êg tỹ Topê vĩ jëmê jãvãnh nỹtĩn kỹ vësỹrênh ke ên tón hã vê.

Topê vĩ mranh tỹ jagy nĩ

(Mt 18.6-7, 21-22; Mc 9.42)

17 Kỹ Jesus tóg ã mré mũ ti ag mỹ: “ũ tỹ hên ri ke ag vĩ ù tỹ iso há ên tỹ isovãnh han sór mũ, ha mẽ,” he mũ. “Vësỹrênh tãvĩn mũ jé ag tóg ke mũ, tag to. Topê vĩ ag ve kónãn tãvĩn mũ, ag tỹ ùn krĩn kónãn mũ tag to. ² Û tỹ ag krĩn kónãn mũ mỹ tóg há nỹnh mũ vê, êg tỹ pó tỹ kra mág tỹ ag nunh to sa kỹ goj nig kuju ki ag vãm jé. Tag vĩ ag mỹ jagy ti vê. Hã ra ag tóg ti jagy tag kãfór venh ke mũ, ag tỹ ùn sĩ tỹ inh ki rã kỹ nĩ (hã) ra ti tỹ inh vĩ mranh han sór kỹ. ³ To jykren, vênh ki rĩr kỹ.

Kejên ã régre vĩ Topê vĩ mranh mũ. Kỹ ti mỹ tómni, ti tỹ kygnê ti. Ti tỹ tovãnh sór kỹ ti mỹ vênh pãte fón nĩ. ⁴ Hên ri ke mũn tóg ã tỹ Topê vĩ mranh han sór mũ han măn', han măn' he mũ, kejên. Kurã pir ki tóg ã jũ tỹ hên ri ke han sór mũ, hên ri ke mũn. Hã ra tóg ã jũ han kar kỹ: “inh pi(jé) ke măn mũ ha',” hênh ke mũ gé. Á jũn kỹ tóg tónh kãtig măn', tónh kãtig măn' he mũ gé. Kỹ ti mỹ vênh pãte fón to krónh ke tũg nĩ,” he tóg, Jesus ti.

Êg tỹ Topê ki rã há han ke

⁵ Kỹ Jesus tỹ ùn vin mũ ag tóg ti mỹ: “êg tỹ Topê ki rã há pẽ han há tóg ti,” he mũ. “Kỹ to êg tar han nĩ,” he ag tóg, Jesus mỹ. ⁶ Kỹ tóg ag mỹ: “ãjag tỹ Topê ki rã kỹ tóg há ti,” he mũ. “Ka tỹ mostarda

fy mĩ êkrên nĩ,” he tóg. “Sĩ ti nĩ, hã ra tóg mog ti. Tag ri ke han nĩ, Topê ki rã kỹ. Ti ki rã kỹ ãjag tóg nén ù kar to tar nỹtĩn mũ. Ka tag ve ra, ka krên tag ti. Ájag tỹ ti mỹ: “ã jãre tỹ ga tá kãkutê, kỹ goj nig ki vênh krãn,” hên kỹ tóg kênh mũ, ãjag tỹ Topê ki rãn kỹ,” he tóg, Jesus ti.

Tỹ êg Topê camarada nỹti

⁷ “Ájag camarada jykre to jykren nĩ,” he tóg. “Ájag japỹ ki tóg rĩr ti, ga tỹ virĩn ken kỹ, ke tũ nĩn kỹ tóg ãjag mẽg ki rĩr ti gé. Rãkãnh kỹ tóg ã rãnhràj ja tá kãti ti. Kỹ ãjag pi(jé) ti mỹ: “kunĩg, jên jé,” he ti. ⁸ Ti mỹ ãjag tóg: “inh mỹ vễjên han, ijen jé,” he ti. “Kuri ã kur tãnfyn kỹ tógfin, ã tỹ inh mỹ vễjên jun jé, ijen jé, kron jé, kar kỹ ã tóg jên ke mũ gé sir, kron ke mũ gé sir, ijen kar kỹ,” he ãjag tóg ti, ãjag camarada mỹ. ⁹ Kỹ ãjag tóg ti mỹ vĩ há han tũ nĩ gé, ti tỹ ãjag vĩ ki króm mũ ra. Ájag camarada vê mỹr, ti rãnhràj vê, hã kỹ tóg ãjag vĩ ên han ke mũ. ¹⁰ Kỹ ãjag camarada ag ri ke han nĩ, Topê mỹ, ha mẽ. Ájag tỹ Topê vĩ ki króm kãn kỹ jagnê mỹ: “ti camarada vĩ tỹ êg nỹti,” hemnĩ. “Ti tỹ êg mỹ nén tó mũn hã han êg tóg, kỹ tóg tỹ nén ù tũ nĩ,” hemnĩ jagnê mỹ. “Ti vĩ han kãn tugrĩn êg tóg há nỹti,” he tũg nĩ,” he tóg, Jesus ti.

Jesus tỹ ùn kaga tỹ 10 (ke) ag tỹ há' he

¹¹ Kỹ Jesus tóg Jerusalém ra tĩg sór mũ. Hã kỹ tóg ga tỹ Samaria fyr mĩ ti mũ. Ga tỹ Galiléia mré ti fyr vê. ¹² Tá tóg êmã ù ki rã mũ, kỹ ù tỹ 10 (ke) ag tóg ti kato tẽgtẽ mũ sir. Vênh kaga kren vãn hyn han ag tóg mũ, lepra han kỹ. Hã kỹ ag tóg kór há tá nỹti, kuvar há tá. ¹³ Jamã hár(a) ag tóg prẽnprẽn mũ, kỹ ag tóg: “!..Jesus'..!” he mũ. “!..Senhor'..!” he ag tóg mũ. “!..Êg jagãgtãn ra..!” he ag tóg mũ. ¹⁴ Kỹ tóg ag ki êvãn mũ, kỹ tóg ag mỹ: “Topê tũ ki rĩr ti ag mỹ vênh ven mũjêg,” he mũ. Kỹ ag tóg mũ mũ.

Ag mün kã ag tóg jãnhkri' he mũ sir, ag fãr ti, tá junjun to hã. Hãghã' he ag tóg mũ sir. ¹⁵ Kĩ ag kãmĩ ùn pir tóg kyrã mũ, Jesus to. Topẽ mĩ tóg vĩ há han mũ, ã tĩ há' hen kĩ. Kĩ vênh kar vỹ ti vĩ mễg mũ. ¹⁶ Ti tĩ Jesus tá jun kĩ tóg ti krêm mũg ke mũ. Ti mĩ tóg: “inh mĩ tóg há tĩ, ã tĩ isỹ há' hen kĩ,” he mũ. Samaria tá fóg ù vễ, Jesus to ùn kyrã mũ ên ti.

¹⁷ Kĩ Jesus tóg: “ù tĩ 10 (ke) tũ mĩ', hã vỹ: há', he mũ?” he mũ. “Hã ra ùn pir ne kãtig ja nĩ'. Hỹn, ù ag, ù tĩ 9 (ke) ên ag?” he tóg. ¹⁸ “Fóg tag hã vỹ ã pir mĩ kyrã, Topẽ to: “ùn mág vỹ tĩ ti nĩ,” he jé,” he tóg, Jesus ti. ¹⁹ Kĩ tóg fóg ên mĩ: “jěgně ra,” he mũ. “Ha tĩg,” he tóg. “Ã tĩ inh ki rã kĩ, hã kĩ ã tóg há' he mũ,” he tóg, Jesus ti.

Topẽ tĩ tĩ ěg pã'i nĩ to vênh jykre

(Mt 24.23-28, 37-41)

²⁰ Kejẽn Fariseu ag tóg ti ki jẽmẽn kãmũ mũ. “Topẽ tĩ tĩ ěg pã'i nĩ ên mĩ ver kór gy nĩ, mĩ kuvar gy?” he ag tóg ti mĩ. Kĩ tóg ag mĩ kãmén mũ sir. “Ti vэг tũ ěg tóg nĩ, ěg kaně tĩ, Topẽ tĩ tĩ ěg pã'i nĩ ti,” he tóg. ²¹ “Hã kĩ ěg tóg to: “tag kã ti nĩ, tãtã ti nĩ,” henh ke tũ nĩ gé. Ha mẽ, ajag kãmĩ ti huri vênh ven, ti tĩ tĩ ěg pã'i nĩ ti, ajag tĩ ti vэг tũ (hã) ra,” he tóg.

²² Kĩ tóg ã mré mũ tĩ ag mĩ: “tĩ sóg ěprã ke fi kósin nĩ,” he mũ. “Kejẽn tóg ajag tĩ Topẽ tĩ tĩ ěg pã'i nĩ venh ha pẽ tĩnh mũ. Ti tĩ kurã pir ki vênh ven mũ vỹ ajag mĩ há tĩnh mũ vễ, hã ra ajag tóg venh ke tũ nĩ ver,” he tóg. ²³ “Kĩ ag tóg ajag mĩ: “tag ki ti jun ja nĩ,” henh ke mũ. “Ên tá tóg jẽ nĩ,” he jé ag tóg ke mũ gé. Kĩ venh mũ tũg nĩ hã ra. Ag vĩ jẽmẽn sór tũg nĩ. ²⁴ Inh kãtig mãn ke vỹ ta tĩ kóm kóm ke ri ke nĩ. Ti tĩ kóm kóm ke kĩ ěg tóg nén kar vэг tĩ, kanhkã krêm. Kĩ vênh kar vỹ ti tĩ kóm kóm ke ên vэг tĩ gé. Inh kãtig mãn ke vỹ ri ke nĩnh mũ, inh kurã ên kã. Vênh kar vỹ inh ve kãn mũ. Tĩ

sóg ěprã ke fi kósin nĩ,” he tóg. ²⁵ “Inh kãtig mãn ke to hã sóg hã ra vễsỹrẻnh mág han ke mũ ver. Ûri ke ag vỹ iso é henh ke mũ ver,” he tóg.

²⁶ “Kĩ inh kãtig mãn ke kurã ên kã ěprã ke ag tóg han kãn ke mũ, ag tĩ Noé tĩ ga mĩ tĩ mũ kã nẻn han ja ên ti. ²⁷ Ta kutě to hã ag tóg jẻn ja nĩgtĩ, jẻn kar kĩ ag tóg kron ja nĩgtĩ gé, vẻnh prũ kutẻm ja ag nĩgtĩ gé. Ên kã Noé tóg kejẻn barco tĩ ìn kãra rã ja nĩ. Ti tĩ kãra rã kar kĩ ta tóg sir kutẻ ja nĩ, kĩ ag tóg goj var ki kãgtẻ kãn ja nĩ. ²⁸ Kĩ tóg ri ke pẻ ja nĩ gé, Ló tĩ ga mĩ tĩg ki. Ên kã ag tóg jẻn ja nĩgtĩ gé, jẻn kar kĩ ag tóg kronkron ja nĩgtĩ gé. Vẻnder ke mũ ja ag nĩgtĩ gé, kygĩam ke mũ ja ag nĩgtĩ gé. Êkrẻn ja ag nĩgtĩ gé, ìn hyn han ja ag nĩgtĩ gé. ²⁹ Ên kã Ló tóg kejẻn cidade tĩ Sodoma tá kãkutẻ ja nĩ, kĩ pĩ tóg kanhkã tá kãtẻre ja nĩ, cidade kri, pỏ tĩ enxofre nĩja ên ke gé. Kĩ ên tóg ag kãgtẻn kãn ja nĩ. Topẽ tĩ ag vóg kónẻn ke to jykrẻn sỏr tũ ja ag nỹtĩgtĩ. ³⁰ Ge ti nĩnh mũ gé, ěprã ke fi kósin tĩ vẻnh ven mãn ke kurã ên kã. Mĩ ěkrẻn ke tũ ag nĩgtĩ gé, ti to há tũ ag. ³¹ Û tĩ kurã ên kã ã ìn rã hã tĩn kỹn jẻ ã tũ mãn rã sỏr tũg, ti tũ tĩ ti ìn krêm nỹtĩ ti. Û tĩ ěpỹ tá tĩ ên jẻ ã tũ to vỹn ke tũg. ³² Ló prũ fi to jykrẻn. ³³ Ajag tĩ ajag jykre hã han sỏr kĩ ajag nũgme ki vẻr ke mũ, ha vemnĩ. Ajag tĩ isugrĩn ajag jykre fi mãn kĩ ajag krenkren ke vễ, ha vemnĩ,” he tóg.

³⁴ “Hã kĩ sóg tag tỏ mũ, ha mẽ. Kuty ên kã, inh kãtig mãn ke kuty ên kã ùn rẻgre ag vỹ jagnẻ mrẻ nũgnữr nỹtĩnh mũ. Ag kãmĩ ùn pir jẻ prẻr sóg ke mũ, kĩ tóg inh mrẻ tĩnh mũ, jãvo ti rẻgre vỹ kã nỹnh mũ, ha vemnĩ. ³⁵ Ûn rẻgre fag vỹ ěgtynyn nỹtĩnh mũ, jagnẻ mrẻ, ên kã. Kĩ sóg ùn pir fi jẻ prẻr ke mũ, kĩ fi tóg inh mrẻ tĩnh mũ, jãvo fi rẻgre fi vỹ kã jẻnh mũ, ha vemnĩ. ³⁶ Ûn rẻgre ag vỹ ěpỹ ki rẻnhrẻj mũnh mũ, ên kã. Kĩ sóg ùn pir jẻ prẻr ke mũ, kĩ tóg inh mrẻ tĩnh mũ. Jãvo ti

régre vỹ tá tĩnh mũ gé, ha vemnĩ,” he tóg, Jesus ti.

³⁷ Kĩ ti mré mũ tĩ ag tóg ěg Senhor mỹ: “tag hẽ tá ke nĩnh mũ hỹn?” he mũ. Kĩ tóg ag mỹ: “kurã ěn kã ajag ki kanhró nỹtĩnh mũ,” he mũ. “Nén ũ ter nỹg ja ri ke ti nĩ. Hã tá tóg vênh mĩn tĩ, jãtã ti, he ěg tóg tĩ. Tag ri ke ti nĩnh mũ, ha vemnĩ,” he tóg, Jesus ti. Tĩ tỹ ã kãtĩg mĩn ke tón hã vẽ.

Ěg tỹ Topẽ mré vỹ to krónh ke tũ

18 Kĩ Jesus tóg ag mỹ: “ajag tỹ Topẽ mré vēmén ke vỹ ge nỹnh mũ, ha mẽ,” he mũ. Ěg tỹ kurã kar ki Topẽ mré vēmén kĩ tóg há tĩnh mũ, ěg tỹ to krónh ke tũ nĩn kỹ. Tag tỹ tóg ag kanhrãnrãn sór mũ, ã mré mũ tĩ ag, hã kỹ tóg tag tó mũ, ha mẽ. ² “Kejẽn pã'i tóg nĩgtĩ, ěmã ũ tá,” he tóg. “Ag tỹ jagnẽ to jũ vэг ti tĩ. Tĩ rãnrhãj hã vẽ. Hã ra tóg Topẽ kamẽg vãnh nĩ, ti jykre pãno nĩn kỹ. Kĩ tóg ã mré ke ag kamẽg vãnh pẽ nĩgtĩ gé. Kórég pẽ ti nĩgtĩ. ³ Tĩ jamã tá ũ fi tóg nĩgtĩ gé, ũn mĩn ter ja fi. Ěn fi vỹ kejẽn ti to kãtĩg kỹ ti mré vēmén mũ. Kĩ fi tóg ti mỹ: “inh lograr ke sór mũ ěn ag jo inh vemnĩ,” he mũ. ⁴ Hã ra tóg mẽ jãvãnh nĩ. Jatu tóg nĩ nĩ, kysã tỹ hẽn ri ke ki. Kĩ fi tóg ti tá jun tỹ hẽn ri ke han mũ, to krónh ke tũ fi nĩ. Kĩ tóg kejẽn to jykren mũ. “Topẽ kamẽg vãnh inh nĩgtĩ,” he tóg. “Ũ kamẽg vãnh inh nĩgtĩ gé. ⁵ Hã ra fi tóg isovãnh tũ pẽ nĩ, ũn mĩn ter ja ěn fi. Kurã kar ki fi tóg inh mỹ to vĩnh kãtĩ tĩ. Kĩ inh hỹn fi jy rãnh mũ ha, ke tũ nĩ mũ ra fi tóg ijũ han ke mũ, fi tỹ inh venh kãtĩ to krónh ke tũ nĩn kỹ, ha vemnĩ,” he tóg, pã'i kórég ti,” he tóg, ěg Senhor tỹ Jesus ti.

⁶ Kĩ tóg ag mỹ: “tĩ vỹ jẽmẽ ra,” he mũ. “Jykre pãno ti nĩ, pã'i kórég ěn ti, hã ra tóg fi tỹ ti mỹ vỹ e ěn to fi kren han sór mũ,” he tóg. ⁷ “Hã kỹ Topẽ vỹ ajag krenkren han ke mũ gé. Ajag kuprẽg ja tóg nĩ mỹr, kỹ ti mré vēmén nĩ. Kurã ki ti mỹ vĩmĩ, kuty tá ke gé. Ajag kren

han vãnh nĩ ve ti nĩ, kejẽn. ⁸ Hã ra tóg ajag krenkren han ke mũ, kãnhmar, ha vemnĩ. Ki hã sóg tó mũ,” he tóg. “Hã ra ěprã ke fi kósin ěn tỹ kãtĩg mĩn kỹ ag mỹ ti ki ge sór mũ vỹ?” he tóg, Jesus ti.

Ěg tỹ: “tỹ inh ũn há nĩ,” henh ke tũ

⁹ Kĩ Jesus tóg ag kanhrãn mĩn mũ gé. ũ tóg ũ tỹ ti vỹ mẽg mũ ěn ag kãmĩ nỹtĩ, hã ra ag tóg veso: “tỹ ěg tóg ũn há nỹtĩ,” he tĩ. “Kórég tũ ěg nỹtĩ, jo ũ ag ne kórég nỹtĩ,” he ag tóg tĩ, veso, Jesus vỹ mẽg mũ ũ ag. Ěn ag kanhrãn rãn sór tóg mũ, Jesus ti. Kĩ tóg ag mỹ: “ajag jykre vỹ ge nỹnh mũ, ha mẽ,” he mũ. ¹⁰ “Kejẽn Fariseu ũ tóg nĩgtĩ. Topẽ jo ĩn ra tóg tĩ mũ, tá Topẽ mré vỹ jé. Tĩ mré ũ tóg ra tĩ mũ gé, ũ tỹ governo mỹ jãnkamy mĩg tĩ ti. Topẽ mré vỹ sór tóg mũ gé. ¹¹ Kĩ Fariseu tóg Topẽ mré vēmén jẽ nĩ. “Topẽ,” he tóg. “Inh mỹ tóg há tĩ, isỹ jykre kórég tũ nĩn kỹ, ag jãvo. ũ ag tóg nĩn ũ pēju(g) tĩ, hã ra sóg han tũ nĩgtĩ. ũ ag tóg nĩn ũ vẽnhmỹ han tĩ inhhã, jãvo inh pi(jé) han tĩ. Ajag prũ tũ fag mré ag tóg nỹgtĩ inhhã. Kĩ governo mỹ jãnkamy mĩg tĩ tag ti vỹ kórég nĩ gé inhhã. ¹² Ag jãvo sóg vênh jykre há han tĩ. Semana kar ki sóg vãkre régre han tĩ, jẽg mẽ ti ki. Hã ki sóg ã jykre ki króm tĩ. Isũ tỹ sóg dízimo kajãm tĩ, ã mỹ. Sỹ nĩn ũ tỹ 10 (ke) ki sóg ũn pir nĩm tĩ, ã mỹ dízimo han kỹ,” he tóg, Fariseu ti, Topẽ mỹ. ¹³ Hã ra governo mỹ jãnkamy mĩg tĩ ěn tóg kór há tá jẽ nĩ, kuvar há tá, mỹ'ag kỹ. Kĩ tóg kanhkã ki ěvãnh tũ nĩ gé. Ā fe kri tóg kãgmĩg mũ, ti tỹ mỹ'ag mĩg kỹ. Kĩ tóg Topẽ mré vỹ mũ. “Topẽ,” he tóg mũ gé. “Ā vỹ mranh inh mỹr,” he tóg. “Ā mỹ inh jagãgtãn ke tũ hã ra,” he tóg, Topẽ vỹ mranh tĩ ěn ti,” he tóg, Jesus ti.

¹⁴ “Ha mẽ, Topẽ vỹ ti mỹ vênh pãte fón, hã kỹ tóg jatun mỹ vyr. Jãvo tóg Fariseu ěn mỹ vênh pãte fón tũ nĩ. Ge ti nĩgtĩ. Ěg tỹ veso: “há inh nĩ,” hen kỹ Topẽ tóg ěg to kórég nĩ. Kĩ tóg ěg tẽrem

mũ sir. Ëg tỹ hã ra vëso: “kórég inh nĩ,” hen kỹ Topê vỹ Ëg to há nĩ, kỹ tóg Ëg tỹ ùn mág han ke mũ gé sir,” he tóg, Jesus ti.

Jesus tỹ ùn kāsir ag to há

(Mt 19.13-15; Mc 10.13-16)

¹⁵ Kỹ fag tóg gĩr tatĩ kāmũ mũ ti to, ti tỹ gĩr kri ã nĩgẽ fi jé. Hã ra ti mré mũ ti ag tóg vég mũ, kỹ ag tóg fag to jũ mũ, ù tỹ ag tatĩ kāmũ mũ fag to. ¹⁶ Hã ra Jesus tóg fag jé prěr kỹ ag mỹ: “vĩ tũg nĩ, gĩr ag mỹ,” he mũ. “Gĩr ag tỹ iso kāmũ kamẽg tũg nĩ,” he tóg. “Û tỹ ge hã vỹ Ëg Senhor tỹ Topê krẽm nỹtĩnh mũ,” he tóg. ¹⁷ “Sỹ ke há vë, hã kỹ sóg tó mũ. Gĩr ag vỹ iso há pẽ nỹtĩ. Ûn kāsir tag ag ri ke nỹtimnĩ, ke tũ nĩ mũ ra ãjag tóg Topê tỹ tỹ Ëg pã'i nĩ venh ke tũ nĩ mỹr,” he tóg, Jesus ti.

Ûn rico ag

(Mt 19.16-30; Mc 10.17-31)

¹⁸ Kỹ kejẽn ù tóg Jesus ki jēmẽnh kãtĩ mũ, pã'i ù. Kỹ tóg ti mỹ: “Senhor,” he mũ. “Hã ã tóg nĩ,” he tóg. “Sỹ rĩr krỹg ja tũ venh há tóg tĩ. Sỹ ti ve jé inh hỹn vẽnũ jykre há tỹ ne han ke mũ?” he tóg. ¹⁹ Kỹ Jesus tóg ti mỹ: “iso: “há ã nĩ,” he sór tũg nĩ,” he mũ. “Ëg pi(jé) há nỹtĩ,” he tóg. “Topê hã ne ã pir mỹ há nĩ,” he tóg. ²⁰ “Topê tỹ nẽn ù to Ëg jyvẽn ja ẽn ki kanhró ã tóg nĩ, hã vỹ: ã prũ tũ fi mré nỹ tũg nĩ, he mũ, ù tén tũg nĩ, he mũ, nẽn ù pēju(g) tũg nĩ, he mũ, ù to ón tũg nĩ, he mũ, ã nỹ mré ã jóg kamẽg nĩ, he mũ,” he tóg ti mỹ, Jesus ti. ²¹ Hã ra tóg: “ki króm kãn sóg, isĩn kã,” he mũ. ²² Kỹ Jesus tóg ti mỹ: “nẽn ù pir vỹ tũ nĩ ver,” he mũ. “Á tũ vãm kãn nĩ, ã tỹ ùn vēsýrẽnh mũ ag mỹ vin jé, jãnkamy ti. Kỹ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tĩg jé,” he tóg ti mỹ, Jesus ti. ²³ Kỹ tóg ti mỹ vẽnĩmỹ tĩ, Jesus vĩ ti, ti rico pẽ nĩn kỹ.

²⁴ Hã ra Jesus tóg ti mỹ vẽnĩmỹ ẽn ki kanhrãn mũ. Kỹ tóg ã mré mũ tĩ ag mỹ:

“jagy ti nỹ, ùn rico tỹ Topê tỹ tỹ Ëg pã'i nĩ venh ke ti,” he mũ. ²⁵ “Cavalo pã'nĩ sór vỹ prěj nor fin rãm ke tũ nĩ,” he tóg. “Tĩ tỹ fin rãm ke ra tóg jagy tĩ vë, ùn rico tỹ Topê tỹ tỹ Ëg pã'i nĩ venh ke ti,” he tóg.

²⁶ Kỹ ti vỹ mềg mũ ag tóg to vēmẽn mũ. “Kỹ ù hỹn kren ke tũ pẽ nĩ,” he ag tóg. ²⁷ Kỹ Jesus tóg ag mỹ: “ẽprã ke ag vỹ tá junjun ke tũ nĩ vë,” he mũ. “Hã ra Topê hã tóg Ëg tỹ tá junjun han ke mũ,” he tóg.

²⁸ Kỹ Pedro vỹ: “ha vé,” he mũ. “Ëg tỹ nẽn ù kar ré jé Ëg tóg mũ mũ, Ëg tỹ ã mré mũ jé,” he tóg. ²⁹ Kỹ Jesus tóg ag mỹ: “sỹ ke há vë, hã kỹ sóg tó mũ,” he mũ. “Û tóg kejẽn ã jamã ré kỹ tĩ mũ, ti prũ fi, ti kãke, ti jãvy, ti han mũ fag, ti krẽ ré kỹ tóg tĩ mũ, Topê tỹ tỹ Ëg pã'i nĩ tugrĩn, ti tỹ ti vĩ ki króm jé,” he tóg. ³⁰ “Ën vỹ tóg sir vẽnũ kaja jé nẽn kar ẽn tỹ ùn e venh ke mũ, ag jęgja kã, ga kri, kar kỹ tóg vãhã sir Ëg rĩr krỹg ja tũ venh ke mũ gé sir, kanhkã tá,” he tóg, Jesus ti.

Jesus tỹ ã ter ke tó mãn

(Mt 20.17-19; Mc 10.32-34)

³¹ Kỹ tóg ù tỹ 12 (ke) ag jé prěr mũ, vyrĩmỹ, ag mỹ kãmén jé. “Ha vé,” he tóg. “Jerusalém ra Ëg mũ mũ, kỹ sóg tá ve kãn ke mũ, vãsỹ Topê vĩ tó tĩ ag tỹ iso nẽn rãn ja ẽn ti,” he tóg. “Tỹ sóg ẽprã ke fi kósin ẽn nĩ, hã kỹ ag tóg inh kãmén ja nĩ, Topê vĩ ki. ³² Fóg ag mỹ ag tóg inh fęg ke mũ, pã'i ag, Jerusalém tá, ha vemnĩ, ag tỹ iso é he jé, ag tỹ inh vóg kónãn jé, ag tỹ iso sug ke jé gẽ, ³³ ag tỹ inh mrãn-mrãn jé. Ag tỹ isẽn ke vë. Hã ra sóg kurã tãgtũ tũg kỹ rĩr mãn ke mũ, ha vemnĩ,” he tóg, ti mré mũ tĩ ag mỹ, Jesus ti. ³⁴ Hã ra ag tóg ti vỹ tag to jykrẽn tũ nĩ, ù tỹ 12 (ke) ẽn ag. Tĩ vỹ tóg ag mỹ vẽnĩmỹ tĩ. Kỹ ag tóg ki kagtũ nỹtĩ. “Tĩ tỹ ne tó nẽ hỹn?” he ag tóg mũ sir.

Jesus tỳ ùn kyvó tỳ há' he

(Mt 20.29-34; Mc 10.46-52)

³⁵ Ag mún ky ag tóg Jericó to há mũ. Tá ùn kyvó vỹ ěpy kri nĩ nĩ, ěmĩn kri. “Inh mỹ jänkamy nĩm,” he tóg tĩ, vênh kar mỹ, ti kyvó nĩn ky. ³⁶ Ěn vỹ vênh kar tỳ ěpy jagma mũ mềg tĩ. Ky tóg ag mỹ: “ũ nê?” he mũ. ³⁷ Ky ag tóg ti mỹ: “Jesus vê, Nazaré tá ke ěn vê,” he mũ. ³⁸ Ky tóg prěr mũ sir. “!..Jesus!...,” Davi kósin!...,” ijagăgtăn ra..!” he tóg mũ, prěr ky. ³⁹ Ky Jesus jo mũ ag vỹ ti mỹ vỹ jũ han mũ. “Ěmê kã nĩ nĩ,” he ag tóg ti mỹ. Hã ra tóg prěr măn', prěr măn' he mũ. “!..Davi kósin!...,” ijagăgtăn ra..!” he tóg.

⁴⁰ Ky Jesus tóg krỹg he mũ, ky tóg: “ti jé prěr,” he mũ. Ky ag tóg ti pére kãmũ mũ. Ti ki jun ky tóg ti mỹ: ⁴¹ “inh ã tỳ hẽ ri kenh ke?” he mũ. Ky tóg ěg Senhor mỹ: “sỹ venh há tóg tĩ,” he mũ. ⁴² Ky Jesus tóg ti mỹ: “ky tỳ vé,” he mũ. “Ă tỳ inh ki rã ky ã há' henh ke mũ,” he tóg. ⁴³ Ky tóg vêsýmér ěvănĩ há' he mũ sir. Ky tóg ti mré tĩ mũ. Topê mỹ tóg vỹ há han mũ. Ky tóg vênh kar mỹ há tĩ, ag tỳ ti tỳ há' he mũ ěn ven ky. Ky ag tóg Topê mỹ vỹ há han mũ gé sir.

Jesus tỳ Zaqueu venh tĩg

19 Ky Jesus tóg cidade tỳ Jericó ki rã mũ sir, ky tóg fin rãm ky tĩg sór mũ. ² Hã ra ù tóg tá nĩ nĩ, ti jỹjỹ hã vỹ: Zaqueu, he mũ. Governo mỹ jänkamy mäg tĩ ag pãi vê. Rico pẽ ti nĩ, rico tăvĩ. ³ Ěn tóg Jesus ve sór mũ, ti tỳ Jericó fin rãm ky. Hã ra tóg rur jẽ, hã ky tóg ti vэг tũ nĩ, vênh e ag tỳ ti pénĩn mũn ky. ⁴ Hã ky tóg ti jo vênhvăg tĩ mũ, ky tóg ka tỳ krén to tăpyr mũ, ti tỳ Jesus ve jé, ti tỳ jagma tĩg ky. ⁵ Ky Jesus tóg ka ěn tá jun mũ. Hã ra tóg krĩg mỹ ěvănĩ ky ka kri ti vэг mũ. Ky tóg ti mỹ: “Zaqueu,” he mũ. “Kur kătêre to fũrũn ké. Isỹ ã ěn krêm nũr ke vê,” he tóg, Jesus ti. ⁶ Ky tóg tere tỳ mrănĩ ke mũ sir. Jesus mỹ tóg: “mũ jé

ha,” he mũ. Ti mỹ tóg sér tĩ, Jesus tỳ ti ěn krêm nũr sór ky.

⁷ Hã ra vênh e ěn tóg Jesus to vỹ mũ sir, ti to jũ ky. “Topê vỹ mranh tĩ vê, ěn ti, hã ra tóg ti ěn krêm nũr sór mũ, vênh jỹke pãno han tĩ ěn mré,” he ag tóg mũ.

⁸ Ky Jesus tóg ti ěn krêm nĩ nĩ. Ky Zaqueu vỹ ti mỹ vênh kãmén kătĩ mũ, ã jỹke to jỹkrén ky. Ky tóg ěg Senhor mỹ: “ha vé,” he mũ. “Isũ kujũ vin jé sóg ke mũ, ùn jagtar ag mỹ. Ũ ag lograr he ja sóg nĩgtĩ, ag tũ ki, hã ra sóg ag mỹ ti kăfór nĩm sór mũ ha. Sỹ jänkamy pir ki ù lograr he jan ki sóg ti mỹ ù tỳ 4 (ke) vin sór mũ,” he tóg, Zaqueu ti.

⁹ Ky Jesus tóg ti mỹ: “há ti nĩ,” he mũ. “Ũri ã tóg kren mũ, ã mré ke fag mré hã,” he tóg. “Abraão kósin vỹ tỳ ã nĩ gé,” he tóg. ¹⁰ “Tỹ sóg ěprã ke fi kósin nĩ. Ũn văfor mũ ěn jăvănĩ jé sóg kătĩg, sỹ ag krenkren han jé, ùn jỹke pãno han mũ ěn,” he tóg, Jesus ti.

Jänkamy to comparação

(Mt 25.14-30)

¹¹ Hã ra ag tóg ti vỹ mề há han mũ, ky tóg ag mỹ Topê tỳ tỳ ěg pãi nĩnh ke ti kãmén sór mũ. Jerusalém to hã tóg nĩ, hã ky ag tóg ti to: “Topê tỳ tỳ ěg pãi nĩ hỹn vênh ven ke mũ, ti tỳ tá jun ky,” he mũ. ¹² Ky Jesus tóg ag mỹ kãmén mũ, Topê tỳ tỳ ěg pãi nĩnh ke tỳ ver vênh ven ke tũ nĩ. Ky tóg tag tó mũ, ha mề. “Kejẽn pãi tóg nĩgtĩ,” he tóg. “Ěn tóg ga ù ra tĩg sór mũ, tá ã tũ ve jé, ga ěn tá ã tũ han jé. Tag han kar tóg tá vỹn ke sór mũ. ¹³ Pãi ěn vỹ ã camarada tỳ 10 (ke) ag jé prěr mũ, ky tóg ag mỹ jänkamy prestar he mũ sir. Ag kar mỹ tóg ti kãmur pir nĩm mũ, jänkamy tỳ, ù tỳ 10 (ke) ag mỹ. Ky tóg ag mỹ: “ha inh mỹ tỳ rănĩrăj,” he mũ. “Kejẽn sóg vỹn kenh ke mũ, ky sóg tugnỹm ke mũ, ãjag rănĩrăj ti,” he tóg. Kar tóg tĩ mũ sir.

¹⁴ Hã ra ti krêm ke ù ag vỹ ti to há tũ nỹtĩ, ky ag tóg ti nón vênh vỹ jẽnẽg mũ.

Kỹ ag tóg: “ã tỹ ãg kri tỹ pã'i nĩn kỹ tóg vẽnhmỹ nĩ,” he mũ, “ẽg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vẽn vĩ jẽnẽg mũn kã. ¹⁵ Hã ra tóg tỹ pã'i nĩn kỹ kějẽn vỹn ke mũ, ga ẽn ve kar kỹ, tá ti rãnrãj han kãn kar. Kỹ tóg tỹ pã'i mág jẽ. Vỹn ke kỹ tóg ã camarada ag jẽ prẽr mũ sir, ti tỹ ùn mỹ jãnkamy vin ja ẽn ag. Ti tỹ ag rãnrãj tugnỹm sór vẽ, ag ganho ve sór vẽ gé. ¹⁶ Kỹ ù tóg ti tá jun kỹ ti mỹ: “pã'i,” he mũ. “Ti kãmur pir nĩm ã tóg mỹr. Hã ra sóg kri ù tỹ 10 (ke) ganhar ké,” he tóg. ¹⁷ Kỹ ti patrão tóg ã camarada mỹ: “jykre há tãvĩ ã tóg nĩ,” he mũ. “Nén sĩ ki rĩr há han ã tóg, hã kỹ ã tóg cidade tỹ 10 (ke) ki rĩr mũ ha,” he tóg, pã'i ti, ã camarada mỹ. ¹⁸ Kỹ ù tóg ti tá jun mũ gé. Kỹ tóg ti mỹ: “pã'i,” he mũ gé. “Ti kãmur pir nĩm ã tóg mỹr. Hã ra sóg kri ù tỹ 5 (ke) ganhar ké,” he tóg. ¹⁹ Kỹ ti patrão tóg ti mỹ: “cidade tỹ 5 (ke) ki rĩr jẽ ã tóg ke mũ ha,” he mũ gé.

²⁰ Kỹ ù tóg tá jun mũ gé. Kỹ tóg ti mỹ: “pã'i,” he mũ gé. “Ha vé, ã tũ ti,” he tóg. “Inh krĩ pãgja ki sóg tógfin kỹ nĩm han. ²¹ ã kamẽg ja inh nĩ, ã vĩ tar to. ã tỹ nén vin ja tũ ẽn mãn sór ã tóg tĩ, ã tỹ nén krãn ja tũ kunũnh sór ã tóg tĩ,” he tóg, ti camarada ti, pã'i ti mỹ. ²² Kỹ ti patrão tóg ti mỹ: “ã vĩ tóg ã jykre pãno han mũ, ha mẽ,” he mũ. “Inh mỹ vĩ tar han tĩ? Inh mỹ sỹ nén vin ja tũ mãn sór tĩ? Inh mỹ sỹ nén krãn ja tũ kunũnh sór tĩ? Hã ki kanhró ã mỹ nĩ?” ²³ Kỹ ã tỹ ne jẽ inh jãnkamy tỹ banco ki rãnrãj ti ag mỹ vin ja tũ nĩ nẽ? ã tỹ ag mỹ vin mũ ra sóg ti juro venh mũ vẽ, kỹ sóg isũ kãfór mãn ke mũ vẽ,” he tóg, ti patrão ti, ã camarada mỹ. ²⁴ Kỹ tóg tá nỹti ag mỹ: “ti nĩgã ti tũ mã,” he mũ. “Ủ tỹ ti kãmur tỹ 10 (ke) mãn ja ẽn mỹ nĩm, ti tũ pir ti,” he tóg mũ sir. ²⁵ Kỹ ag tóg ti mỹ: “pã'i,” he mũ. “Ti kãmur tỹ 10 (ke) vỹ tỹ ti tũ nỹti. Tũ mág ve ti huri,” he ag tóg, pã'i mỹ. ²⁶ Kỹ tóg: “hỹ,” he mũ. “Hã kỹ sóg tó mũ.

Ủn tũ mág vỹ mãn mãn ke mũ. Ủ tỹ tũ sĩ nĩ ẽn tũ kunũnh kãn jẽ ag tóg ke mũ gé,” he tóg. ²⁷ “Kỹ inh kato tẽ mũ ag pére kãmũmnĩ, ù tỹ iso: “ti tỹ ãg kri tỹ pã'i jẽn kỹ tóg ãg mỹ kórég nĩ,” he mũ ẽn ag. Ag kãgtén ra, inh rĩnve,” he tóg, pã'i ti,” he tóg, Jesus ti. Ti tỹ ãg tỹ ti rãnrãj ki rĩr há han ke kãmén hã vẽ.

²⁸ Tag tó kãn kỹ tóg tá kãkutẽ mũ sir, kỹ tóg cidade tỹ Jerusalém ra tĩ mũ.

Jesus tỹ Jerusalém tá jun

(Mt 21.1-11; Mc 11.1-11; Jo 12.12-19)

²⁹ Ti tỹ Jerusalém ra tĩg kỹ tóg ẽmã tỹ Betfagẽ to hã jun mũ, ẽmã tỹ Betânia tá, pãnónh tỹ Oliveiras he mũ ẽn tá. Tá jun kỹ tóg ã mrẽ mũ tĩ rẽgre ag jẽnẽg mũ, ag tỹ ti mỹ ag mẽg tỹ burrica ve jẽ. ³⁰ Hã kỹ tóg ag mỹ: “ẽmã ẽn ra mũmnĩ, ẽg jo ẽmã ẽn ra,” he mũ. “Tá junjun kỹ ãjag tóg burrica fi kósin venh mũ. Kri nĩ ja tũ ja tóg jẽ ver. Ẽn kavãn kỹ ti pére kãmũmnĩ, ti kyvãn kỹ,” he tóg. ³¹ “Hẽn ri ke mũn ag tóg ãjag mỹ: “ãjag tỹ ne jẽ ti kavãn nẽ?” henh mũ. Kỹ ag mỹ: “ẽg Senhor vỹ ti ve sór mũ,” hemnĩ,” he tóg, Jesus ti.

³² Kỹ ag tóg mũ mũ, Jesus tỹ ag jẽnẽn kỹ. Ti tỹ ag mỹ tó mũ ve kãn ag tóg mũ sir. ³³ Kỹ ag tóg ti kyvãg mũ. Kỹ ti tỹ tỹ ùn mẽg mũ ag tóg ag mỹ vĩ mũ. “ãjag tỹ ne jẽ burrica kósin tag kavãn nẽ?” he ag tóg. ³⁴ Kỹ ag tóg: “ẽg Senhor vỹ ti ve sór mũ,” he mũ. ³⁵ Kỹ ag tóg Jesus mỹ ti pére kãmũ mũ. ãjag kur kugjén ag tóg mũ sir ti kri. Kỹ Jesus tóg kri nĩ mũ sir. ³⁶ Kỹ tóg tĩ mũ. Kỹ ag tóg ãjag kur kugjén mũ sir, ẽpry jagma, ẽmĩn jagma. ³⁷ Ge kỹ ag tóg Jerusalém to hã junjun mũ sir, pãnónh tỹ Oliveiras to re kỹ.

Ag tỹ pãnónh ẽn to re kỹ vãhã ag kar ẽn tóg Topẽ mỹ vĩ há han mũ sir, Jesus mrẽ mũ kar ẽn ag. Ag mỹ tóg sér tĩ. Jesus tỹ nén han mũ ve ja ag tóg nĩgtĩ, ti tỹ nén han vãn hyn han mũ ti. Ẽn mĩ ẽkrén kỹ ag tóg Topẽ mỹ vĩ há han mũ, jamã hár(a). ³⁸ Kỹ ag tóg: “!..sẽr tóg

tĩ ãg mĩ..!” he mũ. “!..Ëg Senhor vỹ ãg ki jun..., ãg jóg mág tỹ ti jẽnẽn kỹ..!” he ag tóg. “!..Kanhkã tá ke ag tóg jatu nỹtĩ..! Topẽ mỹ ãg tóg vỹ há han sór mũ, kynhmỹ nĩ ên mỹ..!” he ag tóg, prẽnprẽn kỹ.

³⁹ Hã ra Fariseu ù ag tóg tá nỹtĩ gé, vẽnẽ e ên kãmĩ. Kỹ ag tóg Jesus mỹ: “Senhor,” he mũ. “Á mrẽ mũ tĩ ag mỹ: “prẽnprẽn tũg ra,” hẽ,” he ag tóg, Jesus mỹ. ⁴⁰ Hã ra Jesus tóg ag mỹ: “vó,” he mũ. “Ha mẽ, ag prẽnprẽn tũ nĩ ra pó hỹn prẽnprẽn mũ vẽ, ag mỹ sinsér mũ vẽ,” he tóg ag mỹ.

Jesus tỹ Jerusalém to fỹ

⁴¹ Ge kỹ ag tóg cidade tá junjun mũ sir. Cidade ên ve kỹ tóg to fỹ mũ, Jesus ti. ⁴² “Jerusalém tá ke ag vỹ ki kanhrân-rân sór tũ nỹtĩ,” he tóg. “Ag tỹ ùri ki kanhrân-rân há tóg tĩ vẽ, hã ra ag tóg ke jãvãnh nỹtĩ. Ájag tỹ ki kanhrân-rân he mũ ra ájag tóg jatu kenh ke mũ vẽ, mỹr, ha mẽ, hã ra ájag tóg jẽmẽ sór tũ nĩ. Kutu ájag tóg nỹtĩ. ⁴³ Hã kỹ ájag tóg vãhã kurã kórég pẽ venh ke mũ. Ájag kato tẽgtẽ mũ ag vỹ ájag to ráránh ke mũ. Kũm'kũm ke jẽ ag tóg ke mũ, ájag cidade jy ró pẽnĩn. Komẽr hã ag tóg ájag to grẽngrẽn kenh ke mũ, kỹ ag tóg ájag mãn vỹrỹn kenh ke mũ sir. ⁴⁴ Ájag tỹ tũg' he kãn jẽ ag tóg ke mũ, ájag krẽ ke gé. Ájag ãn kókẽn kãn jẽ ag tóg ke mũ gé. Kỹ ãn tỹ pó pi(jé) jagnẽ kri nỹtĩnh mũ'. Kurã há ki ájag tóg Topẽ vỹ mẽ jãvãnh nỹtĩ, ùri. Topẽ vỹ ùri ájag mỹ vỹ há han mũ ver, hã ra ájag tóg mẽ jãvãnh nỹtĩ. Hã kỹ ájag tóg ti kórég venh ke mũ,” he tóg, Jesus ti. Fỹ pẽ han kỹ tóg to mũ, cidade mĩ tĩg kỹ.

Jesus tỹ Topẽ jo ãn tá jun

(Mt 21.12-17; Mc 11.15-19; Jo 2.13-22)

⁴⁵ Kỹ tóg Topẽ jo ãn tá jun kỹ kãra rã mũ sir. Kỹ tóg ù tỹ tá nẽn ù vender he tĩ ag pan mũ sir. ⁴⁶ Ag mỹ tóg tag tó mũ, ha mẽ. “Topẽ vỹ rá to jykrẽn nĩ,” he tóg.

“Tag vỹ rãn kỹ nĩ, ha mẽ. ãnh ãn jiji vỹ tỹ Topẽ mrẽ vỹ jafã nĩ, he tóg, Topẽ vỹ tỹ rãn kỹ nĩ ki. Hã ra ájag tóg Topẽ mrẽ vỹ jafã tag krẽm nẽn kar pigu mũgtĩ, kỹ tóg bandido ag jamã ri ke nĩ sir,” he tóg, Jesus ti. Ag pan kỹ tóg ag mỹ tó mũ.

⁴⁷ Hã ki tóg kurã kar ki ag kanhrân-rân mũ, Topẽ jo ãn krẽm. Hã ra Topẽ tũ ki rĩr tĩ to pã'i ag mỹ tóg kórég nĩ, Topẽ vỹ rãn tĩ ag mỹ ke gé, pã'i kar ag mỹ. Hã kỹ ag tóg ti tẽn ke to jykrẽn mũ sir. ⁴⁸ Hã ra tóg ag mỹ ki króm sór tũ nĩ. Vẽnẽ kar mỹ tóg mẽ sěr tĩ, ti vỹ ti, hã kỹ pã'i ag tỹ ti tẽn sór mũ ra tóg vẽnẽhmỹ tĩ sir ag mỹ.

Ûn nỹ hỹn Jesus jẽnẽ

(Mt 21.23-27; Mc 11.27-33)

20 Kurã kar ki Jesus tóg Topẽ vỹ tó jẽ nĩ, vẽnẽ vỹ sěr ãn, Topẽ jo ãn krẽm. Kỹ tóg kejẽn tá jẽ nĩ. Kỹ Topẽ tũ ki rĩr tĩ to pã'i ag tóg ti to kãmũ mũ, Topẽ vỹ to professor ag ke gé, kófa ag ke gé. ² Ti mỹ ag tóg: “ẽg tỹ ã ki jẽmẽnẽ há tóg tĩ,” he mũ. Kỹ tóg ag mỹ: “hej,” he mũ. Kỹ ag tóg: “ã vẽnẽ jykre tỹ ne tỹ tag han mũ?” he mũ. “Û nỹ ã jẽnẽ?” he ag tóg. ³ Kỹ tóg ag mỹ: “ájag ki sóg jẽmẽnẽ ke mũ gé, vẽnẽ kato,” he mũ. “Ha mẽ. ⁴ João vỹ ag kygpég tĩ ja nĩgtĩ. Kỹ ti mỹ kanhkã tá vẽnẽ jykre han mũ', ãprã jykre vó?” he tóg. “Û nỹ ti jẽnẽ?” he tóg. “ãnh mỹ tó,” he tóg, Jesus ti, ag mỹ. ⁵ Kỹ ag tóg jagnẽ mrẽ to jykrẽn mũ sir. “Ëg tỹ ti mỹ: “Topẽ tỹ ti jẽnẽ vẽ,” hen kỹ tóg ãg mỹ: “ájag tỹ ne jẽ ti vỹ kri fig tũ ja nĩ nẽ?” henh ke mũ,” he ag tóg jagnẽ mỹ. ⁶ “Ëg tỹ hã ra ti mỹ: “ãprã ke jykre ja vẽ,” hen kỹ vẽnẽ kar vỹ ãg pin sór ke mũ, pó tỹ, ha vemnĩ. João to ag tóg: “Topẽ vỹ tó ti pẽ ja vẽ,” he tĩ, hã kỹ ag tóg ãg to jũnh ke mũ, ãg tỹ: “hã tũ vẽ,” hen kỹ,” he ag tóg mũ jagnẽ mỹ. ⁷ “Topẽ jykre han ja ti nĩ,” he sór tũ ag nỹtĩ, kỹ ag tóg: “ãprã ke jykre han ja ti nĩ,” he sór tũ nỹtĩ gé. Hã kỹ ag tóg Jesus mỹ: “ẽg pi(jé) ki kanhrõ nỹtĩ,” he mũ, João jykre to. ⁸ Kỹ Jesus tóg ag mỹ: “kỹ

sóg ajag mý ù tỹ inh jēnēg mū ēn tónh ke tũ nĩ gé,” he mū. Ā kato tē mū ag mý tóg ke mū.

Ũn camarada kórég ag to comparação
(Mt 21.33-46; Mc 12.1-12)

⁹Kỹ tóg vēnh kar kanhrānrān kỹ ag mý: “ēg tỹ Topē kato tē kỹ tóg ge nỹnh mū, ha mē,” he mū. “Kejēn ù tóg nĩgtĩ. Uva krān ja tóg nĩ, nēn kanē tỹ vinho han jafā ēn. Kỹ tóg ù tỹ ki rĩr tĩ ag mré to jykrén kỹ ag mý tovānh mū sir. Ag mý tovānh kỹ tóg ga ù ra tĩ mū. Hā ra tóg kātīg vānh han mū. ¹⁰Ti uva kanēn kỹ tóg ag mý ā camarada jēnēg mū, ù tỹ ki rĩr tĩ ag mý, ag tỹ ti mý ti tũ nĩm jé, ēkré kanē ēn ti. Hā ra ag tóg ti mý vin tũg mū. Ti mrānmrān ag tóg mū. Kỹ ag tóg ti mý: “ha tĩg,” he mū. Nēn ù tũ ra tóg tĩ mū sir. ¹¹Kỹ tóg ā camarada ù jēnēg mū gé sir. Hā ra ag tóg ti mrānmrān mū gé. Ti mý fēfén kar kỹ ag tóg ti mý: “ha tĩg,” he mū gé sir. Nēn ù tũ ra tóg tĩg mū gé. ¹²Kỹ tóg ag mý ù jēnē mān mū gé sir, hā ra ag tóg ti mrānmrān kỹ ti rānh kỹ ti tũn mū sir.

¹³Kỹ uva kré tỹ ùn tũn mū tóg to jykrén mū. “Inh hỹn hēn ri kēnh ha,” he tóg, to jykrén kỹ. “Inh kósín jēnē jé sóg ke mū, inh fe pē ēn, hēn ri ke mūn ag ti kamēg mū,” he tóg. ¹⁴Ti kósín tỹ ag tá jun kỹ nēn kré ki rĩr tĩ ag tóg ti vėg mū. Kỹ ag tóg ti to jykrén mū, jagnē mré. “Ke-jēn ēkré tag vỹ tỹ ti tũ nỹnh mū,” he ag tóg. “Mū nỹ, ti tén jé, ti tũ tag tỹ tỹ ēg tũ nỹnh jé,” he ag tóg. ¹⁵Kỹ ag tóg ró mã ra ti pére mū kỹ tá ti tén mū sir. Kỹn hỹn hē ri kēnh ke mū', ēkré tỹ ùn tũn mū ēn ti?” he tóg, Jesus ti. ¹⁶“Kātīg jé tóg ke mū, ēkré ki rĩr tĩ ag kāgtén jé. Kỹ tóg camarada ù ag mý fĩnh mū sir, ā jakré ti,” he tóg, Jesus ti.

Kỹ ag tóg mēg mū, ti vĩ ti, ti pēnĩn nỹtĩ ēn ag. Kỹ tóg ag mý e tĩ. “Ēg jé tag venh ke tũ nĩ,” he ag tóg mū, ù tỹ Jesus vĩ mēg mū ag. ¹⁷Hā ra Jesus tóg ag ki ēvānh kỹ

ag mý: “Topē vĩ rá tag to jykrén nĩ, ha mē,” he mū. “Pó tỹ ĩn han jafā fón ag tóg, pó tỹ ĩn han tĩ ag. Ag mý tóg kórég ja nĩ, pó ēn ti. Hā ra Topē tóg pó ēn hā tỹ ĩn nūna han mū,” he tóg, Topē vĩ tỹ rán kỹ nĩ ki,” he tóg, Jesus ti. Ti tỹ ā kato vāsānsān mū ag mý vēnh kāmén hā vė. ¹⁸Kỹ tóg ag mý: “ù tỹ hēn ri ke ag vỹ pó tag kri vār ke mū, kỹ ag tóg kri vār kỹ tũ' hēnh ke mū,” he mū. “Kỹ pó tag vỹ ù tỹ hēn ri ke ag kri kutēnh ke mū gé, kỹ tóg ag tỹ nám nám ke kām mū sir, ag kri kutē kỹ,” he tóg, Topē vĩ tỹ rán kỹ nĩ ki,” he tóg, Jesus ti. Ti tỹ ag tỹ ti ki rā tũ tugrĩn nũgme ki vār ke tón hā vė.

Ēg tỹ imposto kajām

(Mt 22.15-22; Mc 12.13-17)

¹⁹Kỹ Topē vĩ to professor ag vỹ ti vĩ mēg mū, Topē tũ ki rĩr tĩ to pā'i ag ke gé. Ag hā to tóg kāmén ja nĩ, “ēg tỹ Topē kato vāsān tag vỹ ge nỹnh mū,” he mū ēn ti. Kỹ ag tóg ki kanhró nỹtĩ sir, hā kỹ ag tóg ti se sór mū. Hā ra ag tóg ùn e ēn kamēg mū. Ti vĩ vỹ vēnh kar mý mē há tĩ, hā kỹ pā'i ag tóg ti ség tũ nĩ ver, ag tỹ ti se sór mū (hā) ra. ²⁰Kỹ ag tóg hā ra ti tugnỹm mū. Ti vĩ to ag tóg vājig mū, ag tỹ ti vĩ to fóg tỹ pā'i mý ti fēg jé. Ag tỹ ti vĩ tugnĩn fóg tỹ pā'i mág mý: “ha ti vóg kónān,” he sór vė. Hā je ag tóg ùn jykre kuryj nỹ ve ag jēgnēg mū, ag tỹ ón kỹ Jesus ki jēmē jé. ²¹Kỹ ēn ag tóg sir Jesus mý: “Senhor’,” he mū. “Vēnh jykre kuryj hā tó ā tóg tĩ, hā kāmén ā tóg tĩ. Hā kỹ ēprā ke ag ve tóg ā mý tỹ nēn ù tũ nĩ. Hā kỹ ā tóg Topē japry to, Topē jamĩn to ēg kanhrān há han tĩ,” he ag tóg mū. ²²“Kỹn mý há nỹ, ēg tỹ fóg tỹ pā'i mág tỹ imperador mý jānkamy ēn nĩm ti, imposto kajām jé? Ēg mý hỹn nĩm mū', nĩm ke tũ nĩ vó?” he ag tóg. ²³Hā ra Jesus tóg ki kanhró nĩ, ag jykre régre ti. Hā kỹ tóg ag mý: “ajag ne tóg ón kỹ inh ki jēmē sór mū’,” he mū. ²⁴“Inh mý jānkamy ven. Û jiji nỹ kā nĩ? Û kāgrá

nỹ kã nĩ?” he tóg. Kĩ ag tóg ti mĩ: “pã'i mág kãgrá vë,” he mũ. ²⁵ Kĩ tóg ag mĩ: “kĩ pã'i mág mĩ ti tũ nĩm, jo Topê mĩ ti tũ nĩm gé,” he mũ, Jesus ti. ²⁶ Hã kĩ tóg ag tĩ ti vĩ to ti senh ke tóg tũ tĩ, ti vĩ há han kĩ. Kĩ tóg ag mĩ e tĩ, ti vĩ há tăvĩ ên ti. Kĩ ag tóg ti mĩ vĩ mĩn tũ nĩ sir. Hã ra vênh kar vĩ ti vĩ mễg nỹtĩ nĩ.

Ủn kãgter mũ ag tĩ rĩnrĩr mĩn ke

(Mt 22.23-33; Mc 12.18-27)

²⁷ Kĩ Saduceu ag tóg ti tá junjun mũ gé, ti ki jẽmẽ jé. Hã ra Saduceu ag tóg: “ẽg ter ja tá ẽg tóg vỹn ke mĩn ke tũ nĩ, rĩr mĩn ke tũ ẽg tóg nĩ,” he tĩ. ²⁸ Ên ag vĩ Jesus ki jẽmẽ sỏr mũ gé, ón kĩ. Kĩ ag tóg ti mĩ: “Senhor,” he mũ gé. “Moisês vĩ ẽg mỹ vênh jykre tag nĩm, hã vĩ: ã régre tĩ ã krẽ tũ ra ter kĩ ã tĩ ti prũ fi tĩ prũg ke vë, he mũ. ã tĩ ã régre mỹ ã krẽ han ke vë, fi ki, he tóg mũ gé. Moisês tĩ ẽg mỹ tó jan hã vë,” he ag tóg mũ, Saduceu ag. ²⁹ “Kĩ ù tĩ jagnẽ mrẽ pafa ja tĩ 7 (ke) ag vĩ nỹgtĩ. Ag kãke vĩ prũg mũ, hã ra tóg ã kỏsin tũ ra ter mũ. ³⁰ Kĩ ti jãvy vĩ fi tĩ prũg mũ sir, hã ra tóg ã kỏsin tũ ra ter mũ gé. ³¹ Kĩ ti jãvy ù tóg fi tĩ prũg mũ gé, hã ra tóg ter mũ gé, ti kỏsin tũ ra. Gen kĩ ag tóg kãgter kãn mũ kejẽn, ù tĩ 7 (ke) ên ag. ³² Kĩ vãhã ag prũ fi vĩ ter mũ gé sir. ³³ Kĩ fag kãgter ja tá rĩnrĩr mĩn kĩ fi hỹn mẽn tĩ 7 (ke) nĩnh mũ vë. Ag kar vĩ fi tĩ prũg ja nỹtĩgtĩ. Hã kĩ tóg vênhmỹ nỹ, ag tĩ: “rĩnrĩr mĩn jé ẽg tóg ke mũ,” hen kĩ,” he ag tóg. Saduceu ag tĩ Jesus mỹ ken hã vë.

³⁴ Kĩ Jesus tóg ag mỹ kãmẽn mũ. “Êprã ke ag vĩ prũgprũg tĩ, kĩ fag vĩ ag tĩ mẽn tĩ gé. ³⁵ Ag kãmĩ ù ag tóg ãjag kãgter ja tá rĩnrĩr mĩn ke mũ, ti kurã tá krỹg kĩ. Ên ag vĩ prũg mĩn ke tũ nĩ sir, mẽn mĩn ke tũ fag tóg nĩ gé sir, ãjag rĩnrĩr mĩn kĩ. ³⁶ Ter mĩn ke tũ ag tóg nĩ gé, mỹr, ha mẽ, hã kĩ ag prũg mĩn ke tũ nĩ,

kĩ fag mẽn mĩn ke tũ nĩ gé. Kanhkã tãn ri ke ag nỹtĩ, Topê tĩ jẽgnẽ jafã ag ri ke mỹr, ùn rĩnrĩr mĩn mũ ag. Topê krẽ vĩ tĩ ag nỹtĩ sir, ag tĩ ãjag kãgter tá rĩnrĩr mĩn ken kĩ. ³⁷ Rĩnrĩr mĩn jé ag tóg ke mũ, ùn kãgter mũ ag, ha vemnĩ. Hã kĩ Moisês tóg Topê to tag tó ja nĩ, ha mẽ. Tĩ tĩ vãnh pũr nĩ ên tá ti mrẽ vẻmẽn kar kĩ tóg Topê to: “Abraão tĩ ùn to: Topê, he mũ ên vë, Isaque tĩ ùn to: Topê, he mũ ên, Jacó tĩ ùn to: Topê, he mũ ên,” he ja nĩ, Moisês ti. ³⁸ Kãgter ag huri, Abraão, Isaque, Jacó, hã ra Moisês tóg Topê to: “Abraão tĩ ùn to: Topê, he mũ ên vë,” he ja nĩ. Tĩ tĩ vĩ ag Topê nĩn kĩ ag tóg rĩnrĩr nỹtĩ, ha mẽ, ag kãgter mũ ra. Ủn kãgter kar ag vĩ Topê mỹ rĩnrĩr nỹtĩ,” he tóg, Jesus ti.

³⁹ Kĩ ù tĩ Topê vĩ rãn tĩ ù ag tóg ẽg Senhor tĩ Jesus mỹ: “vĩ há han ã, ẽg ter ja tá vỹn kenh ke mũ tag to,” he mũ, ti mỹ. ⁴⁰ Kĩ ù tóg ti ki jẽmẽ mĩn sỏr tũ nĩ sir. Tĩ kamẽgmẽg ag tóg mũ, hã kĩ ag tóg ti ki jẽmẽ mĩn sỏr tũ nĩ ha.

Cristo mỹ tĩ Davi kỏsin nĩ, Topê kỏsin mỹ vỏ

(Mt 22.41-46; Mc 12.35-37)

⁴¹ Kĩ Jesus tóg ag ki jẽmẽg mũ gé sir. Kĩ tóg ag mỹ: “Topê vĩ rãn tĩ ag ne tóg: “Cristo vĩ tĩ Davi kỏsin nĩ,” he tĩ,” he mũ. ⁴² “Hã ra Davi tóg Cristo tó ja nĩ, ti tĩ Topê jé rãn kĩ. Kĩ tóg: “ẽg jóg mág tĩ Topê vĩ inh Senhor mỹ tag tó ja nĩ, ha mẽ: “nĩ ra ver, inh pẽgja tá,” he ja ti nĩ. ⁴³ “Isỹ ã kato vãsãnsãn mũ ag tĩ ã krẽm vin ke vë, kĩ ag sigse ri ke vë sir. Tag jãvãnh nĩ ver,” he ja ti nĩ, Topê ti,” he ja tóg nĩgtĩ, Davi ti,” he tóg, Jesus ti. ⁴⁴ “Hã kĩ Davi tóg Cristo to: “inh Senhor,” he ja nĩ. Kĩ ti kỏsin mỹ tĩ ti kri ke nĩ?” he tóg mũ, Jesus ti.

Hã ra ag tóg ti mỹ tó tũg mũ. Ag tĩ ne tỏnh ke tóg tũ tĩ, ti kato tẻgtẻ mũ ag mỹ.

**Ón kŷ Topě vĭ to professor ag
kaměg jé ěg ke mŭ**

(Mt 23.1-36; Mc 12.38-40)

⁴⁵ Věnh kar tóg mēg mŭ, Jesus vĭ ti. Kŷ tóg ā mré mŭ tĭ ag mŷ: ⁴⁶ “ón kŷ Topě vĭ to professor ag kaměg nĭ,” he mŭ. “Kur téj rĭnh ka(mē) ag nŷtĭ,” he tóg. “Kŷ věnh kar tŷ ag mŷ: “ā mŷ há?” hen kŷ tóg ag mŷ sér tĭ, ag tŷ cidade kuju kāmĭ mŭn kŷ. Věnh kanhrān jafā krēm ag tóg jĕn vén tĭ, ag tŷ tŷ pā'i nŷtĭn kŷ,” he tóg. ⁴⁷ “Hā ra ag tóg ũn mén ter ja fag tŭ măn kăn tĭ. Fag tŭ măn kăn kŷ ag tóg ón kŷ Topě mré vĭ mág han mŭgtĭ, ěg tŷ ag to: “ũn há vŷ tŷ ag nŷtĭ,” he jé. Hā to ag vēsŷrēnh mág tāvĭ han ke mŭ,” he tóg, Jesus ti. Tĭ tŷ ũ tŷ ón kŷ Topě to há nŷtĭ ag kāmén hā vē.

Ũn mén ter ja fi tŷ ā tŭ vin kăn

(Mc 12.41-44)

21 Kŷ Jesus tóg Topě jo ĩn tá jĕ kŷ tāmĭ ěvānh kŷ ũn rico ag vĭgvég mŭ. Jānkamy vin jafā ki ag tóg ājag tŭ vin tĭ, Topě mŷ, jānkamy tĭ. Vin mág ag tóg mŭ. ² Kŷ ũn mén ter ja fi vŷ tá jun mŭ gé sir. Tŷ nén ũ tŭ fi tóg nĭ, hā ra fi tóg jānkamy kāsĭr régre vin mŭ, Topě mŷ. ³ Kŷ Jesus tóg fi to: “ve ra ha,” he mŭ. “Ũn rico tŷ vin káfór han fi tóg, fi tŭ sĭ (hā) ra. Tŷ nén ũ tŭ fi tóg nĭ, fi mén vŷ hur ter. ⁴ Kŷ fi tóg ā tŭ vin kăn ja nĭ, fi jĕn mré hā. Jāvo ũn rico ag vŷ ājag tŭ ke hā tŷ Topě mŷ vin mág tĭ. Hā ki fi tóg ag tŷ nĭm káfór han, fi tŷ nĭm sĭ pĕ han mŭ ra. Ki hā sóg tó mŭ mŷr,” he tóg, Jesus ti.

Topě jo ĩn kókén kŷ nĭnh ke

(Mt 24.1-2; Mc 13.1-2)

⁵ Ěn kă ũ ag tóg Topě jo ĩn to vĭ há han mŭ. “Sĭnvĭ pĕ ti jĕ,” he ag tóg mŭ. “Tĭ pó ve ra ha, mág tĭ nŷtĭ. Tĭ sĭnvĭ han jafā vŷ e nŷtĭ gé,” he ag tóg.

⁶ Kŷ Jesus tóg ke mŭ. “Mŷ ājag mŷ sĭ?” he tóg. “Kejĕn tóg kókén kăn kŷ nĭnh mŭ, ha vemnĭ, kŷ pó vŷ jagnĕ kri nŷtĭ măn ke tŭ nĭ ha. Gŭm ke kăn jé tóg ke mŭ, tag ti,” he tóg, Jesus ti.

Věnh jagăgtar to ră

(Mt 24.3-14; Mc 13.3-13)

⁷ Kŷ ag tóg ěg Senhor ti mŷ: “kurā tŷ ne kă ke nĕ hŷn?” he mŭ. “Ěg hŷn hĕn ri ken kŷ ti kurā ki kanhró nŷtĭnh mŭ hŷn? Topě hŷn ne han ke mŭ, ěg tŷ kurā ěn ki kanhró nŷtĭ jé?” he ag tóg.

⁸ Kŷ tóg ag mŷ: “ker ũ vĭ jĕmĕ hĕ,” he mŭ. “Ũ tŷ hĕn ri ke ag vŷ ĩnh jĭji tó kāmŭnh mŭ. “Cristo vŷ tŷ ĩnh nĭ,” he jé ag tóg ke mŭ. “Īnh kurā vŷ hur jun,” he jé ag tóg ke mŭ. Ag nón mŭ tŭg nĭ. ⁹ Věnh génh mĕgmĕ jé ājag tóg ke mŭ, jagnĕ kato vāsānsān mŭ ag. Kaměg tŭg nĭ hā ra. Věnh génh tŷ hĕn ri ke han jé ag tóg ke mŭ, kurā tŷ ěgno to hā. Tĭ kurā kă ke pijé,” he tóg.

¹⁰ Kŷ tóg ag mŷ: “povo ag tŷ jagnĕ kato vāsānsān ke vē, pā'i krēm ke ag tŷ pā'i ũ krēm ke ag to jŭnh ke vē,” he mŭ. ¹¹ “Ga tŷ ragrag ke jagy tŷ hĕn ri ke han ke vē gé, ěn kă. Kŷ vējĕn tóg tŭ' hĕnh ke mŭ gé. Věnh kaga kórég (ka)mĕ vŷ věnh vinven ke mŭ, ěn kă sir. Nén ũ vēnhmŷ vŷ vēnh vinven ke mŭ gé, kanhkă tá, kŷ věnh kar vŷ kanĕ junjur ke mŭ,” he tóg, Jesus ti.

¹² “Tag to hā ag tóg ājag sigsenh ke mŭ gé, ājag vóg kónān jé ag tóg ke mŭ gé, věnh kanhrān jafā krēm ag tóg ājag jykre vĭgvenh ke mŭ gé, věnh se ja kăki ag tóg ājag vin ke mŭ gé. Pā'i mág tŷ rei ag mŷ ag tóg ājag venven ke mŭ, pā'i tŷ gov-ernador ag mŷ ke gé, ājag tŷ ĩnh jyjy tó ja tugnĭn. ¹³ Ājag tŷ ĩnh vĭ tó jé, hā jé ag tóg ājag tŷ genh ke mŭ. ¹⁴ Ěn kă ājag tŷ nén ũ tónh ke to jykrén tŭg nĭ, to krĭ kufy han tŭg nĭ gé. ¹⁵ Īnh hā vŷ ājag vĭ han ke mŭ, ĩnh jykre nĭm jé sóg ke mŭ ājag mŷ, ājag tŷ ag mŷ tón jé,” he tóg. “Kŷ ag tŷ ājag vĭ kafān sór mŭ ra tóg ag

mỹ vènhmỹ tĩnh mũ, ha vemnĩ, ãjag kato tẽgtẽ mũ ag mỹ. Ag tỹ ne tónh ke tóg tũ tĩnh mũ, ha vemnĩ,” he tóg, Jesus ti.

¹⁶ “Ën kã ãjag han mũ ãn vỹ ãjag senh mũ, ãjag mré pafa mũ ag ke gé, ãjag mré ke ag ke gé, ãjag to há kar ag mỹr,” he tóg. “Ãjag kãmĩ ù ag kãgtén jé ag tóg ke mũ gé, ha vemnĩ. ¹⁷ Vènh kar vỹ ãjag to kórég tãvĩ nỹtĩnh mũ, inh jiji tugrĩn. ¹⁸ Hã ra ãjag vèké vèsỹrénh ke tũ nĩ, ãjag gãnh pĩr vỹ fagrĩnh mỹ kutènh ke tũ nĩ, ha vemnĩ. ¹⁹ To tar nỹtĩmnĩ, ãjag vèsỹrénh ke to, kỹ ãjag tóg rĩr krỹg ja tũ ãn venh ke mũ,” he tóg, Jesus ti.

Jerusalém kókén kỹ nỹnh ke

(Mt 24.15-21; Mc 13.14-19)

²⁰ “Kejẽn ag tóg Jerusalém jy nỹtĩnh mũ, soldado ag, ag tỹ cidade ãn kókén jé. ãjag tỹ tag ve kỹ ãjag tóg ki kanhró nỹtĩnh mũ. Ag tỹ ti kókén kãn ke kurã vỹ jun ke mũ, kurã ãn kã. ²¹ Kỹ vènh pigju mũmnĩ, pãnónh ra, ãjag tỹ Judéia ki nỹtĩn kỹ. ãjag tỹ cidade mág tá nỹtĩn kỹ pétĩgtẽmnĩ, vãnħ kãra. ãjag tỹ vãnħ kãmĩ ãmã kãsir ki nỹtĩn kỹ cidade ra mũ tũg nĩ. ²² Topẽ tỹ ag vóg kónãn ke kurã vè sir, ag jykre kórég to, hã kỹ tóg vãsỹ rán kỹ nĩ. Vènh rá ãn ve jé ãjag tóg ke mũ, kurã ãn kã. ²³ Kỹ ùn kufy fag vỹ vèsỹrénh mág ke mũ, kurã ãn kã, gĩr pygfãm mũ fag ke gé. Ëprã ke ag vèsỹrénh mág tãvĩ han ke vè, Topẽ tỹ povo tag to jũ jagy han ke vè, kurã ãn kã. ²⁴ ãjag kãmĩ ùn e tãvĩ kãgter ke vè, rógro tỹ. Kỹ ãjag kãmĩ ù ag vỹ sigse kỹ mũnh mũ, povo kar kãmĩ. Kỹ Jerusalém vỹ kókén kãn kỹ nĩnh ke mũ. Fóg ag vỹ sãnsãn ke mũ, ãjag cidade mág ti. Kejẽn fóg ag tỹ tũ' henh ke kurã vỹ jun ke mũ gé hã ra,” he tóg, Jesus ti.

Topẽ kósĩn kãtĩg mãn ke

(Mt 24.29-31; Mc 13.24-27)

²⁵ “Kurã ãn kã rã vènhmỹn ke vè, kysã ti ke gé, krĩg ti ke gé. Kỹ ga kri mũ ag vỹ

kamẽgmẽg kãn ke mũ. Kanẽ junjur mág jé ag tóg ke mũ, povo kar ãn ag. Kỹ goj vỹ krém ke mũ, goj kafã tũ vỹ jũnh ke mũ, ti kurã jun kỹ. ²⁶ Kỹ ãprã ke ag fe vỹ vo kónãn ke mũ, ag tỹ jũrũn ke vỹ ag kãgtén ke mũ, ag tỹ ãjag tỹ nén venh ke to jũrũn ken kỹ. Ëg tỹ kanhkã tá nén vèg tũ kar ãn vỹ ragrag ke kãn mũ mỹr, ha mẽ. ²⁷ Kỹ vãnħ vènh kar vỹ ti kãtĩg ãn venh ke mũ, ãprã ke fi kósĩn ãn ti. Kanhkã góg kãmĩ sóg kãtĩg ke mũ vãnħ sir. Inh ve vỹ tar nĩnh mũ, inh kãtĩg mãn kỹ. Kókov kãtĩg jé sóg ke mũ vãnħ sir,” he tóg, Jesus ti.

Ka tỹ figueira to comparação

(Mt 24.32-35; Mc 13.28-31)

²⁸ “Ãjag tỹ isỹ ãjag mỹ nén tó mũ ãn ve sĩ han kỹ ãjag kanẽ nĩm nĩ, ãjag krĩ ti ke gé, ti tỹ ãjag mỹ sér gy tĩn kỹ. Isỹ ãjag krenkren han ken vè ha, isỹ kurã ãn hã kã jun kỹ,” he tóg.

²⁹ Kỹ tóg ag mỹ: “inh kãtĩg mãn ke vỹ ge nỹnh mũ, ha mẽ,” he mũ. “Ka tỹ figueira to ki kanhrãn nĩ, ka ù to ke gé, to comparação han kỹ,” he tóg. ³⁰ “Ti pẽ tánh kỹ, ti féj tag han kỹ tóg kakó tĩ sir, ãkré tygtánh kurã ti. ³¹ Ën ri ke ti nĩ, ãjag tỹ inh kãtĩg mãn ke kurã ki kanhró nỹtĩ ti. ãjag tỹ sỹ ãjag mỹ nén tó ja ãn ve kỹ tóg kakó tãvĩ tĩ ha, inh kãtĩg ke ti,” he tóg. “Ën kã Topẽ tỹ tỹ ãg pã'i nĩ kenh ke vè sir. ³² Sỹ ke há vè, hã kỹ sóg tag tó mũ, ha mẽ. Û tỹ nén kar ãn vèg mũ ag vỹ inh kãtĩg mãn ke tag venh ke mũ, ùri, ag kãgter ke to hã,” he tóg. ³³ “Kanhkã vỹ tũ' he mũ, ga ti ke gé. Jãvo inh vỹ vỹ tũ' henh ke tũ nĩ,” he tóg, Jesus ti.

Ëg tỹ vènh ki ãmẽnh ke

³⁴ “Vènh ki ãmẽ, ãjag tỹ vèjẽn e to nug kaga tũ nĩ jé, tógã nĩnh to, ãjag tỹ kronkron to krĩ vènhmỹ tũ nĩ jé gé. Kỹ vèjẽn to krĩ kufy han tũg nĩ gé, kur to, tag ki nén ù kar to. Ke tũ nĩ mũ ra kurã ãn vỹ ãjag vatánh tá jun ke mũ, inh kãtĩg mãn ke kurã ãn ti. ³⁵ ãjag tỹ to vènh kãn kỹ

nýtĩ tú nĩn kýt tóg ājag mýt sēsĩ týt ěgje ki kutē ri ke nĩ. Věnh vatánh tá tóg ki kutē tĩ, jēsĩ tĩ. Ge ti nĩnh mũ, inh kătĩg măn ke ti, ga kri mũ ag kar mýt. Ag vatánh tá sóg jun ke mũ. ³⁶ Hã kýt ājag kanē nĩm nĩ, nũr sór tũg nĩ. Inh kătĩg kã jatu to ken hã vế, hã vỹ: nũr, he mũ. Topē mrē vỹ tovãnh tũg nĩ, ājag tar nýtĩ jé, nén ù jagy ěn ve kýt. Kýt ājag tóg ěprã ke fi kósĩn rĩnja tá jěnh ke mũ sir, mýt'ag tú nĩn kýt, isỹ vễnh kar jykre tugnỹm kurã ěn kã," he tóg, Jesus ti. Ti týt ag mýt kurã týt ěgno kãmén hã vế.

³⁷ Hã ki tóg kurã kar ki Topē jo ĩn krēm ag kanhrănĩn tĩ, Jesus ti. Kutyg kýt tóg cidade tá kãkutē kýt pãnónh ra tĩ tĩ, tá nũr jé. To ag tóg: Oliveiras, he tĩ, pãnónh ěn to. ³⁸ Ti týt kusã ki Topē jo ĩn tá jun kýt ag tóg tá ti vỹ jěmẻnh kãmũ tĩ, ù týt hẻn ri ke ag.

Ag týt Jesus se sór

(Mt 26.1-5; Mc 14.1-2; Jo 11.45-53)

22 ěn kã festa tóg kakó tĩ sir. Festa ěn ki ag tóg pão ù ko tĩ, hã ra tóg jãgja tú ja nĩgtĩ. Festa ěn jijin hã vỹ: Páscoa, he mũ. ² Kýt Topē tú ki rĩr tĩ to pã'i ag vỹ Jesus to jykrén mũ. Ag týt ti tén sór vế. Topē vỹ to professor ag vỹ ti tén sór mũ gé. Hã ra ag tóg povo kamẻg mũ, kýt ag tóg to jykrén kýt nýtĩ nĩ.

Judas týt pã'i ag mýt Jesus ven sór

(Mt 26.14-16; Mc 14.10-11)

³ ěn kã Judas ěn, ù týt Iscariotes he mũ ěn vỹ jagrẻ vẻg mũ sir, Satanás týt. Hã ra tóg týt ù týt 12 (ke) ag kã ù nĩ, Jesus týt ùn vin mũ ag kã ù vỹ týt ti nĩ. ⁴ Ti týt Satanás týt jagrẻ nĩn kýt tóg Topē tú ki rĩr tĩ to pã'i ag venh tĩ mũ sir, soldado to pã'i ag ke gé. Ti týt ag mýt Jesus ven sór vế, ag týt ti se jé.

Kýt tóg tá jun kýt ag mýt tó mũ. ⁵ Kýt tóg ag mýt sér pẻ tĩ sir. Kýt ag tóg ti mýt jãnkamỹ tó mũ. Ag týt ti mýt vin sór vế, ti týt ag mýt Jesus ven kar kýt. ⁶ Kýt tóg ag

mýt: "hej," he mũ sir. Kýt tóg to jykrén mũ, ti týt ã mýt ki króm ke to, ag mýt: "ha ti kãgmĩ ha," he jé, Judas ti. Ag týt vễnh kar vatánh tá ti se sór vế. Hã kýt Judas tóg ti tó sór mũ.

Pedro týt João mrẻ festa týt Páscoa han

(Mt 26.17-25; Mc 14.12-21; Jo 13.21-30)

⁷ Kýt tóg pão jãgja tú ěn konh ke kurã tá krỹg mũ sir. Kurã ěn ki ag tóg mé tãg tãnh tĩ, ovelha tãg ěn, ag týt kurã týt Páscoa kã ko tĩ ěn. ⁸ Kýt Jesus tóg Pedro jẻnẻg mũ sir, João mrẻ. Kýt tóg ag mýt: "ha mụtẻg, mé tãnh jé, ovelha ěn, ěg týt kon jé," he mũ. ⁹ Kýt ag tóg ti mýt: "ẻg hẻ tá ti tãnh mũ hẻn?" he mũ. ¹⁰ Kýt tóg ag mýt: "ha vẻ," he mũ. "Ễmã mág tag ra mụtẻg. Tá ājag tóg ù venh mũ. Goj vyn kýt tóg tĩ mũ. ěn nón mủmủnĩ. Kýt ti ĩn tá junjun kýt ti nón gemnĩ. ¹¹ Kýt ĩn ki rĩr tĩ mýt: "ẻg Senhor vỹ ã mýt vẻnh vỹ jẻnẻg mũ," hemnĩ. "Inh hẻn hẻ tá ovelha konh ke mũ, inh mrẻ mũ tĩ ag mrẻ?" he ti, ěg Senhor ti," hemnĩ. "Mýt ki vẻnh kánkán jafã tú?" hemnĩ. ¹² Kýt tóg ājag mýt ven ke mũ sir, kroggrog týt kynhmỹ nỹ ěn ti, assoalho týt kynhmỹ nỹ ěn ti. ěhẻ ti nĩ, kýt mesa to nýtĩ jafã vỹ tá nýtĩ gé. ěn tá ti kãn nĩ ěg mýt," he tóg, Jesus ti. ¹³ Kýt ag tóg mũ mũ sir. Jesus týt ag mýt tó ja ěn ve kãn ag tóg mũ, kýt ag tóg mé tãnh mũ sir, tá.

Santa Ceia

(Mt 26.26-30; Mc

14.22-26; 1Co 11.23-25)

¹⁴ Kýt tóg ag týt konh ke hora tá krỹg mũ sir. Kýt Jesus tóg tá nĩ nĩ, ti týt ùn vin ja ag mrẻ hã, apóstolo ěn ag. ¹⁵ Kýt tóg ag mýt vẻmẻn mũ sir. "Sỹ ovelha tag konh ha pẻ tóg tĩ vẻ ājag mrẻ," he tóg. "Sỹ inh vẻsỹrẻnh ke to hã ājag mrẻ ko sór ja vẻ," he tóg, Jesus ti, ã mrẻ mũ tĩ ag mýt. ¹⁶ "Ti ko măn ke tú inh nĩ ha, ha vemnĩ. Topē týt týt ěg pã'i nĩ vỹ vẻnh ven ke mũ. Ti

tỹ vênh ven ja ên kã sóg ko măn ke mũ, kejên,” he tóg.

¹⁷ Kĩ tóg copa mäg mũ sir. To tóg Topê mré vĩ mũ, kĩ tóg ag mỹ: “ha kron,” he mũ. “Ha vênh kăpăm,” he tóg. ¹⁸ “Tag kron măn ke tũ inh nĩ ha, ke gé, ha vemnĩ. Topê tỹ tỹ êg pãi nĩnh ken kĩ sóg kejên kron măn ke mũ, ha vemnĩ,” he tóg.

¹⁹ Kĩ tóg êmĩ mäg mũ sir. To tóg Topê mré vĩ mũ. Kupăn kĩ tóg ag mỹ vênh pipin mũ. Kĩ tóg ag mỹ: “inh hã vê,” he mũ. “Ăjag jagfỹ sóg vênh fêg ke mũ. Kĩ inh mĩ êkrén nĩ, ăjag tỹ pảo tag konh ken kĩ,” he tóg, Jesus ti. ²⁰ Ag tỹ ko kar kĩ tóg copa mäg mũ gé. Kĩ tóg ag mỹ: “copa ki jê tag vĩ inh kyvénh ri ke nĩ,” he mũ. “Ăjag jagfỹ tóg inh ki kăkutênh mũ, inh kyvénh ti. Inh jykre tãg to ken hã vê, isỹ inh kyvénh tugrĩn ăjag mỹ vênh pãte fón jé,” he tóg.

²¹ “Hã ra ăjag kãmĩ ù tóg inh vatánh tá isónh ke mũ, inh kato tẽ ag mỹ. Inh mré tóg mesa tag to nĩ nĩ. ²² Tĩg jé sóg ke mũ, sỹ tỹ êprã ke fi kósın nĩn kĩ. Vãsỹ Topê tóg to jykrén ja nĩ, hã kĩ sóg tĩ mũ. Hã ra ù tỹ isónh ke ên mỹ tóg vĩ kónãn tãvĩ han ke mũ, Topê ti,” he tóg. ²³ Kĩ ag tóg jagnê mỹ ke mũ. “Êg kãmĩ ù tỹ hẽ nẽ hỹn?” he ag tóg mũ sir jagnê mỹ, ù tỹ ti tónh ke ên to.

Ủ tỹ hẽ nẽ tỹ ùn mág nĩ

²⁴ Ên kã ag tóg jagnê kăfór nĩ sór mũ. Hã kĩ ag tóg jagnê to jũ mũ. ²⁵ Kĩ Jesus tóg ag mỹ ke mũ. “Fóg ag pãi ag vĩ ăjag krêm ke ag mỹ vĩ tar han tĩ, kĩ ag tóg ag kri ke ag mỹ: “êg jóg,” he tĩ, ag tỹ ag mỹ vĩ tar han mũ ra. ²⁶ Ag ri ke han tũg nĩ. ăjag mỹ tỹ ùn mág nỹtĩ sór mũ? Kĩ tỹ ùn kãsir ri ke nỹtĩmĩ jagnê mré,” he tóg, Jesus ti. “Ủ tỹ inh jykre ki tỹ pãi nĩn kĩ tóg ă krêm ke ag camarada ri ke nĩnh ke mũ, ag ki rĩr kĩ. ²⁷ Kejên êg tóg mesa to nỹtĩ, kĩ ù tóg mesa ki rĩr tĩgtĩ. Ủ tỹ hẽ nỹ hỹn mesa ki rĩr tĩ? Ag patrão mỹ, ti

camarada mỹ vó? Ti camarada vĩ ki rĩr tĩgtĩ. Jo sóg ăjag ki rĩr tĩgtĩ, ăjag camarada ri ke. ²⁸ ăjag hã ne inh mré mũgtĩ. Isovănھ ja tũ pẽ ăjag tóg nỹtĩ. Isỹ nén ù jagy vэг mũ ên ve kãn ăjag tóg tĩ, inh mré. ²⁹ Inh panh vĩ isỹ pãi han ke mũ, kĩ sóg ăjag tỹ pãi han ke mũ gé, ti tỹ isỹ pãi han kóm, ³⁰ ăjag tỹ inh mré jên jé tá, inh mré kron jé tá, isỹ tỹ pãi nĩn kĩ. Kĩ ăjag tóg ăjag nĩja kri nĩgnĩ kĩ nỹtĩnh mũ, ăjag tỹ povo tỹ Israel ag jykre vigve jé, povo tỹ 12 (ke) ên ag,” he tóg, Jesus ti.

Jesus tỹ Pedro mỹ tó

(Mt 26.31-35; Mc 14.27-31; Jo 13.36-38)

³¹ Kĩ êg Senhor vĩ Pedro mỹ: “Simão', Simão',” he mũ. “Ha vé, Satanás vĩ ăjag to vĩ, Topê mỹ. Ti tỹ ăjag jykre ve sór vê. Trigo tỹ êg tóg gren ki kăkag tĩ, êg tỹ ti făr pan jé. Ên ri ke han jé tóg ke mũ, ăjag tỹ, Satanás ti. ³² Hã ra sóg hur ă jagfỹ vĩ, ă tỹ inh ki rã továnھ pẽ han tũ nĩ jé. Kĩ ă tóg kejên ă jykre to jykrén măn ke mũ, ă tỹ inh jykre hã han jé. Ên kã ă tóg ă mré ke ag jyvên kĩ ag tỹ tar' he mũ.

³³ Hã ra Pedro tóg ti mỹ: “Senhor',” he mũ. “Ă mré sóg se kĩ jênھ mũ, ă mré sóg ter ke mũ gé,” he tóg. ³⁴ Hã ra Jesus tóg Pedro mỹ: “vó,” he mũ. “Ha vé, ùri ă tóg iso: “tĩ ki kagtĩg sóg nĩ,” he tãgtũ han ke mũ, galo kyr to hã, ha vemnĩ,” he tóg mũ, Jesus ti.

Jesus tỹ ă mré mũ tĩ ag mỹ tó

³⁵ Kĩ tóg ag kar mỹ: “ăjag jêgnê ja inh nĩ, vãsỹ,” he mũ. “Kĩ ăjag tóg nén ù ma mũ ja tũ nĩgtĩ, saco tũ, bolsa tũ, pẽn né tũ, pẽn to ró ên. Ên kã ăjag mỹ jagăgtar ja nỹtĩgtĩ?” he tóg. Kĩ ag tóg ti mỹ: “vó,” he mũ. ³⁶ Kĩ tóg ag mỹ: “hã ra tóg ùri ke tũ nĩgtĩ,” he mũ. “Hã kĩ ăjag jănkamỹ ma mũjêg, ăjag sacon ma mũjêg, ăjag bolsa ma mũjêg. ăjag tỹ nén ù tũ nỹtĩn kĩ ăjag kur vender hemnĩ, rógro kajãm jé sir. ³⁷ Nén ù tóg iso rán kĩ nĩ, hã vĩ:

ag mý tóg tỹ ùn jykre pāno nĩ, he mũ. Sỹ vāhā tag venh ke vē ha. Isỹ iso nén rán kỹ nĩ ěn ve kăn ke vē ha, vāhā,” he tóg, Jesus ti.

³⁸ Kỹ ag tóg ti mý: “Senhor,” he mũ. “Rógro régre vỹ ki nỹtĩ,” he ag tóg mũ. Hā ra tóg ag mý: “gen kỹ,” he mũ.

Jesus tỹ ã panh mré vĩ

(Mt 26.36-46; Mc 14.32-42)

³⁹ Kỹ tóg ã tỹ tĩ jafā ra tĩ mũ sir, hā vỹ: pānónh tỹ Oliveira, he mũ ěn ra. Tĩ mré mũ tĩ ag vỹ ti nón mũ mũ sir. ⁴⁰ Tá jun kỹ tóg ag mý: “Topē mré vĩ, ājag tỹ ti vĩ mranh tũ nĩ jé, ājag tỹ nén ù jagy ve kỹ,” he mũ, Jesus ti, ã mré mũ tĩ ag mý.

⁴¹ Kỹ tóg tĩg sĩ han mũ, kỹ tóg ã jakrĩ tỹ jēg mũ. Kỹ tóg Topē mré vĩ mũ sir. ⁴² Kỹ tóg: “panh,” he mũ. “Mỹ ã tỹ inh vēsỹrenh ke tag tỹ tũ’ he mũ jāvānh? Hā ra isỹ ã mý nén to vĩ mũ tag han tũg nĩ. Ā tỹ nén han ke mũ ěn hā han nĩ,” he tóg, Jesus ti, Topē mý.

⁴³ Kỹ Topē tỹ jēnē jafā ù vỹ ti mý vēnh ven mũ sir, kanhkā tá, kỹ tóg ti tar han mũ. ⁴⁴ Hā ra tóg ã ter ke to kanē jur mũ, kỹ tóg Topē mré vĩ măn’, vĩ măn’, he mũ. Kỹ ti kārān vỹ kyvénh nĩ sir, kỹ tóg ga kri vēnh kugjēg mũ.

⁴⁵ Kỹ tóg Topē mré vĩ kar ã mré mũ ti ag to kātĩ mũ. Hā ra ag tóg nũgnũr nỹtĩ nĩ. Krónh’ krónh’ he ja ag tóg nĩ, ag fe kaj tugrĩn. ⁴⁶ Kỹ tóg ag mý: “ājag ne tóg nũgnũr nỹtĩ nĩ,” he mũ. “Nĩgnĩ ra, Topē mré vĩ, ājag tỹ ti vĩ mranh tũ nĩ jé, ājag tỹ nén ù jagy ve kỹ,” he tóg, ti mré mũ tĩ ag mý.

Ag tỹ Jesus se

(Mt 26.47-56; Mc 14.43-50; Jo 18.3-11)

⁴⁷ Tĩ tỹ ver tỹ vēmén jē ra ag tóg junjun mũ sir, Judas mré hā, ù tỹ 12 (ke) ag kã ù ěn ti. Tĩ tỹ ag tatĩn kātũg hā vē, ù tỹ ti senh ke mũ ag. Û tỹ ag jo tĩ mũ ěn tóg sir Jesus to grēn ke kỹ ti ki nhun ke mũ. ⁴⁸ Kỹ Jesus tóg ti mý: “Judas,” he mũ. “Ā

ne tóg inh ki nhun ke kỹ iso: “tĩ hā vē,” he mũ’, inh kato tē ag mý, inh, hā vỹ: ěprā ke fi kósın, he mũ,” he tóg, Jesus ti.

⁴⁹ Kỹ ti mré mũ ag tóg ag tỹ ti senh ke vég mũ. Kỹ ag tóg ti mý: “Senhor,” he mũ. “Ēg mý rógro tỹ ag fynh ke tũ?” he ag tóg. ⁵⁰ Kỹ ag kã ù tóg polícia ù fynh mũ, ti nĩgrēg tỹ rām ke tóg mũ, ti pēgja tá. Topē tũ ki rĩr tĩ to pã’i krēm ke ù vē, polícia ěn ti. ⁵¹ Hā ra Jesus tóg ag mý: “ag vóg tũg ra, há ti nĩ,” he mũ. Kỹ tóg ti nĩgrēg măn kỹ to tỹ grēn ke mũ sir.

⁵² Kỹ Jesus vỹ pã’i ag mré vēmén mũ, Topē tũ ki rĩr tĩ to pã’i ag mré, Topē jo ĩn ki rĩr tĩ to pã’i ag mré ke gé, kófa ag mré ke gé. Ag kar vỹ ti se kãmũ mũ. Kỹ tóg ag mý: “ājag ne tóg rógro génh kỹ iso kãmũ mũ’, ka kyv génh kỹ ke gé,” he mũ. “Inh pi(jé) tỹ bandido nĩ,” he tóg. ⁵³ “Kurā kar ki sóg Topē jo ĩn krēm ājag mré nĩ ja nĩgtĩ, hā ra ājag tóg tá ise sór ja tũ nĩ, ājag tỹ ag kamēg kỹ,” he tóg. “Hā ra tóg ũri jun, ājag kurā ti, Japo tỹ ã tỹ nén han sór tĩ ěn han jé, ājag tỹ. Jykre ki kuty ti nĩ, Japo ti,” he tóg, Jesus ti.

Pedro tỹ Jesus to ón

(Mt 26.57-58, 69-75; Mc 14.53-54, 66-72; Jo 18.12-18, 25-27)

⁵⁴ Kỹ ag tóg ti ség mũ sir. Ag tỹ ti pére mũ kỹ ag tóg Topē tũ ki rĩr tĩ to pã’i mág ĩn tá junjun mũ sir.

Hā ra Pedro vỹ kuvar há tá ag nón tĩ mũ. ⁵⁵ ĩn vāso tá ag tóg pĩ grug mũ, soldado ag, kỹ ag tóg tugtón nỹtĩ nĩ. Kỹ Pedro vỹ ag mré tón nĩ nĩ sir. ⁵⁶ Kỹ pã’i camarada ù fi vỹ tá ti vég mũ, pĩ grun ki. Kỹ fi tóg ti tugnỹm mũ. Kỹ fi tóg ag mý: “tĩ mré tĩ ù vē inh mý,” he mũ. ⁵⁷ Hā ra Pedro tóg: “vó,” he mũ. “Tĩ ki kagtũg sóg nĩ, jỹ,” he tóg.

⁵⁸ Kar kỹ ù tóg ti tugnỹm mũ gé, kỹ tóg ti mý: “ag kã ù vỹ tỹ ã nĩ,” he mũ. Hā ra Pedro tóg ti mý: “inh hā tũ vē, vỹ,” he mũ gé.

⁵⁹ Tag kar kŷ, hora pir tũg kŷ hên ri ke mũn ũ tóg ti tũgnỹm mũ gé. Kŷ tóg tá nỹtĩ ag mỹ: “ha vé, Galiléia tá ke vỹ tỹ ti nĩ,” he mũ. “Inh mỹ tóg tỹ ti mré ke nĩ,” he tóg mũ gé sir. ⁶⁰ Hã ra Pedro tóg ti mỹ: “inh pi(jé) ti ki kanhró nĩ, vỹ,” he mũ. “Á tỹ ne tó nê?” he tóg mũ sir. Ti tỹ ver tó nĩ ra galo vỹ kyr mũ. ⁶¹ Kŷ ěg Senhor vỹ vēsỹjãm ěvãnh kŷ Pedro tũgnỹm mũ. Kŷ Pedro vỹ to jykrén mũ sir, ěg Senhor tỹ ti mỹ nén to ja to, hã vỹ: “iso á tóg: “ti ki kagtĩg sóg nĩ,” he tãgtũ han ke mũ, galo kyr to hã,” he ja ěn mĩ. ⁶² Kŷ Pedro vỹ tá kãkutẽ mũ, kŷ tóg fỹ mág han mũ sir.

Ag tỹ Jesus vóg kónãn

(Mt 26.67-68; Mc 14.65)

⁶³ Kŷ ũ tỹ Jesus ség mũ ag vỹ ti to é he mũ sir. Ti tãnh ag tóg mũ gé sir. ⁶⁴ Ti kanẽ pãg kŷ ag tóg ti kakã ki tãnh kŷ ti mỹ: “ũ nỹ ã tãnh?” he mũ. “Á tỹ nén kar ki kanhró nĩn kŷ ã hỹn ki kanhró nĩ,” he ag tóg ti mỹ. ⁶⁵ Gen kŷ ag tóg ti mỹ vỹ kónãn tỹ hên ri ke han mũ, ti to é he kŷ.

Pã'i ag tỹ Jesus ki jẽmẽ

(Mt 26.59-66; Mc 14.55-64; Jo 18.19-24)

⁶⁶ Tỹ vaj kŷ kófa kar ag tóg vãnh mãn mũ, Topẽ tũ ki rĩr tĩ to pã'i ag mré hã, Topẽ vỹ to professor ag mré hã. Ag vãnh mãn kŷ ag tóg ti jé prêr kŷ ag rĩnja tá ti fêg mũ sir, ag tỹ ón kŷ ti jykre ve jé. Ag tỹ ti tén sór vê, hã ra ag tóg ón kŷ ti jykre ve vén sór mũ. ⁶⁷ Hã kŷ ag tóg ti mỹ: “ã mỹ tỹ Cristo nĩ?” he mũ. “Ha ěg mỹ tó,” he ag tóg. Kŷ tóg ag mỹ: “ãjag pi(jé) inh vỹ kri fig tĩ, isỹ ãjag mỹ tó tĩ (hã) ra’,” he mũ. ⁶⁸ “Isỹ ãjag ki jẽmẽ sór mũ ra ãjag tóg inh mỹ tó tũ nĩ gé. Kŷ ãjag tóg isovãnh tũ nĩ gé,” he tóg. ⁶⁹ “Hã kŷ ěprã ke fi kósin vỹ Topẽ pẽgja tá nĩnh ke mũ ha. Topẽ vỹ tar nĩ. Sỹ ti pẽgja tá nĩnh ken vê ha,” he tóg.

⁷⁰ Kŷ ag tóg ti mỹ ke kãn mũ. “Kŷ ã mỹ tỹ Topẽ kósin nĩ?” he ag tóg mũ ti mỹ. Kŷ tóg ag mỹ: “ki hã ãjag tóg tó mũ,” he

mũ. “Inh hã vê,” he tóg ag mỹ, Jesus ti. ⁷¹ Kŷ ag tóg: “ti kato vỹ ũ jẽmẽ mãn ke tũ ěg nĩ ha,” he mũ, jagnẽ mỹ. “Ti jẽnky ki kutẽ mẽ ěg tóg huri. Topẽ to vỹ kónãn ti huri. Ti ter ke vê,” he ag tóg mũ sir, pã'i ag, Jesus to.

Pilatos tỹ Jesus ki jẽmẽ

(Mt 27.1-2, 11-14; Mc 15.1-5; Jo 18.28-38)

23 Hã ra tá ke kar ag vỹ Jesus pére mũ mũ, fóg tỹ pã'i tỹ Pilatos mỹ. ² Tá ag tóg ti kato vỹ mũ sir, kŷ ag tóg Pilatos mỹ: “vãnh kar krĩn kónãn han tóg tĩ, ag tỹ vãnh jykre há tovãnh jé,” he mũ. “Kŷ tóg ag mỹ: “pã'i mág tỹ imperador mỹ imposto nĩm tũg nĩ,” he tĩ gé. Kŷ tóg vêso: “tỹ inh Cristo nĩ, pã'i mág tỹ rei ti,” he tĩ gé,” he ag tóg mũ, Jesus to. ³ Kŷ Pilatos tóg ti mỹ: “ã mỹ tỹ Judeu ag pã'i tỹ rei nĩ?” he mũ. Kŷ tóg ti mỹ: “ki hã ã tóg tó mũ,” he mũ, Jesus ti.

⁴ Kŷ Pilatos vỹ ag mỹ kãmén mũ, Topẽ tũ ki rĩr tĩ to pã'i ag mỹ, povo kar mỹ ke gé, kŷ tóg: “ti tỹ nén ũ kórég han ja vég tũ sóg nĩ, ti ki,” he mũ. ⁵ Hã ra ag tóg ti tovãnh jãvãnh pẽ nỹtĩ. Kŷ ag tóg ti mỹ: “hã ra tóg vãnh kar krĩ rỹg tĩgtĩ,” he mũ. “Ga tỹ Judéia kar mĩ tóg tĩg ja nĩ, ga tỹ Galiléia mĩ ke gé, tag mĩ ke gé. Tĩg kŷ tóg vãnh kar krĩn kónãn tĩ,” he ag tóg ti mỹ, pã'i ag.

Herodes tỹ Jesus ki jẽmẽ

⁶ Kŷ Pilatos vỹ ga tỹ Galiléia tag to jykrén mũ, kŷ tóg: “ti mỹ tỹ Galiléia tá ke nĩ?” he mũ. ⁷ Kŷ ag tóg ti mỹ: “hỹ,” he mũ. Hã ra Herodes vỹ tỹ ga tỹ Galiléia tá pã'i mág nĩ. Hã kŷ Pilatos tóg ti hã mỹ ti jẽnẽg mũ. ěn kã tóg Jerusalém tá nĩ gé, Herodes ti.

⁸ Kŷ tóg Herodes tá jun mũ sir. Ti tỹ ti ve kŷ tóg ti mỹ sér tĩ. Ti tỹ ti ve sór ja vê. Ti kãmẽ mẽ ja tóg nĩ, hã kŷ tóg ti ve sór ja nĩgtĩ, Herodes ti. “Hên ri ke mũn tóg

nén ũ han vānh han ke mǔ, sǔ ve jé,” he tóg.

⁹ Jesus tǔ ti ki jun kǔ Herodes tóg ti ki jēmē sór mǔ, nén tǔ hēn ri ke ki, hā ra tóg ti mǔ vǐ tǔg mǔ. ¹⁰ Hā ra pǎi ag vǐ tá nǔtǐ nǐ, kǔ ag tóg ti kato vǐ mág han mǔ sir, Topē vǐ to professor ag ke gé. Hā ra Jesus tóg ag mǔ vǐ tǔg mǔ gé. ¹¹ Kǔ Herodes vǐ ti to é he mǔ gé, ti mré ke kar ag ke gé, kǔ ag tóg ti nyg mǔ sir. Kur kupri pē tǔ tóg ti kri fón mǔ, ón kǔ. Kǔ tóg Pilatos mǔ ti jēnē mǎn mǔ sir.

¹² Kurā ēn kā Pilatos vǐ Herodes mǔ vǐ há han mǔ. Jagnē to há he mǎn ag tóg mǔ ha. Ag tǔ Jesus ve jo ag tóg jagnē kato tē ja nǔgtǐ.

Ag tǔ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kǔ Pilatos vǐ Topē tǔ ki rǐr tǐ to pǎi ag jé prēr mǔ sir, pǎi kar ag ke gé. ¹⁴ Kar tóg ag mǔ: “ājag ne inh mǔ ti fēg,” he mǔ, “kǔ ājag ne ti to: “vēnh kar krǐn kónān tóg tǐ,” he mǔ. Ājag rǐnve sóg ti ki jēmē huri, hā ra sóg ve ja tǔ nǐ, ājag tǔ ti to nén tó ja ti. Nén ũ kórég han ja tǔ tóg nǐ. ¹⁵ Kǔ Herodes vǐ vég tǔ nǐ gé. Sǔ ti mǔ ti jēnē ja vē, ājag ke gé. Hā ra tóg inh mǔ ti jēnē mǎn mǔ gé. Ēg hē ri ken kǔ ti tén mǔ hǔn? Sǔ ki kagtǔg tóg tǐ. ¹⁶ Hā kǔ sóg ti mrānmrān kar ti tovānh ke mǔ,” he tóg, Pilatos ti.

¹⁷ Festa tǔ Páscoa ki tóg ag mǔ vēse pir tovānh tǐ, prǔg kar ki. Ti jykren hā vē. Hā kǔ tóg: “Jesus tovānh jé sóg ke mǔ,” he mǔ. ¹⁸ Hā ra vēnh kar ag tóg vāhā prēnprēr mǔ sir. “!..Ti tén ra..!” he ag tóg mǔ. “!..Barrabás tovānh ra..!” he ag tóg. ¹⁹ Barrabás vǐ vēnh génh to se kǔ jē nǐ. Cidade tá tóg vēnh génh han ja nǔgtǐ, ēn kā tóg ũ tén ja nǔgtǐ, hā to tóg se kǔ jē nǐ.

²⁰ Kǔ Pilatos vǐ ag mǔ vǐ mǎn mǔ. Ti tǔ Jesus tovānh sór vē, hā kǔ tóg ag mǔ vǐ mǎn mǔ. ²¹ Hā ra ag tóg prēnprēr kǔ:

“!..cruz to ti sǎ, cruz to ti sǎ..!” he mǔ. ²² Kǔ tóg ag mǔ vǐ tǔgtǔ han mǔ gé, Pilatos ti. “Ti kórég tǔ ne han ti? Sǔ vég tǔ tóg tǐ. Ti tǔ ne to ter ke nē? Sǔ ki kagtǔg tóg tǐ. Hā kǔ sóg ti mrānmrān kar kǔ ti tovānh ke mǔ,” he tóg. ²³ Hā ra ag tóg prēnprēr tǔvǐ han mǔ sir, hā kǔ ag tóg ti kutān mǔ. Ti mǔ ag tóg: “!..cruz to ti sǎ..!” he tǔvǐ han mǔ. Kǔ tóg ag prēnprēr to ag mǔ han sór mǔ sir. ²⁴ To tóg jykrén mǔ, kǔ tóg ag mǔ: “hej,” he mǔ, ag tǔ ti kutān to. ²⁵ Kǔ tóg ũ ēn tovānh mǔ sir, ũ tǔ vēnh génh to se kǔ jē ēn ti, ũ tǔ ũ tén ja ēn ti. Ag tǔ ũ to vǐ mǔ ēn tovānh tóg mǔ sir. Kǔ tóg ag mǔ Jesus ti fēg mǔ sir, ag tǔ ti ki han sór mǔ ēn han jé. ²⁶ Kǔ ag tóg ti pére mǔ mǔ, cruz to ti sa jé.

Jesus tǔ cruz to sa

(Mt 27.32-44; Mc 15.21-32; Jo 19.17-27)

Ag mǔn kǔ ag tóg ũ kǔtǔg vég mǔ. Ēpǔ tá tóg kǔtǔ mǔ, ti jǐjin hā vǐ: Cirene tá Simão, he mǔ. Ti kri ag tóg Jesus cruz ti fig mǔ, ti tǔ ti jo va tǔg jé, ti nón.

²⁷ Kǔ ũ tǔ hēn ri ke ag vǐ Jesus nón mǔ mǔ, ũn tǔtǎ fag ke gé. Ēn fag vǐ vēsǔrénh mǔ, kygfǔ mág han fag tóg mǔ sir. ²⁸ Hā ra Jesus tóg vēsǔjām ēvānh kǔ fag mǔ vǐ mǔ. “Jerusalém tá ke,” he tóg. “!jé kygfǔ tǔg nǐ,” he tóg. “Vēnh jé kygfǔmǔnǐ, ājag krē jé kygfǔmǔnǐ,” he tóg fag mǔ. ²⁹ “Ha vé, kurā kórég pē vǐ jun ke mǔ ājag mǔ. Ēn kā ag tóg tag tónh ke mǔ, ha mē: “ũn kurǐ fag mǔn pǔgsǐ nǐnh mǔ, fag tǔ ājag krē ter vég tǔ nǐn kǔ. ũn krē tǔ fag mǔn pǔgsǐ nǐnh mǔ, ũ tǔ gǐr pafām tǔ fag mǔ ke gé,” he jé ag tóg ke mǔ. ³⁰ Ēn kā ag tóg pānónh mǔ: “inh kri tǔ tam ké,” hēnh ke mǔ gé, kǔ ag tóg sór mǔ: “inh péju ra, vēnh krēm,” hēnh ke mǔ gé. ³¹ Ēg kato tē ag tǔ ka tánh gǔn kǔ ag hǔn ka tóg tovānh ke tǔ pē nǐ. Ka tánh ēn ri ke sóg nǐ, jo ājag vǐ ka tóg ri ke nǔtǐ. Hā kǔ ājag tóg inh vēsǔrénh kǔfór venh ke mǔ, ha vemnǐ,” he tóg, Jesus ti. Jerusalém fǐn rām kǔ tóg ke mǔ.

³² Ag tỹ Jesus pére mũn kỹ ag tóg ùn régre ag pére mũ mũ gé, ùn jykre pãno ag. Ag tỹ ka to ag sanh ke vë gé. ³³ Kỹ ag tóg pãnónh tá junjun mũ sir, ti jyjyn hã vỹ: Krĩ Kuka, he mũ. Tá ag tóg cruz to ti sãg mũ sir. Ùn jykre pãno tỹ ag tóg cruz to sãg mũ gé, ti kóm, kỹ ù vỹ ti pëgja tá sa, jo ù vỹ ti jakãnh tá sa.

³⁴ Kỹ Jesus vỹ: “panh’,” he mũ. “Ag mỹ vënh pãte fón nĩ,” he tóg. “Ag pi(jé) ki kanhró nỹtĩ, ag tỹ nén han mũ tag ti’,” he tóg.

Kỹ soldado ag tóg ti kur tỹ jagnë mỹ tỹ vënh ken jé to jogar he mũ sir. ³⁵ Kỹ vënh e ag vỹ tá vég nỹtĩ. Hã ra pã'i ag tóg ti nyg mũ. Kỹ ag tóg jagnë mỹ: “ũ ag krenkren han ja tóg nĩgtĩ,” he mũ. “Cristo jé vënh kren han, Topë tỹ ti fëg ja nĩn kỹ, ti tỹ ti kuprëg ja nĩn kỹ, hã ra tóg vënh kren han ki kagtĩg nĩ,” he ag tóg mũ, Jesus to é he kỹ. ³⁶ Kỹ soldado ag vỹ ti nyg mũ gé. Ti rã hã nỹtĩn kỹ ag tóg ti mỹ vinagre ven mũ sir. ³⁷ Kỹ ag tóg: “ã mỹ tỹ Judeu ag pã'i mág nĩ?” he mũ. “Vënh kren han ra, ã tỹ tỹ pã'i nĩn kỹ,” he ag tóg mũ ti mỹ, ti to é he kỹ. ³⁸ Hã ra ag tóg rán ja nĩ gé, ti tỹ cruz to sa kỹ jë ên ti. Ti to rán hã vë, hã vỹ: “Judeu ag pã'i mág tỹ rei hã vë,” he mũ. Ti kri tóg cruz to sa gé, ên rá ti.

³⁹ Kỹ ti kóm cruz to sa ù tóg ti mỹ vỹ mũ gé, ùn jykre pãno ên. Ti to tóg é he mũ gé. Kỹ tóg ti mỹ: “ã mỹ tỹ Cristo nĩ?” he mũ. “Vënh kren han ra, kỹ êg krenkren han gé,” he tóg mũ gé. ⁴⁰ Hã ra ti kóm cruz to sa ù ù tóg ti mỹ vỹ jũ han mũ, ù tỹ Jesus mỹ vỹ kónãn mũ ên mỹ. Kỹ tóg ti mỹ: “kỹ ã mỹ Topë kamëg tú?” he mũ. “Vësỹrénh ã tóg mũ gé, ti kóm. ⁴¹ Êg tỹ êg tỹ nén han ja kajãm vë jãvo, êg jykre pãno to êg vësỹrénh nỹtĩ nĩ. Êg jãvo tóg jykre kuryj nĩ. Ti pi(jé) nén ù kórég han ja nĩ,” he tóg. ⁴² Kỹ tóg Jesus mỹ: “Senhor’,” he mũ. “Inh ki êkrén nĩ, ã tỹ tỹ pã'i ki rãn kỹ,” he tóg mũ, Jesus mỹ. ⁴³ Kỹ Jesus tóg ti mỹ: “ha mẽ, ùri ã tóg

inh mré nĩnh mũ, êmã há ên tá, Paraíso he mũ ên tá, kanhkã tá. Ki hã sóg tó mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

⁴⁴ Kejën rã tóg êg nĩno kã sa mũ sir. Hã ra tóg kuty' he mũ sir, ga kar mĩ hã. Kuty ên tóg hora tăgtũ han mũ. ⁴⁵ Kỹ rã vỹ nhyn ke mũ sir. Topë jo ìn krêm kur tỹ jänkã mág pë vỹ kã sa nĩ. Ên vỹ jaran ke mũ. Kuju mĩ tóg jaran ke kãtère mũ sir, fĩn rãm kãn tóg mũ.

⁴⁶ Kỹ Jesus vỹ prër mág pë han mũ. Kỹ tóg: “!..panh'!..!” he mũ. “!..Sỹ ã mỹ vënh fëg vë, inh kuprĩg ti..!” he tóg. Tag tó kar tóg hun ke mũ sir.

⁴⁷ Hã ra fóg tỹ capitão tóg ti ter vég mũ. Kỹ tóg Topë mỹ vỹ há han mũ. “Vënh vỹ há ja vë, ùn há ja vë,” he tóg mũ. ⁴⁸ Kỹ vënh e ên vỹ ti ter vég mũ gé. Kỹ ag tóg ãjag tỹ nén han ja to jykrén mũ sir. Vãhã tóg ag mỹ e tĩ. “Topë hỹn êg tỹ hë ri kenh mũ, êg tỹ ti tén kỹ?” he ag tóg mũ sir. Tag tó kỹ ag tóg ãjag ìn ra vỹnvỹn ke mũ.

⁴⁹ Hã ra ti to há kar ag vỹ ti vég nỹtĩ nĩ, kakó ki, ùn tãtã fag ke gé. Galiléia tá ke fag tóg ti mré kãmũ ja nĩgtĩ gé. Ti ter ve kãn fag tóg mũ sir.

Ag tỹ vënh kej tá Jesus fi

(Mt 27.57-61; Mc 15.42-47; Jo 19.38-42)

⁵⁰ Kỹ ù tóg tá nĩ gé, vënh jyvën tĩ ù, ha mẽ, ti jijin hã vỹ: José, he mũ. Judeu ag tỹ cidade tỹ Arimatéia tá ke ti nĩ. Jykre kuryj tóg nĩ, jykre há. ⁵¹ Ti pi(jé) ag tỹ Jesus tén ke to: “hej,” he ja nĩgtĩ, ag tỹ Jesus to jykrén kỹ. Topë tỹ tỹ êg pã'i nĩnh ke ve sór tóg mũ gé. ⁵² Ên vỹ Pilatos venh tĩ mũ. Kỹ tóg ti mỹ Jesus to vỹ mũ, ti ter kar kỹ. ⁵³ Kỹ tóg cruz to ti kãtërem mũ, kỹ tóg kur há tỹ ti pãg mũ sir. Kỹ tóg pãró nor kãki vënh kej kãkã ti fig mũ. Vënh kej tăg vë, ag pi(jé) kãkã ù fi ja nĩgtĩ ver'. ⁵⁴ Hã ra sexta-feira vë sir, vënhkãn ke kurã ki rã tóg nỹ ha, sãbado ki. ⁵⁵ Kỹ

ũn týtá fag vỹ ag nón mũ mũ, ti kej ve jé, ag tỹ ti finh mũ ja tá. Tĩ mré Galiléia tá kãmũ ja ên fag vễ, ù tỹ ti fi han vég mũ fag. ⁵⁶Ve kar kỹ fag tóg kyrăgră kỹ nén ger há han mũ sir, ti tăg jafă ti, ti to tĩn jé. Hă ra fag tóg vênhkán mũ ver, vênhkán ke kură kă, Topê vĩ ki króm jé.

Jesus rĩr măn

(Mt 28.1-10; Mc 16.1-8; Jo 20.1-10)

24 Kỹ semana kură ve tóg tá krỹg mũ sir. Kỹ fag tóg kusă pẽ ki ti kej tá venh mũ mũ. Vêser ger há han jafă ên ma fag tóg mũ mũ, fag tỹ han ja ên ti, ti kej ra mũn kỹ. ²Hă ra pó ên tỹ ti kej nĩfénh kă nĩ ên vỹ kunũnh kỹ nĩ nĩ. Hă vég fag tóg mũ. ³Kỹ fag tóg ti kej tá junjun kỹ ra ge mũ, hă ra fag tóg vég tũ nĩ, vêser ti, Jesus ti, ěg Senhor ti. ⁴Kỹ tóg fag fe kaj tĩ sir, fag tỹ ti vég tũ nĩn kỹ. Kỹ vâhă ùn régre ag vỹ kăge mũ, kur kupri rĩnh kỹ, kur kókov, Topê tỹ jẽnê jafă ag. ⁵Kỹ fag tóg kanê junjur mũ sir, kỹ fag tóg ěpră ěvănũ mũ. Hă ra ag tóg fag mỹ: “ăjag ne tóg vêser jăvănũ mũ, ti rĩr ja (hă) ra,” he mũ. ⁶“Ki ti tũ nĩ, rĩr ti jê ha. Hă kỹ tóg âjag mỹ tó ja nĩgtĩ, âjag tỹ Galiléia tá nỹtĩ ên kă. ⁷Kỹ tóg âjag mỹ: “ěpră ke fi kósĩn ên fêg jé ag tóg ke mũ, ù tỹ Topê vĩ mranh tĩ ag mỹ,” he ja nĩ. “Ka to ag ti sanh ke mũ, hă ra tóg kură tăgtũ ki rĩr măn ke mũ,” he ja tóg nĩgtĩ, Jesus ti, vễso,” he ag tóg mũ, Topê tỹ jẽnê jafă ag.

⁸Kỹ fag tóg Jesus tỹ nén tó ja ên mĩ ěkrén măn mũ sir. ⁹Kỹ fag vỹ ti kej tá kăpa kỹ mũ mũ sir, ù tỹ 11 (ke) ag mỹ tó jé, ti mré mũ tĩ kar ag mỹ ke gé. ¹⁰Maria Madalena fi vễ, kar kỹ Joana fi ke gé, Maria ù fi ke gé, Tiago mỹnh tag fi, ù fag ke gé, fag mré. Fag hă ne Jesus tỹ ùn vĩn mũ ag mỹ kãmén mũ, apóstolo ag mỹ. ¹¹Hă ra tóg ag mỹ tỹ vênh ó nỹ ve nĩ, hă kỹ ag tóg kri fi ja tũ nĩgtĩ, fag vĩn kri.

¹²Kỹ Pedro vỹ jê kỹ ti kej ra vênh văg tĩ mũ. Pănh ke tóg, kỹ tóg ki ěvănũ mũ, kỹ tóg ti kur tăvĩ vég mũ sir, ti păg ja ti.

Kỹ tóg ti mỹ e tĩ. Tĩ tỹ to jykrén tũ tóg tĩ sir. Kỹ tóg tũg măn mũ.

Ag tỹ Emaús ra mũ

(Mc 16.12-13)

¹³Kỹ vâhă ag kă ù ag tóg mũ mũ, kură ên kă, ùn régre ag. Ěmă sĩ ra ag tóg mũ mũ. Jerusalém tán kakó nĩ, 10 (ke) quilômetros hỹn. Ěmă ên jyjyn hă vỹ: Emaús, he mũ. ¹⁴Ag mũn kỹ ag tóg jagnê mré vēmén mũ sir, âjag tỹ nén ve ja kar ên to.

¹⁵Ag tỹ vēmén nỹtĩ ra, ag tỹ jagnê mré tỹ vēmén mág han nỹtĩ ra Jesus tóg ag tá jun kỹ ag mré tĩ mũ. ¹⁶Hă ra ag tóg ti ki kagtĩg mũ, ag tỹ ti vég mũ (hă) ra. ¹⁷Kỹ Jesus tóg ag mỹ: “ăjag tỹ ne tó nê?” he mũ. “Vēmén mág âjag tóg mũ nĩ,” he tóg. Kỹ ag tóg krỹg he mũ sir, ve ù han ag tóg mũ, âjag fe kaj tugnĩn. ¹⁸Kỹ ù tóg ti mỹ tó mũ. Cleopas he mũ ên tóg ti mỹ: “kỹ ģ mỹ mễg tũ?” he mũ. “Ũ tỹ festa venh kãmũ ja ag vỹ mễ kăn. Ą hă mỹ ģ pir mỹ mễg tũ, ěg tỹ nén ve ja ti, ģ tỹ Jerusalém kă nĩ (hă) ra?” he tóg ti mỹ. ¹⁹Kỹ tóg ag mỹ: “ne nê?” he mũ. Kỹ ag tóg ti mỹ: “Jesus ti,” he mũ. “Nazaré tá ke vễ. Topê vĩ tó tĩ vễ. ěg tỹ nén han vãnh hyn han ja tóg nĩgtĩ. Topê vĩ tó há han ja tóg nĩgtĩ, kỹ Topê vỹ ti mré han tĩ, milagre kar ti. Kỹ povo kar ag vỹ vég tĩ, kỹ tóg ěg kar mỹ e tĩ. ²⁰Kỹ Topê tũ ki rĩr tĩ ag vỹ ti fêg, ěg păi kar ag, fóg tỹ păi tỹ ti tén jé, cruz to ti sa jé, hă kỹ tóg tũg mũ. ²¹ěg tỹ ti ve kỹ ěg tóg ti to: “ti hỹn ěg povo tỹ Israel ag krenkren han ke mũ,” he mũ vễ. Hă ra tóg ter ja nĩ. Ũri tóg kură tăgtũ han, ti ter kri,” he ag tóg, Jesus mỹ. ²²“Kỹ ěg kă ù fag vỹ ěg mỹ nén ù tó gé, kỹ tóg ěg mỹ e tĩ gé. Kusă pẽ ki fag tóg ti kej ra mũjêg. ²³Hă ra fag ti vég tũ nĩ, ti tỹ tá nỹ tũ nĩn kỹ. Kỹ fag tóg: “nén nê ve ěg,” he mũ gé. Topê tỹ jẽnê jafă nêji, kỹ tóg nêji fag mỹ: “rĩr ti jê nĩ,” hé. ²⁴Kỹ ěg kă ù ag vỹ ra mũ mũ, ti kej ra, kỹ ag tóg vég mũ gé, fag tỹ nén tó ja ti. Hă ra ag tóg ti

vég tũ pẽ nĩ,” he ag tóg, Jesus mĩ, ag tỹ ti ki kagtĩg nỹtĩn kỹ.

²⁵ Kỹ ù tỹ ag mré tĩ mũ ãn tóg ag mỹ: “ājag tỹ ne jé vāsỹ Topẽ vĩ tó tĩ ag vĩ kri fi ja tũ nĩ nẽ?” he mũ. “Krĩ tũ ājag nỹtĩ, to jykren há han tũ ājag tóg nỹtĩ,” he tóg. ²⁶ “Cristo vēsỹrénh ke vẽ, vēsỹrénh kar kỹ tóg tỹ ùn mág ninh mũ vāhā,” he tóg. ²⁷ Kỹ tóg ag mỹ vênh rá kāmén kãn mũ sir, Moisés tỹ rá ti, Topẽ vĩ tó tĩ ag kar tỹ rá ti, ag tỹ Jesus to rãn ja ti.

²⁸ Ag mỹ kāmén tĩ ki tóg ěmā ěn tá jun mũ sir. Ag mré tá jun kỹ tóg mã ra tĩg mũ ve nĩ. ²⁹ Kỹ ag tóg ti kógfyn mũ sir, kỹ ag tóg: “ĕg mré nĩ,” he mũ. “Rāké tóg nỹ ha, kutyg ke rā tóg nỹ ha,” he ag tóg mũ sir. Kỹ tóg ag mré kāra rā mũ, ag mré nĩ jé. ³⁰ Kỹ tóg ag mré jẽn ke mũ gé sir. Ag mré jẽn ke kỹ tóg pāo mág mũ, ěmĩ ti. Kỹ tóg Topẽ mré vĩ mũ, kar tóg kupān kỹ tỹ vênh ken mũ. ³¹ Kỹ ag tóg ti ki kanhrān mũ sir vāhā. Ti ve há han ag tóg mũ sir. Hā ra tóg ki tũ nĩ ha, ti ve mǎn tũ ag tóg nĩ sir.

³² Kỹ ag tóg jagnẽ mỹ: “ti tỹ ĕg mré vēmén kỹ tóg ĕg fe ki rā,” he mũ. “Ėg mỹ tóg ā to rãn ja ěn kāmén kãn, ĕg mũn kỹ. Hā ja vẽ,” he ag tóg mũ jagnẽ mỹ.

³³ Kỹ ag tóg vēsỹmér Jerusalém ra vỹnvỹn ke mũ sir. Tá ag tóg ù tỹ 11 (ke) ag vég mũ, ag mré ke ù ag mré hā. ³⁴ Hā ra ěn ag tóg ag mỹ: “ĕg Senhor vỹ rĩr mǎn,” he vẽn mũ. “Simão Pedro mỹ tóg vênh ven, mỹr, ha mẽ,” he ag tóg mũ sir. ³⁵ Kỹ ag tóg ag mỹ: “hỹ, ti ve ĕg ke gé,” he mũ gé. Kỹ ag tóg ag mỹ ājag tỹ nén ve ja ěn tó mũ sir, ag tỹ ājag mũ ki ti ve ja ti, ti tỹ ag mỹ ěmĩ kupān ja ti ke gé. “Hā ki ĕg tóg ti ki kanhró nỹtĩ, ěmĩ kupān ja ki,” he ag tóg mũ.

Jesus tỹ vênh kar ěn mỹ vênh ven

(Mt 28.16-20; Mc 16.14-18;

Jo 20.19-23; Hk 1.6-8)

³⁶ Ag tỹ ver tỹ vēmén nỹtĩ ra Jesus tóg ag mré jẽ mũ vāhā, ti tỹ hẽ tá kārānh ke

tũ nĩ ra. Kỹ tóg ag mỹ: “mỹ sér nỹtĩmĩ,” he mũ. ³⁷ Hā ra ag tóg jũrũnrũn ke mũ sir. Ti kamẽg ag tóg mũ. “Vênh kuprĩg hỹn,” he ag tóg mũ, Jesus to. ³⁸ Kỹ tóg ag mỹ: “ājag ne tóg jũrũnrũn ke mũ,” he mũ. Ājag tỹ ne jé: “vênh kuprĩg hỹn,” he nẽ?” he tóg. ³⁹ “Inh nĩgẽ ve ra, inh pẽn ve ra, inh hā vẽ,” he tóg. “Inh mēgmẽ ra, ve há han ra. Vênh kuprĩg pi(jé) fār nĩ, ti pi(jé) kuka nĩ. Inh fār ve ra, inh kuka ti,” he tóg. ⁴⁰ Vĩ kỹ tóg ag mỹ ā nĩgẽ ven mũ, ā pẽn ke gé. ⁴¹ Hā ra tóg ver ag mỹ e tĩ, ag fe tỹ mrin ke pẽ han kỹ, kỹ tóg ver ag tỹ ki kagtĩg tĩ. Hā kỹ tóg ag mỹ: “mỹ ki vējẽn tũ?” he mũ. ⁴² Kỹ ag tóg ti mỹ pirā nĩm mũ, mỹg mré. ⁴³ Kỹ tóg mǎn kỹ ko mũ, ag rĩnve.

⁴⁴ Kỹ tóg ag mỹ: “hā tó ja inh nĩ, ājag mỹ, iser to hā, isỹ ājag mré nĩgnĩn kǎ,” he mũ. “Vāhā sóg ve kãn ja nĩgtĩ, ag tỹ iso nén rãn ja ti, Moisés ti, ti tỹ ājag mỹ vênh jykre nĩm jan ki, kar kỹ Topẽ vĩ tó tĩ ag kar tỹ nén rãn ja ki ke gé, Topẽ to jǎn ki ke gé. Sỹ nén ven jan hā vẽ,” he tóg, ā mré mũ tĩ ag mỹ. ⁴⁵ Kỹ tóg ag mỹ kāmén há han mũ sir, hā kỹ ag tóg ti to nén rãn ja ki kanhrān kãn mũ sir, to jykren há han ag tóg mũ sir, ti tỹ ag nĩgrẽg róm kỹ. ⁴⁶ Kỹ tóg ag mỹ: “tag vỹ rãn kỹ nĩ, ha mẽ,” he mũ. “Hā kỹ Cristo vỹ vēsỹrénh, kỹ tóg rĩr mǎn gé, ā ter kar kỹ, kurā tǎgtũ tũg kỹ. Tag ve kãn sóg huri,” he tóg. ⁴⁷ “Kỹ tóg rãn kỹ nĩ gé, ù ag tỹ vênh kar mỹ inh kāmén ke ti. Inh jijin tó jé ag tóg ke mũ, ag tỹ vênh kar mỹ: “ājag jykre si tovǎnh ra,” henh ken kỹ, ù tỹ inh vĩ tó tĩ ag. “Tovǎnh kỹ Topẽ tóg ājag mỹ vênh pǎte fón ke mũ, ājag tỹ ti vỹ mranh ja ti,” he jé ag tóg ke gé. Povo kar mỹ ag tóg tónh ke mũ, hā ra ag tóg tag ki tó vén ke mũ, Jerusalém ki. Ājag to ken hā vẽ. Inh kāmén jé ājag tóg ke mũ. ⁴⁸ Ve kãn ājag tóg mỹr, hā kỹ ājag tóg tónh ke mũ. ⁴⁹ Ha mẽ, inh panh vỹ ājag mỹ nén ù tó ja nĩ, ājag tỹ vênh ken jé. Ėn jẽnẽ jé sóg ke mũ ājag mỹ. Hā kỹ

tag ki nýtímnĩ ver, cidade tỹ Jerusalém tag ki. Hên ra mũ tũg nĩ. Vãhã ãjag tóg venh ke mũ, inh panh tỹ ãjag mỹ ũn tó ja ti, hã vỹ: ti kuprĩg, he mũ. Kanhkã tá tóg kătĩg ke mũ, ũ tỹ ãjag tar han ke ti,” he tóg, Jesus ti.

Jesus tỹ kanhkã ra tĩg

(Mc 16.19-20; Hk 1.9-11)

⁵⁰ Kĩ tóg ag jãmĩ tĩ mũ, ěmã tỹ Betânia ra. Tá tóg ã nĩgẽ tỹ ag kri ven mũ. Kĩ

tóg ag mỹ vĩ há han mũ sir. ⁵¹ Ag mỹ vĩ há han kĩ tóg ag ré kĩ tĩ mũ, kanhkã ra tãpry tóg mũ. ⁵² Kĩ ag tóg ti to: “Topẽ vĩ tỹ ti nĩ,” he mũ sir. Kĩ ag tóg Jerusalém ra kãmũ mãn mũ, vësỹkã. Ag mỹ tóg sér pẽ tĩ vãhã. ⁵³ Kurã kar ki ag tóg Topẽ jo ĩn ra mũ tĩ, tá Topẽ to vĩ há han jé, ti mỹ nén ũ há kar tó jé, ti tỹ ag mỹ sér tĩn kĩ. Hã vễ.

JOÃO TỸ RÁ

Topê tỹ ã vĩ tỹ nén ù kar han

1 Topê tỹ nén ù kar han ja tũg ki tóg nĩ ja nĩ, ěg tỹ ù to: “Topê vĩ,” he mũ ěn ti, hã to ěg: Jesus, he mũ. Topê mré tóg nĩ. Topê vĩ tỹ ti nĩ gé. ²Topê tỹ nén (ũ) kar han tũg ki tóg Topê mré nĩ nĩ. ³Ti hã tũgrĩn tóg nén ù kar han, Topê ti, ěg tỹ ù to: “Topê vĩ,” he mũ ěn tũgrĩn. Á pĩr mỹ Topê tóg nén ù han tũ nĩ, ti hã mré tóg nén kar han kãn. ⁴Ěg tỹ ù to: “Topê vĩ,” he mu ěn vĩ rĩr nĩ, hã kỹ tóg ěg rĩnrĩr han mũ gé. Jẽngrẽ ri ke ti nĩ, ù tỹ ěg rĩnrĩr han mũ ěn ti. Ti tỹ ěg kanhrãn to ken hã vễ. ⁵Ũn jykre pãno ag vĩ ù tỹ kutỹ mĩ mũ ěn ag ri ke nỹtĩ. Hã ra tóg ěg mỹ jẽngrẽ ri ke nĩ, ěg tỹ ù to: “Topê vĩ,” he mũ ěn ti. Kỹ Nén-Kórég vĩ ti tỹ tũ’ he han sór ja nĩ, hã ra tóg ti tỹ hẽ ri ke ja tũ nĩ.

⁶Kỹ kejẽn Topê tóg ěprã ke ù jẽnẽ, ti jiji hã vĩ: João, he mũ. ⁷Ti mỹ tóg: “ag mỹ ù tỹ ag mỹ jẽngrẽ hen mũ ěn kãmén” he ja nĩ, hã kỹ tóg ke mỹ, ag kar tỹ ti vĩ mẽ jẽ, ag tỹ ti vĩ kri fi jẽ. ⁸João pi(jé) ěg mỹ jẽngrẽ han ja nĩ. Ti tỹ ěg mỹ: “ẽn hã vễ,” henh kãtig ja vễ, ù tỹ ěg mỹ jẽngrẽ han mũ ěn to, hã vĩ: Jesus, he mũ. ⁹Jẽngrẽ pẽ ěn hã vễ. Ěprã tóg jun, ti tỹ ěg kanhrãn jẽ, ěprã ke kar, ù tỹ ěg ki jẽngrẽg pẽ han mũ ěn ti.

¹⁰Ga han tóg, ù tỹ ěg mỹ jẽngrẽ han mũ ěn ti, kỹ tóg ěg mré ga kri tĩnh kãtig gé, ga han kar kỹ. Hã ra ag tóg ti ki kanhrãn ja tũ nĩ, ěprã ke ag. ¹¹Á povo kar mĩ tóg tũg ja nĩ, hã ra ti mré ke ag pi(jẽ) ti ki ge sór ja nĩgtĩ. ¹²Ũ ag tóg hã ra ti ki ge mũ. En ag to tóg: “Topê krẽ,” he mũ, ù tỹ ti ki ge kỹ nỹtĩ tãvĩ ag to. ¹³Ti ki ge kỹ nỹtĩ tũgrĩn ěg hã vĩ tỹ ti krẽ nỹtĩ. Ěg mur tũgrĩn ěg tóg ver tỹ ti krẽ tũ nỹtĩ. Ěg panh tỹ ěg mĩnh fi mré

nỹ tũgrĩn ěg tóg mur mũ gé. Topê tỹ ěg han mãn tũgrĩn ěg tóg tỹ ti krẽ nỹtĩ jãvo.

¹⁴Ěg tỹ ù to: “Topê vĩ,” he mũ ěn vĩ ěg ri ke mur, kỹ tóg tỹ ěprã ke jẽ sir. Ěg mré tóg tũg ja nĩgtĩ. Hã kỹ sóg ti vễ. Pã’i mág vĩ tỹ ti nĩ, ùn tar, tag ve inh. Ěg to há pẽ tãvĩ ti nĩ, kỹ tóg ki hã tó ti gé. Topê kósin pĩr vễ, kỹ Topê vĩ ti mỹ: “ùn mág vĩ tỹ ã nĩ,” hẽ, ti jóg ti.

¹⁵João vĩ ti kãmén ja nĩ gé. Ti kãmén há han tóg, kỹ tóg: “inh nón kãti mũ ěn vĩ inh kãfór nĩ,” he ja nĩ. “Inh nón kãtig jẽ tóg ke mũ, hã ra tóg tỹ ijo ke nĩ. Ěn tó inh huri ãjag mỹ. Ti hã vễ,” he ja tóg nĩ, João ti, Jesus to.

¹⁶Ěg to há tãvĩ tóg nĩ, hã kỹ tóg mỹ nén ù ha kar han, ěg jagãgtãn kỹ. Ěg jagãgtãn tag tovrãn ke tũ pẽ tóg nĩ. ¹⁷Moisés vĩ ěg mỹ Topê tỹ ěg jyvẽn mũ ěn tó ja nĩgtĩ, ěg tỹ ti vĩ ki króm jẽ, kỹ Jesus tóg ěg mỹ: “Topê vĩ ãjag mỹ vẽn pãte fón sór mũ, ti tỹ ãjag to há nĩn kỹ,” he mũ. Ti hã ne ěg mỹ vẽn vĩ sér ěn to mũ. ¹⁸Ěg pi(jẽ) Topê vэг ti. Kỹ ěg kãmĩ ù vĩ ti ve ja tũ nĩ gé. Ti kósin pĩr hã vĩ ěg mỹ ti kãmén tĩ, ti hã vĩ ã jóg mré nĩ nĩ, Topê mré. Ti hã vĩ Topê ri ke nĩ. Kỹ tóg ěg mỹ ã panh ti kãmén tĩ, Topê kósin ti, Jesus ti.

João Batista tỹ Jesus kãmén.

(Mt 3.1-12; Mc 1.1-8; Lc 3.1-18)

¹⁹Kejẽn Judeu ag pã’i ag vĩ João mỹ vẽn vĩ jẽnẽg mũ. Jerusalém tá ag nỹtĩ, pã’i ag, Topê tũ ki rĩr tĩ, Levi krẽkrẽ ag ke gé. Ag João mỹ vẽn vĩ jẽnẽ kỹ ag tóg mỹ: “ũ nỹ tỹ nĩ?” he mũ. ²⁰Kỹ tóg ag mỹ: “inh pi(jé) tỹ Cristo nĩ,” he mũ. Tó há han tóg, ag mỹ.

²¹Kỹ ag tóg ti mỹ: “kỹ ã hỹn tỹ ù nĩ?” he mũ. “Á mỹ tỹ Elias nĩ?” he ag tóg ti mỹ. Hã ra tóg ag mỹ: “vó” he mũ gé.

Kỹ ag tóg ti mỹ: “Topê vĩ tó tĩ ù nẽji kãtig ke mũ gé. Ti hã mỹ tỹ ã nĩ?” he mũ. Hã ra tóg: “vó,” he mũ gé.

²² Kĩ ag tóg ti mĩ: “ũ nĩ tĩ ã nĩ, ge kĩ?” he mũ. “Pã'i ag vỹ ěg jěgně, ěg tĩ ã ki jěmě jě. ěg hỹn ne tónh ke mũ, ag mĩ?” he ag tóg mũ. “Věso ã hěri ke ti?” he ag tóg mũ, João mĩ.

²³ Kĩ João vỹ ag mĩ věnh kāmén mũ. Ā to nén rán kĩ nĩ ěn tó tóg mũ, hã vỹ: “ũ tĩ ěmã tũg ja tá jě kĩ věnh kar mĩ Topě jykre kāmén mũ ěn vỹ tĩ inh nĩ,” he mũ. “Ũ tĩ věnh kar mĩ: “ěg Senhor japry kure ra, ti jamin kurynh ra, ti tĩ jagma tĩg há han jě, he ti ěn vỹ tĩ inh nĩ. Isaiás tĩ inh kāmén hã vě,” he tóg, João ti.

²⁴ Jăvo ũ tĩ ti ki jěměg mũ ag vỹ tĩ Fariseu ag mrě ke nỹtĩ. ²⁵ Kĩ ag tóg ti mĩ: “ã tĩ hě ri ken kĩ ag kygpe sór ně, ã tĩ tĩ Cristo tũ hã ra?” he mũ. “Inh pi(jě) tĩ Elias nĩ, he ã tóg ti. Inh pi(jě) tĩ Topě vĩ tó ti ěn nĩ, ěg tĩ ũn kătĩg jăvănũ mũ ěn, he ã tóg ti, hã ra ã tóg ag kygpég ti,” he ag tóg mũ, João mĩ. ²⁶ Kĩ tóg ag mĩ: “goj tĩ sóg ag kygpég ti,” he mũ. “Hã ra ũ tóg ajag kāmĩ tĩ mũ ha, ajag tĩ ũn ki kagtĩg ũ. ²⁷ ěn vỹ inh nón kătĩg ke mũ, hã ra tóg inh kăfór nĩ. Sỹ ti camarada ninh ke vě vě, sỹ ti pěn né kunũnh ke vě vě, ti pěn to ró ti. Hã ra sóg tĩ ti krēm ke pě jě,” he tóg, João ti

²⁸ Kĩ ag tóg mũ mũ, ti vĩ mẽ kar kĩ. Cidade tĩ Betânia tá ag tóg ti venh kāmũ ja nĩgtĩ, Fariseu ag, João ti, Jordão mã tá. Tá tóg ag kygpég jě nĩ, João ti.

Jesus tĩ tĩ ěg tĩ Topě mĩ ěg mềg tănũ ěn ri ke

²⁹ Tĩ vaj kĩ João vỹ Jesus vэг mũ sir. João tá tóg jun mũ, Jesus ti. Kĩ João tóg ti to: “ti hã vě,” he mũ. “Ěg tĩ Topě mĩ ěg mềg tĩ carneiro krě tănũ ěn ri ke ti nĩ, cordeiro ěn ti. Ti hã vỹ ěg kar tĩ Topě vĩ mranh jagfy ter ke mũ,” he tóg. ³⁰ “Sỹ ũn kāmén mũ ěn hã vě. Ũ tĩ ijo jě mũ vỹ inh nón kătĩg ke mũ, he ja inh nĩ ti to. Inh kăfór ti nĩ, ti tĩ inh jo ke nĩn kĩ, he ja inh nĩ. ³¹ Inh pi(jě) ti ki kanhró ja nĩ, hã

ra sóg goj tĩ věnh kar ag kygpé, ag tĩ ti ki kanhrân kân jě, povo tĩ Israel ag kar,” he tóg, João ti

³² Kĩ tóg: “Topě kuprĩg ve inh,” he mũ gé. “Kanhkă tá kăkutě kĩ tóg ti krĩ kri nĩ nĩ. Tĩ sórăg ve ti nĩ, Topě kuprĩg ti, ti tĩ ti krĩ kri nĩn kĩ. ³³ Inh pi(jě) Jesus ki kanhró nĩ vě. Hã ra Topě tóg inh mĩ: ha ag kygpenh tĩg,” he ja nĩgtĩ, kĩ tóg inh mĩ: “ã tĩ inh kuprĩg ve kĩ ã tóg ti ki kanhró ninh mũ,” he ja nĩ gé. “Kanhkă tá kăkutě kĩ tóg ag kă ũn pir kri ninh mũ. Ti tĩ ũn kri nĩ mũ ěn vỹ inh kuprĩg tĩ ag kygpenh ke mũ,” he ja tóg nĩ inh mĩ, Topě ti. ³⁴ Tag ve inh, hã kĩ sóg ajag mĩ: ti hã vỹ tĩ Topě kósĩn nĩ, he mũ” he tóg, João ti. Ti tĩ Jesus kāmén hã vě.

Jesus tĩ ã mrě mũ tĩ ag jě prěr

³⁵ Tĩ vaj kĩ João vỹ ã mrě mũ tĩ régre ag mrě vēmén jě nĩ. ³⁶ Kĩ tóg Jesus tĩ mĩ tĩg vэг mũ, kĩ tóg ag mĩ: “Topě tũ vỹ tĩ ti nĩ,” he mũ. “Ěg tĩ Topě mĩ ěg mềg tĩ cordeiro tănũ tĩ ěn ri ke ti nĩ,” he tóg, João ti.

³⁷ Ag tĩ ti vĩ tag mẽ kĩ ag tóg Jesus nón mũ mũ. ³⁸ Kĩ Jesus vỹ ag vэг mũ, ag tĩ ti nón mũ ti. Kĩ tóg ag mĩ: “ne ně?” he mũ. Kĩ ag tóg ti mĩ: “ã hě tá ěmã nĩ?” he mũ. ³⁹ Kĩ tóg ag mĩ: “mũ jě ha, inh mrě, ajag tĩ inh jamă ven jě,” he mũ. Kĩ ag tóg ti mrě mũ mũ sir. Ti mrě ag kură ěn tũg mũ. Ră ké ti nỹ ha, ag tĩ ti mrě mũ kri, 4 horas hỹn hěn ri ke mũn.

⁴⁰ Ti mrě mũ ag kă ũ vỹ tĩ André nĩ, ũ tĩ João tĩ Jesus tó ja ěn mềg mũ ag kă ũ, hã vỹ: Simão Pedro jăvy, he mũ, André ti, Jesus mrě vēmén tĩ ěn ag kă ũ ti. ⁴¹ ěn tóg tá kătĩg, kĩ tóg věsỹmér ã kăke tĩ Simão Pedro venh tĩ mũ, kĩ tóg ti mĩ: “Messias ve inh,” he mũ. “Messias,” he ag tóg ti, Topě tĩ ũn jěněnh ke ěn to, Cristo to. ⁴² André tĩ ti mĩ Jesus tó kĩ tóg ti mrě ti venh tĩ mũ. Kĩ Jesus vỹ ti ki ěvănũ mũ, kĩ tóg ti mĩ: “Simão vỹ tĩ ã nĩ, João kósĩn,” he mũ. “Sỹ ã jyjyn măn

ke vē, hã vỹ: Cefas, he mũ,” he tóg, Jesus ti. Cefas to ken hã vē, hã vỹ: Pedro, he mũ, hã vỹ: pãró, he mũ, ěg vĩ ki.

Jesus tỹ Filipe mré Natanael jé prěr

⁴³Tỹ vaj kỹ Jesus vỹ ga tỹ Galiléia ra tĩg sór mũ. Ā tĩg ke jo tóg Filipe kato tẽ mũ. Kỹ tóg ti mỹ: “inh mré kătĩg,” he mũ. Kỹ tóg ti mũ. ⁴⁴Hã ra Filipe vỹ tỹ Betsaida tá ke nĩ, André mré Pedro jamã ěn tá ke. ⁴⁵Kỹ Filipe vỹ Natanael venh ti mũ, ti mỹ Jesus kãmén jé. Kỹ tóg ti mỹ: “Cristo ve inh huri,” he mũ. “Moisés vỹ ti kătĩg ke rán ja nĩ, Topẽ vĩ tó ti ag ke gé. Jesus to ken hã vē, Nazaré tá ke ěn to ken hã vē, José kósín ěn ti. Ti hã vỹ tỹ Cristo nĩ,” he tóg, Filipe ti, Natanael mỹ. ⁴⁶Kỹ tóg ti mỹ: “hã ra sóg Nazaré tá ĩn há ve ja tũ nĩ ver,” he mũ. Hã ra Filipe tóg ti mỹ: “ge ra ti venh kătĩg,” he mũ. Kỹ tóg ti mré ti mũ.

⁴⁷Ag tỹ Jesus tá junjun mũ ra Jesus tóg Natanael kãmén mũ, ũ tỹ tá nỹtĩ ag mỹ. “Ũ tỹ tá kătĩ mũ ěn ve ra,” he tóg. “Israel krẽkrẽ pẽ vē,” he tóg. “ĩn há vỹ tỹ ti nĩ, ón vãn ti nĩ,” he tóg. ⁴⁸Hã ra Natanael vỹ Jesus tỹ Ā to vĩ tag mềg mũ. Kỹ tóg ti mỹ: “kỹ Ā mỹ inh ki kanhró nĩ?” he mũ. Kỹ Jesus tóg ti mỹ: “Filipe tỹ Ā jé prěr to hã sóg Ā vé,” he mũ. “Ā tỹ ka krêm jẽ kỹ sóg Ā vé, ka tỹ figueira ěn krêm,” he tóg,” he tóg. Jesus ti.

⁴⁹Kỹ Natanael tóg Jesus mỹ: “mẽ,” he mũ. “Topẽ kósín vỹ tỹ Ā nĩ,” he tóg. “Ěg povo tỹ Israel kri pãĩ vỹ tỹ Ā nĩ,” he tóg.

⁵⁰Kỹ Jesus tóg: “isỹ Ā mỹ: Ā ve ja inh nĩ, Ā tỹ ka krêm jẽ ra, hen kỹ tóg Ā mỹ e tĩ, kỹ Ā tóg inh vĩ kri fi sór mũ,” he mũ. “Hã ra tóg ver tỹ nén ũ tũ nĩ, sỹ Ā ve ja tag ti. Isỹ kar kỹ nén han ke vỹ Ā mỹ e pẽ tãvĩ tĩnh mũ, ha vemnĩ,” he tóg, Jesus ti. ⁵¹“Ha vé, ki hã sóg tónh ke mũ, ha mẽ. Kanhkã nor kỹ nĩ ve jé Ājag tóg ke mũ. Tá Ājag tóg Topẽ tỹ jěgnẽ jafã ag venh ke mũ gé. Kanhkã tá ag kãrenh ke mũ, iso,

kỹ ag ra mũ măn ke mũ gé. Tỹ sóg ěprã ke fi kósín nĩ mỹr,” he tóg, Jesus ti.

Jesus tỹ vẽn prũg venh ti

2 Kurã tãgtũ tũg kỹ ũ tóg vẽn prũg han mũ ěmã tỹ Caná tá, ga tỹ Galiléia tá. Jesus mỹnh fi vỹ venh tĩg ja nĩ. ²Kỹ ag tóg Jesus mỹ tó mũ gé, ti tỹ festa venh kătĩg jé, ti mré mũ ti ag mré. ³Ag tỹ tá nỹtĩ ra vãhã vinho tóg tũ' he mũ. Kỹ Jesus mỹnh fi tóg ti mỹ: “vinho hur tũg,” he mũ. ⁴Hã ra Jesus tóg fi mỹ: “toreg', mỹnh’,” he mũ. “Inh mré ke tũ vē, Ā tỹ inh mỹ nén tó mũ tag ti,” he tóg, Jesus ti, Ā mỹnh fi mỹ. ⁵Hã ra fi tóg ũ tỹ festa ki rĩr ti ag mỹ: “ti tỹ Ājag mỹ nén ũ tó kỹ han nĩ,” he mũ.

⁶Hã ra goj né mág tỹ 6 (ke) vỹ tá nỹtĩ, pó tỹ goj hé mág. Ēhé ti nỹtĩ, balde fór tỹ 10 (ke) tỹ ěg tóg ĩn pir fãn tĩ. Judeu ag vỹ vẽnh kygpe e han tĩ, ag tỹ Topẽ mỹ há nỹtĩ jé. Ag jykre hã vē. Ag tỹ vẽnh kygpe hã jé tóg tá nỹtĩ, goj nén ti. ⁷Kỹ Jesus tóg festa ki rĩr ti ag mỹ: “goj né ěn fónfãn, goj run kỹ,” he mũ. Kỹ ag tóg ke mũ. Fónfãn kãn ag tóg mũ. ⁸Kỹ tóg ag mỹ: “goj tag tỹ festa to pãĩ mỹ ven,” he mũ. Kỹ ag tóg ke mũ. ⁹Kỹ tóg kron mũ, festa to pãĩ ěn ti. Hã ra tóg tỹ vinho nĩ sir, ag tỹ run ja ti. Hã ra tóg ki kagtĩg nĩ, festa to pãĩ ti. Ũ tỹ festa ki rĩr ti ag hã vỹ ki kanhró nỹtĩ, pãĩ ěn krêm ke ag.

Pãĩ tỹ vinho hã ěn kron kỹ tóg ĩn prũg mũ ěn jé prěr mũ. Kỹ tóg ti mỹ: ¹⁰“vẽnh jykre vẽnhmỹ han Ā,” he mũ. “Ag tỹ kron-kron vén kỹ Ā tóg ag mỹ vinho há tãvĩ nĩm ke mũ vē, kar kỹ vinho pãgsĩ vỹ há nĩ vē. Jãvo Ā tóg ag mỹ vinho pãgsĩ ěn nĩm vén, kỹ Ā tóg vinho há pẽ tag nĩm sór mũ ha vãhã,” he tóg, festa to pãĩ ti, ĩn prũg mũ ěn mỹ. Hã ra tóg ki kagtĩg nĩ, Jesus tỹ goj tỹ vinho há ěn han mũ ti, há kỹ tóg ti mỹ e tĩ, ti tỹ festa kũju ki vinho há ven sór kỹ.

¹¹Jesus tỹ ěmã tỹ Caná tá nén han mũn hã vē, Galiléia tá. Ěg tỹ nén han ki

kagtīg hyn han tóg tĩ, kỹ tóg tag han vén. Tĩ tỹ nén han mũ ki ěg tóg ti jykre tar ki kanhró nỹtĩ sir. Hã kỹ ag tóg ti ki ge mũ sir, ti mré mũ tĩ ag, ag tỹ ti jykre tar ěn ven kỹ.

¹²Kar kỹ Jesus vỹ cidade tỹ Cafarnaum ra tĩ mũ, ti mỹnh fi mrẽ, ti jãvy ag mré hã, ti mrẽ mũ tĩ ag mré ke gé. Tá ag tóg nỹtĩg mág sĩ han.

Jesus tỹ Topẽ jo ĩn ra tĩ

(Mt 21.12-13; Mc 11.15-17; Lc 19.45-46)

¹³Ěn kã Judeu ag festa tỹ Páscoa vỹ kakó nĩ ha Kỹ Jesus vỹ cidade tỹ Jerusalém ra tĩ mũ, ti mré mũ ti ag mré.

¹⁴Tĩ tỹ Topẽ jo ĩn tá jun kỹ tóg ũ tỹ boi vender he tĩ ag vég mũ, carneiro vender he tĩ ag ke gé sórãg vender he tĩ ag ke gé. Topẽ jo ĩn krēm ag tóg ãjag negócio hyn han tĩ. Kar kỹ ũ ag tóg tá nỹtĩ gé jãnkamy trocar he tĩ ag. ¹⁵Jesus tỹ ag ve kỹ tóg ti mỹ e tĩ, ag tỹ Topẽ jo ĩn kavénh mũn kỹ. Hã kỹ tóg mrãn ke jafã fy tỹ ag mrãnmrãn jafã han mũ. Ěn vyn kỹ tóg ag pan mũ, Topẽ jo ĩn kátá, carneiro ti ke gé, boi ti ke gé. Ũ tỹ jãnkamy trocar he tĩ ag jãnkamy ěn vãm tóg mũ gé, ěprã, kỹ tóg ag mesa tỹ kréj ke mũ gé. ¹⁶Ũ tỹ sórãg vender he tĩ ag mỹ tóg: “ãjag tũ ma mũjẽg,” he mũ. “Inh panh jo ĩn krēm negócio han sór tũg nĩ. Bodega pijẽ, inh panh jo ĩn ti,” he tóg, Jesus tĩ.

¹⁷Tĩ mré mũ tĩ ag tỹ tag ve kỹ ag tóg ti to rãn kỹ nĩ ěn mĩ ěkrég mũ, ha mẽ: “ã ĩn tóg inh mỹ sĩnvĩ jẽ, kỹ tóg inh mỹ e tĩ, ag tỹn kavénh kỹ. Tag tugrĩn ag tóg inh krĩ rỹ han mũ, kỹ tóg kejẽn isén ke mũ sir, inh kri rỹ ti, ha vemnĩ,” he tóg, Topẽ vỹ tỹ rãn kỹ nĩ ki, Jesus to.

¹⁸Kỹ Judeu ag pã'i ag vỹ Jesus tỹ ag pan mũ vég mũ gé. Kỹ ag tóg ti mỹ: “ã tỹ hẽ ri ke nẽ?” he mũ. “Ũ nỹ hỹn ã mỹ: tag han nĩ, hé? Milagre ũ han nĩ, ěg tỹ ũ tỹ ã jẽnẽg mũ ki kanhrãn jé,” he ag tóg mũ, pã'i ag, Jesus mỹ.

¹⁹Hã ra Jesus tóg ag mỹ: “ãjag tỹ Topẽ jo ĩn tag kókén kỹ sóg ti jẽgja ki ũ han mãn ke mũ, kurã tăgtũ ki, ha vemnĩ,” he mũ. ²⁰Kỹ tóg ag mỹ e tĩ. “Ũ tỹ Topẽ jo ĩn tag han mũ ag vỹ ano tỹ 46 (ke) ki rãnrhãj kỹ ti han. Jãvo ã mỹ kurã tăgtũ ki ti han sór mũ, in tĩ?” he ag tóg mũ, Jesus mỹ, pã'i ag. ²¹Hã ra Jesus tóg ag mỹ ã ter ke tó ja nĩgtĩ, vẽn kãmén ja ti nĩgtĩ, ti tỹ veso: “Topẽ jo ĩn ri ke inh nĩ,” hen kỹ. ²²Tĩ tỹ kejẽn ã ter kar kỹ rĩr mãn kỹ ti mré mũ tĩ ag tóg ti vỹ tag ki ěkrén kỹ ki kanhrãn mũ, kỹ ag tóg Topẽ vỹ ki rãn kỹ nĩ ěn to jykren há han mũ vãhã, Jesus vỹ to ke gé, kỹ ag tóg ti ki ge há han mũ ha.

Jesus tỹ vẽn kar ki kanhró

²³Kỹ ũ tỹ hẽn ri ke ag vỹ Jesus ki ge mũ, ti tỹ Jerusalém tá nĩn kỹ, festa tỹ Páscoa ěn kã. Ag tỹ ti tỹ nén han mũ ve kỹ ag tóg ti ki ge mũ. Milagre hyn han tóg tĩ. ²⁴Hã ra tóg ag jykre ki kanhró nĩ, ũ tỹ ón kỹ ti ki ge mũ ag jykre ki. Ón kỹ ag tóg ti ki ge mũ, hã kỹ ag tóg ti ki fe tũ nỹtĩ sir. ²⁵Kỹ ũ tỹ ti mỹ: “ũ ěn jykre vỹ ge nĩ,” hen kỹ tóg: “hỹ, ki kanhró inh nĩ,” he tĩ. Vēsóg ki tóg ag jykre ki kanhró nĩgtĩ.

Nicodemos tỹ Jesus mré vēmén

3 Ěn kã ũ tóg nĩgtĩ, ti jijin hã vỹ: Nicodemos, he mũ. Judeu ag pã'i ũ vỹ, Fariseu ũ vỹ. ²Ěn vỹ Jesus ve sór mũ, kỹ tóg kuty ra ti venh tĩ mũ, ti mré vēmén jé. Kỹ tóg ti mỹ: “Topẽ vỹ ã jẽnẽ, tag ki kanhró ěg tóg nỹtĩ,” he mũ. “Topẽ tỹ ěg mỹ ũn jẽnẽ vỹ tỹ ã nĩ, hã kỹ ã tóg ěg tỹ nén han vãn ěn hyn han tĩ. Topẽ tỹ ã mré han tũ nĩ ra ã tóg ã tỹ han mũ tag ki kagtĩg nĩnh mũ vỹ,” he tóg, Nicodemos tĩ, Jesus mỹ.

³Kỹ Jesus tóg ti mỹ: “sỹ ã mỹ tag kãmén ke vỹ, ha mẽ,” he mũ. “Ũn mur mãn kỹ nỹtĩ ag hã vỹ Topẽ tỹ tỹ ěg pã'i

nĩ venh ke mũ, ag tãvĩ. Ki hã sóg tó mũ m̃ỹr,” he tóg, Jesus ti, Nicodemos m̃ỹ.

⁴Kỹ Nicodemos tóg ti m̃ỹ: “kỹ ùn sanh h̃ỹn h̃e ri kenh mũ, ti mur m̃an jé?” he mũ. “Ti m̃ỹ ṽesĩ han ki kanhró nĩ, k̃ỹn m̃ỹ ã m̃ỹnh fi nug ki rã m̃an kỹ mur m̃an ke mũ?” he tóg, Nicodemos ti.

⁵⁻⁶Hã ra Jesus tóg ti m̃ỹ: “vó,” he mũ. “Ēprã ke ag krê ṽỹ t̃ỹ ěprã ke ñỹtĩ, ag m̃ỹnh fag ri ke, Jãvo Topê kuprĩg t̃ỹ ù han kỹ tóg Topê kuprĩg t̃ỹ jagrẽ nĩ. Mur m̃an to ken hã ṽe, hã ṽỹ: inh ki rã, he mũ, hã ṽỹ: mur m̃an, he mũ. Goj t̃ỹ ke ṽe, Topê kuprĩg t̃ỹ ke ṽe gé. Û t̃ỹ gen kỹ mur m̃an ja tũ ñin kỹ tóg Topê t̃ỹ t̃ỹ ěg pã'i nĩ venh ke tũ p̃e nĩ. ⁷Hã ra tóg ã m̃ỹ e tĩ, s̃ỹ ã m̃ỹ: “mur m̃an jé ã tóg ke mũ,” hen kỹ. ⁸Kãka to jykr̃en nĩ. Ti t̃ỹ m̃i t̃ig s̃ór mũ ěn m̃i tóg tĩ tĩ kãka ti. Ti t̃ỹ krog he mũ ěn hã m̃eg ěg tóg tĩ, hã ra ěg tóg ti vég tũ nĩ, kỹ ěg ti t̃ỹ h̃e ra t̃ig ke mũ ki kagt̃ig ñỹtĩ, ti t̃ỹ h̃e tá kãt̃ig ěn ti ke gé. Ge ti ñigtĩ, Topê kuprĩg t̃ỹ ùn han m̃an mũ ag mr̃é,” he tóg, Jesus ti, Nicodemos m̃ỹ. (Topê kuprĩg vég tũ ěg tóg ñigtĩ. Ha ra tóg ěg m̃ỹ ã jykre tãg ñim, ti t̃ỹ ěg han m̃an kỹ. Hã kỹ Jesus tóg Nicodemos m̃ỹ: “kãka ri ke nĩ,” he mũ)

⁹Kỹ Nicodemos tóg: “tag h̃ỹn h̃e ri ke tĩ?” he mũ. ¹⁰Kỹ Jesus tóg ti m̃ỹ: “Israel ag kanhr̃an ã tóg tĩ, hã ra ã tóg s̃ỹ ã m̃ỹ ñen tó mũ tag ki kagt̃ig nĩ,” he mũ. ¹¹“Ki hã sóg tó mũ, hã kỹ sóg ã m̃ỹ kãm̃en mũ. S̃ỹ ñen ù ki kanhr̃an mũ ěn hã tó sóg tĩ. Is̃ỹ ñen ù ve ja ěn hã kãm̃en sóg tĩ, hã ra ãjag tóg m̃e jãṽanh ñỹtĩ. ¹²Is̃ỹ ãjag m̃ỹ ga kri ṽenh jykre kãm̃en mũ ra ãjag tóg j̃em̃e s̃ór tũ ñigtĩ. Kỹ ãjag h̃ỹn h̃e ri kenh ke mũ', s̃ỹ ãjag m̃ỹ kanhkã tá ṽenh jykre kãm̃en kỹ?” he tóg. ¹³“Ha vé, ãjag kãm̃i ù ṽỹ kanhkã ra tãp̃ry tũ nĩ, tá ṽenh jykre ěn ve jé. Ājag jãvo is̃óg tá kãkut̃e ja nĩ, hã kỹ sóg tó tĩ. Inh jam̃an hã ṽe. T̃ỹ sóg ěprã ke fi kós̃in nĩ,” he tóg, Jesus ti.

¹⁴“Moisés ṽỹ p̃ỹn t̃ỹ ka to sa ja ñigtĩ, ga kórég ěn tá. P̃ỹn t̃ỹ ferro kusũg t̃ỹ há

ẽn t̃ỹ tóg ka to sa ja ñigtĩ. Tag ri ke han jé ag tóg ke mũ, is̃ỹ, is̃ỹ t̃ỹ ěprã ke fi kós̃in ñin kỹ. ¹⁵Kỹ ù t̃ỹ inh ki r̃anh ke mũ ěn ṽỹ kren ke mũ. R̃ir kr̃ỹg ja tũ ve jé tóg ke mũ. Hã jé ag tóg ka to isanh ke mũ. ¹⁶Topê ṽỹ ga kri mũ ag to há nĩ, hã kỹ tóg ã kós̃in pir f̃eg, ṽenh kar t̃ỹ ti ki ge jé, ag t̃ỹ tũ' he tũ nĩ jé, ag t̃ỹ ěg r̃ir kr̃ỹg ja tũ ěn ven j̃e. ¹⁷Topê ṽỹ ã kós̃in j̃eñe, ti t̃ỹ ěprã ke ag krenkren han jé. Ti pi(jé) s̃ỹ ãjag vóg kóñan jé inh j̃eñe,” he tóg, Jesus ti, Nicodemos m̃ỹ.

¹⁸“Û t̃ỹ inh ki r̃anh ke mũ to tóg j̃unh ke tũ nĩ, Topê ti. Jãvo tóg ù t̃ỹ inh ki ge tũ ěn ag hã to jũ nĩ is̃ỹ t̃ỹ ti kós̃in pir ñin kỹ,” he tóg.

¹⁹“Topê t̃ỹ ù t̃ỹ inh ki ge tũ ag to jũ ṽỹ ge nĩ, ha m̃e. Ga kri mũ ag kanhr̃an sóg tĩ, hã ki sóg ag m̃ỹ j̃engr̃e ri ke nĩ. Hã ra ag tóg m̃e s̃ór tũ ñigtĩ. Kut̃y m̃i ag tóg mũ s̃ór mũ, j̃engr̃e tóg ag m̃ỹ kórég nĩ, ag jykre pãno ñin kỹ. ²⁰Û t̃ỹ ṽenh jykre pãno han mũ kar ṽỹ kurã to kórég ñỹtĩ, kỹ ag tóg kurã ki ṽenh ven s̃ór tũ nĩ, ṽenh kar t̃ỹ ag jykre pãno venh ha m̃e t̃in kỹ. ²¹Û t̃ỹ Topê ṽi ki króm mũ ag ṽỹ kurã ki ṽenh ven s̃ór tĩ. Kurã tóg ag m̃ỹ sér tĩ, ṽenh kar t̃ỹ ag jykre hã ven jé. Topê ṽỹ ag tar han tĩ, ag t̃ỹ ñen ù há han jé. Hã ve jé ag tóg ke mũ, ṽenh kar ag,” he tóg, Jesus ti, Nicodemos m̃ỹ. Ti t̃ỹ ti m̃ỹ Topê jykre kãm̃en ja hã ṽe.

João Batista t̃ỹ Jesus kãm̃en m̃an

²²Ēn kã kej̃en Jesus tóg ã mr̃é mũ tĩ ag mr̃é ga t̃ỹ Judéia ra tĩ mũ, kỹ ag tóg tá ñỹtĩ, ṽenh kar kygp̃e kỹ. ²³Hã ra João ṽỹ ag kygp̃ég mũ gé, ěn kã, ṽanh t̃ỹ Enom tá, Salim tóg tá kakó nĩ. Tá goj ṽỹ éhé nĩ, hã kỹ tóg ag t̃ỹ tá ṽenhm̃an kỹ ag kygp̃ég mũ, João ti. ²⁴Ēn kã tóg ver se kỹ j̃e tũ nĩ, João ti.

²⁵Kej̃en Judeu ù tóg tá nĩ gé, hã ra tóg João mr̃é mũ tĩ ag ṽi kaf̃an mũ. “Goj t̃ỹ ěg tóg Topê m̃ỹ j̃anhkri kỹ ñigtĩ,” he tóg mũ, ag m̃ỹ, Judeu ěn ti. Hã to ag tóg

jagnē vī kafān mū. ²⁶Kỹ João mré mū ag tóg João mý tag tó mū, ha mē. “Ũ tỹ Jordão mātá ā mré nĩ ja ěn vỹ ag kygpég jē nĩ, ā tỹ ěg mý ũn kāmén ja ěn ti. Hā ra vėnh kar vỹ ti mré mū mū ha, hā kỹ ag tóg ā venh kāmū mǎn tũ nĩ ha,” he ag tóg mū, João mý, Jesus to. ²⁷Hā ra tóg ag mý: “há ti nĩ,” he mū. “Topē tỹ ěg mý ũn nĩm mū ěn hā vėg ěg tóg tĩ,” he tóg. ²⁸“Mĩ ěkrén nĩ, sỹ ājag mý nén tó ja ti, hā vỹ: inh pĩ (jé) tỹ Cristo nĩ,” he mū. Sỹ ti jāmĩ tĩg ke hā jé tóg inh jēnē, Topē ti, he ja sóg nĩ ājag mý,” he tóg, João ti. ²⁹“Vėnh prũg to jykrén nĩ. ũn prũg mū hā vỹ ā prũ ke fi mré nĩ nĩ. Ti régre tóg hā ra ti rā hā jē, ũn prũg mū ěn rā hā, kỹ tóg ti vỹ mēg mū, hā ra tóg ti mý mē sér pē tĩ, ti, vĩ ti. Ge ti nĩ, inh mré. Inh mý tóg sér tĩ, vėnh kar tỹ ti mré mūn kỹ, ti tỹ ũn prũg mū ri ke nĩn kỹ, Jesus ti. ³⁰Ũn e tỹ ti mré mūn kỹ tóg há tĩ, kỹ tóg tỹ ũn mág nĩnh mū ha. Hā ra sóg tỹ nén ũ tũ nĩnh ha,” he tóg, João ti.

Jesus tỹ kynhmỹ kǎtĩ

³¹“Ũn tỹ kynhmỹ kǎtĩ mū ěn vỹ vėnh kar kafór nĩ. Ěprā ke ag vỹ tỹ ěprā ke nỹtĩ, kỹ ag tóg ěprā ke jykre tỹ vėmén tĩ. Ũ tỹ kanhkā tá kǎtĩ mū ěn vỹ tỹ vėnh kar kri ke jē. ³²Kỹ tóg ā tỹ tá nén ve ja ěn hā tó mū, ā tỹ tá nén mē ja ěn, hā ra ag tóg ti vỹ mē sór tũ nĩ. ³³Ũ tỹ ti vỹ mēg mū ag hā ra Topē to: “ki hā tóg tó tĩ,” he mū. ³⁴Topē tỹ ũn jēnėg mū ěn vỹ ti vỹ kāmén mū. Topē kuprĩg vỹ Jesus tar han mū, ti tỹ tỹ ti jagrē pē nĩn kỹ, ti tỹ ti ve mág han kỹ. ³⁵Topē vỹ ā kósĩn to há tǎvĩ nĩ, kỹ tóg ti mý nén (ũ) kar tovǎnh, ti hā tỹ ki rĩr jé. ³⁶Hā kỹ ũ tỹ ti kósĩn ki rā mū vỹ ter mǎn ke tũ nĩ. Rĩr krỹg ja tũ ve jé tóg ke mū. Ũ tỹ ti vỹ han sór tũ ěn vỹ tag venh ke tũ pē nĩ, rĩr krỹg ja tũ tag ti. Topē vỹ ti vóg kónǎn ke mū, kỹ tóg tũg' henh ke tũ nĩ, Topē tỹ ti vóg kónǎn ke ti,” he tóg, João ti. Ti tỹ ā mré mū ti ag mý Jesus kāmén jan hā vē.

Jesus tỹ Samaria tá fi mré vėmén mū

4 Kỹ Fariseu ag vỹ mēg mū, ũn tỹ hėn ri ke ag tỹ Jesus mré mū ěn ti. ũn e ag kygpég tóg mū gé, Jesus ti, João tỹ ũn kygpe ja ag kǎfór. ²Hā ra Jesus vỹ ag kygpe ja tũ nĩ. Ti mré mū tĩ ag hā vỹ ag kygpe ja nĩgtĩ. ³Kỹ Jesus tóg mēg mū, Fariseu ag tỹ ti tỹ tỹ ũn mág nĩ mē ja ti, hā kỹ tóg ga tỹ Judėia tá kǎkutē kỹ ga tỹ Galilėia ra tĩ mū, ti mré mū tĩ ag mré. ⁴Galilėia ra tĩg jé tóg ver ga tỹ Samaria fin rǎm mū. ⁵Fin rǎm kỹ tóg Samaria tá cidade ũ tá jun mū, hā vỹ: Sicar, he mū. Tán kakó nĩ, Israel jóg'jóg ve tỹ Jacó japỹ ja ti. Ěpỹ ěn fi ja tóg nĩ, ā kósĩn tỹ José mý, Jacó ti. ⁶Kỹ Jacó tỹ poço vỹ tá nĩ gé. Jesus tỹ poço ěn tá jun kỹ tóg tá vėnhkǎn kỹ nĩ nĩ, poço ěn rā hā. Rā tỹ ěg nĩno kǎ sa ra ke ja vē.

⁷Jesus tỹ tá nĩn kỹ ũn tỹtǎ fi vỹ tá jun mū, Samaria tá ke ũ fi. Goj run jé fi tóg kǎtĩ mū. Kỹ Jesus vỹ fi mý: “inh mý goj jun, sỹ kron jé,” he mū. ⁸Ti mré mū tĩ ag vỹ tá tũgtũ nỹtĩ, ā pir mý tóg tá nĩ nĩ, Jesus ti. Cidade ra ag kagáv, vėjėn comprar he jé.

⁹Jesus tỹ fi mý goj to vĩn kỹ fi tóg ti mý: “Judeu vỹ tỹ ā nĩ, hā ra ā tóg inh mý goj to vĩ mū,” he mū, “isỹ tỹ Samaria tá ke nĩ ra,” he fi tóg mū, Jesus mý. Judeu ag vỹ Samaria tá ke ag to é he ti, hā kỹ fi tóg ti mý ke mū.

¹⁰Kỹ Jesus tóg fi mý: “Topē tỹ ā mý nén han sór mū tag ki kagtĩg ā nĩ ver,” he mū. “Kỹ ā tóg inh ki kagtĩg nĩ gé. Ke tũ nĩ mū ra ā tóg inh mý: “inh mý goj nĩm,” henh ke mū vē, kỹ sóg ā mý goj ror tỹ goj nĩm ke mū vē,” he tóg fi mý, Jesus ti.

¹¹Kỹ fi tóg Jesus mý: “runja tũ ā nĩ,” he mū, “kỹ ā hỹn hē ri kenh mū, ā tỹ goj ror tỹ goj ěn run jé? Téj jagy ti nĩ, poço ti,” he fi tóg ti mý. ¹²“Ěg jóg'jóg ve tỹ Jacó vỹ poço tag han, kỹ ag tóg ti goj kron, ti krē ke gé, ti mēg ke gé. Ā mý ti

káfór nĩ, hã k̃y ă m̃y goj ror t̃y goj run sór mũ?” he fi tóg mũ, Jesus m̃y.

¹³ K̃y Jesus tóg fi m̃y: “ă t̃y goj tag kron k̃y ă tóg kãnhmar kron măn sór mũ,” he mũ. ¹⁴ “Is̃y ă m̃y goj nĩm k̃y ă tóg kron pĩr han kar k̃y há nĩ ha, kron măn sór ke tũ ă nĩ sir. Ă kãki tóg goj ror han ke mũ, s̃y ă m̃y goj nĩm ke ti. K̃y goj tag ṽy ă ter ke tũ han ke mũ, ha vemnĩ,” he tóg, Jesus ti. ¹⁵ K̃y fi tóg ti m̃y: “inh m̃y nĩm gé, goj tag ti,” he mũ. “K̃y sóg tag ki run măn ke tũ nĩ ha, k̃y sóg kron sór măn ke tũ nĩ ha,” he fi tóg.

¹⁶ Hã ra Jesus tóg fi m̃y: “k̃y ă mén jé pr̃ermnĩ ge, ti mré inh venh kãtig nĩ,” he mũ fi m̃y. ¹⁷ “Hã ra sóg mén tũ nĩ,” he fi tóg. “H̃y,” he tóg, Jesus ti. “Mên tũ ă nĩ, ki hã ă tóg tó mũ. ¹⁸ Ă mén ag ṽy ũ t̃y 5 (ke) ja nĩgtĩ, k̃y ă t̃y ũri ũn mré nĩ ěn pi(jé) t̃y ă mén nĩ. Ki hã ă tóg tó mũ,” he tóg, Jesus ti.

¹⁹ K̃y fi tóg Jesus m̃y: “Topē vĩ tó jafã ṽy t̃y ă nĩ, vэг isóg nĩ nĩ,” he mũ. “K̃y inh m̃y tag tó, ha mē. Ěg jóg’jóg ve ag ṽy tag ki Topē mré vēmén tĩ ja nĩgtĩ, pãnónh tag kri, k̃y ěg tóg ũri ke tĩ gé. ²⁰ Hã ra tóg ajag m̃y há tũ nĩ, tag, ajag t̃y t̃y Judeu ñytĩn k̃y. “Jerusalém tá ěg Topē mré vēmén ke mũ, Jerusalém tá ěg tóg ti m̃y: ũn mág ṽy t̃y ă nĩ, henh ke mũ,” he ajag tóg tĩ. Ti h̃yn hē tá há nĩ, ěg t̃y Topē mré vēmén ke ti?” he fi tóg, Jesus m̃y

²¹ Hã ra Jesus tóg fi m̃y: “ha mē, s̃y ă m̃y nén kãmén ke ti,” he mũ. “Kãnhmar ajag tóg pãnónh tag kri ěg jóg t̃y Topē mré vēmén măn ke tũ nĩ, k̃y ěg Jerusalém tá ti mré vēmén măn ke tũ nĩ gé. ²² Topē mré ajag tóg vēmén sór ti, hã ra ajag tóg ajag t̃y ũn mré vēmén mũ ki kagtĩg ñytĩ. Ajag jãvo ěg tóg ti ki kanhró ñytĩ, ũ t̃y vènh kar krenkren han ke ěn t̃y t̃y Judeu kr̃ekr̃e ag kã ũ nĩn k̃y. ²³ Kãnhmar vènh kar ṽy Topē mré vēmén há han ke mũ. Kakó ti nĩ ha, kurã tag. K̃y ũ t̃y ti mré vēmén mũ ag ṽy Topē kuprĩg

t̃y jagrē ñytĩ, hã k̃y ag tóg ti mré vēmén há han ke mũ, ěg jóg mág mré. Ũ t̃y ge hã jãvãnh ti mũ, ěg jóg mág ti, ag t̃y ti mré vēmén jé, ti m̃y: “ũn mág ṽy t̃y ă nĩ,” he jé,” he tóg. ²⁴ “Ěg pi(jé) Topē vэг tĩ, hã ra tóg ěg mré nĩ nĩ. K̃y, ěg t̃y ti mré vēmén sór k̃y ěg tóg ti kuprĩg t̃y jagrē ñytĩn mũ, ěg t̃y ti mré vēmén há han jé, ěg t̃y ti vэг tũ ra. Ěg t̃y ti m̃y: “ũn mág ṽy t̃y ă nĩ,” hen k̃y ěg tóg ti m̃y ěn ke tũ nĩ, vènh vĩ há hã tó jé ěg tóg ke mũ,” he tóg mũ, Jesus ti, fi m̃y.

²⁵ K̃y fi tóg ti m̃y: “h̃y,” he mũ. “Mesias ěn ṽy kãtig ke mũ, ěg t̃y ũ to: Cristo, he mũ ěn. ěn ṽy ěg m̃y kãmén kãn ke mũ, tag kar ti,” he fi tóg ti m̃y. ²⁶ K̃y Jesus tóg fi m̃y: “inh hã vē,” he mũ. “Ũ t̃y ă mré vēmén jēn hã vē,” he tóg.

²⁷ Ti t̃y fi m̃y tag tó k̃y ti mré mũ tĩ ag tóg ti tá junjun mũ. K̃y ag tóg ti t̃y fi mré vēmén vэг mũ, k̃y tóg ag m̃y e tãvĩ tĩ. Hã ra ag tóg ti m̃y nén ũ tó tũ nĩgtĩ. “Ă t̃y ne mē sór nē, fi ki?” he tũ ag tóg nĩgtĩ. “Ă t̃y ne tó nē, fi m̃y?” he tũ ag tóg nĩgtĩ gé.

²⁸ Hã ra fi tóg ă runja ré k̃y ti mũ, ă jamã ra. K̃y fi tóg ă nĩgja tá ke ag m̃y: ²⁹ “mũ ñy, ũ ve jé,” he mũ. “Inh m̃y tóg s̃y nén han ja tó kãn. Ti m̃y t̃y Cristo tũ nĩ ṽy?” he fi tóg ag m̃y. ³⁰ K̃y ag tóg fi mré kãmũ mũ sir, ti ve jé.

³¹ Fi tĩg kar k̃y ti mré mũ tĩ ag tóg Jesus m̃y “vējēn ti ko ra,” he mũ. ³² Hã ra tóg ag m̃y: “ijēn ṽy nĩ nĩ, hã ra tóg ajag jēn ri ke tũ nĩ,” he mũ. ³³ K̃y ag tóg jagnē m̃y: “ũ ñy ti m̃y vējēn nĩm h̃yn?” he mũ. ³⁴ Hã ra Jesus tóg: “ijēn to ken hã vē, hã ṽy: t̃y is̃y Topē rãnhraj han kãn ke, he mũ, is̃y ũ t̃y inh jēnēg mũ ěn vĩ han ke, he mũ gé,” he tóg, Jesus ti. ³⁵ “Ajag m̃y ti kysã t̃y 4 (ke) nĩ ver, ěg t̃y ěg jakré kanē venh ke ti. Ha Sicar tá kãmũ mũ ag vigvé. Ũri ag tóg inh ke ge sór mũ, k̃y ag tóg inh m̃y ěg jakré tóg ñy ěn ri ke ñytĩ. ³⁶⁻³⁸ Fi m̃y sóg Topē vĩ tó, k̃y fi tóg ă mré ke ag m̃y tó. Hã ra sóg ajag m̃y: “ha ag m̃y tó măn, ag t̃y inh ki ge jé,” he mũ. K̃y ajag tóg ũ

jakré kym ri ke han mũ, ājag tỹ Sicar tá ke ag tỹ inh ki ge mũ ven kỹ. “Ủ vỹ krăn tĩ, kar kỹ ủ vỹ ti kanē māg tĩ,” he ěg tóg tĩ. Ki hã tó vẽ, tag, ěg tỹ ěprã ke ag tỹ inh ki genh ke to jykrén kỹ. Kỹ ủ tỹ ag mỹ tó măn mũ mỹ tóg sér tĩ, ti tỹ ag tỹ inh ki ge mũ ven kỹ. Ā rãnrhāj kaja vég tóg mũ sir. Hã ra ủ tỹ ag mỹ tó vén ja ěn mỹ tóg sér tĩ gé, ag tỹ inh ki ge mũ ti. Ā rãnrhāj kaja vég ti tĩ gé,” he tóg, Jesus ti, Ā mré mũ ti ag mỹ.

³⁹ Hã ra ùn tỹtã ěn fi tóg Ā mré ke kar ag mỹ: “inh mỹ tóg sỹ nén han ja tó kãn,” he ja nĩ, Jesus to. Kỹ ag tóg Jesus ki ge mũ, fi vĩ to. ⁴⁰ Kỹ ag tóg Jesus tá junjun mũ sir. Kỹ ag tóg ti mỹ: “tĩg tũg nĩ. ěg mré nĩmĩ,” he mũ. Kỹ tóg ag mré kurã régre tũg mũ. ⁴¹ Kỹ ủ tỹ hén ri ke ag tóg ti ki ge mũ sir, ti vĩ to. ⁴² ùn tỹtã ěn fi mỹ ag tóg: “ã vĩ tugrĩn ěg tóg ti ki ge mũ,” he mũ, “hã kỹ ěg tóg ùri ti vĩ mēg mũ, kỹ ěg tóg ti vĩ tugnĩn ti ki ge pē han kỹ nỹtĩ, ùri. Ti ki kanhró ěg tóg nỹtĩ ha. Vēnh kar kren han tĩ ěn vẽ mỹr,” he ag tóg mũ, ùn tỹtã ěn fi mỹ. Hã kỹ Samaria tá ke tỹ hén ri ke ag vỹ Jesus ki ge kỹ nỹtĩ.

Jesus tỹ pã'i kósin tỹ há' he

⁴³ Jesus tỹ Samaria tá ke ag mré kurã régre tũg kar tóg ga tỹ Galiléia ra ti mũ sir. ⁴⁴ “Ủ tỹ Topē vĩ tó ti ěn jamã tá ke ag ne tóg Topē vĩ tó ti ěn to é he tĩ,” he ja tóg nĩ, Jesus ti, hã kỹ tóg kór há ra tĩ mũ, Galiléia ra. ⁴⁵ Hã ra ag tóg, ti tỹ tá jun kỹ (ag tóg) ti mỹ vĩ há han mũ. Ti ve ja ag tóg nĩ, Jerusalém tá, festa tỹ Páscoa ěn tá, kỹ ag tóg ti tỹ tá nén hyn han ja ěn ve kãn. Hã kỹ ag tóg ti mỹ vĩ há han mũ.

⁴⁶ Kỹ Jesus tóg ěmã tỹ Caná ra tĩg măn mũ, ga tỹ Galiléia tá ěmã tỹ Caná ěn ra. Tá tóg goj tỹ vinho han ja nĩgtĩ. ěn tá cidade tỹ Cafarnaum vỹ kakó nĩ.

Cafarnaum tá pã'i mág tóg nĩgtĩ. Ti kosin vỹ kaga nỹ nĩ. ⁴⁷ Kỹ tóg mēg mũ, Jesus tỹ Judéia tá kãtĩg ja ti, ti tỹ Galiléia tá jun ja ti, pã'i mág ěn ti. Kỹ tóg ti venh

kãtĩ mũ. “Inh mré inh kósin venh kãtĩg,” he tóg mũ, Jesus mỹ. “Kaga jagy tóg nỹ, kỹ tóg inh mỹ ti ter ha mē tĩ. Ā mỹ ti tỹ há' henh ke tũ?” he tóg, pã'i mág ti Jesus mỹ. ⁴⁸ Hã ra Jesus tóg ti mỹ: “isỹ ěg tỹ nén han vãnhan han mũ ve sór ājag tóg mũ, ājag tỹ hén ri ke mũn inh ki ge jé,” he tóg, Jesus ti. ⁴⁹ Hã ra pã'i ěn tóg Jesus ti mỹ: “vó,” he mũ. “Kuri inh mré tĩg, ti ter tũ nĩ jé,” he tóg. ⁵⁰ Kỹ Jesus tóg ti mỹ: “ha Ā hã tĩg,” he mũ. “Há tóg nĩ ha, Ā kósin ti,” he tóg. Kỹ tóg Jesus vĩ tag kri fi kỹ tĩ mũ sir, pã'i ěn ti.

⁵¹ Ti tĩg kỹ tóg Ā camarada ag kato tē mũ. Tỹ vaj kỹ ke vẽ. Ti ĩn tá ag tóg kãmũ mũ, kỹ ag tóg ti mỹ: “Ā kósin tóg há' hé huri,” he mũ sir. ⁵² Kỹ tóg ag mỹ: “ti rã tỹ hē kã sa ra há' hé?” he mũ. Kỹ ag tóg ti mỹ: “rãké tá, meio dia pãte ke sĩ,” he mũ. “Ěn kã ti rỹg tóg tũ' he mũ,” he ag tóg ti mỹ. ⁵³ Hora ěn kã Jesus tóg ti mỹ: “Ā kósin vỹ há nĩ,” he ja nĩ. Kỹ tóg to jykrén há han mũ sir, pã'i ěn ti, kỹ tóg Jesus ki rã mũ, ti prũ fi ke gé, ti krē kar ag ke gé, ti camarada kar ag ke gé. ⁵⁴ Jesus vỹ ga tỹ Judéia tá kãtĩg kỹ ga tỹ Galiléia ra tĩg ja nĩ. Ěn kã tóg milagre ěn han, kỹ tóg tỹ régre nỹtĩ, ti tỹ ěg tỹ nén ù han vãnhan hyn han mũ ti.

Jesus tỹ ùn grĩn grĩn kỹ nỹ tỹ há' he

5 Tag pãte Judeu ag tỹ festa há ù tóg kejēn kutē mũ, kỹ Jesus vỹ Jerusalém ra tĩ mũ. ² Tá goj nig tóg nĩgtĩ, cidade jy ró jãnkã rã hã, jãnkã ěn jijin hã vỹ: carneiro jo jãnkã, he mũ. Goj pēnĩn tóg ĩn tỹ 5 (ke) nỹtĩ, vēnh kaga jo ĩn. Goj ěn jyjy hã vỹ: Betesda, he mũ. ³ Ěn tá vēnh kaga tỹ hén ri ke ag vỹ nỹtĩgtĩ, ùn kyvó ag, ùn tĩg vãnhan ag, ùn grĩn grĩn kỹ nỹtĩ ag ke gé. ⁴ Goj vãn vãn he mũ jãvãnhan kỹ ag tóg nỹtĩ. Kejēn Topē tỹ jēnē jafã vỹ goj ki rã kỹ tỹ vãnvãn he han mũ. Ěn kã ù tỹ kãrãn vén mũ ěn tóg há' he tĩ. Vēnh kaga kar tỹ há' he ti tĩ, goj vãnvor mũ ěn, ù tỹ ki ge vén mũ ag kar tỹ.

⁵ Ën tá ù tóg nĩgtĩ, ùn kaga ù. Kaga nĩ ki tóg 38 (ke) anos han mũ. ⁶ Kĩ Jesus tóg tá jun kĩa ti vég mũ, ti tĩ tá nĩn kĩa. Hã ra tóg ki kanhró nĩ, ti tĩ vāsĩ tá kaga nĩ ki. Kĩ tóg ti mĩ: “ã mĩ há' he sór tũ?” he mũ. ⁷ Hã ra tóg ti mĩ: “vó,” he mũ. “Hã ra tóg tũ tĩ, ù tĩ goj kākā inh fēg ke ti,” he tóg, ùn kaga ti. “Goj tĩ vān vān he kĩa ag tóg inh jo kã ra ge tĩ, ijo tá jun kĩa,” he tóg, ùn kaga si ěn ti.

⁸ Kĩ Jesus tóg ti mĩ: “jēg ra,” he mũ. “Ã cama va tĩg,” he tóg, Jesus ti, ùn kaga si ěn mĩ. ⁹ Vēsĩmér tóg há' he mũ, kĩa tóg ã cama va tĩ mũ sir. Vēnhkán ke kurā ki ke vē, Jesus tĩ ti han mũ ti.

¹⁰ Ti tĩ vēnhkán ke kurā ki ã cama va tĩg kĩa pā'i ag tóg ti mĩ: “vēnhkán ke kurā ki ěg tóg nén ù va tĩg ke tũ nĩ vē,” he mũ. “Ã tĩ nén han ke tũ han ã tóg mũ,” he ag tóg ti mĩ. ¹¹ Kĩ tóg ag mĩ: “ũ tĩ isĩ há' he mũ ěn vĩ inh mĩ: “ã cama va tĩg,” he ja nĩ, hã kĩa sóg va tĩ mũ,” he tóg. ¹² Kĩ ag tóg ti mĩ: “ũ nĩ ã mĩ: “ã cama va tĩg,” hé?” he mũ. ¹³ Hã ra tóg ki kagtĩg nĩ, ù tĩ ti tĩ há' he mũ ěn ti. Jesus vĩ ti tĩ há' he kar tĩg ja nĩ, vēsĩmér. E ag nĩtĩ, goj ěn tá, vēnh kaga ag, hã kĩa Jesus tóg ag ré kĩa tĩg ja nĩ. Kĩ ùn kaga ja ěn tóg ti jiji mē ja tũ nĩ.

¹⁴ Kar kĩa Jesus tóg ti ve măn mũ, Topē jo ĩn tá. Kĩa tóg ti mĩ: “hã vé,” he mũ. “Ã tĩ inh há' hé. Topē vĩ mranh măn sór tũg nĩ, ã tĩ ti vĩ mranh măn mũ ra ã tóg ã kaga kãfór venh ke mũ, ha vemnĩ,” he tóg ti mĩ, Jesus ti, ã tĩ ù tĩ há' he ja ěn mĩ.

¹⁵ Hã ra tóg tĩ mũ, pā'i ag mĩ Jesus ti tó jé. ¹⁶ Kĩa ag tóg ti tén sór mũ sir, ti tĩ vēnhkán ke kurā ki ùn kaga ěn tĩ há' hen kĩa. ¹⁷ Hã ra Jesus tóg pā'i ag mĩ: “inh panh vĩ rānhrāj kĩa nĩ nĩ, ěg jóg mág ti,” he mũ. “Kĩa sóg ver ti kóm isũ han ke mũ gé,” he tóg, Jesus ti, pā'i ag mĩ. ¹⁸ Kĩa ag tóg ti to jũ jagy han mũ. “Ti tén jé ěg tóg ke mũ,” he ag tóg mũ sir jagnē mĩ. Vēnhkán ke kurā ěn ki tóg ã tĩ nén

han ke tũ ěn han ja nĩ, Jesus ti, Judeu ag jykre tovānh kĩa. Hã ra tóg Topē to: “inh panh vĩ tĩ ti nĩ,” he mũ gé. Ti tĩ vēso: “Topē ri ke inh nĩ,” he vē. Hã kĩa ag tóg ti to jũ mũ, pā'i ag.

Jesus tĩ ã tĩ tĩ Topē kósĩn nĩ kāmén

¹⁹ Kĩa Jesus tóg ag mĩ vēnh kāmén mũ. “Ki hã sóg tó mũ, ha mē,” he tóg. “Ěg jóg mág kósĩn vĩ ã pir mĩ nén ù han ki kagtĩg nĩ. Ě panh vég ti tĩ, ěg jóg mág kósĩn ti, kĩa tóg ã tĩ ã panh ki nén vég mũ ěn hã han tĩ. Ěg jóg mág tĩ nén han mũ ěn hã han tóg tĩ gé, ti kósĩn ti. ²⁰ Ěg jóg mág vĩ ã kósĩn to há tãvĩ nĩgtĩ, hã kĩa tóg ti mĩ ã tĩ nén han mũ ěn ven kăn mũ. Ti tĩ nén han mũ ù ve ājag huri, hã ra ājag tóg ti kãfór venh ke mũ ver, ha vemnĩ, kĩa tóg ājag mĩ e tĩnh mũ. ²¹ Tag ve jé ājag tóg ke mũ, ha mē. Ěg jóg mág tóg ùn kãgter mũ ag rĩnrĩn măn tĩ, ag rĩnrĩn nĩtĩ jé. Ěn ri ke han jé tóg ke mũ gé, ti kósĩn ti. Ě tĩ ùn rĩn măn mũ ěn rĩn măn jé tóg ke mũ. ²² Kĩa ěg jóg mág vĩ vēnh kar jykre tugnĩm ke mũ, hã ra tóg ã kósĩn mĩ tag tovānh. ²³ Ti mĩ tóg tag tovānh, vēnh kar tĩ ti to: “ũn mág vĩ tĩ ti nĩ,” he jé, ag tĩ ěg jóg mág to: “ũn mág vĩ tĩ ti nĩ,” he mũ tag ri ke. Ě tĩ ti kósĩn mĩ: “ũn mág vĩ tĩ ã nĩ,” he jāvānh kĩa tóg ěg jóg mág mĩ tag tónh ke tũ nĩ gé. Ti hã vĩ ã kósĩn jēnē ja nĩgtĩ. Inh hã vē, ti kósĩn ti,” he tóg, Jesus ti.

²⁴ “Ājag mĩ sóg tag tó mũ, ha mē. Ki hã sóg tó mũ, ha mē. Ě tĩ inh vĩ jēmēg mũ ěn vĩ ter ke tũ nĩ, rĩr krĩg ja tũ ve jé tóg ke mũ, ti tĩ ù tĩ inh jēnēg mũ ěn ki rã kĩa jēn kĩa. Ěn to tóg jũnh ke tũ nĩ, Topē ti. Ti ter ke vē vē, hã ra tóg ter ke tũ nĩ. ²⁵ Ki hã sóg tó mũ, ha mē. Kānhmar ùn kãgter kĩa nĩtĩ ag vĩ Topē kósĩn vĩ mēnh ke mũ, kĩa ùn tĩ ti vĩ mēg mũ ag vĩ rĩnrĩr măn ke mũ. Kakó tãvĩ ti nĩ ha, ag rĩnrĩr măn ke kurā ti. ²⁶ Inh panh vĩ ã pir mĩ vēnh kar rĩnrĩr han ki kanhró nĩ, hã ra tóg inh mĩ ã jykre tag nĩm gé, sĩ vēnh

kar rīnrīr han mǎn jé gé, isy tỹ ti kósín nīn kỹ. ²⁷ Kỹ tóg inh mỹ: “ēprā ke kar jykre tugnỹm nĩ,” he ja nĩgtĩ, isy tỹ ēprā ke fi kósín nīn kỹ. ²⁸ Tag hỹn tóg ājag mỹ e tĩ, sỹ ājag mỹ: “vēnh kar rīnrīr han jé sóg ke mǔ,” hen kỹ. Sỹ ke há vē, hā ra. Kejēn ũn kǎgter mǔ kar ag vỹ inh vỹ mēnh ke mǔ, kỹ ag tóg ājag kej tá kǎpa kǎn ke mǔ. ²⁹ Kỹ ũn tỹ vēnh jykre há han mǔ ag vỹ rīnrīr mǎn kỹ rīr krỹg ja tũ ēn venh ke mǔ, jāvo ũn tỹ vēnh jykre pāno han mǔ ag rīnrīr mǎn sĩ han kỹ nũgme ki vǎr kǎn ke mǔ,” he tóg, Jesus ti.

Jesus tỹ vēnh kāmén mǔ

³⁰ Kỹ tóg ag mỹ: “inh pi(jé) isy vēsóg ki nén to jykrén mǔ ēn han tĩ,” he mǔ, Jesus ti. “Inh panh tỹ inh mỹ nén tó mǔ ēn hā tó sóg tĩ, isy vēnh kar jykre tugnỹm ken kỹ. Hā kỹ sóg ki hā tó tĩ, isy vēsóg ki to jykrén tũ nīn kỹ. Ũ tỹ inh jēnēg mǔ ēn tỹ inh mỹ nén tó mǔ ēn hā tó sóg tĩ, hā kỹ tóg há kar nĩ,” he tóg.

³¹ “Kỹ isy vēso: “ēg jóg mág vỹ inh jēnē, inh panh ti,” henh mǔ ra ājag tóg inh mỹ: “ā ón nē,” henh ke mǔ vē. ³² Ũ vỹ iso: “Topē vỹ ti jēnē,” he mǔ. Hā ra tóg ki hā tó mǔ, ũ tỹ iso tag tó mǔ ti. ³³ Kỹ ājag tóg João ki jēmē sór ja nĩ gé, hā kỹ ājag tóg ti mỹ vēnh vỹ jēnē ja nĩgtĩ. Kỹ tóg ājag mỹ inh kāmén há han ja nĩgtĩ gé. ³⁴ Hā ra tóg inh mỹ tỹ nén ũ tũ nĩ, ēprā ke tỹ iso: “Topē vỹ ti jēnē,” hen kỹ. Hā ra sóg ājag mỹ João vỹ tó mǔ, ājag tỹ ti vỹ kri fi jé, ājag tỹ inh ki ge jé, ājag krenkren jé,” he tóg, Jesus ti.

³⁵ “João vỹ ājag mỹ lampiāo gru ri ke ja nĩ, ājag mỹ kurā sĩ han kỹ, ti tỹ ājag mỹ Topē vỹ kāmén ja nīn kỹ. Kỹ tóg ājag mỹ sér tĩ ja nĩ, hā ra tóg kurā e han tũ nĩ. ³⁶ João vỹ ājag mỹ inh kāmén ja nĩ, hā ra nén ũ vỹ inh kāmén tĩ gé, kỹ tóg João vỹ kǎfór nĩ. Inh panh vỹ inh mỹ: “ēprā ke ag tỹ nén han vǎnh hyn han nĩ, milagre ti,” he ja nĩ, hā kỹ sóg hyn han tĩ. Isy milagre hyn han mǔ tag vỹ inh kāmén há han tĩ

gé. Ājag tỹ milagre tag vigven kỹ ājag tóg ki kanhrān ke mǔ vē, ēg jóg mág tỹ inh jēnē jan ki, inh panh ti. ³⁷ Kar kỹ ēg jóg mág vỹ, ũ tỹ inh jēnēg mǔ ēn vỹ inh kāmén tĩ gé. Ti vỹ jēmēg tũ ājag nỹtĩ, kỹ ājag tóg ti vēg tũ nĩ gé. ³⁸ Kỹ ājag tóg ti vỹ to jykrén há han tũ nĩ gé, ājag tỹ inh ki ge sór tũ nỹtĩn kỹ. Ti hā vỹ inh jēnē. ³⁹ Topē vỹ to ke ājag tóg tĩ. Há ti nĩ, tag ti. “Ēg tỹ Topē vỹ rá to ken kỹ ēg hỹn rīr krỹg ja tũ venh ke mǔ,” he ājag tóg tĩ. Inh hā vỹ ki rán kỹ nĩ, ha mē, hā kỹ ki ve há han nĩ, vēnh rán ki,” he tóg. ⁴⁰ “Hā ra ājag tóg inh ki ge sór tũ nĩ. Ājag tỹ inh ki ge kỹ nỹtĩ ra ājag rīnrīr kỹ nỹtĩnh mǔ vē,” he tóg, Jesus ti.

⁴¹ “Ēprā ke ag tỹ inh mỹ vỹ há han tũ ra tóg inh mỹ tỹ nén ũ tũ nĩ. ⁴² Hā ra sóg ājag jykre ki kanhró nĩ. Ājag pi(jé) Topē to há nỹtĩ. ⁴³ Ājag mỹ sóg: “ēg jóg mág vỹ inh jēnē,” henh kǎtĩg ja nĩ, hā ra ājag tóg inh vỹ mē sór tũ nỹtĩ. Ũ tóg kejēn ājag mré vēmén kǎtĩg ke mǔ, Topē tỹ ti jēnēg tũ (hā) ra. Ēn vỹ jēmē jé ājag ke mǔ, ha vemnĩ. ⁴⁴ Inh ki ge sór tũ ājag nỹtĩ, ājag tỹ ēprā ke ag vỹ jēmēn kỹ. Ēprā ke ag tỹ ājag mỹ vỹ há han kỹ tóg ājag mỹ sér tĩ. Kỹ ājag tóg Topē tỹ ājag mỹ nén tónh ke mǔ mĩ ēkrég tũ nĩgtĩ. “Inh jykre mỹ ti mỹ há nĩ vỹ?” he sór tũ ājag nĩ. ⁴⁵ Ājag hỹn iso: “ti hỹn ēg to vỹ kónān sór mǔ, ēg jóg mág mỹ,” he tĩ. Hā tũ vē. Ũ tỹ ājag to vỹ kónān ke mǔ hā vỹ tỹ Moisés nĩ, ājag tỹ ũ to: “ti hỹn ēg to há tāvĩ nĩ,” he mǔ ēn ti. ⁴⁶ Ājag tỹ Moisés vỹ kri fi (hā) ra ājag tóg inh vỹ kri nĩm ke mǔ gé vē vē. Moisés vỹ iso livro han ja nĩ, ha mē. ⁴⁷ Hā ra ājag tóg ti vỹ rá kri fi sór tũ nĩ, hā kỹ ājag tóg inh vỹ kri nĩm sór tũ nĩ gé,” he tóg, Jesus ti. Ti tỹ pǎ'i ag mỹ vēnh kāmén hā vē.

Jesus tỹ ũn e jēn

(Mt 14.13-21; Mc 6.30-44; Lc 9.10-17)

6 Tag pāte Jesus tóg kejēn ga tỹ Galiléia tá goj nig fĩn rǎm mǔ. Goj ēn jiji hā vỹ: Tiberiádes, he mǔ. ² Kỹ ũ tỹ

hên ri ke ag vỹ ti venh kāmũ mũ, ti nón, ùn e tăvĩ ag. Ti tỹ nén han vānh hyn han mũ ên ve ja ag tóg nĩ, ti tỹ ùn kagyga ag tỹ há' he mũ ti. ³Kỹ Jesus tóg pānónh tá ã mré mũ ti ag mré nĩ nĩ. ⁴Festa tỹ Páscoa ên vỹ kakó nĩ ha, Judeu ag tỹ festa han ti ên ti. ⁵Kỹ Jesus vỹ ùn e ên ki êvānh mũ, ù tỹ ti vỹ mēnh kāmũ mũ ag ki. Kỹ tóg Filipe mỹ: “êg hỹn hē tá vējēn venh ke mũ, êg tỹ ùn e tag ag mỹ ven jé?” he mũ, Jesus ti. ⁶Filipe mỹ tóg ke mũ, ti tỹ to ti jykre ve jé. Jāvo Jesus vỹ to jykren há han huri, ti tỹ nén han ke mũ ên to.

⁷Kỹ Filipe tóg ti mỹ: “êg tỹ ùn e tag ag mỹ nén ù sĩ ven jé êg hỹn jānkamy tỹ hên ri ke to comprar henh ke mũ, hã ran kākyn kenh ke mũ, ha vemnĩ,” he tóg, Filipe ti.

⁸Kỹ ag mré ti ù tóg, André he mũ ên tóg, Simão Pedro jāvy ên tóg Jesus mỹ: ⁹“kyrũ ù tóg cevada tỹ ěmĩ tỹ 5 (ke) ma kātīg ja nĩ, kākufár régre mré,” he mũ. “Hã ra tóg tỹ nén ù tũ pē nĩ, vējēn sĩ tag. E tăvĩ ag nỹti,” he tóg mũ, André ti.

¹⁰Hã ra Jesus tóg: “ag mỹ: “nĩgnĩ ra,” hé,” he mũ. Kỹ ag tóg nĩgnĩ mũ. Tá tóg re gỹnh nĩ, hã kỹ ag tóg tá nĩgnĩ kỹ nỹti. Ùn tỹ 5 mil (ke) ag hỹn tá nỹti, êg tỹ ag tăvĩ tón kỹ, hã ra fag tóg tá nỹti gé, gĩr tỹ hên ri ke ke gé. ¹¹Ag nĩgnĩ kỹ Jesus tóg ěmĩ ên mäg mũ, kỹ tóg Topē mỹ: “há ti nĩ,” he mũ. Kỹ tóg ag mỹ vēnh kápópām mũ sir, kākufár ên ke gé. Kỹ vēnh kar vỹ ag tỹ nén ko sór mũ ên ko mũ sir. Sĩ tũ tóg nĩ, vējēn ti. ¹²Ag funfór nỹtin kỹ Jesus tóg ã mré mũ ti ag mỹ: “ag tỹ ko ja tũ ên génh mũjēg, ti vāgfor tũ nĩ jé,” he mũ. ¹³Kỹ ag tóg kēj tỹ 12 (ke) fān mũ, cevada tỹ ěmĩ tỹ 5 (ke) ên ke tỹ, vēnh e ên tỹ ko kar kỹ.

¹⁴Kỹ tóg ag mỹ e ti, ag tỹ Jesus tỹ mi-lagre tag han mũ ven kỹ. Kỹ ag tóg ti to: “Topē vĩ to sĩ ên hã vē,” he mũ. “Êg tỹ ùn jāvānh mũ ên hỹn tóg,” he ag tóg, Jesus to. ¹⁵Hã ra Jesus vỹ ki kanhró nĩ, ag tỹ nén han sór mũ ti. Ag tỹ Jesus tỹ pā'i

mág tỹ rei han sór vē. Tag ki kanhró tóg nĩ, Jesus ti. Hã kỹ tóg ã pir mỹ ti mũ, pānónh ra, vēnh péju jé.

Jesus tỹ goj nig kri tĩ (Mt 1422-33; Mc 645-52)

¹⁶Kutyg ke mũ ra ti mré mũ ti ag tóg goj nig ra mũ mũ. ¹⁷Barco kāra ge kỹ ag tóg goj fin rām sór kỹ Cafarnaum ra mũ sór mũ. Kejēn tóg kuty pē nỹ ha, hã ra Jesus tóg ag to vỹn ke ja tũ nĩ ver. ¹⁸Kỹ vāhā kóho jũ vỹ kātĩ mũ, kỹ goj vỹ krém ke mũ. ¹⁹Mũ sĩ han ja ag nĩ, 5 (ke) quilômetros, hỹn, ke tũ nĩ kỹ 6 (ke) quilômetros, goj kri. Vāhā ag tóg Jesus vég mũ sir, ti tỹ goj kri tīg kỹ. Ag barco ki tóg jun mũ. Kỹ ag kanē tóg jũrũn ke mũ. ²⁰Hã ra Jesus tóg ag mỹ: “inh hã vē, mũmēg tũg nĩ,” he mũ. ²¹Kỹ tóg ag mỹ sér ti, kỹ tóg barco kāra rā mũ sir, ag mré. Ti tỹ ag mré nĩn kỹ ag tóg kānhmar junjun mũ, kafā ù tá.

Vēnh kar tỹ Jesus ve sór

²²Hã ra vēnh e ên vỹ kafā ù tá nỹti ver. Tỹ vaj kỹ ag tóg Jesus jāvānh mũ, tá. Ti jāvānh kỹ ag tóg: “barco pir vỹ kã nỹ ja nĩ, kuty kỹ,” he mũ. “Kỹ ti mré mũ ti ag vỹ barco ên kāra ge kỹ mũ ja nĩ, hã ra tóg ag mré tīg ja tũ nĩ,” he ag tóg mũ sir jagnē mỹ, ùn e ên ag. Tag tó mũ ra ag tóg Jesus vég tũ nĩ gé. ²³Kỹ barco ù tóg ki junjun mũ, cidade tỹ Tiberíades tá kāmũ ù. Vēnh e ên tá ag tóg junjun mũ. Tá Jesus vỹ ěmĩ to Topē mré vĩ ja nĩ, kar kỹ tóg vēnh e ên mỹ vēnh kápópām ja nĩ. ²⁴Barco tỹ tá junjun mũ ra ag tóg kāra ge kỹ mũ mũ sir, Cafarnaum ra, ti ve jé. “Ki ti tũ nĩ, ti mré mũ ti ag vỹ ki tũgtũ nĩ gé. Mũ nỹ, ti nón,” he ag tóg mũ sir, ùn e ag, hã kỹ ag tóg ti nón mũ mũ.

Kanhkã tá pảo

²⁵Ag tỹ Cafarnaum tá junjun kỹ ag tóg tá ti vég mũ sir, goj nig kafā ù tá, ùn e

ên ag. Kĩ ag tóg ti mĩ: “hẽ ri ken kĩ ã ki jun?” he mũ.

²⁶ Kĩ Jesus tóg ag mĩ: “ha mẽ, ki hã sóg tó mũ,” he mũ. “Ajag tĩ ẽmĩ ko ja t McGrin ajag tóg inh ve sór mũ,” he tóg. “Sĩ milagre hyn han tĩ ên vэг ajag tóg tĩ, hã ra ajag tóg to jykren há han tũ nĩgtĩ,” he tóg. “Ajag tógá nĩgtĩ tag hã ve sór ajag tóg mũ. ²⁷ Ẽg tĩ tag ki vэгjèn vэг mũ ên vĩ kanhmar tũ' henh ke mũ, kĩ tag tãvĩ to vãsãn sór tũg nĩ. Vэгjèn ù jẻ vãsãn nĩ, ẽmĩ tĩ ajag rĩnrĩr pẻ han mũ ên jẻ, ẽmĩ kórég vánh ên jẻ. Sĩ ajag mĩ ẽmĩ ên nĩm sór vẻ. Ẽg jóg tĩ Topẻ tĩ inh mĩ vẻnh rãnrhãj nĩm ja hã vẻ. Ti tĩ inh mĩ tag tó hã kĩ sóg ajag mĩ nĩm sór mũ, ẽmĩ ti. Tĩ sóg ẽprã ke fi kósin nĩ mĩr,” he tóg ag mĩ, Jesus ti.

²⁸ Kĩ ag tóg ti mĩ: “kĩ ẽg hĩn hẻ ri kenh ke mũ, ẽg tĩ Topẻ jykre han jẻ?” he mũ. ²⁹ Kĩ Jesus tóg ag mĩ: “Topẻ tĩ ùn jẻnẻg mũ ên ki gemnĩ,” he mũ. ³⁰ Kĩ ag tóg ti mĩ: “kĩ ã hĩn ne han ke mũ, ẽg tĩ ve kĩ ã ki gen jẻ?” he mũ. “Á hĩn ne han há nĩgtĩ? ³¹ Ẽg jóg'jóg ve ag vĩ kanhkã tá pảo ên kỏ, maná he mũ ên, ag tĩ ga kórég ên mĩ mũn kĩ. Ag to tag vĩ rãn kĩ nĩ, ha mẽ: “kanhkã tá tóg ag mĩ pảo jẻnẻ, ag tĩ ko jẻ,” he ja tóg nĩ, Topẻ vĩ tĩ rãn kĩ nĩ ki. Jãvo ã hĩn ẽg mĩ ne han ke mũ?” he ag tóg, Jesus mĩ, ti vĩ kãfãn kĩ.

³² Kĩ Jesus tóg ag mĩ: “Moisẻs pi(jẻ) ajag mĩ kanhkã tá pảo pẻ nĩm ja nĩ,” he mũ. “Kĩ hã sóg tó mũ, ha mẽ,” he tóg. “Ủ tĩ ajag mĩ kanhkã tá pảo pẻ nĩm mũ ên vĩ tĩ inh panh nĩ. ³³ Topẻ jamĩ vĩ kanhkã tá kãtẻre mũ. Ên vĩ ẽprã ke kar rĩnrĩr han mũ,” he tóg, Jesus ti.

³⁴ Kĩ ag tóg ti mĩ: “ẽg mĩ ẽmĩ ên nĩm, kurã kar ki,” he mũ. ³⁵ Kĩ Jesus tóg ag mĩ vẻnh kãmẻn mũ sir. “Inh hã vĩ tĩ ẽmĩ ên ri ke nĩ, inh hã vĩ ajag rĩnrĩr han ke mũ,” he tóg. “Ẽg tĩ vэгjèn ko mũ ra ẽg tóg kanhmar kỏkĩr mãn' he tĩ, goj kron mãn sór ẽg tĩ gẻ. Ủ tĩ iso kãtĩg mũ ên

mĩ tóg hã ra sẻr tĩnh mũ, ti tĩ inh ki rã kĩ. Ti mĩ sẻr tĩ ên vĩ tũg' henh ke tũ pẻ nĩ. Isĩ ti mĩ vẻnh jykre nĩm ke mũ ên vĩ vэгjèn kãfỏr nĩ,” he tóg, Jesus ti.

³⁶ “Hã ra ajag tóg ajag tĩ inh vэг mũ ra inh ki ge sór tũ nĩ. ³⁷ Inh panh vĩ ù ag kuprẻg mũ, ag tĩ tĩ isũ nĩgtĩ jẻ. Ên ag vĩ iso kãmũ tĩ. Ủ tĩ iso kãmũ tĩ kar ag vĩ inh mĩ há nĩgtĩ. Inh pi(jẻ) ù mĩ: “inh mrẻ kãtĩ tũg,” henh ke mũ'. ³⁸ Kanhkã tá sóg kãtẻre ja nĩ. Inh pi(jẻ) isĩ vẻsẻg ki nẻn to jykren mũ ên han sór mũ'. Ủ tĩ inh jẻnẻg mũ tĩ inh mĩ nẻn tó mũ ên hã han sóg tĩ, hã jẻ sóg tá kãtẻre ja nĩ. ³⁹ Ti tĩ inh mĩ nẻn tó mũn hã vẻ, ha mẽ. “Isĩ ã mĩ ùn jẻnẻnh ke mũ ên ki rĩr há han nĩ, ag vãgfor tũ nĩ jẻ,” he ja tóg nĩ, inh mĩ, inh panh ti. Hã kĩ sóg ke mũ. Kĩ sóg ag rĩnrĩn mãn ke mũ, kurã tĩ ẽgno ki. ⁴⁰ Hĩ, tag vĩ inh panh mĩ há nĩ. Ủ tĩ ti kósin to kãmũ mũ ên mĩ tóg rĩr krẻg ja tũ ven ke mũ, inh panh ti, ù tĩ inh ki ge kĩ nĩgtĩ ag kar mĩ. Kĩ sóg kurã tĩ ẽgno ki ag rĩnrĩn mãn kãn ke mũ, ha vemnĩ,” he tóg, Jesus ti. Ti tĩ Judeu ag mĩ vẻnh kãmẻn hã vẻ.

Ẽg tĩ Jesus nĩ konh ke

⁴¹ Kĩ Judeu ag tóg Jesus kato vĩ mũ, ti vĩ to, ti tĩ ag mĩ: “ẽmĩ tĩ kanhkã tá kãtẻre mũ ên ri ke inh nĩ,” hen kĩ. ⁴² “Ti ki kanhrỏ ẽg nĩgtĩ,” he ag tóg mũ. “Josẻ kósin vẻ, Jesus tag ti. Ti han mũ fag ki kanhrỏ ẽg nĩgtĩ. Hã ra tóg vẻso: “kanhkã tá sóg kãtẻre,” he sór mũ,” he ag tóg mũ, Jesus to.

⁴³ Hã ra tóg ag mĩ: “iso vĩ kỏnãn tũg nĩ, jagnẻ mĩ,” he mũ. ⁴⁴ “Inh panh tĩ ùn krĩn mũ ag hã vĩ iso kãmũnh mũ. Ủ tĩ iso kãmũ mũ ag rĩnrĩn mãn jẻ sóg ke mũ, kurã tĩ ẽgno ki. ⁴⁵ Topẻ vĩ tó tĩ ù vĩ tag rãn ja nĩ, ha mẽ: “Topẻ vĩ vẻnh kar kanhrãn ke mũ,” he ja ti nĩ. Hã kĩ ù tĩ inh panh vĩ mẻg mũ ag hã tóg iso kãmũnh ke mũ, inh panh tĩ ùn kanhrãn mũ ag. ⁴⁶ Ẽprã ke ù pi(jẻ) inh panh ve ja

nĩ. Û tỹ Topẽ tá kãtĩ mũ ên hã vỹ ti ve ja nĩ, inh,” he tóg, Jesus ti.

⁴⁷ “Sỹ ãjag mỹ ki hã tó mũn hã vẽ. Û tỹ inh ki rã mũ ên vỹ rĩr krỹg ja tũ ên venh ke mũ. ⁴⁸ Inh hã vỹ ãmĩ pẽ ri ke nĩ, inh hã vỹ ãjag rĩnrĩr han ke mũ. ⁴⁹ ãjag jóg'jóg ve ag vỹ, ag tỹ ga kórég mĩ mũn kỹ ag tóg kanhkã tá ãmĩ ên ko ja nĩgtĩ, maná he mũ ên, ag tỹ ko mũ (hã) ra ag tóg kãgter kãn. ⁵⁰ Û tỹ ãmĩ tỹ ãg rĩnrĩr han mũ ên ko kỹ, ù tỹ kanhkã tá kãtére ja ên ki rã kỹ tóg ter ke tũ pẽ nĩ. ⁵¹ ãmĩ ên hã vỹ tỹ inh nĩ, inh hã vỹ kanhkã tá kãtére, inh hã vỹ ãjag rĩnrĩr han ke mũ. ãjag tỹ ãmĩ tag ko kỹ ãjag ter ke tũ pẽ nĩ. Isỹ vãnh kar mỹ vễjên nĩm ke hã vẽ, hã vỹ: inh nĩ, he mũ. ãjag tỹ inh nĩ kon kỹ ãjag rĩnrĩr nỹtĩnh mũ,” he tóg, Jesus ti.

⁵² Kỹ Judeu ag vỹ jagnẽ mỹ: “ti mỹ ãg mỹ ã nĩ nĩm ke mũ, ãg tỹ ti nĩ ko jé?” he mũ. “Vẽnhmỹ ti nĩ, tag,” he ag tóg mũ.

⁵³ Kỹ Jesus tóg ag mỹ: “isỹ ãjag mỹ ke há vẽ,” he mũ. “ãjag tỹ inh nĩ ko sór tũ nĩn kỹ, ãjag tỹ inh kyvénh kron sór tũ nĩn kỹ, ãjag rĩnrĩr ke tũ pẽ nĩ. Tỹ sóg ãprã ke fi kósĩn nĩ,” he tóg, Jesus ti. ⁵⁴ “Û tỹ inh nĩ ko kỹ, ù tỹ inh kyvénh kron kỹ tóg rĩr krỹg ja tũ venh ke mũ, kỹ sóg ti rĩn mãn ke mũ, kurã tỹ ãgno ki. ⁵⁵ Inh nĩ vỹ tỹ vễjên pẽ nĩ, inh kyvénh vỹ tỹ ãg tỹ kron jafã pẽ nĩ gé. ⁵⁶ Û tỹ inh nĩ kon kỹ, ti tỹ inh kyvénh kron kỹ tóg inh ki rã kỹ jẽ nĩ, kỹ sóg ti kãki nĩ gé. Jagnẽ mré ke vỹ tỹ ãg nỹtĩ. ⁵⁷ Inh panh vỹ rĩr nĩ. Ti hã vỹ inh jẽnẽ, ti tugrĩn sóg rĩr jẽ. Kỹ ù tỹ inh ki rã mũ ên vỹ isugnĩn rĩr ke mũ gé. ⁵⁸ ãmĩ tỹ kanhkã tá kãtére jan hã vẽ. ãjag jóg'jóg ve ag tỹ ãmĩ ko ja ên ri ke tũ ti nĩ. Ag hã vỹ ãjag tỹ ko mũ ra kãgter kãn ja nĩgtĩ. Û tỹ ãmĩ pẽ tag ko kỹ tóg ter mãn ke tũ nĩ. Inh ki rã to ken hã vẽ,” he tóg, Jesus ti.

⁵⁹ Cafarnaum tá tóg ag kanhrãn mũ, kỹ tóg ag mỹ vãnh kãmén kãn mũ, Jesus ti, ag tỹ vãnh kanhrãn jafã ên krêm.

Û tỹ ón kỹ Jesus mré mũ tĩ ag tỹ ti továnh

⁶⁰ Kỹ tóg ti mré mũ tĩ ù ag mỹ e tĩ, ti vĩ ti. Kỹ ag tóg: “ti vĩ vỹ ãg mỹ mẽ jagy tĩ,” he mũ. “Mẽ jãvánh ãg tóg nỹtĩ, ti tỹ ùri ãg mỹ nẽn tó mũ tag ti,” he ag tóg mũ.

⁶¹ Hã ra Jesus tóg ki kanhró nĩ, ag tỹ ti vĩ tag to vĩ kónãn mũ ti. Hã kỹ tóg ag mỹ: “tag mỹ ãjag mỹ há tũ nĩ?” he mũ. ⁶² “Kỹ ãjag hỹn hẽ ri kenh ke mũ, ãjag tỹ hẽn ri ke mũn isỹ kanhkã ra tĩg mãn ven kỹ, isỹ hẽ tá kãtére ja ên ra tĩg mãn kỹ, isỹ tỹ ãprã ke fi kósĩn nĩn kỹ?” he tóg. ⁶³ “Û tỹ ãg rĩnrĩr han mũ vỹ tỹ Topẽ kuprĩg ti nĩ. Isỹ ãjag mỹ inh nĩ ko mũ tag to ken hã vẽ, hã vỹ: inh ki rã, he mũ. Inh vĩ tag ki króm tugrĩn ãjag rĩnrĩr nỹtĩnh ke mũ.

⁶⁴ Hã ra ãjag tóg inh vĩ kri fi sór tũ nỹtĩ,” he tóg, Jesus ti. Ag jykre ki kanhró tóg nĩ, vėsóg ki, Jesus ti, hã kỹ tóg ke mũ. Û tỹ ón kỹ ã ki ge mũ ên ki kanhró tóg nĩ. Kỹ tóg ù tỹ pã'i ag mỹ ti tónh ke mũ ên ki kanhró nĩ gé. ⁶⁵ Kỹ tóg ag mỹ: “hã kỹ sóg ãjag mỹ: “inh panh tỹ ùn krĩn mũ ag hã vỹ iso kãmũnh ke mũ,” he ja nĩ,” he mũ, Jesus ti.

⁶⁶ Jesus vĩ tag tugrĩn ti mré mũ tĩ ù ag tóg ti továnh mũ sir, ti mré ag mũ mãn tũ nĩ. ⁶⁷ Kỹ Jesus tóg ù tỹ 12 (ke) ag mỹ: “ãjag hỹn isovánh sór mũ gé,” he mũ.

⁶⁸ Kỹ Simão Pedro tóg ti mỹ: “ãg tỹ ã továnh mũ ra ãg hỹn ù mré mũnh ke mũ?” he mũ. “ã hã vỹ ãg mỹ Topẽ vĩ tó tĩ, kỹ ãg tóg rĩr krỹg ja tũ vãnh ke mũ, ãg tỹ ã vĩ kri fi kỹ. ⁶⁹ ã ki ãg ge kỹ nỹtĩ, kỹ ãg tóg ã ki kanhró nỹtĩ. Cristo vỹ tỹ ã nĩ, Topẽ vỹ ãg mỹ ã jẽnẽ,” he tóg, Pedro ti, Jesus mỹ.

⁷⁰ Kỹ Jesus tóg ù tỹ 12 (ke) ag mỹ: “ãjag kuprẽg inh,” he mũ, “hã kỹ ãjag tóg tỹ ù tỹ 12 (ke) nỹtĩ,” he tóg. “Hã ra ãjag kãmĩ ùn pĩr vỹ tỹ Japo tũ nĩ jãvo,” he tóg, Jesus ti. ⁷¹ Ti tỹ Judas ên tó vẽ, Simão Iscariotes kósĩn ên. Ên vỹ kejẽn Jesus továnh kỹ pã'i ag mỹ ti ven, ag tỹ

ti se jé. Û tỹ 12 (ke) ag kã ù ja vē, Judas ti. Hã ra Jesus tóg ti tỹ nén han ke mũ ên ki kanhró ja nĩ.

7 Tag pãte Jesus tóg ga tỹ Galiléia mĩ tĩ mũ. Ga tỹ Judéia ra tĩg sór tũ ti nĩ ver, ag tỹ Judéia tá ti tén sór nỹtĩn kỹ, Judeu ag pã'i ag. ²Kejẽn tóg Judeu ag tỹ festa há ù tá krỹg mũ. Festa ên kurã ki ag tóg pãjó krēm nỹtĩ, Jerusalém tá. ³Kỹ Jesus jãvy ag tóg ti mỹ: “ga tỹ Judéia ra tĩg nĩ, Jerusalém ra,” he mũ. “Ã tỹ tag hã ki milagre hyn han kỹ tá ã mré ke ag tóg vég tũ nĩgtĩ, hã kỹ cidade mág ra tĩg nĩ. ⁴Vẽn kar tỹ ěg jykre ve jé ěg tóg vẽn kar rĩnve ěg tỹ nén han ke mũ ên han tĩ. Hã ra ã tóg ag vatánh tá milagre ti hyn han tĩ. Ag rĩnve han nĩ, ã tỹ nén han ke ti,” he ag tóg mũ, Jesus mỹ, ti jãvy ag. ⁵Ag pi(jé) ti ki ge kỹ nỹtĩ, ti jãvy ag, hã kỹ ag tóg ti to é he mũ.

⁶Hã ra Jesus tóg ag mỹ: “inh kurã vỹ jun ja tũ nĩ ver, hã kỹ sóg tĩg sór tũ nĩ ver,” he mũ. “Ãjag hỹn kurã tũ nỹtĩ, kurã kar hỹn ãjag mỹ há nỹtĩ, hã ra sóg kurã nĩ. ⁷Û tỹ iso jũ mũ ag pi(jé) ãjag to kórég nỹtĩ, hã ra ag tóg iso kórég nỹtĩ, isỹ ag mỹ: “ãjag jykre vỹ kórég pẽ nĩ,” hen kỹ. ⁸Ha festa venh mũjẽg inhhã. Inh pi(jé) tĩg sór mũ, ver'. Inh kurã vỹ jun ja tũ nĩ ver,” he tóg, Jesus ti, ã jãvy ag mỹ. ⁹Tag tó kar kỹ tóg ver ga tỹ Galiléia mĩ tĩ mũ.

Jesus tỹ festa venh tĩ

¹⁰Ti jãvy ag mũ kar kỹ kejẽn Jesus tóg tĩ mũ gé, Jerusalém ra, festa ên ve jé. Hã ra tóg vẽn kar vatánh tá tĩ mũ, vẽnh péju kỹ. ¹¹Kỹ Judeu ag tóg festa ki ti jãvãnh mũ. Jagnẽ mỹ ag tóg: “ti hẽ kã nĩ?” he mũ. ¹²Vẽn kar vỹ ti to vỹ mũ. Û ag tóg ti to: “ũn há vỹ tỹ ti nĩ,” he mũ. Jãvo ù ag tóg: “vó, ěg mỹ tóg ón tĩ,” he mũ gé. ¹³Hã ra ag tóg jamã hár(a) ti to vēmén tũ nĩgtĩ, pã'i ag kamẽg kỹ.

¹⁴Festa kũju ki Jesus kejẽn Topẽ jo ãn ra tĩ mũ, ag kanhrãn jé. ¹⁵Kỹ ti vỹ tóg vẽn kar mỹ e tĩ. “Estudo mág han ja tũ

ti nĩ, hã ra tóg ki kanhró pẽ nĩ,” he ag tóg mũ ti to, pã'i ag.

¹⁶Kỹ Jesus tóg ag mỹ: “isỹ ãjag mỹ Topẽ vỹ tó vē,” he mũ. “Inh jykre pijé'. Û tỹ inh jẽnẽg mũ ên jykre hã vē,” he tóg. ¹⁷“Û tỹ Topẽ vỹ ki króm sór mũ ag vỹ ki kanhró nỹtĩnh mũ, sỹ ãjag mỹ ti jykre tó mũ tag ti ki. Isỹ vėsóg ki sỹ nén tónh ke to jykrén mũ pijé,” he tóg. ¹⁸“Û tỹ ã tỹ vėsóg ki nén to jykrén mũ ên tó kỹ tóg tỹ ùn mág nĩ sór mũ. Hã ra sóg ù tỹ inh jẽnẽg mũ ên to: “ũn mág vỹ tỹ ti nĩ,” he mũ. Hã kỹ ãjag tóg ki kanhró nỹtĩ, isỹ ki hã tó mũn ki. Inh pi(jé) vẽn jykre vẽnhmỹ tó tĩ'. ¹⁹Moisés vỹ ãjag jyvẽn ja nĩgtĩ. Topẽ jykre to. ãjag tỹ ne jé ti vỹ han tũ nĩ nẽ? Isỹ ti vỹ ki króm mũ ra ãjag tóg isén sór mũ,” he tóg, Jesus ti.

²⁰Kỹ ùn e ên ag tóg ti mỹ: “krĩ vẽnhmỹ ã tóg nĩ.” he mũ. “Ã tén sór tũ ěg nỹtĩ,” he ag tóg mũ, Jesus mỹ.

²¹Hã ra Jesus tóg ag mỹ: “milagre pir han ja inh nĩ, vẽnhkán ke kurã ên ki, kỹ tóg ãjag mỹ e tĩ,” he mũ. ²²“Vẽnhkán ke kurã ki ãjag tóg gĩr ag gré junun fár kym tĩ gé, Moisés tỹ ãjag mỹ: “ti mur pãte kurã tỹ 8 (ke) ki ti kym nĩ,” he ja nĩ ên kỹ. Hã ra ù tỹ ã krẽ fár kym vén pi(jé) tỹ Moisés nĩ ja nĩ'. Ti jo ke ù ja vē, ù tỹ kym vén ja ti. ²³Ãjag tỹ Moisés vỹ ki króm jé ãjag tóg vẽnhkán ke kurã ki gĩr fár kym tĩ. Hã ra ãjag tóg iso jũ sór mũ, isỹ vẽnhkán ke kurã ki ùn kaga pir tỹ há' hen kỹ. ²⁴Ón kỹ ãjag tóg iso jũ sór mũ. Inh jykre vỹ ãjag mỹ kórég nĩ ve nĩ. ãjag tỹ to jykrén há han mũ ra ãjag tóg inh jykre há nĩ venh mũ vē,” he tóg, Jesus ti.

Ag tỹ Jesus to: “ti mỹ tỹ Cristo nĩ vỹ?” he

²⁵Kỹ Jerusalém tá ke ag tóg Jesus to: “ti tén sór ja ag tóg nĩ,” he mũ. ²⁶“Hã ra tóg jatun mỹ vẽn kar mré vēmén jẽ nĩ. Ti mỹ ag tóg vỹ tũ nĩ, pã'i ag. Ag mỹ hẽn ri ke mũn ti to: “Cristo vỹ tỹ ti nĩ, Topẽ

tỹ ùn jēnēg mũ vỹ tỹ ti nĩ,” he mũ vỹ, ēg pã'i ag?” he ag tóg mũ, Jesus to. ²⁷ “Hã ra ēg tóg ti tỹ hēn tá kãtĩ mũ ki kanhró nỹtĩ. Cristo ēn kãtĩg kỹ ēg tóg ti tỹ hēn tá kãtĩg mũ ki kagtĩg nỹtĩnh mũ, kỹ ti hỹn tỹ Cristo tũ nĩ,” he ag tóg mũ, Jesus to.

²⁸ Hã ra Jesus tóg Topē jo ìn tá jē nĩ, vēnh kar kanhrān kỹ. Kỹ tóg jamā hár(a) ag kanhrān mũ. “Ti ki kanhró ēg nỹtĩ, he ājag tóg ti iso, ón kỹ,” he tóg. “Ti tỹ hēn tá kãtĩ mũ ki kanhró ēg tóg nỹtĩ gé, he ājag tóg tĩ, ón kỹ. Ình pi(jé) vēsóg ki: ình hỹn tĩg mũ, hé'. Ũ tỹ ình jēnēg mũ ēn vỹ ki hã tó ti. Hã ra ājag tóg ti ki kagtĩg nỹtĩ, ũ tỹ ình jēnēg mũ ēn ti ki. ²⁹ Ình hã vỹ ti ki kanhró nĩ. Ti hã tá sóg kãtére, ājag ve jé, ti tỹ ình mỹ: “ha ag venh tĩg,” hen kỹ,” he tóg, Jesus ti.

³⁰ Kỹ ag tóg ti se sór mũ, hã ra ag tóg ti vóg tũ pē nĩ ver. Ti ter ke kurā vỹ jun ja tũ nĩ ver, hã kỹ ag tóg ag tỹ ti se sór mũ ra ti ség tũ nĩ. ³¹ Ag jāvo ùn e ag tóg Jesus ki ge mũ. Ti to ag tóg: “ēg mỹ tóg tỹ Cristo nĩ ve nĩ,” he mũ. “Cristo kãtĩg kỹ ti nēji milagre hyn han ke mũ. Jesus tỹ milagre hyn han vỹ e nỹtĩ. Ēg mỹ tóg tỹ Cristo nĩ,” he ag tóg, Jesus to. Tag tó kỹ ag tóg ti ki ge mũ.

Pã'i ag tỹ Jesus se sór

³² Kỹ Fariseu ag tóg mēg mũ, ùn e ag tỹ Jesus to nēn (ũ) tó mũ ti. Kỹ ag tóg Topē tũ ki rĩr tĩ to pã'i ag mré vēmén mũ, ag tỹ Jesus senh ke to. Kỹ ag tóg polícia ag jēnēg mũ, ag tỹ ti se jé. ³³ Hã ra Jesus tóg: “ājag mré sóg nĩ sĩ han ke mũ ver,” he mũ. “Tag pãte sóg tĩg ke mũ, isỹ ũ tỹ ình jēnēg mũ ēn ve jé. ³⁴ Ēn kã tóg ājag tỹ ình venh há tĩnh mũ, hã ra ājag tóg ình venh ke tũ nĩ. Ēn tá junjun ke tũ ājag tóg nĩ, isỹ hēn ra tĩg ke ēn tá,” he tóg.

³⁵ Kỹ Judeu ag tóg jagnē mỹ: “ti hỹn hē ra tĩg sór mũ?” he mũ. “Ēg hỹn hē tá ti venh ke tũ nĩ? Ti hỹn hēn ri ke mũn ga tỹ Grécia ra tĩg sór mũ, tá ēg mré ke

ag kanhrān jé. ³⁶ Ne to ke nē, hỹn, hã vỹ: “ājag tỹ ình venh há tóg tĩnh mũ, hã ra ājag tóg ình venh ke tũ nĩ, he mũ tag ti?” he ag tóg, Judeu ag. Jesus vỹ vỹ ag mỹ e tĩ, hã kỹ ag tóg ki kagtĩg nỹtĩ, ti tỹ nēn tó mũn ki.

Topē kuprĩg tỹ goj ri ke nĩ

³⁷ Vāhā tóg festa tỹ kurā tỹ ēgno tá krỹg mũ. Festa to kurā mág pē vē, kurā tỹ ēgno ēn ti, hã kỹ ag e tāvi nỹtĩ, Jerusalém tá. Kurā ēn kã Jesus tóg jē kỹ vēnh kar mỹ prēr mũ sir. “!..Ājag tỹ goj kron sór kỹ ình mỹ to vỹ, isỹ ājag mỹ goj há ven jé..!” he tóg, prēr kỹ. ³⁸ “!..Topē vỹ ki tag vỹ rán kỹ nĩ, ha mē: !..Ājag tỹ ình ki ge kỹ tóg ājag kãki goj ror han ke mũ, isỹ ājag mỹ goj nĩm ke ti..!” he tóg. “!..Kỹ goj tag vỹ ājag rĩnrĩr pē han ke mo..!” he tóg, Jesus ti. Ti tỹ ag mỹ prēr jan hã vē. ³⁹ Jesus tỹ ag mỹ Topē kuprĩg tón hã vē, hã to tóg: goj, he mũ. Topē kuprĩg tỹ tóg ag jagrēn ke mũ, ũ tỹ ti ki ge mũ ag. Festa ēn kã tóg ag mỹ ti jēnē ja tũ nĩ ver, Topē kuprĩg ti, ti tỹ ver ā ter kar kỹ rĩr mǎn ja tũ nĩn kỹ, ti tỹ ā panh ra tĩg mǎn ja tũ nĩn kỹ ver.

Ag tỹ Jesus ki kagtĩg

⁴⁰ Kỹ Jesus vỹ mēg mũ ũ ag tóg ti to: “Topē vỹ tó tĩ pē ēn vē,” he mũ. ⁴¹ Kỹ ũ ag tóg ti to: “Cristo vỹ tỹ ti nĩ, Topē tỹ ēg mỹ ùn jēnēg mũ ēn vỹ tỹ ti nĩ,” he tĩ gé. Hã ra ũ ag tóg: “Cristo mỹ hỹn ga tỹ Galiléia tá kãtĩ mũ vỹ?” he mũ. ⁴² “Topē vỹ rá ki tóg: “Davi kósĩn vỹ tỹ ti nĩ, Cristo ti,” he mũ, “ēmā tỹ Belém tá ke vỹ tỹ ti nĩ, Davi jamā ēn tá ke,” he tóg, Topē vỹ tỹ rán kỹ nĩ ki. Hã kỹ tóg ēg mỹ tỹ Cristo tũ nĩ, Jesus ti, ti tỹ tỹ Galiléia tá ke nĩn kỹ,” he ag tóg. ⁴³ Hã kỹ ag tóg vēnh kãpām kỹ nỹtĩ, ti tugnĩn. ⁴⁴ Kỹ ag kãmĩ ũ ag vỹ ti se sór mũ, hã ra ag tóg ti kãgmĩg tũ nĩgtĩ, ti kamēg kỹ.

Pã'i ag tỹ Jesus ki ge sór tũ

⁴⁵ Kĩ polícia ag tóg Topê tũ ki rĩr tĩ to pã'i ag to vỹnvỹn ke mũ, Fariseu ag to ke gé, ù tỹ ag jěgně ja ag to. Kĩ ag tóg ag mỹ: “hỹn, ti?” he mũ. ⁴⁶ Kĩ ag tóg: “hã ra tóg vĩ há tãvĩ han mũ,” he mũ. “Věnh vĩ tỹ ge mẽ ja tũ ěg nỹtĩ, hã kỹ ěg tóg ti kãgmĩ ja tũ nĩ,” he ag tóg mũ, polícia ag. ⁴⁷ Kĩ Fariseu ag tóg ag mỹ: “kỹ ajag mỹ ti vĩ kri nĩm sór mũ, ti ón mũ ra?” he mũ. ⁴⁸ “Pã'ĩ ù mỹ ti vĩ kri fig mũ? Vó, ke tũ ěg nỹtĩ. Fariseu ù tỹ ti vĩ kri nĩm tũ nĩ gé. ⁴⁹ Hã ra ag tóg ki kagtĩg nỹtĩ, ù tỹ ti vĩ kri fig mũ ag. Topê vĩ rãn ki kagtĩg ag nỹtĩ, kỹ Topê vỹ ag mỹ vĩ kónãn ke mũ, ha vemnĩ,” he ag tóg mũ, Fariseu ag.

⁵⁰ Hã ra Nicodemos vỹ ag mré nĩ gé, ù tỹ kuty tá Jesus mré vēmén ja ěn ti. Ěn tóg ag mỹ: ⁵¹ “ěg tỹ ti vóg kónãn sór kỹ ěg tóg ti ki jēmě vén ke mũ,” he mũ. “Tĩ tỹ nén han ja to jykrén há han jé ěg tóg ke mũ, ěg tỹ kar kỹ ti vóg kónãn jé. Topê tỹ ěg mỹ věnh jykre nĩm jan hã vē,” he tóg, Nicodemos ti.

⁵²⁻⁵³ Hã ra ag tóg ti mỹ: “ã hỹn tỹ Galiléia tá ke nĩ gé', hã kỹ ã tóg ti jy nĩgãn sór mũ,” he mũ. “Topê vĩ ki ve há han nĩ, kỹ ã tóg venh ke mũ. Galiléia tá ke ù vỹ Topê vĩ tónh ke tũ pẽ nĩ, Topê vỹ tá ke ù jěněnh ke tũ pẽ nĩ,” he ag tóg, Nicodemos mỹ. Kĩ ag tóg ajag jamã ra mũ mũ sir, pã'i kar ag.

Jesus tỹ ùn tỹtá kórég fi mỹ věnh pãte fón

8 Hã ra Jesus tóg pãnónh tỹ Oliveiras ra tĩ mũ, tá nũr jé. ² Kurã ke ra tóg Jerusalém ra tĩg mãn kỹ (tóg) Topê jo ĩn tá nĩ mãn mũ sir, kỹ věnh kar ag tóg ti vĩ měnh kãmũ mũ. Tá nĩ kỹ tóg ag kanhrãn mũ. ³ Kĩ Topê vĩ to professor ag vỹ ùn tỹtá fi pére kãmũ mũ, Fariseu ag ke gé. Ùn tỹtá ěn fi ve ja ag tóg nĩ, fi tỹ fi mén tũ mré nỹn kỹ. Věnh kuju kã ag tóg fi fěg mũ. ⁴ Kĩ ag tóg Jesus mỹ: “Senhor,” he

mũ. “Fi ve ěg tóg, fi tỹ fi mén tũ mré nỹn kỹ,” he ag tóg, Jesus mỹ. ⁵ “Moisés vỹ ěg mỹ: “ajag kãmĩ ù fi tỹ fi mén tũ mré nỹn kỹ fi tén nĩ, pó tỹ fi pin kỹ,” he ja nĩ. Jo ã hỹn hẽ ri ke ti?” he ag tóg, Jesus mỹ. ⁶ Ag tỹ ón kỹ ti vĩ mẽ sór vē, ag tỹ ti vĩ to ti se jé. Hã ra Jesus tóg pãnh ke kỹ nĩ kỹ ga kri rãn mũ, ã nĩgé tỹ. Vĩ tũ tóg nĩ.

⁷ Hã ra ag tóg ti tovãnh sór tũ nĩ. Kỹ tóg vãhã ag ki ěvãnh kỹ ag mỹ: “ajag kãmĩ ù hỹn Topê vĩ mranh ja tũ nĩ ver,” he mũ. “Ěn hỹn fi pin vén ke mũ, pó tỹ,” he tóg mũ. ⁸ Kĩ tóg pãnh ke mãn kỹ ga kri rãn mãn mũ.

⁹ Kỹ ti vĩ tóg ag mỹ e tĩ. Ag kar vỹ ajag tỹ Topê vĩ mranh ja ěn mĩ ěkrég mũ sir, hã kỹ ag tóg mũ mũ sir. Ùn si há ag vỹ mũ vén mũ, kar kỹ věnh kar ag. Koměr hã ag tóg mũ kãn mũ. Vãhã Jesus vỹ ã pir mỹ nĩ, fi mré. Fi hã vỹ tá jě nĩ, ti mré. ¹⁰ Kĩ tóg fi ki ěvãnh kỹ fi mỹ: “ag hẽ ra kagáv, ù tỹ ã kato vĩ mũ ag?” he mũ. “Ag mỹ ã vóg kónãn tũ?” he tóg. Ag mũ kar kỹ tóg fi mỹ ke mũ.

¹¹ Hã ra fi tóg ti mỹ: “hỹ,” he mũ. Kỹ tóg fi mỹ: “kỹ inh hỹn ã vóg kónãn ke tũ nĩ gé,” he mũ. “Ha tĩg, jatun mỹ. Hã ra Topê vĩ mranh mãn sór tũg nĩ,” he tóg, Jesus ti. Ùn tỹtá kórég ěn fi vóg kónãn sór ja tũ ti nĩ, Jesus ti.

Jesus tỹ jěngrě ri ke nĩ

¹² Kĩ Jesus tóg Topê jo ĩn krēm nĩ kỹ věnh kar kanhrãn mãn mũ. “Jěngrě ri ke inh nĩ,” he tóg. “Ajag tỹ inh mré mũn kỹ ajag tóg kuty mĩ mũ tũ nĩgtĩ. Jěngrě mĩ ajag tóg mũgtĩ, kurã mĩ. Ajag tỹ věnh jykre tãg han ke to ken hã vē,” he tóg.

¹³ Hã ra Fariseu ag tóg ti vĩ kafãn mũ, kỹ ag tóg ti mỹ: “věnh kãmén ã tóg mũ ha,” he mũ. “Ěg tỹ věnh kãmén kỹ ěg tóg ón kỹ vĩ tĩ,” he ag tóg mũ sir. ¹⁴ Hã ra Jesus tóg ag mỹ: “hỹ,” he mũ. “Věnh kãmén inh tĩ, hã ra sóg ki hã tó tĩ,” he tóg mũ. “Isỹ hẽ tá kãtĩg mũ ěn ki kanhró inh nĩ, isỹ hẽ ra tĩg ke mũ ti ke gé,” he tóg.

“Hã ra ājag tóg inh ki kagtīg nýtī, isy hē tá kătīg mūn ki, isy hē ra tīg ken ki ke gé. Ēprā ke ājag nýtī. ¹⁵ Kānhmar ājag tóg ũ to: “jykre kórég ti nī,” hēnh ke mū. Ājag jāvo sóg vēnh kar jykre to nén ũ tó tū nī ver. ¹⁶ Isy hã ra ũ jykre to nén ũ tó sór mū ra sóg tó há han ke mū vē. Inh pi(jé) inh pir mý nén ũ to jykrén tī. Ũ tỹ inh jēnēg mū vỹ inh mré nén ũ kar to jykrén tī. ¹⁷ Kỹ ũn rēgre ag tỹ vēnh vỹ pir han kỹ tóg ājag mý tỹ ki hã ke nī. Hã kỹ tóg rán kỹ nī, Topē vỹ tỹ rán kỹ nī ki. ¹⁸ Hã kỹ sóg vēnh kāmén mū, hã ra inh panh tóg, ũ tỹ inh jēnēg mū tóg inh kāmén mū gé. Rēgre ēg nýtī, ũ tỹ inh kāmén mū ti,” he tóg, Jesus ti.

¹⁹ Kỹ ag tóg ti mý: “hỹn, ā panh ti?” he mū. Kỹ Jesus tóg ag mý: “ājag pi(jé) inh ki kanhró nýtī,” he mū. “Hã kỹ ājag tóg inh panh ki kagtīg nýtī gé,” he tóg. “Ājag tỹ inh ki kanhró nýtī ra ājag tóg inh panh ki kanhró nýtīnh mū vē gé,” he tóg, Jesus ti. ²⁰ Tĩ tỹ ag mý vēnh kāmén hã vē. Topē jo ĩn krēm nī kỹ tóg ag mý vēnh kāmén mū, ti tỹ jānkamy vin jafā rā hã nīn kỹ. Kỹ pā'i ag tóg ti se sór mū, hã ra ag tóg ti kǎgmīg tū nīgītī, ag tỹ ti kamēg kỹ. Tĩ ter ke kurā vỹ jun ja tū nī ver, hã kỹ ag tóg ti tỹ hē ri ke tū nī ver.

Jesus tỹ hēn ra tīg ke

²¹ Kỹ tóg ag mý kāmén mǎn mū. “Tīg jé sóg ke mū, kỹ ājag tóg inh ve sór ke mū, hã ra ājag tóg inh venh ke tū nī. Inh vэг tũ ki ājag tóg kǎgter ke mū, kỹ ājag tỹ Topē vỹ mranh ja ěn vỹ ājag kākā nī nī. Ājag pi(jé) isy hēn ra tīg ke mū ěn ki kanhró nýtī. Isy hēn ra tīg ke mū ěn ki kagtīg ājag nýtī,” he tóg, Jesus ti. ²² Kỹ ag tóg jagnē mý: “ti mý hēn ri ke mūn vēsén sór mū, hã kỹn mý: “ājag pi(jé) isy hēn ra tīg ke mū ěn ki kanhró nýtī,” he mū?” he ag tóg, Jesus to. ²³ Hã ra Jesus tóg ag mý: “ēprā ke vỹ tỹ ājag nýtī,” he mū. “Jāvo sóg tỹ kanhkā tá ke nī. Ga tag ki ke tỹ ājag nýtī, jāvo inh pi(jé) tỹ ga tag

ki ke nī. ²⁴ Hã kỹ sóg ājag mý: “kǎgter jé ājag tóg ke mū, kỹ ājag tỹ Topē vỹ mranh ja ěn vỹ ājag kākā nī nī,” he ja nī. Ha vé, ājag tỹ inh ki ge sór tū nīn kỹ tóg ājag kākā nīnh ke mū, ājag tỹ Topē vỹ mranh ja ěn ti. “Ũ ěn vỹ tỹ inh nī,” he ja inh nī ājag mý. Tag to: hỹ, hemnī,” he tóg, Jesus ti.

²⁵ Kỹ ag tóg ti mý: “tỹ ā ũ nī?” he mū. Kỹ Jesus tóg: “vāsỹ sóg ājag mý tó huri, isy ājag mré vēmén vén kỹ,” he mū. “Ājag mý sóg vēnh kāmén tīgītī. ²⁶ Hã ra sóg ājag mý tó kǎn ja tū nī ver, sỹ ājag mý vỹ kónān ke vỹ kǎ nī gé ver. Hã ra sóg ũ tỹ inh jēnēg mū ěn vỹ hã tó tĩ, ti tỹ inh mý tó ja kar ěn ti. Ki hã tóg tó tĩ, ũ tỹ inh jēnēg mū ti,” he tóg, Jesus ti. ²⁷ Hã ra tóg ag tỹ to jykrén tū nīgītī, ti tỹ ag mý ā panh tó mū ra.

²⁸ Kỹ Jesus tóg ag mý ke mǎn mū. “Ājag tỹ ka to isa kỹ, kỹ ājag tóg inh ki kanhrān ke mū,” he tóg. “Tỹ sóg ēprā ke fi kósín nī. Kurā ěn kǎ ājag tóg ki kanhró nýtīnh ke mū, isy tỹ ũn ěn nī ti. Inh pi(jé) vēsóg ki nén ũ to jykrén tī. Inh panh tỹ inh mý nén tó mū ěn hã tó sóg tĩ. Hã ki kanhró ājag nýtīnh ke mū, kurā ěn kǎ, ājag tỹ ka to isa kỹ. ²⁹ Kỹ ũ tỹ inh jēnēg mū vỹ inh mré nī nī. Tĩ mý nén há nī ěn hã han sóg tĩ, hã kỹ tóg inh mré nī nī,” he tóg, Jesus ti. ³⁰ Ag tỹ ti vỹ tag mē kỹ ũn e ag vỹ ti ki ge mū, kurā ěn kǎ.

Jesus tỹ ēg tar han ke

³¹ Kỹ Jesus tóg ũ tỹ ti ki ge kỹ nýtī ag kanhrān mū. “Inh vỹ tovānh tũg nī,” he tóg. “Kỹ ājag tóg tỹ inh mré ke pē nýtī. ³² Kỹ ājag tóg Topē vỹ pē ki kanhró nýtīnh mū. Topē vỹ pē ki kanhró tugrīn ājag tóg patrāo kórég ve mǎn ke tū nī,” he tóg.

³³ Kỹ ag tóg ti mý: “Abraão krē'krē vỹ tỹ ēg nýtī,” he mū. “Ēg pi(jé) tỹ ũ camarada nýtī, ũri, vāsỹ ke gé. Ne to ke nē, hã vỹ: patrāo kórég ve mǎn ke tū ājag nī, he mū tag ti?” he ag tóg mū, Jesus mý.

³⁴ Hã ra Jesus tóg ag mý: “ki hã sóg ke mû, hã kÿ sóg tó mû,” he mû. “Ājag tÿ Topê vî mranh kÿ ājag tóg tÿ ti vî mranh jafā nÿtî, kÿ tóg ěg tÿ ũn kórég tÿ patrão vэг mû ri ke nĩ. ³⁵ Ti camarada ag pi(jé) ti ĩn krēm ěmā nÿtĭgtĭ. Ti kósin hã vÿ ti ĩn krēm nĭgtĭ jāvo. ³⁶ Kÿ, Topê kósin tÿ ājag tÿ Topê krē han kÿ ājag tóg patrão kórég ve măn ke tũ nĩ ha. ³⁷ Abraão krē vÿ tÿ ājag nÿtî. Ki kanhró inh nĩ. Hã ra ājag tóg isén sór mû, ājag tÿ inh vî to há tũ nÿtĭn kÿ. ³⁸ Inh panh tÿ inh mÿ nén tó mû ěn hã tó sóg tĩ. Inh jāvo ājag tóg ājag panh tÿ ājag mÿ nén tó mû ěn hã tó tĩ,” he tóg, Jesus ti.

³⁹ Kÿ ag tóg ti mÿ: “hÿ, Abraão vÿ tÿ ěg panh nĩ,” he mû.

Kÿ Jesus tóg ag mÿ: “ājag tÿ tÿ Abraão krē nÿtĭn kÿ ti jykre han nĩ ge,” he mû.

⁴⁰ “Hã ra ājag tóg isén sór mû. Ājag mÿ sóg Topê vî pē tó ja nĩ, Topê tÿ inh mÿ nén tó mû ěn ti, hã ra ājag tóg isén sór mû. Abraão vÿ tag han ja tũ nĩ. ⁴¹ Vyr mÿ ājag panh ũ tũ hã han ājag tóg tĩ,” he tóg.

Kÿ ag tóg Jesus mÿ: “panh ěg nÿtĭ, hã vÿ: Topê, he mû. ěg pi(jé) panh tũ nÿtĭ,” he ag tóg mû.

⁴² Hã ra Jesus tóg ag mÿ: “Topê tÿ tÿ ājag panh nĩ ra ājag tóg iso há nÿtĭnh mû vē,” he mû. “Inh panh tá sóg kătére, hã kÿ sóg ājag mré nĩ nĩ. Inh pi(jé) vēsóg ki nén to jykren kÿ kătére mû. Ti hã vÿ inh jĕnĕ. ⁴³ Hã ra ājag tóg inh vî ki kagtĭg nÿtĭ. Mē sór tũ ājag nÿtĭ, hã kÿ ājag tóg ki kagtĭg nÿtĭ. ⁴⁴ Japo krē vÿ tÿ ājag nÿtĭ, kÿ ājag tóg ti tÿ nén to jykren mû ěn han tĩ. Topê tÿ ěprā ke ag han ěn kã tóg ag kăgtén sór tĭgtĭ, Japo ti. Vāsÿ ti jykre vē, kÿ tóg ũri tÿ ti jykre nĩ gé ver. Ti pi(jé) ki hã tó tĩ. Ki hã tó to ti kórég pē nĩ, Japo ti. Vēnh ó vÿ tÿ ti tũ pē nĩ. Őn mē ti nĭgtĭ, vēnh ón né vē. Ti hã vÿ tÿ ũn ón mû ag panh kar nĩ. ⁴⁵ Ti jāvo sóg ki hã tó tĩ. Hã ra ājag tóg inh vî kri nĭm sór tũ nĭgtĭ. ⁴⁶ Inh hÿ ne ki Topê vî mranh? Ha inh mÿ tó. Mranh ja tũ sóg nĩ. Hã ra sóg

ājag mÿ Topê vî pē tó tĩ. Ājag hē ri ken kÿ inh vî kri fi sór tũ nĩ? ⁴⁷ Topê krē ag vÿ Topê vî mēg tĩ. Ājag pi(jé) inh vî jēmē sór tĩ, ājag tÿ tÿ Topê krē tũ nÿtĭn kÿ,” he tóg, Jesus ti, ag mÿ.

Jesus tÿ Abraão kăfór nĩ

⁴⁸ Kÿ Judeu ag tóg ti mÿ: “Samaria tá ke ri ke ā tóg nĩ, ā tÿ ki kagtĭg nĭn kÿ, kÿ ā jagrē kórég nĩ gé,” he mû.

⁴⁹ Hã ra Jesus tóg ag mÿ: “inh pi(jé) jagrē kórég nĩ,” he mû. “Inh panh to sóg: ũn mág vÿ tÿ ti nĩ, he tĩ. Hã ra ājag tóg iso é he tĩ. ⁵⁰ Inh pi(jé) vēsÿ ũn mág han sór mû. Ū tÿ isÿ ũn mág han ke mû vÿ nĩ nĩ, ěn vÿ vēnh kar jykre tugnÿm ke mû. ⁵¹ Ki hã sóg ke mû, hã kÿ sóg tó mû, ha mē. Ājag tÿ inh vî kri fi kÿ ājag ter ke tũ pē nĩ,” he tóg, Jesus ti.

⁵² Kÿ Judeu ag tóg ti mÿ: “jagrē kórég ā tóg nĩ,” he mû. “Vāhā tóg ve há tĩ, ā jagrē kórég ti,” he ag tóg mû ti mÿ. “Abraão vÿ ter, kÿ Topê vî tó tĩ ag kar vÿ kăgter. Hã ra ā tóg ón kÿ: “ājag tÿ inh vî kri nĭm kÿ ājag kăgter ke tũ pē nĩ,” he mû. ⁵³ Ā mÿ vēsÿ ěg jógjóg ve tÿ Abraão kăfór han sór mû, ā tÿ ěg mÿ: kăgter ke tũ ājag nĩ, hen kÿ? Ter ja ti nĩ, Abraão ti, kÿ Topê vî tó tĩ ag kar vÿ kăgter kăn gé. Vēsÿ ũn mág han kÿ nĩ ve ā tóg nĩ,” he ag tóg, Jesus mÿ, Judeu ag.

⁵⁴ Kÿ Jesus tóg ag mÿ: “isÿ vēsÿ ũn mág han kÿ sóg ón kÿ ke mû ve nĩ,” he mû. “Hã ra inh panh hã vÿ isÿ ũn mág han ke mû, ājag tÿ ũ to: ěg jóg mág, he mû ěn ti. ⁵⁵ Hã ra ājag tóg ti ki kagtĭg nÿtĭ, ājag jāvo sóg ti ki kanhró nĩ. Isÿ ājag mÿ: “ti ki kagtĭg inh nĩ,” he mû ra sóg ājag ón tag ri ke han mû vē, hã ra sóg ti ki kanhró nĩ, kÿ sóg ti vî ki króm tĩ gé. ⁵⁶ Ājag jógjóg ve tÿ Abraão vÿ inh kurā ve sór ja nĩ, kÿ tóg kejĕn vē, kÿ tóg ti mÿ sér pē tĩ, ti tÿ inh kurā ve kÿ,” he tóg, Jesus ti.

⁵⁷ Kÿ Judeu ag tóg ti mÿ: “50 (ke) anos han tũ ā nĩ ver, hã ra ā tóg: “Abraão ve

inh,” he mû. Vĩ vênhmỹ han ã tóg,” he ag tóg mû, Jesus mý.

⁵⁸ Hã ra Jesus tóg ag mý: “ki hã sóg ke mû, hã kýt sóg tó mû, ha mẽ,” he mû. “Abraão mur tũ ra sóg nĩ nĩ,” he tóg, Jesus ti. ⁵⁹ Kýt ag tóg jũgũ mû, ti týt vëso: “Topẽ ri ke inh nĩ,” hen kýt. Hã kýt ag tóg pò măn kýt ti pin sór mû. Hã ra Jesus tóg Topẽ jo ãn kãtã kãkutẽ mû sir, kýt tóg ti mû, vênh pēju jé.

Jesus týt ãn kyvó týt há' he

9 Kejẽn Jesus tóg tĩg kýt ãn kyvó vэг mû. ã mur mũn kã tóg kyvó nĩ sir. ² Kýt ti mré mû tĩ ag tóg ti mré ti vэг mû gé. Kýt ag tóg Jesus mý: “ti han mû fag hỹn Topẽ vĩ mranh’,” he mû, “ha kýt tóg kyvó nĩ,” he ag tóg. “Ti týt vësóg ki Topẽ vĩ mranh kýt mý kyvó nĩ vó?” he ag tóg mû. ³ Kýt Jesus tóg ag mý: “ti týt Topẽ vĩ mranh to ke pijé,” he mû. “Ti han mû fag týt Topẽ vĩ mranh to ke pijé,” he tóg. “Topẽ týt vênh kar mý ã týt nén han sór mû ên ven sór vë, ti ki. ⁴ Isỹ ù týt inh jẽnэг mû ên týt inh mý nén tó mû ên han sór vë. Ver tóg inh mý kurã nĩ, sỹ rãnrãj jé. Kãnhmar tóg kuty nỹn mû, kýt ù tóg rãnrãj măn ke tũ nĩ, iser ke kurã ên kã,” he tóg. ⁵ “Ver sóg ajag mré tĩg mû, kýt sóg ajag mý jẽnэг ri ke nĩ ver,” he tóg, Jesus ti. ⁶ Tag tó kar kýt tóg sug mû, ga kri, kýt tóg óré sĩ han mû. Óré ên týt tóg ãn kyvó kanẽ to tĩn mû. ⁷ Kýt tóg ti mý: “ha tĩg, goj týt Siloé ki vênh kype jé,” he mû. Goj týt Siloé to ke hã vỹ: “ũ týt inh jẽnэг ja,” he mû, ẽg vĩ ki. Kýt tóg ti mû, ãn kyvó ti. Kýt tóg tá kãtĩg kýt ẽvãnh há han tĩ nĩ sir.

⁸ Ti týt ẽvãnh há han kýt tóg ti rã hã nỹtĩ kar ag mý e tĩ. Vênh kar vỹ ti ki kanhró nỹtĩ, vênh kar mý tóg: “inh mý nén ù nĩm,” he tĩ ja nĩgtĩ. Kýt ag tóg, ag týt ti ẽvãnh há tag ve kýt (ag tóg) ti to: “ũ týt ẽg mý: inh mý nén ù nĩm, he tĩ ên hã tũ mý?” he mû. ⁹ Kýt ag kãmĩ ù tóg: “ti hã vë,” he mû. Hã ra ù ag tóg: “ẽn ri ke nĩ ve ti nĩ, hã ra tóg ẽg mý týt hã tũ nĩ,”

he mû gé. Hã ra tóg vëso: “inh hã vë,” he mû. ¹⁰ Kýt ag tóg ti mý: “kýt ã hẽ ri ké, ã týt ẽvãnh há' he jé?” he mû. ¹¹ Kýt tóg ag mý: “ag týt ù to: Jesus, he mû ên vỹ óré han, kýt tóg inh kanẽ to tĩn, kýt tóg inh mý: “goj týt Siloé ra tĩg nĩ, tá vênh kupemni,” hẽ. Kýt sóg vyr. Vênh kupe sóg, kýt sóg ẽvãnh há' he mû sir,” he tóg, ãn kyvó ja ti. ¹² Kýt ag tóg ti mý: “ti hẽ kã jé?” he mû. Hã ra tóg ag mý: “ha?” he mû.

Fariseu ag týt ãn kyvó ja ki jẽmẽ

¹³ Kýt ag tóg Fariseu ag mý ti pére mû mû, ãn kyvó ja ên ti. ¹⁴ Hã ra tóg týt vênhkãn ke kurã nĩ. Ên kã Jesus tóg óré han kýt ti týt há' hẽ. ¹⁵ Kýt Fariseu ag tóg ti ki jẽmẽ sór mû gé. “ã hẽ ri ké, ã týt ẽvãnh há' he jé?” he ag tóg mû gé. Kýt tóg ag mý: “óré týt tóg inh kanẽ to tĩn, kýt sóg vênh kupenh vyr, kýt sóg ẽvãnh há' he mû sir,” he mû, ag mý, ãn kyvó ja ti.

¹⁶ Kýt Fariseu ù ag tóg Jesus to: “Topẽ pi(jé) ti jẽnэг,” he mû. “Vênhkãn ke kurã ki tóg vênhkãn vãnh nĩgtĩ, kýt tóg kórég nĩ,” he ag tóg mû, Jesus to, Fariseu ù ag. Hã ra ù ag tóg ti to: “hã ra tóg nén ù há tãvĩ han,” he mû gé. “Ti kórég nĩ ran hỹn tag han ki kagtĩg nĩnh mû vë,” he ag tóg, Fariseu ù ag. Hã kýt ag vênh kãpãm kýt nỹtĩ. ¹⁷ Kýt ag tóg ãn kyvó ja ên ki jẽmẽ măn mû. “Ti mý týt ãn há nĩ, ãn kórég mý vó?” he ag tóg mû. “ã týt tóg há' hẽ mýr,” he ag tóg.

Kýt tóg ag mý: “inh mý tóg týt Topẽ vĩ tó jafã nĩ,” he mû, ãn kyvó ja ti.

¹⁸ Hã ra ag tóg ti vĩ kri nĩm sór tũ nĩ. “Ti mý kyvó ja nĩ vỹ?” he ag tóg mû. Kýt ag tóg ti han mû fag jé prẽr mû. ¹⁹ Kýt ag tóg fag mý: “ajag kósin hã mý?” he mû. “Ti mý ã mur mũn hã kã kyvó ja nĩ? Kýt hỹn hẽ ri ké, ti týt ùri ẽvãnh há nĩn jé?” he ag tóg mû, ti han mû fag mý.

²⁰ Kýt fag tóg: “hỹ, ẽg kósin hã vë,” he mû. “ã mur mũn hã kã tóg kyvó ja nĩ. ²¹ Hã ra tóg ùri ẽvãnh há nĩ. Hẽ ri ken

ký'? Ha'? Û nỹ ti han'? Ha ti ki jēmēmñĩ. Sanh há ti nĩ ha. Ājag mỹ ti tónh mũ,” he fag tóg, ti han mũ fag.

²² Hã ra fag tóg pã'i ag kamēg mũ, hã ký fag tóg: “ha ti ki jēmēmñĩ,” he mũ. Pã'i ag vỹ tag tó ja nĩ, Jesus to: “ājag kāmĩ ù tỹ ti to: “Cristo vỹ tỹ ti nĩ,” hen ký ěg ti kutēm ke mũ,” he mũ, “ti tỹ tỹ ěg mré ke tũ nĩ jé, ti tỹ ěg mré vēnhmān tũ nĩ jé, ěg vēnh kanhrān jafā krēm,” he ja ag tóg nĩgtĩ. ²³ Hã ký ùn kyvó ja ěn han mũ fag vỹ Jesus to nén ù tó sór tũ nĩ, hã ký fag tóg pã'i ag mỹ: “sanh há ti nĩ ha, ājag mỹ ti tónh mũ,” he mũ, fag kósĩn kyvó ja ěn to.

²⁴ Ký ag tóg ùn kyvó ja ěn jé prēr mǎn mũ. Ký ag tóg ti mỹ: “ker ón hẽ', Topẽ vỹ ã vỹ mēg mũ,” he mũ. “Û tỹ ã tỹ há' he mũ ěn vỹ kórég nĩ, Topẽ vỹ mranh ti tĩ,” he ag tóg mũ ti mỹ. ²⁵ Ký tóg: “mẽ',” he mũ. “Ti mỹ Topẽ vỹ mranh tĩ? Sỹ ki kagtĩg tóg tĩ. Nén ù pir hã ki kanhró sóg nĩ. Kyvó inh vẽ vẽ, hã ra sóg ěvānh há nĩ ha,” he tóg, ùn kyvó ja ěn ti.

²⁶ Ký ag tóg ti mỹ: “ti hẽ ri ké, ã tỹ há' he jé?” he mǎn mũ. ²⁷ Hã ra tóg ag mỹ: “ājag mỹ inh hur tó, hã ra ājag tóg mẽ sór tũ nĩ,” he mũ. “Ājag tỹ ne jé mẽ mǎn sór nẽ? Ājag mỹ ti mré mũ sór mũ gé?” he tóg.

²⁸ Ký ag tóg ti nyg mũ. “Ā hã vỹ tỹ ti mré ke nĩ,” he ag tóg mũ. “Jāvo ěg tóg tỹ Moisés mré ke nỹtĩ,” he ag tóg, pã'i ag, ùn kyvó ja ěn mỹ. ²⁹ “Topẽ vỹ Moisés mré vēmén ja nĩ, tag ki kanhró ěg tóg nỹtĩ. Hã ra ěg pi(jé) ěn ki kanhró nỹtĩ. Ti hỹn tỹ hẽ tá ke nĩ?” he ag tóg, pã'i ag.

³⁰ Ký ùn kyvó ja ěn tóg ag mỹ: “mẽ',” he mǎn mũ. “Ājag mỹ ti ki kagtĩg nỹtĩ, ti tỹ tỹ hẽ tá ke nĩn ki? Isỹ tóg há' hé mỹr, inh kanẽ tỹ. ³¹ Hã ra Topẽ tóg ěg vỹ mēg tũ nĩgtĩ, ěg tỹ tỹ ti vỹ mranh jafā nỹtĩn ký. Û tỹ Topẽ kamēg mũ ěn vỹ hã mēg ti tĩ. Û tỹ ti vỹ ki króm mũ ěn vỹ hã mēg ti tĩ, Topẽ ti. ³² Inh mur mũ kã inh kyvó nĩ ja nĩ. Û tỹ ge tỹ há' he mũ tag ve ja tũ inh

nĩ ver. Hã ra tóg isỹ há' hé. ³³ Ti tỹ Topẽ tá kagtĩg tũ ra tóg nén ù há han ki kagtĩg nĩ vẽ,” he tóg, ùn kyvó ja ti, pã'i ag mỹ.

³⁴ Hã ra ag tóg ti mỹ: “Topẽ vỹ mranh ký ã tóg mur, hã ra ã tóg ěg kanhrān sór mũ,” he mũ. Ký ag tóg ti kutēm mũ, vēnh kanhrān jafā krēm.

Ûn kyvó to comparação

³⁵ Hã ra Jesus tóg mēg mũ, ag tỹ ti kutēm ja ti. Ký tóg ti vēnh ti mũ. Ký tóg ti mỹ: “ã mỹ ěprā ke fi kósĩn ěn ki rã sór tũ?” he mũ.

³⁶ Ký tóg Jesus mỹ: “ký ùn nẽ ge?” he mũ. “Sỹ ti ki rã sór vẽ,” he tóg.

³⁷ Ký Jesus tóg ti mỹ: “ti ve ã huri,” he mũ. “Û tỹ ã mré vēmén jẽ mũ hã vỹ tỹ ti nĩ, inh hã vỹ tỹ ti nĩ,” he tóg.

³⁸ Ký ùn kyvó ja tóg ti mỹ: “Senhor,” he mũ. “Ā ki rã ký inh jẽ nĩ,” he tóg. Ký tóg ti krēm mūg ke mũ, Jesus krēm, ti mỹ: “Topẽ kósĩn vỹ tỹ ã nĩ,” he jé.

³⁹ Ký Jesus tóg ti mỹ: “ga tag ki sóg jun, sỹ vēnh kar jykre tugnỹm jé,” he mũ. “Ûn kyvó ag tỹ ěvānh há han jé sóg ke mũ. Ag tỹ iso jykrén há han ke to ken hã vẽ. Ký sóg ù tỹ ve há han mũ ag kyvó han ke mũ gé. Ag tỹ iso jykrén há han ki kagtĩg to ken hã vẽ,” he tóg, Jesus ti, ùn kyvó ja ěn mỹ.

⁴⁰ Hã ra Fariseu ù ag tóg ti vỹ mēg mũ. Ký ag tóg ti mỹ: “ký ěg mỹ kyvó nỹtĩ gé?” he mũ.

⁴¹ Ký Jesus tóg ag mỹ: “ājag tỹ: kyvó ěg nỹtĩ, ki kagtĩg ěg nỹtĩ,” he mũ hã ra Topẽ tóg ājag to jũ tũ nĩ ver. Hã ra ājag tóg vēsō: “ěvānh há ěg nỹtĩ, ki kanhró ěg nỹtĩ,” he tĩ. Hã ký ājag tỹ Topẽ vỹ mranh ja vỹ ājag kākā nĩ nĩ,” he tóg, Jesus ti, Fariseu ag mỹ.

Vēnh mēg tỹ carneiro to comparação

10 Ký Jesus tóg ag mỹ vēnh kāmén mǎn mũ. “Ki hã sóg ke mũ, hã ký sóg tó mũ,” he tóg. “Ěg tỹ ěg mēg tỹ carneiro jy ró han ký ěg tóg ti jänkā ra rã

tĩ. Jāvo ũ tóg kejēn ró to tāpɾy kŷ pāte rā sór tĩ. Ti tŷ carneiro péju sór vē, hā kŷ tóg ró to tāpɾy kŷ pāte rā sór mŭ. ²Ti jāvo ũ tŷ carneiro ki rĩr tĩ vŷ jānkā ra rā mŭ. ³Jānkā ki rĩr tĩ ěn vŷ ti mŷ ró nón tĩ, jānkā ti. Kŷ tóg carneiro jygji tó kân mŭ sir. Ti vĩ ki kanhró fag nŷtĩ, ti mēg tŷ carneiro fag. ⁴Kŷ tóg fag jo tĩ mŭ, re ra. Kŷ tóg ā mēg fag jé prēr kân mŭ sir, kŷ fag tóg pa kân mŭ, ũ tŷ carneiro ki rĩr tĩ ěn mēg fag. Kŷ tóg fag jo tĩ mŭ, kŷ fag tóg ti nón mŭ mŭ sir, ti mēg fag, fag tŷ ti vĩ ki kanhró nŷtĩn kŷ. ⁵Fag pi(jé) ũ nón mŭnh ke mŭ', fag tŷ ũn ki kagtĩg nón. Ũ jo fag vėnh pigjunh ke mŭ, fag tŷ ũn ki kagtĩg ěn jo. Fag pi(jé) ti vĩ ki kanhró nŷtĩ', hā kŷ fag tóg ti jo vėnh pigjunh ke mŭ," he tóg, Jesus ti. ⁶Jesus tŷ ag mŷ comparaçāo han vē. Ti mŷ ěg tóg vėnh mēg tŷ carneiro ri ke nŷtĩ, ěg tŷ ti nón mŭn kŷ. Hā ra Fariseu ag tóg ti vĩ to jykrén tũ nŷtĩ.

Vėnh mēg to comparaçāo ũ

⁷Hā ra Jesus tóg ag mŷ kāmén mǎn mŭ. "Ki hā sóg tó mŭ, hā kŷ sóg ke mŭ," he tóg. "Carneiro jy ró jānkā ri ke inh nĩ," he tóg. ⁸"Ũ tŷ inh jo kāmũ ag vŷ tŷ carneiro pigju(g) tĩ ag nŷtĩ ja nĩgtĩ, ũn jũ (ka)mē ag nŷtĩ ja nĩgtĩ. Hā ra carneiro fag vŷ ag vĩ mē ja tũ nŷtĩ. ⁹Inh hā vŷ fag mŷ jānkā ri ke nĩ. Ũ tŷ inh ki rā mŭ vŷ kren ke mŭ, kŷ tóg ti tŷ jānkā ra rā ri ke nĩ. Kŷ tóg kāra rā tĩ, kar kŷ tóg kākutē tĩ gé, ti tŷ vėjēn ve kŷ. ¹⁰Vėnh mēg tŷ carneiro pigju(g) tĩ ěn vŷ carneiro pigju hā jé kātĩ tĩ, fag kǎgtén jé, fag kókén jé. Ti jāvo sóg fag ki rĩnrĩr hā han hā jé kātĩg, fag tŷ jagtar tũ nŷtĩ jé, fag mŷ sér tĩ jé," he tóg, Jesus ti.

¹¹"Ũ tŷ carneiro ki rĩr tĩ ri ke inh nĩ gé, ũn tŷ ki rĩr hā ri ke inh nĩ. Ũ tŷ carneiro ki rĩr hā han mŭ vŷ ā mēg jagfy ter ke mŭ, fag krenkren jé. ¹²Kŷ ũ camarada vŷ tag ri ke tũ nĩgtĩ. Mĩg kamēg jé tóg ke mŭ, kŷ tóg mĩg ve kŷ vėnhvǎg tĩnh

ke mŭ, ā patrāo mēg tovǎnh kŷ, ti camarada ti. Kŷ mĩg vŷ fag kugmĩnh ke mŭ, kŷ fag tóg vėnh kǎpugpóv ke mŭ gé, mĩg tugrĩn, carneiro fag. Ti camarada mēg pi(jé), ti patrāo mēg vē, hā kŷ tóg fag jy nĩgǎn hā han tũ nĩ. ¹³Mĩg ve kŷ tóg vėnh vǎg tĩ mŭ. Jānkamy hā to tóg rǎnhraj jē nĩ, hā kŷ tóg mĩg kamēg mŭ. ¹⁴Ti jāvo sóg carneiro ki rĩr hā han tĩ. Inh mēg ki kanhró sóg nĩ, kŷ fag tóg inh ki kanhró nŷtĩ gé. ¹⁵Ri ke ti nĩ gé, inh panh mré. Inh ki kanhró tóg nĩ, kŷ sóg ti ki kanhró nĩ gé. Kŷ sóg inh mēg jagfy ter ke mŭ. ¹⁶Inh mēg ũ vŷ nŷtĩgtĩ gé ver, inh mēg tŷ hē tá ke fag. Ājag povo kāmĩ ke pijé'. ěn jé prēr jé sóg ke mŭ gé, kŷ fag tóg inh mré kāmũnh ke mŭ gé. Inh vĩ mē jé fag ke mŭ gé. Inh mēg tŷ tag ki fag mré ke vŷ tŷ fag nŷtĩnh mŭ. Fag kar jy sóg ró pir han ke mŭ, inh mēg kar jy, kŷ sóg inh pir mŷ fag ki rĩr ke mŭ," he tóg, Jesus ti.

¹⁷"Inh panh vŷ iso hā nĩ, isŷ inh mēg jagfy ter ken kŷ, kar kŷ sóg rĩr mǎn ke mŭ. ¹⁸Iser sór tũ ra ũ pi(jé) isén ke mŭ vē'. Hā ra sóg fag jagfy ter sór mŭ. Iser sór kŷ sóg ter ke mŭ. Inh rĩr mǎn sór kŷ sóg rĩr mǎn ke mŭ gé, iser kar kŷ. Inh panh tŷ inh mŷ nén tó mŭn hā vē," he tóg, Jesus ti.

¹⁹Judeu ag tŷ ti vĩ tag mē kŷ ag tóg vėnh kǎpām kŷ nŷtĩ mǎn mŭ gé. ²⁰Ũn e tóg ti to: "jagrē kórég ti nĩ, krĩ vėnhmŷ ti nĩ, ti vĩ mē sór tũg nĩ," he mŭ. ²¹Hā ra ũ ag tóg: "ũn pi(jé) ā jagrē kórég hā ra vėnh vĩ há tó tĩ," he mŭ. "Ũn kyvó tŷ há' he ki kagtĩg tóg nĩ gé, ũn jagrē kórég ti," he ag tóg mŭ, Judeu ũ ag, ũ tŷ Jesus to há nŷtĩ ag.

Judeu ag tŷ Jesus tén mǎn sór

²²Kejēn tóg Judeu ag tŷ festa há' ũ tá krŷg mŭ. Vǎsŷ ũ tŷ Judeu ag kato vǎsǎn-sǎn mŭ ag vŷ Topē jo ĩn kókén ja nĩgtĩ, hā ra Judeu ag tóg kejēn ti ĩn han mǎn. Ag tŷ ĩn han mǎn to festa hā vē sir. Prŷg kar ki ag tóg festa ěn han tĩ. Kusǎg mŭ

ên kã ke ja vê, festa ên ti. ²³ Hã ra Jesus tóg venh tíg ja nĩ, kũ tóg Topê jo ãn mĩ pasa ke tĩ nĩ, Salomão tĩ jãnkã ên tá. ²⁴ Kũ Judeu ag tóg ti venh kãmũ mũ, ag tĩ ón kũ ti ki jẽmẽ jẽ. “Á hẽ ri ke kã ãg mũ vẽn kãmẽn há han ke mũ?” he ag tóg mũ. “Á mũ tĩ Cristo nĩ? Topê tĩ ãg mũ ãn jẽnẽn ke mũ ên mũ tĩ ã nĩ?” Ha ãg mũ tóg há han,” he ag tóg mũ, ón kũ.

²⁵ Hã ra Jesus tóg ag mũ: “ãgag mũ sóg hur tó, hã ra ãgag tóg kri nĩm sór tũ nĩ,” he mũ. “Milagre hyn han sóg tĩ gẽ, ãn panh tĩ ãn mũ nẽn tóg ja ãn. ãn ve kũ ãgag tóg ãn ki kanhró nĩtĩn mũ vẽ. ²⁶ Hã ra ãgag tóg kri fi sór tũ nĩtĩ. ãgag pi(jé) ãn mẽg tĩ carneiro ri ke nĩtĩ, hã kũ ãgag tóg kri nĩm sór tũ nĩtĩ. ²⁷ ãn mẽg fag vỹ ãn vỹ mẽg tĩ, fag ki kanhró sóg nĩ, hã kũ fag tóg ãn mrẽ mũgtĩ. ²⁸ Fag jagfỹ sóg ter ke mũ, kũ fag tóg kãgter ke tũ nĩ. Mĩg vỹ fag kugmĩn ke tũ pẽ nĩ gẽ, isỹ fag jy nĩgãn kũ. ²⁹ ãn panh tĩ ãn mũ fag vĩn mũn hã vẽ, ãn mẽg fag. Hã ra tóg vẽn kar kãfór nĩ, ãn panh ti. Kũ ãn pi(jé) ãn panh tũ ag pẽju(g) tĩ, ti tĩ tĩ vẽn kar kri ke nĩn kũ. ³⁰ ãn panh mrẽ sóg tĩ ãn pĩr nĩ,” he tóg, Jesus ti.

³¹ Ag tĩ ti vỹ tag mẽ kũ ag tóg póg tĩ hẽn ri ke mág mũ sir, Judeu ag, ag tĩ tĩ ti pĩn kũ ti tén jẽ.

³² Hã ra Jesus tóg ag mũ: “nẽn ã há hã hyn han ja ãn nĩ,” he mũ. “ãn panh tĩ ãn mũ: “tag han ra,” he ja ãn hã han ãn tĩ. Sỹ nẽn han ja tĩ hẽ nỹ hỹn ãgag mũ kórég nĩ, hã kũ ãgag tóg isẽn sór mũ?” he tóg.

³³ Hã ra ag tóg ti mũ: “ẽg pi(jé) nẽn ã há to ã tén sór mũ,” he mũ. “Èprã ke vỹ tĩ ã nĩ, ãg mrẽ ke vỹ tĩ ã nĩ, hã ra ã tóg vẽn: “Topê kósĩn vỹ tĩ ãn nĩ,” he mũ. ã tĩ Topê to vỹ kónãn hã vẽ. Tag to ãg tóg ã tén ke mũ, póg tĩ ã pĩn kũ,” he ag tóg mũ, Judeu ag.

³⁴ Kũ Jesus tóg ag mũ: “Topê vỹ tĩ rán kũ nĩ ki tag vỹ rán kũ nĩ, ha mẽ,” he mũ. “Topê vỹ èprã ke ag to: “Topê ri ke ãgag

nỹtĩ,” he tĩ,” he tóg, Topê vỹ rá ki. ³⁵ Kũ tóg ã tĩ ti vỹ mẽg mũ ãn ag mũ: “Topê ri ke ãgag nỹtĩ,” he ja nĩ, Topê ti. Hã ra tóg ón tũ nĩgtĩ, Topê ti. ³⁶ Hã kũ tóg vẽnhmỹ tũ nĩ gẽ, sỹ ãgag mũ: Topê kósĩn vỹ tĩ ãn nĩ, hẽn kũ. ãn panh vỹ ãn kuprẽg, kũ tóg ãn jẽnẽ gẽ, isỹ ãgag tá jun jẽ. Topê to vỹ kónãn pijé, sỹ nẽn tóg mũ tag ti. ³⁷ Isỹ ãn panh vỹ ki kórĩm tũ nĩ ra tóg há nĩn mũ vẽ, ãgag tĩ ãn vỹ kri nĩm sór tũ nỹtĩ ti. ³⁸ Hã ra sóg tĩ vỹ ki kórĩm tĩ. Kũ ãn vỹ tĩ ãgag mũ kórég nĩn kũ isỹ milagre hyn han mũ ãn vẽn nĩ. Isỹ milagre hyn han mũ ki tóg ve há tĩ, isỹ ãn panh ri ke nĩ ti, kũ ãn panh vỹ ãn ri ke nĩ gẽ,” he tóg, Jesus ti.

³⁹ Kũ ag tóg ti vỹ to ti se sór mãn mũ sir, hã ra tóg kren mãn mũ gẽ.

⁴⁰ Kũ tóg vẽn pẽju kũ tĩ mũ, goj tĩ Jordão mãra, Jesus ti. João vỹ ãn tá vẽn kar kygpég jẽ ja nĩgtĩ, ti tĩ ag kygpe vẽn kũ. ãn ra tóg tĩ mũ sir, Jesus ti, kũ tóg tá nĩ nĩ, ã mrẽ mũ tĩ ag mrẽ. ⁴¹ Kũ ã tĩ hẽn ri ke ag vỹ tá ti venh kãmũ mũ. Jesus to ag tóg jagnẽ mũ: “há vẽ, João vỹ milagre han ja tũ nĩ,” he mũ. “Hã ra tóg Jesus kãmẽn. Tóg há han ja tóg nĩ, João ti. Ki hã tóg tóg ja nĩ, ti tĩ ãg mũ Jesus to nẽn tóg mũ ti,” he ag tóg. ⁴² Kũ tá ã tĩ hẽn ri ke ag tóg ti ki ge mũ sir.

Lázaro ter

11 Kejẽn ã tĩ Jesus to há ã tóg kaga nỹ nĩ, cidade tĩ Betânia tá. ãn kaga ãn jyjn hã vỹ: Lázaro, he mũ. Ti ve fi vỹ tĩ Maria fi nĩ, Marta fi ke gẽ. Betânia tá fag ãmã nỹtĩ gẽ. ² Maria ãn fi vỹ kar kũ kejẽn Jesus pẽn kri nẽn ger há kujẽ, kũ fi tóg fi gãn tĩ ti pẽn kykũg mũ gẽ. ãn fi mrẽ pafa mũ vỹ kaga nỹ. ³ Kũ ti ve fag vỹ Jesus mũ vẽn vỹ jẽnẽg mũ. Ti mũ fag tóg: “ã tĩ ã to há nĩ ãn vỹ kaga nỹ,” he mũ. ⁴ Kũ Jesus tóg mẽg mũ. Hã ra tóg ã mrẽ mũ tĩ ag mũ: “ti pi(jé) vẽn kaga tag to ter ke mũ,” he mũ. “Topê vỹ tĩ ãn mág nĩ. Tag vỹ vẽn ven ke mũ, ti

kaga tugrîn. Kÿ Topê kósín vÿ tÿ ùn mág nĩ gé. Tag vÿ vènh ven ke mû gé, ti kaga tugnîn,” he tóg, Jesus ti. ⁵ Jesus vÿ Marta fi to há távĩ nĩ, fi jävÿ fi to ke gé, Lázaro to ke gé.

⁶ Hã ra Jesus tóg, ti tÿ Lázaro kaga mæg mû ra (tóg ver) ti venh tĩ tũ nĩ. Á tÿ hẽ tá nĩ ên tá tóg ver kurã régre han. ⁷ Tag pãte tóg á mré mû tĩ ag mÿ: “mũ nÿ, ga tÿ Judéia ra,” he mû. ⁸ Kÿ ag tóg ti mÿ: “Senhor,” he mû. “Êg tÿ Judéia tá nÿtĩn kÿ Judeu ag tóg á pin sór ja nĩ, pó tÿ. Ra tĩ tũg nĩ,” he ag tóg ti mÿ. ⁹ Hã ra Jesus tóg ag mÿ comparação han mû, ti ter ke kurã jun ja tũ to. “Kurã pir vÿ tÿ 12 (ke) hora ke nĩ,” he tóg. “Êg tÿ kurã ên ki hên ra mûn kÿ êg tóg krĩm kenh ke tũ nĩ, êg tÿ kurã ve há han kÿ. ¹⁰ Êg tÿ hã ra kuty ra hên ra mûn kÿ êg tóg krĩm ke tĩ, êg tÿ kuty ki nén ù vég tũ nĩn kÿ,” he tóg, Jesus ti.

¹¹ Kÿ tóg ag mÿ: “ũ tÿ êg to há nĩ ên, Lázaro ên vÿ nũr nÿ,” he mû. “Isÿ ti tÿ mrin ke han tũg ke nê ha,” he tóg. ¹² Kÿ ag tóg ti mÿ: “ti nũr nÿn kÿn kren ke mû,” he mû. ¹³ Hã ra Jesus tóg ti ter ja tó ja nĩ. Jó ag tóg: “ti nũr vè, ti vènhkán vè,” he mû, ag tÿ ti vĩ mèn kÿ. ¹⁴ Kÿ Jesus tóg jamã hár(a) ag mÿ kãmén mû. “Lázaro vÿ ter huri,” he tóg. ¹⁵ “Ájag tugrîn tóg inh mÿ sér tĩ, isÿ ti ter ve ja tũ nĩn kÿ. Ájag tÿ isÿ nén han mû ven kÿ ájag tóg inh ki ge há han ke mû. Mû jé ha, ti ve jé,” he tóg.

¹⁶ Kÿ Tomé he mû ên, ag tÿ ù to: “ũn vègnig mû,” he tĩ ên vÿ ti mré mû tĩ ag mÿ: “mũ jé ha, ti mré, êg tÿ ti mré kãgter jé,” he mû. Kÿ ag tóg mû mû sir.

Jesus tÿ vènh kar rĩnrĩr han ke

¹⁷ Kÿ ag tóg Betânia tá junjun mû. Hã ra Lázaro vÿ vènh kej tá nÿ nĩ. Kurã tÿ 4 (ke) vè sir, ag tÿ vènh kej tá ti fón ja kri. ¹⁸ Hã ra ag tóg Jerusalém kakó ki nÿtĩ, 3 quilômetros hÿn, êmã tÿ Betânia ki. ¹⁹ Kÿ Judeu tÿ hên ri ke fag vÿ Marta fi

venh kãmũ ja nĩ, Maria fi ke gé, fag mré vèser kri fÿ jé. ²⁰ Kÿ Marta fi tóg mæg mû, Jesus kãtũg ti. Kÿ fi tóg tim ke kÿ ti venh tĩ mû. Hã ra Maria fi tóg á ĩn krêm nĩ nĩ. ²¹ Kÿ Marta fi tóg Jesus kato tẽ mû. “Senhor,” he fi tóg. “Á tÿ kãnĩ ra ti ter ke tũ nĩ vè,” he fi tóg. ²² “Hã ra sóg á ki kanhró nĩ. Á tÿ Topê mÿ nén ù to vĩn kÿ tóg á mÿ nĩm ke mû, Topê ti,” he fi tóg, Marta fi, Jesus mÿ.

²³ Kÿ tóg fi mÿ: “á mré ke vÿ rĩr măn ke mû,” he mû.

²⁴ “Hÿ,” he fi tóg. “Vènh kar rĩnrĩr măn ken kÿ tóg rĩr măn ke mû gé, ki kanhró sóg nĩ. Kurã tÿ êgno ki ke vè,” he fi tóg.

²⁵ Hã ra Jesus tóg fi mÿ: “inh hã vÿ vènh kar rĩnrĩr măn han tĩ,” he mû. “Vènh kar rĩnrĩn mû vÿ tÿ inh nĩ,” he tóg. “Û tÿ inh ki rá mû ên vÿ rĩr ke mû, ti ter kÿ nÿ (hã) ra. ²⁶ Kÿ ùn rĩr jé tóg, ti tÿ inh ki rá kÿ (tóg) ter măn ke tũ pẽ nĩ. Á mÿ inh vĩ tag kri fig mû?” he tóg, Jesus ti.

²⁷ “Hÿ,” he fi tóg. “Cristo vÿ tÿ á nĩ, Topê kósín ti, ù tÿ ga kri jun ke mû ên ti. Tag vÿ inh mÿ tÿ hã nĩ,” he fi tóg, Jesus ti mÿ. ²⁸ Kÿ fi tóg tĩ mû, fi jävÿ fi jé prêr jé, Maria fi.

Jesus fÿ

Kÿ Marta fi tóg Maria fi tá jun kÿ fi mÿ: “êg Senhor vÿ jun, kÿ tóg á ve sór mû,” he mû. ²⁹ Fi tÿ tag mẽ kÿ fi tóg tim ke kÿ tĩ mû, Jesus ve jé. ³⁰ Hã ra tóg êmã ên ra rá ja tũ nĩ ver. Ver tóg tá nĩ nĩ, Marta fi tÿ hẽ tá ti mré vèmén ja ên tá. ³¹ Kÿ Judeu fag vÿ vég mû, Maria fi tÿ tim ke kÿ tũg mû ti. Fi mré kygfÿ jé fag kãmũ ja nĩ, Judeu fag. Fag tÿ fi tũg ve kÿ fag tóg fi nón kãmũ mû gé. “Fi hÿn ti kej ra tũg sór mû, tá fÿ jé,” he fag tóg mû, hã kÿ fag tóg fi nón kãmũ mû.

³² Kÿ Maria fi tóg Jesus tá jun mû. Fi tÿ ti ve kÿ fi tóg ti pèn krêm mũg ke mû. Ti mÿ fi tóg: “Senhor,” he mû. “Á tÿ kãnĩ ra ti ter ke tũ nĩ vè,” he fi tóg mû gé. ³³ Kÿ Jesus tóg fi fÿ mû vég mû, kÿ tóg Judeu

tỹ hên ri ke fag vég mũ gé, fi nón kāmũ mũ fag. Kỹ tóg ti mỹ e tăvĩ tĩ. ³⁴ “Ti hê kã nỹ?” he tóg mũ sir. Kỹ ag tóg ti mỹ: “mũ nỹ, ti ve jé,” he mũ. ³⁵ Kỹ Jesus tóg fỹ mũ. ³⁶ Kỹ Judeu ag tóg: “ha vé,” he mũ. “Ti to há tăvĩ tóg nĩ, hã kỹ tóg fỹ mũ,” he ag tóg. ³⁷ Hã ra ag kāmĩ ù tóg: “ti tỹ há’ he ja tũ tóg nĩ,” he mũ. “Ûn kyvó kanẽ tỹ há’ he ja tóg nĩ, ti tỹ hê ri ken kỹ ti tỹ há’ he ja tũ nĩ nẽ, ti ter tũ nĩ jé? Ti mỹ tỹ hê ri ke tũ nĩ vỹ, ti kaga tỹ?” he ag tóg, Jesus to.

Jesus tỹ Lázaro rĩn măn

³⁸ Kỹ tóg Jesus mỹ e tăvĩ tĩ. Kỹ tóg ti tỹ vênh kej kỹ nỹ ãn ra ti mũ. Hã ra ti kej vỹ tỹ pãró nor nĩ, kỹ tóg pó mág tỹ nĩfénh kỹ nĩ, ti kej nor ti. ³⁹ Kỹ Jesus tóg ag mỹ: “ha pó tag kunũ,” he mũ. Kỹ Marta fi, ùn ter kỹ nỹ ãn ve fi vỹ ti mỹ: “Senhor,” he mũ. “Ti hỹn ger nỹ ha. Kurã tỹ 4 (ke) vê ha, ãg tỹ ti fón ja kri,” he fi tóg mũ. ⁴⁰ Hã ra Jesus tóg fi mỹ: “ã mỹ sóg: ã tỹ inh ki rã há han kỹ ã tóg venh ke mũ, Topẽ tỹ tỹ ùn mág nĩ ti, he ja nĩ,” he mũ. ⁴¹ Kỹ ag tóg pó ãn kunũg mũ.

Kỹ Jesus tóg kanhkã ki ãvãnh mũ. Kỹ tóg: “panh’,” he mũ. “Inh mỹ tóg há tĩ. Inh vĩ tag jẽmẽg ã tóg mũ. ⁴² Jẽmẽg ã tóg tĩ, inh vĩ ti, hã kỹ ã tóg sỹ ã mỹ vĩ tag jẽmẽg mũ gé. Hã ra sóg jamã hár(a) ã mré vĩ mũ, ù tỹ ki nỹtĩ kar fag tỹ inh vĩ mẽ jé, fag tỹ inh ki ge jé, fag tỹ iso: “Topẽ tỹ ti jẽnẽ vê,” he jé,” he tóg, Jesus ti.

⁴³ Tag tó kar kỹ tóg jamã hár(a) prẽr mũ. “!..Lázaro, kuneg..!” he tóg. ⁴⁴ Kỹ ùn ter ja ãn tóg kãtĩg mũ sir, ã kej kãki tóg kãkutẽ mũ sir, mỹr, ha mẽ. Ti pẽn vỹ sigse kỹ nỹtĩ, ti nĩgé ke gé, kỹ ti kakã vỹ pãg kỹ nĩ gé. Kỹ Jesus tóg ag mỹ: “ha ti kava,” he mũ, “ti tĩg jé,” he tóg. Kỹ ag tóg ti kyvãn kãn mũ sir.

⁴⁵ Kỹ ù tỹ Maria fi mré kygfỹ jé kāmũ tỹ hên ri ke fag vỹ Jesus ki ge mũ sir, fag tỹ Jesus tỹ ti rĩn măn mũ ãn ven kỹ.

⁴⁶ Hã ra ù ag tóg Fariseu ag mỹ tónh mũ mũ, Jesus tỹ ti rĩn măn ja ti.

Ag tỹ Jesus tén ke to jykrén

(Mt 26.1-5; Mc 14.1-2; Lc 22.1-2)

⁴⁷ Kỹ Fariseu ag tóg mẽg mũ, Jesus tỹ Lázaro rĩn măn ja ti. Topẽ tũ ki rĩr tĩ to pã’i ag vỹ mẽ kãn mũ gé. Kỹ ag tóg vênh jyvẽn tĩ kar ag jé prẽr mũ. “Ëg hỹn ti tỹ hê ri kenh ke mũ?” he ag tóg mũ, Jesus to. “Milagre tỹ hên ri ke hyn han tóg tĩ. ⁴⁸ Ëg tỹ ti kato vãsãn tũ nĩn kỹ tóg ãg mỹ vênh kar tỹ ti ki genh ha mẽ tĩ. Kỹ ãg fóg tỹ Romano ag vỹ ãg kato vãsãsãn ke mũ. Topẽ jo ãn kókén jé ag tóg ke mũ, kỹ ag tóg ãg kãgtén kãn ke mũ gé, ãg fóg tỹ Romano ag, ha vemnĩ,” he ag tóg, vênh jyvẽn tĩ ag.

⁴⁹ Kỹ pã’i ag kāmĩ ù vỹ tỹ Caifás nĩ. Prỹg ãn kã tóg tỹ Topẽ tũ ki rĩr tĩ to pã’i mág nĩ, Caifás ti. ãn vỹ tóg ag mỹ: “to jykrén há han tũ ãjag nỹtĩ,” he mũ. ⁵⁰ “Tag to jykrén nĩ, ha mẽ. Ûn pir ter ke tóg kórég nĩ, hã ra tóg povo kãgter kãn kórég jakrẽm nĩ. Kỹ ti hỹn ãg povo jagfỹ ter ke mũ, Jesus ti,” he tóg, Caifás ti. ⁵¹ Hã ra tóg vêsóg ki tag to jykrén ja tũ nĩ. Prỹg ãn ki tóg tỹ Topẽ tũ ki rĩr tĩ to pã’i mág nĩ, hã kỹ Topẽ kuprĩg vỹ ti krĩn ja nĩ, ti tỹ Jesus to: “ãg povo jagfỹ tóg ter ke mũ,” he jé, Caifás ti. ⁵² Hã ra Judeu ag tăvĩ jagfỹ ke pijé’. Topẽ krẽ kar jagfỹ ke ja vê. Ti tỹ vênh kar tỹ ùn pir han sór ja vê, Jesus ti, hã jé tóg ãg jagfỹ ter ja nĩ, ù tỹ povo kar kāmĩ ti ki genh ke mũ ag kar jagfỹ.

⁵³ Pã’i ag tỹ tỹ vẽnén kar kỹ ag tóg ti tén ke to jykrén mũ sir. ⁵⁴ Hã kỹ Jesus tóg vênh pēju kỹ tĩ mũ, ga kórég ra, ãmã tỹ Efraim ra. Judeu ag mĩ tóg tĩg măn tũ nĩ sir. Efraim hã tá tóg nĩ nĩ ver, kỹ ti mré mũ tĩ ag vỹ ti mré tá nỹtĩ gé.

⁵⁵ Hã ra Judeu ag tỹ festa tỹ Páscoa há ù vỹ kakó tĩ ha. Kỹ ù tỹ hên ri ke ag tóg Jerusalém ra mũ mũ, Páscoa ãn ve jé. To hã ag tóg ra mũ mũ, vênh jãnhkrigkrig

jé, Judeu ag jykre ki. ⁵⁶Tá ag tóg Jesus jávānh mū, Topē jo īn tá nýtī kŷ. Kŷ ag tóg jagnē mŷ: “tī ā mŷ hŷn hē ri ke mū?” he mū. “Tī mŷ hŷn festa to kātīg ke mū vŷ?” he ag tóg mū, jagnē mŷ. ⁵⁷Hā ra Topē tū ki rŷr tī to pā'i ag vŷ vēnh kar mŷ vēnh vī jēnē ja nŷgtī, Fariseu ag mré hā. “Ājag tŷ ti ve kŷ ěg mŷ tónh kāmūmnī,” he ja ag tóg nī, vēnh kar mŷ. Ag tŷ ti se sór vē, hā kŷ ag tóg ke mū.

Betânia tá

(Mt 26.6-13; Mc 14.3-9)

12 Festa tŷ Páscoa to hā ke vē sir, kurā tŷ 6 (ke) vŷ jun nŷ ha. Kŷ Jesus tóg Betânia ra tŷg mǎn mū, Lázaro jamā ra, ūn rŷr mǎn mū ěn jamā ra. ²Tá fag tóg Jesus mŷ festa han mū. Kŷ Marta fi tóg vējēn ki rŷr mū. Lázaro vŷ Jesus mré nī nī, mesa to. ³Kŷ Maria fi tóg nén ger há ma kātī mū, garrafa fór, ūn kaja e. Ěn tŷ fi tóg Jesus pēn kri kujēg mū, kŷ fi tóg ā gānh tŷ kykūg mū, ti pēn ti. Kŷ ger há ěn tóg īn kar ěn kri rūm ke mū.

⁴Kŷ tóg Judas Iscariotes mŷ e tī, ū tŷ Jesus mré mū ěn ag kā ū tag mŷ, ū tŷ pā'i ag mŷ Jesus ven ke mū tag mŷ. Fi tŷ ger há tŷ ti pēn to tŷn kŷ tóg ti mŷ e tī, kŷ tóg fi to: ⁵“fi tŷ ger há ěn fón ke vē vē, jānkamy tŷ hēn ri ke to,” he mū. “Fi tŷ ūn jagāgtar ag mŷ jānkamy ěn kā vēnh kápópām jé vē vē,” he tóg mū, Judas tī. ⁶Hā ra tóg tag tó, ti tŷ Jesus mŷ jānkamy ki rŷr kŷ. Hā ra tóg ti jānkamy péju(g) tī. Hā kŷ tóg fi to tag tó ja nī, Judas tī. Ti tŷ ūn jagāgtar ag to jykrén ja pijé'. Ti tŷ jānkamy ěn mǎn sór ja vē. ⁷Hā ra Jesus tóg ti mŷ: “fi to vī tŷg,” he mū. “Fi tŷ nén ger há ěn nīm han ja vē, fi tŷ iser jé inh kri kujēn jé, isŷ inh kej kākā nŷ jé. Ki hā fi tóg han ja nī. ⁸Ūn jagāgtar ag vŷ ājag mré nŷtī, tŷ' hēnh ke tŷ ag tóg nŷtī. Ag jāvo sóg kānhmar ājag mré nī mǎn ke tŷ nī,” he tóg, Jesus ti.

Ag tŷ Lázaro tén sór

⁹Kŷ Judeu tŷ hēn ri ke ag vŷ mēg mū, Jesus tŷ Betânia tá nī ti, kŷ ag tóg ti venh kāmū mū. Hā ra ag tóg Lázaro ve sór mū gé, ūn rŷr mǎn mū ěn ti. ¹⁰Pā'i ag tóg Lázaro tén sór mū gé sir. ¹¹Judeu tŷ hēn ri ke ag vŷ Jesus ki ge kŷ nŷtī, ti tŷ Lázaro rŷn mǎn ja tugrŷn, hā kŷ ag tóg Lázaro tén sór mū.

Jesus tŷ Jerusalém ra tŷg

(Mt 21.1-11; Mc 11.1-11; Lc 19.28-40)

¹²Tŷ vaj kŷ Jesus tóg Jerusalém ra tī mū. Kŷ ūn e ag tóg Jesus tŷ Jerusalém ra tī mēg mū sir, ū tŷ festa venh kāmū mū ěn ag. ¹³Kŷ ag tóg ti ve jé kāpa mū, Jerusalém tá. Tānh féj génh kŷ ag tóg ti venh kāmū mū. Kŷ ag tóg: “!..Viva..!” he mū. “!..Sér tóg tī ěg mŷ..! !..Ěg jóg mág vŷ ti jēnē..! !..Israel kri pā'i mág pē vē..!” he ag tóg, prēnprēr kŷ. ¹⁴Hā ra Jesus vŷ burrico sī ve ja nī, kŷ tóg kri nī kŷ Jerusalém ra tī mū. Hā ra tóg rán kŷ nī, Topē vī tŷ rán kŷ nī ki, ti tŷ burrico sī kri tŷg ke ti, ha mē: ¹⁵“kamēg tŷg nī, Siāo tá ke kar',” he tóg. “Ājag pā'i mág vŷ ūri jun ke mū ha. Burrico sī kri tóg jun ke mū ha,” he ja tóg nī, Topē vī rán ki, Jesus to.

¹⁶Kurā ěn kā ag tóg ti rá tag to jykrén ja tŷ nī ver, Jesus mré mū tī ag. Jesus tŷ kanhkā ra vŷn ke kar kŷ ag tóg kejēn to jykrén mū ha, ti to rán kŷ nī ěn to, hā ra tóg ge ja nī.

¹⁷Ū tŷ Jesus mŷ prēnprēr mū ag kāmī ū ag tóg Lázaro ve ja nī, Jesus tŷ ti rŷn mǎn kŷ. Lázaro tŷ vēnh kej kākā nŷ ra Jesus tóg ti jé prēr kŷ ti rŷn mǎn ja nī. Ū tŷ tag vég mū ěn ag vŷ jagnē mŷ kāmén mū sir. ¹⁸Hā kŷ ūn e ěn ag tóg Jesus kato pétē mū, ti tŷ jun ke kŷ. Ū ter kŷ nŷ rŷn mǎn ěn ve ja tŷ ag tóg nŷtī, kŷ tóg ag mŷ e tī. ¹⁹Kŷ Fariseu ag tóg jagnē mŷ: “ha vé, ag pi(jé) ěg vī jēmē sór mū',” he mū.

“Ti hã mré ag tóg mû mû,” he ag tóg, ti to jũgũ kũ, pã'i ag.

Fóg tỹ Grego ag tỹ Jesus ve sór

²⁰ Festa venh kãmũ mû ag vỹ e nỹtĩ. Ag kãmĩ ù vỹ tỹ ga tỹ Grécia tá ke nỹtĩ gé. ²¹ Ën ag vỹ Jesus ve sór mû. Hã kũ ag tóg Filipe mré vỹ mû. Ga tỹ Galiléia tá emã tỹ Betsaida tá ke vỹ tỹ ti nĩ, Filipe ti. Kũ fóg tỹ Grego ãn ag tóg Filipe mỹ: “ẽg tỹ Jesus venh há tóg tĩ,” he mû.

²² Kũ Filipe tóg André mỹ tónh tĩ mû, kũ ag tóg Jesus mỹ tónh mû mû, Filipe ti, André ti ke gé.

²³ Hã ra Jesus tóg ag mỹ: “inh kurã vỹ hur jun,” he mû. “Topẽ vỹ isỹ ùn mág han ke mû ha. Tỹ sóg ẽprã ke fi kósin nĩ,” he tóg. ²⁴ “Ki hã sóg ãjag mỹ tó mû, hã kũ sóg tó mû. Isén jé ag tóg ke mû, ùn e ag tỹ isugrĩn rĩnrĩn nỹtĩ jé. Ẽg tỹ nén ù fy krãn ri ke ti nĩ. Ti péju(g) ẽg tóg tĩ, ga ki, kũ tóg vag tĩ, nén ù fy fár ti. Hã ra ti fy ẽn tóg rĩr mãn kũ mur mû, kũ tóg mog kũ kanẽ e han mû. Ẽg tỹ ti krãn tũ nĩ ra tóg kanẽn ke tũ nĩ vẽ. ²⁵ Ën ri ke tóg nĩ, ẽg mré hã. Ẽg hã vỹ tỹ nén ù fy ri ke nỹtĩ gé. Ẽg tỹ ẽg jykre si to vãnh kũ ẽg tóg ẽg rĩr krỹg ja tũ ẽn venh ke mû. Jãvo ẽg tỹ ẽg jykre si to vãnh pẽ han tũ nĩn kũ ẽg rĩnrĩr ke ẽn tóg krỹ he mû sir. Kũ ẽg kanhkã tá vэг tũ nĩ sir. ²⁶ Ẽjag tỹ inh rãnrãj han sór kũ inh ri ke han nĩ, kũ ãjag tóg tỹ inh mré ke nỹtĩn mû, kũ ãjag tóg inh mré kanhkã tá nỹtĩn ke mû gé, ãjag tỹ inh rãnrãj han kũ. Kũ inh panh vỹ ãjag tỹ ùn mág han ke mû gé, inh ri ke han jé tóg ke mû, ãjag tỹ,” he tóg, Jesus ti.

Jesus tỹ ã ter ke tó

²⁷ “Ũri tóg inh mỹ e tĩ,” he tóg. “Krĩ kufy jagy isóg nĩ. Ge ra sóg inh panh mỹ: “inh kren han nĩ, inh jagtar tũ nĩ jé,” he sór tũ nĩ. Inh vësýrénh hã jé sóg kãtũg, ti tỹ inh mỹ jagy pẽ (hã) ra. ²⁸ Tag tó jé

sóg ke mû, inh panh mỹ, hã vỹ: “vènh kar mỹ ven nĩ, ã tỹ tỹ ùn mág nĩ tag ti,” he mû,” he tóg, Jesus ti.

Ti tỹ tag tó kũ vãhã Topẽ tóg ti mỹ vỹ mû, kanhkã tá nĩ kũ. Kũ tóg jamã hár(a) ti mỹ: “ag mỹ sóg ven huri,” he mû. “Hã ra sóg ag mỹ ven mãn ke mû gé, isỹ tỹ ùn mág nĩ ti,” he tóg, Topẽ ti. Kanhkã tá nĩg kũ tóg ti mỹ tó mû. ²⁹ Kũ ùn e ag tóg mẽg mû, Topẽ vỹ ti, ag tỹ ẽprã nỹtĩ ra. Kũ ag tóg ti vỹ to: “ta tỹ tỹrỹr he hỹn,” he mû. Ag tỹ ki kagtũg nỹtĩn kũ ag tóg Topẽ vỹ to: “ta hỹn,” he mû. Hã ra ù ag tóg: “Topẽ tỹ jẽnẽ jafã ù hỹn ti mré vëmén,” he mû gé, ag tỹ ki kagtũg nỹtĩn kũ.

³⁰ Hã ra Jesus tóg ag mỹ: “Topẽ pi(jé) isugrĩn vỹ ja nĩ,” he mû. “Ẽjag tugnĩn ke ja vẽ,” he tóg. ³¹⁻³² “Hã kũ ãjag tóg ka to isanh ke mû, kynhmỹ. Topẽ tỹ ẽprã ke ag jykre to: “kórég ti nĩ,” he vẽ, ti tỹ tag ki ùn mág tỹ Japo he mû ẽn to: ti kutẽ jé, he vẽ, hã kũ ag tóg cruz to isãg mû. Ën kã vènh kar ag vỹ inh ki genh ke mû, isỹ ag krĩn kũ, ha vemnĩ,” he tóg, Jesus ti. ³³ Tag tó tóg, ã mré mû tĩ ag mỹ, ã ter ke kãmén kũ, ag tỹ cruz to ti sanh ke ti.

³⁴ Kũ vènh kar ag tóg ti mỹ: “hã ra ag tóg ẽg mỹ: “Cristo vỹ ter ke tũ nĩ,” he tĩ. Topẽ vỹ ki ti nẽji rãn kũ nĩ,” he ag tóg mû. “Jãvo ã tóg ẽg mỹ: ẽprã ke fi kósin ẽn tỹ ag tóg cruz to ti sanh ke mû, kynhmỹ, he mû. Û to ke nẽ, hỹn, ẽprã ke fi kósin ẽn?” he ag tóg, Jesus mỹ.

³⁵ Kũ tóg ag mỹ: “ver sóg ãjag mré nĩ nĩ, sỹ ãjag mỹ kurã han jé,” he mû. “Kurã ki inh japry jagma mũmũ. Kãnhmar ti kuty ninh mû. Ajag tỹ kuty ra inh jamĩn jagma mû sór mû ra ãjag tóg vãgfor mũnh ke mû. ³⁶ Isỹ ver ãjag mré nĩn kũ inh ki ge sórmnĩ, ãjag tỹ tỹ inh mré ke nỹtĩ jé. Kũ ãjag tóg kurã ki nỹtĩ, isỹ tỹ jẽngrẽ ri ke nĩn kũ,” he tóg, Jesus ti. Ẽ tỹ tag tó kar kũ tóg tĩ mû, ag ré kũ. Vènh péju kũ tóg tĩ mû.

Judeu ag tỹ Jesus ki ge sór tũ

³⁷ Jesus vỹ ag rĩnve nén tỹ hên ri ke hyn han ja nĩgtĩ, ěg tỹ nén han vánh tỹ hên ri ke, milagre tỹ hên ri ke, hã ra ag tóg ti ki ge sór tũ nĩgtĩ. ³⁸ Hã ra Isaías vỹ tag rán ja nĩ gé. “Eg jóg mág,” he ja tóg nĩ. “Isỹ ag mỹ ă kămén mũ ra ag tóg inh vỹ kri nĩm sór tũ nỹtĩ,” he ja tóg nĩ. “Ag tỹ ă tỹ nén han mũ ěn vэг mũ ra ag tóg: “Topẽ jykre vỹ tar nĩ,” he ja tũ nĩ,” he ja tóg nĩ, Isaías ti. Hã ra tóg ge nĩgtĩ, Jesus tỹ ag mỹ Topẽ vỹ tón kỹ, ti tỹ ag mỹ milagre hyn han kỹ.

^{39–40} Kỹ Isaías vỹ ag to tag tó gé, ha mẽ. “Topẽ vỹ ag kyvó han, nĩgrẽg kutu, hã kỹ ag tóg mẽg tũ nĩgtĩ, kỹ ag tóg to jykrén sór tũ nĩgtĩ gé, kỹ ag tóg inh ki ge sór tũ nĩgtĩ gé, kỹ sóg ag tỹ há’ henh ke tũ nĩ gé,” he ja tóg nĩ gé, Isaías ti, ti tỹ Topẽ vỹ tó kỹ. Jesus to tóg ke mũ. Hã kỹ ag tóg Jesus ki ge sór tũ nĩgtĩ. ⁴¹ Isaías vỹ Jesus ve ja nĩ, ti tỹ tỹ ùn mág nĩ ti, ùn tar ti. Jesus mur to hã ke ja vẽ, vãsỹ. Ti tỹ ti ve hã kỹ tóg tag tó ja nĩ, ti to, Isaías ti.

⁴² Hã ra ù ag tóg ti ki ge kỹ nỹtĩ gé, pã’i ù ag mré hã. Hã ra ag tóg tó sór tũ nĩgtĩ. Fariseu ag kamẽg ag tóg ti, hã kỹ ag tóg tó sór tũ nĩ. “Fariseu ag vỹ ěg pan ke mũ, ěg tỹ ěg vãnh kanhrân jafã ra mũ tũ nĩ jé, ěg tỹ ěg mré ke ag mré tá vãnh măn kỹ nỹtĩ tũ nĩn jé,” he ag tóg mũ, hã kỹ ag tóg Jesus tó tũ nĩgtĩ. ⁴³ Ěprã ke ag tỹ ag to vỹ há han mũ tag vỹ ag mỹ sér ti, kỹ Topẽ tỹ ag mỹ vỹ há han mũ vỹ ag mỹ pãgsĩ ti. Hã ti nĩ gé vẽ vẽ, hã ra ag tóg ěprã pã’i ag hã kamẽg mũ.

Ag jykre kórég vãnh ven ke

⁴⁴ Kỹ Jesus vỹ jamã hár(a) ke mũ, vãnh kar tỹ ti vỹ mẽ jé. Kỹ tóg: “ãjag tỹ inh ki ge kỹ ãjag tóg ù tỹ inh jẽnẽg mũ ěn ki ge mũ gé,” he mũ. ⁴⁵ “ãjag tỹ inh ve kỹ ãjag tóg ti vэг mũ gé, ù tỹ inh jẽnẽg mũ ěn ti. ⁴⁶ Sỹ ãjag mỹ kurã han hã jé sóg kãtĩg.

ãjag tỹ inh ki ge kỹ sóg ãjag mỹ kuty ěn tỹ tũ’ he mũ. ⁴⁷ ãjag tỹ ón kỹ inh vỹ mẽg mũ ra sóg ãjag to: “kórég ãjag nỹtĩ,” henh ke tũ nĩ. Inh pi(jé) ãjag mỹ: “kórég ãjag nỹtĩ,” he jé kãtĩg’. Sỹ ãjag krenkren han hã jé sóg kãtĩg. ⁴⁸ ãjag tỹ iso é he kỹ, ãjag tỹ inh vỹ to é he kỹ tóg vãnh ven mũ, ãjag jykre kórég ěn ti, ha vemnĩ. Isỹ ãjag mỹ inh vỹ tó mũ ra ãjag tóg inh vỹ kri nĩm jãvãnh nỹtĩ. Hã tugrĩn tóg vãnh ven ke mũ, ãjag jykre kórég ti, kurã tỹ ěgno tá hã. ⁴⁹ Inh pi(jé) isỹ vęsóg ki nén to jykrén ja ěn tó ti’. Inh panh vỹ hã tó ja inh nĩgtĩ, ù tỹ inh jẽnẽg mũ ěn vỹ ti. Ěn vỹ inh mỹ: “tag tómnĩ, tag tó tũg nĩ,” he ti. ⁵⁰ Ti tỹ inh mỹ nén tó mũ vỹ ãjag rĩnrĩr han ke mũ, ki kanhró sóg nĩ. Hã kỹ sóg inh panh tỹ inh mỹ nén tó mũ ěn hã tó ti, tag tãvĩ,” he tóg, Jesus ti.

Jesus tỹ ă mré mũ ti ag pẽn kugpe

13 Hã ra festa tỹ Páscoa vỹ kakó tãvĩ ti sir, hã ra tóg tá krỹg tũ nĩ ver. Kỹ Jesus vỹ ki kanhró nĩ, ti tỹ ùri ter ke ěn ti. Ti kurã vỹ jun ja nĩ, ti tỹ ă panh ra tĩg jé. ă mré mũ ti ag to tóg há tãvĩ ja nĩgtĩ, ag tỹ tỹ ti tũ nỹtĩn kỹ. Kỹ tóg ă ter ke kurã ěn kã ag to há tãvĩ nĩ gé, tag ki, ěprã, ti mré mũ ti ag to.

² Kỹ tóg rãkãnh kỹ ag mré jẽg mũ. Hã ra Japo vỹ Judas krĩn huri, ti tỹ pã’i ag mỹ Jesus ven tĩg jé, ag tỹ ti se jé. Judas Iscariotes ěn vẽ, Simão kósin ěn. ³ Hã ra Jesus tóg ki kanhró nĩ, ă tỹ Topẽ tá kãtĩg ja ěn ki, kỹ tóg ki kanhró nĩ gé, ă tỹ ra tĩg măn ken ki. Kỹ Topẽ tóg ti tar han mũ gé, ti tỹ nén ù kar ki ag mỹ tỹ ùn mág jẽ jé. Ěn ki kanhró tóg nĩ gé, Jesus ti. ⁴ Tag kar to jykrén kỹ tóg vãhã jẽgnẽ mũ sir, jẽn kar kỹ. Jẽgnẽ kỹ tóg ă capa kunũnh kỹ vãnh pẽfi jafã tỹ vãnh pẽfi mũ. ⁵ Goj tỹ tóg pẽnky kãki kujẽg mũ, kỹ tóg ă mré mũ ti ag pẽn kugpég mũ. Vãnh pẽfi jafã ěn tỹ tóg ag pẽn kykũg mũ. ⁶ Kỹ tóg Simão Pedro tá jun mũ gé,

ti pên kugpe jé. Hã ra Pedro tóg ti mý: “ã pi(jé) inh pên kugpenh ke mû,” he mû.

⁷ Hã ra Jesus tóg ti mý: “ã pi(jé) ki kanhró nĩ, sý ã mý nén han mû ti,” he mû. “Kar ký ã tóg kejên to jykrén ke mû,” he tóg.

⁸ Hã ra Pedro tóg ti mý: “vó,” he mán mû. “Inh pên kugpenh ke tũ ã tóg nĩ,” he tóg. Ký Jesus tóg ti mý: “isý ã pên kupég tũ nín ký ã tóg tý isũ tũ ninh ke mû,” he mû.

⁹ Ký Pedro tóg ti mý: “inh kupe kân nĩ, ge ký, inh pên, inh krĩ, inh nĩgé ke gé,” he mû.

¹⁰ Hã ra Jesus tóg ti mý: “mro ã huri,” he mû. “Ã mro kar ký sóg ã pên hã kugpenh ke mû. Jãnhkri ã nĩ, ã mro kar ký. Jãnhkri ãjag nýtĩ, hã ra ãjag kãmĩ ùn pir vỹ jãnhkri tũ nĩ,” he tóg, Jesus ti. ¹¹ Û tỹ pã'i ag mý ã ven ke mû ên ki kanhró tóg nĩ, Jesus ti, hã ký tóg ag mý: “ãjag kãmĩ ùn pir vỹ jãnhkri tũ nĩ,” he mû.

¹² Ký tóg ag pên kugpe kân mû. Ag pên kugpe kar ký tóg ã kur rĩnh mán mû, ký tóg nĩ mán mû. Ký tóg ag mý: “ãjag mý sý nén han ja ki kanhró nýtĩ?” he mû.

¹³ “Iso ãjag tóg: Senhor, he tĩ. Tó há han ãjag tĩ. Tỹ sóg ãjag Senhor nĩ. ¹⁴ Ký sóg tỹ ãjag professor nĩ gé. Hã ra sóg ãjag pên kupé. Hã ký tóg há tĩ, ãjag tỹ jagnê mý jagnê pên kugpe ký, inh ri ke han ký. ¹⁵ Sý ãjag kanhrân sór vê, hã ký sóg ãjag mý ãjag pên kupé. Inh ri ke han nĩ.

¹⁶ Ki hã sóg tó mû, hã ký sóg ke mû. Êg camarada pi(jé) ãjag patrão kãfór nýtĩ'. Ký êg tỹ ù jênên ký tóg ù tỹ ti jênêg mû ên kãfór tũ nĩ gé. ¹⁷ Tag ki kanhró ãjag nýtĩ, ký tóg há tĩ, ãjag tỹ inh ri ke han ký. ¹⁸ ãjag kãmĩ ù tóg tag han ke tũ nĩ, ki kanhró sóg nĩ. ãjag kuprêg inh, ký sóg ãjag ki kanhró nĩ. Tag vỹ ãjag kãmĩ ù to rán ký nĩ, ha mē: “ũ tỹ inh mré inh jamĩ ko mû ên vỹ isovãnh ke mû ha,” he ti nĩ, Topê vỹ tỹ rán ký nĩ ki. Isý tag ve jé sóg ãjag kuprêg. ¹⁹ Ûri sóg ãjag mý tó mû,

ti tỹ isovãnh ke to hã, ãjag tỹ ên ve ký inh ki êkrén' he jé. Ên ve ký inh ki ge ký nýtĩmnĩ jãvo. ²⁰ Ki hã sóg tó mû, hã ký sóg ke mû. Isý ãjag jêgnênh ke vê. Ký ù tỹ ãjag mý vỹ há han ký tóg inh mý vỹ há han ke mû gé, hã ra tóg ù tỹ inh jênêg mû ên mý vỹ há han ke mû gé, ãjag mý vỹ há han ký,” he tóg, Jesus ti, ti mré mû tĩ ag mý.

Û tỹ pã'i ag mý Jesus ven ke

(Mt 26.20-25; Mc 14.17-21; Lc 22.21-23)

²¹ Jesus tỹ tag tó kar ký tóg ti mý e tĩ. Krĩ kufy jagy ti nĩ, ký tóg ã mré mû tĩ ag mý: “ki hã sóg tó mû, hã ký sóg ke mû,” he mû. “ãjag kãmĩ ù vỹ pã'i ag mý inh ven ke mû,” he tóg. ²² Ký tóg ag mý e tĩ. Ki kagtĩg ag nýtĩ, ký ag tóg véké jagnê ki êvãnh mû.

²³ Hã ra ù tóg Jesus rã hã nĩ nĩ, ên kã, ti tỹ ti to há nín ký. ²⁴ Ký Pedro tóg ti mý ã nĩgé ven mû, ký tóg ti mý: “ti ki jêmê há han,” he mû, ù tỹ Jesus rã hã nĩ ên mý. ²⁵ Ký tóg ti to grên ke ký ti mý: “Senhor,” he mû. “Û tỹ hê nê?” he tóg ti mý. ²⁶ Ký Jesus tóg ti mý: “êmĩ tỹ sóg ti kume kã tỹ pun ke mû,” he mû, “ký sóg ti mý nĩm ke mû sir. Ên hã vê,” he tóg mû, Jesus ti. Tag tó ký tóg êmĩ mäg mû, ký tóg ti kume kã tỹ pun ke mû sir, ký tóg Judas mý nĩm mû, Simão Iscariotes kósín ên mý. ²⁷ Ký Judas tóg ko mû. Ti tỹ ko kar mû ra vêsýmér Satanás tóg ti kãra rã ja nĩ sir. Ký Jesus tóg ti mý: “ã tỹ nén han sór mû ên han tĩg nĩ, to fũrũn nĩ,” he mû. ²⁸ Hã ra ù ag tóg ki kagtĩg nýtĩ, Jesus tỹ ti mý nén tó mû ên ki. ²⁹ Judas vỹ ag jãnkamy ki rĩr tĩ. Hã ký ag kãmĩ ù tóg: “ti hỹn ti mý: “êg mý festa to compra ù han tĩg,” he sór mû, ke tũ nĩ ký ti tỹ ùn jagãgtar ag mý nén ù nĩm ke hỹn,” he ag tóg mû. ³⁰ Hã ra Judas tóg êmĩ ên ko kar ký (tóg) króm ke kãkutê mû, re ra. Hã ra tóg kuty nỹ.

Vênh jykre tăg

³¹ Judas tīg kar kŷ Jesus tóg ã mré mŭ tĩ ag mŷ: “vãhã tóg vênh ven ke mŭ, isŷ tŷ ùn mág nĩ ti,” he mŭ. “Tŷ sóg êprã ke fi kósın nĩ. Hã ra sóg vênh kar mŷ Topê tŷ tŷ ùn mág nĩ tag ven ke mŭ gé. ³² Isŷ vênh kar mŷ Topê tŷ tŷ ùn mág nĩ ven kŷ Topê tóg vênh kar mŷ ven ke mŭ gé, isŷ tŷ ùn mág nĩ ti. Vêsŷmér tóg tag han ke mŭ, Topê ti, ha vemnĩ,” he tóg, Jesus ti.

³³ “Inh jãvy', ãjag mré sóg nĩ sĩ pẽ han mŭ ver,” he tóg. “Inh jãvãnh jé ãjag tóg ke mŭ, hã ra ãjag tóg inh venh ke tũ nĩ. Tag tó inh, Judeu ag mŷ, hã ra sóg ãjag mŷ tag hã tó mŭ gé, hã vŷ: ãjag pi(jé) isŷ hên ra tīg ke mŭ ên ki kanhró nŷtĩ', he mŭ. ³⁴ Kŷ sóg ãjag mŷ vênh jykre tăg nĩm sór mŭ, hã vŷ: jagnê to há tãvĩ nŷtĩmnĩ, he mŭ. ãjag to há tãvĩ sóg nĩ gé. Tag ri ke han nĩ, jagnê mŷ. Vênh jykre tăg hã vê. ³⁵ ãjag tŷ jagnê to há nŷtĩn kŷ vênh kar vŷ ãjag jykre ki kanhrãn ke mŭ. “Ti mré ke vŷ tŷ ag nŷtĩ,” he jé ag tóg ke mŭ ãjag to, ag tŷ ãjag jykre há ve kŷ,” he tóg, Jesus ti.

Jesus tŷ Pedro mŷ nén tó mŭ

(Mt 26.31-35; Mc 14.27-31; Lc 22.31-34)

³⁶ Kŷ Simão Pedro tóg Jesus mŷ: “Senhor,” he mŭ. “Ã tŷ hê ra tīg sór nê?” he tóg. Kŷ Jesus tóg: “ên ra ã tīg ke tũ nĩ ver, inh mré,” he mŭ. “Kar kŷ ã tóg kejên ên ra tīg ke mŭ gé, inh nón,” he tóg.

³⁷ Kŷ Pedro tóg ti mŷ: “isŷ ã mré tīg há tóg tĩ,” he mŭ. “Isŷ ã tugrĩn ter ken kŷ tóg inh mŷ tŷ nén ù tũ tĩnh mŭ,” he tóg. ³⁸ Hã ra Jesus tóg ti mŷ: “vó,” he mŭ. “Ūri ã tóg ón kŷ iso: “ti ki kagtīg sóg nĩ,” henh ke mŭ. “Ti ki kagtīg sóg nĩ,” he tăgtũ han jé ã tóg ke mŭ, galo kynkyr to hã. Ki hã sóg tó mŭ, ha vemnĩ,” he tóg, Jesus ti. Ti tŷ Pedro mŷ tón hã vê.

Kanhkã to êmĩn

14 Kŷ Jesus tóg ã mré mŭ tĩ ag mŷ: “krĩ kufy han tũg nĩ,” he mŭ. “Inh ki rã há han nĩ, kŷ Topê ki rã há han nĩ gé. ² Inh panh jamã tá ãjag ãn vŷ e nŷtĩ, ki hã sóg tó mŭ. Ti tŷ tá tũ nŷtĩ ra sóg tónh ke tũ nĩ vê. Ra tīg jé sóg ke mŭ, isŷ ãjag mŷ ãjag ãn kãnkãn jé. ³ Isŷ kãnkãn kar kŷ sóg tá kãtig mãn ke mŭ gé, sŷ ãjag tatĩn tīg jé, kŷ ãjag tóg inh mré tá nŷtĩnh mŭ. ⁴ Ti to êpŷy ki kanhró ãjag nŷtĩ, sŷ hê ra tīg ke to êmĩn ti,” he tóg.

⁵ Kŷ Tomé tóg ti mŷ: “êg pi(jé) ki kanhró nŷtĩ', ã tŷ hê ra tīg ke ti',” he mŭ. “Hã kŷ êg tóg ti to êpŷy ki kagtīg nŷtĩ gé,” he tóg. ⁶ Kŷ Jesus tóg ag mŷ: “ti to êmĩn vŷ tŷ inh nĩ,” he mŭ. “Vênh vĩ há hã tó sóg tĩ. Inh hã vŷ ãjag rĩnrĩr han ke mŭ. Ū tŷ inh ki ge mŭ ag vŷ inh panh venh ke mŭ. ⁷ ãjag tŷ inh ki kanhró nŷtĩn kŷ ãjag tóg inh panh ki kanhró nŷtĩ gé. Inh ki kanhrãn ãjag tóg huri, inh ve ãjag tóg huri,” he tóg, Jesus ti.

⁸ Kŷ Filipe tóg ti mŷ: “êg mŷ êg jóg mág ti ven nĩ,” he mŭ. “Êg tŷ ti venh há tóg ti,” he tóg. ⁹ Kŷ Jesus tóg Filipe mŷ: “ã mŷ inh ki kagtīg nĩ ver', isŷ ãjag mré tīg mág ja ra?” he mŭ. “Ã tŷ inh ve kŷ ã tóg inh panh ti vэг mŭ gé. Hã ra ã tóg inh mŷ: êg mŷ ti ven nĩ, he mŭ. ¹⁰ Inh panh mré sóg tŷ ùn pir nĩ, kŷ tóg inh mré tŷ ùn pir nĩ gé. ã mŷ tag kri fig tũ? Inh pi(jé) isŷ vêsóg ki nén to jykrén mŭ tó tĩ'. Inh panh tũ hã tó sóg tĩ, ti tũ hã han sóg tĩ, inh mré tŷ ùn pir nĩ ên tũ ti. Kŷ tóg inh mré nén kar han mŭ, inh panh ti. ¹¹ Inh vĩ kri nĩmnĩ, isŷ ã mŷ: “inh panh mré sóg tŷ ùn pir nĩ,” hen kŷ. ã tŷ hã ra inh vĩ kri fi sór tũ nĩn kŷ isŷ nén han mŭ ên ki êvãnh nĩ, ã tŷ to jykrén há han jé. ¹² Ki hã sóg tó mŭ, hã kŷ sóg ke mŭ. Ū tŷ inh ki rã há han mŭ ên vŷ isŷ nén han mŭ ri ke han ke mŭ gé, hã ra tóg isŷ nén han mŭ kãfór han ke mŭ, ha vemnĩ, isŷ ũri inh panh venh tīg ken kŷ. ¹³ Kŷ sóg

ājag tỹ inh mỹ nén ũ to vĩ mũ ên hyn han kân ke mũ, isỹ tỹ ājag kâke nĩn kỹ. Isỹ vênh kar mỹ inh panh tỹ tỹ ũn mág nĩ ven ke vễ, hã jé sóg ājag mỹ ājag tỹ nén to vĩ mũ ên hyn han ke mũ. ¹⁴Kỹ, ājag tỹ inh mỹ nén ũ to vính ken kỹ sóg ên hyn han kân ke mũ, isỹ tỹ ājag kâke nĩn kỹ, ha vemnĩ,” he tóg, Jesus ti.

Jesus tỹ Topê kuprĩg jẽnênh ke

¹⁵“Ājag tỹ iso há nỹtĩn kỹ han nĩ, isỹ ājag mỹ nén tó mũ ti. ¹⁶Kỹ isóg inh panh mỹ ti kuprĩg to vính ke mũ, ti tỹ ājag mỹ ti jẽnê jé, ti tỹ tỹ ājag jagrê nĩ jé, ti tỹ ājag tar han jé, kỹ tóg ājag továnh măn ke tũ nĩ. Ājag mỹ tóg ki hã tónh ke mũ. ¹⁷Hã ra tóg ũ tỹ inh ki ge jāvánh ên ag mỹ nén ũ tónh ke tũ nĩ, ag tỹ ti ki kagtĩg nỹtĩn kỹ. Ag jăvo ājag tóg ti ki kanhró nỹtĩ. Ājag kâtá tóg ājag mré nĩ nĩ, Topê kuprĩg ti,” he tóg, Jesus ti.

¹⁸“Inh pi(jé) ājag továnh ke mũ. Isỹ mũ ra sóg vỹn kenh ke mũ, ājag to. ¹⁹Kānhmar ũ tỹ inh ki ge jāvánh ên ag tóg inh ve măn ke tũ nĩ. Ag jăvo ājag tóg inh ve măn ke mũ. Rĩr inh nĩ nĩ, kỹ ājag tóg inh ri kén rĩr măn ke mũ gé. ²⁰Ājag tỹ Topê kuprĩg tỹ ājag jagrê venh ke kurā ên ki ājag tóg inh ki kanhrân há han ke mũ, isỹ inh panh mré tỹ ũn pir nĩ ên ti. Kỹ ājag tóg inh mré tỹ ũn pir nỹtĩn mũ gé, ha mẽ,” he tóg, Jesus ti.

²¹“Ũ tỹ inh vĩ hã ki kanhrân mũ ên, ũ tỹ inh vĩ hã ki króm mũ ên hã vỹ iso há nĩ. Kỹ ũ tỹ iso há nĩ ên to inh panh tóg há tăvĩ nĩ. Ên to sóg há tăvĩ nĩ gé. Ên vỹ inh venh ke mũ,” he tóg, Jesus ti.

²²Kỹ Judas tóg ti ki jêmêg mũ. Judas Iscariotes pijé’, Judas ũ vễ. Ên vỹ Jesus mỹ: “êg mỹ ã tóg vênh ven sór mũ,” he mũ, “hã ra ã tóg ũ tỹ ã ki ge sór tũ ag mỹ vênh ven sór tũ nĩ. Ā hẽ ri kenh ke mũ?” he tóg mũ.

²³Kỹ Jesus tóg ti mỹ: “ũ tỹ iso há nỹtĩ kar ag vỹ inh vĩ ki króm ke mũ,” he mũ. “Ũ tỹ inh vĩ ki króm mũ to inh panh tóg

há nĩ, kỹ tóg ti mré êmân ke mũ. Kỹ sóg ti mré êmân ke mũ gé. ²⁴Ũ tỹ iso há tũ ên vỹ inh vĩ han sór ke tũ nĩ gé. Inh pi(jé) inh vĩ hã tó tĩ. Ũ tỹ inh jẽnêg mũ ên vĩ hã tó sóg tĩ, inh panh vĩ ti,” he tóg.

²⁵“Ājag mré sóg nĩ nĩ ver, kỹ sóg ājag mỹ tag kāmén mũ. ²⁶Isĩg kar kỹ sóg ājag mỹ vêsýmér ũ tỹ ājag tar han ke mũ ên jẽnênh ke mũ, hã vỹ: Topê kuprĩg, he mũ. Inh panh vỹ ājag mỹ ti jẽnênh ke mũ. Ên vỹ nén ũ kar to ājag kanhrân há han ke mũ. Kỹ tóg ājag mỹ tó măn ke mũ gé, sỹ ājag mỹ nén tó mũ kar ti, ājag tỹ kã jatun tũ nĩ jé,” he tóg, Jesus ti.

²⁷“Ājag krĩ kánhvy han jé sóg ke mũ. Sỹ ājag mỹ nén nĩm ke mũ hã vỹ: krĩ kánhvy, he mũ. Hã ra tóg ũ tỹ inh ki ge jāvánh ag krĩ kánhvy sĩ ên ri ke tũ nĩ, sỹ ājag mỹ ājag krĩ kánhvy han mũ ti. Krĩ kánhvy pẽ ājag nỹtĩn ha. Hã kỹ krĩ kufy han tũg nĩ. Kanê jur han tũg nĩ gé. ²⁸Inh vĩ tag mẽ ājag tóg huri, isỹ ājag mỹ: “tũg jé sóg ke mũ, kar kỹ sóg ājag to vỹn kenh ke mũ gé,” he mũ ti. Ājag tỹ iso há nỹtĩ ra tóg ājag mỹ sér tĩnh mũ vễ, isỹ inh panh venh tũg ke ti. Inh panh vỹ inh kăfór nĩ. ²⁹Ũri sóg ājag mỹ tag kāmén mũ, ājag tỹ ên venh ke to hã. Kỹ inh mĩ êkrén nĩ, ājag tỹ ên venh ken kỹ. Ên kã inh ki ge kỹ nỹtĩmnĩ. ³⁰Isỹ ājag mré vêmén tag vỹ rur nĩ ha. Êpră pã’i mág jun ke nẽ ha. Hã ra ti pi(jé) tỹ inh krĩg mỹ ke nĩ. ³¹Hã ra sóg sỹ nén han ke mũ ên han sór mũ, êpră ke kar ag tỹ inh jykre ve jé, isỹ inh panh to há tăvĩ nĩ ti. Kỹ sóg inh panh tỹ inh mỹ nén tó mũ ên han kân tĩ. Hã ven sór inh mũ, êpră ke kar ag mỹ. Mũ jé ha, re ra,” he tóg, Jesus ti. Ti tỹ ã mré mũ ti ag mỹ ag tỹ nén venh ke kāmén hã vễ.

Jesus tỹ uva fa ri ke nĩ

15 Ag mũn kỹ Jesus tóg ag mỹ: “uva fa ri ke inh nĩ,” he mũ. “Inh panh vỹ ũ tỹ uva ki rĩr mũ ên ri ke nĩ. ²Kỹ ājag uva pẽ ri ke nỹtĩ,” he tóg. “Ũ tỹ inh vĩ han sór tũ ên ag hã vỹ uva pẽ kanên

vành ên ri ke nýtĩ. Ên kym ky tóg fón tĩ, inh panh ti, uva pê kanê vanh ên ti. Ûn kanê há han mũ ên ki rĩr há han tóg tĩ, ên fêj rógřam tóg tĩ, ti pê kásir nêgnêm tóg tĩ gé, ti tỹ kanê e han jé. ³ Tag ri ke han ti tĩ, inh panh ti, ājag tỹ. Ājag tỹ há he tóg huri, inh panh ti, ājag tỹ inh vĩ kri nĩm tugrĩn. ⁴ Isovānh tũg nĩ, ky sóg ājag to vānh ke tũ pê nĩ gé. Uva pê ên ri ke ti nĩ. Ti tỹ ti pê rógřam ky tóg tóg mũ. Ĵavo ti pê tỹ uva fa ên to nỹgtĩn ky tóg kanê há han ti. Ên ri ke ti nĩ, ājag tỹ inh ki ge ky nýtĩ tag ti. Ājag tỹ inh ki ge ky nỹtĩn ky ājag tóg vênh jykre há há han ky nýtĩ nĩ, Ĵavo ājag tỹ isovānh ky ājag tóg vênh jykre há to vānh ke mũ gé,” he tóg, Jesus ti.

⁵ “Uva fa ri ke inh nĩ, ky ājag tóg uva pê ri ke nýtĩ gé. Ājag tỹ inh ki ge ky nỹtĩn ky ājag tóg kanê e han ke mũ, ājag tỹ isovānh tũ nĩn ky. Ājag pi(jé) ājag pir mỹ nén ũ há han ki kanhró nýtĩ. Inh hã ne ājag tar han tĩ. ⁶ Ũ tỹ isovānh ke mũ ên fón jé tóg ke mũ, inh panh ti. Ēg tỹ uva pê kórég kym ky vām ên ri ke tóg nĩ. Ēg tỹ ti pê kym ky fón ky tóg tóg mũ, ky Ēg tóg ti pũn tĩ sir. Ên ri ke han jé tóg ke mũ, inh panh ti, ũ tỹ isovānh mũ ên tỹ. ⁷ Ājag tỹ isovānh tũ nĩn ky, ājag tỹ isỹ ājag mỹ nén tó mũ ên to jykrén ky nỹtĩn ky, ky inh mỹ nén kar to vĩmnĩ. Han jé sóg ke mũ, ājag mỹ, ājag tỹ inh mỹ nén to vĩ mũ ên ti, ha vemnĩ. ⁸ Ājag tỹ vênh jykre há han ky tóg uva pê tỹ kanê e han ri ke nĩ. Ky vênh kar ag tóg ājag jykre ve ky Topê to: “ũn há vỹ tỹ ti nĩ,” henh ke mũ. Hã ki ag tóg ki kanhró nỹtĩn mũ, ājag tỹ tỹ inh mré ke nýtĩ ti. ⁹ Inh panh vỹ iso há tãvĩ nĩ. Ge inh nĩgtĩ gé, ājag to. Ājag to ha pê sóg nĩ gé. Inh ki ge ky nỹtĩmnĩ, sỹ ājag to há tãvĩ nĩ jé. ¹⁰ Ājag tỹ isỹ ājag mỹ nén tó mũ ki króm ky ājag tóg inh ki ge ky nỹtĩn mũ, ky sóg ājag to há nĩ gé. Hã ky sóg inh panh vỹ hã ki króm kãn mũ, ky tóg iso há tãvĩ nĩ.

¹¹ Inh mỹ tóg sér tĩ. Ky sóg ājag mỹ tag tó mũ, ti tỹ ājag mỹ sér tĩn jé gé, ti tỹ inh mỹ sér ên ri ke tĩn jé gé, ājag mỹ. Ti tỹ ājag mỹ sér tĩ hã jé sóg ājag mỹ inh jykre kāmén mũ. ¹² Sỹ ājag mỹ vênh jykre nĩm mũn hã vê, ha mẽ. Ĵagnê to há pê nỹtĩmnĩ, sỹ ājag to há nĩ ên ri ke han nĩ, he sóg mũ. ¹³ Ũ tỹ ā mré ke ũ ag jagfy ter sór mũ ên vỹ ag to há ja nĩgtĩ. Ũ tỹ Ēg to há kãfór pê ên vênh ke tũ Ēg tóg nĩ, Ēprã. ¹⁴ Inh mré ke pê vỹ tỹ ājag nýtĩ, ājag tỹ inh vĩ ki króm ky. ¹⁵ Hã ky sóg ājag to: “inh camarada ag,” he tũ nĩgtĩ gé. Ēg pi(jé) Ēg camarada ên ag mỹ Ēg tỹ nén to jykrén mũ ên kāmén tĩ. Ēg mré ke ag hã mỹ Ēg tóg kāmén tĩ. Ājag mỹ sóg inh panh tỹ inh mỹ nén tó mũ ên kāmén kãn huri, hã ky sóg ājag to: “inh mré ke ag,” he mũ. ¹⁶ Ājag pi(jé) inh kuprêg. Inh hã ne ājag kuprêg. Ky sóg ājag mỹ: “kanê e han nĩ,” he mũ ha, hã vỹ: vênh jykre há, he mũ. Vênh jykre há hã vỹ tũ henh ke tũ nĩ. Ājag tỹ ên han ky jatun mỹ Topê mỹ nén kar to vĩmnĩ, inh jyjy tó ky. Ājag tỹ ti mỹ nén ũ to vĩ mũ ên han jé tóg ke mũ, Topê ti, ājag tỹ vênh jykre há han ky nỹtĩn ky. ¹⁷ Sỹ ājag mỹ nén tó mũn hã vê, hã vỹ: Ĵagnê to há nỹtĩmnĩ, sỹ ājag to há nĩ ên ri ke, he mũ,” he tóg, Jesus ti.

Ũ tỹ Ēg to jũnh ke ag

¹⁸ Ũ tỹ inh ki ge tũ ag vỹ iso jũ vén ja nĩgtĩ, ky ag tóg ājag to jũ nýtĩ gé. Tag mĩ Ēkrén nĩ, ag tỹ ājag to jũnh ken ky. ¹⁹ Ājag pi(jé) tỹ ag mré ke nýtĩ. Ājag tỹ tỹ ag mré ke nýtĩ ra ag tóg ājag to há nỹtĩn ke mũ vê, hã ra ājag tóg tỹ ag mré ke tũ nýtĩ. Ājag kuprêg inh, ag kāmĩ, ājag tỹ tỹ inh mré ke nýtĩ jé, hã ky ag tóg ājag to jũ nýtĩ. ²⁰ Vãsỹ sóg ājag mỹ: “ājag pi(jé) inh kãfór nýtĩ,” he ja nĩgtĩ. Tag mĩ Ēkrén nĩ. Inh camarada ri ke ājag nýtĩ, Ĵavo sóg tỹ ājag patrão ri ke nĩ. Ag kāmĩ ũ tóg inh vóg kónān ke mũ. Ên vỹ ājag vóg kónān ke mũ gé. Ag kāmĩ ũ tóg inh

vĩ ki króm tĩ. Ên ag vỹ ājag vĩ ki króm ke mũ gé. ²¹ Hã ra ag tóg ājag vóg kónăn ke mũ gé, ājag tỹ tỹ inh mré ke nỹtĩn kỹ. Ag pi(jé) ũ tỹ inh jēnēg mũ ên ki kanhró nỹtĩ. ²² Inh kãtĩ tũ ra, isỹ ag mỹ inh vĩ tó tũ ra ag tóg: “hã ra ěg tóg ki kagtĩg nỹtĩ,” henh ke mũ vê. Hã ra sóg ag mỹ tó, hã kỹ ag tóg ki kanhró nỹtĩ. ²³ Ũ tỹ iso jũ nỹtĩ ěn ag vỹ inh panh to jũ nỹtĩ gé. ²⁴ Nén ũ han vánh hyn han sóg tĩ, ag rĩnve, kỹ ũ vỹ tag han ja tũ pē nĩ ijo. Isỹ tag han tũ nĩ ra ag tóg: “vég tũ ěg nĩ,” henh ke mũ vê. Hã ra ag tóg vé, ag tỹ vég mũ ra ag tóg ge ra iso jũ nỹtĩ, kỹ ag tóg inh panh to jũ nỹtĩ gé. ²⁵ Hã ra ag tóg rãn kỹ nỹtĩ, Topē vĩ tỹ rãn kỹ nĩ ki. “Nén ũ tũ to ag tóg iso jũ sór mũ,” he tóg, Topē vĩ rá ki. Hã kỹ ag tóg ke tĩ,” he tóg, Jesus ti.

²⁶ “Hã ra tóg kãtĩg ke mũ, ũ tỹ ājag tar han ke ti. Topē kuprĩg to ken hã vê. Ti hã vỹ ki hã tónh ke mũ, inh panh kuprĩg ti. Ên hã vỹ ājag mỹ inh kãmén ke mũ. ²⁷ Kỹ ājag tóg vênh kar mỹ inh kãmén ke mũ gé, ěn kã. Inh mré ājag tóg mũ ja nĩ, isỹ ājag mỹ tó vén mũn kã,” he tóg.

16 “Ājag mỹ sóg tag kãmén kãn mũ, ājag tỹ ki kanhró nỹtĩ jé, ājag tỹ isovánh sór tũ pē nĩ jé, ājag jagtar ke kurã ěn kã. ² Ājag pan jé ag tóg ke mũ, pã'i ag, ājag tỹ vênh kanhrãn jafã ra mũ măn tũ nĩ jé. Kỹ ag tóg ājag kãgtén ke mũ gé. Ājag kãgtén kỹ ag tóg ón kỹ: “Topē vỹ ěg mỹ tó, hã kỹ ěg tóg ag kãgtén,” henh ke mũ. ³ Ag tỹ ěg jóg mág ki kagtĩg nỹtĩ hã kỹ ag tóg tag han ke mũ. Inh ki kagtĩg ag tóg nỹtĩ gé. ⁴ Ũri sóg ājag mỹ tó mũ. Kỹ ājag tóg, ājag tỹ tag ve kỹ (ājag tóg): “ěg mỹ tóg tó ja nĩ, ěg tỹ ũri nén vég mũ tag ti,” henh ke mũ,” he tóg, Jesus ti.

Topē kuprĩg kãtĩg ke

Vāsỹ sóg ājag mỹ tag tó ja tũ nĩ ver. Vāsỹ sóg ājag mré tĩg nĩ vê, hã ra sóg ājag mỹ tag tó ja tũ nĩ, sỹ ũri ājag mỹ nén tó mũ tag ti. ⁵ Ũri sóg tĩg ke mũ, isỹ ũ tỹ inh jēnēg mũ ěn ve jé. Kỹ ājag pi(jé)

inh mỹ: “ã tỹ hẽ ra tĩg ke nẽ?” henh ke mũ'. ⁶ Ājag mỹ tóg e tĩ, sỹ ājag mỹ isĩg ke tag tó ja nĩn kỹ, kỹ ājag tóg fe kaj nỹtĩ. ⁷ Hã ti nĩ hã ra, isĩg ke ti, ha mẽ. Isĩg tũ nĩn kỹ ũ tỹ ājag tar han mũ ěn vỹ kãtĩg ke tũ nĩ vê, Topē kuprĩg ti. Isĩg kỹ sóg ājag mỹ ti jēnēnh ke mũ. ⁸ Ên vỹ, ã kãtĩg kỹ (tóg) vênh kar mỹ: “Topē vĩ mranh ã huri,” henh ke mũ, kỹ tóg ag mỹ vênh jykre kuryj tónh ke mũ gé, kỹ tóg ag mỹ Topē tỹ ag vóg kónăn ke ěn tónh ke mũ gé. ⁹ “Jesus ki ã tóg rã tũ nĩ, hã kỹ ã tóg Topē vĩ mranh tĩ,” he jé tóg ke mũ, vênh kar mỹ. ¹⁰ Kỹ tóg ag mỹ vênh jykre kuryj tónh ke mũ gé, Topē kuprĩg ti. Jãvo sóg tĩg ke mũ, inh panh kukãm, kỹ ag tóg inh venh ke tũ nĩ. ¹¹ Kỹ Topē kuprĩg tóg ag mỹ Topē tỹ ag vóg kónăn ke ěn tónh ke mũ gé. Tag ki ũn tỹ tỹ ũn mág pē tỹ Nén-Kórég ěn to tóg: “kórég ti nĩ,” hé huri, Topē ti. Hã to ěg tóg ti tỹ ũn vóg kónăn ke mũ ěn ag ki kanhró nỹtĩ,” he tóg, Jesus ti.

¹² “Sỹ ājag mỹ nén tónh ke mũ vỹ ver e nỹtĩ, hã ra tóg ver ājag mỹ mẽ jagy tĩ, hã kỹ sóg tónh ke tũ nĩ. ¹³ Topē kuprĩg tỹ ājag ki jun kỹ, ũ tỹ ki hã tó tĩ ěn kãtĩg kỹ tóg komēr hã ājag mỹ tó kãn ke mũ, nén tỹ ki hã tó mũ ěn ti. Ti pi(jé) ã tỹ nén to jykren mũ ěn tónh ke mũ', Topē kuprĩg ti. Inh panh tỹ inh mré nén to jykren mũ ěn hã tó jé tóg ke mũ. Kỹ tóg ājag mỹ ājag tỹ kar kỹ nén venh ke ěn tónh ke mũ gé. ¹⁴ Ti hã vỹ iso: “ũn mág vỹ tỹ ti nĩ,” henh ke mũ gé. Inh vĩ hã tó jé tóg ke mũ ājag mỹ, hã kỹ tóg isỹ tỹ ũn mág nĩ tónh ke mũ. ¹⁵ Inh panh tỹ nén tó mũ ěn hã tó sóg tĩ gé. Kỹ tóg ěn hã tónh ke mũ gé, ti kuprĩg ti. Hã kỹ sóg ājag mỹ: inh vĩ hã tó jé tóg ke mũ,” he mũ,” he tóg, Jesus ti.

Jesus tỹ ter kar kỹ rĩr mãn ke

¹⁶ “Kãnhmar ājag tóg inh ve mãn ke tũ nĩ ha, kejēn ājag tóg kurã ũ ki inh ve mãn ke mũ gé,” he tóg, Jesus ti. ¹⁷ Kỹ ti mré

mũ tĩ ag tóg jagně mý: “ti hýn ne tó sór mũ, hã kýt tóg: kãnhmar ãjag tóg inh ve măn ke tũ nĩ ha, he mũ, hã kýt tóg: kejẽn ãjag tóg kurã ù ki inh ve măn ke mũ gé, he mũ?” he ag tóg. “Ti tỹ ne tónh ke nẽ hýn, hã kýt tóg: inh panh kukãm sóg tũg mũ ha, he mũ?” he ag tóg. ¹⁸ “Ne to ke nẽ hýn, hã vỹ: kãnhmar, he mũ? Ēg pi(jé) ti tỹ nẽn to mũ ěn ki kanhró nýtĩ,” he ag tóg, jagně mý.

¹⁹ Hã ra Jesus tóg ki kanhró nĩ, ag tỹ ti ki nẽn jẽmẽ sór mũ ěn ki. Hã kýt tóg ag mý: “inh vỹ mý ãjag mý e?” he mũ. “Kãnhmar ãjag tóg inh ve măn ke tũ nĩ ha, kejẽn hã ãjag tóg kurã ù ki inh ve măn ke mũ. ²⁰ Ki hã sóg tó mũ, hã kýt sóg ke mũ. Kygfỹ jé ãjag tóg ke mũ. Věsýrénh jé ãjag tóg ke mũ. Hã ra tóg ù tỹ inh ki ge tũ ag hã mý sér tĩnh mũ. Fe kaj han jé ãjag tóg ke mũ, tag pãte tóg ãjag mý sér tĩnh măn ke mũ gé. ²¹ Ûn týtá fi tỹ gĩr venh ken kýt tóg fi mý jagy tĩ, fi kaga jagy ěn ti. Fi kósın tỹ fi ki mur kar kýt tóg hã ra fi mý sér tĩ, kýt fi tóg ã kaga ěn mĩ ěkrén măn tũ nĩgtĩ. Fi tỹ ã kósın ve kýt tóg fi mý sér tĩ. ²² Ge ve jé ãjag tóg ke mũ. Ûri tóg ãjag mý jagy tĩ, hã ra sóg ãjag ve măn ke mũ, kýt ãjag fe tóg mrin kenh ke mũ, ãjag tỹ inh ven kýt. Kýt ù tóg ãjag fe kaj han măn ke tũ nĩ ha, inh kãtig măn kýt. ²³ Ēn kã ãjag tóg inh mý nẽn ù to vỹ măn ke tũ nĩ ha, isỹ ãjag mré nĩn kýt. Ki hã sóg tó mũ, hã kýt sóg ke mũ. ãjag tỹ inh panh mý nẽn ù to vĩn kýt tóg ãjag mý vĩn kãn ke mũ, ãjag tỹ ti mý nẽn ù to vỹ mũ ěn tỹ, ãjag tỹ tỹ inh mré ke nýtĩn kýt. ²⁴ Ver ãjag tóg ti mý nẽn ù to vỹ ja tũ nĩ, ãjag tỹ ti mý: “ti mré ke vỹ tỹ ěg nýtĩ,” hen kýt. Ti mý nẽn ù to vĩmnĩ, kýt tóg ãjag mý hyn han kãn ke mũ, ãjag tỹ nẽn to vỹ mũ ěn ti, kýt tóg ãjag mý sér tãvĩ tĩnh mũ,” he tóg, Jesus ti.

Jesus tỹ tỹ ěprã ke kar kri ke nĩ

²⁵ “ãjag mý sóg comparação han kýt inh panh kãmén tĩ, kãnhmar sóg jamã

hár(a) ãjag mý inh panh kãmén ke mũ, kýt sóg ãjag mý comparação han măn ke tũ nĩ sir. ²⁶ Kurã ěn kã ãjag tóg vėsóg ki inh panh mý nẽn ù kar to vĩnh ke mũ, ãjag tỹ tỹ inh mré ke nýtĩn kýt. Kýt sóg ãjag jagfỹ vỹ măn ke tũ nĩ ha, ãjag tỹ vėsóg ki ti mré vēmén ke mũ ha. ²⁷ Inh panh vỹ ãjag to hã tãvĩ nĩgtĩ, ãjag tỹ iso hã nýtĩn kýt, ãjag tỹ iso: “Topẽ vỹ ti jẽnẽ,” hen kýt. ²⁸ Inh panh tỹ inh jẽnẽn hã kýt sóg ga tag ki jun mũ. Hã ra sóg ùri inh mur ja ré kýt tũg ke mũ ha, inh panh kukãm,” he tóg, Jesus ti.

²⁹ Kýt ti mré mũ tĩ ag tóg ti mý: “vãhã ã tóg ěg mý kãmén há han mũ ha,” he mũ. “Vãhã ã tóg ěg mý comparação tó tũ nĩ ha. ³⁰ Nẽn ù kar ki kanhró ã tóg nĩ, vég ěg tóg mũ. Ēg tỹ ã ki nẽn ù jẽmẽ sór kýt ã tóg ki kanhró nĩ. Ēg tỹ ã mý nẽn ù tó tũ ra ã tóg ki kanhró nĩ. Hã ki ěg tóg vég mũ, ã tỹ Topẽ tá kãtig ja ti,” he ag tóg mũ, Jesus mý.

³¹ Kýt tóg ag mý: “vãhã ãjag tóg inh ki ge kýt nýtĩ ha,” he mũ. ³² “Hã ra ãjag tóg kãnhmar inh ré kýt mũ kãn mũ ha, ãjag ĩn ra. Vẽn hã pugpóv kãn jé ãjag tóg ke mũ, ùri. Hã ra sóg pir pẽ tũ nĩ, ãjag tỹ inh ré kýt mũ kãn mũ (hã) ra. Inh panh vỹ ěgno kã inh mré jẽ nĩ. ³³ Tag kãmén sóg ãjag mý, ãjag tỹ krĩ kãnhvy nýtĩ jé, ãjag tỹ inh ki ge kýt nýtĩ tugrĩn. Tag ki ãjag tóg nẽn ù jagy kar vég tĩ ver. Hã ra to krĩ kufy han tũg nĩ. Ēprã ke kar kri ke vỹ tỹ inh nĩ, ěprã ke kri pãĩ ěn, Japo ěn kutēm inh huri,” he tóg, Jesus ti.

Jesus tỹ Topẽ mré vēmén

17 Jesus tỹ ã mré mũ tĩ ag mý tag kãmén kãn kar kýt tóg kanhkã ki ěvãnh mũ, kýt tóg: “panh’,” he mũ. “Inh hora tán krỹg huri,” he tóg. “Ag mý isỹ tỹ ùn mág nĩ ven nĩ, isỹ tỹ ã kósın nĩn kýt. Kýt sóg ag mý ã tỹ tỹ ùn mág nĩ ven ke mũ gé. ² Ēprã ke kar kri ã tóg inh fẽg, isỹ ag mý rĩr krỹg ja tũ ven jé, ã tỹ inh

mỹ ùn vin mũ kar ên ag mỹ, fag mỹ ke gé.³ Ủ tỹ ã ki kanhrân mũ ên vỹ rĩr krỹg ja tũ venh ke mũ, ủ tỹ ã to: “Topê vê,” he mũ kar ag, ủ tỹ ã to: “Topê ủ vỹ tũ nĩ,” he mũ kar ag, fag kar ke gé. Kỹ ag tóg inh ki kanhró nỹtĩ gé, isỹ tỹ Jesus Cristo nĩn ki, ã hã tỹ inh jênê ên ki.⁴ Ag hã mỹ sóg ã tỹ tỹ ùn mág nĩ tag ven, êprã ke ag mỹ, fag mỹ ke gé. Ắ tỹ inh mỹ nén tó mũ ên han kãn inh.⁵ Vãsỹ, êg tỹ ga tag han tũg ki sóg ã mré nĩ ja nĩgtĩ, ên kã sóg tỹ ùn mág pẽ nĩ ja nĩgtĩ, ã mré. Ên han mãn nĩ, inh mỹ. Isỹ tỹ ùn mág pẽ nĩ han mãn nĩ, panh’.

⁶ Ủ ag kuprêg ja ã nĩ, ag tỹ inh ki ge jé, fag ke gé. Ên ag mỹ sóg ã kãmén ja nĩgtĩ. Ắ tũ ag vê, hã ra ã tóg inh mỹ ag vin, fag ke gé. Ắ vĩ ki króm ag tóg tĩ, fag ke gé.⁷ Ủri ag tóg ki kanhró nỹtĩ, isỹ ã tũ hã han mũ ên ki, fag ke gé. Ắ hã ne inh mỹ nén kar ên tó tĩ. Tag vég ag tóg tĩ.⁸ Ag mỹ sóg ã vĩ ti tó tĩ, kỹ tóg ag mỹ sér tĩ, fag mỹ ke gé. Kỹ ag tóg vég mũ, ã tỹ inh jênê ên ti. Kỹ ag tóg iso: “Topê tỹ ùn jênêg mũ ên vê,” he mũ, fag ke gé.

⁹ Ắ tỹ inh mỹ ùn vin mũ ên ag hã jagfỹ sóg vĩ tĩ, fag ke gé. Ủ tỹ inh ki ge tũ ên ag jagfỹ sóg vĩnh ke tũ nĩ. Ắ tũ ag hã jagfỹ sóg vĩ tĩ.¹⁰ Ha vé, isũ kar vỹ tỹ ã tũ nỹtĩ, kỹ ã tũ kar vỹ tỹ isũ nỹtĩ gé. Ag hã tugrĩn sóg tỹ ùn mág nĩ, ủ tỹ inh ki ge kỹ nỹtĩ ên ag hã tugrĩn, fag ke gé.¹¹ Inh mur ja ré kỹ sóg tĩg mũ, ijãvo ag tóg êgno mĩ mũ nĩ sir, isũ mré ã tũ ag. Ag jãvo sóg ã venh kãtĩg mũ ha. Inh panh mág, há tăvĩ ã tóg nĩ. Ag jy nĩgãn nĩ, ã jykre ki. Ắ hã ne inh mỹ ag vin’. Ắ mré sóg tỹ ùn pir nĩ. Ag tỹ jagnê mré tỹ ùn pir nỹtĩ han nĩ, isỹ ã mré tỹ ùn pir nĩ tag ri ke han nĩ, ag tỹ, fag tỹ ke gé.¹² Isỹ ag mré nĩn kỹ sóg ag jy nĩgãn tĩ, ã jykre ki, ã tỹ inh mỹ ùn vin mũ ên ag kar jy, fag jy ke gé. Ag ki rĩr há han inh, kỹ ag kã ù tóg vãfor ja tũ nĩ. Ủn pir tóg hã ra vãfor kỹ nĩ inhhã, hã ra tóg ti to rãn kỹ nĩ, ti tỹ nũgme ki kutênh ke ti, hã kỹ ti tỹ ki kutênh ke nê

ha.¹³ Ủri sóg ã kukãm kãtĩg mũ, hã ra sóg ver tag ki ag mỹ kãmén mũ, ti tỹ ag mỹ sér tĩ jé, ti tỹ inh mỹ sér tĩ tag ri ke tĩ jé, ag mỹ.¹⁴ Ag mỹ sóg hur ã vĩ kãmén. Kỹ ủ tỹ inh ki ge tũ ag vỹ ag to jũ mũ, ag tỹ tỹ ag mré ke tũ nỹtĩn kỹ. Inh pi(jé) tỹ ag mré ke nĩ gé’, ủ tỹ ag to jũ mũ ên mré.¹⁵ Hã ra sóg ã mỹ: “ha ag jé prêr,” he tũ nĩ, “ag tỹ ga tovãnh jé,” he tũ sóg nĩ. “Nén-Kórég jo ag jy nĩgãn nĩ,” he sóg mũ ã mỹ.¹⁶ Ag pi(jé) tỹ inh ki ge tũ ag mré ke nỹtĩ’. Tỹ sóg ag mré ke tũ nĩ gé, ủ tỹ inh ki ge jãvãnh ên ag mré.¹⁷ Ắ vĩ há ki ag kanhrân nĩ, ã tỹ ùn kuprêg mũ ên ag, ag tỹ komêr hã ã ri ke nỹtĩ jé. Ắ vĩ ên vỹ tỹ vênh vĩ há tăvĩ nĩ.¹⁸ Inh jênê ã tóg, sỹ ga kri mur jé. Kỹ sóg ã kóm ag jêgnênh mũ, ag tỹ êprã ke kar ên ag mỹ inh kãmén jé.¹⁹ Ag jagfỹ sóg ã mỹ vênh fêg ke mũ, ag tỹ inh mré ã mỹ vênh vin kỹ nỹtĩ jé.

²⁰ Hã ra sóg nén ủ to vĩ sór mũ gé, sỹ ã mỹ ag kãmén kar kỹ. Ủ ag tóg ag vĩ mẽ kỹ inh ki genh ke mũ. Ên ag to sóg vĩ sór mũ gé.²¹ Ag kar tỹ tỹ ùn pir nỹtĩn ken kỹ tóg há tĩ, ã tỹ inh mré tỹ ùn pir nĩ ên ri ke, isỹ ã mré tỹ ùn pir nĩ ên ri ke. Ag tỹ êg mré tỹ ùn pir nỹtĩn kỹ tóg há tĩ. Kỹ vênh kar vỹ venh ke mũ, ã tỹ nén to inh jênêg mũ ti.²² Isỹ ã tóg ùn mág han. Kỹ sóg ag tỹ ùn mág han ke mũ gé, ag tỹ jagnê mré tỹ ùn pir nỹtĩ jé, ã tỹ inh mré tỹ ùn pir nĩ tag ri ke.²³ Inh mré ke vỹ tỹ ag nỹtĩ, kỹ sóg tỹ ag mré ke nĩ gé, kỹ êg kar vỹ tỹ ùn pir ri ke nỹtĩ. Êg tỹ tỹ ùn pir nỹtĩ tugrĩn vênh kar tóg venh ke mũ, ã tỹ inh jênê ên ti. Ủn tỹ inh ki ge kỹ nỹtĩ ên ag to há tăvĩ ã tóg nĩ, ã tỹ iso há nĩ tag ri ke. Tag ve jé ag tóg ke mũ, êprã ke ag, ag tỹ êg tỹ tỹ ùn pir nỹtĩ tag ven kỹ.

²⁴ Panh’, vãsỹ ã tóg iso há nĩgtĩ vê, êg tỹ ga tag han tũg ki. Hã kỹ ã tóg isỹ ùn mág pẽ han. Kỹ tóg inh mỹ há tĩnh mũ, ag tỹ inh mré nỹtĩn kỹ, ã tỹ inh mỹ ùn vin mũ ên ag. Ag tỹ inh mré nỹtĩn kỹ ag tóg venh ke mũ, ã tỹ isỹ ùn mág han ja ti.

²⁵ Panh', jykre kuryj ã tóg nĩ. Û tỹ inh ki ge tũ ag vỹ ã ki kagtĩg nỹtĩ, ag jãvo sóg ã ki kanhró nĩ. Kỹ tag ki inh mré nỹtĩ ag vỹ ki kanhró nỹtĩ gé, ã tỹ nén to inh jēnēg mũ ti. ²⁶ Ag mỹ sóg ã kāmén huri, kỹ sóg ag mỹ ã kāmén măn ke mũ gé, ag tỹ jagnē to há nỹtĩ jé, ag tỹ ã tỹ iso há tag ri ke nỹtĩ jé. Kỹ sóg ag mré ěmăn ke mũ gé,” he tóg, Jesus ti, ã panh mré vēmén kỹ.

Ag tỹ Jesus se

(Mt 26.47-56; Mc 14.43-50; Lc 22.47-53)

18 Jesus tỹ tag tó kar kỹ tóg ã mré mũ ti ag mré ti mũ sir. Goj tỹ Cedrom kafã ù ra ag tóg pa mũ sir. Tá ka tóg krânkrân kỹ nỹtĩ. Ka kré ěn krēm ag tóg nĩgnĩ mũ sir. ² Hã ra Judas tóg ti tĩg ěn ki kanhró nĩ gé. Tã tóg ã mré mũ ti ag mré vēmén tỹ hēn ri ke han huri, Jesus ti, hã kỹ Judas tóg ag tỹ ra mũnh ke ki kanhró nĩ, ù tỹ pã'i ag mỹ Jesus ve ke mũ ěn ti. ³ Kỹ tóg ag nón tá jun mũ sir, Judas ti, soldado ag mré, polícia ag mré hã ke gé, pã'i ag tỹ ag jēgnēn kỹ. Fariseu ag vỹ pã'i ag mré polícia ag jēgnē ja nĩ gé. Lampião e gég ag tóg kāmũ mũ, pĩ jónhkó ke gé, ka kykyv mré hã. ⁴ Hã ra Jesus tóg ki kanhró nĩ, ã jagtar ken ki, kỹ tóg ag kato tē mũ sir. Kỹ tóg ag mỹ: “ājag tỹ ù tỹ hē ve sór nē?” he mũ. ⁵ Kỹ ag tóg ti mỹ: “Nazaré tá ke ěn ve sór ěg tóg mũ,” he mũ. “Jesus vē mỹr,” he ag tóg mũ. Kỹ Jesus tóg ag mỹ: “inh hã vē,” he mũ. Hã ra Judas tóg ag mré kătĩg ja nĩ gé, ù tỹ pã'i ag mỹ Jesus ven mũ ěn ti. ⁶ Jesus tỹ ag mỹ: “inh hã vē,” hen kỹ ag tóg ti jo ranh ke mũ. Rom ke ag tóg mũ sir, ěprã. ⁷ Kỹ Jesus tóg ag mỹ vĩ măn mũ. “Ājag tỹ ù ve sór nē?” he tóg. Kỹ ag tóg ti mỹ: “Jesus, Nazaré tá ke ěn,” he măn mũ. ⁸ Kỹ Jesus tóg ag mỹ: “ājag mỹ sóg: inh hã vē, hé huri. Kỹ ājag tỹ ise sór kỹ inh mré ke tag ag togvānh nĩ sir,” he tóg. ⁹ Hã ra tóg tag tó, ã tỹ to hã ã panh mỹ: “ã tỹ inh mỹ ùn vin ja ěn ag vỹ ki

nỹtĩ, ag kãki ù vỹ vāfor ja tũ nĩ,” he jan kỹ. Ā tỹ ag jy nĩgān jé tóg polícia ag mỹ: “ag togvānh ra,” he mũ, ã mré mũ ti ag to.

¹⁰ Hã ra Simão Pedro tóg ã rógro ěn vyn kỹ tóg polícia ag kãki ù nĩgrēg kym ke mũ. Ti pēgja tá ti nĩgrēg jē ěn tỹ tóg kym ke mũ. Topē tũ ki rĩr ti to pã'i mág camarada ja vē, ti tỹ ù nĩgrēg kym mũ ěn ti, ti jijin hã vỹ: Malco, he mũ. ¹¹ Kỹ Jesus tóg Pedro mỹ: “ã rógro tỹ ti pág ja tá fēg,” he mũ. “Inh panh tỹ inh mỹ: “vēsỹrēnh jé ã tóg ke mũ,” he ja vē, hã kỹ sóg ag mỹ vēnh fēg ke mũ ha. Vēnh nenh ke tũ sóg nĩ,” he tóg, Jesus ti.

Pã'i tỹ Anás tỹ Jesus ve

¹² Kỹ soldado ag tóg, ājag pã'i mré (ag tóg) Jesus mĩnh mũ sir, vāfe tỹ. Polícia ag vỹ ag mré ti mĩnh mũ gé. ¹³ Kỹ ag tóg ti pére mũ mũ, Anás ĩn ra. Caifás kakrã vē, Anás ti, hã ra Caifás vỹ tỹ Topē tũ ki rĩr ti ag to pã'i mág nĩ, prỹg ěn kã. ¹⁴ Hã ra Caifás ěn vỹ pã'i ag mỹ: “ũn pir tỹ ěg povo jagfỹ ter kỹ tóg pāgsĩ nĩ,” he ja nĩ. ěn kakrã ĩn ra ag tóg Jesus pére mũ mũ.

Pedro tỹ Jesus to: “ti ki kagtĩg sóg nĩ,” he vén

(Mt 26.57-58, 69-70; Mc 14.53-54, 66-80; Lc 22.54-57)

¹⁵ Kỹ Simão Pedro tóg Jesus nón ti mũ, Jesus mré ke ù mré. Hã ra Jesus mré ke ù ěn tóg Topē tũ ki rĩr ti ag to pã'i mág ěn ki kanhró nĩ, hã kỹ tóg Jesus nón Anás ĩn kãra rã mũ, ĩn vāso ra. ¹⁶ Hã ra Pedro tóg re tá jē nĩ, ĩn jänkã rã hã. Kỹ Jesus mré ke ù ěn tóg ver ù tỹ jänkã ki rĩr mũ ěn fi mré vēmén mũ, kỹ fi tóg Pedro ti mỹ: “hã kãrã,” he mũ, ti mré ke ù ěn tỹ pã'i mág ki kanhró nĩn kỹ. ¹⁷ Kỹ fi tóg ti mỹ: “ã hỹn tỹ Jesus mré ke nĩ,” he mũ, Pedro ti mỹ, ù tỹ jänkã ki rĩr jē ěn fi. Hã ra tóg fi mỹ ón kỹ: “vó,” he mũ.

¹⁸ Hã ra Anás camarada ù ag vỹ tá nỹtĩ gé, polícia ag mré. ĩn vāso ki ag tóg pĩ

han kŷ nŷtĩ, ti tŷ kusa jagy tĩn kŷ. Pĩ to ag tóg tugtón nŷtĩ. Kŷ Pedro tóg ag mré tón nĩ gé, pĩ ěn ti to.

Anás tŷ Jesus ki jēmē sór

(Mt 26.59-66; Mc 14.55-64; Lc 22.66-71)

¹⁹ Kŷ pā'i mág tóg Jesus mŷ: “inh mŷ ā mré mũ tĩ ag kāmén,” he mũ. “Ā tŷ nén kāmén tĩ ěn ti kāmén nĩ gé, inh mŷ,” he tóg, Anás ti. ²⁰ Kŷ Jesus tóg ti mŷ: “vĕnh kar mŷ sóg jamā hár(a) tó ti,” he mũ. “Vĕnh kanhrān jafā krēm sóg tó ti, Topē jo ĩn krēm ke gé. Judeu kar tŷ vĕnhmān kŷ nŷtĩn kŷ sóg ag mŷ kāmén tĩ. Inh pi(jé) vĕnh péju kŷ tó ti, kŷ vĕnh kar vŷ ki kanhró nŷtĩ. ²¹ Hā ra ā tóg inh ki jēmē sór mũ. Inh vĩ jēmēg mũ ěn ag ki jēmēmni. Ki kanhró ag tóg nŷtĩ, isŷ ag mŷ nén tó ja ěn ki,” he tóg, Jesus ti.

²² Jesus tŷ tag tó kŷ polícia ũ tóg Jesus tĕnh mũ, kŷ tóg ti mŷ: “pā'i mág vĕ mŷr,” he mũ. “Hā ra ā tóg ti mŷ vĩ mũ,” he tóg mũ. ²³ Kŷ Jesus tóg ti mŷ: “kŷ inh hŷn vĕnh vĩ kórég tŷ ne tó?” he mũ. “Ha inh mŷ sŷ vĕnh vĩ kórég tó mũ ěn tó,” he tóg. “Vĩ há han inh, ā tŷ hā ra ne tugnĩn isānh nē?” he tóg.

²⁴ Tag pāte Anás tóg Jesus jĕnĕg mũ sir, ti tŷ Caifás venh tĩg jé, Topē tũ ki rĩr tĩ ag to pā'i mág ěn mŷ. Ti mrĩnh kŷ jĕ kŷ tóg ti jĕnĕg mũ.

Pedro tŷ Jesus to: “ti ki kagtĩg sóg nĩ,” he mĕn

(Mt 26.71-75; Mc 14.69-72; Lc 22.58-62)

²⁵ Hā ra Simão Pedro tóg tón nĩ nĩ, pĩ to. Kŷ tá nŷtĩ ag tóg ti mŷ: “ā hŷn tŷ ti mré ke nĩ gé,” he mũ. Hā ra tóg ón kŷ: “vó,” he mĕn mũ. ²⁶ Kŷ pā'i mág mŷ rānhrāj tĩ ũ vŷ tá nĩ gé. Pedro tŷ ũ nĕgrĕg kym ja ěn kanhkā ũ vĕ. ěn vŷ Pedro mŷ: “ā ve inh, ka kré krēm,” he mũ. Tá ā tóg ti mré jĕ ja nĩ,” he tóg mũ. ²⁷ Hā ra Pedro tóg ón kŷ ti mŷ: “vó,” he mĕn mũ. ěn kĕ galo vŷ kynkyr mũ ha.

Pilatos tŷ Jesus ki jēmē

(Mt 27.1-2, 11-14; Mc 15.1-5; Lc 23.1-5)

²⁸ Kusā pē ki ag tóg Jesus pére mũ mũ, pā'i tŷ governador ĩn ra, ti vĕmén jafā ra, palácio ěn ra. Caifás ĩn tá ag tóg ti pére kĕpa mũ. Hā ra ag tóg pā'i tŷ governador ĩn kĕ ra ge sór tũ nĩ. Ag tŷ festa tŷ Páscoa han ke vŷ kakó ti ha, kŷ ũ tŷ pā'i tŷ governador ĩn kĕ ra ge mũ vŷ festa tŷ Páscoa ěn ki jĕn ke tũ nĩ. Ag jykre vĕ. Hā ra ag tóg ko sór mũ, hā kŷ ag tóg kĕ ra ge ja tũ nĩ sir. ²⁹ Kŷ Pilatos tóg re ra kĕkutē mũ, ag mré vĕmén jé. Kŷ tóg ag mŷ: “ti hĕ ri kĕ?” he mũ. “Ti vĕnh jykre kórég tŷ ne han?” he tóg, Pilatos ti, Jesus to. ³⁰ Kŷ ag tóg ti mŷ: “vĕnh jykre kórég han ti ti,” he mũ. “Ti há nĩ ra ěg tóg ā mŷ ti ven ke tũ nĩ vĕ,” he ag tóg, Pilatos mŷ. ³¹ Kŷ Pilatos tóg ag mŷ: “ha mŷjĕg,” he mũ. “Ājag jykre ki ājag tóg ti jykre kórég ěn to jykren kŷ tónh ke mũ, ti jykre ti,” he tóg. Hā ra ag tóg ti mŷ: “ti ter ke vĕ,” he mũ. “Kŷ ā hā vŷ ěg mŷ: “ha ti tĕn,” hĕnh ke mũ,” he ag tóg, pā'i ag, Pilatos mŷ. ³² Hā ra Jesus tóg ag tŷ fóg tŷ pā'i mŷ ā fĕg ke tag tó ja nĩ, fóg ag tŷ cruz to ti sa kŷ ti tĕn jé. Hā kŷ ag tóg Pilatos mŷ ti ven mũ.

³³ Kŷ Pilatos tóg ā ĩn kĕra rā mĕn mũ, Jesus mré vĕmén jé. Kŷ tóg ti mŷ: “ā mŷ tŷ Judeu ag pā'i mág nĩ?” he mũ. ³⁴ Kŷ Jesus tóg ti mŷ: “ũ nŷ ā mŷ tag tó?” he mũ. “Ā tŷ vĕsóg ki to jykren mŷ vó, pā'i ag tŷ ā mŷ tó mŷ vó?” he tóg. ³⁵ Kŷ Pilatos tóg: “inh pi(jé) tŷ Judeu nĩ,” he mũ. “Ā kanhkā ag vŷ inh mŷ ā fĕg, ā povo to pā'i ag. Ā hĕ ri kĕ?” he tóg.

³⁶ Kŷ Jesus tóg ti mŷ: “inh pi(jé) tŷ ga tag kri pā'i mág nĩ,” he mũ. “Isŷ tŷ tag ki ũn mág nĩ ra inh krēm ke ag tóg Judeu ag mré jagnĕ génh ke mũ vĕ, kŷ ag tóg isĕnh ke tũ nĩ vĕ. Hā ra sóg tag ki tŷ ũn mág tũ nĩ, hā kŷ ag tóg isĕ, Judeu ag,” he tóg, Jesus ti.

³⁷ Kĩ Pilatos tóg ti mĩ: “kĩ ã mĩ hã ra tĩ pã'i mág nĩ?” he mũ. Kĩ Jesus tóg: “ki hã ã tóg tó mũ,” he mũ. “Isĩ ki hã tó jé, hã jé sóg ga kri mur ja nĩ, hã jé sóg ga kri ti mũ gé. Kĩ ù tĩ ki hã tó to há nĩtĩ ěn ag kar vỹ inh vỹ jēmēg mũ,” he tóg, Jesus ti. ³⁸ Kĩ Pilatos tóg ti mĩ: “ne nỹ tĩ ki hã ke nĩ?” he mũ. “Sỹ ki kanhrān jāvānh mē tóg ti,” he tóg, Pilatos ti.

Jesus ter ke

(Mt 27.15-31; Mc 15.6-20; Lc 23.13-25)

Kĩ tóg re ra tĩg mǎn mũ, pã'i ag mré vēmén jé, kĩ tóg ag mĩ: “ti pi(jé) vēnh jykre kórég han tĩ,” he mũ. ³⁹ “Páscoa kar ki sóg ājag mĩ vēsē ù kavāg tĩ. Kĩ inh hỹn ājag mĩ ājag tĩ ù to: “Judeu ag pã'i,” he mũ ěn kyvān ke mũ,” he tóg, Pilatos ti. ⁴⁰ Hã ra ag kar tóg prēnprēr mũ sir. “!..Jesus pijé..! Barrabás kava ra..!” he ag tóg mũ sir, prēnprēr kĩ. Hã ra Barrabás ěn vỹ tĩ ùn jykre kórég pē nĩ.

19 Kĩ Pilatos tóg soldado ag mĩ: “ti mrānmrān ra, ge kĩ,” he mũ. ² Kĩ ag tóg ti mrānmrān mũ. Ti mrānmrān kar kĩ ag tóg sǎnh pĩrĩn kĩ ti krĩ tógfig mũ sir. Kĩ ag tóg kur kusũg tĩ ti kri fón mũ gé sir. ³ Ti ki junjun kĩ ag tóg ti mĩ: “viva, Judeu ag pã'i,” he mũ, ti nyg kĩ. Kar ag tóg ti tǎnh mũ gé sir.

⁴ Kĩ Pilatos tóg re ra kutē mǎn mũ gé sir. Kĩ tóg vēnh kar mĩ: “ha vé ha,” he mũ. “Ti jykre kórég mē ja tũ sóg nĩ vē. Kĩ sóg ājag mĩ ti ven mũ. Nén ù vēnhmỹ han tũ ti nĩ vē,” he tóg, Pilatos ti, ag mĩ.

⁵ Kĩ Jesus tóg kākutē mũ, hã ra tóg sǎnh tĩ ã krĩ tógfin kĩ kākutē mũ, kur kusũg ěn tu kĩ ke gé. Kĩ Pilatos tóg vēnh kar mĩ: “ti ve ra,” he mũ, ag tĩ hēn ri ke mũn ti tovānh jé, ag tĩ ti jagtar ěn ve kĩ.

⁶ Pã'i ag tĩ ti ve kĩ, polícia ag tĩ ti ve kĩ ag tóg prēnprēr mũ gé sir. “!..Ka to ti sǎ..! !..Ka to ti sǎ..!” he ag tóg mũ sir, prēnprēr kĩ. Kĩ Pilatos tóg ag mĩ: “kĩ ājag hỹn inhhā ka to ti sa sór mũ,” he

mũ. “Ti pi(jé) nén ù kórég han mũ,” he tóg.

⁷ Kĩ ag tóg ti mĩ: “hã ra tóg: “tĩ inh Topē kósĩn nĩ,” he tĩ ěg mĩ,” he mũ. “Ěg tĩ ù tĩ ge tén ke vē. Hã tó ja ti nĩ, ěg mĩ, Topē ti, hã kĩ tóg rán kĩ nĩ,” he ag tóg mũ sir, Pilatos mĩ.

⁸ Kĩ Pilatos tĩ ti tĩ tĩ Topē kósĩn nĩ mē kĩ tóg ti mĩ e tǎvĩ tĩ. ⁹ Kĩ tóg ã ĩn kǎra rǎ mǎn kĩ Jesus mĩ: “tĩ ã hē tá ke nĩ?” he mũ. Hã ra Jesus tóg ti mré vēmén mǎn sór tũ nĩ. ¹⁰ Kĩ Pilatos tóg ti mĩ: “ã mĩ inh mré vēmén ke tũ?” he mũ. “Isỹ ã kavān sór nĩ kĩ sóg ã kyvāg mũ. Isỹ ka to ã sa sór kĩ sóg to ã sǎg mũ gé. Tag to jykrén,” he tóg, Pilatos ti, Jesus mĩ. ¹¹ Hã ra Jesus tóg ti mĩ: “Topē tĩ ã tĩ pã'i han tũ nĩ ra ã tóg tag han ki kagtĩg nĩnh mũ vē,” he mũ. “Hã kĩ ù tĩ ã mĩ inh fēg mũ ěn vỹ ã tĩ Topē vỹ mranh mũ tag kǎfór nĩ ha,” he tóg, Jesus ti.

¹² Kĩ tóg Pilatos mĩ e pē tǎvĩ tĩ, kĩ tóg ti kavān sór mũ sir. Hã ra Judeu ag tóg ti mĩ: “ã tĩ tag kyvān kĩ ã pi(jé) tĩ ěg kar kri pã'i mág pē tĩ Imperador ěn mré ke nĩ,” he mũ. “Ũ tĩ vēsỹ pã'i mág han mũ ěn vỹ Imperador kato tē mũ,” he ag tóg. ¹³ Kĩ Pilatos tóg ag vỹ tag mē kĩ mũmēg mũ, kĩ tóg Jesus jé prēr mũ, ti tĩ ti mré re tá jēnh kutē jé. Kĩ tóg ã nĩgia ěn kri nĩ nĩ, ã tĩ hē tá vēnh kar jykre vég tĩ ěn ki. Tá ag tóg pó nē ja nĩgtĩ, hã kĩ ag tóg to: “Pó Nē,” he tĩ, hã vỹ: “Gabatá,” he mũ, Hebreu vỹ ki. ¹⁴ Meio dia ki ke vē. Tĩ vaj kĩ ag tóg festa tĩ Páscoa ěn han sór mũ, hã kĩ ag tóg ũri vējēn tĩ hēn ri ke kǎn mũ. Ěn kǎ meio dia ki Pilatos tóg ã nĩgia kri nĩ nĩ, ag mĩ ag tĩ vēnh jykre han ke mũ ěn tó jé. Kĩ tóg Judeu ag mĩ: “ājag pã'i mág hã vē ha,” he mũ. ¹⁵ Hã ra ag tóg prēnprēr kĩ: “!..ti tén ra, ti tén ra, ka to ti sǎ..!” he mũ sir.

“Kĩ inh mĩ ājag pã'i mág tĩ cruz to sanh mũ?” he tóg, Pilatos ti. Kĩ pã'i ag tóg ti mĩ: “pã'i mág ěg nỹtĩ, hã vỹ: Imperador, he mũ,” he mũ. ¹⁶ Kĩ Pilatos tóg

ag mý: “ha cruz to ti sanh mŭjĕg gé,” he mŭ sir.

Ag tŷ Jesus tŷ cruz to sanh ke

(Mt 27.32-44; Mc 15.21-32; Lc 23.26-43)

¹⁷ Kŷ ag tóg Jesus mŷ cruz fig mŭ, ti tŷ vŷn kŷ pānónh tŷ Calvário ra tŷg jé, ag tŷ Hebreu vŷ ki to: Gólgota, he mŭ ěn ra. ¹⁸ Tá ag tóg cruz to ti sŷg mŭ sir. Ti mré ag tóg ũn régre ag tŷ cruz to ag sŷg mŭ gé, kŷ ũ vŷ ti pĕgja tá cruz to sa, jŷvo ũ vŷ ti jakānh tá cruz to sa gé. Jŷvo Jesus vŷ ag kuju kŷ cruz ti to sa gé. ¹⁹ Hŷ ra Pilatos tóg Jesus to vĕnh rá han ja nŷ, kŷ ag tóg ti krŷg mŷ vĕnhrá ěn sa ja nŷ, hŷ vŷ: “Nazaré tá Jesus vĕ, Judeu ag pŷi tŷ rei vĕ,” he mŭ, vĕnh rán ki. Hebreu vŷ ki tóg rán kŷ nŷ, Latim vŷ ki ke gé, Grego vŷ ki ke gé. ²⁰ Kŷ Judeu tŷ hĕn ri ke ag tóg vég mŭ sir, vĕnh rá ti. Jerusalém vŷ tá kakó nŷ, Jesus tŷ hĕ tá cruz to sa kŷ jĕ ěn ti tá, hŷ kŷ ũ tŷ hĕn ri ke ag tóg ti vĕnh kāmŭjĕg sir. ²¹ Kŷ tóg pŷi ag mŷ há tŷ nŷ. Hŷ kŷ ag tóg Pilatos mŷ: “Judeu ag pŷi tŷ rei vĕ, he ja ě nŷ, vĕnh rán ki,” he mŭ. “Hŷ ra tóg ki krov ja tŷ nŷ. Vĕso tóg: “tŷ sóg Judeu ag pŷi tŷ rei nŷ,” he ja nŷ. Kŷ: Judeu ag pŷi mág vŷ tŷ inh nŷ, he rán nŷ,” he ag tóg, Pilatos mŷ. ²² Hŷ ra Pilatos tóg ag mŷ: “vó,” he mŭ. “Rán inh huri, kŷ tóg rán kŷ nŷ ha,” he tóg mŭ.

²³ Kŷ soldado ag tóg Jesus tŷ ka to sŷg mŭ. Kŷ ag tóg ti kur mŷn kŷ vĕnh kŷpām mŭ. Ũ tŷ 4 (ke) ag vĕ, soldado ag, hŷ kŷ ag tóg ti kur tŷ vĕnh kŷpām tŷ 4 (ke) han mŭ. Hŷ ra ti vĕnh kri fĕg ja vŷ kur pir tŷ há nŷ. Kurŷr tŷ ti nŷ. ²⁴ Kŷ ag tóg ti capa há ve kŷ jagnĕ mŷ: “ĕg hŷn tag kŷm ke tŷ nŷ,” he mŭ. “Ti capa to jogar he jĕ ĕg tóg ke mŭ. Ũ tŷ mŷg mŭ ěn hŷ vŷ tóg tunh mŭ,” he ag tóg mŭ. Kŷ ag tóg to jogar he mŭ sir. Hŷ ra ag tŷ ti kur to jogar he mŭ ěn tóg rán kŷ nŷ gé, Topĕ vŷ rá ki, ha mĕ. “Inh kur tŷ vĕnh kŷpām ag tóg, hŷ ra ag tóg inh kur tŷ vĕnh kri fĕg ja to jogar he

mŭ,” he ja tóg nŷ, Topĕ vŷ rá ki, hŷ kŷ ag tóg ke mŭ.

²⁵ Hŷ ra Jesus mŷnh fi vŷ tá jĕ nŷ, cruz rá hŷ, fi jŷvy fi mré. Kar kŷ Maria Madalena fi vŷ tá jĕ nŷ gé, kar kŷ Maria ũ fi ke gé, Clopas prŷ fi. ²⁶ Kŷ Jesus tóg ě mŷnh fi vég mŭ sir. Ti mré tŷ mŭ ũ vŷ fi to grĕn ke kŷ jĕ nŷ, Jesus tŷ ũ to há pĕ ěn ti. Kŷ Jesus tóg ě mŷnh fi mŷ: “tag vŷ tŷ ě kósĭn ninh mŭ ha,” he mŭ, ě mré tŷ mŭ ěn to. ²⁷ Jŷvo tóg ti mŷ: “fi hŷ vŷ tŷ ě mŷnh ninh mŭ ha,” he mŭ gé, fi to. Hŷ kŷ ti mré tŷ mŭ ěn tóg fi mŷ: “inh mré ninh kŷtĭg,” he mŭ, kŷ fi tóg ti ĩn krĕm nŷ nŷ, ti tŷ Jesus jĕgja ki fi jĕŷn jĕ.

Jesus ter

(Mt 27.45-56; Mc 15.33-41; Lc 23.44-49)

²⁸ Jesus tŷ ě mŷnh fi mŷ tag tó kar kŷ tóg sir ě tŷ nĕn hŷn han ke mŭ ěn hŷn han kŷn ja nŷ. Hŷ to jykrĕn kŷ tóg hŷ ra nĕn tŷ ě to rán kŷ nŷ ěn hŷn han kŷn sór mŭ, hŷ kŷ tóg: “inh og há tóg tŷ,” he mŭ sir. ²⁹ Tá runja ũ vŷ nŷ nŷ, hŷ ra vinho kaja pir vŷ ki nŷ, runja ěn ki. Kŷ ag tóg esponja tŷ vinho ki tŷ pun ke mŭ, kŷ ag tóg ka tŷ hissopo jurŷn kŷ (ag tóg) nĕn kugpe jafŷ ěn kusón mŭ, kusón kŷ ag tóg vinho kŷra rŷg kŷ ti mŷ jun mŭ sir, vinho ti. ³⁰ Kŷ tóg ki ũnh ũnh ge mŭ sir, vinho ěn ki. Kŷ tóg: “ke kŷn inh huri,” he mŭ. Kŷ ti krŷ tóg hĕré’ he mŭ, kŷ tóg hun ke mŭ. Kŷ tóg hur ter.

Soldado ũ tŷ Jesus kusón

³¹ Kŷ Judeu ag tóg Pilatos mŷ to vŷ mŭ, soldado ag tŷ ũ tŷ ka to sa kŷ nŷtŷ ag fa mŷrnhmranh jĕ, ag tŷ kŷnhmar kŷgter jĕ. Tŷ vaj kŷ ag mŷ festa mág vĕ, kŷ ag tóg ũri festa ěn to nĕn kar kŷnkŷn tŷ gé. Hŷ ra tóg ag mŷ kórĕg nŷ, ũ tŷ ag festa kurŷ ki cruz to sa kŷ ter mŭ ti. Hŷ kŷ ag tóg Pilatos mŷ ag kŷgtĕn ke to vŷ mŭ, ag tŷ ka to ag kŷrem jĕ. ³² Kŷ soldado ag tóg ũ tŷ Jesus mré cruz to vĭn kŷ nŷtŷ ag fa mŷrnhmranh mŭ mŭ. ³³ Kŷ ag tóg Jesus

fa mrynhmranh sór mũ gé, hã ra tóg hur ter, hã k̄y ag tóg mrynhmranh tũ nĩ sir. ³⁴K̄y soldado ù tóg ã rógro t̄y ti j̄en'yr ki kusón mũ, k̄y ti kyvénh tóg ki k̄akutē mũ, kyvénh j̄apri mré.

³⁵Tag ve inh, m̄yr, ha mē, hã k̄y sóg ājag m̄y tó mũ. S̄y ki hã tó v̄e. S̄y ājag m̄y tag k̄amén v̄e, ājag t̄y inh v̄i tag kri fi jé, ājag t̄y ti ki ge sór jé. ³⁶Hã ra tóg rán k̄y nĩ gé, ag t̄y ti kusón ke tag ti. “Ag pi(jé) ti kuka mrynhmranh ke mũ’,” he tóg, Topē v̄i t̄y rán k̄y nĩ ki. ³⁷K̄y tag tóg rán k̄y nĩ gé, hã mē. “Ag t̄y ùn kusón mũ ěn ve jé ag tóg ke mũ,” he tóg mũ gé, Topē v̄i ki, Jesus to.

Ag t̄y v̄enh kej ra ti va mũ

(Mt 27.57-61; Mc 15.42-47; Lc 23.50-56)

³⁸K̄y Jesus to há ù tóg n̄gt̄i, Arimatéia tá José. Ěn v̄y ti mré t̄ig ja tũ n̄gt̄i, ti t̄y p̄a'i ag kamēg k̄y, hã ra tóg Jesus to há nĩ. Ěn v̄y tóg sir Pilatos venh t̄i mũ, k̄y tóg ti m̄y: “s̄y Jesus t̄y ka to ti k̄atérem há tóg t̄i,” he mũ. K̄y Pilatos tóg ti m̄y: “há ti nĩ,” he mũ. K̄y Arimatéia tá José ěn tóg Jesus t̄y cruz to ti k̄atérem t̄i mũ. ³⁹K̄y Nicodemus v̄y k̄at̄i mũ gé, ù t̄y kuty tá Jesus mré v̄emén mũ ěn ti. Ěn v̄y ger há ma k̄at̄i mũ, 45 (ke) quilos v̄e m̄yr. Ka t̄y mirra j̄enjo ger há v̄e, kar ka t̄y aloés j̄enjo ger há mré. Ěn ma k̄at̄ig tóg mũ, Nicodemus ti. ⁴⁰K̄y ag tóg Jesus ti k̄atérem mũ sir, cruz to, José mré Nicodemus ti. Ti p̄ag ag tóg mũ sir, kur t̄y, hã ra ag tóg n̄en ger há ěn t̄y ti p̄ag ke ěn k̄ākā n̄im mũ gé. Judeu ag j̄ykre hã v̄e, ag t̄y v̄enh kej tá ù fi k̄y. ⁴¹Ka kré ù v̄y Gólgota tá kakó nĩ, k̄y tóg tá v̄enh kej t̄ag nĩ, p̄aró nor ti, ka kré ěn tá. Kuprā ti n̄y. ⁴²Ěn k̄ākā ag tóg ti fig mũ, ti kakó n̄in k̄y. Hã ra tóg r̄aké n̄y ha, k̄y ag festa tóg kakó' he mũ ha, hã k̄y ag tóg v̄enh kej t̄ag ěn k̄ākā Jesus fig mũ sir.

Jesus r̄ir m̄an

(Mt 28.1-8; Mc 16.1-8; Lc 24.1-12)

20 T̄y vaj ùn k̄y, semana ki kurā ve ki Maria Madalena fi tóg Jesus venh t̄ig sór mũ, ti kej tá. Kusā pē ki fi tóg ra t̄i mũ, kurā s̄i hã ra. Hã ra fi tóg tá jun k̄y (fi tóg) pó ěn v̄ég mũ, ti kej n̄ife ěn ti. Kun̄nh k̄y tóg j̄e nĩ, k̄y tóg sir nor k̄y n̄y nĩ, ti kej ti. ²K̄y fi tóg Simão Pedro to v̄enhv̄ag t̄i mũ sir, Jesus mré t̄i ti ù to ke gé, ù t̄y Jesus to há t̄av̄i ěn to. K̄y fi tóg ag m̄y: “ěg Senhor va ag tóg mũ ja nĩ,” he mũ. “Ā kej k̄aki tóg tũ nĩ,” he fi tóg mũ. “Ag h̄yn h̄e ra ti va kagáv,” he fi tóg mũ ag m̄y. ³K̄y ag tóg venh mũ mũ gé, Pedro ti, Jesus mré t̄i ti ù ěn ke gé. ⁴Pētē ag tóg mũ mũ, hã ra ù ěn tóg Pedro k̄a raran ke mũ, k̄y tóg tá jun v̄en mũ. ⁵K̄y tóg p̄aró nor ěn ki p̄anh ke k̄y k̄at̄a kur ěn v̄ég mũ, ti p̄ag ja ti, hã ra tóg k̄ara r̄a ja tũ nĩ. ⁶K̄y Simão Pedro tóg ti n̄ón tá jun mũ gé, hã ra tóg inh̄h̄a k̄ara r̄a mũ, ti kej k̄ara, Pedro ti. K̄y tóg kur ěn v̄ég mũ gé sir. ⁷Ti kr̄i p̄ag ja v̄y vyr m̄y n̄i nĩ, kónhp̄en k̄y. ⁸K̄y ù ěn tóg ti n̄ón k̄ara r̄a mũ gé sir, k̄y tóg ã t̄y ven k̄y: “hã ja v̄e,” he mũ. ⁹Vāh̄a ag tóg ki kanhró n̄y t̄i. Tag to hã ag tóg ti v̄i to j̄ykr̄en há han ja tũ nĩ ver, ti to n̄en rán k̄y nĩ ěn to, ti t̄y ā ter kar k̄y r̄ir m̄an ke ěn to. Vāh̄a ag tóg ki kanhró n̄y t̄i.

¹⁰Ag t̄y ti kej t̄y kuprā n̄y ve kar k̄y ag tóg v̄ynv̄yn ke mũ, ājag ĩn ra.

Jesus t̄y Maria Madalena fi m̄y v̄enh ven

(Mt 28.9-10; Mc 16.9-11)

¹¹Hã ra Maria Madalena fi tóg tá j̄e nĩ, ti kej nor nĩ ěn tá. F̄y fi tóg j̄e nĩ. Fi f̄y k̄y fi tóg ti kej to p̄anh ke k̄y (fi tóg) k̄at̄a ěv̄anh mũ sir. ¹²K̄y fi tóg ùn régre ag vigv̄ég mũ. Topē t̄y j̄egn̄ē jaf̄a ag v̄e. Kur kupri r̄inh k̄y ag n̄ign̄ig k̄y n̄y t̄i, Jesus n̄ygja tá, ti kej k̄at̄a. Û tóg ti kr̄i n̄igja tá nĩ, k̄y ù tóg ti p̄en n̄yt̄igja tá nĩ gé. ¹³K̄y

ag tóg fi mý: “ã tỹ ù jāvānh kỹ fỹ nē, jỹ?” he mũ. Kỹ fi tóg ag mý: “inh Senhor va ag tóg mũ ja nĩ, hã ra sóg ag tỹ hē ra ti va mũ ja ěn ki kagtĩg nĩ,” he mũ. ¹⁴Kỹ fi tóg vēsýkā ěvānh mũ, hã ra Jesus tóg tá jē nĩ. Hã ra fi tóg ti ki kagtĩg nĩ. ¹⁵Kỹ tóg fi mý: “ã tỹ ù jāvānh kỹ fỹ nē, jỹ?” he mũ gé. Hã ra fi tóg ti to: “ti hỹn tỹ ka kré tag ki rĩr tĩ jē, he sóg mũ,” he mũ. Hã kỹ fi tóg ti mý: “ã mý ag tỹ hēn ra ti va mũ vég tũ, vỹ?” he mũ. ¹⁶Kỹ Jesus tóg fi mý: “Maria’,” he mũ, fi jiji tó kỹ. Kỹ fi tóg ti tỹ fi mý fi jyjy tó kỹ (fi tóg) vāhã ti ki kanhrān mũ sir. Kỹ fi tóg ti mý: “Raboni’, ã hã mý?” he mũ. Hebreu vĩ ki fi tóg tó mũ, hã kỹ fi tóg: “Raboni’,” he mũ. Ēg vĩ ki ěg tóg tag to: “Senhor,” he tĩ. Fi tỹ vāhã Jesus ki kanhrān kỹ nĩn kỹ fi tóg ti mý ke mũ.

¹⁷Hã ra Jesus tóg fi mý: “inh vóg tũg nĩ ver,” he mũ. “Isỹ ver inh panh ra tãprynh ke vē. Inh kanhkã ag mý tónh tũg nĩ hã ra. Ag mý: “isỹ ver inh panh venh tũg ke vē, hã ra tóg tỹ ājag panh nĩ gé, he tóg,” hemnĩ. “Isỹ ver inh Topē to tãprynh ke vē, kỹ tóg tỹ ājag Topē nĩ gé, he ti,” hemnĩ ag mý,” he tóg Jesus ti, Maria Madalena fi mý.

¹⁸Kỹ fi tóg tĩ mũ, ti mré mũgtĩ ag mý tó jé. “Ēg Senhor ve inh,” he fi tóg mũ. Kỹ fi tóg ag mý tó kãn mũ sir, ti tỹ fi mý nén tó mũ ěn ti.

Jesus tỹ ã mré mũ tĩ ag mý vēnh ven
(Mt 28.16-20; Mc 16.14-18; Lc 24.36-49)

¹⁹Kurã ěn kã, semana tỹ kurã ve ěn tỹ rākānh kỹ ag tóg vēnhmān kỹ nỹtĩ, ĩn ù krēm, ti mré mũ tĩ ag. Hã ra ag tóg jānkã nĩfēnh ja nĩ, chave tỹ, ag tỹ ěprã pã’i ag kamēg kỹ. Hã ra Jesus tóg vāhã vēnh ven mũ, ag kãki, kỹ tóg ag mý: “mỹ sér nỹtĩmnĩ,” he mũ. ²⁰Tag tó kỹ tóg ag mý ã nĩgé nug ven mũ, ã jēn’yr ti ke gé. Kỹ tóg ag mý sér tĩ sir, ag tỹ ěg Senhor ven kỹ. ²¹Kỹ tóg ag mý ke mãn mũ. “Mỹ sér nỹtĩmnĩ,” he tóg. “Inh panh tỹ inh

jēnē vē. Kỹ sóg ũri ājag jēnēg mũ gé, ti tỹ inh jēnē ri ke,” he tóg. ²²Tag tó kar tóg ag ki hu he mũ, ag kar ki, kỹ tóg ag mý: “Topē kuprĩg vỹ tỹ ājag jagrē nỹtĩ ha,” he mũ. ²³“Ājag tỹ ù mý: “ã tỹ Topē vĩ mranh ja ěn tỹ tóg vēnh pāte fón mũ,” hen kỹ tóg vēnh pāte fón kỹ nĩ nĩ. Ājag tỹ ù mý: “ã mý ti vēnh pāte fón ke tũ nĩ,” hen kỹ tóg vēnh pāte fón ke tũ nĩ,” he tóg, Jesus ti, ti tỹ ag mý vēnh ven vén kỹ.

Tomé tỹ vāhã Jesus ve

²⁴Hã ra Tomé vỹ ag mré nĩ ja tũ nĩ, ag tỹ Jesus vég mũ ěn kã. Tomé ěn vē, ag tỹ ù to: “ũn vēgni,” he mũ ěn vē, Jesus mré tĩ tĩ ù ěn ti. ²⁵Ag tỹ Tomé ěn ve kỹ ag tóg ti mý: “ěg Senhor ve ěg,” he mũ. Hã ra tóg ag mý: “ti nĩgé nug ve sór inh mũ,” he mũ, “isỹ ag tỹ prego tỹ ti nĩgé nugnón ja ěn mē jé, inh nĩgé tỹ,” he tóg mũ. “Kỹ sóg ti jēn’yr ki mēnh ke mũ gé, sỹ ki ti kusón ja ěn mē jé. Ke tũ nĩ (mũ) ra isóg kri nĩm ke tũ pē nĩ, ti rĩr mãn kri,” he tóg, Tomé ti.

²⁶Kurã tỹ 8 (ke) tũg kỹ ag tóg vēnh mãn kỹ nỹtĩ gé, kỹ Tomé vỹ ag mré nĩ gé. ĩn jānkã vỹ ki chaven kỹ nỹtĩ. Kỹ Jesus tóg ag mý vēnh ven mãn mũ, ag mré jēn kỹ. Kỹ tóg ag mý: “mỹ sér nỹtĩmnĩ,” he mũ. ²⁷Kỹ tóg vēsýmēr Tomé mý: “ã nĩgé tỹ inh nĩgé nugnor mē,” he mũ. “Ā nĩgé tỹ inh jēn’yr kusón ja ěn ti mē gé. Kri nĩmnĩ, to: “vēnh ó vē,” he mãn tũg nĩ,” he tóg, Jesus ti. ²⁸Kỹ Tomé tóg ti mý: “inh Senhor,” he mũ. “Topē,” he tóg. ²⁹Kỹ Jesus tóg ti mý: “vāhã ã tóg kri nĩm sór mũ ha, ã tỹ inh ve kỹ,” he mũ. “Ũ tỹ ã tỹ inh vég tũ ra kri nĩm mũ ěn mý tóg vĩ há pē han ke mũ, Topē ti,” he tóg, Jesus ti, ti tỹ ag mý vēnh ven mãn kỹ.

Ēg tỹ Jesus ki ge jé livro tag tóg rãn kỹ nĩ

³⁰Jesus vỹ ag rĩnve ěg tỹ nén han vānh hyn han kãn ja nĩgtĩ, nén tỹ hēn ri ke, hã

ra sóg rán kân ja tũ nĩ. ³¹ Sỹ livro tag rán vê, ù tỹ vênh rá tag vég mũ kar ên ag tỹ Jesus ki ge sór jé, ag tỹ ti to: “Cristo vỹ tỹ ti nĩ, Topê kósín vỹ tỹ ti nĩ,” he jé. Kỹ ãjag tỹ ti ki ge kỹ ãjag tóg rĩr krỹj ja tũ ên venh ke mũ, ti tugrĩn, mỹr, ha mẽ.

Jesus tỹ ã mré mũ tĩ ù ag mỹ vênh ven măn

21 Tag pãte Jesus tóg kejên goj tỹ Tiberiades tá ag mỹ vênh ven măn mũ, kỹ tóg ge tí, ha mẽ. ² Simão Pedro vỹ tá nĩ, Tomé ti ke gé, ag tỹ ù to: “ũn vègnĩ,” he mũ ên ti, kar kỹ Natanael ti ke gé, êmã tỹ Caná tá ke ên, ga tỹ Galiléia tá ke ên, kar kỹ Zebedeu krê ag vỹ tá nỹtĩ gé, ù tỹ Jesus mré mũ tĩ régre ù ag ke gé. ³ Kỹ Simão Pedro vỹ ag mỹ: isỹ pirã kugmĩnh tĩg vê,” he mũ. Kỹ ag tóg ti mỹ: “ã mré êg mũnh mũ,” he mũ gé. Kỹ ag tóg barco ki ge mũ, goj kri mũ jé. Hã ra ag tóg nén ù kãgmĩg tũ pẽ nĩ, kuty ên kã.

⁴ Tỹ vaj kỹ kusã pẽ ki, rã tỹ jun ke mũ ra Jesus vỹ ga fyr tá jẽ nĩ, hã ra ag tóg ti ki kagtĩg nỹtĩ ver. ⁵ Kỹ tóg ag mỹ: “ãjag mỹ pirã ù kãgmĩg tũ?” he mũ. Kỹ ag tóg ti mỹ: “hỹ,” he mũ. ⁶ Kỹ tóg ag mỹ: “rede tỹ barco pègia tá fón,” he mũ, “kỹ ãjag tóg kugmĩnh ke mũ, pirã ti,” he tóg mũ. Kỹ ag tóg ke mũ. Kỹ tóg fór mũ, rede ti, kỹ ag tóg kãtãnfyn kórég nỹtĩ, ti kufy tĩn kỹ, pirã e nỹtĩn kỹ. ⁷ Kỹ ù tóg Pedro mỹ: “êg Senhor hã vê,” he mũ. Jesus tỹ ù to há pẽ ên vỹ Pedro mỹ ke mũ. Kỹ Pedro tóg ti vỹ tag to ã kur rĩnh măn mũ. Kunũnh ja ti nĩ, ti kur ti. ã kur rĩnh kỹ tóg barco ki kãkutẽ kỹ (tóg) goj kãmĩ tĩ mũ sir, ti tỹ Jesus kukãm tĩg jé, goj kãmĩ. ⁸ Hã ra ag tóg ti nón barco kãmĩ mũ mũ gé, rede ên raran ag tóg mũ mũ. Kakó ti nĩ ha, goj fyr ti, 100 (ke) metros hỹn.

⁹ Ag tỹ vagvag ke pa kỹ ag tóg Jesus jãká vég mũ sir. Pirã kugjin tóg nĩ nĩ, kỹ êmĩ tóg tá ti rã nĩ gé. ¹⁰ Kỹ Jesus tóg ag mỹ: “ãjag pirã gé kãmũjêg,” he mũ. ¹¹ Kỹ Simão Pedro tóg barco kãra rã kỹ rede ên

raran mũ. Goj fyr kukãm tóg ma tĩ mũ, kỹ tóg vag ke mũ sir, tar tá. Hã ra tóg fór nĩ, rede ti, pirã tỹ, 150 (ke) hỹn, pirã mág tãvĩ. Hã ra rede tóg jar ja tũ nĩ, ti e tãvĩ nỹtĩ ra. ¹² Kỹ Jesus tóg ag mỹ: “konh kãmũjêg,” he mũ. Hã ra ag tóg ti mỹ: “tỹ ã ù nĩ?” he jãvãnh nỹtĩgtĩ. Tĩ ki kanhró ag tóg nỹtĩ, ti tỹ tỹ êg Senhor nĩn ki. ¹³ Kỹ Jesus tóg ag mỹ êmĩ ên kã vênh ken mũ sir, pirã ti ke gé.

¹⁴ Jesus tỹ ag mỹ vênh ven tãgtũ vê ha, ên kã, ti ter kar kỹ rĩr măn kar kỹ.

Jesus tỹ Pedro mré vēmén

¹⁵ Ag jên kar kỹ Jesus tóg Simão Pedro mỹ: “Simão,” he mũ. “João kósín,” he tóg. “ã mỹ iso há tãvĩ nĩ, ã mré ke ag tỹ iso há nỹtĩ ên kãfór?” he tóg, Jesus ti, Pedro mỹ. Kỹ tóg ti mỹ: “hỹ, hã vê,” he mũ. “Kĩ kanhró ã tóg nĩ, isỹ ã to há pẽ nĩn ki,” he tóg, Pedro ti, Jesus mỹ. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he mũ.

¹⁶ Kỹ tóg ti mỹ vỹ măn mũ, Jesus ti, Pedro mỹ. “Simão,” he măn tóg. “João kósín,” he tóg. “ã mỹ iso há nĩ?” he tóg. Kỹ tóg ti mỹ: “hỹ, hã vê,” he măn mũ. “Kĩ kanhró ã tóg nĩ, isỹ ã to há nĩn ki,” he măn tóg. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he măn mũ gé.

¹⁷ Kỹ Jesus tóg ti mỹ vỹ măn mũ gé, vỹ tãgtũ han kỹ. “Simão,” he tóg. “João kósín,” he tóg. “ã mỹ iso há nĩ?” he tóg. Kỹ tóg Pedro mỹ e tí, ti tỹ ti mỹ ke tãgtũ han kỹ. Tĩ ki jẽmẽ tãgtũ han tóg, hã kỹ tóg ti mỹ e tí. Kỹ tóg ti mỹ: “nén kar ki kanhró ã tóg nĩ,” he mũ. “Kĩ kanhró ã tóg nĩ, isỹ ã to há nĩn ki,” he tóg, Jesus mỹ, Pedro ti. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he măn mũ. ¹⁸ “ã mỹ sóg ki hã tó mũ, ha mẽ,” he tóg mũ. “ã kyrũ kã ã tóg ã kur rĩnh kỹ ã tỹ hên ra tĩg sór mũ ên ra tĩg ja nĩgtĩ. Kejên ã kófa nĩnh ke vê. Ên kã ã tóg ag mỹ ã nĩgẽ tỹ vênh kri tỹ tam kenh

mũ, kŷ ag tóg ã senh mũ, ha vemñĩ, kŷ ag tóg ã pére mũnh mũ, ã tŷ hẽ ra tŷg sór tũ ẽn ra,” he tóg, Jesus ti, Pedro mŷ. ¹⁹Ti tŷ ti mŷ ag tŷ ti tén ke tó vẽ. Hã ra ag tóg Topẽ tŷ tŷ ùn mág nĩ venh ke mũ, ag tŷ Pedro tén ke tigrĩn. Tag tó ti, Jesus ti, Pedro mŷ. Tag pãte tóg ti mŷ: “mũ jé ha, inh mré,” he mũ gé sir, Jesus ti.

Jesus tŷ João to Pedro mŷ vĩ

²⁰Ag mũn kŷ Pedro tóg vễsŷjãm ẽvãnh kŷ (tóg) ù tŷ Jesus nón kătĩg mũ ẽn vэг mũ gé, Jesus tŷ ù to há tăvĩ ẽn. Ag jẽn rén ja ẽn tá tóg Jesus rã hã nĩ ja nĩ, ti mré tóg jagnẽ to grẽn ke kŷ nĩ ja nĩ, Jesus tŷ ù to há tăvĩ ẽn. Ẽn kã tóg Jesus ti mŷ: “ũ nŷ hŷn ã ven ke mũ, pã'i ag mŷ?” he ja nĩ. Ẽn hã vĩ Jesus nón tŷg mũ, Pedro tŷ ti mré tŷg kŷ. ²¹Pedro tŷ ti tŷ ag nón kătĩ mũ ve kŷ tóg Jesus mŷ: “jãvo ù tŷ ẽg nón kătĩg mũ tag ti?” he mũ. ²²Kŷ Jesus tóg ti mŷ: “sŷ ti mŷ nén tó mũ vĩ vyr mŷ nĩ,” he mũ. “Kŷ sŷ ã mŷ nén tó mũ vĩ vyr mŷ nĩ gé,” he tóg mũ. “Sŷ ti mŷ: “ter ke tũ ã tóg nĩ, isŷ vŷn ke ve jé ã tóg ke mũ,” he sór mũ ra sóg ti mŷ tónh ke mũ vẽ,” he tóg. “Ã hã mŷ sóg ã tũ tónh ke mũ, hã

kŷ sóg ã mŷ: mũ jé ha, inh mré, he mũ,” he tóg, Jesus ti, Pedro mŷ. Ti tŷ ù tŷ ag mré kătĩ mũ ẽn to ken hã vẽ.

²³Jesus vĩ tag tigrĩn vênh kar tóg ti to: “ter ke tũ ti nĩ,” he tĩ, Jesus ki ge kŷ nŷtĩ kar ag. Hã ra Jesus pi(jé) ti to: “ter ke tũ ti nĩ,” he ja nŷtĩ. Ti to tóg: “sŷ ti mŷ: ter ke tũ ã tóg nĩ, isŷ vŷn ke ve jé ã tóg ke mũ, he sór mũ ra sóg ti mŷ tag tónh ke mũ vẽ,” he ja nĩ, Pedro mŷ, ù ẽn to. Hã kŷ ti to: “ter ke tũ ti nĩ,” he tũg nĩ.

João tŷ vênh kãmén

²⁴João vĩ tŷ inh nĩ. Inh hã vĩ tag ve kãn ja nĩ, hã kŷ sóg rãn. Ki hã tó sóg tĩ, vênh kar vĩ tag ki kanhró nŷtĩ. ²⁵Hã ra sóg Jesus tŷ nén hŷn han mũ ẽn rãn kãn ja tũ nĩ. Ti tŷ nén hŷn han mũ ẽn vĩ e tăvĩ nŷtĩ, e tăvĩ. Ẽg tŷ tag rãn kãn sór mũ ra ẽg tóg livro tŷ hẽn ri ke hŷn han ke mũ vẽ. Kŷ ẽg hŷn hẽ tá livro kar tag vŷn han ke mũ? Sŷ ti nĩ, ẽg ga ti, kŷ ẽg tŷ hẽ tá livro tag vŷn han ke tóg tũ tŷnh mũ, ẽg tŷ Jesus tŷ nén hŷn han ja ẽn rãn kãn sór mũ ra.

Hã vẽ.

APÓSTOLO AG TỠ NĒN HAN KĀME

1 Teófilo, inh livro ve ki sóg ă mỷ Jesus tỹ nén han kar tó ja nĩ, ti tỹ nén han vén mủ ền ti, ti tỹ nén han rén ền ti ke gé. Ti tỹ ềg kanhrăn mủ ền răn sóg huri ke gé. ² Kỷ sóg ti tỹ kanhkă ra tăpry mủ răn huri ke gé. ă tỹ kanhkă ra tăpry to hă tóg apóstolo ag mré vēmén ja nĩ ver, ă tỹ ừn kuprềg mủ ag mré. Topề kuprềg tỹ ti mỷ nén tó mủ ền tó tóg mủ ag mỷ, ag tỹ ki hă han jé. ³ ă ter kar kỷ Jesus tóg ag mỷ vênh ven tỹ hên ri ke han ja nĩ, kură tỹ 40 (ke) ki. Rỉr măn kỷ tóg ag mỷ vênh ven ja nĩ, ti tỹ ừn kuprềg ja ền ag mỷ. Ag tỹ ti ve kỷ, ag tỹ ti mré vēmén kỷ ag tóg ti rỉr jề ki kanhró nỹtĩ, apóstolo ag. Ag mỷ tóg Topề tỹ tỹ ềg pă'i nĩ kămén mủ, Jesus ti.

⁴ Kejên tóg ag mré nĩ nĩ. Kỷ tóg ag mỷ: “ver cidade tỹ Jerusalém tá kăpa tũg nĩ,” he mủ. “Tá nỹtĩ kỷ Topề tỹ ăjag mỷ nén tó ja jăvăn nĩ,” he tóg, “isỷ ăjag mỷ nén tó ja ền ti,” he tóg. ⁵ “João vỷ goj tỹ ềg kygpe ja nĩgtĩ,” he tóg. “Hă ra kănhtar ăjag tóg Topề kuprềg tỹ jagrề vênh ke mủ. Sỷ ăjag kypen ken hă vể,” he tóg, Jesus ti. Kỷ tóg ti mủ sir.

Jesus tỹ kanhkă ra tũg

⁶ Kejên ag tóg vênh măn măn mủ sir, Jesus tỹ ừn vin mủ ag. Kỷ tóg ag mré nĩ nĩ, Jesus ti. Kỷ ag tóg ti mỷ: “Senhor,” he mủ. “ă mỷ ừ ri ềg pă'i mág fềg măn mủ, ềg povo tỹ Israel tỹ pă'i mág?” he ag tóg ti mỷ.

⁷ Hă ra tóg ag mỷ: “vó,” he mủ. “Topề hă ki kanhro nĩ,” he tóg. “ăjag tũ pijé,” he tóg. “Kură ền ki kanhrăn ke tũ ăjag tóg nĩ, Topề tỹ ăjag pă'i mág fềg măn ke kură ti. Topề hă ne kură tag tónh ke mủ,” he tóg. ⁸ “Hă ra Topề kuprềg vỷ tỹ ăjag jagrề nĩnh ke mủ. Kỷ ti hă vỷ ăjag tar han ke mủ, ăjag tỹ inh kămén jé. Cidade

tỹ Jerusalém tá ăjag tóg inh kămén ke mủ, ga tỹ Judéia tá ke gé, ga tỹ Samaria tá ke gé, ga fyn ja tá hă ke gé mỷr,” he tóg, Jesus ti.

⁹ ă tỹ tag tó kar kỷ tóg văhă kynh mỷ tăpry mủ sir ag rĩnve, kỷ kanhkă góg vỷ ti kri rũm ke mủ sir, ti ve măn tũ ag tóg nĩ sir. ¹⁰ Hă ra ag tóg kanhkă tugnym mủ, ag tỹ ti tũg ven kỷ, ti tỹ ừn vin mủ ag.

Kỷ văhă ừn rềgre ag tóg tá nỹtĩ, kur kupri rĩnh kỷ. Topề tỹ jềnề jafă ag vể, ừn rềgre ền ag. ¹¹ Kỷ ag tóg ag mỷ: “ha vé, Galiléia tá ke,” he mủ. “ăjag hă ne tóg kanhkă tá ềvăn nỹtĩ nĩ,” he ag tóg. “Jesus vỷ vỷn kenh mủ, ti tũg ja ền ri ke han jé tóg ke mủ. Ti tỹ kanhkă ra tăpry vể, hă ra tóg tá kătêre măn ke mủ gé,” he ag tóg, Topề tỹ jềnề jafă ag, Jesus tỹ ừn vin mủ ag mỷ.

Ag tỹ Matias fềg

¹² Kỷ Jesus tỹ ừn vin mủ ag tóg vỷnvỷn ke mủ sir, Jerusalém ra, kri tỹ Oliveiras tá kămủ kỷ. Jerusalém kakó kă ti nĩ, 1 quilômetro tá ti nĩ hỷn, kri tỹ Oliveiras ti.

¹³ Ag tỹ Jerusalém tá junjun kỷ ag tóg ừn to jăpry jafă to jăpry mủ, tá nỹtĩ jé, ừn kri. Ừ tỹ tá nỹtĩ ag hă vể: Pedro, João, Tiago, André, Filipe, Tomé, Bartolomeu, Mateus, Tiago ừ hă vỷ: Alfeu kósin, he mủ, Simão ke gé, vĩ tar han ti tag ti, Judas ke gé, Tiago kósin tag ti. ¹⁴ Ag kar ền tóg Topề mré vĩ mủ, jagnề mré, ừn tỹtă fag mré hă, Maria fi mré hă, Jesus mỷnh ền fi, Jesus jăvy ag mré hă ke gé, ha mể.

¹⁵ Kejên Jesus mré ke tỹ hên ri ke ag vỷ tá nỹtĩ nĩ, ừn to jăpry jafă ền tá, ừ tỹ 100 kri 20 (ke) hỷn.

¹⁶ Kỷ Pedro vỷ tóg jềg nể mủ, kỷ tóg: “ha vé, inh kanhkă,” he mủ. “Văsỷ tóg răn kỷ nĩ, Judas to,” he tóg. “Topề kuprềg tóg Davi krĩn ja nĩgtĩ, ti tỹ Judas to răn jé,” he tóg. “Hă ra tóg ki hă tó ja nĩ, vênh răn ki,” he tóg. “Ag jămĩ tóg kătĩg ja nĩ, Judas ti, ừ tỹ Jesus kăgmĩnh ke mủ ag

jāmī. ¹⁷ Hā ra tóg tỹ ěg mré ke ja nĩ, kỹ ti tỹ nén han mũ tóg ěg tỹ nén han mũ ri ke ja nĩ gé,” he tóg, Pedro ti. ¹⁸ “Hā ra tóg Jesus kato jänkamy mǎn ja nĩ, kỹ tóg jänkamy ěn tỹ ěpỹ kajām ja nĩgtĩ. Hā ra tóg ā nunh kǎ vĕnh jāján ja nĩ, kỹ tóg tam ke kỹ kutē ja nĩ, kỹ ti nug tóg jar ja nĩ, kỹ ti nug tóg kǎkutē ja nĩ, kỹ tóg ter ja nĩ, Judas ti,” he tóg, Pedro ti.

¹⁹ “Kỹ Jerusalém tá ke kar ag tóg mĕg mũ sir, hǎ kỹ ag tóg ti japỹ to: Aceldama, he mũ, hǎ vỹ: ěpỹ kyvĕnh, he mũ, ěg vĩ ki,” he tóg, Pedro ti.

²⁰ “Ěg tỹ Topē mỹ jǎn jǎn jafǎ ki tag tóg rán kỹ nĩ, hǎ mĕ: ěn jamǎ vỹ vag ke mũ, ũ pi(jé) ki ěmǎn mǎn mũ, he tóg, vĕnh rán ki, Judas to,” he tóg, Pedro ti. “Kỹ ũ vỹ ge nĩ gé, hǎ mĕ: ũ ũ tỹ ti jĕg ja kǎ jĕnh ke kỹ ti rǎnhřǎj han ke vĕ, he tóg mũ gé, vĕnh rán ki,” he tóg, Pedro ti. ²¹ “Hǎ kỹ ěg tỹ ěg mré mũ ti ũ jǎvǎnh ke vĕ. Jesus mré tóg tĩg ja nĩgtĩ, ěg tỹ ũn jǎvǎnh ke mũ ti, kỹ tóg Jesus tỹ ga mĩ ti ěn ve ja nĩgtĩ gé. ²² João tỹ Jesus kype ve ja tóg nĩ gé. Jesus tỹ kanhkǎ ra tǎpřy ve ja tóg nĩ gé. Jesus tỹ nén han mũ kar ve ja tóg nĩ, ěg tỹ ũn jǎvǎnh ke mũ ti. Kỹ tóg sir Jesus rĩr mǎn tónh ke mũ ěg mré,” he tóg, Pedro ti.

²³ Kỹ ag tóg ũn régre ag vin mũ, hǎ vỹ: José, he mũ, ti jyjy ũ hǎ vỹ: Barsabás, he mũ. Fóg tỹ ti jiji hǎ vỹ: Justo, he mũ. Ti mré ag tóg Matias fĕg mũ gé. ²⁴ Kỹ ag tóg Topē mré vĩ mũ, kỹ ag tóg tag tó mũ, hǎ mĕ. “Ěg jóg’,” he ag tóg ti mỹ. “Ěg tỹ nén to jykrĕn mũ ki kanhró ā tóg nĩ,” he ag tóg mũ. “Ā hỹn ũ tỹ hĕ kupřĕg, ũn régre tag ag kǎ, ²⁵ ti tỹ ěg mré ā rǎnhřǎj tag han jé, ti tỹ tỹ ěg mré apóstolo jĕ jé? Judas vỹ ā rǎnhřǎj tovǎnh, kỹ tóg ā tỹ ra tĩg ke ěn ra vyr. Kỹ ũ tỹ hĕ nỹ ti jĕg ja kǎ jĕnh mũ ha?” he ag tóg mũ, Topē mỹ. ²⁶ Kỹ ag tóg to jogar he mũ sir, hǎ ra Matias tóg Judas jĕgja kǎ jĕ nĩ. Hǎ kỹ tóg tỹ ũ tỹ 11 (ke) ag mré ke nĩ sir, tỹ tóg apóstolo jĕ sir.

Topē kupřĩg tỹ tỹ ěg jagřĕ

2 Vǎhǎ tóg festa tỹ Pentecostes kurǎ tá krỹg mũ. Kỹ vĕnh kar vỹ vĕnh mǎn kỹ nỹti nĩ, Jesus ki ge kỹ nỹti kar ěn ag.

² Kỹ vǎhǎ kanhkǎ tá kóho ri ke tóg mĕ há tĩ, króg he mũ ěn ti. Kỹ ĩn tóg kóho ri ke ěn tỹ fór mũ. Hǎ ra ag tóg ĩn ěn ki nỹti, Jesus ki ge kỹ nỹti ag.

³ Kỹ ag tóg nén nĕ vĕg mũ, hǎ ra tóg tỹ pĩ gru hǎ pĕ nĩ, nén nĕ ěn ti. Vĕnh kǎpópǎm kỹ tóg nĩ nĩ, pĩ gru hǎ pĕ ěn ti. Kỹ tóg ag kri nĩ nĩ he kǎn mũ, pĩ gru hǎ pĕ ěn ti. ⁴ Kỹ Topē kupřĩg tóg ag ki ge kǎn mũ, kỹ ag tóg vĕnh vỹ ũ tugtó mũ, Topē kupřĩg tỹ ag krĩn kỹ, ti tỹ tỹ ag jagřĕ nĩn kỹ.

⁵ Hǎ ra Jerusalém tá ke ũ ag tóg Topē to há nỹti gé. Israel ag vĕ gé, hǎ ra ag tóg povo tỹ hĕn ri ke mĩ mogmog ja nĩ. Hǎ kỹ ag vỹ tóg tó tỹ hĕn ri ke nĩ.

⁶ Ag tỹ kóho ri ke ěn mĕ kỹ ag tóg vĕnh mǎn mũ. Kỹ ag tóg ājag vỹ e ěn ki Pedro ag tỹ nén tó mũ mĕg mũ. ⁷ Kỹ tóg ag mỹ e ti. Ag fe tỹ hĕn ri ke nĩn kỹ ag tóg: “hǎ vé, Galiléia tá ke ag vĕ mỹr,” he mũ. “Galiléia tá ke ag vỹ vyr mỹ vỹ nỹti.

⁸ Hǎ ra ěg tóg ěg vỹ pĕ ki ag vỹ jĕmĕg mũ,” he ag tóg. ⁹ “Ěg kǎ ũ ag tóg Pártia tá kǎmũ mũ, kỹ ũ ag tóg Média tá kǎmũ mũ gé, ũ ag tóg ga tỹ Elǎo tá kǎmũ mũ, ũ ag tóg ga tỹ Mesopotǎmia tá kǎmũ mũ, ũ ag tóg Judéia tá kǎmũ mũ, ũ ag tóg Capadócia tá kǎmũ mũ, kar kỹ Ponto tá, Ásia tá, ¹⁰ Frígia tá, Panfília tá, Egito tá, ga tỹ Lĩbia tá, cidade tỹ Cirene ěn mǎ tá. ũ ag tóg cidade tỹ Roma tá kǎmũ mũ gé. ¹¹ ũ ag tóg tỹ Israel nỹti, kar kỹ ũ ag tóg tỹ fóg tỹ Israel jykre han mũ nỹti gé. ũ ag tóg goj vǎso tỹ Creta tá kǎmũ mũ, ũ ag tóg ga tỹ Arábia tá kǎmũ mũ gé. Ěg kar tóg ěg vỹ pĕ ki ag tỹ Topē kǎmĕn mũ mĕg mũ, ag tỹ Topē tỹ nén han ja kǎmĕn mũ ti, Topē tỹ milagre hyn han ja ěn ti,” he ag tóg. ¹² Ājag mỹ e tĩn kỹ ag tóg jagřĕ

mỹ: “ne nē hŷn?” he mŷ. Ag fe tóg jŷrŷn ke mŷ, ag tŷ ge ve ja tŷ nŷtŷn kŷ.

¹³ Ū ag tóg hā ra nyg mŷ. “Kronkron kŷ ag kāgter mŷ mŷr,” he ag tóg.

Pedro tŷ ag mŷ Topē vŷ tó

¹⁴ Kŷ Pedro tóg ŷ tŷ 11 (ke) ag mré jēgnē mŷ, kŷ tóg jamā hār(a) ag mŷ: “inh kanhkā,” he mŷ. “Jerusalēm tá ke,” he tóg. “Jēmē há han ra, sŷ ājag mŷ nēn tó mŷ ti,” he tóg. ¹⁵ “Ājag hā tóg ěg to: kronkron kŷ ag kāgter mŷ, he mŷ. Hā tŷ vē hā ra. 9 horas vē ver, meio dia to hān sa mŷr,” he tóg. “Ag kronkron kŷ ag tóg rākānh kŷ kronkron kŷ kāgter mŷgtŷ, ŷn kronkron mŷ ěn ag,” he tóg. “Hā kŷ ěg tóg kron ja tŷ nŷ,” he tóg, Pedro ti.

¹⁶ “Hā ra tóg vāsŷ rán kŷ nŷ, ěg tŷ ŷri nēn vėg mŷ ti. Topē vŷ tó tŷ tŷ Joel tóg vāsŷ tag tó ja nŷ, ha mē: ¹⁷ “kurā tŷ ěgno to hā sóg inh kuprŷg jēnēnh mŷ, vėnh kar mŷ, ti tŷ tŷ ājag jagrē nŷ jé,” he ja tóg nŷ, Topē ti. “Kŷ ājag krē ag tŷ fag mré Topē vŷ mē kŷ tónh ke vē. Kyrŷ ag tŷ nēn nē venh ke vē. Kófa ag tŷ vėnh pétinh ke vē. ¹⁸ Sŷ inh camarada ag mŷ inh kuprŷg jēnēnh ke vē gé, fag mŷ ke gé. Kŷ fag tóg inh vŷ tónh ke mŷ gé,” he tóg, Topē ti. ¹⁹ “Ājag tŷ nēn han vānh han jé sóg ke mŷ gé, ājag mŷ, kanhkā tá, ga tá ke gé, ěprā, kyvėnh mŷr, pŷ mŷr, nŷja mŷr. ²⁰ Kŷ rā tŷ kutyg ke vē, kysā kyvėnh ke vē gé. Kar kŷ Topē kurā vē sir, kurā mág ěn ti. ²¹ Kŷ ŷ tŷ Topē mŷ nēn kar to vŷ mŷ ěn kren ke vē sir,” he tóg, Topē ti. Joel tŷ tón hā vē, vāsŷ,” he tóg, Pedro ti.

²² “Inh kanhkā, inh vŷ jēmē ra,” he tóg. “Nazarē tá Jesus vē mŷr,” he tóg. “Tŷ hā tóg nēn han vānh hŷn han ja nŷgtŷ, Topē jykre hŷn han ja tóg nŷgtŷ, Topē tŷ ti jēnēn kŷ. Hā ra Topē tóg Jesus mŷ tó ja nŷ, ti tŷ milagre ěn hŷn han jé. Kŷ tóg ājag rŷnve hŷn han, ājag tŷ ve jé, Jesus to jykrén jé. Hā kŷ ājag tóg vé,” he tóg, Pedro ti. ²³ “Hā ra Topē tóg ājag mŷ ti fėg sór ja nŷ, Jesus ti. Kŷ tóg to jykrén kŷ

ājag mŷ ti fėg ja nŷ. Jāvo ājag tóg ka to ti sa ja nŷ, ti tén ja ājag tóg nŷ. Kŷ ŷ tŷ ka to ti sāg mŷ ěn ag jykre vŷ pāno tāvŷ nŷ. ²⁴ Hā ra Topē tóg ti rŷn mān ja nŷ, hā kŷ tóg vēser jagėgtar ěn tŷ tŷl he ja nŷ ti mŷ. Hā kŷ tóg vēser jamā tá nŷg mág ja tŷ nŷ, Jesus ti,” he tóg, Pedro ti.

²⁵ “Hā kŷ Davi tóg Jesus jo tag tó ja nŷ, kŷ tóg Jesus tŷ ā jóg mré vŷ ri ke nŷ. Ti to tóg: “ěg jóg,” he ja nŷ. “Ā vėg isóg nŷ nŷ,” he ja tóg nŷ. “Inh pėgia tá ā tóg nŷ nŷ, hā kŷ sóg krónh ke tŷ nŷ,” he ja tóg nŷ, Davi ti. ²⁶ “Hā kŷ inh fe tóg mrin ke mŷ. Vŷ sér han isóg nŷ nŷ. Iser kŷ inh fār tóg nŷnh ke mŷ, hā ra sóg to krŷ kufy tŷ nŷ. ²⁷ Inh kuprŷg vŷ vėnh kuprŷg jamā tá nŷnh ke tŷ nŷ. Inh fār vŷ vag ke tŷ nŷ gé, sŷ tŷ ā tŷ kuprėg ja nŷn kŷ,” he ja tóg nŷ, Davi ti, Topē mŷ. ²⁸ “Inh kanhrān ā tóg nŷ nŷ, isŷ kanhkā to ěpry ěn ve há han jé, kanhkā to ěmŷn ěn ti. Isŷ ā mré nŷn kŷ tóg inh mŷ sér tāvŷ tŷ,” he ja tóg nŷ. Davi tŷ Jesus tón hā vē,” he tóg, Pedro ti.

²⁹ “Inh kanhkā,” he tóg. “ěg jóg jóg tŷ Davi kāmén há han jé sóg ke mŷ ājag mŷ,” he tóg. “Vāsŷ ti ter mŷr, kŷ ag tóg vėnh kej tá ti pėju, hā ra ěg tóg vėg tŷ, ti kej ti, Davi kej ti,” he tóg. ³⁰ “Ā tŷ ga mŷ tŷg kŷ tóg hā ra Topē vŷ tó tŷ ja nŷgtŷ, Davi ti. Topē tóg ti mŷ: “ā krėkrė ag kā ŷ vŷ tŷ pāi tŷ rei nŷnh mŷ,” he ja nŷgtŷ, Topē ti. ³¹ Topē vŷ tag kri fi kŷ tóg Cristo rŷr mān ke tó ja nŷgtŷ gé, Davi ti. Hā kŷ tóg ā vŷ ěn tó ja nŷgtŷ. Cristo pŷ(jé) vēser jamā tá nŷg mág han, kŷ ti fār vŷ vag ja tŷ nŷ gé,” he tóg, Pedro ti.

³² “Cristo vē, hā vŷ: Jesus, he mŷ. Topē vŷ ti rŷn mān, kŷ ěg kar tóg ti ve ja nŷgtŷ,” he tóg. ³³ “Topē tóg ti mŷ: “kunŷg, inh pėgia tá nŷ,” he ja nŷ, Jesus ti mŷ. Kŷ ěg jóg tóg ti mŷ ā tŷ ěg mŷ nēn tó ja fėg, hā vŷ: Topē kuprŷg, he mŷ. Hā kŷ tóg ěg mŷ tŷ jagrē han mŷ, Topē kuprŷg tŷ, Jesus ti. Hā kŷ ājag tóg ŷri tag vėg mŷ, tag mėg mŷ,” he tóg, Pedro ti.

³⁴“Davi hā tóg rīr mǎn ja tū nī ver, kanhkā ra tóg tāpɾy ja tū nī ver, ge ra tóg tag tó ja nī, ha mē: “ēg jóg mág vỹ inh Senhor mỹ tag tó ja nī, hā vỹ: “nī ra ver, inh pēgja tá,” he ja tóg nī, ³⁵“sỹ ā kato vāsānsān mū ag tỹ ā jakrēm vin jé, ag sigse jé,” he ja tóg nī. Davi tỹ tón hā vē,” he tóg, Pedro ti.

³⁶“Jesus tag hā vỹ, ājag tỹ ka to ũn sǎg mū tag hā vỹ: tỹ ēg Senhor nī, he mū,” he tóg. “Topē vỹ ti to: “tỹ tóg Cristo nī,” he mū. “Tỹ tóg vēnh kar Senhor nī,” he tóg. Ēg tỹ vēnh vỹ tag kri finh ke vē. Ēg povo tỹ Israel tỹ ti ki kanhrān ke vē, ēg vỹ tag kri nīm ke vē,” he tóg, Pedro ti, ũ tỹ vēnh mǎn kỹ nỹti kar ag mỹ.

³⁷Ag tỹ ti vỹ jēmē kỹ ti jykɾe tóg ag kǎra rā mū sir. Kỹ ag tóg ti mỹ: “kỹ ēg hỹn hē ri kenh mū, vỹ?” he mū, Jesus tỹ ũn vin mū kar ag mỹ ke gé.

³⁸Kỹ Pedro tóg ag mỹ: “ājag jykɾe tovānh ra,” he mū. “Kỹ ēg tóg ājag kygpenh ke mū, Jesus Cristo jiji tó kỹ,” he tóg. “Kỹ Topē tóg ājag mỹ ājag tỹ ti vỹ mranh ja ēn tỹ vēnh pāte fón ke mū. Kỹ ājag tóg Topē kuprīg tỹ jagrē nỹtĩnh mū gé, Topē tỹ ājag mỹ ti jēnēn kỹ. ³⁹Ti tỹ ājag hā mỹ ti nīm ke vē inhhā, ājag krē mré hā ke gé. Ti tỹ ũn mỹ vēnh vỹ jēnēg mū kar ag mỹ tóg nīm ti, Topē ti, ēg jóg mág ti, ag tỹ ver kuvar há tá mū hā ra,” he tóg, Pedro ti.

⁴⁰Vĩ tỹ hēn ri ke han tóg, Jesus kāmén kỹ. Ag jyvēn tóg mū gé, kỹ tóg ag mỹ: “Jesus mỹ: “inh kren han nī,” hemnī,” he mū. “Ēg kar vỹ vēnh jykɾe pāno han kǎn, ā jykɾe han vānh nỹtĩn kỹ. Kỹ inh kren han nī, hemnī, Jesus mỹ,” he tóg, Pedro ti.

⁴¹Ũ tỹ ti vỹ han mū ag kygpég ag tóg mū sir. Kurā ēn kǎ ũn kygpe kỹ nỹti ag vỹ tỹ ũ tỹ 3 mĩl nỹti hỹn, hēn ri ke mūn. ⁴²Ēn ag vỹ kurā kar ki Jesus tỹ ũn vin mū ag vỹ jēmē jé vēnh mǎn tĩ, jagnē ve jé ke gé. Kỹ ag tóg Jesus jamĩ ko mū sir. Kỹ ag tóg ti mré vỹ mū gé, kurā kar ki.

Jesus ki ge mū ag jykɾe ti

⁴³Kỹ Jesus tỹ ũn vin mū ag tóg ēg tỹ nén han vānh tỹ hēn ri ke han tĩ nỹtĩti. Hā kỹ vēnh kar tóg Topē kamēg tĩ. ⁴⁴Jāvo ũ tỹ Jesus ki ge kỹ nỹti ag tóg jagnē mré vēnh jykɾe pir han mūgtĩ. Kỹ ag kuge vỹ jagnē tū ri ke nỹti. ⁴⁵Ũ ag tóg ājag kuge ũ vāvām mū gé, jānkamy kato, kỹ ag tóg ũn jānkamy tū ag mỹ vēnh kǎpópām mū. ⁴⁶Kurā kar ki ag kar tóg Topē jo ĩn ra mū tĩ, ag tỹ ti mré vỹ jé. Ājag ĩn kǎki ag tóg Jesus jamĩ ko mūgtĩ gé. Jatun mỹ ag tóg sir jēgǰēg mū. Kỹ tóg ag mỹ sér tĩ sir. ⁴⁷Kỹ ag tóg Topē mỹ: “há ti nī,” he ti gé. Jó vēnh kar tóg ag to há nỹti gé. Kỹ Topē tóg kurā kar ki ũ ag mỹ krĩ há nīm tĩ gé, kỹ ag tóg ti ki ge mū, ag krenkren jé. Hā kỹ ag tóg komēr hā e nỹti.

Ũn grĩ tỹ há' he

3 Kejēn Pedro tóg João mré Topē jo ĩn ra mū mū, meio dia pāte 3 horas ki. Israel ag tỹ Topē mré vỹ jafā vē, hā vỹ: 3 horas, he mū.

²Topē jo ĩn tá ũ tóg nī nī, ũn grĩ. Ā mūr mū kǎ tóg ge nī. Topē jo ĩn jānkā tá tóg nī nī, jānkā sǐnvĩ he mū ēn tá. Tá tóg: “inh mỹ nén ũ nīm,” he nĩgtĩ, ũ tỹ Topē jo ĩn kǎra ge mū ag mỹ.

Ēn va ag tóg kāmū mū, jānkā tá ti nīm jé. Kỹ João mré Pedro tóg Topē jo ĩn tá junjun mū. ³Ũn grĩ tỹ Pedro ag ve kỹ tóg ag mỹ nén ũ to vỹ mū. ⁴Kỹ Pedro ag tóg ti tugnỹm mū. Kỹ Pedro tóg ti mỹ: “ēg ki ēvānh ra,” he mū. ⁵Kỹ tóg ag ki ēvānh mū. “Ag hỹn inh mỹ jānkamy nīm ke mū,” he tóg.

⁶Hā ra Pedro tóg ti mỹ: “jānkamy tóg inh mỹ tū tĩ,” he mū. “Sỹ nén ma tĩ hā tỹ sóg ā mỹ nīm mū, hā vỹ: Jesus Cristo jyjy hā tó kỹ, Nazaré tá ke ēn jiji tó kỹ sóg ā mỹ: ha jēg, he mū, ha mĩ tĩg, he sóg ā mỹ,” he tóg, Pedro ti, ũn grĩ mỹ. ⁷Kỹ tóg ti pēgja tá ti kǎgmĩ kỹ ti fēg mū.

Kỹ vāhā ti pēn tóg tar' he mū sir, ti pēn nágán ti. ⁸Hūm hen kỹ tóg jē nī sir. Jēg há' he tóg mū sir. Mī tóg tī mū sir. Ag mré tóg Topē jo īn kāra rā mū sir. Tá tóg mī tī kỹ hūm hūm he mū. Topē mý tóg vī há han mū sir.

⁹Kỹ vēnh kar tóg ti vég mū, ti tỹ mī tīg kỹ, ti tỹ Topē mý vī há han kỹ. ¹⁰Ag tỹ ti ve kỹ ag tóg ti ki kanhró nýtī. “Topē jo īn jänkā tá nī ēn hā vē mýr,” he ag tóg mū. “Jänkā sīnvī he mū ēn tá nī mūn hā vē mýr,” he ag tóg mū. “Vēnh kar mý: inh mý nīm, he tī ēn hā vē mýr,” he ag tóg ti to. Kỹ tóg ag mý e tī sir. Ag fe tóg jūrūn ke mū sir, ag tỹ ti ven kỹ.

Pedro tỹ Topē jykre kāmén mū

¹¹Hā ra tóg Pedro mré João mré tī mū, ũn grī ja ēn ti. Hā kỹ vēnh kar tóg ag to vēnh mǎn mū, Topē jo īn krēm, pā'i tỹ Salomão he mū ēn sala tá. Vēnh kar ag mý tóg e tī, ũn grī ēn tỹ há' hen kỹ.

¹²Ā tỹ ũn e ēn ag ve kỹ Pedro tóg ag mý: “inh kanhkā',” he mū. “Ājag fe hā ne tóg jūrūn ke mū,” he tóg. “Ēg tỹ vēsóg ki ti tỹ há' he tū vē. Topē tỹ ti tỹ tīg há' he vē mýr. Ēg tỹ vēnh jykre kuryj han mū ra ēg tóg ge han ki kagtīg nýtī vē,” he tóg, Pedro ti, ũn e ēn ag mý.

¹³“Ēg jóg'jóg ve ag vỹ Topē to há ja nýtīgti, Abraão ti, Isaque ti, Jacó ti ke gé. Topē ēn vē mýr, ũ tỹ ti tỹ há' he mū ti,” he tóg. “Topē ēn vỹ ā kósín tỹ ũn mág han. Ti kósín hā vē, hā vỹ: Jesus, he mū. Hā ra ājag tóg fóg ag mý ti fēg ja nýtī. Fóg tỹ pā'i tỹ Pilatos vỹ: “ti kavān jé sóg ke mū,” he mū vē. Hā ra ājag tóg ti mý: “nejé,” he ja nýtī. ¹⁴Ū tỹ vēnh jykre kuryj han mū to ājag tóg: “nejé,” he ja nýtī, Topē tỹ ũn kuprēg mū ēn to, Jesus ēn to. Hā ra ājag tóg ũ tỹ ũn tén mū to: “ti kyvān ra,” he ja nýtī. ¹⁵Ū tỹ ēg rīnrīr han tī ēn tén ja ājag tóg nýtī mýr. Topē tóg hā ra ti rīn mǎn ja nī, ti ter mū hā ra, kỹ ēg tóg ti ve ja nýtī,” he tóg, Pedro ti, ũn e ēn ag mý.

¹⁶“Kỹ ēg tóg Jesus ki ge mū. Hā kỹ Jesus tóg ũn grī ja tag tỹ tar' he mū, ājag tỹ ũn vég mū tag ti, ājag tỹ ũn ki kanhrān mū tag ti. Jesus vỹ ti tỹ ā ki rā han. Kỹ ti tỹ Jesus ki rā kỹ tóg há' he mū sir, ājag rīnve,” he tóg, Pedro ti.

¹⁷“Inh kanhkā',” he tóg. “Ājag tỹ ki kagtīg nýtīn kỹ, hā kỹ ājag tóg Jesus tén ja nýtī. Hā kỹ ājag pā'i ag tóg ti tén ja nýtī,” he tóg.

¹⁸“Hā kỹ Topē tóg vāsỹ rán kỹ nī ēn han. Topē vī tó tī ag kar tóg vāsỹ Jesus jagtar ke ti tó ja nýtī, Topē tỹ ag mý: ha tó, hen kỹ. “Topē tỹ ũn jēnēg mū ēn tỹ jagtar ke vē, Cristo ti,” he ja ag tóg nýtī, Topē vī tó tī ag,” he tóg, Pedro ti.

¹⁹“Kỹ ājag jykre tovānh nī. Topē jykre ki gemnī, Topē tỹ ājag tỹ ti vī mranh tỹ tū' he jé. ²⁰Hā kỹ ājag tóg tỹ Topē mré ke nýtī, kỹ tóg ājag krī tỹ kǎnhvỹ' henh ke mū, Topē ti. Kar kỹ tóg ājag mý ti jēnē mǎn mū gé, ti tỹ ājag mý ũn jēnēnh ke ēn ti, Cristo ti, hā vỹ: Jesus, he mū,” he tóg, Pedro ti. ²¹“Tī tỹ kanhkā tá nī vē ver. Tī tỹ ā kurā pétēm kỹ tóg vāhā tá vỹn kenh mū, Topē tỹ nén kar han mǎn ke kurā ēn kǎ,” he tóg.

“Hā kỹ Topē tóg vāsỹ ā vī tó tī ag mý tó ja nýtī, ag tỹ vēnh kar mý ti vī tó jé, ti tū ag kar mý. ²²Hā kỹ Moisés vỹ tag tó ja nī, ha mē: “Topē vỹ ājag mý ā vī tó tī ũ jēnēnh ke mū, ājag mré ke ũ, ti tỹ ājag mý Topē vī tó jé, inh ri kén. Ēn ti vī jēmēmni,” he ja tóg nýtī, Moisés ti,” he tóg, Pedro ti. ²³“Ū tỹ ti vī jēmē jāvānh ēn ter ke vē,” he ja tóg nýtī, “ēn pi(jé) tỹ Topē tū nī,” he ja tóg nýtī, Moisés ti,” he tóg, Pedro ti.

²⁴“Topē vī tó tī ag kar vỹ tó ja nýtī, ēg tỹ ũri vég mū tag ti. Samuel vỹ tag tó vén ja nýtī, kar ti nón ke ag kar tóg tag tó ja nī gé vāhā,” he tóg, Pedro ti.

²⁵“Topē vī tó tī ēn krē vỹ tỹ ājag nýtī,” he tóg. “Ājag jóg'jóg ve ag hā mré tóg jykren ja nýtī, Topē ti, Abraão hā mré. Hā kỹ tóg Abraão mý: “ā kósín ũ hā tu-

grīn sóg vènh kar to há nính mǔ,” he ja nǐgtǐ, Topē ti,” he tóg, Pedro ti. ²⁶ “Ājag hǎ mǔ tóg ā kósín jēnē, ti rīn mǎn kǐ, Topē ti. Ājag hǎ mǔ tóg tó vén, ājag tǐ tǐ Israel nǐtǐn kǐ. Ājag hǎ mǔ tóg tó, ājag tǐ ājag jykre pāno tovǎnh jé. Tǐ tǐ ājag krīn sór vē, ājag tǐ tovǎnh jé, ājag jykre pāno ēn tǐ,” he tóg, Pedro ti, ũ tǐ Topē jo ĩn krēm vènh mǎn kǐ nǐtǐ ēn ag mǔ.

Pǎi ag tǐ Pedro mré João to jǔ

4 Ag tǐ ver vēmén kǐ nǐtǐ ra Topē tǔ ki rǐr tǐ ag tóg tá junjun mǔ. Topē jo ĩn to capitão vǐ ag mré tá jun mǔ gé, Saduceu ag ke gé, ũ tǐ: “ēg hǐn rǐnrǐr mǎn ke tǔ nǐ ha, ēg ter kar kǐ,” he mǔ ēn ag. ² Pedro ag to ag tóg jǔgǔ mǔ, ag tǐ: “Jesus vǐ rǐr mǎn,” hen kǐ. “Kǐ ēg tóg ti ri kén rǐr mǎn mǔ gé, ēg ter kǐ,” he ag tóg, Pedro ag. Hǎ kǐ pǎi ag tóg ag to jǔgǔ mǔ. ³ Hǎ kǐ ag tóg Pedro ag sigség mǔ, vèse jafǎ kǎtá ag tóg ag vǎm mǔ, ag tǐ kǎtá nǔgnǔr pir han jé. Rǎkē ti nǐ ha, hǎ kǐ ag tóg: “ha ver kǎtá nǔgnǔr,” he mǔ.

⁴ Hǎ ra ũ tǐ hèn ri ke ag tóg Pedro ag vǐ mē ja nǐgtǐ, kǐ ag tóg sir ti vǐ kri fig mǔ. ũ tǐ 5 mǐl (ke) ag vē, Jesus ki ge kǐ nǐtǐ ag, ēg tǐ ũn tǐtǎ fag mré tó tǔ hǎ ra.

⁵ Tǐ vaj kǐ pǎi ag tóg vènh mǎn mǔ, kófa ag mré hǎ, Topē vǐ to professor ag mré hǎ. Jerusalém tá ag tóg vènh mǎn mǔ. ⁶ Topē tǔ ki rǐr tǐ to pǎi mág jyjy hǎ vǐ: Anás, he mǔ. Ag pǎi mág ũ jǐjín hǎ vǐ: Caifás, he mǔ. Pǎi mág kanhkǎ ũ jyjy hǎ vǐ: João, he mǔ, kǐ ũ jǐjín hǎ vǐ: Alexandre, he mǔ. Pǎi mág mré ke kar ag vǐ tá vènh mǎn kǐ nǐtǐ. ⁷ Vènh kuju ki ag tóg Pedro ag vin mǔ, kǐ ag tóg: “ũ nǐ ājag mǔ vènh jykre tag nǐm, ājag tǐ ũn grǐ ēn tǐ há' he jé?” he mǔ. “Ŭ jykre tǐ ājag tǐ tǐ há' hé?” he ag tóg mǔ, Pedro ag mǔ.

⁸ Kǐ vǎhǎ Topē kuprǐg tóg Pedro krīn mǔ. Kǐ tóg: “ha vé,” he mǔ. ⁹ “Nén ũ hǎ to ājag tóg ēg kugmǐg mǔ, ēg tǐ ũn grǐ

tǐ há' he mǔ ēn to,” he tóg. “Kǐ ājag tóg vǎhǎ ēg jykre jēmē sór mǔ ha,” he tóg. ¹⁰ “Ājag mǔ sóg ēg jykre tónh mǔ, Israel kar tǐ ki kanhró nǐtǐ jé,” he tóg. “Jesus tigrīn tóg há' hé, Nazaré tá ke ēn tigrīn tóg tar jē nǐ, ājag tǐ ũ tǐ ka to sǎg mǔ ēn hǎ tigrīn. Topē tóg ti rǐn mǎn ja nǐ, ũ tǐ cruz to ter mǔ ēn ti. Ēn vǐ tǐ tǐ há' hé, ũn grǐ ja ēn ti,” he tóg, Pedro ti. ¹¹ “Jesus ēn hǎ to tag tóg rán kǐ nǐ, Topē vǐ tǐ rán kǐ nǐ ēn ki, ha mē: ājag tǐ pó tǐ ĩn han kǐ ājag tóg pó ũ fón, ti tǐ ājag mǔ kórég nín kǐ. Hǎ ra Topē tóg pó ēn hǎ tǐ ĩn nǔna han mǔ,” he ja tóg nǐ, Topē vǐ ki, Jesus to,” he tóg, Pedro ti.

¹² “Ŭ pi(jé) ēg kren han ke mǔ'. Topē tóg Jesus fēg inhǎ, ti hǎ tǐ ēg kren han jé, ti hǎ tǐ ēprǎ ke ag krenkren han kǎn jé, kanhkǎ krēm ke kar ēn ag. Ēg kren han ke mǔ ũ venh ke tǐ ēg nǐ mǔr,” he tóg, Pedro ti, pǎi ag mǔ.

¹³ Pǎi ag tǐ Pedro vǐ mē kǐ tóg ag mǔ e tǐ. “Ēg kamēg tǔ ag tóg nǐgtǐ mǔr,” he ag tóg, Pedro to, João to ke gé. “Vènh rán sǐ ag nǐtǐ vē mǔr, escola ki ge mág ja tǔ ag nǐtǐ vē,” he ag tóg. To jykrén kǐ ag tóg ag ki kanhró nǐtǐ. “Jesus mré ke ag vē,” he ag tóg mǔ, Pedro ag to. Kǐ tóg ag mǔ e tǐ.

¹⁴ Hǎ ra ũn grǐ ja tóg tá jē ag mré. Kǐ ag tǐ ne tǐ ag kato vǐnh ke tóg tǔ tǐ sir. ¹⁵ Kǐ ag tóg Pedro ag mǔ: “ha ver kǎpa jēg,” he mǔ. Kǐ pǎi ēn ag tóg ver jagnē mré to jykrén mǔ. ¹⁶ Kǐ ag tóg: “Ēg hǐn ag tǐ hē ri kenh mǔ ha'?” he mǔ. “Jerusalém tá ke kar vǐ ag tǐ nén han mǔ ki kanhró kar nǐtǐ. Kǐ ag jykre tóg vènh kar mǔ há nǐ. Kǐ ēg tǐ ag to: ag ón vē, hen kǐ tóg tǐ ũn nǐ sir,” he ag tóg jagnē mǔ. ¹⁷ “Ag tǐ hǎ ra vènh kar mǔ Jesus tó kǐ tóg tǐ ũ nǐ gé,” he ag tóg. “Kǐ ēg tǐ ag mǔ: ha tó mǎn tǔg, henh ke vē,” he ag tóg. “Ājag tǐ ti tó mǎn kǐ ēg tóg ājag vóg kónǎn ke mǔ ha, he jé ēg tóg ke mǔ ag mǔ,” he ag tóg jagnē mǔ. ¹⁸ Kǐ ag tóg Pedro ag jé prēr mǎn mǔ. Kǐ ag tóg: “Ker ũ mǔ tó

mān hē',” he mū. “Ker Jesus tỹ vỹ mān hē',” he ag tóg mū ag mỹ.

¹⁹ Hā ra Pedro tóg João mré ag mỹ ke mū. “Topē tóg ěg mỹ: “ha vênh kar mỹ tóg,” he ja nĩ. Ājag tóg hā ra: “ker tóg hē',” he mū. Ēg hỹn ũ tỹ hē vỹ han mū, Topē vỹ vó, ājag vỹ vó?” he tóg ag mỹ. “Ne nỹ hỹn Topē mỹ há nĩn mū?” he tóg. “Ēg mỹ tóg,” he tóg. ²⁰ “Ēg pi(jé) tóg tũg mū, ěg tỹ nén vэг mū ti, Jesus tỹ ěg mỹ nén tóg ja ěn ti,” he tóg ag mỹ, Pedro ti.

²¹ Hā ra pā'i ag tóg: “ker tóg hē', ker tóg hē',” he mū mū gé. Kỹ ag tóg ag kygvāg mū sir. Ājag tỹ ag vóg kónān há ra ag tóg ag vóg kónān tũ nĩ, vênh kar tỹ ag to há nỹtĩn kỹ, vênh kar tỹ Topē to: “há ti nĩ, ti hā ne tóg ũn grĩ ěn tỹ há' he mū,” hen kỹ.

²² Hā ra ũn grĩ ja ěn tóg tĩ nĩ sir. 40 anos kǎfór han tóg, kỹ Topē tóg ti tỹ há' hē.

Jesus mré ke ag tỹ Topē mré vỹ

²³ Pedro ag tỹ kygvar kỹ mū kỹ ag tóg ājag mré ke ag to mū mū. Kỹ ag tóg pā'i tỹ ājag mỹ nén tóg ěn kāmén mū, kófa ag tỹ: “ker Jesus tóg hē',” he mū ěn ti. ²⁴ Kỹ vênh kar ag tóg tag jēmē kỹ Topē mỹ vỹ há han mū, jagnē mré. Kỹ ag tóg: “ěg jóg mág',” he mū. “Tỹ ā tóg vênh kar kri ke nĩ,” he ag tóg mū. “Kanhkā han ā mỹr, ga ti, goj ti ke gé, mĩ mū ag kar ke gé,” he ag tóg. ²⁵ “Ēg jóg'jóg tỹ Davi krĩn ja ā tóg nĩgtĩ, ā camarada ěn ti. Ā kuprĩg tỹ ā tóg ti krĩn ja nĩ. Kỹ tóg Jesus tóg ja nĩgtĩ, kỹ tóg: “fóg kar ag ne tóg jũgũ mū, kanhgág ag ke gé,” he ja nĩ. “Inh kanhkā tỹ Israel ag ne tóg nén ũ tũ to jykrén',” he ja tóg nĩ. ²⁶ “Nação kar ag pā'i ag vỹ vênh génh kỹ nỹtĩ, ěg pā'i ag ke gé, Topē kato tēgtē jé, Topē tỹ ũn kuprēg mū ěn ag kato,” he ja tóg nĩgtĩ, Davi ti,” he ag tóg, Topē mỹ. ²⁷ “Hā ra tóg ki hā tóg ja nĩ. Ēmā tag ki ag tóg vênh génh kỹ nỹtĩ, ā kósĩn kato, ā tỹ ũn kuprēg mū ěn kato, ũn kuryj nĩ ěn kato, hā vỹ: Jesus, he mū,”

he ag tóg. “Pāi mág tỹ Herodes vỹ ti kato tē mū gé, pā'i tỹ Pilatos ke gé, ag tỹ ũ to: Pôncio, he mū ěn, fóg ag kar, Israel ag kar ke gé,” he ag tóg. “Tag ag kar vỹ vênh génh kỹ nỹtĩ, ā kósĩn kato,” he ag tóg. ²⁸ “Ā tỹ nén to jykrén mū han ag tóg mū sir, ā kato tēgtē mū tag ag. Vāsỹ ā tóg to: ge tĩ jé tóg ke mū, he ja nĩgtĩ,” he ag tóg, Topē mỹ. ²⁹ “Pā'i ag tỹ ěg mỹ nén tóg mē ā tóg, ag tỹ ěg mỹ: ker tóg hē', he mū tag ti. Kỹ ěg tỹ tar' hemnĩ, ěg tỹ ag kamēg tũ nĩn jé, ěg tỹ ā vỹ tóg jé, ěg tỹ tỹ ā camarada nỹtĩn kỹ,” he ag tóg, Topē mỹ. ³⁰ “Kỹ ěg mré milagre hyn han nĩ gé. Ũn kagyga ag tỹ há' hemnĩ, ěg tỹ nén han vánh han nĩ, ěg tỹ ā mỹ to vĩn kỹ, ěg tỹ ā kósĩn tỹ Jesus jyjy tóg kỹ, ěg tỹ ũn kuryj nĩ ěn tóg kỹ,” he ag tóg, Topē mỹ.

³¹ Ag tỹ ti mré vỹ kar kỹ ga tóg jũrũn ke mū sir, ag tỹ tá nỹtĩ hā ra. Kỹ Topē kuprĩg tóg ag krĩn mū gé. Kỹ ag tóg mūmēg vánh kỹ Topē vỹ kāmén mū sir.

Jesus ki ge kỹ nỹtĩ ag jykre pir

³² Ũ tỹ Jesus ki ge kỹ nỹtĩ ag tóg jykre pir han kỹ nỹtĩ. Ũ pi(jé) ā kuge to: “isũ vē,” he tĩ. Ājag kuge kar to ag tóg: “ěg tũ vē,” he tĩ. ³³ Jesus tỹ ũn vĩn mū ag tóg ěg Senhor tỹ Jesus rĩr mǎn tugtóg mū, to tar pē nỹtĩn kỹ. Kỹ Topē tóg ag ki rĩr há han mū gé sir. ³⁴ Ag mré ke ũ pi(jé) jagāgtar nỹtĩ' Ag kāmĩ ũ tóg ěpỹ nỹtĩ, kar ũ tóg ĩn nỹtĩ gé. Ājag tũ ěn funfón ag tóg mū, kỹ ag tóg ti kaja ma kāmũ mū. ³⁵ Jesus tỹ ũn vĩn mū ag mỹ nĩm jé, jǎnkamy ti. Kỹ ũn jagāgtar ag tóg jǎnkamy ěn to ājag tỹ nén ve sór mū ěn mǎn mū sir.

³⁶ Kỹ ũ tóg nĩ gé, ti jiji hā vỹ: José, he mū. Jesus tỹ ũn vĩn mū ag tóg ti to: Barnabé, he tĩ, hā vỹ: vênh jyvẽn krē, he mū, hā vỹ: Barnabé, he mū. Levi kósĩn'kósĩn ũ vē. Goj vāsō tỹ Chipre tá ke vē.

³⁷ Ēn hā vỹ ěpỹ nĩ, kỹ tóg ā japỹ fón mū, kỹ tóg Jesus tỹ ũn vĩn mū ag mỹ ti kaja ma kǎtĩ mū. Kỹ ag tóg jagnē mỹ kǎnhkrég mū sir.

Ananias fag tỹ Topẽ mỹ ón

5 Kỹ ũ tóg nĩ gé, ti jyjy hã vỹ: Ananias, he mũ. Jãvo ti prũ fi jiji hã vỹ: Safira, he mũ. Ên vỹ tóg ã japỹ fón mũ gé. ² Kỹ tóg ã prũ fi mỹ: “ti kaja vênh kápón péju kỹ êg tóg nĩm mũ,” he mũ. Ti vênh kápón ũ tỹ tóg Jesus tỹ ũn vin mũ ag mỹ nĩm mũ. “Êg japỹ kaja kar hã vẽ,” he tóg mũ ag mỹ, ón kỹ.

³ Kỹ Pedro tóg ti mỹ: “Satanás hã ne tóg ã krĩn ja nĩ,” he mũ. “Hã kỹ ã tóg Topẽ kuprĩg mỹ ón. Hã kỹ ã tóg ti kaja vênh kápón péju kỹ nĩm ja nĩ,” he tóg. “Hã ra ã tóg ti tỹ ã krĩn mũ ra: “nejé,” he ja tũ nĩ, Satanás mỹ,” he tóg. ⁴ “Á japỹ vẽ (mỹr), ha mẽ,” he tóg. “Kỹ ti kaja vỹ tóg tỹ ã tũ nĩ gé sir,” he tóg. “Kỹ ã tỹ ma kãtĩ tũ nĩ hã ra tóg tỹ nén ũ tũ nĩ vẽ,” he tóg. “Hã ra ã tóg ã ón ke to jykrén ja nĩgtĩ, ã tỹ ti kaja to ón jé,” he tóg. “Hã kỹ ã tóg êg mỹ ón, hã ra ã tóg Topẽ hã mỹ ón mũ,” he tóg, Pedro ti.

⁵ Ananias tỹ ti vĩ mẽ kỹ tóg kutẽ mũ, ti ter vẽ sir. ũ tỹ mẽg mũ ag kar mỹ tóg e tĩ, kỹ ag fe tóg jũrũn ke mũ. ⁶ Kỹ kyrũ ag tóg jẽgẽg nẽgnẽ kỹ ag tóg ti fi han mũ. Kỹ ag tóg ti va mũ mũ, kỹ ag tóg ti kénh mũ sir.

⁷ 3 horas tũg kỹ ti prũ fi tóg mĩ kãtĩ mũ gé. Hã ra fi tóg ã mén ter mẽ ja tũ nĩ ver.

⁸ Kỹ Pedro tóg fi mỹ: “ãjag mỹ ti kaja tag to fón, ãjag japỹ ti?” he mũ fi mỹ.

Kỹ fi tóg: “hỹ, ti kaja tag to êg tóg fón,” he mũ, ón kỹ.

⁹ Kỹ Pedro tóg fi mỹ: “ãjag ne tóg jagnẽ mré to jykrén ja nĩ gé,” he mũ. “Topẽ kuprĩg mỹ ãjag ón mỹr. ũ tỹ ã mén kénh mũ ag vỹ mĩ kãmũ jẽg. ã va ag tóg mũnh mũ gé,” he tóg fi mỹ, Pedro ti.

¹⁰ Kỹ fi tóg kutẽ kỹ hun ke mũ gé sir. Kyrũ ag tỹ junjun kỹ ag tóg fi ter vэг mũ gé, kỹ ag tóg fi kénh mũ mũ gé, fi mén mré. ¹¹ Kỹ Jesus ki ge kỹ nỹtĩ kar ag fe tóg jũrũn ke mũ, ũ tỹ mẽg mũ kar ag ke gé.

Hã kỹ Ananias fag tóg Topẽ mỹ ón tũgrĩn kãgter mũ. Kỹ tóg vênh kar mỹ e tĩ sir.

Ag tỹ Jesus tỹ ũn vin mũ ag vóg kónãn

¹² Jesus tỹ ũn vin mũ ag tóg nén ve vãnh tỹ hên ri ke hyn han mũgtĩ, vênh kar mỹ. Jesus ki ge kỹ nỹtĩ kar ag vỹ kurã kar ki vênh mãn tĩ, pã'i tỹ Salomão he mũ ên sala tá, Topẽ jo ãn krẽm. ¹³ Jesus ki ge tũ ag tóg vênh kãmũ tũ nĩgtĩ, ag tỹ ag kamẽg kỹ. Hã ra tóg vênh kar mỹ há tĩ sir, Jesus ki ge kỹ nỹtĩ ag jykre ti. ¹⁴ Kurã kar ki ũ tóg to jykrén ke mũ, Jesus ki rã jé, ũ tỹ hên ri ke ag, fag ke gé. Hã ki ag tóg e nỹtĩ sir, Jesus ki ge mũ ên ag.

¹⁵ Kejẽn ag tóg ũn kagyga gé kãmũ mũ gé vãhã, êpryn kri, êmĩn kri. Tá ag tóg cama kri nỹtĩ, nỹg jafãn ki. Kỹ ag tóg Pedro jãvãnh mũ. “Ti kãnhvэг tỹ êg mĩ tĩg kỹ ũ tóg hên ri ke mũn tỹ há' henh ke,” he ag tóg.

¹⁶ ũ tỹ hên ri ke ag tóg Jerusalém tá vênh mãn mũ, êmã kar tá kãmũ ên ag. ũn kagyga ag gé(g) ag tóg kãmũ mũ, ũn jagrẽ kórég ag ke gé. Kỹ ag tóg há' he kãn mũ sir.

¹⁷ Kỹ Topẽ tũ ki rĩr tĩ to pã'i mág tóg jũ tãvĩ nĩ, ti mré ke kar ag ke gé, Saduceu he mũ ên ag kar. ¹⁸ Kỹ ag tóg Jesus tỹ ũn vin mũ ag sigsэг mũ, vese ja mág tá.

¹⁹ Hã ra kuty tá Topẽ tỹ jẽnẽ jafã tóg tere kỹ vese ja jãnkãn nugnón mũ, rugróm tóg mũ. Ag gé(g) tóg tĩ mũ, ag kygvãn kỹ, kỹ tóg ag mỹ: ²⁰ “ha mũ jẽg, Topẽ jo ãn ra, ãjag tỹ vênh kar mỹ Topẽ vĩ tó jé, Topẽ tỹ êg rĩnrĩn mãn ke ên ti,” he mũ, Topẽ tỹ jẽnẽ jafã ti, ag mỹ.

²¹ Ag tỹ ti vĩ mẽ kỹ ag tóg kusã pẽ ki Topẽ jo ãn ra mũ mũ, tá Topẽ vĩ tó jé. Hã ra Topẽ tũ ki rĩr tĩ to pã'i mág tóg ã mré ke ag jẽgnẽg mũ, ag tỹ kófa ag jé prẽr jé, vênh jyvẽn tĩ kar ên ag, povo tỹ Israel to pã'i ag ke gé. Kỹ ag tóg vese ja ra ũ jẽgnẽg mũ, ag tỹ vèsigse ag tatĩ kãmũ jé. ²² Polícia ag tỹ tá junjun mũ ra ag tóg

vēse ja kātá tūgtū nýtī. Kŷ ag tóg vŷnvŷn ke mŷ. ²³Kŷ ag tóg: “vēse ja tóg nífénh kŷ jē nī, nífénh jāfa tŷ,” he mŷ. “Kŷ ū tŷ ki rīr mŷ ag tóg tá nýtī gé, ti jānkān tá. Ēg tŷ nón mŷ ra tóg kuprā jē nī,” he ag tóg mŷ, pā'i ag mŷ.

²⁴Topē jo īn to capitāo tŷ mē kŷ tóg ti mŷ e tī, Topē tū ki rīr tī to pā'i mág ag mŷ ke gé. Kŷ tóg ag krī tū tī sir. ²⁵Kŷ ū tóg tá jun kŷ: “Topē jo īn krēm ag nýtī, ājag tŷ ūn sigség mŷ ag,” he mŷ. “Tá ag tóg vēnh kar mŷ Topē vī tó nýtī,” he tóg.

²⁶Kŷ capitāo tóg polícia ag mré tī mŷ, ag tatī kāmŷ jē. Komēr hā ag tóg vī mŷ, ag mré. “Ēg vāsānsān kŷ ū tŷ ag vī mēg mŷ ag tóg hēn ri ke mŷn Ēg pin ke mŷ, pó tŷ,” he ag tóg, polícia ag.

²⁷Apóstolo ag tŷ ag mré junjun kŷ ag tóg pā'i ag jo ag vin mŷ. Kŷ Topē tū ki rīr tī to pā'i mág tóg ag mŷ. ²⁸“ājag mŷ Ēg tóg: ker ēn jiji tó mǎn hē', he ja nīgtī,” he mŷ. “Ge ra ājag tóg Jerusalém tá ke kar ag mŷ tugtó ja nīgtī, ēn vī ti,” he ag tóg, Jesus vī to. “Ājag hŷn ti ter to Ēg jagāgtar han sór mŷ,” he ag tóg, pā'i ag.

²⁹Kŷ Jesus tŷ ūn vin mŷ ag kar tóg ag mŷ tag tó mŷ, ha mē. Pedro tóg ag mŷ tag tó mŷ, ha mē: “Topē tŷ Ēg mŷ nén tó mŷ ēn han jē Ēg tóg ke mŷ (mŷr),” he tóg. “Ēprā ke ag tŷ Ēg mŷ: “ke tūg nī,” he mŷ hā ra Ēg tóg ti tŷ Ēg mŷ nén tó mŷ ēn han mŷ,” he tóg. ³⁰“Ēg jóg'jóg ag vŷ Topē to há nýtīgtī. Ag tŷ ū to há nýtī ēn vŷ Jesus ti rīn mǎn ja nīgtī, ājag tŷ ūn tén mŷ ēn ti, ka to ūn sǎg mŷ ēn ti,” he tóg.

³¹“Kŷ Topē tóg ti tŷ pā'i mág han mŷ, ti tŷ Ēg kren han tī han kŷ, ti tŷ ti mŷ: “kunīg, inh pēgja tá nī,” hen kŷ. Jesus tŷ tóg Ēg kar krīn sór mŷ, Ēg povo tŷ Israel kar tŷ vēnh jykre pāno tovānh jē, ti tŷ ag tŷ ā vī mranh tŷ vēnh pāte fón jē,” he tóg. ³²“Nén kar ēn ve ja Ēg tóg nīgtī, hā kŷ Ēg tóg ti vī tó mŷ sir. Kŷ Topē kuprīg tóg Ēg kanhrān mŷ gé. Topē vŷ ū tŷ ti vī han mŷ kar ag mŷ ā kuprīg jēnēg mŷ,” he tóg, Pedro ti.

³³Pā'i ag tŷ ti vī mē kŷ ag fe tóg gŷm ke mŷ, kŷ ag tóg ag kǎgtén ke to jykrén mŷ, Jesus tŷ ūn vin mŷ ēn ag. ³⁴Kŷ vāhā ū tóg jēg nē mŷ, Fariseu ū, ti jyjy hā vŷ: Gamaliel, he mŷ. Topē vī to professor ū vē, kŷ vēnh kar mŷ tóg há nŷ, ti jykre ti. Kŷ tóg: “ver ag kāpan nī,” he mŷ. ³⁵Ag mŷ kar tóg ag mŷ: “inh kanhkā',” he mŷ. “To jykrén nī ver, ājag tŷ han tū jē,” he tóg. ³⁶“Pedro ag jo ke ū tóg jē ja nī gé, ti jiji hā vŷ: Teudas, he mŷ. Tī hā ne tóg vēsŷ tŷ pā'i mág han ja nī, kŷ ū tŷ 100 tŷ 4 ag vŷ ti nón mŷ ja nīgtī sir. Tī tén ja ag tóg nī jāvo, pā'i ag, kŷ ū tŷ ti vī han mŷ ag tóg tāmī mŷ ja nī, kŷ tóg tū' he mŷ,” he tóg. ³⁷“Kar kŷ ū vŷ jē ja nī gé, ti jyjy hā vŷ: Judas, he mŷ. Galiléia tá ke ēn vē. Ag tŷ vēnh kar jyjgi ránrán mŷ ra tóg tá jē ja nī, Judas ēn ti, kŷ ū tŷ hēn ri ke ag tóg ti nón mŷ ja nīgtī gé. Ēn tén ja ag tóg nī gé, pā'i ag, kŷ ū tŷ ti vī han mŷ ag tóg krig' ke ja nī, vēnh pipin kŷ,” he tóg.

³⁸“Isŷ nén to jykrén hā vē, ha mē: Pedro ag tovānh nī ver,” he tóg. “Ag mŷ: ha mŷ jēg, hemnī ver,” he tóg. “Ag tū tŷ tŷ Ēprā ke ag jykre nīn kŷ tóg tū' hēnh ke mŷ (mŷr), vēsóg ki, ha mē,” he tóg. ³⁹“Tī tŷ hā ra tŷ Topē jykre nīn kŷ ājag tóg tŷ tū' hēnh ke tū nī,” he tóg. “Ājag tŷ ge ra ag to jū nýtīn kŷ ājag tóg vāhā Topē kato tē mŷ,” he tóg, Gamaliel ti.

⁴⁰Kŷ ag tóg ti mŷ: “hej,” he mŷ. Kŷ ag tóg Jesus tŷ ūn vin mŷ ag jē prēr mǎn mŷ. Ag mrānmrān ag tóg mŷ. Kŷ ag tóg: “ker Jesus tó mǎn hē',” he mǎn mŷ ag mŷ. Kŷ ag tóg: “ha mŷ jēg ge,” he mŷ.

⁴¹Kŷ ag tóg mŷ mŷ, Jesus tŷ ūn vin mŷ ag. Ag mŷ tóg sér tī, ha mē. Ag tŷ Jesus ri ke jagēgtar mŷ ra tóg ag mŷ sér tī, ag tŷ Jesus ri kén jagēgtar ke ki krŷg kŷ. ⁴²Kurā kar ki ag tóg Topē jo īn tá Jesus tó tī, ti to: “Topē vŷ ti jēnē,” hen kŷ. Vēnh kar īn tá ag tóg ti kāmén mŷ gé, ū tŷ ag kógfyn kŷ. To ag tóg krónh ke tū nīgtī sir.

Ag tỹ ũ tỹ 7 (ke) ag vin

6 Kỹ ũ tỹ hên ri ke ag tóg Jesus ki ge mũ. Ũ ag tóg Grego vĩ tó tĩ, Jesus mré mũ ũ ag. Kỹ ũ ag tóg Hebreu vĩ tó tĩ gé, ti mré mũ ũ ag. Ag e nỹtĩn kỹ ũ tỹ Grego vĩ tó mũ ag tóg kejên vĩ kónân mũ, Hebreu vĩ tó tĩ ag kato. “Ũ tỹ Hebreu vĩ tó mũ ag vĩ ěg ki króm tú nỹtĩ (mỹr),” he ag tóg. “Ag kã ũn mén ter ja fag vĩ kurã kar ki vėjên há vég tĩ, ag tỹ fag mỹ vin kỹ,” he ag tóg. “Hã ra ěg kã ũn mén ter ja ěn fag kã ag tóg jatun nỹtĩ, fag tỹ ag vĩ tó tú nĩn kỹ. Hã kỹ fag tóg jagãgtar nỹtĩ, ěg mré ke fag,” he ag tóg.

² Kỹ ũ tỹ 12 ag tóg mễg mũ, Jesus tỹ ũn vin mũ ag. Kỹ ag tóg Jesus mré mũ kar ag jé prêr mũ. Kỹ ag tóg: “Ěg tú hã vễ, hã vĩ ěg tỹ tỹ Topê vĩ tó ti nỹ,” he mũ. “Ěg tỹ vėjên ki rĩr kỹ ěg tóg kutar nỹtĩ, kỹ ěg tóg ěg tỹ nén han ke ki rĩr há han ke tú nĩ gé,” he ag tóg. ³ “Kỹ ũ tỹ 7 (ke) ag vin nĩ, ũn kãme kórég tú ag, ũn jykre há ag, ũ tỹ Topê kuprĩg tỹ jagrê nĩ ěn ag,” he ag tóg. “Ěn mỹ ěg tóg vênh rãnrãj ěn nĩm mũ, ag tỹ vėjên ki rĩr jé,” he ag tóg. ⁴ “Ěg hã tóg hã ra Topê mré vĩ kỹ nỹtĩ, ti vĩ tó kỹ nỹtĩ. Ěg tỹ nén han ken hã vễ,” he ag tóg, Pedro ag.

⁵ Ag vĩ vĩ vênh kar mỹ há nĩ ha, kỹ ag tóg Estêvão fêg mũ sir, ũ tỹ Jesus ki rã kỹ jê ěn ti, kỹ Topê kuprĩg vĩ tỹ ti jagrê nĩ. Tĩ mré ag tóg Filipe fêg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag ti, fóg tỹ Israel jykre han mũ tag ti. ⁶ Ěn ag vin ag tóg mũ, Jesus tỹ ũn vin mũ ag jo. Kỹ ag tóg ag to Topê mré vĩ mũ, ag nĩgé tỹ ag mẽ kỹ. Hã kỹ ag tóg ag mỹ vênh rãnrãj ěn nĩm mũ, ag tỹ vėjên ki rĩr jé.

⁷ Kỹ Topê vĩ tóg vênh kar kri rũm ke mũ sir. Ũ tỹ Jesus mré mũ ag vĩ tóg hên ri ke nỹtĩ, Jerusalém tá. Kỹ Topê tú ki rĩr tĩ ũ ag tóg Jesus vĩ kri fi kỹ ti ki ge mũ gé sir.

Ag tỹ Estêvão se

⁸ Estêvão vĩ hã ra krĩ há nĩ, Topê tỹ ti mỹ vênh jykre nĩm kỹ. Kỹ tóg ěg tỹ nén han vánh tỹ hên ri ke hyn han mũ, vênh kar mỹ. ⁹ Kỹ Israel ag vênh kanhrãn jafã ũ tá ag tóg ti vĩ kafãn mũ, ũn kygvãn kỹ nỹtĩ he mũ ěn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ěn ag kar vĩ ãjag tỹ Estêvão mré vin kỹ ti vĩ kafãn mũ. ¹⁰ Hã ra ag tỹ ti vĩ kafãn ke tóg tú tĩ, ti krĩ há nĩn kỹ, ti tỹ Topê kuprĩg tỹ jagrê nĩn kỹ. ¹¹ Kỹ ag tóg ũ ag krĩn mũ, ag tỹ ti kato vĩ jé, Estêvão kato. Kỹ ag tóg: “ti vĩ mẽ ěg (mỹr),” he mũ. “Moisés kato vĩ kónân tóg (mỹr), Topê kato ke gé,” he ag tóg ón kỹ, Estêvão to. ¹² Hã kỹ vênh kar tóg ti to jũgũ mũ, Estêvão to, kófa ag mré hã, Topê vĩ to professor ag mré hã. Kỹ ag tóg ti kãgmĩ kỹ ti ség mũ. Kỹ ag tóg pã'i ag jo ti pére kãmũ mũ. ¹³ Ũ tỹ ón kỹ ti kato vỉnh ke mũ ag jé ag tóg prêr mũ gé, pã'i ag. Kỹ ag tóg ti kato: “Topê jo ĩn kato tóg vĩ kónân tĩ, Topê tỹ ěg mỹ nén tó ja ti kato ke gé,” he mũ ón kỹ. “Hã ra tóg ã vĩ kónân to krónh ke tú nĩgtĩ,” he ag tóg ón kỹ, Estêvão to. ¹⁴ “Ti vĩ mẽ ěg (mỹr),” he ag tóg. “Jesus kãmén tóg tĩgtĩ, Nazaré tá ke ěn ti,” he ag tóg. “Topê jo ĩn kókén jé tóg ke mũ, Jesus ti,” he tóg nĩgtĩ, Estêvão ti, kỹ tóg Moisés tỹ ěg mỹ vênh jykre nĩm mũ ěn tỹ tú' he sór mũ gé, ěg mỹ vênh jykre ũ nĩm kỹ,” he ag tóg. Ag tỹ Estêvão to ón hã vễ.

¹⁵ Kỹ pã'i kar ag tóg ti tugnỹm mũ, hã ra ti ve tóg sir Topê tỹ jêñe jafã ve ri ke nĩ, Estêvão ti.

Estêvão tỹ vênh kãmén

7 Kỹ Topê tú ki rĩr tĩ to pã'i mág tóg ti mỹ: “Ki hã ke mỹ?” he mũ.

² Kỹ Estêvão tóg ag mỹ: “ijóg’,” he mũ. “Inh kanhkã’,” he tóg. “Ěg jóg tỹ Topê vĩ tóg vênh kar kãfór nĩ,” he tóg. “Ti hã ne

ēg jóg'jóg tỹ Abraão mré vỹ ja nĩgtĩ, ti tỹ ver ga tỹ Mesopotâmia tá nĩ ki, ti tỹ ver ěmā tỹ Harā ra tĩ tũ ki.

³Kỹ tóg ti mỹ: “ã jamā tá kutē,” he ja nĩ. “Ā kanhkā ag kar ré kỹ tĩg,” he ja tóg nĩ ti mỹ. “Ga ũ ra tĩg, isỹ tá ã mỹ: tag kã nĩmĩ, he jé,” he ja tóg nĩ ti mỹ, Topē ti.

⁴Hã kỹ tóg ga tỹ Caldéia tá kãkutē mũ, Hãra tá ěmān jé, Abraão ti. Ti panh ter kar kỹ Topē tóg ti mỹ: “ga tag ra tĩg sir,” he mũ.

Ēg jamān hã vỹ, Abraão jamā ja ti,” he tóg, Estêvão ti, pã'i ag mỹ.

⁵“Ge ra Topē tóg Abraão mỹ ga ěn nĩm ja tũ nĩ, ěpỹ pir mré tó kỹ. Ti mỹ tóg hã ra: “ã tũnh ke vỹ, kar kỹ, ã krē tũnh ke vỹ gé,” he ja nĩ, Topē ti. Hã ra tóg ver kósĩn ja tũ nĩ, Topē tỹ ti mỹ: “ã krē tũnh ke vỹ,” he mũ ra.

⁶Kỹ Topē tóg ti mỹ: “ã krē ag tỹ fóg ũ ag mré mũnh ke vỹ, fóg ěn jamā tá,” he mũ. “Fóg ěn ag tỹ camarada han ke vỹ, ag vóg kónān jé ag tóg ke mũ, prỹg tỹ 100 tỹ 4 ki,” he tóg, Abraão mỹ, Topē ti.

⁷“Hã ra ũ tỹ ag vóg kónān mũ ěn ag vóg kónān jé sóg ke mũ gé, kar kỹ,” he tóg, Topē ti. “Isỹ ag vóg kónān kar kỹ ã krē ag tóg tá kãpanh mũ. Kỹ ag tóg ga tag ki isũ ti han mũ,” he tóg, Topē ti. Ti tỹ Abraão mỹ ken hã vỹ,” he tóg, Estêvão ti.

⁸“Kỹ tóg ti mỹ vỹnh jykre nĩm mũ, ti tỹ ã krē ag gré junun fār kym jé. Kỹ ti sinal vỹ sir. Kar kỹ Abraão tóg Isaque han mũ. Ti tỹ kurā tỹ 8 han kỹ tóg ti mỹ kym mũ. Isaque tỹ Jacó han kỹ tóg ge han mũ gé, kỹ Jacó tóg ge han mũ gé, ti tỹ ã krē tỹ 12 ěn ag han kỹ, ěg tỹ ũ to: ěg jóg'jóg kar, he mũ ěn ag,” he tóg. ⁹“Hã ra ěg jóg'jóg ěn ag tóg ājag jāvy tỹ José to jũgũ nỹtĩ, ājag tỹ ti tũ to ěn kỹ. Hã kỹ ag tóg ti vỹne he mũ, José ti, ũ tỹ ga tỹ Egito ra mũ mũ ag mỹ. Hã ra Topē tóg ti ki rĩr mũ. ¹⁰Kỹ tóg ti jy nĩgān mũ, ti tỹ vỹnh jagtar vég mũ ra. Ti jykre há nĩn kỹ tóg Egito tá ke ag pã'i mág mỹ há tĩ, ag tỹ ũ to: Faraó,

he mũ ěn mỹ. Hã kỹ tóg ti tỹ pã'i mág han mũ, Faraó ti, José ti tỹ. Ti tỹ tóg pã'i mág han mũ, ti tỹ Egito tá ke kar ag ki rĩr jé, Faraó mré ke kar ag ki rĩr jé gé sir.

¹¹Kejēn tóg prỹg han mũ, ga tỹ Egito mĩ hã, ga tỹ Canaã mĩ hã ke gé. Kỹ vỹnh kar tóg kókĩnkĩr mũ, prỹg kã. Kỹ ěg jóg'jóg ěn ag tóg kókĩnkĩr mũ gé. ¹²Kỹ ũ tóg Jacó mỹ: “Egito tá ti vỹjēn nĩ inhã,” he mũ. Kỹ tóg ěg jóg'jóg ag jēgnēg mũ, Jacó ti, ag tỹ Egito ra mũ vẽn jé. ¹³Ag tỹ ra mũ mĩn kỹ José tóg vāhā ag mỹ: “inh hã vỹ,” he mũ, ã kãke ag mỹ. Hã kỹ Faraó tóg José kanhkā ki kanhró nĩ gé sir. ¹⁴Kỹ José tóg ã panh tỹ Jacó jé prēr mũ, ti tỹ vỹnh kar tatĩn kãtĩg jé. Ũ tỹ 70 kri 5 ag vỹ, ti kanhkā ag. ¹⁵Kỹ Jacó tóg Egito ra tĩ mũ. Tá tóg ter mũ kejēn. Kar kỹ ěg jóg'jóg ag vỹ tá kãgter kãn mũ gé. ¹⁶Ěmā tỹ Siquém tá ag tóg kénh kỹ nỹtĩ, Abraão vỹ tóg vỹnh kej ěn to jānkamy nĩm ja nĩ, Emor krē ag mỹ, ěmā tỹ Siquém tá,” he tóg, Estêvão ti.

¹⁷“Vāhā tóg kurā pétēm ke mũ sir, Topē tỹ Abraão mỹ: “ã krē mỹ sóg ga ěn nĩm mũ,” he mũ kurā ti. Kỹ ag tóg Egito tá vỹnh grun mũ.

¹⁸Kejēn ũ tá pã'i tóg tỹ pã'i jē, Egito tá. Hã ra tóg José mē ja tũ nĩ, pã'i tag ti. ¹⁹Ěn tóg ěg kanhkā ag kã'ug mũ, ag lograr ke tóg mũ, ěg jóg ag vóg kónān tóg mũ gé. Kỹ tóg ag mỹ: “ājag krē kāsĩr ag vãm ra, ag kãgter jé,” he mũ, pã'i ěn ti,” he tóg, Estêvão ti.

²⁰“Ti tỹ tag tó kar vāhā Moisés tóg mur mũ, kỹ tóg Topē mỹ há tĩ. Hã ra ti han mũ fag tóg kysā tãgtũ hã ki ti ki rĩr mũ. ²¹Kysā tãgtũ tũg kỹ fag tóg sir ti fón mũ. Hã ra Faraó ěn kósĩn fi tóg ti ve kỹ ti vãg mũ, ti jē'yn jé. Kỹ tóg fi kósĩn ri ke nĩ, Moisés ti. ²²Kỹ tóg nēn kar ki kanhrān mũ, Egito tá vỹnh jykre kar ěn ki. Kỹ ti jykre vỹ vỹnh jykre tỹ hēn ri ke nĩ, kỹ ti vỹ vỹ vỹnh vỹ tỹ hēn ri ke nỹ gé, Moisés ti,” he tóg, Estêvão ti.

²³“Vāhā tóg pr̥g t̃ 40 han m̃, Moisés ti. K̃y tóg ā kanhkā pē ag to jykrén m̃, povo t̃ Israel to, ag t̃y nén han m̃ venh t̃g jē. ²⁴K̃y tóg ũ vэг m̃. Egito tá ke ũ vэг tóg m̃, Moisés ti. T̃i t̃y Israel vóg kónān vэг tóg m̃, nén ũ t̃u to. K̃y tóg ti to j̃ū k̃y Israel ēn ka-jām m̃, ti tén tóg m̃, Egito tá ke ēn ti. ²⁵“Inh kanhkā ag h̃yn is̃y nén han m̃ to jykrén m̃,” he tóg. “Hā k̃y ag tóg ki kanhró ñt̃i, Topē t̃y inh tugr̃in ag kren han ke ti,” he tóg, Moisés ti. Hā ra ag tóg to jykrén t̃u ñt̃i, ti kanhkā ag,” he tóg, Estêvão ti.

²⁶“T̃y vaj k̃y tóg ag to t̃g m̃an m̃, ā kanhkā ag to. K̃y ũn régre ag tóg jagnē to j̃ū ñt̃i, Israel ag. K̃y Moisés tóg ag t̃y jagnē to há han sór m̃. Hā jē tóg ag m̃y: “t̃y ājag tóg jagnē kanhkā ñt̃i vē,” he m̃. “Ājag t̃y ne jē jagnē vóg kónān sór nē?” he tóg.

²⁷Ũ t̃y ā régre vóg kónān m̃ ēn tóg ti vóg k̃y ti m̃y: “ā pi(jé) t̃y ēg p̃ai ñi,” he m̃. “Ā pi(jé) ēg jyvén m̃i,” he tóg. ²⁸“Ā h̃yn isén sór m̃, ā t̃y rāké tá Egito tá ke ēn tén ri ke han sór ā h̃yn m̃,” he tóg ti m̃y,” he tóg, Estêvão ti.

²⁹“K̃y Moisés tóg ā t̃y ti ṽi mē k̃y tóg vènh péju k̃y t̃i m̃. K̃y tóg ga t̃y Midia ra t̃i m̃. Povo ũ ag m̃i tóg t̃i m̃ gé. Tá tóg pr̃ug k̃y kós̃in régre han m̃. ³⁰Pr̃g t̃y 40 t̃ug k̃y Topē t̃y jēnē jafā ṽy ti m̃y vènh ven m̃, ti t̃y ēmā t̃u ja m̃i t̃i m̃ ra, kr̃i t̃y Sinai tá. Vành grug ki tóg ti vэг m̃, Moisés ti, Topē t̃y jēnē jafā ēn ti. ³¹T̃i t̃y ti ve k̃y tóg ti m̃y e t̃i. K̃y tóg ra t̃i m̃, ti ve há han jē. K̃y tóg vènh ṽi mēg m̃. Topē ṽi vē. ³²K̃y tóg ti m̃y: “t̃y sóg ā jóg'jóg ag Topē ñi,” he m̃, “Abraão Topē, Isaque Topē, Jacó Topē,” he tóg, vènh ṽi ti.

Hā ra Moisés tóg j̃ur̃un ke m̃, ti kamēg k̃y. K̃y tóg tá ēvānh jāvānh ñi.

³³Hā ra Topē tóg ti m̃y: “ā pēn né kuñi ra, ā pēn to ró ti,” he m̃. “Inh jo ā tóg jē ñi (m̃ỹr), hā ra sóg vènh kar k̃afór ñi. Hā

k̃y kuñi,” he tóg, Topē ti. ³⁴“Egito tá ke ag t̃y is̃u ag vóg kónān vэг isóg ñi ñi. Ag vèkrénkrér mēg sóg ñi ñi. K̃y sóg tere, s̃y ag kygvān jē. Hā k̃y sóg ā jēnēg m̃, ga t̃y Egito ra, ā t̃y ag kygvān jē. Ha t̃g,” he tóg, Topē t̃y jēnē jafā ti, Moisés m̃y,” he tóg, Estêvão ti.

³⁵“Moisés ēn hā jēnē ja tóg ñi, Topē ti, ti t̃y ā kanhkā ag kren han jē, ti t̃y t̃y p̃ai ñi jē. Hā to Topē t̃y jēnē jafā tóg ti m̃y vènh ven, vānh gru ki. Hā ra ti kanhkā ag tóg ti to é he ja ñigt̃i, ti m̃y: “ā pi(jé) t̃y ēg p̃ai ñi,” hen k̃y, “ā pi(jé) ēg jyvén m̃i,” hen k̃y. ³⁶Moisés tóg sir ēg t̃y nén han vānh hyn han, ga t̃y Egito tá, goj kafā t̃u tá ke gé, goj kus̃g he m̃i ēn tá ke gé. K̃y ag tóg ēmā t̃u m̃i m̃i m̃, pr̃g t̃y 40 ki, ti kanhkā ag. K̃y Moisés ṽy ag jo t̃i m̃, ti t̃y ga t̃y Egito tá ag k̃apan k̃y. Hā ra tóg ag m̃un ki ēg t̃y nén han vānh hyn han m̃i gé,” he tóg, Estêvão ti.

³⁷“Moisés tóg ā kanhkā ag m̃y, povo t̃y Israel ag m̃y tóg tag tó ja ñi: “Topē ṽy ājag m̃y ā ṽi tó t̃i ũ jēnēnh m̃, ājag mré ke ũ, ti t̃y ājag m̃y Topē ṽi tó jē inh ri kén,” he ja tóg ñigt̃i, Moisés ti. ³⁸Moisés ēn hā ne tóg povo t̃y Israel ag mré ēmā t̃u m̃i t̃i ja ñigt̃i. Ag t̃y kejēn p̃anónh t̃y Sinai tá ñyt̃in k̃y tóg Topē t̃y jēnē jafā mré ṽi m̃, Moisés ti. K̃y tóg ti m̃y vènh ṽi ñim m̃, Topē ti, ēg t̃y ti ṽi ēn han k̃y ēg t̃y ēg r̃ir kr̃ỹg ja t̃u ve jē. K̃y Moisés tóg ēg jóg'jóg ag m̃y vènh ṽi ēn tugtó m̃. Hā ra tóg ēg m̃y tó m̃i gé,” he tóg, Estêvão ti.

³⁹“Moisés ṽi han vānh ag ñyt̃i, ēg jóg'jóg ag. K̃y ag tóg ti tovānh k̃y ga t̃y Egito ra m̃i m̃an sór m̃, kyrāgrā k̃y. ⁴⁰K̃y ag tóg Moisés jāṽy t̃y Arão mré ṽi m̃. K̃y ag tóg ti m̃y: “ēg m̃y vènh k̃aggrā t̃y topē han, retrato t̃y, ēg t̃y vènh jo ag gé(g) m̃i jē,” he ag tóg.

Hā ra Moisés ṽy ver p̃anónh t̃y Sinai kri ñi ñi.

K̃y ag tóg Arão m̃y: “Moisés tóg ēg jo t̃g ja ñi,” he m̃. “Ēg k̃apan ja tóg ñi, ga t̃y Egito tá, hā ran hē ra ṽyr h̃yn'?”

he ag tóg ti mý. Ký tóg ag mý: “hej,” he mû. ⁴¹ Ký ag tóg monh sī kăggran mû. Ký ag tóg ti kăggrá ên mý ag tóg ājag mēg kugprūn mû, retrato ên mý. Ag tỹ han mû tóg ag mý sīnvī tĩ. Ký tóg ag mý sér tĩ sir.

⁴² Hā ra Topē tóg vênh kaja jé ag tovānh mû gé, hā ký ag tóg rā to jānjān mû, kysā to (mýr), krīg kar to (mýr). Hā ký Topē vī tó tĩ ũ tóg ag to rān mû gé, ký tóg: “Israel,” he mû. “Ājag tỹ ěmā tũ ja mĩ mūn ký ājag tóg inh mý nén ũ pūn ja tũ nĩgtĩ (mýr),” he tóg. “Prýg tỹ 40 ki ājag tóg ěmā tũ ja mĩ mû ja nĩgtĩ,” he tóg, “hā ra ājag tóg topē ũ ag mý kugprūn ja nĩgtĩ, inh mý pūn tũ nĩn ký,” he tóg, Topē ti, ā vī tó tĩ tỹ. ⁴³ “Topē tỹ Moloque ĩn sī va ājag tóg mû ja nĩgtĩ, krīg kăggrá ke gé, hā vỹ: Renfă, he mû, krīg retrato ên ti,” he tóg. “Vênh kăggrá ên to ājag tóg jānjān ja nĩgtĩ,” he tóg. “Hā ký sóg ājag vóg kónān ký Babilônia tá ke ag jěgnēnh mû, ag tỹ ājag tatĩn mû jé, cidade tỹ Babilônia mā ra,” he tóg, Topē ti, ā vī tó tĩ tỹ,” he tóg, Estêvão ti.

⁴⁴ “Ēg jóg ag tỹ ěmā tũg ja mĩ mūn ký ag tóg kur tỹ Topē pē jo ĩn han ja nĩ, ag tỹ tá Topē tũ han jé, ti ĩn tá. Topē vỹ Moisés mý tó ja nĩ, ti tỹ kur tỹ Topē jo ĩn han jé, ký tóg ti tỹ nén han ke ven ja nĩ ti mý. ⁴⁵ Ag krē tóg sir ag ri kén ĩn tỹ kur ên ma mû ja nĩgtĩ gé, ag tỹ Topē tỹ ājag mý ěmā tó mû ên ra mūn ký. Moisés ter kar Josué tóg sir ag jo tĩ mû, ký ag tóg ga ên ra mû mû. Hā ra Topē tóg ga ên tá ke ag kăpan mû, ěg jóg'jóg ag jo.

Kejēn Davi tóg tỹ ag păi'ĩ nĩ sir, prýg tỹ hēn ri ke kar ký. Hā ra ĩn tỹ kur ên tóg ver jē nĩ. ⁴⁶ Topē vỹ Davi to há nĩ. Ký Davi tóg ti mý: “sỹ ā mý ĩn há han há tóg tĩ vē,” he mû. “Ā hā ne tóg tỹ ijóg'jóg tỹ Jacó Topē nĩ,” he tóg. “Ký tóg ā tỹ ĩn tỹ kur krēm nĩn ký inh mý há tũ nĩ,” he tóg ti mý, Davi ti.

⁴⁷ Hā ra Davi tóg han tũ nĩ ver. Ti kósın tỹ Salomão tóg ĩn ên han mû,” he tóg, Estêvão ti.

⁴⁸ Ký tóg ag mý: “hā ra vênh kar kăfór ên tóg ěg tỹ ti jo ĩn han mû ên krēm nĩ tũ nĩgtĩ (mýr),” he mû. “Hā ký Topē vī tó tĩ ũ tóg ti to tag tó ja nĩ, ha mē. ⁴⁹ “Kanhkă tân vỹ tỹ inh nĩ,” he tóg. “Inh nĩg ja ri ken hā vē,” he tóg. “Ký ga vỹ tỹ isũ nĩ gé. Sỹ tá vênhkán sór nĩn ký sóg kenh ke mû. Isũ kar vē. Ký ājag tỹ inh mý ĩn han sór ký ājag hỹn hē ri kenh mû?” he tóg. “Pétēm ke tũ ājag nĩnh mû, ājag tỹ inh mý vênhkán jafā han ken ki,” he tóg. ⁵⁰ “Inh hā ne tóg nén kar hyn han ja nĩ inhhā,” he tóg, Topē ti, ā vī tó tĩ tỹ,” he tóg, Estêvão ti.

⁵¹ Ký tóg ag mý: “krĩ tũ ājag nỹtĩ (mýr),” he mû. “Ki kanhrān jāvānh ājag tóg nỹtĩ (mýr),” he tóg. “Ký ājag nĩgrēg tóg kutu nĩ gé (mýr), Topē kuprīg kato ājag tóg vāsānsān nỹtĩ. Ājag jóg'jóg ag mré ājag tóg ti kato vāsānsān nỹtĩ,” he tóg. ⁵² “Ājag jóg'jóg ag ne tóg Topē vī tó tĩ ag kar vóg kónān ja nĩgtĩ, ag kăgtén ja ag tóg nĩgtĩ. Hā ra ên ag tóg ũ tỹ vênh jykre kuryj han mû ên kāmén ja nĩgtĩ, hā vỹ: Jesus, he mû. Ti kătīg ke jo ag tóg ti tó ja nĩgtĩ, Topē vī tó tĩ ag. Jāvo ājag tóg ên kato vī ja nĩgtĩ, fóg mý. Ký ājag tóg ti tén ja nĩgtĩ, Cristo ti,” he tóg, Estêvão ti.

⁵³ “Topē hā ne ājag mý ā vī nĩm ja nĩ, ā tỹ jěgnē jafā ag tỹ. Hā ra ājag tóg ti vĩ mrynhranh ja nĩgtĩ,” he tóg. Estêvão tỹ păi'ĩ ag mý tón hā vē.

Ag tỹ Estêvão tén

⁵⁴ Ũ tỹ tá nỹtĩ ag tỹ ti vĩ mē ký ag fe tóg gỹm ke mû. Ký ag tóg ājag jā tỹ gyngyn he mû, tỹ ag tóg gangan ke mû. ⁵⁵ Hā ra Topē kuprīg tóg Estêvão krĩn mû, ký Estêvão tóg kanhkă ki ěvānh mû. Ký tóg Topē vég mû, ti kókov ti. Jesus vég tóg mû gé, Topē pēgja tá tóg jē nĩ, Jesus ti. ⁵⁶ Ký tóg: “ha vé,” he mû. “Kanhkă tá sóg

vég mû,” he tóg. “Kỹ êprā ke fi kósin tóg Topē pēgja tá jē nī,” he tóg.

⁵⁷ Kĩ ag tóg prēnprēr mû sir, ājag nĩgrēg nĩgfénh kĩ. Tĩ to ag tóg vēnh génh mû sir, ag kar ti. ⁵⁸ Kĩ ag tóg ti ség mû, cidade tĩ Jerusalém tá ag tóg ti kutēm mû gé. Kĩ ag tóg ti pin mû, pó tĩ. Ājag kur vāvām ag tóg mû, kĩ kyrũ tóg ki rĩr mû, ag kur ki. Kyrũ ěn jiji hā vỹ: Saulo, he mû.

⁵⁹ Kĩ ag tóg Estêvão pin mû sir, pó tĩ. Hā ra Estêvão tóg jamā hár(a): “!..inh Senhor’..!” he mû. “!..Jesus’..!” he tóg. “!..Inh kuprĩg jāvānh ra..!” he tóg mû. ⁶⁰ Kĩ tóg ā jakrĩ tĩ jē kĩ prēr mû, jamā hár(a), kĩ tóg: “!..inh Senhor’..!” he mû. “!..Ag tĩ inh pin tĩ vēnh pāte fón ne..!” he tóg mû. Kar kĩ tóg hun ke mû sir.

Saulo tĩ ag vóg kónān

8 Jāvo Saulo ěn mĩ tóg há tĩ, ag tĩ ti tén kĩ. Kurā ěn kā ag tóg Jesus ki ge mû kar vóg kónān jagy han mû, Jerusalém tá. Ũ tĩ vēnh mǎn tĩ ag vóg kónān ag tóg mû gé, ũ tĩ Topē vĩ mē jé vēnh mǎn tĩ ag. Kĩ ag tóg jagāgtar tāvĩ nĩtĩ. Kĩ ag tóg vēnh kǎpugpóv kǎn mû sir. Ga tĩ Judéia kar mĩ ag tóg mû mû, ga tĩ Samaria mĩ ke gé. Hā ra Jesus tĩ ũn vin mû ag hā tóg Jerusalém tá nĩtĩ nĩ.

² Ũ tĩ Topē to há tĩ ag tóg fe kaj nĩtĩ, Estêvão ter kĩ. Kĩ ag tóg kygfỹ mág kĩ ti kénh mû.

³ Hā ra Saulo tóg Jesus ki ge kĩ nĩtĩ kar ag vóg kónān jagy han mû, ũ tĩ Topē vĩ mē jé vēnh mǎn tĩ ag. Tĩ tĩ ag tũg sór vē, Saulo ti. Hā jé tóg ĩn kar kǎra rǎ tĩ. Tĩ tĩ Jesus ki rǎ kĩ jē ũ ven kĩ tóg vēse jan kǎtá ti fón ti, ũn gré ag, ũn tǎtá fag ke gé.

Samaria tá Topē vĩ tó

⁴ Ũ tĩ vēnh kǎpugpóv mû ěn ag vỹ vēnh kar mĩ vēnh vĩ sér tugtó mũgtĩ, Topē vĩ ti. ⁵ Kĩ Filipe tóg tĩ mû gé. Ga tĩ Samaria ra tóg tĩ mû, kĩ tóg cidade ũ

ki ra mû, Cristo kāmén jē. ⁶ Kĩ vēnh kar tóg ti vĩ mēgmēg mû. Jēmē há han ag tóg mû, Filipe vĩ ti. Hā ra Filipe tóg ěg tĩ nén han vānh hyn han mû gé. Kĩ ag tóg vég mû. Hā kĩ ag tóg jēmē há han mû. ⁷ Vēnh jagrē kórég tĩ hēn ri ke pan tóg mû, Filipe ti. Tĩ tĩ ag pan kĩ ag tóg jamā hár(a) prēr mû, kĩ ag tóg kǎpa mû. Ũ grĩ ag tĩ há’ he tóg mû gé, ũn vagvá ag tĩ ke gé, ũn vygvá ag tĩ. ⁸ Kĩ tóg vēnh kar mĩ sér tĩ sir, cidade ěn tá.

⁹ Kĩ Simão tóg nĩ nĩ, cidade ěn tá ke ũ. Kujá vē, Simão ěn ti. Kĩ tóg nén vēnhmỹ hyn han tĩgtĩ. Kĩ tóg ga tĩ Samaria tá ke ag tĩ ti tĩ nén han ve kĩ tóg ag mĩ e tĩ. Vēso tóg: “ag kǎfór inh nĩ,” he tĩ, ag tĩ ti kamēg jé. ¹⁰ Hā kĩ vēnh kar tóg ti kamēg mû sir, ũn sanh ag, gĩr ag ke gé. Tĩ to ag tóg: “Topē jykre han tóg tĩgtĩ, Topē jykre mág (pē) ěn,” he tĩ, Simão ěn to. ¹¹ Kysā tĩ hēn ri ke ki tóg nén vēnhmỹ hyn han ti, kĩ tóg vēnh kar mĩ e tĩ, hā kĩ ag tóg ti kamēg tĩ sir.

¹² Vāhā ag tóg Filipe vĩ kri fig mû, Samaria tá ke ag, ti tĩ Jesus Cristo tón kĩ. Topē tĩ tĩ ěg pǎi nĩ kāmén tóg mû, Filipe ti. Ũ tĩ ā vĩ kri fig mû ag kygpég tóg mû, ũn gré ag, ũn tǎtá fag ke gé. ¹³ Kĩ Simão ěn tóg ti vĩ kri fig mû gé, kujá ěn ti. Kĩ Filipe tóg ti kypég mû gé. Kĩ tóg Filipe mré nĩ nĩ. Kĩ tóg Filipe tĩ ěg tĩ nén han vānh hyn han mû vég mû, Topē jykre tĩ. Kĩ tóg ti mĩ e (pē) tāvĩ tĩ sir, Simão mĩ.

¹⁴ Kĩ vāhā Jesus tĩ ũn vin mû ag tóg kejēn mēg mû, Samaria tá ke ag tĩ Topē vĩ kri fig mû ěn ti. Jerusalém tá ag tóg mēg mû, kĩ ag tóg João mré Pedro jēnēg mû, ag tĩ ve jé. ¹⁵ Pedro ag tĩ tá junjun kĩ ag tóg ag to Topē mré vĩ mû, Samaria tá ke ag to, Topē tĩ ā kuprĩg tĩ ag jagrēn jé. ¹⁶ Tá ke ũ tóg tĩ jagrē tũ ja nĩ ver. Kygpe kĩ ag nĩtĩ inhhā, Jesus jiji tó kĩ, ěg Senhor jyjy tó kĩ. ¹⁷ Kĩ Pedro ag tóg ājag nĩgé tĩ ag mēgmēg mû, kĩ Topē kuprĩg tóg ag kǎra rǎ mû.

¹⁸ Hã ra Simão tóg vég mû, Jesus tỹ ùn vin mû ag tỹ nén han mû ti. Ag tỹ ù mẽ kỹ Topê kuprĩg tóg ag kâra rã mû. Ên vég tóg mû, Simão ti. Kỹ tóg ag mỹ jänkamy ven mû, Pedro ag mỹ. ¹⁹ Kỹ tóg ag mỹ: “inh mỹ vênh jykre tag nĩm nĩ, jänkamy tag to,” he mû. “Sỹ ù mẽ kỹ Topê kuprĩg tóg ag kâra rãnh ke mû. Sỹ vênh jykre ên ki kanhrã há tóg tĩ,” he tóg.

²⁰ Hã ra Pedro tóg ti mỹ: “ã jänkamy mré ã nũgme ki kutênh mû,” he mû. “Topê tỹ nĩm ja vê (mỹr), hã ra ã tóg jänkamy ti măn sór mû, vênh jykre ti,” he tóg. ²¹ “Ã pi(jé) Topê jykre tag ki kanhró nĩnh mû, kỹ Topê tóg ã mỹ nĩm ke tũ nĩ,” he tóg. “Ã jykre pijé kuryj nỹ, Topê mỹ,” he tóg. ²² “Ã jykre pãno tag tovãnh ra,” he tóg. “Topê mré vĩ. Hên ri ke mũn tóg ã mỹ vênh pãte fón mû, ã tỹ vênh jykre pãno to jykrén mû tag ti,” he tóg. Pedro ti. ²³ “Fe kórég tãvĩ ã nĩ (mỹr), kỹ ã jykre vỹ pãno nỹ gé sir,” he tóg, Pedro ti.

²⁴ Kỹ Simão tóg ti mỹ: “iso Topê mré vĩ, inh jagtar jêg tũ nĩ jé, ã tỹ inh mỹ tó mû tag ti,” he mû.

²⁵ Hã ra Pedro ag tóg mû măn gé, ag tỹ êg Senhor tỹ Jesus vĩ tó kar kỹ. Ajag tỹ nén ve ja ên tó kãn ag tóg, Jesus tỹ nén han ja ti. Kỹ ag tóg Jerusalém to vỹnvỹn ke mû sir. Ag mû kỹ ag tóg ga tỹ Samaria mĩ Topê vĩ há tugtó mû gé.

Filipe tỹ ùn kypég mû

²⁶ Hã ra Topê tỹ jêñê jafã tóg Filipe mỹ vĩ mû, kỹ tóg: “kanhkã tãpér ra tĩg, êpřy jagma tĩg, êmĩn jagma,” he mû. Jerusalém tán kãtĩ, Gaza mĩ, hã ra tóg êmã tũ fĩn kutê mû. Êpřy ên jagma tĩg, êmĩn ên jagma,” he tóg mû, Topê tỹ jêñê jafã ti.

Kỹ tóg tĩ mû sir, Filipe ti. ²⁷ Tá jun kỹ tóg ga tỹ Etiópia tá ke vég mû, pã'i fi rãnhřãj han tĩ ti, pã'i tỹ rainha fi tỹ nén ù kar vég tĩ ti, ùn kurĩ ên ti. Pã'i fi jijin hã vỹ: Candace, he mû. Fi krêm pã'i ên tóg

Jerusalém ra tĩg ja nĩ, ùn kurĩ ên ti. Tá tóg Topê kurã mág ve ja nĩ, festa mág ti, Jerusalém tá. ²⁸ Hã ra tóg ã jamã ra vỹn ke mû sir, carroça kãmĩ. Tĩg kỹ tóg Topê vĩ to ke mû, Isaías tỹ rá ên ti. Vãsỹ Topê vĩ tó tĩ vê, hã vỹ: Isaías, he mû.

²⁹ Kỹ Topê kuprĩg tóg Filipe mỹ: “carroça kukãm tĩg,” he mû. ³⁰ Kỹ Filipe tóg fũrũn tĩ mû, kỹ tóg ti tỹ vênh rá to ke mẽg mû, Isaías tỹ rá ên to, vãsỹ Topê vĩ tó tĩ tỹ rá ên to. Kỹ tóg ti mỹ: “ã mỹ ã tỹ nén to ke mũ tag ki kanhró nĩ?” he mû.

³¹ Hã ra tóg: “vó,” he mû. “Û tóg inh mỹ kãmén ja tũ nĩ ver,” he tóg. “Ã mỹ inh mỹ kãmén ke tũ nĩ?” he tóg. “Tãpřy ra, inh mré nĩ jé,” he tóg. Kỹ tóg ke mû, Filipe ti.

³² Ti tỹ ken hã vê, ha mẽ: “ovelha ri ke han tóg, ù ên ti. Ovelha pére êg mũgtĩ, ti tãnh jé, hã ra tóg vĩ tũ nĩgtĩ (mỹr). Cordeiro ri ke han tóg mû gé. Êg tỹ ti kyki ronh mû ra tóg jatun mỹ jé nĩ gé (mỹr). ³³ Û ên tỹ Topê vĩ mranh tũ hã ra ag tóg ti vóg kónãn, ag tỹ ti jyvẽn tũ ra. Ti mré ke ag jykre pãno tó kãn ke tũ êg tóg nĩgtĩ (mỹr). Ti tén ja ag tóg (mỹr), kỹ tóg ter mû sir,” he tóg, vênh rá ti.

³⁴ Kỹ ùn kurĩ ên tóg Filipe mỹ: “ũ to ke nê hỹn? Topê vĩ tó tĩ tỹ ne tó nê hỹn?” he mû. “Inh mỹ tó,” he tóg. “Ti tỹ vêso ke mỹ, ù to ke mỹ vó?” he tóg.

³⁵ Kỹ Filipe tóg ti mỹ vênh rá tag kãmén mû sir. Jesus kãmén tóg mû. Ti mỹ tóg vênh vĩ há ên tó mû, Jesus to.

³⁶ Ge ag tóg mû mû, êpřy jagma, êmĩn jagma. Kỹ ag tóg goj tá junjun mû. Kỹ ùn kurĩ ên tóg: “tag ki tóg goj nĩ,” he mû. “Ã tỹ ki inh kype jé tóg há nĩ, he tóg.

³⁷ Kỹ Filipe tóg ti mỹ: “ã tỹ ã fe tỹ ti ki rã kỹ nĩ nĩn kỹ tóg há nĩ,” he mû.

Kỹ tóg: “ti ki sóg rã kỹ nĩ,” he mû. “Jesus tóg tỹ Topê kósin nĩ (mỹr), Jesus Cristo ti,” he tóg, ùn kurĩ ti. ³⁸ Kỹ tóg carroça tĩn ti mỹ: “ver krỹg hé,” he mû. Kỹ tóg Filipe mré goj ra tére mû, kỹ tóg kâra

rā mū, ūn kurī ti. Kŷ Filipe tóg ti kypég mū sir.

³⁹ Ag tŷ goj kátá kăjăpŷy kŷ Filipe tóg tū' he mū, Topê kuprīg tŷ ti ma tīg kŷ. Kŷ ūn kurī tóg ti ve măn tū nī sir. Hă ra tóg tī mū, â jamăn ra. Tī mŷ tóg sér tī sir.

⁴⁰ Hă ra Filipe tóg cidade tŷ Azoto tá nī nī. Kŷ tóg tīg kŷ Jesus vī tó tī mū, êmă kar mī. Kŷ tóg kejên cidade tŷ Cesaréia tá jun mū, Jesus kăme sér tó jé.

Saulo tŷ Jesus ki rā

(Hk 22.6-16; 26.12-18)

9 Hă ra Saulo tóg ver ū tŷ êg Senhor tŷ Jesus mré mū mū ag vóg kónăn sór mū. Ag to tóg krī rŷ nī ver. Tī tŷ ag kăgtén sór vë. Hă to tóg Topê tū ki rīr tī to pā'i mág to tī mū. ² Kŷ tóg ti mŷ permissão to vī mū, tī tŷ cidade tŷ Damasco ra tīg jé. Tá tóg permissão ên tŷ pā'i ag mŷ ven sór mū, ag tŷ ti mŷ: "ha ag venh tī gé," he jé. Tī tŷ Jesus mré tī mū ū ve kŷ tóg ti se sór tī. Jerusalém ra tóg ag tatī tīg sór tī, tī tŷ ūn ség mū ag, ūn gré ag, ūn tātá fag ke gé. ³ Hă jé tóg Damasco ra tī mū. Tī tŷ kakó ke mŷr hă jêngŕe tar tóg vênh ven mū, kanhkă tá. Ră kăfór tóg nī, hă ra tóg Saulo ki kómkóm ke mū sir. ⁴ Kŷ Saulo tóg kutê mū, ga kri tóg tá' ke mū. Kŷ tóg vênh vī mēg mū. Kŷ tóg: "Saulo', Saulo'," he mū. "Ă tŷ ne jé isū ag vóg kónăn nê?" he tóg, vênh vī ti.

⁵ Kŷ Saulo tóg êg Senhor mŷ: "ă tŷ ū nê?" he mū.

Kŷ tóg ti mŷ: "tŷ sóg Jesus nī, â tŷ ūn vóg kónăn sór tī ên vŷ tŷ inh nī," he mū. ⁶ "Jêg nê ra, cidade tag ki rā, tá ū tóg â mŷ tónh mū, â tŷ nén han ke ti," he tóg, vênh vī ti.

⁷ Tī mré mū ag vŷ vênh vī tag mēg mū gé, hă ra ag tóg nén ū vég tū nī. Kŷ ag kăne tóg jŷrŷn ke mū. ⁸ Kŷ Saulo tóg jêg nê mū sir. Kŷ tóg tāmī êvănĥ sór mū, hă ra tóg nén ū vég tū nī. Kŷ ag tóg ti nīgê kăgmī kŷ ti pére mū mū, cidade tŷ Damasco ra. ⁹ Kură tăgtŷ ki tóg êvănĥ tū nī,

kŷ tóg jêg tū (pê) nī gé, kron tū (pê) ti nī gé, Saulo ti.

¹⁰ Damasco tá ke ū tóg nī nī, tī jyjy hă vŷ: Ananias, he mū. Jesus mré tī ū vë. Kŷ Jesus tóg ti mŷ vênh ven mū. Kŷ tóg: "Ananias'," he mū.

Kŷ Ananias tóg êg Senhor ti mŷ: "inh hă vë," he mū.

¹¹ Kŷ Jesus tóg ti mŷ: "jêg nê ra," he mū. "Êmîn kuryj he mū ên ra tīg. Judas he mū ên ĩn kăra ră. Tá ū tóg nī nī, tī jiji hă vŷ: Saulo, he mū. Cidade tŷ Tarso tá ke vë. Ên mré vĭmnĭ," he tóg. "Ha vé, inh mré tóg vī nī," he tóg. ¹² "Kŷ tóg ū vég nī nī, tī jyjy hă vŷ: Ananias, he mū. Ă hă vë. Ă tŷ tī ĩn kăra rănĥ ke vë. Ă tŷ â nīgê tŷ ti mênĥ ke vë. Kŷ tóg ve măn ke mū, â tŷ ti mên tŷ. Tag vég tóg nī nī, Saulo ti," he tóg, Jesus ti, Ananias mŷ.

¹³ Kŷ Ananias tóg êg Senhor ti mŷ: "vênĥ kar tóg ti kămén tī hă ra, â tŷ inh mŷ tó mū tag ti," he mū. "Jerusalém tá tóg â tū ag vóg kónăn," he tóg. ¹⁴ "Kŷ tóg permissão ma kătī mū, Topê tū ki rīr tī to pā'i mág tŷ ti mŷ han kŷ. Kŷ tóg ū tŷ â mré vī mū kar sigse sór mū, cidade tag ki," he tóg, Ananias ti, Jesus mŷ.

¹⁵ Kŷ êg Senhor tŷ Jesus tóg ti mŷ: "tī venh tīg," he mū. "Tī kuprêg isóg (mŷr), tī tŷ ijiji tó jé, fóg ag kar mŷ, kanĥgág ag kar mŷ ke gé, povo tŷ Israel ag mŷ ke gé," he tóg. ¹⁶ "Tī mŷ sóg ven mū, tī tŷ isugrĭn jagtar ke ti," he tóg, Jesus ti.

¹⁷ Kŷ Ananias tóg tī mū. Tī tŷ ĩn ên tá jun kŷ tóg â nīgê tŷ ti mēg mū, kŷ tóg ti mŷ: "Saulo'," he mū. "Régre'," he tóg mū. "Êg Senhor vŷ inh jênê, Jesus mŷr, sŷ â ve jé," he tóg. "Tī ve â (mŷr), êpŷy kri, â tŷ tag ki jun mŷn kă," he tóg. "Hă kŷ sóg kătī mū, â tŷ ve măn jé, Topê kuprīg tŷ tŷ â jagŕe nī jé," he tóg, Ananias ti.

¹⁸ Kŷ tóg vâĥă ti kanê tá pa mū, piră făr ri ke. Kŷ tóg ve há' he măn mū sir. Kŷ tóg jêg nê mū sir. Kŷ tóg ti kypég mū sir, Ananias ti. ¹⁹ Kŷ tóg jêg mū gé sir, hă kŷ tóg tar' he mū sir. Damasco tá tóg nī

nĩ ver, Jesus mrē mū tĩ ag mré. ²⁰ Kĩ tóg vēsýmér Jesus kāmén mū, Israel ag vēnh kanhrān jafā krēm. “Tĩ tóg Topē kósín nĩ,” he tóg mū, Jesus to. ²¹ Ū tĩ ti vĩ mēg mū kar ag mĩ tóg e tĩ. “Jerusalém tá tóg ag vóg kónān, ũ tĩ Jesus tó mū ag,” he ag tóg. “Kĩ tóg tag ki jun mū gé, ag sigse jé, Topē tũ ki rĩr tĩ tĩ pā'i mág ag mĩ ag tatĩ tĩg jé,” he ag tóg, Saulo to. Kĩ tóg ag mĩ e tĩ, ti tĩ Jesus to: Topē kósín vē,” hen kĩ.

²² Hã ra Saulo tóg fe tar nĩ. Kĩ tóg Israel ag kanhrān mū, cidade tĩ Damasco tá. Ag mĩ tóg Jesus kāmén mū. “Tĩ tóg Cristo nĩ, Jesus ti,” he tóg, ag mĩ Topē vĩ kāmén kĩ. Kĩ tóg ag tĩ ti vĩ kafān sór mū hã ra ag mĩ vēnhmĩ tĩ sir.

Saulo tĩ cidade tĩ Jerusalém ra tĩg

²³ Kurā tĩ hēn ri ke tũg kĩ Israel ag tóg kejēn jagnē mré jykrén mū, Saulo tén ke to. ²⁴ Hã ra Saulo tóg mēg mū, ag tĩ ti to jykrén ěn to. Cidade ěn to ró jānkā tá ag tóg vājig nĩtĩ, ti jo, kurā kar ki, kuty tá ke gé, ag tĩ hēn ri ke mūn tá ti tén jé. Kĩ tóg mēg mū sir, Saulo ti. ²⁵ Kĩ ti mré ke ag vĩ kuty tá kēj kākā ti nĩm kĩ ti térem mū, cidade ěn to ró to. Kĩ tóg Jerusalém ra tĩ mū.

²⁶ Ti tĩ Jerusalém tá jun kĩ tóg Jesus mré mū ag mré nĩ sór mū, Jesus mré mū tĩ ag mré. Hã ra ag tóg ti kamēg mū. “Ti ón hĩn,” he ag tóg ti to, ti tĩ ag vóg kónān jan kĩ. ²⁷ Kĩ Barnabé tóg ti mré vĩ kĩ Jesus tĩ ũn vĩn mū ag to ti pére tĩ mū. Kĩ tóg ag mĩ ti tĩ Jesus ve ja ěn kāmén mū, ěpry jagma. “Kĩ Jesus tóg ti mré vĩ ja nĩ gé,” he tóg. “Kar tóg Damasco tá ke ag mĩ Jesus kāmén ja nĩ gé, ti tĩ mūmēg tũ nĩn kĩ,” he tóg, Barnabé ti.

²⁸ Kĩ Saulo tóg ag mré tĩ nĩ ver, Jerusalém tá. Tá tóg Jesus kāmén mū gé, ti tĩ mūmēg tũ nĩn kĩ. ²⁹ Kĩ tóg Israel ag mré vĩ mū gé, ũ tĩ Grego vĩ tó mū ag mré ke gé. Ag tĩ ti vĩ kafān kĩ tóg ag mré vĩ mū. Hã ra ag tóg ti tén ke to jykrén mū,

Saulo tén ke to. ³⁰ Kĩ Jesus mré ke ag tóg mēg mū gé, ag tĩ Saulo tén ke to jykrén mū ěn to. Kĩ ag tóg cidade tĩ Cesaréia ra ti pére mū mū. Tá junjun kĩ ag tóg cidade tĩ Tarso ra ti jēnēg mū.

³¹ Jesus ki ge kĩ nĩtĩ ag kar vĩ jatun mĩ nĩtĩ nĩ sir, ũ tĩ Topē vĩ mē jé vēnh mĩn tĩ ěn ag. Jatun mĩ ag tóg nĩtĩ sir, ga tĩ Judéia tá, ga tĩ Galiléia tá ke gé, ga tĩ Samaria tá ke gé. Kĩ ag tóg jatun mĩ vēnh kanhrān mū, Topē jykre tĩ. Topē vĩ ki ag tóg króm mū, Topē kamēg kĩ. Topē kuprĩg vĩ ag krĩn mū. Kĩ ag krĩ vĩ kānhvy' he mū. Kĩ ag tóg e nĩtĩ gé sir.

Enéias

³² Kejēn Pedro tóg vēnh kar ag veg-venh tĩ mū. Kĩ tóg cidade tĩ Lida ra tĩ mū gé, tá Topē tũ ag vegve jé. ³³ Tá ũ tóg nĩ nĩ, ti jijin hã vĩ: Enéias, he mū. Grĩn kĩ tóg nĩ nĩ, ā cama kri. 8 anos han tóg, grĩ nĩ ki.

³⁴ Kĩ Pedro tóg ti mĩ: “Enéias’,” he mū. “Jesus Cristo vĩ ā han,” he tóg. “Jēg nē ra, ā cama fi han ra,” he tóg.

³⁵ Kĩ tóg vēsýmér jēg nē mū. Kĩ cidade tĩ Lida tá ke kar ag vĩ ti vég mū, cidade tĩ Saroná tá ke kar ag ke gé. Kĩ ag tóg ti ve kĩ Jesus ki ge mū gé sir.

Dorcas fi

³⁶ Cidade tĩ Jope tá ũ fi tóg nĩ nĩ, Jesus mré tĩ mū fi, fi jiji hã vĩ: Tabita, he mū, hã vĩ: Dorcas, he mū, fi jyjy ti, fóg tĩ Grego vĩn ki. ěn fi hã vĩ nēn kar há han mū. Ũn jagāgtar fag mĩ fi tóg nēn vĩn tĩ.

³⁷ Kejēn fi tóg kaga nĩ nĩ, kĩ fi tóg ter mū sir. Kĩ fag tóg fi kupe kĩ ĩn to jāpry jafā tá fi fig mū, kynh mĩ.

³⁸ Jo Jope tóg Lida kakó kã nĩ, hã ra Pedro tóg Lida tá nĩ nĩ. Kĩ Jope tá ke ag tóg ti ki kanhró nĩtĩ, Pedron ki, Jesus mré mū ag.

Kĩ ag tóg ũn régre ag jēgnēg mū, ag tĩ ti mĩ: “kur kātĩg mē han,” he jé. ³⁹ Kĩ Pedro tóg vēsýmér tĩ mū. Kĩ tóg tá jun

mũ. Hā ra Dorcas fi tóg ĩn to jāpɾy jafā tá nỹ nĩ, ter kỹ. Pedro jun kỹ ag tóg ĩn to jāpɾy jafā to jāpɾy mũ, ti mré. Kỹ ũn mén ter ja ěn fag kar vỹ ti to kāmũ mũ. Kygfỹ fag tóg mũ. Ti mỹ fag tóg kur venven mũ, fi tỹ fag mỹ kugrỹn ja ti, camisa, vestido ke gé, vènh kri fẽ ke gé. Dorcas fi tóg fag mỹ kugrỹn mẽ han ja nĩtĩ.

⁴⁰ Kỹ Pedro tóg vènh kar mỹ: “ha pa jẽg,” he mũ. Kỹ tóg ã jakrĩ tỹ jẽg kỹ Topẽ mré vĩ mũ. Kỹ tóg vèser ti mỹ: “Tabita', nĩ ra,” he mũ. Kỹ fi tóg mɾin ke mũ. Kỹ fi tóg nĩ mũ, fi tỹ Pedro ven kỹ. ⁴¹ Kỹ tóg fi nĩgẽ kãgmĩ kỹ fi fẽg mũ. Kỹ tóg vènh kar jé prẽr mũ, Topẽ tũ kar, ũn mén ter ja ěn fag mré hã. Kỹ tóg fag mỹ fi ven mũ.

⁴² Kỹ Jope tá ke kar ag vỹ mẽg mũ sir, fi rĩr mǎn ěn ti. Kỹ ũ tỹ hẽn ri ke ag vỹ Jesus ki ge mũ sir.

⁴³ Kỹ Pedro tóg cidade tỹ Jope tá nĩ nĩ ver, Simão he mũ ěn mré, ũ tỹ nén fár tỹ tǎnǎj ke tĩ ěn mré.

Capitão tỹ Cornélio

10 Cidade tỹ Cesaréia tá ũ tóg nĩ nĩ, ti jiji hã vỹ: Cornélio, he mũ. Soldado tỹ 100 to pǎi vẽ, ag tỹ ũ to: ga tỹ Itália tá ke ag, he mũ ěn to capitão vẽ. ² Ěn vỹ Topẽ to há nĩ, kỹ tóg Topẽ kamẽg tĩ. Ti mré ke kar vỹ ge nỹtĩ gé. Povo tỹ Israel ag kāmĩ ũn jagǎgtar ag jagǎgtǎn tóg tĩgtĩ, ti tỹ tỹ Israel ag mré ke tũ hã ra. Topẽ mré tóg vĩ tĩ gé. ³ Ěn tóg nén nẽ vэг mũ, 3 horas ki, ã nũr tũ ra. Kỹ tóg Topẽ tỹ jẽnẽ jafā jun vэг mũ. Kỹ tóg ti mỹ: “Cornélio,” he mũ, Topẽ tỹ jẽnẽ jafā ti.

⁴ Ti tỹ ti ve kỹ ti fe tóg jũrũn ke mũ, kỹ tóg: “ne nẽ?” he mũ.

Hā ra tóg ti mỹ: “Topẽ vỹ ã vỹ mẽg mũ (mỹr),” he mũ. “Ā tỹ ũn jagǎgtar ag mỹ nén nĩm tĩ vэг tóg mũ gé,” he tóg. “Hā kỹ tóg ã to jykrén mũ,” he tóg. ⁵ “Kỹ ũ jẽgnẽmnĩ, ag tỹ Jope ra mũ jé. Tá ũ tóg nĩ nĩ, ti jiji hã vỹ: Simão, he mũ, kỹ ti jyjy ũ hã vỹ: Pedro, he mũ. Ěn jé prẽrnmĩ,”

he tóg. ⁶ “Simão mré tóg nĩ nĩ, ũ tỹ nén fár tỹ tǎnǎj ke tĩ ěn mré, kỹ ti ĩn vỹ goj kafā tũ fyr tá jẽ nĩ,” he tóg.

⁷ Kỹ Topẽ tỹ jẽnẽ jafā tóg tĩ mũ, ti mỹ tóg kar kỹ. Kỹ capitão ěn tóg ã camarada régre ag jé prẽr mũ, soldado pĩr mré, ũ tỹ Topẽ kamẽg mũ ěn ti. Ũ tỹ ã rǎnrhǎj han mũ ěn jé tóg prẽr mũ. ⁸ Kỹ tóg ag mỹ ã tỹ nén ve ja tóg mũ, kỹ tóg cidade tỹ Jope ra ag jẽgnẽg mũ.

⁹ Tỹ vaj kỹ ag tóg cidade ěn to hã nỹtĩ, meio dia ki. Kỹ Pedro tóg ĩn kri kyjer ěn ra tǎpɾy mũ, Topẽ mré vĩ jé. ¹⁰ Kỹ tóg kókĩr mũ. Kỹ tóg fag mỹ vэгjén to vĩ mũ. Fag tỹ ver ti mỹ han mũ ra tóg nén nẽ vэг mũ, Pedro ti. ¹¹ Kỹ tóg ag tỹ kanhkā nón mũ vэг mũ. Tá nén ũ tóg kǎtère mũ. Kỹ tóg tỹ kur mág ve nĩ. Ti péno kygje kỹ tóg ga kri kǎtère mũ, kur ti. ¹² Hā ra bicho kar tóg kur ěn kǎki nỹtĩ nĩ, fa tỹ 4 (ke) kar tóg nỹtĩ, ũ tóg ã nug kri mũgtĩ gé, sēsĩ kar ke gé, jēsĩ kar. ¹³ Kỹ vènh vĩ tóg mẽ há tĩ, kỹ tóg: “tág’,” he mũ. “Tǎnh kỹ kó, vỹ,” he tóg.

¹⁴ Kỹ Pedro tóg ěg Senhor ti mỹ: “nejé,” he mũ. “Nén ũ jẽggɾy ko ja tũ sóg nĩ (mỹr),” he tóg. “Ěg povo jykre tũ vẽ, ěg tỹ bicho ěn kon kỹ,” he tóg.

¹⁵ Kỹ tóg ti mỹ vĩ mǎn mũ sir jǎvo, vènh vĩ ti, kỹ tóg: “Topẽ tóg hã ra to: há ti nĩ, he mũ. Kỹ jẽggɾyg tũg nĩ,” he tóg.

¹⁶ Ge tǎgtũ han tóg, kỹ nén nẽ ěn tóg vэг tũ' he mũ sir, kanhkā tá.

¹⁷ Hā ra tóg Pedro mỹ e tĩ. Ti tỹ to jykrén tũ tóg tĩ, ti tỹ vэг mũ to. Ti tỹ ver to jykrén mũ ra ag tóg junjun mũ, Cornélio tỹ ũn jẽgnẽg mũ ag. Ũ tóg ag mỹ: “ĩn ěn vẽ,” he ja nĩ.

¹⁸ Kỹ ag tóg tá junjun mũ. Ró to jẽgĩjẽ kỹ ag tóg jamā hár(a) ke mũ, kỹ ag tóg: “Simão Pedro ag mỹ ki nỹtĩ?” he mũ.

¹⁹ Hā ra Pedro tóg ver ã tỹ vэг mũ ěn to jykrén nĩ nĩ. Kỹ Topẽ kuprĩg tóg ti mỹ ke mũ. “Ha vé, ũn régre ag vỹ ã jé prẽr mũ,” he tóg. ²⁰ “Jẽg nẽ ra, kǎtère ra, tĩg

ra ag mré,” he tóg. “To jykrén tūg. Isy ag jēgnē vē,” he tóg, Pedro mý, Topē kuprīg ti.

²¹ Kĩ Pedro tóg ag to kátère mū, kĩ tóg ag mý: “inh hā vē,” he mū. “Inh jé prēr ja ājag tóg nĩ,” he tóg. “Ājag tỹ ne to kāmũ nē?” he tóg ag mý.

²² Kĩ ag tóg ti mý: “Cornélio tỹ ěg jēgnē vē,” he mū. “Capitão vē, Cornélio ti. Ũn jykre kuryj vē, kĩ tóg Topē kamēg ti,” he ag tóg. “Israel kar ag tóg ti to há nýtĩ, ti to ag tóg vĩ há han ti. Topē tỹ jēnē jafā vỹ ti mý ke ja nĩ, ti tỹ ā jé prēr jé, ā tỹ ti ĩn ra tĩg jé, ā tỹ ti mý Topē kāmén jé,” he ag tóg, Pedro mý.

²³ Kĩ Pedro tóg ag mý: “kāge jēg ra,” he mū. Kĩ ag tóg tá nūgnūr mū. Tỹ vaj kĩ tóg ag mré tĩ mū. Kĩ Joep tá ke ũ ag tóg ti mré mū mū gé, Jesus mré ke ũ ag. ²⁴ Tỹ vaj kĩ ag tóg Cesaréia tá junjun mū. Tá Cornélio tóg ag jāvānh mū. Hā kĩ tóg ā kanhkā ag kar kógfyn ja nĩ, ag mý vēnh vĩ jēnē ja tóg nĩ, ā mré ke kar ag mý. Kĩ ag tóg kāmũ ja nĩ, kĩ ag tóg tá nýtĩ sir.

²⁵ Pedro tỹ tá jun kĩ Cornélio tóg ti kato tē mū, kĩ tóg ti jo mūg ke mū. “Ti hỹn tỹ Topē nĩ,” he tóg, hā kĩ tóg ti jo mūg ke mū, Cornélio ti.

²⁶ Hā ra Pedro tóg ti fēg mū, kĩ tóg: “ke tūg ra,” he mū. “Tỹ sóg ēprā ke nĩ gé,” he tóg ti mý. ²⁷ Kĩ tóg ti mý vĩ há han mū. Kĩ tóg kāra rā kĩ ũn e ag vég mū, ũn vēnh mǎn kĩ nýtĩ ag, Pedro ti. ²⁸ Kĩ tóg ag mý: “Israel ag vỹ fóg mré nĩ tũ nĩgtĩ (mýr),” he mū. “Ěg jykrén hā vē,” he tóg. “Kĩ ěg tóg fóg ĩn kāra rā tũ nĩgtĩ gé (mýr) sir. Tag ki kanhró ājag tóg nýtĩ,” he tóg. “Hā ra Topē tóg ĩnh kanhrān, ā jykre tỹ. Kĩ sóg vēnh kar ĩn kāra rānh mū, jēggry tũ nĩn kĩ,” he tóg. ²⁹ “Hā kĩ sóg jatun mý kātĩg, vēsýmér, ājag tỹ ĩnh jé prēr kĩ. Kĩ sỹ ājag ki jēmēnh há tóg tĩ. Ājag tỹ hē ri ke jé ĩnh jé prēr nē?” he tóg ag mý, Pedro ti.

³⁰ Kĩ Cornélio tóg ti mý: “4 dias vē ha ũri,” he mū, “kĩ sóg Topē mré vĩnh ke

nĩ nĩ, jēg tũ nĩn kĩ. 3 horas vē. ĩnh ĩn krēm sóg Topē mré vĩnh ke nĩ nĩ, kĩ sóg ũ vég nĩ nĩ. Ti kur tóg kókov nĩ. ³¹ Kĩ tóg ĩnh mý: “Cornélio’,” he mū. “Topē vỹ ā vĩ mēg mū. Ā tỹ ũn jagēgtar mý nén vin ěn ve tóg. To tóg jykrén, Topē ti,” he tóg. ³² “Kĩ Joep ra ũ jēnē. Tá Simão jé prēr, ũ tỹ Pedro he mū ěn ti. Nén fār tỹ tǎnǎj ke tĩ ěn ĩn krēm tóg nĩ nĩ, hā vỹ: Simão, he mū. Ti ĩn vỹ goj kafā tũ fyr tá jē nĩ,” he tóg ĩnh mý, Topē tỹ jēnē jafā ti,” he tóg, capitão ti. ³³ “Kĩ sóg vēsýmér ā to ũ ag jēgnē. Kĩ ā tóg kātĩ mū. Kĩ tóg há tĩ, ā kātĩg ti. Hā to ěg tóg vēnh mǎn, Topē jo. Topē tỹ ā mý nén tó ja kāmén ra ěg mý. Ěg tỹ mēnh há tóg tĩ vē,” he tóg, Cornélio ti, Pedro mý.

Pedro tỹ Cornélio mý Topē vĩ tó

³⁴ Kĩ Pedro tóg ag mý kāmén mū, kĩ tóg: “vāhā tóg sỹ to jykrén mū,” he mū. “Topē mý nén ũ tũ vē, Israel he mū ěn ag, fóg he mū ěn ag ke gé, kanhgág ag ke gé, Israel jykre han tũ kar ag,” he tóg. ³⁵ “Ũ tỹ ti kamēg mū vỹ ti mý há nýtĩ, Topē mý, ũ tỹ vēnh jykre kuryj han mū ag kar, povo kar kāmĩ,” he tóg. ³⁶ “Povo tỹ Israel mý tóg ā vĩ ěn jēnē ja nĩ, Topē ti. Ěg mý tóg tó, ěg tỹ jatu nýtĩ jé, ti tỹ Jesus Cristo tugrĩn ěg to há nĩn kĩ. Jesus ěn vỹ tỹ vēnh kar Senhor nĩ,” he tóg.

³⁷ “Vēnh vĩ ěn mē kǎn ājag tóg huri. Judéia kar mĩ tóg rǔm ke ja nĩ. João tóg vēnh kar mý: “ājag jykre tovānh ra,” he ja nĩgtĩ. Kĩ tóg ag kygpe ja nĩ. Kar kĩ Jesus tóg Galiléia mĩ tĩg vén mū, Nazaré tá ke ěn ti. ³⁸ Kĩ Topē tóg Jesus mý ā kuprīg jēnē ja nĩ. Kĩ tóg ti mý vēnh jykre nĩm ja nĩ. Ga kar mĩ tóg tĩg ja nĩgtĩ. Nén kar há han ja tóg nĩgtĩ. Japo tỹ ũn vóg kónān mū ag tỹ há’ he ja tóg nĩ gé. Topē hā ne ti mré han ja nĩgtĩ hā ra’,” he tóg.

³⁹ “Nén kar ěn ve ja ěg tóg nĩgtĩ, ti tỹ nén han mū kar, ga tỹ Judéia tá, Jerusalém tá ke gé. Ěn tỹ ag tóg cruz to ti sa ja nĩgtĩ, ti tén ja ag tóg nĩgtĩ. ⁴⁰ Kurā

tāgtū tūg kŷ Topē tóg ěn rĭn mĕn ja nĭgtĭ, kŷ tóg vĕnh ven ja nĭgtĭ,” he tóg, Pedro ti.

⁴¹ “Hă ra vĕnh kar vŷ ti ve ja tũ nĭ. Ěg hă mŷ tóg vĕnh ven ja nĭ. Hă to Topē tóg ěg kuprĕg ja nĭgtĭ. Ti mré ěg tóg jĕn ja nĭgtĭ, kron ja nĭgtĭ gé, ti tŷ ģ ter kar rĭr mĕn kŷ,” he tóg, Pedro ti. ⁴² “Kŷ tóg ěg mŷ: “vĕnh kar mŷ inh kāmĕn nĭ,” he ja nĭgtĭ. “Topē vŷ ti tŷ vĕnh kar kăfór han, hemnĭ,” he ja tóg nĭ ěg mŷ. “Kŷ tóg vĕnh kar tŷ nĕn han mŷ vĕnh ke mŷ sir. Ũ tŷ ũrĭ rĭnrĭr mŷ ag kar tŷ nĕn hyn han mŷ ve jé tóg ke mŷ, ũn ter mŷ ag kar tŷ nĕn hyn han mŷ kar ke gé, hemnĭ,” he ja tóg nĭgtĭ ěg mŷ, Jesus ti,” he tóg, Pedro ti.

⁴³ “Văšŷ Topē vĭ tó tĭ ag kar vŷ ti kāmĕn ja nĭgtĭ, kŷ ag tóg: “ũ tŷ ti ki ră mŷ mŷ tóg vĕnh pĕte fón ke mŷ, Topē ti, ti tŷ ti vĭ mranh mŷ ti,” he ja nĭgtĭ. “Cristo tugrĭn tóg vĕnh pĕte fón ke mŷ,” he ja ag tóg nĭgtĭ, Topē vĭ tó tĭ ag,” he tóg, Pedro ti.

Topē kuprĭg tŷ tŷ ag jagrĕ nĭ

⁴⁴ Pedro tŷ ver tag tó kŷ vĕhă Topē kuprĭg tóg ag ki ră mŷ, ũ tŷ ti vĭ mĕg mŷ ag ki. ⁴⁵ Kŷ Israel ag tŷ Jesus ki ge kŷ nŷtĭ ag mŷ tóg e tĭ, ũ tŷ Pedro mré kāmŷ ag mŷ. “Topē kuprĭg tóg tŷ ag jagrĕ nĭ,” he ag tóg. “Ag tŷ tŷ fóg nŷtĭ ra tóg ag ki ră mŷ,” he ag tóg. ⁴⁶ “Vĕnh vĭ ũ tugtó ag mŷ (mŷr),” he ag tóg. “Vĕnh vĭ ěn ki ag tóg Topē mŷ: há ģ tóg nĭ, he mŷ,” he ag tóg.

⁴⁷ Kŷ Pedro tóg: “ũ tóg ag to: ag kygpenh ke tũ ěg nĭ, hĕnh ke tũ nĭ (mŷr),” he mŷ. “Topē kuprĭg tŷ ag jagrĕ nŷtĭ. Ěg ki ră ri ke han tóg ag ki, Topē kuprĭg ti. Kŷ ěg hŷn ag kygpenh mŷ ha,” he tóg, Pedro ti. ⁴⁸ Kŷ tóg ũ mŷ: “ag kygpe ra ge, Jesus Cristo jiji tó kŷ,” he mŷ sir.

Ājag kygpe kar kŷ ag tóg Pedro mŷ: “ver ěg mré nĭ,” he mŷ. Kŷ tóg ag mré nĭ sĭ han kar kŷ tĭ mŷ sir.

Pedro tŷ Jerusalĕm tá ģ tŷ nĕn han mŷ tó

11 Kŷ Jesus tŷ ũn vin mŷ kar ag vŷ jĕmĕg mŷ, fóg ag tŷ Topē vĭ kri fig mŷ ti. Judĕia kar mĭ ag tóg jĕmĕg mŷ, Jesus mré ke kar ag. ² Kŷ Pedro tóg Jerusalĕm ra tĭ mŷ. Kŷ tá Jesus ki ge mŷ ag tóg ti mré vĭ mŷ. Ti mré vĭ mŷ ag tóg: “vĕnh kar vŷ ģjag grĕ junjun făr kym ke mŷ, ěg jykre han jĕ, ag tŷ Topē jykre han sór kŷ,” he ag tóg ti. Ēn ag vŷ Pedro mŷ vĭ mŷ, ³ kŷ ag tóg: “ũn făr kym ja tũ ag mré ģ tóg jĕg mŷ (mŷr), ag ĩn ki,” he mŷ.

⁴ Kŷ Pedro tóg ag mŷ nĕn kar ěn kāmĕn mŷ, ⁵ kŷ tóg: “cidade tŷ Jope tá sóg nĭ ja nĭ, kŷ sóg Topē mré vĭ nĭ ja nĭgtĭ. Ti mré vĭ kŷ sóg nĕn nĕ vĕg mŷ,” he tóg. “Nĕn gé(g) tĭg jafă vĕ, kur mág ri ke. Ti péno kygje tóg kanhkă tá kătĕre mŷ. Kŷ tóg inh ki jun mŷ. ⁶ Kŷ sóg kăki ěvĕnh mŷ, kŷ sóg bicho kar vĕg mŷ, fa tŷ 4 ke ti nŷtĭ, nĕn tĕn ag mré hă, ag nug kri mŷ tĭ ag mré hă, sĕsĭ kar mré hă, jĕsĭ kar. ⁷ Kŷ sóg vĕnh vĭ mĕg mŷ, kŷ tóg: “tág', vŷ,” he mŷ. “Tĕnh kŷ kó,” he tóg. ⁸ Kŷ sóg ti mŷ: “nejĕ,” he mŷ. “Nĕn ũ jĕggry ko ja tũ sóg nĭ,” he sóg ti mŷ. “Ěg jykre tũ vĕ, ěg tŷ bicho ěn kon kŷ,” he sóg ti mŷ. ⁹ Kŷ tóg inh mŷ tó mĕn mŷ gé, kanhkă tá vĕnh vĭ ti, kŷ tóg: “Topē tóg hă ra to: há tĭ nĭ, he mŷ. Kŷ jĕggry tũg nĭ,” he tóg, kanhkă tá. ¹⁰ Ge tāgtũ han tóg, kŷ nĕn nĕ ěn tóg vĕg tũ' he mŷ sir, kanhkă tá. ¹¹ Kŷ vĕšŷmĕr ũn tāgtũ ag vŷ tá nŷtĭ, inh nĭ ěn ră. Cidade tŷ Cesarĕia tá ag kāmŷ ja nĭgtĭ, fóg tŷ iso ag jĕgnĕn kŷ. ¹² Kŷ Topē kuprĭg tóg inh mŷ: “ha jatun mŷ ag mré tĭg,” he mŷ. Kŷ tag ag tóg inh mré mŷ mŷ, ũ tŷ 6 (ke) tag ag, Jesus mré ke tag ag. Kŷ ěg tóg ěn ĩn kăra ge mŷ sir.

¹³ Kŷ tóg ěg mŷ ģ tŷ Topē tŷ jĕnĕ jafă ve ja tó mŷ. Ti ĩn kătă tóg nĕji jĕ ja nĭ, Topē tŷ jĕnĕ jafă ti. Kŷ tóg nĕji ti mŷ: “Jope ra ũ jĕgnĕ,” he mŷ. “Tă Simăo jĕ prĕr, ũ tŷ Pedro he mŷ ěn,” he ja tóg nĕji

ti mý. ¹⁴ “Ēn vỹ ã mré vỹnh mũ. Ti vỹ tỹ ã tóg kren ke mũ, ã mré ke kar fag ke gé,” he ja tóg nẽji nĩ ti mý, Topẽ tỹ jẽnẽ jafã ti,” he tóg, Pedro ti.

¹⁵ “Kỹ sóg ag mý kāmén mũ. Isỹ tó sĩ han mũ ra Topẽ kuprĩg tóg ag ki rã mũ. Ti tỹ ěg ki rã ri ke han tóg mũ, kurã ěn kã. ¹⁶ Kỹ sóg Jesus vỹ to jykrén mũ, ti tỹ ěg mý: João tóg goj tỹ ag kygpe ja nĩgtĩ, hã ra Topẽ kuprĩg tóg ag kãra rãnh mũ, tỹ vỹnh kype ri ke vỹ sir, he ěn to,” he tóg, Pedro ti. ¹⁷ “Kỹ Topẽ vỹ ag jagrẽn mũ, ã kuprĩg tỹ, ti tỹ ěg jagrẽn ri ke vỹ, ěg tỹ Jesus Cristo ki ge kỹ. Hã kỹ sóg Topẽ kato tẽ jãvãnh ja nĩ,” he tóg, Pedro ti.

¹⁸ Ag tỹ tag mẽ kỹ ag krĩ tóg kusa' he mũ. Kỹ ag tóg: “Topẽ vỹ fóg ag krĩn mũ gé, ag tỹ ãjag jykre tovãnh jé, ag tỹ ěg rĩr krỹg ja tũ ve jé,” he ag tóg mũ.

Antioquia tá ke ag tỹ Topẽ vỹ kri fi

¹⁹ Ag tỹ Estêvão tén kar kỹ Jesus ki ge kỹ nỹtĩ ag tóg hẽn ra mũ mũ, ag tỹ ag vóg kónãn kỹ. Kỹ ag tóg ga tỹ Fenícia ra mũ mũ, goj vãso tỹ Chipre ra, cidade tỹ Antioquia ra ke gé. Ag mũn kỹ ag tóg Israel ag hã mý Topẽ vỹ tó mũ.

²⁰ Kejẽn Chipre tá ke ù ag tóg cidade tỹ Antioquia ra mũ mũ, Cirene tá ke ag ke gé. Ēn ag tóg fóg tỹ Grego vỹ tó mũ ag mý Jesus Cristo kāmén mũ, vỹnh vỹ sér tag ti. ²¹ Kỹ Topẽ tóg ag mré ag krĩn mũ. Kỹ ù tỹ hẽn ri ke ag tóg Jesus ki ge mũ, Topẽ jykre han jé. ²² Kỹ Jerusalém tá ke ag tóg mẽg mũ, fóg ag tỹ Jesus vỹ kri fig mũ ti. Jerusalém tá Jesus ki ge kỹ nỹtĩ ag tóg mẽg mũ gé, ù tỹ tá Topẽ vỹ mẽ jé vỹnh mãn tĩ ag. Kỹ ag tóg Barnabé jẽnẽg mũ, ti tỹ Antioquia ra tĩg jé.

²³ Ti tỹ tá jun kỹ ti fe tóg mĩn ke mũ, Topẽ tỹ ag jagãgtãn kỹ. Kỹ tóg ag jyvẽn mũ, ag tỹ Jesus ki rã to krónh ke tũ nĩn jé, ag tỹ fe tar nỹtĩn jé. ²⁴ Barnabé vỹ tỹ ùn vỹ há nĩ, Topẽ kuprĩg vỹ tỹ ti jagrẽ nĩ. Kỹ ti jykre kar tóg Jesus ki rã ja nĩ. Kỹ ù

tỹ hẽn ri ke ag vỹ Jesus ki ge mũ gé sir, ti tỹ ag jyvẽn kỹ.

²⁵ Kỹ Barnabé tóg cidade tỹ Tarso ra tĩ mũ, Saulo jãvãnh jé, tá. ²⁶ Ti tỹ ti ve kỹ tóg ti pére tĩ mũ, Antioquia ra. Kỹ ag tóg prỹg pir han, Antioquia tá. Jesus ki ge kỹ nỹtĩ ag tỹ vỹnh mãn kỹ ag tóg ag kanhrãn tĩ, Barnabé ti, Saulo ti ke gé. Kỹ ùn e vỹ Barnabé ag vỹ jẽnẽg tĩ. Kỹ ag tóg Antioquia tá ag tóg ù tỹ Jesus mré mũ ag to: “Cristo mré ke ag,” he vẽn. Kỹ ag jiji vỹ sir, hã vỹ: Cristo mré ke ag, he mũ.

²⁷ Kejẽn Jerusalém tá ke ù ag tóg Antioquia tá junjun mũ, Topẽ vỹ tó ti ag. ²⁸ Ag kã ù jijin hã vỹ: Ágabo, he mũ. Ēn vỹ kejẽn Topẽ kuprĩg tỹ ti krĩn kỹ: “kejẽn ěg tóg prỹg vẽn mũ, kãnhmar,” he mũ, “ga kar mĩ hã,” he tóg. Kỹ tóg Cláudio tỹ pã'i tỹ imperador nĩn kỹ tóg ge nĩ. ²⁹ Kỹ ag tóg prỹg nĩnh ken kỹ Jesus mré mũ ag tóg Judéia tá ke ag to jykrén mũ sir. Kỹ ag tóg: “ěg hỹn ag mý nén ù jẽnẽn mũ, ag tỹ kon jé,” he mũ. Kỹ vỹnh kar vỹ ag tũ kuju vin han mũ, ag tỹ Judéia tá Jesus mré ke ag mý jẽnẽ jé. ³⁰ Kỹ ag tóg Barnabé jẽnẽg mũ, Saulo ke gé, ag tỹ gé(g) mũ jé, kófa ag mý vin jé, ù tỹ Jesus ki ge kỹ nỹtĩ ag ki rĩr tĩ ag mý. Kỹ ag tóg ke mũ sir.

Ag tỹ Pedro se

12 Kejẽn pã'i tỹ rei tỹ Herodes vỹ Jesus ki ge kỹ nỹtĩ ù ag sigség mũ, ag vóg kónãn jé. ² Kỹ tóg soldado jẽnẽg mũ, ti tỹ Tiago tén jé, João kãke ěn. Kyfé téj tỹ tóg ti tén mũ, rógro téj tỹ, soldado ti, Herodes tỹ ti jẽnẽn kỹ. ³ Kỹ tóg Israel ag mý há tĩ, ti tỹ Tiago tén kỹ. Kỹ Herodes tóg Pedro kãgmĩg mũ gé sir. Festa kãki tóg ti kãgmĩg mũ. Festa ěn ki ag tóg pão jẽgĩa tũ ko tĩ, Israel ag. Ag jykre vỹ.

⁴ Soldado ag tỹ Pedro ve kỹ ag tóg vỹse ja kãki ti fón mũ. Soldado tỹ 16 ag vỹ ti ki rĩr mũ, ù tỹ 4 tỹ ti ki rĩr nỹtĩn kỹ ù tỹ 4 ù ag nỹtĩg ja ki nỹtĩ ke tĩ, jagnẽ ri

kén. “Festa tỹ Páscoa kar kỹ sóg ag mỹ ti ven mũ, ag tỹ ti vóg kónān jé,” he tóg, Herodes ti. ⁵ Kỹ Pedro tóg se kỹ jẽ nĩ. Hã ra Jesus ki ge kỹ nỹtĩ ag tóg ti jo Topẽ mré vĩ kỹ nỹtĩ, ag tỹ to krónh ke tũ nĩn kỹ.

Pedro tỹ kavar nĩ

⁶ Tỹ vaj kỹ Herodes vỹ ag mỹ ti ven sór mũ. Tỹ kuty ên kã Pedro tóg soldado régre ag kujũ ki nũr mũ. Ferro régre tỹ tóg se kỹ nỹ ag mré. Soldado ù ag tóg vese ja jänkã ki rĩr mũ.

⁷ Kỹ vãhã Topẽ tỹ jẽnẽ jafã tóg ti mré jẽ nĩ, kỹ tóg ãn ên krēm jẽngrẽ nĩ, kuty hã ra. Ên tóg Pedro ki pérén ke mũ, ti kãvy ki. Ti rĩn tóg mũ, kỹ tóg ti mỹ: “kur nĩ,” he mũ. Kỹ ti nĩgẽ se ja tóg varan ke mũ, ferro ên ti. Kỹ tóg kavar kỹ nĩ nĩ, kyvar kỹ, Pedro ti. ⁸ Kỹ Topẽ tỹ jẽnẽ jafã tóg ti mỹ: “vėsóg fĩ ra,” he mũ. “Á pẽn né tu ra gé, ã pẽn to ró ti,” he tóg. Kỹ tóg ke mũ sir. Kỹ tóg ti mỹ: “Á kur rỹ tu kỹ inh nón kãtĩg,” he mũ.

⁹ Kỹ tóg kãkutẽ mũ. Ti nón tóg tĩ mũ, Pedro ti. Hã ra tóg ti mỹ tỹ nẽn ù ve jẽ, ti tỹ vэг mũ ti. Ti mỹ tóg tỹ ti vènh-péti ve tĩ, Topẽ tỹ jẽnẽ jafã tỹ nén han mũ ti. ¹⁰ Jänkã ki rĩr vèn mũ ên pátén ag tóg mũ, jänkã ki rĩr mũ ù ke gé. Kỹ ag tóg jänkã mág tá junjun mũ, ferro tỹ han kỹ jẽ ên, kyfẽ tỹ han kỹ jẽ ên, ùn tỹ cidade to nón mũ ên. Jänkã ên vỹ vėsógki rãm ke mũ ag jo. Kỹ ag tóg kãpa mũ sir. Êpřy jagma ag tóg mũ mũ, êmĩn jagma. Kỹ vãhã Topẽ tỹ jẽnẽ jafã tóg ti mũ sir. ¹¹ Kỹ vãhã Pedro tóg mřin ke mũ, kỹ tóg: “vãhã sóg ki kanhró nĩ,” he mũ. “Topẽ vỹ ã tỹ jẽnẽ jafã jẽnẽ ja nĩ, kỹ tóg inh křen han mũ, pã'i tỹ Herodes jo. Israel kar ag tóg inh jagtar nĩnh ke jãvãnh mũ, hã ra sóg venh ke tũ nĩ,” he tóg, Pedro ti.

¹² To jykrén kỹ tóg Maria fi ãn ra tĩ mũ, João mỹnh ên fi, ag tỹ ù to: Marcos, he mũ ên mỹnh fi. Fi ãn krēm ag tóg vènh

mãn kỹ nỹtĩ nĩ, Topẽ mré ag vĩ nỹtĩ nĩ, ù tỹ hẽn ri ke ag. ¹³ Kỹ tóg ãn to ró jänkã tỹ tórón' tórón' ke mũ. Kỹ fi camarada fi tóg venh kãtĩ mũ. Fi jyjy hã vỹ: Rode, he mũ. ¹⁴ Kỹ fi tóg Pedro vĩ ki kanhró nĩ, hã ra fi tóg ti mỹ nón tũ nĩ, róm tũ fi nĩ, jänkã ti, fi fe tỹ mřin ke mũ ra. Fi tỹ ãn kãra rãn kỹ fi tóg vènh kar mỹ: “Pedro vỹ ró to jẽ,” he mũ.

¹⁵ Kỹ ag tóg fi mỹ: “krĩ vènhmỹ ã nĩ,” he mũ. Hã ra fi tóg: “tĩ hã vè,” he mũ. Kỹ ag tóg fi mỹ: “tĩ ki rĩr tĩ ên vè hỹn,” he mũ.

¹⁶ Kỹ Pedro tóg ver re tá jẽ nĩ, jänkã tỹ tórón' tórón' ke mãn kỹ. Kỹ ag tóg ti mỹ róm mũ, jänkã ti. Ti vэг ag tóg mũ sir, kỹ tóg ag mỹ e tĩ. ¹⁷ Kỹ Pedro tóg ag mỹ ã nĩgẽ tỹ ge mũ, ag tỹ katy' he jẽ. Kỹ tóg ag mỹ Topẽ tỹ ti kavãn tó mũ sir, Topẽ tỹ ti kyvãn kỹ. Topẽ tỹ vese ja kãtã ã kutẽm kãmén tóg mũ sir. Kỹ tóg ag mỹ: “Tiago mỹ kemnĩ, Jesus mré ke kar ag mỹ ke gé,” he mũ. Kỹ tóg Jerusalém tá kutẽ kỹ emã ù ra tĩ mũ sir.

¹⁸ Tỹ vaj kỹ soldado ag fe tóg jũrũn ke mũ. “Pedro hỹn hẽ kãtã vyr, ti hỹn ne kãtã vyr?” he ag tóg mũ, ti jãvãnh kỹ. ¹⁹ Kỹ Herodes tóg ù ag jẽgnèg mũ gé, ti kãgmĩ jẽ. Hã ra ag tóg ti vэг tũ nĩ gé. Kỹ Herodes tóg Pedro ki rĩr mũ ag ki jẽmèg mãn mũ. Kar kỹ tóg soldado ù ag mỹ: “ag kãgtén ra, ti ki rĩr mũ ag,” he mũ. Kỹ ag tóg ag kãgtén mũ sir.

Kar kỹ Herodes tóg Judéia tá kutẽ kỹ cidade tỹ Cesaréia ra tĩ mũ sir, tá nĩ jẽ.

Herodes ter

²⁰ Herodes tóg cidade tỹ Tiro tá ke ag to jũ mũ, cidade tỹ Sidom tá ke ag to ke gé. Ên ag tóg Herodes nĩgja tá junjun mũ. Kỹ ag tóg pã'i sĩ mré vĩ mũ, ti jiji hã vỹ: Blasto, he mũ. Herodes vỹ ti tỹ pã'i han ja nĩ. Ên mỹ ag tóg to vĩ mũ, ti tỹ ag jagfỹ vĩ jẽ, pã'i tỹ Herodes mré, ti tỹ ti fe tỹ há' he jẽ. Herodes krēm ke ag tóg ag mỹ vèjèn vène he ja nĩgtĩ, Tiro tá ke ag

mỹ, Sidom tá ke ag mỹ ke gé. Herodes tỹ ag to jũ nĩn kỹ ag tóg tá vėjēn ve mĩn tũ nĩ sir. Hã kỹ ag tóg ti fe tỹ há' he sór mũ, ti tỹ ag mỹ vėne he mĩn jé.

²¹ Kỹ Herodes tóg ag mỹ kurā nĩm mũ. Kỹ tóg ā kur sĩnvĩ ěn tu mũ, pã'i kur ěn ti. Kỹ tóg ā nĩja kri nĩ kỹ ag mỹ vĩ mág han mũ. ²² Kỹ vėnh kar tóg ti to: “ěprā vėnh vĩ pijé,” he mũ. “Tỹ tóg Topě vĩ mē ti, ti vĩ ti,” he ag tóg mũ. ²³ Kỹ vėsỹmér Topě tỹ jėnē jafā tóg ti vóg kónān mũ sir, ti tỹ ag mỹ: “vó,” he tũ nĩn kỹ. “Inh pi(jé) tỹ Topě nĩ,” he ja tũ tóg nĩ, hã kỹ tóg ti vóg kónān mũ sir. Kỹ ti nug ga vỹ ti kagrāg mũ, hã kỹ tóg ter mũ.

Barnabé tỹ Saulo mré Topě vĩ tónh tĩg

²⁴ Jó ũ tỹ hėn ri ke ag vỹ Topě vĩ męg mũ, kỹ ag tóg Jesus ki ge mũ.

²⁵ Kỹ Barnabé vỹ Saulo mré ājag tỹ nén gė(g) kāmũ mũ ěn vin mũ, Jerusalém tá ke ag mỹ. Prỹg nĩn kỹ Jesus ki ge kỹ nỹti ag tóg Jerusalém tá ke ag mỹ vėjēn jėgnē ja nĩgtĩ. Ag mỹ vėjēn ěn vin kỹ ag tóg vỹnvỹn ke mũ sir, Barnabé ti, Saulo ti ke gé. João pére ag tóg mũ mũ, Marcos he mũ ěn ti.

13 Antioquia tá ũ ag tóg nỹti, Topě vĩ tó ti ũ ag, Jesus jykre tỹ vėnh kanhrān nỹti ag ke gé. Jesus ki ge kỹ nỹti ag mré ag tóg nỹti, ũ tỹ vėnh mĩn ti ag mré, ag tỹ Topě vĩ mē jé. Kỹ ũ jijin hã vỹ: Barnabé, he mũ, kar ũ jyjyn hã vỹ: Simão Negro, he mũ. Ũ tóg tỹ Lúcio nĩ, Cirene tá ke tag ti. Kỹ ũ tóg tỹ Manaém nĩ, pã'i tỹ Herodes mré mog mũ tag ti. Kỹ ũ tóg tỹ Saulo nĩ gé.

² Kejēn ag tóg jagnē mỹ Topě jykre tó mũ, ag tỹ jęg tũ nĩn kỹ. Kỹ Topě kuprĩg tóg ag mỹ: “Barnabé fėg ra, Saulo mré,” he mũ, “ag tỹ inh rānhrāj han jé, isỹ nén to jykrén mũ ěn ti, ag tỹ inh jykre tó jé, vėnh kar mỹ,” he tóg, Topě kuprĩg ti.

³ Kỹ ag tóg jęg tũ nĩn kỹ Topě mré vĩ mĩn mũ. Ājag nĩgé tỹ ag tóg ag męg mũ, ag kymēn ag tóg mũ, kỹ ag tóg: “ha mũ

jęg ge,” he mũ. Hã kỹ Topě kuprĩg tóg ag jėgnēg mũ sir.

Kujá tỹ Elimas

⁴ Topě kuprĩg tỹ ag jėgnēn kỹ ag tóg cidade tỹ Selėucia ra mũ mũ. Tá junjun kỹ ag tóg goj vāso tỹ Chipre ra mũ mũ, canoa mág kāmĩ. ⁵ Kỹ ag tóg cidade tỹ Salamina tá junjun mũ. Tá ag tóg Topě vĩ kāmén mũ, Israel ag tỹ vėnh kanhrān jafā kātá. João Marcos vỹ ag mré ti mũ gé. Ag camarada vė, João Marcos ti.

⁶ Goj vāso mĩ ag tóg pa mũ. Kỹ ag tóg cidade tỹ Pafos tá junjun mũ, Topě vĩ kāmén kỹ. Tá ũ tóg nĩ nĩ, kujá ũ. Őn kỹ tóg Topě vĩ tó sór mũ. Israel ũ vė, ti jiji hã vỹ: Bar Jesus, he mũ. ⁷ Governador mré tóg nĩ nĩ. Governador jyjy hã vỹ: Sérgio Paulo, he mũ. Krĩ há ti nĩ, Sérgio Paulo ti. Kỹ tóg Barnabé jé prēr mũ, Saulo jé ke gé, ti tỹ Topě vĩ jēmē sór kỹ.

⁸ Kỹ kujá ěn tóg ag vĩ kato tē mũ, governador tỹ Topě vĩ kri fig tũ nĩ jé. Kujá ěn jiji ũ hã vỹ: Elimas, he mũ, hã vỹ: kujá, he mũ, ti jyjy ti.

⁹ Kỹ vāhā Topě kuprĩg tóg Saulo krĩn mũ. Saulo jiji ũ hã vỹ: Paulo, he mũ.

Kỹ Topě kuprĩg tỹ ti krĩn kỹ Paulo tóg kujá ěn ki kanē jũ han kỹ ti ki ěvānh mũ, ¹⁰ kỹ tóg: “tỹ ā tóg ũn ón mé nĩ,” he mũ. “Jykre pāno ā nĩ (mỹr),” he tóg. “Japo kósĩn vỹ tỹ ā nĩ (mỹr), vėnh jykre kuryj kato tē ā nĩ (mỹr),” he tóg. “Topě japry vỹ kugryj nỹti, ti jamĩn ti, hã ra ā tóg tỹ pāno ke sór ti (mỹr), kỹ ā tóg vėnh jykre pāno to krónh ke tũ nĩgtĩ (mỹr),” he tóg. ¹¹ “Ha vé, Topě vỹ ā vóg mũ, kỹ ā tóg kyvān ha,” he tóg. “Rā vėnh ke tũ ā nĩnh mũ, kurā tỹ hėn ri ke kĩ,” he tóg, Paulo ti.

Kỹ tóg vėsỹmér ti mỹ kuty' he mũ. Kyvó tóg nĩ sir. Kỹ tóg jēmĩg mũ. Ũ jé tóg prēr mũ, ti tỹ ti pére tĩg jé.

¹² Governador tỹ tag ve kỹ tóg ti mỹ e ti. Kỹ tóg Jesus ki rā mũ. Topě jykre tóg ti mỹ tar ja nĩ.

**Paulo tỹ cidade
tỹ Antioquia tá Topē vĩ to**

¹³ Kỹ vāhā Paulo ag tóg Pafos tá pa mũ. Canoa mág kāmĩ ag mũ mũ. Kỹ ag tóg ga tỹ Panfilia tá junjun mũ, cidade tỹ Perge tá. Hā ra João Marcos tóg kyrā mũ. Ag ré kỹ tóg Jerusalém ra vỹn ke mũ, João Marcos ti. ¹⁴ Jó ag tóg Perge tá pa mũ, ga tỹ Pisidia ra mũ jé, cidade tỹ Antioquia ra. Tá junjun kỹ ag tóg vênhkán ke kurā ki ag tóg Israel tỹ vênh kanhrān jafā kára ge mũ, tá ag nignĩ mũ gé.

¹⁵ Ũ tóg tá Topē tỹ ẽg mỹ vênh jykre nĩm ja ẽn to ke mũ, rán kỹ nĩ ẽn to. Ti tỹ ẽg jyvẽn tó tóg mũ gé, vāsỹ Topē vĩ to ti ag tỹ rán ja ẽn ti. Kar kỹ pā'i ag tóg Paulo ag jé prēr mũ. Kỹ ag tóg: “kanhkā’,” he mũ. “Ājag tỹ ẽg jyvẽn sór nỹtĩn kỹ tóg há tĩ,” he ag tóg.

¹⁶ Kỹ Paulo tóg jẽg nẽ mũ. Ā nĩgẽ tỹ tóg ag mỹ ge mũ, ag tỹ katy' he jé. Kỹ tóg ag mỹ: “hā mẽ, Israel kar’,” he mũ. “Jēmẽ ra ha, ũ tỹ Topē kamẽg mũ kar, ājag tỹ tỹ fóg nỹtĩ ra,” he tóg. ¹⁷ “Israel ag vỹ Topē kamẽg tĩ. Topē tag tóg ẽg jóg'jóg ag kuprẽg ja nĩ. Ag tỹ tóg povo mág han, ag tỹ ver Egito tá ke ag mrẽ nỹtĩn kỹ. Tá tóg ag kápan mũ, ā jykre tar ẽn tỹ, Topē ti,” he tóg. ¹⁸ “Ag to tóg fen mág mũ, Topē tag ti, ag tỹ ẽmā tũg ja mĩ mũn kỹ, prỹg tỹ 40 ẽn ki. ¹⁹ Povo tỹ 7 tỹ tóg tũ' he mũ, ga tỹ Canaã tá. Kỹ tóg ẽg jóg'jóg ag mỹ ag ga fig mũ, tỹ ag tũ nĩ jé. ²⁰ Kỹ tóg ag mỹ pā'i ag vĩn mũ gé, ag jyvẽn jafā ag, 100 tỹ 4 kri 50 anos ki. Kar kỹ Samuel vỹ tỹ Topē vĩ to ti nĩ gé. ²¹ Kỹ ag tóg pā'i mág tỹ rei ve sór mũ. Kỹ ag tóg Topē mỹ to vĩ mũ. Hā kỹ Topē tóg Saulo fẽg mũ, Quis kósĩn ẽn. Benjamim krẽ'krẽ ũ vẽ, Saulo ti. 40 anos ki tóg tỹ pā'i mág tỹ rei nĩ. ²² Ti tỹ ẽn kutẽm kar tóg Davi fẽg mũ, Topē ti. Davi to tóg vĩ há han mũ, Topē ti, kỹ tóg: “Davi ve sóg, Jessé kósĩn,” he mũ. “Nén há han tóg tĩgtĩ. Kỹ sóg ti to há nĩ. Ẽn hā vỹ inh jykre kar han mũ,”

he tóg, Topē ti, Davi to,” he tóg, Paulo ti.

²³ “Davi kósĩn ũ vẽ, hā vỹ: Jesus, he mũ. Topē vỹ vāsỹ ti kătĩg ke tó ja nĩgtĩ. Kỹ tóg vāhā Jesus jẽnẽ ja nĩ, ẽg povo tỹ Israel to, ti tỹ ẽg kren han jé. ²⁴ João vỹ ti kătĩg ke jo vênh kar mỹ: “ājag jykre továnh ra,” he ja nĩgtĩ, “isỹ ājag kygpe jé,” he ja tóg nĩgtĩ, ẽg povo tỹ Israel kar mỹ. ²⁵ João rānhraj tỹ tũ' henh ken kỹ tóg ag mỹ: “iso ājag tóg Cristo he sór mũ,” he ja nĩgtĩ, João ti. “Hā tũ vẽ,” he ja tóg nĩgtĩ. “Inh pi(jé) tỹ Cristo nĩ,” he ja tóg nĩgtĩ. “Hā vé, inh nón tóg kătĩg, inh Senhor ti, hā vỹ: Jesus, he mũ. Sỹ tỹ ti camarada nĩnh ke vẽ vẽ, sỹ ti pẽn né kunũ jé, ti pẽn to ró ti, hā ra sóg tỹ ti krẽm ke pẽ jẽ,” he ja tóg nĩ, João ti,” he tóg, Paulo ti.

²⁶ “Inh kanhkā’,” he tóg. “Abraão krẽ’,” he tóg. “Ũ tỹ Topē kamẽg mũ, fóg kāmĩ,” he tóg. “Topē vỹ ẽg hā mỹ vênh vĩ tag jẽnẽ, ẽg krenkren jé,” he tóg. ²⁷ “Jerusalém tá ke ag vỹ Jesus ki kagtĩg ja nỹtĩgtĩ. Ti tỹ tỹ Topē kósĩn nĩn ki kagtĩg ja ag tóg nỹtĩgtĩ, ag pā'i ag ke gé. Hā kỹ ag tóg vāsỹ rán kỹ nĩ ẽn han. Vênhkán ke kurā ki ag tóg vếg tĩ, Topē vĩ to ti ag tỹ nẽn rán ja ti. Hā ra ag tóg sir ag tỹ nẽn tó mũ ẽn ki króm, ājag tỹ Jesus to: ter jé tóg ke mũ, hen kỹ. ²⁸ Nén ũ kórẽg han ja tũ ti nĩ, kỹ ti ter ke tũ vẽ vẽ, hā ra ag tóg Pilatos mỹ: “ẽg tỹ ti tén há tóg tĩ vẽ,” he ja nĩgtĩ. ²⁹ Ag tỹ ti to rán ja ẽn ki króm kán kỹ ag tóg cruz ẽn to ti térem ja nĩgtĩ, vênh kej kătā ag tóg ti fón ja nĩgtĩ.

³⁰ Hā ra Topē tóg ti rĩn mǎn ja nĩgtĩ, ti ter mũ ra. ³¹ Kỹ tóg ā mrẽ ke ag mỹ vênh ven ja nĩgtĩ sir, Jesus ti, ũ tỹ ti mrẽ Jerusalém ra mũ ja ag mỹ, Galiléia tá kāmũ kỹ. Ẽn ag tóg ti kāmén mũ sir, vênh kar mỹ. ³² Vênh vĩ tag tó ẽg tóg mũ,” he tóg, Paulo ti.

³³ “Ẽg jóg'jóg ag vỹ Topē vĩ ẽn mẽ ja nĩgtĩ. Hā ra tóg ũri han mũ, Topē ti, ā tỹ

vās̄y nén tó ja ěn ti. Ěg jóg'jóg ag krē'krē ag m̄y tóg han m̄, ti t̄y vās̄y nén tó ja ěn ti, Topē ti. Hā k̄y tóg Jesus r̄in m̄n, ti ter k̄y. K̄y tóg ti m̄y: “t̄y ā tóg inh kós̄in jē. Ūri sóg ā han,” he ja n̄gt̄i, Topē ti, Jesus m̄y. Topē m̄y j̄an jafā ki tóg rán k̄y n̄i, j̄an t̄y 2 ki,” he tóg, Paulo ti.

³⁴ “Hā ra tóg ti t̄y ti r̄in m̄n ke tó ja n̄gt̄i gé, ti mur ke to hā. Ti vag ke t̄u ěn tó ja tóg n̄gt̄i gé, k̄y tóg: “s̄y Davi m̄y nén tó ja ěn ki króm jé sóg ke m̄,” he ja n̄gt̄i. “Ājag m̄y sóg han m̄, s̄y ti m̄y nén tó ja ěn ti,” he ja tóg n̄gt̄i, Topē ti,” he tóg, Paulo ti.

³⁵ “K̄y tóg tag tó ja n̄gt̄i gé: “ā t̄u v̄y vag ke t̄u n̄i,” he ja tóg n̄gt̄i gé, Topē ti,” he tóg, Paulo ti.

³⁶ “Hā ra Davi v̄y ter ja n̄gt̄i, ā jóg'jóg ag nón. K̄y tóg vag ja n̄i inhā. Topē t̄y ti m̄y nén tó jan ki króm ja tóg n̄gt̄i, Davi ti. Ā mré ke ag m̄y tóg han, Topē t̄y ti m̄y nén tó ja ti. Hā ra tóg ter k̄y vag ja n̄gt̄i inhā, Davi ti. ³⁷ Ti j̄avo tóg vag ja t̄u n̄i inhā, Jesus ti, Topē t̄y ti r̄in m̄n k̄y,” he tóg, Paulo ti.

³⁸ “Ha vé, inh kanhkā’,” he tóg. “Jesus tag tugr̄in Topē v̄y ājag m̄y v̄enh p̄ate fón sór m̄, ājag t̄y ti v̄i mranh ja ti. Hā k̄y sóg ājag m̄y tó m̄,” he tóg. ³⁹ “Ājag t̄y Moisés v̄i m̄g m̄ ra ājag jykre tóg kuryj ja t̄u n̄i ver. Ājag t̄y hā ra Jesus ki ge k̄y tóg ke m̄ sir, Topē ti. Ājag kugrynh tóg m̄ sir. ⁴⁰ Hā ra ti to é he t̄ug n̄i. Ke t̄u n̄i m̄ ra ājag tóg venh ke m̄, vās̄y nén rán k̄y n̄i ěn ti, Topē v̄i tó t̄i t̄y nén tó ěn ti, ⁴¹ hā v̄y: “iso ājag tóg é he m̄ (m̄y),” he m̄. “S̄y nén han ke ve jé ājag tóg ke m̄, k̄y ājag kanē jur ke m̄, ājag fe tóg j̄ūr̄un kenh ke m̄ gé,” he ja tóg n̄gt̄i, Topē ti. “Ājag t̄y kri f̄inh ke t̄u vē vē, ū t̄y ājag m̄y tó m̄ ra. Hā ra ājag tóg venh ke m̄,” he ja tóg n̄gt̄i, Topē v̄i tó t̄i ti,” he tóg, Paulo ti.

⁴² Ag t̄y Paulo v̄i m̄ k̄n k̄y ag tóg ĩn ěn k̄at̄a pa m̄. ĩn k̄at̄a pa k̄y ag tóg ti m̄y: “v̄enh k̄n ke kurā ū tá ěg m̄y k̄amén

m̄n n̄i,” he m̄. ⁴³ K̄y Israel t̄y ěn ri ke ag tóg Paulo ag nón m̄ m̄. Fóg ag tóg ag nón m̄ m̄ gé, fóg t̄y Israel jykre han m̄ ag, ū t̄y Topē kam̄g m̄ ag. K̄y Paulo ag tóg ag jyv̄en m̄, ag t̄y Topē to jykren k̄y n̄gt̄i jé, ag t̄y ti t̄y ěg jagāgt̄an to jykren k̄y n̄gt̄i jé.

⁴⁴ V̄enhk̄an ke kurā ū tá cidade ěn tá ke kar ag v̄y v̄enh m̄n m̄, Topē v̄i jēm̄ jé. ⁴⁵ K̄y Israel ag tóg ũn e ěn v̄eg m̄. K̄y ag tóg j̄ugj̄u m̄, v̄enh kar t̄y Paulo ag to há n̄gt̄in k̄y. Hā k̄y ag tóg Paulo v̄i kaf̄an m̄ sir, ti t̄y ag m̄y Topē v̄i tón k̄y. Ti to ag tóg v̄i v̄i he m̄ gé.

⁴⁶ Hā ra Paulo ag tóg ag kam̄g t̄u n̄i. Ag m̄y ag tóg: “ājag hā m̄y ěg tóg tó vén, Topē v̄i ti,” he m̄, “ti t̄y ěg m̄y: Israel ag m̄y tó vén, ěn k̄y. Hā ra ājag tóg m̄ jāv̄anh n̄gt̄i,” he ag tóg. “Ěg r̄ir kr̄yg ja t̄u venh ke t̄u ājag n̄i, ājag t̄y m̄ jāv̄anh n̄gt̄in k̄y,” he ag tóg. “Hā k̄y ěg tóg sir fóg ag hā m̄y tónh ke m̄, Topē v̄i ti,” he ag tóg. ⁴⁷ “Topē v̄y ěg m̄y: “ājag t̄y sóg néj gru ri ke han m̄,” he m̄, “fóg kar ag t̄y ājag ki Topē ve jé, kanhgág ag ke gé. Ājag ki ag tóg m̄nh ke m̄, Jesus t̄y ag krenkren han ke ti, ga fyn ja m̄i hā,” he ja tóg n̄i ěg m̄y, Topē ti,” he ag tóg, Paulo ag.

⁴⁸ Fóg ag t̄y tag m̄ k̄y tóg ag m̄y sér t̄i sir. K̄y ag tóg Topē v̄i to há n̄gt̄i, ti m̄y v̄i há han k̄y. K̄y ag tóg Jesus ki ge m̄, Topē t̄y ũn kupr̄eg m̄ ag, ag t̄y ěg r̄ir kr̄yg ja t̄u ve jé. ⁴⁹ K̄y ga ěn tá ke kar ag v̄y Topē v̄i jēm̄g m̄.

⁵⁰ Hā ra Israel ag tóg ũn t̄at̄a há ū fag mré v̄i m̄, fóg t̄y Israel jykre han m̄ fag. P̄ā'i ag mré ag tóg v̄i m̄ gé. Paulo ag kato ag tóg v̄i m̄. K̄y ag tóg ag vóg kón̄an m̄. “Ha m̄ j̄eg, ěm̄ ū ra,” he ag tóg m̄ sir, ag vóg kón̄an kar k̄y.

⁵¹ K̄y Paulo ag tóg ājag p̄en kyk̄nhk̄nh m̄, ag m̄y: “Topē tov̄anh ājag huri,” he jé. K̄y ag tóg cidade t̄y Icônio ra m̄ m̄ sir. ⁵² Jesus mré m̄ ag

mỹ tóg hā ra sér tī. Topē kuprīg vỹ tỹ ag jagrē nī, kỹ tóg ag mỹ sér tī sir.

Cidade tỹ Icônio tá Topē vĩ tó

14 Ag tỹ cidade tỹ Icônio tá junjun kỹ ag tóg sir Israel tỹ vênh kanhrān jafā kāra ge mũ. Kỹ ag tóg ag mỹ Topē vĩ kāmén mũ. Kỹ Israel tỹ hēn ri ke ag tóg Jesus ki ge mũ gé, fóg tỹ hēn ri ke ag ke gé, ù tỹ Grego vĩ tó mũ ěn ag. ²Kỹ Israel ag tóg, ù tỹ Jesus ki ge jāvānh ag tóg fóg ag krīn kónān mũ sir, Jesus mré ke ag to.

³Hā ra Paulo ag tóg tá nỹtĩ mág han mũ. Kỹ ag tóg Topē vĩ tó mũ, ag tỹ ag kamēg tú nĩn kỹ, Topē vĩ kri fi kỹ. Kỹ Topē tóg ag mỹ ã jykre fig mũ, ag tỹ ěg tỹ nén han vānh hyn han jé. Hā kỹ vênh kar tóg Topē jykre ki kanhró nỹtĩ sir.

⁴Kỹ vênh kar tóg vênh kápugpóv kỹ nỹtĩ nĩ. Û ag tóg Israel ag to há nỹtĩ, jó ù ag tóg Jesus tỹ ùn vin mũ ag to há nỹtĩ. ⁵Kỹ Israel ag tóg fóg ag mré jykren mũ, fóg tỹ pālĩ ag mré, ag tỹ Paulo ag vóg kónān jé, ag tỹ pó tỹ ag pin jé. ⁶Kỹ Paulo ag tóg jēmēg mũ, kỹ ag tóg cidade ù ra mũ mũ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nỹtĩ, cidade tag ti. ⁷Cidade ěn mĩ mũn kỹ ag tóg tá Jesus vĩ há tugtó mũ sir.

Ag tỹ cidade tỹ Listra tá Paulo vóg kónān

⁸Cidade tỹ Listra tá ke ù tóg nĩ nĩ, ùn tĩg vānh. Ti pēn vỹ grĩ nỹtĩ. Ge pē tóg nĩ, ã mur mũn kã. Pēn krój tóg nĩ.

⁹Ěn tóg sir Paulo vĩ mēg mũ. Kỹ Paulo tóg ti tugnỹm mũ. Kỹ tóg ti tỹ Jesus vĩ kri fig mũ vég mũ, Jesus tỹ ti tỹ há' he jé. ¹⁰Kỹ tóg jamā hár(a) ti mỹ ke mũ, kỹ tóg: “jēg nē ra,” he mũ. “Vēnhrā hā jēg,” he tóg ti mỹ, Paulo ti. Kỹ tóg vāhā hũm he mũ. Kỹ tóg mĩ ti mũ.

¹¹Kỹ tóg vênh kar ěn mỹ e tĩ, ag tỹ Paulo tỹ nén han mũ ven kỹ. Kỹ ag tóg ājag vĩ ki jagnē mỹ ke mũ, vĩ tỹ Licaônica

he mũn ki. Jamā hár(a) ag tóg: “topē ag vỹ ěg tá junjun,” he mũ. “Ěg ri ke ag nỹtĩ, topē ag, kỹ ag tóg ěg tá re mũ,” he ag tóg, Paulo ag to. ¹²Kỹ ag tóg Barnabé to: Júpiter, he mũ. Paulo to ag tóg: Mercúrio, he mũ sir, ti vĩ mág to. Ěn kỹ ag topē jygi vē, hā vỹ: Júpiter, Mercúrio, he mũ.

Hā ra Paulo ag tóg ag vĩ ki kagtĩg nỹtĩ.

¹³Júpiter jo ěn vỹ cidade fyr tá jē nĩ, kỹ ti tú ki rĩr ti tóg tá nĩ gé. Kỹ tóg monh gé(g) tĩ mũ, ka fej tỹ coroa ke gé, Júpiter tú ki rĩr tĩ ěn ti. Cidade to ró jānkā mǎra tóg gé(g) tĩ mũ. Tá tóg monh kugprũn sór mũ, Barnabé mỹ, Paulo mỹ ke gé. Ěn kỹ ag tóg Paulo ag to: “topē ag vē,” he mũ, hā kỹ ag tóg ag mỹ monh kuprũn sór mũ, tá ke kar ěn ag.

¹⁴Hā ra Paulo ag tóg mēg mũ, kỹ ag tóg ājag kur janjān mũ, jūgjũ kỹ. Û tỹ vênh mǎn kỹ nỹtĩ ag to ag tóg pétē mũ. Prēr kỹ ag tóg ag mỹ: ¹⁵“ne nē?” he mũ. “Tỹ ěg ěprā ke nỹtĩ, ājag ri ke,” he ag tóg. “Hā ra ěg tóg ājag mỹ kāmén sór mũ, ājag tỹ ón kỹ topē tag ag tovānh jé. Topē pē ki gemnĩ, ùn rĩr mũn ki. Kanhkā han tóg, ga ke gé, goj ke gé, mĩ mũ kar ěn ke gé, Topē ti,” he ag tóg. ¹⁶“Vāsỹ Topē tóg nação ag mỹ nén ù to ja tú nĩgtĩ, kỹ ag tóg ājag jykre mĩ mũgtĩ. ¹⁷Ge ra tóg ag ki rĩr há han mũ, Topē ti, ag tỹ tag to vāhā ti ki kanhrān jé. Hā jé tóg ta jēnē, kỹ ājag jakré tóg mogmog mũ. Kỹ ājag tóg konh ke mũ. Kỹ ājag fe tóg há' he mũ sir. Ąjag mỹ tóg sér tĩ sir, ti tỹ ājag mỹ vējēn han kỹ, Topē ti,” he ag tóg, Paulo ag.

¹⁸Ag vĩ ki ag tóg ag mỹ nén ù kugprũn tovānh mũ, Paulo ag mỹ, vênh kar ěn ag. Hā ra ag tóg ag mỹ nén ù kugprũn kren ja nĩgtĩ, tá.

¹⁹Kar kỹ cidade tỹ Antioquia tá ke ag tóg tá junjun mũ, cidade tỹ Icônio tá ke ag ke gé. Israel ag vē, tá junjun mũ ag. Ěn ag vênh kar krīn kónān mũ, kỹ ag tóg Paulo pin mũ, pó tỹ. “Ter ti huri,” he ag tóg mũ sir, ti pin kar kỹ. Kỹ ag tóg ti

raran mū sir. Cidade fyr tá ag tóg ti raran kŷ ti fón mū sir. ²⁰ Kŷ Jesus mré mū ag tóg ti venh kāmū mū, hā ra tóg jēg nē mū, Paulo ti. Cidade kāra tóg rā mū.

Tŷ vaj kŷ tóg hā ra cidade tŷ Derbe ra tī mū, Barnabé mré. ²¹ Tá ag tóg Jesus kāme há tó mū gé, Derbe tá. Kŷ ū tŷ hēn ri ke ag tóg Jesus ki ge mū sir.

Paulo ag tŷ cidade tŷ Antioquia ra vŷnvŷn ke

Kar kŷ ag tóg cidade tŷ Listra ra vŷnvŷn ke mū, cidade tŷ Icônio ra ke gé, cidade tŷ Antioquia ra ke gé, Paulo ag. ²² Vŷnvŷn ke ki ag tóg Jesus mré mū ag jyvēn mū sir, ag tŷ Jesus vī kri fi to krónh ke tū nŷn jé, ag tŷ to fe tar nŷn jé ke gé. “Ēg tŷ Topē tŷ tŷ ěg pā’i nŷ ve sór nŷtŷn kŷ ěg tóg ti venh ke jo vēnh jagāgtar jagy venh ke mū,” he ag tóg, Jesus ki ge kŷ nŷtŷ ag mŷ, Paulo ag. ²³ Kŷ ag tóg ag mŷ kófa ag kuprēg mū, ag tŷ Jesus ki ge kŷ nŷtŷ ag ki rŷr jé, ū tŷ Topē vī mē jé vēnh mǎn tŷ ag ki. Ag to ag tóg Topē mré vī mū gé, nén ū ko tū nŷn kŷ. Kŷ ag tóg: “Topē vŷ ājag ki rŷr há han mū,” he mū. Kŷ ag tóg mū mū sir. ²⁴ Kŷ ag tóg ga tŷ Pisídia fŷn pa mū. Ga tŷ Panfília tá ag tóg junjun mū. ²⁵ Cidade tŷ Perge tá ag tóg Topē vī tó mū gé sir. Kar kŷ ag tóg cidade tŷ Atália ra mū mū. ²⁶ Tá junjun kŷ ag tóg cidade tŷ Antioquia ra mū mū gé, canoa mág kāmī. Antioquia ěn tá ag tóg pa ja nŷ (mŷr). Tá ke ag tóg ag to Topē mré vī ja nŷgtŷ, ti tŷ ag jŷ nŷgǎn jé, ag tŷ ti rǎnhŷrǎj han kŷ. Vēnh rǎnhŷrǎj ěn han kǎn ag tóg mū (mŷr) sir, kŷ ag tóg Antioquia ra vŷnvŷn ke mū. ²⁷ Tá junjun kŷ ag tóg Jesus ki ge mū kar jé prēr mū, ag tŷ vēnh mǎn jé. Kŷ ag tóg ag mŷ Topē tŷ nén han mū kar kāmén mū. “Fóg ag ne tóg Jesus ki ge mū gé, Topē tŷ ag krŷn kŷ,” he ag tóg mū ag mŷ.

²⁸ Kŷ ag tóg tá nŷtŷ, kŷsǎ tŷ hēn ri ke ki. Jesus mré mū ag mré ag tóg nŷtŷgtŷ.

Ag tŷ Topē jykre to jykrén

15 Kejēn Judéia tá ke ū ag tóg tá junjun mū, Antioquia tá. Tá junjun kŷ ag tóg Jesus mré ke ag mŷ kāmén mū, kŷ ag tóg: “ājag gré junun fǎr kym nŷ,” he mū. “Moisés tŷ ěg mŷ nén tó mū ěn han nŷ. Ke tū nŷ mū ra ājag tóg krenkren ke tū nŷ,” he ag tóg.

² Hā ra Paulo ag tóg: “ke tū vē,” he mū. Kŷ ag tóg jagŷnē vī kafǎn mū sir. Kŷ Jesus mré ke kar ag tóg Paulo ag mŷ ke mū, ag tŷ Jerusalém ra mū jé. “Tag ag mré mūmŷn, Jerusalém ra,” he ag tóg. “Tá Jesus tŷ ūn vin mū ag mré vīmŷn, kófa ag mré. Ag mŷ: ěg hŷn hē ri kenh mū, vēnh gré junun fǎr kym ke to? hemŷn,” he ag tóg.

³ Kŷ Paulo ag tóg: “ěg mūnh ke nē ha,” he mū. Jesus ki ge kŷ nŷtŷ ag tóg ag mré mū sŷ han, kŷ ag tóg mū mū. Kŷ ag tóg ga tŷ Fenícia fŷn pa mū sir, ga tŷ Samaria fŷn ke gé. Ag mūn kŷ ag tóg Jesus mré ke kar ag mŷ fóg ag kāmén mū, fóg ag tŷ Jesus ki ge mū ag. Kŷ tóg vēnh kar mŷ sér tŷ sir. ⁴ Hā kŷ ag tóg Jerusalém tá junjun mū. Kŷ tá Jesus ki ge kŷ nŷtŷ ag tóg vēnh mǎn mū, Jesus tŷ ūn vin mū ag mré hā, kófa ag mré hā. Kŷ ag tóg ag mŷ Topē tŷ nén han mū kar tugtó mū.

⁵ Hā ra Fariseu ū ag tóg tá nŷtŷ gé, ū tŷ Jesus ki ge mū ag. Ēn ag tóg ag mŷ ke mū. “Ēg mŷ tóg há tŷ, ag tŷ ājag gré junun fǎr kym kym ken kŷ,” he ag tóg mū, fóg ag to. “Ag tŷ Moisés tŷ ěg mŷ vēnh jykre nŷm ja ki kanhrǎn kŷ tóg ěg mŷ há tŷ,” he ag tóg mū sir, Fariseu ag, fóg ag to, ū tŷ Israel jykre han tū ag to.

⁶ Kŷ vǎhǎ Jesus tŷ ūn vin mū ag vŷ kófa ag mré vēnh mǎn mū, vyr mŷ, to vēmén jé. ⁷ Kŷ ag tóg to vēmén mág han mū sir. Kŷ kejēn Pedro tóg jēg nē kŷ ag mŷ: “inh kanhkǎ,” he mū. “Vǎsŷ Topē tóg inh kuprēg ja nŷ, isŷ fóg ag mŷ Jesus vī há tó jé, ag tŷ jēmē kŷ krenkren jé,” he tóg. “Tag ki kanhró ājag tóg nŷtŷ,” he

tóg. ⁸ “Kỹ Topē tóg ag mý ã kuprīg jēnēg mū. Ag fe ki kanhró tóg nī, Topē ti, kỹ tóg ag mý ti jēnēg mū. Hã ki tóg ěg mý ven mū, ag tỹ Jesus ki ge kỹ nỹti ti, ěg ri kén,” he tóg. ⁹ “Hã kỹ Topē tóg ag to: vyr mý ke ag vĕ, he tũ nĩgtĩ. Ag tỹ ti ki ge kỹ nỹtin kỹ tóg ag fe tỹ jãnhkri’ he mū, fóg ag fe tỹ,” he tóg. ¹⁰ “Topē tỹ há vĕ (mýr). To: vĕnhmý ti nĩ, he tũg nĩ,” he tóg. “Ag mý ãjag tóg vĕnh jykre jagy ěn fi sór mū, ti tỹ ěg mý han jagy ja ra. Ěg jóg’jóg ag mý tóg han jagy ja nĩ, kỹ tóg ag mý ag tỹ ki króm tũ ninh ha mĕ tóg ti, ěg mý ke gé. Hã ra ãjag tóg ag mý fi sór mū,” he tóg. ¹¹ “Ke tũg nĩ. Jesus tỹ ěg jagãgtãn kỹ tóg ěg kren han mū, ěg tỹ ti vĩ kri fi kỹ. Kỹ ěg tóg ag ri ke tãvĩ nỹti,” he tóg, Pedro ti.

¹² Kỹ vĕnh kar ag tóg ěmĕ kỹ nỹti nĩ. Kỹ ag tóg Barnabé tỹ ag mý nĕn tó mū mĕg mū, Paulo tỹ ag mý nĕn kãmĕn ti ke gé. Ag tỹ ěg tỹ nĕn han vãnh hyn han mū tó ag tóg mū gé. Ag tỹ Topē jykre ki fóg ag mý nĕn hyn han mū tó ag tóg mū gé sir.

¹³ Ag tỹ tó kãn kỹ Tiago tóg sir ag mý: “ha mĕ, inh kanhkã,” he mū. ¹⁴ “Simão vỹ ěg mý tó ja nĩ, Topē tỹ nĕn han ve ti, Simão tỹ fóg ag mý Topē vĩ tó ve ti. Kỹ ag tóg tỹ Topē tũ nỹti sir, fóg tỹ ti vĩ mĕg mū ag. Jesus mré ke vỹ tỹ ag nỹti, ag tỹ ti ki ge kỹ nỹtin kỹ. ¹⁵ Hã ra tóg vãsý rãn kỹ nĩ. Topē vĩ tó ti tóg tag rãn ja nĩgtĩ, ha mĕ: ¹⁶ “kãtig jé sóg ke mū, he tóg, Topē ti. Davi krĕm Israel ag tóg e pĕ ja nỹti ja nĩgtĩ. Hã ra Davi jykre tóg tũ’ he mū. Kỹ tóg ĩn vag ri ke nĩ sir. ĩn tãg han jé sóg ke mū, hã vỹ: Davi krĕ’krĕ ũ vỹ tỹ pã’i ninh mãn mū, he mū. Isỹ han ken hã vĕ. ¹⁷ Ti tỹ sóg ũn mág pĕ han ke mū, povo kar kãmĩ ke ag tỹ inh ki ge sór jé, fóg kar kãmĩ ke ag tỹ isũ nỹti jé, kanhgág kar kãmĩ ke ag ke gé, isỹ ũn kuprĕg mū ag, he tóg. ¹⁸ Topē tỹ tón hã vĕ. Ũ tỹ vãsý tag kãmĕn mū tỹ tón hã vĕ,” he tóg, Topē vĩ

tó ti ti. Hã kỹ ěg tóg tag ki kanhró tãvĩ nỹti,” he tóg, Tiago ti.

¹⁹ “Isỹ nĕn to jykrĕn hã vĕ, ěg tỹ ag mý ěg jykre jagy ěn tó tũ nĩn jé, ũ tỹ fóg kar kãmĩ Topē jykre han sór mū ag mý, kanhgág ag mý ke gé,” he tóg. ²⁰ “Ěg tỹ ag mý tónh ke, ha mĕ: vĕnh kãggrá to festa ko tũg nĩ, ã prũ tũ fi mré nỹ tũg nĩ, nĕn ũ tỹ vĕsókĩ ter mū ko tũg nĩ, nĕn ũ kyvĕnh ko tũg nĩ gé,” he tóg, Tiago ti. ²¹ “Moisés jykre tugtóg ag tóg ti, ěg mré Israel ag, cidade kar ki. Vĕnh kãn ke kurã ki ag tóg ti tỹ rãn mū to ke ti. Vãsý ag tóg ke ja nỹti, kỹ ag tóg ũri ke tãvĩ ti gé,” he tóg. “Hã kỹ ũ tỹ han sór mū tóg han ti, Moisés jykre ti,” he tóg, Tiago ti.

Apóstolo ag tỹ carta rãn mū

²² Kỹ Jesus tỹ ũn vin mū ag tóg to jykrĕn mū, kófa ag ke gé, Jesus ki ge mū ag kar ke gé, ũ tỹ Topē vĩ mĕ jé vĕnh mãn ti ag. Kỹ ag tóg ũ ag kuprĕg mū, ag tỹ Antioquia ra mū jé, Paulo mré, Barnabé mré. Ag tỹ ũn kuprĕg mū ag hã vĕ, hã vỹ: Judas, he mū, ti jiji ũ hã vỹ: Barsabás, he mū. Silas kuprĕg ag tóg mū gé. Ěn ag tóg tỹ Jesus mré ke ag pã’i nỹti. ²³ Ag mý ag tóg vĕnh rãn nĩm mū gé. Ag tỹ rãn hã vĕ, ha mĕ:

“Jesus tỹ ũn vin mū ag tỹ rãn hã vĕ, kófa ag tỹ rãn ke gé, Jesus mré ke ag. Ěg tỹ cidade tỹ Antioquia tá ke ag mý rãn hã vĕ, fóg tỹ Jesus mré ke ag mý, ga tỹ Sírĩa tá ke ag mý, ga tỹ Cilícia tá ke ag mý ke gé. Ąjag mý há?

²⁴ Ěg kã ũ ag tỹ ãjag tá junjun mĕ ěg tóg. Ąjag krĩn ũ han ag tóg mū, kỹ ãjag krĩ tóg kufy’ he mū. Hã ra ěg tóg ag mý: ha vĕnh jykre tag tó, he ja tũ nĩgtĩ. ²⁵ Kỹ ěg tóg vĕnh mãn, ěg tỹ to jykrĕn jé. Kỹ ěg kar tóg to jykrĕn kỹ tag ag kuprĕg, ěg tỹ ãjag to ag jĕgnĕ jé, ag tỹ Barnabé mré mū jé, Paulo mré. Ag to ěg há tãvĩ nỹti, Barnabé to, Paulo to ke gé. ²⁶ Ag hã ne tóg fe tũmĕ nỹtigti’, fe tar kamĕ ag nỹtigti’. Kỹ ag tóg ěg Senhor tỹ Jesus

Cristo vĩ tó mǔgtĩ, ừ tỹ hên ri ke tỹ ag tén sór mǔ hã ra. ²⁷ Ẽg tỹ ag to há nỹtĩn kỹ ẽg tóg Judas jênẽg mǔ, Silas ke gé, ag tỹ ăjag mỹ ẽg tỹ rán mǔ tag ti kāmén jé.

²⁸ Topẽ kuprĩg vỹ ẽg mỹ tó, kỹ tóg ẽg mỹ há tĩ gé, ẽg tỹ ăjag mỹ vênh jykre jagy ẽn fig tũ nĩn jé. Tag hã han jé ăjag tóg ke mǔ, ha mẽ: ²⁹ vênh kăgrá to festa ko tũg nĩ, nén ù kyvénh ko tũg nĩ gé. Nén ù tỹ vėsóg ki ter mǔ ẽn ko tũg nĩ gé. ăjag prũ tĩ fag mré nỹ tũg nĩ gé. ăjag tỹ tag ki króm kỹ tóg há tĩ. Jatun mỹ nỹtimnĩ.” Vênhrán hã vẽ.

³⁰ Kỹ ag tóg ag mỹ: “ha mǔ jẽg ge,” he mǔ. Kỹ ag tóg mǔ kỹ Antioquia tá junjun mǔ. Tá ag tóg vênh kar jé prẽr mǔ. Jesus ki ge mǔ kar jé ag tóg prẽr mǔ sir, ag tỹ to vênh mǎn jé. Kỹ ag tóg ag mỹ vênh rán ẽn nĩm mǔ. ³¹ Kỹ ag tóg to ke mǔ, vênh rán to. Kỹ tóg ag mỹ há tĩ, ag tỹ vênh jyvẽn rá ẽn ven kỹ. Kỹ ag krĩ tóg kănhvy' he mǔ sir.

³² Kỹ Judas vỹ Silas mré vênh kar jyvẽn mǔ gé. Topẽ vĩ tó tĩ ag vẽ. Hã kỹ ag tóg ag jyvẽn tỹ hên ri ke han mǔ. Ag fe tỹ ag tóg tar' he mǔ. ³³ Tá ag tóg semana tỹ hên ri ke han mǔ. Kỹ Jesus mré ke ag tóg ag mỹ: “ha jatun mỹ mǔ jẽg,” he mǔ, ag tỹ Jerusalém ra vỹnvỹn ke jé, ù tỹ ăjag jẽgnẽg mǔ ẽn to. ³⁴ Hã ra tóg Silas mỹ há nĩ, kỹ tóg tá nĩ nĩ sir, tĩ tũ tóg nĩ sir.

³⁵ Kỹ Paulo tóg Barnabé mré Antioquia tá nĩ nĩ. Topẽ vĩ tỹ ag tóg ag kănhrán mǔ, kāmén kỹ. Hã ra ù tỹ hên ri ke ag tóg ag ri kén Topẽ vĩ tó mǔ gé.

Paulo tỹ ă pir mỹ tĩg, Barnabé tỹ ă pir mỹ tĩg

³⁶ Si há tũ ra Paulo tóg Barnabé mỹ: “mǔ nỹ, ẽg tỹ ẽmã ẽn kar mĩ mǔ mǎn jé, ẽg tỹ Jesus vĩ tó ja tá,” he mǔ. “Isỹ Jesus mré ke ag venh há tóg tĩ. Ag mỹ hên ri ke mũn mǔ há han mǔ vỹ? he sóg tĩ,” he tóg, Paulo ti, Barnabé mỹ.

³⁷ Kỹ Barnabé tóg João Marcos pére tĩg sór mǔ. ³⁸ Hã ra Paulo mỹ tóg kórég nĩ, Marcos tỹ ag ré kỹ tĩg ja nĩn kỹ, ga tỹ Panfília tá. “Ủ tỹ ẽg mré Topẽ rănhrăj han ja tũ ẽn pére sóg tĩg mǎn ke tũ nĩ ha,” he tóg, Paulo ti.

³⁹ Hã to ag tóg jagnẽ to jũgũ mǔ. Kỹ ag tóg vênh kăpugpóv kỹ mǔ mǔ. Kỹ Barnabé tóg Marcos mré goj văso tỹ Chipre ra tĩ mǔ, canoa mág kămĩ.

⁴⁰ Jó Paulo tóg Silas kuprẽg mǔ, ti tỹ ti mré tĩg jé. Kỹ tóg tĩ mǔ sir. Jesus mré ke ag tóg Paulo to Topẽ mré vĩ mǔ, ti tỹ ti jy nĩgân jé. ⁴¹ Kỹ ag tóg ga tỹ Sírĩa mĩ pa mǔ, ga tỹ Cilícia mĩ ke gé. Jesus ki ge mǔ kar jyvẽn tóg mǔ, ă tĩg kỹ, Paulo ti.

Timóteo tỹ Paulo mré tĩg

16 Kỹ Paulo ag tóg cidade tỹ Derbe tá junjun mǔ, cidade tỹ Listra tá ke gé. Kỹ tá ù tóg nĩ nĩ, Jesus mré tĩ ù, ti jyjy hã vỹ: Timóteo, he mǔ. Ti mỹnh fi ne tóg tỹ Israel nĩ, hã ra fi tóg Jesus ki rã ja nĩgtĩ. Ti panh tóg tỹ fóg tỹ Grego nĩ, Timóteo panh ti.

² Ti to ag tóg vĩ há han mǔ, Jesus mré ka ag, Listra tá ke ag, Icônio tá ke ag ke gé, Timóteo to. ³ Kỹ Paulo tóg ti pére tĩg sór mǔ, kỹ tóg ti gré junun făr kym mǔ, Israel ag tugrĩn. Vênh kar tóg ti panh tỹ tỹ fóg tỹ Grego nĩ ki kănhró nỹtĩ, hã kỹ tóg ti făr kym ja tũ nĩ. Hã ra ag tỹ ra mũnh ke tá ag tóg e nỹtĩ, Israel ag, hã kỹ Paulo tóg ti făr kym mǔ sir.

⁴ Kỹ ag tóg cidade ẽn mĩ mǔ mǔ. Kỹ ag tóg ag mỹ Jesus tỹ ũn vin mǔ ag tỹ rá kāmén mǔ sir, kófa ag tỹ Jerusalém tá nén rán ja ti, Jesus mré ke ag mỹ. Ag tỹ nén ki króm ke hã tỹ ag tóg ag mỹ kāmén mǔ. ⁵ Hã kỹ Jesus ki ge mǔ ag tóg tar nỹtĩ sir, Jesus jykren ki. Vênh mǎn ag tóg tĩ, ag tỹ Topẽ vĩ mẽ jé. E ag tóg nĩgtĩ sir, komẽr hã.

Paulo tỹ nén nẽ vэг мũ

⁶Kỹ Paulo ag tóg ga tỹ Frigia mĩ pa mũ, ga tỹ Galácia mĩ ke gé. Kỹ ag tóg ga tỹ Ásia tá Topẽ vĩ tó sór mũ, hã ra Topẽ kuprĩg tóg ag mỹn nenh mũ. ⁷Kỹ ag tóg ga tỹ Mísia tá junjun mũ. Kỹ ag tóg ga tỹ Bitinia ra mũ sór mũ, hã ra Topẽ kuprĩg tóg ag mỹn nenh mũ gé. ⁸Kỹ ag tóg Mísia jỹ mũ kỹ cidade tỹ Trôade tá junjun mũ. ⁹Kỹ kutyg kỹ Paulo tóg nén nẽ vэг мũ. Ga tỹ Macedônia tá ke vэг tóg mũ, ti vènhpéti ki. Kỹ tóg ti jo jẽ nĩ. Kỹ tóg ti mỹ: “Macedônia to kătĩg, ẽg kanhrăn jé,” he mũ ti mỹ, ga tỹ Macedônia tá ke ẽn ti. Kỹ Paulo tóg rĩr mũ sir.

¹⁰Paulo tỹ nén nẽ ẽn ve kar kỹ ẽg tóg vèsymér Macedônia ra mũ sór mũ sir. “Jesus hỹn ẽg mỹ: ha mũ jẽg, hé,” he ẽg tóg. “Ag mỹ inh vĩn tó, he ti hỹn, Jesus ti,” he ẽg tóg, Paulo tỹ nén nẽ ẽn ve kỹ. ¹¹Kỹ ẽg tóg cidade tỹ Trôade ki pa mũ. Vèsymér ẽg tóg goj vâso tỹ Samotrácia ra mũ mũ. Tỹ vaj kỹ ẽg tóg cidade tỹ Neápolis ra mũ mũ. ¹²Tá pa kỹ ẽg tóg cidade tỹ Filipos ra mũ mũ. Ga tỹ Macedônia ki cidade ve vè. Ẽg tỹ tá junjun vén jan hã vè. Fóg tỹ Romano ag jamã ù vè. Tá ẽg tóg kurã e sĩ ki nỹti nĩ.

Lídia fi tỹ Jesus ki rã

¹³Vènh kán ke kurã ki ẽg tóg cidade to ró mãra mũ mũ, goj ra. “Tán hỹn Topẽ mré vĩ jafã nĩ,” he ẽg tóg. Tá ẽg tóg nĩgnĩ mũ sir. Ẽn tãtã fag tóg tá nỹti nĩ, kỹ ẽg tóg fag mré vĩ mũ.

¹⁴Tá ù fi tóg nĩ nĩ, fi jiji hã vỹ: Lídia, he mũ. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topẽ kamẽg fi tóg tĩ. Ẽn fi vỹ Paulo vĩ mẽg mũ sir. Kỹ Topẽ tóg fi mỹ krĩ há nĩm mũ, kỹ fi tóg Paulo vĩ jẽmẽ há han mũ. ¹⁵Kỹ ẽg tóg fi kypég mũ, fi mré ke kar mré hã. Kỹ fi tóg ẽg mỹ: “isỹ Jesus ki rã kỹ jẽ ve ajag (mỹr),” he mũ. “Tĩ tỹ ajag mỹ gen kỹ inh ãn ki gemnĩ,” he fi

tóg. “Tá inh mré nỹtĩmnĩ,” he fi tóg. Vĩ ki fi tóg ẽg kutãn mũ. Kỹ ẽg tóg ke mũ.

Paulo ag tỹ Filipos tá se kỹ nỹti

¹⁶Ẽg tỹ kejẽn Topẽ mré vĩ jafã ra mũ mãn kỹ ù fi tóg ẽg kato tẽ mũ. Ẽ camarada fi vè. Hã ra fi tóg jagrẽ kórég nĩ, kỹ fi jagrẽ tóg vènh kar mỹ ag tỹ nén vènh ke tó tĩ. Fi patrão ag tóg fi tugnĩn jãnkamy mág vэг tĩ, fi tỹ jãnkamy to vènh kar mỹ ag tỹ nén vènh ke tón kỹ.

¹⁷Ẽn fi vỹ Paulo nón tĩ mũ, ẽg nón, kỹ fi tóg jamã hár(a) prẽr mũ, kỹ fi tóg: “Topẽ pẽ camarada ag vè (mỹr),” he mũ. “Vènh kar kãfór camarada ag vè mỹr. Ag hã ne tóg ajag mỹ vènh vĩ tó tĩ, ajag tỹ to krenkren jé,” he fi tóg ẽg to. ¹⁸Kurã tỹ hẽn ri ke han fi tóg, vĩ tỹ ge han kỹ. Kỹ tóg Paulo mỹ tỹ ù nỹ, kỹ tóg kyrã kỹ fi jagrẽ mỹ: “Jesus Cristo jykre tỹ sóg ã mỹ tó mũ, ã tỹ fi tovãnh jé,” he mũ. Kỹ tóg vèsymér fi tovãnh mũ sir, fi jagrẽ kórég ẽn ti.

¹⁹Hã ra fi patrão ag mỹ tóg tỹ ù nỹ, ag tỹ fi tugrĩn ganho ve mãn tũ nĩn kỹ. Kỹ ag tóg Paulo ség mũ, Silas ke gé. Pãi ag mỹ ag tóg ag ven mũ, cidade kuu ki. ²⁰Pãi ag mỹ ag ven kỹ ag tóg: “Israel tag ag ve ra ha,” he mũ. “Vènh kar jũgũ han ag tóg mũ nĩ (mỹr), ẽg jamã tag mĩ,” he ag tóg. ²¹“Vènh jykre vènhmỹ tó ag tóg mũ (mỹr), ẽg tỹ nén han ke tũ tó ag tóg mũ (mỹr). Tỹ ẽg tóg Romano nỹti, kỹ ag jykre tóg ẽg mỹ tỹ ù nỹ,” he ag tóg. ²²Povo ẽn kar tóg ag to kórég nỹti, kỹ ag tóg ag kato vĩ mũ.

Kỹ pãi ag tóg polícia ag mỹ: “ag kur nũ ra,” he mũ. “Ag mrãnmrãn ra,” he ag tóg mũ gé. ²³Ag mrãnmrãn tỹ hẽn ri ke han ag tóg mũ, ka tég tỹ. Kar ag tóg vèse ja kãki ag vãm mũ. Vèse ja ki rĩr tĩ mỹ ag tóg: “ag nĩgfénh há han nĩ, ag tỹ kãpa tũ nĩ jé,” he mũ. ²⁴Ag tỹ ti mỹ tag tó to tóg vèse ja kuu tá ag vãm mũ, vèse ja mág ẽn kuu tá. Ka tỹ tóg ag sigség mũ sir.

²⁵ Meia noite ki Paulo tóg Silas mré Topē mré vī mū. Ti mý ag tóg jānjān mū, Topē mý. Ký vèse ag kar vỹ jēmēg mū sir. ²⁶ Ký vāhā ga tóg jūrūn ke mū. Vèse ja krēm tóg jūrūn ke mū. Ký vēsýmér jānkā kar vỹ nognor kán tī mū, rómrom kán tóg mū. Ký vèse ag kar ěn ferro tóg kygvar kán mū, ag se ja ti. ²⁷ Ký tóg vèse ja ki rīr tī nūnmān mū gé. hā ra vèse ja jānkā kar tóg nognor ký nýtī nī, rómrom ký tóg nýtī nī. Ký ũ tỹ ag ki rīr tī ěn tóg ā kyfē téj, ā rógro ěn kunūnh ký tóg vēnh kusón sór mū. “Vèse kar ag hỹn vēnh pigju kán,” he tóg. Hā ký tóg vēnh kusón sór mū.

²⁸ Hā ra Paulo tóg jamā hár(a): “ker vēnh vóg kónān hē,” he mū. “Ěg kar vỹ ki nýtī,” he tóg.

²⁹ Ký tóg néj gru to vī mū, ũ tỹ ag ki rīr tī ěn ti. Ký tóg Paulo ag se ja kāra vēnhvāg rā mū, jūrūn ke ký. Paulo jo tóg mūg ke mū, Silas jo ke gé, ag tỹ ti mý ti káfór nýtīn ký. ³⁰ Ag gé(g) tóg tī mū, vèse ja kátá kākutē ký, ký tóg ag mý: “inh hỹn hē ri kenh mū vỹ?” he mū. “Topē vī mranh sóg, hā ra tóg ti tỹ inh kren han há tī,” he tóg, ũ tỹ vèse ja ki rīr tī ěn ti.

³¹ Ký ag tóg ti mý: “Jesus Cristo ki rā ge,” he mū. “Ký ā tóg kren mū, ā mré ke kar ag mré hā,” he ag tóg ti mý, Paulo ag. ³² Ký ag tóg ti mý Jesus vī kāmén mū, ti mré nýtī ag mý ke gé. ³³ Ký tóg ag ki rīr mū vēsýmér, kutý ke nỹ ra. Ag tỹ ag mrānmrān ja ěn kupég tóg mū ag mý. Ký ag tóg vēnh kaja jé ti kypég mū gé, ti mré nýtī ag mré, ag tỹ Jesus ki ge ký. ³⁴ Ký tóg ā ĩn ra ag tatīn tī mū. Ag jēn tóg mū. Ti fe tóg mrin ke mū sir, ti tỹ Jesus ki rā ký. Ti mré nýtī ag kar mý tóg sér tī gé sir, ũ tỹ vèse ja ki rīr tī ěn mré ke fag mý.

³⁵ Tỹ vaj ký pā'i ag tóg polícia ag jēgnēg mū, ũ tỹ vèse ja ki rīr tī ěn mý. “Ěn ag mý: ha mū jēg, hemnī,” he ag tóg ti mý. ³⁶ Ký ũ tỹ vèse ja ki rīr tī ěn tóg Paulo mý ke mū. “Pā'i ag vỹ inh mý vēnh

vī jēnē, isỹ ājag mý: ha mū jēg, he jé. Hā ký jatun mý mū jēg,” he tóg, Paulo ag mý.

³⁷ Ký Paulo tóg ti mý: “hā ra ag tóg vēnh ó to ěg mrānmrān ja nī,” he mū. “Vēnh kar vỹ ag tỹ ěg mrānmrān ve kán. Hā ra ag tóg ěg ki jēmē ja tū nī, ěg jyvēn ja tū ag nī gé. Tỹ ěg Romano nýtī, hā ra ag tóg vèse ja kākī ěg vām. Jó ag tóg vēnh kar vatānh tá ěg mý: ha mū jēg, he sór mū. Mūnh ke tū ěg nī. Ag hā tóg kāmūnh mū, pā'i ag. Ěg tatī ag tóg mūnh mū. Ký ěg mūnh mū ha,” he tóg, Paulo ti.

³⁸ Ký polícia ag tóg pā'i ag mý tag tó mū sir, ký tóg ag mý e tī. Ag tỹ Romano ũ vóg kónān ke tū vē vē, hā ký ag fe tóg jūrūn ke mū, pā'i ag. ³⁹ “Ěg mý vēnh pāte fón nī, ěg tỹ ājag se ja ti,” he ag tóg mū. Ký ag tóg ag tatī mū mū. “Ājag tỹ ěg jamā ki pa ký tóg há tī,” he ag tóg mū sir ag mý.

⁴⁰ Ag tỹ vèse ja ki pa ký ag tóg Lídia fi ĩn ra mū mū sir. Jesus mré ke ag vég ag tóg mū. Ký ag tóg ag jyvēn mū. Ký ag tóg cidade ěn ki pa mū sir.

Cidade tỹ Tessalônica tá

17 Ký ag tóg cidade tỹ Anfípolis mī pa mū, cidade tỹ Apolônica mī ke gé. Ký ag tóg cidade tỹ Tessalônica tá junjun mū. Tá Israel tỹ vēnh kanhrān jafā tóg nī. ² Ký Paulo tóg ā tỹ nén han tī ěn han mū sir. Israel tỹ vēnh kanhrān jafā kāra tóg rā mū. Ag mré tóg vī mū, vēnh kán ke kurā tāgtū ki. Topē vī tó tóg mū sir ag mý, Paulo ti, vāsỹ rán ký nī ěn ti. ³ Ag mý tóg Cristo kāmén mū, ti jagtar ti, ti ter kar rīr mān ja ěn ti. “Jesus hā vē, hā vỹ: Cristo, he mū,” he tóg. “Cristo tóg vāsỹ rán ký nī, ti jagtar ke ti, ti rīr mān ke ti ke gé, hā vỹ: Jesus, he mū,” he tóg, Paulo ti.

⁴ Ký tóg ũ ag mý ge nī, Israel kāmī ũ ag mý. Ký ag tóg Paulo mré mūgtī, Silas mré ke gé. Ký fóg tỹ Grego he mū tỹ hēn

ri ke ag tóg to há nýtĩ gé sir, ũ tỹ Topẽ kamẽg mũ ag, ũn tātá há fag ke gé.

⁵Hã ra Israel ũ ag mỹ tóg tỹ ũ nỹ. Hã kỹ ag tóg ũn kórég ag mỹ: “kāmũ jêg ra,” he mũ, ũn rãnrãj vãnẽ ag mỹ. Vẽnẽ gẽnẽ kỹ ag tóg vẽnẽ kar jũgũ han mũ. Kỹ ag tóg Jasão he mũ ẽn ĩn jy nýtĩ nĩ sir. Paulo ag kanẽg ag tóg mũ, ag jãvãnẽ kỹ, ag tỹ vẽnẽ kar jũgũ ẽn ag mỹ ag ven jé. ⁶Hã ra ag tóg ag vэг tú nĩ, Paulo ag. Kỹ ag tóg Jasão péré mũ mũ, Jesus mré ke ũ ag mré ke gé. Pãi ag mỹ ag tóg ag vin mũ. Kỹ ag tóg jamã hár(a) prẽr mũ. “Ũ tỹ mundo kar ki vẽnẽ kar jũgũ han mũ ag tóg tag ki junjun mũ (mỹr),” he ag tóg mũ. ⁷“Jasão tóg ag mỹ: kãge jêg ra, hé. Hã ra ag kar tóg pãi mág tỹ imperador vĩ mranh ja tĩgtĩ. “Vyr mỹ ẽg pãi mág nĩ, hã vỹ: Jesus, he mũ,” he ag tóg. “Kỹ ẽg pi(jé) imperador krẽm nýtĩgtĩ,” he ag tóg, Paulo ag,” he ag tóg mũ. Ag tỹ Paulo to ón hã vẽ, pãi ag mỹ.

⁸Kỹ ũ tỹ mẽg mũ ag vỹ fe ũ nýtĩ sir, cidade ẽn tá pãi ũ ag, cidade ẽn tá ke kar ag ke gé. ⁹Kỹ pãi ag tóg Jasão ag mỹ: “ẽg mỹ jãnkamy nĩm ké, ẽg tỹ to ve jé, ajag tỹ imperador kato tẽnẽ ke tú ti,” he ag tóg. Ag tỹ ag mỹ nĩm kar kỹ ag tóg: “hã mũ jêg (ge),” he mũ sir.

Cidade tỹ Beréia tá

¹⁰Kuty ẽn kã Jesus mré ke ag tóg Paulo mỹ: “hã tĩg, cidade tỹ Beréia ra,” he mũ. Silas mỹ ag tóg ke mũ gé. Kỹ ag tóg mũ mũ.

Ag tỹ Beréia tá junjun kỹ ag tóg Israel tỹ vẽnẽ kanhrãn jafã kãra ge mũ, ag mỹ Topẽ vĩ tó jé.

¹¹Beréia tá ke ag tóg jykre há nýtĩ. Ag pi(jé) Tessalônica tá ke ag ri ke nýtĩ. Kỹ ag tóg Paulo ag vĩ kri fig mũ. Ag mỹ tóg há tĩ sir. Kurã kar ki ag tóg Topẽ vĩ ki estudar he mũ, ag tỹ to: “ki hã tóg tó tĩ,” hen kỹ. ¹²Kỹ ũ tỹ hẽn ri ke ag tóg Jesus ki ge mũ, fóg tỹ Grego ag mré hã, ũn tātá há fag mré hã.

¹³Kỹ Israel ag tóg mẽg mũ, cidade tỹ Tessalônica tá. Paulo tỹ Beréia tá Topẽ vĩ tó mũ mẽg ag tóg mũ sir. Kỹ ag tóg Beréia tá junjun mũ, ag tỹ tá vẽnẽ kar jũgũ han jé. ¹⁴Kỹ Jesus mré ke ag tóg Paulo mỹ: “hã tĩg, canoa mág kãmĩ,” he mũ. Hã ra Silas vỹ tĩ tú nĩ, Timóteo ke gé. Beréia tá ag nýtĩ. ¹⁵Kỹ ũ ag tóg Paulo mré mũ mũ. Cidade tỹ Atenas ra ag tóg ti péré mũ mũ. Ag tỹ tá vỹnvỹn kenh kenh kỹ Paulo tóg ag mỹ ke mũ, ag tỹ Silas jé prẽr jé, ag tỹ Timóteo jé prẽr jé ke gé, ag tỹ vỹsýmér cidade tỹ Atenas kukãm kãmũ jé.

Cidade tỹ Atenas tá

¹⁶Kỹ Paulo tóg Atenas tá nĩ nĩ, Silas jãvãnẽ kỹ, Timóteo jãvãnẽ kỹ ke gé. Hã ra tóg sir krĩ ũ nĩ, ti tỹ tá vẽnẽ kãggrá tỹ hẽn ri ke ven kỹ, ti tỹ ag tỹ to jãn jafã ẽn ven kỹ. ¹⁷Kỹ tóg Israel tỹ vẽnẽ kanhrãn jafã ki Israel ag mré vĩ mũ, fóg tỹ Israel jykre han mũ ag mré ke gé. Kurã kar ki tóg cidade kũju tá vẽnẽ kar mré vĩ mũ gé sir, ũ tỹ tá nýtĩ ag mré.

¹⁸Kỹ ũ ag tóg ti mré vĩ mũ, ũ tỹ Epicuro tỹ nẽn rán ja to jykrén mũ ag, ũ tỹ Estóico he mũ ag tỹ nẽn rán ja to jykrén mũ ag ke gé. Kỹ ag tóg ti to: “vĩ mã pẽ tóg nĩ, vĩ kamẽ tóg nĩ,” he mũ. “Tĩ hỹn tóg ne tó?” he ag tóg. Kỹ ũ ag tóg ti to: “topẽ ũ tugtó ti hỹn, kór há tá topẽ,” he mũ. Hã ra Paulo tóg Jesus tỹ vẽnẽ sér tó mũ. Jesus rĩr mãn tó tóg mũ, Paulo ti.

¹⁹Kỹ ag tóg sór tỹ Areópago ra ti péré mũ mũ. Tá pãi ag tóg ag jyvẽn tĩ, sór tỹ Areópago tá. Kỹ pãi ag tóg ti mỹ: “ã tỹ vẽnẽ jykre tag tó mũ kãmén há han ra ẽg mỹ,” he mũ, ti mỹ. ²⁰“(Ge) mẽ ja tú ẽg nýtĩ, ã tỹ ẽg mỹ tó mũ tag ti. Kỹ ẽg mỹ kãmén há han nĩ,” he ag tóg, pãi ag.

²¹Hã ra Atenas tá ke ag tóg vẽnẽ vĩ tãg mẽ to há nýtĩ, cidade ũ tá kãmũ kỹ tá nýtĩ ag ke gé. Ag tỹ vẽnẽ vĩ tãg mẽ kỹ ag fe tóg mrin ke tĩ.

²² Kĩ Paulo tóg sór tỹ Areópago kri jē kỹ ag mỹ: “Atenas tá ke’,” he mũ. “Topē tỹ hēn ri ke kamēg ājag tóg tĩ (mỹr). Tag ve sóg,” he tóg. ²³ “Ājag jamā mĩ sóg tĩ, kỹ sóg ājag tỹ topē jo ĩn kāsir kar vigvé. Kỹ sóg topē jo ĩn sĩ ũ vé, kỹ tóg to rán kỹ nĩ, hā vỹ: ěg tỹ topē ki kagtĩg jo ĩn, he mũ, ti rá ti. Topē ěn tó sóg tĩ, ājag tỹ Topē ki kagtĩg ěn. Ājag tỹ ti ki kagtĩg nĩ ra ājag tóg ti mỹ nēn ũ kugprũn tĩ,” he tóg.

²⁴ “Topē ěn vỹ mundo kar han, mĩ mũ kar ke gé. Kanhkă tăn vē mỹr, kỹ tóg tỹ ga to pā’i nĩ gé. Hā kỹ tóg ěg tỹ ti jo ĩn han krēm nĩ tũ nĩgtĩ (mỹr),” he tóg. ²⁵ “Kỹ ěg tóg ti ki rĩr ke tũ nĩ gé, ti jagtar tũ nĩn kỹ. Vēnh kar rĩn tóg nĩgtĩ (mỹr), Topē ti, kỹ tóg vēnh kar tỹ hāmham ke han tĩ. Vēnh kar tỹ nēn precisar he kar nĩm tóg tĩ (mỹr),” he tóg. ²⁶ “Kỹ tóg vēnh kyvénh pir tỹ ěpră ke kar hyn han, nação kar (mỹr), ga kar mĩ mũ mũ ag (mỹr). Tỹ ěg vēnh kyvénh pir nỹtĩ. Kỹ tóg ěg mỹ ěg mur kură nĩm mũ gé, ěg ter kură ti ke gé. ěg mỹ tóg ěg jamā nĩm mũ gé, Topē ti,” he tóg. ²⁷ “Vēnh kar hyn han tóg, Topē ti, ěg tỹ ti to há nĩn jé, ěg tỹ ti ki kanhró nỹtĩ jé. Kór gy tũ ti nĩ, ti pi(jé) kuvar gy nĩ’. Kakó ti nĩ, Topē ti,” he tóg. ²⁸ “Tĩ tỹ ěg han vē mỹr, hā kỹ ěg tóg rĩnrĩr nỹtĩ nĩ, ti tugrĩn. Tĩ tugnĩn ěg tóg mũgtĩ (mỹr), kỹ ěg tóg ti tugrĩn nỹtĩ gé (mỹr), Topē tugrĩn. Hā kỹ ājag kāmĩ vēnhrán tĩ ag tóg tó ja nĩgtĩ gé, kỹ ag tóg: tỹ ěg Topē krē nỹtĩ, he ja nĩgtĩ. ²⁹ ěg tỹ tỹ ti krē nỹtĩn kỹ ěg tóg ti ki kanhró nỹtĩ gé. Ouro ri ke tũ ti nĩ, Topē ti. Tĩ pi(jé) prata ri ke nĩ’. Tĩ pi(jé) pó ri ke nĩ’. Tĩ pi(jé) tỹ vēnh kăgră nĩ, retrato ke gé, ti sĩnvĩ ra. ěpră ke tỹ nēn to jykrén mũ ri ke tũ ti nĩ, ěg tỹ nēn han mũ ri ke tũ ti nĩ. Topē vē (mỹr), Topē,” he tóg, Paulo ti.

³⁰ “Hā ra Topē tóg ěg to fe mág mũ, ěg tỹ ti ki kagtĩg nỹtĩn kỹ. Hā kỹ tóg vāhā vēnh kar mỹ vēnh vĩ jēnēg mũ, ěg tỹ ěg jykre tovānh jé. ³¹ Kură nĩm tóg huri, kỹ

tóg kură ěn ki ěpră ke jykre kar tugnỹm ke mũ. Kură ěn ki tóg vēnh jykre kuryj han ke mũ inhhă, Topē ti, ti tỹ ěg jykre tugnỹm ke mũn kỹ. Ũn pir kuprēg tóg, ti tỹ ti jagfỹ ěg kar jykre tugnỹm jé. ěn tóg ter ja nĩ, hā ra Topē tóg ti ter kỹ ti rĩn măn ja nĩ, ěg tỹ ti ki kanhró nỹtĩ jé, ũ tỹ Topē jagfỹ ěg jykre tugnỹm ke ti,” he tóg, Paulo ti.

³² Tĩ tỹ ag mỹ ti ter kar rĩr măn tón kỹ ũ ag tóg to ě he mũ. Jó ũ ag tóg: “kură ũ kă ěg hēn ri ke mũn ă vĩ mē măn sór mũ,” he mũ. ³³ Hā kỹ Paulo tóg tĩ mũ, ag ré kỹ. ³⁴ Kỹ ũ ag tóg ti nón mũ mũ, kỹ ag tóg Jesus ki ge mũ sir. Ag kă ũ vỹ tỹ Dionísio nĩ. Areópago tá ag jyvēn tĩ ag kă ũ vē, Dionísio ti. Kỹ ũ fi tóg Jesus ki ră mũ gé. Fi jyjy hā vỹ: Damáris, he mũ. Kỹ ũ ag vỹ ti ki ge mũ gé sir.

Cidade tỹ Corinto tá

18 Kĩ Paulo tóg cidade tỹ Atenas ki kutē kỹ cidade tỹ Corinto ra tĩ mũ.

² Tá Israel ũ tóg nĩ nĩ, ti jiji hā vỹ: Áquila, he mũ. Ponto tá ke vē. Ũri tóg ga tỹ Itália tá kătĩg ja nĩ, ă prũ fi mré. Fi jyjy hā vỹ: Priscila, he mũ. Pā’i mág tỹ imperador tỹ Cláudio he mũ tóg Israel kar ag mỹ: “cidade tỹ Roma ki pa jēg,” he ja nĩgtĩ. Hā kỹ fag tóg cidade tỹ Corinto tá junjun ja nĩgtĩ.

³ Kỹ Paulo tóg fag mré nĩ nĩ sir. Fag mré tóg rānhraj mũ sir. Hā ra fag tóg kur tỹ ĩn han mũgtĩ, Paulo kóm. Fag rānhraj hā vē. Hā kỹ Paulo tóg fag mré rānhraj mũ sir, ti tỹ fag mré nĩn kỹ. ⁴ Kỹ tóg vēnhkán ke kură kar ki ag mỹ Topē vĩ tó mũ, Israel tỹ vēnh kanhrān jafă krēm, Israel ag tỹ ti vĩ kri fi jé, fóg tỹ Grego ag ke gé. ⁵ Kỹ Silas vỹ Macedônia tá kătĩ mũ, Timóteo ke gé. Kỹ Paulo tóg Topē vĩ tó tăvĩ nĩ nĩ, ĩn tỹ kur han măn tũ tóg nĩ. Israel ag mỹ tóg Jesus kāmén mũ, ti tỹ tỹ Cristo nĩ ti.

⁶ Hā ra ag tóg ti kato vī mū. Kĩ ag tóg Jesus to é he mū. Kĩ Paulo tóg ā kur rūm-rūm mū, ag mĩ: “vėnh hā ki ājag tóg vāg-for kenh mū, nūgme ki vār kĩ, inferno ki,” he jé. “Ājag mĩ sóg tó, Jesus ti, hā ra ājag tóg mē jāvānh nĩtĩ. Kĩ ājag tĩ vėsóg ki vėsyrėnh ke vė. Inh hā tóg fóg ag kar mĩ tónh tĩg ha, kanhgág ag kar mĩ ke gé,” he tóg mū, Paulo ti. ⁷ Hā kĩ tóg tá kutė kĩ fóg ĩn kĀra rā mū, ti jiji hā vỹ: Tício Justo, he mū. Topē kamėg ti tĩ. Ti ĩn vỹ Israel tĩ vėnh kanhrān jafā rā jė gé. Kĩ Paulo tóg ti ĩn kĀra rā mū sir.

⁸ Hā ra Israel tĩ vėnh kanhrān jafā to pā'i vỹ Jesus ki rā mū, ti jyjy hā vỹ: Crispo, he mū. Ti mré ke kar vỹ Jesus ki ge mū gé, Corinto tá ke tĩ hėn ri ke ag ke gé, ag tĩ Paulo vĩ mē kĩ. Kĩ ag tóg kygpe kĩ nĩtĩ sir.

⁹ Kejēn Paulo tóg kuty kĀ nén nē vėg mū. Topē tĩ ti mĩ vėnh ven vė, kĩ tóg ti mĩ: “kamėg tũg ra,” he mū. “Inh vĩ kāmén ra, ha mē kĩ nĩ tũg,” he tóg. ¹⁰ “Ā mré sóg nĩnh mū. Ū pi(jé) ā vóg kónān mū,” he tóg. “Cidade tag ki ũ tĩ hėn ri ke ag vỹ tĩ isũ nĩtĩnh mū,” he tóg, Topē ti.

¹¹ Kĩ Paulo tóg prỹg pir kri kysā tĩ 6 ke ki tá nĩ nĩ. Ag mĩ tóg Topē vĩ kāmén tĩ nĩ sir, tá.

¹² Kejēn ũ tĩ Gálio he mū tóg tĩ Romano tĩ governador nĩ, ga tĩ Grécia ki. Kĩ Israel ag kar tóg Paulo kato vāsānsān mū. Kĩ ag tóg ti kĀgmĩ kĩ pā'i mág mĩ ti ven mū mū. ¹³ Kĩ ag tóg governador mĩ: “tag tóg ěg jykre tĩ tĩ' he sór mū,” he mū. “Vėnh kar tóg ti vĩ tugnĩn Topē to jānjān tĩ, vėnh jykre tĀg tĩ hā ra,” he ag tóg ti mĩ.

¹⁴ Kĩ Paulo tóg vĩ sór mū, hā ra Gálio tóg Israel ag mĩ: “Israel,” he mū. “Ti tĩ nén ũ kórég han mū ra sóg ājag jagfy vĩ tĩ vė, ti tĩ crime han mū ra, Paulo ti,” he tóg. ¹⁵ “Hā ra ājag jykre to ājag tóg ti to jũ mū, ājag jiji to, ājag vėnh rá to (mỹr). Isũ pijé', ājag tũ tag ti'. Ājag hā ne tag

to jykrén ke mū inhhā'. Inh pi(jé) ājag tũ to jykrén sór mū,” he tóg, Gálio ti, pā'i mág ěn ti. ¹⁶ Kĩ tóg ag mĩ: “ha mū jėg,” he mū sir, vĩ tar han kĩ.

¹⁷ Kĩ tá nĩtĩ ag tóg Sóstenes kĀgmĩg mū. Israel tĩ vėnh kanhrān jafā to pā'i vė. Ti kĀgmĩ kĩ ag tóg ti mrānmrān mū, pā'i mág ěn ĩn tá, hā ra Gálio tóg ki ěmė sór tũ nĩ.

Paulo tĩ Antioquia ra vỹn ke

¹⁸ Kĩ Paulo tóg tá nĩ sir, kurā tĩ hėn ri ke ki. Kĩ tóg kejēn Jesus mré ke ag mĩ: “isĩg vė ha,” he mū. Kĩ Áquila tóg ti mré tĩ mū, ti prũ tĩ Priscila fĩ mré hā. Ag tĩ ga tĩ Sírĩa ra mũnh ke vė. Cidade tĩ Cencrėia tá ag tóg canoa mág ki ge sór mū, va mū jé. To hā tóg vėnh jārėg mū, Paulo ti, Topē mĩ promessa han kĩ. ¹⁹ Kĩ ag kar tóg canoa mág kĀki cidade tĩ Ēfeso ra mū mū. Hā ra Áquila fag vỹ tá nĩtĩ, mū mǎn tũ fag nĩ sir.

Kĩ Paulo tóg Israel tĩ vėnh kanhrān jafā kĀra rā mū, Israel ag mré vĩ jé. ²⁰ Ag tĩ ti vĩ mē kĩ tá ke ag tóg ti mĩ: “ėg mré nĩ nĩ,” he mū.

Hā ra tóg ag mĩ: “hā ra sóg ver tĩg mū ha,” he mū. ²¹ “Kānhmar sóg vỹn kenh ke mū hā ra, Topē tĩ ĩnh vỹn kenh ke to há nĩn kĩ,” he tóg. Kĩ tóg cidade tĩ Ēfeso tá kutė mū. ²² Kĩ tóg cidade tĩ Cesarėia tá jun mū. Kĩ tóg cidade tĩ Jerusalém ra tĩg kĩ Jesus ki ge mū kar vĩgvėg mū, ũ tĩ Topē vĩ mē jé vėnh mǎn tĩ ag. Kar kĩ tóg cidade tĩ Antioquia ra tĩ mū. ²³ Tá tóg nĩ sĩ han mū. Kar kĩ tóg tá kutė kĩ ga tĩ Galácia mĩ kutė mū, ga tĩ Frígĩa mĩ ke gé. Jesus mré mū ag jyvėn tóg mū sir, ag tĩ tar nĩtĩ jé.

Apolo tĩ Topē vĩ tó

²⁴ Kejēn Israel ũ tóg cidade tĩ Ēfeso tá jun mū, ti jiji hā vỹ: Apolo, he mū. Cidade tĩ Alexandria tá tóg mur ja nĩ. Vĩ há ti nĩ. Topē vĩ tó tóg tĩ gé, vāsỹ rán kĩ nĩ ěn to tóg tar nĩ.

²⁵ Ēn tóg Jesus japry ki kanhró nĩ, Jesus jamĩn ki. Mũmẽg vānh nĩn kũ tóg Jesus vĩ tó tĩ mũ, ti tũ to krónh ke vānh nĩn kũ. Hã ra tóg João tũ ag kygpég mũ ěn hã ki kanhró nĩ. Ēg tũ Jesus jyjy tó kũ kygpe kũ nĩ tag ki kagtĩg tóg nĩ ver.

²⁶ Ēn tóg Israel tũ vėnh kanhrān jafā krēm ag kanhrān mũ sir, ti tũ mũmẽg vānh nĩn kũ. Áquila fag tũ ti vĩ mẽg kũ fag tóg ti mũ: “ẽg venh kātĩg nĩ,” he mũ. Kũ fag tóg ti mũ Topẽ japry kāmén kām mũ, Topẽ jamĩn ti. ²⁷ Kar tóg ga tũ Grécia ra tĩg sór mũ, Apolo ti. Kũ Jesus mré ke ag tóg ti mũ: “há ti nũ, ha tĩg ge,” he mũ. Kũ ag tóg Jesus mré mũ ag mũ vėnh rá jėnẽg mũ, ag tũ ti mũ: “kārā ra,” hen jé. Tá jun kũ tóg Jesus ki ge kũ nĩti ag jyvėn mũ, kũ ag tóg ti tũ ag jyvėn to tar han kũ nĩti nĩ sir, Topẽ tũ ũn jagāgtān mũ ag. ²⁸ Israel ag mré tóg vĩ tĩ, Apolo ti, vėnh kar jo. Ag mũ tóg Topẽ vĩ tó tĩ, vāsũ rán kũ nĩ ěn ti. Kũ tóg ag mũ Cristo kāmén mũ sir. “Cristo vỹ tũ Jesus nĩ,” he tóg mũ ag mũ, Apolo ti, ag mũ Topẽ vĩ rá kāmén kũ.

Paulo tũ cidade tũ Ēfeso tá nĩ

19 Kũ Apolo tóg cidade tũ Corinto tá nĩ nĩ sir. Hã ra Paulo tóg cidade tũ Ēfeso tá jun mũ. Ga ěn mũ tóg tĩg ja nĩti, pānónh kri kyjer ěn mũ. Kũ tóg Ēfeso tá jun mũ sir.

² Tá ũ ag tóg Jesus ki ge ja nĩti. Kũ Paulo tóg ag mũ: “ājag mũ Topẽ kuprĩg tũ jagrẽ nĩti, ājag tũ Jesus ki gen kã?” he mũ. Kũ ag tóg ti mũ: “kũ ne nẽ ge, Topẽ kuprĩg ti?” he mũ, Paulo mũ. ³ Kũ Paulo tóg: “ājag tũ kygpe kũ ājag hẽ ri kẽ?” he mũ. Kũ ag tóg: “João tũ ag kygpe ri ke ti nĩ, ẽg kygpe ti,” he mũ. ⁴ Kũ Paulo tóg: “João tóg ag kygpe ja nĩti, ag tũ ājag jykre tovānh sór nĩti kũ,” he mũ. “Kũ tóg vėnh kar mũ kāmén ja nĩ gé, ag tũ ũ tũ ti nón kātĩ ěn ki ge jé, hã vỹ: Jesus, he mũ,” he tóg, Paulo ti. ⁵ Ag tũ tag mẽ kũ ag tóg ti mũ: “Jesus jiji tó kũ ẽg kygpe

ge,” he mũ. ⁶ Kũ Paulo tóg ģ nĩgẽ tũ ag mẽg mũ, kũ Topẽ kuprĩg tóg ag ki rá mũ sir. Vėnh vĩ ũ han ag tóg mũ sir. Kũ ag tóg Topẽ vĩ tó mũ gé. ⁷ Ũ tũ 12 ag hĩn, vėnh vĩ ũ han mũ ěn ag.

⁸ Kũ Paulo tóg Israel tũ vėnh kanhrān jafā kārā rá mũ. Ti tũ mũmẽg vānh nĩn kũ tóg Topẽ tũ tũ ẽg pā'i nĩ kāmén mũ. Kysā tāgtũ ki tóg ag mũ kāmén mũ, ag tũ hẽn ri ke mũn ti vĩ kri fi jé. ⁹ Hã ra ũ ag tóg ti vĩ to fe ũ nĩti sir, ag tũ kri fi jāvānh nĩti kũ. Kũ ag tóg to é hen kũ ag tóg to vĩ kónān mũ, vėnh kar jo. Kũ Paulo tóg ag mré vĩ mǎn tũ nĩ sir. Jesus mré mũ ag mũ tóg: “vyr mũ ẽg nĩti,” he mũ. Kũ tóg escola krēm ag kanhrān mũ sir, kurā kar ki. Escola to professor ěn jiji hã vỹ: Tirano, he mũ.

¹⁰ Prỹg régre ki tóg tá nĩ nĩ, gen kũ, Paulo ti. Hã kũ ga tũ Ásia tá ke ag kar vỹ Jesus vĩ mẽg mũgtĩ, Israel ag kar, fóg tũ Grego he mũ ag kar ke gé. ¹¹ Kũ Topẽ tóg Paulo mũ vėnh jykre nĩm mũ gé, kũ tóg ẽg tũ nén han vānh tũ hẽn ri ke hĩn han mũ. ¹² Kejẽn ag tóg Paulo kur tũ ũn kagyga ag mẽgmẽg mũ, ag tũ há' he jé. Paulo tũ kur mẽ kar kũ ag tóg tũ ũn kagyga ag mẽgmẽg mũ. Kũ ag tóg hághá' he mũ. Vėnh jagrẽ kórég ag vỹ gen kũ pa mũ gé, ũn kaga ag tũ ti kur mẽ kũ.

Kujá ag

¹³ Kũ Israel ag kujá ag vỹ tá nĩti gé. Kujá ěn ag tóg ěmā kar kri rĩm ke ti. Kejẽn ag tóg ājag tũ vėnh jagrẽ kórég ven kũ ag tóg Jesus jyjy tó tĩ. Őn kũ ag tóg tó tĩ. Kũ ag tóg ũ mũ: “Jesus jykre tũ sóg ģ kutēm ke mũ, Paulo tũ ũn kāmén tĩ ěn jykre tũ,” he mũ, ũn jagrẽ kórég mũ. Hã ra ag tũ ón kũ Jesus jiji tó vė. Ti mré ke pijé'. ¹⁴ Ũ tũ ge tó mũ ag vỹ tũ Israel ag nĩti. Topẽ tũ ki rĩr tĩ to pā'i mág krẽ ag vė, kũ ti jiji hã vỹ: Ceva, he mũ, ag panh jyjy ti. Ũ tũ 7 ke ag vė, ti krẽ ěn ag.

¹⁵ Ag tũ ũn jagrẽ kórég mũ Jesus jiji tó kũ vėnh jagrẽ kórég ěn tóg ag mũ: “Je-

sus ki kanhró sóg nī, Paulo mē inh huri ke gé, hā ra ājag tóg tỹ ũ nỹtĩ?” he mū ag mỹ, kujá ag mỹ. ¹⁶ Kỹ ũn jagrē kórég ěn tóg ag to hũm he mū. Ag kygrēg tóg mū, hā ra ag tóg ti tỹ hē ri ke tũ nĩ. Kỹ ag tóg kator kỹ rinfīg mū sir, kygvēnh kỹ. ¹⁷ Kỹ Ēfeso tá ke ag kar tóg mēg mū, Is-rael kar, fóg tỹ Grego ag kar ke gé. Kỹ ag tóg mūmēgmēg mū sir. Kỹ Jesus Cristo jiji tóg ag mỹ tar nĩ, ag mỹ tóg nēn kar kăfór nĩ, Jesus Cristo jyyj ti.

¹⁸ Kỹ Jesus ki ge kỹ nỹtĩ ag tóg ājag jykre kórég tugtó mū sir, jagnē mỹ. ¹⁹ Ũ ag tóg curandeiro tũ han ja nĩgtĩ, kujá tũ ke gé. Kỹ ag tóg ājag vēnh rán gé kāmũ mū, curandeiro tỹ vēnh rán ěn ti. Kỹ ag tóg kuprũn kãn mū sir, vēnh kar rĩnve. Ag tỹ ti kaja nĩkrén kỹ tóg kaja e ja nĩ, jánkamy tỹ 50 mil hỹn. ²⁰ Hā kỹ Topē vĩ tóg sir vēnh kar kri rũm ke mū. Kỹ ũ tỹ hēn ri ke ag tóg kri fig mū sir.

Ēfeso tá vēnh génh

²¹ Kar kỹ Paulo tóg to jykrén mū. Ga tỹ Macedônia mĩ tóg kutē sór mū, ga tỹ Grécia mĩ, Jerusalém ra tĩg jé. “Isỹ Jerusalém ra tĩg kar kỹ sóg cidade tỹ Roma ra tĩg sór mū gé,” he tóg, Paulo ti. ²² Kỹ tóg ga tỹ Macedônia ra ũn régre ag jēgnēg mū, ti mré rānrhāj mū ag, hā vỹ: Timóteo mré Erasto, he mū. Ti hā tóg hā ra ga tỹ Ásia tá nĩ nĩ ver, Paulo ti.

²³ Kejēn vēnh génh tóg kutē mū, Jesus japry tugrĩn, ti jamĩn tugnĩn. ²⁴ Ũ tóg Ēfeso tá nĩ nĩ, ũ tỹ prata tỹ ĩn sĩ kăggrá han mū ti, ũ tỹ topē tỹ Diana he mū fi jo ĩn sĩ ěn kăggrá han mū ti, retrato ěn. Ũ tỹ han mū jiji hā vỹ: Demétrio, he mū. Ti camarada tỹ hēn ri ke ag tóg vēnh rānrhāj ěn ki nēn há vég tĩ. Ag ganho vē.

²⁵ Kỹ tóg ā camarada ag jé prēr kãn mū, Demétrio ti. Ũ tỹ ā ri kén rānrhāj mū ag jé prēr tóg mū gé. Ag vēnh măn kỹ tóg ag mỹ: “ha vé,” he mū. “Vēnh rānrhāj tag ki ěg tóg nēn ũ há vég mũgtĩ, ěg ganho ti. Tag ki ěg há nỹtĩ,” he tóg. ²⁶ “Hā ra

Paulo tag tóg cidade tag ki tóg ũ tỹ hēn ri ke krĩn mū sir, ga tỹ Ásia mĩ ke gé. Ag mỹ tóg: “vēnh nĩgé tỹ han ja pi(jé) tỹ Topē nĩ,” he tĩ. Kỹ ag tóg ti vĩ kri fig mū sir. Tag vég ěg mū (mỹr),” he tóg. ²⁷ “Kỹ ěg tỹ nēn tag tóg tũ he sór mū sir ti tugrĩn, ěg ganho ti. Hā ra Diana fi jo ĩn tóg tỹ nēn ũ tũ nĩ ke gé, ti sĩnvĩ nĩ ra. Kỹ fi tóg tỹ nēn ũ tũ nĩ gé sir, fi tỹ tỹ ũn mág nĩ ra. Ásia kar mĩ ag tóg fi to jănjan tĩ, ga kar mĩ ke gé. Hā ra tóg fi tỹ tũg’ henh ha, Paulo ti, ti tỹ: “vēnh kăggrá pi(jé) tỹ Topē nĩ, hen kỹ,” he tóg, Demétrio ti, ũ tỹ fi jo ĩn sĩ han mū ěn ti.

²⁸ Ag tỹ tag mē kỹ ag fe tóg gỹm ke mū sir. Kỹ ag tóg jamā hár(a) prēr kỹ: “!..topē tỹ Diana fi vỹ kăfór ne..! !..Tỹ fi Ēfeso ag tũ ne..!” he mū sir, prēnprēr kỹ. ²⁹ Kỹ cidade ěn ki ag vēnh génh vē sir, kỹ vēnh kar tóg ĩn mág ěn ra pétē mū, ĩn kri ĩn tũ ěn ra. Gaio he mū ti pére ag tóg mū mū, ti kăgmĩ kỹ, Aristarco ke gé. Macedônia tá ke ag vē. Ēn ag tóg Paulo mré kāmũ ja nĩgtĩ. Ēn ag kugmĩg ag tóg mū, ag tỹ ĩn mág ěn ra ag tatĩ mū jé.

³⁰ Kỹ Paulo tóg ra tĩg sór mū, ag mré vĩ jé, hā ra ũ tỹ Jesus ki ge kỹ nỹtĩ ag tóg ti mỹ: “tĩ tũg ra,” he mū. ³¹ Kỹ ga tỹ Ásia tá pãi ag tóg ti mỹ vēnh vĩ jēnēg mū gé, ti tỹ ĩn mág ěn ra ti tũ nĩ jé. Ti to ag tóg há nỹtĩ, pãi ag.

³² ĩn mág tá ag tóg vēnh măn kỹ nỹtĩ nĩ, ũ tỹ hēn ri ke ag. Kỹ ũ ag tóg nēn ũ tó tĩ, prēnprēr kỹ, jó ũ ag tóg nēn ũ tó tĩ, prēnprēr kỹ. Kỹ vēnh kar tóg vĩ vĩ he kãn mū sir. Vēnh măn kỹ ag nỹtĩ, hā ra ag tóg: “ěg tỹ hē ri ke jé vēnh măn nē hỹn?” he mū. ³³ Kỹ Israel ag tóg vēnh kar mỹ ũ ven mū gé, Alexandre he mū ěn. Kỹ Alexandre tóg ā nĩgé tỹ ge mū, ag tỹ katy’ he jé. Kỹ tóg ag mỹ kāmén sór mū. ³⁴ Kỹ ag tóg vég mū sir, ti tỹ tỹ Israel nĩ ti, Alexandre ti. Hā ra ag tóg tỹ fóg nỹtĩ, tá vēnh măn kỹ nỹtĩ ag. Kỹ ag tóg Israel ag to jũgũ nỹtĩ nĩ. Ag tỹ ti tỹ tỹ Israel nĩ ěn ven kỹ vēnh kar tóg prēr

pir han mū, hā vỹ: “!..Éfeso tá ke fi tỹ vênh kar kăfór ne..! !..Diana he mū fi vỹ vênh kar kăfór ne..!” he mū, prēnprēr kỹ. Hora régre han ag tóg mū sir, ge nỹtĩ ki.

³⁵ Governo mỹ răn tĩ ěn tóg hā ra ag fe tỹ há' he mū. Kar kỹ tóg ag mỹ: “Éfeso tá ke' he mū. “Vênh kar vỹ Diana fi ki kanhró nỹtĩ,” he tóg. “Éfeso tá ěg tóg fi ki rĩr mū. Fi kăggrá nējĩ tóg kanhkā tá kăkutē ja nĩ. Vênh kar tóg tag ki kanhró nỹtĩ,” he tóg. ³⁶ “Ũ tóg tag kato vĩ tũ nĩgtĩ (mỹr),” he tóg. “Hā kỹ jatu ké. Krĩ rỹg tũg ra,” he tóg. ³⁷ “Tag ag taĩ ājag tóg kāmũ ja nĩgtĩ, hā ra ag tóg topē fi jo ĩn tá nén ũ pēju ja tũ nĩgtĩ. Ěg topē fi to ag tóg vĩ kónān tũ nĩgtĩ (mỹr),” he tóg. ³⁸ “Demétrio mỹ ag kato vĩ sór ke mū?” he tóg. “Vênh kăggrá han mū ag mỹ ti mré ag vĩ kafān sór mū?” he tóg. “Kỹ kófa ag mỹ tómñĩ ge, vênh jyvēn ke kurā ěn kă. Ag kato vĩmnĩ ge,” he tóg. ³⁹ “Ājag tỹ hā ra nén ũ tó sór kỹ ājag tóg ěg tũ ki kanhró nỹtĩ. Kurā nĩm jé ěg tóg ke mū, kỹ ěg vênh măn kỹ venh mū ha,” he tóg. ⁴⁰ “Hā ra ěg tỹ ón kỹ vênh génh kỹ ũ ag hỹn ěg to: pā'i mág tỹ imperador kato ag tē sór mū, he mū. Nén ũ tũ to ājag tóg vênh măn mū (mỹr),” he tóg. “Ũ tỹ ěg mỹ: ne nē? he mū ra ěg tỹ ne tónh ke tóg tũ tĩ,” he tóg, governo mỹ răn tĩ ti. ⁴¹ Kar kỹ tóg ag mỹ: “ha mū jęg,” he mū. Kỹ ag tóg mū mū sir.

Paulo tỹ ga tỹ Macedônia mĩ tũg

20 Vênh kar tỹ jatu ke măn kỹ Paulo tóg Jesus ki ge kỹ nỹtĩ ag jé prēr mū. Ag jyvēn tóg mū, kỹ tóg ag mỹ: “sỹ tĩ ma,” he mū. Kỹ tóg ga tỹ Macedônia ra tĩ mū. ² Kỹ tóg ga ěn mĩ tĩ mū, kỹ tóg fĩn kutē mū. Jesus ki ge kỹ nỹtĩ kar ag jyvēn mág tóg mū. Kỹ tóg tũg măn kỹ ga tỹ Grécia tá jun mū. ³ Tá tóg kysā tăgtũ tũg mū. Kỹ tóg ga tỹ Sírĩa ra vỹn ke sór mū, canoa mág kāmĩ. Hā ra Israel ag tóg tá ti vóg kónān sór mū. Kỹ tóg to jykrén kỹ ga tỹ Macedônia mĩ kutē mū, ga tỹ

Sírĩa ra vỹn ken jé. ⁴ Tĩ mré ag tóg mū mū, hā vỹ: Sópattro, he mū, Pirro kósĩn tag ti, Beréia tá ke tag ti. Kỹ Tessalônica tá Artistarco tóg ti mré tĩ mū, Segundo ke gé. Derbe tá Gaio tóg ti mré tĩ mū, Timóteo ke gé. Ásia tá Tíquico tóg ti mré tĩ mū, Trófimo ke gé. ⁵ Ěn ag kar vỹ ěg jo mū mū, cidade tỹ Trôade ra. Tá ag tóg ěg jāvānh mū sir.

⁶ Kỹ ěg tóg cidade tỹ Filipos tá pa mū, festa tỹ pảo jęgĩa tũ ke kurā kar kỹ. Kỹ ěg tóg kurā tỹ 5 (ke) tũg kỹ Trôade tá junjun mū ag tá, ěg jo mū ag tá. Tá ěg tóg kurā tỹ 7 (ke) tũg mū sir.

Cidade tỹ Trôade tá

⁷ Semana tỹ kurā ve ki ěg tóg vênh măn mū sir, Domingo kă, Jesus jamĩ kó jé. Kỹ Paulo tóg tỹ vaj kỹ tũg sór mū, hā kỹ tóg ag mré vēmén mág mū. Kỹ ěg tóg meia noite pétēm mū, vēmén nỹtĩn ki. ⁸ ĩn to jăpřy jafā tá ěg nỹtĩ, kỹ néj gru tỹ hēn ri ke tá grug kỹ nỹtĩ nĩ.

⁹ Kỹ kyrũ tóg tá nĩ nĩ, ti jyjy hā vỹ: Êutico, he mū. Jānkā ror kă tóg nĩ nĩ, janela kă. Hā ra tóg nũr mū sir. Nũr sér han tóg mū sir. Jó Paulo tóg vēmén jē nĩ. Kỹ tóg ā nũr kỹ jānkā ror ki kutē mū. Janela tăgtũ tá nĩ kỹ tóg ěprā kutē mū. Kỹ tóg ter ja nĩ sir, ag tỹ re kỹ, ti ve jé.

¹⁰ Kỹ Paulo tóg tere mū gé sir. Ti kri tóg pānh ke mū. Kỹ tóg ti kăgũg mū, ā nĩgnó tỹ. Kỹ tóg ag mỹ: “fe kaj tũg ra,” he mū. “Tĩ kupřĩg vỹ ti kăkă nĩ nĩ,” he tóg. ¹¹ Kỹ tóg tăpřy mū, Paulo ti. Jesus jamĩ kănhkrég tóg mū sir, kỹ tóg ko mū gé. Ag mỹ tóg vēmén mág han măn mū gé, kỹ tóg tỹ vaj mū. Vaj kỹ tóg tĩ mū, cidade ěn ki kutē kỹ, Paulo ti.

¹² Hā ra ag tóg kyrũ ěn pére kāmũ mū. Rĩr tóg nĩ nĩ, kỹ ag krĩ tóg há' he mū sir.

Cidade tỹ Mileto ra

¹³ Kỹ ěg tóg ti jo canoa mág kăra ge mū, Paulo jo. Kỹ ěg tóg cidade tỹ Assôs ra mū mū. Tá Paulo tóg ěg mré canoa

kāra rā sór mū gé, ti tỹ ěg mré tĩg jé. “Iso ra mū jĕg, inh hā vỹ inh pĕn kã ra tĩ mū,” he ja tóg nĩgtĩ, Paulo ti. ¹⁴ Ěg tỹ cidade tỹ Assôs tá pa kỹ tóg ěg mré tĩ mū gé, Paulo ti, canoa mág kãmĩ. Kỹ ěg tóg cidade tỹ Mitilene tá junjun mū. ¹⁵ Tá pa kỹ ěg tóg tỹ vaj kỹ goj vāso tỹ Quios kakām krỹg mū. Tỹ vaj kỹ ěg tóg goj vāso tỹ Samos to hā nũnũr mū, kỹ ěg tóg tỹ vaj kỹ cidade tỹ Mileto tá junjun mū sir. ¹⁶ Paulo tóg: “Ěfeso ra ěg mũnh ke tũ nĩ,” he ja nĩgtĩ. “Ěg tỹ Jerusalém kukām mũnh ke vĕ, hā kỹ ěg tóg Ásia ki nỹtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tĩ,” he ja tóg nĩgtĩ, Paulo ti.

Paulo tỹ Jesus mré ke ag mré vĩ

¹⁷ Mileto tá nĩ kỹ tóg Ěfeso ra vĕnh vĩ jĕnĕg mū, Paulo ti, kófa ag mỹ, Jesus ki ge kỹ nỹtĩ to pã'i ag mỹ, ag kãmũ jé. ¹⁸ Ag tỹ tá junjun kỹ tóg ag mỹ: “inh ve ja ājag tóg (mỹr),” he mū. “Inh kātĩg ven kã ājag tóg inh vé, isỹ ga tỹ Ásia tá jun vén kã,” he tóg. ¹⁹ “Ěg Senhor tỹ Jesus tỹ inh mỹ nĕn nĩm ja han isóg tĩ. Vĕnh kãfór han tũ sóg tĩ. Kejĕn sóg fỹ tĩ gé, sỹ vĕnh jykre pāno ven kỹ. Israel ag tóg iso jũgũ tĩ gé, kỹ sóg vĕsỹrĕnh tĩ gé,” he tóg.

²⁰ “Nĕn há kar tó sóg tĩ ājag mỹ. Inh pi(jé) ājag mỹ tó tũ nĩgtĩ, sỹ nĕn ki kanhrān mū tĩ. Ěg vĕnh mān ki sóg tó ja nĩgtĩ, ājag ĩn krĕm ke gé,” he tóg. ²¹ “Israel ag mỹ sóg tó ja nĩgtĩ, inh mré ke ag mỹ, fóg tỹ Grego ag mỹ ke gé, ag tỹ ājag jykre tovānh jé, Topĕ jykre han jé, Jesus Cristo ki rā jé, ěg Senhor ki. Tag tó ja sóg nĩgtĩ,” he tóg, Paulo ti.

²² “Ha vé, Jerusalém ra sóg tĩ mū, Topĕ kuprĩg tỹ inh mỹ: ha tĩg, hen kỹ. Isỹ tá nĕn venh ke ki kagtĩg sóg nĩ ver,” he tóg. ²³ “Hā ra Topĕ kuprĩg tóg inh mỹ tag tó tĩ, ha mĕ: “ã se jé ag tóg ke mū, ã vóg kónān jé ag tóg ke mū,” he tóg tĩ. Isỹ ěmā ũ ki rā tóg inh mỹ inh vĕsỹrĕnh ke tó tĩ, Topĕ kuprĩg ti,” he tóg. ²⁴ “Hā ra tóg inh mỹ tỹ nĕn ũ tũ nĩ. Ag tỹ isĕn ke

mū ra tóg inh mỹ tỹ nĕn ũ tũ nĩ gé. Sỹ inh rānhrāj kān há tóg tĩ, Jesus Cristo tỹ inh mỹ vĕnh rānhrāj nĩm ja ěn ti, hā vỹ: sỹ vĕnh kar mỹ Jesus to vĩ sér ěn tó jé, he mū, sỹ Topĕ tỹ ěg jagĕgtān mū ti tó jé, he mū,” he tóg.

²⁵ “Ha vé, inh ve mān ke tũ ājag tóg nĩ ha, ki kanhró sóg nĩ. Ũ tỹ hĕn ri ke ag mỹ sóg Topĕ tỹ tỹ ěg pã'i nĩ tó ja nĩgtĩ, isỹ ag vĕnh tĩg kỹ. Hā ra ag kar ěn tóg inh ve mān ke tũ nĩ ha,” he tóg. ²⁶ “Hā kỹ sóg ājag mỹ tó mū. Ũ tỹ Jesus ki rā tũ nĩn kỹ tóg iso: inh mỹ tóg tó ja tũ nĩ, hĕnh ke tũ nĩ,” he tóg. ²⁷ “Ājag mỹ sóg tó kān, Topĕ jykre kar tó sóg ājag mỹ. Inh pi(jé) ājag mỹ nĕn ũ tó tũg ja nĩ,” he tóg. ²⁸ “Vĕnh ki rĩrmnĩ, vĕso jykrĕn kỹ. Kỹ Jesus ki ge mū kar ag ki rĩrmnĩ gé. Topĕ kuprĩg vỹ ājag tỹ ag to pã'i hyn han, kỹ ag ki rĩr há han nĩ. Ā kyvĕnh tỹ tóg ag kygĩām mū mỹr, Jesus ti. Tĩ mỹ ag tóg tỹ ti mĕg ri ke nỹtĩ, kỹ ājag tỹ ti mĕg ěn jĕn ke,” he tóg. ²⁹ “Isĩg kỹ ũ ag tóg ājag to junjun ke mū, kỹ ag tóg mĩg ri ke nỹtĩ, ti mĕg mān sór kỹ, hā vỹ: Jesus ki ge kỹ nỹtĩ ag kókĕn sór mū, he mū,” he tóg. ³⁰ “Ājag kãmĩ ũ tóg vĕnh ó tónh ke mū gé, Jesus mré mū ag tỹ ag mré mū kónān han jé,” he tóg. ³¹ “Kỹ vĕnh ki rĩr. Iso jykrĕn. Prỹg tãgtũ ki sóg ājag jyvĕn, kurā ki, kutỹ ki ke gé. Ājag kar jyvĕn sóg (mỹr). Ājag jyvĕn kỹ sóg fỹ tĩ gé kejĕn,” he tóg. ³² “Hā ra sóg Topĕ mỹ: ag ki rĩr, he mū, ājag to. Topĕ vỹ ā vỹ tỹ ājag ki rĩr ke mū gé, ti tỹ ājag jagāgtān kỹ. Tĩ hā vỹ ti ki rā to ājag tar han ke mū, Topĕ ti. Ājag mỹ tóg ěmā há tãvĩ nĩm ke mū gé, kar kỹ, ti tũ kar ag mré hā,” he tóg, Paulo ti.

³³ “Inh pi(jé) ājag mỹ: inh mỹ jānkamy nĩm, inh mỹ kur nĩm, he mū,” he tóg. ³⁴ “Isỹ nĕn ũ gĕnh jé sóg rānhrāj ja nĩgtĩ (mỹr), inh nĩgé tỹ. Kỹ inh rānhrāj ki inh companheiro ag vỹ ājag tũ ti vĩgve ja nĩgtĩ gé inh kóm,” he tóg. ³⁵ “Hā ki sóg ājag mỹ Jesus jykre ti ven mū. Ěg rānhrāj ki ěg tũ ven kỹ ěg tóg ũn krónhkrój ag mỹ

nén ũ vin ke mǔ gé, ěg tǔ ti jykre han kǔ. Ěg Senhor tǔ Jesus vǐ mǐ sóg ěkrég tǐ. Tǐ hǎ tóg ěg mǔ tag tó ja nǐgtǐ, kǔ tóg: “ũ tǔ ěg mǔ nén ũ nǐm kǔ tóg pǎgsǐ nǔ,” he ja nǐgtǐ. “Hǎ sǐ tóg nǔ. Ěg tǔ ũ mǔ ěg tǔ nǐm hǎ kǔ tóg hǎ nǔ,” he ja tóg nǐgtǐ, Jesus tǐ,” he tóg, Paulo tǐ. Paulo tǔ ag mǔ ken hǎ vē.

³⁶ Tǐ tǔ tó kǎn kǔ tóg ǎ jakrǐ tǔ jǐ mǔ, kǔ tóg Topē mré vǐ mǔ, vǐnh kar to. ³⁷ Kǔ ag tóg kygfǔ' he mǔ. Paulo nunh jǎgmǔ ag tóg ǎjag nǐgnó fón mǔ, tǐ ki ag tóg nhun ke mǔ. ³⁸ Ag mǔ tóg e tǐ, tǐ tǔ ag mǔ: “inh ve mǎn ke tǔ ǎjag nǐ ha,” hen kǔ. Kǔ ag tóg canoa mág ra tǐ mré mǔ mǔ sir.

Jerusalém ra

21 Vǎhǎ ěg tóg ag mǔ: “ěg mǔ sór vē,” he mǔ. Ěg tǔ ag ré kǔ mǔ kǔ tóg ag mǔ jagy tǐ. Ge ra ěg tóg tá pa mǔ. Kǔ ěg tóg canoa mág kǎmǐ mǔ mǔ, goj vǎso tǔ Cós kukām, vēsǔméri. Tǔ vaj kǔ ěg tóg goj vǎso tǔ Rodes tá junjun mǔ. Kar ěg tóg cidade tǔ Pátara tá junjun mǔ sir. ² Tá ěg tóg canoa mág ũ vég mǔ gé, ũ tǔ ga tǔ Fenícia ra tǐ mǔ ěn. Kǔ ěg tóg kǎra ge kǔ kǎmǐ mǔ mǔ sir. ³ Goj vǎso tǔ Chipre vég ěg tóg mǔ, ěg jakǎnh tá. Kǔ ěg tóg ga tǔ Síría kukām mǔ mǔ. Cidade tǔ Tiro tá ěg tóg krǔg mǔ. Ag tǔ canoa tǔ nén rǐnh tǐ ěn tǔ tá vin han ke vē, cidade tǔ Tiro tá. ⁴ Tá ěg tóg Jesus mré mǔ ag vég mǔ. Hǎ kǔ ěg tóg kurǎ tǔ 7 (ke) ki tá nǔtǐ nǐ. Topē kuprǐg tǔ ag krǐn kǔ ag tóg Paulo mǔ ke mǔ, tǐ tǔ Jerusalém ra tǔg tǔ nǐ jé, he ag tóg. ⁵ Ge ra ěg tóg kurǎ tǔ 7 (ke) tǔg kǔ mǔ mǎn mǔ. Hǎ ra ag tóg ěg mré mǔ sǐ han mǔ, ǎjag prǔ fag mré hǎ ke gé. Cidade tá ag tóg pa mǔ ěg mré, kǔ ěg tóg goj fyr tá ěg jakrǐ tǔ nǔtǐn kǔ Topē mré vǐ mǔ. ⁶ Kǔ ěg tóg: “ěg mǔnh ken vē ha,” he mǔ. Kǔ ěg tóg canoa kǎra ge mǔ. Jó ag tóg ǎjag jamǎ ra vǔnvǔn ke mǔ gé.

⁷ Kǔ ěg tóg cidade tǔ Tiro tá pa kǔ mǔ mǎn kǔ cidade tǔ Ptolemaida tá junjun mǔ. Jesus mré ke ag vég ěg tóg mǔ sir tá. Ag mré ěg tóg kurǎ pir han mǔ.

⁸ Tǔ vaj kǔ ěg tóg tá pa kǔ cidade tǔ Cesaréia ra mǔ mǔ, ěg pǐn kǎ. Tá ěg tóg Jesus vǐ tó tǐ ũ ěn krēm nǔtǐ mǔ, tǐ jǐji hǎ vǔ: Filipe, he mǔ. ũ tǔ 7 (ke) ěn ag kǎ ũ vē, ũ tǔ vējǐn vēnh kǎpópǎm mǔ ěn ag kǎ ũ vē. ⁹ Tǐ kósín fag vǔ tǔ 4 (ke) nǔtǐ, ěn mǎn ja tǔ fag. ěn fag vǔ Topē vǐ tó mǔgtǐ.

¹⁰ Sǐ há tǔ tá Judéia tá ke ũ tóg kǎtǐ mǔ, ũ tǔ Topē vǐ tó tǐ tǐ, tǐ jǔjy hǎ vǔ: Ágabo, he mǔ. ¹¹ ěn tóg ěg tá jun kǔ Paulo vēsógfǐn ja tǔ ǎ nǐgé sigség mǔ, ǎ pǐn ke gé. Kǔ tóg: “Topē kuprǐg tǔ tón hǎ vē, ha mǐ: ũ tǔ vēsógfǐn ja tag tǔ tǔ nǐ ěn vǔ se kǔ jǐnh mǔ,” he mǔ. “Israel ag vǔ tǐ senh mǔ, kǔ ag tóg fóg ag mǔ tǐ fǐg mǔ, he tóg, Topē kuprǐg tǐ,” he tóg, Ágabo tǐ.

¹² Ěg tǔ tag mǐ kǔ ěg tóg Paulo mǔ: “Jerusalém ra tǐ tǔg nǐ,” he mǔ. Kǔ tá ke ag tóg ge mǔ sir ěg mré. ¹³ Hǎ ra Paulo tóg: “ǎjag hǎ ne tóg kygfǔ' he mǔ,” he mǔ. “Inh fe kaj han ǎjag tóg mǔ,” he tóg. “Ag tǔ ise sór nǔtǐn kǔ tóg inh mǔ tǔ nén ũ tǔ nǔ. Ag tǔ isén sór nǔtǐn kǔ tóg inh mǔ tǔ nén ũ tǔ nǔ gé, ag tǔ Jerusalém tá inh vóg kónǎn sór kǔ, ěg Senhor tǔ Jesus tugnǐn,” he tóg, Paulo tǐ.

¹⁴ Ěg vǐ mǐ jǎvǎnh tóg nǐ. Kǔ ěg tóg vǐ mǎn tǔ nǐ sir. “Jesus tǔ nén han mǔ vǔ tóg há nǐ,” he ěg tóg mǔ sir. ¹⁵ Kar kǔ ěg tóg nén kar kǎn mǔ. Kǔ ěg tóg Jerusalém ra mǔ mǔ. ¹⁶ Cesaréia tá ke ũ ag tóg ěg mré mǔ mǔ gé, Jesus mré ke ũ ag. Ěg mǔ ag tóg ũ ven mǔ, ěg tǔ tǐ ěn krēm nǔtǐ jé. Tǐ jǐji hǎ vǔ: Menasom, he mǔ. Goj vǎso tǔ Chipre tá ke vē. Vǎsǔ tóg Jesus ki rá ja nǐgtǐ. Ěg tǔ tǐ ěn krēm nǔgnǔr ke vē.

Paulo tǔ Tiago mré vēmén

¹⁷ Ěg tǔ Jerusalém tá junjun kǔ Jesus mré ke ag fe tóg mǐn ke mǔ sir.

¹⁸Tỹ vaj k̄y Paulo tóg ěg mré Tiago vėnh tĩ mũ. K̄y kófa ag kar tóg tá vėnh mǎn mũ gé. ¹⁹Ag m̄y tóg: “ǎjag m̄y há?” he mũ. K̄y tóg ag m̄y Topě tỹ nén han kar tugtó mũ. Tugtó kǎn tóg mũ, Topě tỹ fóg kar kr̄in mũ ti, ti tỹ ag m̄y Topě vĩ tón k̄y. ²⁰Ag tỹ mē k̄y ag tóg Topě m̄y vĩ há han mũ. K̄y ag tóg Paulo m̄y: “régre’,” he mũ. “Israel tỹ hén ri ke ag vỹ Jesus ki ge k̄y n̄yti, ũ tỹ mil tỹ hén ri ke ag. Ěn kar tóg Moisés tỹ ěg m̄y vėnh jykre n̄im ja han (ka)mē n̄igtĩ,” he ag tóg. ²¹“Hǎ ra ũ ag tóg ag m̄y ǎ to ón ja n̄igtĩ. ǎ to ag tóg: “Israel kar kr̄in kónǎn tóg tĩ,” he tĩ. “Israel tỹ fóg mĩ mũ kar kr̄in kónǎn tóg tĩ, ag tỹ Moisés tỹ ěg m̄y nén n̄im ja tovǎnh jé,” he ag tóg tĩ ǎ to, ón k̄y. ǎjag krē gré junun fár kym tũg n̄i, he ǎ n̄eji tĩ. Moisés tỹ ěg m̄y nén n̄im ja hǎn mǎn tũg n̄i, he ǎ n̄eji tĩ,” he ag tóg, Paulo m̄y. ²²“K̄y ěg ne han mũ ha?” he ag tóg. “Ũ tỹ hén ri ke ag vỹ vėnh mǎn ke mũ, ag tỹ ǎ k̄atig mēn k̄y,” he ag tóg, Paulo m̄y. ²³“Tag hǎ han jé ǎ tóg ke mũ, ha mē. Ũ tỹ 4 (ke) ag vỹ ki n̄yti ěg mré, Topě m̄y promessa han mũ ag,” he ag tóg. ²⁴“Ag m̄y: “inh mré n̄ytĩmnĩ,” hemnĩ. Ag mré vėnh jǎnhkri han n̄i, ěg jykre ki. Ag tỹ vėjǎrég mũ k̄y ag jo kajǎm n̄i. Hǎ k̄y vėnh kar tóg ǎ jykre ki kanhró n̄yti sir. Ũ ěn ag tỹ ǎ to ón mũ ve jé ag tóg ke mũ, ǎ tỹ Moisés tỹ ěg m̄y nén n̄im ja ěn han k̄y,” he ag tóg mũ, Tiago ag, Paulo m̄y.

²⁵“Jó ěg tóg fóg ag tỹ Jesus ki ge mũ ag m̄y vėnh rá jēnē ja n̄igtĩ, kanhgág ag m̄y ke gé. Ũ tỹ Israel jykre han tũ kar to ěg tóg jykrén, k̄y ěg tóg ag m̄y vėnh rá ěn jēnē ja n̄i. Ag m̄y ěg tóg: Moisés tỹ ěg m̄y nén n̄im ja ěn han ke tũ ǎjag n̄i, he ja n̄igtĩ. ǎjag tỹ nén han ken hǎ vē, ha mē: vėnh kǎggrá to festa ko tũg n̄i, retrato to festa ěn. Nén ũ kyvėnh ko tũg n̄i gé. Nén tỹ vėsóg ki ter ja ěn ko tũg n̄i gé. ǎjag prũ tũ fag mré n̄y tũg n̄i gé, he ja ěg tóg n̄igtĩ ag m̄y, ũ tỹ Israel jykre han tũ ag m̄y,” he ag tóg, kófa ag, Paulo m̄y.

²⁶K̄y Paulo tóg ũ tỹ 4 (ke) ěn ag m̄y: “inh mré n̄ytĩmnĩ,” he mũ, ũ tỹ promessa han mũ ag m̄y. Tỹ vaj k̄y tóg ag mré vėnh jǎnhkri mũ, Israel ag jykre ki. K̄y tóg Topě jo ěn to tĩg k̄y ũ tỹ ki r̄ir tĩ ag m̄y: “ag mré sóg vėnh jǎnhkri mũ,” he mũ sir. Ag m̄y tóg kurǎ n̄im, Paulo ti, ag tỹ kurǎ ěn kǎ Topě m̄y ti tũ pũn jé, ũ tỹ 4 (ke) ag jo, Topě tũ ki r̄ir tĩ ag. Kurǎ ěn to hǎ ag tóg vėnh jǎnhkri tĩ, kurǎ tỹ 7 (ke) ki, promessa han mũ ag.

Ag tỹ Paulo se

²⁷K̄y tóg kurǎ tỹ 7 (ke) ěn tũ ken k̄y Israel tỹ Ásia tá ke ag tóg Topě jo ěn tá ti vėg mũ sir, Paulo ti. K̄y ag tóg vėnh génh mág han mũ. Ti kǎm̄ig ag tóg mũ, k̄y ag tóg pr̄enpr̄er mũ sir. ²⁸“!..Israel kar, kǎmũ jėg ra..!” he ag tóg. “!..Ũ gré ěn ve ra..! !..Ũ tỹ vėnh kar kr̄in kónǎn mũ ěn ve ra..! !..Ěg povo to tóg vĩ kónǎn mo..! !..Moisés tỹ ěg m̄y nén n̄im ja to..! !..Topě jo ěn to tóg vĩ kónǎn mo..! !..K̄y tóg fóg ag m̄y: Topě jo ěn kǎra ge jėg, he ja ne..! !..Hǎ k̄y tóg Topě jo ěn kavėnh mo..!” he ag tóg, pr̄enpr̄er k̄y, Paulo to. ²⁹Fóg tỹ Tróximo ěn ve ja ag tóg n̄igtĩ, Éfeso tá ke ěn, Paulo mré tĩ mũ ěn. Jerusalém tá ag tóg ti ve ja n̄igtĩ, k̄y ag tóg ón k̄y: “Paulo h̄yn ti pére vyr, Topě jo ěn kǎra,” he mũ.

³⁰K̄y cidade ěn tá ke kar ag vỹ vėnh génh mũ sir, jũgũ k̄y. Ag tỹ Paulo kǎgmĩ k̄y ag tóg Topě jo ěn kǎtá ti kutēm mũ. K̄y ũ tỹ ki r̄ir tĩ ag tóg Topě jo ěn n̄igtĩ mũ sir. ³¹K̄y ag tóg ti r̄eg mũ, Paulo ti.

Hǎ ra soldado ag pǎi vỹ mēg mũ, major ti, Jerusalém tá ke kar ag tỹ vėnh génh k̄y. ³²K̄y tóg soldado ag jé pr̄er k̄y, ag pǎi jé pr̄er k̄y tóg ag to pétē mũ. Ag tỹ soldado ag ve k̄y, ag tỹ major ve k̄y ag tóg sir kr̄y he mũ, Paulo r̄en k̄y. ³³Hǎ ra major tóg tá jun mũ. “Ti kǎgmĩ ra,” he tóg, soldado ag m̄y. “Ti se ra, ferro régre tỹ,” he tóg. “Ũ nē?” he tóg. “Ti tỹ ne han nē?” he tóg, vėnh kar m̄y, major ti. ³⁴Hǎ

ra ũ ag tóg ti mý nén ũ tó, ký ũ ag tóg ti mý nén ũ tó, ký tóg ki kanhrân tũ nĩ sir. Ký tóg soldado ag mý: “эг ĩn kăra ti răg,” he mũ.

³⁵ Ag tỹ sânsân he jafă tá junjun ký ag tóg ti văg mũ. Vênh kar tỹ ti to vênh génh ký ag tóg ti văg mũ, ag tỹ ti kă kyn ke jé. ³⁶ Vênh kar tóg ag nón mũ ký: “!..ti rē ra..!” he mũ, prênprēr ký.

Paulo tỹ ag mý vênh kāmén mũ

³⁷ Ag tỹ ĩn kăra ti răg sór ký Paulo tóg major mý: “sỹ ă mré vémén há tóg tĩ,” he mũ. Grego vĩ ki tóg ti mý ke mũ. Fóg tỹ major vê, hă ký tóg Grego vĩ hă tó ti.

³⁸ Ký major tóg ti mý: “ă hă ne tóg Grego vĩ tó há nĩ,” he mũ. “Kỹ ă mý tỹ Egito tá ke ěn tũ nĩ, ũ tỹ kură ěn kă vênh génh han mũ ěn’, ũ tỹ mil tỹ 4 (ke) mré tĩ mũ ěn, governo kato tē mũ ěn ag mré, ěmă tũ mĩ tĩ mũ ěn?” he tóg, Paulo mý, major ti.

³⁹ Ký Paulo tóg ti mý: “hỹ,” he mũ. “Tỹ sóg Israel nĩ,” he tóg. “Tỹ sóg cidade tỹ Tarso tá ke nĩ. Ga tỹ Cilícia tá cidade mág kăfór vê, inh mur ja ti. Isỹ povo tag mré vính há tóg tĩ,” he tóg, Paulo ti, major mý. ⁴⁰ Ký tóg ti mý: “ha vĩ ge,” he mũ.

Ký Paulo tóg sânsân he jafă kri jē ký ag mý ke mũ sir. Hebreu vĩ ki tóg ag mý ke mũ, ký tóg:

22 “inh kanhkă’,” he mũ. “Ijóg’,” he tóg. “Isỹ ajag mý inh jykre kāmén ke vê, ki ěmê,” he tóg ag mý.

² Ký ag tóg ti tỹ Hebreu vĩ ki ag mý vĩ mẽg mũ sir, ký ag tóg katy’ he mũ sir.

³ Ký tóg ag mý: “tỹ sóg Israel nĩ,” he mũ. “Cidade tỹ Tarso tá inh mur, ga tỹ Cilícia tá. Cidade tag ki sóg hă ra mog mũ, ký Gamaliel tóg inh kanhrân. Inh mý tóg ěg jóg’jóg ag jykre tó kăn, ký sóg to tar ja nĩ. Topê jykre to sóg tar tăvĩ ja nĩgtĩ, ajag tỹ ũri han mũ ri kén,” he tóg. “Topê jykre hỹn, he sóg tĩ gé, ěg jykre ěn to, hă ra sóg kygnê. ⁴ Hă ký sóg Jesus

mré mũ ag to jũ tăvĩ ja nĩgtĩ. Ag kăgtén sór ja inh nĩgtĩ, ũn tătă fag ke gé. Ag sigse ja sóg nĩgtĩ, vêse ja kăki sóg ag văm ja nĩgtĩ gé. ⁵ Topê tũ ki rĩr tĩ to pă’i mág vĩ ki kanhró nĩ, kófa ag kar ke gé. Ag hă tóg inh mý permissăo han ja nĩgtĩ, sỹ cidade tỹ Damasco ra tĩg jé, tá ěg mré ke ag mý ven jé. Tá sóg Jesus mré ke ag sigse sór ja nĩ gé, Jerusalém ra ag tatĩ kătĩg jé, tag ki ag vóg kónăn jé,” he tóg, Paulo ti.

Paulo tỹ ă tỹ Jesus ki ră kāmén

(Hk 9.1-19; 26.12-18)

⁶ “Isĩg ký sóg Damasco tá jun mũ. Ký tóg văhă vênh jěngrê tar tăvĩ tóg văhă inh ki kómkóm ke mũ. Kanhkă tá ke vê, vênh jěngrê tag ti. Ră tỹ ěg nĩno kă sa ra tóg ke mũ. ⁷ Ký sóg kutê mũ. Ký sóg vênh vĩ mẽg mũ, ký tóg inh mý: “Saulo’, Saulo’, ă tỹ ne jé isũ ag vóg kónăn nê?” he mũ, vênh vĩ ti. ⁸ Ký sóg ěg Senhor mý: “ă tỹ ũ nê?” he mũ. Ký tóg inh mý: “tỹ sóg Jesus nĩ, Nazarê tá ke ěn,” he mũ, “ă tỹ ũn vóg kónăn sór tĩ ěn hă vĩ tỹ inh nĩ,” he tóg inh mý. ⁹ Inh mré mũ ag vĩ vênh jěngrê ěn vigvêg mũ. Hă ra ag tóg ũ tỹ inh mý vĩ mũ mẽg tũ nĩ.

¹⁰ Ký sóg ěg Senhor ti mý: “kỹ sỹ hê ri kenh ke nê?” he mũ. Ký tóg inh mý: “jêg nê ra,” he mũ. “Damasco ki ră. Tá ũ tóg ă mý tó kăn mũ, ă tỹ nén han ke ti,” he tóg inh mý, vênh vĩ ti. ¹¹ Hă ra sóg nén ũ vэг tũ nĩ, vênh jěngrê ěn tar tăvĩ nĩn ký. Ký inh mré mũ ag tóg inh nĩgê kăgmĩ ký inh péré mũ mũ. Hă ki ěg tóg Damasco tá junjun mũ sir.

¹² Ký ũ tỹ Ananias he mũ ěn tóg inh venh kătĩ mũ. Moisés tỹ ěg mý vênh jykre nĩm ja ěn han kăn tóg nĩgtĩ, Ananias ti. Damasco tá ke kar vĩ ti to vĩ há han mũgtĩ, Israel ěn ag kar. ¹³ ěn tóg inh venh kătĩ mũ, ký tóg iso jun ký inh mý: “régrê’,” he mũ. “Saulo’,” he tóg mũ. “Inh ki ěvăn ra,” he tóg. Ký sóg vêsýmér ti vэг mũ sir. ¹⁴ Ký tóg inh mý: “эг jóg’jóg ag tỹ Topê vĩ ă kuprêg, văsỹ,” he mũ, “ă

tỹ ti jykre ki kanhró nĩ jé, ă tỹ ũn kuryj nĩ ěn ve jé, Cristo ěn. Tĩ hă tóg ă mré vĩnh mũ, he tóg inh mỹ, Ananias ti. ¹⁵“Ă tỹ vėnh kar mỹ ă tỹ nén vég mũ tónh ke vė, ă tỹ nén męg mũ ti,” he tóg inh mỹ. ¹⁶“Kỹ ěmẽ kỹ nĩ tũg nĩ. Jęg nẽ ra, ă tỹ kype kỹ jẽ jé, Topẽ tỹ ă tỹ ti vĩ mranh tỹ tũ’ he jé. Tĩ mré vĩ, ti jiji tó kỹ,” he tóg inh mỹ, Ananias ti,” he tóg, Paulo ti.

Paulo tỹ ă rănhrăj kămén

¹⁷“Isỹ Jerusalém ra vỹn ke kỹ sóg Topẽ jo ĩn krēm ti mré vĩ mũ. Kỹ sóg nén nẽ vég mũ. ¹⁸Tĩ hă vė, ěg Senhor hă vė. Kỹ tóg inh mỹ: “kur Jerusalém tá kutẽ,” he mũ. “Ă vĩ mẽn̄h ke tũ ag nĩ, ă tỹ ag mỹ inh kămén mũ ra,” he tóg inh mỹ.

¹⁹Kỹ sóg ěg Senhor ti mỹ: “hă ra ag tóg isỹ nén han ja ki kanhró nỹti,” he mũ. “Ag sigse han ja isóg tĩgtĩ. Vėnh kanhrăn jafă krēm sóg ag mrănmrăn ja tĩgtĩ gé, ũ tỹ ă ki ge kỹ nỹti ag,” he sóg ti mỹ. ²⁰“Kỹ sóg ag tỹ Estêvão tén kỹ, ag tỹ ũ tỹ ă vĩ tó mũ ěn tén kỹ sóg tá jẽ ja nĩ gé, kỹ tóg inh mỹ há ja tĩ, ag tỹ ti tén kỹ. Ag kur ki sóg rĩr ja nĩgtĩ gé, ũ tỹ Estêvão tén mũ ag kur ki,” he sóg, ěg Senhor mỹ.

²¹Hă ra tóg inh mỹ: “vó, ha tĩg,” he mũ. “Kór há ra sóg ă jẽnẽnh mũ, kuvar há ra. Fóg kar to sóg ă jẽnẽnh mũ, kanhgág kar to ke gé,” he tóg inh mỹ,” he tóg, Paulo ti.

²²Hă ra vėnh kar ěn ag tóg ěmẽ kỹ nỹti nĩ. Ag tỹ ti vĩ tag mẽ kỹ ag tóg prẽnprẽn mũ sir. “!..Tĩ tén ra..!” he ag tóg. “!..Ũ tỹ ge vỹ kórég ne..!” he ag tóg. “!..Tĩ rĩr nĩn kỹ tóg ěg mỹ tỹ ũ nỹnh mo..!” he ag tóg. ²³Prẽnprẽn ag tóg mũ. Ājag kur văm ag tóg mũ, ga funfur han ag tóg mũ sir. Ag jũgũ vė.

²⁴Kỹ major vỹ: “ĩn kăra ti răg,” he mũ. “Nén făr tỹ ti mrănmrăn, cavalo tỹ mrăn ke jafă ri ke ěn tỹ. Hă tỹ ti ki jẽmẽ. Ag tỹ hẽ ri ke jé ă to vĩ kónăn nẽ? hemnĩ ti mỹ,” he tóg, major ti, soldado ag mỹ. Major tóg Paulo tỹ ag mỹ nén tó ja ěn

mẽ ja tũ nĩ, ti tỹ Hebreu ag vĩ ki kagtĩg nĩn kỹ. Hă kỹ tóg soldado ag mỹ: “ti ki jẽmẽ,” he mũ sir.

²⁵Kỹ ag tóg ti ség mũ, nén făr tỹ, ag tỹ ti mrănmrăn jé. Hă ra Paulo tóg capitão mỹ, ũ tỹ tá jẽ ěn mỹ tóg: “mỹ ă mỹ kuryj, ag tỹ inh mrănmrăn ke ti?” he mũ. “Tỹ sóg Romano nĩ, hă ra ag tóg nén făr tỹ inh mrănmrăn sór mũ, ũ tỹ inh ki jẽmẽg tũ ra, ag tỹ inh jyvẽn tũ ra,” he tóg, Paulo ti. ²⁶Kỹ tóg capitão mỹ e tĩ, kỹ tóg major mỹ tónh ti mũ. Tĩ mỹ tóg: “ă tỹ ne han ke nẽ ha?” he mũ. “Romano vẽ mỹr,” he tóg ti mỹ. ²⁷Kỹ major tóg ti to kăti mũ, kỹ tóg ti mỹ: “kỹ ă mỹ tỹ Romano nĩ?” he mũ. Kỹ Paulo tóg: “hỹ,” he mũ. ²⁸Kỹ major tóg ti mỹ: “isỹ tỹ Romano nĩ jé sóg jănkamy tỹ hẽn ri ke tỹ kajăm,” he mũ ti mỹ. Kỹ Paulo tóg ti mỹ: “inh mur kă sóg ge nĩ hă ra, inh panh ri kén,” he mũ. ²⁹Kỹ ag tóg ti tovănh mũ sir, ũ tỹ ti mrănmrăn ke mũ ěn ag. Hă ra tóg major mỹ e tĩ, ti tỹ ti se kỹ. Tĩ tỹ ũn Romano senh ke tũ vė vė, hă kỹ tóg ti mỹ e tĩ.

Israel tỹ pă’i ag tỹ Paulo vĩ męg mũ

³⁰Tỹ vaj kỹ major tóg Israel ag ki jẽmẽ măn sór mũ, ag tỹ hẽ ri ke kỹ Paulo to jũ mũ ti. Kỹ tóg ti kavăn mũ. Kỹ tóg Topẽ tũ ki rĩr tĩ to pă’i mág ag jé prěr mũ, vėnh jyvẽn tĩ kar ag ke gé. Kỹ tóg Paulo pére tĩ mũ, ag jo ti fęg jé.

23 Kỹ Paulo tóg vėnh jyvẽn ti ag vég mũ, kỹ tóg: “inh kanhkă,” he mũ. “Vėnh jykre há kar han isóg nĩgtĩ (mỹr), kură kar ki, ũri ke gé, isỹ Topẽ mĩ ěkrén kỹ,” he tóg.

²Kỹ Topẽ tũ ki rĩr tĩ to pă’i mág tóg ke mũ, ũ tỹ Ananias he mũ ěn vỹ: “tĩ jẽnky ki tăn̄h,” he mũ, ti jy nỹti ag mỹ.

³Kỹ Paulo tóg ti mỹ: “Topẽ vỹ ă tăn̄h ke mũ,” he mũ. “Jykre régre ă nĩ, kỹ ă tóg tỹ ĩn to ró ri ke nĩ. ěg tỹ tinta kupri tỹ to tĩn kỹ ěg tóg ti kórég vég tũ nĩgtĩ, tinta krēm ti kórég ti,” he tóg. “Inh jyvẽn sór ă tóg mũ, Topẽ jykre ki, hă ra ă hă

tóg Topē jykre mranh, ā tỹ ag mỹ: ti tãnh ra, hen kỹ,” he tóg, Paulo ti.

⁴Kỹ tá nỹtĩ ag tóg ti mỹ: “ā hã tóg Topē camarada mỹ vĩ kónãn, Topē tũ ki rĩr tĩ to pã'i mág mỹ,” he mũ, Paulo mỹ. ⁵Kỹ Paulo tóg: “mẽ,” he mũ. “Ti tỹ tỹ pã'i mág nĩn ki sóg kagtĩg ja nĩ, ke tũ nĩ mũ ra sóg ti to vĩ kónãn ja tũ nĩ vễ,” he tóg. “Topē vĩ ki tag tóg rãn kỹ nĩ nĩ, hã vỹ: ā povo tỹ pã'i mág to vĩ kónãn tũg nĩ, he mũ,” he tóg, Paulo ti.

⁶Hã ra Paulo tóg ag vэг mũ, vễnh jyvễn tĩ ag. Ũ ag tóg tỹ Saduceu nỹtĩ, kỹ ũ ag tóg tỹ Fariseu nỹtĩ. Vyrmỹ ag jykre nỹtĩ. Kỹ Paulo tóg jamã hár(a) ke kỹ ag mỹ: “inh kanhkã,” he mũ. “Tỹ sóg Fariseu nĩ, kỹ inh panh tóg tỹ Fariseu nĩ gé,” he tóg. “Topē vỹ ũn ter mũ ag rĩn-rĩn mãn ke mũ. Tag vỹ inh mỹ ki hã ke nĩ, hã kỹ ājag tóg iso jũgũ mũ,” he tóg, Paulo ti.

⁷Ti tỹ tag tó kar kỹ vễnh jyvễn tĩ ag tóg vễnh kápugpów kỹ nỹtĩ. Fariseu ag tóg Saduceu ag mré vĩ jũgũ han mũ, jagně vĩ kafãn kỹ. ⁸Saduceu ag mỹ tóg tũ tĩ, Topē tỹ ẽg ter mũ rĩn mãn mũ ti. Topē tỹ jẽně jafã tóg ag mỹ tũ tĩ gé. Kỹ vễnh kuprĩg tóg ag mỹ tũ tĩ gé. Hã ra Fariseu ag mỹ tóg nỹtĩ, vễnh kuprĩg, Topē tỹ jẽně jafã, ti tỹ ẽg rĩn mãn mũ ke gé. Hã kỹ ag tóg jagně vĩ kafãn mũ sir. ⁹Kỹ ag tóg jagně to jũgũ kỹ prẽnprẽn mũ. Fariseu ag kãmĩ ũ ag tóg jẽg nẽ nẽ kỹ, Saduceu vĩ kafãn kỹ ag tóg: “nén ũ kórég han tũ ti nĩ, Paulo ti,” he mũ. “Hẽn ri ke mũn ti hỹn nẻn nẻ ve ja nĩ, vễnh kuprĩg hẽn ri ke mũn, ke tũ nĩ kỹ Topē tỹ jẽně jafã,” he ag tóg, Fariseu ag, Topē vĩ to professor ag. ¹⁰Kỹ vễnh génh tóg kutě mũ ve nĩ. Kỹ major tóg Paulo to jykrén mũ. “Ag hỹn gen kỹ ti janjãn ke mũ, ti jónjãn kỹ,” he tóg, vễnh génh ven kỹ. Kỹ tóg soldado ag mỹ: “kur mũ jẽg, ti kãgmĩ jẻ, ẽg ỉn kãra ti rãg jẻ,” he mũ, major ti. Kỹ ag tóg ỉn kãra ti rãg mũ.

¹¹Tỹ kutỹ kỹ Jesus tóg Paulo mré vĩ mũ. “Kamẽg tũg ra,” he tóg ti mỹ. “Jerusalém tá ả tóg inh vĩ tó há han. Ge jẻ ả tóg ke mũ, cidade tỹ Roma tá,” he tóg, Paulo mỹ, Jesus ti.

Ag tỹ Paulo tén sór

¹²Tỹ vaj kỹ Israel ag tóg vễnh mãn mũ sir. Jagně mré ag tóg jykrén mũ. “Paulo tén jẻ ẽg tóg ke mũ,” he ag tóg. “Jẻn ke tũ ẽg nĩ, kron ke tũ ẽg nĩ gé, ẽg tỹ Paulo tén ke jo, ke tũ nĩ mũ ra Topē jẻ ẽg vóg kónãn,” he ag tóg. ¹³Ũ tỹ 40 (ke) kãfór vễ, jagně mré jykrén mũ ag. ¹⁴Ễn ag vỹ Topē tũ ki rĩr tĩ to pã'i mág ag mré vễnh kãmũ mũ, kófa ag mrẻ hã. “Jagně mrẻ ẽg jykrén,” he ag tóg. “Nẻn ũ kãmẻnh ke tũ ẽg nĩ, ẽg tỹ Paulo tén ke jo, ke tũ nĩ mũ ra Topē jẻ ẽg vóg kónãn,” he ag tóg. ¹⁵“Kỹ major mrẻ vễnh mũmĩ. Vễnh jyvễn tĩ ag mrẻ mũmĩ, ājag tỹ ti mrẻ vĩ jẻ. Ti mỹ: ẽg tỹ ti tỹ nẻn ũ kórẻg han mũ to jykrén mãn ke vễ, hemnĩ, hã to ẽg mỹ ti ven mãn nĩ, hemnĩ ti mỹ. Ti tỹ: hej, hen kỹ ẽg tóg ti tẻn ke mũ, kỹ tóg ājag to jun ke tũ nĩ,” he ag tóg, pã'i ag mỹ.

¹⁶Hã ra Paulo ve fi kósĩn tóg ag tỹ han sór mũ ẻn mẻg mũ. Kỹ tóg soldado jo ỉn kãra rã kỹ Paulo mỹ tó mũ. ¹⁷Kỹ Paulo tóg capitão ũ jẻ prẻr kỹ ti mỹ: “major mỹ kyrũ tag pẻre tĩg, ti tỹ ti mỹ nẻn ũ tó jẻ,” he mũ ti mỹ.

¹⁸Kỹ tóg ti pẻre tĩ mũ sir, major to. Kỹ tóg ti mỹ: “ũ se kỹ jẻ ẻn tóg, Paulo ẻn tóg inh jẻ prẻr,” he mũ, “kỹ tóg inh mỹ: “kyrũ tag tỹ major mỹ ti pẻre tĩg,” he mũ. Ti tỹ nẻjĩ ả mrẻ vĩ sór nẻ,” he tóg, capitão ti.

¹⁹Kỹ major tóg ti nĩgẻ kãgmĩ kỹ ti pẻre tĩ mũ, vễnh pẻju kỹ. Kỹ tóg ti mỹ: “ả hẻ ri kẻ?” he mũ.

²⁰Kỹ tóg ti mỹ: “Israel ag tóg to jykrén, ag tỹ ả mỹ to vĩ jẻ, ả tỹ vaj kỹ Paulo jẻnẻ jẻ, vễnh jyvễn tĩ ag to. Ốn kỹ ag tóg ả mỹ: “ti ve mãn jẻ ẽg tóg ke mũ, ẽg tỹ ti to jykrén mãn jẻ,” hẻnh ke mũ. Hã ra

ag ón vē,” he tóg, major mý. ²¹ “Ag mý: hej, he tūg nī. Ū tý 49 (ke) ag tóg, ti jo vājig mū. Jagnē mré ag jykrén, ag tý nén ū konh ke tū nī jé, kron ke tū nī jé, ti tén ken jo. “Ke tū nī mū ra Topē jé ēg vóg kónān,” he ag tóg. Ēn ag tóg ā tý ag mý: hej, henh ke jāvānh mū sir,” he tóg, kyrū ti, major mý.

²² Ký major tóg ti mý: “ū mý: ti mý sóg tó, he tūg nī,” he mū. “Ha jatun mý tíg,” he tóg ti mý.

Major tý Paulo jēnēnh ke, pā'i mág tý governador ra

²³ Ký major tóg capitão régre ag mý: “kāmū jēg ra,” he mū. Ký tóg ag mý: “ājag tū kānkān ra,” he mū. “Cidade tý Cesaréia ra ājag mūnh mū, kuty tag kā 9 horas ki. Ký soldado tý 200 (ke) ag vý mūnh mū, cavalo kri mū ag tý 70 (ke) ag ke gé, ký ū tý 200 (ke) ū ag vý rógro pu gég mūnh mū,” he tóg. ²⁴ “Ký cavalo ū ag vý mūnh ke mū gé, Paulo tý kri nī jé. Governador tý Félix to ti pére mū jēg, ti tý jatun mý tá jun jé,” he tóg, major ti, capitão ag mý.

²⁵ Ký tóg pā'i mág tý Félix mý rán mū, major ti, ký tóg:

²⁶ “Cláudio Lísias tý rá vé,” he mū. “Isý Governador tý Félix mý rán hā vé, ā tý inh kāfór nūn ký. Ā mý sóg: ā mý há? he mū,” he tóg.

²⁷ “Tag vý tý Israel ag vēse jē. Ti tén kren ag tóg. Hā ra sóg ti tý tý Romano nī jēmē, ký sóg inh soldado ag mré ti kren han. ²⁸ Hā ra sóg ti kato tē mū ag ki jēmē sór mū. Ag tý hē ri ke jé ti to jūgū nē? he sóg. Hā ký sóg vēnh jyvēn tī ag mý ti ven mū. ²⁹ Ký sóg vég mū. Ag jykre tugrīn ag tóg ti to jūgū mū. Crime han tū ti nī. Ti tý nén ū to ter jé han tū ti nī gé. Ký tóg ti tý nén ū to se ký ný jé tóg han tū nī gé. ³⁰ Hā ra sóg nén ū mē gé. Ti to ag tóg vājig mū sir, hā ký sóg vēsýmér ti jēnēg mū ā to. Ti kato vī mū ag mý sóg: ti hā mré vīmī, he mū gé,” he tóg.

Vēnh rá ki tóg tó ja nī, major ti, governador mý.

³¹ Ký soldado ag tóg han mū sir, ti tý ag mý nén tó mū ti. Paulo pére ag tóg mū mū. Kuty tá mū ký ag tóg cidade tý Antipátride tá junjun mū. ³² Tý vaj ký ag tóg kyrāgrā mū, ājag jamā ra, ū tý ājag pēn kā mū mū ag. Cavalo kri mū ag tóg ti pére mū mū inhā. ³³ Ēn ag vý Cesaréia tá junjun mū. Governador mý ag tóg vēnh rá ěn nīm mū. Ký ag tóg ti mý Paulo ven mū.

³⁴ Ký pā'i mág ěn tóg vēnh rá vég mū, ký tóg Paulo mý: “tý ā ga tý hē tá ke nī, ga tý ne tá?” he mū. Ký tóg ti mý: “ga tý Cilícia tá,” he mū. ³⁵ Ký tóg Paulo mý: “ā kato vī mū ag tý junjun ký sóg ā ki jēmēnh mū,” he mū. Ký tóg soldado ag mý: “pā'i mág tý Herodes tý vēnh jyvēn jafā krēm ti nīm,” he mū, pā'i mág tý Félix ti.

Ag tý Paulo kato vī

24 ⁵ dias tūg ký pā'i tý Ananias vý tá jun mū, cidade tý Cesaréia tá. Topē tū ki rīr tī to pā'i mág vē. Kófa ag vý junjun mū gé ti mré. Ū vý vī kāfór han tī gé, ti jiji hā vý: Tértulo, he mū. Ký ag tóg pā'i mág tý governador mý Paulo tó mū, ón ký ti kato vī ký. ² Ký tóg Paulo jé prēr mū.

Ký Tértulo tóg ti kato vī mū, ký tóg: “Félix,” he mū. “Hā tāvī ā tóg jē,” he tóg ti mý. “Ēg ki ā tóg rīr há tāvī han tī, ký ěg tóg jatun mý nýtī. Ā tý nén to jykrén mū kar tóg ěg mý há tī,” he tóg, Félix mý. ³ “Hā ký ěg tóg ā to há (pē) tāvī nýtī. Ā to ěg jykrén há han tī. Kurā kar ki ěg tóg ā to vī há han tī,” he tóg. ⁴ “Ký ěg tóg ā mré nén ū sī (pē) to vīnh kāmū mū. Kutar ā nī, ěg ki rīr há han ký, hā ký ěg tóg ā mý vī mág han sór tū nī. Ēg to ā há nī, hā ký ā tóg ěg vī mē sór mū,” he tóg.

⁵ “Tag ti vý vī kónān tāvī han tī. Israel kar ag krīn kónān tóg tī, ký ag tóg tī tugrīn vēnh kápugpóv ký nýtī. Ga kar mī

tóg ke tĩ. Kĩ tóg tỹ Nazaré tá ke ěn mré ke ag pā'i mág nĩ gé," he tóg. Paulo to tóg ke mũ. ⁶ "Kĩ tóg Topē jo ĩn kǎvénh sór mũ gé, hǎ kĩ ěg tóg ti kǎgmĩ. ěg tỹ ěg jykre ki ti jyvĕn ke vĕ vĕ. ⁷ Hǎ ra Lísias tóg kǎti mũ, major ěn ti. Kĩ tóg ti kǎgmĩg mũ. ěg kuju ki tóg ti tỹ hǎn ke mũ, jũ kĩ. ⁸ Kĩ tóg ti kato vĩ mũ ag mĩ ké, ag tỹ ǎ venh kǎmũ jé. ǎ tỹ vĕse tag ti ki jĕmĕ kĩ ǎ tóg venh mũ. Ki hǎ ěg tóg ke ti. ǎ mĩ ti tónh mũ," he tóg, Tértulo ti. Ti tỹ Paulo to ón hǎ vĕ.

⁹ Kĩ Israel ag tóg ti mré tó mũ gé, pā'i ěn ag. "Ti tỹ ki hǎ ke vĕ," he ag tóg, Tértulo to.

Paulo tỹ vĕnh kǎmĕn

¹⁰ Kĩ governador tóg Paulo mĩ ǎ nĩgĕ tỹ ven mũ, Paulo vĩ jé. Kĩ Paulo tóg: "prỹg tỹ hĕn ri ke ki ǎ tóg tỹ pā'i mág nĩ, Israel ag mĩ," he mũ. "Hǎ kĩ tóg sỹ ǎ mĩ ĩnh jykre tón kĩ tóg ĩnh mĩ sér tĩ," he tóg.

¹¹ "Kurǎ tỹ 12 pǎtĕn tũ tóg nĩ, sỹ Jerusalém tá jun ti. Sỹ tá Topē tũ han jé sóg ra tĩg ja nĩgtĩ. Vĕnh kar vỹ tá ĩnh ve ja nĩgtĩ. Ag hỹn ǎ mĩ tónh mũ, ǎ tỹ ag ki jĕmĕn kĩ," he tóg. ¹² "Hǎ ra sóg jatun mĩ isũ han tĩ ja nĩ. Topē jo ĩn krĕm sóg ũ vĩ kafǎn ja tũ nĩ. Vĕnh génh han ja tũ sóg nĩ gé, ěg vĕnh kanhrǎn jafǎ krĕm. Cidade ki sóg nĕn ũ kórĕg han ja tũ nĩ gé," he tóg. ¹³ "Ag tỹ ĩnh kato vĩ mũ pi(jé) tỹ ki hǎ ke nĩ. ǎ tỹ ve hǎ nĩn kĩ ǎ tóg ki kanhró nĩnh mũ," he tóg. ¹⁴ "Kĩ sóg ǎ mĩ ki hǎ tónh mũ ha," he tóg. "Ĩnh jóg'jóg ag tỹ Topē jykre han tĩ ěn hǎ han isóg tĩ gé, kĩ sóg vǎsỹ nĕn rán kĩ nĩ ěn kri fig tĩ gé, ũ tỹ Topē vĩ tó tĩ ag tỹ nĕn rán ja ěn ti, Moisés mré hǎ. Hǎ ra sóg vĕnh jykre tǎg tag han mũ gé, Topē tỹ ũri ěg mĩ nĕn tó mũ ti. Tag to ag tóg: "vyr mĩ vĕnh jykre vĕ," he tĩ, pā'i ag. ¹⁵ Hǎ ra sóg ag ri kĕn Topē tỹ nĕn han ke ěn ve sór mũ. Ti tỹ ěg ter kar kĩ ěg rĩn mǎn ěn ve sór isóg mũ. Ũn jykre kuryj ag rĩn mǎn jé tóg ke mũ, ũn

jykre pǎno ag ke gé," he tóg. ¹⁶ "Kĩ sóg tĩg hǎ han sór mũ (mỹr), ũ tỹ iso: nĕn ũ kórĕg han ti huri, he tũ nĩn jé," he tóg. "Topē rĩnve sóg tĩg hǎ han sór mũ," he tóg.

¹⁷ "Vǎhǎ sóg Jerusalém tá jun mǎn. Prỹg tỹ hĕn ri ke ki sóg tá jun ja tũ nĩ vĕ. Hǎ ra sóg ra vyr, sỹ ĩnh povo ki ũn jagǎgtar fag mĩ nĕn ũ vĩn jé, sỹ Topē mĩ nĕn ũ pũn jé gé," he tóg. ¹⁸ "Vĕnh jǎnhkriag ja sóg nĩ, ěg jykre ki. Kĩ sóg Topē jo ĩn kǎra rǎ ja nĩ, jatun mĩ, vĕnh génh han tũ kĩ. ¹⁹ Hǎ ra Israel ag tỹ ǎsia tá ke ag vỹ tá ĩnh ve ja nĩgtĩ gé," he tóg. "Ěn ag tỹ ǎ jo nỹtĩn kĩ, ag tỹ ĩnh kato vĩ kĩ tóg hǎ tĩ vĕ, ag tỹ iso jykren mũ ra, ag tỹ iso jũ mũ ra," he tóg. ²⁰ "Hǎ ra ũ tỹ ki nỹtĩ ag tỹ ǎ mĩ ĩnh jykre kórĕg tónh ke vĕ. Vĕnh jyvĕn tĩ ag vỹ ĩnh ki jĕmĕ ja nĩ, kĩ tag ag vỹ tá nỹtĩ ja nĩ. Hǎ ra ag tóg tá isỹ nĕn ũ vĕnhmỹ han ve ja tũ nĩ," he tóg. ²¹ "Vĕnh vĩ pir tỹ sóg jamǎ hár(a) tó ja nĩ, isỹ ag rĩnve jĕn kĩ, hǎ vỹ: Topē tỹ ũn ter mũ rĩn mǎn mũ ěn kri sóg fig mũ, hǎ kĩ ǎjag tóg ũri iso jũgũ mũ, he ja sóg nĩ ag mĩ," he tóg, Paulo ti.

²² Kĩ Félix tóg kurǎ ũ kǎ ti ve mǎn sór mũ, pā'i mág tỹ governador ěn ti. Jesus japry ki kanhró tóg nĩ, Jesus jamĩn ki, ti jykre ki, Félix ti. Hǎ kĩ tóg: "major tỹ Lísias kǎtig kĩ sóg ǎjag ki jĕmĕ kǎn mũ," he mũ. ²³ Kĩ tóg kapitǎo mĩ: "tĩ fĕg han ra," he mũ. "Ti jagǎgtǎn ra hǎ ra," he tóg. "Ti mré ke ag tỹ ti mĩ nĕn ũ nĩm sór kĩ tóg hǎ nĩ. Ag mĩ nenh tũg nĩ," he tóg, kapitǎo mĩ, Félix ti. Ti tỹ Paulo to ken hǎ vĕ.

Félix tỹ Paulo ki jĕmĕ mǎn

²⁴ Si hǎ tũ ra Félix vỹ Paulo vĩ mĕ mǎn sór mũ, ti prũ fi mré. Fi jyyj hǎ vỹ: Drusila, he mũ. Israel fi vĕ. Kĩ tóg Paulo jé prĕr mũ sir, Félix ti, ti tỹ fag mĩ Jesus Cristo ki rǎ kǎmĕn jé.

²⁵ Kĩ Paulo tóg vĕnh jykre kuryj kǎmĕn mũ sir. Vĕso jykren ke kǎmĕn tóg

mũ. Topē tỹ kar kỹ vênh kar tỹ nén han mũ tó tóg mũ. Kỹ Félix tóg ã kanē tỹ jūrūn' ke mũ sir, ti tỹ ã jykre pāno mĩ ēkrén kỹ. Kỹ tóg ti mỹ: “ha ver tĩg,” he mũ. “Kejēn sóg ã ki jēmē mǎn mũ gé, kar kỹ, inh kutar tũ nĩn kỹ,” he tóg. Félix ti, Paulo mỹ. ²⁶ Hã ra tóg Paulo ki jǎnkamy mǎn sór mũ gé, ti tỹ ti kavǎn jé, ti tỹ ti kyvǎn jé. Hã jé tóg kǎnhmar ti jé prēr mǎn', kǎnhmar ti jé prēr mǎn' he tĩ, ti mré vēmén jé. Hã ra Paulo tóg ti mỹ ven tũg.

²⁷ Hã ki prỹg régre tóg tũg mũ sir. Kỹ Félix jēgja kǎ ù tóg jē mũ sir, hã vỹ: Pórcio Festo, he mũ. Kỹ Félix tóg Israel ag tỹ ã to vĩ há han sór mũ, ag tỹ ti tỹ jykrén há han jé, ti nón. Hã kỹ tóg Paulo kavǎg tũ nĩ. Se kỹ tóg jē nĩ.

Paulo tỹ pǎi mág tỹ Imperador ve sór

25 Hã kỹ Festo vỹ tỹ governador nĩ sir. Ti tỹ 3 (ke) dias ěn kǎ pǎi mág nĩn kỹ tóg cidade tỹ Cesaréia tá kutē kỹ cidade tỹ Jerusalém ra tĩ mũ. ² Kỹ Topē tũ ki rĩr tĩ to pǎi mág ag vỹ Israel há ag mré vĩ mág han mũ, Paulo kato. Kỹ ag tóg governador mỹ nén ù to vĩ mũ. ³ “A tỹ ěg to há nĩn kỹ vênh vĩ jēnēmni, Paulo tỹ Jerusalém mĩ kǎtĩg jé, ěg mĩ,” he ag tóg ti mỹ. Hã ra ag tóg ti kǎtĩg kỹ ti tén sór mũ, ěpry kri, ěmĩn kri.

⁴ Hã ra Festo tóg ag mỹ: “Cesaréia tá tóg se kỹ jē, Paulo ti,” he mũ. “Jó sóg kǎnhmar ra tĩg mũ gé,” he tóg. ⁵ “Kỹ ājag pǎi ag vỹ inh mré mũnh mũ gé. Tá sóg ājag mré ti venh mũ, ti tỹ hēn ri ke mũn nén ù kórég han ja ěn ti,” he tóg. ⁶ Kỹ tóg tá nĩ sĩ han mũ sir, 8 (ke) dias hỹn hēn ri ke mũn, ke tũ nĩ kỹ 10 (ke) dias hỹn. Kỹ tóg Cesaréia ra vỹn ke mǎn mũ. Tỹ vaj kỹ tóg ã tỹ kri nĩn kỹ ag jyvén jǎfǎ kri nĩ mũ. Kỹ tóg soldado mỹ: “Paulo pére kǎtĩ,” he mũ. ⁷ Ti kǎtĩg kỹ Israel ag tóg ti jy nỹtĩ, Jerusalém tá kǎmũ ag. Paulo kato ag tóg vỹ tỹ hēn ri ke han mũ. Ti

jykre pāno tugtó ag tóg mũ sir, ón kỹ, hã ra tóg ag mỹ ki krov tũ nĩ.

⁸ Kỹ Paulo tóg vênh kǎmén mũ sir, kỹ tóg: “Israel ag jykre mranh ja tũ sóg nĩ,” he mũ. “Topē jo ĩn kavénh ja tũ sóg nĩ gé. Kỹ sóg ěg kar pǎi mág tỹ Imperador vĩ mranh ja tũ nĩ gé,” he tóg, Paulo ti.

⁹ Hã ra Festo tóg Israel ag mỹ nén ù há han sór mũ. Hã kỹ tóg Paulo mỹ: “mỹ ã tỹ Jerusalém ra tĩg jé há?” he mũ. “Sỹ tá ã jykre venh há tóg tĩ, ag tỹ ã kato vĩ ti,” he tóg, Festo ti.

¹⁰ Hã ra tóg Paulo mỹ ag tỹ tá ti tén ha mē tĩ, hã kỹ tóg: “ne jé,” he mũ. “Ěg pǎi mág tỹ Imperador jēgja kǎ ã tóg inh ki jēmēg mũ,” he tóg. “Hã kỹ ã tỹ tag ki inh jykre venh ke vē,” he tóg. “Israel ag to sóg jykre pāno han ja tũ nĩ (mỹr). Kỹ ã tóg ki kanhró nĩ (mỹr), ha mē,” he tóg. ¹¹ “Isỹ crime han ra isỹ to ter ke vē vē. Kỹ sóg ne tónh ke tũ nĩ vē. Hã ra ag tóg ón kỹ inh kato vĩ mũ sir. Hã kỹ tóg ã tỹ ag mỹ inh fēg kỹ vênhmỹ tĩ. Ā tỹ ag mỹ nén há han sór vē (mỹr), hã kỹ ã tóg ag mỹ ke mũ. Ěg pǎi tỹ Imperador hã tóg ã pin kỹ inh jykre venh ke mũ,” he tóg, Paulo ti.

¹² Kỹ Festo tóg ã mré jykrén mũ ag mré vĩ mũ, kỹ tóg Paulo mỹ: “ã tỹ Imperador ve sór kỹ ã tóg Imperador venh tĩg mũ, cidade tỹ Roma ra,” he mũ, Paulo mỹ.

Pǎi tỹ Agripa tỹ Paulo mré vĩ

¹³ Si há tũ ra Israel ag pǎi mág tỹ Agripa vỹ cidade tỹ Cesaréia tá jun mũ, ti prũ tỹ Berenice fi mré. Fag tỹ Festo to pygsa ke vē. ¹⁴ Tá fag tóg kurǎ pir tũg mũ. Kỹ Festo tóg ti mỹ Paulo kǎmén mũ. Kỹ tóg ti mỹ: “Félix vỹ vēsē ù kavǎn ja tũ nĩ,” he mũ. ¹⁵ “Kỹ Topē tũ ki rĩr tĩ to pǎi mág ag tóg inh mỹ ti kǎmén, Israel ag kófa ag ke gé. Jerusalém tá ag tóg inh mré ti kato vĩ, isỹ ag mỹ: té, ha ti vóg kónǎn, he jé,” he tóg. ¹⁶ “Kỹ sóg ag mỹ: ěg jykre tóg ge tũ nĩ, he mũ. Ěg pi(jé): ti tén ra, henh mũ', kǎnhmar', he sóg. Ti

kato vī mū ag tỹ ti kato nỹtĩn kỹ tóg vẽnħ kāmén tĩ, vẽnħ ti. Kar ěg tóg ti vóg kónān tĩ sir. Romano jyken hā vẽn, he sóg ag mỹ, he tóg Festo ti. ¹⁷“Hā kỹ ag tóg tag ki vẽnħ mǎn mū. Kỹ sóg vẽnšmēr ag vэг mū, tỹ vaj kỹ. Inh nĩg jafā kri nĩ kỹ sóg Paulo jé prēr mū,” he tóg. ¹⁸“Kỹ ag tóg ti kato vī mū. Hā ra ag tóg isỹ nén to jykrén mū tó tũ nĩgtĩ (mỹr), ti jykre kórég ti,” he tóg. ¹⁹“Ag Topē jykre tó ag tóg mū. Ũn ter mū tó ag tóg mū, ag tỹ ũn to: Jesus, he mū ěn ti. Hā ra Paulo tóg ti to: rĩr ti jē nĩ, he mū,” he tóg. ²⁰“Kỹ sỹ ne to jykrén ke tóg tũ tĩ inh mỹ. Kỹ sóg Paulo mỹ: ā mỹ Jerusalém ra tĩg ke tũ nĩ? he mū. Tá ag tóg ā jyvẽn hā han mū sir, he sóg ti mỹ,” he tóg. ²¹“Hā ra Paulo tóg ěg pā'i mág tỹ Imperador ve sór mū, ti tỹ ti jykre ve jé. Hā kỹ sóg soldado ag mỹ: ti fęg han ra, he mū. Kejēn sóg Imperador ra ti jēnēnħ mū, he sóg ag mỹ,” he tóg, Festo ti, pā'i tỹ Agripa mỹ.

²²Kỹ Agripa vỹ Festo mỹ: “sỹ ti vỹ mēnħ hā tóg ti,” he mū.

Kỹ Festo tóg: “vaj kỹ ā tóg ti vỹ mēnħ mū,” he mū

²³Tỹ vaj kỹ Agripa vỹ kātĩ mū, Berenice fi mré. Kur sĩnvĩ rĩnħ kỹ fag nỹtĩ, pā'i mág kur ti. Tenente ag mré fag tóg kāmū mū, ũn kǎfór ag mré ke gé, cidade ěn tá ke ag. Ĩn mág kǎra ag tóg ge mū. Kỹ Festo tóg Paulo jé prēr mū sir. Kỹ ag tóg ti pére kāmū mū.

²⁴Kỹ Festo vỹ: “pā'i tỹ Agripa',” he mū. “Tag ki ke kar',” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vĩ. Tag ki ag tóg inh mré vĩ mū gé ti to. Prēnprēr ag tóg, ti ter jé,” he tóg. ²⁵“Hā ra sóg vэг mū. Nén ũ vẽnħmỹ han tũ tóg nĩ, ti tỹ to ter jé. Kỹ tóg pā'i mág tỹ Imperador ve sór mū, hā kỹ sóg to jykrén mū. Sỹ ti jēnēnħ ke vẽn,” he tóg. ²⁶“Hā ra sóg ti to nén rán ke ki kagtĩg nĩ ver, sỹ Imperador mỹ nén rán jé. Hā kỹ sóg ti jé prēr, ājag tỹ ti ve jé, ā tỹ ti ve jé, pā'i tỹ Agripa',” he tóg. “Ājag tỹ ti ki

jēmē kỹ sóg sỹ nén rán ke ki kanhró nĩnħ mū,” he tóg. ²⁷“Sỹ nén rán tũ ra ti jēnē kỹ tóg vẽnħmỹ nỹnħ mū, sỹ ag tỹ ti kato nén tó mū ěn rán tũ ra,” he tóg, Festo ti.

Paulo tỹ vẽnħ kāmén mǎn

26 Kỹ Agripa vỹ Paulo mỹ: “ā tỹ vẽnħ kāmén kỹ tóg há tĩ,” he mū. Kỹ Paulo tóg ā nĩgē tỹ kryg he mū, kỹ tóg: “pā'i Agripa',” he mū. ²“Ā hā ne tóg Israel jykre kar ki kanhró nĩ. Hā kỹ tóg inh mỹ há tĩ, sỹ ũri ā jy vỹ kỹ,” he tóg. ³“Israel ag tỹ inh kato vĩ mū to sóg kāmén kǎn sór mū ā mỹ,” he tóg. “Hā kỹ jatun mỹ inh vỹ jēmēmñĩ,” he tóg.

⁴“Israel kar vỹ inh ki kanhró nỹtĩ, vāsỹ, isĩ kǎ, isỹ inh mur ja tá nĩn kǎ, isỹ kar kỹ Jerusalém tá nĩn kỹ ke gé,” he tóg.

⁵“Isĩ kǎ sóg ěg jykre han kǎn mū, tag ki kanhró ag nỹtĩ, ag tỹ tó sór kỹ,” he tóg. “Tỹ sóg Fariseu nĩ (mỹr), jó Fariseu ag vỹ ěg jykre kar to tar nỹtĩ (mỹr),” he tóg.

⁶“Hā ra ag tóg inh kato vĩ mū. Topē vỹ ěg jóg'jóg ag mỹ: “rĩr mǎn jé ājag tóg ke mū, ājag ter kỹ,” he ja nĩgtĩ. Tĩ vỹ tag kri sóg fig mū, hā kỹ ag tóg inh kato vĩ mū,” he tóg. ⁷“Povo tỹ 12 (ke) vỹ tỹ ěg nỹtĩ. ěg kar vỹ Topē jykre hyn han tĩ, kuty ki, kurā ki ke gé. ěg tỹ ter kar rĩr mǎn jé, hā jé ěg tóg ke tĩ, hā jé ěg tóg Topē jykre han tĩ, pā'i tỹ Agripa',” he tóg. “Sỹ Topē tỹ ěg mỹ tag tó kri fi kỹ Israel ag tóg inh kato vĩ mū,” he tóg. ⁸“Mỹ ājag mỹ vẽnħmỹ, Topē tỹ ũn ter kar rĩn mǎn ke ti?” he tóg. “Vẽnħmỹ ke tũg nĩ,” he tóg, Paulo ti.

⁹“Hā ra sóg vāsỹ Jesus kato tē ja nĩ gé. Nazaré tá ke ěn mré ke ag vóg kónān jagy han ja sóg nĩ vẽn, vāsỹ,” he tóg.

¹⁰“Jerusalém tá sóg ke ja nĩgtĩ. Jesus tũ ag sigse ja sóg nĩgtĩ gé. Topē tũ ki rĩr tĩ to pā'i mág ag vỹ inh mỹ tag to permis-são han ja nĩgtĩ gé,” he tóg. “Ag tỹ Jesus mré ke ag kāmĩ ũ tén kỹ tóg inh mỹ há ja tĩgtĩ gé,” he tóg. ¹¹“ěg vẽnħ kanhrān jafā krēm isóg ag vóg kónān ja nĩgtĩ gé,

ag tỹ Jesus ki ge tag tovānh jé, ag tỹ ti mỹ vĩ kónān jé. Ag to sóg jũ tǎvĩ ja nĩgtĩ gé, inh fe tỹ gỹm ken kỹ. Kỹ sóg cidade ũ ra ag nón tĩg ja nĩgtĩ gé, ag vóg kónān jé,” he tóg.

Paulo tỹ ă tỹ Jesus ki rǎ kǎmén

(Hk 9.1-19; 22.6-16)

¹²“Hǎ kỹ sóg cidade tỹ Damasco ra tĩg ja nĩ gé. Topẽ tũ ki rĩr tĩ to pǎi mág ag vĩ inh mỹ permissão han ja nĩgtĩ, inh mỹ: ha tĩg, hen kỹ. ¹³Ēpry jagma sóg meio dia ki jēngrē tar vé, kanhkā tá. Rǎ kǎfór vē, ha mē, pǎi,” he tóg. “Jēngrē ěn vĩ inh ki kómkóm ké, inh mré mũ ag ki ke gé. ¹⁴Kỹ ěg kar vĩ vǎr mũ, ga kri. Kỹ sóg vēnh vĩ mē. Inh mré tóg vĩ, Hebreu vĩ ki, kỹ tóg inh mỹ: “Saulo’, Saulo’,” he mũ. “Ă hǎ ne tóg isũ ag vóg kónān nĩ,” he tóg inh mỹ. “Ă vóg isóg mũ, ka junun kri ferro ěn tỹ, monh vóg jafǎ ěn tỹ. Kỹ tóg ă tỹ inh kato nig kỹ, ă tỹ ka kato vāsān kỹ tóg kaga mág tĩnh mũ,” he tóg inh mỹ, vēnh vĩ tĩ,” he tóg, Paulo ti.

¹⁵“Kỹ sóg ěg Senhor mỹ: “ă tỹ ũ nē?” he mũ. Kỹ tóg inh mỹ: “tỹ sóg Jesus nĩ,” he mũ. “Ă tỹ ũn vóg kónān sór tĩ ěn vĩ tỹ inh nĩ,” he tóg inh mỹ. ¹⁶“Jēg ra, vēnh rǎ hǎ jēg,” he tóg. “Ă mỹ sóg vēnh ven, ă tỹ isũ han jé, ă tỹ nén vég mũ tag tó jé. Ă mỹ sóg vēnh ven mǎn ke mũ gé, kejēn. Tag kar tó jé ă tóg ke mũ,” he tóg inh mỹ. ¹⁷“Ă povo mỹ sóg ă jēnēnh mũ, fóg kar ag mỹ ke gé, kanhgág kar ag mỹ ke gé. Hǎ ra sóg ă jy nĩgān mũ,” he tóg inh mỹ. ¹⁸“Ag kanē nugnón sór inh mũ (mỹr). Ag tỹ vēnh jykre pǎno han kỹ tóg ag kǎki kuty nĩ sir, hǎ ra sóg ag kǎki jēngrē han sór mũ. Satanás krēm ag nỹtĩ, Japo krēm. Hǎ ra sóg ag kygvān sór mũ, ag tỹ inh jykre han jé. Ag tỹ inh vĩ mranh tỹ sóg vēnh pǎte fón sór ke mũ (mỹr), ag tỹ ũ tỹ inh ki ge kỹ nỹtĩ ag mré kanhkā tá nỹtĩnh ken jé, isỹ ũn kuprēg kar ag mré hǎ,” he tóg inh mỹ, Jesus ti,” he tóg, Paulo ti.

Paulo tỹ ă rǎnhrǎj kǎmén

¹⁹“Kỹ sóg ti vĩ mranh tũ nĩ, pǎi tỹ Agripa’,” he tóg. “Kanhkā tá nĩ kỹ tóg inh mré vĩ ja nĩ, Jesus ti, kỹ sóg ti vĩ han. ²⁰Damasco tá ke ag mỹ sóg tó vén, kar Jerusalém tá ke ag mỹ ke gé, ga tỹ Judéia tá ke ag kar mỹ ke gé. Israel kar ag mỹ sóg tó mũ, kar sóg fóg ag mỹ tó mũ gé sir, kanhgág ag mỹ ke gé. Ag mỹ sóg tó, ag tỹ ăjag jykre tovānh jé, ag tỹ Topẽ jykre han jé sir, ag tỹ vēnh jykre kuryj han jé, vēnh kar tỹ ag tỹ ăjag jykre tovānh ve jé,” he tóg, Paulo ti.

²¹“Isỹ tag han to Israel ag tóg Topẽ jo ĩn krēm inh kǎgmĩ ja nĩgtĩ, isén jé,” he tóg. ²²“Hǎ ra Topẽ tóg inh jy nĩgān mũ. Hǎ kỹ sóg ũri jē mũ. Tĩ vĩ tó inh mũ (mỹr), ũn mág ag mỹ, ũn kāsir ag mỹ ke gé. Vāsỹ Topẽ vĩ tó tĩ ag tóg tó ja nĩgtĩ, isỹ nén tó mũ tag, Moisés mré hǎ,” he tóg. ²³“Cristo jagtar ke tó ja ag tóg nĩgtĩ. Ă ter kar rĩr vén ke tĩ, ěg jo, he ja ag tóg nĩgtĩ, Cristo to. Kỹ tóg ěg povo mỹ jēngrēg tĩ ěn ri ke nĩ sir, fóg kar ag mỹ ke gé, kanhgág kar ag mỹ ke gé,” he tóg, Paulo ti.

²⁴Paulo tỹ gen kỹ tóg Festo mỹ e tĩ sir, Paulo tỹ vēnh kǎmén kỹ. Kỹ Festo tóg jamǎ hǎr(a): “krĩ tũ ă nĩ, Paulo’,” he mũ. “Ă tỹ vēnh rá ve mág kỹ tóg ă krĩ tũ (pē) tĩ,” he tóg, Festo ti.

²⁵Hǎ ra tóg ti mỹ: “inh krĩ vĩ há nĩ, Festo’,” he mũ. “Hǎ tǎvĩ ă jē nĩ vĩ,” he tóg ti mỹ. “Hǎ ra sóg ki hǎ tó mũ (mỹr), to jykrén há han kỹ,” he tóg. ²⁶“Tag kǎ nĩ vĩ ki kanhró nĩ, pǎi tỹ Agripa tag ti. Hǎ kỹ sóg ti ve kỹ mỹ’ăg tũ nĩ. Tó kǎn sóg mũ. Mē ti huri, ki kanhró tóg nĩ. Vēnh kar tóg mē kǎn tĩ ha,” he tóg.

²⁷“Pǎi tỹ Agripa’,” he tóg. “Ă mỹ Topẽ vĩ tó tĩ ag tỹ nén tó mũ kri fig mũ?” he tóg. “Kri nĩm ă tóg mũ, ki kanhró sóg nĩ,” he tóg.

²⁸ Kĩ Agripa tóg Paulo mĩ: “vẽme sĩ tĩ ã mĩ isĩ Cristo ki rã han sór mũ?” he mũ.

²⁹ Kĩ Paulo tóg ti mĩ: “hĩ,” he mũ. “Hã to sóg Topẽ mré vĩ mũ,” he tóg. “Ã tĩ vẽme sĩ hã ki Jesus ki rãnh ken kĩ tóg há tĩ vẽ, ke tũ nĩ kĩ vẽme mág ki. Ã tĩ inh ri kén ke kĩ tóg há tĩ vẽ, ã, ã mré inh vĩ mẽg mũ ag ke gé. Isĩ se kĩ jẽ tag hã to sóg ã mĩ: inh ri kemnĩ, henh ke tũ nĩ,” he tóg, Paulo ti.

³⁰ Kĩ pã'i tĩ Agripa vỹ jẽg nẽ mũ sir, governador ke gé, Berenice fi ke gé, ag mré nĩtĩ kar ag ke gé. ³¹ Kĩ ag tóg kãpa mũ. Kĩ ag tóg jagnẽ mré vĩ mũ. “Nén ù kórég han tũ ti nĩ,” he ag tóg. “Véké tóg se kĩ jẽ. Ã tĩ nén han tũ to tóg ter ke tũ nĩ,” he ag tóg. ³² Kĩ Agripa tóg Festo mĩ: “ti tĩ kyvar kĩ jẽ hã vẽ vẽ, hã ra tóg pã'i mág tĩ Imperador ve sór mũ,” he tóg mũ.

Cidade tĩ Roma ra

27 Hã kĩ Festo tóg kejẽ Paulo mĩ: “ã tĩ ga tĩ Itália ra tĩg ke nẽ ha,” he mũ. Kĩ tóg pã'i mĩ ti fẽg mũ. Soldado ag capitão vẽ, pã'i ẽn ti. Û tĩ Imperador mré ke ag he mũ ẽn capitão vẽ. Ti jiji hã vỹ: Júlio, he mũ. Ti mĩ ag tóg vẽse ù ag vĩn mũ gé.

² Kĩ ẽg tóg canoa mág kãra ge mũ sir. Cidade tĩ Adramítio tá ke vẽ, canoa mág ẽn ti. Ag tĩ ga tĩ Ásia fyr to mũ sór vẽ, canoa kãmĩ. Kĩ ẽg tóg goj kãmĩ mũ mũ, tá pa kĩ. Aristarco tóg ẽg mré tĩ mũ, cidade tĩ Tessalônica tá ke ẽn ti, ga tĩ Macedônia tá ke ẽn ti.

³ Tĩ vaj kĩ ẽg tóg cidade tĩ Sidom tá krỹg mũ sir. Kĩ Júlio tóg Paulo mĩ vĩ há han mũ. Kĩ tóg ti mĩ: “ã mré ke ag venh tĩg, ag tĩ ã ki rĩr jẽ,” he mũ.

⁴ Tá pa kĩ kãka tóg ẽg kato tẽ mũ. Kĩ ẽg tóg goj vãso tĩ Chipre kakãm mũ mũ, ti tĩ ẽg jakãnh tá nĩn kĩ. ⁵ Kĩ ẽg tóg goj kafã tũ kãmĩ mũ mũ, ga tĩ Cilícias fyr to, ga tĩ Panfília fyr to ke gé. Kĩ ẽg tóg

cidade tĩ Mirra tá junjun mũ sir, ga tĩ Lícia tá. ⁶ Tá capitão tóg canoa mág ù vẽg mũ, cidade tĩ Alexandria tá canoa, ù tĩ ga tĩ Itália ra tĩ mũ ẽn. Kĩ tóg ẽg mĩ: “kã ge jẽg,” he mũ, capitão ti. ⁷ Kãmĩ ẽg tóg mũ mũ. Komẽr hã ẽg tóg mũ mũ, kurã tĩ hên ri ke ki. Kĩ ẽg tóg vãhã goj vãso tĩ Cnido tá junjun mũ. Hã ra kãka tóg ẽg kato tẽ mũ gé. Kĩ ẽg tóg tá fin rãm tũ nĩgtĩ. Kĩ ẽg tóg goj vãso tĩ Creta kakãm mũ mũ, kãka tĩ ẽg tĩ vĩrĩn ke kĩ. Kĩ tĩ Salmona kakãm mũ ẽg tóg mũ, kãka krẽfin. ⁸ Kãmĩ tĩg tóg jagy tĩ, Creta fyr to hã tĩg kĩ. Kĩ ẽg tóg vãhã komẽr hã ẽg tóg canoa sag ja há he mũ tá junjun mũ. Cidade ù vỹ tá kakó nĩ, ti jyjy hã vỹ: Laséia, he mũ. ⁹ Hã ra ẽg tóg komẽr hã mũ ja nĩgtĩ, hã kĩ kusa tóg kakó tĩ ha. Kĩ tóg goj kãmĩ tĩg kórég nĩ, kóho tugrĩn. Festa ù pãtẽn tóg huri, Israel ag vãkre jafã ti. Hã kĩ Paulo tóg ag jyvẽn kĩ: ¹⁰ “goj tóg kãmĩ tĩg kórég tĩ ha, vỹ,” he mũ. “Kĩ ẽg tóg jagãgtar mũ ha. Kĩ tóg inh mĩ canoa tĩ nĩnũnh mĩ tĩg ha mẽ tĩ, kĩ ajag tũ vỹ vãgfor mũ sir, jó ẽg hên ri ke mũn kãgtar ke mũ gé,” he tóg, Paulo ti.

¹¹ Hã ra capitão tóg canoa tĩ ù tũn mũn vĩ mẽg mũ sir. Canoa vóg mũ vĩ mẽg tóg mũ gé, hã kĩ tóg Paulo vĩ mẽg tũ nĩ sir. ¹² Canoa sag ja ẽn tóg há sĩ nĩ, hã kĩ ag tóg tá kusa fin pa vãnh nĩtĩ. Hã kĩ ùn e ag tóg tá pa sór mũ, ag tĩ cidade tĩ Fenice tá junjun jẽ, tá kusa fin pa jẽ. Goj vãso tĩ Creta tá cidade ù vẽ, canoa sag ja ù vẽ, Fenice ti. Tá rã krẽfin tá kãka vỹ króg he tũ nĩgtĩ. Hã kĩ ag tóg ra mũ sór mũ sir.

Kóho mág

¹³ Hã ra kãka sĩ tóg komẽr hã kraug he mũ sir. Kĩ tóg ag mĩ há tĩ. Hã kĩ ẽg tóg tá pa kĩ Creta fyr ra mũ mũ sir, Creta fyr kakó ra, goj kãmĩ mũn kĩ. ¹⁴ Vãhã kóho jũ tóg canoa kato tẽ mũ sir, ti jiji hã vỹ: Nordeste, he mũ. Creta tán kãtĩ mũ.

¹⁵Hā ra ěg tóg kóho jū tag kato canoa vóg tỹ hē ri ke tũ nĩ, kỹ ěg tóg ti vóg tovānh mũ sir. Kỹ kóho tóg canoa va tĩ mũ. ¹⁶Kỹ ěg tóg goj vāso sĩ to hā mũ mũ, ti jyjy hā vỹ: Cauda, he mũ. Hā ra ěg tóg canoa sĩ nỹgnỹn kāmũ ja nĩ, ti se kỹ. Cauda tá ěg tóg canoa mág kri ti fi han sór mũ, hā ra ěg tóg to jagāgtar mũ, kóho to. ¹⁷Vāhā ag tóg ti kātānfyn mũ, canoa vóg ti ag. Kar ag tóg canoa mág tógfin mũ, ti tỹ vām ke tũ nĩ jé. Hā ra ag tóg rỹnhryj kamēg mũ, rỹnhryj tỹ Sirte he mũ ěn, ga tỹ Lĩbia fyr tá. Hā kỹ ag tóg kur kunũg mũ sir. Kur ěn vỹ canoa kri sag tĩ, kākā tỹ ti tĩn jé. Ěn kunũg ag tóg mũ sir.

¹⁸Hā ra ěg tóg kóho jū to jagāgtar' he mũ, kỹ ag tóg tỹ vaj kỹ canoa tỹ rĩg mũ ěn kujy vām mũ sir, goj ki, ti kufy vėnh kápām ag tóg mũ sir. ¹⁹Tỹ vaj ũn kỹ ěg tóg jagāgtar tāvĩ nỹtĩ, kỹ ěg tóg vāvām kām mũ sir, canoa kākĩ nỹtĩ ěn, ti tralha ti. Ěg kar tóg ag mré vāvām mũ sir. ²⁰Kurā tỹ hēn ri ke ki ěg tóg rā vėg tũ (pē) nĩ, krĩg ke gé. Kóho jū ěn tóg ěg kato tē mũ. Kỹ tóg ěg mỹ ěg kągter ha mē tĩ. “Ěg hỹn krenkren ke tũ nĩ ha,” he ěg tóg.

²¹Hā ra ěg tóg jėg tũ (pē) ja nĩ, kurā tỹ hēn ri ke ki. Kỹ Paulo tóg ag to tĩg kỹ: “ājag tỹ inh vĩ kri finh ke vė vė,” he mũ. “Ěg tỹ Creta tá kapa tũ nĩ ra ěg jagēgtar tũ ninh ke vė vė, kỹ ājag tỹ nén ũ kren tũ ninh ke vė vė,” he tóg. ²²“Hā ra ājag fe ti tỹ rỹnh kemnĩ. Ěg kar vỹ krenkren mũ. Canoa hā vỹ tũ' henh mũ,” he tóg. ²³“Kuty tag kā Topē tỹ jēnē jafā tóg inh mré vĩ mũ. Inh Senhor hā vė, ũ tỹ ti jēnēg mũ ti, hā vỹ: Topē, he mũ,” he tóg. ²⁴“Ti tỹ jēnē jafā tóg inh mỹ: “kamēg tũg nĩ, Paulo,” he mũ. “Pā'i mág tỹ Imperador ve jé ā tóg ke mũ, kỹ Topē tóg ā mré mũ ag kar vin, ag tỹ ā mré krenkren jé,” he tóg inh mỹ,” he tóg, Paulo ti. ²⁵“Kỹ ājag fe ti tỹ há' hemnĩ. Topē vĩ kri sóg fig mũ. Ti tỹ inh mỹ tó mũ vỹ ge ninh mũ,” he

tóg, Paulo ti. ²⁶“Jó ěg tỹ canoa tỹ goj vāso to tĩn há tóg tĩ,” he tóg.

²⁷Semana régre vė sir, ěg tỹ goj kafān tũ mĩ mũ kri, kóho tỹ ěg ran tĩ ki. Goj kafā tũ ěn jiji hā vỹ: Mediterrâneo, he mũ. Meio noite ki canoa vóg tĩ ag tóg: “ga hỹn kakó nĩ ha,” he mũ. ²⁸Kỹ ag tóg goj kāmũn mũ sir. Kỹ tóg 36 (ke) metros he mũ. Kānhmar ag tóg kāmũn mām, kỹ tóg 27 (ke) metros he mũ sir. ²⁹Kỹ ag tóg pāró kamēg mũ, ěg tỹ ag mỹ kā ta kenh ha mē tĩn kỹ. Kỹ ag tóg canoa nér tá ti se jafā tỹ 4 (ke) vin mũ. Ferro ũ vė, ti se jafā ti. Ti tỹ rỹnhryj kākā nỹ kỹ canoa tóg tá krỹg he mũ. Ti vin kỹ tóg ag tỹ kurā vėnh há tĩ, canoa vóg tĩ ag. ³⁰Kỹ ag tóg canoa sĩ ěn térem mũ, goj ki. Canoa se jafā tỹ ag tóg kākĩ vin mũ, ag tỹ ón kỹ canoa krĩ tá vin jé. Hā ra ag tóg canoa mág ré kỹ ga ra mũ sór mũ.

³¹Hā ra Paulo tóg vėg mũ. Kỹ tóg capitão mỹ, soldado ag mỹ tóg: “ag tỹ pa kỹ ājag vỹ krenkren ke tũ nĩ,” he mũ.

³²Kỹ soldado ag tóg vāfe kym mũ sir, ag tỹ vāfe tỹ canoa sĩ térem kỹ. Kỹ canoa sĩ ěn tóg kutē mũ sir.

³³Tỹ vaj ken kỹ Paulo tóg vėnh kar jyvėn mũ, ag jėn jé. Kỹ tóg: “semana régre vė (mỹr), ājag fe von kỹ,” he mũ. “Nén ũ kāmēg tũ ājag nỹtĩ (mỹr) ver,” he tóg. ³⁴“Pāo ko ra, ājag tỹ tar há ki krenkren jé. ũ vỹ ter ke tũ nĩ, kỹ ũ vỹ kaganh ke tũ nĩ gé,” he tóg, Paulo ti. ³⁵Ti tỹ tag tó kar kỹ tóg pāo mág mũ sir. Vėnh kar rĩnve tóg Topē mré vĩ mũ, kỹ tóg kupān kỹ ko mũ sir.

³⁶Kỹ vėnh kar tóg fe tar nỹtĩ sir. Kỹ ag tóg ko mũ gé sir. ³⁷276 (ke) ěg nỹtĩ, canoa mág ěn kākĩ.

³⁸Ěg tỹ ko kar kỹ ag tóg goj ki trigo kugjėg mũ, canoa tỹ kānhvy' hen jé.

³⁹Tỹ vaj kỹ ag tóg vėg mũ sir, hā ra ag tóg goj vāso ěn ki kagtĩg nỹtĩ. Kỹ ag tóg tá rỹnhryj vėg mũ sir, rĩnhryj ti. Tá kóho tóg há sĩ nĩ. Kỹ ag tóg tag ra canoa tĩn sór mũ. ⁴⁰Kỹ ag tóg ferro ěn kykym mũ sir,

goj kākī. Kĩ ag tóg canoa vóg jafā kygvāg mū gé. Canoa krī tá ag tóg kur kujén mū, kóho kato. ⁴¹ Hā kĩ ěg tóg r̥nhr̥j ěn to mū mū sir. Kĩ goj régre tóg jagnē ki jun nĩ. Kĩ canoa tóg r̥nhr̥j k̄ara rā mū sir. Ti krī tóg r̥nhr̥j krēm rā mū, kĩ tóg sir tar mū sir. Kĩ ti nér tóg kam ke mū sir, goj jũ kĩ. Kĩ tóg mrāj mū, canoa ti.

⁴² Kĩ soldado ag tóg vėnh sigse ag k̄agtén sór mū, ag mrogmro kĩ vėnh pigju tũ nĩn jé, ag krenkren tũ nĩn jé. ⁴³ Hā ra capitão tóg Paulo kren han sór mū. Kĩ tóg ag m̄y: “ke tũg ra,” he mū. “Ājag t̄y tũgnũm há nĩn kĩ goj k̄ara ge vėn inhā, ājag t̄y ga ra ge vėn jé, tũgnũm kĩ,” he tóg. ⁴⁴ “Ājag t̄y tũgnũm kórég kĩ kan kri n̄ymnĩ, canoa mr̄nhr̄aj kri,” he tóg, capitão ti.

Kĩ ag tóg ge mū sir. Hā kĩ ěg kar tóg ga tá junjun mū, krenkren kĩ.

Goj vāso t̄y Malta tá

28 ěg t̄y ga tá n̄ytĩn kĩ ěg tóg ga jiji mēg mū, hā v̄y: Malta, he mu.

² Tá ke ag tóg ěg jagāgt̄an mū. Kĩ ag tóg pĩn han mū. ěg m̄y ag tóg: “k̄age jēg ra,” he mū, ta kutē kĩ, kusa jagy tĩn kĩ. Kanhgág ri ke ag vē, tá ke ag.

³ Kĩ Paulo tóg pĩn tĩ mū, kĩ tóg pĩ ki nĩn mū. Hā ra p̄yn tóg pĩ kākā n̄y ja nĩ. R̄y mē kĩ tóg tim ke kĩ Paulo pr̄ag mū, ti nĩgé ki. ⁴ Kĩ tá ke ag tóg p̄yn ěn vėg mū, ti t̄y ti nĩgé to sa k̄y. Kĩ ag tóg jagnē m̄y: “ũ tén tĩ h̄yn vē,” he mū. “Goj tán kren, hā ra tóg ā t̄y nén han jan kajām mū,” he ag tóg, Paulo to.

⁵ Hā ra Paulo tóg p̄yn k̄avén mū, pĩ ki tóg t̄y vėn mū. Hā ra tóg kaga tũ nĩ, ti nĩgé ti, Topē t̄y ti t̄y há’ hen k̄y.

⁶ Hā ra ag tóg ti tugn̄ym mū, ti k̄anhpar ve jé, ke tũ nĩ k̄y ti ter k̄y kutē ve jé. Hā k̄y ag tóg ti vėg n̄ytĩ, hora t̄y h̄en ri ke ki. Hā ra tóg ke tũ nĩ. Kĩ ag tóg ti to jykrén m̄an mū. “Topē tũ m̄y vó?” he ag tóg mū, ón k̄y, Paulo to. Ag m̄y tóg e tĩ, hā k̄y ag tóg ti to: “topē h̄yn,” he mū.

⁷ Goj vāso tá ke ěn ag k̄afór v̄y t̄y Públío nĩ. Tá tóg ěn nĩ, ā jap̄y tá. ěg t̄y tón n̄ytĩ tag tá tóg kakó nĩ, ti ěn ti. Kĩ tóg ěg m̄y: “k̄age jēg ra,” he mū. Ti mré ěg tóg kurā t̄agtũ han mū.

⁸ Hā ra Públío panh tóg kaga n̄y nĩ. J̄agfa kyvėnh han tóg, k̄y tóg to r̄yng n̄y nĩ gé. Kĩ Paulo tóg ti venh rā mū. Kĩ tóg ti to Topē mré vĩ mū. Ā nĩgé t̄y tóg ti mēg mū, k̄y tóg há’ he mū sir. ⁹ Ti han k̄y vėnh kagyga kar ag v̄y tá junjun mū sir, goj vāso ěn tá. Kĩ tóg ag t̄y há’ he k̄an mū, Paulo ti.

¹⁰ Kĩ ag tóg ěg ki r̄ir há han mū. ěg t̄y kar k̄y canoa ũ k̄ara ge k̄y ag tóg ěg m̄y ěg t̄y nén ve sór mū kar ěn v̄in mū.

Roma ra

¹¹ Kysā t̄agtũ tũg k̄y ěg tóg canoa ũ k̄ara ge mū sir. Cidade t̄y Alexandre tá ke vē gé, canoa ěn. Tá tóg kusa f̄in rā ja nĩ, Malta tá. Ti rá v̄y t̄y ti vėgni k̄aggrá nĩ, ti retrato ěn ti. Ón k̄y Romano ag topē ũ vē, ti vėgni k̄aggrá ti.

¹² Tá pa k̄y ěg tóg mū k̄y cidade t̄y Sir-acusa tá kr̄yng mū. Kĩ ěg tóg tá kurā t̄agtũ tũg mū. ¹³ Tá pa k̄y ěg tóg cidade t̄y Ré-gio tá junjun mū. T̄y vaj k̄y k̄aka tóg ěg vóg há han mū. Hā k̄y ěg tóg kurā régre tũg k̄y cidade t̄y Pozuoli tá junjun mū sir. ¹⁴ Tá ěg tóg Jesus mré ke ag vėg mū, k̄y ag tóg ěg m̄y: “ěg mré semana tũg nĩ ver,” he mū. Kar k̄y ěg tóg cidade t̄y Roma ra mū mū sir. ¹⁵ Roma tá ke ag tóg ěg k̄amū mē ja nĩ, Jesus mré ke ag. K̄y ag tóg ěg venh k̄amū mū. Cidade t̄y Ápio jamā he mū ěn tá ag tóg ěg kato tēgtē mū, ěmā t̄y Venda T̄agtũ he mū ěn tá ke gé. Paulo t̄y ag ve k̄y ti fe tóg mrin ke mū. Kĩ tóg Topē m̄y v̄i há han mū. Ti krī tóg k̄anhvy’ he mū sir.

¹⁶ ěg t̄y cidade mág t̄y Roma tá junjun k̄y Paulo tóg vyr m̄y nĩ nĩ, vėse ũ ag mré tóg nĩ tũ nĩ. Soldado pir hā tóg ti ki r̄ir mū. Capitão tóg ti m̄y tag to: “hej,” he ja nĩ.

Roma tá

¹⁷ Kurā tāgtū tūg kŷ Paulo tóg Israel kăfór ag jé prēr mŭ. Ag vĕnh măn kŷ tóg ag mŷ: “inh kanhkă’,” he mŭ. “Se kŷ inh jĕ, Jerusalém tá, kŷ ag tóg tá fóg tŷ Romano ag mŷ inh fĕg, isŷ nĕn ũ han tŷ hă ra, isŷ ĕg jykre mranh tŷ hă ra, isŷ ĕg jóg’jóg tŷ ĕg mŷ vĕnh jykre nĭm ja ĕn mranh tŷ hă ra,” he tóg. ¹⁸ “Fóg tŷ Romano ag tóg inh kavăn sór mŭ vĕ, ag tŷ inh ki jĕmĕ kar kŷ. Isŷ nĕn han ja tŷ to sóg ter ke tŷ nĭ vĕ. ¹⁹ Hă ra Israel ag tóg inh kato vĭ, hă kŷ sóg sir pă’i mág tŷ Imperador ve sór mŭ, ag tŷ isĕn tŷ nĭ jĕ. Hă ra sóg ĕg povo kavĕnh sór tŷ nĭ, Imperador jo,” he tóg. ²⁰ “Hă kŷ sóg ājag jé prēr mŭ, sŷ ājag ki jĕmĕ jĕ. Ėg povo tŷ Israel kar vŷ Cristo ve sór mŭ. Sŷ Cristo tó hă to sóg se kŷ jĕ nĭ,” he tóg, Paulo ti.

²¹ Kŷ ag tóg ti mŷ: “ũ tóg ĕg mŷ ā to vĕnh rán han ja tŷ nĭ, Judéia tá,” he mŭ ti mŷ, pă’i ag. “Kŷ ĕg kanhkă ũ tóg ĕg ki jun ja tŷ nĭ jĕ, ti tŷ ĕg mŷ ā tŷ nĕn ũ kórĕg han mŭ ĕn tó jĕ,” he ag tóg. ²² “Hă ra tóg ĕg tŷ ā ki jĕmĕnh há tŷ, ā tŷ nĕn to jykrĕn mŭ ti. Vĕnh jykre tăg tag kato ag tóg vĭ tŷ, vĕnh kar ag, hă kŷ tóg ĕg tŷ ā ki jĕmĕnh há tŷ,” he ag tóg ti mŷ, Israel mág ag.

²³ Kŷ ag tóg ti mŷ kurā nĭm mŭ. Kŷ ũn e ag tóg vĕnh măn mŭ sir, ti tŷ ĩn krĕm nĭ ĕn tá. Ag mŷ tóg Topĕ tŷ tŷ ĕg pă’i nĭ kămén mŭ. Jesus kămén tóg mŭ, ag tŷ hĕn ri ke mŭn ti ki ge jĕ. Moisés tŷ ag mŷ vĕnh jykre nĭm ja ĕn tó tóg mŭ sir ag mŷ, văsŷ Topĕ vĭ tó ti ag vĭ ke gé. Vĕnh rá ĕn ki tóg ag mŷ Jesus ti ven mŭ sir. Kusă ki ag tóg kămŷ ja nĭ, tŷ vĕmén nŷtĭ

ki ag tóg kutyg mŭ. ²⁴ Kŷ tóg ũ ag mŷ ki hă tó ti, Paulo tŷ ag mŷ nĕn tó mŭ ti, kŷ ag tóg kri fig mŭ. Hă ra tóg ũ ag mŷ há tŷ nĭ. ²⁵ Hă kŷ ag tóg vĕnh kăpugpóv kŷ nŷtĭ. Kŷ ag tóg mŭ mŭ, Paulo tŷ ag mŷ tag tó kar kŷ, ha mĕ. Ag mŷ tóg: “Topĕ kuprĭg tóg tó há han ja nĭ, ti tŷ Topĕ vĭ tó ti tŷ Isaías mŷ: ag mŷ tag tó, hen kŷ,” he tóg. ²⁶ “Ėg jóg’jóg ag mŷ tóg tag tó ja nĭ, hă mĕ: “povo tag mŷ tag tó, hă mĕ: mĕ jĕ ājag tóg ke mŭ, ón kŷ, hă ra ājag tóg to jykrĕn ke tŷ nĭnh mŭ, hemnĭ,” he tóg. ²⁷ “Kŷ ag tóg ki kagtĭg nŷtĭnh mŭ. Povo tag ag vŷ krĭ tŷ nŷtĭ, nĭgrĕg kutu ag tóg nŷtĭ gé, kanĕ kyvó ag tóg nŷtĭ gé, ag tŷ nĕn ũ ve sór tŷ nŷtĭn kŷ, ag tŷ jĕmĕ sór tŷ nŷtĭn kŷ, ag tŷ to jykrĕn sór tŷ nŷtĭn kŷ ke gé. Hă kŷ ag tóg inh ki ge sór tŷ nŷtĭ gé, kŷ sóg ag tŷ há’ hĕnh ke tŷ nĭ gé,” he tóg, Isaías ti,” he tóg mŭ, Paulo ti, Israel ag mŷ.

²⁸ “Hă kŷ sóg, ājag mŷ tó mŭ,” he tóg, Paulo ti. “Ājag tŷ mĕ jăvănĭh nŷtĭn kŷ fóg ag vŷ mĕnh mŭ, kanhgág ag ke gé, Topĕ tŷ ag krenkren han sór mŭ ti. Kŷ ag tóg ti mŷ: hej, hĕnh mŭ,” he tóg, Paulo ti, Israel ag mŷ.

²⁹ Paulo tŷ tag tó kar kŷ Israel ag tóg mŭ mŭ sir, jagnĕ vĭ kăfăn kŷ.

³⁰ Paulo vŷ prŷg régre tūg mŭ, ā ĩn krĕm nĭn kŷ. Alugar hen kŷ tóg jĕ nĭ, ĩn ĕn ti, kŷ tóg kajām mŭ, Paulo ti, ā jănkamy tŷ. Kŷ tóg ũ tŷ ti mrĕ vĭ sór mŭ mŷ: “kără ra,” he ti. ³¹ Vĕnh kar mŷ tóg Topĕ tŷ tŷ ĕg pă’i nĭ kămén mŭ sir, fe tar han kŷ. Ėg Senhor tŷ Jesus Cristo kămén tóg mŭ sir. Ũ tóg ti mŷ: “vĭ tūg ra,” he tŷ nĭ, ti se kŷ nĭ hă ra.

PAULO TỠ CARTA HAN: ROMA TÁ KE AG MỠ CARTA

1 Paulo tỡ rá vễ. Isỷ cidade tỡ Roma tá ke ag mỡ rán ken hã vễ.

Tỡ sỏg Jesus Cristo camarada nỡ, kỡ tỏg inh fềg, isỷ tỡ apỏstolo nỡ jế. Hã jế tỏg inh jế prềr. Kỡ tỏg inh kuprềg gế, isỷ vễnh kar mỡ vễnh vớ sớ kămén jế, Topề tỡ ềg mỡ vễnh vớ jềnề ja ền ti. ²Topề vỡ vấsỷ ả vớ tó tỡ ag mỡ: “ha inh kớsin kămé tó,” he ja nỉgtỉ, kỡ ag tỏg ti kămé rán ja nỉgtỉ gế, ag tỡ Topề vớ rán kỡ. ³Topề kớsin ền tó ja ag tỏg nỉgtỉ, ềg Senhor tỡ Jesus Cristo ti. Tỡ tỏg vấsỷ pải mág tỡ Davi kớsin nỡ, Jesus ti. Ti jỏg'jỏg ve hã vễ, Davi ti. ⁴Ti tỡ tỡ Davi kớsin nỡn kỡ tỏg tỡ ềprả ke nỡ, Davi ri ke, hã ra tỏg tỡ Topề kớsin nỡ gế, hã kỡ tỏg ả ter kar kỡ rừr măn ja nỡ. Topề tỡ ti rừn măn to ềg tỏg ti tỡ tỡ Topề kớsin nỡn ki kanhrỏ nỷtỉ. Topề vỡ ti tỡ ừn mág han mỗ gế sir, ềg Senhor tỡ Jesus tỡ.

⁵Topề hã ne isar han', Jesus tugrừn. Ti hã ne inh fềg', isỷ tỡ apỏstolo nỡn jế, isỷ fỏg ag kar mỡ ti kămén jế, kanhgág ag mỡ ke gế, ag tỡ ti ki ge jế, ti vớ kri fi jế, ti vớ kri nừm jế, ti jừi mề kỡ. ⁶Ủ tỡ inh vớ mềg mỗ vỡ tỡ ầjag nỷtỉ gế.

Topề vỡ ầjag kuprềg, hã kỡ ầjag vỡ tỡ Jesus Cristo tỡ nỷtỉ. ⁷Kỡ sỏg ầjag mỡ vễnhrả jềnềg mỗ, Topề tỡ ầjag to há nừn kỡ. Cidade tỡ Roma tá ầjag tỏg nỷtỉ. Topề ne ầjag kuprềg', hã kỡ ầjag vỡ tỡ ti tỡ nỷtỉ. Hã kỡ sỏg ềg jỏg tỡ Topề mỡ: “ag tar han nỡ, ag mỡ vễnh jykre kusa nừm nỡ,” he tỡ, Topề mỡ, ềg Senhor tỡ Jesus Cristo mỡ ke gế.

Paulo tỡ Roma tá ke ag ve sớ

⁸Ha mề, vễnh kar vỡ ầjag tỡ ti ki ge kỡ nỷtỉ tag mề huri, kỡ sỏg ầjag to Topề mỡ vớ há han tỡ, Jesus Cristo tugrừn. Ti hã mrế sỏg vềmén tỡ. ⁹Ti hã mỡ sỏg rầnhrầj tỡ, to krónh ke vảnh sỏg nỉgtỉ, hã kỡ sỏg

ti kớsin to vềmề sớ ền tó tỡ. Ti hã mrế sỏg ầjag jagfỷ vớ tỡ gế, kỡ tỏg ki kanhrỏ nỡ. Kurả kar ki sỏg ầjag kămén tỉgtỉ, ti mỡ. ¹⁰Isỷ ti mrế vềmén kỡ sỏg ầjag tó tỡ. Ti mỡ sỏg sỷ kejền ầjag ve sớ mỗ tó tỡ. Ti tỡ kejền sỷ ầjag vễnh ke to há nừn kỡ tỏg inh mỡ: hej, henh ke mỗ. ¹¹Ầjag ve sớ tầvỉ inh nỉgtỉ, sỷ ầjag mỡ Topề kuprừg tỡ inh kanhrần ja ền kămén jế, ầjag tỡ inh vớ jềmén kỡ tar nỷtỉ jế. ¹²Kỡ ềg tỏg jagnề tar han ke mỗ sir, ềg tỡ jagnề jykre ven kỡ, ầjag tỡ isỷ Jesus ki rả kỡ nỡ ven kỡ, isỷ ầjag tỡ ti ki ge kỡ nỷtỉ ven kỡ ke gế.

¹³Inh kanhkả', inh mỡ tỏg ầjag tỡ tag ki kanhrỏ nỷtính há tỡ, ha mề: ầjag vễnh tỉg ke to inh jykừn tỡ hừn ri ke han huri, hã ra tỏg inh mỡ ki króm ja tỡ nỡ ver. Isỷ ầjag mỡ Topề vớ kămén sớ vễ, Roma ki ke ủ ag mỡ ke gế, ag kămỉ ủ tỡ Topề ki ge jế. Fỏg kar mỡ sỏg ke tỡ, kỡ tỏg inh mỡ sớ tính mỗ, sỷ Roma tá tónh ke mừn kỡ ke gế. ¹⁴Fỏg tỡ Grego ag mỡ sỏg Topề vớ tó tỡ, fỏg kar ag mỡ ke gế, kanhgág ag mỡ ke gế, ủ tỡ nén ủ ki kanhrỏ ag mỡ, ủ tỡ nén ủ ki kagtừg ag mỡ ke gế. Topề vỡ inh mỡ: “ha ag mỡ tó,” he ja nỉgtỉ. ¹⁵Hã kỡ sỏg Roma tá ti tó sớ mỗ gế, Topề vớ sớ ền ti.

Topề jykre tar

¹⁶Inh pi(jế) Topề vớ sớ tag to mỡ'ầg sớ mỗ'. Topề hã ne tag to ềg kren han tỡ', ềg tỡ kri fin kỡ. Topề jykre tar hã vễ. Judeu ag kren han sớ tỏg mỗ, kar kỡ fỏg kar ag ke gế, kanhgág ag ke gế. ¹⁷Tag hã ki ềg tỏg Topề jykre ki kanhrỏ nỷtính mỗ, Topề vớ sớ hã ki. Ềg tỡ ti ki rả hã kỡ ềg tỏg ti mỡ kuryj nỷtỉ. Hã kỡ tag tỏg rần kỡ nỡ, ha mề: “ềg tỡ Topề ki rả hã tugnừn ềg tỏg ti mỡ kuryj nỷtính ke mỗ, kỡ ềg rừnrừr măn ke mỗ,” he ja tỏg nỡ, Topề vớ rần ki.

Ềprả ke ag jykre pảnỏ

¹⁸Hã ra Topề tỏg jỡ nỡ gế, kanhkả tá. Ủ tỡ ti ki ềkrềg tỡ ag to tỏg jỡ mỗ. Topề vỡ

ag mý tỹ nén ũ tũ nĩ, hã kỹ ag tóg vênh jykre kuryj han sór tũ nĩgtĩ. Vênh vĩ há tỹ ag tóg tũg' he sór tĩ gé, vênh jykre kórég han sór kỹ. ¹⁹Topê jykre há nỹtĩn hã ki kanhró ag tóg nỹtĩ vễ, ag tỹ ki kanhrân sór kỹ. Topê vỹ ẽg kar mý tag ven tĩ. ²⁰Êg pi(jé) Topê vég tĩ. Hã ra tóg nén ũ kar han, ẽg tỹ nén vég mũ kar. Ên vigve kỹ ẽg tóg ti jykre mág nĩ ên ki kanhró nĩ sir. “Ủ tỹ tag han mũ vỹ tỹ ũn mág nĩ,” he jé ẽg tóg ke mũ. “Ên jykre vỹ tar nĩ, ên hỹn tóg tũ henh ke tũ nĩ,” he jé ẽg tóg ke mũ, ẽg tỹ Topê tỹ nén han ja vigve kỹ. Hã ra ag tóg ki kanhrân jăvánh nỹtĩ, hã kỹ Topê tóg ag to jũnh ke mũ, hã ra ag tỹ ne tónh ke tóg tũ tĩnh mũ. ²¹Ti tỹ tỹ Topê nĩn ki kanhró ag tóg nỹtĩ vễ, hã ra ag tóg ti to: “Topê vễ,” he tũ nĩgtĩ. Ti tỹ tỹ ũn mág nĩ tag tó sór tũ ag tóg nĩgtĩ. Ti mý ag: “inh mý tóg há tĩ,” he ja tũ nĩgtĩ gé, ti tỹ ag ki rĩr há han mũ ra. Hã kỹ ag tóg ag tỹ krĩ há ra ki kagtĩg nỹtĩ sir, ag krĩ há tóg tũ he ja nĩgtĩ sir. Nén ũ há to jykrén mũ ki kagtĩg ag nỹtĩ ha. ²²“Ki kanhró mág inh nĩ,” he ag tóg tĩ, hã ra ag tóg krĩ vênhmỹ nỹtĩ ha. ²³Kỹ ag tóg Topê pẽ tag jẽgja kã, ũn ter vánh tag jẽgja kã ag tóg sir ẽprã ke kãggrã fẽg mũ sir, ẽprã ke ag kãgter tĩn ra. Sẽsĩ kãggrã vĩn ag ke gé, bicho tỹ fa tỹ 4 ag kãggrã ke gé, pỹn kãggrã ke gé. Tag vỹ ag mý tỹ topê nỹtĩ sir.

²⁴Hã kỹ Topê tóg ag továnh mũ sir. Ag tỹ ajag tỹ nén to én mũ ên han sór nỹtĩn kỹ tóg ag továnh mũ, ag tỹ han jé. Jagnẽ kavénh ag tóg mũ sir. ²⁵Topê vĩ há kri fi vánh ra ag tóg vênh ó hã kri nĩm tĩ. Ag tỹ ũ tỹ nén ũ kar han ja ên to: “Topê vễ,” henh ke vễ vễ, hã ra ag tóg ti tỹ nén han ja to: “Topê vễ,” he sór mũ, ón kỹ. Ủ tỹ nén ũ kar han mũ hã ne ã pir mý tỹ ũn mág nĩ, ti hã mý ẽg tóg vĩ há han ke mũ'. To krónh ke vánh ẽg nỹtĩ. Amém.

²⁶Ag tỹ Topê tỹ nén han ja to: “Topê vễ,” hen kỹ Topê tóg ag togvánh gé, ag tỹ ajag tỹ nén to én mũ ên han jé, ẽg kavénh

tĩ ên ti. Ag prũ fag tỹ ag mré nỹ tũg kỹ fag tóg jag(nê) hã mré ti vênhmỹ han mũ sir, mýr, ha mẽ. ²⁷Kỹ fag mén ag tóg ajag prũ fag mré nỹ továnh kỹ jagnẽ to én mũ gé sir. Jagnẽ to én kỹ ag tóg jagnẽ mré nỹ kỹ ti kórég han mũ gé sir, jagnẽ kavénh kỹ. Hã kỹ ag tóg ag tỹ Topê továnh to jagãgtar nỹtĩnh mũ. Ti tỹ ag vóg kónân hã vễ.

²⁸Ve ra ha. Topê ki ẽkrén jăvánh ag tóg nỹtĩ, ti to é he kỹ. Hã kỹ Topê tóg ag togvánh ja nĩgtĩ gé sir, vênh kato, ag tỹ vênh jykre pãno han sór kỹ. “Ha han, ge kỹ sir,” he ja tóg nĩgtĩ. ²⁹Vênh jykre pãno tỹ ag fór nỹtĩ ha, ti kórég tăvĩ tỹ. Nén kar to én (ka)mẽ ag nỹtĩ. Vênh jykre kuryj han vánh ag nỹtĩ. Jagnẽ tũ to én (ka)mẽ ag nỹtĩ. Jagnẽ kãgtén ag tóg tĩ gé. Jagnẽ vĩ kafân ag tóg tĩ gé. Jagnẽ mý un'ón ag tóg tĩ gé. Jagnẽ krĩn kónân ag tóg tĩ gé. Jagnẽ to vĩ kónân ag tóg tĩ gé. ³⁰Jagnẽ to un'ón ag tóg tĩ gé. Topê kato tẽ mág ag tóg nỹtĩ. Jagnẽ vóg kónân ag tóg tĩ. “Ag kãfór vỹ tỹ inh nĩ,” he ag tóg tĩ, kỹ ag tóg veso nén ũ há tó tĩ, ón kỹ. “Inh hỹn vênh jykre pãno tỹ ne han mũ, ũri?” he ag tóg tĩ, kurã kar ki. Ajag mýnh fag vĩ han vánh ag tóg nỹtĩ gé, ajag panh ag vĩ ti. ³¹Krĩ tũ ag nỹtĩ. Ón kỹ ag tóg jagnẽ mré nén kar to jykrén tĩ, ajag tỹ ki króm ke tũ (hã) ra. Jagnẽ mré há nỹtĩ ki kagtĩg ag nỹtĩ, kỹ ag tóg jagnẽ jagãgtân ki kagtĩg nỹtĩ gé. ³²Topê vỹ ũ tỹ tag han mũ to: “kãgter jé ag tóg ke mũ,” he ja nĩgtĩ. Ag tỹ tag ki kanhró nỹtĩ ra ag tóg han mũ sir, kỹ ag tóg ũ tỹ tag han mũ to há nỹtĩ gé, mýr, ha mẽ.

Topê tỹ vênh jykre pãno to jũ

2Fóg mré kanhgág ag vỹ vênh jykre kórég tag hyn han kãn tĩ, kỹ ag tóg Judeu ag mý kórég nỹtĩ. Hã ra Judeu ag vỹ ti kórég han tĩ gé, ag tỹ ón kỹ ag to vĩ mũ ra. “Kórég ag nỹtĩ,” he ag tóg tĩ, hã ra ag tóg fóg jykre kórég ên han tĩ gé, kanhgág jykre kórég ti ke gé. Hã kỹ

ag tóg ājag jykre tugnīn ti kórég venh ke mū gé. ²Topē vỹ ũ tỹ tag han mū vóg kónān ke mū, ti jykre kuryj nīn kỹ, Topē ti. Ti tỹ ke há vē. ³Ūn jykre kórég ag tóg ag mỹ kórég nỹtī, Judeu ag mỹ, hā ra ag tóg hā han tī gé. Kỹ ag hỹn hē ri kenh mū, Topē tỹ ag vóg kónān tũ nī jé? Ag vóg kónān jé tóg ke mū, ha vemnī. ⁴Ver tóg ěg to há nī, ver tóg ěg to fen nīnh mū, ver tóg jũ vānh nī, Topē ti. Ti tỹ ěg tỹ ěg jykre kórég tovānh ve sór vē, hā kỹ tóg ver ěg to há tāvī nī. Hā ra tóg ag mỹ tỹ nén ũ tũ nī ve nī, Topē tỹ ěg to fen nīnh ke mū ti. ⁵Kutu ag nỹtī, vēnh jykre pāno tovānh jāvānh ag nỹtī, hā kỹ Topē tỹ ag to jũ tóg komēr hā mág rā nī. Kejēn tóg Topē tỹ vēnh kar jykre venh ke kurā pétēm ke mū sir. Kỹ ag tóg venh ke mū, Topē tỹ ag vóg kónān ke ti, kỹ vēnh kar vỹ ti jykre kuryj venh ke mū, ti tỹ ěg mỹ ki hā tó mū ti. ⁶Ti hā ne ěg mỹ nīm ke mū', ěg tỹ nén hyn han ja ěn kaja ti. ⁷Ēn kā tóg ěg mỹ ěg rīr krỹg ja tũ ven ke mū, ūn jykre kuryj ag mỹ. ěg tỹ ti jykre há to tar nỹtīn kỹ tóg ěg mỹ ěg rīr krỹg ja tũ ven ke mū, ěg tỹ tá tỹ ūn mág nỹtī sór kỹ, ěg tỹ Topē hā tỹ ěg mỹ vī há han ke ve sór kỹ, ěg tỹ ěg rīr krỹg ja tũ ve sór kỹ. Kỹ tóg ěg mỹ ven ke mū. ⁸Hā ra tóg ũ vóg kónān ke mū gé. Ū tóg ājag tỹ nén han sór mū ěn hā han tī. Vēnh vī há kri fi vānh ag nỹtī, ag tỹ vēnh jykre pāno hyn han sór kỹ. Hā kỹ tóg ag vóg kónān ke mū. ⁹Ū tỹ vēnh jykre pāno han mū kar vỹ kanē junjur ke mū, jagtar jagy hyn han kỹ. Ag tỹ tỹ Judeu nỹtī ra ag tóg jagāgtar ke mū, kar kỹ fóg kar ag ke gé, kanhgág ag ke gé. ¹⁰Ū tỹ vēnh jykre kuryj han mū tỹ tóg ūn mág hyn han ke mū hā ra, to tóg vī há han ke mū, ěg mỹ tóg vēnh jykre kusa nīm ke mū, ěg tỹ tỹ Judeu nỹtī ra, kar kỹ fóg ag mỹ ke gé, kanhgág ag mỹ ke gé.

¹¹Ha vé, Topē mỹ ti tỹ nén ũ tũ nī, Judeu ag, fóg ag, kanhgág ag. Ti mỹ ěg tóg tỹ ūn pir nỹtī. ¹²Ū ag tóg Topē vī mē

ja tũ nỹtī. Kỹ ag tóg ti kórég kar hyn han mū sir. Kỹ ag tóg nūgme ki vár ke mū sir, inferno ki, ag jykre kórég to. Ag jāvo Judeu ag vỹ Topē vī mē ja nĩgtī. Hā ra ag tóg ti kórég han tī gé. Kỹ Topē tóg ag vóg kónān ke mū gé sir. “Isỹ ājag mỹ nén tó ja ěn han ja tũ ājag nỹtī,” he jé tóg ke mū. ¹³Ha vé, ěg tỹ Topē vī mēg mū ra han tũ nīn kỹ ěg Topē mỹ há tũ nỹtī. ěg tỹ ti vī ki króm kỹ ěg tóg ti mỹ kuryj nỹtī. ¹⁴Fóg ag mré kanhgág ag vỹ Topē vī mē ja tũ nī ver, ũ tỹ Judeu jykre han tũ kar ag. Ge ra vēnh jykre há tóg ag mỹ sér tī, ag tỹ Topē vī mē ja tũ (hā) ra. Kỹ ag tỹ vēnh jykre há han sór mū tag vỹ ag mỹ ag tỹ ki króm han jafā nī. ¹⁵Topē tỹ nén tó ja ěn vỹ ag kākā nī, hā kỹ ag tóg han sór mū, ag tỹ mē ja tũ ra. Hā kỹ tóg ag mỹ sér tī, ag tỹ nén ũ há han kỹ. Jāvo tóg ag mỹ e tī, ag tỹ ti kórég han kỹ. Ag tỹ Topē vī mē ja tũ ra ag tóg vēnh jykre há ki kanhró nỹtī. ¹⁶Kejēn Topē tóg Jesus Cristo mỹ: “ag jykre ve kán nī,” henh ke mū, ti kurā ěn kā. Kỹ vēnh kar jykre vỹ vēnh ven ke mū, ag jykre kórég mré hā, ag tỹ vēnh kar vatánh tá nén han ja ti. Tag hā tó sóg tī, sỹ vēnh kar mỹ ti vī sér kāmén kỹ.

Judeu ag tỹ Topē vī mranh ja

¹⁷Ha vé, Judeu ag mỹ tóg sér tī, ag tỹ tỹ Judeu nỹtīn kỹ. “Topē ne ěg jyvēn ja nĩgtī', kỹ ěg nūgme ki vár ke tũ nī,” he ag tóg tī. “Topē to ěg há nỹtī,” he ag tóg tī gé. ¹⁸Ti tỹ ěg ki nén ve sór mū ki kanhró ag tóg nỹtī. Ti vī ki tóg rán kỹ nī, hā kỹ ag tóg ěn ve kỹ vēnh jykre kuryj ki kanhró nỹtī. ¹⁹“Ki kanhró ěg nỹtī,” he ag tóg tī, hā kỹ ag tóg ũ tỹ ki kagtīg ag mỹ tó tī, Judeu ag, ag tỹ ag mỹ ūn kyvó ag ri ke nỹtīn kỹ. Kutỹ mī ag tóg mūgtī, kỹ ag tóg ag mỹ jēngrē han sór tī, ag mỹ Topē vī tó kỹ. ²⁰Ū tỹ ki kagtīg ag kanhrān ag tóg tī, gīr ag ke gé. “Topē vī vỹ há nī, vēnh jykre há vē, ki hā tóg tó tī, hā to ěg Topē ki kanhrān tī,” he ag tóg tī. ²¹Ōn kỹ ag

tóg ũ ag kanhrân tĩ, ājag tỹ ki kagtĩg nỹtĩ (hã) ra. Ũ mỹ ag tóg: “nén ũ péju(g) tũg nĩ,” he tĩ. Hã ra ag tóg ũ tũ péju(g) tĩ. ²² Ōn kỹ ag tóg: “ā prũ tũ fi mré nỹ tũg nĩ, ā mén tũ mré nỹ tũg nĩ gé,” he tĩ. Hã ra ag tóg fag mré nỹgnỹ tĩ. Ōn kỹ ag tóg vênh kăggrá tỹ topē to: “Topē pijé,” he tĩ. Hã ra ag tóg vênh kăggrá ag jo ĩn krēm ag tũ péju(g) tĩ. ²³ “Topē vỹ ěg jyvên ja nĩgtĩ,” he ag tóg tĩ. Hã ra ag tóg ti vỹ mranh tĩ. Topē kavênh ag tóg tĩ. ²⁴ Hã kỹ tag tóg rân kỹ nĩ, Judeu ag to, Topē vỹ rân ki, ha mē: “ājag jykre kórég ve kỹ fóg ag mré kanhgág ag vỹ Topē jykre to: kórég ti hỹn nĩ,” he tĩ,” he ja tóg nĩgtĩ, Judeu ag to, Topē vỹ rân ki.

²⁵ Há ti nĩ, ěg tỹ tỹ Judeu nỹtĩ ti, ěg tỹ Topē vỹ ki króm kỹ. ěg tỹ hã ra ti vỹ mranh kỹ tóg ěg mỹ nén ũ há han ke tũ nĩ, ěg tỹ tỹ Judeu nỹtĩ ra. Fóg ri ke vỹ tỹ ěg nỹtĩ, kanhgág ri ke, ěg tỹ ti vỹ mranh kỹ. ²⁶ Kejên fóg ũ tóg sir Topē vỹ ki króm mũ sir, kanhgág ũ hên ri ke mũn. Kỹ tóg Topē mỹ tỹ Judeu ri ke nĩ sir, ti tỹ Topē vỹ ki króm to. ²⁷ Hã kỹ fóg ag mré kanhgág ag vỹ Judeu ag jykre kórég tónh ke mũ, ha vemnĩ, ag tỹ Topē vỹ ki króm kỹ. Topē vỹ mranh ag tóg tĩ, ag tỹ tỹ Judeu nỹtĩ ra, ag tỹ Topē vỹ rá vég nỹtĩ ra. Hã tó jé ag tóg ke mũ, fóg ag, kanhgág ag ke gé. ²⁸⁻²⁹ Ōn kỹ ag tóg tỹ Judeu nỹtĩ, ag pi(jé) tỹ Topē tũ pē nỹtĩ. Ōn kỹ ag gré junun fár vỹ kym kỹ nĩ, Topē tỹ ag mỹ: “kym ra,” he ja nĩn kỹ. Kỹ ag tóg tag tugnĩn jagnē mỹ: “Topē tũ vỹ tỹ ěg nỹtĩ,” he tĩ. Hã ra ag pi(jé) tag tugrĩn tỹ Topē tũ nỹtĩ. Topē tũ ag vỹ ājag fe tỹ ti ki rã tĩ, kỹ ag jykre hã ne kym kỹ nĩ ri ke nĩ. Ag tỹ vênh jykre kórég továnh to ken hã vē. Topē kuprĩg ne ěg jykre há han tĩ, kỹ Topē tóg ěg mỹ vỹ há han tĩ gé sir, ěg jykre há nỹtĩn kỹ. Ti pi(jé) ěprã ke ri ke ón kỹ vỹ há han tĩ, ti ki ge kỹ nỹtĩ ag mỹ. ěg hã vỹ tỹ Topē tũ pē nỹtĩ.

3 Kỹ Judeu ag hỹn inh mỹ: “kỹn mỹ há tũ nĩ, ěg tỹ tỹ Judeu ag krē nỹtĩn

kỹ?” he sór mũ. “Ěg gré junun fár kym kỹ nĩn kỹn mỹ tỹ nén ũ tũ nĩ?” he sór ag hỹn mũ. ² Vó, há tãvĩ ti nĩ gé. ěg hã mỹ tóg ā vỹ ti tó ja nĩgtĩ, Topē ti, ěg tỹ tỹ Judeu krē nỹtĩn kỹ. ³ Ěg kãmĩ ũ tóg ti vỹ kri fig tũ nĩgtĩ. Hã ra Topē pi(jé) ag tugrĩn ā tỹ nén tó ja ěn han ke tũ nĩ, ag tỹ ti vỹ ki króm tũ ra tóg ā vỹ ki króm tĩ, Topē ti, ag jãvo. ⁴ Ti tỹ ěg mỹ tó ja ěn han ti tĩ, ón vánh ti nĩgtĩ. ěprã ke ag ne un'ón tĩ, hã ra tóg ón ke tũ pē nĩ, Topē ti. Hã kỹ tag tóg rân kỹ nĩ, Topē vỹ rân ki, hã vỹ: “vênh kar vỹ vênh ke mũ, ā tỹ ā vỹ han tĩ ti,” he mũ. “Ũ tỹ ā jykre tugnỹm kỹ tóg vênh ke mũ sir, ā tỹ ki hã tó tĩ ti,” he ja tóg nĩ, Topē to, Topē vỹ tỹ rân kỹ nĩ ki. Hã ra tóg ge nĩ.

⁵ Kỹ Judeu ag hỹn ón kỹ inh mỹ: “kỹn hỹn há nĩ, ěg jykre pãno ti,” he sór mũ. “Vênh kar vỹ ěg jykre pãno ve kỹ Topē jykre kuryj nĩ ki kanhró nỹtĩ, ti tỹ ěg jãvo vênh jykre pãno to há tũ nĩn kỹ. Hã kỹ ěg jykre pãno tag vỹ tỹ nén ũ há nĩ. Hã ra tóg to ěg vóg kónãn sór mũ, ěg jykre pãno to, ti tỹ tỹ nén ũ há nĩ ra. Tag tugnĩn tóg jykre pãno nĩ ve nĩ, Topē ti,” he sór ag hỹn mũ, Judeu ũ ag. ěprã ke ag vỹ ón kỹ vỹ tỹ ge han tĩ. ⁶ Hã ra tóg há tũ nĩ, ag vỹ tag ti. Topē jykre hã ne kuryj nĩ. Ti jykre há nĩn kỹ tóg ěprã ke jykre to: “há tũ ti nĩ,” henh ke mũ. Jykre kuryj ti nĩ inhã.

⁷ Hã ra Judeu ũ ag tóg ón kỹ: “vênhmỹ ěg ki króm kỹ nỹtĩ vē,” he tĩ gé. “Ěg ón tugrĩn Topē tỹ tỹ ũn mág nĩ tag vỹ vênh ven mũ, ti ón vánh vỹ vênh ven mũ ěg jãvo. Há ti nĩ, tag ti. Hã kỹ ti tỹ ěg ón mũ tag to: “inh vỹ mranh ja ājag tóg nĩgtĩ,” hen kỹ tóg vênhmỹn kỹ tó mũ, Topē ti,” he ag tóg tĩ, ón kỹ. ⁸ “Ti kórég han jé ěg tóg ke mũ, Topē tỹ ěg jykre kórég tỹ nén ũ há han jé,” he ag tóg tĩ, ón kỹ. Kỹ ag tóg iso ón kỹ: “tag tó ti tĩ, Paulo ti,” he tĩ gé. Ũ tỹ tag tó mũ ag vóg kónãn jé tóg ke mũ, Topē ti, ag ón mũ tag to, ti jykre kuryj nĩn kỹ, ha vemnĩ.

Ĕg kar tỹ Topě vĩ mranh kãn

⁹ Kĩ isỹ Judeu ag to ne tó nẽ? Ĕg mỹ fóg ag kãfór nỹtĩ, Ĕg tỹ tỹ Judeu nỹtĩn kỹ? Vó, ag kãfór tũ Ĕg nỹtĩ. Topě vĩ mranh kãn Ĕg mỹr, Judeu, fóg, kanhgág, Ĕg kar mỹr. Tag tó inh huri. Hã ra tóg ge nĩ. ¹⁰ Hã kỹ tag tóg rãn kỹ nĩ gé, ha mẽ: “ũn jykre kuryj vỹ tũ tĩ, ũn jykre kuryj venh ke tũ pẽ Ĕg nỹtĩ. ¹¹ Vẽnh jykre há han ki kagtĩg kar Ĕg nỹtĩ, ũ tỹ Topě jykre han sór mũ vỹ tũ tĩ. ¹² Ĕg kar vỹ Topě japry, Topě jamĩn tovãnh kãn kỹ nỹtĩ. Jykre kórég kar Ĕg nỹtĩ. Vẽnh jykre kuryj han vãn Ĕg nỹtĩ. ũn jykre há venh ke tũ pẽ Ĕg nĩ. ¹³ Un’ón (ka)mẽ kar Ĕg nỹtĩ, jagnẽ to. Ĕg tỹ vëser to nón kỹ vëser ger tóg kãkutẽ tĩ. Ĕg ón vỹ vëser ger tag ri ke nĩ. Jagnẽ mỹ Ĕg tóg un’ón tĩ gé. Ĕg vĩ jũ tỹ Ĕg tóg jagnẽ kãgtén ri ke han tĩ gé, kỹ tóg pỹn veneno ri ke nĩ, Ĕg vĩ jũ tĩ. ¹⁴ Vẽnh vĩ jũ tỹ Ĕg fór nỹtĩ, kỹ Ĕg tóg vẽn ĩ kar mỹ vĩ kónãn tĩ. ¹⁵ Jagnẽ kãgtén (ka)mẽ Ĕg nỹtĩ, tag hã tóg Ĕg mỹ sér tĩ. ¹⁶ Ĕg tỹ hẽn mĩ mũ kỹ Ĕg tóg nén ũ kar kókég tĩ, hã kỹ Ĕg mré ke fag vỹ jagtar nỹtĩ, Ĕg to. ¹⁷ Ĕg pi(jé) vẽn ĩ jykre kusa ve sór tĩ. ¹⁸ Topě kamẽg sór vãn Ĕg nỹtĩ,” he ja tóg nĩgtĩ, Topě vĩ tỹ rãn kỹ nĩ ki. Hã ra tóg ge nĩ.

¹⁹ Hã ra Ĕg kar vỹ tag ki kanhró nỹtĩ, ha mẽ. Ĕg hã mỹ ti rãn kỹ nĩ, Topě vĩ ti, Ĕg tỹ ki króm jé. Hã ra Ĕg tóg mranh kãn. Kỹ Topě tỹ Ĕg mỹ: “tĩ kórég han ã,” he mũ ra tóg Ĕg tỹ ti mỹ ne tónh ke tóg tũ tĩ, Ĕg kar ti. Hã jé tóg Ĕg mỹ ã vĩ jẽnẽ ja nĩgtĩ, Ĕg tỹ to Ĕg kórég nĩ tag ki kanhrãn jé. ²⁰ Topě vĩ ki króm kãn ja tũ Ĕg tóg nỹtĩ, hã kỹ Ĕg kuryj tũ nỹtĩ, Topě mỹ. Hã kỹ Ĕg tỹ Topě tỹ vãsỹ Ĕg jyvẽn ja ĩn mẽg mũ ra Ĕg tóg Topě vĩ mranh ki kanhrãn mũ, ti tỹ Ĕg mỹ: “tag han tũg ra,” hen kỹ. Ge ta Ĕg tóg mranh tĩ.

Topě tỹ Ĕg kren han sór

²¹⁻²² Vãhã Topě jykre kuryj tóg vẽn ĩ ven ja nĩgtĩ. Ti hã ne Ĕg mỹ vẽn ĩ pãte fón mũ sir, inhhã, Ĕg tỹ Jesus Cristo ki ge kỹ, Ĕg tỹ ti tỹ Ĕg jyvẽn ja ĩn mranh ja (hã) ra. Ti jykre kuryj hã vẽn. Vãsỹ tóg tóg ja nĩ, Topě ti, ti tỹ tag han ke ti. A jykre si ki tóg tóg ja nĩ, kỹ ti vĩ tó tĩ ag, profeta ĩn ag tóg tóg ja nĩgtĩ gé, ti jykre tãg ke ti. ũ tỹ ti ki ge kỹ nỹtĩ kar mỹ tóg vẽn ĩ pãte fón tĩ. Kỹ Ĕg kar tóg jagnẽ ri ke nỹtĩ ha, Ĕg tỹ ti ki ge kỹ. ²³ Topě vĩ mranh kãn Ĕg, vẽn ĩ jykre kuryj han tũ Ĕg nỹtĩ, Topě jykre kuryj tag han ki kagtĩg Ĕg nỹtĩ. ²⁴ Hã ra tóg Ĕg jagãgtãn kỹ Ĕg mỹ vẽn ĩ pãte fón sór mũ. Fagrĩnh mỹ ke vẽn, kajãm ke tũ Ĕg tóg nĩ. Jesus Cristo tugnĩn tóg Ĕg kren han sór mũ. ²⁵ Topě ne Jesus fẽg, ti hã tỹ Ĕg tỹ Topě vĩ mranh tỹ tũg’ hen jé, ti ter kỹ ti kyvẽn ĩ tỹ Ĕg jagfy ti ki kãkutẽ kỹ. Kỹ Ĕg tóg ti ki rã kỹ há nỹtĩ sir, Topě jykre kuryj hã vẽn sir. Jesus to Ĕg ki kanhrãn mũ, vẽn ĩ jykre kuryj ti. Hã kỹ Topě tóg Ĕg tỹ vãsỹ ti vĩ mranh ja ĩn to tóg Ĕg vóg ja tũ nĩ ver, Ĕg to fen kỹ, ²⁶ ti tỹ ũri Ĕg mỹ ã jykre tãg ven sór kỹ. Topě vỹ kuryj nĩ. Ti tỹ Ĕg mỹ vẽn ĩ pãte fón kỹ Ĕg ti mỹ kugryj nỹtĩ sir, Ĕg tỹ Jesus ki gen kỹ. Topě jykre kuryj hã vẽn sir.

²⁷ Kỹ Judeu ag hỹn inh mỹ: “kỹ Ĕg mỹ Topě mỹ há tũ nỹtĩ, Ĕg tỹ ti vĩ ki króm sór mũ ra?” he sór mũ. Hỹ, hã vẽn. Kórég Ĕg nỹtĩ, hã kỹ Ĕg tóg ti vĩ ki króm sór mũ ra mranh tĩ. Ĕg tỹ ti ki ge kỹ tóg Ĕg mỹ vẽn ĩ pãte fón tĩ, kỹ Ĕg há nỹtĩ. ²⁸ Tag ki kanhró Ĕg nỹtĩ, ha mẽ. Ĕg tỹ Topě jykre si ĩn han sór mũ ra Ĕg jykre pãnũ vỹ Ĕg kãkã nĩ nĩ. Ĕg tỹ Jesus ki gen hã kỹ tóg Ĕg mỹ vẽn ĩ pãte fón ke mũ hã ra. ²⁹ Topě pi(jé) Judeu ag tãvĩ vэг nĩ nĩ. Fóg ag vэг ti nĩ gé, kanhgág ag ke gé. ³⁰ Pir ti nĩ, Topě ti. Hã kỹ tóg ũ tỹ ti ki ge mũ ag mỹ vẽn ĩ pãte fón tĩ, Judeu ag mré hã, fóg ag mỹ ke gé, kanhgág ag mỹ ke gé. Ĕg tỹ

ti ki ge to tóg ěg mý vĕnh pāte fón tĩ, ěg kar mý.

³¹ Kĩ ěg mý ti ki ge kĩ (ěg mý) Topĕ tỹ vāsỹ ěg mý vĕnh jykre nĩm ja ěn tỹ tũg' he tĩ, Topĕ tỹ Judeu ag jyvĕn ja ěn ti? Vó. Vāhā ěg ki króm há han ki kanhró nỹtĩ, Topĕ tỹ ěg mý vĕnh jykre nĩm ja ěn ki.

Topĕ tỹ Abraão mý vĕnh pāte fón

4 Kĩ Judeu ag hỹn inh mý: “ěg jóg'jóg ve pĕ tỹ Abraão hỹn hĕ ri ke tĩ?” he sór mũ. ²⁻³ “Nén ũ há kar han ti tĩ, Abraão ti, hā tugrĩn tóg tỹ Topĕ mý ũn há nĩ,” he sór ag hỹn mũ, Judeu ag. Vó, hā tũ vĕ. Ti ki rā tugnĩn ke vĕ. Hā kĩ tag vỹ ti to rán kĩ nĩ, ha mĕ: “Abraão vỹ Topĕ ki rā, hā kĩ tóg tỹ Topĕ mý ũn há nĩ, ti tỹ ti ki rā tugrĩn,” he tóg mũ, Topĕ vĩ rán ki. Ti tỹ nén ũ há han tugnĩn Topĕ mý tỹ ũn há nĩ ra tóg vĕso: “tỹ sóg ũn há nĩ, ag kar káfór,” henh ke mũ vĕ, vĕsỹ ũn há han sór kĩ. Hā ra ěg vĕsỹ ũn há han ki kagtĩg nỹtĩ.

⁴ Hā vé, ěg rānhrāj to ěg tóg ěg rānhrāj kaja vég tĩ. Fagrĩnh mý ke tũ vĕ, ěg rānhrāj kaja ti. ⁵ Topĕ jykre vỹ ge tũ nĩgtĩ. ěg tỹ ti ki ge kĩ ěg tóg ti mý tỹ, ũn há nỹtĩ. ěg tỹ ti ki ge tugrĩn tóg ěg mý vĕnh pāte fón tĩ, ěg tỹ ti vĩ mranh ja ti. ěg rānhrāj pijé'. Topĕ tỹ nén han mũn hā vĕ.

⁶ Hā kĩ vāsỹ ěg pā'i tỹ Davi tóg tó ja nĩgtĩ gé. Ũ tỹ nén ũ kórég han tĩ ěn to tóg vĩ há han ja nĩ, Davi ti. Topĕ vỹ ěg mý vĕnh pāte fón tĩ, ěg tỹ ti vĩ mranh ja ti. Topĕ tỹ ũn mý vĕnh pāte fón ja ěn to Davi tóg tag tó ja nĩgtĩ, ha mĕ: ⁷ “Topĕ vỹ ěg ve há han ke mũ, hā kĩ tóg ěg mý ěg tỹ ti vĩ mranh ja ěn tỹ vĕnh pāte fón tĩ. Kĩ ěg ve mǎn ke tũ nĩ ha, ěg jykre pāno ja ěn ti, ti tỹ vĕnh pāte fón kĩ nĩn kĩ. ⁸ Topĕ vỹ ěg ve há han ke mũ, hā kĩ tóg ěg mý ěg tỹ ti vĩ mranh ja ěn kaja kórég ěn ven ke tũ pĕ nĩ,” he ja tóg nĩgtĩ, Davi ti.

⁹ Kĩ Judeu ag hỹn inh mý: “Davi hỹn ũ tỹ hĕ to tag tó ja nĩgtĩ?” he sór mũ. “Judeu jykre han mũ ag to ke mý vó, ag jykre han tũ ag to ke mý vó?” he sór ag hỹn mũ. ěg kar to ke vĕ. Hā vĕ, Abraão to sóg: “ti tỹ Topĕ ki rā tugrĩn tóg tỹ Topĕ mý ũn há nĩ,” he ja nĩ. ¹⁰ Kĩ ti jykre tỹ Topĕ mý kuryj nĩ ěn kǎ ti mý Judeu ag jykre han kĩ tĩ nĩ', Abraão ti'? Vó, ěn kǎ ti ěg jykre han tũ nĩ ver. ěn kǎ ti ā gré junun fár kym ja tũ nĩ ver. ¹¹ Topĕ vỹ ti mý vĕnh pāte fón, ti tỹ ti ki rā tugnĩn, ti tỹ ver Israel ag jykre ki kagtĩg nĩn kǎ. Ti mý vĕnh pāte fón kar kĩ Topĕ tóg ti mý ěg jykre tag nĩm ja nĩ, ti tỹ ā gré junun fár kym jé sir, vĕnh kar tỹ ti jykre há nĩ ki kanhrān jé. Hā kĩ tóg tỹ ũ tỹ Topĕ ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ājag fár kym tũ ra ke gé. Topĕ ki ge kĩ ěg tóg Topĕ mý tỹ ũn há nỹtĩ, Abraão ri ke. ¹² Kĩ tóg tỹ Judeu jykre han mũ ag jóg'jóg ve pĕ nĩ gé sir, Abraão ti, ag tỹ ti mré Topĕ ki ge kĩ. Judeu jykre han to hā tóg Topĕ ki rā, ěg jóg tỹ Abraão ti. Kĩ ěg tỹ Topĕ ki ge kĩ tóg tỹ ěg jóg pĕ nĩ gé sir, ěg tỹ tỹ Judeu krĕ nỹtĩ ra Topĕ ki ge kĩ nỹtĩn kĩ. ¹³ Topĕ vỹ Abraão mý: “ā krĕ vỹ ga kar mĩ mũnh mũ, kĩ tóg tỹ ag tũ kar nĩnh mũ,” he ja nĩgtĩ. Ti tỹ Topĕ vĩ kri fi tugrĩn tóg ti mý tag tó. Vĕnh jykre si ki króm tugnĩn ke pijé'. Ti tỹ Topĕ ki rā kĩ tóg ti mý tỹ ũn há nĩ, hā kĩ Topĕ tóg ti mý tag tó ja nĩ.

Topĕ tỹ ũ tỹ ti ki ge kĩ nỹtĩ ag to há

¹⁴⁻¹⁵ Ha vé, ěg tỹ Topĕ tỹ vāsỹ ěg mý vĕnh jykre nĩm ja ěn han sór mũ ra ěg tóg mranh tĩ, kĩ Topĕ tóg ěg vóg kónān ke mũ vĕ sir. Hā kĩ ěg tóg ti tỹ ěg mý nén ũ há tó ja ěn venh ke tũ pĕ nĩ vĕ sir. ěg vóg kónān jé tóg ke mũ vĕ sir, kĩ tóg ěg mý nén ũ há nĩm ke tũ nĩ vĕ sir. Kĩ tóg ěg mý: “ha inh ki rā,” henh ke tũ nĩ vĕ gé. Topĕ tỹ ěg vóg kónān ke mũ hā ne kǎ nĩ vĕ', ti vĩ mranh tugrĩn. ¹⁶ Hā ra

tóg ęg mý: “ha inh ki rã, sý ājag mý nén ũ há ěn han jé, ājag tý inh ki ge tugrĩn,” he ja nĩgtĩ. Tĩ tý ęg jagāgtān hã vë. Topẽ tóg Abraão krẽ kar ag mý vin sór mũ, ā tý nén tó ja ěn. Tĩ pi(jé) Judeu jykre han mũ ag tãvĩ mý vin sór mũ. Ũ tý Abraão ri ke Topẽ ki ge mũ ag mý tóg vin sór mũ gé, Topẽ ti. Ếg kar jóg'jóg ve vỹ tý ti nĩ, Abraão ti. ¹⁷⁻¹⁸Topẽ hã ne ti mý: “ā krẽ tý sóg povo e hyn han ke mũ,” he ja nĩ, hã kỹ tóg tý ęg kar jóg'jóg ve pẽ nĩ. Rãn kỹ ti nĩ, Topẽ vĩ rãn ki. Kỹ tóg ti vĩ tag kri fi ja nĩgtĩ, Abraão ti, ā tý gĩr ve vãnh nĩ ra, ti kófa nĩn kỹ. Ũn ter mũ ag rĩnrĩr mãn han ki kanhró tóg nĩ, Topẽ ti. Kỹ tóg nén kar han ki kanhró nĩgtĩ gé. Nén ũ tóg tũ tĩ ver, hã ra Topẽ tóg nén ũ kar han tĩ, ā vĩ tý. Hã kỹ tóg Abraão mý ti kósin ke tó ja nĩgtĩ gé. Kỹ Abraão tóg ti vĩ kri fi ja nĩgtĩ. Ver tóg kósin ja tũ nĩ, ā kófa nĩ ra, hã ra tóg Topẽ vĩ kri fi ja nĩgtĩ, Topẽ tý ti mý: “ā krẽ tý sóg povo e hyn han ke mũ,” he ja tag to. ¹⁹⁻²⁰Topẽ tý ti mý tag tó kỹ tóg 100 (ke) anos pétẽm, Abraão ti. Sĩ há ti nĩ ja nĩgtĩ, ti prũ tý Sara fi ke gé. Gĩr han vãnh fag nỹtĩ, ěn kã. Ěn hã kã Topẽ tóg ti mý ti krẽ e hyn han ke tó ja nĩgtĩ. Kỹ tóg ti vĩ kri fi ja nĩgtĩ, to krónh ke tũ ja tóg nĩgtĩ. “Hỹ mý vỹ?” he ja tũ ti nĩgtĩ, Topẽ vĩ tag to. Tĩ vĩ kri fi kỹ tóg Topẽ to: “ũn mág vỹ tý ti nĩ,” he ja nĩgtĩ. ²¹“Topẽ vỹ ā tý nén tó ja han ki kanhró nĩ,” he ja ti nĩ, Abraão ti, to krónh ke tũ nĩn kỹ. ²²Tag hã tugnĩn tóg Topẽ mý tý ũn há nĩ, ti tý ā fe tý ti ki rãn kỹ.

²³Topẽ vĩ tó tĩ ũ tóg Abraão to rãn ja nĩ, Topẽ vĩ rãn ki, ti tý Topẽ mý tý ũn há nĩ ti. ²⁴Hã ra tóg ęg to rãn ja nĩ gé. Topẽ mý ęg tóg tý ũn há nỹtĩn ke mũ gé, Abraão ri ke, ęg tý ti ki ge kỹ. Hã kỹ tóg ęg Senhor tý Jesus rĩn mãn ja nĩgtĩ, ti ter ja tá. ²⁵Ếg jagfý tóg ter ja nĩ, Jesus ti, ti tý ęg tý Topẽ vĩ mranh tý tũg' he jé. Hã jé Topẽ tóg ti fẽg ja nĩ. Kỹ tóg ti rĩn mãn ja nĩ gé, ti tý ęg mý vãnh pãte fón jé, ęg tý ti vĩ mranh ja ti.

Topẽ tý ęg to jũ mãn ke tũ

5 Kỹ tóg ęg mý vãnh pãte fón mũ sir, ęg tý Jesus Cristo ki ge kỹ nỹtĩn kỹ. Kỹ ęg tóg jatun mý nỹtĩ, Topẽ tý ęg to jũ mãn tũ nĩn kỹ, ęg Senhor tý Jesus Cristo tugrĩn. ²Tĩ hã tugnĩn Topẽ tóg ęg jagāgtān tĩ. Tag tugrĩn ęg tar nỹtĩ sir. Kỹ tóg ęg mý sér tĩ gé. Topẽ vỹ ęg tý ũn mág han ke mũ, ti tý tý ũn mág nĩ ěn ri ke han jé tóg ke mũ, kỹ tóg ęg mý sér tĩn mũ sir. ³Ver ęg tóg ti jagy vég tĩ, tag ki. Hã ra tóg ęg mý sér tĩ gé, ęg tý ti jagy vég mũ ra. Ếg tý ti jagy vég mũ tag ne ęg tar han ke mũ, komẽr hã. ⁴Ếg tar nỹtĩn kỹ ęg ti tovãnh sór tũ nĩ ki kanhró nỹtĩ sir. Ếg tý ti tovãnh sór tũ nỹtĩn kỹ ęg tóg Topẽ tý ęg mý nén tó ja kar venh ke mũ, ti tý ęg mý nén ũ há ven ke ěn ti, tá. ⁵Ếg pi(jé) venh ke tũ nĩ, Topẽ tý nén tó ja ěn ti. Ếg mý tóg ā kuprĩg jẽnẽ huri, ti tý tý ęg jagrẽ nĩ jé. Ếg jagrẽ tag vỹ ęg mý: “Topẽ vỹ ā to há nĩ,” he tĩ. Tĩ hã tugrĩn ęg ki kanhró nỹtĩ, ęg tý Topẽ tý ęg mý nén tó ja ěn venh ke ki.

⁶Jykre pãno ęg nỹtĩ, krój ęg nỹtĩ. Ếg tý ver kórég nỹtĩ ěn kã Cristo ne ęg jagfý ter ja nĩgtĩ. ⁷Tĩ jãvo ęg kã ũ tóg ęg jagfý ter ke tũ nĩ. Ũn jykre hã jagfý ter ke tũ ęg nỹtĩ. ⁸Ếg jãvo Cristo vỹ ęg jagfý ter ja nĩ, ęg tý tý Topẽ vĩ mranh jafã nỹtĩ ra. Hã ki ęg ki kanhró nỹtĩ, Topẽ tý ęg to há tãvĩ nĩ ti. ⁹Kỹ Topẽ tóg ęg mý vãnh pãte fón mũ sir, Jesus tý ęg jagfý ter ja tugnĩn, ti kyvãnh tugrĩn. Kỹ tóg Topẽ tý vãnh kar to jũnh ke kurã ěn ki ęg kren han ke mũ gé, ha mẽ. ¹⁰Ếg tý ver ti kato tẽ nỹtĩ ra Topẽ kósin tóg ęg jagfý ter, kỹ Topẽ tóg ęg to há nĩ, ęg to jũ mãn tũ ti nĩ. Kỹ tóg ęg to há nĩ ha. Kỹ tóg kurã ěn kã ęg kren han ke mũ gé, ti rĩr jẽn kỹ, ti kósin ti. ¹¹Kurã ěn kã tóg ęg kren han ke mũ, hã ra tóg ũri ęg to há nĩ gé, kỹ tóg ęg mý sér tĩ. Ếg Senhor tý Jesus Cristo tugnĩn ke vë. Tĩ hã ne Topẽ tý ęg to há nĩn ke

han'. Ti hã ne Topê tỹ ãg to jũ tỹ tũ' he mũ'.

**Adão vỹ Topê vỹ mranh vén,
Jesus vỹ ki króm kãn**

¹² Ha vé, ùn pir vỹ Topê vỹ mranh vén, kỹ Topê vỹ mranh vỹ kã nĩ nĩ sir. Ti vỹ mranh tugrĩn tóg ter ja nĩ gé, ù tỹ ti vỹ mranh vén mũ ãn ti. Û tỹ ti vỹ mranh vén ja ãn ri ke ãg nỹtĩ, Topê vỹ mranh kãn ja ãg tóg nĩ gé, ãg tỹ tỹ ùn ve nón ke nỹtĩn kỹ. Kỹ ãg tóg kãgter kãn ke mũ gé, Topê vỹ mranh kỹ. ¹³ Topê tỹ ãg jyvẽn to hã ag tóg ti vỹ mranh ja nĩgtĩ gé, hã ra ag tóg vẽnħ jykre kórég to: “Topê vỹ mranh vẽn,” he ja tũ nĩ ver, ag tỹ Topê tỹ ãg jyvẽn tĩ ãn mẽ ja tũ nĩn kỹ, Moisés tỹ Topê vỹ rãn ja to hã. ¹⁴⁻¹⁵ Ge ra ag tóg kãgter ja nĩ, ãn to. Adão vỹ ter, ti nón ke ag vỹ kãgter, Moisés mur to hã. Adão ne Topê tỹ ti mỹ ka kanẽ to: “ko tũg nĩ,” he ja ãn ko ja nĩgtĩ'. Ti nón ke ag vỹ Topê vỹ mranh gé, hã ra ag pi(jé) Adão tỹ Topê vỹ mranh ja ãn ri ke hyn han ja nĩgtĩ'. Ge ra ag tóg kãgter. Kỹ ãg ùri kãgter tĩ gé, ãg tỹ ùn ve ãn nón Topê vỹ mranh kỹ.

Ùn pir tỹ Topê vỹ mranh vén ja tugrĩn ãg tóg kãgter kãn ke mũ. Ùn ve tỹ ãg jo vẽnħ jykre kórég han jan hã vẽn. Ti jãvo ti nón ke ãn ti, Jesus hã vỹ ãg mỹ vẽnħ jykre há nĩm ke mũ. Ti tugnĩn Topê vỹ ùn e tãvĩ jagãtãn ke mũ sir. ãg mỹ tóg nẽn tỹ hẽn ri ke hyn han ke mũ sir, kỹ tóg presente há tãvĩ ri ke nĩ sir, ùn pir tugrĩn, hã vỹ: Jesus Cristo, he mũ. Kỹ Jesus tỹ ãg mỹ vẽnħ jykre há nĩm mũ ãn vỹ ùn ve tỹ ãg mỹ vẽnħ jykre kórég nĩm ja ãn kãfór nĩ. ¹⁶ Ûn pir tỹ Topê vỹ mranh vén ãn tugnĩn ãg kãgter kãn ke mũ. Topê vỹ mranh pir tugrĩn tóg ãg vóg kónãn kãn ke mũ. Hã ra tóg ãg mỹ presente ri ke han sór mũ ha. ãg jagãgtãn tóg tĩ, ãg tỹ ti vỹ mranh tỹ hẽn ri ke han ja ra, kỹ tóg ãg mỹ vẽnħ pãte fón mũ gé sir. ¹⁷ Ûn pir tỹ Tope vỹ mranh vén ja tugnĩn ãg kar kãgter kãn ke mũ. Hã ra tóg ùn pir ù tu-

grĩn ãg jagãgtãn ke mũ ha, kỹ tóg ãg mỹ vẽnħ pãte fón mũ. Kỹ tóg ãg kugrynh ke mũ. ãg mỹ presente ri ke han hã vẽn. Kỹ ãg tóg rĩnrĩr mãn ke mũ gé, kỹ ãg tóg tá tỹ ùn mág nỹtĩn mũ sir, ùn pir tugnĩn, hã vỹ: Jesus Cristo, he mũ. Hã ki Jesus tỹ ãg mỹ vẽnħ jykre há nĩm mũ tóg ùn ve tỹ ãg mỹ vẽnħ jykre kórég nĩm ja ãn kãfór nĩ.

¹⁸ Hỹ, ùn pir tỹ Topê vỹ mranh vén ja tugrĩn Topê tóg ãg vóg kónãn kãn ke mũ sir. Ri ke ti nĩ, Jesus tỹ ãg kren han mũ ti. Ûn pir tỹ Topê vỹ ki króm kãn tugnĩn Topê tóg ãg kar jagãgtãn ke mũ sir, kỹ tóg ãg mỹ vẽnħ pãte fón ke mũ, ãg kãgter mãn tũ nĩ jé, ãg kuprĩg ti. ¹⁹ Ûn pir tóg Topê vỹ han ja tũ nĩ, kỹ ãg kar vỹ Topê vỹ mranh tĩ sir, ti nón. Kar kỹ ùn pir vỹ Topê vỹ han kãn ja nĩgtĩ, kỹ Topê tóg ti tugrĩn ãg mỹ vẽnħ pãte fón kãn ke mũ gé sir. ²⁰ Kỹ Topê tóg Moisés tỹ ãg jyvẽn ja nĩgtĩ, hã kỹ tóg rãn ja nĩ. Kỹ ãg tóg ti vỹ mẽ kỹ ãg tỹ Topê vỹ mranh e han ja ãn ki kanhrãn mũ sir. ãg tỹ ti vỹ mranh e tãvĩ nĩ ra Topê tóg ãg jagãgtãn kãfór han mũ gé sir, ²¹ ti tỹ ãg jykre kugrynh jé sir. Nũgme ki ãg tóg vár kãn ke mũ vẽn, inferno ki, ãg tỹ Topê vỹ mranh to. Jagy ti nĩ. Hã ra Topê tóg ãg jagãgtãn kãn ke mũ, kỹ tóg ãg kugrynh ke mũ, kỹ ãg rĩr krỹg ja tũ venħ ke mũ, nũgme ki vár ke tũ ãg nỹtĩ, inferno ki. Topê tỹ ãg jagãgtãn hã vẽn, ãg Senhor tỹ Jesus Cristo tỹ ãg jagfy ter ja tugrĩn ken hã vẽn.

Jesus Cristo tỹ ãg jykre si tũg

6 Kỹ Judeu ù hỹn inh mỹ: “kỹn hỹn há nĩnh mũ, ãg tỹ Topê vỹ mranh kỹ,” he sór mũ. “Kỹ tóg ãg jagãgtãn kãfór han ke mũ gé, ãg tỹ mranh mág kỹ,” he sór ag hỹn mũ. ² Vó, há tũ pẽ ti nĩ. Kórég ti nĩ. Ti ki ge kỹ ãg tóg vẽnħ jykre tãg han tĩ, kỹ ãg jykre si tóg tũ tĩ ha, ti tỹ ãg jykre si tỹ tũ' hen kỹ.

³ Ha vé, vẽnħ kype kỹ ãg nỹtĩ. Batismo tag vỹ ge nĩ, ha mẽ. ãg tỹ Cristo ki rã

to ken hã vê. Cristo vỹ ter ja nĩ. Ter kỹ tóg ãg jykre si tỹ tũ' hé. ⁴Tũg kỹ tóg ti mré vènh kej kākā nỹ ri ke han mũ gé, ãg jykre si ti. Kỹ Cristo vỹ rĩr măn, ter kar kỹ, Topê tỹ ti rĩn măn kỹ. Tar ti nĩ, Topê ti, hã kỹ tóg ti rĩn măn. ãg tỹ ti mré rĩr măn ri ke ti nĩ, hã vỹ: vènh jykre tãg to tar nĩ, he mũ. Batismo to ken hã vê.

⁵ ãg jykre si tỹ tóg tũ' hé, ti ter kỹ, kỹ ãg jykre tãg tóg nỹ ha, ãg tỹ ti mré rĩnrĩr nỹtĩn kỹ, ti rĩr măn ên ri ke. ⁶ Ti tỹ cruz to sa kỹ ãg jykre si tóg ti mré to sa ri ke han gé, kỹ tóg tũ' he mũ, ãg tỹ ti vỹ mranh măn tũ nĩ jé. Topê vỹ mranh jafã vỹ tỹ ãg nỹti ja nĩgtĩ, hã kỹ tóg tỹ tũg' he ja nĩ, Jesus Cristo ti. Hã kỹ ãg tóg ũri Topê vỹ mranh tĩ ag ri ke tũ nỹti ha. ⁷ ãg jykre si tũg kỹ ãg tóg jykre kuryj nỹti ha, ha mẽ, kỹ ãg tóg mranh sór măn tũ nĩ ha. ⁸ Cristo vỹ ãg jykre si tỹ tũg' hé, ti ter kỹ. Kỹ tóg ãg mỹ vènh jykre tãg han mũ gé, rĩr măn kỹ, kỹ ãg tóg ti mré jykre tãg ên hã mĩ mũnh mũ. Vènh vỹ há to ken hã vê.

⁹ Cristo ne rĩr măn', ter kar kỹ. Kỹ tóg ter măn ke tũ nĩ ha. ũ vỹ ti tén măn ke tũ pẽ nĩ ha. ¹⁰ Ter ja ti nĩ. Ti ter ja vỹ pĩr nĩ, ãg tỹ Topê vỹ mranh ên tũgnĩn. Kỹ tóg rĩr jẽ nĩ sir, Topê mỹ, ti tỹ Topê tũ han kãn jé. ¹¹ Kỹ ti ri ke han nĩ. Topê vỹ mranh tũg nĩ, ãg jykre si ter kỹ nỹn kỹ. Topê jykre hã han nĩ, ãg tỹ ti tũ han kãn jé, ãg tỹ Jesus Cristo ki ge kỹ nỹtĩn kỹ.

¹² ãg jykre vỹ Topê vỹ mranh sór mũ, ãg jykre ter ke tag. ãg jykre tỹ nén to én mũ ên han tũg nĩ, Topê vỹ mranh tũg nĩ. ¹³ Kejẽn ãg tóg ãg pẽn tỹ, ãg nĩgẽ tỹ, ãg nũnẽ tỹ, ãg há ki nỹti kar tỹ Topê vỹ mranh sór mũ. ãg tỹ mranh kỹ ãg tóg ãg há tỹ vènh jykre pãno han ja nỹtĩgtĩ, Topê kato tẽ ja nỹtĩgtĩ. Kỹ ke tũg nĩ. Topê mỹ vènh fẽg nĩ. ãg jykre si ter kỹ, ãg jykre tãg nỹtĩn kỹ Topê mỹ vènh fẽg kãn nĩ, ti jykre hã han sór mĩnĩ, ãg jykre tỹ, ãg há ki nỹti kar tỹ. ãg tỹ ti mỹ vènh fẽg kỹ ãg tóg ti jykre há

han kãn ke mũ sir. ¹⁴ Kỹ ãg tóg ũri Topê vỹ mranh tĩ ag ri ke tũ nỹti ha, Topê tỹ ãg jagãgtãn kỹ, ti tỹ ãg tar han kỹ. Ti tỹ ãg jyvẽn ja ên tũgnĩn tóg ãg vóg kónãn ke mũ vê, ãg tỹ mranh kỹ, hã ra tóg ãg jagãgtãn mũ ha.

Jesus Cristo tỹ ãg jykre tãg

¹⁵ Kỹ Judeu ag hỹn inh mỹ: “kỹ Topê vỹ ãg tỹ ti vỹ mranh mũ ra ãg vóg kónãn măn ke tũ nĩ. Kỹ ãg hỹn jatun mỹ mranh mũ,” he sór mũ. “ãg jagãgtãn ti tĩ, hã kỹ tóg tỹ nén ũ tũ nĩ, ti vỹ mranh mũ ti,” he sór ag hỹn mũ. Hã tũ vê hã ra. Kórég ti nĩ, ãg tỹ ti vỹ mranh kỹ. ¹⁶ ãg tỹ ũ mỹ vènh fẽg kỹ tóg tỹ ãg patrão nĩ, kỹ ãg hã vỹ tỹ ti camarada nỹti. Ri ke ti nĩ, ãg tỹ Topê vỹ mranh sór kỹ. Ti vỹ mranh jafã vỹ tỹ ãg nỹti, ên kã. ãg tỹ Topê vỹ kri fig tĩ nĩn kỹ ãg tóg ti mỹ há nỹti sir. ¹⁷ Vãsỹ ãg tóg tỹ Topê vỹ mranh jafã ja nỹtĩgtĩ. Hã ra ãg tóg ũri Topê vỹ kri fig tĩ ha, ãg fe tỹ ti ki ge kỹ. ãg tỹ Topê vỹ mẽ ja ên kri fig ãg tóg tĩ, kỹ sóg Topê mỹ vỹ há han tĩ, ãg to. ¹⁸ Topê vỹ ãg jykre kugrynh, ãg tỹ tỹ ti vỹ mranh jafã tũ nỹti jé, ũri. Kỹ ãg tóg tỹ Topê krẽm ke nỹti, ãg tỹ tỹ ti jykre kuryj mĩ mũ jafã nỹti jé, ũri.

¹⁹ ãg mỹ sóg ãg tỹ tỹ ti vỹ ki króm jafã nỹti tag tó mũ, comparação han kỹ, ãg tỹ to ãg tỹ tỹ ũn há mỹ vènh fẽg ki kãnhró nỹti jé, hã vỹ: Topê, he mũ. Vãsỹ ãg tóg vènh jykre pãno han sór ja nỹti, nén ũ kavěj ti, nén ũ kórég kar ti. Tag han kỹ ãg tóg ũn kórég mỹ vènh fẽg ja nỹti. ũri Topê mỹ vènh fẽg kãn, ãg tỹ tỹ ti tũ nỹti jé, vènh jykre kuryj hã han jé sir. ²⁰ Vãsỹ, ãg tỹ tỹ Topê vỹ mranh kỹ nỹtĩn kỹ vènh jykre há tóg ãg mỹ tũg ja nĩ. ²¹ Kỹ ãg ne han ja nỹti, tempo ên kã? Vènh jykre kórég tãvi han ja ãg tóg nỹti. ãg tỹ ãg jykre si to jyrkẽn kỹ tóg ãg mỹ'a tĩ, ũri. Vènh jykre tag tũgnĩn ãg nũgme ki vár kãn ke mũ vê, hã kỹ tóg ãg mỹ'a tĩ, ãg tỹ ti kórég han

ja to jykren kŷ. ²² Ūri ājag tóg kygvar kŷ nŷtī, mŷr, ha mē, Topē vī mranh ja ēn tŷ tóg tūg' he ja nī. Topē mŷ ājag vēnh fēg kŷ nŷtī. Ājag tŷ nēn han mŷ vŷ tŷ ti tū nī, ti jykre kuryj, kŷ ājag tóg ter ke tū nī ha, ājag kuprīg vŷ rīr nī ha. ²³ Topē vī mranh tugrīn ēg nūgme ki vār ke mŷ vē. Topē tŷ ēg vóg kónān hā vē. Hā ra tóg ēg jagāgtān mŷ, kŷ tóg ēg mŷ rīr krŷg ja tū ven ke mŷ. Ti tŷ ēg mŷ presente han hā vē, hā vŷ: ēg tŷ ēg rīr krŷg ja tū venh ke, he mŷ, ēg Senhor tŷ Jesus Cristo tugnīn.

Vēnh prŷg to comparação

7 Inh kanhkā', Topē tŷ vāsŷ ēg mŷ vēnh jykre nīm ja ēn ki kanhró ājag tóg nŷtī, Moisés tŷ rán ja ēn ti. Ēg rīr nŷtīn kŷ ēg tóg vēnh jykre ēn han kŷ nŷtī, ēg ter kŷ tóg ēg mŷ tū' he mŷ, vēnh jykre ēn ti. ² Ri ke ti nī gé, ēg prŷ fi mré. Fi mén rīr jēn kŷ fi tóg tŷ ti tū jē, fi mén tū. Ti ter kŷ fi tóg tŷ ti tū tū jē sir, ti tūg kŷ. ³ Fi mén rīr jēn kŷ fi tóg tŷ ti tū jē. Fi tŷ ti rīr tī ra ū mré nŷ kŷ fi tóg ā mén tū mré nŷ mŷ. Ti ter kŷ fi tóg mén tū jē sir, kŷ, fi tŷ ū mré tūg sór kŷ tóg sir há tī, fi mén vē sir, fi tŷ ū mré tī mŷ ēn ti. ⁴ Ri ke ti nī, Topē tŷ vāsŷ ēg mŷ vēnh jykre nīm ja ēn ti. Cristo ter kŷ tóg ēg jykre si tŷ tūg' hé gé. Hā kŷ tóg ēg tŷ ti tŷ ēg jyvēn ja ēn mranh ja ra tóg ēg vóg kónān ke tū nī sir. Vāhā ēg tóg tŷ Cristo tū nŷtī ha, ū tŷ ter kar kŷ rīr mān ja ēn tū vŷ tŷ ēg nŷtī. Kŷ ēg tóg ūri Topē jykre hā han sór mŷ ha, ti mŷ sér tī jē. ⁵ Vāsŷ ēg tóg ēg tŷ nēn to én ja ēn hŷn han tī ja nŷgtī. Kŷ ēg tóg vēnh jykre kavéj han kān ja nŷgtī, ēg jykre tŷ, ēg há ki nŷtī kar tŷ ke gé. Ēg jykre kavéj tugrīn ēg nūgme ki vār ke mŷ vē. Topē tŷ ēg jyvēn mŷ jēmēn kŷ ēg tóg ki kanhrān mŷ, ēg tŷ ti vī mranh mŷ tag ki. Jérīn mŷ ēg tóg mranh mān', mranh mān' he mŷ sir. ⁶ Hā ra tóg ēg mŷ tū tī ha, ēg tŷ Topē tŷ vāsŷ ēg jyvēn jēmēg mŷ ra mranh mŷ ti, Cristo tŷ ter kŷ ēg jykre si tŷ tūg' hen kŷ. Topē vī mranh sór tū ēg

nŷtī ha. Ēg kygvān ti huri, kŷ ēg tóg Topē tū hā han tī sir, Topē kuprīg tŷ ēg krīn kŷ. Kŷ ēg tóg Topē tŷ ēg jyvēn to kanē jur han mān ke tū nī ha. Ki króm sór ēg nŷtī ha. Ēg kanē jur pijé'. Topē kuprīg tŷ ēg mŷ vēnh jykre tág nīm jan hā vē.

Vēnh jykre kórég han kŷ ēg Topē vī mranh tī

⁷ Kŷ Judeu ag hŷn inh mŷ: “kŷ Topē tŷ vāsŷ ēg jyvēn mŷ ēn mŷ kórég nī?” he sór mŷ. Vó, kórég tū ti nī. Ēg jyvēn ja tóg nŷgtī, kŷ ēg tóg ti vī mē kŷ: “vēnh jykre kórég han kŷ inh hŷn tóg ti vī mranh tī,” he tī. Topē vŷ ēg mŷ: “nēn ū to én tūg nī,” he ja nī. Tag jēmēn kŷ ēg tóg ū tū to én tag tŷ Topē vī mranh nī ki kanhró nŷtī. ⁸ Topē tŷ ēg jyvēn mŷ ra ēg tóg ti vī mranh sór mŷgtī, Jérīn mŷ. Ti tŷ ēg mŷ: “tag han tūg ra,” he mŷ ra ēg tóg han sór tī, hā kŷ ēg tóg ū tū to én sór tī. Topē tŷ ēg jyvēn tū ra ēg ki kanhrān ke tū nī vē, vēnh jykre pāno tŷ ti vī mranh nīn ki. ⁹ Vāsŷ ēg tóg Topē tŷ ēg jyvēn mŷ ēn mēg tū ja nŷtīgtī. Véké ēg tóg mŷ ja nŷtīgtī, jatun mŷ. Kŷ tóg vāhā ēg mŷ ā vī jēnē ja nī, Topē ti, ēg jyvēn kŷ. Ēn mē kŷ ēg tóg ēg tŷ ti vī mranh ja ēn ki kanhrān ja nŷtīgtī, ēg tŷ to nūgme ki vār ke mŷ mré hā. Kŷ ēg tóg kanē jur nŷtī ha. ¹⁰ Topē vŷ tóg ēg jyvēn, ēg tŷ nūgme ki vār ke tū nŷtī jē. Jérīn mŷ ēg tóg ki vār ke mŷ, ēg tŷ ti tŷ ēg jyvēn kri fig tū nīn kŷ. Hā ve ēg tóg, ēg tŷ ti tŷ ēg jyvēn mē kŷ. ¹¹ Ēg tŷ Topē vī mranh kŷ ēg tóg Topē tŷ ēg jyvēn mŷ kato tē mŷ. Kŷ ēg nūgme ki vār ke mŷ sir, ēg tŷ: “tī hŷn tŷ nēn ū tū nī, sŷ ti vī mranh mŷ ti,” he mŷ ra.

¹² Hā kŷ Topē tŷ vāsŷ ēg jyvēn mŷ ēn vŷ há nī, ti tŷ tŷ Topē tū nīn kŷ. Kŷ Topē tŷ vāsŷ ēg mŷ vēnh jykre nīm ja ēn vŷ kuryj nī gé. Há ti nī, Topē tū vŷ tŷ ti nī gé.

¹³ Kŷ Judeu ag hŷn inh mŷ: “ēg mŷ vēnh jykre há tugnīn nūgme ki vār ke mŷ?” he sór mŷ. Vó, ke tū vē. Topē vī

mranh tugrîn êg nûgme ki vár ke mû. Nén û há ja vē, Topê tỹ êg jyvên ja ti, há ra êg tóg mranh. Êg tỹ Topê tỹ êg jyvên mē kỹ êg tóg êg jykre kórég to: “ti vĩ mranh ja inh nĩgtĩ,” he tĩ. Há ki êg tóg ki kanhrân mû, êg tỹ Topê vĩ mranh tag tỹ tỹ nén û kórég tâvĩ nĩn ki. ¹⁴Topê tỹ êg jyvên mû ên vỹ tỹ ti tũ nĩ, ti kuprĩg vỹ to êg kanhrân tĩ. Jérĩn mỹ êg tóg êg tỹ nén to én mû ên han sór tĩ, êg krój nỹtĩn kỹ. Ti vĩ mranh kỹ êg tóg tỹ ti vĩ mranh jafã nỹtĩ.

Êg tỹ ti kórég han sór tũ ra êg tóg han ti

¹⁵Êg jykre tóg inh mỹ e tĩ. Sỹ nén to há ên han tũ sóg nĩgtĩ. Sỹ nén to há tũ ên há han sóg tĩ mỹr, kỹ tóg inh mỹ e tĩ. ¹⁶Êg tỹ ti kórég han sór tũ ra êg tóg han tĩ. Ti vĩ mranh mû vỹ êg mỹ kórég nĩ, kỹ êg tóg ki kanhrô nỹtĩ, ti tỹ êg jyvên há han ja ên ki. Ge ra êg tóg mranh tĩ. ¹⁷Êg jykre si há vē. Êg tỹ êg jykre si továnh kãn ja tũ nĩn kỹ êg tóg ti vĩ mranh tĩ, êg tỹ mranh sór tũ (há) ra. Êg jykre tág tũ vē, tag ti. ¹⁸Êg pi(jé) vênh jykre há to tar nỹtĩ'. Vênh jykre kórég vỹ ver êg kākã nĩ nĩ. Vênh jykre kuryj tóg êg mỹ sér tĩ, ge ra êg tóg ti pãno han tĩ, êg tỹ ùn há han sór mû ra. ¹⁹Hã kỹ êg pi(jé) vênh jykre há han tĩ', êg tỹ han sór mû ra'. Ti kórég há han êg tĩ, êg tỹ han sór tũ ra. ²⁰Êg tỹ nén han sór tũ ên han êg tóg tĩ, vênh vatánh tá. Êg jykre si há tugrîn êg tóg Topê vĩ mranh tĩ, êg tỹ továnh kãn ja tũ nĩn kỹ.

²¹Ha vé, êg jykre ti. Ûn há há han sór êg tóg mũgtĩ. Ge ra êg tóg ùn kórég há han tĩ, êg jykre si tỹ êg kākã nĩn kỹ. ²²Êg tỹ to jykrén há han kỹ êg tóg: “Topê tỹ êg jyvên mû vỹ há nĩ,” he ti. Êg mỹ tóg sér tĩ. ²³Êg tỹ há ra êg jykre to jykrén kỹ êg tóg vênh jykre kórég há han mũgtĩ ver, vênh vatánh tá. Kỹ êg tóg sir vênh jykre há kato tẽ mû, êg tỹ vênh jykre kórég han kỹ, vênh jykre há tỹ êg mỹ há nĩ (há) ra.

Ti vĩ mranh jafã vỹ tỹ êg nỹtĩ, êg tỹ Topê vĩ mranh to én kỹ, êg tỹ to én sór tũ ra. Êg kākã tóg nĩ nĩ, vênh jykre kórég ti. ²⁴⁻²⁵Êg tỹ to jykrén há han kỹ Topê tỹ êg jyvên tĩ ên tóg êg mỹ há tĩ, kỹ êg tóg han sór mû. Ge ra êg tóg ti vĩ mranh ja nĩgtĩ, kỹ êg tóg mranh măn', mranh măn' he tĩ sir, êg tỹ mranh sór tũ ra.

Jagy pẽ ti nĩ. Kórég êg nỹtĩ, êg tỹ ùn há han ki kagtĩg nỹtĩn kỹ. Nũgme ki vár kãn jé êg tóg ke mũ mỹr. Û nỹ hỹn êg kren han ki kanhrô nĩ, vênh jykre kórég tag to? Êg Senhor tỹ Jesus Cristo há vē. Ti há vỹ êg kren han mû. Kỹ êg tóg Topê mỹ: “há ti nĩ, ã kósĩn tỹ êg kren han mũ ti,” he tĩ. Há kỹ êg tóg vėsóg ki êg jykre si tỹ tũg' he ki kagtĩg nỹtĩ. Jesus há tugnĩn Topê tóg êg mỹ vênh pãte fón tĩ, kỹ êg tóg ti mỹ há nỹtĩ.

Topê kuprĩg tỹ êg jagrẽ

8 Kỹ tóg, êg tỹ Jesus Cristo ki rã kỹ Topê tóg êg vóg kónãn măn ke tũ nĩ ha. ²Vênh jykre tág vỹ êg kākã nĩ ha, Topê kuprĩg tugrîn, êg tỹ Jesus Cristo ki ge kỹ nỹtĩn kỹ. Ti tỹ tỹ êg jagrẽ nĩn kỹ êg rĩnrĩr nỹtĩ, kỹ êg kygvar kỹ nỹtĩ sir, Topê vĩ mranh jan ki. Nũgme ki vár ke tũ êg nỹtĩ ha. ³Topê tỹ vãsỹ êg jyvên mû ra êg krenkren ja tũ nĩ ver, êg tỹ ki króm kãn ja tũ nĩn kỹ, êg krónhkrój nỹtĩn kỹ. Há kỹ Topê tóg ã kósĩn jẽnẽ ja nĩ. Û tỹ Topê vĩ mranh jafã ri ke tóg mur, êg ri ke, há ra tóg mranh ja tũ nĩ inhã. Kỹ tóg êg jagfy ter ja nĩ, êg há tỹ ti vĩ mranh ja tugrîn. Topê tỹ ti vóg kónãn há vē, êg nỹtĩg ja ki. ⁴Vãhã êg tóg Topê tỹ vãsỹ êg jyvên mû ên ki króm há nỹtĩ, Topê kuprĩg tỹ tỹ êg jagrẽ nĩn kỹ. Kỹ êg tóg êg tỹ nén to én mû ên han măn ke tũ nỹtĩ sir, êg jagrẽ há tỹ êg tar han mũ tugnĩn. ⁵Êg tỹ êg tỹ nén to én mû ên han sór kỹ êg tóg tỹ Topê vĩ mranh jafã nỹtĩ. Êg tỹ há ra Topê kuprĩg tỹ jagrẽ nĩn kỹ êg tóg ti há tỹ êg mỹ nén tó mû ên han tĩ. ⁶Êg tỹ nén to én mû ên han kỹ êg nũgme ki vár ke mũ vē. Êg tỹ

Topē kuprīg tỳ ěg mỳ nén tó mũ ěn han kỳ ěg tóg vènh jykre tåg han kỳ nýtĩ, kỳ ěg jatun mỳ mũgtĩ sir.

⁷ Ũ tỳ ěg tỳ nén to én mũ ěn han kỳ tóg Topē kato tē mũ sir. Ti pi(jé) Topē jykre han tĩ'. Han ki kagtīg tóg nĩgtĩ. Ěg jykre sin hã vè. ⁸ Ũ tỳ ěg tỳ nén to én mũ ěn han to tóg kórég nĩ, Topē ti. ⁹ Ag jãvo ajag tóg Topē kuprīg tỳ ajag mỳ nén tó mũ ěn hã han ti. Ěg tỳ nén to én mũ ěn han vánh ajag nýtĩ, Topē kuprīg tỳ tỳ ajag jagrē nĩn kỳ. Ũ tỳ Cristo kuprīg tỳ jagrē tũ nĩ ěn pi(jé) tỳ ti tũ nĩ'. ¹⁰ Cristo tũ vỹ tỳ ěg nýtĩ, kỳ tóg ěg kākã jẽ nĩ, Jesus Cristo ti, ã kuprīg tỳ. Kỳ ěg há vỹ ter ke mũ, ěg tỳ Topē vỹ mranh jan kỳ. Hã ra ěg tóg ěg rĩr krỹg ja tũ venh ke mũ, Topē tỳ ěg mỳ vènh pãte fón ja nĩn kỳ. ¹¹ Topē kuprīg vỹ tỳ ěg jagrē jẽ ha. Topē vỹ Jesus rĩn măn, ti ter kar kỳ. Ti tỳ Jesus rĩn măn kỳ tóg ěg há ter ke tag rĩn măn ki kanhró nĩ gé, ěg mỳ ěg há tåg han kỳ, ti kuprīg tỳ tỳ ěg jagrē nĩn kỳ.

¹² Inh kanhkã', Topē tũ vỹ tỳ ěg nýtĩ ha, ěg tỳ ti jykre hã han jẽ. Kỳ han tũg nĩ, ajag tỳ nén to én mũ ti. ¹³ Ěg tỳ nén to én mũ ěn han kỳ ěg nũgme ki vár ke mũ. Topē tỳ ěg jagrē vỹ ěg tỳ nén to én mũ tag tỳ tũg' he sór mũ. Ěg tỳ ti mré tỳ tũg' hen kỳ ěg vènh jykre tåg han kỳ nýtĩn mũ. ¹⁴ Ěg tỳ Topē kuprīg tỳ ěg mỳ nén tó tĩ ěn han kỳ ěg tóg tỳ Topē krē nýtĩ, Jesus jãvy ěg nýtĩ mỹr, ha mẽ. ¹⁵ Ěg tỳ tỳ Jesus jãvy nýtĩn kỳ ti pi(jé) ěg kanē jun ke mũ'. Ti kuprīg vỹ tỳ ěg jagrē nĩ, kỳ ěg tóg tỳ Jesus jãvy nýtĩ ha. Topē pi(jé) tỳ ěg patrão kórég ri ke nĩ'. Tỳ tóg ěg panh nĩ ha. Hã kỳ ěg tóg ti mỹ: "Aba," he tĩ, hã vỹ: "ẽg jóg," he mũ, ěg vỹ ki. Ěg jagrē hã jamēn kỳ ěg tóg ti mỹ: "ẽg jóg mág," he tĩ. ¹⁶ Topē kuprīg hã ne ěg mỳ tó tĩ', ěg tỳ tỳ Topē krē nýtĩ ti, Jesus jãvy. Hã kỳ ěg ki kanhró nýtĩ. ¹⁷ Ěg tỳ tỳ ti krē nýtĩn kỳ tóg ěg mỳ ã tũ nĩm kãn ke mũ gé, Topē ti. Jesus Cristo hã mỳ tóg nĩm kãn ke mũ, kỳ tóg ěg mỳ nĩm kãn ke mũ

gẽ sir, ěg kãke mré. Hã jẽ ěg tóg ti mré jagãgtar ke mũ gé, ti tỳ vènh jykre há to jagtar ja ěn ri ke. Kỳ ěg tóg ti mré tỳ ũn mág nýtĩn ke mũ gé, ěg jagtar kar kỳ.

Kanhkã ve jẽ ěg tóg ke mũ

¹⁸ Ha vé, tag ki kanhró sóg nĩ, ha mẽ. Kanhkã tá tóg sér pẽ tĩnh mũ. Tá ěg tóg tỳ ũn mág nýtĩn mũ. Kỳ ěg tỳ ũri ti tugnĩn jagãgtar mũ tag vỹ tỳ ěg mỳ nén ũ tũ pẽ nĩgtĩ, ěg tỳ tỳ ũn mág nĩnh ke to jykrén kỳ. ¹⁹ Topē vỹ ã krē tỳ tỳ ũn mág han ke mũ. Kỳ Topē tỳ ũn han mũ kar ag tóg tag hã ve sór mũ gé, bicho kar, ka kar, ěkré kar ke gé, nén kar ti. ²⁰ Nén kar vỹ jagãgtar nýtĩ, ũn ve tỳ Topē vỹ mranh tugrĩn. Vènh kókén ja tũ ti nĩ, Topē vỹ mranh ja tũ ti nĩ, hã ra tóg ũn ve tỳ Topē vỹ mranh ja tugnĩn jagtar nýtĩ, Topē tỳ ěg mré ti vóg kónãn kỳ, nén kar ti. ²¹ Hã ra Topē tóg ã tỳ ũn han mũ kar ag mỹ: "kejēn ajag jagtar măn ke tũ nýtĩ ha," he ja nĩ. Kỳ Topē tỳ Jesus jãvy ag tỳ ũn mág hyn han ke kurã ěn kã tóg nén kar tỳ há' henh ke mũ gé, kỳ tóg tũg măn ke tũ nĩ ha, nén kar ti. Nén kar vỹ há nýtĩn mũ, Jesus jãvy há nýtĩn ke ěn ri ke. ²² Ver tóg Topē tỳ ũn han mũ kar ag mỹ jagy tĩ, kỳ tóg fag tỳ fag kósĩn măn kỳ fag vènhkrēr ěn ri ke han tĩ, Topē tỳ ũn han kar ti, ti jagãgtar nýtĩn kỳ. ²³ Nén ũ kar tag vènhkrēr ri ke han ěg tóg tĩ gé, ěg tỳ ti jagy ven kỳ, ěg tỳ ti kuprīg tỳ jagre nýtĩ ra. Ěg jagrē to ěg tóg ki kanhró nýtĩ, ěg tỳ tá tỳ ũn mág nýtĩn ke ti. Ge ra tóg ver ěg mỹ jagy tĩ, tag ti ki, kỳ ěg tóg ti mré nýtĩ sór mũ. Kỳ ěg tóg venh ke mũ sir, ti tỳ ã krē pẽ mỳ nén nĩm ke mũ ěn ti. Hã jãvánh ěg tóg mũ. ěn kã tóg ěg mỹ ěg fár tåg han ke mũ, ěg fár ter ke tũ ti.

²⁴ Krenkren kỳ ěg nýtĩ, hã ra ěg tóg ver vég tũ nĩgtĩ, ěg krenkren kỳ nýtĩ tag, ěg fár tåg tag. Ěg tỳ venh há tóg tĩ. Hã jãvánh ěg tóg tĩ. Ěg tỳn jãvánh mũ ra ěg tóg ver vég tũ nýtĩ. Ěg tỳn ve kar kỳ ěg tóg ti jãvánh măn ke tũ nýtĩ ha. ²⁵ Hã

ra ãg tóg ver vég tú nýtí, há kýt ãg tóg ti jávánh mû ver. To krónh ke tú ãg tóg nýtí, ti jávánh to.

Topê kuprîg tý ãg jagfy ví

²⁶ Hã ra Topê kuprîg vỹ ãg tar han tí, ãg krój nýtín kýt. Kejên ãg ki kagtîg nýtí, ãg tý ne to vính ken ki, ãg tý Topê mré vémén kýt. Hã kýt tóg ãg jagfy ví tí, Topê kuprîg tí. Kejên ãg jêngér mág han tí, ãg tý nén ù to vính ken ki kagtîg nýtín kýt. Hã ra tóg ãg mré ví tí gé, ãg jagfy, Topê kuprîg tí. Tí ví ki kagtîg ãg nýtí, há ra tóg ãg jagfy ví' ví' he tí. ²⁷ Kýt Topê vỹ ãg tý nén ù to jykrén mû kar vég tí. Kýt tóg ã kuprîg tý nén tó mû tag ki kanhró nĩ gé. Tí jykre vỹ ti mỹ há nĩ, ti tý nén to ví mû tí, ãg jagfy, Topê tú kar ag jagfy. Topê tý nén ù han sór mû ên há to ví tóg tí, ti kuprîg tí.

²⁸ Ha vé, Topê to há ãg nýtí, há kýt ãg tý nén vég mû kar vỹ ãg tar han ke mû, ãg tý ti jagy vég mû mré há. Topê há vỹ ãg ki rîr mû, há kýt nén ù kar vỹ ãg tar han ke mû, ti tý ãg kuprêg ja nín kýt. ²⁹ ãg tý ti ki ge tûg ki tóg: “inh ki tóg rânhe ke mû, tag,” he ja nĩ, ki kanhró nín kýt. Kýt tóg ãg kuprêg ja nĩ gé, ãg tý ti kósín ri ke pẽ nýtí jé. Tí há vỹ tý Topê kósín pẽ nĩ inhã, ti kósín ve, kýt tóg tý ãg kãke nĩ gé sir, kýt ti jávy ag, ti ve fag vỹ e tăvĩ tăvĩ nýtính mû ha. ãg há vẽ sir. Topê tý nén to jykrén há vẽ. ³⁰ Hã jé tóg ãg kuprêg, kýt tóg ãg mỹ vênh ví jênẽ. Tí tý ãg mỹ vênh ví jênẽ kýt tóg ãg mỹ vênh pãte fón gé. ãg mỹ vênh pãte fón kýt tóg ãg tý ùn mág hyn han ke mû gé, ti mré, tá.

Topê tý ãg to há

³¹ Tag tóg inh mỹ e tí, sỹ to jykrén ke tóg inh mỹ tú tí. Topê vỹ tý ãg mré ke nĩ mỹr. Hã kýt ãg kato tê ù pi(jé) ãg tý hẽ ri kenh mû ha'. ³² Topê vỹ ã kósín pir fêg ja nĩ, ti tý ãg jagfy ter jé. Á kósín pir nenh ja tú tóg nĩ, há kýt tóg ãg mỹ nén ù há nenh ke tú pẽ nĩ, ti tý ã kósín pir

nenh ja tú nín kýt. ³³ Topê tý ãg kuprêg kýt tóg ù tý ãg kato ví sór mû ra tóg ag mỹ vênhmỹ tí. Topê há ne ãg mỹ vênh pãte fón ja nĩgtí'. ³⁴ Kýt ù ag tý ãg to: “kórêg ag nýtí,” he mû ra ãg tóg Topê mỹ há nýtí. Jesus Cristo há tóg ter ja nĩ, ãg jagfy, kýt tóg rîr măn ja nĩ gé. Topê pêgia tá tóg nĩ nĩ, ti rã há, kýt tóg ãg jagfy ví tí.

³⁵ Kýt ù pi(jé) Cristo tý ãg to jũ han ki kanhró nĩ. Tí fe vỹ tý ãg nýtí. Kejên ãg tóg nén ù jagy venh ke mû, ti tugrín. Kejên ãg kanẽ jur ke mû. Kejên ag tóg ãg vóg kónãn ke mû. Kejên ãg tóg kókinkîr ke mû. Kejên ãg tóg kur venh ke tú nĩ gé. Kejên ãg tóg kãgter kren ke mû. Kejên ag tóg ãg kãmĩ ù tên ke mû. Jérín mỹ ãg tóg Cristo továnh ke tú nĩ. Kýt tóg ãg továnh ke tú nĩ gé, Jesus Cristo tí. ãg to há nín kýt tóg nĩ nĩ. ³⁶ Kejên ãg tóg ti jagy tag vég tí, há kýt tóg rán kýt nĩ, ha mẽ: “ãg tý ã to há nýtí tugnín ag tóg ãg tén sór tí, kurã kar ki. Ag mỹ ãg tóg carneiro ri ke nýtí. Carneiro tânhe ãg tóg tí, ãg tý ko jé. Vênhe mẽg ri ke ãg nýtí, ag mỹ, ãg tý ã to há nýtí tugrín,” he ja tóg nĩ, Topê ví rá ki. Hã ra tóg ge nĩ. ³⁷ Hã ra tóg tý nén ù tú nĩ, ãg mỹ. Tí há ne ãg tar han tí', ù tý ãg to há tăvĩ nĩ tí. Hã kýt tóg ãg mỹ sér tí, ãg tý nén jagy vég mû ra, ti tugrín.

³⁸ Ha vé, tag ki kanhró sóg nĩ, ha mẽ. Nén ù pi(jé) Topê tý ãg to há nĩ tag tý tûg' henh mû', ha mẽ. ãg ter mû ra tóg ãg to há nĩ, ãg ter tú ra ke gé. Topê tý jênẽ jafã ag vỹ Topê tý ãg kato tê han ki kagtîg nýtí gé. Japo ag vỹ ti tý ãg kato tê han ke tú nĩ gé, ag tý han sór mû ra. Pã'i kar ag vỹ tag han ki kagtîg nýtí gé. ãg tý ùrĩ nén ù jagy vég mû ra ãg tóg ti továnh ke tú nĩ, kýt tóg ãg to jũnh ke tú nĩ gé, ãg tý kejên nén ù jagy tăvĩ vég mû ra. ³⁹ Kanhkã tân ag vỹ ti tý ãg to jũ han ke tú nĩ gé, nũgme tân ag ke gé, ag tý ti tý ãg to jũ han sór mû ra. Topê tý nén hyn han ja kar vỹ ti tý ãg to jũ (jé) han ke tú pẽ nĩ. ãg to há nĩ kýt tóg nĩ nĩ, ãg tý

êg Senhor tỹ Jesus Cristo ki ge kỹ nỹtĩn kỹ.

Topê tỹ Judeu ag kuprêg

9 Nén ù tó sór inh mũ gé, ha mẽ. Cristo vỹ ki kanhró nĩ, sỹ tónh ke mũ tag. Sỹ ki hã ke vễ, ón tũ sóg nĩgtĩ, kỹ Topê kuprêg vỹ inh mẽ: “ki hã ã tóg tó,” he ti gé. ²⁻³ Ha mẽ, inh mré ke ag to sóg fe kaj tãvĩ nĩ, Judeu ag to, ag tỹ Jesus kato tên kỹ. Fỹ sóg tĩ, sỹ ag mĩ êkrén kỹ, inh mẽ tóg vênh kaga jagy ri ke nĩ, ha mẽ. Kỹ, Topê tỹ ag jagfỹ inh kato tẽ ra tóg inh mỹ há tĩ vễ, Jesus tỹ êg jagfỹ ter ri ke, ag tỹ ti ki ge jé. Ti tỹ ag jagfỹ isỹ Cristo mré ke tũ han ra tóg inh mỹ há tĩ vễ. Tỹ ag tóg inh kanhkã pẽ nỹtĩ, ⁴ isỹ tỹ ag mré Israel krê nĩn kỹ. Tỹ ag tóg Topê krê ja nỹtĩ vễ, kỹ tóg ag mỹ ã jykre tar ven ja nĩ gé. Ag mré vênh jykre tỹ hẽn ri ke han ja tóg nĩgtĩ, ag jyvẽn ja tóg nĩgtĩ gé, kỹ ti vĩ tó tĩ ag vỹ rán ja nĩgtĩ gé, Topê vĩ ti. Ti jo ãn pẽ han ja ag tóg nĩgtĩ, Jerusalém tá, krêm nén ù kar pũn jafã. Ag mỹ tóg ã tỹ nén han ke ti kãmén ja nĩgtĩ. ⁵ Êg jóg'jóg ve ag, ù tỹ vãsỹ Topê mré vēmén tĩ ag vỹ ag jóg'jóg ve nỹtĩ gé, kỹ Cristo vỹ tỹ ag kã ù nĩ gé, ag kanhkã, ti tỹ ga kri tũg kỹ. Êg kri ke kar vễ, Cristo ti, Topê ti. Ti hã mỹ êg vĩ há han ke mũ, to êg krónh ke vánh nỹtĩ, ga kri, kanhkã tá ke gé, ti mỹ vĩ há han to. Amém.

⁶ Jesus kato tẽ ag tóg nỹtĩ ha, Israel ag, Topê tỹ ag jyvẽn ja ra. Hã kỹ tóg Topê tỹ ag mỹ tó há han ja tũ nĩ ve nĩ. Hã tũ vễ hã ra. Ag hã ne to jykrén há han ja tũ nĩ, ti tỹ ag mỹ tó há han ja ra. Êg tỹ to jykrén há han kỹ êg Israel ag jykre ki kanhrãn mũ, ha mẽ: Israel krê ù tóg tỹ Topê krê pẽ tũ nỹtĩ, ha mẽ. ⁷ Hã ra ag tóg: “Abraão vỹ tỹ êg jóg'jóg ve nĩ,” he tĩ, “hã kỹ êg tóg tỹ Topê krê nỹtĩ, Abraão tugnĩn,” he ag tóg tĩ. Kygnê kỹ ag tóg tag tó tĩ, ha mẽ. Topê tóg Abraão mỹ: “ã kósĩn tỹ Isaque krê vỹ tỹ ã krê pẽ nỹtĩnh mũ,” he ja nĩ. ⁸ Hã ra Abraão vỹ krê e han ja nĩgtĩ, kósĩn pir tũ

ti nĩ. Hã kỹ Abraão krê ù vỹ tỹ Topê krê tũ nỹtĩ, Abraão tỹ ag han ja ra. Û tỹ Topê ki ge kỹ nỹtĩ ag hã vỹ tỹ Topê krê nỹtĩ, Topê tỹ ùn kuprêg ja ag.

⁹ Topê vỹ Abraão mỹ: “prỹg tũg kỹ sóg ã venh kãtũg mãn ke mũ, kỹ Sara fi kósĩn vỹ kã nỹnh mũ sir, ha vemnĩ,” he ja nĩ. Topê tỹ Abraão mỹ Isaque mur ke tó jan hã vễ, ti tỹ Isaque hã kuprêg jan kỹ. ¹⁰ Kỹ tóg ge nĩ gé, êg tỹ Rebeca fi krê to jykrén kỹ, Isaque prũ fi. Krê vẽnĩ han ja fi nĩ, kỹ ag tóg tỹ êg jóg tỹ Isaque krê kar nỹtĩ, ùn vẽnĩ ja ag. ¹¹⁻¹² Kỹ ag mur tũg ki, ag tỹ ver nén ù han tũg ki Topê tóg ag mỹnh fi mỹ: “ùn mur vén ke mũ vỹ tỹ ù tỹ ti nón mur ke mũ ên krêm ke jẽnĩh ke mũ, ha vemnĩ,” he ja nĩ. Topê tỹ fi mỹ tó kã ag tóg nén ù há mré nén ù kórég han ja tũ nĩ ver. Ag mur tũg ki ke ja vễ. Topê tỹ êg mỹ ã jykre ven sór ja vễ, hã kỹ tóg ag mur tũg ki tag tó ja nĩ. ã tỹ nén to jykrén mũ ên han ti tĩ, Topê ti. Kỹ tóg ã tỹ ùn kuprêg sór mũ ên hã kuprêg tĩ gé, ag tỹ ver nén ù han tũg ki. ¹³ Hã kỹ tag tóg rán kỹ nĩ gé, Rebeca fi krê ên ag to, ha mẽ: “Jacó to inh há nĩ, hã ra sóg ti jo mur ja tỹ Esaú to kórég nĩ,” he ja tóg nĩ, Topê vĩ rán ki.

¹⁴ Kỹ Judeu ag hỹn inh mẽ: “Topê jykre vỹ há tũ nĩ,” he sór mũ. “Kuryj tũ ti nĩ, ti tỹ vėsóg ki nén to jykrén sór kỹ, ti tỹ ùn kuprêg mũ ên to,” he ag hỹn tĩ. Hã tũ vễ hã ra. ¹⁵ Hã kỹ tóg Moisés mỹ: “isỹ ùn jagãgtãn sór mũ ên hã jagãgtãn jé sóg ke mũ,” he ja nĩ, Topê ti. ¹⁶ Êg tỹ to vãsãn tũ vễ, êg tỹ to tar nĩnh ke tũ vễ. Topê tỹ vėsóg ki êg jagãgtãn hã vễ. ¹⁷ Hã kỹ ga tỹ Egito tá pã'i tỹ Faraó to tag tóg rán kỹ nĩ gé, ha mẽ. “Ùn tar vỹ tỹ inh nĩ,” he ja ti nĩ, Topê ti, Faraó mỹ. “ã tỹ sóg ùn tar han, vênh kar tỹ isỹ tỹ ùn tar nĩ tag ki kanhró nỹtĩ jé, isỹ ã vóg kónãn to, ã tar jẽ ra. Vênh kar tỹ inh jyjy mẽnĩh ke vễ, hã jé sóg ã fêg,” he ja ti nĩ, vãsỹ, Topê ti, Faraó mỹ.

¹⁸ Hã kÿ, Topê tÿ ùn jagăgtân sôr nîn kÿ tóg ti jagăgtân tĩ sir. Hã ra tóg ù tÿ mē jāvānh ên ti kutu kăfôr han mû sir, Faraô ri ke.

Topê tÿ ã tÿ nén han sôr mû ên han tĩ

¹⁹ Kÿ Judeu ag hÿn inh mÿ: “kÿ êg hÿn Topê tÿ êg kuprêg tũ tugrîn kutu nÿtinh mû,” he sôr mû. “Ti tugnîn ke vê. Kÿ ti tÿ ne jé êg vóg kónān sôr nê?” he sôr ag hÿn mû, ón kÿ Topê to vîn kÿ. ²⁰ Ha vé, êpră ke vÿ tÿ êg nÿtĩ. Ti vi kăfān ke tũ pē êg tóg nĩ. Ti kamêg jé êg tóg ke mû. Ā tÿ nén han sôr mû ên han ti tĩ.

Êg rānhrāj to jykrén nĩ. Kejēn êg tóg nén ù han tĩ, go'or tÿ. Kÿ go'or tóg êg mÿ: “isÿ kukrũ kórég han tũg nĩ, isÿ kukrũ sīnvĩ han nĩ,” he tũ nĩgtĩ. Êg vĩ kăfān ke tũ ti nĩ, go'or ti. Êg tÿ tÿ nén han sôr mû ên han êg tóg tĩ, ti ki jēmē vānh êg nÿtĩ. ²¹ Go'or ù tÿ êg kukrũ sīnvĩ han tĩ, ù tÿ êg kukrũ kórég han tĩ. Êg tÿ nén han sôr mû ên han êg tóg tĩ.

²² Topê vÿ êg rānhrāj tag ri ke han tĩ gé. Ti tÿ nén han sôr mû ên han ti tĩ, êg tÿ, êg tÿ ti mÿ go'or tÿ kukrũ ri ke nÿtĩn kÿ. Û ag to tóg jũ tĩ, êg kar tÿ ag ki ti tar nĩ to jykrén jé, ti jũ ên ti, Topê ti. Kÿ tóg kănhmar ag to jũnh ke vê vê, hã ra tóg ver ag to fe mág nĩ, ag kórég tăvĩ nÿtĩ ra, ti tÿ ù to jũnh ke mû ag. Hã ra tóg ag vóg kónān ke mû, ha vemnĩ. ²³ Kÿ tóg ù ag jagăgtân mû gé, vênh kar tÿ ag ki Topê tÿ tÿ ùn há tăvĩ nĩ to jykrén jé, êg há kar kăfôr. Hã jé tóg ag kuprêg ja nĩgtĩ. Ti tÿ ag tÿ ùn mág han sôr vê, ti mré. ²⁴ Êg hã vê sir, ùn kuprêg kÿ nÿtĩ tag ag. Hã kÿ tóg êg mÿ vênh vĩ jēnē. Judeu ag kāmĩ tóg êg mÿ vênh vĩ jēnē, fóg ag kāmĩ ke gé, kanhgág ag kāmĩ ke gé, ti tÿ êg jagăgtân sôr kÿ.

²⁵ Hã kÿ Oséias tóg tag tó ja nĩ, ha mē. “Vāsÿ ag vÿ tÿ inh mré ke tũ ja nÿtĩ, hã ra sóg ag mÿ: “inh mré ke vÿ tÿ ājag nÿtinh mû ha, isũ ag,” he sôr mû, he ti, Topê ti,” he ja tóg nĩgtĩ, Oséias ti. “Vāsÿ sóg ag to

há tũ ja nĩgtĩ, hã ra sóg ag to há nîn mû ha,” he ti. ²⁶ “Vāsÿ sóg ag mÿ: “ājag pi(jé) tÿ isũ nÿtĩ,” he ja nĩgtĩ. Hã ra sóg ag mÿ: “Topê krê vÿ tÿ ājag nÿtinh mû,” henh ke mû, “ùn rĩr nĩ ên krê vÿ tÿ ājag nÿtinh mû,” he jé sóg ke mû ag mÿ,” he ti, Topê ti,” he ja tóg nĩ, Oséias ti. Ti tÿ ù tÿ ùri Cristo ki ge kÿ nÿtĩ ag kāmén hã vê.

²⁷ Kÿ Isaías vÿ Israel krê ag to tag tó, ha mē: “e ag nÿtĩ, Israel krê ag, rÿnhryj e nĩ ên ri ke, goj kāmĩ pó rÿnhryj e nĩ ên ri ke. Ge ra ag pipir nÿtinh mû, ùn krenkren ke mû ag. ²⁸ Topê vÿ kănhmar ã tÿ nén tó ja ên han ke mû, ga tag ki, kÿ tóg ag vóg kónān kân ke mû, ùn e ên ag, ag kórég nÿtĩn kÿ,” he ja ti nĩ, Isaías ti. ²⁹ Kÿ tóg tag tó ja nĩ gé, ha mē: “êg tũg kân kren ti, Topê ti, vênh kar kri nĩ ên ti. Hã ra tóg êg kāmĩ ùn pipir krenkren han ja nĩgtĩ. Cidade tÿ Sodoma tá ke ag tũg kân ja tóg nĩ, Topê ti, cidade tÿ Gomorra tá ke ag ke gé. Kÿ tóg êg tũg kân kren gé, ag ri kén, hã ra tóg êg kāmĩ ù krenkren han mû,” he ja tóg nĩ, Isaías ti.

³⁰ Oséias mré Isaías ag tÿ tó mû vÿ ge nĩ, ha mē. Fóg ag, kanhgág ag pi(jé) vênh jykre kuryj nón mû ja nĩgtĩ. Ge ra Topê tóg ag jagăgtân kÿ ag mÿ vênh pāte fón mû ha, ag tÿ Jesus ki rā kÿ. ³¹ Ag jāvo Israel krê ag vÿ ājag jykre hã tÿ Topê tÿ ag jyvên ki króm sôr ja nĩgtĩ. “Ti vi han êg tĩ, kÿ tóg êg to há nĩ,” he ag tóg tĩ. Hã ra ag tóg ki króm kân ja tũ nĩ, hã kÿ Topê tóg ag to há tũ nĩ, jérin mÿ. ³² Hē ri ken kÿ hÿn? Ag tÿ ti ki ge ja tũ nîn kÿ, hã kÿ tóg ag mÿ vênh pāte fón ja tũ nĩ gé. Ag tÿ vēsóg ki Topê jykre ki króm sôr ja vê. Hã kÿ ag tóg ón kÿ ki króm ja nĩgtĩ. Hã kÿ ag tóg Cristo kato tē nÿtĩ.

Pó ri ke ti nĩ, Cristo ti, êg tÿ tÿ krĩm ke jafā. Ag tÿ ti tÿ krĩm ke jan hã vê, hã vÿ: ti ki rā tũ, he mû. ³³ Hã kÿ tag tóg rán kÿ nĩ, Jesus Cristo to, ha mē. “Pānónh sĩ tÿ Sĩaó pēnĩn cidade ki sóg pó nĩm mû, ag tÿ tÿ krĩm ke jé. Kÿ ag tóg, pārô tag tÿ

ag tóg krím ke kÿ vár ke mû sir. Hã ra ù tÿ ti ki rã mû vÿ ã tÿ nén ve sór mû ên venh ke mû,” he ja ti nĩ, Topê vĩ rãn ki, Jesus Cristo to.

Judeu ag tÿ Jesus ki ge kÿ krenkren ke

10 Inh kanhkã', isÿ inh mré ke tÿ Israel tÿ krenkren han venh há tãvĩ tóg tĩ, hã jé sóg Topê mré vêmén tĩ. ²Topê vĩ han jé ag tóg vãsãnsãn mütĩ, tag vég isóg nĩ nĩ. Hã ra ag tóg ki kagtĩg nÿtĩ, kÿ ag tóg êg tÿ nén han ke tũ ên han tĩ. ³Vésóg ki ag tóg vênh jÿkre kuryj to vãsãn sór tĩ. Hã ra ù tÿ êg mÿ vênh jÿkre kuryj nĩm sór mû vÿ tÿ Topê ti nĩ. Tag ve sór tũ ag nÿtĩ, Topê tÿ êg mÿ nĩm ke tag. Hã kÿ ag tóg Topê kato vãsãnsãn mû. ⁴Cristo vÿ hur kãtĩg. Kÿ êg tóg ti ki ge kÿ nÿtĩn kÿ ti mÿ há nÿtĩ ha. Êg tÿ Topê tÿ vãsÿ êg jÿvên ki króm tugnĩn ke pijé'. Jesus Cristo ki rã tugrĩn ke vë.

⁵Ha vé, Moisés vÿ Topê jÿkre si to tag rãn, ha mē. “Û tÿ vênh jÿkre kuryj han kãn mû vÿ rĩr nĩnh ke mû, ù tÿ ge vÿ rĩr krÿg ja tũ venh ke mû, ti tÿ Topê tÿ êg jÿvên tĩ ên ki króm kãn tugnĩn,” he ja tóg nĩ, Moisés ti. Hã ra êg tóg ki króm kãn ki kagtĩg nÿtĩ, hã kÿ êg tóg êg tÿ ki króm kãn sór mû ra rĩr nĩnh ke tũ nĩ. ⁶Êg tÿ Jesus ki rã tugrĩn êg Topê mÿ há nÿtĩ. Kÿ êg tóg: “ù nÿ hÿn kanhkã ra tĩg mû, Cristo pére kãtĩg jé?” henh ke tũ pē nĩ. Mur kÿ ti nĩ ha. ⁷Kÿ êg: “ù nÿ hÿn vênh kuprĩg ag jamã ra tĩg mû, Cristo rĩn mãn jé?” henh ke tũ pē nĩ gé. Rĩr mãn kÿ ti nĩ ha. ⁸Tag tó jé êg tóg ke mû, ha mē: “jagy tũ ti nĩ, Topê vĩ ti, to jÿkrén há ti nĩ. Kãnhmar êg tónh ke mû, kãnhmar êg to jÿkrén ke mû, Topê vĩ to,” he jé êg tóg ke mû.

Topê vĩ tag hã tó sóg tĩ. “Jesus Cristo ki rã tugnĩn êg krenkren ke mû,” he sóg tĩ. ⁹Êg krenkren jé êg tóg Jesus to: “êg Senhor vÿ tÿ ti nĩ,” henh ke mû. Vênh kar mÿ êg tónh ke mû. Kÿ êg tóg êg fe tÿ ti ki rãnh ke mû gé. Topê tÿ ti ter kar kÿ

ti rĩn mãn ja tag vÿ tÿ êg mÿ ki hã ke nĩ, kÿ êg kri fig mû. Kÿ êg tóg krenkren ke mû sir. ¹⁰Êg tÿ êg fe tÿ ti ki rã kÿ êg tóg ti mÿ há nÿtĩ. Êg tÿ vênh kar mÿ ti kãmén kÿ êg krenkren ke mû sir. ¹¹Hã kÿ tag tóg rãn kÿ nĩ, ha mē: “êg tÿ ti ki ge kÿ êg tóg êg tÿ nén ve sór mû ên venh ke mû,” he ja tóg nĩ, Topê vĩ rãn ki. ¹²Vênh kar mÿ ke vë sir, vênh vĩ tag. Judeu ag mÿ ke vë, kar kÿ fóg ag mÿ ke vë gé, kanhgág ag mÿ ke vë gé. Tÿ tóg êg kar Senhor nĩ mÿr. Kÿ, êg tÿ ti mÿ nén ù to vĩn kÿ tóg êg mÿ nén ù tÿ hên ri ke nĩm ke mû gé sir, êg kar mÿ. ¹³Tag hã vÿ rãn kÿ nĩ gé, ha mē: “êg tÿ êg Senhor mÿ: “inh kren han nĩ,” hen kÿ êg krenkren ke mû, êg kar,” he ja tóg nĩ, Topê vĩ tÿ rãn kÿ nĩ ki.

¹⁴Êg tÿ ti ki rã tũ nÿtĩ ra êg tóg: “inh kren han nĩ,” he ki kagtĩg nÿtĩnh mû vë. Êg tÿ ti vĩ mē ja tũ nÿtĩ ra êg tóg ti ki ge ki kagtĩg nÿtĩnh mû vë. Û tÿ êg mÿ ti vĩ tó tũ nĩ ra êg ti vĩ mênh ke tũ nĩnh mû vë. ¹⁵Topê tÿ ag jëgnëg tũ nĩ ra ag tóg êg mÿ ti vĩ tónh ke tũ nĩnh mû vë. Hã kÿ tag tóg rãn kÿ nĩ, ha mē. “Û tÿ êg mÿ Topê vĩ sér ma kãmũ ag junjun vÿ êg mÿ sér pē tĩ,” he ja tóg nĩ, Topê vĩ tÿ rãn kÿ nĩ ki. Topê tÿ ã vĩ tó tĩ ag jëgnë to ken hã vë.

¹⁶Hã ra ù ag tóg kri fi jãvãnh nÿtĩ gé, ag tÿ ón kÿ mēg mû ra, Topê vĩ sér ti. Isaías vÿ ag to Topê mÿ tag tó ja nĩ. “Êg jóg mág', inh vĩ mē jãvãnh ag nÿtĩ,” he ja tóg nĩ. ¹⁷Hã kÿ tóg, êg tÿ ti vĩ mē há han kar kÿ êg tóg ti ki rã tĩ. Êg tÿ Cristo kãmē mē kÿ êg ti ki rã tĩ.

¹⁸Kÿ ájag hÿn inh mÿ: “Judeu ag mÿ hên ri ke mũn mē ja tũ nĩ, hã kÿ ag mÿ ti ki ge ja tũ nĩ?” he sór mû, ájag tÿ inh carta tag ve kÿ. Vó, mē kÿ ag nÿtĩ vë. Tag vÿ rãn kÿ nĩ, ha mē: “ga kar mĩ ag tóg mē ja nĩgtĩ, ã vĩ ti. Ga fyr tá tóg jun gé, ã vĩ ti,” he ja ti nĩ, Topê vĩ rá ki.

¹⁹Kÿ ájag hÿn inh mÿ: “kÿ Judeu ag hên ri ke mũn to jÿkrén há han ki kagtĩg nÿtĩ, ag tÿ mēg mû ra?” he sór mû, ájag

tỹ inh carta tag ve kỹ. Vó, ag tỹ to jykrén sór kỹ ag tóg to jykrén mũ vê. Moisés vỹ ãg mỹ tag kãmén, ha mẽ: “Topê tóg fóg mré kanhgág to tag tó sór mũ, ha mẽ,” he tóg. “Ag vỹ tỹ isũ tũ nỹtĩ ver, hã ra sóg ag tỹ isũ han sór mũ, ãjag tỹ ag ve kỹ ãjag tỹ inh ki rã to én jé,” he tóg. “Fóg mré kanhgág ag vỹ ãjag mỹ krĩ tũ nỹtĩ, hã ra sóg ag to há nĩ sór mũ, ãjag tỹ ag tugin jũgũ jé, he tóg, Topê ti,” he ja tóg nĩgtĩ, Moisés ti, Judeu ag mỹ.

²⁰ Kỹ Isaías tóg tag tó mũ gé, fóg ag to, kanhgág ag to, ha mẽ. “Ủ ag tóg inh jãvãnh ja tũ nỹtĩgtĩ, hã ra ag tóg inh vỹ jẽmẽg mũ ha. Topê hẽ ri ke tĩ? he ja tũ ag nỹtĩ, hã ra sóg ag mỹ inh vỹ jẽnẽg mũ ha, he tóg, Topê ti,” he ja ti nĩ gé, Isaías ti. Pã'i ag kamẽg vãnh kỹ tóg Judeu ag mỹ fóg ag mré kanhgág ag tỹ Topê ki genh ke tó ja nĩ, Isaías ti. ²¹ Kỹ tóg Israel ag to tag tó ja nĩ gé sir, ha mẽ: “kurã kar ki sóg ãjag mỹ: kunĩg, he tĩ. Hã jé sóg ãjag mỹ inh nĩgé ven tĩ, ãjag tỹ gĩr mỹ ãjag nĩgé ven tĩ ẽn ri ke. Hã ra ãjag tóg inh vỹ mẽ jãvãnh nỹtĩ'. Inh vỹ kafãn kónãn ãjag tóg mũ mỹr',” he ja tóg nĩ, Isaías ti, ti tỹ Judeu ag mỹ Topê vỹ tón kỹ.

Israel krẽ'krẽ pipir ag vỹ tỹ Topê tũ nỹtĩ

11 Kỹ ãjag hỹn: “kỹ Topê mỹ ã povo tỹ Israel to vãnh kãn kỹ nĩ?” he sór mũ, ãjag tỹ inh carta tag ve kỹ. Vó, ag to vãnh kãn tũ ti nĩ. Hã vé, tỹ sóg Israel krẽ nĩ gé, hã ra sóg ti ki rã. Abraão krẽ'krẽ ù vỹ tỹ inh nĩ gé, ti kósĩn'kósĩn tỹ Benjamim krẽ'krẽ ù mỹr. ² Isovãnh ja tũ ti nĩ, Topê ti, hã kỹ tóg ã povo to vãnh kãn ja tũ nĩ. Nén kar han tũg ki tóg ãg kuprẽg ja nĩ, ãg tỹ tỹ ti tũ nỹtĩ jé.

Elias to jykrén nĩ. Ti kãmẽ tóg rãn kỹ nĩ, Topê vỹ rá ki. Elias tempo kã Israel ag tóg Topê kato tẽ mũ. Kỹ ag tóg Elias kato tẽ mũ gé, ti tén jé. Hã kỹ tóg Topê mỹ tó mũ, Elias ti, kỹ tóg: ³ “Senhor',” he mũ. “Á vỹ tó tĩ ag kãgtén kãn ag huri, ã

mỹ pũn jafã kókén ag huri ke gé. Inh pir mỹ sóg kren, kỹ ag tóg isén sór mũ ha ke gé. Á to vãnh kãn kỹ ag nỹtĩ,” he ja tóg nĩ, Elias ti, Topê mỹ, Israel ag to. ⁴ Hã ra Topê tóg ti mỹ: “krĩ kufy han tũg nĩ,” he mũ. “Ủ tỹ 7 mĩl (ke) vỹ ki nỹtĩ, ù tỹ isovãnh tũ ag, sỹ ùn kuprẽg ja ag. Tag ag vỹ vẽnũh kãgrá tỹ topê tỹ Baal mỹ: “Topê vỹ tỹ ã nĩ,” he ja tũ nĩ,” he ja tóg nĩ, Topê ti, Elias mỹ. Ti tỹ Israel pipir ag tỹ Topê to vãnh tũg ja ẽn tó vê.

⁵ Ge ti nĩgtĩ, ùri. Pir ag nỹtĩ, Israel tỹ Topê to há nỹtĩ ag. Ti kato tẽ kãn tũ ãg mỹr. Topê vỹ ãg jagãgtãn, kỹ tóg ãg kuprẽg, hã kỹ ãg tóg ti to há nỹtĩ, ãg pipir nỹtĩ ra, ãg tỹ tỹ Israel krẽ nỹtĩn kỹ. ⁶ ãg tỹ vėsóg ki han pijé', ãg tỹ to vãsãn pijé'. Topê tỹ vėsóg ki ãg jagãgtãn hã vê. Ke tũ nĩ mũ ra tóg: “vėsóg ki sóg ãjag jagãgtãn,” henh ke tũ nĩ vê. Hã ra tóg vėsóg ki ãg jagãgtãn.

⁷ Ge ti nĩ, ha mẽ, Israel ag vỹ ve sór ja nĩgtĩ, Topê tỹ ãg mỹ nén ù há ven ke ẽn ti, hã ra ag tóg venh ke tũ nĩ. Topê tỹ ùn kuprẽg mũ ag hã mỹ tóg ven tĩ, Topê ti. Jãvo ù ag tóg kutu nỹtĩ sir, ag tỹ Topê vỹ mẽ jãvãnh nỹtĩn kỹ. ⁸ Hã kỹ tag tóg rãn kỹ nĩ, Israel ag to, ha mẽ: “Topê vỹ ag krĩ tũ han, hã kỹ ag tóg ti vỹ rá vэг mũ ra to jykrén tũ nỹtĩgtĩ. Mẽg tũ ag nỹtĩ, ãjag nĩgrẽg ra. ùri ag tóg gen kỹ nỹtĩnh mũ ver,” he ja ti nĩ, Topê vỹ rãn ki. ⁹ Kỹ Davi vỹ Judeu ag to tag tó ja nĩ gé, ha mẽ: “Topê mỹ festa han ag tóg ti. Hã ra ag tóg ón kỹ ti mỹ festa han ti, kỹ ag tóg to sigse kỹ nỹtĩnh mũ, ag festa to. Ag sigse kỹ tóg ag vóg kónãn ke mũ, Topê ti. Krenkren ke tũ ag tóg nĩ. ¹⁰ Kutu ag nỹtĩ, to jykrén ke tũ pẽ ag nỹtĩ, kỹ ag tóg vẽnũh jykre kufy hã venh ke mũ, hã to ag jagtar nỹtĩnh mũ,” he ja tóg nĩ, Judeu ag to, Davi ti.

Judeu ag to é henh ke tũ ãg tóg nĩ

¹¹ Kỹ ãjag hỹn inh mỹ: “kỹ Topê mỹ Judeu ag tỹ nũgme ki vár ke tag ve sór

mũ, hã jén mý ag mý Jesus jênê ja nĩ, ag tỹ ti tỹ prãnh ke jé?” he sór mũ. Vó. Hã ra ag tóg Topê kato têtê tĩ. Tĩ vĩ mranh ja ag tóg nýtĩtĩ, hã kỹ Topê tóg fóg ag mré kanhgág ag krenkren han sór mũ, Judeu ag tỹ ag ve kỹ ti ki ge to én jé. ¹² Kỹ Judeu ag tỹ Topê vĩ mranh kỹ Topê tóg fóg mré kanhgág kar to há nĩ. Kỹ Judeu ag vỹ jagăgtar nýtĩ. Ag nýtĩg ja ki ù ag kar vỹ Topê tỹ ag to há nĩ vég mũ. Há ti nĩ, tag. Kỹ, Topê tỹ Judeu ag to há’ he măn nĩ ra tóg hã ra ga kri mũ kar mý há pẽ tâvĩ tĩnh mũ vê, mýr, ha mẽ. Hã ra tóg ag to há tũ nĩ ver.

¹³ Kỹ sóg ajag mý tag tó sór mũ, ajag tỹ tỹ fóg nýtĩn kỹ, kanhgág ag mý ke gé. Ajag apóstolo vỹ tỹ inh nĩ, sỹ ajag mý Topê vĩ tó jé. Inh rănhrăj vỹ inh mý sér pẽ tĩ. ¹⁴ Isỹ ajag mý Topê vĩ tó kỹ inh mré ke ag hên ri ke mũn ajag kóm Jesus ki ge sór mũ gé, kỹ ag krenkren ke mũ sir, Israel ag. ¹⁵ Ha vé, Topê tỹ inh mré ke ag tovănh to tóg povo ù ag to há nĩ ha, ag to jũ măn tũ tóg nĩ sir. Topê tỹ Israel ag to há’ he măn mũ ra tóg vênh kar mý há pẽ tâvĩ tĩnh mũ vê, kỹ vênh kar vỹ rĩnrĩr măn ke mũ vê, ùn kăgter mũ ag mré hã. Hã ra tóg ag to há tũ nĩ ver.

¹⁶ Êmĩ to jykrén nĩ. Êmĩ kupar ko há nĩn kỹ tóg ko há kar nĩ. Ge ti nĩgtĩ gé, ka tỹ. Tĩ jăre há nĩn kỹ ka vỹ há kar nĩ. Israel ag vỹ tag ri ke nýtĩ. Ag jóg’jóg ve ag vỹ ka jăre ri ke nýtĩ. Topê mý ag há nýtĩ ja nĩgtĩ, hã kỹ ag krê vỹ Topê mý há nýtĩnh ke mũ gé. ¹⁷ Povo tỹ Israel vỹ ka tỹ oliveira há ri ke nýtĩ. Tĩ jăre vỹ há nĩ, hã ra ti pẽ ù tóg kórég nýtĩ. Hã kỹ tóg mrynhranh kỹ văvăm mũ, Topê ti, ti pẽ kórég ên ti. Tĩ tỹ Israel kórég ag togvăn to ken hã vê, hã vỹ: ka pẽ kórég văvăm, he mũ. Ka pẽ kórég tag nýtĩg ja ki tóg ka ù pẽ vin, vãnh kămĩ ka tỹ oliveira pẽ tỹ, ùn kanên vãnh pẽ tỹ. Ajag hã vê sir, ajag tỹ tỹ fóg nýtĩn kỹ, kanhgág ag ke gé. Hã ra ka ù pẽ tag vỹ ka há jăre ên tỹ ti kume vég tĩ, kỹ tóg tỹ há’ he mũ sir. Ajag

tỹ Topê tỹ Israel jóg’jóg ve tỹ Abraão mý nén tó ja ên vég mũ to ken hã vê, hã vỹ: ka há jăre kume vég mũ, he mũ. ¹⁸ Kỹ Israel ag to é he sór tũg nĩ, Topê tỹ ag văm mũ ra, êg tỹ ka pẽ kórég văm ri ke. Ag nýtĩg ja ki ajag nýtĩ. Hã ra ka jăre vỹ tỹ Judeu ag jóg’jóg ve nýtĩ. Ajag jóg’jóg ve pijé, fóg pijé, kanhgág pijé. Judeu ag vê. Kỹ Judeu ag to é he sór tũg nĩ.

¹⁹ Hên ri ke mũn ajag tóg inh mý: “hã ra tóg Judeu ag văm, êg to há nĩ jé,” he sór mũ. “Hã kỹ tóg êg to há nĩ,” he ajag hỹn mũ. ²⁰ Hỹ, ag văm tóg. Hã ra ag tóg ti ki rã jăvăn to ag nýtĩtĩ, hã kỹ tóg ag văm. Jăvo tóg ajag to há nĩ, ajag tỹ ti ki ge to. Hã kỹ ag to é he sór tũg nĩ. Topê kamêg nĩ mýr. ²¹ Israel krê ag tỹ ti ki ge jăvăn tugnĩn tóg ag văm. Ag jagăgtăn jăvăn tóg nĩ ha. Kỹ tóg ajag jagăgtăn ke tũ nĩ gé, ajag tỹ ti ki ge to tar tũ nýtĩn kỹ. Hã kỹ ti hã kamêg nĩ.

²² Hã ki Topê tỹ tỹ ùn há nĩ tóg ve há tĩ, hã ra tóg ù ag vóg kónăn jagy han tĩ gé. Û tỹ ti vỹ mranh mũ ag vóg kónăn jagy han tóg tĩ, Topê ti. Hã ra tóg sir ajag to há nĩ sir, ajag tỹ ti tovăn to nĩn kỹ. Ajag tỹ ti tovăn kỹ tóg ajag văm ke mũ gé, ha vemnĩ. ²³ Judeu ag tỹ ti ki ge kỹ tóg ag to há nĩ măn ke mũ gé sir, kỹ tóg ka há ki ti pẽ mrynhrăj ja ên ki vin măn ke ri ke nĩ sir. ²⁴ Ha vé, ajag hã vỹ tỹ ka kanên vãnh pẽ ri ke nýtĩ. Hã ra tóg ka há ki ajag vin, ajag tỹ tỹ ka kanên vãnh pẽ nýtĩ ra. Kỹ tóg, ti tỹ ka há ên pẽ mrynhrăj ja ên ki vin măn sór nĩ ra tóg vin măn mũ sir, ka há ên ki, hã vỹ: Judeu ag tỹ Jesus ki rã, he mũ. Ka há pẽ mrynhrăj ja ên ki vin măn to ken hã vê. Êg pi(jé) ka kanên vãnh pẽ tỹ ka kanên há ki vin tĩ. Êg tỹ ka há pẽ tỹ ki vin măn tag vỹ jagy tũ nĩ vê. Hã kỹ tóg Topê mý jagy tũ tĩ, ti tỹ Judeu ag to há nĩ măn kỹ.

Topê tỹ Israel ag krenkren han sór

²⁵ Isỹ ajag mý nén ù kămén sór vê, ajag tỹ mẽ ja tũ ù, ha mẽ. Sỹ ajag mý kămén

sór vë, ājag tỹ Judeu ag to é he tũ nĩ jé. Ha vé, Israel ũ ag vỹ ver mẽ sór tũ nỹtĩ. Ũ ag tóg mẽ sór mũ, hã ra ũ ag tóg mẽ jāvãnh nỹtĩ gé, vênh kar tỹ Topê vỹ mẽ jé, Judeu tũ ag kar. Kejẽn ag tóg mẽ kãn ke mũ, fóg kar, kanhgág kar ke gé. ²⁶ Ag tỹ mẽ kãn ke ên kã Israel ag tóg krenkren ke mũ gé. Hã kỹ tag tóg ag to rãn kỹ nĩ, ha mẽ: “ag krenkren han tĩ vỹ jun ke mũ. Pãnõnh sĩ tỹ Sião pênin cidade ên tá tóg vênh ven ke mũ, ag krenkren han tĩ ti. Ên vỹ Jacó krẽ ag tỹ inh vỹ mranh ja ên tỹ vênh pãte fón ke mũ, Israel krẽ en ag mỹ. ²⁷ Sỹ ag mré jykrén jan hã vë. Ag tỹ inh vỹ mranh tỹ sóg tũg' he mũ,” he ja tóg nĩ, Topê vỹ rá ki, Judeu ag to. ²⁸ Jesus kato tẽ ag tóg mũ ver, ti kãmẽ sér mẽ jāvãnh ag nỹtĩ ver, hã kỹ ājag tóg ag nỹtĩg ja ki Topê vỹ sér mẽg mũ. Hã ra ag jóg'jóg ve ag vỹ Topê to há nỹtĩ ja nĩgtĩ, hã kỹ Topê tóg ag krẽkrẽ to há nĩnh ke mũ ge kejẽn, ti tỹ vãsỹ ag kuprẽg ja nĩn kỹ. ²⁹ Topê tỹ ũ to há nĩn kỹ tóg ti to há nĩ, ti tỹ ũ kuprẽg kỹ tóg kuprẽg kỹ jẽ nĩ gé. Tỹ tũg' henh ke tũ ti nĩ, Topê ti.

³⁰ Vãsỹ ājag tóg Topê vỹ ki kagtĩg ja nỹtĩgtĩ gé. Hã ra Topê tóg ũri ājag jagãgtãn, ājag tỹ ti ki ge jé, Judeu ag tỹ ti vỹ mranh ag nỹtĩg ja kã. ³¹ Kỹ ên ag tóg ti vỹ mranh mũgtĩ ver, Topê tỹ kar kỹ ag jagãgtãn jé, ti tỹ ājag jagãgtãn ri ke. ³² Kỹ Topê tóg ěg kar mỹ ěg tỹ ti vỹ mranh mũ tag ven kãn sór mũ, ěg tỹ to jykrén mãn jé. Ti tỹ ěg jagãgtãn sór vë, ěg tỹ ti ki ge jé, hã jé tóg ěg mỹ ěg tỹ ti vỹ mranh mũ ven sór mũ.

Topê jykre tỹ ěg jykre kãfór nĩ

³³ Topê vỹ tỹ ũn mág pẽ nĩ, mỹr, ha mẽ. Ti jykre vỹ vênh kar kri nĩ kar nĩ. Ve kãn jāvãnh ěg nỹtĩ, ti jykre ti, tá krỹg jāvãnh ěg nỹtĩ. Nén ũ kar ki kanhró ti nĩ mỹr, nén ũ kar to jykrén há han kãn ti tĩ mỹr. Ti tỹ nén to jykrén mũ ve kãn ke tũ pẽ ěg nĩ. “Ti hỹn hẽ ri ken kỹ tag han?” henh ke tũ ěg tóg nĩ gé. To jykrén

kórég ěg tóg nỹtĩ. ³⁴ Ũ nỹ Topê tỹ nén to jykrén mũ ki kanhró nĩ? Ki kagtĩg kar ěg nỹtĩ. Ũ nỹ Topê mỹ: “tag han ra, tag han tũg ra,” he tĩ? Ũ vỹ ti jyvẽn ke tũ pẽ nĩ. ³⁵ Ũ nỹ ti mỹ nén ũ nĩm', Topê tỹ ti mỹ kajãm jé? Nén kar vỹ tỹ ti tũ nỹtĩ mỹr, hã kỹ tóg ěg hã mỹ nén ũ kar nĩm tĩ, ěg jagãgtãn kỹ. ³⁶ Topê hã ne nén kar hyn han'. Ti hã jamẽn kỹ ěg tóg nỹtĩ, nén ũ kar vỹ ti jamẽn kỹ nỹtĩ gé. Hã kỹ ěg tóg tỹ ti tũ nỹtĩ gé, nén ũ kar ti ke gé. Kỹ ti hã ne tóg tỹ ũn mág nĩ, ti pĩr mỹ. Ti hã mỹ ěg tóg vỹ há han tĩ, to krónh ke tũ ěg nĩ, ga kri, kanhkã tá ke gé. Amém.

Topê mỹ ěg vênh fẽg ke mũ

12 Inh kanhkã', Topê vỹ ājag jagãgtãn. Hã kỹ sóg ājag mỹ: “ti mỹ vênh fẽg,” he mũ. Kỹ tóg ěg tỹ ti mỹ nén ũ pũn ri ke nĩ, ěg tỹ ti mỹ vênh fẽg kỹ. Judeu ag vỹ ājag mẽg tãnĩh kỹ pũn tĩ. Ag jãvo ěg tóg ti mỹ ěg rĩnrĩr nỹtĩn kỹ vênh fẽg tĩ. Ti mỹ tóg sér tĩ, ěg tỹ tag han kỹ, ěg tỹ tỹ ti tũ nỹtĩn kỹ sir. Gen kỹ ājag tóg Topê jykre han ke mũ. ² Ēprã ke ag jykre han sór tũg nĩ. Topê vỹ ājag krĩ tãg han sór mũ. Vênh jykre tãg han sór tóg mũ. Kỹ ājag tóg nén há han ki kanhró nỹtĩnh mũ. Vênh jykre kuryj han jé ājag tóg ke mũ. Kygnẽnh ke tũ ājag tóg nĩ. Tag ve sór tóg mũ, Topê ti. Tag hã to tóg ěg kanhrãn ke mũ.

³ Ha vé, Topê vỹ isar han, kỹ sóg ājag jyvẽn há han ki kanhró nĩ. Hã kỹ sóg ājag kar mỹ tag tó mũ. Vēsỹ ũn mág han sór tũg nĩ. “Tỹ inh ũn mág nĩ,” he tũg nĩ, ā tỹ tỹ ũn mág tũ nĩn kỹ. ěg kar vỹ Topê ki ge kỹ nỹtĩ, kỹ tóg ěg kar tỹ nén ũ to tar han tĩ, ěg kar tỹ ti rãnrhãj han jé. Tag to jykrén kỹ jagnẽ to é he tũg nĩ.

⁴ ěg há to jykrén nĩ. Ti ki nỹtĩ vỹ e nỹtĩ, ěg pẽn, ěg nĩgnó, ěg kanẽ, ěg nĩgrẽg, ti kar ti. ěg há ki nỹtĩ vỹ jagnẽ kóm rãnrhãj nỹtĩ kar nỹtĩ, vyr mỹ. ⁵ Ge ti nĩgtĩ, ěg mré. E ěg nỹtĩ, hã ra ěg tỹ Cristo ki ge kỹ nỹtĩn kỹ ěg tóg ěg há ri ke nỹtĩ, kỹ ěg

tóg jagnē ki rīr ke mū sir, ēg há ki nýtī tỹ jagnē ki rīr tĩ ěn ri ke. ⁶Hā ra ũ tóg nén ũ han há nĩgtĩ, kỹ ũ tóg nén ũ ũ han há nĩgtĩ gé, Topē tỹ to ēg tar han kỹ. Ēg kāmĩ ũ mỹ tóg: “ag jyvēn nĩ,” he tĩ, Jesus ti. Kỹ Topē tỹ ā mỹ nén tó mū hā tỹ ēg jyvēn nĩ, ti tỹ ā mỹ: “ag jyvēn nĩ,” hen kỹ. ⁷Ēg kāmĩ ũ mỹ tóg: “ũn jagāgtar ag jagāgtān nĩ,” he tĩ gé. Kỹ ēg jagāgtān há han to tar nĩmnĩ. Ēg kāmĩ ũ mỹ tóg: “inh vĩ kāmén nĩ,” he tĩ gé. Kỹ to krónh ke tũg nĩ. ⁸Ēg kāmĩ ũ mỹ tóg: “ag mỹ ag tỹ nén han ke kāmén nĩ,” he tĩ gé. Kỹ ā rānhrāj tag ki rīr há han nĩ. Ēg kāmĩ ũ mỹ tóg: “ā tỹ nén ũ nĩm mág nĩ, inh mỹ,” he tĩ gé. Kỹ ón kỹ ti mỹ nĩm sór tũg nĩ. Ēg kāmĩ ũ mỹ tóg: “culto to pā'i vỹ tỹ ā nĩ,” he tĩ gé. Ā tỹ tỹ to pā'i nĩn kỹ to jykrén há han nĩ. Ēg kāmĩ ũ mỹ tóg: “ag jagāgtān nĩ,” he tĩ gé. Kỹ ti tỹ ā mỹ ā tỹ ēg jagāgtān ke tag tó kỹ to mỹ sér nĩmnĩ. Ēg tỹ jagnē ki rīr to ken hā vē.

⁹Jagnē to há tāvĩ nýtĩmnĩ. Ón kỹ jagnē to há nýtĩ sór tũg nĩ. Vēnh jykre pāno to kórég tāvĩ nýtĩmnĩ, kỹ tovānh kān nĩ. Vēnh jykre há hā mĩ mūmnĩ. ¹⁰Jagnē to há pē tāvĩ nýtĩmnĩ, ājag tỹ jagnē mré pafa ja ag to há ri ke nýtĩmnĩ, jagnē to. Jagnē mỹ komēr hā vĩmnĩ, ēg tỹ pā'i mỹ komēr hā vĩ ěn ri kemnĩ, jagnē mỹ. ¹¹Topē jykre to krónh ke tũg nĩ. Ti tỹ ājag mỹ: “tag han ra,” he to jēnjēr ke tũg nĩ gé, to vāsān nĩ. Ti kuprīg tỹ ājag mỹ nén tó mū ěn ki króm nĩ, kỹ tóg ājag mỹ sér tĩnh mū. Ēg Senhor tũ han nĩ. ¹²Topē vỹ ēg mỹ nén ũ há kar han ke mū. Tag to mỹ sér nýtĩmnĩ. Kejēn ājag tóg nén ũ jagy venh ke mū, ti tugnĩn. Tag to krónh ke tũg nĩ. Topē mré vēmén kỹ nýtĩmnĩ. ¹³Ājag mré Topē ki rā ũ jagtar nĩn kỹ ti jagāgtān nĩ. Ũ tỹ ājag to pasa ke kỹ ti mỹ: “inh mré nĩ,” hemnĩ.

¹⁴Kejēn ũ tóg ājag vóg kónān sór mū. Ēn to Topē mỹ: “ti jagāgtān nĩ,” hemnĩ. Ti to: “ti vóg kónān nĩ,” he tũg nĩ. ¹⁵Kejēn tóg ũ mỹ sér tĩ. Kỹ ti mré mỹ sér

nýtĩmnĩ gé. Kejēn ũ tóg fỹ tĩ. Ti mré fỹmnĩ gé. ¹⁶Jagnē mré vēnh jykre pir hā han nĩ, hā vỹ: jagnē to há, he mū. Vēsỹ ũn mág han sór tũg nĩ. Tỹ ũn kāsir ag mré ke nýtĩmnĩ. “Ag mré ke vỹ tỹ inh nĩ,” hemnĩ, ũn kāsir ag to. Hēn ri ke mūn ājag kāmĩ ũ tóg vēnh kanhrān mág to tar nĩ, ājag káfór. Ti jé: “ag káfór inh nĩ, vēnh kanhrān mág ja tag to,” he tũg nĩ.

¹⁷Kejēn ũ tóg ājag mỹ nén ũ kórég han tĩ. Ge ra ti mỹ nén ũ há hā han nĩ. Vēnh kar mỹ vĩ há tāvĩ han nĩ, ũ tỹ ājag to: “kygnē ti huri,” he tũ nĩ jé. ¹⁸Vāsān nĩ, ājag tỹ ũ to krĩ rỹ tũ nýtĩ jé, ājag tỹ vēnh kar to krĩ kuprā nýtĩ jé.

¹⁹Inh kanhkā, ũ tỹ ājag mỹ nén ũ kórég han mū ra vēnh kajām sór tũg nĩ. Topē hā tóg ā tỹ ti to jũnh ke ěn ki kanhró nĩ. Hā kỹ tag vỹ rán kỹ nĩ, ha mē: “inh hā ne ājag kajām ke mū, inh hā ne ag mỹ ven ke mū, ag tỹ ājag jykre kórég to jagāgtar ke ti, he ti, ēg Senhor ti,” he ja tóg nĩ, Topē vỹ tỹ rán kỹ nĩ ki. ²⁰Kỹ ũ tỹ ājag kato tē mū mỹ nén ũ há kar han nĩ. Ti kókĩr nĩn kỹ ti mỹ vējēn ven nĩ. Ti hāghā kỹ ti mỹ goj ven nĩ. Gen kỹ ā tóg ti mỹ'a pē han ke mū, ha vemnĩ, ā tỹ ti to há nĩn kỹ, ti tỹ ā to kórég nĩ ra. ²¹Ũ tỹ vēnh jykre pāno han mū ag vỹ ēg kato tē tĩ. Kỹ ēg tóg ag ki rīr ke mū, vēnh kaja jé. Ag jagtar nýtĩn kỹ ēg tóg ag jagāgtān ke mū. Ēg tỹ ag jagāgtān kỹ ag jykre pāno tóg ag mỹ vēnhmỹ nĩnh mū, ag tỹ ēg jykre ve kỹ, ha vemnĩ.

Ēg pā'i ag

13 Ēg kri pā'i vỹ nýtĩ. Kỹ tóg ēg tỹ ag vĩ ki han há tĩ. Topē tỹ ag tỹ pā'i han hā vē, ag krĩn kỹ. Ti hā vỹ ũ tỹ hē nỹ tỹ pā'i nĩnh ke to jykrén tĩ. ²Kỹ ag kato tē sór tũg nĩ. Topē hā vỹ ag vin tĩ, pā'i ag krĩn kỹ, kỹ ag kato vāsān tũg nĩ. Ũ tỹ ag kato vāsānsān mū ag vóg kónān jé ag tóg ke mū, pā'i ag. ³Ēg tỹ vēnh jykre há han kỹ ēg tóg pā'i ag vэг mū ra kanē jur han ke tũ nĩ. Ũ tỹ vēnh jykre kórég

han mû ag vỹ vëso kanë jur tĩ, pã'i ag ve kỹ. Kỹ ãg hỹn hẽ ri kenh ke mû, ag tỹ ãg kanë jun tũg jé? Vẽnh jykre há tãvĩ han jé ãg tóg ke mû, kỹ ag tóg ãg to vëmén há han ke mû sir, pã'i ag. ⁴ ãg pã'i ag ne ãg jyvẽn tĩ, ãg tỹ vẽnhy jykre há to tar nỹtĩ jé. Ag tỹ Topẽ tỹ ag mỹ nẽn tó mũn han hã vẽ. A tỹ vẽnhy jykre kórég han kỹ kanë jurmnĩ. A vóg konãn jé ag tóg ke mû, ha vemnĩ, hã jé Topẽ tóg ag vin. Topẽ tũ ag vẽ, ag tỹ ùn jykre kórég han mû ag vóg kónãn jé, ag tỹ ag jykre pãno to ag jagãgtar han jé. ⁵ Hã kỹ ag vĩ ki króm nĩ, ag tỹ ãgag to jũ tũ nỹtĩ jé. ãgag kakã kavénh ti tĩ gé, ãgag tỹ pã'i ag vĩ ki króm tũ ãn ti. Hã kỹ ki króm sórmnĩ.

⁶ Kỹ governo mỹ imposto kajãm nĩ gé. Topẽ tỹ ag mỹ vẽnhy rãnrhãj nĩm ja ãn han ag tĩ, kurã kar ki, pã'i ag, governo mỹ rãnrhãj tĩ ag. Kỹ ag mỹ kajãm nĩ. ⁷ Kỹ ãgag név(e) kajãm kãn nĩ, governo mỹ ke gé. ãgag tỹ pã'i ù mỹ imposto kajãm ken kỹ ti mỹ ven nĩ, jãnkamy ti. ãgag pã'i ag kamẽg nĩ, ag mỹ komẽr hã vĩmnĩ.

Topẽ jykre hã mĩ mũmnĩ

⁸ ãgag név(e) kajãm kãn nĩ. Mré hã jagnẽ to há tãvĩ nỹtĩmnĩ gé. Jagnẽ to há nỹtĩ to krónh ke tũg nĩ. ãg tỹ jagnẽ to há nỹtĩn kỹ ãg tóg Topẽ tỹ ãg jyvẽn ja ãn ki króm kãn mũ sir. ⁹ Ha vé, Topẽ tóg ãg mỹ: “ã prũ tũ fi mré nỹ tũg nĩ, kỹ ã mén tũ mré nỹ tũg nĩ gé,” he ja nĩ. Kỹ tóg: “ũ tén tũg nĩ, nẽn ù péju(g) tũg nĩ, ù to ón tũg nĩ, nẽn ù to éntũg nĩ gé,” he ja nĩ gé. Ti tỹ ãg jyvẽn vỹ e nỹtĩ. Hã ra ãg tỹ ti tỹ ãg jyvẽn kar tỹ tó pir han sór kỹ ãg tóg tag tónh ke mû, ha mẽ: “ã régre ki rĩr nĩmnĩ. A tỹ vẽnhy ki rĩr há ri ke han nĩ, ã régre ki,” he jé ãg tóg ke mû. ¹⁰ ãg tỹ ãg régre kar ki rĩr há nỹtĩn kỹ ãg tóg ag mỹ nẽn ù kórég han ke tũ nĩ. Hã kỹ ãg tóg jagnẽ ki rĩr há nỹtĩn ki Topẽ tỹ ãg jyvẽn tĩ ãn ki króm kãn ke mû.

¹¹ Vãsãn nĩ. Vẽnhy jykre kórég tovãnh kãn nĩ. Ti tỹ ãg kren han ke kurã vỹ kakó

pẽ tĩ ha. ãg tỹ ti ki ge vén kỹ tóg ver kór gy nỹ ja nĩ, kuvar gy nỹ ja tóg nĩ ver ãn kã, hã ra tóg ùri kakó tãvĩ tĩ ha. ¹² Ti kãtig to hã tóg ãg mỹ kuty ri ke nĩ. Kuty tag vỹ tũg ke nẽ ha, tỹ vaj ke ti nỹ ha. Ti tỹ kãnhmar kãtig ke to ken hã vẽ. Hã kỹ ag tỹ kuty kã nẽn han tĩ ãn han mãn sór tũg nĩ, vẽnhy jykre kavẽj ãn ti. ãg tỹ kurã ki nẽn han jafã ãn han nĩ, vẽnhy jykre kuryj ti, ãg tỹ vẽnhy jykre há han kỹ vẽnhy jykre kórég kato tẽ jé, tỹ tũg' he jé. ¹³ ãg tỹ kurã mĩ tĩg há han tĩ ãn ri ke han nĩ. Ag tỹ baile ki nẽn ù vẽnhy han tĩ ãn han tũg nĩ. Kronkron tũg nĩ gé. Fag to éntũg nĩ, kỹ fag mré nỹ tũg nĩ, ag mré ke gé. Jagnẽ to jũ tũg nĩ gé, jagnẽ tũ to éntũg nĩ gé. ¹⁴ ãg Senhor tỹ Jesus Cristo jykre tãg hã han nĩ. ãg tỹ nẽn to éntũ ãn han sór mãn tũg nĩ. ãg jykre si tovãnh kãn nĩ.

Jesus ki ge kỹ nỹtĩ fag tỹ jagnẽ to há nỹtĩn ke

14 ù tóg krój nỹtĩ ver. Jesus jykre ù tóg ver ag mỹ jagy tĩ, ag tỹ ti ki ge kỹ nỹtĩ ra. ù tỹ ge tovãnh tũg nĩ, ag mỹ: “ẽg mré Topẽ vĩ mẽnhy kãtig nĩ,” hemnĩ. Ag vĩ kafãn tũg nĩ hã ra, ag tỹ kygnẽ kỹ: “tag tóg inh mỹ ge nĩ, ge nĩ,” he mũ ra. ² ù mỹ tóg nẽn kar ko há tĩ, hã ra ù tóg nẽn ù nĩ ko vãnhy nĩn kỹ ãkré hã ko tĩ. “Vẽnhy kãggrá mỹ ag tóg pũn ja nĩ, vẽnhy mẽg ãn nĩ ti, ag tỹ ón kỹ topẽ kãggran ja ãn mỹ, hã kỹ sóg ti nĩ ko sór tũ nĩ,” he ag tóg tĩ, ùn krój ag. ³ Hã ra ãgag kãmĩ ù ag tóg ge ra ko tĩ, vẽnhy kãggrá tỹ ag mỹ tỹ nẽn ù tũ nĩn kỹ. ãgag tỹ ko kỹ ù tỹ ko vãnhy ãn to é he tũg nĩ. Kỹ ãgag tỹ ko sór vãnhy kỹ ù tỹ ko mũ ãn to: “ti kórég han tĩ tĩ,” he sór tũg nĩ gé. Vẽjẽn to jagnẽ mỹ vĩ tũg nĩ. A mré tóg Topẽ ki rã kỹ jẽ gé, ù tỹ ko mũ ti, kỹ ti to vĩ tũg nĩ. ⁴ Jesus mỹ rãnrhãj tĩ vỹ tỹ ãg nỹtĩ, ãg kar, hã kỹ tóg vẽnhy tĩ, ãg tỹ jagnẽ to vĩ sór kỹ. ù tỹ ãg mỹ vĩnh ke mũ vỹ tỹ ãg Senhor tĩ nĩ, ãg tỹ tỹ ti tũ nỹtĩn kỹ. Hã ra ãg kar vỹ há

kutē kân ke mû, kurâ ên kâ, ha vemnĩ, ãg Senhor tỹ ãg tar han kỹ.

⁵ Û tóg vênh kân ke kurâ to: “kurâ kórég,” he tĩ, kurâ ù to ke gé. Jâvo ù tóg kurâ kar to: “kurâ há,” he tĩ gé. Há kar ti nỹtĩ, ãjag tỹ kurâ han mû ti. Kỹ ãjag tỹ nén to jykrén mû ên hã han nĩ. ⁶ Ëg kar vỹ ãg Senhor jykre mĩ mû sór mû, hã kỹ ù tóg kurâ kórég han sór tĩ, ti jykre mĩ ti jé, jâvo ù tóg kurâ kórég han vãnh nĩ, ti jykre mĩ ti jé gé. Há kar ti nĩ.

Kỹ ù tỹ nén ù kar ko mû vỹ ge nĩ gé. Ëg Senhor jykre mĩ tĩ hã jé tóg ko tĩ gé. Ti hã mỹ tóg to vỹ há han tĩ, vễjên to, Topê hã mỹ. Û tỹ nén ù nĩ ko vãnh ên vỹ ãg Senhor jykre mĩ tĩ hã jé ko vãnh nĩ gé, ti tỹ ti mỹ há nĩ jé. Kỹ tóg to Topê mỹ vỹ há han tĩ gé. Há kar ti nĩ, ãg tỹ nén ù nĩ ko mû ti, ãg tỹ ko vãnh ti ke gé.

⁷ Ëg pi(jé) ãg jykre han ke mû, ãg tỹ ga kri mûn kỹ. Kỹ, ãg ter ken kỹ ãg pi(jé) ãg jykre ki ter ke mû gé. ⁸ Ëg tỹ ga kri mûn kỹ ãg tóg ãg Senhor jykre hã han ke mû. Ti tũ han hã jé ãg tóg ga kri mû nĩ. Kỹ, ãg ter ken kỹ ãg tóg ti jykre hã ki ter ke mû gé. Hã kỹ ãg tóg tỹ ti tũ kar nỹtĩ sir, ãg tỹ ga kri mûn kỹ ke gé. Ëg Senhor tỹ Jesus Cristo tũ vỹ tỹ ãg nỹtĩ. ⁹ Ëg tỹ tỹ ti tũ nỹtĩ hã jé tóg ter ja nĩ. Hã jé tóg rĩr măn ja nĩ gé. Ti tỹ tỹ ãg Senhor nĩ hã jé tóg ter ja nĩ, vênh kar pã'i, ùn rĩnrĩr mũ ag pã'i, ùn kãgter ja ag pã'i ke gé.

¹⁰ Kỹ ãjag tỹ hẽ ri ke jé jagnẽ to vỹ sór nẽ? ãjag tỹ hẽ ri ke jé jagnẽ to é he nẽ? Topê hã vỹ ãg jykre ve kân ke mû, ãg kar, ti tỹ ãg jé prẽr ken kỹ. ¹¹ Hã kỹ tag tóg rán kỹ nĩ, ha mẽ. “Rĩr inh jẽ nĩ,” he tóg, ãg Senhor ti. “Vênh kar vỹ inh krêm grĩnh kenh ke mû, ha vemnĩ. Vênh kar vỹ inh mỹ: “ũn mág vỹ tỹ ã nĩ,” henh ke mû, he ti, Topê ti,” he tóg, Topê vỹ tỹ rán kỹ nĩ ki. ¹² Ëg kar vỹ Topê rĩnja tá nỹtĩnh ke mû, kỹ tóg ãg jykre tugnỹm ke mû. Ëg hã ki tóg jẽmẽnh ke mû, ãg tỹ nén han ja ên to. ¹³ Hã kỹ jagnẽ to vỹ măn tũg nĩ.

Ëg tỹ jagnẽ to fen ke

Jagnẽ to: “kórég ti nĩ,” he măn tũg nĩ. ãjag tỹ nén ù han ken kỹ tag to jykrén nĩ, ha mẽ. “Isỹ tag han kỹ inh régre mỹ inh ve kỹ Topê vỹ mranh ke tũ nĩ vỹ?” he jé ãg tóg ke mû. “Ti mỹ tỹ prãnh kenh ke tũ nĩ vỹ, isỹ tag han kỹ?” he jé ãg tóg ke mû.

¹⁴ Tag ki kanhró inh nĩ, ha mẽ: “vễjên pi(jé) ãg kavénh tĩ.” Jesus tỹ tón hã vẽ. Nén ù tũ vẽ, vễjên ti, ãg tỹ ko jafã tãvĩ vẽ. Hã ra ù tóg nén ù nĩ to: “vênh kãggrá mỹ ag tóg pũn ja nĩ, vênh mẽg ên nĩ ti, hã kỹ sóg ko kỹ Topê vỹ mranh tĩ,” he tĩ. Û tỹ tag tó mũ jykre kavénh ti tĩ, ti tỹ ge ra kon kỹ. ¹⁵ Inh mỹ tóg tỹ Topê vỹ mranh tũ nĩ, isỹ nén ù nĩ ko tag ti. Kỹ sóg ko' he mũ sir. Kỹ inh régre ù tóg isỹ ko mũ ve kỹ ko sór mũ gé sir, hã ra tóg ti hã mỹ Topê vỹ mranh ri ke nĩ. Kỹ tóg ko kỹ isugrĩn Topê vỹ mranh mũ sir. Kỹ tóg nũgme ki kutẽnẽh ke mũ sir, ti tỹ ko kỹ Topê vỹ mranh kỹ. Kỹ tóg isỹ ti tén ri ke nĩ sir, Cristo tỹ ùn jagfỹ ter ja ên ti. Isỹ tag han kỹ tóg sỹ ti to há tũ ri ke nĩ, isỹ inh jẽn tugnĩn ti tén ri ke han kỹ. ¹⁶ Kỹ tag han sór tũg nĩ, ù tỹ ãjag tỹ nén han mũ to ãjag to vỹ tũ nĩ jé. Há ti nĩ vẽ, ãjag tỹ kon kỹ, hã ra ù tỹ ãjag jẽn to ãjag to vĩn kỹ ko sór tũg nĩ. ¹⁷ Topê tỹ tỹ ãg Senhor nĩn kỹ ãg jẽn tóg tỹ nén ù tũ nĩ ha mỹr, kỹ ãg tỹ nén ù nĩ ko tũ ra tóg ãg mỹ tỹ nén ù tũ nĩ. Nén ù ù to ãg jykrén ke mũ ha, hã vỹ: vênh jykre kuryj, he mũ, vênh jykre kusa, he mũ, vênh jykre sér, he mũ, Topê kuprĩg tỹ mỹr, ãg jagrẽ tãg ti. ¹⁸ Ëg tỹ gen kỹ Cristo jykre han kỹ tóg Topê mỹ há tĩ ha, ãg jykre ti, kỹ tóg ãg mrẽ ãprã ke ag mỹ há tĩ gé sir, ha vemnĩ.

¹⁹ Kỹ ãg jé jagnẽ krĩ kuprãg hã to jykrén. Ëg jé jagnẽ tar han sór. ²⁰ Kỹ tóg ãg tỹ nén ù nĩ ko to ãg régre tỹ tỹ prãnh ke han kỹ tóg kórég nĩ, ãg tỹ ù tỹ Topê ki rã kỹ nĩ ù tỹ tỹ prãnh ke han kỹ. Vễjên kar vỹ há nĩ. Hã ra ù tóg vễjên ù to jykrén

kónân sór mû, ti tỹ to Topê vỹ mranh kỹ. Ti tỹ ge ra kon kỹ tóg tỹ prãnh ke mû sir.
²¹ Kỹ tóg kórég nĩ, ěg régre tỹ ěg tugnĩn Topê vỹ mranh kỹ. Hã jé nén ù nĩ ko tũg nĩ, ã régre tỹ to tỹ prãnh kenh (ka) mẽ tĩn kỹ. Ti rĩnve vinho kron tũg nĩ gé. Nén ù tỹ ã régre tỹ Topê vỹ mranh han ěn továnh kân nĩ. ²² Ā tỹ nén ù to: “kórég tũ ti nĩ,” hen kỹ Topê hã mỹ tómni. Hã ra ã régre rĩnve han tũg nĩ, ti tỹ ã mỹ há nĩ ra, ã régre tỹ ã tugnĩn Topê vỹ mranh tũ nĩ jé. Ā tỹ Topê tỹ ã mỹ nén tó hã han kỹ tóg há nĩ, kỹ ã tóg jatũ nĩ, ha vemni.
²³ Ũ tóg ko tĩ, hã ra tóg ã tỹ ko mũ tag to: “isỹ Topê vỹ mranh ja mỹ vỹ?” he mũ sir. Ti tỹ ge ra ko kỹ tóg to krĩ kufy nĩ sir, kỹ tóg Topê vỹ mranh mũ sir. Ěg tỹ ti ki ge kỹ nỹtĩn kỹ ěg tóg ti tũ hã han sór mũ sir. Ěg tỹ nén ù to: “tag han kỹ inh mỹ ti vỹ mranh mũ vỹ?” hen kỹ ěg han ke tũ nĩ, ke tũ nĩ mũ ra ěg ti vỹ mranh mũ.

Ěg tỹ ěg mré ke ag to há nỹtĩnh ke

15 Ha vé, tar ěg nỹtĩ. Hã kỹ tóg ěg tỹ ùn krój nỹtĩ ag to fen nỹtĩnh há tĩ. “Ěn tóg inh mỹ há tĩ, hã kỹ sóg han sór mũ,” henh ke tũ ěg tóg nĩ. ² “Mỹ inh régre mỹ há nĩ vỹ?” he jé ěg tóg ke mũ. Ti tỹ ti mỹ há tũ nĩn kỹ ěg han ke tũ nĩ. Ěg tỹ ti tar han sór vỹ, ěg tỹ nén han mũ kar tỹ. ³ Cristo pi(jé) ã tỹ nén to ěn mũ ěn han ja nĩgtĩ, hã kỹ tóg ěg jagfy jagtar ja nĩgtĩ. Kỹ tóg Topê mỹ: “ã to ag tóg vỹ kónân tĩ, ã kato tẽ ag, hã ra ag vỹ vỹ inh kri kutẽnh ke mũ,” he ja nĩ. Ti mur tũg ki Topê vỹ tó tĩ ù tóg ti vỹ tag rán ja nĩ, hã ra tóg ge nĩ. ⁴ Hã ra Topê tóg ěg kanhrãn sór mũ, hã kỹ tóg ã vỹ tó ti ag mỹ: “ha rán,” he ja nĩgtĩ, hã kỹ ag tóg ránrán ja nĩgtĩ. Ěn ve kỹ ěg tar nỹtĩ, Jesus jykre mĩ mũ to, kỹ ěg tỹ prãnh kenh ke tũ nĩ. Kỹ ěg tóg ěg tỹ kanhkã tá nén venh ke ěn kã jatũ henh ke tũ nĩ gé. ⁵ Topê vỹ ěg to fen kỹ nĩ. Ti hã vỹ ājag tỹ jagnẽ to fen han ke mũ, ti kóm, ājag tỹ ti mré jykre pir nỹtĩ jé, ājag tỹ Jesus Cristo ki ge kỹ nỹtĩn kỹ.

Ěg tỹ to vāsãn han ki kanhró tóg nĩ, Topê ti. ⁶ Kỹ ājag tóg jagnẽ mré ěg jóg tỹ Topê to: “ũn mág vỹ tỹ ti nĩ,” henh ke mũ gé. Vẽnh vỹ pir han jé ājag tóg ke mũ, ti to, ěg Senhor tỹ Jesus Cristo to ke gé.

Fóg ag mré kanhgág ag tỹ Topê vỹ mẽnh ke

⁷ Hã kỹ jagnẽ to há nỹtĩmni, Cristo tỹ ěg to há nĩ ri ke nỹtĩmni, jagnẽ to. Kỹ ù tóg ājag jykre ve kỹ Topê to: “ũn mág vỹ tỹ ti nĩ,” henh ke mũ. ⁸ Tag to jykren nĩ, ha mẽ. Cristo vỹ Judeu ag ki rĩr jé kãtig ja nĩ, ti tỹ Topê tỹ vāsỹ ěg jógjóg ve ag mỹ nén tó ja ěn ki han jé. Ěn ve kỹ ěg tóg ki kanhrãn mũ, Topê tỹ vẽnh vỹ há hã tó tĩ ti. ⁹ Kỹ tóg povo ù ag jagãgtãn gé, kỹ ag tóg ti tugrĩn Topê mỹ vỹ há han mũ gé sir, fóg ag, kanhgág ag ke gé. Hã kỹ Davi tóg tag rán ja nĩ gé, ha mẽ: “tag tugnĩn sóg ã mỹ vỹ há han ke mũ, fóg ag rĩnve, kanhgág ag rĩnve ke gé. Ag rĩnve sóg ã mỹ jãn ke mũ, ã jé tó jé sóg ke mũ, ã jiji tó kỹ,” he ja tóg nĩ, Davi ti, Topê vỹ tỹ rán kỹ nĩ ki. ¹⁰ Kỹ tag tóg rán kỹ nĩ gé, ha mẽ. “Fóg’, kanhgág’, mỹ sér nỹtĩmni, Judeu ag mré hã, ti tũ ag mré hã,” he tóg mũ gé, Topê vỹ tỹ rán kỹ nĩ ki. ¹¹ Kỹ tag tóg rán kỹ nĩ gé, ha mẽ. “Fóg’, kanhgág’, ěg Senhor mỹ vỹ há han nĩ. Topê to vỹ há han kân nĩ, povo kar’,” he ja tóg nĩ gé, Topê vỹ tỹ rán kỹ nĩ ki. ¹² Kỹ Isaías vỹ Cristo to tag tó ja nĩ gé, ha mẽ: “Jessé krẽkrẽ ù vỹ tỹ ùn mág jẽnh mũ, Davi panh ěn krẽkrẽ ù, kỹ tóg tỹ povo kar ag pã’i mág jẽnh mũ. Fóg ag vỹ kanhgág ag mré ti ki ge sór ke mũ,” he ja tóg nĩ, Isaías ti. Ti tỹ Jesus tón hã vỹ. ¹³ Topê hã ne ěg mỹ ven ke mũ, nén ù há kar, hã kỹ tóg ěg mỹ tó ja nĩ. Ti hã ki ājag tóg ge kỹ nỹtĩ. Ti hã vỹ ājag fe tỹ mrin kenh ke mũ, ti hã vỹ ājag krĩ kuprãg ke mũ. Topê kuprĩg vỹ tỹ ājag jagrẽ nĩ, kỹ tóg nén kar han há nĩgtĩ. Ti hã vỹ ājag tar han ke mũ, ājag tỹ Topê tỹ ěg mỹ nén ù há ven kenh ke

ên to tar nýtí jé, ájag tý tag há mĩ êkrén jé.

Paulo rânhrāj

¹⁴ Inh kanhkā', vênh jykre há han kŷ ájag tóg nýtí. Isŷ ájag mŷ tó tũg ki ájag tóg ki kanhrân ja nĩ. Vég isóg nĩ nĩ. Hã kŷ ájag tóg jagnē jyvên ki kanhró nýtí gé. ¹⁵ Inh vênh rá tag ki sóg ájag mŷ nén ù tý hên ri ke kāmén, ti tý inh mŷ sér tĩn kŷ, sŷ ájag vég tũ ra. Ájag mŷ sóg kāmén há han, ájag tý kã jatú tũ nĩ jé, ájag tý mēg mũ tag kã. Topē ne tag to inh jēnē', tag to tóg isar han'. ¹⁶ Inh jé prēr tóg, isŷ povo kar mŷ Jesus Cristo kāmén jé. Kŷ sóg ti tũ ki rĩr jē nĩ, Topē vĩ sér tó sóg tĩ, fóg ag mŷ, kanhgág ag mŷ ke gé. Ag tý ti ki ge kŷ tóg ti mŷ sér tĩ, Topē kuprīg tý ag tý ũn há han kŷ, ag tý tý Topē tũ nýtĩn kŷ. Inh rânhrāj há vē.

¹⁷ Tý sóg Jesus Cristo rânhrāj han jafā nĩ, Topē tý isar han kŷ, kŷ inh rânhrāj tóg inh mŷ sér tĩ. ¹⁸ Kŷ sóg ájag mŷ Cristo tý inh mŷ vênh rânhrāj nĩm ja há tý vēmén sór mũ. Fóg ag mré kanhgág ag tý ti ki ge jé tóg isar han tĩ, ti vĩ tó tag to. Inh vĩ mē kŷ ag tóg ti ki ge sór mũ, ag tý inh jykre ve kŷ ke gé. Jesus Cristo tý nén han mũn há vē. ¹⁹ Milagre hyn han sóg tĩ gé, Topē tý isar han kŷ. Ti kuprīg tý inh krĩn kŷ sóg hyn han tĩ, milagre tĩ. Milagre hyn han kŷ sóg vênh kar mŷ ti vĩ ti tó ja nĩgtĩ, Jerusalém tá, kŷ tá kãkutē kŷ sóg ga kar mĩ tĩg ja nĩgtĩ gé, ga tý Ilríia mĩ há. Vênh kar mŷ sóg Cristo kãme sér tó ja nĩgtĩ. ²⁰ Û tý tá jun tũ ra sóg tá jun vén ja nĩgtĩ, sŷ tá ti vĩ tó vén jé, ag tý vāhā Cristo kãme mē jé, ù tý mē ja tũ ag. Inh hã ne ag mŷ tó vén sór ja nĩgtĩ', isŷ ù rânhrāj ja ki rânhrāj tũ nĩ jé. ²¹ Hã kŷ tag tóg rán kŷ nĩ, ha mē: "ù tý ti vēmē mē ja tũ ên ag vŷ ti ki kanhrân ke mũ. Û tý ti vĩ mē ja tũ ag vŷ mēnh ke mũ," he ja tóg nĩ, Topē vĩ rá ki. Sŷ ti vĩ tag há ki króm sór vē.

Paulo tý Roma ra tĩg sór

²² Hã kŷ sóg ájag tá jun ja tũ nĩ ver, sŷ ájag vênh há há ra. ²³ Hã ra sóg hur han kãn, tag ki inh rânhrāj ti. Vāsŷ sóg to jykrén, sŷ ájag vênh tĩg jé. ²⁴ Kŷ tóg hên ri ke mũn inh mŷ ki króm ke mũ ha. Sŷ ga tý Espanha ra tĩg sór vē, kŷ sóg ájag vênh rãnh mũ, êpŷrŷ kãkre ki, êmĩn kãkre ki. Kŷ tóg há tĩ, ájag tý inh jagāgtãn ken kŷ, sŷ ájag tá jun ken kŷ. Ájag tý inh jagāgtãn há han kŷ sóg tĩg há han ke mũ, Espanha ra. Hã ra sóg ájag mré nĩ sĩ han sór mũ, ájag tý isar han jé.

²⁵ Hã ra sóg ver Jerusalém ra tĩg sór mũ. Sŷ tá Topē tũ ag mŷ jãnkamy ma tĩg ke vē. ²⁶ Ga tý Macedônia tá Jesus mré ke ag vŷ inh mŷ jãnkamy vin, ga tý Grécia tá Jesus mré ke ag ke gé, isŷ Jerusalém tá ũn jagāgtar nýtĩ ag jagāgtãn jé, jãnkamy ên tý. Êg mré ke ag vē gé, Jerusalém tá ũn jagtar nýtĩ ag. ²⁷ Macedônia tá ke ag mŷ tóg sér tĩ, ag tý Jerusalém tá ke ag mré jãnkamy vênh kãpãm kŷ. Grécia tá ke ag mŷ tóg sér tĩ gé. Hã ra tóg inh mŷ há tĩ gé. Jerusalém tá ke ag vŷ Jesus ki ge vén, Judeu ag, kŷ fóg ag vŷ ag vĩ mē kŷ Jesus kãme mē ja nĩgtĩ. Hã kŷ fóg ag vŷ Judeu ag tũ mãn ja nĩ, há vŷ: Topē vĩ, he mũ. Kŷ tóg há nĩ ha, ag tý mē kar kŷ ag mŷ ájag tũ vênh kãpãm kŷ, vênh kaja jé, ag jãnkamy ti.

²⁸ Isŷ tag han kãn kŷ, sŷ ag mŷ jãnkamy tag vin kar kŷ sóg cidade tý Roma tá nĩ sĩ han kar kŷ ga tý Espanha ra tĩg sór mũ ha. ²⁹ Ha mē, isŷ ájag ki jun ken kŷ Cristo vĩ vŷ ájag mŷ sér tĩnh mũ, êg tý jagnē mré ti to vēmén kŷ, isŷ ájag mŷ ti vĩ tón kŷ, ha vemnĩ. Ti vĩ sér to tóg êg mŷ sér tĩnh mũ.

³⁰ Inh kanhkā', êg Senhor tý Jesus Cristo ki ge kŷ ájag tóg nýtĩ, kŷ ájag tóg jagnē to há nýtĩ gé, Topē kuprīg tugrĩn. Kŷ sóg ájag mŷ tag to vĩ sór mũ gé, ha mē. Iso Topē mré vĩmnĩ, inh mré, to krónh ke tũg nĩ. ³¹ Judéia tá ag vŷ e

nýtĩ, ù tỹ Jesus kato tẽ mũ ag, kỹ ag tóg inh kato tẽ sór mũ gé. Kỹ iso Topẽ mré vĩmnĩ, ti tỹ inh jy nĩgãnjé, Jerusalém tá ù tỹ Jesus ki ge kỹ nýtĩ ag tỹ inh mỹ vĩ há han jé gé, ti tỹ ag mỹ há tí jé, sỹ jãnkamy ên tỹ ag jagãgtãn sór mũ tag ti.
³² Tá kãtĩg kỹ sóg jatun mỹ ãjag ki jun ke mũ. Kỹ tóg êg kar mỹ sér tĩnh mũ, sỹ ãjag to pasan h tĩg ken kỹ, Topẽ tỹ isĩg ke tag to há nĩn kỹ. Kỹ ãjag tóg isar han ke mũ sir.

³³ Topẽ vĩ êg krĩ kuprãg tĩ. Kỹ sóg ti mỹ to vĩ tí, ti tỹ ãjag krĩ kãnhvy han jé. Amém.

Paulo tỹ ùn e mĩ êkrég tí

16 ãjag mỹ sóg êg mré ke fi tó sór mũ, Febe fi. Cidade tỹ Cencreia tá fi tóg Jesus ki ge kỹ nýtĩ fag ki rĩr tĩgtĩ. ² Fi tỹ kejẽn ãjag ki jun kỹ fi mỹ: “ha kãrã,” hemnĩ. ãjag mré fi tóg Jesus ki rã kỹ jẽ nĩ, kỹ fi mỹ nén tỹ fi mỹ tũ ên ven kãn nĩ. ù tỹ hẽn ri ke jagãgtãn fi huri, inh ke gé.

³ Priscila fi mĩ sóg êkrég tí, fi mén tỹ Áquila mĩ ke gé. Inh mré fag tóg rãnhřãj mág, Jesus Cristo rãnhřãj han kỹ. ⁴ Isug-nĩn fag tóg kãgter kren, inh jy nĩgãnjé. Tag hã mĩ sóg êkrég tí, kỹ sóg fag to há tăvĩ nĩ. Kỹ fóg kar kãmĩ Jesus ki ge kỹ nýtĩ ag vĩ tag tugrĩn fag to há nýtĩnh ke mũ gé, fag tỹ inh jy nĩgãnjé. ⁵ Fag ĩn krẽm ù ag tóg vẽn h mãn tí gé, culto han jé. Ên fag ki sóg êkrég tí gé.

Iso há ù vĩ nĩ gé, hã vĩ: Epẽneto, he mũ. Ga tỹ Ásia tá ù tỹ Jesus ki rã vén jan hã vẽn. Ti mĩ sóg êkrég tí gé. ⁶ Kỹ Maria fi vĩ nĩ gé. ãjag mỹ fi rãnhřãj mág. Fi mĩ sóg êkrég tí gé. ⁷ Kỹ sóg Adrõnico mĩ êkrég tí gé, Júnias mĩ ke gé. Inh kãnhkã ag vẽn. Inh mré ag tóg sigse kỹ nýtĩ ja nĩgtĩ gé. Apóstolo ag kãmĩ ag tóg tỹ ùn mág nýtĩ. Vãsỹ ag tóg Jesus ki ge jẽg, isỹ ti ki rã tũg ki.

⁸ Ampliãto mĩ sóg êkrég tí gé. Ti to inh há tăvĩ nĩ, êg Senhor tugrĩn. ⁹ Kỹ sóg Ur-

bano mĩ êkrég tí gé. Inh mré tóg Cristo rãnhřãj han tí. Kar kỹ iso há ù vĩ nĩ gé, Estãquis tí. Ti ki sóg êkrég tí gé. ¹⁰ Apeles mĩ sóg êkrég tí gé. Cristo tovãnh jãvãnh ja tí nĩ. Aristóbulo mré ke fag mĩ sóg êkrég tí gé. ¹¹ Kar kỹ inh kãnhkã ù vĩ tá jẽ gé, Herodiãto tí. Ti ki sóg êkrég tí. Kỹ sóg Narciso mré ke fag mĩ êkrég tí, ù tỹ fag kãmĩ êg Senhor ki ge kỹ nýtĩ fag.

¹² Kỹ sóg Trifena fi ki êkrég tí, Trifosa fi mĩ ke gé. Êg Senhor mỹ fag rãnhřãj mũgtĩ. Kỹ sóg iso há tăvĩ ù fi mĩ êkrég tí gé, hã vĩ: Pérside, he mũ. Êg Senhor mỹ rãnhřãj to fi tar tăvĩ nĩ. ¹³ Kỹ sóg Rufo mĩ êkrég tí. Topẽ ne ti kuprẽg', ti mỹnh fi ke gé'. Inh mỹ fi tóg tỹ inh mỹnh ri ke nĩ, ti mỹnh fi. ¹⁴ Kỹ sóg Asĩncrito mĩ êkrég tí, Flegonte mĩ ke gé, Hermes mĩ ke gé, Pãtrobas mĩ ke gé, Hermas mĩ ke gé, ag mré Topẽ vĩ mẽ jé vẽn h mãn tí ag mĩ ke gé. ¹⁵ Kỹ sóg Filólogo mĩ êkrég tí, Júlia fi mĩ ke gé, Nereu mĩ ke gé, ti ve fi mré, Olimpãs mĩ ke gé, kỹ ag mré Jesus vĩ mẽ jé vẽn h mãn tí ag mĩ ke gé, Topẽ tũ kar ag mĩ.

¹⁶ Kỹ jagnẽ ki nhun ke ri ke han nĩ, Jesus mré ke kar ki, jagnẽ nĩgẽ kãgmĩ kỹ. Cristo ki ge kỹ nýtĩ kar vĩ ãjag mĩ êkrég tí, êmã kar ki ke ag.

Ón kỹ vẽn vĩ há mẽ sór tũg nĩ

¹⁷ Nén ù tó sór sóg mũ gé ver ãjag mỹ. ù ag tóg ãjag tỹ jagnẽ to jũ han sór mũ. ãjag tỹ jagnẽ vĩ kãfãn kónãn mũ han sór ag tóg mũ. Ag pi(jé) ãjag tỹ Topẽ vĩ mẽ ja ên ri ke tó tí. Ên ag vĩ mẽ sór tũg nĩ. ¹⁸ Ag pi(jé) êg Senhor tỹ Cristo rãnhřãj han sór tí. Ag nug hã ki rĩr ag tóg tí. Ag vĩ vĩ mẽ há tí, ón kỹ, kỹ ù tỹ hẽn ri ke ag tóg kri fi sór mũ, ag vĩ kri, ag tỹ ag jykre kórég ki kãgtĩg nýtĩn kỹ, ù tỹ nén ù vẽn h mỹ to jykren tũ ag. Inh mỹ tóg ag tỹ ù tỹ ge krĩn kónãn ha mẽ tí. Kỹ ag vĩ mẽ sór tũg nĩ.

¹⁹ ãjag tỹ Topẽ vĩ kri nĩm mũ tag vĩ mẽ há tí. Vẽn kar vĩ mẽ, kỹ tóg inh mỹ

sér tĩ sir, ājag to. Kĩ tóg ājag tỹ vėnh jykre há ki kanhrān mág nỹtĩnh há tĩ. Ājag tỹ vėnh jykre pāno to jykren tũ pė nỹtĩn kĩ tóg há tĩ gé.

²⁰Topě vỹ ěg krĩ kuprāg tĩ. Kānhmar tóg ěg mỹ Satanás tỹ tũg' henh ke mũ gé, ha vemnĩ, kĩ tóg ājag vóg măn ke tũ nĩ ha.

Ěg Senhor tỹ Jesus mỹ sóg to vĩ tĩ, ti tỹ ājag mỹ ā tỹ nén ũ há ěn vin jé.

**Paulo mré ke ag tỹ Roma
ki ke fag mĩ ěkrég tĩ**

²¹Inh mré Jesus rānhrāj han mũ tỹ Timóteo vỹ ājag mĩ ěkrég tĩ gé, Lúcio ti ke gé, Jasão ke gé, Sosípatro ke gé, inh kanhkā ag.

²²Ũ tỹ Paulo mỹ tag rán mũ vỹ tỹ inh nĩ, hā vỹ: Tércio, he mũ. Kĩ sóg ājag mĩ ěkrég tĩ gé, ājag tỹ inh mré ěg Senhor ki ge kĩ nỹtĩn kĩ.

²³Gaio vỹ ājag mĩ ěkrég tĩ. Tĩ ĩn krēm sóg jě, kĩ ěg tóg ti ĩn krēm culto han tĩ. Erasto vỹ ājag mĩ ěkrég tĩ gé, ũ tỹ cidade jānkamy ki rĩr tĩ ěn ti. Ěg régre tỹ Quarto vỹ ājag mĩ ěkrég tĩ gé. ²⁴Ěg Senhor tỹ Jesus Cristo mỹ sóg to vĩ tĩ, ti tỹ ājag kar tar han jé. Amém.

Topě mỹ ěg vĩ há han ke

²⁵Ha mẽ, ěg jé Topě mỹ vĩ há han. Ěg tar han ki kanhró tóg nĩ, ěg tỹ ti ki rā kar krónh ke tũ nĩn jé. Sỹ ājag mỹ Topě vĩ sér tó mũn hā vė, Jesus Cristo kāmén kĩ. Vāsỹ ěg tóg mẽ ja tũ nĩ, ti vĩ sér tag ti. Ěg tỹ vāhā mẽ vė, Topě tỹ ěg mỹ to vėnh jykre nĩm kĩ. Prỹg tỹ hėn ri ke ki ag tóg mẽ ja tũ nỹtĩ, ěg jo ke ag. ²⁶Ũri hā ěg tóg męg mũ. Vāsỹ Topě vĩ rán ti ag vỹ ěg tỹ ũri męg mũ tag tó ja nĩgtĩ. Kĩ Topě tóg tag to: “povo kar mỹ kāmén nĩ, fóg ag mỹ, kanhgág ag mỹ, Judeu ag mré hā,” he ja nĩ, ěg tỹ mẽ kăn jé, ti ki ge jé, ti vĩ kri fi jé, ti tỹ tỹ ěg Senhor kar jě jé. Ā tỹ nén kar han tũg ki tóg nĩ nĩ, Topě ti, ũ tỹ ti han ja tũ (hā) ra. Kĩ tóg tũ' henh ke tũ nĩ gé. Gen kĩ tóg nĩ nĩ.

²⁷Ti hā ne ā pir mỹ nén ũ kar ki kanhró nĩ', Topě ti. Jesus Cristo hā tóg ěg mỹ Topě ven ke mũ. Kĩ ěg tóg ti hā mỹ vĩ há han sór mũ, Topě hā mỹ, kĩ tóg krỹg henh ke tũ nĩ, ěg tỹ ti mỹ vĩ há han mũ ti. Amém.

**PAULO TỠ CARTA HAN:
CORINTO TÁ KE
AG MỸ CARTA VE**

1 Paulo tỡ rá vễ. Isỷ cidade tỡ Corinto tá ke ag mỷ rán hã vễ. Kỷ ẽg rẻgre tỡ Sỏstenes vỷ inh mớ rán mủ gẻ. Topẻ hã ne inh kuprẻg', kỷ tỏg inh jẻ prẻr, Jesus Cristo tỡ inh fẻg jẻ, sỷ tỡ ti apỏstolo jẻ jẻ sir. Hã kỷ sỏg ỏgag mỷ rán mủ. ²Corinto tá ỏgag tỏg vẻnh mản tỡ, Topẻ vỡ mẻ jẻ. Topẻ tủ vỷ tỡ ỏgag nỷtỡ, ỏgag tỡ tỡ Jesus Cristo mớ ke nỷtỡn kỷ. ỏgag jẻ prẻr tỏg, ỏgag tỡ tỡ ti tủ nỷtỡn jẻ.

Vẻnh kar mỷ ke vẻ gẻ, vẻnh rá tag ti, ủ tỡ hẻ tá ẻg Senhor tỡ Jesus Cristo jiji tỏ tỡ ag mỷ. Ủ tỡ ti hã to: “ẻg Senhor vẻ,” he tỡ ag mỷ ke vẻ gẻ. Ag Senhor vẻ, kỷ tỏg tỡ ẻg Senhor nỡ gẻ, Jesus ti.

³Topẻ mỷ sỏg to vỡ tỡ, ti tỡ ỏgag tar han jẻ, ti tỡ ỏgag kỡ kuprẻg jẻ, ẻg jỏg mág ti, ẻg Senhor tỡ Jesus Cristo jỏg ti.

Topẻ tỡ ẻg mỷ nẻn han mủ vỷ há nỡ

⁴Kurả kar ki sỏg ỏgag to Topẻ mớ vỡ tỡ. Ti mỷ sỏg: “há ti nỡ, ả tỡ Jesus Cristo tugrỡn ag tar han kỷ,” he tỡ. ⁵Ti tugnỡn ỏgag tỏg ủn rico ag ri ke nỷtỡ, nẻn kar to mỷr, Topẻ vỡ to, vẻnh jykre há kar to. Ki kanhrỏ ỏgag tỏg nỷtỡ. ⁶Cristo tỡ vẻme ki kanhrỏ ỏgag tỏg nỷtỡ mỷr, to tar ỏgag tỏg nỷtỡ. ⁷Hã kỷ Topẻ kuprẻg tỡ ẻg mỷ nẻn nỡm tỡ ẻn vỷ tủg' he vẻnh nỷgtỡ ỏgag mỷ. ẻg Senhor tỡ Jesus Cristo vẻnh ven mản ẻn jẻvẻnh ỏgag tỏg mủgtỡ gẻ, ti kỏtẻg ke ti. ⁸Ti hã vỷ ỏgag tar han mủ', ỏgag tỡ ti tovẻnh tủ nỡ jẻ, ỏgag tỡ kygnẻg tủ nỡ jẻ. Kỷ ẻg Senhor tỡ Jesus Cristo kỏtẻg mản kỷ, ti kurả ki, kỷ tỏg ỏgag tỡ kygnẻ ja tủ ẻn venh ke mủ sir. ⁹Topẻ ne fagrỡnh mỷ vỡ vẻnh nỷgtỡ'. ỏgag jẻ prẻr tỏg, ỏgag tỡ tỡ ti kỏsin tỡ Jesus Cristo mớ ke nỷtỡ jẻ, ỏgag tỡ tỡ ẻg Senhor mớ ke nỷtỡ jẻ gẻ.

Vẻnh kỏpỏm kỷ nỷtỡ tủg nỡ

¹⁰Inh kanhkỏ', vẻnh vỡ pir han nỡ. ẻg Senhor tỡ Jesus Cristo jiji ki sỏg ỏgag jyvẻn sỏr mủ, hã kỷ sỏg ke mủ. Vẻnh kỏpỏm sỏr tủg ra. Vẻnh jykre pir han sỏr ra. Nẻn pir hã to jykrẻn nỡ. Vẻnh jykre pir hã han sỏr ra.

¹¹Inh kanhkỏ', ỏgag to sỏg vẻnh vỡ jagy mẻ. Cloe fi mớ ke fag vỷ inh mỷ tỏ, kỷ fag tỏg inh mỷ ỏgag tỡ vẻnh kỏpỏm sỏr mủ kỏmẻn, ỏgag tỡ jagnẻ to jủ sỏr mủ ti. ¹²Tag mẻ sỏg, ha mẻ: ỏgag kỏmỡ ủ tỏg nẻji: “tỡ sỏg Paulo mớ ke nỡ,” he tỡ. Kỷ ủ tỏg nẻji: “tỡ sỏg Apolo mớ ke nỡ,” he tỡ gẻ. Jỏvo ủ tỏg: “tỡ sỏg Pedro mớ ke nỡ,” he tỡ, kỷ ủ tỏg: “tỡ sỏg Cristo mớ ke nỡ,” he tỡ gẻ. ¹³Cristo mỷ vẻnh kỏpỏm kỷ nỡ? Vỏ. Inh hã mỷ ỏgag jagfy cruz to sa? Vỏ. Inh jyjy tỏ kỷ ỏgag mỷ vẻnh kygpe kỷ nỷtỡ', isỷ tỡ Paulo nỡn kỷ? Vỏ, ke tủ vẻ.

¹⁴Hã kỷ tỏg inh mỷ há tỡ, ủri, sỷ ỏgag kygpe ja tủ nỡ ti. Tag to sỏg Topẻ mỷ: “há ti nỡ,” he tỡ. ¹⁵Kỷ ỏgag tỏg iso: “ti jiji tỏ kỷ sỏg kype kỷ nỡ,” he vẻnh nỷtủgtỡ. Crispo hã kype inh, kar kỷ Gaio ti ke gẻ. ¹⁶Kar kỷ sỏg Estẻfanas fag kygpẻ gẻ. Kar inh ủ kygpẻg tủ nỡ, hỷn, he sỏg. ¹⁷Cristo pi(jẻ) inh mỷ: “ha ag kygpenh tẻg,” he ja nỡ'. Inh mỷ tỏg: “ha ag mỷ inh kỏmẻn tẻg, ha inh vỡ tỏnh tẻg,” he ja nỡ. Kỷ sỏg tỏ tẻgtỡ. Hã ra sỏg ỏn kỷ tỡ vẻme kanhrỏ han vẻnh nỷgtỡ, ke tủ nỡ mủ ra Cristo tỡ cruz to sa ja ẻn tỡ nẻn ủ tỡ ri ke nỡ sir, isỷ inh vỡ kanhrỏ tỡ ỏgag kỡn sỏr mủ ra.

Jesus tỡ cruz to sa ja hã tỏ ẻg tỡ

¹⁸Ủ mỷ ẻg tỏg vẻnh kỏtẻg nỷtỡ ve nỡ, ẻg tỡ Jesus tỡ cruz to sa mủ ẻn tỏ kỷ. Hã ra ag tỡ nủgme ki vỏr ke vẻ. Ag jỏvo tỏg ẻg mỷ Topẻ tỡ há (r) nỡ, Jesus tỡ cruz to sa ti, hã kỷ ẻg krenkren kỷ nỷtỡ, Topẻ tỡ hã tugrỡn ẻg krenkren han kỷ. ¹⁹Hã kỷ tỏg rỏn kỷ nỡ, ha mẻ. “Ủn kanhrỏ mág ag jykre tỡ sỏg tủ hẻnh ke mủ, ha vemnỡ,

ũn estudo mág ag tỹ nén to jykrén mũ tỹ sóg tũ' henh ke mũ," he tóg, Topê ti.

²⁰ Hã kỹ ón kỹ ũn kanhró mág ag pi(jé) tỹ nén ũ nỹtĩ. Ón kỹ vènh rán tĩ ag pi(jé) tỹ nén ũ nỹtĩ. Ón kỹ ũn estudo mág ag pi(jé) tỹ nén ũ nỹtĩ. Ēg tỹ tag ki nén ũ ki kanhrân mũ to tóg: "nén ũ tũ vè," he ja nĩgtĩ, Topê ti. "Krĩ tũ ag nỹtĩ, ũ tỹ tag hã nón mũ sór mũ ag," he tóg, Topê ti.

²¹ Topê tỹ nén to jykrén mũ vỹ ge nĩ, ha mē. Ēg tỹ vēsóg ki Topê to jykrén sór mũ ra Ēg tóg ti ki kanhrân ja tũ nĩgtĩ, Ēg tỹ ga krĩ mũn kỹ. Hã kỹ Topê tóg Ēg tỹ ti vỹ jēmē kỹ krĩ fi kỹ Ēg kren han mũ. Hã kỹ tóg ag mỹ Topê krĩ tũ nĩ ve nĩ, ũ tỹ ki kagtĩg ag mỹ. ²² Judeu ag ne Ēg tỹ nén han vánh ve sór mũ', milagre ti, ag tỹ Topê jykre ki kanhrân jé. Kỹ fóg tỹ Grego ag ne ón kỹ ti jykre to vēmén sór mũ'. ²³ Ag jãvo Ēg tóg nén pir hã tó tĩ, hã vỹ: Cristo tỹ cruz to sa kỹ ter ja ti, he mũ. Judeu ũ ag mỹ tóg jēggry tĩ, ti cruz ti, jãvo tóg Judeu tũ ag mỹ Ēg krĩ tũ nĩ ve nĩ, ag tỹ Ēg vỹ mē kỹ, fóg ũ ag mỹ, kanhgág ũ ag mỹ ke gé. ²⁴ Judeu kãmĩ ũ ag tóg kuprēg kỹ nỹtĩ jãvo, fóg kãmĩ ũ ag tóg kuprēg kỹ nỹtĩ gé, kanhgág ag kãmĩ ke gé. Ag hã mỹ tóg há tĩ, Cristo tỹ cruz to sa kỹ ter ja ti, ũn kuprēg kỹ nỹtĩ ag mỹ. Ēg hã vè. Topê jykre tar hã vè, Cristo tỹ cruz to sa ja ti. Topê krĩ há to ken hã vè, hã vỹ: Cristo ter ja ti, he mũ. ²⁵ Topê krĩ tũ nĩ ve vỹ ěprã ke krĩ há nĩ ve kãfór nĩ mỹr, ti hã ne ã pir mỹ krĩ há nĩ. Kỹ Topê krój nĩ ve vỹ ěprã ke ag tar nĩ ve kãfór nĩ gé. Topê hã ne ã pir mỹ tar nĩ'.

Topê vỹ Ēg kuprēg, Ēg tỹ tỹ nén ũ tũ ra

²⁶ Inh kanhkã', vēsô jykrén. Topê vỹ ājag jé prēr. Ājag kãmĩ ti pipir nỹtĩ, ũn kanhró mág ag, escola tỹ hēn ri ke ki vènh kanhrân ja ag. Ũn mág ag vỹ pipir nỹtĩ gé, ũn mág krē ag ke gé. Ũ tỹ ge kuprēg mág tũ ti nĩgtĩ, Topê ti. ²⁷ Ũ tỹ ũn mág ag mỹ krĩ tũ nĩ ve ag hã kuprēg

ti tĩ mỹr, ũn vènh kagtĩg ag. Ti tỹ ũn krĩ há ag mỹ'a han sór vè. Kỹ tóg tag ki ũn krój nỹtĩ ag kuprēg, ũn tar ag mỹ'a han jé. ²⁸ Hã jé Topê tóg ũ tỹ tag ki jagtar nỹtĩ ag kuprēg. Ũn mág ag tỹ Ēg ve kỹ Ēg tóg ag mỹ jagāgtar nỹtĩ. Nén ũ tũ vỹ tỹ Ēg nỹtĩ. Hã ra Topê tóg Ēg kuprēg mũ, ag tỹ tũ' hen jé, ũn mág ag vỹ tỹ. ²⁹ Hã kỹ ũ tóg Topê mỹ: "ũn mág vỹ tỹ inh nĩ, há inh nĩ," henh ke tũ pē nĩ, Ēg tỹ kejēn ti ve kỹ. Hã jé Topê tóg ũn jagtar ag kuprēg.

³⁰ Topê mré ke vỹ tỹ Ēg nỹtĩ, ha mē, Ēg tỹ tỹ Jesus Cristo mré ke nỹtĩn kỹ. Topê hã vỹ Ēg krĩ há han mũ', Jesus tugnĩn. Topê hã vỹ Ēg mỹ vènh pãte fón mũ', ti tugrĩn. Ti hã ne Ēg tỹ tỹ ti tũ nỹtĩ han mũ', ti tugnĩn. Ti hã ne Ēg krenkren han mũ'. Topê tỹ ti mỹ vènh jykre nĩm hã vè, Ēg tỹ tag han jé, ³¹ ũ tỹ rán kỹ nĩ tag ti, hã vỹ: "ājag tỹ ũ to: ũn mág vỹ tỹ ti nĩ, he sór kỹ Ēg Senhor ti tómni," he mũ, Topê vỹ rán ki.

Paulo vỹ krój nĩ gé

2 Inh kanhkã', ājag ki sóg jun ja nĩ, sỹ ājag mỹ Topê jykre tó jé. Inh pi(jé) ājag mỹ ón kỹ vēmē kanhró han'. Inh pi(jé) ājag tỹ vènh vỹ ki kanhró jāvánh tó'. ² Nén pir hã to sóg jykrén ja nĩgtĩ, sỹ ājag mỹ tó jé, hã vỹ: Jesus Cristo, he mũ, ti tỹ cruz to sa kỹ ter ja ěn ti. ³ Krój ja inh nĩ, sỹ ājag ki jun kỹ. Mũmēg ja inh nĩ, kanē jur han ja inh nĩ, sỹ ājag mré nĩn kỹ. ⁴ Isỹ ājag mỹ Topê vỹ tó kỹ inh pi(jé) vènh vỹ sĩnvĩ tỹ ājag krĩn sór ja nĩgtĩ', inh pi(jé) inh krĩ há tỹ vènh vỹ kanhró tó ja nĩgtĩ'. Topê kuprĩg tỹ inh jagrē nĩ hã tỹ sóg ājag mỹ tó ja nĩgtĩ', ti jykre tar tỹ. ⁵ Hã kỹ ājag pi(jé) ěprã ke jykre há ki ge jēg', ěprã ke vỹ kanhró ki'. Hỹ, hã ra ājag tóg Topê jykre tar ki ge jēg mỹr'.

Topê kuprĩg vỹ Topê tỹ nén to jykrén mũ ki kanhró nĩ

⁶ Jãvo sóg ũ tỹ Jesus ki kanhró mág ag mỹ Topê vỹ kanhró tó tĩ gé, ũ tỹ to

kykrén há ag mý. Hã ra ti pi(jé) tý ěprã ke ví kanhró nĩ. Ga kri ke ag jykre tó tú sóg nĩgtĩ, ũri ũn mág ag ví ti. Tú' he jé tóg ke mũ, ũri ũn mág ag ví ti. ⁷ Topě ví kanhró tó sóg tí mýr'. Ěn tý ěg vėsóg ki ki kanhrãn ke tú nĩ. Vãsý ěg tóg ki kanhrãn ja tú nĩ gé. Hã ra Topě tóg vãsý to jykrén mũ, mundo tý kã nĩ to hã tóg to jykrén mũ, ěg tý ti ví ki kanhrãn jé, ěg tý ti jykre ki kanhró tugin tý ũn mág nýti jé. ⁸ Ũri ũn mág ag pi(jé) ki kanhró nýti', Topě jykre tag ki'. Ag tý ki kanhró nýti ra ag pi(jé) Jesus tý ka to ti sanh mũ vė', ěg Senhor tý, ũ tý vėnh kar kãfór nĩ tag tý mýr. Hã ra ag tóg ti ki kagtĩg nýtin ký ag tóg cruz to ti sa ja nĩgtĩ. ⁹ Hã ra tóg rán ký nĩ, Topě jykre ti, hã vỹ: "Topě tóg ěg mý nén ũ há tãví kãn ja nĩ, ũ tý ti to há kar mý mýr," he mũ. "Ũ pi(jé) tag ve ja nĩ ver'. Ũ pi(jé) tag mē ja nĩ ver'. Ěprã ke ag pi(jé) to jykrén ja nĩ ver'. Topě hã ne to jykrén ja nĩgtĩ, ti tý ěg mý kãn ke ěn to," he ja tóg nĩgtĩ, Topě ví rán ki.

¹⁰ Ký tóg ěg hã mý tó ja nĩ. Ā kuprĩg tý tóg ěg kanhrãn ja nĩ, to. Ti kuprĩg vỹ nén kar to jykrén tĩgtĩ, Topě tý nén to jykrén mũ mré hã, ti tý vėnh kar vatánh tá nén to jykrén mũ mré hã. ¹¹ Ge ti nĩ, ha mē. Ěprã ke tý nén to jykrén mũ ki kanhró ěg tóg nĩ. Ký ěg ne tý ki kanhrãn tí? Ěg krĩ tý ěg ki kanhrãn tí. Ěprã ke krĩ vỹ ěprã ke tý nén to jykrén mũ ki kanhrãn tí. Hã ra Topě kuprĩg vỹ Topě tý nén to jykrén mũ ki kanhrãn tí. Ěprã ke pi(jé) Topě tý nén to jykrén mũ ki kanhrãn tí', ti tý Topě kuprĩg tý jagrē tú ra'. ¹² Hã ra Topě pi(jé) ěg mý ěprã ke kuprĩg tý ěg jagrē han'. Topě kuprĩg tý tóg ěg mý ěg jagrē han, ěg tý ti tý ěg mý nén nĩm mũ ki kanhró nýti jé. Ti hã vỹ ěg kren han sór mũ, ěg tý vėnh krenkren han ki kagtĩg ra. Ti tý ěg mý nén nĩm to ken hã vė.

¹³ Hã tó sóg tí. Ěprã vėnh kanhró pijé', sý ājag mý tó mũ tag ti. Topě kuprĩg kanhró vė. Hã ký sóg ti kuprĩg hã tý ti jykre kãmén tí. ¹⁴ Ěprã ke ag pi(jé) Topě

kuprĩg to há nýti', ti jykre to'. Ag mý tóg tý Topě krĩ tú nĩ ve nĩ. To jykrén há han ki kagtĩg ag nýti, ag tý Topě kuprĩg tý jagrē tú nýtin ký. ¹⁵ Ũ tý ti kuprĩg tý jagrē jē ěn hã ne nén kar to jykrén há han tí'. Ký ũ pi(jé) ěg tý nén han mũ ěn ki kanhró nĩ, ti tý vėg mũ ra, ti tý Topě kuprĩg tý jagrē tú jēn ký.

¹⁶ Hỹ, ũ nỹ hỹn Topě tý nén to jykrén mũ ki kanhró nĩ? Ũ nỹ hỹn Topě kanhrãn mũ? Ũ tý ti kanhrãn mũ vėnh ke tú ěg tóg nĩ. Jãvo Cristo hã ne ěg kanhrãn tí', ti tý ěg krĩ ri ke nĩn ký.

Topě camarada ag tý jagnē ri ke

3 Inh kanhkã', inh pi(jé) ājag mý Topě jykre tó kãn ja nĩ ver', sý ājag mý tó sór mũ ra. Ũ tý Topě kuprĩg tý jagrē nýti tú ri ke vỹ tý ājag nýti, gĩr ri ke vỹ tý ājag nýti, ājag tý Cristo jykre to tar tú nýtin ký. ² Hã ký sóg ājag mý leite ri ke hã ven ja nĩ, sý ājag mý Topě ví tó ký. Inh pi(jé) ājag mý vėjēn tar ri ke ven ja nĩgtĩ', ājag tý to tar tú ja nýtin ký ver. Ký ājag tóg ũri to tar tú nýti gé. Ver ājag tóg ũ tý Topě kuprĩg tý jagrē tú nýti ve nĩ. ³ Hã ký ājag tóg vėnh kãpugpón ký nýti, ājag tý jagnē to jũ nýtin ký. Hã ki ājag tóg ěprã ke jykre han tí, hã ki ājag tóg ti tý jagrē tú nýti ve nĩ. ⁴ Ký ājag kãmĩ ũ ne tóg: "Paulo mré ke vỹ tý inh nĩ," he tí'. Ký ũ tóg: "jãvo sóg tý Apolo mré ke nĩ," he tí gé'. Ěprã ke jykre hã vė, ājag tý han mũ tag ti.

⁵ Ũ nỹ tý Apolo nĩ', jo ũ nỹ tý inh nĩ', hã vỹ: Paulo, he mũ? Topě camarada ri ke ěg nýti, ký ājag tóg ěg ví kri fi ký Jesus ki ge ja nĩgtĩ, ěg Senhor tý ājag krĩn ký. Ti hã vỹ ěg mý ěg rãnrãj nĩm ja nĩ. ⁶ Topě ví krãn inh, ājag kãki, ký Apolo vỹ ki gónh, hã ra ũ tý ti mog han mũ vỹ tý Topě nĩ. ⁷ Hã ký ũ tý krãn mũ pi(jé) tý ũn mág nĩ'. Ũ tý ki gónh mũ pi(jé) tý ũn mág nĩ gé'. Pir ti nĩ, ũn mág ti, hã vỹ: Topě, he mũ, ũ tý ti mog han mũ ěn ti. ⁸ Ũ tý krãn mũ vỹ ũ tý ki gónh mũ ěn ri

ke nĩ. Kanhkā tá ěg tóg ěg rānhrāj kaja venh ke mũ. Sỹ krān ja kaja ve jé sóg ke mũ, jāvo tóg ā tỹ ki gónh ja kaja venh ke mũ gé. ⁹Topē hā mré ěg tóg rānhrāj mǔgtĩ. Topē japỹ ri ke ājag nỹtĩ.

Topē tỹ ěg rānhrāj tugnỹm ke

Kỹ ājag tóg ti tỹ ĩn han mũ ri ke nỹtĩ gé. ¹⁰Ĩn tỹ kri jē jafā ri ke han ĩnh, ĩn króg-gróg ri ke ti, sỹ ājag mỹ ti jykre tó kỹ, Topē tỹ to ĩnh krĩn kỹ. Kỹ sóg to jykrén há han, sỹ ĩn tỹ kri jē jafā ri ke ěn tar há han jē. Kỹ ājag kāmĩ tóg kri ĩn ri ke han mũ sir, ti tỹ isỹ ājag kanhrān nón ājag kanhrān kỹ. Kỹ ũ tỹ Topē vĩ tó mũ jé to jykrén há han. ¹¹Ĩn tỹ kri jē jafā ri ke ěn vĩ pir nĩ, hā vĩ: Jesus Cristo, he mũ, hā kỹ sóg ājag mỹ ri ke han, sỹ ti kāmén kỹ. ũ venh ke tũ ěg tóg nĩgtĩ. ¹²Kri ěg tóg ĩn ri ke hyn han tĩ. ũ tóg ouro tỹ han mũ, ũ tóg prata tỹ han mũ, ũ tóg pó sĩnvĩ tỹ han mũ, ũ tóg ka tỹ han mũ, ũ tóg re tỹ han mũ, ũ tóg ěkré fār tỹ han mũ. ¹³Kurā tỹ ěgno ki ěg tóg venh ke mũ, ĩn há ti, hā vĩ: ěg tỹ ũ mỹ ti vĩ kāmén há han ja ti, he mũ. Pĩ vĩ ěg rānhrāj kókén ke mũ, kỹ ěg tóg pĩ ki ěg rānhrāj jykre venh ke mũ. ¹⁴Pĩ tỹ ti kókén vānh nĩn kỹ ěg tóg ti kaja venh ke mũ sir, ěg tỹ ĩn tỹ kri jē jafā kri han ja kaja ti. ¹⁵Pĩ tỹ ěg rānhrāj kókén kỹ ěg tóg ěg rānhrāj ti kren ke mũ sir, ti tũg kỹ, ge ra ěg hā tóg kren ke mũ hā ra, ěg tỹ kanhkā ra mũn kỹ. Hā ra tóg ěg tỹ pĩ ki kren ri ke nĩ sir.

¹⁶Ha mẽ, Topē ĩn ri ke ěg nỹtĩ, Topē kuprĩg tỹ ěg kākā jēn kỹ. Ājag mỹ tag ki kagtĩg? Ki kagtĩg nĩ ve ājag nỹtĩ. ¹⁷Ũ tỹ Topē ĩn kókén mũ ěn kókén jé tóg ke mũ, Topē ti. Ti tũ vế mỹr, ti ĩn ti. Ājag hā vế, ti ĩn ti, ěg hā vế.

Ěg pi(jé) jagnē káfór nỹtĩ

¹⁸Kygnē tũg nĩ, ājag tỹ vếso: “ki kanhró mág ĩnh nĩ,” hen kỹ. Ājag tỹ ěprā ki kanhró mág nỹtĩn kỹ to: “nén ũ tũ vế,” hemnĩ, to: “sỹ nén ũ ki kagtĩg ri ke vế,”

hemnĩ, ājag tỹ Topē jykre hā ki kanhrān jé. ¹⁹Ěprā ki kanhró mág ag to Topē tóg: “nén ũ tũ vế,” he tĩ. Vēnh kagtĩg ag tóg nỹtĩ, ti mỹ. Hā kỹ tag tóg rán kỹ nĩ, ha mẽ: “ěprā ke ag mỹ tóg ag tỹ ki kanhró mág nỹtĩ ve nĩ, hā ra Topē tóg hā ki ag mỹ ag krĩ tũ nỹtĩ ěn ven ke mũ,” he tóg, Topē vĩ rá ki. ²⁰Kỹ ti rá ũ vĩ ge nĩ gé, ha mẽ: “Topē vĩ ki kanhró nĩ, ũ tỹ ki kanhró mág ag tỹ nén to jykrén mũn ki. Nén ũ tũ vế, ag tỹ nén to jykrén mũn ti. Kỹ tóg ki kanhró nĩ, Topē ti,” he tóg mũ gé, Topē vĩ rá ki. ²¹Hā kỹ ěprā ke jiji tó sór tũg nĩ. Ag pi(jé) tỹ ũn mág nỹtĩ. Ājag mré ke kar ag vế mỹr. ²²Ĩnh hā vĩ tỹ ājag mré ke nĩ. Apolo vĩ tỹ ājag mré ke nĩ gé, Pedro ti ke gé. Mundo ki ke kar vĩ tỹ ājag tũ nĩ gé, ājag rĩnrĩr nĩ ti ke gé, ājag ter ke ti ke gé, ājag tỹ ũri vég mũ ti ke gé, ājag tỹ vāhā venh ke ti ke gé. Ājag tũ kar vế mỹr, ²³jāvo ājag hā ne tỹ Cristo tũ nỹtĩ, kỹ Cristo vĩ tỹ Topē tũ nĩ. Vyrmỹ tũ han sór tũg nĩ.

Apóstolo ag

4 Ājag tỹ ěg to jykrén kỹ tag to jykre nĩ, ha mẽ. Cristo camarada vĩ tỹ ěg nỹtĩ. Topē jykre tó ěg tóg tĩ, ěg tỹ vếsóg ki nén to jykrén vānh ěn. ěn ki rĩr ěg tóg tĩ. ²Kỹ ěg patrāo tóg nén ũ pir ve sór nĩgtĩ, ěg tỹ ti tũ ki rĩr mũn kỹ, hā vĩ: ěg tỹ ki rĩr há han mũ, he mũ. Ge ti nĩ, Topē tỹ ěg ki nén ve sór mũ ti. Ti tũ ki rĩr há han jé ěg tóg ke mũ. ³Kỹ ājag tỹ isỹ nén han mũ to vĩ mũ ra tóg ĩnh mỹ tỹ nén ũ tũ nĩ, ěprā ke ag tỹ ĩnh jykre to vĩ mũ ra. Kỹ isóg ĩnh jykre to: há ti nĩ, he tũ nĩgtĩ gé. ⁴Ĩnh pi(jé) sỹ ti vĩ mranh mũ ki kanhró nĩ. Hā ra sóg tag to: “hā kỹ ĩnh jykre vĩ kuryj kar nĩ,” he tũ nĩgtĩ gé. Topē hā ne ěg jykre tugnỹm tĩ, hā kỹ tóg ki kanhró kar nĩ, hā kỹ tóg tónh ke mũ. ⁵Kỹ ũ jykre to vĩ sór tũg nĩ, kurā tỹ ěgno to hā, ěg Senhor kātĩg ke to hā. Ti ha ne nén kar vēnh ven han ke mũ, ěg tỹ vēnh vatánh tá nén han mũ mré hā, ěg

tỹ kutý tá nén han mũ mré hã. Kỹ tóg ãg tỹ nén ù to jykrén mũ ãn vènh ven han kãn ke mũ gé mỹr. Kỹ ãg tóg mènũ mũ sir, Topẽ tỹ ãg mỹ vĩ há han ke ti. Vyrmynd tóg ãg mỹ tónh ke mũ, ãg kar mỹ, ãg tỹ nén han ja ti.

⁶ Inh kanhkã', Topẽ vĩ rán ja pátén sór tũg nĩ. Û tỹ ãgag kanhrãn mũ to: "Topẽ vĩ tó tĩ ag kãmĩ kãfór vĩ tỹ ti nĩ," he tũg nĩ. ãgag tỹ to jykrén há han jé, hã jé sóg vènh hã to tag rán, ãgag mỹ, Apolo to ke gé, ãg tỹ jagnẽ ri ke nỹtĩ tag ti. ⁷ ãg tỹ jagnẽ kãfór han sór kỹ ãg tóg ón kỹ ke ti. Ha vé, Topẽ vĩ ãg mỹ ãg tũ vin kãn. ãg tỹ vèsóg ki mãn ja pijé'. Kỹ ãgag tỹ ne jé to: "isũ vè," he sór nẽ? Tỹ tóg Topẽ tỹ ãgag mỹ nĩm tũ nĩ ve nĩ, ãgag tỹ to: "isũ vĩ ã tũ kãfór nĩ," hen kỹ.

⁸ Tỹ ùn há nỹtĩ ve ãgag nỹtĩ, vènhmỹ. Rico nỹtĩ ve ãgag nỹtĩ, vènhmỹ. Tỹ ùn mág nỹtĩ ve ãgag nỹtĩ vènhmỹ, inh jãvo. Hỹ, há ti nĩ vè, ãgag tỹ tỹ ùn mág nỹtĩ ra. Kỹ sóg tỹ ãgag mré ùn mág nĩnh mũ gé vè vè. Hã ra tóg ke tũ tĩ. ⁹ Jesus tỹ ùn fẽg mũ vĩ tỹ inh nĩ, apóstolo vĩ tỹ inh nĩ. Hã ra tóg sỹ to jykrén mũ ra tóg Topẽ tỹ isỹ ùn jykre kórég ag ri ke han nĩ ve nĩ, ùn kónẽg ag ri ke, ag tỹ ùn kãgtén mũ ãn ag ri ke. Vènh kar ne tóg isugnỹm tĩ', ãprã ke kar, Topẽ tỹ jẽnẽ jafã ag kar ke gé, mundo tag ki ke kar ag mỹr. ¹⁰ Krĩ tũ nĩ ve sóg nĩ mỹr, Cristo tugrĩn. Inh jãvo ãgag tóg krĩ há nỹtĩ ve nỹtĩ, Cristo jykre ki. Krój inh nĩ, jãvo ãgag tóg tar nỹtĩ ve nỹtĩ. ãgag to ag tóg vĩ há han tĩ, jãvo ag tóg iso é he tĩ. ¹¹ Hã kỹ sóg kókĩr mũ, ùrĩ, kur tũ sóg nĩ gé, iso kry ag tóg mũ gé, jamã tũ sóg nĩ gé, ¹² ron sóg tĩ gé, sỹ inh rãnhrãj ki ijẽn ven jẽ. Ag tỹ iso é he mũ ra sóg ag mỹ nén ù há tó tĩ, Topẽ tỹ ag mỹ han jé. Ag tỹ inh vóg kónãn kỹ sóg ag mỹ vènh nenh tũ nĩgtĩ. ¹³ Ag tỹ iso fé fé he mũ ra sóg komẽr hã ag mỹ vĩ tĩ, ag jũ tỹ tũ' he jé. Vãfãr ri ke inh nĩ, vènh kar mỹ, ag tỹ nén fón tĩ kar ri ke inh nĩ.

¹⁴ Inh pi(jé) ãgag mỹ'a han sór mũ'. Hã ra sóg ãgag mỹ tag rán, sỹ ãgag jyvẽn jé, ãgag tỹ tỹ inh krẽ ri ke nỹtĩn kỹ, sỹ ãgag to há tãvĩ nĩn kỹ. ¹⁵ Û tỹ ãgag kanhrãn sór mũ vĩ e nỹtĩ, ù tỹ Cristo jykre tỹ ãgag kanhrãn sór mũ ag. Mĩl kãfór ag nỹtĩ, hỹn. Hã ra sóg pir nĩ, sỹ ãgag panh ri ke nĩn kỹ. Isỹ ãgag mỹ Jesus Cristo kãmén kỹ sóg ãgag panh ri ke nĩ, ti tỹ sỹ ãgag hyn han ri ke nĩn kỹ. ¹⁶ Hã kỹ sóg ãgag jyvẽn mũ, ãgag tỹ sỹ nén han mũ han jé. ¹⁷ Hã jé sóg Timóteo jẽnẽ, ãgag to. Inh kósĩn ri ke ti nĩ, ti to inh há tãvĩ nĩ, kỹ tóg ãgag Senhor jykre to tar nĩ. ãn hã vĩ ãgag mỹ tó mãn ke mũ, isỹ Jesus Cristo japry jagma tĩ ti, isỹ ti jamĩn jagma tĩ ti, isỹ igreja kar ki ke ag kanhrãn tĩ ti, ãmã kar mĩ hã.

¹⁸ Jãvo ãgag kãmĩ ù tóg vèsỹ ùn mág han sór mũ, iso: "kãtĩg ke tũ pẽ ti nĩ," hen kỹ. ¹⁹⁻²⁰ Hã ra sóg kãnhrmar ãgag to pasa ke kãtĩg ke mũ, ha vemnĩ, ãgag Senhor tỹ: "ha tĩg," hen kỹ. Kỹ sóg ag jykre venh ke mũ, vèsỹ ùn mág han mũ ag. ãg pi(jé) ù vĩ tỹ Topẽ tỹ tỹ ãg pã'ĩ nĩ ãn vèg tĩ'. Hã ra ti jykre tar hã tỹ ãg vèg tĩ. Hã kỹ inh pi(jé) ag vĩ mẽ sór mũ ver'. Ag jykre tar ve sór inh mũ, ù tỹ vèsỹ ùn mág han mũ ag. ²¹ Kỹ isỹ ãgag tá jun kỹ ne nỹ hỹn ãgag mỹ há nĩnh mũ? Inh mỹ ka ma kãtĩ mũ', ãgag mrãnmrãn jé? Inh mỹ ãgag mỹ vĩ há han ke mũ', komẽr hã, ãgag tỹ tỹ inh fe nỹtĩn kỹ? Ne nỹ hỹn há nĩ ãgag mỹ? Ha to jykrén.

Ùn prũg kónãn mũ

5 Nén ù tóg mẽ há tĩ ãgag to, ke gé. Nén ù vènhmỹ han ãgag nẽji tĩ, hã ra tóg kórég pẽ nĩ, ãgag kãmĩ ù tỹ nén han mũ ti. Tag mẽ inh, ha mẽ: ãgag kãmĩ ù tóg nẽji ã panh prũ fi tỹ prũg mũ. Û tỹ Topẽ jykre ki kãgtĩg ag pi(jé) ti ri ke han tĩ', ti jykre kórég tag ti'. ² Hã ra ãgag tóg to fe kaj tũ nỹtĩgtĩ. Vèsỹ ùn mág han sór ãgag tóg mũgtĩ, vènh jykre kórég tag tỹ ãgag kãmĩ ù kãkã nỹ ra. ãgag ne tóg vèsỹrénh

tũ nýtĩgtĩ', ājag tỹ ũ tỹ ti kórég tỹ ge han mũ ěn kutẽm jé, ājag kāmĩ. ³ Ha mẽ, ěg tỹ ti tỹ nén han ke to inh jykrén huri, sỹ ājag mré nĩ tũ ra ver. Hã ra sóg ājag to jykrén tĩ. Sỹ ājag mré nĩ ri ke han sóg tĩ, sỹ ājag mré ti to jykrén kỹ. Ũ tỹ vẽnħ jykre pãno tỹ ge han mũ ěn tỹ tag han nĩ, ha mẽ. ⁴ Vẽnħ măn jé ājag tóg ke mũ, jó sóg ājag mré nĩ ri ke han mũ, ājag vẽnħ măn ki. Ěn ki ěg Senhor tỹ Jesus vỹ ājag mỹ vẽnħ jykre nĩm ke mũ. Kỹ ājag tóg sir Jesus jyjy tó kỹ ⁵ ti fêg ke mũ, ũn jykre kórég ěn ti, Satanás mỹ, ti tỹ ti fár kókén jé. Satanás tỹ ti fár kókén kỹ tóg hẽn ri ke mũn to jykrén măn ke mũ, kỹ ti kuprĩg vỹ kren ke mũ, ěg Senhor tỹ Jesus kura ěn kã.

⁶ Ājag tỹ vêsõ: “há ěg nýtĩ,” he mũ ran pi(jé) há nýtĩ'. Ha mẽ, pão jãgja sĩ tỹ, fermento sĩ tỹ pão kar tóg sòn ke kỹ mog tĩ. Tag to jykrén. ⁷ Hã kỹ fón kãn nĩ, pão jãgja si ti, ājag tỹ pão tãg han jé, ũn jãgja tũ ri ke ājag nýtĩ, ājag jykre ti, ti há nĩn kỹ. Kỹ vẽnħ jykre kórég vãm kãn nĩ. Cristo vỹ ěg jagfy ter mỹr. Ěg tỹ Páscoa kã cordeiro tãnh tĩ ěn ri ke ti nĩ, Jesus ter ti. ⁸ Ěg tỹ festa ěn ko jé ěg tóg pão jãgja si fón kãn tĩ. Kỹ kemnĩ gé, hã vỹ: vẽnħ jykre pãno tovãnh, he mũ, nén ũ vẽnħmỹ han măn tũg, he mũ, ājag tỹ pão jãgja tũ ri ke nýtĩ jé, hã vỹ: vẽnħ jykre kuryj han nĩ, he mũ, vẽnħ jykre pir han nĩ, he mũ gé.

⁹ Hã jé sóg ājag mỹ rán ja nĩ, ājag tỹ ũ tỹ nén ũ vẽnħmỹ han mũ ag mré mũ tũ nĩ jé. ¹⁰ Hã ra sóg ũ tỹ Jesus ki ge tũ ag tó ja tũ nĩ, isỹ: “ag mré mũ tũg nĩ,” hẽn kỹ. Jykre pãno ag nýtĩ, ěprã ke ag, hã vỹ: nén kar to ěn (ka)mẽ, he mũ, nén ũ pēju tĩ he mũ vỹrmỹ topẽ han mũ, he mũ. Ājag tỹ tag ag mré vēmén sór tũ nĩn kỹ ājag hỹn mundo tag tovãnh kỹ hẽ ra mũnh ke mũ. Inh pi(jé) tag tó ja nĩ'. ¹¹ Hã ra sóg ājag mỹ ũ tỹ ón kỹ tỹ ěg régre nĩ ěn rán mũ. Ũ tỹ: “tỹ inh ã mré Jesus ki rã kỹ nĩ,” he mũ ra nén ũ vẽnħmỹ han

tovãnh sór tũ nĩn kỹ ti mré tũg măn tũg nĩ, ti tỹ nén kar to ěn (ka)mẽ nĩn kỹ, ti tỹ vỹrmỹ topẽ han kỹ, ti tỹ ũ to vĩ kónãn (ka)mẽ nĩn kỹ, ti tỹ kron (ka)mẽ nĩn kỹ, ti tỹ nén ũ pigiu(g) ti nĩn kỹ. Ũ tỹ ge mré nĩ sór tũg, nĩ, ti mré jẽn tũg nĩ gé.

¹² Ěg pi(jé) ěg mré ke tũ ag jykre tugnỹm ke mũ', Jesus ki ge tũ ag. Ājag tỹ ěg mré ke ag jykre tugnỹm ke vẽ, ag jykre to: “tag vỹ há nĩ, tag vỹ kórég nĩ,” hẽnħ ke vẽ. ¹³ Topẽ hã ne ũ ag jykre vẽnħ ke mũ', ěg mré ke tũ ag. Ěg mré ke tỹ vẽnħ jykre pãno han kỹ ěg ti jykre tónħ ke mũ. Hã kỹ ũ tỹ vẽnħ jykre kórég han mũ ěn kutẽm nĩ, ājag kāmĩ.

Ěg tỹ pã'i ag mỹ ěg mré Jesus ki rã kỹ nýtĩ ũ tónħ ke tũ

6 Kỹ nén ũ tóg vẽnħmỹ tĩ gé. Ājag kāmĩ ũ tóg ã mré ke to jũ kỹ Jesus mré ke tũ ag tỹ pã'i mỹ tó tĩ, pã'i ag jykre pãno ra. Ti pi(jé) Topẽ tũ ag mỹ tó tĩ'. Vẽnħmỹ ti nĩ, tag ti. ² Ěprã ke ag jykre tugnỹm jé ājag tóg ke mũ mỹr, ājag tỹ tỹ Topẽ tũ nýtĩn kỹ. Ājag mỹ tag mẽ ja tũ? Kỹ, ājag tỹ ga kri ke kar jykre tugnỹm ken kỹ ājag hỹn jagnẽ jykre tugnỹm há han ke mũ gé, jagnẽ to jũ tỹ tũ' hẽnħ ke jé ājag tóg ke mũ gé. Ki ājag tóg krỹg mũ mỹr. ³ Topẽ tỹ jẽnẽ jafã ag jykre tugnỹm jé ājag tóg ke mũ mỹr, ājag mỹ tag mẽ ja tũ? Kỹ ājag hỹn ěprã ke jykre tugnỹm há han ke mũ gé. ⁴ Ge ra ājag tóg ěg mré ke tũ ag mỹ: “ha inh mỹ isũ ti vẽ,” he tĩ, ũ tỹ ěg mré vẽnħ măn tĩ tũ ag mỹ, ag tỹ ga kri ājag tũ ven jé. ⁵ Mỹ ājag mỹ'a tũ? Ājag kāmĩ ũ mỹ kri há tũ nĩ', ti tỹ ājag jyvẽn jé ājag tũ to, ājag tỹ jagnẽ tũ to jykrén mũ to? ⁶ Vẽnħmỹ ti nĩ, irmão tỹ irmão ũ tón kỹ, ũ tỹ Jesus ki rã kỹ nĩ tũ mỹ, ti tỹ ājag tũ ven jé. ⁷ Ājag tỹ jagnẽ tũ to jykrén kónãn kỹ tóg vẽnħmỹ pẽ nĩ, ājag tỹ to jagnẽ to jũ kỹ mỹr. Ājag tỹ ne jé ājag tũ tovãnh sór tũ nĩ nẽ? Ājag tỹ ne jé ũ tỹ ājag tũ măn sór kỹ ti mỹ nenħ ke nẽ? Ti hã tóg vẽnħ jykre pãno han mũ,

ajag tũ mǎn sór kŷ. Ge ra ti mŷ nĩm nĩ. Kŷ ă tóg Topě vĩ mranh tũ nĩ, inhhă, ti tugrĩn. ⁸Hă ra ajag tóg ti mŷ nenh sór mũ. Kŷ ajag tóg jagně tũ to vėnh jykre kórég han tĩ gé mŷr, jagně tũ mǎn sór ajag tóg mũ gé mŷr, ajag mré ke tũ ẽn mŷr. ⁹Ũn jykre pǎno ag pi(jé) Topě tŷ tŷ ęg pǎ'i nĩ venh ke mũ'. Ajag mŷ tag mē ja tũ?

Ha mē, ker kygně hē'. Ũ tŷ ũn mén tũ fag mré nŷ mũ ag pi(jé) venh ke mũ', Topě tŷ ęg pǎ'i nĩ ti. Ũ tŷ vyrmŷ topě han mũ ag pi(jé) venh ke mũ'. Ũ tŷ ă prũ ra ũ fi mré nŷ mũ ẽn pi(jé) venh ke mũ', ũ fi tŷ ă mén ra ũ mré nŷ kŷ fi pi(jé) venh ke mũ'. Ũn gré tŷ ũn gré ũ tŷ prũg mũ ẽn pi(jé) venh ke mũ'. Ũn gré tŷ ti tŷ prũg sór mũ mŷ nenh tũ ẽn pi(jé) venh ke mũ gé'. ¹⁰Ũn tũ péju(g) tĩ ẽn pi(jé) venh ke mũ', ũ tŷ nén kar to én (ka)mē pi(jé) venh ke mũ', ũn kron (ka)mē pi(jé) venh ke mũ', ũ tŷ ęg to vĩ kónǎn tĩ pi(jé) venh ke mũ', ũ tŷ ęg vatánh tá ęg tũ mǎg tĩ pi(jé) venh ke mũ'. Topě tŷ tŷ ęg pǎ'i nĩ venh ke tũ ag tóg nĩ, vėnh jykre tŷ ge han tĩ ag. ¹¹Ājag kāmĩ ũ tóg vėnh jykre tŷ ge han ja nĩgtĩ, vǎsŷ, hă ra ajag tóg vėnh kugpe kŷ nŷtĩ, ũri. Kykũnh kŷ ajag tóg nŷtĩ, ẽn tŷ, kŷ Topě tóg ajag mŷ vėnh pǎte fón ja nĩ sir, ęg Senhor tŷ Jesus Cristo tugrĩn, Topě kuprĩg tugnĩn.

Ēg tŷ nén ũ vėnhmŷ han ke tũ

¹²Kŷ ajag hŷn inh mŷ: “isŷ nén han sór mũ ẽn han jé sóg ke mũ. Topě vŷ ge ra inh jagăgtǎn ke mũ,” he sór mũ. Vó. Nén ũ tóg ęg mŷ nén ũ há han ke tũ nĩ, kŷ tóg ęg tŷ ẽn han mũ ra há tũ nĩ. Ēg tŷ nén ũ han sór mũ ẽn tóg han há nŷtĩnh mũ vė, hă ra isŷ nén ũ kórég tŷ tǎn nĩn kŷ tóg inh mŷ há tũ nĩ sir. ¹³“Vějėn vŷ tŷ ęg nug tũ nĩ, kŷ ęg nug vŷ tŷ vėjėn né nĩ,” he ajag tóg tĩ. Hŷ, hă ra Topě vŷ tŷ tũ' henh ke mũ, vėjėn tŷ, ęg nug tŷ ke gé. Ēg han ja tóg nĩgtĩ, Topě ti. Hă ra ti pi(jé) ęg tŷ tŷ ũn mén tũ mré nŷ jafă han'. Ēg

Senhor tũ vė, ęg, kŷ ęg Senhor vŷ tŷ ęg tǎn nĩ sir. ¹⁴Ēg Senhor rĩn mǎn tóg, Topě ti, kŷ tóg ęg rĩn mǎn ke mũ gé, ti jykre tar tŷ.

¹⁵Kŷ ęg hă vŷ tŷ Cristo tũ nŷtĩ, ti mré ęg tóg tŷ ũn pir ri ke nŷtĩ. Ājag mŷ tag mē ja tũ'? Kŷ ęg tŷ Cristo tũ tŷ ũn mén tũ fi mré tŷ ũn pir ri ke han kŷ tóg vėnhmŷ pē nĩgtĩ, fi mré nŷn kŷ. Ke tũg nĩ. ¹⁶Ha mē, ũ tŷ ũn mén (ka)mē fi mré nŷ kŷ tóg fi mré tŷ ũn pir ri ke nĩ. Hă kŷ tóg vǎsŷ tó ja nĩ. “Ũn pir ri ke fag nŷtĩ, jagně mré nŷtĩ fag,” he ja tóg nĩ. Ājag mŷ tag mē ja tũ'? ¹⁷Fag jǎvo ęg tŷ tŷ ęg Senhor mré ke nŷtĩn kŷ ęg tóg ti mré vėnh kuprĩg pir ri ke nŷtĩ gé sir.

¹⁸Ēg tŷ ũn mén tũ mré nŷ kŷ, ęg tŷ ũn prũg tũ mré nŷ kŷ ęg tóg vėnh kavėnh tĩ sir, ęg tŷ Topě vĩ mranh tag tŷ. Ēg tŷ nén ũ ũ ki Topě vĩ mranh kŷ ęg tóg vėnh kavėnh tŷ ge han tũ nĩgtĩ. Hă kŷ ũn mén tũ mré nŷ tovǎnh kǎn nĩ, ũn prũ tũ mré nŷ tovǎnh kǎn nĩ gé. ¹⁹Ēg hă vŷ Topě kuprĩg jo ĩn ri ke nŷtĩ. Ēg kǎkǎ tóg jē nĩ, Topě kuprĩg ti, ti tŷ tŷ ęg jagrē nĩn kŷ. Topě tŷ ęg mŷ nén han hă vė. Ājag mŷ tag mē ja tũ? Hă kŷ ęg pi(jé) tŷ vėnh pǎ'i jē'. Topě krēm ke vŷ tŷ ęg nŷtĩ. ²⁰Ēg kǎjǎm tóg mŷr, kaja e to. Hă kŷ vėnh kar mŷ Topě tŷ tŷ ũn há nĩ ven nĩ, ajag tŷ ti jykre kuryj han mũn kŷ.

Ēg tŷ prũg há han to vėnh jykre

7 Ājag tŷ inh mŷ vėnh rǎn jėnėn kŷ ajag tóg inh mŷ ajag prũg ke ti tó ja nĩ. Ājag prũg tũ nĩn kŷ tóg há tĩ vė. ²Hă ra tóg ajag mŷ vėnhmŷ tĩnh mũ, kŷ tóg inh mŷ ajag tŷ ũn mén tũ fag to én ha mē tĩ. Hă kŷ tóg há nĩ, ũ tŷ ũn pir fi tŷ prũg kŷ, fi tŷ tŷ ti prũ pē nĩ jē. Ũ fi tŷ ũn pir tŷ mén kŷ tóg há tĩ gé, ti tŷ fi mén pē nĩ jē gé. ³Kŷ fi mén jē fi mŷ fi tũ han, fi mré nŷ kŷ, jǎvo ti prũ fi jē ti tũ han, ti mré nŷ kŷ. ⁴Fi pi(jé) tŷ vėsũ nĩ', fi mén jėn kŷ'. Fi mén tũ vė sir. Kŷ ti hă vŷ ri ke nĩ gé. Tĩ pi(jé) tŷ vėsũ nĩ gé', ti prũ jėn

ký'. Fi tũ vê, fi mên ti. ⁵Hã ký jagnê mỷ vênh nenh tũg nĩ. Hên ri ke mũn ãjag kejên jagnê mré to jykrén sór mũ, ãjag tỹ kutỹ pipir ki jagnê mré nỹ tũ nĩ jé, ãjag tỹ Topê mré vémén jé vāsānsān jé. Ký tag pāte jagnê mré nỹ măn nĩ sir, Satanás tỹ ãjag krín kónān tũ nĩ jé. ãjag tỹ ù mré nỹ sór ký tóg inh mỷ to ãjag tỹ Topê vĩ mranh ha mễ tĩ, Satanás tỹ ãjag krín ký. Hã ký tóg ãjag tỹ kánhmar jagnê mré nỹ măn kỹn há tĩ.

⁶Tag kar tó sóg ãjag mỷ, ãjag króji nỹtĩn ký. Inh pi(jé) vênh kar mỷ: “ha prũg, ha mên,” he sór mũ. ⁷Vênh kar tỹ inh ri ke nỹtĩ ra tóg inh mỷ há tĩ vê, isỹ prũ tũ nĩ tag ri ke. Hã ra Topê tóg vênh kar tỹ vỹrmỹ nén ù to tar han tĩ, ẽg tỹ ki króm jé. Hã ký ù tóg ã prũ tũ to tar nĩ, jó ù tóg ã prũ fi to tar nĩ. Topê tỹ nén han jan hã vê.

⁸Hã ra sóg ùn prũ tũ mỷ tag tó sór mũ, ha mễ. ãjag tỹ inh prũ tũ ri ke nỹtĩ ra tóg há tĩ vê, ký ùn mên ter ja fag tỹ mên măn tũ ra tóg há tĩ vê gé. ⁹ãjag tỹ hã ra prũg sór ký, ãjag tỹ mên sór ký tóg há tĩ gé, ký ãjag tóg vênh prũg han mũ sir. ãjag tỹ prũ tũ nĩ ra fag to én kỹn pi(jé) há nĩ, ãjag tỹ ag to én ký ke gé. Hã ký prũg nĩ, mên nĩ ãjag tỹ ù to én tũ nĩ jé.

¹⁰ãjag kāmĩ ù tóg prũ nỹtĩ, ù fag tóg mên nỹtĩ gé. Ẽg Senhor vỹ ãjag hã mỷ tag tó mũ, sỹ tónh ke tag, ha mễ. Isỹ tó pijé, ti tỹ tó hã nẽ, ha mễ. Ẽ mên fón tũg nĩ. ¹¹Ẽ tỹ ge ra to fón ký mên măn tũg nĩ. Ẽ tỹ mên măn sór ký ã mên fón jan hã mré to jykrén, ãjag tỹ jagnê mré nỹtĩ măn jé sir. Ký ã prũ jên ký fi fón tũg nĩ gé. Ẽg Senhor tỹ tón hã vê.

¹²Jāvo inh hã tóg tag tó mũ ãjag mỷ, ha mễ. Ẽg Senhor tỹ tó pijé, ha mễ. ãjag kāmĩ ù prũ fi tóg Jesus ki rã sór tũ nĩ, fi mên tỹ tỹ Jesus mré ke nĩ ra. Fi tỹ ti mré nĩ sór nĩn ký tóg fi mré nĩ ha sir. Fi továnh sór tũg nĩ. ¹³Kỹ ã mên tỹ Jesus ki rã sór tũ ra ã mré nĩ sór ký ti mré nĩmĩnĩ gé. ¹⁴Topê tũ vỹ tỹ ã nĩ, ã mên tỹ ti ki rã

sór tũ ra. Hã ra tóg ã mré nĩn ký tỹ ti tũ ri ke nĩ gé sir. Ký ã prũ fi tỹ Jesus ki rã sór tũ ra fi tóg tỹ Topê tũ ri ke nĩ gé sir, fi tỹ ã mré nĩn ký. Ke tũ nĩ mũ ra ãjag krê vỹ ti ki rã tũ krê ri ke nỹtĩn mũ vê, Topê mũ. Hã ra ag pi(jé) ri ke nỹtĩ. Tỹ Topê tũ ri ke ag nỹtĩ gé sir, ãjag krê ti. ¹⁵Hên ri ke mũn ã mên, ã prũ fi ã fón sór mũ, fi tỹ Jesus ki rã sór tũ nĩn ký. Ký fi mỷ, ti mỷ: “ha ti ge,” hemnĩ. Topê vỹ ẽg krĩ kuprãg sór mũ, hã jé tóg ẽg kuprêg. Hã ký ã pi(jé) tỹ ã mên krêm ke nĩ, ti tỹ ã továnh sór ký, ã pi(jé) tỹ ã prũ fi krêm ke nĩ gé, fi tỹ ã továnh sór ký, ã tỹ Jesus ki rã tũgrĩn. ¹⁶Hên ri ke mũn ti kejên kren ke mũ, ã jamên ký, ã mên ti, hã ra ã pi(jé) ki kanhró nĩ, ti kren ke ti. Hên ri ke mũn fi kejên kren ke mũ, ã jamên ký, ã prũ fi, hã ra ã pi(jé) ki kanhró nĩ, fi kren ke ti. Hã ký fi tĩg kamẽg tũg nĩ, fi tĩg sór ký, ti tĩg sór ký ke gé.

Ẽg tỹ Topê jykre hã mĩ mũnh

¹⁷Topê tỹ ã jykre tỹ ã kuprêg ja ẽn hã mĩ tĩg nĩ, ẽg Senhor tỹ ã mỷ Vênh jykre nĩm ja ẽn hã mĩ. Hã tó sóg tĩ, ẽg mré vênh măn tĩ kar ag mỷ. ¹⁸Topê vỹ ã kuprêg. Ẽ tỹ tỹ Israel mré ke nĩn ký ã gré junun fār vỹ kym ký nĩgtĩ. Ký tóg hã tĩ. Tỹ tũ' he sór tũg nĩ. Ẽ tỹ tỹ Israel mré ke tũ nĩn ký ã fār vỹ kym ký nĩ tũ nĩ. Ký tóg há tĩ gé. Kym sór tũg nĩ gé. ¹⁹Nén ù tũ vê, ti fār kym ke ti, ti fār kym ke tũ ti ke gé. Nén pir vỹ há nĩ, hã vỹ: ẽg tỹ Topê vĩ ki króm, he mũ, ẽg tỹ ti tỹ ẽg jyvẽn mũ han, he mũ.

²⁰Topê tỹ hã tỹ ã kuprêg ký vênh jykre ẽn hã mĩ tĩmĩnĩ. ²¹ãjag kāmĩ ù vỹ patrão nỹtĩ. ãjag kajām tóg, ãjag patrão ti, ẽg tỹ ẽg mẽg kajām ẽn ri ke, hã ký ãjag tóg tỹ ti tũ nỹtĩ, fagrĩnh mỷ ãjag tóg ti rānhraj han ti. To krĩ kufy nỹtĩ tũg nĩ. ãjag tỹ hã ra ãjag patrão továnh to vênh jykre há ve ký továnh nĩ, ti tỹ ãjag továnh sór ký. ²²Ha vé, ẽg Senhor vỹ ãjag kuprêg, ãjag patrão nỹtĩ ra. ãjag tỹ tỹ Cristo tũ nỹtĩn

kỹ ājag tóg tỹ ũn patrão tũ ěn ri ke nỹtĩ sir, ājag tỹ ěprā patrão krēm nỹtĩ ra. Kỹ ājag patrão vỹ ge nĩ gé. Ěg Senhor tỹ ti kuprĕg kỹ tóg tỹ ti patrão jĕ sir. Hã kỹ ũn patrão tũ ag vỹ Cristo ki ge kỹ tỹ Cristo krēm ke nỹtĩ. jāvo ũn patrão ag vỹ Cristo tugrĩn tỹ ũn patrão tũ ěn ri ke nỹtĩ gé.²³ Hỹ, ěg kygĩām ti mỹr, kaja e tỹ, Cristo ti. Hã kỹ ěprā ke ag krēm nỹtĩ sór tũg nĩ, tũ nĩ mũ ra ag tóg ājag tỹ Cristo mré mũ kamĕg mũ.

²⁴ Inh kanhkā', Topĕ tỹ hã tỹ ājag kuprĕg kỹ vĕnh jykre ěn hã mĩ mũmnĩ.

Ũn mén ja tũ fag tó vĕnh jykre

²⁵ Ũn mén ja tũ fag tó ja ājag tóg nĩgtĩ inh mỹ, ājag tỹ rán ki. Hã ra ěg Senhor pi(jé) fag to nén ũ tó ja nĩgtĩ'. Kỹ sóg to jykrén kỹ ājag mỹ tag tó sór mũ, ha mĕ. Ěg Senhor tóg inh jagāgtān, kỹ tóg isar han, sỹ to jykrén há han jé.²⁶ Kỹ sóg ěg tỹ ti jagy vég tĩ tag to jykrén mũ. To jykrén kỹ tóg inh mỹ há tĩ, ājag tỹ ũri nén han mũ tag tovānh sór tũ nĩ jé.²⁷ Ā mỹ prũ jĕ? Kỹ fi fón sór tũg nĩ. Ā mỹ prũ tũ jĕ? Kỹ prũg sór tũg nĩ gé.²⁸ Ā tỹ ge ra prũg sór kỹ tóg há tĩ gé hã ra, Topĕ vĩ mranh ke tũ ā tóg nĩ, prũg kỹ. Kỹ ũn mén ja tũ fi mén kỹ tóg há tĩ gé sir. Topĕ vĩ mranh pijé'. Hã ra tóg jagy tĩnh mũ. Krĩ kufy ve jĕ ājag tóg ke mũ, tag ki, ěprā, ājag prũg kỹ, ājag mén kỹ ke gé. Hã ra tóg inh mỹ há tĩ vĕ, ājag krĩ kufy tũ nĩ ti.

²⁹ Inh kanhkā', inh vĩ tag jĕmĕ ra, ha mĕ. Kurā tỹ ěgno vỹ kãnhmar jun ke mũ. Hã kỹ ũn mén fi jé ũn mén ja tũ fi ri ke nĩ, ũn prũg ja tũ ri ke nĩ gé. Tag ki vĕnh jykre vĕ, fag tỹ jagnĕ mré nỹtĩg ti. Kãnhmar tóg tũ' henh ke mũ.³⁰ Hã kỹ ũ tỹ tag ki fỹ mũ jé ũn fỹ tũ ri ke nĩ. Ũ tỹ tag ki mỹ sér nĩ jé ũn mỹ sér vānh ri ke nĩ. Ũ tỹ nén ũ comprar he mũ jĕ ũ tỹ nén ũ comprar he tũ ri ke nĩ.³¹ Ũ tỹ ga kri tỹ nén ũ mág nĩ ěn jé ũ tỹ nén ũ tũ ěn ri ke nĩ. Tũg kãn jĕ tóg ke mũ, ěg tỹ tag ki nén vég mũ ti.

³² Nén ũ pir tóg inh mỹ há tĩ vĕ, hã vỹ: ājag krĩ kuprā kỹ nỹtĩmnĩ, he mũ, ājag tỹ nén ũ to krĩ kufy tũ nỹtĩ jé.

Ũn prũg tũ ěn vỹ ěg Senhor tũ ki rĩr tĩgtĩ, kỹ tóg: “ěg Senhor mỹn mỹ há nĩ vỹ, sỹ nén han mũ ti?” he tĩ.³³ Jāvo ũn prũg mũ vỹ ěg tỹ tag ki nén vég tĩ ki rĩr nĩgtĩ, kỹ tóg: “inh prũ fi mỹn mỹ há nĩ vỹ, sỹ nén han mũ ti?” he tĩ gé.³⁴ Kỹ tóg ěg Senhor tũ ki rĩr tãvĩ han tũ nĩ sir, ũn prũ ěn ti. Kỹ fi vỹ ge nĩgtĩ gé, ũn mén ter ja fi, ũn mén ja tũ fi ke gé. Ěg Senhor tũ ki rĩr fag tóg nĩgtĩ, fag tỹ tỹ ti tũ tãvĩ nỹtĩ jé, fag tỹ ti tũ ki króm há han jé, fag tỹ nén ũ han kỹ, fag tỹ nén ũ to jykrén kỹ ke gé. Ũn mén mũ fi tóg hã ra ěg tỹ tag ki nén vég tĩ ki rĩr nĩgtĩ, kỹ fi tóg: “inh mén mỹn mỹ há nĩ vỹ, sỹ nén han mũ ti?” he tĩ gé.

³⁵ Sỹ ājag tũ to jykrén há han kỹ, hã kỹ sóg ājag mỹ tag tó mũ. Inh pi(jé) ājag mỹ vĩ tar han sór mũ', ājag tỹ ti tỹ ājag mỹ há tũ nĩ ěn han jé'. Ājag tỹ mũ há han kỹ tóg inh mỹ há tĩ, ājag tỹ ěg Senhor tũ ki rĩr há han kỹ, nén ũ tỹ ājag kutān tũ nĩ jé.

³⁶ Hĕn ri ke mũn ti ājag kãmĩ ũ mỹ há tũ nĩ, ti kósĩn fi mén tũ nĩn kỹ. Hĕn ri ke mũn tóg fi mỹ vĕnhmỹ nỹ ve nĩ, fi panh mỹ ke gé. Hĕn ri ke mũn fi sanh há nĩ ha, hĕn ri ke mũn fi jagtar ke mũ, fi mén ke tũ to. Kỹ tóg jatun mỹ fi tỹ ā tỹ nén han sór mũ ěn han mũ sir, fi panh ti. Há ti nĩ, fi mén ke ti. Topĕ vĩ mranh pijé'.

³⁷ Hĕn ri ke mũn ũ tóg to jykrén há han mũ hã ra, kỹ tóg fi mén sór tũ nĩ sir. Kỹ tóg tá krỹ nĩ, ā kósĩn fi ki rĩr ke ti. Kỹ tóg to jykrén mǎn mũ ra tóg ti mỹ há tĩ, fi mén ke tũ ti. Tovānh sór tũ ti nĩ. Kỹ tóg fi mén tũ nĩ sir. Tag vỹ há tãvĩ nĩ.³⁸ Hã kỹ tóg ge nĩ, ha mĕ. Tĩ tỹ fi mén kỹ tóg há nĩ, ā kósĩn mén ja tũ fi. Tĩ tỹ fi mén tũ nĩn kỹ tóg há kǎfór nĩ.

³⁹ Ũn tỹtá fag vỹ tỹ ājag mén tũ nỹtĩ, ag rĩnrĩr nỹtĩn kỹ. Ũ fi mén ter kar kỹ fi hã ra ũ tỹ mén sór mũ kỹ fi tóg mén mũ

sir, jatun mý. Fi mén mǎn vê sir, Há ti nĩ. Hǎ ran jé tỹ ẽg Senhor mré ke nĩ, fi mén mǎn ke ti. ⁴⁰ Fi tỹ mén mǎn sór tũ nĩn kỹ tóg há kǎfór nĩ sir, fi mý sér kǎfór. Isỹ fag to jykrén hǎ vê. Hǎ ra sóg Topẽ kuprĩg tỹ jagrẽ nĩ, hǎ kỹ sóg ǎjag mré to jykrén há han mũ gé.

Vênh kǎggrá tỹ topẽ to vênh jykre

8 Kỹ sóg ǎjag mý vễjẽn tó sór mũ gé. ǎjag mễg tǎnh kỹ ag tóg vênh kǎggrá tỹ topẽ mý pũn vên tĩ, pũn kar kỹ ag tóg açougue ki ǎjag mý vễne he tĩ. Kỹ ǎjag kǎmĩ ù tóg: “inh mý açougue ki mǎn kỹ konh mý vỹ?” he tĩ, hǎ kỹ sóg ǎjag mý kǎmẽn sór mũ.

Hǎ ra ǎjag kǎmĩ ù tóg: “ki kanhró ẽg nỹtĩ, to tar ẽg nỹtĩ,” he tĩ. “Jatun mý ẽg tóg konh ke mũ,” he ag tóg tĩ. Ẽg tỹ nén ù to: “ki kanhró mág inh nĩ,” hen kỹ tóg inh mý ẽg tỹ kǎnhmar ù to: “ti pi(jé) inh ri ke nĩ, ti kǎfór inh nĩ,” henh ha mẽ tĩ. Ẽg tỹ jagnẽ to há nỹtĩn ke vê. Ẽg tỹ jagnẽ to há nỹtĩn kỹ ẽg tóg jagnẽ mý nén ù há tó tĩ, ẽg kar tỹ ki kanhrǎn há han jé sir. ² Ẽg tỹ nén ù to: “ki kanhró sóg nĩ, ǎ jǎvo,” hen kỹ ẽg pi(jé) ki kanhrǎn há han mũ ver’.” ³ Ẽg tỹ Topẽ to há nỹtĩn kỹ, kỹ tóg ẽg tỹ ti ki kanhrǎn há han mũ sir Topẽ ti.

⁴ Kỹ sóg ǎjag mý vễjẽn ẽn kǎmẽn sór mũ, ag tỹ ón kỹ vênh kǎggrá tỹ topẽ mý pũn tĩ ẽn ti. Nén ù tũ vê ón kỹ vênh kǎggrá tỹ topẽ ti. Pir ti nĩ, Topẽ ti. Topẽ ù vỹ tũ nĩ. ⁵ Nén ù e to ag tóg ón kỹ: “Topẽ vê,” he tĩ, kanhkǎ tǎn ù ag to, ga tǎn ù ag to ke gé, Û tỹ ge vỹ e nỹtĩ, topẽ tỹ ge ti, Senhor tỹ ge ti. ⁶ Hǎ ta tóg ẽg mý pir nĩ, Topẽ ti, ẽg jóg mág ti, ag jǎvo. Nén kar han ja ti nĩgtĩ mỹr vễnhmỹ, kỹ ẽg tóg ti hǎ ve sór mũ gé sir. Pir ti nĩ gé, ẽg Senhor ti, hǎ vỹ: Jesus Cristo, he mũ. Nén ù kar vỹ nỹtĩ ti tugrĩn, kỹ ẽg ti tugnĩn krenkren ke mũ gé.

⁷ Hǎ ra ẽg kǎmĩ ù ag tóg tag ki kagtĩg nỹtĩ ver. Tǎg ti nĩ ver, ǎjag tỹ ón kỹ vênh

kǎggrá tỹ topẽ tovǎnh mũ ti, kỹ tóg ver ag mý e tĩ. Hǎ kỹ ón kỹ vênh kǎggrá tỹ topẽ mý vễjẽn pũn ja ẽn tóg tỹ vênh kǎggrá tỹ topẽ ẽn tũ nĩ nễji ag mý. Kỹ tóg ag tũ vễjẽn ẽn ko kỹ tóg ag tỹ vênh kǎggrá tỹ topẽ ẽn tũ ko ri ke nĩ sir ag mý. Kỹ tóg ag mý há tũ tĩ sir, ag tỹ tag to krój nỹtĩn kỹ ver. Kỹ tóg ag mý ag tỹ vễjẽn to vênh kavénh ha mẽ tĩ.

⁸ Ẽg pi(jé) vễjẽn tugrĩn Topẽ to há nỹtĩ, ti to kórég nỹtĩ. Ẽg tỹ ko tũ (hǎ) ra nén ù tũ vê gé, vênh kǎggrá tỹ Topẽ mý pũn ja ẽn ti. Vễjẽn vê mỹr. ⁹ Nén ù kar vỹ tỹ ẽg tũ nĩ.

Hǎ ra ùn krój tóg hẽn ri ke mũn Topẽ vĩ mranh ke mũ, ẽg tugrĩn, ti tỹ ẽg tỹ ti mý nén ù vễnhmỹ to tar nỹtĩ nĩ ve nĩn kỹ. Kỹ tag han sór tũg nĩ. ¹⁰ Ve ra ha. Tar ǎ tóg nĩ, ki kanhró ǎ tóg nĩ, vênh kǎggrá tỹ topẽ vỹ tỹ nén ù tũ nĩ ǎ mý. Hǎ kỹ ǎ tóg ti jo ãn krêm rǎ kỹ ko mũ sir, ti festa ti, ǎ mré ke ù tỹ ti mý festa han kỹ. Nén ù tũ vê vê. ǎ tỹ ti festa ko mũ ti. Hǎ ra ẽg mré Jesus ki rǎ kỹ jẽ ù tóg tag to krój nĩ ver, kỹ tóg tá ǎ vэг mũ sir, ǎ tỹ ti festa ko mũ ẽn kǎ. Kỹ tóg ǎ ve kỹ to jykrén mũ sir, ti festa ko sór jé, vênh kǎggrá tỹ topẽ mý festa ẽn, ti mý pũn ja ẽn ti. Hǎ ra vênh kǎggrá tỹ topẽ tóg ti mý tar nĩ, ùn krój mý, ti tỹ Jesus ki rǎ kỹ nĩ (hǎ) ra. ¹¹ Kỹ tóg ǎ tỹ ko mũ tugrĩn vǎfor ke mũ sir, ùn krój nĩ ti. Ti jǎvo ǎ tóg ki kanhró nĩ, hǎ ra tóg ǎ tugnĩn tũ’ henh ke mũ, ùn krój nĩ ti. Hǎ ra Cristo tóg ti jagfỹ ter ja nĩgtĩ. ¹² ǎ tỹ ti vĩ mranh hǎ vê sir, ǎ régre krój ẽn to. Ti vóg kónǎn ǎ tóg mũ sir, ti krój nĩn kỹ. Hǎ ki ǎ tóg Cristo vĩ mranh mũ sir, mỹr, ha mẽ. ¹³ Hǎ kỹ sóg tag han sór tũ nĩ. Inh irmǎo tỹ isỹ nén ù nĩ ko to Topẽ vĩ mranh kỹ sóg nén ù nĩ ko sór mǎn ke tũ nĩ ha, ón kỹ vênh kǎggrá tỹ topẽ mý pũn ja ẽn ti, ti tỹ mranh tũ nĩ jé sir, isugrĩn.

Paulo tỹ jänkamy ve sór tũ

9 Isỹ nén han mũ ve ra. Ēprā ke ag tỹ inh mỹ nén tó mũ ěn han sór tũ inh nĩgtĩ. Jesus hā vỹ inh fẽg, isỹ tỹ apóstolo jẽ jé. Tĩ ve inh mỹr, ěg Senhor tỹ Jesus ti. Kỹ ājag vỹ isugnĩn ěg Senhor ki ge jẽg. Inh rānrhāj kaja vỹ tỹ ājag nỹtĩ. ² Hẽn ri ke mũn sóg ù mỹ tỹ apóstolo tũ nĩ. Ājag hā mỹ sóg tỹ apóstolo jẽ mỹr, ājag tỹ inh vĩ mẽ tũgrĩn ti ki ge kỹ. Hā ki tóg ve há tĩ, ěg Senhor tỹ inh fẽg ja ti. ³ Kỹ ù tỹ kejẽn inh kato vĩ sór mũ mỹ sóg tag tó tĩ, ha mẽ. ⁴⁻⁵ Jesus tỹ ùn vin mũ ù ag ri ke inh nĩ, apóstolo ù ag ri ke, ù tỹ Jesus mré pygfa mũ ag ri ke, Pedro ri ke ke gé, isỹ vễjẽn to, inh prũ tũ to ag jykre han tũ ra. Ājag prũ fag pére ag mũ tĩ, ag tỹ hẽn ra mũn kỹ. Isỹ ag ri ke ù tỹ Jesus ki rā kỹ jẽ ù fi tỹ prũg sór mũ ra sóg fi pére tũg ke mũ vẽ gé, hā ra sóg ke sór tũ nĩ. Kỹ ag tóg ājag jẽn ko tĩ, ag tỹ ājag mỹ Topẽ vĩ tó to. Isỹ ag ri kén ājag jẽn ko sór mũ ra sóg konh ke mũ vẽ gé, hā ra sóg ko sór tũ nĩ. ⁶ Inh nĩgẽ rānrhāj ja kaja hā ko sór inh tĩ, Barnabé ti ke gé. Ēg tỹ Topẽ vĩ tó tĩ ù ag ri kén ěg nĩgẽ rānrhāj tovānh sór mũ ra ěg tóg tovānh ke mũ vẽ, hā ra ěg tóg rānrhāj sór mũ. ⁷ Ēg tỹ Topẽ tỹ ěg mỹ vẽn rānrhāj nĩm kaja venh ken kỹ tóg há tĩ vẽ. Soldado jykre ri ke ti nĩ. Ag pi(jé) ājag tũ ko tĩ, ag tỹ vẽnh génh han kỹ, soldado ag. Ājag vẽnh génh hā to ag tóg vễjẽn vэг tĩ. Kỹ ù tỹ uva ki rĩr tĩ vỹ ti kanẽ ko tĩ gé. Kỹ ù tỹ ovelha ki rĩr tĩ vỹ ti fi leite kron tĩ gé. Hā kỹ tóg ěg tỹ Topẽ vĩ tó to ganho ve sór mũ ra tóg há tĩ vẽ, hā ra ěg tóg ve sór tũ nĩ.

⁸ Ēprā ke jykre ki ěg tóg ěg rānrhāj pẽ to ěg jẽn vэг tĩ. Kỹ Topẽ vỹ tag tó ja nĩgtĩ. ⁹ Moisés vỹ tag rán ja nĩ, ha mẽ. “Monh tỹ ěkré jänkre ki rānrhāj kỹ ti jẽnky tógfĩn tũg nĩ, ti jẽn kamẽg tũg nĩ,” he ja ti nĩ, Topẽ vĩ rá ki. Topẽ mỹ monh hā to jykrén kỹ tag tó ja nĩ? Vó. ¹⁰ Ēg to jykrén hā kỹ tóg tag tó ja nĩ. Ēg hā to tóg

rán kỹ nĩ, ěg tỹ ěg rānrhāj to ěg jẽn ve jé. Hā kỹ ù tỹ ěpỹ ki rānrhāj mũ tóg to nén ù ve sór mũ, hā jé tóg rānrhāj jẽ nĩ. ù tỹ jänkreg mũ vỹ to nén ù ve sór mũ gé, ā rānrhāj to. ¹¹ Isỹ ājag mỹ kanhkā jykre tó kỹ tóg sỹ nén ù krān ri ke nĩ, kỹ sỹ ājag ki nén ù ve sór mũ ra tóg há tĩ vẽ, ijẽn jé, hā ra sóg ve sór tũ nĩ. ¹² ù ag tóg ājag jẽn vэг tĩ, Topẽ vĩ to. Kỹ tóg sỹ ag ri kén ājag ki jänkamy ve sór mũ ra há tĩ vẽ, sỹ ājag mỹ Topẽ vĩ tó vẽn kỹ. Hā ra sóg ājag jẽn ve sór tũ nĩ. Inh jagtar ra tóg inh mỹ tỹ nén ù tũ nĩ, ù tỹ isũgrĩn Cristo kāmẽ sér kato vĩ tũ nĩ jé, sỹ ti kaja ve tũgnĩn Jesus to kórég tũ nĩ jé. Hā kỹ sóg ve sór tũ nĩ.

¹³ ù tỹ Topẽ ĩn krẽm ti tũ ki rĩr tĩ ag vỹ tá ājag jẽn vэг tĩ gé, ag tỹ Topẽ mỹ nén vin tĩ ěn tỹ. Kỹ ù tỹ Topẽ mỹ nén ù pũn tĩ ěn vỹ ti ke ko tĩ gé. Ājag mỹ tag mẽ ja tũ? ¹⁴ Hā kỹ ěg Senhor vỹ tag tó ja nĩgtĩ gé, hā vỹ: “ù tỹ ti kāmẽn mũ ěn vỹ tag to ājag jẽn venh ke mũ,” he mũ. ¹⁵ Hā ra sóg ājag jẽn ve sór ja tũ nĩ. Kỹ sóg ve sór tũ nĩ gé, ùri, hā kỹ sóg ājag mỹ rán mũ. Isỹ ijẽn to inh nĩgẽ tỹ rānrhāj mũ hā to sóg tỹ ùn mág nĩnh mũ, kanhkā tá. Kỹ sóg tỹ tũ' he sór tũ nĩgtĩ. Iser jé tóg inh mỹ há tĩ, ù tỹ inh mỹ Topẽ vĩ kajām sór mũ (hā) ra.

¹⁶ Jesus kāmẽn sóg tĩ. Inh rānrhāj hā vẽ. Tĩ hā tóg inh mỹ tó, sỹ ti kāmẽn jé. Kỹ sóg ti tó tũgrĩn tỹ ùn mág nĩnh ke tũ nĩ. Isỹ ti kāmẽn sór tũ ra Topẽ tóg inh vóg kónān ke mũ vẽ, isỹ inh rānrhāj han tũ nĩn kỹ. ¹⁷ Topẽ tỹ inh mỹ: “hā kāmẽn,” he tũ nĩ ra sóg kanhkā tá to ganho venh ke vẽ vẽ, sỹ ti kāmẽn tĩ ti to. Hā ra tóg inh mỹ: “hā kāmẽn,” he ja nĩ, kỹ tóg sỹ ti rānrhāj ki rĩr há han mũ ve sór mũ sir inh ki, Topẽ ti. ¹⁸ Kỹ sóg kanhkā tá to ganho venh ke tũ nĩ, inh rānrhāj ja to. Hā ra sóg ganho ve sór mũ tá. Hā kỹ sóg ěprā ke ag ki sỹ nén ve sór mũ ěn ve sór tũ nĩ, ijẽn jé. Ājag tỹ inh mỹ nén vin ke ti ve sór tũ inh nĩ. Vékẽ sóg ājag mỹ tó tĩ, Topẽ vĩ ti,

vênh kar mý ke gé. Ājag tỹ inh mý kajām tũ ra tóg inh mý há tĩ. Kỹ sóg tag hã to kanhkã tá inh ganho ti venh ke mũ.

**Ũn e tỹ Jesus ki ge kỹ
tóg Paulo mý há tĩ**

¹⁹ Ũ pi(jé) inh kri ke nĩ'. Ge ra sóg vēsỹ vênh kar krēm ke han, vênh kar tỹ inh patrão ri ke nỹti jé. “Hên ri ke mũn ũ tóg Jesus ki rã sór mũ, isỹ tỹ ti krēm ke nĩn kỹ,” he sóg tĩ. Hã jé sóg vēsỹ ag krēm ke han tĩ, ũ tỹ ti ki ge mũ ag e nỹti jé, isugrĩn. ²⁰ Judeu ag tugnĩn sóg vēsỹ Judeu han tĩ, Judeu ag tỹ Jesus ki ge jé. Isỹ ag jykre han sór tũ ra inh han ke tũ nĩ vê, hã ra sóg han sór tĩ, isỹ ag to há nĩn kỹ. Kỹ sóg Judeu jykre han mũ ag tugrĩn ag jykre han tĩ, ũ tỹ ag jykre han mũ ag tỹ Jesus ki ge jé, isugnĩn. ²¹ Kỹ fóg ag vỹ Judeu jykre han tũ nĩgtĩ, kanhgág ag ke gé. Kỹ sóg fóg ag tugrĩn fóg jykre han tĩ, kanhgág ag tugnĩn sóg kanhgág jykre han tĩ, ag tỹ isugrĩn Jesus ki ge jé. Inh pi(jé) Topẽ jykre továnh mũ hã ra'. Cristo jykre han sóg tĩgtĩ mỹr. Judeu jykre hã továnh inh tĩ, fóg to, kanhgág to ke gé. ²² Kỹ sóg ũn krój ag mý komēr hã vĩ tĩ, ag tỹ isugnĩn Jesus to vāsānsān mǎn jé. Isỹ ũn jykre ve kỹ sóg ti jykre ri ke han tĩ, ag tỹ Jesus ki ge jé, isugrĩn. ²³ Tag kar han sóg tĩ, Jesus kǎme tugnĩn, isỹ ti mré ti rǎnhrǎj ki rĩr jé.

²⁴ Ha mẽ, ũn e tóg corridida han tĩ, hã ra ũn pĩr tóg ganhar ke tĩ inhhã. Ag ri ke han nĩ. Vāsān ra, ājag tỹ ganhar ken jé, Jesus tỹ ěg mý nén ven ke ti. ²⁵ Ha vé, ũ tỹ torneio han tĩ ag vỹ to jykrén mág tĩ, kỹ ag vǎkrég tĩ gé, ag tỹ ganhar ken jé. Ēprǎ jykre ki ag tóg ganhar ke sór tĩ, hã jé ag vǎkrég tĩ, ti tỹ kǎnhmar tũ' he mũ ra, ag ganho ti. Hã ra ěg tóg kanhkã tá ěg ganho venh ke mũ, ũ tỹ tũg ke vǎnh ěn ti. ²⁶ Ge sóg tĩ gé, sỹ corridida ri ke han kỹ. Pétēm sór inh nĩ, to krónh ke tũ sóg nĩ. Rǎrá ri ke han sóg tĩ to. Inh pi(jé) véké rǎrá tĩ'. ²⁷ Vênh hã to rá sóg tĩ, kỹ sóg

isỹ nén to én mũ ěn han ke tũ nĩ. Inh mý Topẽ tỹ inh fón ha mẽ tóg tĩ, isỹ ājag jyvén kar kỹ vênh jykre pǎno han kỹ. Hã kỹ sóg vēsō rá tĩ, sỹ han tũg jé.

Ēg jo ke ag to jykrén nĩ

10 Inh kanhkã', tag jēmē ra, ājag tỹ ki kanhrǎn jé. Ēg jóg'jóg ve ag vỹ Moisés mré mũ ja nĩgtĩ. Kanhkã góg ěn krēm ag tóg mũ kǎn ja nĩgtĩ, kỹ ag tóg goj kusũg nig ěn kafǎ ra pa kǎn ja nĩgtĩ gé. ² Ēg vênh kyppe ri ken hã vê, ag tỹ kanhkã góg krēm mũ ja ti, ag tỹ goj kusũg nig kafǎ ra pa ja ti ke gé. Ēn kǎ Moisés vỹ ag jāmĩ tĩg ja nĩgtĩ, Jesus tỹ ěg ki rĩr nĩ tag ri ke. ³ Kỹ ěg jóg'jóg ve ag tóg kanhkã tá vējēn ko kǎn ja nĩgtĩ gé, ⁴ kanhkã tá goj tỹ ěganē ki kronkron kǎn ja ag tóg nĩgtĩ gé, kanhkã tá goj tỹ vênh kanē ti. Pǎró tá ag tóg goj ve ja nĩgtĩ, hã ra tóg tỹ kanhkã tá ke nĩ ja nĩgtĩ. Cristo to ken hã vê. Ti hã vỹ ag mré tĩ ja nĩgtĩ. Kỹ tóg ag mý goj ěn ven ja nĩgtĩ. ⁵ Ge ra Topẽ tóg ěg jóg'jóg ve ag to jũ kǎn ja nĩgtĩ, kỹ ag tóg kǎgter kǎn ja nĩgtĩ, ga kórég ěn tá. Hã ra tóg ũn pipir ag hã to há ja nĩgtĩ, Topẽ ti, kỹ ag hã tóg krenkren ja nĩgtĩ, ũn pipir ěn ag. ⁶ Hã ra tóg rǎn kỹ nĩ, ěg tỹ tỹ vênh kanhrǎn jé, ěg tỹ nén ũ kórég to én tũ nĩ jé. To én ja ag tóg nĩgtĩ, ěg jóg'jóg ve ag, kỹ ěg tag han ke tũ nĩ.

⁷ Hã kỹ ón kỹ vênh kǎggrǎ tỹ topē nón mũ sór tũg nĩ. Tag han ja ag tóg nĩgtĩ gé, ěg jóg'jóg ve ag. Hã kỹ tag tóg rǎn kỹ nĩ, hã mẽ. “Povo kar vỹ nĩgnĩ mũ sir, ag tỹ vênh kǎggrǎ tỹ topē to festa ko jé, ag kronkron jé sir, ag tỹ kar kỹ vênh gringrén jé fag mré,” he ja tóg nĩgtĩ, Topẽ vĩ rǎn ki. Hã to Topẽ tóg ag to jũ ja nĩgtĩ gé.

⁸ Kỹ ěg ũn mén tũ fag mré nỹnh ke tũ nĩ gé. Tag han ja ag tóg nĩgtĩ gé, ěg jóg'jóg ve ag, kỹ kurǎ pĩr ki ũ tỹ 23 mil (ke) ag vỹ kǎgter ja nĩgtĩ, Topẽ tỹ ag tũg kỹ. ⁹ Kỹ ěg Topẽ to: “tĩ hỹn iso jũnh ke tũ nĩ, sỹ ti vĩ mranh mũ ra,” henh ke tũ nĩ gé. Ke ja ag tóg nĩgtĩ gé, ěg jóg'jóg ve ag,

kỹ p̄n tóg ag kăgtén ja nĩgtĩ, Topê tỹ ag to jũn kỹ. ¹⁰Kỹ ẽg Topê to vĩ kónân ke tũ nĩ gé. Ke ja ag tóg nĩgtĩ gé, ẽg jóg'jóg ve ag, kỹ Topê tỹ jênê jafã tóg ag kăgtén ja nĩgtĩ.

¹¹Hã ra Topê tóg ag vóg kónân, ẽg tỹ ag to vênh kanhrân jé. Hã jé tóg rán kỹ nĩ gé, ti tỹ to ẽg jyvên jé. Ẽg hã m̄n kakó nĩ, kurã tỹ ẽgno ti. ¹²Hã kỹ vêso jykrén. Ẽg hã han kỹ, ả tỹ ti vĩ mranh tũg kỹ tóg há ti. Hã jé vênh ki rĩr, ả tỹ pranh ke tũ nĩ jé. ¹³Nén-Kórég vỹ ẽg krĩn sór mũ, ẽg tỹ Topê vỹ mranh jé. Hã ra tóg ẽprã ke jykre ki ẽg krĩn sór tĩgtĩ, Japo ti. Kỹ Topê tóg ti vэг ti, kỹ tóg ẽg ki rĩr ti. Kỹ tóg kejên ti mỹ: “gen kỹ,” he tĩ sir, ti tỹ ẽg kutân tãvĩ han mũ ra ẽg tỹ hẽ ri ke tũ nĩ jé. Kỹ tóg ẽg tar han ke mũ gé, ẽg tỹ Nén-Kórég tỹ ẽg krĩn kónân mũ ra ti kato tẽ jé, ẽg tỹ ti mỹ: “hej,” he tũ nĩ jé.

Vênh kăggrá tỹ topê jykre han sór tũg nĩ

¹⁴Inh krê', tag tugrĩn vênh kăggrá tỹ topê továnh pẽ han nĩ, ve sór tũg nĩ. ¹⁵Ki kanhró ajag tóg nỹtĩ, hã kỹ ẽg tỹ Jesus jamĩ ko tĩ ẽn to jykrén nĩ, ha mẽ. ¹⁶Ẽg tỹ Cristo ter ja mĩ ẽkrén kỹ ẽg tóg kron tĩ, ti kyvénh ri ke ẽn ti. Copa ẽn to Jesus tóg Topê mré vĩ há han ja nĩgtĩ, ag tỹ kron jé. Kỹ ẽg tóg to Topê mré vĩ kar kỹ kron tĩ sir. Ẽg tỹ kron kỹ ẽg tóg tỹ ti mré ke nỹtĩ sir, ẽg tỹ ti kyvénh ri ke ẽn kron kỹ. Kỹ ti jamĩ vỹ ge nĩgtĩ gé. Kupân kỹ ẽg tóg ko tĩ, Cristo tỹ ẽg mỹ tón kỹ. Ẽg tỹ kon kỹ ẽg tóg tỹ ti mré ke nỹtĩ gé sir, ẽg tỹ ti nĩ ri ke ẽn kon kỹ. ¹⁷Ti jamĩ vỹ pir nĩ, kỹ ẽg tóg ko kân kỹ ẽg tóg tỹ ùn pir nỹtĩ gé, ti mré, ẽg e hã ra. Jesus jamĩ ko to vênh jykre hã vẽ.

¹⁸Kỹ povo tỹ Israel ag to jykrén nĩ gé, ha mẽ, Israel krê ag to. Topê mỹ ag tóg nén ù pũn tĩ, ti pũn jafã kri. Pũn kỹ ag tóg ko tĩ gé. Ag tỹ kon kỹ ag tóg tỹ ag tỹ ùn mỹ pũn mũ ẽn mré ke nỹtĩ gé sir, ẽg tỹ tỹ Jesus mré ke nỹtĩ ri ke. ¹⁹⁻²⁰Kỹ ón

kỹ vênh kăggrá tỹ topê to jykrén nĩ gé, ha mẽ. Ag tỹ vênh kăggrá tỹ topê mỹ nén ù pũn kỹ ag tóg Nén-Kórég ag hã mỹ pũn tĩ. Ag pi (jé) Topê pẽ mỹ pũn tĩ'. Hã kỹ tóg inh mỹ há tũ nĩ, ajag tỹ tỹ Nén-Kórég ag mré ke nỹtĩn kỹ, ajag tỹ ag tũ kon kỹ ke gé.

Inh pi(jé) ajag mỹ: “vênh kăggrá tỹ topê vỹ nỹgtĩ, kỹ ag tỹ ag mỹ pũn mũ ẽn vỹ tỹ nén ù nĩ,” he sór tĩ'. Nén ù tũ vẽ, Topê tũ vẽ, ón kỹ vênh kăggrá tỹ topê ti. ²¹Hã ra tóg vênhmỹ nĩ, ajag tỹ ẽg Senhor tỹ copa ki ke kron kar kỹ Nén-Kórég tỹ copa ki ke kron kỹ ke gé. Vênhmỹ ti nĩ, ajag tỹ ẽg Senhor jên ko kar Nén-Kórég ag jên kon kỹ ke gé. ²²Ẽg tỹ Nén-Kórég ag tũ kon kỹ ti hẽ ri ke mũn ẽg to jũnh ke mũ, ẽg Senhor ti. Ti tỹ ẽg to jũ nĩn kỹ tóg vênhmỹ nĩ. Ẽg pi(jé) ti tỹ hẽ ri kenh mũ'. Hã kỹ ón kỹ vênh kăggrá tỹ topê ve sór tũg nĩ.

Ẽg régre tugrĩn ẽg kejên konh ke tũ nĩ

²³Hã ra ajag tóg inh mỹ: “isỹ nén han sór mũ ẽn han jé sóg ke mũ, pi(jé) kórég nĩ,” he sór mũ. Há ti nĩ vẽ, tag ti. Hã ra ẽg tỹ nén han mũ ù tóg ẽg mỹ nén ù há han tũ nĩgtĩ. Nén ù kar han há ẽg tóg tĩ vẽ, hã ra ẽg tỹ nén han mũ ù tóg ẽg tar han ke tũ nĩ, Jesus to. ²⁴Kỹ ả tũ to jykrén tãvĩ han tũg nĩ, ả régre tũ to jykrén nĩ gé, ti mỹ há nĩ jé, ha mẽ. ²⁵Kỹ ả tỹ nén ù tãnh jafã ki nén ù nĩ kajãm sór nĩn kỹn há tĩ, kỹ ag mỹ: “ũ mỹ ón kỹ vênh kăggrá tỹ topê mỹ ti nĩ tag pũn ja tũ?” he tũg nĩ. Jẽmẽ tũg nĩ, jatun mỹ komnĩ. ²⁶Topê tũ vẽ, ga ti, ga kri ke kar ti ke gé, hã kỹ jatun mỹ komnĩ. ²⁷Kejên ù tỹ Jesus ki rã tũ ù vỹ ả mỹ: “inh mré jên kătĩg,” he mũ sir. Ẽg tỹ sór kỹ ả tóg tĩg mũ, kỹ ả tóg nén ù kar konh ke mũ. Ti ki jẽmẽ tũg nĩ, ù tỹ hẽ ri ke mũn ón kỹ vênh kăggrá tỹ topê mỹ nén ù pũn ja ti, ả tỹ jatun mỹ ko jé. ²⁸Hẽ ri ke mũn ù tóg sir ả mỹ: “vẽjên tag ù pũn ag, ón kỹ vênh kăggrá tỹ topê mỹ,” he mũ. Kỹ

ko tũg nĩ sir, ti tũgrĩn, ù tỹ ă mỹ tó mũ tũgnĩn, ti tỹ ă to jykrén kónān tũ nĩ jé.²⁹ Ǻ pi(jé) to jykrén mũ vế', hã ra ti hã tóg to jykrén mũ, hã kỹ tóg ă mỹ tó mũ. Há tũ ti nĩ inh mỹ, ù tỹ iso jykrén kónān kỹ, isỹ nén ù tỹ inh mỹ kórég tũ han to.³⁰ Topê mỹ sóg vếjēn ēn to vĩ há han ja nĩgtĩ. Kỹ ù tỹ tag to iso vĩ vĩ he mũ ra tóg inh mỹ kórég nĩ, sỹ Topê mỹ vĩ há han ja ēn to. Hã kỹ sóg ko sór tũ nĩ, ù tỹ iso jykrén kónān sór kỹ.

³¹ Hã kỹ Topê hã mỹ nén kar han nĩ, vãnh kar tỹ Topê jykre há nĩ ve jé. Ǻ jēn kỹ ti jykre ki jēn nĩ. Ǻ kron kỹ ti jykre ki kron nĩ. Ǻ tỹ nén ù han kỹ ti jykre hã ki han nĩ gé, vãnh kar tỹ ti jykre há nĩ ve jé.³² Û tỹ ă tũgrĩn Topê to jũ tũ nĩ jén há tĩ, Judeu ag, fóg ag, kanhgág ag, Topê tũ ag ke gé, ù tỹ ẽg mré ke ag. Kỹ vãnh jykre há hã han nĩ.³³ Ke sóg tĩ gé. Vāsān sóg tĩ, vãnh kar tỹ iso há nỹtĩ jé. Hã jé sóg isũ ki rĩr tãvĩ han tũ nĩgtĩ. Vãnh kar tũ ki rĩr inh tĩ, ag tỹ Jesus ki ge jé.

11 Inh jykre han sór mĩnĩ, isỹ Jesus jykre han ri ke.

Ủn tỹtá fag jykre

² Hỹ, ăjag mỹ sóg vĩ há han sór mũ mỹr. Isỹ ăjag mỹ nén tó mũ ēn to jykrén kãn ăjag tóg mũgtĩ mỹr'. Isỹ ăjag kanhrān ēn ki króm sór ăjag tóg tĩ.³ Hã kỹ sóg nén ù ki ăjag kanhrān sór mũ sir, ha mẽ. Cristo vỹ tỹ ag kri ke nĩ, kỹ ag vỹ tỹ ăjag prũ fag kri ke nỹtĩ, kỹ Topê vỹ tỹ Cristo kri ke nĩ gé.⁴ Kỹ ag kãmĩ ù tỹ kur tỹ vãnh kri fón kỹ Topê mré vĩ kỹ tóg há tũ nĩ, ti tỹ kur tỹ vãnh kri fón kỹ jēn kỹ Topê vĩ tón kỹ. Ti mỹ'ăg vế sir.⁵ Ủn tỹtá fag tỹ hã ra kur tỹ vãnh kri fón tũ ra Topê mré vĩ kỹ tóg há tũ nĩ. Fag tỹ kur tỹ vãnh kri fón tũ ra Topê vĩ tó kỹ fag tóg ăjag kri ke ēn mỹ'a han mũ sir, kỹ tóg fag mỹ'a tĩ gé sir, fag krĩ kator ri ke ti nĩ sir.⁶ Hã kỹ tóg fag tỹ vãnh kri fón sór tũ kỹ fag krĩ kator ri ke nĩ. Hã ra tóg fag mỹ'a tĩ, fag gãnh ronh ke to, fag krĩ

kator nĩnh ke to. Hã kỹ tóg há tĩ gé, fag tỹ kur tỹ vãnh kri fón ti.⁷ Hỹ, hã vế. Ag kãmĩ ù tóg kur tỹ vãnh kri fón ke tũ nĩ, ti tỹ tỹ Topê ri ke nĩn kỹ, ẽg tỹ ti tũgrĩn Topê tỹ ti kri tỹ ùn mág nĩ ven kỹ. Hã ra ẽg tóg ùn tỹtá fag hã tũgrĩn ẽg tóg ag tỹ fag kri tỹ ùn mág nỹtĩ vếg tĩ.⁸ Ha vế, Topê pi(jé) ùn ve fi tỹ ùn ve ti han ja nĩ'. Ûn ve tỹ tóg fi han ja nĩ mỹr.⁹ Kỹn pi(jé) fi tũgrĩn ti han'. Ti hã tũgnĩn tóg fi han.¹⁰ Hã kỹ ùn tỹtá fag tóg kur tỹ vãnh kri fón ke mũ, fag tỹ tỹ ag krēm ke nỹtĩn kỹ. Kỹ Topê tỹ jēnẽ jafã ag tóg fag tỹ tỹ ag tũ nỹtĩ ki kanhró nỹtĩ sir, kur ēn to.¹¹ Hã ra ẽg kar vỹ ẽg Senhor ki ge kỹ nỹtĩ. Ti ki ge kỹ nỹtĩn kỹ ùn tỹtá fag pi(jé) ăjag pir mỹ tỹ nén ù nỹtĩ'. Ag mré ke fag nỹtĩ. Kỹ ag pi(jé) ăjag pir mỹ tỹ nén ù nỹtĩ gé'. Fag mré ke ag nỹtĩ gé. Jagnẽ ki rĩr ẽg tóg tĩ ha.¹² Hỹ, ùn tỹtá fi vỹ tỹ ti ki han kỹ nĩ. Hã ra ag kar tóg fag ki mur tĩ sir, jãvo ẽg kar vỹ tỹ Topê tỹ há (r) kar nỹtĩ.

¹³ Kỹ to jykrén, ăjag. Há tũ tóg nĩ, ùn tỹtá fag tỹ kur tỹ vãnh kri fón tũ ra Topê mré vēmén kỹ.¹⁴ Fag kar vỹ kur tỹ vãnh kri fón tĩ, ẽg mré ke tũ fag mré hã. Hã kỹ ẽg vēsóg ki ki kanhró nỹtĩ, vãnh jykre tag ti. Há ti nĩ mỹr.

Ag mỹ'a tóg tĩ, ag gãnh tēj ti. Vēsóg ki ẽg tag to jykrén tĩ.¹⁵ Hã ra tóg fag mỹ sér tĩ, fag gãnh tēj ti. Hỹ, fag gãnh vỹ tỹ fag krĩ kri fón ja ri ke nĩ.¹⁶ Hēn ri ke mũn ăjag kãmĩ ù mỹ tóg há tũ nĩ hã ra, fag krĩ kri fón ja ti. Kỹ tag to jykrén nĩ, ha mẽ: ă tỹ kri fón sór tũ tag pi(jé) tỹ ẽg jykre nĩ'. Topê tũ fag jykre pi(jé)'. Igreja kar ki fag tóg kur tỹ vãnh kri fón tĩ, ha mẽ. Kỹ igreja krēm ẽg mỹ'a han sór tũg nĩ.

Santa Ceia to vãnh jykre

(Mt 26.26-28; Mc 14.22-24; Lc 22.17-20)

¹⁷ Kỹ sóg nén ù ki ăjag mỹ vĩ há han ke tũ nĩ gé. Ǻjag jykre ù tóg há tũ nĩ, ha mẽ. Ǻjag vãnh mãn kỹ ăjag nēji, Jesus jamĩ ko kỹ ăjag nēji jagnẽ jēn vóg tĩ, kỹ ăjag nēji jagnẽ kókég tĩ sir.¹⁸ Ǻjag vãnh mãn

kỹ ājag nēji jagnē kato tē tī, vēnh kâpām kỹ, kỹ tóg inh mỹ ki hã ke ve nĩ, sỹ to jykrén kỹ. Ājag kāmĩ ũ hỹn vēnh kâpām sór tĩ, he sóg tĩ. ¹⁹ Hỹ, há ti nĩ vế, ājag tỹ vēnh kâpām kỹ nỹtĩn kỹ. Kỹ ũn jykre há ag vỹ vēnh ven ke mũ, ājag kāmĩ.

²⁰ Kỹ, ājag vēnh măn kỹ ājag pi(jé) ěg Senhor jamĩ ko tĩ', Santa Ceia he mũ ěn ti'. ²¹ Tỹ festa han kỹ ājag kar nēji vēnh fãn hã jé ko tĩ, ājag fôr sór kỹ. Tá jun kỹ ājag nēji kãnhmar ko tĩ. Kỹ ũ ag nēji vēnh fãn tĩ, vinho kron kỹ ag nēji tỹ pépév tĩ, jó ũ ag tóg kókĩnkĩr ti sir, ũ tỹ kãnhmar tá junjun mũ ag tỹ ag tũ kaggran kỹ. ²² Ha mẽ, vēnhmỹ ti nĩ. Topē mré ke ag to é he mũ ve ājag tóg nỹtĩ mỹr', ājag tỹ ag tũ kaggran kỹ. Ũn jagtar ag mỹ'a han ājag tóg mũ mỹr', ājag tỹ ag jēn kaggran kỹ, ag junjun to hã. Tag tỹ inh hỹn hẽ ri kenh mũ? Inh mỹ ājag mỹ vĩ há han ke mũ', tag to? Vó', kenh ke tũ inh nĩ. Kórég ti nĩ, ājag tỹ han mũ tag ti. Ājag ĩn hã tá vējēn tỹ vēnh fãn nĩ.

²³ Ha mẽ, ěg Senhor tóg inh mỹ tó ja nĩ, sỹ ājag mỹ tó mũ ti, ěg tỹ ti ter to jykrén kỹ tag han jé, ha mẽ. Kutỹ ěn kã, Judas tỹ pã'i ag mỹ ěg Senhor tỹ Jesus tó ja ěn kã ěg Senhor tóg ěmĩ măn ja nĩgtĩ, Jesus ti. ²⁴ To tóg Topē mré vĩ ja nĩgtĩ. Kupãn kỹ tóg ag mỹ: “inh hã vế,” he ja nĩgtĩ. “Ājag jagfỹ sóg ter ke mũ. Kỹ inh mĩ ěkrén nĩ, ājag tỹ pảo tag kon kỹ,” he ja tóg nĩgtĩ. ²⁵ Ag tỹ ko kar kỹ tóg copa măn ja nĩgtĩ gé sir. Kỹ tóg ag mỹ: “copa ki jē tag vỹ inh kyvénh ri ke nĩ,” he ja nĩgtĩ. “Inh jykre tãg to ken hã vế, isỹ inh kyvénh tugrĩn ājag mỹ vēnh pãte fón jé. Kỹ inh kyvénh tỹ inh ki kutē mũ ěn mĩ ěkrén nĩ, ājag tỹ copa kãkã nĩ tag kron kỹ,” he ja tóg nĩgtĩ gé. ²⁶ Hã kỹ ěg tỹ ěmĩ ěn kon kỹ, ěg tỹ copa kãkã nĩ ěn kron kỹ ěg tóg sir ěg Senhor ter ti tó tĩ. Tag han ěg tĩ, ti kãtĩg ken jo.

²⁷ Hã kỹ vēnh jykre kórég ki ěmĩ ěn ko sór tũg nĩ, copa kãkã nĩ ěn kron kónãn sór tũg nĩ gé, ěg Senhor tũ ti. Ke tũ nĩ

mũ ra tóg ěg tỹ ti ter to é he ri ke nĩ, ěg tỹ ti kyvénh kutē to é he ri ke ti nĩ, ěg tỹ ěg jykre kórég ra kron kỹ. ²⁸ Hã kỹ ěg jé ěg jykre tugnỹm. Tugnỹm kar kỹ, ti há nĩ ve kar kỹ ěg tóg ěmĩ ěn konh mũ, copa kãkã nĩ ěn kron ke mũ gé. ²⁹ ěg tỹ ón kỹ ko sór kỹ, ón kỹ kron sór kỹ, ti tỹ ěg mỹ vējēn ũ ri ke nĩn kỹ Topē tóg ěg vóg kónãn ke mũ sir, ěg tỹ ěmĩ ěn to ěg Senhor ter mĩ ěkrég tũ nĩn kỹ. Kỹ ěg tóg Topē tỹ ěg vóg kónãn hã jé tỹ nén ũ tũ han kỹ ko' he mũ, kron' he mũ gé sir.

³⁰ Ājag tỹ Jesus jamĩ ko to vēnh ki rĩr há han tũ nỹtĩn kỹ, hã kỹ ũ ag tóg krónhkrój nỹtĩ, ājag kāmĩ, kỹ ũ ag tóg kaga nỹtĩ, kỹ ũ tỹ hẽ ri ke ag tóg kãgtter huri ke gé. ³¹ Ha vé, ěg tỹ ěg jykre tugnỹm kỹ ti mỹ tó kỹ tóg ěg mỹ vēnh pãte fón ke mũ. Kỹ tóg ěg jykre tugnỹm măn ke tũ nĩ sir, ěg vóg kónãn ke tũ tóg nĩ gé, ěg Senhor ti. ³² Hã ra tóg kejēn ěg vóg kónãn tĩ. ěg Senhor tỹ ěg kanhrãn sór vế, ti tỹ ěg tỹ kygnē to ěg vóg kónãn kỹ, ti tỹ ěg vãm tũ nĩ jé, ũ tỹ ti vĩ mranh mũ ag mré hã.

³³ Inh kanhkã', tag to jykrén, kỹ jagnē jãvãnh nĩ, ājag tỹ vējēn tỹ Santa Ceia ko sór kỹ. ³⁴ Ājag kāmĩ ũ kókĩr nĩn kỹ tóg ĩn tá ĩ jēn tỹ vēnh fãn ke mũ, ke tũ nĩ mũ ra tóg ājag vóg kónãn ke mũ, ěg Senhor ti, ājag tỹ vēnh măn kỹ vēnh fãnfan kỹ.

Sỹ ājag mỹ nén tónh ke ũ tóg nỹtĩ ke gé, hã ra sóg rãn ke tũ nĩ. Sỹ ājag mré ninh ken kỹ sóg ājag mỹ kãmén ke mũ.

Topē vỹ ěg tar han mũ, ti kuprĩg tỹ

12 Kỹ sóg ājag mỹ Topē kuprĩg tỹ ěg krĩn ke tag tó sór mũ, ājag tỹ inh ki jēmēn kỹ. Kejēn tóg nén ũ to ěg tar han tĩ, ěg tỹ han jé, Topē kuprĩg ti. ² Ha vé, vãsỹ, ājag tỹ Jesus ki ge tũg ki ājag tóg ón kỹ vēnh kãggrá tỹ topē nón mũ ja nĩgtĩ gé. Vĩ vãnh ti nỹtĩ, vēnh kãggrá tỹ topē ti, hã ra Japo vỹ ājag tỹ ag ki rã han ja nĩgtĩ. ³ Hã kỹ sóg tag to ājag kanhrãn sór mũ, ha mẽ. Topē kuprĩg tỹ ěg krĩn kỹ ěg pi(jé) Jesus to: “Nén-Kórég

ag pã'i mág," he tĩ. Jãvo ěg tỹ Jesus mỹ: "ěg Senhor," hen kỹ Topẽ kuprĩg tóg ěg krĩn mũ sir, ke tũ nĩ mũ ra ěg ti mỹ: "ěg Senhor," he vãnħ nĩ sir.

⁴Kỹ Topẽ kuprĩg vỹ tỹ ùn pĩr nĩ, hã ra tóg ěg tar han tĩ, nén ù kar to. Vyrmỹ tóg ěg tãn tĩ, ěg tãn tĩ' he tĩ. ⁵Kỹ ěg rãnrhãj vỹ e nỹtĩ gé, ěg kar vỹ vyrmỹ rãnrhãj nỹtĩ gé, hã ra tóg pĩr nĩ, ěg Senhor ti, ù tỹ ěg mỹ vẽnħ rãnrhãj nĩm tĩ ti. ⁶Kỹ ěg tỹ ti jykre ki nén ù hyn han mũ vỹ e nỹtĩ, hã ra tóg pĩr nĩ, Topẽ ti, ù tỹ ěg tar han mũ ti.

⁷Kỹ Topẽ kuprĩg vỹ ěg tar han kãn ti sir, kỹ tóg ù tỹ nén ù to tãn kỹ nĩ han tĩ, jó tóg ù tỹ nén ù ù to tãn kỹ nĩ han tĩ gé, ěg kar tỹ jagnẽ mỹ nén ù há han jé, ěg tỹ nén ù to tar nỹtĩ ěn tỹ. ⁸Hã kỹ Topẽ kuprĩg tóg ù tar han tĩ, ti tỹ ěg mỹ ti vĩ kãmén há han jé sir. Û tar han tóg tĩ gé, ti tỹ Topẽ vĩ ki nén ù kar ki kanhró nĩ jé. ⁹Kỹ Topẽ kuprĩg tóg ù tar han tĩ, ti tỹ ti ki fé mág to. Û tar han tóg tĩ gé, ti tỹ ùn kagyga tỹ há' he jé, Topẽ kuprĩg ěn ti mỹr. ¹⁰Û tar han tóg tĩ gé, ti tỹ ěg tỹ nén han vãnħ han jé, ù tar han tóg tĩ, ti tỹ ěg jyvẽn há han jé, kỹ tóg ù tar han tĩ, ti tỹ: "tag vỹ tỹ vẽnħ jagrẽ há nĩ, tag vỹ tỹ vẽnħ jagrẽ kórég nĩ," he jé. Û tar han tóg tĩ, ti tỹ ěg tỹ vẽnħ vĩ ki kagtĩg ki Topẽ mré vēmén jé, kỹ tóg ù tar han tĩ, ti tỹ ěg tỹ vẽnħ vĩ ki kagtĩg mẽ kỹ ěg vĩ ki tó jé sir. ¹¹Hã ra tóg pĩr nĩ, Topẽ kuprĩg ti. Ti pĩr nĩ ra tóg nén ù e tag hyn han tĩ, kỹ tóg to ěg tar han tĩ. Ti hã ne to jykren kỹ: "tag tar han jé sóg ke mũ, tag to, jó sóg ù ěn tar han ke mũ, ěn to," he tĩ. Kỹ tóg vyrmỹ ù tar han', vyrmỹ ù tar han' he tĩ sir.

Nén ù pĩr ri ke ěg nỹtĩ, ěg jagrẽ pĩr nĩn kỹ

¹²Ěg há to jykren nĩ, ha mẽ. Ěg há vỹ tỹ ùn pĩr nĩ, hã ra ěg há ki nỹtĩ vỹ e nỹtĩ, ěg pẽn, ěg nĩgé, ěg nĩgrẽg, ti kar ti. Kỹ ěg há ki nỹtĩ kar vỹ tỹ ěg há nĩ sir. Nén

ù pĩr vẽn sir, ti e nỹtĩ ra, ti tỹ ěg ki nỹtĩ kar nĩn kỹ. Tag ri ke ěg nỹtĩ gé. Cristo há ri ke ěg nỹtĩ, ěg tỹ ti ki ge kỹ nỹtĩn kỹ. ¹³Topẽ kuprĩg vỹ tỹ ùn pĩr nĩ, kỹ ěg kar vỹ kygpe kỹ nỹtĩ, ti kuprĩg tỹ, hã vỹ: Cristo há pĩr, he mũ. Ěg kãmĩ ù ag tóg tỹ povo tỹ Israel ag ki ke nỹtĩ, ù ag tóg tỹ povo ù ag ki ke nỹtĩ gé, ù ag tóg ěprã ke tỹ patrão nỹtĩ, jó ù ag tóg patrão tũ nỹtĩ. Hã ra Topẽ kuprĩg vỹ tỹ ùn pĩr nĩ, ěg jagrẽ ti, kỹ tóg tỹ ěg jagrẽ kar nĩ, ti pĩr nĩ hã ra. Nén ù pĩr vỹ tỹ ěg nỹtĩ.

¹⁴Ěg há vỹ ge nĩ, ha mẽ. Ěg há ki nỹtĩ pi(jé) tỹ ùn pĩr nĩ. E ti nỹtĩ, ěg há ki nỹtĩ ti. Kỹ ěg jé ěg rãnrhãj to vĩ vĩ he tũ nĩ.

¹⁵Hẽn ri ke mũn ěg pẽn tóg to jykren kỹ: "inh pi (jé) tỹ vẽnħ nĩgé nĩ, hã kỹ sóg vẽnħ há ki nỹtĩ tũ nĩ," he tĩ. Hã tũ vẽn hã ra. Ěg há ki nỹtĩ ti nĩ, ěg pẽn ti, ti tỹ tỹ ěg nĩgé tũ nĩ ra. ¹⁶Kỹ ěg nĩgrẽg tóg to jykren kỹ hẽn ri ke mũn: "inh pi(jé) tỹ vẽnħ kanẽ nĩ, hã kỹ sóg vẽnħ há ki nỹtĩ tũ nĩ," he tĩ gé. Hã tũ vẽn mỹr. ¹⁷Ěg há tỹ tỹ vẽnħ kanẽ tãvĩ nĩ hã ra ěg ne tỹ jēmẽnħ mũ vẽn? Ěg há tỹ tỹ vẽnħ nĩgrẽg tãvĩ nĩ hã ra ěg nén ù ger mẽnħ ke tũ nĩ vẽn. ¹⁸Topẽ hã ne ěg há ki nỹtĩ hyn han kãn', kỹ tóg ti ki nỹtĩ kar mỹ vyrmỹ vẽnħ jykre vin kãn ja nĩgtĩ, ti tỹ ã rãnrhãj ěn han jé. Topẽ tỹ nén to jykren jan hã vẽn. ¹⁹Kỹ ti ki nỹtĩ kar tỹ vẽnħ jykre pĩr nĩ ra ěg há vỹ tũ nĩ vẽn. ²⁰Hã ti nĩ, Topẽ jykre ti. Ěg há ki nỹtĩ jykre e han ti, ti e tỹ ěg há pĩr han jé sir.

²¹Hã kỹ ěg kanẽ pi(jé) ěg nĩgé mỹ: "ã pi(jé) inh mré rãnrhãj tĩ," he tĩ. Kỹ ěg krĩ vỹ ge nĩgtĩ gé. Ěg pẽn mỹ ti: "ã pi(jé) inh mré rãnrhãj tĩ," he tũ nĩgtĩ gé. ²²Ge tũ ti nĩ, ěg há jykre ti. Ěg há ki nỹtĩ ù tóg rãnrhãj krój han nĩ ve nĩ, hã ra ěg tóg jarĩn mỹ tỹ jagnẽ mré rãnrhãj kãn ti. ²³Kỹ ti ki nỹtĩ ù tóg rãnrhãj kufy han tĩ, kỹ ěg tóg hã ra ti ki rĩr há han tĩ sir. Kỹ ti ki nỹtĩ ù tóg ěg mỹ sĩnvĩ tũ nỹtĩ, hã kỹ ěg tóg kur krēm ti rãg tĩ. ²⁴Û tỹ ěg mỹ sĩnvĩ nỹtĩ tỹ ěg tóg kur krēm rãg tũ nĩgtĩ

sir. Kĩ Topê tóg êg mĩ vènh jykre nĩm, êg tĩ ti ki nĩtĩ tĩ vènh rānrāj kufy han mũ ên ki rĩr há han jé sir. Êg há jykre hā vè. Topê vỹ to jykrén kăn, kĩ tóg êg há ki nĩtĩ han kăn, ²⁵ êg há tĩ vènh jykre pir han jé. Kĩ tóg ti mĩ há tĩ, êg tĩ êg mré Jesus ki ge kĩ nĩtĩ kar ag ki rĩr há han kĩ. Êg tĩ jagnê ki rĩr há han kĩ êg kāmĩ ù vỹ jagtar tũ nĩtĩnh mũ, êg tĩ êg há ki nĩtĩ jykre pir ri ke han kăn kĩ, jagnê mĩ. ²⁶ Hỹ, êg há ki nĩtĩ pir kaga nĩn kĩ tóg kaga kăn tĩ sir. Kĩ tóg ge nĩ gé, êg mré. Jagnê mré tóg êg mĩ e tĩ. Kĩ ù tĩ êg kāmĩ ù mĩ vỹ há han kĩ tóg êg kar mĩ sér tĩ gé sir.

²⁷ Ha mẽ, Cristo há ri ke êg nĩtĩ, kĩ êg kar vỹ ti há ki nĩtĩ ri ke nĩtĩ gé sir. ²⁸ Kĩ Topê tóg ù tĩ igreja ki ke kar mĩ vènh rānrāj vin kăn, êg mĩ. Êg kāmĩ ù ag vin tóg, ag tĩ tĩ apóstolo nĩtĩ jé. Tag pāte tóg ù ag vin, ag tĩ jagnê jykre ki kanhrān kĩ jagnê jyvén jé. Tag pāte tóg ù ag vin, ag tĩ tĩ ti vỹ tó jafā nĩtĩ jé. Kĩ tóg ù ag vin, ag tĩ êg tĩ nén han vānh hyn han jé. Kĩ tóg ù ag vin, ag tĩ ùn kagyga tĩ há' he jé. Kĩ tóg ù ag vin, ag tĩ ù jagāgtān jé. Kĩ tóg ù ag vin, ag tĩ tĩ igreja krēm tĩ pā'i nĩtĩ jé. Kĩ tóg ù ag vin, ag tĩ êg tĩ vènh vỹ ki kagtĩg ki Topê mré vēmén jé. ²⁹ Êg kar pi(jé) tĩ apóstolo nĩtĩ'. Êg kar pi(jé) tĩ vènh jyvén jafā nĩtĩ'. Êg kar pi(jé) tĩ Topê vỹ kāmén jafā nĩtĩ'. Êg kar pi(jé) êg tĩ nén han vānh hyn han tĩ'. ³⁰ Êg kar pi(jé) ùn kagyga tĩ há' he tĩ'. Êg kar pi(jé) êg tĩ vènh vỹ ki kagtĩg tĩ Topê mré vēmén tĩ'. Êg kar pi(jé) vènh vỹ ên mẽ kĩ êg vỹ ki hā tó tĩ'. ³¹ Kĩ Topê mĩ to vỹ mág, ti kuprĩg tĩ nén ù há to ājag tar han jé, ājag kar tĩ jagnê mré rānrāj kăn jé sir.

Ājag tĩ nén han mũ ù tóg há sĩ nĩ, kĩ ù tóg há tāvĩ nĩ gé. Kĩ sóg ājag mĩ nén ù há tāvĩ kāmén sór mũ, ha mẽ.

Vènh kar to há nĩtĩnhĩ

13 Hên ri ke mũn êg tóg êprā ke ag vỹ tĩ hên ri ke tó há nĩtĩgtĩ, Topê tĩ jēnē jafā ag vỹ mré hā. Êg tĩ jarĩn mĩ vènh kar to há tũ nĩtĩn kĩ êg tóg ón kĩ ke nĩ hā ra, êg vỹ tag ti. Êg tĩ vènh kar to há tũ nĩtĩn kĩ êg tóg ón kĩ vỹ há han tĩ, ferro tĩ véké kyr ri ke, sino tĩ kejēn ón kĩ kyr ên ri ke. ² Hên ri ke mũn êg tóg vènh jyvén há han tĩgtĩ. Topê hên ri ke mũn nén ù kar tó tĩ êg mĩ, êprā ke jykre ki kanhró kar êg nĩtĩ hên ri ke mũn. Hên ri ke mũn êg tóg Topê ki rā há han kĩ nĩtĩ, kĩ êg ti vỹ to: “hỹ mĩ vỹ?” he tũ pē nĩgtĩ. Kĩ êg tóg pānónh mĩ: “ha tĩg,” he tĩ, hā ra tóg sir tĩ tĩ. Êg tĩ jarĩn mĩ vènh kar to há tũ nĩtĩn kĩ tóg tĩ ón kĩ ke nĩ. ³ Hên ri ke mũn êg tóg êg tũ vin kăn tĩ, ùn jagtar ag mĩ. Hên ri ke mũn êg tóg ù tĩ Jesus kato tē mũ ag mĩ vènh fēg mũ, ag tĩ êg pũn jé. Êg tĩ jarĩn mĩ vènh kar to há tũ nĩtĩn kĩ tóg êg mĩ nén ù há han ke tũ nĩ.

⁴ Êg tĩ vènh kar to há nĩtĩn kĩ êg tóg vènh kar to fen nĩtĩ. Ag mĩ êg tóg nén há kar han sór mũ. Êg pi(jé) jagnê tũ to én ke mũ'. “Ā kǎfór vỹ tĩ inh nĩ,” henh ke tũ êg tóg nĩ. “Ūn mág vỹ tĩ inh nĩ,” henh ke tũ êg tóg nĩ gé. ⁵ Vènhmỹ mẽ han ke tũ êg tóg nĩ gé, êg tũ tāvĩ hā to jykrén ke tũ êg tóg nĩ gé. “Tĩ hỹn ne ki kanhrān ke tũ pē nĩ,” henh ke tũ êg tóg nĩ gé. Kĩ ù tĩ êg vóg kónān mũ ra êg tóg ti to jũnh ke tũ nĩ gé. ⁶ Êg tĩ vènh jykre pāno ven kỹn pi(jé) êg mĩ sér tĩnh mũ'. Êg tĩ ù tĩ ki hā tó mũ mẽ kĩ tóg êg mĩ sér tĩnh mũ. ⁷ Êg tĩ nén ù jagy vég mũ ra êg pi(jé) to vĩnh ke mũ'. Nén ù kar to êg tóg: “Topê vỹ tag han há nĩ,” henh ke mũ. Tĩ hā ki êg tóg nén ù kar ve sór ke mũ. Vènh kar ki êg fe mág nĩtĩnh mũ, êg tĩ vènh kar to há nĩtĩn kĩ.

⁸ Êg tĩ vènh kar to há nĩtĩ ên vỹ krỹg ja tũ nĩnh mũ. Jāvo êg tĩ jagnê jykre ki vènh kanhrān kĩ jagnê jyvén tĩ ên vỹ

krýg ja ný. Æg tý Æg tý vènh ví ki kagtíg tý Topè mré vémén tí èn vỹ krýg ja ný gé. Æg tý èprā nén ũ ki kanhró nýtí èn kar vỹ krýg ja ný gé. ⁹ Ûri Æg tóg nén sí há ki kanhró nýtí. Nén sí tý Æg tóg jagnè jyvèn tí, Topè tý Æg mý tó tý. Æg pi(jé) ki kanhrān kán kỹ nýtí ver'. ¹⁰ Kānhmar tóg vènh ven ke mũ, ũ tý nén ũ kar ki kanhró kar nĩ èn tí. Kỹ há Æg tóg nén ũ hyn han há tāvĩ han kán ke mũ, kurā èn kã.

¹¹ Æg mog mũ ri ke ti nĩ. Vāsỹ sóg sí ja jēgtí. Kỹ sóg ũn kāsir ag tý nén tó tí èn tó ja nĩgtí gé. Ûn kāsir ag mý ke èn tóg inh mý ke ja nĩgtí gé. Ûn kāsir tý nén to jykrén tí èn to sóg jykrén ja nĩgtí gé. Kejēn sóg sanh há jē sir. Kỹ sóg ũn kāsir jykre tovānh kán ja nĩgtí. Èn ri ke ti nĩ, Æg Senhor kātīg mǎn ke ti. Ki kanhrān kán jé Æg tóg ke mũ, èn kã. ¹² Ûri Æg tóg ve há han tũ nĩgtí ver, Æg Senhor jykre tí, kỹ tóg Æg tý vènh ve jafā ki vènh ve há han tũ ri ke nĩ. Kutý nĩ ve ti nĩ, Æg tý vènh ve jafā ki nén vég mũ ti. Há kỹ Æg tóg ve há han tũ nĩ ver. Kurā èn kã Æg tóg nén kar ve há han kán ke mũ há ra. Æg há vỹ tóg ti venh ke mũ. Ûri Æg tóg sĩn kỹ ti ki kanhró nýtí. Kurā èn kã Æg tóg ki kanhrān kán ke mũ, ti tý Æg ki kanhró kar èn ri ke.

¹³ Há kỹ tag vỹ krýg ja tũ ný, ha mē. Æg tý Topè ki rā mũ vỹ krýg ja tũ ný. Æg tý tí há ki nén ũ kar ve sór mũ vỹ krýg ja tũ ný gé. Æg tý vènh kar to há vỹ krýg ja tũ ný gé. Kỹ nén ũ pir tóg kǎfór nĩ, há vỹ: Æg tý vènh kar to há nĩ, he mũ.

Topè vỹ ā kupríg tý Æg tar han tí, Æg tý jagnè ki rĩr jé

14 Kỹ vènh kar to há nýtĩmnĩ. Kỹ Topè mý to vĩmnĩ gé, ti kupríg tý nén ũ to ājag tar han jé. Tí tý nén ũ to Æg tar han tí ũ vỹ kǎfór nĩ, há vỹ: Æg tý jagnè jykre ki kanhrān kỹ jagnè jyvèn tí, he mũ. ² Æg tý há ra Æg tý vènh ví ki kagtíg ki vémén kỹ Æg pi(jé) èprā ke ag

mý nén ũ tó tí. Topè há mý Æg tó tí, Æg tý tag tó kỹ. Û pi(jé) ki kanhró nĩ, Æg tý vènh ví ki kagtíg ki vémén kỹ. Topè kupríg há tóg Æg krĩn tí, Æg tý vènh ví ki kagtíg èn tó jé. Kỹ Æg tóg ki kagtíg nýtí, Æg tý nén tó mũ ti. ³ Æg tý há ra Æg ví ki jagnè jyvèn kỹ Æg tóg ũ tý mēg mũ kar jyvèn tí sir. Tý Æg tóg jagnè tar han tí, Topè to. Jagnè jyvèn Æg tóg tí, jagnè fe kaj tý Æg tóg tũg' he tí gé, Æg tý jagnè mý Æg ví ki vémén kỹ. ⁴ Û tý Æg tý vènh ví ki kātīg ki vémén mũn vỹ vènhmý tý ũn tar jē sir, Topè to, ũn vémén mũ ti. Û tý Æg ví ki vènh jyvèn tí èn tóg Æg tar han kán mũ sir, Topè to, Æg mré vènh mǎn kỹ nýtí ag kar.

⁵ Inh mýn há tí vè, ājag kar tý Æg tý vènh ví ki kagtíg tý Topè mré vémén há há ra. Ājag kar tý Æg ví ki jagnè jykre to jagnè jyvèn há nýtí ra tóg há ra tag kǎfór nĩ. Kỹ tóg inh mý há kǎfór nĩ vè, ājag tý ke kán mũ ra. Û tý Æg ví ki tó mũ vỹ ũ tý Æg tý vènh ví ki kagtíg ki vémén mũ èn kǎfór nĩ, ũ tý Æg ví ki jagnè jykre to vènh jyvèn tí èn, mýr, ha mē. Kejēn ũ tóg Æg tý vènh ví ki kagtíg ki vémén tí. Kar kỹ ũ tóg tí ví èn mē kỹ Æg ví ki tó mũ sir, ti tý nén tó ja èn tí. Tag vỹ há tí gé. Û tý vènh mǎn kỹ nýtí kar vỹ ki kanhrān kán mũ sir, ti ví tí, kỹ ag tóg tý tar nýtĩnh mũ sir.

⁶ Inh kanhkā', ha vé. Hēn ri ke mũn sóg ājag ki jun kỹ Æg tý vènh ví ki kagtíg ki vémén mũ. Kỹ sóg ājag mý nén ũ há han ke tũ nĩ ha, tý, ājag tý inh ví ki kagtíg nýtĩn kỹ. Jāvo isỹ ājag mý Topè tý inh mý nén tó mũ tý Æg ví ki kāmén kỹ sóg tý ājag tar han mũ sir, isỹ ājag mý sỹ nén to jykrén mũ kāmén kỹ, sỹ ājag jyvèn kỹ, sỹ ājag mý Topè ví ki nén rán kỹ nĩ èn kāmén kỹ. Kỹ sóg tý ājag tar han mu sir, mýr, ha mē, ājag tý inh ví ki kanhrān kỹ.

⁷ Vān tý vākyn jafā to jykrén nĩ, vākyn jafā ũ to ke gé. Ag tý kyn kórég kỹ Æg tóg ki kagtíg nýtí sir, ag tý vākyn mũ ti. ⁸ Kỹ vākyn jafā tý trombeta vỹ ge nĩgtí gé. Ag

tỷ ti kyr mẽ kỷ soldado ag vỹ vênh kân kân tĩ, vênh génh ke to. Ag tỷ tỷ kyn há han tũ nỹtĩn kỷ ag pi (jé) vênh génh ke to vênh kân ke mũ'. ⁹Ge ti nĩ gé, ẽg vỹ ti. Ẽg tỷ ag tỷ ki kagtĩg ẽn tó kỷ ag tóg to jykrén ke tũ nĩ gé, ẽg tỷ nén tó mũ to. Vékẽ ẽg tóg vēmén mũ sir, ẽg tỷ gen kỷ.

¹⁰Vênh vỹ vỹ e nỹtĩ, ga tag kri. Povo kar vỹ vỹmỹ vỹ nĩ he kar nỹtĩ. Ẽg vỹ pẽ ki ẽg tóg vēmén ki kanhró nỹtĩ. ¹¹Kỷ sóg kejẽn hẽ tá ke ù vỹ mễg tĩ. Sỷ ti vỹ ki kagtĩg nĩn kỷ sóg ti jykre ki kanhrân ke tũ nĩ, ùn vỹ mũ ti, kỷ tóg inh jykre ki kanhrân ke tũ nĩ gé. Ge ti nĩ gé, ẽg tỷ vênh vỹ ki kagtĩg ki vēmén kỷ. Kĩ kagtĩg ẽg tóg nỹtĩ sir.

¹²Topẽ kuprĩg tỷ ăjag tar han mũ ve sór ăjag tóg nỹtĩ, nén ù ù to. Kỷ tóg há tĩ. Kỷ hã ra ẽg mré ke ag tar han jafã to ẽn nĩ, ẽn hã to Topẽ mré vĩmnĩ, hã vỹ: ẽg vỹ ki jagnẽ jyvẽn, he mũ.

¹³⁻¹⁴Ẽg tỷ vênh vỹ ki kagtĩg ki Topẽ mré vēmén kỷ ẽg tóg to jykrén kỷ nĩ tũ ra Topẽ mré vēmén tĩ. Kỷ, ă tỷ vênh vỹ ki kagtĩg ki vēmén to tar nĩn kỷ Topẽ mỷ to vĩmnĩ, ti tỷ ă tỷ nén tó ja ẽn ki kanhrân kỷ ẽg mỷ ẽg vỹ ki kãmén to ă tar han jé gé. Kỷ ă tóg: “tag tó ja inh nĩ, tag tó ja inh nĩ,” henh ke mũ gé sir, kỷ tóg há tĩ.

¹⁵Ẽg tỷ to jykrén kỷ nĩ tũ ra Topẽ mré vēmén kỷ tóg há tĩ. Ẽg tỷ hã ra to jykrén kỷ nĩn kỷ ti mỷ vēmén kỷ tóg há tĩ gé. Ẽg tỷ to jykrén kỷ nĩ tũ ra Topẽ mỷ jân kỷ tóg há tĩ. Ẽg tỷ hã ra to jykrén kỷ nĩn kỷ ti mỷ jân kỷ tóg há tĩ gé. Sỷ tag han kân sór vẽ. ¹⁶Ha vẽ, ă tỷ to jykrén kỷ nĩ tũ ra Topẽ to vỹ há han kỷ ă vỹ mễg mũ ag vỹ ki kagtĩg nỹtĩ, ă vỹ ti, ă tỷ ẽg tỷ vênh vỹ ki kagtĩg ki vēmén kỷ. Kỷ tóg ag tỷ ă mré: “hỹ, hã vẽ,” he sór mũ ra tóg vênhmỹ tĩ. “Tĩ ne tó mũ vỹ? Sỷ ki kagtĩg tóg tĩ,” he jé ag tóg ke mũ. ¹⁷Tó há han ă tĩgtĩ, ă tỷ ẽg tỷ vênh vỹ ki kagtĩg ki vēmén kỷ. Hã ra ù tỷ mễg mũ ag vỹ ki kagtĩg nỹtĩ, kỷ ă pi(jé) ag tar han tĩ.

¹⁸Ẽg tỷ vênh vỹ ki kagtĩg ki vēmén to sóg tar pẽ nĩ inhã. To tar nĩn kỷ sóg ăjag kăfór nĩ. ¹⁹Hã ra sóg tag tó sór tũ nĩ, ẽg vênh măn kỷ nỹtĩn kỷ. Hẽn ri ke mũn sóg vênh vỹ tỷ mĩl (ke) han ke mũ, ẽg tỷ vênh vỹ ki kagtĩg ki vēmén kỷ. Hã ra sóg jérĩn mỷ ăjag tar han ke tũ nĩ. Hã kỷ sóg tag tó sór tũ nĩ. Sỷ nén to jykrén mũ hã tó sór inh mũ, kỷ sóg inh vỹ pir tỷ ăjag tar han ke mũ.

²⁰Inh kanhã', to jykrén há han nĩ. Gĩr tỷ nén ù to jykrén tũ ẽn ri ke nỹtĩ sór tũg nĩ. Vênh jykre pãno hã to gĩr tỷ ti ki kagtĩg nĩ ẽn ri ke nỹtĩmnĩ, ăjag tỷ ti kórég han tũ nĩ jé. Nén ù há to jykrén kỷ tóg inh mỷ ăjag tỷ ùn sanh há ag tỷ nén ù to jykrén há ẽn ri ke nỹtĩn há tĩ. ²¹Ve ra, Topẽ vỹ rãn ki tag vỹ rãn kỷ nĩ, ha mẽ. “Inh povo tỷ inh vỹ mẽ jăvãnh nỹtĩn kỷ sóg ag mỷ ùn vỹ ù ag vỹ ki inh vỹ jẽnẽnh ke mũ. Povo tỷ vỹmỹ vỹ ag mỷ sóg: “ha ag mỷ inh vỹ ti tó,” henh ke mũ, “ag vỹ tũ ki hã ra, ù tỷ inh vỹ mẽ jăvãnh ag mỷ,” he jé sóg ke mũ. Hã kỷ ag tóg mẽn ke tũ nĩ, inh povo ti, ag tỷ ag vỹ tũ ki ag mỷ vēmén kỷ,” he tóg, ẽg Senhor ti, Topẽ vỹ rá ki. ²²Hã kỷ tóg tỷ ù tỷ Topẽ ki ge jăvãnh ag tỷ ki kagtĩg han jafã nĩ, ẽg tỷ vênh vỹ ki kagtĩg tỷ vēmén mũ ti. Tĩ ki ge kỷ nỹtĩ ag mỷ ke pijé'. Jăvo ẽg tỷ jagnẽ jykre ki kanhrân kỷ jagnẽ jyvẽn tag vỹ tỷ ti ki ge kỷ nỹtĩ ag tar han jafã nĩ. Tĩ ki ge jăvãnh ag mỷ ke pijé'.

²³Ha vẽ, kejẽn ẽg mré ke ag vỹ vênh măn kân mũ. Kỷ vênh kar tóg hẽn ri ke mũn ẽg tỷ vênh vỹ ki kagtĩg ki vēmén mũ. Kỷ ù tỷ ki kagtĩg tóg venh ke kătĩg mũ, ù tỷ Jesus ki rã ja tũ ti hẽn ri ke mũn. Kỷ tóg ti tỷ ăjag tỷ vênh vỹ ki kagtĩg tag mẽ kỷ tóg ăjag to: “krĩ vênhmỹ ag nỹtĩ,” henh ke mũ sir, ón kỷ. ²⁴Ăjag tỷ ẽg vỹ ki jagnẽ jykre ki kanhrân kỷ jagnẽ jyvẽn kỷ tóg hã ra há tĩ. Kỷ ù tỷ Jesus ki rã tũ vỹ jun mũ, ù tỷ ki kagtĩg. Kỷ tóg ăjag vỹ mẽn mũ, kỷ tóg to jykrén ke mũ sir. Ăjag vỹ to tóg: “hỹ, hã vẽ,” henh ke mũ.

Ti jykre pāno to tóg jykrén ke mū gé.
²⁵ Ti tỹ nén ũ to jykrén mū vỹ vênh ven
 kân ke mū, kỹ tóg ti mỹ e tĩnh mū sir.
 Mũg ke jé tóg ke mū. “Topê vỹ tỹ ũn mág
 nĩ,” he jé tóg ke mū. Kỹ tóg ki kanhró
 nĩnh mū, tó jé tóg ke mū sir, Topê tỹ ājag
 mré nĩ ti.

Culto ki vênh jykre

²⁶ Kỹ ājag vênh măn kỹ tag vỹ há nĩ, ha
 mẽ. Ũ tóg Topê mỹ jân ke mū, ti mỹ can-
 tar ken jé. Ũ tóg Topê vỹ tỹ vênh kanhrân
 kỹ tónh ke mū. Ũ mỹ tóg nén ũ tónh mū,
 Topê ti, ti tỹ tỹ ājag jyvên jé. Ũ tóg ěg tỹ
 vênh vỹ ki kagtĩg ki vēmén ke mū, ũ tóg ti
 vỹ mẽ kỹ ěg vỹ pẽ ki tónh ke mū, ti tỹ nén
 tó mū ěn ti. Há kar ti nĩ, ājag tỹ tag tỹ
 Topê to tar nỹtĩ jé. ²⁷ Ājag tỹ ěg tỹ vênh
 vỹ ki kagtĩg ki vēmén sór kỹ ũn pipir ag
 hã tóg tónh ke mū, hẽn ri ke mũn ũn ré-
 gre, ke tũ nĩn kỹ ũn tăgtũ, jagnê ri ke. Ũ
 tỹ tó kỹ ũ tóg vênh ke tũ nĩ sir. Ũn pir tỹ
 vēmén kỹ tóg há tĩ. Kỹ ũ tóg ti vỹ mẽ kỹ
 ěg vỹ pẽ ki tónh ke mū gé sir, ti tỹ nén
 tó mū ěn ti. ²⁸ Kejên tóg ki tũ nĩ, ũ tỹ ti
 tỹ nén tó mū ěn tỹ ěg vỹ ki tónh ke mū
 ti. Kỹ ěg tóg ěg tỹ vênh vỹ ki kagtĩg tỹ
 vēmén ke tũ nĩ sir, vênh kar rĩnve. Ājag
 ĩn hã tá vēmén nĩ, ěg tỹ vênh vỹ ki kagtĩg
 tỹ. ěn tỹ igreja krêm vēmén tũg nĩ, ěg tỹ
 vênh vỹ ki kagtĩg tỹ, ũ tỹ ti tỹ nén tó mū
 tỹ ěg vỹ ki tónh ke tũ nĩn kỹ.

²⁹ Kỹ tóg ājag tỹ jagnê jykre ki kanhrân
 kỹ ěg vỹ ki jagnê jyvên ken kỹ tóg ge nĩ
 gé, ha mẽ. Ũn régre vỹ tónh ke mū, ke
 tũ nĩn kỹ ũn tăgtũ, jagnê ri kén tón jé.
 Kỹ ag vỹ mẽg mū ag vỹ to jykrén ke mū,
 ag tỹ ti kygnê tũ ve jé. ³⁰ Hã ra hẽn ri ke
 mũn Topê tóg ũ mỹ nén ũ tónh ke mū
 gé. Kỹ ũn vēmén vén mū tóg krỹg henh
 ke mū ver, kỹ ũ tóg ti ri kén tónh mū sir,
 Topê tỹ ti mỹ nén tó ja ti. ³¹ Hã kỹ ājag
 kar vỹ jagnê jyvên ke mū, ājag tỹ jagnê
 ri kén vēmén kỹ. Gen kỹ ājag tóg jagnê
 kanhrân ke mū sir, jagnê krĩ kuprăg ke

ājag tóg mū gé sir. ³² Topê kuprĩg vỹ ěg
 krĩn tĩ, ěg tỹ jagnê jyvên jé. Hã ra ti pi(jé)
 ěg tỹ nén tó sór tũ ra ěg kri gĩnh ke tĩ.
³³ Hã kỹ tóg Topê mỹ há tũ nĩ, ěg tỹ ũ
 vēmén jẽ ra ěg tỹ nén tónh ke mū ěn tó
 sór kỹ. ěg tỹ jagnê tỹ tó kar kỹ ěg tỹ nén
 tónh ke tó kỹ tóg ti mỹ há tĩ, kỹ vênh kar
 tóg jatun mỹ mẽnh ke mū sir, ěg tỹ nén
 tó mū ti. Topê jykre kusan hã vẽ.

³⁴ Topê tũ vỹ tỹ ěg nỹtĩ. Kỹ ũn tỹtá fag
 vỹ vēmén ke tũ nĩ, igreja krêm. Hẽ tá
 igreja krêm fag vỹ jatun nỹtĩgtĩ, ěmă kar
 mĩ, kỹ ājag tóg fag ri ke jatun nỹtĩnh mū
 gé. “Tỹ fag tóg ag krêm ke nỹtĩ,” he ja
 tóg nĩ, Topê ti, hã kỹ fag tóg vēmén ke
 tũ nĩ, igreja krêm. ³⁵ Kỹ fag tóg ājag tỹ
 Topê vỹ ki kanhrân há han tũ nĩn kỹ fag
 tóg ājag ĩn tá ājag mén ki jēmẽn mū,
 ājag tỹ ki kanhrân há han tũ ja ěn ti. ěg
 mỹ'a tóg tĩ, fag tỹ igreja krêm vēmén sór
 kỹ, kỹ ke sór tũg nĩ. ³⁶ Ājag hỹn tag ki
 króm sór tũ nĩ, vэг isóg nĩ nĩ. “ěg hã vỹ
 to jykrén há tăvĩ han tĩ, ěg hã vỹ tó vén,
 vênh kar jo, Topê vỹ ti,” he ājag tóg tĩ, ěg
 kăfór nỹtĩ sór kỹ. Hã ra tóg e nỹtĩ, Jesus
 ki ge mū ag. Tó há han ag tóg tĩ gé. Ag
 mré vênh jykre pir han sórmnĩ.

³⁷ Ājag kāmĩ ũ hỹn: “Topê vỹ inh mré
 vēmén tĩ, ti kuprĩg tỹ inh krĩn tag to sóg
 tar tăvĩ nĩ,” he tĩ. Kỹn hỹn ki kanhró nĩ,
 sỹ ājag mỹ Topê jykre tó mū tag, ājag tỹ
 igreja krêm vênh măn ke to. ěg Senhor tỹ
 ěg mỹ vênh jykre nĩm jan hã vẽ, sỹ ājag
 mỹ rán mū tag ti. ³⁸ Ũ tỹ tag to: “nén ũ
 tũ vẽ,” he mū ra sóg ti to: “nén ũ tũ vỹ
 tỹ ă nĩ,” he mū gé.

³⁹ Inh kanhkă', Topê mỹ to vỹ mág, ti
 kuprĩg tỹ ājag tar han jé, ājag tỹ jagnê
 jykre ve kỹ jagnê jyvên há han jé, ěg vỹ
 ki. Ũ tỹ ěg tỹ vênh vỹ ki kagtĩg ki vēmén
 sór kỹ ti mỹ: “vỹ tũg ra,” he tũg nĩ gé.
⁴⁰ Hã ra ũ vēmén jẽ ra ěg tỹ nén tónh
 ke mū ěn tó sór tũg nĩ. To jykre kusa
 nỹtĩmnĩ.

Jesus rĩr jẽ

15 Inh kanhkã', sỹ ājag mỹ Jesus kãme sér ên tó măn ke vễ, sỹ ājag mỹ tó ja ên ti. Ên kri fig ājag tóg tĩ, kỹ ājag tóg mĩ mũgtĩ. ²Ti vĩ kri nĩm kỹ ājag tóg krenkren ke mũ, ājag tỹ tovãnh tũ nĩn kỹ. Sỹ ājag mỹ nén tó ja ên tỹ tũ' he tũg nĩ, ke tũ nĩ mũ ra ājag tóg véké kri fi ja nĩnh mũ. Kỹ ājag tóg tá nén ù venh ke tũ nĩ gé.

³Sỹ ājag mỹ Topẽ vĩ kãmén kỹ sóg ājag mỹ sỹ nén mễ ja ên hã tó vén ja nĩgtĩ, hã vĩ: Cristo vĩ ěg jagfy ter ja nĩgtĩ, ěg tỹ Topẽ vĩ mranh ja tugrĩn, he mũ. Tag vĩ rãn kỹ nĩ, Topẽ vĩ rá ki. ⁴Kỹ ag tóg vẽnħ kej kãtã ti fi ja nĩgtĩ. Kurã tãgtũ tũg kỹ tóg rĩr măn ja nĩgtĩ gé. Tag vĩ rãn kỹ nĩ gé, Topẽ vĩ rá ki. ⁵Kỹ tóg Pedro mỹ vẽnħ ven, kar kỹ ù tỹ 12 (ke) ag mỹ ke gé. ⁶Kar kỹ tóg ù tỹ 500 (ke) kãfór ag mỹ vẽnħ ven gé, vẽnħ ven pir ki, ag vẽnħ măn kỹ nỹtĩ ên ki. Ên ag kãmĩ ùn pipir ag tóg kãgter ja nĩgtĩ, hã ra ùn e ag tóg ver ěg mré nỹtĩ. ⁷Kar kỹ Tiago tóg ti vé gé, kar kỹ ti tỹ ùn vin mũ kar ag, ke gé, apóstolo kar ên ag. ⁸Kar kỹ sóg vãhã ti vé gé, ag kar nón. Sỹ ti venh ke tũ vễ vễ, sỹ kãnhmar ti ki rã ja tũ nĩn kỹ. ⁹Apóstolo ag krêm ke kar vĩ tỹ inh nĩ. Sỹ tá krỹg ke tũ vễ vễ, sỹ tỹ apóstolo nĩnh ke ti, isỹ Topẽ ki ge kỹ nỹtĩ ag vóg kónãn jan kỹ, fag ke gé. ¹⁰Hã ra Topẽ tóg inh jagãgtãn, hã kỹ tóg isỹ apóstolo han mũ. Kỹ ti pi(jé) fagrĩnh mỹ inh jagãgtãn'. Rãnhřãj mág han inh mỹr, ag rãnhřãj kãfór kar. Hã ra sóg inh pir mỹ han tũ nĩgtĩ. Topẽ hã ne isar han tĩ', inh rãnhřãj to'.

¹¹Hã ra ěg kar tóg Jesus tó tĩ. “Jesus vĩ rĩr jẽ,” he ag tóg tĩ, apóstolo ù ag, kỹ sóg tag tó tĩ gé, ag mré. Kỹ ājag tóg sỹ ti kãmén kỹ inh vĩ kri fig tĩ. ¹²Ěg kar vĩ Cristo tỹ ter kar ti rĩr măn ja ên tó tĩ.

Jesus mré ěg rĩnrĩr măn ke mũ gé

Cristo rĩr măn mũ ra ājag kãmĩ ù tóg ón kỹ: “ěg ter kar kỹ ěg rĩr măn ke tũ nĩ ha,” he tĩ'. Hã tũ vễ. ¹³Ěg tỹ ěg ter kar kỹ rĩr măn ke tũ nĩ hã ra Cristo vĩ rĩr măn ja tũ nĩnh mũ gé vễ vễ. ¹⁴Cristo rĩr măn ja tũ nĩ hã ra ěg tóg fagrĩnh mỹ ājag mỹ ti kãmén ja nĩnh mũ gé vễ vễ. Kỹ ājag tóg fagrĩnh mỹ kri fi ja nĩnh mũ gé vễ vễ. ¹⁵Kỹ ěg tóg Topẽ to ón ja nĩnh mũ gé vễ vễ, ěg tỹ ti to: “Cristo rĩn măn ja tóg nĩ,” hen kỹ. Kỹ ěg kar vĩ ti to ón ja nĩnh mũ vễ. Hã ra tóg Jesus rĩn măn ja nĩ, Topẽ ti.

¹⁶Hỹ, ùn kãgter mũ ag rĩnrĩr măn ke tũ nĩ ra Cristo vĩ rĩr măn ja tũ nĩnh mũ gé vễ vễ, ha mễ. ¹⁷Kỹ Cristo rĩr măn tũ nĩ ra ěg tóg fagrĩnh mỹ ti ki ge ja nĩnh mũ gé vễ vễ. Kỹ ěg tóg Topẽ vĩ mranh ja ên hã ki nỹtĩnh mũ vễ ver, tỹ tũ' he ja tũ ti nĩnh mũ vễ, ti rĩr măn tũ nĩ hã ra. ¹⁸Kỹ ù vễ gé, ha mễ: ti rĩr măn tũ nĩ ra ù tỹ Cristo ki ge kar kỹ kãgter mũ ên ag vĩ nũgme ki văr kãn kỹ nỹtĩnh mũ gé vễ vễ, ha mễ. ¹⁹Hã kỹ tóg vẽnħmỹ tĩ, ājag tỹ: “rĩr măn ke tũ ěg nĩ,” hen kỹ. Cristo pi(jé) ěg tỹ ga kri mũ tag tãvĩ ki rĩr nĩgtĩ'. Kanhkã tá ěg tóg junjun ke mũ. Ke tũ nĩ mũ ra ěg tóg ùn jagãgtar ag kãfór kar nỹtĩnh mũ vễ, ěg tỹ fagrĩnh mỹ Jesus ki rã ja nỹtĩ ra. Hã tũ vễ mỹr.

²⁰Cristo vĩ rĩr măn, ter kar kỹ. Hã vễ. Ùn kãgter kỹ nỹtĩ ag kar kãmĩ ti rĩr măn vén, Cristo ti, hã kỹ ěg tóg rĩnrĩr măn ke mũ gé, ěg tỹ ti ki ge kỹ. ²¹Ùn pir tugrĩn ěg kar vĩ kãgter ke mũ, hã kỹ ěg tóg ùn pir tugnĩn rĩnrĩr măn kãn ke mũ gé, ěg ter kar kỹ. ²²Adão tỹ Topẽ vĩ mranh tugrĩn ěg tóg kãgter kãn ke mũ, ěg tỹ tỹ ti krẽ nỹtĩn kỹ. Rĩ ke ti nĩ, Cristo tugnĩn ěg tóg rĩnrĩr măn kãn ke mũ gé, ěg tỹ ti ki ge kỹ nỹtĩn kỹ.

²³Topẽ tỹ nén to jykrén mũn hã vễ, Cristo tỹ ěg jo rĩr măn tag ti. Hã kỹ tóg rĩr măn vén. Kar kỹ ù tỹ Cristo ki ge kỹ nỹtĩ

ag vỹ rĩnrĩr mǎn ke mũ gé sir, ti kǎtĩg mǎn kỹ. ²⁴⁻²⁵ Kỹ vǎhǎ kurǎ tỹ ěgno vỹ sir. Kurǎ ěn kǎ Jesus vỹ Topẽ mỹ: “ǎ hǎ ne ěg kri ke jẽ ha’,” henh ke mũ, ti panh mỹ. Ủri tóg tỹ pǎi mág nĩ ver, Cristo ti, kỹ tóg pǎi ũ ag vỹ tỹ tũ’ he kǎn mũ, ũn jykre tar kar, ũ tỹ ěg kǎfór nỹtĩ kar. Tỹ tũ’ he kǎn jé tóg ke mũ, hǎ jé tóg ver tỹ pǎi mág nĩ, Cristo ti, ti tỹ ǎ kato tẽgtẽ mũ ag jykre sǎn kǎn jé, ti tỹ ag vỹ tỹ tũ’ he kǎn jé.

²⁶ Ěg tỹ Topẽ vỹ mranh tugrĩn ěg kǎgter kǎn mũ. Hǎ ra tóg tỹ tũ’ henh ke mũ gé, ěg ter mũ tỹ, kỹ ěg ter mǎn ke tũ nĩ ha, kurǎ tỹ ěgno ěn kǎ. Ti tỹ ěg ter mũ tỹ tũ’ henh kỹ tóg há kar nĩ sir. ²⁷ Hỹ, vẽnħ kar vỹ tỹ ti krẽm ke nỹtĩ, ti tỹ ag jykre sǎn kỹ, ti tỹ ũn mág ag vỹ tỹ tũ’ henh kỹ. Vẽnħ kar vỹ tỹ ti krẽm ke nỹtĩ, Cristo krẽm. Hǎ ra ũn pir vỹ tỹ ti krẽm ke tũ nĩ, hǎ vỹ: ũ tỹ vẽnħ kar tỹ ti krẽm ke han ja ěn, he mũ, hǎ vỹ: Topẽ, he mũ. ²⁸ Vẽnħ kar tỹ ti krẽm ke nỹtĩn kỹ, kurǎ ěn kǎ tóg ti krẽm vẽnħ fẽg ke mũ gé, ti kósĩn ti, ǎ panh krẽm, ũ tỹ vẽnħ kar tỹ ti krẽm vin ja ěn krẽm. Kurǎ ěn kǎ Topẽ tóg tỹ vẽnħ kar kri ke jẽnħ mũ, ǎ pir mỹ. Kỹ ũ tóg ti ri ke jẽnħ ke tũ pẽ nĩ.

²⁹ Ěg rĩr mǎn ke tũ nỹtĩ ra ǎjag kǎ ũ tóg fagrĩnh mỹ ũn ter mũ ag jagfỹ vẽnħ kygpenh mũ vỹ. Ag rĩr mǎn tũ ra tóg vẽnħmỹ tĩ vỹ, ǎjag tỹ ag jagfỹ vẽnħ kygpenh ke ti. Hǎ tũ vỹ hǎ ra. Rĩr mǎn jé ěg tóg ke mũ. ³⁰ Hǎ kỹ sóg kurǎ kar ki ti jagy vэг tĩ gé, hǎ ra sóg ag mỹ vẽnħ nenħ tũ nĩgtĩ, ũ tỹ inh vóg kónǎn sór mũ ag mỹ. ³¹ Kurǎ kar ki sóg ter kren’ he tĩgtĩ. Kĩ hǎ sóg tó tĩ, ki kanhró ǎjag nỹtĩ. ǎjag hǎ ki sóg tỹ ũn mág nĩ, Jesus Cristo ki, ěg Senhor ki. ³² Cidade tỹ Ēfeso tá sóg mĩg mré rǎrá ri ke han mỹr, hǎ ra tóg inh mỹ nén ũ há han ke tũ nĩ vỹ, ěg tỹ rĩr mǎn’ he tũ ra. Ũn kǎgter mũ ag rĩnrĩr mǎn ke tũ ra ěg tóg jatun mỹ ěg tỹ nén to én mũ han ke mũ vỹ, ěg tỹ: “mũ nỹ, jẽn jé, kron jé, ěg

hỹn vaj kỹ ter ke mũ,” hen kỹ, Topẽ ki ge tũ ag ri kén ken kỹ. ³³ Hǎ tũ vỹ hǎ ra.

Kygnẽ tũg nĩ. Tag to jykrén nĩ, ha mẽ: ũn vỹ kórég ag vỹ jẽmẽ sór tũg nĩ. Vẽnħ jykre há pǎno han ti tĩ, ag vỹ kórég ti. ³⁴ Krĩ há han ra, tag hǎ ne há nĩ’. Topẽ vỹ mranh tũg nĩ. ǎjag kǎmĩ ũ vỹ Topẽ ki kanhró tũ nỹtĩ ver’. Tag to vẽnħ mỹ en nĩ.

Ěg rĩr mǎn ke to vẽnħ jykre

³⁵ Kỹ ũ tóg to jykrén kỹ inh mỹ: “Topẽ hỹn hẽ ri kenh ke mũ, ti tỹ ũn ter mũ ag rĩnrĩn mǎn jé?” he sór mũ. “Ěg fǎr hỹn hẽ ri kenh ke mũ?” he sór ǎjag hỹn mũ. ³⁶ Krĩ tũ ǎjag nỹtĩ mỹr’. Nén ũ fy jykre vỹ ěg ter ri ke nĩ, ha mẽ. Ěg tỹ krǎn kỹ tóg kugnǎnh tĩ, ti fǎr ti, jǎvo tóg ti kǎtǎ mur mǎn mũ sir. ³⁷ Kỹ ti fy pi(jé) ti fėj ri ke nĩ gé’, ti tỹ han ke ti. Sĩ ti nĩ, trigo fy ti, nén ũ kar fy ti ke gé. ³⁸ Topẽ hǎ ne ti pẽn han mũ’, ti fėj ke gé, ti fej ke gé. Ti hǎ ne to jykrén tĩ’. Kỹ tóg nén kar fy mỹ ti fėj ũ nĩm’, ti fėj ũ nĩm’ he tĩ.

³⁹ Kỹ nén ũ fǎr vỹ ge nĩgtĩ gé. Ti pi(jé) pir nĩ gé’. Ěg fǎr vỹ vyrmỹ nĩ, kar kỹ bi-cho fǎr vỹ vyrmỹ nĩ gé, kar kỹ sēsĩ fǎr vỹ vyrmỹ nĩ gé, jēsĩ fǎr ti, kar kỹ pirǎ fǎr vỹ vyrmỹ nĩ gé.

⁴⁰ Kỹ kanhkǎ tǎn ag vỹ vyrmỹ fǎr nỹtĩ gé, ěprǎ ke ag vỹ vyrmỹ fǎr nỹtĩ gé. Kỹ ěg ve vỹ ge nĩgtĩ gé. Kanhkǎ tá ke ag ve vỹ vyrmỹ nĩ, ěprǎ ke ag ve vỹ vyrmỹ nĩgtĩ gé. ⁴¹ Rǎ jẽngrẽ vỹ vyrmỹ nĩ, kysǎ jẽngrẽ vỹ vyrmỹ nĩ gé, krĩg jẽngrẽ vỹ vyrmỹ nĩ gé. Kỹ krĩg ag vỹ jagnẽ ri ke tũ nỹtĩ gé, ǎjag jẽngrẽ ki.

⁴² Ge ti nĩ, ěg ter kar kỹ ěg rĩr mǎn ke ti. Ter jé ěg tóg ke mũ, kỹ tóg ěg tỹ nén ũ fy krǎn ri ke nĩ sir, ěg fǎr tỹ ga ra rǎ mũ ti. Ěg rĩr mǎn kỹ ěg pi(jé) ter mǎn ke mũ’.

Kejẽn tóg ěg mỹ’a tĩ, ěg ter ke to hǎ. Hǎ ra ěg tóg sĩnvĩ nỹtĩnh mũ, ěg rĩr mǎn kỹ. ⁴³ Krój ěg nỹtĩ. Hǎ ra ěg tóg tar nỹtĩnh mũ, ěg rĩr mǎn kỹ. ⁴⁴ Ủri ěg tóg tỹ ěprǎ

ke nýtĩ, k̃y ẽg fár vỹ tỹ ẽprã ke fár nĩ. Ẽg rĩr măn k̃y ẽg tóg Topẽ kuprĩg jamã tá fár nýtĩnh mũ. Ẽprã ẽg fár nýtĩ, k̃y ẽg tóg tỹ ẽprã ke nýtĩ. K̃y ẽg tóg ẽg tỹ Topẽ kuprĩg jamã tá ẽg fár ù venh ke ki kanhró nýtĩ sir. Ẽprã ke fár ve vén ẽg tĩ. Kar k̃y ẽg tóg Topẽ kuprĩg jamã tá fár ù venh ke mũ, ẽprã ke fár ve kar k̃y. ⁴⁵⁻⁴⁶ Hã k̃y tag tóg rán k̃y nĩ, ha mẽ: “ũn ve ti, Adão ti vỹ rĩr nĩ ja nĩgtĩ. Jãvo ù tỹ ẽgno ti, Cristo ti vỹ ã kuprĩg tỹ nén kar rĩnrĩr han,” he ja tóg nĩgtĩ, Topẽ vĩ rá ki. ⁴⁷ Ũn ve ẽn, Adão ẽn vỹ ga tỹ há (r) nĩ, hã k̃y ti jykre tóg tỹ ẽprã ke jykre nĩ. Cristo vỹ tỹ kanhkã tá ke nĩ. ⁴⁸ Ũn ve vỹ tỹ ẽprã ke nĩ, k̃y ti krẽ kar vỹ tỹ ẽprã ke nýtĩ gé, ti mré. Jãvo Cristo vỹ tỹ kanhkã tá ke nĩ. K̃y ti mré ke kar vỹ tỹ kanhkã tá ke nýtĩ gé, ti mré. ⁴⁹ Ẽprã ke ẽn ve ri ke ẽg nýtĩ, ẽg kar tỹ Adão ve k̃y. K̃y ẽg tóg kanhkã tá ke ẽn ve ri ke nýtĩnh ke mũ gé, ẽg tỹ Cristo ve k̃y, ẽg rĩnrĩr măn ken k̃y.

Jesus kãtĩg măn ken k̃y tóg ẽg kar han măn ke mũ

⁵⁰ Inh kanhkã', s̃y ãjag mỹ tag tó há han sór vẽ, s̃y ki kanhrãn há han k̃y, ha mẽ. Ẽg fár tỹ ẽprã ke tag pi(jé) Topẽ tỹ tỹ ẽg pã'i nĩ venh ke mũ'. Nén ter ke mũ ẽn pi(jé) nén ù ter vãnh tá venh ke mũ'. Topẽ vỹ ẽg han măn ke mũ, ẽg tỹ ve jé.

⁵¹ K̃y sóg ãjag mỹ nén ù tó sór mũ gé, ãjag tỹ mẽ ja tũ ti, ha mẽ. Ẽg kãmĩ ù ag tóg ti jun ke pétẽm mũ, kãgter ke tũ ag tóg nĩ. K̃y Topẽ tóg ẽg kar han măn kãn ke mũ, kurã ẽn kã, ẽg tỹ ti ki ge k̃y nýtĩn k̃y. ⁵² K̃y tóg ẽg tỹ pan ke kar mĩn ke ẽn ri ke nĩnh mũ, ti tỹ ẽg han măn ke ti, trombeta kyr rén kã. Trombeta kyr ẽn vỹ mẽ há tĩnh mũ, k̃y ùn kãgter mũ ag vỹ rĩnrĩr măn kãn ke mũ, ag tỹ kãgter măn ke tũ nĩ jé sir. Ẽn kã tóg ẽg han măn ke mũ gé sir, ẽg tỹ ti jun ke pétẽm mũ ra kãgter ja tũ ra. ⁵³ Ha vé, ti tỹ ẽg fár kókrãnh mũ tag tỹ ù han tũ ra ẽg tóg venh ke tũ nĩnh mũ vẽ, kanhkã ti. Hã k̃y

tóg ẽg fár ter ke mũ tag tỹ ù han ke mũ, ti han măn k̃y, ti ter măn tũ nĩ jé, kókrãnh măn tũ nĩ jé. Kejẽn tóg kenh ke mũ. ⁵⁴ Ẽg fár kókrãnh mũ tag tỹ tóg ù han ke mũ, ti kókrãnh vãnh nĩ jé sir. Ẽg fár ter ke mũ tag tỹ ù han jé tóg ke mũ, ti ter vãnh nĩ jé. Kurã ẽn kã ẽg tóg vãnh rá tag venh ke mũ gé, vãsỹ rán k̃y nĩ tag, hã vỹ: “tũg ti huri, ẽg ter ke mũ ti, ẽg ter pãte rẽg k̃y,” he mũ. “Topẽ vỹ tỹ tũg' hé, ẽg ter ke mũ tỹ. ⁵⁵ Kãgter kãn ja ẽg tóg nĩgtĩ. Hã ra ẽg tóg tag ve măn ke tũ nĩ ha. Nén ù tỹ ã prẽj tỹ ẽg tugtãn tỹ ẽg tén ri ke ti nĩ, ẽg ter ke mũ ti, hã ra Topẽ tóg tỹ tũg' hé,” he tóg, Topẽ vĩ rá ki.

⁵⁶ Topẽ vỹ mranh hã tugrĩn ẽg tóg kãgter tĩ. Nén ù tỹ ẽg tugtãg tĩ prẽj ri ken hã vẽ, hã vỹ: ẽg tỹ Topẽ vỹ mranh, he mũ. Hã ra Jesus tóg tỹ tũg' he kãn, ẽg tỹ Topẽ vỹ mranh tỹ. K̃y tóg nén ù prẽj ẽn tỹ prẽj tũ nĩ ri ke nĩ sir. Ter măn ke tũ ẽg tóg nýtĩ ha, kurã ẽn kã. Topẽ vỹ ẽg jyvẽn tĩ. Ẽg tỹ ti vỹ mranh hã tugnĩn ẽg tóg kãgter kãn ja nĩgtĩ. ⁵⁷ Hã ra Jesus tóg tỹ tũg' hé huri.

Topẽ hã mỹ sóg vỹ há han mũ, ti hã vỹ ẽg tar han tĩ, ẽg tỹ ti vỹ mranh măn tũg jé. Ẽg Senhor tỹ Jesus Cristo tugrĩn tóg ẽg tar han tĩ, Topẽ ti.

⁵⁸ Tag to jykrén k̃y tar nýtĩmnĩ, Topẽ to, ãjag tỹ ti ki rã tovãnh tũ nĩ jé. ãjag to sóg há tãvĩ nĩ, inh kanhkã'. Ẽg Senhor rãnhràj han kãn sórmnĩ. Tag to jykrén nĩ, ha mẽ: ẽg pi(jé) véké rãnhràj tĩgtĩ', ẽg tỹ ẽg Senhor rãnhràj han k̃y'. Ti kaja ve jé ẽg tóg ke mũ mỹr, kanhkã tá.

Ẽg tỹ ẽg mré Jesus ki ge k̃y nýtĩ ag jagãgtãn ke

16 K̃y sóg ãjag mỹ ãjag tỹ ù tỹ Topẽ ki ge k̃y nýtĩ ra jagãgtar nýtĩ ag mỹ jãnkamy jẽnẽnh ke ẽn tó sór mũ gé sir, ãjag tỹ inh ki nén jẽmẽ sór mũ ti. Ga tỹ Galácia tá igreja krẽm vãnh măn tĩ ag mỹ sóg tag tó ja nĩ, s̃y ãjag mỹ tónh ke tag ti, ha mẽ. ² Domingo kar ki nén ù sĩ

tỹ vurmỹ nĩmĩ, ājag ĩn tá. Ũ tỹ nén ũ mág ěn tóg nén ũ mág sĩ tỹ vurmỹ nĩm ke mũ gé, kỹ ũ tỹ nén ũ sĩ ěn tóg nén ũ sĩ tỹ vurmỹ nĩm ke mũ gé. Ājag tỹ semana kar ki nĩm han kỹ tóg komēr hã mág mũ sir. Kỹ tóg kar kỹ nĩ, sỹ ājag ki jun mũ ra. Ājag tỹ inh kătĩg ken jo vyr mỹ nĩm han ja tũ nĩn kỹ tóg há tũ nỹ. ³Kỹ ũn kuprêg nĩ gé, ag tỹ ājag tỹ nén ũ ma mũ jé, Jerusalém ra, ājag tỹ tá ke fag mỹ nén ven sór mũ ti. Inh jun kỹ sóg ag jêgnênh ke mũ, carta mré hã. ⁴Ājag tỹ nén ũ ěn éhé nĩn kỹ sóg hên ri ke mũn ma tĩg sór mũ gé, kỹ sóg ag mré tĩg mũ gé.

Paulo tỹ nén han sór mũ

⁵Kỹ tóg, isỹ ga tỹ Macedônia mĩ kutênh ken kỹ sóg vãhã ājag tá jun sór mũ sir. Isỹ Macedônia mĩ kutê sór vê. ⁶Hã ra sóg ājag mré nĩg mág sĩ han sór mũ, ti tỹ inh mỹ ki króm ken kỹ. Hên ri ke mũn sóg prỹg kusa fĩn rãm ke mũ, ājag mré nĩ ki, kỹ ājag tóg sir inh jagăgtãn kenh ke mũ, isỹ kar hên ra tĩg ken kỹ. ⁷Inh pi(jé) ājag ve sĩ han sór mũ, hã ra sóg ver kutar nĩ, hã kỹ sóg kar hã ājag venh tĩg sór mũ. Sỹ ājag mré nĩ sór vê mỹr, ěg Senhor tỹ to há nĩn kỹ. ⁸Ver sóg cidade tỹ Éfeso tag kã nĩ ki festa tỹ Pentecoste pétêm sór mũ. ⁹Tag ki ke ag tóg mē há han mũ, inh vĩ ti, ũ tỹ hên ri ke ag. Hã ra tag ki ver ũ tỹ inh kato vāsân-sân mũ ag vĩ e nỹtĩ. Hã kỹ sóg Éfeso tag kã nĩg mág sĩ han sór mũ, sỹ kar ājag venh tĩg jé.

¹⁰Hên ri ke mũn Timóteo tóg ājag ki jun ke mũ. Kỹ ti vĩ jēmē há han nĩ, ti mỹ'ăg tũ nĩ jé, ti tỹ ājag mré nĩn kỹ. Ěg Senhor rãnhraj han tóg tĩ mỹr, inh kóm. ¹¹Kỹ ti to é he tũg nĩ, ti kyrũ hã ra. Kỹ ti tĩg ken kỹ ti jagăgtãn nĩ gé, ti tỹ jatun mỹ inh ki jun jé. Sỹ ti jãvãnh vê, ěg régre ag mré hã.

¹²Ěg régre tỹ Apolo mré sóg vēmén gé. Tĩ mỹ sóg to vĩ mũ vê, ti tỹ ājag venh tĩg jé, ěg régre tag ag mré hã, ũ tỹ ājag venh

kãmũ tag ag mré. Hã ra tóg tĩg jãvãnh nĩ ver. Tĩ tỹ ti mỹ ki króm ken kỹ ti nējĩ kejên ājag venh tĩg ke mũ hã ra.

Jesus ki ge kỹ nỹtĩ ag tỹ jagnê mĩ êkrén

¹³Ājag kanē fãn nĩ. Ěg Senhor ki rã tovãnh tũg nĩ. Krónh ke tũg nĩ, tar nỹtĩmĩ. ¹⁴Kỹ ājag tỹ nén ũ kar han kỹ vênh kar to há nỹtĩmĩ.

¹⁵Kỹ sóg ājag mỹ nén ũ to vĩ sór mũ gé, Estéfanos to mỹr. Estéfanos fag vĩ Jesus ki ge vén ja nĩgtĩ, ājag jamã tá, ga tỹ Grécia tag tá. Kỹ fag tóg Topê tũ fag ki rĩr nỹtĩgtĩ, Topê tũ fag kar ki. ¹⁶Hã kỹ sóg fag tó mũ ājag mỹ. Kỹ fag vĩ jēmēmĩ. Kỹ Topê rãnhraj han mũ ag kar vĩ jēmē kãn nĩ, ke gé, ěg mré rãnhraj mũ ag kar vĩ ti.

¹⁷Estéfanos tóg inh ki jun há han, Fortunato ke gé, Acaico ke gé. Ag tỹ inh ki junjun kỹ inh fe tóg mrin ke mũ mỹr. Sỹ ājag venh há tĩn kỹ tóg inh mỹ sér pē tĩ, sỹ ag ve kỹ, ājag jêgja kã ke vê mỹr, ag tỹ tỹ ājag mré ke nỹtĩn kỹ. ¹⁸Inh mỹ ag tóg vĩ há han mũ ājag to, kỹ ag tóg inh krĩ kusăg mũ sir. Ag tỹ ājag krĩ kusăg ke vê gé. Ũ tỹ ge to há tăvĩ nỹtĩmĩ.

¹⁹Ga tỹ Āsia tá igreja krēm vênhmãn tĩ ag vĩ ājag mĩ êkrég tĩ. Kỹ Áquila mré Priscila fag vĩ ājag mĩ êkrén mág tĩ gé, fag tỹ ājag mré ěg Senhor ki ge kỹ nỹtĩn kỹ. Fag ĩn krēm fag tóg culto han tĩ. Fag ĩn tá culto to kãmũ fag vĩ ājag mĩ êkrég tĩ gé, ²⁰kar kỹ ěg Senhor ki ge kỹ nỹtĩ fag kar ke gé. Jagnê to há tăvĩ nỹtĩmĩ, kỹ jagnê ki nhun ke ri ke han nĩ, Jesus mré ke kar ki, ājag tỹ jagnê nĩg kăgmĩ kỹ.

²¹Sỹ vãhã vêsóg ki ājag mỹ rãn vê, ũ tỹ inh vĩ rãn ja pãte, inh, hã vĩ: Paulo, he mũ. ²²Topê mỹ sóg to vĩ tĩ, ti tỹ ũ tỹ ěg Senhor to há tăvĩ tũ ěn ag vóg kónãn kãn jé. “Marana tá,” he sóg tĩ, hã vĩ: ha kătĩg, Senhor, he mũ, ājag vĩ ki.

²³ Ëg Senhor tỹ Jesus mỹ sóg to vĩ tĩ, Hã vễ.
ti tỹ ãjag tar han jé. ²⁴ ãjag jé isỹ ãjag to
há tãvĩ nĩ ki kanhrân, ãg tỹ Jesus Cristo
ki ge kỹ nỹtĩn kỹ.

PAULO TỠ CARTA HAN: CORINTO TÁ KE AG MỠ CARTA Ỡ

1 Paulo tỠ rá vễ, ẽg rẻgre tỠ Timóteo mrẻ. Jesus Cristo hỏ ne inh fẻg', isỠ tỠ ti apỏstolo jẻ jẻ, Topẻ tỠ inh kuprẻg kỠ. IsỠ Topẻ tỠ ag mỠ rỏn vẻ, ỳ tỠ cidade tỠ Corinto tá vẻnh mỏn tỠ ag mỠ, ỳ tỠ Grẻcia tá vẻnhmỏn tỠ ag mỠ ke gẻ. ² Ẽg jỏg tỠ Topẻ jẻ ỏjag tar han, tỠ jẻ ỏjag krỏ kuprỏg, ẽg Senhor tỠ Jesus Cristo ti ke gẻ.

Topẻ tỠ Paulo krỏ tỠ kỏnhvỳ' he

³ Topẻ mỠ sỏg vỠ há han tỠ, ẽg Senhor tỠ Jesus Cristo panh ti mỠ, ẽg jỏg mỠ, ỳ tỠ ẽg jagỏgtỏn tỠ ẻn mỠ. Ẽg vẻsỠrẻnh kỠ tỏg ẽg krỏ tỠ kỏnhvỳ' he tỠ, Topẻ ti. Ti hỏ mỠ sỏg agradecer he tỠ mỠr. ⁴ Ti hỏ ne inh vẻsỠrẻnh mỠ ra inh krỏ tỠ kỏnhvỳ' he tỠ, inh jagtar tỠn kỠ. Ti tỠ inh krỏ tỠ kỏnhvỳ' he tugrỏn sỏg inh kỏnhkỏ ag krỏ tỠ kỏnhvỳ' he ki kỏnhró nỠ ha, inh kỏnhkỏ ỳ tỠ nẻn ỳ jagy vẻg mỠ ra. ⁵ Cristo jagtar ja ẻn ri ke pẻ ve mỏg sỏg mỠr, hỏ kỠ Cristo tỏg inh krỏ kufy tỠ hẻn ri ke tỠ tỠ' he tỠ gẻ sir. ⁶ Hỏ ra sỏg ỏjag jagfy jagtar nỠ, ỏjag tỠ ti hỏ to tar nỠtỠn jẻ gẻ, ỏjag krenkren jẻ. Topẻ tỠ isar han kỠ tỏg inh kỏm ỏjag tar han ke mỠ gẻ sir. ỏjag tỠ inh kỏm jagtar nỠtỠn kỠ ỏjag tỏg inh kỏm ti to krỏnh kỏnh ke tỠ nỠ gẻ sir. ⁷ ỏjag ki ẻkrẻn mỏg sỏg tỠ, hỏ ra sỏg ki kỏnhró nỠ, Topẻ tỠ ỏjag tar han ẻn ki. Ỡri ỏjag tỏg hỏ ra inh mrẻ jagtar nỠtỠ, hỏ kỠ Topẻ tỏg ỏjag krỏ tỠ kỏnhvỳ' he tỠ gẻ, ti tỠ inh krỏ tỠ kỏnhvỳ' he tỠ ẻn ri ke han tỏg tỠ, ỏjag mỠ.

⁸ Inh kỏnhkỏ', ỏjag mỠ sỏg inh jagtar mỏg ja tỏ sỏr mỠ. Ga tỠ ỏsỏa tá sỏg nẻn ỳ jagy tỏvỠ ve ja nỠ, tá ag tỏg isỠ hẻn ri ke kren, kỠ sỏg: "ỳri inh hỠn kren mỏn ke tỠ nỠ ha," he ja nỠ. ⁹ "Ag tỠ isỠ tỳg' hẻnh ke hỠn," he sỏg mỠ vẻ. ẻn kỏ sỏg Topẻ hỏ

mỠ ẻkrẻg mỠ sir, isỠ vẻnhmỠ kren mỏn ke tỠ nỠn kỠ. "Ti hỏ ne inh kren han ki kỏnhró nỠ," he ja inh nỠ. "Ỡn kỏgtẻr mỠ ag rỏnrỏn mỏn ki kỏnhró tỏg nỠ, kỠ tỏg inh kren han ki kỏnhró nỠ gẻ," he ja inh nỠ. ¹⁰ KỠ tỏg inh kren han ja nỠ, isẻr kren mỠ ẻn kỏ, kỠ tỏg kejẻn inh kren han mỏn ke mỠ gẻ. Ti hỏ mỠ sỏg to vỠ tỠ, ti hỏ tỠ inh kren han jẻ. ¹¹ KỠ iso vỏsỏn nỠ gẻ, iso Topẻ mrẻ vỠ kỠ, kỠ Topẻ tỏg ỏjag vỠ mẻnh mỠ. Ti tỠ ỏjag vỠ mẻ tugrỏn inh jagỏgtỏn kỠ ỏjag tỏg ti mỠ agradecer hẻnh ke mỠ. KỠ ỳ tỠ hẻn ri ke ag vỠ Topẻ mỠ vỠ há han ke mỠ, ti tỠ inh jagỏgtỏn ke tugrỏn.

Paulo tỠ Corinto tá ke ag vẻnh kỏtỠg ja tỠ

¹² Ha vẻ, inh jykre tỏg tỠ ỳn há nỠ, ki kỏnhró inh nỠ. Vẻnh kar mỠ sỏg nẻn ỳ há há han tỠ, vẻnh jykre kuryj, kỠ sỏg ki há tỏ tỠ gẻ, Topẻ jykre han kỠ. Inh pi(jẻ) isỠ vẻsỏg ki nẻn to jykrẻn mỠ ẻn há han tỠ'. Topẻ hỏ ne isar han tỠ', isỠ ti jykre ki krỏm jẻ. KỠ sỏg ỏjag mỠ ti jykre hỏ kỏmẻn ja nỠgtỠ gẻ. ¹³ Tag hỏ rỏn isỏg tỠ gẻ, kỠ ỏjag tỏg isỠ rá ve kỠ (ỏjag tỏg) ki kỏnhrỏn ke mỠ gẻ sir. Ti pi(jẻ) mẻ jagy tỠ'. ỏjag tỠ ki kỏnhrỏn kỏn kỠ tỏg há tỠnh mỠ. ¹⁴ ỏjag tỠ ki kỏnhrỏn sỠ tag kỏfỏr han kỠ tỏg há tỠnh mỠ. KỠ kurỏ ẻn kỏ, ẽg Senhor tỠ Jesus kurỏ ẻn kỏ tỏg ỏjag mỠ sẻr tỠnh ke mỠ, ỏjag tỠ inh ven kỠ. KỠ tỏg inh mỠ sẻr tỠnh ke mỠ gẻ, isỠ ỏjag ven kỠ.

¹⁵ Tag to jykrẻn kỠ sỏg ỏjag ki jun kren ja nỠgtỠ. IsỠ ỏjag ki jun ke vẻ vẻ, isỠ ỏjag tar han jẻ. IsỠ vỏsỠ ỏjag tar han ja ẻn ri ke han mỏn ke vẻ vẻ. ¹⁶ KỠ sỏg ỏjag ve kar kỠ (sỏg) ga tỠ Macedỏnia ra tỠg ke mỠ vẻ. Kar kỠ, isỠ Macedỏnia tá kỏtỠg mỏn kỠ sỏg ỏjag ve mỏn ke mỠ vẻ gẻ, ỏjag tỠ inh jagỏgtỏn kỠ inh mỠ jỏnkamy nỠmỏn' he jẻ vẻ vẻ, isỠ ga tỠ Judẻa ra tỠg há han ke to. ¹⁷ Hỏ ra tỏg inh mỠ ki krov ja tỠ nỠ, hỏ kỠ sỏg kỏtỠg ja tỠ nỠ. KỠ inh mỠ kỏnhir kỠ ỏjag mỠ: "kỏtỠg jẻ sỏg ke mỠ," he ja

nĩ? Vó. Inh jykre pijé', isy kanhir k̄y tó tĩ ěn ti. K̄y sóg jykre régre han tũ nĩgtĩ gé. Ũn jykre régre ag t̄y: "hej," he mũ ra ag tóg han sór tũ nĩ. Ge tũ inh nĩgtĩ. ¹⁸Topê hã ne ón vánh nĩ, hã ra tóg ki kanhró nĩ, inh jykre pĩr nĩ ti. ¹⁹Topê kósĩn jykre hã han sóg tĩ, Jesus Cristo jykre ti. Inh hã ne ājag m̄y ti kāmĩn ja nĩ, Silas mré, Timóteo mré ke gé. Ti pi(jé) ā t̄y: "hej," he mũ ra han ke tũ nĩ. Han ti tĩ, nén ũ kar ti, Topê kósĩn ti. ²⁰Topê hã v̄y ěg m̄y ěg t̄y nén vėnh ke ti tó ja nĩgtĩ, k̄y ěg tóg ti kósĩn hã tugrĩn vėg mũ sir, ti panh t̄y ěg m̄y nén tó mũ ěn ti. Hã tó sóg tĩ, vėnh kar m̄y, Topê ón vánh ěn hã tó sóg tĩ. K̄y ěg tóg ti hã m̄y v̄i há han tĩ sir, Topê hã m̄y, ěg t̄y ti t̄y ěg m̄y nén tó mũ ěn to: "hã vė," hen k̄y. ²¹Topê hã ne Cristo ki isar han, ājag mré hã. K̄y tóg ěg kuprėg gé. ²²K̄y tóg ěg nĩḡjėg k̄y ěg vin tĩ gé. Ā kuprĩg jėnėg tóg mũ ěg m̄y. Ti t̄y ěg m̄y ā kuprĩg jėnė tugrĩn ěg tóg ki kanhró n̄tĩ, ti t̄y ěg m̄y nén ũ kar vin ke mũ ěn ti.

²³Ha vé, ki hã sóg tó mũ, Topê ne ki kanhró nĩ. Inh ón tĩ nĩ ra tóg inh vóg kónān mũ vė. Isy ājag to jũ tũ nĩ jė, hã jė sóg ājag tá jun ja tũ nĩ ver, cidade t̄y Corinto tá. S̄y tá jun ra sóg ājag to jũnh ke mũ vė. ²⁴Inh pi(jé) ājag to tar han sór mũ. Jesus hã ki ge k̄y ājag n̄tĩ, ti hã to tar ājag n̄tĩ. Ājag fe t̄y m̄rin ke han sór sóg mũ vė, hã jė sóg ājag to vāsān tĩ vė.

2 Hã k̄y sóg tag to jykrén ja nĩ, ha mē: "ag kanē jun m̄an sór tũ inh nĩ," he sóg, "hã k̄y sóg ag venh t̄ig ke tũ nĩ ver," he sóg ājag to. ²Ha mē, isy ājag kanē jun k̄y ũ n̄y h̄yn inh fe t̄y m̄rin kenh mũ? Isy ājag kanē jun k̄y ũ t̄y inh fe t̄y m̄rin kenh ke tóg tũ tĩ. ³Hã k̄y sóg ājag m̄y vėnh rá ěn jėnė gé, ājag t̄y inh kanē jun tũ n̄n jė gé, s̄y ājag ki jun k̄y. Inh jun k̄y tóg inh m̄y há t̄inh mũ, ājag t̄y inh fe t̄y m̄rin ken k̄y. Tag to sóg jykrén tĩ gé, ha mē. "Ag t̄y inh fe t̄y m̄rin ke k̄y tóg h̄yn ag m̄y sér tĩ gé," he sóg tĩ, ājag to. ⁴S̄y ājag m̄y carta ěn rán m̄un k̄y sóg to f̄y mág m̄y, ājag

tugrĩn sóg kanē jur, ājag tugrĩn sóg vėnh m̄y en. Inh pi(jé) ājag kanē jun sór ja nĩ. Isy ājag to há pē n̄n k̄y sóg ājag m̄y vėnh rá ěn han ja n̄gtĩ, ājag t̄y isy ājag to há nĩ tag ki kanhró n̄t̄in jė.

Ěg t̄y jagnē m̄y vėnh pāte fón ke

⁵Ha mē, ājag kāmĩ ũ tóg ājag kanē jur han ja nĩ. Ti pi(jé) isavĩn kanē jun ja nĩ. Ājag kar kanē jun ja tóg nĩ. Hēn ri ke m̄un sóg tó há han ja tũ nĩ, isy: "ājag kar," he k̄y. Ājag kāmĩ ũn e kanē jun-jur han tóg hã ra, ti t̄y Topê v̄i m̄ranh tugrĩn. ⁶K̄y ājag tóg hur ti m̄y v̄i kónān. Ha ti tovānh, gen k̄y. ⁷Vāhã ti m̄y vėnh pāte fón nĩ, ti m̄y vėnh v̄i há hã tómnĩ. Ke tũ nĩ (mũ) ra ti fe kaj tóg ti tén ke mũ, ha vemnĩ. ⁸Hã k̄y sóg ājag m̄y tag to v̄i sór mũ vāhã, ha mē: ti m̄y ven nĩ, ājag t̄y ti to há n̄t̄i ti. ⁹Isy ājag t̄y inh v̄i kri fig mũ ěn ve sór ja vė, hã jė sóg ājag m̄y vėnh rá ěn jėnė ja nĩ, m̄y, ha mē. ¹⁰Ājag t̄y ũ m̄y vėnh pāte fón k̄y sóg ti m̄y vėnh pāte fón tĩ gé. Kejėn sóg vėnh pāte fón tĩ, ũ m̄y. K̄y sóg Cristo rĩnve ti m̄y vėnh pāte fón tĩ, ājag jagāgtān k̄y. ¹¹Satanás t̄y ěg t̄y hē ri ke tũ n̄n jė sóg vėnh pāte fón tĩ. Ti t̄y nén to jykrén mũ ěn ki kanhró ěg tóg nĩ m̄y, Satanás t̄y nén to jykrén mũ ti.

Paulo krĩ kufy

¹²Ha vé, isy cidade t̄y Trôade tá jun ja n̄n k̄y sóg tá ke ag m̄y Cristo kāmē sér ěn tó ja n̄gtĩ. K̄y ag tóg jēmē há han ja n̄gtĩ, ěg Senhor t̄y ag krĩn k̄y. ¹³Hã ra sóg ěg mré ke t̄y Tito ve ja tũ nĩ tá. Isy tá ti venh ke vė vė, hã ra tóg ki tũ nĩ, isy tá jun mũ ra. Hã k̄y sóg ti to krĩ kufy nĩ ja n̄gtĩ. Hã k̄y sóg ag m̄y: "is̄ig ke vė," he k̄y t̄ig ja nĩ sir, ga t̄y Macedônia ra, ti nón.

Jesus v̄i t̄y nén ger há ri ke nĩ

¹⁴Hã ra sóg Topê hã m̄y v̄i há han tĩ. Ti hã ne inh jėnėg t̄i, isy ěmā kar m̄i t̄ig

jé, Cristo tigrin. Kĩ vènh kar tóg ti tĩ tĩ ùn mág pè nĩ hã vég tĩ, ag tĩ inh jykre jagma êvánh kĩ. Hã kĩ vènh kar tóg ti ki kanhrân mũ sir, isỹ ag mỹ ti tón kĩ. Kĩ tóg ag mỹ nén ger há kri nĩ nĩ, ag tĩ ti vĩ mên kĩ. ¹⁵Nén ger há tóg vènh kar kri rùm ke tĩ. Rì ke ti nĩ, isỹ vènh kar mỹ Cristo kāmén kĩ, ag tĩ Topê ki kanhrân jé. Vènh kar mỹ sóg ti vĩ tó tĩ, ùn krenkren mũ ag mỹ, ùn vágfor kĩ nĩti ag mỹ ke gé. ¹⁶ Ùn vágfor kĩ nĩti ag tĩ inh vĩ męg mũ ra kri fig tũ nĩn kĩ ag tóg nũgme ki vár ke mũ. Kĩ inh vĩ tóg ag mỹ nén ù ter ger gy ên ri ke nĩ. Ag jãvo ùn krenkren mũ ag tĩ inh vĩ jēmē kĩ ag tóg rĩnrĩr ke mũ, ag tĩ inh vĩ kri nĩm kĩ. Kĩ inh vĩ tóg ag mỹ ãg tĩ nén ger há mē kĩ ãg fe tĩ mrin ke ên kri nĩ nĩ. Hã ra ãg pi(jé) vēsóg ki vènh rānhraj tag han há nĩtĩgtĩ. ¹⁷ Ha vé, ù ag vỹ Topê vĩ kāmén to ti kaja ve sór tĩ, jānkamy ve sór to ag tóg Topê vĩ kāmén tĩ. Ke tũ nĩ kĩ ag tóg ti vĩ tó ên tigrin vēsỹ ùn mág han tĩ. Ag jãvo inh pi(jé) ti kaja ve sór tĩ, inh pi(jé) vēsỹ ùn mág han sór mũ. Cristo ki rā kĩ sóg Topê rĩnve ti kāmén tĩ. Jykre pir han sóg tĩ gé mỹr. Kĩ ù tĩ inh jēnēg mũ vỹ tĩ Topê ti nĩ.

Vènh jykre tãg

3 Kĩ ājag hĩn iso: “tĩ sóg ùn há nĩ, he tóg tĩ, Paulo ti,” he sór tĩ. Hã tũ vè. Ù ag tóg ājag mỹ carta to vĩ tĩ, kĩ ag tóg: “ùn há vỹ tĩ ti nĩ, hemnĩ iso, carta ki,” he tĩ, “kĩ vènh kar tóg vènh rá tag ve kĩ isỹ tĩ ùn há nĩ ki kanhró nĩtĩnh mũ,” he ag tóg tĩ. Inh pi(jé) carta tĩ ge ma tĩg sór mũ. ² Inh mỹ ājag tóg carta ri ke nĩti. Ājag mĩ sóg ēkrég tĩ, kĩ sóg vènh kar mỹ ājag kāmén tĩ. Inh hã ki ag tóg ājag jykre há vég tĩ, kĩ ag tóg isỹ tĩ ùn há nĩ ên ki kanhrân mũ sir. Hã ki ājag tóg carta ri ke nĩti. ³ Ājag mỹ sóg Cristo jykre kāmén ja nĩ, kĩ ājag tóg mĩ mũgtĩ. Kĩ vènh kar tóg ājag jykre ve kĩ (ag tóg) Cristo ki kanhró nĩti, kĩ ājag tóg tĩ Cristo tĩ vènh rá ri ke

nĩti, sỹ carta han ja ri ke. Hã ra ti pi(jé) caneta tĩ rán kĩ nĩ. Topê kuprĩg tĩ tóg rán kĩ nĩ, ùn rĩr nĩ ên kuprĩg tĩ tóg rán kĩ nĩ, carta ên ti. Kĩ tóg pó tĩ rán jafā kri rán kĩ nĩ tũ nĩ gé. Ēg ki tóg rán kĩ nĩ, kĩ tóg tĩ ãg jykre nĩ sir, carta ri ke ên ti.

⁴ Topê hã vỹ Cristo tĩ isar han tĩ, hã kĩ sóg ājag ki carta tĩ ge han ki kanhró nĩ. ⁵ Inh pi(jé) vēsóg ki nén ù há to jykren ki kanhró nĩ. Inh pi(jé) vēsóg ki nén ù há han ki kanhró nĩ gé. Hỹ, Topê hã ne isar han tĩ, isỹ nén ù há han ke to. ⁶ Ti hã ne inh krĩn tĩ, isỹ ti jykre tãg kāmén jé, vènh kar mỹ. Ti pi(jé) ãg mỹ vāsỹ nén rán kĩ nĩ ên tó mán mũ. Vāhã tóg ãg mỹ ā kuprĩg jēnēg mũ. Vènh jykre tãg to ken hã vè, hã vỹ: “Topê kuprĩg tĩ ãg krĩn mũ,” he mũ. Ha vé, Topê kuprĩg vỹ ãg rĩn tĩ, jãvo vāsỹ Topê vĩ rán kĩ nĩ ên vỹ ãg tén ke ja nĩgtĩ, ãg tĩ mranh kĩ.

⁷ Topê vĩ tĩ vāsỹ rán kĩ nĩ ja ên vỹ pó kri rán kĩ nĩ ja nĩ, ù tĩ ãg tén mũ ên ti. Moisés tóg pó kri ti rán ja nĩ, Topê tĩ ti mỹ tón kĩ. Ti tĩ ti mỹ tó kar kĩ ti kakā tóg jēngre nĩ ja nĩgtĩ, Moisés ti. Kĩ tóg Israel ag mỹ e ja tĩ, Moisés kakā ki êvánh tũ ja ag tóg nĩgtĩ sir, ti tĩ kakā jēngre nĩn kĩ. Hã ra tóg kejēn tũ he ja nĩgtĩ gé, ti kakā jēngre ti. ⁸ Kĩ ù tĩ Topê kuprĩg kāmén mũ ên hĩn tóg Moisés kakā jēngre káfór nĩ, ti sĩnvĩ káfór ti nĩ. ⁹ Moisés vỹ Topê tĩ ãg vóg kónān ke ên tó ja nĩgtĩ. Hã ra Topê vĩ tag tóg ti kakā jēngre han, ti sĩnvĩ han ti. Jãvo sóg Topê tĩ ãg mỹ vènh pāte fón ke ên há tó tĩ. Ti tĩ ãg to “jykre há ag nĩti ha,” he mũ ên tó sóg tĩ. Topê vĩ tag tigrin sóg Moisés sĩnvĩ káfór pè nĩ. ¹⁰ Kĩ vāsỹ nén sĩnvĩ ên tóg vāhã ãg mỹ sĩnvĩ tũ nĩ ha, vāsỹ jēngre ên tóg ãg mỹ jēngre tũ nĩ ha, ãg tĩ ù tãg tag sĩnvĩ ve kĩ, ãg tĩ ù tãg jēngre ven kĩ. Ùn tãg tag vỹ nén kar sĩnvĩ káfór nĩ. ¹¹ Vāsỹ rán kĩ nĩ ja ên tóg tũ he ja nĩ. Kĩ ù tĩ tũ he mũ ên tóg sĩnvĩ ja nĩgtĩ gé. Ti jãvo isỹ vènh jykre tó mũ tag vỹ tũ henh ke tũ pè nĩ, hã kĩ tóg ùn si sĩnvĩ ên káfór nĩ.

¹² Ëg tỹ tag venh ke jāvānh sóg mũ mỹr. Hã kỹ sóg jamā hár(a) tó mũ, inh pi(jé) sỹ ag mỹ tó jé to mỹ'ag mũ'. ¹³ Moisés ri ke han tũ sóg nĩ. Kur tỹ tóg vênh kri fón ja nĩ. Kỹ tóg vênh pugrĩn ja nĩ, ti tỹ ā kakā jēngrē ěn péju jé. Hã ra tóg komēr hã tũ' he ja nĩ, ti jēngrē ěn ti. Hã kỹ tóg kur krēm vênh péju, Moisés ti, Israel ag tỹ ti jēngrē vég tũ nĩ jé. ¹⁴ Hã ra ag tóg ũri ki kagtĩg nỹti gé ver. Kyvó ri ke ag nỹti, kutu, Israel ag. Ag tỹ vāsỹ rán kỹ nĩ ěn to ken kỹ tóg ag mỹ Moisés vênh pugrĩn kỹ nĩ ěn ri ke nĩ, ti pākri ri ke. Ag tỹ ki kagtĩg to ken hã vế. Cristo hã tugrĩn ěg tóg vāsỹ nén rán kỹ nĩ ěn to jykrén há han mũ ha, hã ra ag tóg ki kagtĩg nỹti jāvo. ¹⁵ Hã kỹ ag tóg Moisés tỹ nén rán mũ to ke ěn mēg tĩ, hã ra ag tóg to jykrén tũ nĩgtĩ, kỹ tóg Moisés vênh pugrĩn ěn ri ke nĩ ag mỹ, ti pākri ěn ri ke. ¹⁶ Kejēn ũ tóg ěg Senhor ki rā mũ, ag kākĩ ũ. Kỹ tóg vāhā ag tỹ ti vênh pugrĩ vym ri ke nĩ. ¹⁷ Hã kỹ tag tóg rán kỹ nĩ, Topē vĩ rá ki, ha mē: Moisés tỹ ěg Senhor mré vēmén kỹ tóg ā vênh pugrĩn tỹ vym ke ja nĩgtĩ,” he ja tóg nĩ, Topē vĩ rá ki. Topē kuprĩg to ken hã vế, ěg Senhor he mũ tag ti. Kỹ ěg Senhor kuprĩg hã ne ěg kygvān ke mũ', ěg tỹ ti vĩ ki króm ke to. ¹⁸ Hã kỹ tóg ěg mỹ ti vênh pugrĩn tỹ vym ke ja ri ke nĩ, kỹ ěg tóg ěg Senhor sīnvĩ ěn, jēngrē ěn ve há han tĩ. ěg tỹ vênh ve jafā ki nén ũ ve há ěn ri ke tóg nĩ sir. ěg tỹ ěg Senhor ki ěvānh kỹ ěg tóg ti ri ke nỹtinh ke mũ gé. Komēr hã ěg tóg ve ũ han ke mũ, ti ve ěn ri ke, ěg tỹ ti tugnỹm kỹ, ěg tỹ ěg Senhor tugnỹm kỹ, ti kuprĩg ti.

Paulo krój nĩ

4 Inh rānhřāj hã vế, Topē tỹ inh mỹ vênh rānhřāj nĩm jan hã vế. Kỹ tóg inh jagāgtān mũ gé, isỹ ti rānhřāj to krónh ke tũ nĩ jé. ² Hỹ, ũ ag tóg nén tỹ ěg mỹ'ag han tĩ ěn han tĩ, kuty tá, ũ tỹ ag vég tũ nĩn jé. Vênh jykre tỹ ge tovānh kãn inh huri mỹr. Kỹ sóg ājag mỹ ón tũ

nĩgtĩ gé, ājag lograr henh ke tũ sóg nĩ gé. Ón kỹ sóg: “Topē vỹ tag tó ja nĩ,” he tũ nĩ gé. Ki hã sóg tó tĩ. Topē rĩnve sóg vēmén tĩ, hã kỹ sóg ón tũ nĩgtĩ. ũ tỹ isugnỹm mũ ěn vỹ ki kanhrān kãn ke mũ, inh jykre ki. ³ Kỹ ũ tóg kejēn ki kagtĩg nỹti, isỹ Jesus kāme sér tó mũ ěn ki. Ag mỹ tóg nén ũ péju kỹ nĩ ri ke nĩ. ũ tỹ vāgfor kỹ nỹti ag vế, hã kỹ ag tóg ki kanhrān tũ nĩgtĩ. ⁴ Kyvó ag nỹti, krĩ tũ ag nỹti. Jesus ki ge sór tũ ag nỹti, Satanás tỹ ag kyvó nĩm ti kỹ. Ēprā pā'i ag kri ke vỹ tỹ ti nĩ, Satanás ti. Ti tỹ ag kyvó nĩm ti kỹ ag tóg Cristo kāme tag to jykrén tũ nĩgtĩ. Ti jēngrē vég tũ ag tóg nĩgtĩ, ti sīnvĩ ti. Cristo hã vỹ tỹ Topē kānhvég ri ke nĩ, ti ve ri ke.

⁵ Inh pi(jé) inh jykre kāmén tĩ'. Jesus Cristo hã kāmén sóg tĩ, ti tỹ tỹ ěg Senhor nĩ ti. Jāvo sóg tỹ ājag camarada ri ke nĩ, isỹ Jesus to há nĩn kỹ. ⁶ Ha vé, ũ tỹ kutyg mũ ra kurāg han mũ ěn tóg ěg ki kurā han mũ gé sir, Topē ti, ěg tỹ ki kanhrān jé, Topē tỹ tỹ ũn mág nĩn ki. ěg tỹ Cristo ve kỹ ěg tóg Topē ki kanhrān tĩ. Cristo vỹ tóg Topē ve hã pē nĩ. ěg ki kurā to ken hã vế, hã vỹ: Topē ki kanhró he mũ.

⁷ ěg tỹ tỹ ěprā ke nỹti (hã) ra tóg ěg kanhrān sór tĩ, kỹ tóg ěg tỹ go'or tỹ kukrũ han kỹ kākĩ jānkamy e vin ěn ri ke nĩ. ěg hã vỹ tỹ go'or tỹ kukrũ ěn ri ke nỹti, ěg krój nỹtinh kỹ, inh ke gé. Hã ra tóg ěg kanhrān tĩ, vênh kar tỹ ti hã tỹ tỹ ũn tar tāvĩ nĩ ěn ve je. Jānkamy ri ke to ken hã vế. ěg pi(jé) tar nỹti'. ũ tỹ ěg tar han mũ vỹ tỹ Topē ti nĩ. ⁸ Inh krój nĩ ra Topē tỹ isar han mũ vế, ha vé ha. Nén kar tóg inh kutān tĩ, hã ra inh pi(jé) to krĩ kufy han tĩ'. Kejēn tóg inh jykre tũ tĩgtĩ, kỹ tóg isỹ: hỹ mỹ vỹ? he ja há tĩgtĩ, hã ra inh pi(jé) to krónh ke tĩ'. ⁹ Inh vóg kónān ag tóg tĩ, hã ra Topē pi(jé) isovānh tĩ'. Inh rỹnh ag tóg tĩ, hã ra ag pi(je) isén tĩ'. ¹⁰ Kurā kar ki sóg Jesus vēsỹrēnh ěn ri ke han tĩgtĩ. Hã tugrĩn vênh kar tóg Jesus rĩr nĩ tag venh ke mũ gé, inh vēsỹrēnh tugrĩn. ¹¹ Kurā kar ki sóg ter kren tĩ, Jesus tu-

grîn. Hã ki Jesus rîr nĩ tóg inh ki ve há tĩ, inh fár vag ke mũ ra. ¹²Iser kren k̃y ajag tóg tar ñtĩ jãvo, rĩnrĩr ajag ñtĩ.

¹³Tag vỹ Topẽ vĩ ki rãn k̃y nĩ, ha mē: “Topẽ vỹ kri nĩm inh, hã k̃y sóg tó,” he ja tóg nĩgtĩ, Topẽ vỹ rá ki. Topẽ vỹ tag hã vỹ inh jykre han tĩ, hã k̃y sóg tó tĩ gé. Kri fig sóg tĩ, hã k̃y sóg tó tĩ m̃y. ¹⁴Topẽ ne ãg Senhor tỹ Jesus rĩn mãn ja nĩ. Ën vỹ inh rĩn mãn ke mũ gé, ki kanhró sóg nĩ. Kurã ãn kã tóg ajag mré inh jé pr̃er ke mũ, ãg tỹ ti m̃y vẽn ven jé. ¹⁵Ājag tugrĩn sóg ti jagy tag ve kãn tĩ. K̃y kom̃r hã ãn e tóg Topẽ tỹ ag jagãgtãn tag mẽn ke mũ. Vẽnh grun jé ãg tóg ke mũ, k̃y ãn e tóg sir ti m̃y vĩ há han ke mũ. K̃y Topẽ to vĩ há han mũ ag tóg e tãvĩ ñtĩ sir. Topẽ tỹ tỹ ãn mág nĩn hã vẽ.

Ēg tỹ Jesus ki ge k̃y ñtĩn k̃y ãg krenkren ke

¹⁶Hã k̃y sóg to krónh ke jãvãnh nĩ. Ha vé, inh fár tag tóg krój nĩ, kom̃r hã tóg ter sór mũ, ti vag jé. Hã ra inh kuprĩg tóg tar nĩ jãvo. Kurã kar ki tóg vẽn han mãn tĩ, Topẽ tỹ isar han k̃y, inh kuprĩg ti. ¹⁷Tag ki sóg ti jagy vэг tĩ, hã ra tóg inh m̃y kãnhvy nĩ. Tũ' he jé tóg ke mũ, tag ki ti jagy ti. Tá ãg tóg nén ũ há tãvĩ venh ke mũ, ãg tỹ tag ki ti jagy ve ja tugrĩn, hã ra tóg tũ' he jãvãnh nĩ, ãg tỹ tá nén venh ke mũ ãn ti. Ki kagtĩg ãg nĩ ver, hã ra tóg há tãvĩ nĩnh mũ, ãg tỹ tag ki nén ũ há ve kãfór ti nĩnh mũ, tá. ¹⁸Hã ve sór inh nĩ, hã mĩ sóg ãkrég tĩ. Ver ãg tóg vэг tũ nĩgtĩ, s̃y nén ve sór mũ tag ti. Hã k̃y sóg ãg tỹ nén (ũ) vэг mũ tag to jykrén sór tũ nĩgtĩ. Ēg tỹ nén (ũ) vэг mũ tag vỹ tũ' henh ke mũ. Ēg tỹ ũri nén (ũ) vэг tũ ãn vỹ tũ' henh ke tũ nĩ, ãg tỹ tá nén venh ke mũ ãn ti.

5 Ēg fár vỹ ãg pãjó ri ke nĩ. Tũ' he jé tóg ke mũ, ãg fár ti. Hã ra Topẽ ne ãg m̃y ĩn tãg ri ke han ke mũ', kanhkã tá'. Hã ra tóg ãg tỹ tag ki ĩn han ri ke tũ nĩ. Tũ' he jãvãnh tóg nĩ, Topẽ tỹ ãg jamã

tãg han mũ ti. ²Tag ki ãg tóg vēs̃yrénh tĩ, ãg fár tỹ ãg pãjó ri ke tag ki. K̃y tóg ãg tỹ kanhkã tá ãg jamã tãg ãn venh há tĩ. Hã jé ãg tóg pr̃er tĩ. K̃y tóg ãg tỹ kur tãg tu ri ke nĩ. ³Ēg tỹ kur tu k̃y ãg kator tũ ñtĩ. Ēg kur ri ke ti nĩ, kanhkã tá ãg jamã ti, ãg tỹ ãg fár tãg tun k̃y. ⁴Ha vé, ki hã sóg tó mũ. Tag ki, ãg tỹ ãg fár tỹ pãjó ri ke tag ki ñtĩn k̃y ãg tóg vēs̃yrénh tĩ, ãg m̃y ãg ter jãvãnh tĩn k̃y. Ēg m̃y tóg ãg rĩr hã tag tỹ kanhkã tá jun há tĩ vẽ, k̃y tóg ãg tỹ tag ki ãg kur kunũg tũ ra ãg tỹ kanhkã tá jun k̃y ãg kur tãg tu ri ke nĩnh mũ, ãg m̃y. K̃y ãg tỹ ãg fár tãg ve k̃y ãg fár si tóg tũ' he mũ, ãg ter tũ ra. Tag hã tóg ãg m̃y há tĩnh mũ vẽ. ⁵Ēg tỹ kanhkã tá ãg fár tãg venh ke jé Topẽ tóg ãg m̃y vẽnh jykre nĩm, k̃y tóg ãg m̃y ã kuprĩg jēnē gé. Hã ki ãg tóg ki kanhró ñtĩ, ãg tỹ tá nén (ũ) venh ke mũ ãn ki.

⁶Hã k̃y tóg inh m̃y sér tĩ. Ēg tỹ ver ga kri mũn k̃y ãg tóg ãg Senhor vэг tũ nĩgtĩ ver. ⁷Ēg tỹ ti vэг tũ ra ãg tóg ti vĩ kri fig tĩ. ⁸K̃y sóg kanē jur mãn tũ nĩ ha. Is̃y inh fár tỹ pãjó ri ke tag tovãnh há tóg tĩ, s̃y ãg Senhor mré nĩ jé, inh jamã pẽ tá. ⁹Hã k̃y sóg vāsãn tĩ, inh jykre tỹ ti m̃y há nĩ jé. Is̃y tag kã nĩ k̃y sóg vāsãn tĩ, k̃y sóg tá vāsãn ke mũ gé, s̃y tá ti mré nĩnh ken k̃y.

¹⁰Ha vé, ãg kar vỹ Cristo m̃y vẽn ven ke mũ, ti tỹ ãg jykre tugñm jé. K̃y tóg ãg m̃y nĩm ke mũ, ãg tỹ tag ki nén (ũ) han mũ kaja ti. Ũ tỹ tag ki nén (ũ) há han mũ ãn tóg ã tũ kajan venh ke mũ gé, k̃y ũ tỹ tag ki nén (ũ) kórég han mũ ãn ag tóg ajag vēs̃yrénh venh ke mũ gé sir.

Cristo tỹ ãg jykre si tỹ tũ' he

¹¹Ha vé, ãg Senhor kam̃g sóg tĩ, hã k̃y sóg ãprã ke ag m̃y ki hã tó tĩ, ag tỹ ti ki ge jé. Topẽ hã ne inh ki kanhró kar nĩ'. K̃y ajag h̃yn, ajag tỹ nén to jykrén há han k̃y (ajag h̃yn) inh ki kanhró ñtĩnh ke mũ gé, he sóg tĩ. ¹²Inh pi(jé) ajag m̃y: “ũn mág vỹ tỹ inh nĩ,” he sór tĩ'. Hã ra

sóg ājag mý vēnh kāmén mū, ti tỹ ājag mý sér tĩ jé, sỹ ājag mý nén (ũ) kāmén mū ěn tugrĩn, ājag tỹ iso: “jykre há tãvĩ ti nĩ,” he jé. Tag tómni, ũ tỹ vēsỹ tỹ ũn mág han sór mū ag mý. Ũ tỹ ge jykre vỹ sĩnvĩ nĩ ve nĩ, hã ra tóg ěg tỹ ve há han kỹ (tóg) krój nĩ, ag jykre ti. ¹³ Ha vé, krĩ tũ inh nēji nĩ. Topē jykre han tugrĩn sóg krĩ tũ nĩ ve nĩ. Kejēn sóg krĩ há han tĩ gé. Ājag tugrĩn ke vē, inh krĩ há ti. ¹⁴ Cristo hã vỹ tỹ inh fe nĩ, hã kỹ sóg vēnh kar to há nĩ. Tag to sóg jykrén mū, ha mē: vēnh kar jagfỹ tóg ter ja nĩ, Cristo ti, kỹ ěg kar jykre si vỹ tũ' he mū sir, ti jamēn kỹ. ¹⁵ Tĩ hã ne vēnh kar jagfỹ ter ja nĩ'. Hã kỹ ěg pi(jé) tỹ ěg tũ nỹtĩ', ũrĩ'. Tĩ tũ vỹ tỹ ěg nỹtĩ, ti tỹ ěg jagfỹ ter ja nĩn kỹ, ti tỹ ěg jagfỹ rĩr mǎn ja nĩn kỹ ke gé. Kỹ ti hã ne ěg mý ěg tỹ nén han ke mū ěn tó tĩ', ũrĩ'.

¹⁶ Vāsỹ ěg tóg ěg tỹ vēsóg ki nén (ũ) to jykrén kỹ (ěg tóg) ěprǎ ke jykre to: “tag vỹ há nĩ, tag vỹ kórég nĩ,” he ja nĩgtĩ. Ũrĩ ěg tóg vēsóg ki tag to jykrén mǎn ke tũ nĩ ha. Cristo to ěg vēsóg ki jykrén mǎn ke tũ nĩ gé, ěg tỹ vāsỹ vēsóg ki ti to jykrén' he ja ěn ri ke tũ vē ha, ũrĩ. ¹⁷ Hē ri ken kỹ? Cristo tỹ ěg han mǎn kỹ mýr. Tĩ ki ge kỹ ěg nỹtĩ, hã kỹ tóg ěg han mǎn ja nĩ. ěg jykre si tóg tũ ti ha, ěg tỹ nén han ja ěn tóg tũ ti ha ke gé. Ũrĩ ěg tóg tỹ ũn tǎg nỹtĩ ha, ěg krĩ, ěg jykre ti ke gé. ¹⁸ Topē tỹ nén han mūn hã vē. Topē kato vāsǎn ěg tĩ vē, hã ra ěg tóg ũrĩ tỹ Cristo mré ke nỹtĩ ha, Topē tỹ ěg han mǎn kỹ, Cristo tugrĩn. Kỹ tóg ěg mý vēnh rǎnhrǎj tag nĩm mū gé sir, ěg tỹ vēnh kar mý: tỹ Cristo mré ke nỹtĩmni, he jé. ¹⁹ Ha vé, Topē vỹ Cristo jēnē, ti tỹ ěg tỹ tỹ ti mré ke nỹtĩ han jé, ěprǎ ke kar tỹ ti ki ge sór jé. Kỹ tóg ěg tỹ ti vỹ mranh tỹ tũ' he sór mū gé sir, ěg tỹ ti kaja kórég vэг tũ nĩ jé. Kỹ tóg ěg mý: ha vēnh kar mý tó, isỹ ag to há nĩ sór mū ti,” he ja nĩ gé.

²⁰ Cristo hã ne inh jēnēg mū', isỹ ti jiji tó jé. Kỹ Topē tóg vēnh kar jyvēn tĩ, kỹ

sóg hã tó jé nĩ. Hã kỹ sóg Cristo jyjy tó kỹ (sóg) ājag mý tag to vỹ sór mū, ha mē: “Topē to há nỹtĩmni, ti kato vāsǎn mǎn sór tũg nĩ,” he sóg mū. ²¹ Jesus pi(jé) Topē vỹ mranh ja nĩgtĩ'. Hã ra tóg ěg tỹ ti vỹ mranh ja ěn kajǎm kǎn. Kỹ tóg ěg mý Topē jykre kuryj ěn nĩm mū sir, ěg jagfỹ kajǎm kar kỹ.

6 Topē mré sóg rǎnhrǎj tĩgtĩ. Hã kỹ sóg ājag jyvēn mū, ājag tỹ Topē vỹ ki króm jé. Ājag tỹ ti vỹ ki króm tũ nĩn kỹ tóg fagrĩnh mý ājag jagǎgtǎn nĩ. ² Tĩ hã ne tag tó ja nĩ', ha mē: sỹ ājag jagǎgtǎn ke kurǎ ki sóg ājag tỹ inh mý nén to vỹ mū ěn han ke mū. Ājag krenkren ke kurǎ ki sóg ājag krenkren han ke mū,” he ja tóg nĩ, Topē ti. Ājag krenkren ke kurǎ vỹ hur jun, ha mē. Ũrĩ tóg ěg krenkren han sór mū, Topē ti.

³ Kỹ sóg nén ũ vēnhmý han tũ nĩgtĩ sir, ũ tỹ iso vēnh jykre kórég tó tũ nĩ jé, inh rǎnhrǎj to. ⁴ Vēnh jykre há mĩ sóg tĩ mýr, isỹ tỹ Topē camarada jēn kỹ, kỹ inh jykre tóg vēnh kar mý ve há tĩ. Isỹ nén ũ jagy vэг mū ra sóg ti to krónh ke tũ nĩgtĩ, ijagtar nĩ ra, inh kanē jur mū ra. ⁵ Kejēn ag tóg inh mrǎnmrǎn tĩ, vēsēja kǎtǎ ag tóg inh fón tĩ, vēnh kar tóg kejēn inh krĩ rǔv tĩ. Kejēn sóg inh rǎnhrǎj tỹ inh kutǎn to jagtar tĩ, kejēn sóg nũr tũ nĩgtĩ, kejēn sóg vėjēn vэг tũ nĩgtĩ. ⁶ Isỹ ti jagy vэг mū hã ra ijykre tóg tỹ ũn há nỹ, Topē vỹ ki kanhró mág sóg nĩ, vēnh kar to sóg fe nĩ, vēnh kar mý sóg komēr hã vỹ tĩ, vēnh kar tỹ isỹ tỹ Topē camarada jē tag ki kanhrǎn kǎn jé. Topē kuprĩg vỹ tỹ inh jagrē nĩ, hã kỹ sóg vēnh jykre kuryj to tar nĩ. Inh pi(jé) ón kỹ ũ to há nĩ'. ⁷ Kĩ hã tó sóg tĩ. Topē hã ne isar han'. Tĩ hã ne inh mý ā jykre kuryj nĩm', kỹ tóg tỹ isỹ tỹ rǎrǎ jafǎ nĩ, Topē jykre há ěn ti. Inh kren han tóg, Topē ti, ti tỹ inh mý vēnh jykre kuryj nĩm ti kỹ, kỹ ag tóg ti jykre hã tugrĩn (ag tóg) ājag jykre kórég vэг tĩ gé.

⁸Kejēn ag tóg inh mý ví há han tĩ, kejēn ag tóg iso é he tĩ. Kejēn ag tóg iso ti kórég kar tó tĩ, kejēn ag tóg iso nén ũ há tó tĩ. Kejēn ag tóg iso: “ti ón nē,” he tĩ, hã ra sóg ón vãnh nĩgtĩ. ⁹Ũ tóg kãmĩ inh ki kagtĩg nĩ ve nýtĩ, hã ra vãnh kar tóg inh ki kanhró nýtĩ. Ter kren tỹ hên ri ke han sóg tĩgtĩ, hã ra sóg rĩr tĩ nĩ ver. Inh vóg kónãn ag tóg tĩ, hã ra ag tóg isén ja tũ nĩ. ¹⁰Inh fe kaj tóg tĩ, ge ra tóg inh mý sér tĩ. Jagtar sóg tĩ, hã ra sóg ũ tỹ hên ri ke ag jagãgtãn tĩ, ag mý Topê vỹ tón kỹ. Nén ũ tỹ isóg tũ tũ nĩ, hã ra Topê tỹ ěg mý nén nĩm mũ ěn kar vỹ tỹ isũ nýtĩ.

¹¹Ājag hã mý sóg ĩjagtar tag kãmén mũ, tó kãn sóg mũ, ājag mý, isỹ ājag to há tãvĩ nĩn kỹ. Ājag hã to sóg fen mág kỹ nĩ. ¹²Inh pi(jé) ājag to kórég nĩ. Ājag hã ne iso há tũ nĩ ve nýtĩ. ¹³Inh krē ri ke ājag nýtĩ. Hã kỹ sóg ājag mý tag to vỹ sór mũ, ha mẽ: “isỹ ājag to há kóm iso há nýtĩmnĩ, iso fe mág nýtĩmnĩ,” he sóg mũ.

Ũ tỹ Jesus ki ge tũ ag pi(jé) tỹ ěg mré ke nýtĩ

¹⁴Ũ tỹ Jesus ki rã tũ mré jykrén sór tũg nĩ. Tỹ ag ěg mré ke tũ nýtĩ. Hã kỹ ũn jykre pãno ag mré jykrén sór tũg nĩ gé, ājag tỹ vãnh jykre kuryj han kỹ nýtĩn kỹ. Kurã pi(jé) tỹ kuty mré ke nĩ. ¹⁵Cristo pi(jé) Japo mré jykrén tĩ. Kỹ ũ tỹ ti ki rã kỹ jē pi(jé) ũ tỹ ti ki rã tũ mré jykrén há nĩnh mũ. ¹⁶Kỹ Topê jo ĩn pi(jé) tỹ ón kỹ topê jo ke nĩ. Ha vé, Topê jo ĩn vỹ tỹ ěg nýtĩ, ũn rĩr mũ jo ĩn. Ti hã ne tag tó, ha mẽ: “ag ki sóg ĩjamã han ke mũ, ag mré sóg tĩg ke mũ, ag Topê vỹ tỹ inh nĩnh mũ, kỹ ag vỹ tỹ inh povo nýtĩnh mũ,” he ja ti nĩgtĩ. ¹⁷Hã kỹ ěg Senhor tóg tag tó, ha mẽ: “ag ré kỹ mũmnĩ, vyrmỹ nýtĩmnĩ. Vãnh jykre kavėj han tũg nĩ, kỹ sóg ājag mý: ha kãmũ jęg, henh ke mũ. ¹⁸Ājag jóg vỹ tỹ inh nĩnh mũ, kỹ ājag vỹ tỹ inh krē nýtĩnh mũ,” he tóg, ěg Senhor ti, ũ

tỹ nén (ũ) kar han ki kanhrãn kỹ nĩ ěn ti,” he ja tóg nĩgtĩ, Topê vỹ rãn ki.

7 Inh kanhkã', inh fe vỹ tỹ ājag nýtĩ. Hã kỹ sóg ājag mý tag tó mũ. ěg hã mý tóg tó mũ, Topê ti, ti tỹ tỹ ěg jóg mág nĩ tag ti, kỹ ěg tóg ti venh ke mũ. Ājag tỹ ti ve hã jé nén (ũ) kavėj ěn tovãnh kãn nĩ, ājag jãnhkri nýtĩ jé. Nén (ũ) kavėj han tũg nĩ, to jykrén tũg nĩ gé. Komēr hã jykre há tãvĩ nýtĩ sórmnĩ. Topê tũ vỹ tỹ ěg nýtĩ, kỹ ti kamēj nĩ, ti jykre kuryj ěn ri ke nýtĩ sórmnĩ.

Paulo fe tỹ mrin ke

²Iso fe mág han mãn nĩ, ha mẽ. Inh pi(jé) ũ mý vãnh jykre pãno han sór tĩ, inh pi(jé) ũ krĩn kónãn sór tĩ, inh pi(jé) ũ tỹ nén ũ pēju sór tĩ. ³Isỹ ājag mý tag tó mũ jãvo sóg ājag to kórég tũ nĩ. Ājag mré ke vỹ tỹ inh nĩ, kỹ ěg tóg jatun mý jagnē mré mũ mũ, jagnē mré kãgter ěg tóg ke mũ gé, hên ri ke mũn. ⁴Inh mý ag tóg vãnh ví há tónh ke mũ, he sóg tĩ ājag to. Kỹ sóg vãnh kar mý ājag to: há ag nýtĩ, he tĩ. Tag ki sóg ti jagy pē vэг mũ, hã ra inh krĩ tóg kãnhvy nĩ, ājag to, kỹ tóg sir inh mý sér pē tĩ.

⁵Ha vé, isỹ ga tỹ Macedônia tá jun kỹ sóg nén ũ tỹ inh krĩ kuprãg ke ve ja tũ nĩ. Tá sóg ti jagy ve mãn gé. Iso rará ag tóg, tá, kỹ sóg vẽnhmỹ en mãn gé sir. ⁶Hã ra Topê tóg inh mý Tito jēnē, kỹ ti hã tóg inh krĩ tỹ kãnhvy' hé. ũn vēsýrénh mũ ěn mý tóg ví há han tĩ, Topê ti, hã kỹ tóg inh mý Tito jēnē, ěn kã. ⁷Ti tỹ inh ki jun kỹ tóg inh mý ví há han. Kỹ tóg inh mý ājag tỹ iso ví há han ja tag tó mũ gé sir, ājag tỹ inh ve sór mũ tag tó ti mũ, ājag tỹ vãnh jykre kórég to vẽnhmỹ en ěn kãmén ti mũ, ājag tỹ inh jagfy vãnh ví tó sór mũ tó ti mũ gé inh mý. Sỹ tag mẽ kỹ tóg inh mý sér gy tĩ sir.

⁸Inh carta tỹ ājag ki jun kỹ tóg ājag fe kaj han, isỹ rá ti. Hã ra tóg há tĩ. Ājag fe kaj han tóg, kurã pir ki, kỹ ājag tóg ājag jykre kórég ěn tovãnh ja nĩ, hã kỹ

tóg inh mý sér tí. Ûri tóg inh mý sér tí, isý carta rán ký jēnē ja ēn mī ēkrén ký, hā ký sóg rán tūg sór ja tū nī. ⁹ Inh mý tóg sér tí. Hē ri ken ký? Ājag fe kaj mý inh mý sér tí? Vó. Ājag tý ājag fe kaj tý ājag mý jagy tūn ký ājag jykre kórég ēn tovānh ký tóg inh mý sér tí. Ājag fe kaj tigrin ājag tóg Topē mý vēnh fēg, ký inh carta tóg ājag mý nēn (ū) kórég kāmén ja tū nī. ¹⁰ Ēg tý ēg fe kaj tigrin Topē mý vēnh fēg ký ēg tóg ēg jykre kórég tovānh kán ke mū, ký ēg krenken ke mū. Tag vỹ ēg mý sér tí. Jāvo ēg tý fe kaj ra ēg jykre kórég tovānh tū nīn ký ēg ter pē han ke mū sir.

¹¹ Ha vé. Ājag fe kaj tūn ký ājag tóg ājag jykre tugnīm mū sir, Topē tý ājag krīn ký. Vēnh jykre kórég ēn to ājag tóg jū mū sir, kanē jur han ājag tóg mū sir, ký ājag tóg: “vēnh jykre kórég ēn han sór tū ēg tóg nīgtī,” he mū sir. Inh ve sór ājag tóg mū nī sir, vēnh jykre kórég tý ājag tóg tū he sór mū, ūn tý vēnh jykre kórég han mū ēn mý vī tar han sór ājag tóg mū. Há kar ti nī. Hā ki tóg ājag tý ti mré ti jykre kórég ēn han ja tū (tóg) ve há tí sir.

¹² Isý ājag mý carta ēn rán ký sóg ū tý vēnh jykre kórég han mū ēn to ja nī, ti tý ūn mý ti kórég han mū ēn to ja inh nī gé. Hā ra sóg tag to jykren, sý rán ký, ha mē: “isý Corinto tá ke ag tý iso há nýtī venh há tóg tí, ag tý ājag tý iso há nīn ki kanhrān jé, Topē rīnve,” he ja sóg nī, hā ký sóg carta ēn rán ja nī. ¹³ Hā ký inh krī tóg kánhvy' he mū sir, isý ājag tý iso há nýtīn mēn ký. Ký inh krī tý kánhvy' hen mré tóg inh mý sér pē tí gé sir, Tito tý ājag to vī há han ký. Ti krī tý kuprā' he ja ājag tóg nī, ti tý ājag mré nīn ký, ký tóg ti mý há tí gé. ¹⁴ Ti mý sóg ājag kāmén ja nī, ājag tý ti mý vī há han ke tag ti. Ti tīg ke to hā sóg ti mý ājag kāmén ja nī, hā ra ājag tóg ti mý ki hā han ja nī. Inh kavēnh ja tū ājag tóg nī. Ha vé, ājag mý sóg ki hā to há han tí. Ký tóg ri ke nī ja

nīgtī, sý Tito mý ājag to vī há han ja nīn ký. Ki hā han ja ājag tóg nīgtī.

¹⁵ Ký tóg kurā kar ki ājag mī ēkrég tí, ājag to tóg há tāvī nī, Tito ti. Ājag tý inh vī kri nīm mū ēn mī tóg ēkrég tí, ājag tý inh kamēg mū ēn mī, ký ājag nēji ti kamēg ja nī gé, isý ti jēnēn ký. Hā to tóg tí. ¹⁶ Ký tóg inh mý sér tí gé sir, ājag tý inh kavēnh ja tū nīn ký, ājag tý inh vī ki króm ký.

Ēg tý jānkamy nīm ke

8 Ký sóg ājag mý Topē tý ga tý Macedônia tá ke ag tar han mū to sór mū gé, Macedônia tá igreja krēm vēnhmān ký nýtī ag, ū tý tá vēnh pānpin tí ag. Ājag jagāgtar hā ra ag tóg Jerusalém tá ke ag jagāgtān sór mū, ag mý jānkamy jēnēn ký. ² Ha vé, ti jagy pē hā ve ja ag tóg nīgtī, Macedônia tá ke ag, ag jykre há vēnh ven jé. Ge ra tóg ag mý sér tí. Jagāgtar ag nýtī gé, tý nēn (ū) mág tū ag nýtī. Hā ra ag tóg, ag mý sér nīn ký (ag tóg) vin mág pē han ja nīgtī, ag jagtar mág mū ra. Ag tý Jerusalém ra jānkamy jēnē sór vē. ³ Ha vé, ag jykre ve inh. Ājag tý nēn (ū) tý vēnh kápām ag tóg, ag jēn mré hā. ⁴ To ag tóg inh mý to vī mág, isý ag mý: “ājag tū tý vēnh kápām tūg nī,” he tū nīn jé. Ag tý Topē tū ag mý nēn ū há han sór vē. Tag hā ne ag mý sér tí, Topē tý tag to ag tar han ký, hā ký ag tóg inh mý: “ēg tý ag mý jānkamy jēnē sór vē,” he mū. ⁵ Ký ag tóg vēnh jykre há han, isý ag ki vēnh jykre há ve sór mū ēn káfór. Ēg Senhor mý ag tóg vēnh vin, kar ký ag tóg inh mý vēnh vin gé, Topē tý ag mý: “ha ti mý vēnh vin,” hen ký.

⁶ Ký sóg Tito mý ké, ti tý ājag ki jānkamy ū ve jé, ājag tý Jerusalém tá ke ag mý jānkamy jēnēnh ke ti. Ājag ki tóg hur jānkamy sī vé, ký tóg ti tý ūri ve kán há tí, ti tý ājag mý sér tí jé gé, Topē tý tag to ājag tar han ký. ⁷ Ha vé, Jesus ki ge ký ājag nýtī. Vī há ājag nýtī. Ki kanhrān

mág ājag nýtī. Ū jagāgtān sór ājag nýtī. Jagnē to há ājag nýtī. Tag kar ki ājag tóg ūn rico ri ke nýtī. K̄y nén ū há tag han sórmnī gé, Tito t̄y ājag ki nén venh ke mū tag ti.

⁸ Inh pi(jé) ājag m̄y: “ker ag jagāgtān tūg hē,” he sór mū. S̄y ājag t̄y vėnh kar to há nýtī ve sór vė, ājag t̄y ū ag jagāgtān mūn ki. ⁹ Ha vé, ěg Senhor t̄y Jesus Cristo v̄y ěg jagāgtān ja nī gé. Tag ki kanhró ājag tóg nýtī. Kanhkā tá ti rico nī ja nīgtī, há ra tóg ā t̄y nén (ū) ěn to vānh kán. Ā t̄y ěg jagfy jagtar tī jé tóg kātīg. K̄y ěg tóg ti jagtar tugrīn rico nýtī sir.

¹⁰ K̄y sóg tag to jykrén, ha mē. Ano ti nī ha, ājag t̄y ag m̄y jēnēnh ke t̄y vyrm̄y vin han vén kri. Ājag hā ne to jykrén vén ja nīgtī gé, Jerusalém tá ke ag m̄y jānkamy jēnēnh ke to. ¹¹ K̄y ājag t̄y nén han vén ja ěn han kán nī, ūri. To jykrén ja ājag tóg nīgtī, k̄y han kán sórmnī gé. Ājag t̄y vyrm̄y nén vin ja ěn kri vin mán nī, ag m̄y jēnēn jé. ¹² Ājag t̄y nén nīm k̄y ti t̄y ājag m̄y sér nīn k̄y tóg Topē m̄y há tī. Ū t̄y nén ū mág v̄y nīm mág han ke mū, ū t̄y nén ū sī v̄y sīn k̄y nīm ke mū. Topē pi(jé) ū t̄y nén ū sī t̄y nīm mág ve sór mū'.

¹³ Ti t̄y ājag t̄y ū jagāgtān tugrīn ājag m̄y tū tūn k̄y tóg Topē m̄y ū tī sir. Vėnh kar t̄y nén ū sī ve k̄y tóg há tī. ¹⁴ Ūri ājag tū tóg e nī, há k̄y tóg ājag t̄y ūn jagāgtar ag m̄y vėnh kápām há tī. Kejēn tóg ājag m̄y tū' henh ke mū gé, k̄y ag tóg sir ājag m̄y nén (ū) vin ke mū gé, vėnh kato. K̄y vėnh kar v̄y jagnē ri ke nýtī sir. Tag há v̄y há nī'. ¹⁵ Hā k̄y tag tóg rán k̄y nī, ha mē: “ū tóg vėjēn génh mág han ja nīgtī, ū tóg génh pir han ja nīgtī gé. K̄y ū t̄y génh mág han mū m̄y tóg káfór ja tū nīgtī, há ra ū t̄y génh pir han mū ěn m̄y tóg tū' he ja tū nīgtī gé,” he tóg mū, Topē vī rá ki. Jagnē ri ke ag tóg nýtī ja nīgtī. Hā k̄y tóg ěg t̄y ū t̄y nén (ū) pir nī ěn jagāgtān há tī.

Tito to vėme

¹⁶ Topē hā ne Tito fe han', ti t̄y ājag to há tāvī nī jé. K̄y sóg Topē m̄y vī há han tī sir, ti t̄y ti fe han k̄y. ¹⁷ K̄y tóg kánhmar inh m̄y: “hej,” hé, s̄y ti m̄y: “ha Corinto ra tīg,” hen k̄y. Kánhmar tóg tīg sór ja nī, Tito ti. ¹⁸ K̄y sóg ti mré ěg régre ū jēnē sór mū gé. ěg régre tag v̄y Jesus kāmén tī, k̄y igreja krēm vėnhmān k̄y nýtī ag kar v̄y ti to vī há han tī, ū t̄y ěmā kar ki Topē vī to vėnh pānpin tī ag. ¹⁹ K̄y igreja krēm ke kar v̄y ti há kuprėg, ti há t̄y inh mré ěg t̄y ūn jagāgtar ag m̄y nén jēnēnh ke tag ki rīr jé. ěg Senhor t̄y ūn mág nī tag vėnh ven hā jé ěg tóg tag ki rīr sór mū, ěg t̄y ag jagāgtān ke tag ti ki. K̄y tóg inh m̄y há tī gé, s̄y inh pir m̄y ki rīr tū nīn k̄y.

²⁰ K̄y ū tóg iso jykrén kónān ke tū nī gé, is̄y inh pir m̄y ki rīr tū nīn k̄y. Jānkamy e vė, ěg t̄y ma mūnh ke ti, k̄y tóg inh m̄y ū t̄y tag to iso jykrén kónān ha mē tī. K̄y tóg inh m̄y há tī, ū ag t̄y inh mré ki rīr mūn k̄y. ²¹ Is̄y vėnh jykre kuryj han sór vė, há to sóg jykrén tī. ěg Senhor ne inh jykre ki kanhró nī, k̄y tóg há tī gé, ěprā ke ag t̄y inh jykre há vėg mūn k̄y.

²² Inh mré tīg ke mū tag v̄y Tito mré ājag ki jun ke mū, kar k̄y ěg régre ū ke gé. ěg régre tag hā ne ěg Senhor tū ki rīr há han tīgī', tag ve t̄y hén ri ke han inh huri. Ti tū ki rīr nī v̄y ti m̄y sér tī. K̄y tóg ājag vėme mē, há k̄y tóg ājag ve sór mū. Ājag to tóg há tāvī nī, ti t̄y ājag vėme mēn k̄y.

²³ K̄y Tito ne ājag venh kātīg ke mū'. Inh mré rānhrāj jafā vė, Tio ti, k̄y tóg inh mré ājag to vāsān tī. Ti mré kāmū tag ag v̄y t̄y ūn há nýtī gé. Ū t̄y igreja krēm vėnhmān k̄y nýtī ag v̄y ag jėgnē ja nī, ājag to. Ag t̄y Cristo jykre há ěn han k̄y nýtī v̄y ve há tī. ²⁴ Ag t̄y ājag ki junjun k̄y ag ki rīr há han nī, vėnh kar t̄y ve jé, ājag t̄y ag to há nýtī ti, igreja krēm vėnh pānpin tī ag kar t̄y ājag jykre há ve jé.

Vênh kar mý sóg ājag to: “vī há tāvī han ag tóg tī,” he tī. Ký Tito ag mý vī há han nī, ke tū nī (mũ) ra sóg ón ja nīnh mũ.

Ag tỹ jänkamy jēnēnh ke

9 Ký ājag tóg, ěg tỹ Jerusalém tá Topē ki ge kỹ nýtĩ ag mý jēgnēnh ke tag ki kanhró (ājag tóg) nýtĩ, hā kỹ sóg tó sór tū nī. ² Ag jagāgtān sór ājag tóg mũ, ki kanhró sóg nī. Hā kỹ sóg Macedônia tá ke ag mý tó tĩ. Ag mý sóg: “Grécia tá ke ag ne Jerusalém tá ke ag mý nén ũ jēnē sór tĩ,” he tĩ. “Kri prỹg tóg nỹ ha, ag tỹ nén ũ jēnē sór mūn kri,” he sóg tĩ, ājag to. Ký ag tóg ke sór mũ gé sir, ājag kóm. ³ Hā kỹ sóg ājag mý ěg régre ag jēgnēg mũ, ājag tỹ ki kanhrān jé, sỹ ājag kāmén mũ ti. Ký ājag tỹ nén (ũ) nīm sór mũ ěn vin kăn nī, ũri, kỹ sóg fagrīnh mý vī ja tū nīnh mũ. ⁴ Hēn ri ke mūn Macedônia tá ke ũ ag tóg inh mré kāmũ sór mũ. Ký tóg ājag tỹ nén vin ja tū nī kỹ inh mý'a tĩnh mũ, isỹ ón kỹ vī ja nīn kỹ. Ký tóg ājag mý'a tĩnh mũ gé sir. ⁵ Hā kỹ sóg to jykrén, sỹ ājag mý ěg régre tag ag jēgnē jé, inh kătĩg ke to hā, ājag tỹ nén vin han kăn jé, ājag tỹ nén (ũ) tỹ ěg mré ke ag jagāgtān ke ti. Vāsỹ ājag tóg tó ja nī, ājag tỹ nén vin sór mũ ěn ti, kỹ ha vin han, kỹ tóg e nīnh mũ, jänkamy ti, kỹ tóg ve há tĩ, ti tỹ ājag mý sér nī ti. Ký ũ tóg ājag to: “ti mý ag mý há tū ja, hā kỹ ag tóg nīm sĩ han ja nī?” hēnh ke tū nī.

⁶ Ký sóg tag tó sór mũ, ha mē: “ũ tỹ ti fy pir krān kỹ tóg pin kỹ génh ke mũ gé sir. ũ tỹ krān mág mũ ěn hā tóg génh mág han ke mũ gé sir,” he sóg tĩ. ⁷ Ký ājag tỹ nén to jykrén mũ ěn hā vin nī, ājag tỹ Jerusalém ra jēnē jé. Ti tỹ ājag mý sér tū nīn kỹ tóg há tū nī. Inh pi(jé) ājag mý vī tar han mũ'. Mý sér nýtĩmĩ, ājag tỹ ěg mré ke ag jagāgtān to, kỹ tóg Topē mý há tĩ sir. ũ tỹ ge to tóg há tāvī nī. ⁸ Ký Topē tóg to tar nī gé, ājag mý nén vin mág han ke to, ājag tū tỹ ājag ki e nī jé, kurā kar ki, nén ũ tỹ ājag mý tũ' he tũ

nī jé. Ký tóg, ājag tū tỹ ājag ki mág nīn kỹ (tóg) ājag tỹ ũ jagāgtān', ũ jagāgtān' hēnh há tĩ sir. ⁹ Tag vỹ rán kỹ nī, ha mē: “ũn jagāgtar ag mý tóg vin mág tĩ, ti tỹ ěg mý vênh vī há tó tóg tũ' hēnh ke tū nī,” he tóg, Topē vī rá ki.

¹⁰ Ha vé, Topē ne ěg mý nén (ũ) kar fy vin mũ', ěg tỹ krān jé, kỹ tóg ěg mý pāo han jafā nīm mũ gé, ěg tỹ tỹ pāo han kỹ kon jé. Ký tóg ājag mý ājag tỹ tỹ ũ jagāgtān ke mũ ěn ven mũ gé, kỹ tóg nén ũ fy ri ke nī. Kanē há ri ke han jé tóg ke mũ gé, ājag tỹ vênh jykre kuryj tag han kỹ, hā vỹ: jagnē jagāgtān, he mũ. ¹¹ Tag ki ājag tóg rico nýtĩnh ke mũ, ājag tỹ vênh kar jagāgtān kỹ. Ký ag tóg e nýtĩnh mũ gé sir, ũ tỹ ěg tugrīn Topē to vī há han mũ ag, ag tỹ ěg tỹ ag jagāgtān tugrīn Topē to vī há han kỹ. ¹² Ký tóg ge nī. ěg tỹ Topē ki ge kỹ nýtĩ ag jagāgtān kỹ ěg tóg ag jagāgtar tỹ tũ' he mũ. Tag tóg há tĩ. Hā ra ag tóg ěg tỹ ag jagāgtān tugrīn (ag tóg) Topē mý vī há han ke mũ gé sir. ¹³ Hā ki ag tóg ājag tỹ Topē vī kri fig mũ vég mũ, ājag tỹ ag jagāgtān ki. Ký ag tóg tag to Topē to vī há han ke mũ gé sir, ha vemnī. Cristo to vême to ājag nēji há nýtĩ. Hā ve jé ag tóg ke mũ, ājag tỹ ag jagāgtān mág kỹ, ājag tỹ vênh kar jagāgtān kỹ ke gé. ¹⁴ Ký ag tóg ājag to Topē mré vēmén ke mũ gé sir, ājag to há tāvī nýtĩn kỹ. Topē tỹ ājag jagāgtān há pē han mũ ěn ve jé ag tóg ke mũ, hā kỹ ag tóg ājag ve sór ke mũ gé sir. ¹⁵ Topē ne ěg mý nén ũ há tāvī vin tĩ mýr'. Pi(jé) kaja nī, ti tỹ ěg mý nén vin mũ ti. ěg jé ti mý to vī há han, ti mý agradecer hēn kỹ.

Paulo tỹ nén to vī

10 Ha vé, ājag jyvēn sór inh mũ, inh, hā vỹ: Paulo, he mũ. Sỹ ājag mré nīn kỹ sóg nēji komēr hā vī tĩ, kỹ, isỹ kór há tá nīn kỹ isóg nēji vī jũ han tĩ ājag mý. Cristo ne komēr hā vī tĩ'. Ũn há vē, Cristo ti. Ti jykre hā han sór inh nigtĩ. ² Hā kỹ

sóg ājag mý tag to vī sór mū, ha mē. Isý ājag mý nēn rán mū tag jēmēmñī. Ký sóg ājag ki jun ký vī jū han ke tū nī. Vī jū han jé sóg ke mū, ha vemñī, ũ tỹ inh kato vī mū ag mý, ũ tỹ iso: “ā tỹ vēsóg ki nēn to jykrén mū ěn hā han tóg tĩ,” he mū ag mý. ³ Ēprā ke vỹ tỹ inh nī, hā ra inh pi(jé) ěprā ke jykre han ký vēnh jykre kórég han to vāsān tĩ. ⁴ Vāsān mág sóg tĩ, hā ra inh pi(jé) ěprā ke ag jykre han ký vāsān mū. Topē jykre tar ěn hā han ký sóg hā to vāsān tĩ, ký tóg soldado tỹ rará jafā ri ke nī, Topē jykre tar ti. Tỹ sóg ěg kato tē mū ag vēnh pigju jafā mág ěn kókég tĩ, hā vỹ: isý ũ tỹ ěg vī kato vāsānsān mū ag vī tỹ tũ' he mū, he mū. ⁵ Ũ tỹ Topē kato vī sór mū ag vī tỹ sóg tũ' he tĩ gé. Vēsỹ ũn mág han sór ag tóg nỹtĩ, Topē kato vāsān ký, ěg tỹ Topē jykre ki kanhrān mū kato vāsān ký. Tỹ tũ' he jé sóg ke mū, Topē jykre tar hā tỹ. Ēprā ke ag tỹ Topē vī kato tē mū ag tỹ Cristo krēm ge han kān sór sóg mū, ký ag sigse ký nỹtĩ ri ke vē sir. ⁶ Ký, sỹ ājag tỹ Topē vī kri nīm mū ve ký sóg ũ tỹ kri fi sór tũ ag mý vī jū han ke mū sir, ha vemñī.

⁷ To jykrén há han nī, ha mē. “Tỹ sóg Cristo mré ke nī,” he ājag tóg tĩ, ājag kāmī ũ. Ký to jykrén há han nī. Tỹ sóg Cristo mré ke nī gé, inh, ājag kóm mýr, ha mē. ⁸ Ēg Senhor ne inh fēg', sỹ ājag jyvēn jé. Ti pi(jé) inh mý: “ha ag kókén,” hé'. Ký sóg ājag mý tó, ěg Senhor tỹ inh fēg ja ti. Isý vēso vī há han hā vē. Ge ra tóg inh mý'a tũ nī, isý vēso vī há han mū ti. ⁹ Sỹ ājag jyvēn sór vē. Inh pi(jé) ājag kanē jun sór mū. Ājag jyvēn hā jé sóg ājag mý rán. ¹⁰ Inh carta ki inh nēji ājag mý vī tar han tĩ, vī jū, ký sỹ ājag mré nīn ký sóg nēji krój nī ve nī, ký inh vī nēji tóg tỹ nēn ũ tũ nī ve nī. ¹¹ Tag to jykrén, ha mē: isý rán mū ri ke han jé sóg ke mū, isý ājag mré nīnh ken ký, ha mē. Ājag vég tũ sóg nī, isý carta tag rán ký. Isý ājag mré nīnh ken ký sóg inh vī tag ri ke han ke mū, ha vemñī.

¹² Ājag kāmī ũ tóg vēso vī há han sór tĩ. Inh pi(jé) ag ri ke nī, inh pi(jé) tỹ ag mré ke nī gé'. Vēsóg ki to jykrén ký ag tóg nēn ũ to: “tag vỹ há nī, tag vỹ há tũ nī,” he tĩ. Tag to jykrén ký ag jykre tóg ag mý há nī ve nī. Topē jykre ve vén sór tũ ag tóg nī. Ag tỹ vēsóg ki nēn to jykrén hā tóg ag mý há tĩ. Krī tũ ag nỹtĩ.

¹³ Ag jāvo sóg Topē jykre vég tĩ, hā ký sóg ājag mý: “inh jykre vỹ há nī,” he tĩ. Topē ne inh mý inh rānhraj ti nīm, ký tóg inh mý: “ha Corinto tá ke ag ki rir,” he ja nĩgtĩ gé. ¹⁴ Inh pi(jé) Topē tỹ inh mý vēnh rānhraj nīm ěn pātén tĩ, ký sóg pātén ja tũ nī gé, sỹ ājag mý rán ký. Inh hā ne ājag mý Cristo kāmén vén ja nĩgtĩ. ¹⁵ Hā ký sóg isũ tỹ ājag jyvēn tĩ. Ũ tũ pijé'. Inh pi(jé) ũ rānhraj to: “isý han ja vē,” he mū. Isũ hā ki sóg tỹ ũn mág nī. Ký sóg tag to jykrén mū gé, ha mē: ājag tỹ Topē ki ge ký nỹtĩ to tar nỹtĩn ký sóg tỹ ũn mág tāvī nīnh ke mū gé, ājag mré. Isũ hā vē, inh rānhraj hā vē. ¹⁶ Ký sóg ājag jamā mā ra tīg sór mū gé, sỹ Cristo kāmén jé, ũ tỹ ag mý tó ja tũ ěn ra. Sỹ tátá ag mý kāmén ký sóg inhhā ki rānhraj mū sir, ũ tỹ ag mý tá Topē vī kāmén ja tũ nīn ký. Ký sóg inh rānhraj hā tugñĩn tỹ ũn mág jēnh mū, ũ rānhraj tugin ke tũ vē.

¹⁷ Hā ra tóg há tũ tĩ, ěg vēme tag ti. Ājag tỹ ũn mág nī tó sór ký ěg Senhor ti tómñī. ¹⁸ Ēg tỹ vēso: “ũn há vỹ tỹ inh nī,” he mū ra ěg pi(jé) tỹ ũn há nỹtĩ'. Ēg Senhor tỹ ěg to: “ũn há vỹ tỹ ā nī,” hen hā ký ěg tóg tỹ ũn há nỹtĩ.

Ōn ký apóstolo ag

11 Iso fe nỹtīmñī. Krī tũ nī ve inh nī, isý vēsóg ký. Hā ra ājag tóg iso fe nỹtĩ, ký tóg há tĩ. ² Ājag to sóg há pē nī, Topē tỹ ājag to há nī ri ke, hā ký sóg ājag jyvēn tĩ. Ký ājag tóg ũn mén ke mū fi ri ke nỹtĩ, ký Cristo vỹ ājag mén ke ri ke nī sir. Vēnh prüg tag to sóg ājag kān sór mū mýr, ājag jānhkri nỹtĩ jé, tátāg tỹ mén ja

tũ jãnhkri ri ke. ³Hã ra sóg ājag to: “ag mỹ ti tovãnh sór tũ nĩ vỹ?” he mũ. Pỹn vỹ Eva fi mỹ ón, Japo ti, ti jykre (ka)mẽ nĩn kỹ, kỹ fi tóg ti vỹ kri nĩm. Kỹ tóg ājag mỹ ón sór mũ gé, Japo ti, ājag tỹ Cristo tovãnh jé, ājag tỹ ti jykre pir tovãnh jé, ājag tỹ ti to tar ên to krónh ke jé. ⁴Hã kỹ ājag tóg ù ag vỹ jẽmẽ sór mũ, ag tỹ ājag mỹ ón kỹ Jesus tó kỹ, ag tỹ isỹ ājag mỹ nén to mũ ên hã tũ tó mũ ra ājag tóg jẽmẽ sór ti. Ón kỹ jagrẽ vỹ ājag mỹ há nĩ ve nĩ, Topẽ tỹ ājag mỹ nĩm ja tũ ên. Ón kỹ topẽ vỹ vỹ ājag mỹ mẽ sέρ tĩ ve nĩ, ājag tỹ vãsỹ mẽ ja tũ ên. Vẽnhmỹ han sór ājag tóg mũ.

⁵Ón kỹ apóstolo ag ne ājag mỹ vẽnh vỹ tag tó sór mũ'. Inh pi(jé) tỹ ag krêm ke nĩ', ha mẽ. ⁶Vĩ sĩnvĩ han tũ inh nẽji nĩ, ag vỹ sĩnvĩ ri ke han tũ inh nẽji nĩ. Hã ra sóg nén tỹ hẽn ri ke ki kanhró nĩgtĩ, tag ve ājag tóg mỹr, ājag tỹ inh vỹ mẽ tỹ hẽn ri ke han mũ ên ki.

⁷Ājag mỹ sóg Topẽ vỹ tó ja nĩgtĩ, kỹ sóg tag to ājag ki ti kaja ve sór ja tũ nĩ. Vẽsỹ ùn sĩ han ja inh nĩ, sỹ ājag mrẽ nĩn kỹ, ājag tỹ tỹ ùn mág nỹtĩ jé, isugrĩn. Tag tugrĩn inh mỹ Topẽ vỹ mranh'? Vó, vẽnh jykre há vé. ⁸Êmã ù tá Jesus ki ge kỹ nỹtĩ fag ne inh mỹ fag jãnkamy vẽnh kápãm, kỹ fag tóg inh mỹ ti jẽnẽ ja nĩ, sỹ ājag mrẽ nĩn kỹ. Fag tũ hã ko ja inh nĩgtĩ. ⁹Kỹ, isỹ jãnkamy ve sór mũ ra sóg ājag mỹ tó ja tũ nĩ gé. “Ti hỹn ag mỹ jagy tĩnh mũ,” he sóg tĩ, hã kỹ sóg ājag mỹ to ja tũ nĩ. Ga tỹ Macedônia tá ẽg régre ag ne inh ki junjun ja nĩgtĩ', sỹ ājag mrẽ nĩn kỹ, kỹ ag tóg inh mỹ jãnkamy ù ma kãmũ ja nĩ gé, sỹ to nén tỹ inh mỹ tũ nĩ ên mãn jé. Gen kỹ sóg isũ vég tĩ hã ra, ti tỹ ājag mỹ jagy tũ nĩn jé. Inh jykre hã vẽ. Tovãnh sór tũ inh nĩgtĩ. ¹⁰Ki hã tó sóg tĩ, Cristo tỹ ki hã tó tĩ ên ri ke han sóg tĩ. Kỹ sóg ājag to: “ga tỹ Grécia tá ke ag vỹ jãnkamy to inh jykre ki kanhrãn kãn ke mũ, ag tỹ iso vĩvĩ he tũ nĩn jé,” he mũ. Ājag jãnkamy ve sór tũ pẽ inh nĩgtĩ. ¹¹Hẽ ri ken kỹ?

Inh mỹ ājag to há tũ nĩgtĩ? Vó, ājag to sóg há tãvĩ nĩ, kỹ Topẽ ne ki kanhró nĩ'.

¹²Hã ra sóg ājag tũ ve sór tũ nĩ, sỹ ag vỹ tỹ tũ' hen jé, ón kỹ apóstolo ên ag vỹ ti. Inh mỹ tóg ag tỹ ājag mỹ: “Paulo ri ke inh nĩ. Inh mỹ ājag tũ vẽnh kápãm,” hẽnh ha mẽ tĩ. Hã kỹ sóg ājag tũ ve sór tũ nĩ. ¹³Ón kỹ apóstolo vỹ tỹ ag nỹtĩ, mỹr, ha mẽ, ón kỹ ag tóg: “Topẽ rãnhraj han ẽg tóg mũ,” he tĩ. Ón kỹ ag tóg: “Cristo vỹ ẽg tỹ apóstolo han,” he tĩ. ¹⁴Satanás jykre há vẽ. Vẽsỹ tóg Topẽ tỹ jẽnẽ jafã ri ke han tĩ, ón kỹ, Satanás ti. ¹⁵Kỹ Satanás mỹ rãnhraj tĩ ag tóg ón kỹ (ag tóg) jykre kuryj nỹtĩ ve nĩ gé. Hã ra Topẽ tóg ag vóg kónãn ke mũ, ag rãnhraj kórég to.

Paulo jagtar

¹⁶Ha mẽ, tó mãn jé sóg ke mũ, sỹ tó ja ti. Inh pi(jé) krĩ tũ nĩ'. Isỹ ājag mỹ krĩ tũ nĩ ve (hã) ra, ge ra iso hã nỹtĩmĩ, sỹ vẽso vẽnh vỹ há tón kỹ. ¹⁷Sỹ ājag mỹ sỹ nén ve ja ên tó sór vẽ, kỹ tóg inh krĩ tũ nĩ ve nĩ. Sỹ vẽso vỹ há han kỹ sóg krĩ tũ nĩ ve nĩ. Ẽg tỹ ẽg Senhor jykre tó kỹ ẽg tóg tag tó tũ nĩgtĩ, sỹ tónh ke tag. ¹⁸Hã ra sóg tó sór mũ. Vẽnh kar tóg ājag mỹ ag tỹ nén ve ja tó tĩ, kỹ sóg ājag mỹ sỹ nén ve ja ên tó sór mũ gé, ha mẽ. ¹⁹Krĩ há ājag nỹtĩ, ge ra ùn krĩ tũ ag tóg ājag mỹ há nỹtĩ ve nĩ. ²⁰Ủ tỹ ājag mỹ: “tag han ra, tag han tũg ra,” hen kỹ tóg ājag mỹ sέρ tĩ ve nĩgtĩ. Ủ tỹ ājag tũ mãn sór kỹ tóg ājag mỹ há tĩ ve nĩgtĩ, ù tỹ ājag mỹ un'ón mũ ag tóg ājag mỹ há nỹtĩ ve nĩgtĩ, ù tỹ vẽso: “tỹ inh ùn mág nĩ,” he mũ ag vỹ ājag mỹ há nỹtĩ ve nĩgtĩ gé, ù tỹ ājag kakã ki tãnh tĩ ên ag ke gé. Ủ tỹ ge vỹ ājag mỹ há kar nỹtĩ ve nĩgtĩ. ²¹Inh mỹ'a tóg tĩ, sỹ tag tó kỹ. Vẽnh jykre tag to sóg krój nĩ, tag han sór vãn h inh nĩgtĩ, ag tỹ han ri ke tag.

Hã ra ag tóg ājag mỹ ag tỹ nén ve ja ên ti tó sór mũ, ón kỹ apóstolo ên ag, ag tỹ nén ù há kar han mũ tó ag tóg tĩ. Kỹ sóg ag ri ke tónh ke mũ gé sir, ùn krĩ tũ ag ri

kén. ²²Hebreu vỹ tỹ ag nỹtĩ. Tỹ sóg Hebreu nĩ gé. Israel krẽ'krẽ vỹ tỹ ag nỹtĩ. Tỹ sóg Israel krẽ'krẽ nĩ gé. Abraão krẽ'krẽ vỹ tỹ ag nỹtĩ. Tỹ sóg Abraão krẽ'krẽ nĩ gé. ²³Cristo camarada vỹ tỹ ag nỹtĩ. Tag to sóg ag kăfór nĩ hã ra. Ha vé, krĩ tũ pẽ nĩ ve sóg nĩ, sỹ tỹ ag kăfór nĩ tag tón kỹ.

Ha mẽ, isỹ tỹ Cristo camarada nĩ ti: inh rănhrăj e tag hã to sóg ag kăfór nĩ, ise kỹ nĩn e ja hã to sóg ag kăfór nĩ gé. Inh mrănmrăn kăfór han ag tóg tĩ gé, ter kren tỹ hên ri ke ve inh, ag kăfór ke gé. ²⁴Judeu ag ne inh mrănmrăn tỹ 5 (ke) han', ag tỹ ù mrănmrăn tỹ 39 (ke) han ti ên tỹ 5 (ke) han ag tóg isỹ, kură tỹ hên ri ke han tóg, ti tỹ 5 (ke) ên tá krỹg jé. ²⁵Kar kỹ ag tóg ka tỹ inh mrănmrăn tỹ 3 (ke) han ja nĩgtĩ gé. Kură tỹ hên ri ke han tóg ke gé, ti tỹ 3 (ke) ên tá krỹg jé. Pó tỹ ag inh pin ja nĩgtĩ gé, isén jé, kură pir ki. Kar kỹ sóg goj ki ter kren tăgtũ han ke gé, ên kã sóg kejên kuty pir ki kură mré goj nig kăki năgnăr, goj kafă tũ kăki. ²⁶Kuvar há ra tĩg tỹ hên ri ke han inh, kỹ goj var tóg inh jagtar han. Ėg tũ péju(g) tĩ ag vỹ inh jagtar han tĩ. Inh mré ke ag vỹ inh vóg kónăn sór nĩgtĩ, fóg ag ke gé, cidade ki ke ag ke gé, ěmă tũ tá ke ag ke gé. Goj kafă tũ kri inh jagtar han. Ôn kỹ ěg kanhkă ag vỹ inh jagtar han tĩ gé. ²⁷Rănhrăj mág to inh jagtar tĩ gé, to sóg ron tĩ, kỹ sóg nũr tũ tỹ hên ri ke hyn han tĩ gé. Kejên sóg kókĩr tĩ, kejên sóg goj vég tũ nĩgtĩ, văkre tỹ hên ri ke han sóg tĩ, kusa mẽg sóg tĩ, inh kur tóg iso tũg tĩ gé. ²⁸Kỹ, isỹ kură kar ki ti jagy tag vég mũ mré hã sóg igreja krēm vẽnhmăn tĩ ag to krĩ kufy han tĩ gé. ²⁹Ũ tỹ Cristo vĩ to krónh ken kỹ tóg inh mỹ jagy tĩ gé. Ũ tỹ Topẽ vĩ mranh kỹ sóg kanẽ jur tĩgtĩ gé.

³⁰Kỹ, isỹ vėsó kỹ sóg isỹ nén ù jagy vég mũ ěn tó sór tĩ, inh krój nĩ ěn ti. ³¹Topẽ ne ki kanhró nĩ, ěg Senhor tỹ Jesus jóg ti. Ėg tỹ ti mỹ vĩ há han tóg tũ' henh ke tũ pẽ nĩ. Ti hã ne ki kanhró nĩ'. Inh pi(jé)

ón mũ'. ³²Cidade tỹ Damasco tá sóg nĩ ja nĩgtĩ, kỹ pã'i mág tỹ rei tỹ Aretas ěn krēm pã'i ù vỹ governo ki rĩr nĩ ja nĩgtĩ. Ėn tóg ijo văji ja nĩgtĩ. Ti polícia ag tóg ijo văji ja nĩgtĩ, ag tỹ ise jé. ³³Hã ra inh mré ke ag tóg kěj mág kăkă inh péju kỹ jănkă ror tỹ isérem, cidade to ró tỹ, hã kỹ sóg kren. Isỹ ti jagy ve jan hã vẽ.

Paulo tỹ nén nẽ ve

12 Kỹ ājag tỹ isỹ tỹ ùn mág nĩ tag mẽ sór kỹ, kỹ sóg ājag mỹ ěg Senhor tỹ inh mỹ nén ven mũ ěn tó sór mũ gé ver, ti tỹ inh mỹ nén kămén mũ ti. Sỹ ājag mỹ tónh ke tũ vẽ vẽ, hã ra ājag tóg mẽ sór mũ. ²Ha vé, ù ki kanhró sóg nĩ, Jesus ki rã ù. 14 (ke) anos ti nĩ ha, ti tỹ kanhkă ra tĩg kri, kanhkă tăgtũ he mũ ěn ra. Hên ri ke mũn tóg ă rĩr há ra vyr, hên ri ke mũn ti kuprĩg tóg ra vyr, inh pi(jé) ki kanhró nĩ'. Topẽ hã ne ki kanhró nĩ'. ³Hã ra tóg ra vyr, hên ri ke mũn ă rĩr há ra, ti kuprĩg hên ri ke mũn, inh pi(jé) ki kanhró nĩ', Topẽ hã ne ki kanhró nĩ'. ⁴Kỹ tóg ěg tỹ hẽ tá Topẽ mré nỹtĩnh ke mũ ěn ra vyr, Paraíso he mũ ěn ra. Tá tóg vẽn vĩ jēmẽ, ěpră ke tỹ nén tónh ke tũ ěn mẽ tóg tá, kanhkă tá vẽn jykre sĩnvĩ pẽ ěn, ěg tỹ tag ki nén ki kagtĩg ěn. ⁵Ėn hã to sóg: “ùn mág vỹ tỹ inh nĩ,” he sór mũ. Isỹ vėsóg ki kanhkă ra tĩg pijé'. Isỹ ěg tỹ ěpră vég tĩ ěn tó kỹ sóg inh krój nĩ hã tó sór mũ. ⁶Isỹ ùn mág nĩ tag tó kỹ sóg ki hã tó tĩ, vẽn ó pijé'. Hã ra sóg tó tũ nĩ, ājag tỹ iso: “vẽn kar kăfór vỹ tỹ ti nĩ,” he tũ nĩ jé. Inh jykre vég ājag tóg mũgtĩ, inh vĩ mẽg ājag tóg mũgtĩ, kỹ tag hã to jykren nĩ, tag hã to ājag tóg inh jykre ki kanhrăn ke mũ.

⁷Kỹ Topẽ tóg, ti tỹ inh mỹ kanhkă ven kar kỹ (tóg) to jykren gé, sỹ vēsỹ ùn mág han sór tũ nĩ jé. Hã jé tóg inh há tỹ nén ù jagy ki nĩ han tĩ gé, kỹ tóg sónh tỹ inh ki já ri ke nĩ. Satanás krēm ke ù vẽ, kỹ tóg isănh tĩ, isỹ vēsỹ ùn mág han tũ nĩ jé. ⁸Kỹ sóg ěg Senhor mỹ to vĩ tăgtũ han, ti

tỹ inh mỹ tỹ tũ' hen jé. ⁹Hã ra tóg ke jãvãnh ja nĩ. Kĩ tóg inh mỹ: “ã jagãgtãn sóg tĩ,” he ja nĩ, “kỹ tóg há tĩ,” he ja tóg nĩ, ěg Senhor ti. “Ã krój nĩ hã ki isỹ tỹ ùn tar nĩ ve há tĩ,” he ja tóg nĩ inh mỹ, ěg Senhor ti. Hã kỹ inh krój nĩ tag tóg inh mỹ há tĩ. Inh krój nĩn kỹ sóg Cristo tar hã tỹ tar nĩ nĩ. Tag hã ne há tĩ'. ¹⁰Hã kỹ inh krój nĩ tóg inh mỹ sér tĩ, ag tỹ iso vĩ kónãn ti ke gé, inh jagtar nĩ ti ke gé, ag tỹ inh vóg kónãn ti ke gé, inh kanê jur ti ke gé. Inh mỹ tóg sér kar tĩ, sỹ nén vég mũ ti, sỹ Cristo hã tỹ fe nĩn kỹ. Inh krój nĩ ěn kã sóg tar nĩ, mỹr, ha mẽ.

**Paulo tỹ Corinto tá ke
ag to nén to jykren**

¹¹Ha vé ha, vėsỹ ùn krĩ tũ nĩ ěn ri ke han sóg, ajag tỹ inh kutãn kỹ. Ajag tỹ iso vĩ há han ke vễ vễ. Inh pi(jé) ù tỹ vėsỹ apóstolo han mũ ěn ag krēm ke nĩ', isỹ tỹ nén (ũ) tũ hã ra, mỹr, ha mẽ. ¹²Ājag mỹ sóg sỹ tỹ apóstolo jẽ ven huri. Isỹ nén (ũ) jagy vég mũ ra sóg to krónh ke tũ nĩgtĩ. Ēg tỹ nén han vãnh hyn han ja inh nĩgtĩ, ajag rĩnve, milagre ti, Topẽ jykre ti ke gé. Hã ki ajag tóg venh mũ, sỹ tỹ apóstolo jẽ ti. ¹³Kỹ inh ajag mỹ ne han ja tũ nĩ nẽji, ajag tỹ ěmã ù tá Jesus to vẽnhmãn tĩ ag to: “ěg kãfór ag nỹtĩ,” hen jé? Nén pir hã han tũ inh nĩ, hã vỹ: ajag jẽn ko ja tũ inh nĩ, he mũ, sỹ ajag mré nĩn kỹ, kỹ tóg ajag mỹ jagy nĩ ja tũ nĩ. Tag tỹ kórég kỹ inh mỹ vẽnh pãte fón nĩ.

¹⁴Ha vé ha, sỹ ajag ve mãn sór vễ mỹr. Sỹ tag to jykre tăgtũ hã vễ sir. Kỹ sóg inh jun kỹ ajag mré nĩn kỹ (sóg) ajag mỹ ti jagy nĩm sór tũ nĩ gé, ùri. Inh pi(jé) ajag tũ mãn sór mũ'. Sỹ ajag venh kãtig ke vễ. Ēg krẽ pi(jé) ěg rico han tĩ', ěg tỹ ag jẽ'yn mũ ra. Ēg hã ne ěg krẽ mỹ nén ù nĩm tĩ'. ¹⁵Hã kỹ sóg isũ fón kãn ke mũ, ajag tugrĩn, vẽnh fẽg jé sóg ke mũ gé, sỹ ajag krenkren han jé. Ajag to sóg há tăvĩ nĩ. Hã kỹ tóg inh mỹ e tĩ, ajag tỹ iso há tũ nỹtĩ ti. ¹⁶Kỹ ajag tóg ki kanhró nỹtĩ,

isỹ ajag mré nĩn kỹ ajag mỹ ti jagy nĩm sór tũ nĩ ti.

Hã ra sóg nẽji ajag vatánh tá ajag krĩn tĩ, ajag mỹ sóg nẽji ón tĩ. ¹⁷Kỹ inh mỹ ajag vatánh tá ajag tũ mãng tĩ', sỹ ajag mỹ inh mré ke ag jẽgnẽn kỹ? Ke tũ sóg nĩgtĩ mỹr. ¹⁸Tito mỹ sóg to vĩ, ti tỹ ěg rẻgre ù ěn mré ajag venh tĩg jé. Kỹ Tito mỹ inh mỹ ajag tũ ma kãtig ja nĩ'? Ke tũ tóg nĩ, ki kanhró ajag tóg nỹtĩ. Inh jykre hã han tóg tĩ, Tito ti. Isỹ nén han mũ ěn hã han tóg tĩ.

¹⁹Ājag hỹn iso: “ón kỹ tóg vẽnh jagy vĩ mũ,” he mũ. “Ti tỹ ěg tỹ ã to há nỹtĩ ěn han sór vễ,” he ajag hỹn mũ iso. Hã tũ vễ, kỹ Cristo vĩ ki kanhró nĩ, Topẽ ti ke gé. Ājag to sóg há pẽ nĩ, hã kỹ sóg vĩ mũ, ajag tỹ inh vĩ tugrĩn ti hã to tar nỹtĩ jé. ²⁰Tag hã to sóg jykrén mũ, ha mẽ: hẽn ri ke mũn ěg tóg jagnẽ tỹ ùn mũ, sỹ ajag ki jun kỹ. Hẽn ri ke mũn ajag tóg jagnẽ to jũ mũ, hẽn ri ke mũn ajag tóg jagnẽ tũ ki vễ'ĩ mũ, hẽn ri ke mũn ajag tóg jagnẽ to krĩ rỹ nỹtĩ, vẽnh kar hẽn ri ke mũn ajag tũ hã mĩ ěkrén sór tĩ, hẽn ri ke mũn ajag tóg jagnẽ to vĩ kónãn mũ, hẽn ri ke mũn ajag tóg jagnẽ to vĩ vĩ henh mũ, hẽn ri ke mũn ajag tóg jagnẽ kãfór nỹtĩ sór mũ, hẽn ri ke mũn ajag tóg vẽnh jykre e han sór mũ. ²¹Kỹ tóg inh mỹ'a tĩnh mũ, sỹ ajag ki jun kỹ, kỹ Topẽ tỹ isỹ ùn sĩ han ri ke vễ sir. Inh fỹnh ke vễ, ajag tỹ vẫsỹ Topẽ vĩ mranh ja ěn tovãnh sór tũ nỹtĩn kỹ, nén ù kavėj ěn ti, ã prũ tũ fi mré nỹ, ã mén tũ mré nỹ, fag to ěn tĩ ěn mỹr. Ājag tỹ ěn tovãnh tũ nĩn kỹ tóg inh mỹ'a tĩnh mũ.

Paulo tỹ ag jyvẽn mãn mũ

13 Sỹ ajag ve tăgtũnh ke vễ ha. Kỹ sóg ajag jykre venh ke mũ. Û tỹ ajag jykre kórég vég mũ vĩ tónh ke mũ, ajag tỹ ti kórég han ja ti. Ûn rẻgre vĩ tugtónh ke mũ, ke tũ nĩn kỹ ùn tăgtũ. ²Tag tó inh huri, kỹ sóg tó mãn sór mũ mỹr. Sỹ ajag mré nĩ ja nĩn kỹ sóg ajag mỹ

tag tó ja nĩ, kỹ sóg ũri ājag mĩ rán mũ sir, sỹ ājag mré nĩ tũ nĩn kỹ, ha mẽ. Sỹ ājag mré nĩ ja nĩn kỹ sóg komēr hã vĩ ja nĩ, ũ tỹ Topẽ vĩ mranh ja ěn ag mỹ. Inh jun măn kỹ inh pi(jé) komēr hã vĩ măn mũ', ha vemnĩ. Vĩ tar han jé sóg ke mũ mỹr. ³ Cristo vĩ mẽ sór ājag mũ, inh ki. Mẽ jé ājag tóg ke mũ. Ti pi(jé) krój nĩ. Tar ti nĩ, hã kỹ sóg vĩ tar han ke mũ gé. ⁴ Krój nĩ ve ja ti nĩ, ti tỹ cruz to sa kỹ. Hã ra tóg rĩr măn, Topẽ tỹ ti rĩn măn kỹ. Topẽ tar nĩ hã vẽ. Kỹ sóg krój nĩ gé, sỹ ti ki rã kỹ jẽn kỹ, hã ra sóg ti mré rĩr kỹ jẽ gé, ājag mỹ, Topẽ tar nĩn kỹ.

⁵ Ājag jykre tugnỹm nĩ. “Inh mỹ Jesus ki rã há han mũ vỹ?” hemnĩ, vësò jykren kỹ. “Jesus Cristo mỹ inh kãkã nĩ?” hemnĩ. Ājag tỹ tag to: “hỹ, hã vẽ,” he tũ nĩn kỹ ājag pi(jé) tỹ ti tũ nỹtĩ. Ěn kã ājag tóg ti tovãnh kỹ mũ nĩ sir. ⁶ Hã ra sóg ti tovãnh ja tũ nĩ. Ājag tỹ tag ki kanhrãn kỹn há tĩ. ⁷ Ājag to sóg Topẽ mré vēmén tĩ, ājag tỹ nén ũ kórég han tũ nĩ jé. Kỹ inh rãnrãj tóg Topẽ mỹ há tĩ sir, vẽn kar mỹ ke gé. Ag tỹ hã ra iso é he mũ ra nén ũ há tãvĩ han sórmnĩ, ha mẽ, kỹ ājag tỹ Jesus tũ hã han ke mũ tag ne há tãvĩ nĩnh mũ'. ⁸ Inh pi(jé) ũ tỹ ki hã tó

mũ kato tẽ sór mũ'. Ũ tỹ ki hã tó mũ tag ve sór inh nĩ mỹr. ⁹ Inh mỹ tóg sér tĩ, inh krój nĩn kỹ, kỹ tóg inh mỹ sér tĩ gé, ājag tar nỹtĩn kỹ. Hã jé sóg Topẽ mré vĩ tĩ, ti tỹ ājag mỹ vẽn jykre há ěn nĩm jé, ājag tỹ há pẽ nỹtĩ jé. ¹⁰ Hã kỹ sóg ājag mỹ carta tag rán, sỹ ājag vэг tũ nĩn kỹ. Kỹ sóg komēr hã vĩ sór mũ, sỹ ājag mré nĩnh ken kỹ. Inh pi(jé) vĩ tar han sór mũ', inh pi(jé) ěg Senhor tỹ isar han kỹ inh vĩ tar tỹ ājag kókén sór mũ'. Ājag tar han sór inh mũ mỹr.

¹¹ Inh kanhkã', sỹ ājag mỹ rán kãn hã vẽ. Hã ra sóg ver tag tó sór mũ, ha mẽ: vẽn kãn nĩ, ājag tỹ kygnэг tũ nĩ jé, inh vĩ jēmēmĩ, vẽn jykre pĩr han nĩ, krĩ kuprã nỹtĩmĩ. Topẽ ne ěg to há nĩ', ti ne ěg krĩ kuprãg tĩ'. Ti hã ne ājag ki rĩr mũ', ājag tỹ ti jykre tag han kỹ.

¹² Jagnẽ ki nhun ke ri ke han nĩ, Jesus mré ke kar ki, ājag tỹ jagnẽ nĩg kãgmĩ kỹ. Topẽ tũ ki ge kỹ nỹtĩ kar vỹ ājag mỹ: “ājag mỹ há?” he sór mũ.

¹³⁻¹⁴ Ěg Senhor tỹ Jesus Cristo jé ājag tar han tĩ. Topẽ vỹ ājag to há nĩ. Ti kuprĩg vỹ tỹ ājag jagrẽ nĩ. Ti jykre hã mĩ mũmĩ. Hã vẽ.

PAULO TỠ CARTA HAN: GALÁCIA TÁ KE AG MỠ CARTA

1 Paulo tỡ rá vễ, inh. Isỷ ga tỡ Galácia tá ke ag mỡ rán hã vễ. Jesus Cristo hã vỷ inh fềg, sỷ tỡ ti apóstolo jề jế, ềg jóg tỡ Topề ti ke gế. Ềprã ke tỡ inh fềg pijế'. Jesus Cristo hã ne inh fềg', Topề tỡ ừn rừn măn mủ ti, ti ter kar kỡ. ²Sỷ inh mừrế ke ag mừrế ga tỡ Galácia tá ke ag mỡ rán hã vễ, ừ tỡ Galácia tá Jesus to vễnhmăn tỡ ag mỡ.

³Topề mỡ sóg to vỡ tỡ, ti tỡ ầjag tar han jế, ềg jóg mág tỡ ầjag krỉ kuprág jế, ềg pã'i tỡ Jesus Cristo ti ke gế.

⁴Ti hã ne ừ tỡ ầ tén mủ ag mỡ vễnh fềg', ti tỡ ềg tỡ Topề vỡ mranh tỡ tỡ' he jế, kỡ tóg ềg kren han, ềprã ke jykre to. Ềprã ke jykre tỡ pãno nỡ kỡ tóg vễnh jykre tag ki ềg kunũ. Ềg jóg tỡ Topề tỡ nén ve sớr mũn hã vễ, ti hã ne Jesus mỡ tag tó ja nỡ'. ⁵Kỷ ềg tóg Topề to vỡ há han sớr mủ, kỡ tóg tũg' he jãvăn nỡ, ti to vỡ há tag ti. Hã vễ.

Jesus kãme pir nỡ

⁶Ầjag ne tóg kãnhmar sỷ ầjag mỡ Cristo kãmén ja ền tovăn sớr mủ', ti tỡ ềg jagfỷ ter ja kãme ti. Ti kãme ừ nón mủ sớr ầjag tóg mủ, Cristo tỡ ềg mỡ tó ja tỡ nón. Inh mỡ tóg e tỡ mỡr, ầjag jykre tag ti. ⁷Cristo kãme vỷ pir nỡ, kỡ ti kãme ừ tóg tỡ tỡ. Hã ra ừ ag tóg ầjag krỉ kufỷ han sớr mủ, hã kỡ ag tóg Cristo kãme ền ki króm há han tỡ nĩgtỉ. Ừ tó sớr ag tóg mủ mỡr, Cristo jykre to, hã vỷ: “ầjag krenkren jế ầjag tóg Cristo ki rã kar kỡ Judeu ag jykre han ke mủ gế, Topề tỡ Moisés mỡ nén tó ja ền ti,” he mủ. ⁸Hã ra sóg ầjag mỡ tó há han ja nĩgtỉ, isỷ ầjag mỡ: “ti ki rã tãvỉ han jế ầjag tóg ke mủ,” hen kỡ. Ừ tỡ inh vỡ tag ri ke tó tỡ ag jế mủ kónãn. Hền ri ke mũn isóg ầjag mỡ tag tó tỡ nỡ, hền ri ke mũn sóg ti pãte nén ừ tónh ke mủ. Kỡ inh jế tığ kónãn. Hền ri

ke mũn kanhkã tá Topề tỡ jềnế jafã tóg isỷ tó ja ền ri ke han ke tỡ nỡ, pãte tóg hền ri ke mũn nén ừ tó sớr mủ. Kỡ ti jế tığ kónãn. ⁹Tag tó ja inh nỡ, kỡ sóg tó măn mủ sir. Ừ tỡ ầjag mỡ Cristo kãmén kỡ, hã ra tóg ầjag mỡ isỷ tó ri ke han tỡ nỡ, isỷ tó pãte tóg ừ tó sớr mủ, kỡ ti jế tığ kónãn.

¹⁰Vỡ tar han sóg tỡ, ềprã ke kórég ag to. Inh pi(jế) ón kỡ ag mỡ vỡ há han sớr mủ', ag tỡ iso há nỹtỉ jế'. Ềprã ke ag tỡ iso há nỡ tag, ag tỡ iso kórég nỡ tag tóg inh mỡ tỡ nén ừ tỡ nỡ.

Isỷ ềprã ke ag tỡ iso nén tó mủ to jykren nỡ ra inh hỷn Cristo tỡ ki rừn tỡ nừnh mủ vễ. Hã ra sóg ti hã to jykren tỡ. “Isỷ nén tó mủ hỷn ti mỡ há nỡ, ti mỡ kórég nỡ vó?” he sóg tỡ, ti tỡ inh mỡ vỡ há han jế, Topề ti.

Paulo tỡ Topề vỡ hã tó

¹¹⁻¹²Cristo kãmén ja inh nĩgtỉ, isỷ ầjag mỡ: “ti ki rã kỡ ềg krenkren ke mủ, ềg tỡ Moisés jykre han tỡ ra,” hen kỡ. Ềprã ke tỡ véké nén ừ to jykren ja pijế', sỷ ầjag mỡ nén tó mủ ti. Ềprã ke tỡ inh kanhrãn ja pijế'. Ừ pi(jế) inh mỡ: “tag tómnỡ,” he mủ'. Jesus Cristo hã ne inh kanhrãn', ti hã ne inh mỡ tag tó kãn'. Tag to jykren nỡ, inh kanhkã'.

¹³⁻¹⁴Isỷ vãsỷ nén han ja mễ ầjag tóg huri. Tỡ sóg Judeu krề nỡ, hã kỡ sóg Judeu jykre han tỡ ja nĩgtỉ, Moisés tỡ ềg jóg'jóg ve ag mỡ Topề jykre tó ja ền ti. Kỡ sóg inh povo jykre ki, Judeu jykre ki sóg vãsãn mág, hã kỡ sóg inh rềg्रे ag pãtén, sỷ ềg jykre ki króm to tar tãvỉ nừn kỡ. Ềg jóg'jóg ve ag jykre tãvỉ han sóg nĩgtỉ mỡr, tag hã mỡ sóg ềkrén ja nĩgtỉ. Kỡ sóg kygnế kỡ: “Jesus hỷn ón kỡ vếsỷ Topề han,” he ja nỡ gế. Hã kỡ sóg ti ki ge kỡ nỹtỉ ag vóg kónãn tãvỉ han, isỷ ag tỡ tỡ' he jế. Ag jagãgtãn vãn hã ja inh nĩgtỉ.

¹⁵⁻¹⁶Hã ra Topề tóg kejền inh mỡ Jesus to: “inh kớsin vỷ tỡ ti nỡ,” hế, isỷ fóg ag mỡ, kanhgág ag mỡ ti kãmén jế, ừ tỡ

mê ja tũ ag kar mĩ. Ti hã tóg inh mur to hã inh kuprêg, inh jagãgtãn kĩ. Kĩ, Jesus tĩ inh mĩ vênh ven kar inh pi(jé) êprã ke ù mré vēmén', ti ki jēmē jé'. ¹⁷ Kĩ sóg Jerusalém ra tĩg ja tũ nĩ gé, sỹ ijo apóstolo ag mré vēmén jé. Ga tỹ Arábia ra sóg vyr, ên kã, kar kĩ sóg tá kãtĩg kĩ cidade tỹ Damasco tá jun mãn.

¹⁸ Kĩ, 3 anos tũg kĩ sóg kejên Jerusalém ra vyr, sỹ apóstolo Pedro mré vēmén jé. Ti mré sóg kurã tỹ 15 (ke) han, tãvĩ. ¹⁹ Ên kã inh pi(jé) apóstolo ù ag vé'. Tiago hã ve inh, êg Senhor jãvy ên, isỹ Pedro mré vĩn kĩ.

²⁰ Ājag mĩ sóg ki hã rán mũ. Inh pi(jé) ón mũ', Topê hã ne ki kanhró nĩ.

²¹ Tag pãte sóg ga tỹ Sírĩa ra vyr, ga tỹ Cilícia ra ke gé. ²² Isỹ ra tĩg jé sóg ga tỹ Judéĩa fin rãm. Kĩ Judéĩa tá Jesus to vênh mãn tĩ ag inh ki kagtĩg nỹti ja nĩgtĩ. Inh ve ja tũ ag nỹti ver, Judéĩa tá Cristo ki ge kĩ nỹti ag. ²³ Iso vĩ hã mē ja ag tóg nĩgtĩ, hã vỹ: “ũ tỹ êg vóg kónãn mũ ên nēji Cristo tó mũ,” he mũ. “Vãsỹ tóg ù tỹ ti ki ge kĩ nỹti ag tũg sór ja nĩ, hã ra tóg ũri ti kãmén mũ ha, nēji,” he ja ag tóg nĩgtĩ iso. ²⁴ Kĩ ag tóg isugrĩn Topê to vĩ há han ja nĩgtĩ, ag tỹ tag mē kĩ.

Paulo jykre tỹ apóstolo ù ag mĩ há nĩ.

2 Tag pãte 14 anos tũg kar sóg Jerusalém ra tĩg mãn gé, Barnabé mré, kĩ Tito tóg êg mré vyr gé. ² Topê tỹ inh mĩ: “ha ra tĩg,” he ja vê. Tá jun kĩ sóg ag mĩ isỹ nén tó tĩ ên kãmén kãn ja nĩ sir, sỹ fóg ag mĩ nén kãmén tĩ ên ti. Vyr mĩ sóg tag to pã'i ag mré vēmén. Fóg ag mĩ sóg: “Jesus ki rã kĩ êg krenkren ke mũ, êg tỹ Moisés jykre han tũ ra,” he tĩ. Kĩ sóg tag to pã'i ag ki jēmē sór ja nĩ, sỹ ag mĩ: “mỹ há, fóg ag tỹ Moisés jykre han tũ ra, kanhgág ag ke gé?” he jé. Isỹ fagrĩnh mĩ rãnrãj jãvãnh tóg tĩ, isỹ fagrĩnh mĩ carreira ri ke han jãvãnh tóg tĩ, hã kĩ sóg ag ki jēmēnh vyr. ³ Kĩ tóg ag mĩ há tĩ, sỹ fóg ag mĩ, kanhgág ag mĩ

Jesus hã tó mũ ti, sỹ ag mĩ Moisés tó tũ ra, sỹ ag mĩ Judeu ag jykre tó tũ ra, sỹ ag mĩ: “ha ājag gré fár junun kym,” he tũ ra. Hã kĩ ag tóg Tito mĩ: “ha kym,” he ja tũ nĩ gé. Fóg tỹ Grego vê, Tito ti, ù tỹ Jerusalém ra inh mré tĩ mũ ên ti. Hã kĩ tóg ā gré fár kym ja tũ nĩ, ti tỹ tỹ Judeu tũ nĩn kĩ. ⁴ Hã ra ón kĩ Jesus ki ge kĩ nỹti ag tóg ti kym sór ja nĩ. Ón kĩ ag tóg Jesus jykre ve sór ja nĩ. “Ti mĩ Moisés jykre tovãnh tũ?” he ag tóg iso. Ag tỹ Moisés jykre krēm êg vin mãn sór ja vê, kĩ tóg êg patrão ri ke nĩ, Moisés jykre ên ti. ⁵ Hã ra sóg ag kato tẽ. Inh pi(jé) ag mĩ: “hỹ,” he ja nĩgtĩ'. Ag kato tẽ tãvĩ han ja inh nĩgtĩ ājag jagfy, ājag tỹ vênh vĩ há hã kri fi jé, Jesus kãmē tỹ ājag mĩ sér tĩ jé, ājag tỹ Moisés jykre kufy ên han tũ nĩn kĩ.

⁶ Kĩ pã'i ag tóg isỹ ag mĩ nén kãmén mũ ên to: “tó kãn ja tũ ā nĩ,” he ja tũ nĩ gé, ũn mág ag. Vãsỹ ag tóg tỹ pã'i tũ ja nỹtĩgtĩ, ũn mág tag ag, hã ra tóg inh mĩ tỹ nén ù tũ nĩ, ha mē. Topê mĩ ti tỹ nén ù tũ nĩ, êg tỹ êprã ke ag mĩ tỹ ũn mág nỹti ti, ũn sĩ nỹti ti ke gé. ⁷ Kĩ tóg pã'i tag ag mĩ há tĩ, sỹ fóg ag mĩ, sỹ kanhgág ag mĩ Topê vĩ tónh ke ti, ũn gré fár junun kym ja tũ ên ag mĩ, Topê tỹ inh mĩ: “povo ù ag mĩ tónh tĩg,” hen kĩ. “Topê vỹ Pedro mĩ tó, ti tỹ Judeu ag mĩ tó jé, ũn gré fár junun kym kĩ nỹti ên ag mĩ, hã ra ā tóg ù ag mĩ tónh ke mũ,” he ja ag tóg nĩ inh mĩ, Jerusalém tá ũn mág ag. ⁸ Topê ne Pedro ti tar han, ti tỹ tỹ Judeu ag apóstolo jẽ jé. Kĩ tóg isar han, isỹ tỹ ù ag apóstolo jẽ jé, ũn tỹ Judeu ag jykre han tũ kar ag. ⁹ Tag ve ag, Topê tỹ tag to isar han mũ ve ag, Tiago ti, Pedro ti, João ti ke gé. Igreja to pã'i vỹ tỹ ag nỹti, kĩ ag tóg tỹ igreja nũna ri ke nỹti. Ên ag ne inh nĩgé mē', Barnabé nĩgé ke gé. Hã kĩ ag tóg êg mĩ: “há ti nĩ, ājag rãnrãj ti, ājag tỹ nén han sór mũ ti,” he mũ. “Ha fóg ag mĩ tónh mũjêg, kanhgág ag mĩ, jãvo êg tóg ù tỹ Judeu

ag jykre han mû ag hã mý tónh ke mû,” he ag tóg mû ãg mý, pã'i ag. ¹⁰ Ký ag tóg ãg mý to vî, ãg tỹ ag kãmî ùn vësýrénh mû ag jagãgtãn jé, ãg tỹ ag mý nén ù jênê jé, fag mý ke gé. Tag han sóg tĩ mýr. Inh pi(jé) kã jatun tĩ'.

Fóg ag tỹ Judeu ag ri ke nýtĩ

¹¹ Ký kejên Pedro tóg cidade tỹ Antioquia tá jun ja nigtĩ. Hã ra tóg tá kygnê, ký sóg ti kato tê. Ti hã mý sóg ti kygnê ên tó. ¹² Ký Tiago tóg kejên ti mré ke ù ag jëgnê ja nigtĩ. Ag tỹ junjun tũ ki Pedro tóg fóg ag mré jên ja nigtĩ, Judeu tũ ag mré. Hã ra Tiago tá ke ag tỹ junjun ký tóg sir Judeu tũ ag mré jên jãvãnh nĩ sir, ti tỹ Judeu ag kamêg vê sir, ùn gré junun fãr kym tĩ ag jagfỹ. Ký Pedro tóg ón ký vurmỹ nĩ mû sir, fóg ag vãm ký. ¹³ Ký ti mré Judeu ù ag tóg fóg ag vãm mû gé sir. Ký vãhã Barnabé tóg fóg ag vãm mû gé sir. Ki kanhró ti nĩ vê, Barnabé ti, ãg tỹ jatun mý fóg mré nính ke ti, ãg tỹ tỹ Judeu nýtĩ ra. ¹⁴ Ag kar vỹ kygnê kãn, Pedro nón. Jesus jykre pijé', vênh vỹ sér pijé'.

Sỹ ag tỹ kygnê tag ve ký sóg vênh kar rĩnve Pedro mý tag tó, ha mẽ. “Ha vé, Judeu vỹ tỹ ã nĩ,” he sóg ti mý. “Ã tỹ tỹ Judeu nĩ ra ã tóg fóg jykre han ja nigtĩ, fóg mré jên ký,” he sóg ti mý. “Ký ã tỹ ne jé ùri Judeu jykre han mãn sór nê? Ã tỹ ne jé fóg ag mý: Judeu ag jykre han nĩ, he sór nê?” he sóg ti mý.

Jesus ki ge ký nýtĩ ký ãg povo pir ri ke nýtĩ

¹⁵ Judeu krê vỹ tỹ ãg nýtĩ, ký ãg tóg fóg ag tỹ Topê vỹ mranh tĩ ên ri ke tũ nýtĩ. ¹⁶ Hã ký ãg tóg Topê tỹ vãsỹ ãg jyvên tĩ ên ki kanhró nýtĩ. Hã ra ãg pi(jé) tag tugrĩn Topê mý há nýtĩ'. ãg tỹ Jesus Cristo ki ge ký ãg ti mý há nýtĩ. Hã ký ãg tóg Jesus Cristo ki ge ký nýtĩ, ãg tỹ ti mý tỹ ùn há nýtĩ jé, ti tỹ ãg tỹ ti ki ge ký nýtĩ tag tugrĩn ãg mý vênh pãte fón jé sir. ãg

pi(jé) Topê tỹ vãsỹ ãg jyvên tĩ ên ki króm ja nigtĩ', hã ký ãg tóg ti mý tỹ ùn há tũ nýtĩ, ãg tỹ ti tỹ vãsỹ ãg jyvên han sór mû ra. Topê pi(jé) Moisés tỹ ãg mý vênh jykre nĩm ja ên tugrĩn ãg mý vênh pãte fón ke mû'. Jesus Cristo tugrĩn ke vê.

¹⁷ Ký tóg ge nĩ. ãg tỹ Cristo ki ge tugrĩn ãg tóg Topê mý tỹ ùn há nýtĩ. ãg tỹ Topê vỹ mranh ký, hã ký tóg ãg mý vênh pãte fón mû, ãg tỹ tỹ Judeu nýtĩn ký, ký tóg fóg ag mý vênh pãte fón mû gé, kanhgág ag mý ke gé.

Ký ãjag hỹn iso: “ã tỹ tag tó ký ã tóg: Cristo vỹ Topê vỹ mranh tag to há nigtĩ, he tĩ,” he sór mû. Vó, hã tũ vê. ¹⁸ Hã ra tag to jykren, ha mẽ: ãg tỹ Topê tỹ vãsỹ vênh jykre to: “vênh jykre tag han mãn ke tũ ãg nĩ ha,” he kar ký: “vó, han mãn jé ãg tóg ke mû, ge ra,” hen ký tóg vênhmỹ tĩ sir. Vênh jykre régre vê sir. ¹⁹ Topê tỹ vãsỹ ãg jyvên ja ên ki kanhró ãg tóg nýtĩ. Ký ãg tóg ti tỹ ãg jyvên mû ên mẽ ký: “vênh jykre kórég han ký sóg Topê vỹ mranh tĩ,” he mû sir. Ti vỹ ki króm ki kagtĩg ãg tóg nýtĩ, ãg tỹ ki króm sór mû ra. Hã ra Cristo vỹ ãg jykre si tỹ tũ' he ja nĩ. Ti mré tóg cruz to sa ja nĩ, ãg jykre si ti. Ký tóg ãg mý vênh jykre tãg nĩm mû sir, ãg tỹ tỹ Topê tũ nýtĩ jé. ²⁰ ãg jykre si vỹ tũ' hé. Hã ký ãg tóg ti tũ hã han tĩ, ãg tỹ ver ga kri mũn ký. Topê kósin ki rã tugrĩn ãg tóg sir rĩnrĩr nýtĩ. Ti fe vỹ tỹ ãg nýtĩ, ãg kar vỹ tỹ ti fe nýtĩ, ký tóg ãg jagfỹ ù tỹ ã tén tĩ ag mý vênh fêg, ký tóg ãg jagfỹ ter ja nĩ. ²¹ Ti ki ge ký nýtĩ tugrĩn ãg tóg Topê mý há nýtĩ. Topê tỹ ãg jagãgtãn hã vê. ãg tỹ: “Topê jykre si ki króm ký inh hỹn Topê mý tỹ ùn há nĩ,” hen ký Cristo vỹ fagrĩnh mý ter ja nĩ. Ký ãg tóg Topê tỹ ãg jagãtãn tag tỹ tũ' he mû. Hã tũ vê mýr.

ãg tỹ Jesus ki ge ký ãg krenkren ke

3 Galácia tá ke', ãjag ne tóg krĩ tũ nýtĩ ve nýtĩ'. Û nỹ ãjag krĩn kónãn, ãjag tỹ Jesus Cristo tovãnh sór jé? Ti tỹ ka to

sa ja ên tó kân inh mÿr ājag mÿ, kÿ ājag tÿ ne jé vāsÿ vênĥ jykre ên han sór nê? ²Kÿ sóg ājag ki tag jēmē sór mû, ha mē: Topē ne ājag mÿ ā kuprīg jēnē'. Ājag tÿ vāsÿ vênĥ jykre si ên mī mû tigrîn ājag mÿ jagrēn kÿ nÿtī? Vó, inh vī tigrîn ājag tóg Cristo ki ge kÿ nÿtī, kÿ ājag tóg Cristo ki ge tigrîn jagrēn kÿ nÿtī. ³Kÿ krī vênĥ mÿ han sór tûg nī. Topē kuprīg tÿ ājag krīn kÿ ājag Jesus ki ge ja nī. Kÿ: vēsóg ki sóg ti jykre ki krov," he tûg nī. ⁴Ke tû nī (mû) ra ājag tóg fagrīnĥ mÿ Topē kuprīg tÿ jagrē nī ên vé. Hā ra tóg inh mÿ fagrīnĥ mÿ ke tû nī. ⁵Kÿ ũ tÿ ājag mÿ ā kuprīg jēnēg mû ên vÿ ěg tÿ nén han vānĥ hyn han ja nīgġi gé. Ti mÿ ājag tÿ vāsÿ vênĥ jykre si mī mû tigrîn milagre ên hyn han? Vó. Ājag tÿ Cristo kāmē sér mē kÿ ti ki ge tigrîn tóg milagre ên hyn han. Tag to jykrén.

⁶Kÿ Abraão to jykrén nī gé. Topē ki tóg rā kÿ nī ja nī, kÿ tóg Topē mÿ tÿ ũn há nī sir, Abraão ti. ⁷Tag to jykrén há han nī. ěg tÿ Abraão nón Topē ki ge kÿ nÿtī kÿ ěg tóg Abraão krē'krē ag ri ke nÿtī. ⁸Topē vÿ fóg ag mré kanhgág ag krenkren han sór mû, ag tÿ ti ki ge kÿ. Ũ tÿ Judeu jykre han tû ag kar krenkren han sór tóg mû. Hā tóg rán kÿ nī. Vāsÿ tóg rán kÿ nī, Topē vī tÿ rán kÿ nī ki. Vāsÿ tóg Abraão mÿ vênĥ vī sér tag tó ja nī, ha mē: "povo kar mÿ sóg vī há han ke mû, ā tigrîn," he ja tóg nī, Topē ti, Abraão mÿ. ⁹Ti mÿ tóg vī há han ja nī, Topē ti, Abraão mÿ, ti tÿ ti ki rā há han kÿ. Kÿ tóg ũ tÿ ti nón ti ki ge kÿ nÿtī ag mÿ vī há han ke mû gé.

¹⁰Ũ tÿ vāsÿ vênĥ jykre si ên ki króm tigrîn kren sór mû ag mÿ tóg vī kónān ke mû, Topē ti, ag tÿ ki króm sór mû ra mranĥ kÿ, mÿr, ha mē. Hā kÿ tag tóg rán kÿ nī, ha mē. "Topē tÿ ěg jyvén mû tóg e nÿtī, kÿ ti vī tóg rán kÿ nÿtī. ěg tÿ ki króm kân ke vē. Ũ tÿ mranĥ pir han mû mÿ tóg vī kónān ke mû, Topē ti," he tóg, Topē vī tÿ rán kÿ nī ki. ¹¹Hā kÿ ěg tÿ

Topē tÿ vāsÿ ěg jyvén mû ên ki króm sór mû ra ěg tóg ti mÿ tÿ ũn há tû nÿtī, Topē ti mÿ, ěg tÿ ki króm kân tû nín kÿ. Hā kÿ tag tóg rán kÿ nī gé: "ěg tÿ Topē ki ge kÿ nÿtīn hā kÿ ěg tóg ti mÿ tÿ ũn há nÿtī, kÿ ěg tóg krenkren ke mû ha," he ja tóg nī, Topē vī tÿ rán kÿ nī ki. ¹²Kÿ Topē tÿ vāsÿ ěg jyvén ti ên vÿ ěg tÿ ti ki rā ri ke tû nī. Hā kÿ tóg tag tó ja nī, Topē ti, ha mē: "ājag tÿ inh vī ki króm tigrîn ājag krenkren ke mû," he ja tóg nī. Hā ra ěg tóg ki króm ki kagtīg nÿtī, hā kÿ ěg tóg ti jykre si ki króm sór mû ra ki króm ja tû nī, hā kÿ ěg tóg krenkren ke tû nī sir.

¹³Jāvo ěg tÿ Cristo ki ge kÿ ěg krenkren ke mû. Topē vÿ ěg mÿ vī kónān ke mû vē, ěg tÿ ti tÿ vāsÿ ěg jyvén mû ên mranĥ ja to. Hā ra Cristo tóg ěg kren han mû, Topē tÿ ěg mÿ vī kónān tû nī jé. Cristo hā ne Topē mÿ: "ha ag jagfÿ inh hā mÿ vī kónān," he ja nīgġi. Ti to tag tóg rán kÿ nī, ha mē: "ũ tÿ cruz to sa mû ên mÿ tóg vī kónān mû, Topē ti," he ja tóg nīgġi, Topē vī tÿ rán kÿ nī ki. ¹⁴Ti tÿ Cristo hā mÿ vī kónān kÿ tóg ěg hā mÿ vī há han mû sir, ti tÿ Abraão mÿ vī há han ja ên ri ke. Fóg ag mÿ tóg vī há han mû, kanhgág ag mÿ ke gé, Jesus Cristo tigrîn. Kÿ tóg ěg mÿ ā kuprīg jēnēg mû sir, ěg tÿ ti ki rā ja tigrîn. Tó ja ti nī, ti tÿ ěg jagrēn ke ti, kÿ tóg ke mû, ěg tÿ ti ki rā ja tigrîn.

Abraão tÿ Topē vī kri nīm kÿ tÿ ũn há nī

¹⁵Inh kanhkā', ěprā ke jykre to jykrén. Kejēn ũn régre ag tóg jagnē mré nén ũ to jykrén ti. To jykrén kar kÿ ag tóg rán ti, kÿ ag tóg ājag jyggi ránrán ti gé sir. Ag jyggi ránrán kar kÿ ũ tóg sir tÿ nén ũ han mán ke tû nī. Rán kÿ tóg nī nī, kÿ ag tóg tÿ ti rá ũ han tû nīgġi sir. ěprā ke jykre hā vē. ¹⁶Kÿ Topē jykre vÿ ge nīgġi gé. Topē vÿ Abraão mÿ tó ja nī, vāsÿ, ti tÿ ti mÿ nén ũ há han ke ti, ti krē'krē mÿ ke gé. Kÿ tóg, ti tÿ ti krē'krē tó kÿ (tóg) Abraão

krē'krē ag kā ūn pir hā tó ja nī. Ti pi(jé) Abraão mý: “ā krē'krē ag,” he ja nī. “Ā krē'krē,” he ja ti nī, hā vỹ: Cristo, he mū, hā vỹ: Abraão krē'krē ag kā ūn pir, he mū.

¹⁷ Kĩ Topē tóg Moisés mur ke to hā Abraão mý ti tỹ ti krē'krē ag kā ū mý vỹ há han ke tag tó ja nī, ti tỹ Abraão mré jykrén kỹ. Kĩ, tag pāte, 430 (ke) anos tũg kỹ tóg Moisés mý ti tỹ ěg jyvẽn ke ěn nĩm. Hā ra tóg ā tỹ Moisés mý vẽn jykre ěn nĩm mū ra tóg ā tỹ Abraão mý vẽn jykre tó ja ěn tỹ tũ he ja tũ nĩ. ¹⁸ Kĩ Topē tỹ Abraão mý: “ve jé ā tóg ke mū, ā krē'krē mré,” he ja ěn tugrĩn tóg ve ja nĩ, Topē vỹ há tugrĩn tóg ve ja nĩ, Abraão ti. Ti tỹ ěg jyvẽn ěn to ke tũ vỹ, ti tỹ ěg mý: “ěn ve jé ājag tóg ke mū,” hen kỹ ěg tóg venh ke mū, ti vỹ tugnĩn.

¹⁹ Kĩ ājag hỹn inh mý: “Topē tỹ ne jé Moisés mý ti tỹ ěg jyvẽn ke ěn tó ja nē?” he sór mū. ěg tỹ: “venh jykre kórég han kỹ inh hỹn tóg Topē vỹ mranh,” he jé, hā jé Topē tóg Moisés mý ti tỹ ěg jyvẽn ke ěn nĩm ja nĩ, Jesus mur ke to hā. Abraão kósĩn tỹ Jesus mur ke tũg ki ke ja vỹ, Topē tỹ ěg jyvẽn ja ěn ti. Ti hā mý tóg vỹ há han sór ja nĩ, Topē ti, Jesus hā mý.

Topē tỹ Israel ag jyvẽn kỹ tóg ā tỹ jẽnē jafā ag mý tó ja nĩ. Kĩ Topē tỹ jẽnē jafā ag tóg Moisés mý tó ja nĩ, Moisés tỹ Israel ag mý kāmén jé. Topē tỹ ěg jyvẽn jafā ti nĩ ja nĩ, Moisés ti. ²⁰ Topē jęgja kā jęg kỹ tóg Israel ag mý vỹ ja nĩgtĩ, Moisés ti, Topē tỹ Israel ag mré jykrén kỹ. Kĩ Moisés tóg ag jyvẽn, ag tỹ Topē vỹ ki króm jé. Topē tỹ ěg kren han kỹ tóg ge tũ nĩgtĩ. Ā pir mý tóg ěg mý tó mū, ti tỹ ěg kren han sór mū ti, Topē ti. Ũ tóg ti jagfy ěg mré vỹ tũ nĩ sir.

Topē vỹ ěg jyvẽn, ěg tỹ ti vỹ ki kanhrān jé

²¹ Isỹ tag tó kỹ Topē hỹn ājag mý tỹ ũn ón mé nĩ ve nĩ. “Topē tỹ ěg jyvẽn mū ra ěg tóg ti vỹ mranh tĩ. Hā kỹ tóg ěg vóg

kónān ke mū. Kỹ tóg ěg kren han ke tũ nĩ,” he ājag hỹn tĩ. Vó, Topē pi(jé) ón tĩ. Hā ra Topē tỹ ěg jyvẽn mū ra ěg tóg ki króm tũ nĩgtĩ, hā kỹ ti tỹ ěg jyvẽn tag tóg ěg kren han jāvānh nĩ. Ti tỹ ěg jyvẽn ěn tỹ ěg kren han mū ra ěg tóg ti tỹ ěg jyvẽn tugrĩn jykre kuryj nỹtĩnh mū vỹ. ²² Hā ra tag tóg rán kỹ nĩ, ha mẽ: “vẽnħ kar vỹ Topē vỹ mranh kãn ja nĩgtĩ,” he ja tóg nĩ, Topē vỹ tỹ rán kỹ nĩ ki. Kỹ ěg tỹ Jesus ki ge hā kỹ ěg tóg krenkren ke mū sir. Ũ tỹ ti ki ge kỹ nỹti ag hā vỹ krenkren ke mū.

²³ Kĩ, ěg tỹ Cristo ki rānh ke to hā ěg tóg Topē tỹ vāsỹ ěg jyvẽn mū ěn krēm nỹti ja nĩgtĩ, kỹ tóg ěg kanhrān tĩ ja nĩgtĩ. Ti tỹ ěg mrānmrān ri ke ja ti nĩgtĩ, ti vỹ ti. Krēm ěg tóg sigse kỹ nỹti ja nĩgtĩ. ěg tỹ Cristo ki ge kỹ ěg tóg kygvar kỹ nỹti sir. Cristo mur to hā ke ja vỹ, Topē tỹ vāsỹ ěg jyvẽn ja ti. ²⁴ Kĩ tóg ěg jyvẽn ja nĩgtĩ, ěg tỹ Cristo ki rānh ke to jykrén jé. Cristo ki ge tugrĩn ěg tóg Topē mý tỹ ũn há nỹti ha. ²⁵ Kĩ, ěg tỹ ti ki rā kar kỹ ěg tóg Topē tỹ vāsỹ ũn mý: ag jyvẽn nĩ, he mū ěn krēm ke tũ nỹti ha.

²⁶ Topē krē vỹ tỹ ěg nỹti ha, ěg tỹ Jesus Cristo ki ge kỹ. ²⁷ Ti jiji tó kỹ ěg kygpe kỹ nỹti, kỹ ěg tóg ti ri ke nỹti sir, tỹ ti hā ri ken hā vỹ. ²⁸ Hā kỹ ěg tóg tỹ jagnē hā nỹti gé. Kỹ ěg tỹ ti ki ge kỹ Judeu ag vỹ fóg ag ri ke nỹti, kỹ fóg ag vỹ kanhgág ag ri ke nỹti gé. Ũ camarada ag vỹ ājag patrão ri ke nỹti. Ag vỹ fag ri ke nỹti gé. Nén ũ pir vỹ tỹ ěg nỹti, ěg tỹ Jesus Cristo ki ge kỹ nỹtin kỹ. ²⁹ Kĩ, ěg tỹ tỹ Cristo mré ke nỹtin kỹ ěg tóg tỹ Abraão krē'krē ag ri ke nỹti gé sir, ěg kar, kỹ ěg venh ke mū sir, Topē tỹ Abraão mý nén to mū ěn ti.

4 Sỹ ājag mý kāmén mǎn ke vỹ, sỹ nén tó ja ěn ti. Ũn rico kósĩn vỹ ti tũ mǎn kãn ke mū, ti mog kỹ. Ti tỹ ver sĩ nĩn kỹ tóg nén ũ venh ke tũ nĩ ver. Ti panh camarada ri ke tóg nĩ ver, ti sĩ nĩn kỹ. Hā ra ti panh tỹ nén kar vỹ tỹ ti tũ nỹtĩnh ke mū. ² Ge ra ag tóg ver ti kanhrān tĩ,

ti sī nīn kŷ. Kŷ ti kri ke ag ne ti tū to jykrén tī'. Gen kŷ tóg kejēn ti panh tŷ ti mŷ kurā nīm ja ēn pétēm ke mū. Ēn kã tóg ā tū măn kãn ke mū sir. ³ Ge ti nŷgtī ěg mré, ěg tŷ tŷ Topē krē nŷtīn kŷ. Jesus mur ke to hã ěg tóg gŷr ri ke nŷtī ja nŷgtī. Nén kar tãn kamēg ja ěg tóg nŷgtī, krŷg tãn mré hã. ěg sigse ri ke han ja ag nŷgtī, nén tãn ag. ⁴ Kŷ, ti kurā tá krŷg kŷ Topē tóg ā kósín jēnē. Ēprã ke fi ki tóg mur. Moisés tŷ ěg jyvēn tī ěn ki króm kãn ja tóg nŷgtī. ⁵ ěg kren han jé tóg mur, ti tŷ Moisés tŷ ěg jyvēn ja ěn to ěg kygvãn jé sir, ěg tŷ vãhã tŷ Topē krē pē nŷtī jé sir. Tŷ ěg ti krē tū ja nŷtŷgtī vē, hã ra Topē tóg ěg jē'ŷn sór mū ha sir.

⁶ Kŷ ěg tóg tŷ ti krē nŷtī sir. ěg tŷ tŷ ti krē nŷtīn kŷ tóg ěg mŷ ā kuprŷg jēnēg mū sir, ti tŷ tŷ ěg jagrē nī jé. Ti kósín kuprŷg ri ke ti nī, Topē kuprŷg ti. ěg jagrē tag tŷ ěg tóg sir Topē to: “ěg jóg mág,” he tī. ⁷ Hã kŷ ěg tóg tŷ ū camarada ri ke tū nŷtī ha. Topē krē vŷ tŷ ěg nŷtī ha. Kŷ, ěg tŷ tŷ ti krē nŷtīn kŷ ěg tóg ti tŷ nén măn ke mū gé sir, ti tŷ ěg mŷ nén nīm ke ti. Topē tŷ ěg mŷ nén han hã vē.

Paulo tŷ krī kufy nī

⁸ Vãsŷ ājag tóg Topē ki kagtŷg ja nŷtŷgtī. Kŷ ājag tóg ón kŷ vēnh kãgrã hã to: “ěg Topē vē,” he ja nŷgtī. Vēnh kãgrã pi(jé) tŷ Topē nī'. Vēnh kãgrã hã nón mŷn kŷ ājag tóg sigse kŷ nŷtī ja nŷgtī. ⁹ Ūri ājag tóg Topē ki kanhró nŷtī jãvo. Hã ra tóg vãsŷ ājag ki kanhró nī ja nī vē, Topē ti, ha mē. Kŷ ājag tŷ ne jé tŷ nén kar tãn ag mré ke nŷtī măn sór nē? Krój ti nŷtī, nén kar tãn ti, to ěg jagtar' he nŷtī ja nŷgtī, sigse kŷ ěg nŷtī ja nŷgtī, ěg tŷ tŷ ag mré ke ja nŷtīn kŷ. Ājag mŷ sigse kŷ nŷtī măn sór mū'? ¹⁰ Kurã to ājag tóg jykrén sór mū, kurã kórég to, kar kŷ kysã kórég to ke gé, prŷg kórég to ke gé. ¹¹ Inh kanē jur tóg tī, sŷ tag mē kŷ. Inh hŷn fagrŷnh mŷ ag mŷ Jesus kãmén, he sóg tī, mŷr.

¹² Inh kanhkã, inh ri ke nŷtī sórmnī. Ājag mré ke vŷ tŷ inh nī, kŷ inh ri ke han sórmnī. Tag hã to sóg vī mū, ājag mŷ. Ājag pi(jé) inh jū han'. ¹³ Sŷ ājag ki jun vén mū ěn mī ěkré, sŷ ājag mŷ Topē vī tó vén mū ti. Ēn kã sóg kaga nŷ ja nŷgtī. ¹⁴ Kŷ tóg ājag mŷ e tī ja nŷgtī, ājag tŷ inh kaga ven kŷ. Ge ra ājag tóg iso é he ja tū nŷgtī, ti pi(jé) ājag mŷ jēgry ja nŷgtī', inh kaga ti. Inh mŷ vī hã han ja ājag tóg nŷgtī, sŷ tŷ Topē tŷ jēnē jafã nŷn kŷ, ājag mŷ. Ājag tŷ Jesus Cristo ki rŷr mū ěn ri ke han ja ājag tóg nŷgtī isŷ. ¹⁵ Ēn kã tóg ājag mŷ sér pē tī ja nŷgtī. Hã kŷ ājag tóg inh jagãgtãn ja nŷgtī. Isŷ ājag mŷ ājag kanē to vī ra ājag hŷn inh mŷ vŷn ke mū vē. Kŷ ti tŷ ne jé ājag mŷ sér tū tī nē, ŷri? ¹⁶ Ājag mŷ sóg ki hã tó mū. Inh mŷ tag tugrŷn ājag mŷ kórég nī ha'? Inh mŷ tóg e tī, tag ti.

¹⁷ Ū ag tóg ājag mŷ vī há han sór mū. Ag ón vē hã ra. Ag tŷ ājag tŷ inh kato tē han sór vē, hã kŷ ag tóg ón kŷ vī há han sór mū, ājag tŷ ag hã nón mū jé sir, isovãnh kŷ. ¹⁸ Há ti nī vē, nén ū há tŷ ājag mŷ sér nŷn kŷ. Isŷ ājag mré nŷn kŷ nén ū há ěn tóg ājag mŷ sér nī ja nŷgtī. Kŷ ājag tŷ tag tovãnh tū nī kŷ tóg há tī, inh mŷ. Kŷ nén ū há hã to tar nŷtīmŷnī.

¹⁹ Inh krē', ājag mŷnh ri ke vŷ tŷ inh nī. ěg mŷnh fi ne kaga tī', ěg tŷ fi ki mur ken kŷ. Fi kaga tag ri ke han măn inh, ājag to. Ājag tŷ Cristo hã ri ke nŷtīn kŷ tóg há tī, sŷ tag hã ve sór vē, hã jé sóg ěg mŷnh fi kaga ěn ri ke han măn mū, ājag tugrŷn. ²⁰ Sŷ ājag mré nŷnh há tóg tī, sŷ ājag mré vēmén jé, sŷ ājag mŷ kãmén há han jé sir. Sŷ komēr hã ājag mŷ kãmén há tóg tī. Hã ra sóg kanē jur mū, ājag to, hã kŷ sóg vī mū.

Agar fi mré Sara fag to vēnh jykre

²¹ Ājag kãmī ū tóg Moisés tŷ ěg jyvēn ja ěn han sór mū. Ājag hŷn mē kãn ja tū nī, vãsŷ vēnh jykre ěn ti, hã kŷ ājag tóg han sór mū. Ājag tŷ mē há han kãn ja nī

ra ājag h̄yn han s̄or ke tũ nĩ vē. H̄a mē, v̄as̄y v̄enh jykre ēn ti, ājag t̄y n̄en han s̄or m̄ũ ēn ti. ²² Tag v̄y r̄an k̄y nĩ, ha mē. Abraão v̄y k̄osin r̄egre nĩ ja n̄ĩtĩ. Ū m̄ynh fi v̄y t̄y ti camarada fi nĩ, k̄y ū m̄ynh fi v̄y t̄y ti pr̄ũ pē fi nĩ. ²³ K̄y Abraão tóg ā camarada fi mr̄e n̄y ja nĩ, ti t̄y ver kófa tũ ra, k̄y ti k̄osin tóg fi ki mur m̄ũ sir. H̄a ra tóg ā pr̄ũ pē fi ki (tóg) ā kófa ra k̄osin m̄ũ gé sir. Topē t̄y ti m̄y: “ā kófa nĩ ra ā tóg k̄osin ke m̄ũ,” he jan h̄a vē. ²⁴ Topē tóg tag han, ēg t̄y ti jykre ki kanhr̄an jé. Ti t̄y ēg m̄y comparação han h̄a vē, fag to, ha mē. Topē t̄y ēg mr̄e jykren m̄ũ ri ke fag n̄ȳtĩ, Abraão pr̄ũ fag. Agar fi v̄y t̄y Abraão camarada ja n̄ĩtĩ. Ti mr̄e ke pē tũ fi vē. K̄y fi tóg ri ke nĩ, Topē t̄y kr̄ĩ t̄y Sinai tá Moisés m̄y ti t̄y ēg jyv̄en ēn tó ja ti. Tag v̄y Agar fi ri ke nĩ, ti camarada fi ri ke. Ū t̄y v̄enh jykre ēn han m̄ũ v̄y t̄y ū camarada ri ke n̄ȳtĩ, fi kóm. T̄y ag tóg sir Topē mr̄e ke tũ n̄ȳtĩ, ū t̄y Judeu jykre han m̄ũ ag. ²⁵ K̄y Agar fi v̄y kr̄ĩ t̄y Sinai ri ke nĩ, ga t̄y Arábia tá. H̄a ra fi tóg cidade t̄y Jerusalém ri ke nĩ gé, h̄a v̄y: Judeu ag jykre han m̄ũ ag kar, he m̄ũ, h̄a v̄y: Jerusalém, he m̄ũ. T̄y ag Topē mr̄e ke tũ n̄ȳtĩ, ū t̄y Judeu ag jykre han m̄ũ ag. ²⁶ H̄a ra ēg jamā v̄y kanhkā tá nĩ, Jerusalém t̄ag to ken h̄a vē, h̄a v̄y: kanhkā, he m̄ũ. Ēg m̄ynh ri ke vē sir, Abraão pr̄ũ pē fi ri ke vē sir, Jerusalém t̄ag, he m̄ũ tag ti. ²⁷ Tag to tag tóg r̄an k̄y nĩ, ha mē: “kur̄ĩ ā tóg nĩ, kr̄ēg v̄anh ā tóg nĩ. Ge ra m̄y sér t̄imnĩ, jamā há ra pr̄ermnĩ, ā m̄y sér t̄in k̄y, ḡir ū t̄y ā ki mur ja tũ ra. Á kr̄ē v̄y e t̄av̄ĩ n̄ȳt̄inh m̄ũ, ūn kr̄ēg m̄ũ fi kr̄ē e k̄áfór ti n̄ȳt̄inh m̄ũ, ā kr̄ē ti, ā mén t̄y ā fón m̄ũ ra. Ū t̄y fi mén mr̄e t̄i m̄ũ fi kr̄ē k̄áfór ti n̄ȳt̄inh m̄ũ, ā kr̄ē ti,” he ja tóg nĩ, Topē v̄ĩ t̄y r̄an k̄y nĩ ki.

²⁸ K̄y ēg tóg Isaque ri ke n̄ȳtĩ. Topē tóg Isaque to Abraão m̄y: “ā kófa nĩ ra ā tóg k̄osin ke m̄ũ,” he ja nĩ. K̄y ēg tóg Cristo ki ge k̄y n̄ȳtĩ k̄y t̄y Topē kr̄ē n̄ȳtĩ, Topē t̄y: “inh kr̄ē v̄y t̄y ājag n̄ȳt̄inh m̄ũ,” hen

k̄y. Topē v̄ĩ tag tugr̄in ēg tóg Isaque ri ke n̄ȳtĩ. ²⁹ K̄y Abraão k̄osin ve v̄y ti pr̄ũ pē fi k̄osin vóg kón̄an ja n̄ĩtĩ. Abraão v̄y ā kófa tũ ra ā k̄osin ve ēn han, h̄a ra tóg Topē kupr̄ig tugr̄in ā pr̄ũ pē fi k̄osin han, ā kófa pē ra. K̄y ti k̄osin ve v̄y ēgno vóg kón̄an m̄ũ. H̄a k̄y ēg tóg tag v̄ég t̄i gé, ūri. Judeu jykre han m̄ũ ag v̄y ēg vóg kón̄an s̄or t̄i gé ver. ³⁰ K̄y Abraão kr̄ē ag to tag v̄y r̄an k̄y nĩ, ha mē: “ā camarada fi fón nĩ, fi k̄osin mr̄e,” he ja tóg nĩ. “Ā camarada fi k̄osin pi(jé) ā pr̄ũ pē fi k̄osin mr̄e ā tũ m̄an ke m̄ũ”. Ā pir m̄y ti m̄an ke m̄ũ, ā pr̄ũ pē fi k̄osin ti,” he ja tóg n̄ĩtĩ, Topē v̄ĩ t̄y r̄an k̄y nĩ ki, Abraão kr̄ē to. ³¹ K̄y ēg tóg ti pr̄ũ pē fi k̄osin ri ke n̄ȳtĩ. Ēg pi(jé) t̄y ti camarada fi k̄osin ri ke n̄ȳtĩ, ēg t̄y Jesus ki ge k̄y n̄ȳt̄in k̄y.

Jesus t̄y ēg kygv̄an ja

5 K̄y Jesus tóg ēg kygv̄a, v̄enh jykre si to, ēg kygvar k̄y n̄ȳtĩ jé sir. H̄a k̄y Judeu ag jykre ēn han s̄or t̄ug nĩ. Ū t̄y tag to ājag kr̄in s̄or m̄ũ ēn ag kato t̄em̄nĩ, ag nón m̄ũ s̄or t̄ug nĩ, ājag t̄y v̄enh jykre ēn kr̄ēm sigse k̄y n̄ȳtĩ m̄an tũ n̄in jé sir.

² H̄a k̄y sóg ājag m̄y k̄am̄en m̄ũ, inh, h̄a v̄y: Paulo, he m̄ũ. S̄y ājag m̄y n̄en tónh ken h̄a vē, ha mē: ājag t̄y ājag gr̄e junun f̄ar kym k̄y, ājag t̄y Judeu ag jykre han jé, k̄y Cristo v̄y ājag m̄y n̄en ū há han ke tũ nĩ. ³ Ha vé, s̄y tag tó m̄an ke vē gé, ha mē. Ājag t̄y ājag f̄ar kym k̄y ājag han k̄an ke m̄ũ sir, Moisés t̄y ēg m̄y v̄enh jykre n̄im ja ēn ti. ⁴ H̄a ra ājag tóg Cristo tov̄anh ke m̄ũ, ājag t̄y Moisés t̄y ēg jyv̄en t̄i ēn han s̄or k̄y, ājag t̄y Moisés jykre tugr̄in Topē m̄y t̄y ūn há n̄ȳtĩ s̄or k̄y. Topē v̄y ēg jagāgt̄an s̄or m̄ũ. Ājag t̄y Moisés jykre han s̄or k̄y ājag tóg ti t̄y ēg jagāgt̄an tag to é he m̄ũ sir. ⁵ Ājag jāvo ēg tóg ēg t̄y Jesus ki gen k̄y Topē m̄y t̄y ūn há n̄ȳt̄inh m̄ũ. Ēg t̄y ti ki ge k̄y n̄ȳt̄in k̄y ēg tóg Topē kupr̄ig t̄y jagr̄ē n̄ȳtĩ. Ēg jagr̄ē tag tugn̄in ēg tóg Topē m̄y t̄y ūn há n̄ȳtĩ. ⁶ Ha vé, ēg t̄y Jesus Cristo ki ge k̄y n̄ȳt̄in k̄y tóg t̄y

nén ũ tũ tĩ sir, ũn gré junun fár kym ja ti, ũn tỹ kym ja tũ ti ke gé. Ti ki ge kỹ ěg tóg nỹtĩ, kỹ ěg tóg tỹ nén ũ pir nỹtĩ ha, jagně to há ěg nỹtĩ ha.

⁷ Ha vé, mũ há han ja ājag nĩgtĩ. Ājag tỹ ne jé tovānh sór nē? Ājag tỹ ne jé vėnh vĩ há kri nĩm sór tũ nĩ nē? ⁸ Topě tỹ ājag krĩn pijé'. Ti hā ne ājag jé prěr ja nĩgtĩ'. ⁹ Tag to jykrén: fermento sĩ vỹ ěg tỹ pāo kujāgja kỹ kri rĩm ke tĩ, kỹ tóg tỹ sónsón ke kãn ti, tỹ nĩ kãn tóg ti, pāo ti. Topě vĩ kujāgja vỹ ge nĩ, ha mẽ. Ke tũg nĩ. ¹⁰ Ěg Senhor tũ vỹ tỹ ājag nỹtĩ. Hā kỹ sóg ājag to: “ag hỹn ti tovānh ke tũ nĩ,” he tĩ, “ag hỹn ti japry, ti jamĩn jagma mũ mǎn ke mũ,” he sóg tĩ. Ũ tỹ ājag krĩn mũ ěn ne vėsỹrénh ke mũ', ājag krĩn kónān ja tag to, ti tỹ tỹ pǎ'i nĩ ra.

¹¹ Inh pi(jé) ěg gré junun fár kym to: “ke ra,” he tĩ'. Isỹ ag mré tag tó ra ag hỹn inh vóg kónān ke tũ nĩ vė. Isỹ ag mré tag tó ra ag hỹn iso jũnh ke tũ nĩ vė. Ěg tỹ ěg fár kym tugrĩn krenkren tĩ ra ěg tóg Jesus tỹ ka to sa ja ěn to krenkren ke tũ nĩ vė, kỹ tóg ag mỹ sér tĩ vė, isỹ vėnh jykre si tó tĩ ra. Hā ra sóg tó tũ nĩgtĩ. ¹² Ũ tỹ tag tó mũ ag jé ājag grǎfy kym kãn, ũ tỹ ājag krĩn kónān mũ tag ag.

¹³ Hā ra Topě tóg ěg jé prěr, ti tỹ ěg kygvān jé. Ti tỹ ěg kygvān kỹ ěg kygvar kỹ nỹtĩ ha. Ge ra ěg tóg ěg tỹ vėsóg ki nén to jykrén mũ ěn han sór ke tũ nĩ, ti kórég nĩn kỹ. Ěg tũ hā han ke tũ ěg nĩ. Ěg tỹ jagně to há nỹtĩ tag hā ne há nĩ'. Jagně ki rĩr to ken hā vė. ¹⁴ Ha vé, Topě tỹ ěg jyvėn e ěn ki króm kãn jé ěg tóg ke mũ, ěg tỹ nén ũ pir han kỹ, hā vỹ: “ã régre ki rĩr há han nĩ, ã tỹ vėnh ki rĩr há ri ke han nĩ, ã régre ki,” he mũ. ¹⁵ Jāvo ājag tóg mĩg ri ke jagně mǎn sór mũ, jagně to jũn kỹ. Jagně tỹ tũ he jé ājag tóg ke mũ, ge kỹ, ha vemnĩ.

Ěg tỹ ěg tỹ nén to ěn mũ ěn han ke tũ

¹⁶ Hā kỹ sóg ājag mỹ: “Topě kuprĩg tỹ ājag mỹ nén tó mũ ěn hā han nĩ,” he sór

mũ. Kỹ ājag tóg ājag tỹ nén to ěn mũ ěn han ke tũ nĩ. ¹⁷ Ěg tỹ nén to ěn mũ vỹ Topě kuprĩg tỹ ěg mỹ nén tó mũ ěn kato tẽ nĩ, kỹ Topě kuprĩg vỹ ěg tỹ nén to ěn mũ ěn kato tẽ nĩ gé. Jagně to rará ag tóg tĩ, hā kỹ ěg tóg ěg tỹ nén han sór mũ ěn han ke tũ nĩ. ¹⁸ Ěg tỹ hā ra Topě kuprĩg tỹ ěg mỹ nén tó mũ ěn han kãn kỹ tóg ěg se mǎn ke tũ nĩ sir, Topě tỹ vāsỹ ěg jyvėn ja ěn ti.

¹⁹ Ěg tỹ vėsóg ki nén to jykrén mũ ěn vỹ kórég nĩ, kỹ vėnh kar vỹ ki kanhró nỹtĩ. Ěg tỹ vėsóg ki nén to jykrén to ken hā vė, hā vỹ: mén tũ mré nỹ, he mũ, prũ tũ mré nỹ, he mũ, nén ũ kavėj han tĩ, he mũ, ěg tỹ nén to ěn mũ kar han tĩ, he mũ, ²⁰ ěg tỹ vėnh kǎgrá to: Topě vė, he tĩ, he mũ, kujá jykre han tĩ, he mũ, curandeiro jykre han tĩ, he mũ, jagně kato vāsān tĩ, he mũ, jagně to ājag fe tỹ gỹm ke (ka)mě, he mũ, jagně tũ to jykrén kónān tĩ, he mũ, vėsỹ ũn mág han sór mũ, he mũ, jagně vĩ kato tẽ mũ, he mũ, ²¹ jagně tũ to ěn tĩ, he mũ, kronkron tĩ, he mũ, krĩn tũ, he mũ, vėnh jykre pāno han tĩ tỹ hėn ri ke ke gé. Tag to sóg ājag jyvėn huri, hā ra sóg tó mǎn sór mũ. Ũ tỹ tag han mũ ag pi(jé) Topě tỹ tỹ ěg pǎ'i nĩ venh ke mũ'.

²² Topě kuprĩg tỹ ěg kanhrān mũ vỹ tag ri ke tũ nĩ. Há kar ti nĩ. Ti tỹ ěg kanhrān to ken hā vė, hā vỹ: jagně to há, he mũ, mỹ sér tĩ, he mũ, krĩ kuprǎ, he mũ, jagně to fe há nỹtĩ, he mũ, koměr hā vĩ, he mũ, jagně jagǎgtān tĩ, he mũ, jagně mỹ ón vānh, he mũ, ²³ vėsỹ ũn mág han sór tũ, he mũ, vėsó jykrén tĩ, he mũ. Topě pi(jé) tag kato tẽ tĩ', ti tỹ vāsỹ ěg jyvėn ti vỹ tag ri ke ja nĩgtĩ gé. ²⁴ Ěg tỹ tỹ Jesus Cristo tũ nỹtĩn kỹ, kỹ ěg tóg tỹ ti tỹ ka to sa ja ěn ri ke nỹtĩ. Hā kỹ ěg tóg ěg tỹ nén to ěn mũ ěn han mǎn sór ke tũ nĩ ha sir, ěg tỹ nén ki vėtĩ mũ ěn han mǎn sór ke tũ ěg nĩ ha.

²⁵ Ěg tỹ Topě kuprĩg tỹ jagrě nỹtĩn kỹ, kỹ ěg tóg ti tỹ ěg mỹ nén tó mũ ěn han

kān ke mū sir, ti kuprīg tỹ ěg mỹ nén tó mū ěn ti. ²⁶ Kỹ ěg tóg sir tỹ ũn mág nỹtĩ sór ke tũ nĩ, jagnē jũ han mǎn sór ke tũ ěg nĩ, jagnē tũ mǎn sór ke tũ ěg nĩ gé. Vēnh jykre há hǎ han jé ěg tóg ke mū.

Ěg tỹ jagnē jagāgtān ke

6 Inh kanhkā', kejēn ājag kāmĩ ũ tóg kygnēg tĩ, vēnh vatánh tá. Kỹ ũ tỹ kygnēg mū ěn mỹ: “kygnē ā mỹr,” hemnĩ, ājag tỹ Topē kuprīg tỹ jagrē nỹtĩn kỹ. Komēr hǎ ti mỹ tómnĩ, ti tỹ kygnēg mū ěn ti. Kỹ vēsō jykren há han nĩ gé, ājag tỹ ti tỹ kygnē ěn ri ke han tũ nĩ jé, ti kóm. ² Jagnē ajudar hemnĩ, ājag mré ke ũ tỹ jagtar nĩn kỹ. Cristo tỹ ěg jyvēn mūn hǎ vē. ³ Kejēn ũ tóg vēsóg ki vēsỹ ũn mág han sór tĩ. Hǎ ra tóg tỹ nén ũ tũ nĩ. Kygnēg ti tĩ, ũ tỹ tag to jykrēn mū ti. Vēnh hǎ mỹ tóg ón mū sir. ⁴ Ājag jykre tugnỹm nĩ. Ti há nĩn kỹ tóg há tĩ, kỹ tóg tỹ ũn há nĩ, ũ tỹ vēnh jykre há han mū ěn ti. Jagnē mỹ: inh jykre há vỹ ā jykre há kǎfór nĩ, he tũg nĩ. ⁵ Topē hǎ ne ěg ki ěg jykre há ěn vég tĩ', kar kỹ tóg ěg mré ke ag jykre ki kanhró nĩ gé, Topē ti.

⁶ Kejēn ũ tóg ājag mỹ Topē vĩ kāmén mū. Tĩ mỹ ājag tỹ nén ũ nĩmnĩ, ti tỹ ājag mỹ kāmén mū kaja ti.

⁷ Kygnē tũg nĩ, ěg tỹ Topē to é he kỹn pí(jé) há nĩ'. Ěg tỹ ón kỹ: vēnh jykre há kǎgmĩ kỹ inh nĩ ha, hen kỹ tóg ěg kren han ke tũ nĩ. Topē vỹ ěg jykre ki kanhró nĩ. ⁸ Ge ti nĩgtĩ, ěg tỹ nén han mūn ti. Ěg tỹ ěg tỹ nén to ěn mū ěn han kỹ ěg tóg ter ke mū sir. Kỹ tog ěg tỹ mandioca ko vǎnh krǎn kỹ ti nin ko kỹ ti tỹ ěg tén ěn ri ke nĩ sir. Ěg tỹ Topē kuprīg tỹ ěg mỹ nén tó mū ěn han kỹ ěg tóg rĩr krỹg ja tũ ěn venh ke mū, kỹ tóg ěg jakré tỹ kanēn há han kỹ ěg tỹ ko ěn ri ke nĩ sir. ⁹ Hǎ kỹ nén ũ há han to krónh ke tũg nĩ. Ve jé ěg tóg ke mū, ti kanē há ěn ti, Topē tỹ ěg mỹ nén ũ há han ke ti, ěg tỹ Topē jykre há tovǎnh tũ nĩn kỹ. ¹⁰ Hǎ kỹ ěg tóg vēnh kar jagāgtān ke mū. Kỹ tóg há tǎvĩ nĩ, ěg

tỹ ěg mré Jesus ki ge kỹ nỹtĩ ag jagāgtān ti.

Paulo tỹ ag jyvēn mǎn

¹¹ Ha vé, rá mág han sóg tĩ, sỹ vēsóg ki ājag mỹ rán kỹ.

¹² Ũ ag tóg ājag kutān tĩ, ājag tỹ ājag gré junun fǎr kym jé. Ag tỹ vēnh mỹ nén ũ há han sór vē, ha mē. Judeu ag tóg ěg vóg kónān tĩ, ěg tỹ fóg ag mỹ: “ājag gré junun fǎr kym nĩ,” he tũ to. Ũ tỹ ājag kutān mū ag vỹ Judeu tỹ ag vóg kónān ěn ve sór tũ nĩ. Cristo tỹ cruz to sa ja ra ag vēsỹrénh sór tũ nĩ, hǎ kỹ ag tóg ājag mỹ: “hǎ ājag fǎr kym nĩ,” he mū. Ag vĩ jēmē tũg nĩ. ¹³ Ha vé, ag tỹ ājag gré junun fǎr kym ja ra ag tóg Topē tỹ vǎsỹ ěg jyvēn tĩ ěn han kān ja tũ nĩgtĩ. Hǎ ra ag tóg ājag mỹ ājag tỹ vēnh kym ke ti tó mū, ag tỹ vēnh kar mỹ ājag tỹ nén han mū tó jé sir. Tag ki ag tóg tỹ ũn mág nỹtĩ sór mū, vēsóg ki. ¹⁴ Ag jǎvo sóg tỹ ũn mág nĩ sór tũ nĩ. Nén pir tóg inh mỹ sér tĩ, hǎ vỹ: ěg pǎ'i tỹ Jesus Cristo tỹ cruz to sa ja ěn, he mū. Kỹ ěprǎ ke jykre inh mỹ tũ tĩ ha. Jesus tỹ cruz to sa kỹ tóg inh mỹ tỹ tũ' he ja nĩ, ěprǎ ke jykre tỹ, Jesus ti. Kỹ sóg han sór tũ nĩ ha. Jǎvo sóg cruz to sa ri ke han kỹ nĩ gé, ěprǎ ke jykre mỹ sóg hur tũg. Sỹ han tũ to ken hǎ vē. ¹⁵ Ũ ag tóg ājag fǎr kym tĩ, jǎvo ũ ag tóg kym tũ nĩ gé. Hǎ ra tóg tỹ nén ũ tũ nĩ gé. Topē mỹ ěg há nỹtĩ, ěg tỹ ti ki ge kỹ nỹtĩn kỹ. Topē vỹ ěg han mǎn, kỹ ěg tóg tỹ ũn tǎg nỹtĩ ha. Tag hǎ ne há nĩ'. ¹⁶ Ũ tỹ vēnh jykre tǎg tag han mū ag krĩ kuprǎg ti tĩ, Topē ti, ũ tỹ ge jagāgtān ti tĩ. Topē tũ ag hǎ vē ha. Israel pē ag hǎ vē sir.

¹⁷ Kỹ inh kutān mǎn tũg nĩ, inh vēsỹrénh han mǎn tũg nĩ. Jesus vēsỹrénh ja ěn ri ke han inh mỹr, hǎ kỹ sóg ti ri kén kygven kỹ nĩ ha.

¹⁸ Inh kanhkā', ěg pǎ'i tỹ Jesus Cristo jé ājag tar han, ti jé ājag krĩ kuprǎg. Hǎ vē.

PAULO TỠ CARTA HAN: ÉFESO TÁ KE AG MỠ CARTA

1 Paulo tỡ rá vễ. Isỹ cidade tỡ Éfeso tá ke ag mỡ rán hã vễ. Jesus Cristo vỹ inh fêg', sỡ tỡ ti apóstolo jê jê, Topê tỡ isỹ apóstolo han kỡ. Hã kỡ sóg ajag mỡ carta tag rán mủ. Topê tũ vỹ tỡ ajag nỹtĩ, kỡ ajag tóg cidade tỡ Éfeso tá Jesus to vễnhmãn ti. Jesus Cristo to vãnh ti ajag tóg nỹtĩ. ²Êg jóg tỡ Topê jê ajag tar han, ti jê ajag krĩ kuprêg, êg Senhor tỡ Jesus Cristo ti ke gé.

Cristo tỡ êg mỡ vỹ há han mủ

³Êg kar jê Topê mỡ vỹ há han, êg jê ti mỡ agradecer hé, êg Senhor tỡ Jesus Cristo panh mỡ. Êg tỡ Cristo ki ge kỡ nỹtĩn kỡ tóg êg mỡ kanhkã ti ven sór mủ, Topê ti. Tá tóg êg mỡ nén (ũ) há kar ven sór mủ gé, kỡ nén ũ tóg êg mỡ tũ' henh ke tũ pẽ nĩ, tá. Hã jê tóg êg mỡ ã kuprĩg jênê, êg tỡ ti tugrĩn nén (ũ) há kar ve jê. ⁴Vãsỹ tóg êg kuprêg ja nĩ, ã tỡ nén (ũ) kar han ke to hã tóg êg kuprêg ja nĩ, Topê ti, êg tỡ tỡ ti tũ nỹtĩ jê, Cristo tugrĩn. Êg tỡ ti ri ke nỹtĩ jê tóg êg kuprêg, êg tỡ kygnêg tũ nĩ jê. Ti fe vỹ tỡ êg nỹtĩ. ⁵Hã kỡ tóg êg kuprêg, êg tỡ tỡ ti krê nỹtĩ jê, Jesus Cristo tugrĩn. Ti hã ne vêsóg ki êg kuprêg ke to jykrên ja nĩgtĩ'. ⁶Êg tỡ ti mỡ vỹ há han jê tóg êg kuprêg. Ũn mág vỹ tỡ ti nĩ, êg jagãgtãn tóg ti, hã kỡ tóg há tĩnh mủ, êg tỡ ti mỡ agradecer hen kỡ. Ti kósĩn pĩr tugrĩn êg tóg tỡ ti fe pẽ nỹtĩ. ⁷Ti hã ne êg kren han tĩ', ti kyvénh tỡ êg jagfỹ kãkutê ja nĩn kỡ. Tỡ tóg êg tỡ Topê vỹ mranh ja ên tỡ tũ' he ja nĩgtĩ, ã kyvénh tỡ. Topê tỡ êg mỡ nén ũ há han hã vễ. ⁸Hã ra tóg tũ' henh ke tũ nĩ, ti tỡ êg mỡ nén nĩm ja tag tĩ. Krĩ há ti nĩ, nén kar to jykrên há han ti tĩ, Topê ti. ⁹Vãsỹ tóg to jykrên ja nĩgtĩ, kỡ tóg ũri êg mỡ tó mủ sir, ti tỡ Cristo tugrĩn nén han sór mủ ti. ¹⁰Cristo tỡ tóg ũn mág han sór mủ,

vẻnh kar kri ke, kanhkã tãn ag kri ke, ga kri mủ ag kri ke gé, kỡ vẻnh kar vỹ tỡ ti krêm ke nỹtĩnh mủ. Povo pĩr ri ke ag nỹtĩnh mủ, kurã ên kã. Ti kurã ki tóg ti tỡ ũn mág han sór mủ ha, Topê ti.

¹¹Êg tỡ Cristo ki ge kỡ nỹtĩ kỡ êg tóg venh ke mủ gé, Topê tỡ ã tũ ag mỡ nén ven ke mủ ên ti. Êg tỡ ên ve jê Topê tóg êg kuprêg ja nĩ, ti tỡ êg kuprêg to jykrên kỡ. Nén kar to tóg jykrên há han tĩ, vêsóg ki, kỡ tóg êg kuprêg to jykrên ja nĩ gé, ¹²êg tỡ Jesus hã pin kỡ ti ki êvánh jê. Êg tỡ ti ki êvánh kar kỡ êg tóg vãnh Topê mỡ vỹ há han ki kanhró nỹtĩ. Ti hã ki êvánh kỡ êg tóg Topê to: “ũn mág vỹ tỡ ti nĩ,” he' he ti sir.

¹³Ti kãme mẽ ja ajag tóg nĩgtĩ gé, vẻnh vỹ há ên, ti tỡ êg krenkren han sór mủ kãme. Ti kãme ên mẽ kỡ ajag tóg ti ki ge jêg. Kỡ Topê tóg ajag mỡ ã kuprĩg jênê. Tỡ tóg ajag jagrên há han. Ti tỡ ajag nĩgjêg hã vễ, ã kuprĩg tỡ. ¹⁴Êg jagrê tugrĩn êg tóg ki kanhró nỹtĩ, ti tỡ êg mỡ ã tỡ êg mỡ nén tó ja ên ven kãn ke ti. Kejên êg tóg venh ke mủ, ha vemnĩ, êg tỡ tỡ ti tũ nỹtĩn kỡ, kỡ tóg êg mỡ sér tĩnh mủ. Kỡ êg tóg ti mỡ vỹ há han ke mủ, ti tỡ tỡ ũn mág jên kỡ.

Paulo tỡ Topê mré vỹ mủ

¹⁵Ájag tỡ êg Senhor tỡ Jesus ki ge mẽ kỡ inh nĩ, ájag tỡ jagnê to há nỹtĩ ti ke gé, ájag tỡ ũ tỡ Jesus ki ge kỡ nỹtĩ ag kar to há nỹtĩ ti. ¹⁶Hã kỡ sóg ajag to Topê mỡ: “há ti nĩ,” he ti. Ájag to ti mré vêmén to krónh ke vãnh inh nĩgtĩ. ¹⁷Êg Senhor tỡ Jesus Cristo panh mré sóg vêmén tĩ, êg jóg mré, ũn mág pẽ ên mré. Ti mré vêmén kỡ sóg ti mỡ: “ã kuprĩg tỡ ag krĩn nĩ,” he tĩ, “ã kuprĩg tỡ ag mỡ vẻnh kãmén há han nĩ, ag tỡ ã ki kanhrãn há han jê,” he sóg tĩ. ¹⁸“Ha ag mỡ krĩ há nĩm. Ha ag kanê tar han, ag tỡ ve há han jê. Ag kuprêg ja ã tóg nĩ, ã tỡ ag mỡ nĩm jê, ã tỡ nén tó ja ên ti. Ag tỡ tỡ ã tũ nỹtĩn kỡ ã tóg ag mỡ ã tũ vin ke mủ, ã tỡ nén tó

mũ ên ti, hã ra tóg e tâvĩ nýtĩ, ã tỹ ag mỹ nén vin ke mũ ên ti. ¹⁹Tar tâvĩ ã tóg nĩ gé, kỹ ã tóg ag mỹ nén kar há han tĩ tag ki, tá ke gé, ag tỹ ã ki ge kỹ nýtĩn kỹ. Ag mỹ tag kãmén nĩ,” he sóg tĩ, Topê mỹ.

²⁰Ti tar tâvĩ nĩn kỹ tóg Cristo ter kar kỹ ti rĩn măn ja nĩgtĩ gé. Kỹ tóg ti mỹ: “ha inh pējja tá nĩ,” he ja nĩ gé, kanhkã tá. ²¹Ti tỹ tóg pã'i mág han, kỹ tóg tỹ pã'i kar ag kri ke jê, kanhkã tân kar ag kri ke, êg tỹ ùn vэг tú kar ag kri ke, ùn tar ag, ùn mág ag. Tỹ tóg ag kri ke kar jê, Cristo ti, kỹ ti jiji vỹ vènh kar ag jygji kãfór nĩ gé, êg tỹ ùri ùn tó mũ ag jygji, êg tỹ kar kỹ ùn tónh ke ag jygji mré hã. ²²Kỹ Topê tóg ti krêm vènh kar vin kãn. Kỹ tóg tỹ vènh kar kri ke jê sir, Cristo ti. Kỹ tóg tỹ êg kri jê nĩ sir, êg tỹ tỹ ti tũ nýtĩn kỹ. ²³Jãvo êg tóg ti há ri ke nýtĩ gé sir, kỹ êg tóg tỹ ùn pir nýtĩ jagnê mré, Jesus ti mré ke gé. Êg há vỹ ã pir mỹ tỹ nén ù tũ nĩ. Êg krĩ mré tóg tỹ nén ù pir nĩ, êg há ti. Ri ke ti nĩ, êg tỹ Jesus mré tỹ ùn pir nýtĩ ti. Ti hã vỹ nén kar rĩr han tĩ, Jesus ti.

Ti ki ge kỹ êg rĩnrĩr nýtĩ

2 Vãsỹ ãjag tóg nũgme ki vár ke mũ vè, ãjag tỹ ti vĩ ki króm ja tũ nĩn kỹ, ãjag tỹ ti vĩ mranh ja nĩn kỹ. ²Ên kã ãjag tóg êprã ke ag jykre pãno jagma mũ ja nĩgtĩ, Nén-Kórég pã'i mág ên tỹ ãjag krĩn kỹ, ù tỹ nén ù ù tân ag kri pã'i ên tỹ ãjag krĩn kỹ. Tỹ ti krĩg tân ag kri pã'i nĩ gé. Ên vỹ tỹ ù tỹ Topê vĩ mranh tĩ ag jagrê nĩ mỹr. ³Vãsỹ êg tóg tỹ ti tũ nýtĩ ja nĩgtĩ gé, ti krê ag ri ke. Ên kã êg tóg êg tỹ nén to én mũ ên han ja nĩgtĩ, êg tỹ nén to jykrén mũ kar ên ti. Kỹ Topê tóg êg vóg kónãn mũ vè, ti tỹ ag vóg kónãn ke ên ri ke.

⁴Hã ra Topê tóg êg jagãgtãn pè han. Êg to tóg há tâvĩ nĩ, kỹ êg tóg tỹ ti fe nýtĩ. ⁵Êg tỹ ti vĩ mranh ja nĩn kỹ êg tóg vèser ri ke nýtĩ ja nĩgtĩ, hã ra tóg êg rĩnrĩn măn ja nĩgtĩ, Cristo mré. Ti tỹ êg jagãgtãn kỹ tóg êg krenkren han ja nĩgtĩ. ⁶Cristo mré

tóg êg rĩnrĩn măn ja nĩgtĩ gé. Kanhkã tá tóg êg tỹ ùn mág han ke mũ, Jesus Cristo mré hã. ⁷Tag ve kỹ vènh kar vỹ ki kanhró nýtĩn mũ, Topê tỹ Jesus Cristo tugrĩn êg to há tâvĩ nĩn ki. Hã jê tóg êg mỹ nén ù há ên ven ke mũ. Tũ he jãvãnh ti nĩ, ti tỹ êg mỹ nén ven ke ti. Ti tỹ Jesus Cristo to há nĩn kỹ tóg êg mỹ nén ù há kar ven ke mũ.

⁸Ha vé, ti tỹ êg jagãgtãn kỹ tóg êg kren han ja nĩgtĩ, êg tỹ ti ki ge kỹ nýtĩn kỹ. Êg tỹ vèsóg ki vènh kren han pijé'. Topê tỹ êg kren han ja vè mỹr. Kỹ tóg ti tỹ êg mỹ presente han ri ke nĩ. ⁹Êg vãsãn pijé'. Êg tỹ êg vãsãn to kren tĩ ra êg Topê mỹ: “há inh nĩ, vãsãn ja inh nĩ, hã kỹ sóg kren mũ,” henh mũ vè. Hã ra êg pi(jé) êg vãsãn to kren ke mũ'. Ti tỹ êg jagãgtãn vè mỹr. ¹⁰Ti hã ne êg han măn ja nĩgtĩ'. Jesus Cristo tỹ tóg êg han ja nĩgtĩ, êg tỹ vènh jykre há han jê. Topê vỹ êg mỹ vènh jykre há tag nĩm kãn, êg tỹ vènh jykre tag jagma mũ jê.

Êg tỹ Cristo mré tỹ ùn pir nýtĩ

¹¹Ãjag tỹ vãsỹ nén han tĩ ja ên mĩ êkré. Fóg vỹ tỹ ãjag nýtĩ, Judeu ag tỹ ù to: “ùn gré junun fár kym ja tũ ag,” he mũ ên ag vỹ tỹ ãjag nýtĩ. Jãvo Judeu ag vỹ ãjag gré junun fár kym tĩ. Hã ra êg fár vỹ tỹ êprã ke nĩ. ¹²Û tỹ kym tĩ ag jãvo ãjag tóg vãsỹ Cristo ki kagtĩg ja nýtĩgtĩ, kỹ ãjag pi(jé) tỹ Israel ag mré ke nýtĩ ja nĩgtĩ', vãsỹ. Topê tỹ Israel jóg'jóg ve ag mré nén ù to jykrén mũ ên ki kagtĩg ja ãjag tóg nýtĩ gé, Topê ki kagtĩg ja ãjag tóg nýtĩgtĩ gé, kỹ ãjag tóg Topê tỹ êg mỹ nén ven ke mũ tag ki kagtĩg ja nýtĩgtĩ gé. ¹³Ên kã tóg ãjag mỹ kuvar gy nĩ ja nĩgtĩ, Topê ti. Ûri tóg ãjag mỹ kakó nĩ ha, Topê ti, ãjag tỹ Jesus Cristo ki ge kỹ nýtĩn kỹ. Ti tỹ êg jagfỹ ã kyvènh kujên ja tugrĩn tóg ãjag mỹ kakó nĩ ha.

¹⁴Ûri êg tóg tỹ povo pir ri ke nýtĩ, Judeu ag, fóg ag, kanhgág ag. Topê hã ne êg tỹ jagnê to há nýtĩ tag han'. Jagnê fyn

kỹ ẽg tóg nỹtĩ ja nĩgtĩ, hã ra tóg vãfynyn ẽn kókén, Jesus ter kỹ. Ẽg tỹ tóg povo pir ri ke han, ẽg tỹ jagnẽ kato vãsân măn tũ nĩ jé. ¹⁵Topẽ tỹ vãsỹ Judeu ag jyvẽn tĩ ẽn tỹ tũ' he ja tóg nĩgtĩ, ti tỹ ag jyvẽn kar ẽn tỹ. Ẽ ter tugrĩn tóg tỹ tũ' he ja nĩgtĩ, ti tỹ ẽg mỹ ù tãg nĩm jé sir. Nén ù régre tỹ tóg ùn pir han ja nĩgtĩ, ù tãg, ẽg tỹ jagnẽ kato vãsân măn tũ nĩ jé. Topẽ tỹ nén to jykrén mũn hã vẽ. Cristo tugrĩn tóg ẽg tỹ ùn pir han, ẽg tỹ tỹ vẽn kanhkã pir nỹtĩ jé. ¹⁶Cristo vỹ ả ter kỹ Topẽ tỹ ẽg kar to há nĩ han, Judeu mré Judeu tũ ag to. Ti tỹ cruz to sa kỹ tóg Topẽ tỹ ẽg kato tẽ ẽn tỹ tũ' he kãn ja nĩgtĩ.

¹⁷Jesus tỹ nén han jan hã vẽ. Kỹ tóg Topẽ tỹ ẽg to há nĩ tag tó ja nĩ, ảjag mỹ, ảjag tỹ tỹ Judeu tũ ra, ẽg mỹ ke gé, ẽg tỹ tỹ Judeu nỹtĩn mỹ. ¹⁸Ti tugrĩn ẽg tóg ẽg jóg tỹ Topẽ mré vẽnén tĩ ha, ảjag, ảjag tỹ tỹ Judeu tũ ra, ẽg ke gé, ẽg tỹ tỹ Judeu nỹtĩ ag ke gé. Ti kuprĩg vỹ tỹ ùn pir nĩ, hã tỹ ẽg kar tóg ti mré vẽnén tĩ.

¹⁹Hã kỹ ảjag kórég tũ nỹtĩ ha. ảjag pi(jé) tỹ ẽmã ù tá ke nỹtĩ ha', ti mỹ, ảjag tỹ tỹ fóg nỹtĩ ra, ảjag tỹ tỹ kanhgág nỹtĩ ra ke gé. Ẽg mré ke vỹ tỹ ảjag nỹtĩ ha, Topẽ tũ vỹ tỹ ảjag nỹtĩ ha. Topẽ krẽ vỹ tỹ ảjag nỹtĩ ha. ²⁰Topẽ jo ỉn ri ke vỹ tỹ ẽg nỹtĩ. Ti nũna runrur ri ke vỹ tỹ apóstolo nỹtĩ, Topẽ vĩ tó tĩ ag mré. Ti nũna téj ri ke vỹ tỹ Jesus Cristo nĩ. Ti kuge ri ke vỹ tỹ ảjag nỹtĩ, ẽg mré. ²¹Ỉn nũna tugrĩn ỉn tóg jẽ nĩ, kỹ tóg komẽr hã kar kỹ jẽn hũ. Ti kar kỹ jẽ kỹ tóg tỹ ẽg Senhor tũ jẽ sir. ²²Cristo vỹ komẽr hã ti han mũ, ỉn kar ri ke ti, hã vỹ: ẽg, he mũ. Kỹ Topẽ kuprĩg vỹ krẽm ẽmãn nĩ, ẽg kãkã. Ừ tỹ Jesus ki ge mũ ag to ken hã vẽ.

Paulo tỹ fóg mré kanhgág ag mỹ Jesus kãmén

3 Hã kỹ sóg Topẽ mré vĩ tĩ, ỉnh, hã vỹ: Paulo, he mũ. Se kỹ ỉnh jé, Jesus Cristo tugrĩn. Isỹ ảjag to há jẽn kỹ sóg se kỹ jẽ, isỹ ù tỹ Judeu jykre han tũ kar

ag to há jẽn kỹ. ²Ảjag hỹn tóg Topẽ tỹ isar han, mũ ẽn mẽ. Isỹ ảjag ki rĩr jé tóg isar han, isỹ ù tỹ Judeu jykre han tũ ag ki rĩr jé. ³Topẽ ne ỉnh mỹ ả tỹ vãsỹ nén to jykrén mũ ẽn tó', hã ra ẽg tóg ki kagtĩg ja nỹtĩgtĩ. Vãhã tóg ỉnh mỹ tó mũ ha', hã kỹ sóg ảjag mỹ kãmén sĩ han huri, Topẽ tỹ nén ù tãg to jykrén mũ ẽn ti. ⁴Ảjag tỹ ỉnh vẽn rãn tag ve kỹ ảjag tóg vẽn ke mũ sir, ỉnh jykre ti. Cristo vỹ nén ù tãg han jé kătĩg ja nĩ, ẽn ki kanhro sóg nĩ. ⁵Ti tỹ ỉnh mỹ tag tó to há ag tóg ki kagtĩg ja nỹtĩgtĩ, ẽg jóg'jóg ag, ẽprã ke kar ag. Ừi tóg ẽg mỹ tó mũ, Topẽ ti, ả kuprĩg tỹ. Apóstolo ag mỹ tóg tó mũ ha, ừi, ti tũ ag mỹ, ẽg jyvẽn tĩ ag mỹ ke gé. ⁶Ti tỹ ẽg mỹ nén ù tãg tó mũn hã vẽ, ha mẽ. Vãsỹ Topẽ tóg Judeu ag hã mỹ vĩ há han ja nĩ. Ừi tóg fóg ag mỹ, kanhgág ag mỹ vĩ há han mũ ha, Judeu ag mré. Ẽg kar vỹ tỹ Jesus Cristo há ri ke nỹtĩ ha, ẽg tỹ ti ki ge kỹ nỹtĩn kỹ. Topẽ tỹ Judeu ag mỹ nén tó mũ ẽn, ẽg tỹ Jesus Cristo tugrĩn nén vẽn ke mũ ẽn ve kãn jé ag tóg ke mũ gé, ẽg mré, fóg ag, kanhgág ag. Ừ tỹ Jesus ki ge kỹ nỹtĩ ag hã vỹ vẽn ke mũ.

⁷Tag to Topẽ tóg ỉnh mỹ: “hã fóg kar ag mỹ, kanhgág kar ag mỹ tónh tĩg,” he ja nĩgtĩ, kỹ tóg tag to isar han. Ti tar nĩn kỹ tóg isar han, ỉnh rãnhrãj to. ⁸Topẽ tũ kãsir ag kar jakrẽm ỉnh nĩ, hã ra tóg isar han, sĩ fóg ag mỹ, kanhgág ag mỹ Cristo kãmén jé. Cristo tugrĩn tóg ẽg mỹ nén (ũ) há tãvĩ han ke mũ, Topẽ ti. Hã tó sóg tĩ, vẽn hã kar mỹ. ⁹Vẽn hã kar mỹ sóg kãmén tĩ, Topẽ tỹ nén han ke ti, ti tỹ ả tỹ vãsỹ nén to jykrén mũ tag han ke ti. Vãsỹ tóg to: “tag han jé sóg ke mũ,” he ja nĩgtĩ. Ti tỹ nén kar han tũg ki tóg to jykrén ja nĩgtĩ. Ti hã ne nén kar han'. Kỹ tóg, ả tỹ ẽn han ke to jykrén mũ ra tóg ù mỹ tó ja tũ nĩ ver. ¹⁰Ừi tóg ve há tĩ ha, ti tỹ vãsỹ nén to jykrén mũ ẽn ti. Kanhkã tãn ag mỹ tóg ve há tĩ ha, tá pã'i ag mỹ, Topẽ krĩ há tag vỹ ve há tĩ ha, ti jykre há pẽ

ên ti. Ag tỹ ù tỹ Jesus ki ge kỹ nỹtĩ ag ve kỹ ag tóg Topê jykre ki kanhró nỹtĩ, kanhkā tân ag.

¹¹Vāsỹ tóg to jykrén, Topê ti, ti tỹ êg pā'i tỹ Jesus Cristo tugrĩn nén (ũ) han sór mũ ên ti. ¹²Ti hā ki êg ge kỹ nỹtĩ, hā kỹ êg tóg jatun mỹ Topê mré vēmén tĩ ha. Êg kanê jun măn ke tũ ti nĩ ha, Topê ti. ¹³Hā kỹ sóg ājag mỹ: “sỹ ājag jagfỹ jagtar nĩ tag to jykrén tũg nĩ,” he mũ. Inh jagtar mĩ êkrén kỹ Jesus to krónh ke sór tũg nĩ gé. Ājag jagfỹ ke vê, isỹ nén vég mũ tag. Inh jagtar tag tugrĩn ājag tóg nén ù há venh ke mũ, ha vemnĩ.

Cristo tỹ êg to há nĩ

¹⁴Hā jé sóg Topê mré vēmén tĩ. Êg jóg vê mỹr. ¹⁵Ti tugrĩn êg tóg rĩnrĩr nỹtĩ, êprā ke kar, kanhkā tá ke kar ke gé, kỹ tóg êg ki rĩr tĩgtĩ. ¹⁶Kỹ sóg ti hā mỹ to vĩ tĩ, ti tỹ ā jykre tỹ ājag tỹ tar' he jé, ti kuprĩg tỹ. Nén ù kar vỹ tỹ ti tũ nỹtĩ, tar ti jê gé, hā kỹ sóg ti hā mỹ to vĩ tĩ, ¹⁷ti tỹ Cristo tỹ ājag ki êmā han jé, ājag tỹ ti ki ge nỹtĩn kỹ. Ti tỹ êg to há nĩ vỹ tỹ ga ri ke nĩ, êg tỹ ti ki jārén jé, ka jārén ri ke. Kỹ êg tóg ti to tar nỹtĩ sir. Hā jé sóg ti mỹ ājag tó tĩ gé. ¹⁸Topê tỹ êg kren han mũ vỹ êg tỹ nén ve vānh ri ke nĩ, ge ve ja tũ êg nĩgtĩ. Kỹ sóg Topê mré vēmén tĩ, ti tỹ ājag mỹ tag kāmén kăn jé, ti tũ kar ag mỹ ke gé. Nén (ũ) téj gy ri ke ti nĩ, nén (ũ) tấpér mág ri ke, kăgnó téj gy ri ke ti nĩ, nén (ũ) krỹg ja tũ ri ke ti nĩ, Topê tỹ êg kren han mũ tĩ. Hā kỹ êg tóg vēsóg ki to jykrén kăn ke tũ nĩ. ¹⁹Cristo vỹ êg to há tấvĩ nĩ, tag to jykrén kăn ke tũ êg tóg nĩ gé. Kỹ sóg Topê mỹ: “ha ag mỹ tag kāmén,” he tĩ, ājag tỹ ti hā tỹ krĩn kỹ nỹtĩ jé.

²⁰Ha vé, Topê hā ne tar tấvĩ nĩ. Hā kỹ tóg êg tỹ ti mỹ nén (ũ) to vĩn kỹ (tóg) êg tỹ ti mỹ nén (ũ) to vĩ mũ ên kăfór han ki kanhró nĩ. Kỹ tóg êg tỹ nén (ũ) to jykrén mũ kăfór han ki kanhró nĩ gé. ²¹Kỹ êg tóg ti hā mỹ vĩ há han ke mũ, êg tỹ ti ki

ge kỹ nỹtĩn kỹ, êg tỹ Jesus Cristo ki ge kỹ nỹtĩn kỹ. Êg tỹ ti mỹ vĩ há han vỹ tũ' henh ke tũ nĩ. Hā vê.

Êg tỹ Cristo mré tỹ ùn pir nỹtĩ

4 Kỹ sóg ājag jyvén sór mũ ha. Se kỹ inh jé nĩ, êg Senhor tugrĩn, kỹ sóg ājag jyvén sór mũ. Mũ há han sórmmĩ. Topê vỹ ājag kuprêg, kỹ ājag tỹ vênh jykre há han ke hā to vāsān nĩ. ²Ājag rêgre to: “ti kăfór vỹ tỹ inh nĩ,” he sór tũg nĩ. Jagnê mỹ komêr hā vĩmmĩ. Jagnê to fe nỹtĩmmĩ. Jagnê to há nỹtĩmmĩ. Jagnê ajudar hemnĩ. ³Topê kuprĩg vỹ tỹ ùn pir nĩ, kỹ tóg ājag mỹ vênh jykre pir nĩm tĩ. Vāsān nĩ, ājag tỹ vênh jykre pir ên hā han jé, ājag tỹ krĩ kuprā nỹtĩn jé. ⁴Topê kuprĩg pir ên vỹ tỹ êg kar jagrê nĩ, kỹ êg kar vỹ tỹ Cristo há ri ke nỹtĩ, jăvo tóg tỹ êg krĩ ri ke nĩ, Cristo ti. Êg kar mỹ ti nén ù há han ke mũ, jagnê ri ke, ti tỹ êg kuprêg kỹ. ⁵Kỹ êg Senhor vỹ tỹ ùn pir nĩ gé. Êg kar vỹ ti ki ge kỹ nỹtĩ. Ti jiji hā tỹ êg kygpe kỹ nỹtĩ gé. ⁶Êg jóg tỹ Topê vỹ tỹ ùn pir nĩ gé, êg kar jóg ti. Ti hā ne tỹ vênh kar krĩg mỹ ke nĩ. Êg kar tỹ tóg ā tỹ ùn han sór mũ ên han tĩ, kỹ tóg êg kākā nĩ gé, êg jóg ti.

⁷Cristo vỹ êg tar han tĩ gé, êg kar, ti rānhrāj to. Ũ mỹ tóg vênh rānhrāj ù nĩm', nĩm' he tĩ. ⁸Hā kỹ tag tóg răn kỹ nĩ, ha mē: “ti tỹ kanhkā ra tấpry kỹ tóg ùn sigse kỹ nỹtĩ ên ag tatĩn vyr. Kỹ tóg êprā ke ag tar han mũ gé, ag tỹ ti rānhrāj han ke to,” he ja tóg nĩgtĩ, Tope vĩ răn ki.

⁹Ha vé, ti tấpry kỹ tóg ā tỹ kanhkā ra tĩg ke to hā tóg tere ja nĩ gé, êprā. ¹⁰Ũn tere mũ ên vỹ tấpry măn ja nĩ gé, kỹ tóg kanhkā pătén kỹ tĩ mũ sir. Kanhkā pătén kỹ tóg kanhkā kri nĩ nĩ sir. Kanhkā kri nĩn kỹ tóg nén (ũ) kar ki kanhró nĩ sir, ti tỹ êmā kar vég nĩn kỹ. ¹¹Ti hā ne ā rānhrāj kar to êg tar han tĩ. Ũ ag vĩn kỹ tóg ag tỹ apóstolo hyn han. Ũ tỹ tóg ti tỹ êg jyvén tĩ nĩnh ke han. Ũ mỹ tóg: “ũ tỹ inh vĩ mē ja tũ ag mỹ inh vĩ tónh tĩg nĩ,”

he mû. Û tỹ tóg igreja krêm pã'i han, ù mỹ tóg: “ủ tỹ igreja krêm vênh măn tĩ ag mỹ inh vĩ kămén nĩ,” he mû gé. ¹² Tag to tóg ẽg tar han tĩ, ẽg tỹ tỹ tĩ jãvy nỹtĩn kỹ, ti ve fag ke gé. Ẽg tỹ ẽg rãnhrãj tag ki króm kỹ Cristo há ẽn vỹ tar pẽ nĩ ha, ẽg tỹ tỹ tĩ há nỹtĩn kỹ. ¹³ Tĩ tỹ ẽg kar tỹ vênh jykre pĩr han mũ ve sỏr vẽ, ẽg tỹ ti ki ge kỹ nỹtĩn kỹ, ẽg tỹ Topẽ kỏsin ki kanhrỏ nỹtĩn kỹ. Kỹ ẽg kar vỹ ẽg rãnhrãj to tar nỹtĩ sir, ẽg tỹ jagnẽ mrẻ tỹ ùn pĩr nỹtĩn kỹ. Kỹ ẽg Cristo tỹ ẽprả ke jykre kãfỏr nĩ ẽn ri ke nỹtĩ sir, kỹ ẽg tóg komẻ hã ti tỹ nẻn kar han mũ mrẻ ti tỹ nẻn to jykrẻn mũ ki kanhrẻn kãn ke mũ gé sir, kỹ ẽg tóg ùn sanh há kanhrỏ ri ke nỹtĩ sir.

¹⁴ Ẽg tỹ gĩr ri ke nỹtĩn kỹ tóg ti mỹ há tũ nĩ. Gĩr ag ne ki kagtũg nỹtĩ. Kỹ ag tóg, ag tỹ nẻn ù mẻ kỹ ag tóg kãnhma nẻn ù nỏn tĩ, nẻn ù nỏn tĩ, he' he tĩ. Ẽg tỹ ti vĩ to gĩr tỹ ki kagtũg ẽn ri ke nỹtĩn kỹ tóg ẽg tỹ ùn ón mũ vĩ kri nĩm ja há (tóg) tĩ, ẽg tỹ ki kagtũg nỹtĩn kỹ. Û ag tóg Topẽ vĩ to ón tĩ. Ag tỹ ẽg tỹ ẵag mrẻ kygnẻ han sỏr vẽ. Vĩ há nĩ ve ag tóg nỹtĩ, kỹ tóg ẽg tỹ ag vĩ kri fi ja há tĩ sir. ¹⁵ Kỹ tóg há tĩnh mũ, ẽg tỹ Topẽ tỹ ki há tỏ mũ ẽn hã han kỹ. Kỹ ẽg tóg jagnẻ to há tãvĩ nỹtĩnh mũ gé. Hã tỹ ẽg tar nỹtĩnh mũ. Tĩ ki mog ri ke vẻ sir, ti tỹ tỹ ẽg kri nĩ nĩn kỹ, Cristo ti. ¹⁶ Ẽg tỹ tỹ ti mrẻ ke nỹtĩn kỹ ẽg tóg tỹ ti há tỹ tỹ ùn pĩr ẽn ri ke nỹtĩ. Ẽg kar vỹ rãnhrãj ke mũ, ẽg tỹ ti jykre pĩr to tar nỹtĩ jẻ. Ẽg kar vỹ tỹ jagnẻ mrẻ ke nỹtĩ. Ẽg kar tỹ Topẽ tỹ ẽg mỹ nẻn nĩm ja ẽn to vẫsẫsẫn kỹ ẽg tóg ùn sanh há tar ri ke nỹtĩ sir. Mog jẻ ẽg tóg ke mũ, ẽg tỹ jagnẻ to há nỹtĩn kỹ.

Cristo tỹ ẽg mỹ vênh jykre tãg nĩm

¹⁷ Kỹ sỏg ẵag jyvẻn sỏr mũ, ẽg Senhor tỹ inh mỹ: “ha ag jyvẻn,” hen kỹ. Hã kỹ sỏg ẵag mỹ: “ủ tỹ Topẽ ki kagtũg ag jykre han sỏr tũg nĩ,” he mũ. Kỏrẻg ti

nỹ, ag jykre ti, mỹr. Ag tỹ vẻsỏg ki nẻn to jykrẻn mũ ẽn hã han ag tóg tĩ. ¹⁸ Kutỹ mĩ ag mũgtĩ, ki kagtũg ag nỹtĩ. Hã ra ag tóg ki kanhrẻn sỏr tũ nĩ gé. Hã kỹ ag tóg Topẽ tỹ ẽg mỹ vênh jykre nĩm ẽn ki kagtũg nỹtĩ. ¹⁹ Kỹ ag tóg vênh jykre há to ẻ he tĩ. Mỹ'ẫg vẫnh ag nỹtĩ. Ag vênh kavẻnh vỹ ag mỹ há tĩ. Vênh jykre kỏrẻg tỹ ag kỏkẻg mũ ra tóg ag mỹ sẻr tĩgtĩ, kỹ ag tóg to krỏnh ke jẫvẫnh nỹtĩ. Ke tũg nĩ, ag jẫvo.

²⁰ Cristo jykre vỹ ge tũ nĩgtĩ, ki kanhrỏ ẵag tóg nỹtĩ. ²¹ Tĩ kẫme ki kanhrỏ kar ẵag nỹtĩ ha, ti jykre ke gé. ẵag mỹ ag tóg kẫmẻn kẫn, Jesus jykre ti, ẽg tỹ ti ki ge kỹ nỹtĩn kỹ nẻn han ke mũ ẽn ti. ²² Tĩ ki ge kỹ nỹtĩn kỹ ẽg tóg ẽg tỹ vẫsỹ nẻn han ja ẽn ri ke han mẫn ke tũ nĩ ha. Tag mẻ ẵag huri. ẵag jykre si ẽn tovẫnh kẫn jẻ ẵag tóg ke mũ. ẵag tỹ ẵag jykre si jagma mũn kỹ ẵag tóg ẵag tỹ nẻn to ẻn mũ ẽn hã han mũ ja nĩgtĩ ver. Hã ra ẽg tóg tag hã to ter ke mũ. ²³ Kỹ Topẽ mỹ to vĩmnĩ, ti tỹ ẵag mỹ ẵag jykre kurynh kẫn jẻ, ti tỹ ẵag fe jẫnhkri g jẻ. ²⁴ Vênh jykre tãg hã han sỏrmnĩ, Topẽ tỹ ẽg mỹ vênh jykre tãg nĩm mũ ẽn ti. Kỹ ẽg tóg ti ri ke nỹtĩnh mũ, kuryj ẽg nỹtĩnh mũ ha, há ẽg nỹtĩnh mũ, ti há ri ke. Kỹ ẽg vênh vĩ há hã han ke mũ.

²⁵ Hã kỹ jagnẻ mỹ ón mẫn tũg nĩ. Ki hã tỏmnĩ, jagnẻ mỹ. Jagnẻ mrẻ ke vỹ tỹ ẽg nỹtĩ, ẽg tỹ Cristo há ri ke nỹtĩn kỹ. ²⁶ ẵag fe tỹ gỹm ke mũ ra Topẽ vĩ mranh tũg nĩ. ẵag tỹ jagnẻ to jũ nỹtĩn kỹ kurẫ ù jẫvẫnh sỏr tũg nĩ. Kutỹg ke to hã tỹ há' hemnĩ. ²⁷ Japo tỹ ẵag krĩn sỏr mũ ra ti vĩ jẻmẻ tũg nĩ. ²⁸ Vẫsỹ ẵag kẫmĩ ù vỹ ù tỹ nẻn ù pigju (ka)mẻ ja nĩgtĩ. Kỹ ẽn han mẫn tũg nĩ. ẵag rãnhrãj nỏn ẵag mũnh ke mũ ùri. ẵag nĩgẻ tỹ nẻn ù há han nĩ, ẵag tỹ ẵag rãnhrãj to nẻn (ủ) kar ve jẻ. To vẫsẫn nĩ, ti tỹ ẵag mỹ kẻn jẻ, ẵag tỹ ẵag tỹ nẻn ù tỹ ùn jagẫgtar ag jagẫgtẫn jẻ.

²⁹ Vēnh vī kórég tó sór tūg nī. Nén ũ há hā tỹ vēmén nī, ājag tỹ ājag vī tỹ jagnē tar han jé, ājag tỹ jagnē jykre kuryñh jé.

³⁰ Topē kuprīg fe kaj han sór tūg nī gé. Topē vỹ ēg mỹ ā kuprīg jēnē, ti tỹ hā tugrīn ēg nīgjēg jé, ēg krenkren ke to. Ti tỹ tỹ ēg jagrē nīn kỹ ēg tóg ki kanhró nýtī, ēg tỹ Topē tỹ ēg krenkren han ke kurā ēn tá krỹg mūn ki. ³¹ Jagnē to jykrén kónān tūg nī. Jagnē to krī rỹ han tūg nī. Ājag fe tỹ gỹm ke (ka)mē nýtī tūg nī. Féfén tūg nī. Jagnē to vī kónān tūg nī. Vēnh jykre pāno tovānh kān nī. ³² Jagnē to vī há han nī. Jagnē mỹ komēr hā vīmñī. Jagnē mỹ vēnh pāte fón nī, Topē tỹ Cristo tugrīn ēg mỹ vēnh pāte fón ja ri kén.

Ēg jykre tăg

5 Topē tỹ vēnh jykre han tī ēn hā han nī, ājag tỹ tỹ ti fe nýtīn kỹ, ti krē. ² Jagnē to há kar nýtīmñī, Cristo tỹ ēg to há nī ri ke. Ēg jagfy tóg vēnh fēg. Ēg tỹ Topē mỹ nén (ũ) pūn ri ke ti nī, ti tỹ ēg jagfy vēnh fēg mū ēn ti. Topē mỹ nén ger há pūr ri ke ti nī, kỹ tóg Topē mỹ há tī sir.

³ Topē tũ vỹ tỹ ājag nýtī. Hā kỹ vēnh jykre pāno tỹ vēmén sór tūg nī, ājag tỹ han sór tũ nī jé. Ēg prū tũ mré nỹ, ēg mén tũ mré nỹ, tỹ vēmén sór tūg nī, ājag tỹ nén e hā tỹ vāsān (ka)mē tỹ vēmén sór tūg nī gé. ⁴ Kỹ jagnē mỹ vī kónān tūg nī, jagnē to vī kónān tūg nī gé. Fagrīnh mỹ vī tūg nī gé. Nén ũ kavėj tỹ vēmén tūg nī gé. Ēg tỹ tag tó kỹn pi(jé) há nī', ēg tỹ tỹ Topē krē nýtīn kỹ. Ēg tỹ nén tónh ken hā vē, ha mē: "ā tỹ inh mỹ nén jēnēg mū kar tóg inh mỹ há nýtī," he jé ēg tóg ke mū, Topē mỹ agradecer hen kỹ. ⁵ Tag to jykrén, ha mē: ũ tỹ ā prū tũ fi mré nỹ mū ēn, ũ fi tỹ ā mén tũ mré nỹ mū ēn fi pi(jé) Cristo tỹ tỹ ēg pā'i nī venh ke mū'. ũ tỹ ā tỹ nén e hā tỹ vāsān mū ēn pi(jé) venh ke mū'. Ēg tỹ vēnh kăggrá to jān ēn ri ke ti nī, ēg tỹ ēg tỹ nén e hā tỹ vāsān mū

ēn ti. ũ tỹ ge pi(jé) Cristo venh ke mū', Cristo tỹ tỹ ēg pā'i nī ēn ti.

⁶ ũ tóg ón kỹ ājag mỹ vēnh vī há tó sór tī. ũ tỹ ge vī jēmē tūg nī, ke tũ nī mū ra Topē tóg ājag to jūnh ke mū. Ti vī mranh vē mỹr, kỹ tóg ũ tỹ ge to jūnh ke mū. ⁷ Hā kỹ ag vī jēmē sór tūg nī. ⁸ Vāsỹ ājag tóg vēnh jykre ki kuty hā han ja nīgťi gé. Hā ra Topē tóg ājag mỹ vēnh jykre ki kurā ēn nīm, ājag tỹ ti ki gen kỹ. Kỹ vēnh jykre ki kurā tag hā han sórmñī. ⁹ Ēg tỹ vēnh jykre ki kurā hā han kỹ ēg tóg jagnē mỹ vī há han ke mū, vēnh jykre kuryj. Ki hā tó jé ēg tóg ke mū gé, jagnē mỹ. ¹⁰ Vēnh jykre tỹ ēg Senhor mỹ há nỹ ēn hā han sórmñī. Ēn hā to jykrén mág nī.

¹¹ Kejēn ājag tóg ũ vэг tī, hā ra tóg vēnh jykre ki kuty han tī. Kỹ ti mré han sór tūg nī. Ti mỹ: "kórég ti nī, tovānh nī," hemñī. ¹² Vēnh péju kỹ ag tóg han tī, vēnh jykre kórég ti. Ēg mỹ'a tóg tī, ēg tỹ ag tỹ nén han tī ēn ve kỹ. ¹³ Kejēn tóg ag tỹ nén han mū kri kurāg tī, kỹ tóg ve há tigtī, ag tỹ nén han mū ti. Kurā ki ēg tóg ti kórég nī ēn vэг tī. ¹⁴ Kỹ tóg há nī ha, ēg tỹ vēnh jykre kórég to: kórég ti nī, hen kỹ. Kỹ ēg tóg tovānh sór ke mū. Hā kỹ ēg tóg tag tó tī, ha mē: "Topē vī mranh sór mán tūg nī. Nūgme ki kutē sór mán tūg nī. Kỹ Cristo vỹ ā mỹ jēngre han ke mū," he ēg tóg tī, ēg jān kỹ.

¹⁵ Ājag tỹ nén han mū to jykrén nī. Krī tũ nī sór tūg nī, vēnh jykre há ki vēnh kanhrān kỹ mūmñī. ¹⁶ Kurā kren tūg sórmñī. Nén ũ jagy ve jé ēg tóg ke mū, hā kỹ tóg há tī, ēg tỹ kurā kren tũ nīn kỹ. ¹⁷ Ēg Senhor vỹ ēg tỹ nén ũ há han mū ve sór tī. Kỹ ti tỹ nén (ũ) ve sór mū tag hā to jykrén nī, ājag tỹ tag hā han jé.

¹⁸ Vinho tỹ vēsén tūg nī, tỹ vēnh pēn-mān tūg nī. Vēnh jykre kórég vē, ēg tỹ nén ũ fa tỹ vēsén mū ti, tỹ vēnh pēnmān mū ti. Tope kuprīg tỹ ēg fān tag hā ne há nī'. ¹⁹ Jagnē mré vēmén kỹ Topē tỹ jān nī, ti jé tómnī, ēg Senhor jé ti. Ti kuprīg

vỹ ẽg kanhrân tĩ gé, ẽg tỹ ẽg Senhor mỹ
nén tó sór mũ to, ẽg tỹ ti tỹ jân há han
jé. Ẽg tỹ ti mỹ: “há kar ti nĩ,” henh ke vễ
gé. ²⁰ Ẽg jóg tỹ Topê mỹ ẽg tóg tónh ke
mũ, ti hã mỹ ẽg tóg: “ã tỹ ẽg mỹ nén ven
mũ vỹ há kar nỹtĩ,” henh ke mũ, ẽg tỹ ẽg
Senhor tỹ Jesus Cristo jyjy tón kỹ.

²¹ Ẽg tỹ Cristo kamẽg kỹ tóg há tĩ, kỹ
tóg ẽg tỹ jagnẽ jykre mĩ mũn kỹ (tóg) há
tĩ gé, ẽg tỹ tỹ ti mré ke nỹtĩn kỹ.

Ủ tỹ jagnẽ mré nỹtĩ fag jykre

²² Ủn tỹtá fag jé ajag mén ag jykre mĩ
mũjẽg. Fag mỹ tóg ẽg Senhor ri ke nĩ, fag
mén ti. ²³ Fi krĩ vễ, fi mén ti. Cristo vỹ tỹ
ti ki ge kỹ nỹtĩ kar ag kri ke nĩ, kỹ ẽg tóg
tỹ ti há ri ke nỹtĩ, ti tỹ ẽg kren han kỹ.
²⁴ Hã kỹ ẽg tóg tỹ ti krẽm ke nỹtĩ, Cristo
krẽm ke. Ge ti nĩgtĩ, ủn tỹtá fag jykre ti.
Fag mén krẽm ke vỹ tỹ fag nỹtĩ, fag tỹ
ajag mén vĩ han jé.

²⁵ Kỹ sóg fag mén ag mỹ tag tó sór mũ
gé. Ajag prũ to há tãvĩ nỹtĩmnĩ. Cristo
vỹ ẽg to há nĩ, ẽg tỹ tỹ ti tũ nỹtĩn kỹ. Ẽg
jagfỹ tóg vênh fẽg, ²⁶ ẽg tỹ tỹ ti tũ nỹtĩ
jé. Kỹ tóg ẽg kykũnh, goj tỹ ẽg kygpe kỹ,
ti vĩ tỹ ke gé. ²⁷ Ti tỹ ẽg há nỹtĩ ve sór vễ,
ẽg tỹ vênhmỹ nỹtĩnh ke tũ vễ, ẽg kaga ri
ke nỹtĩnh ke tũ vễ, ẽg kórẽg nỹtĩnh ke tũ
vễ gé, ẽg sũnvĩ tãvĩ nỹtĩnh ke vễ, ẽg tỹ tỹ
ti tũ nỹtĩn kỹ. Cristo prũnh ke ri ke vỹ tỹ
ẽg nỹtĩ.

²⁸ Tag ri ke han nĩ, ajag prũ tỹ. Fag
to há nỹtĩmnĩ. “Inh há ri ke vỹ tỹ fi nĩ,”
hemnĩ, fag to. Ủ tỹ ã prũ fi to há nũn kỹ
tóg vễso há nĩ sir. ²⁹ Vênh ki rĩr há han
ẽg tóg tĩ, jẽg ẽg tóg tĩ, ẽg tar nỹtĩ jé. Ẽg
pi(jé) vênh kókén sór tĩ. Cristo vỹ ẽg tỹ
ge tĩ gé. Ẽg ki rĩr há han tóg tĩ gé. ³⁰ Ti
há vỹ tỹ ẽg nỹtĩ, ẽg kar, ẽg tỹ ti ki ge kỹ
nỹtĩn kỹ.

³¹ Tag vỹ rán kỹ nĩ, ha mẽ: “ủn gré tóg
ã prũ fi to ã panh ré kỹ tĩ mũ, ã mỹnh fi
ré kỹ ke gé. Á prũ fi mré tóg tĩnh mũ. Fi
mré tóg tỹ ủn pir nĩ sir, ti prũ fi mré,” he
ja tóg nĩgtĩ, Topê vĩ rán ki. ³² Tag vỹ tỹ

nén ủ sũnvĩ pẽ nĩ. Kỹ tóg Cristo to rán kỹ
nĩ gé, ti tỹ ủ tỹ ti ki ge kỹ nỹtĩ ag mré tỹ
ủn pir nũn kỹ. ³³ Hã ra tóg ẽg mỹ rán kỹ
nĩ gé, ẽg tỹ ẽg prũ fag to há nỹtĩ jé, ẽg tỹ
vênh ki rĩr há han mũ tag ri ke. Kỹ tóg
fag mỹ rán kỹ nĩ gé, fag tỹ ajag mén vĩ
kỹ jémẽn jé.

Ẽg han mũ fag to vênh jykre

6 Kỹ sóg ajag krẽ mỹ tag tó mũ, ha mẽ.
“Ajag han mũ fag vĩ kri finnĩ,” he
sóg mũ, ag mỹ. Há ti nĩ, ẽg Senhor jykre
ha vễ. ² Ajag han mũ fag kamẽg nĩ. Topê
tỹ ẽg mỹ tag tó kỹ tóg ẽg mỹ nén ủ há tó
mũ gé, hã vỹ: ³ “ã han mũ fag kamẽg nĩ,
ã tỹ tĩg há han jé, ã tỹ ga kri tĩg mág han
jé,” he ja tóg nĩ, Topê ti.

⁴ Kỹ sóg ủn sanh ag mỹ: “ajag krẽ mỹ
vĩ tar pẽ han tũg nĩ, ag tỹ ajag to jũ tũ nĩ
jé,” he mũ gé. Ajag krẽ jyvẽn nĩ, ag mỹ
ẽg Senhor jykre kãmẽn nĩ, ag tỹ mĩ mũn
jé.

Camarada ag tỹ ajag patrão mré nỹtĩ jykre

⁵ Ajag kãmĩ ủ ag tóg patrão krẽm nỹtĩ
gé, fagrĩnh mỹ ti mỹ ti rãnrhãj han tũn
kỹ. Ajag patrão vĩ kri finnĩ. Ti kamẽg
nĩ, ti to jũrn kemnĩ. Ti rãnrhãj ki rĩr há
han nĩ, ajag tỹ Cristo rãnrhãj ki rĩr tĩ ẽn
ri ke. ⁶ Ủ tóg kejẽn ti patrão tỹ ti mỹ vĩ
há han hã jé (tóg) ti patrão tũ ki rĩr tĩ,
ón kỹ. Tag han tũg nĩ. Ajag patrão tũ ki
rĩr pẽ han nĩ, ajag tỹ tỹ Cristo camarada
nỹtĩn kỹ, Topê jykre tỹ ajag mỹ sér nũn
kỹ. ⁷ Ajag patrão rãnrhãj ki rĩr kỹ mỹ sér
nỹtĩmnĩ. Ajag tỹ ẽg Senhor rãnrhãj ki rĩr
vễ, ajag tỹ ajag patrão rãnrhãj ki rĩr kỹ.
⁸ Ha vé, ẽg tỹ nén ủ há han kỹ ẽg tóg ti
kaja venh ke mũ, kanhkã tá. Ẽg Senhor
vỹ ẽg mỹ ti kaja ven ke mũ, ti camarada
ag mỹ, ag patrão mỹ ke gé, ti ki ge kỹ
nỹtĩ kar ag mỹ.

⁹ Ajag kãmĩ ủ vỹ tỹ patrão nỹtĩ, kỹ ajag
camarada vỹ nỹtĩ, ajag krẽm. Ag to há
nỹtĩmnĩ. Ag mỹ vĩ kónãn tũg nĩ. Ẽg Sen-

hor vỹ kanhkā tá nĩ. Ājag pā'i vē, ājag camarada pā'i vē gé hā ra, ũ tỹ kanhkā tá nĩ ti. Ti mỹ ěg tóg tỹ ũn pir nỹtĩ, tag ki ũn mág mré ũn kāsir ag.

Topē tỹ ěg tỹ Japo katō vāsānsān jafā vin sór

¹⁰ Kĩ sóg ājag mỹ tag tó sór mũ gé ver, ha mē. Ěg Senhor ki ge kỹ nỹtĩ to tar nỹtĩmnĩ. Tar ti nĩ, kỹ tóg ěg tar han ki kanhró nĩ gé. ¹¹⁻¹² Tag ki ěg vēnh génh han tĩ, ěg tỹ Japo kato vāsānsān kỹ nỹtĩn kỹ. Hā ra Topē tóg ěg mỹ ěg tỹ ti kato vāsānsān jafā nĩm tĩ. Kỹ mǎn nĩ, Topē tỹ ěg mỹ ti kato vāsānsān jafā nĩm mũ ěn tĩ, kỹ Japo tóg ěg tỹ hē ri kenh ke tũ nĩ. Tar jé ěg tóg ke mũ ha. Ěg pi(jé) ěprā ke ag kato vāsānsān tĩ', ěg pi(jé) ěg mré ke ag kato vāsānsān tĩ'. Pā'i ag nỹtĩ, ũ tỹ ěg kato vāsānsān mũ ag, hā ra ěg tóg ag vég tũ nĩgtĩ. Kutỹ tǎn ag vē, ga to pā'i ag vē gé. Kanhkā krēm ag ěmā nỹtĩ gé. Kórég kar ag nỹtĩ. ¹³ Kỹ mǎn kǎn nĩ, Topē tỹ ěg mỹ nén tỹ ag kato vāsānsān jafā vin sór mũ ěn ti, ājag tỹ ag kato vāsānsān to tar nỹtĩ jé. Kejēn ag tóg ěg kato vāsān mág han ke mũ. Kurā ěn kǎ ag tóg ěg tỹ hē ri kenh ke tũ nĩ, Topē tỹ ěg tar han kỹ, ti tỹ ěg mỹ ěg tỹ ag kato vāsānsān jafā ěn vin kỹ.

¹⁴ Hā kỹ tar nỹtĩmnĩ. Ěg Senhor vỹ ón vǎnh nĩ. Ti ón vǎnh vỹ ěg vēsóg fĩn ja mág ri ke nĩ. Tỹ vēsóg fĩn ri ke han nĩ, ti ón vǎnh ri ke han to ken hā vē. Vēnh jykre kuryj vỹ tỹ soldado tỹ camisa tỹ ferro ri ke nĩ. Ěn tu ri ke han nĩ, vēnh jykre kuryj han to ken hā vē. ¹⁵ Ěg tỹ Topē vĩ sér tó sór mũ vỹ ěg pēn né, ěg pēn to ró ri ke nĩ, ěg tỹ vēnh kar mỹ Topē tỹ ěg krĩ kuprāg ke mũ tónh ke mũ tag ti. Ěn rĩnh ri ke han nĩ, vēnh kar mỹ Topē vĩ kǎmén to ken hā vē. ¹⁶ Ěg tỹ ti ki rǎ kỹ tóg soldado tỹ vējy ven jafā ma tĩ ěn

ri ke nĩ. Satanás tỹ ěg kato vāsān kỹ tóg ti tỹ no tỹ ěg to pēg grug ri ke nĩ. Ěg tỹ vējy ven jafā tỹ vējy ven kỹ tóg tỹ nhyn ke tĩ, ti no gru ěn tỹ. Ěg tỹ Jesus ki rǎ to ken hā vē. ¹⁷ Ěg kren han ke vỹ soldado sǎpe ri ke nĩ, sǎpe tỹ ferro ěn ri ke. Kỹ Topē vĩ vỹ rógro ri ke nĩ gé. Topē kuprĩg vỹ ěg mỹ kǎmén tĩ', Topē vĩ ti. Topē tỹ ěg mỹ Japo kato vāsānsān jafā vin ke mũn hā vē. ¹⁸ Kỹ Topē mré vēmén nĩ gé, ti mỹ nén kar to vĩmnĩ. Ti kuprĩg vỹ ěg jagfỹ vĩ tĩ gé. Topē mré vĩ to krónh ke tũg nĩ. Ěg tỹ to krónh ken kỹ tóg ěg nũr ri ke nĩ sir. Ke tũg nĩ. Ěg mré ti ki ge kỹ nỹtĩ kar to vĩmnĩ. ¹⁹ Kỹ inh jagfỹ ti mré vēmén nĩ gé. Topē vĩ tó sóg tĩ. Kỹ inh mré to vĩmnĩ, sỹ tó há han jé, isỹ inh kato vāsānsān mũ ag kamēg tũ nĩ jé, isỹ vēnh kar mỹ Topē tỹ nén han sór mũ ěn kǎmén há han jé, vēnh vĩ sér ěn. ²⁰ Topē vỹ inh mỹ tag nĩm ja nĩ, sỹ han jé, hā ra sóg ver se kỹ jē. Kỹ tóg sỹ ag kamēg tũ nĩnh há tĩ, sỹ Jesus kǎme tó kǎn jé, sỹ ti tỹ inh mỹ: “ha ag mỹ kǎmén,” he mũ tag tó kǎn jé.

Paulo tỹ Tíquico jēnēnh ke

²¹ Kỹ tóg inh mỹ há tĩ, ājag tỹ isỹ nén ve ja tag mē kǎn jé, isỹ nén han mũ mré hā. Hā jé sóg ājag mỹ Tíquico ti jēnēnh ke mũ. Ěg régre ũ vē gé, iso há tavĩ ti nĩ, Tíquico ti. Ěg Senhor rǎnhraj han ti tĩ, ti to krónh ke tũ ti nĩgtĩ. ²² Ti hā vỹ ājag mỹ inh kǎmén ke mũ, ti tỹ ājag fe tỹ há' he jé. Hā jé sóg ti jēnēnh ke mũ.

²³ Ěg jóg tỹ Topē jé ājag krĩ kuprāg, ěg régre kar ag mré hā. Ti jé ājag tỹ jagnē to há kar han. Ti jé ājag tỹ ti ki rǎ há han, ěg jóg tỹ Topē ti, ěg Senhor tỹ Jesus Cristo ti ke gé. ²⁴ Topē jé ājag tar han, ũ tỹ ěg Senhor tỹ Jesus Cristo to há nỹtĩ ag kar, kỹ tóg tũ' he jǎvǎnh nĩ, ěg tỹ ti to há nỹtĩ ti.

Hā vē.

PAULO TỠ CARTA HAN: FILIPOS TÁ KE AG MỠ CARTA

1 Paulo tỡ rá vễ, inh. Isỷ cidade tỡ Fil-
ippos tá ke ag mỡ rán hã vễ. Kỡ Timó-
teo vỡ inh mrế ăjag mỡ jẽnềg mủ gế,
vẻnh rá tag ti, inh mrế Jesus Cristo mỡ
rănhrăj ti tag ti. Isỷ ăjag mỡ ti rá tag jẽnề
vễ, ăjag tỡ tỡ Jesus Cristo ki ge kỡ nỹtĩn
kỡ. Kỡ sớg ăjag pả'i ag mỡ jẽnềg mủ gế,
ủ tỡ ăjag ki rĩr ti ag mỡ ke gế.

² Ềg jớg tỡ Topễ jế ăjag tar han, ti jế
ăjag krĩ kuprăg, ềg Senhor tỡ Jesus Cristo
ke gế.

Paulo tỡ Topễ mrế vỡ

³ ăjag to sớg Topễ mrế vỡ há han tỡ, sỡ
ăjag mỡ ềkrén kỡ. ⁴ Sỷ ăjag to Topễ mrế
vỡ kỡ inh fe tóg mrin ke tỡ. Inh mỡ tóg sér
tỡ, sỡ ăjag mỡ ềkrén kỡ. ⁵ ăjag tỡ inh mrế
Jesus kămén kỡ tóg inh mỡ há tỡ, ăjag tỡ
inh mrế ti to tar nỹtĩn kỡ. Kỡ sớg Topễ
mỡ vỡ há han tỡ, ăjag to. Isỷ ăjag mỡ ti
vỡ tó vén kỡ ăjag tóg kănhră inh mrế ti
kămén ja nĩgtĩ, kỡ ăjag tóg ừi ti vỡ tó há
han tỡ gế. Tovẻnh tỡ ăjag nỡ. Kỡ tóg inh
mỡ sér tỡ. ⁶ Tag ki kanhró sớg nỡ, ha mẽ.
Topễ vỡ ăjag krĩn rả nỡ, komễr hã, nén ủ
há kar to. Kỡ tóg ăjag krĩn tĩgtĩ sir, ti tỡ
komễr hã ăjag krĩn kăn jế, Jesus Cristo
kătĩg măn ke kurả to hã. Ti hã vỡ ăjag
krĩn ke mủ, Topễ ti. ⁷ Tag to sớg jykren,
sỡ ăjag mỡ ềkrén kỡ. Hã ra tóg há nỡ. Inh
fe vỡ tỡ ăjag nỹtĩ. Inh hã mrế tóg ăjag
tar han tỡ, ềg Senhor ti. Hã kỡ ăjag tóg
inh mrế jagăgtar nỹtĩ, inh se kỡ jế tag ti
to. Isỷ vẫsỷ kavar kỡ jế ja nĩn kỡ sớg ag
mỡ Topễ vỡ kămén ja nĩgtĩ, kỡ ăjag tóg
inh mrế to tar nỹtĩ ja nĩgtĩ gế, pả'i ag tỡ
inh ki Jesus jẻmẻn kỡ ke gế. Kỡ ăjag tóg
ừi inh mrế ti to tar nỹtĩ gế. ⁸ Sỷ ăjag kar
venh há tóg tỡ, kỡ Topễ vỡ ki kanhró nỡ.
Inh mỡ ăjag tóg tỡ inh fe pẻ nỹtĩ, ềg tỡ
Jesus Cristo mỡ tỡ ti fe pẻ ẻn ri ke ăjag
nỹtĩ, inh mỡ.

⁹ Sỷ Topễ mrế vỡn kỡ sớg ti mỡ tag tó tỡ,
ăjag to, ha mẽ. “Jagnẻ to há ag nỹtĩ,” he
sớg tỡ, Topễ mỡ. “Ag tỡ komễr hã jagnẻ
to há kar nỹtĩ han nỡ,” he sớg tỡ ăjag to,
Topễ mỡ. “Ag kanhrăn nỡ gế, ag tỡ komễr
hã ả jykre ki kanhrăn kăn jế, ag tỡ ki
króm kăn jế,” he sớg tỡ, ăjag to. ¹⁰ “Ả tỡ
ag kanhrăn kỡ ag tóg nẻn (ủ) há kar ki
kanhró nỹtĩn ke mủ. Kỡ ag tóg to jykren
há han ke mủ, ag tỡ nẻn ủ ve sớr kỡ. “Tag
vỡ há pe nỡ, tag vỡ há sỡ nỡ,” he jế ag
tóg ke mủ, ả tỡ ag kanhrăn kỡ,” he sớg tỡ
ăjag to, Topễ mỡ. ăjag tỡ tag to jykren há
nỹtĩn kỡ ăjag tóg jẻnhkri nỹtĩn ke mủ,
kỡ ăjag tóg mỡ'ăg măn ke tỡ nỡ, Cristo
kătĩg măn ke kurả ẻn kả. ¹¹ Kỡ ăjag tóg
vẻnh jykre há han kăn ke mủ sir, Jesus
Cristo tỡ ăjag mỡ ả jykre há ẻn nĩm kỡ.
Hã jế sớg Topễ mỡ ăjag tó tỡ. Ti tỡ ăjag
krĩ kugrynh kỡ vẻnh kar tóg ti tỡ tỡ ừn
mág nỡ venh ke mủ. Kỡ ag tóg ti mỡ vỡ
há han ke mủ gế sir.

Jesus tỡ inh jykre

¹² Inh kanhkả', inh jagtar mủ ra Jesus
kămẻ tóg vẻnh kar kri rủm ke mủ. Tag
to jykren. ¹³ Vẻnh kar tóg mẻ kăn, ti vỡ
ti, polícia ag mrế hã, ủ tỡ palácio ki rĩr ti
ag mrế hã. Cristo tugrĩn sớg se kỡ jế, hã
vẻg ag tóg mủ. ¹⁴ Kỡ Jesus mrế ke tỡ hẻn
ri ke ag vỡ fe tar nỹtĩ gế sir, ềg Senhor
jykre to, inh se kỡ jế tag tugrĩn. Hã kỡ ag
tóg Topễ vỡ tó tỡ sir, ag tỡ to fe tar nỹtĩn
kỡ, ag mủmẻg vẻnh nỹtĩn kỡ. ¹⁵ Ủ ag tóg
iso jủ nỹtĩ, ha kỡ ag tóg Jesus tó tỡ, ag tỡ
inh ri ke han sớrn kỡ. Kỡ ủ ag tóg iso há
nỹtĩ, hã kỡ ag tóg ti tó tỡ sir. ¹⁶ Topễ vỡ
hã to sớg se kỡ jế, sỡ pả'i ag mỡ ti kămén
jế. Topễ tỡ inh mỡ vẻnh rănhrăj nĩm hã
vẻ. Hã vẻg ag tóg tỡ, ủ tỡ iso há nỹtĩ ag,
kỡ ag tóg ti vỡ tó tỡ, ủ tỡ iso há nỹtĩ ag.
¹⁷ Ủ ag tóg hã ra iso jủ nỹtĩ, hã kỡ ag tóg
ón kỡ Cristo kămén tỡ, ag tỡ inh vỡ kảfór
han sớr kỡ. Ag tỡ inh kato tẻ mủ ag tỡ iso
jủ han sớr vẻgtĩ gế, ag tỡ inh se tỡ hẻn ri
ke han sớr vẻ. Hã jế ag tóg Cristo vỡ tó tỡ.

¹⁸ Hã ra sóg ag to vènh mý nĩ sór tũ nĩ. Cristo tó ag tóg mũ mýr. Ủ tóg ón ký tó tĩ, jo ù tóg tó há han tĩ. Ag kar vỹ ti tó tĩ, kỹ tóg há tĩ. Hã kỹ tóg inh mý sér tĩ, kỹ sóg inh mý sér tỹ tũ he sór tũ nĩ.

¹⁹ Hã ra sóg kren ke mũ gé, ha vemnĩ. Ki kanhró sóg nĩ. Ājag hã ne iso Topẽ mré vĩ tĩ, kỹ Jesus Cristo vỹ isar han tĩ gé, ā kuprĩg tỹ. Hã kỹ sóg kren ke mũ.

²⁰ Kỹ sóg tag jāvānh mũ, ha mẽ. Hèn ri ke mũn ag tóg inh kyvān ke mũ, hèn ri ke mũn ag tóg isén ke mũ. Isỹ tag to jykrén kónān tũ nĩ jé, hã jé sóg ti mré vĩ tĩ. Isar han jé tóg ke mũ, sỹ nén ù kamẽg tũ nĩ jé, sỹ ti kavénh tũ nĩ jé, inh mý'āg tũ nĩ jé. Vènh kar tỹ isugrĩn Jesus tỹ tỹ ùn mág nĩ ven kỹ tóg inh mý sér tĩ. ²¹ Inh jykre hã vỹ tỹ Cristo ti nĩ, hã kỹ sóg iser kỹ ti venh tĩg ke mũ, kỹ tóg sér tĩ. ²² Kỹ sóg hã ra inh kren kỹ ti rānhrāj hã han ke mũ. Hã kỹ sóg sỹ nén han sór mũ ki kagtĩg nĩ.

²³ Inh kren ke mý inh mý hán tĩ vỹ, iser ke vó? he sóg tĩ. Iser kỹ sóg Cristo mré nĩ nĩ, kỹ tag tóg inh mý há pẽ nĩ, isỹ ti venh há tĩn kỹ. ²⁴ Jāvo isỹ ājag mré nĩn kỹ sóg ājag tar han ke mũ, kỹ tag tóg inh mý há káfór nĩ. ²⁵ Hã tóg inh mý ge nĩ. Kren jé sóg ke mũ, he sóg tĩ, kỹ sóg ājag kar mré nĩnh ke mũ. Ājag ve jé sóg ke mũ, ājag tỹ komẽr hã inh vĩ mẽ kỹ ti vĩ kri fi kãn jé. Kỹ tóg ājag mý sér tĩnh mũ, ha vemnĩ.

²⁶ Isỹ ājag mré nĩ mǎn ken kỹ tóg inh mý há tĩnh mũ. Kỹ ājag fe tóg mrin ke tǎvĩ han ke mũ, ājag tỹ inh ve mǎn kỹ. Ājag mý sóg tỹ ùn mág jẽ, Jesus Cristo tugrĩn.

²⁷ Ha vé, Cristo jykre hã han nĩ, tag hã to vāsānsān nĩ. Hèn ri ke mũn sóg ājag venh kǎtĩg ke mũ, hèn ri ke mũn sóg ājag venh kǎtĩg ke tũ nĩ. Inh kǎtĩ tũ ra jagnẽ mré vènh jykre pir han kỹ nỹtĩmnĩ, Jesus kǎme hã tómnĩ, ti ki ge kỹ nỹtĩmnĩ. Sỹ tag mēnh há tóg tĩ, ājag to. ²⁸ Ủ tỹ ěg kato vāsānsān mũ ag kamẽg tũg nĩ, hã tugnĩn ag tóg ājag tỹ nũgme ki vǎr ke ki kanhró nỹtĩ, inferno ki. Hã tugnĩn ājag tóg ājag krenkren ke mũ ěn ki kanhró

nỹtĩ gé sir. Topẽ vỹ ěg tar han ke mũ, ěg tỹ ag tỹ hèn ri ke jé gé, ù tỹ ěg kato vāsānsān mũ ěn ag tỹ. ²⁹ Cristo ki ge kỹ ājag nỹtĩ, kỹ ājag tóg ti tugrĩn jagāgtar nỹtĩnh ke mũ gé. Hã jé tóg ājag kuprẽg. ³⁰ Hã kỹ ājag tóg inh kóm ti jagy vég tĩ gé. Ag tỹ vāsỹ inh kato vāsānsān ěn ve ja ājag tóg nĩgtĩ gé. Ủri sóg hã vég ti ver. Kỹ inh kóm tar nỹtĩmnĩ.

Topẽ kósin tỹ tỹ ěprǎ ke nĩ

2 Ha vé, sỹ ājag jyvèn sór mũ, ha mẽ. Ājag tỹ Jesus jykre han kỹ nỹtĩ tag vỹ ājag tar han tĩ. Ti tỹ ājag to há nĩ tag vỹ sér tĩ. Ti kuprĩg vỹ tỹ ājag jagrẽ nĩ. Kỹ ājag tóg jagnẽ to há nỹtĩ gé, jagnẽ jagāgtān ājag tóg tĩ gé. ² Kỹ inh jagāgtān nĩ gé, inh fe tỹ mrin kemnĩ gé, inh mý sér tĩ jé. Jagnẽ mré vènh jykre pir hã han nĩ, ha mẽ. Jagnẽ to há tǎvĩ nỹtĩmnĩ. Ājag tỹ nén ù to jykrén kỹ jagnẽ mré to jykrén nĩ, ājag tỹ vènh jykre pir hã han jé. ³ Vēsỹ ùn mág han sór tũg nĩ, jagnẽ káfór han sór tũg nĩ. “Tỹ inh ùn sĩ nĩ,” hemnĩ. Jagnẽ to: “inh káfór ti nĩ,” hemnĩ gé. ⁴ Ājag tỹ ājag tũ ki rĩr mré hã jagnẽ tũn ki rĩrmnĩ gé. ⁵ Jesus Cristo kóm ti jykre han nĩ gé, jagnẽ mý. Ti tỹ vènh jykre han hã vẽ, ha mẽ.

⁶ Topẽ hã pẽ ja ti nĩ mýr, Jesus ti, ti tỹ ti mré nĩn kỹ. Hã ra tóg tá nĩ kỹ: “isũ vẽ, kanhkā ti, hã kỹ sóg ěprǎ ke ag to tĩg ke tũ nĩ,” he ja tũ nĩ. ⁷ Kanhkā tá ā tỹ nén tovānh kãn sór ja ti nĩ, kỹ tóg ěg ri ke nĩ jé kǎtĩg sór ja nĩ, hã kỹ tóg kǎtĩg ja nĩ. Ēprǎ ke jagtar ri ke tóg nĩ, ti tỹ ěprǎ ke fi ki mur kỹ. Ēg tỹ ěprǎ ti ve kỹ tóg tỹ ěg hã pẽ nĩ, ti tỹ kanhkā tá tỹ Topẽ hã pẽ ja ra. ⁸ Vēsỹ ùn mág han ja tũ tóg nĩ, kỹ tóg ā jóg vĩ hã han ja nĩgtĩ. Ti vĩ han kỹ tóg ter ja nĩ, cruz to sa kỹ tóg ter ja nĩ, mýr, ha mẽ. ⁹ Hã kỹ Topẽ tóg ti tỹ vènh kar káfór han sir, kỹ tóg ti jijin mũ sir, kỹ ti jyjy tag tóg vènh kar jyjgi káfór nĩ. ¹⁰ Ēg tỹ ti jyjy mẽ kỹ vènh kar ag tóg ti krēm mũgmũg ke kãn mũ sir, kanhkā tá ke kar ag, ěprǎ

ke kar ag ke gé, vènh kuprīg kar ag ke gé.¹¹ Kĩ vènh kar ag tóg: “Jesus Cristo vỹ tỹ pǎi mág nĩ,” henh ke mũ sir. Tag hǎ tugrĩn ag tóg sir Topẽ to: “tỹ tóg ẽg kǎfór kar nĩ,” he mũ. Tag to jykrén nĩ, ăjag tỹ ti kóm han jé, Jesus Cristo kóm.

Ėg tỹ ẽprǎ ke ag mỹ jẽngrẽ há han

¹² Inh kanhkǎ', ăjag ki sóg fe nĩ. Inh vĩ han ăjag tóg mǔgtĩ, sỹ ăjag mré nĩn kỹ, hǎ ra sóg ური ăjag mré nĩ tũ nĩ. Ge ra inh vĩ kri fi há han nĩ. ăjag krenkren ke vè, kỹ Topẽ jykre hǎ han nĩ. Topẽ kamẽg nĩ, ăjag fe tỹ jũrũn kemnĩ. “Ti mỹ ẽg to jũnh ke tũ nĩ vỹ?” hemnĩ. Kỹ ti jykre hǎ han nĩ. ¹³ Ti hǎ ne tóg ăjag krĩn há han tĩ, ti jykre tỹ ăjag mỹ sér tĩn jé, ăjag tỹ hǎ mĩ hǎ mũn jé.

¹⁴ ăjag tỹ ti jykre han kỹ ti jykre to vĩ he tũg nĩ, ti tỹ kejẽn ăjag mỹ jagy ra. Kỹ jagnẽ mỹ jagnẽ vĩ kafǎn tũg nĩ gé, ti jykre to. ¹⁵ Hǎ tugnĩn ũ tóg ăjag to jykrén kónǎn ke tũ nĩ, ăjag tỹ kygnẽg tũ nĩn kỹ. Kỹ ăjag tóg jǎnhkri nỹtĩ. Kỹ ăjag tóg tỹ Topẽ krẽ nỹtĩ gé, ăjag tỹ ti jykre há ri ke nỹtĩn kỹ. ẽprǎ ke kar vỹ jykre pǎno nỹtĩ, Topẽ vĩ mranh kỹ ag tóg nỹtĩ, ăjag tỹ ũn mré ga kri mũ ag. Kỹ ăjag tóg ag mỹ jẽngrẽ ri ke nỹtĩ, ăjag tỹ ag mỹ Topẽ vĩ kǎmẽn kỹ, ũ tỹ ẽg rĩnrĩr han mũ ẽn vĩ ti. ¹⁶ ăjag tỹ tag han kỹ sóg tỹ ũn mág jẽnh ke mũ gé, ăjag tugrĩn, Cristo kǎtĩg mǎn ke kurǎ ẽn kǎ. Kỹ sóg ăjag to: “inh pi(jé) fagrĩnh mỹ ag to vǎsǎn', inh pi(jé) fagrĩnh mỹ ag mỹ Topẽ vĩ kǎmẽn',” henh ke mũ.

¹⁷ Hẽn ri ke mũn ag isẽn ke mũ, kỹ inh kyvẽnũh tỹ inh ki kutẽ kỹ tóg ẽg tỹ Topẽ mỹ nẽn ũ pũn ri ke nĩnh mũ. ăjag tỹ ti ki ge kỹ nỹtĩ tugrĩn ke vè. Ge ra tóg inh mỹ sér tĩnh mũ. Inh fe tóg mrĩn kenh ke mũ, ăjag kóm. ¹⁸ Kỹ tóg inh mỹ ti tỹ ăjag mỹ sér tĩnh há tĩ gé, iser ke ti.

Timóteo mré Epafrodito

¹⁹ Sỹ ăjag mỹ Timóteo jẽnẽnũh há tóg tĩ, ẽg Senhor tỹ to: “hej,” hen kỹ. Sỹ ti jẽnẽnũh ke vè, ti tỹ tá vỹn ke kỹ inh mỹ ăjag kǎmẽn jé. Kỹ inh krĩ tóg ăjag to kǎnhvy' henh ke mũ sir, isỹ ăjag vēmẽ há mẽn kỹ. ²⁰ Ti hǎ ne tóg ăjag mĩ ẽkrẽn mág tĩ, Timóteo ti. ũ tóg ti ri ke tũ pe nĩ, ti tỹ ăjag to há nĩn ki. ²¹ Ag kar vỹ: “inh rǎnhrǎj vỹ inh kutǎn mũ,” he kǎn mũ. Hǎ kỹ ag tóg Jesus rǎnhrǎj han tũ nĩgtĩ. ²² Hǎ ra ăjag tóg Timóteo ki kanhró nỹtĩ. Inh kósin ri ke ti nĩ. Ėg krẽ ag vỹ ẽg mré ẽg rǎnhrǎj han tĩ. Kỹ Timóteo vỹ inh mré Topẽ vĩ tó tỹ rǎnhrǎj tĩgtĩ, ti tỹ tỹ inh kósin ri ke nĩn kỹ. ²³ Ti hǎ jẽnẽ jé sóg ke mũ, ăjag to. Hǎ ra sóg ver ag tỹ inh mỹ nẽn tónh ke jǎvǎnh sór mũ, ũ tỹ inh ség mũ ag. Isỹ ag tỹ inh mỹ nẽn tó mũ mẽ kar kỹ sóg vǎhǎ ti jẽnẽnũh ke mũ. ²⁴ Hẽn ri ke mũn sóg kǎnhmar ăjag venh tĩg ke mũ gé. Ėg Senhor tỹ Jesus hǎ ne ki kanhró nĩ.

²⁵ Hǎ ra tóg sỹ vèsỹmér ũ jẽnẽnũh há tĩ, ăjag to. Hǎ kỹ sóg Epafrodito mỹ: “ha ag to vỹn ké,” he mũ. ăjag hǎ ne ti jẽnẽ ja nĩgtĩ, ti tỹ inh ki rĩr jé. Kỹ tóg inh mỹ há tĩ. Inh mré tóg Topẽ rǎnhrǎj han tĩ mỹr. Kỹ tóg inh mré Topẽ vĩ to jagtar nĩ gé. ²⁶ Hǎ ra tóg ăjag mĩ ẽkrég mũ, Epafrodito ti. Kỹ tóg ăjag to krĩ kufy jagy nĩ sir, ăjag tỹ ti kaga mẽ ja ẽn tugrĩn. ²⁷ Kaga ja tóg nĩgtĩ mỹr, kỹ tóg ter kren ja nĩgtĩ. Hǎ ra Topẽ tóg ti jagǎgtǎn, kỹ tóg há' he mũ sir. Ti ter ra sóg ijagtar tag krĩg mỹ vèsỹrẻnh mág ke mũ vè, hǎ ra Topẽ tóg ti jagǎgtǎn, kỹ tóg inh jagǎgtǎn gé. ²⁸ Hǎ kỹ sóg ti mỹ: “ha tĩg, ǎ tĩg to fũrũn,” he mũ sir, ăjag fe tỹ mrĩn ke jé, ăjag tỹ ti ve kỹ. Hǎ kỹ inh jagtar tóg pǎgsi' henh mũ gé sir. ²⁹ Ti jun kỹ ti to mỹ sér nỹtĩmĩn, ăjag tỹ ti ve mǎn kỹ, ẽg Senhor tỹ ti jy nĩgǎn kỹ. Kỹ ti mỹ: “há tóg tĩ,” hemnĩ, ăjag mỹ sér tĩn kỹ, ti kǎtĩg kỹ. ³⁰ Cristo rǎnhrǎj tugrĩn tóg ter kren mỹr. Hǎ ra tóg tovǎnh ja tũ

nĩ, ã ter kren mũ ra. Hã k̃y tóg inh ki rĩr há han. Ājag jēgja k̃a jēg k̃y tóg inh ki rĩr há han. Ũ t̃y ge m̃y vĩ há han nĩ.

Jesus t̃y ěg kurynh p̃e han

3 Inh kanhk̃a', vāhā sóg ājag m̃y nén ũ tónh ke m̃u gé sir, ha m̃e. Ēg Senhor ki ājag ge k̃y ñtĩ, h̃a k̃y m̃y sér ñtĩmnĩ. Tag rán inh huri, h̃a ra sóg rán m̃an m̃u. S̃y ājag m̃y tag tó to sóg krónh ke sór tũ nĩ. Ājag m̃y tóg há tĩ, s̃y ti t̃y ājag m̃y sér nĩ to ājag j̃yṽen k̃y.

² Vēnh ki rĩr. Ōn k̃y Top̃e vĩ tó tĩ ag ṽy junjun ke m̃u, vēnh j̃ykre p̃ano han m̃u ag, ha vemnĩ. Inh m̃y ag tóg cachorro ri ke ñtĩ. Ōn k̃y ag tóg ājag gré junun f̃ar kym sór m̃u. H̃a k̃y vēnh ki rĩr. ³ “Ēg f̃ar kym h̃a tugr̃in ěg tóg t̃y Top̃e kr̃e ñtĩ,” he ag tóg tĩ, ōn k̃y. H̃a tũ vē. Top̃e kupr̃ig ṽy t̃y ěg jagr̃e nĩ, k̃y ěg tóg ěg jagr̃e tag tugr̃in Top̃e m̃y vĩ há han tĩ. K̃y Jesus Cristo ṽy ěg m̃y t̃y ũn mág nĩ, ěg t̃y ti ki ge k̃y ñtĩn k̃y. H̃a tugr̃in ěg tóg t̃y Top̃e kr̃e p̃e ñtĩ. Ēg t̃y ěg f̃ar kym m̃u ra tóg t̃y nén ũ tũ nĩ sir. Ēg f̃ar vē m̃ỹr, k̃y tóg ěg kren han ke tũ nĩ. ⁴ Ēg f̃ar t̃y ěg kren han ki kanhró nĩ ra sóg t̃y inh kren han sór m̃u vē. Moisés j̃ykre h̃a t̃y ěg kren han ke ki kanhró nĩ ra sóg h̃a t̃y inh kren han sór m̃u vē. H̃a ra tóg ge tũ ñy. ⁵ Vās̃y inh j̃ykre h̃a vē, ha m̃e. Is̃y kur̃a t̃y 8 (ke) han k̃y ag tóg inh gré junun f̃ar kym, is̃y t̃y povo t̃y Israel kr̃e ñn k̃y, ěg jóg'jóg ve t̃y Benjamim kr̃e'kr̃e ag k̃a ũ. K̃y inh han m̃u fag ṽy t̃y Hebreu p̃e ñtĩ. Inh mog k̃y sóg t̃y Fariseu nĩ, h̃a ra Fariseu ag tóg Judeu ag j̃ykre to tar t̃aṽi ñtĩ. ⁶ S̃y ěg j̃ykre to tar p̃e ñn h̃a k̃y sóg Jesus ki ge k̃y ñtĩ ag vóg kóñan. Top̃e t̃y Moisés m̃y vēnh j̃ykre ñim ja ěn ki króm k̃an ja sóg ñigtĩ m̃ỹr. Vēnh j̃ykre ěn mranh ja tũ sóg ñigtĩ, ěn k̃a sóg t̃y ũn kuryj ja ñigtĩ. ⁷ H̃a k̃y sóg ag m̃y t̃y ũn há p̃e ja ñigtĩ. H̃a ra sóg ũri tag kar to: “nén ũ tũ vē, inh kókén jé tóg ke m̃u,” he m̃u sir. S̃y Cristo ki r̃a k̃y sóg ěn tovānh k̃an m̃u sir. ⁸ K̃y, h̃a vē.

Inh j̃ykre si kar tóg inh m̃y kórég ñy, ũri, ti t̃y inh kókén k̃y. Nén pir h̃a ne há ñy, h̃a ṽy: is̃y ěg Senhor t̃y Jesus Cristo ki kanhró nĩ jé, he m̃u. Ēg t̃y nén ki kanhró kar k̃afór ti nĩ, ěg t̃y ti ki kanhró nĩ ti. Tag to sóg inh j̃ykre si ěn fón k̃an. Inh m̃y tóg vēnh j̃agfa pr̃ēnhpr̃ē ěn ri ke ñy, inh j̃ykre si ěn ti, is̃y Cristo h̃a ki r̃a k̃y j̃ēn k̃y. ⁹ K̃y sóg ti h̃a ki r̃a k̃y j̃ē sir. Ũri sóg Moisés j̃ykre ki króm tugr̃in vēs̃y ũn mág han m̃an sór tũ nĩ ha. Jesus ki r̃a h̃a tugr̃in sóg t̃y ũn mág j̃ē ha. H̃a tugr̃in Top̃e tóg iso: “há ti j̃ē ha,” he m̃u. Jesus ki r̃a tugr̃in ke vē ha. ¹⁰ S̃y ti ki kanhr̃an k̃y j̃ē tag h̃a tóg inh m̃y há ñy. Ti h̃a ṽy ã ter kar k̃y rĩr m̃an, k̃y sóg ti mr̃e rĩr m̃an sór m̃u gé. H̃a jé sóg ti mr̃e jagtar sór m̃u gé, iser k̃y sóg ti ter ri ke han sór m̃u gé. ¹¹ S̃y rĩr m̃an há tóg t̃y m̃ỹr, iser kar k̃y. H̃a jé sóg ti ri ke han sór tĩ.

Vēnhvó to comparação

¹² Ver sóg ki kanhr̃an k̃an ja tũ nĩ, ver sóg tá kr̃ỹg ja tũ nĩ. H̃a ra sóg vās̃an t̃y, s̃y kom̃er h̃a ti ki kanhr̃an k̃an jé, ti t̃y inh ki kanhró nĩ ěn ri ke, is̃y t̃y ti tũ j̃ēn k̃y, Cristo ti.

¹³ Inh kanhk̃a', ver sóg tá kr̃ỹg ja tũ nĩ. H̃a ra sóg tag han m̃u, ha m̃e. Vēs̃ỹj̃am sóg m̃i ěkr̃ēn m̃an tũ nĩ ha, vās̃an m̃an', vās̃an m̃an', he jé sóg ke m̃u ha, is̃y kej̃ēn tá kr̃ỹg jé. ¹⁴ Ag t̃y jagñe mr̃e pét̃e ri ke han sóg t̃y m̃ỹr. Jagñe mr̃e ag tóg pét̃e t̃y, ũ tóg ganhar he sór tĩ. Ēn ri ke han sóg t̃y. Inh ganho ṽy t̃y is̃y rĩr kr̃ỹg ja tũ venh ke ti nĩ. H̃a jé Top̃e tóg ěg kupr̃ēg, Jesus Cristo tugr̃in.

¹⁵ Ũ t̃y Jesus to sygsanh m̃u ag jé inh kóm han k̃an. Ũ t̃y h̃a ra to: “h̃a tũ vē,” hen k̃y Top̃e jé ti kanhr̃an. ¹⁶ K̃y ājag t̃y ti j̃ykre m̃ēg m̃u tag h̃a jagma m̃ūmñi, ājag t̃y tá junjun jé.

¹⁷ Inh kanhk̃a', inh j̃ykre h̃a han k̃an nĩ. K̃y ũ t̃y inh j̃ykre ri ke han m̃u ěn j̃ykre tugñỹm nĩ gé, ājag t̃y ag mr̃e h̃a han jé. ¹⁸ Ũ ag tóg ōn k̃y Jesus Cristo ki ge k̃y

nýtí, hã ra ag tóg ti jykre kato vāsānsān mū, Jesus tỹ ěg jagfy cruz to ter mū ra. Ag kāmén inh huri mỹr, ājag mỹ. Tó tỹ hēn ri ke han isóg huri. Hã ra sóg ājag mỹ ag tó mǎn ke mū gé sir. Inh fe kaj tóg tí, kỹ sóg fỹ mū sir, ag jykre to. ¹⁹ Nūgme ki ag tóg vǎr ke mū, inferno ki, ha mē. Jēn há tǎvī han sór ag tóg mū, tag hã tóg ag mỹ sér tí. Nén tỹ ěg mỹ'a han tí tag hã tóg ag mỹ sér tí. Ěg tỹ tag mī vég tí ěn hã to ag tóg jykrén sór tí. ²⁰ Ag jāvo ěg jamā vỹ tỹ kanhkā ti nĩ. Kanhkā tá tóg kǎtīg ke mū, ěg kren han ke mū ti, hã vỹ: ěg Senhor tỹ Jesus Cristo, he mū. Ti hã jāvǎnh ěg tóg nýtí. ²¹ Ti hã ne tóg ěg han mǎn ke mū, ā kǎtīg kỹ'. Ěg tỹ ga kri mūn kỹ ěg tóg ver krój nýtí, ěg tỹ tỹ ěprǎ ke nýtín kỹ. Ti tỹ ěg han mǎn kỹ, ti tỹ ěg mỹ ěg fǎr tǎg han ken kỹ, kỹ ěg tóg ti ri ke nýtính mū, ti mág ri ke, ti tar ri ke, ti sīnvī ěn ri ke. Ti hã tóg ěg tỹ ũ tǎg han mǎn ke mū, ti tỹ tỹ ũn tar nīn kỹ. Ti tar tugnīn tóg nén kar tỹ ā krēm ke han mǎn ke mū gé.

Paulo tỹ ěg jyvēn

4 Inh kanhkā', tỹ ājag tóg inh mỹ inh jāvy ri ke nýtí, kỹ tóg sỹ ājag venh há tǐgtí, sỹ ājag to há nīn kỹ. Ājag hã tugnīn inh fe tóg mrin ke tí, ājag hã tugrīn sóg tỹ ũn mág jē. Ājag to sóg há pē nĩ. Hã kỹ tar nýtīmñĩ, ěg Senhor jykre to.

² Vǎhã sóg Evódia fi jyvēn sór mū, Sín-tique fi ke gé, ha mē. “Jagnē mré vēnh jykre pir hã han nĩ,” he sóg mū, ājag mỹ. “Jesus mré ke vỹ tỹ ājag nýtí, kỹ jagnē kato vāsān tūg nĩ,” he sóg tí. ³ Kỹ sóg ā mỹ ke mū gé, vỹ. Inh ri kén ā tóg ěg Senhor rǎnhraj han tí. Kỹ fag jyvēn nĩ, fag tỹ jagnē to há nýtí jé. Inh mré fag tóg vēnh kar mỹ Jesus kāmén tí, kỹ fag tóg Clemente mré Topē vī ti tó tí gé, inh mré ti tó mū kar ag mré ke gé. Fag jygyj vỹ rǎnrǎn kỹ nýtí, Topē livron ki, hã kỹ fag tóg rīr krỹg ja tū venh ke mū. Hã kỹ tóg tỹ ũ nỹ, fag tỹ jagnē to jū ti.

⁴ Ěg Senhor mré ke vỹ tỹ ěg nýtí, kỹ mỹ sér nýtīmñĩ. Tag tó inh huri, hã ra sóg tó mǎn ke mū sir, ha mē. Mỹ sér nýtīmñĩ mỹr, ha mē.

⁵ Vēnh kar to fe nýtīmñĩ. Ěg Senhor kǎtīg mǎn ke vỹ kakó tí ha, ha mē. ⁶ Krī kufy nýtí tūg nĩ. Nén kar tómnĩ, Topē mỹ, ti mré vīn kỹ. Kỹ ti mỹ nén kar to vīmñĩ gé, ājag tỹ nén ve sór mū kar to. Kỹ ti mỹ nén kar to: “há ti nĩ,” hemñĩ gé, ājag tỹ ti mỹ agradecer hen kỹ. ⁷ Kỹ Topē vỹ ājag krī tỹ kuprǎ' henh ke mū. Ěg tỹ nén kar to jykrén há ra ěg tóg vēsóg ki ěg krī kuprǎg ki kǎtīg nýtí. Ti hã ne ěg fe tỹ há' he tí, ti hã ne ěg krī kuprǎg tí, kỹ tóg kuprǎ pē nǐgtí sir, ti tỹ ěg krī tỹ kuprǎ' hen kỹ, ěg tỹ Jesus Cristo ki ge kỹ nýtín kỹ.

⁸ Inh kanhkā', vǎhã sóg ājag mỹ nén ũ tó sór mū gé. Nén ũ há hã to jykrén nĩ, hã vỹ: “ki hã tó,” he mū. Ěg tỹ nén ũ to: “há ti nĩ,” he ěn hã to jykrén nĩ. Vēnh jykre kuryj hã to jykrén nĩ, nén ũ jānhkri hã to jykrén nĩ. Nén ũ sīnvī kar to jykrén nĩ gé, ki hã ke kar to. Tag kar to ěg tóg: sér ti tí, he tí, hã kỹ to jykrén mág han nĩ. ⁹ Ājag kanhrǎn mág sóg huri, sỹ ājag mỹ ti jykre kāmén kỹ. Kỹ ājag tóg inh jykre tugnỹm ja nĩ gé. Ājag tỹ isỹ nén han mū ěn hã han nĩ. Kỹ ũ tỹ ěg krī kuprǎg mū ěn hã vỹ ājag tar han ke mū, Topē ti.

Paulo tỹ ag mỹ agradecer he

¹⁰ Ha vé, inh fe tóg mrin ke mū, ājag tỹ inh mỹ nén ũ jēnēn kỹ. Kỹ sóg to Topē mré vī há han', vī há han' he mū. Inh mĩ ājag tóg ěkrég mūgtí, hã kỹ ājag tóg inh mỹ nén ũ jēnē mǎn. Vǎsỹ ājag tỹ inh mỹ ne jēnēnh ke tóg tū tí, hã kỹ ājag tóg inh mỹ nén ũ jēnē ja tū nǐgtí. Vǎhã tóg jun, ājag tỹ inh mỹ nén jēnēg mū ti. ¹¹ Hã ra sóg ājag mỹ isỹ nén ve sór mū ěn ti tó ja tū nĩ. Sỹ nén vég mū kar vỹ inh mỹ há nỹ. ¹² Isỹ nén ũ vég tū (hã) ra tóg inh mỹ há nỹgtí gé. Isỹ nén ũ e vég mū ra tóg inh mỹ há nỹgtí gé. Nén kar tag ve

sóg huri. Kejën sóg tógá nĩgtĩ, kejën sóg kókĩr nĩgtĩ. Kejën sóg nén ũ kar vég tĩ, kejën sóg nén ũ vég tũ nĩgtĩ. ¹³Nén kar to sóg tar nĩ, ěg Senhor tỹ isar han kỹ.

¹⁴Hã ra tóg há nỹ, ājag tỹ inh jagāgtān kỹ, ājag tỹ inh jagtar nĩ tag to jykrén kỹ. ¹⁵Vāsỹ ājag tóg inh mỹ ũ nĩm ja nĩgtĩ gé, isỹ ājag mỹ Jesus kāmén vén kỹ. Sỹ ga tỹ Macedônia ki kutē kỹ ājag hã tóg inh mỹ nén ũ jēnē ja nĩgtĩ, ājag pir mỹ, ājag, hã vỹ: Filipos tá ke ag, he mũ. Ũ pĩ(jé) ājag mré isỹ nén vég mũ to jykrén ja nĩgtĩ, isỹ nén vég tũ ěn to ke gé. Ājag pir mỹ ājag tóg inh mré to jykrén inh hã, tag ki kanhró ājag tóg nỹtĩ. ¹⁶Isỹ cidade tỹ Tessalônica tá nĩn kỹ ājag tóg inh mỹ nén ũ jēnē mǎn ja nĩgtĩ gé, kar kỹ ājag tóg ũ jēnē mǎn', ũ jēnē mǎn' he ja nĩgtĩ gé, ājag tỹ inh ki rĩr há han jé. ¹⁷Hã ra sóg isỹ jānkamy venh ke ěn to jykrén sór tũ nĩgtĩ. Ājag tũ mág nỹtĩ kỹ tóg inh mỹ há tĩ. ¹⁸Nén kar vỹ inh ki junjun há han, kỹ sóg ve kǎn mũ, sỹ nén ve sór mũ ěn ve kǎn inh huri. Epafrodito vỹ inh mỹ

vin kǎn, ājag tỹ inh mỹ nén jēnēg mũ ti. Topē mỹ nĩm ja vē, ājag tỹ inh mỹ nén nĩm ja ti, kỹ tóg ti mỹ sér tĩ sir. Tĩ mỹ tóg ājag tỹ ti mỹ nén ger há pũn ěn kri nĩ nĩ sir, ājag tỹ inh mỹ nén jēnēg mũ ěn ti. ¹⁹Ěg jóg tỹ Topē vỹ ājag mỹ nĩm kǎn ke mũ, ājag tỹ nén ve sór mũ ěn ti. Tĩ hã ne tóg nén kar tỹ tũ nĩ', kanhkǎ tá nĩ ěn ti', hã kỹ tóg ājag mỹ nén kar nĩm ke mũ, Jesus Cristo tugrĩn. ²⁰Ěg kar jé ěg jóg tỹ Topē to: “tỹ ti ũn mág nĩ, tỹ ti ũn tar nĩ,” hé, kỹ ěg tỹ ti mỹ vĩ há han vỹ tũ' henh ke tũ nĩ. Hã vē.

Paulo tỹ ag mĩ ěkrén

²¹Ũ tỹ Jesus Cristo ki ge kỹ nỹtĩ kar ag mĩ sóg ěkrég tĩ. Ěg kanhkǎ tỹ tag ki inh mré nỹtĩ ag vỹ ājag mĩ ěkrég tĩ gé. ²²Kar kỹ tag mĩ ũ tỹ Topē ki ge kỹ nỹtĩ kar ag vỹ ājag mĩ ěkrég tĩ gé, pǎ'i tỹ imperador ĩn tỹ palácio krēm nỹtĩ ag kar ke gé.

²³Ěg pǎ'i tỹ Jesus Cristo jé ājag tar han. Hã vē.

PAULO TỠ CARTA HAN: COLOSSOS TÁ KE AG MỠ CARTA

1 Paulo tỡ rá vễ. Topễ vỹ inh fễg, sỡ tỡ Jesus Cristo apốstolo jễ jẻ. Hả kỡ sỏg ấjag mỡ carta tag rỏn mủ. Kỡ ễg rẻgre tỡ Timốteo vỹ inh mớ rỏn mủ gẻ. ² Ễg tỡ cidade tỡ Colossos tá Topễ tủ ag mỡ rỏn hỏ vễ, ễg kỏnhkỏ ag mỡ, ủ tỡ Cristo ki ge tovỏnh tủ ag mỡ. Ễg jỏg tỡ Topễ jẻ ấjag tar han, ti jẻ ấjag kỡ kuprỏg.

Topễ kuprỏg tỡ ễg tar han

³ Ễg Senhor tỡ Jesus Cristo panh mỡ sỏg vỡ há han tỡ, ấjag to, ti mỡ sỏg agradercer he tỡ, kurỏ kar ki, sỡ Topễ mớ vẻmẻn kỡ. ⁴ Ầjag tỡ Jesus Cristo ki ge tag mẻ inh, kỡ ấjag tỏg nẻji jỏgnẻ to há tỏvỡ nỷtỡ gẻ, Topễ ki ge kỡ nỷtỡ ag kar to ke gẻ. ⁵ Topễ tỡ kỏnhkỏ tá ễg mỡ nẻn (ủ) ven ke mủ ẻn hỏ to jykrẻn ấjag tỏg tỡ nẻji. Ti tỡ ễg mỡ nẻn ủ ven ke mủ mẻ ấjag tỏg huri. Ầjag tỡ Cristo kỏme sẻ ẻn mẻ kỡ ấjag tỏg tag mẻ gẻ. ⁶ Ga kar mỡ tỏg tỡ ha, vẻnh vỡ há tag, hỏ kỡ tỏg ấjag ki jun ja nỡ gẻ. Vẻnh vỡ há tag tỏg Topễ mỡ ẻkrẻ kanẻ ri ke han tỡ, vẻnh kar tỡ ti ki ge kỡ. Hỏ kỡ ấjag tỏg ti ki ge gẻ, ấjag tỡ ti vỡ mẻ vẻn kỡ. Ễn kỏ ấjag tỏg Topễ tỡ ễg jỏgỏgtỏn ki kỏnhrỏn ja nỡ, kỡ ấjag tỏg ki kỏnhrỏ nỷtỡ ha. ⁷ Ủ tỡ ấjag mỡ tỏ vẻn mủ vỹ tỡ Epafras nỡ. Jỏgnẻ to há tỏvỡ ễg nỷtỡ, Epafras mớ. Inh mớ tỏg Cristo rỏnhrỏj han tỡgtỡ. Ầjag ki rỡr há han tỏg tỡ, ấjag mỡ ti vỡ kỏmẻn kỡ. To kỏnhkẻ tủ ti nỷgtỡ. ⁸ Ti hỏ vỹ inh mỡ ấjag tỡ ễg to há nỷtỡ tag tỏ, Topễ kuprỏg tỡ ấjag tỡ ễg to há nỷtỡ han mủ ẻn ti.

⁹ Epafras vỡ mẻ kỡ sỏg ấjag jỏgfy Topễ mớ vẻmẻn tỡ sir. Ti mỡ sỏg to vỡ tỡ, ấjag tỡ ti tỡ ấjag ki nẻn ve sỏr mủ ẻn ki kỏnhrỏn kỏn jẻ, ti tỡ ấjag mỡ kỡrỏ há nỏm jẻ, ti tỡ ả kuprỏg tỡ ấjag kỏnhrỏn jẻ. ¹⁰ Kỡ ấjag tỏg ễg mớ ễg Senhor jykre ki tỡ kỏmẻ kỏnhkẻ ke ki kỏnhrỏ nỷtỡnh mủ gẻ,

ấjag jykre tỡ ti mỡ há nỷn jẻ. Ễg tỡ vẻnh jykre há han kỡ ễg tỏg ti mỡ ẻkrẻ kanẻ há ẻn ri ke han tỡ. Ầjag tỡ tag han kỡ tỏg há tỡ. Kỡ ấjag tỏg Topễ ki kỏnhrỏn há han ke mủ gẻ sir. ¹¹ Kỡ ấjag tỏg tỡ ủn tar nỷtỡnh mủ gẻ sir. Ti hỏ ne ấjag tar han tỡ, ti tar nỏn kỡ. Kỡ ấjag tỏg ti to kỏnhkẻ ke tủ nỷgtỡ. Vẻnh kar to ấjag fe nỷtỡnh mủ. ¹² Kỡ tỏg ấjag mỡ sẻr tỡnh mủ gẻ. Kỡ ấjag tỏg ễg jỏg mỡ vỡ há han ke mủ. Ti hỏ ne ấjag tỡ há' he mủ', ấjag tỡ kỏnhkỏ ve jẻ. Ti tỡ ễg kỏn kỏn kỡ ễg tỏg kurỏ kỡrỏg ja tủ ẻn vẻnh ke mủ, kỡ ấjag tỏg vẻnh ke mủ gẻ, ễg mớ. ¹³ Ễg kygva tỏg huri, hỏ kỡ ễg tỏg tỡ kuty tỏn ag kỡrẻm ke tủ nỷtỡ ha. Topễ kỏsin kỡrẻm ke vỹ tỡ ễg nỷtỡ, ủri, Topễ tỡ ủ to: inh fe, he mủ ẻn kỡrẻm. ¹⁴ Ti hỏ ne ễg kỏn han mủ', ti hỏ tugrỏn Topễ tỏg ễg mỡ vẻnh pỏte fỏn mủ, ễg tỡ ti vỡ mỏnh ja ti.

Jesus tugrỏn nẻn kar tỏg vẻnh ven ke mủ

¹⁵ Topễ ri ke pẻ ti nỡ, ti kỏsin ti. Ễg pi(jẻ) Topễ vẻg tỡ. Ễg tỡ ti kỏsin ve kỡ ễg tỏg Topễ ki kỏnhrỏ nỷtỡ. Ả panh kỏsin ve vỹ tỡ ti nỡ. Topễ tỡ nẻn (ủ) kar hỏn han kỡ tỏg ả panh mớ nỡ nỡ, ti kỏsin ti. ¹⁶ Ả kỏsin tugrỏn tỏg ả tỡ nẻn (ủ) kar hỏn han tỡ ẻn nỏm ja nỷgtỡ gẻ, Topễ ti. Kỏnhkỏ tá ke ẻn hỏn han kỏn ja ti nỷgtỡ, Topễ ti, ả kỏsin tugrỏn, ga kỡ ke kar hỏn han ja ti nỷgtỡ gẻ, ễg tỡ nẻn vẻg tỡ kar hỏn han ja ti nỷgtỡ gẻ, ễg tỡ nẻn ve vỏnh kar hỏn han ja ti nỷgtỡ gẻ. Pỏ'i kar hỏn han ja ti nỷgtỡ gẻ, ủn tar ag kar, ủn mỏg ag kar hỏn han ja ti nỷgtỡ, ủn kỏsir kar ag mớ hỏ. Ả kỏsin tugrỏn tỏg nẻn ủ kar hỏn han ja nỡ, kỡ tỏg ti hỏ mỡ hỏn han kỏn ja nỡ, nẻn (ủ) kar ti. ¹⁷ Nẻn kar tỡ vẻnh ven tủg ki tỏg kỏ nỡ nỡ, Cristo ti. Ti tugrỏn nẻn kar tỏg vỏhỏ vẻnh ven kỏn tỡ. ¹⁸ Ti ki ge kỡ nỷtỡ kar ag kỡrỏ ri ke ti nỡ, kỡ ễg tỏg ti há ri ke nỷtỡ. Ủn ve vỹ tỡ ti nỡ, kỡ tỏg rỡr mỏn gẻ, ti ter kar kỡ, ễg rỡr mỏn kỏn jo. Nẻn (ủ) kar kỡ ke vỹ tỡ ti nỡ. ¹⁹ Topễ mỡ tỏg sẻr

tĩ, ti kósın tỹ ti ri ke pẽ nĩn kỹ, ti tỹ tỹ ti ve pẽ nĩn kỹ. ²⁰Kỹ tóg ti ter tugrĩn vẽnħ kar to há nĩ ha, Topẽ ti, Jesus tỹ cruz to sa tugrĩn, ti kyvẽnħ jamẽn kỹ. Kỹ Topẽ tóg ẽg to jũ tũ nĩ ha, ù tỹ ga kri mũ ag to, kanhkã tân ag to ke gé.

²¹Hã kỹ tóg ajag to há nĩ ha, ke gé. Vãsỹ ajag tóg vẽnħ jykre kórég hã han ja nĩgtĩ, hã kỹ ajag tóg Topẽ kato vãsãnsãn ja nỹtĩgtĩ. ²²Hã ra ti kósın tóg ẽg ri ke mur ja nĩ, kỹ tóg ẽg jagfy ter ja nĩ, hã kỹ Topẽ tóg ajag to há nĩ ha, ajag tỹ tỹ ti tũ nỹtĩ jé, ajag tỹ há pẽ nỹtĩ jé, kỹ ajag jykre si ẽn tóg tũ ti ha. ²³Hã jé ti ki ge tovãnh tũg nĩ. Tar nỹtĩmnĩ, ti to krónħ ke tũg nĩ. Ajag tỹ Jesus kãme sér ẽn mẽ kỹ ajag tóg Topẽ tỹ ẽg mỹ nén (ũ) vin ke mũ ẽn kãme mẽ ja nĩgtĩ gé. Tag hã mĩ ẽkrén nĩ, tovãnh tũg nĩ. Ga kri mũ kar ag vỹ mẽg mũ ha, Jesus kãme sér ẽn. Inh rãnrhãj hã vẽ, sỹ ag mỹ tónħ ke ti, inh, hã vỹ: Paulo, he mũ.

Paulo tỹ vėsỹrénh mág ja

²⁴Ajag jagfy sóg vėsỹrénh mũ. Hã ra tóg inh mỹ sér tĩ. Cristo vỹ vėsỹrénh mág, ẽg tỹ ti ki ge jé, kỹ ẽg tóg ti vėsỹrénh ẽn ri ke han ke mũ gé, ù tỹ hẽn ri ke ag tỹ ẽg tugrĩn ti vĩ ki króm sór jé. ²⁵Topẽ ne inh mỹ: “ha vẽnħ kar mỹ inh vĩ ti tó,” he ja nĩgtĩ, sỹ ti rãnrhãj ki rĩr jé, sỹ ajag mỹ tó jé gé, ti vĩ ti. Ti tỹ ajag mỹ vẽnħ vĩ jẽnẽ vẽ. ²⁶Topẽ tóg vãsỹ ă tỹ nén han ke to jykrén ja nĩgtĩ, ă tỹ nén (ũ) kar hyn han tũg ki tóg to jykrén ja nĩgtĩ. Hã ra tóg ẽn kã ù mỹ tó ja tũ nĩ ver. Vãhã tóg ù tỹ ti ki ge mũ ẽn ag mỹ tó mũ, ti tỹ vãsỹ nén to jykrén ja ẽn ti. ²⁷Ẽg hã mỹ tóg tó mũ ha, ti tỹ povo kar mỹ nén ù há tăvĩ vin sór mũ ti, hã kỹ tóg to hã ù mỹ tó jã tũ nĩ ver, ti tỹ ẽg hã mỹ tó sór kỹ. Ti tỹ ẽg mỹ nén vin ken hã vẽ, ha mẽ: Cristo vỹ ajag kãtã jamãn nĩ ha, hã kỹ ajag tóg ẽg tỹ kanhkã tá nén venħ ke ẽn ti venħ ke mũ gé sir, ẽg mré, ù tỹ ti ki ge kỹ nỹtĩ ag.

²⁸Cristo jykre tag hã tó inh tĩ, vẽnħ kar mỹ. Vẽnħ kar kanhrãn há han sóg tĩ, Topẽ tỹ inh mỹ krĩ há nĩm jan tugrĩn. Kỹ sóg vẽnħ kar jyvẽn tĩ gé, ag tỹ ti ki ge há han jé, ag tỹ kygnẽ sór tũ nĩ jé. Kỹ ag tóg há pẽ nỹtĩnh mũ, ag tỹ Cristo ki ge kỹ. ²⁹Hã to sóg vãsãn tĩ, kỹ sóg to ron tĩ gé. Ti hã ne isar han tĩ, ti tar nĩn kỹ.

2 Ha vé, ajag jagfy sóg vẽnħ rãnrhãj mág pẽ to vãsãn tĩ, Laodicea tá ke ag jagfy ke gé, ù tỹ inh ve ja tũ ag jagfy ke gé. Inh mỹ tóg há tĩ, ajag tỹ isỹ vãsãn tag mẽn kỹ. ²“Ag tỹ tag mẽ kỹ ag hỹn tóg nén ù kamẽg ke tũ nĩ, kỹ ag hỹn jagnẽ to há kar nỹtĩnh mũ,” he sóg tĩ. Kỹ ajag tóg ki kanhrãn ke mũ gé, Topẽ tỹ nén to jykrén mũ ẽn ti. Inh mỹ tóg ajag tỹ tag ki kanhrãn kãn há tĩ, inh mỹ tóg ajag tỹ to krĩ há nỹtĩnh há tĩ. Topẽ tỹ nén to jykrén jan hã vỹ tỹ Cristo nĩ. ³Ẽg tỹ ti ki kanhrãn kỹ ẽg tóg Topẽ ki kanhró nỹtĩnh ke mũ gé. Ti pãte ẽg tóg vẽnħ vĩ sér ù ve mãn ke tũ nĩ, ti hã tugrĩn ẽg tóg Topẽ ki kanhrãn kỹ nỹtĩ.

⁴Tag kãmén sóg mũ ajag mỹ, ù tỹ ajag krĩn kónãn tũ nĩ jé. Û tỹ ajag krĩn kónãn sór mũ vĩ tóg há nĩ ve nĩ, hã ra tóg tỹ hã tũ nĩ. ⁵Ajag vếg tũ sóg nĩ. Hã ra sóg ajag ki ẽkrég tĩ, kỹ tóg sỹ ajag ve ẽn ri ke tĩ inh mỹ. Inh mỹ tóg sér tĩ, ajag tỹ Cristo ki ge tovãnh tũ nĩn kỹ, ajag tỹ ti to tar tăvĩ nỹtĩn kỹ.

Cristo jykre

⁶Ha vé, Jesus Cristo ki ge kỹ ajag nỹtĩ, ẽg Senhor ki. Kỹ ti jykre hã han nĩ. ⁷Ti hã vỹ ẽg mỹ ga ri ke nĩ. Ti ki jãre han nĩ, ka jãre ẽn ri ke han nĩ. Kỹ tóg ẽg mỹ їн tỹ kri jẽ jafã ri ke nĩ gé, їн nũna tỹ kri gunħ kỹ fẽg ẽn ri ke ti nĩ gé. Ti ki ge tovãnh tũg nĩ. Tag hã mẽ ajag, ajag tỹ ti vĩ mẽ vén kỹ. Kỹ to tar nỹtĩmnĩ, Topẽ mỹ vẽnħ vĩ há tó kỹ.

⁸Ha vé, vëso jykrén. Inh mỹ tóg ù tỹ ón kỹ ajag krĩn kónãn sór ha mẽ tĩ. Û tóg krĩg tân tó tĩ, ù tóg nén ù tân tó tĩ gé.

Nén kórég mré ke ag vē, nén ũ tăn kar ti. Kĩ ũ tóg ēprā ke jykre tó tĩ gé. Cristo jykre tũ vē, ēprā ke jykre kar ti. Hā kĩ ũ tỹ ājag mỹ tag tó sór mũ ag vĩ jēmē tũg nĩ. ⁹⁻¹⁰ Cristo vĩ tỹ nén (ũ) kar kri ke nĩ, pā'i kar kri ke vĩ tỹ ti nĩ. Ti fār vĩ ēg ri ke ja nĩgtĩ, ti tỹ ga kri tĩ mũn kĩ, hā ra tóg tỹ Topē jē nĩ, ti fār kākā ti jē nĩ, Topē ti. Topē pē hā vē sir. Kĩ ājag tóg há nỹti gē sir, ājag tỹ ti ki ge kĩ, há tãvĩ.

¹¹ Kĩ, ēg tỹ ēg gré junun fār kym mũ vĩ ge nĩ, ha mẽ. Ti ki ge kĩ ēg tóg ēg jykre si tovănh mũ sir. Judeu ag tóg ājag gré junun fār kym ja nĩgtĩ, vėnh kar tỹ ag tỹ Topē jykre hā han mũ ěn ki kanhró nỹti jē. Ũri ēg tóg ēg jykre si tovănh mũ, vėnh kar tỹ ēg tỹ Topē jykre han mũ ki kanhró nỹti jē. Ēg tỹ ti mré ter ri ke ti nĩ, ēg tỹ ēg jykre si tovănh mũ ti, kĩ ēg tóg ēg tỹ nén ũ to ěn mũ ěn han măn ke tũ nĩ. Ēg tỹ Cristo mỹ vėnh fēg to ken hā vē. ¹² Ti mré ter ri ke han kĩ ēg tóg vėnh kej kākā nỹ ri ke han mũ gé, ti mré. Vėnh kype to ken hā vē, batismo to ken hā vē, hā vĩ: ti mré vėnh kej kākā nỹ ri ke han mũ, he mũ. Kĩ ēg tóg ti mré rĩr măn ri ke han mũ gé sir, ēg tỹ goj kátá kākutē kĩ. Ēg jykre si tỹ tóg hur tũ' hé, kĩ ēg rĩr măn vē sir. Topē vĩ Cristo rĩn măn, ti ter kĩ. Ēg tỹ ti ki ge kĩ tóg ēg rĩn măn mũ gé sir. ¹³ Vāsỹ ājag tóg vēser ri ke nỹti ja nĩgtĩ. Ājag tỹ ti vĩ mranh tugrĩn, ājag tóg ājag kăgter ra mũ ja nĩgtĩ, ājag gré junun fār kym tũ ja tugrĩn. Hā ra tóg ājag rĩn măn ja nĩgtĩ, Cristo mré Topē ti. Ājag mỹ tóg hur vėnh pāte fón, ājag tỹ vėnh jykre kórég han ja ěn ti tỹ. ¹⁴ Ēg név(e) rá ěn tỹ tóg tũ' hé huri, ēg mỹ. Rán kĩ tóg nĩ ja nĩgtĩ, ēg név(e) ěn ti, hā vĩ: ēg tỹ ti vĩ mranh, he mũ. Tag to tóg ēg to jũ ja nĩ vē. Hā ra Cristo tóg tỹ tũ' hé. Cruz to tóg ti sa, ēg név(e) ěn ti, kĩ tóg tỹ tũ' hé. Kajām kăn tóg huri. ¹⁵ Kĩ tóg Japo pā'i kar ag tỹ tũ' he ja nĩgtĩ gé, ũn tar ja ěn ag tỹ. Cruz to sa kĩ tóg ag tar tỹ tũ' hé, ũ tỹ ti kato vāsānsān mũ ěn ag tỹ, kĩ ēg

kar tóg ag venh ke mũ, kĩ ēg tóg ag to é henh ke mũ sir. Cristo tóg ag pan kar kĩ ag tatĩn tũg kăn ke mũ, nũgme ki ag vām jē. Tag ve jē ēg tóg ke mũ.

¹⁶ Kĩ ũ tỹ vējēn há to ājag mỹ: “ā tỹ tag kon kĩ Topē tóg ā to jũnh mũ,” hen kĩ hā ra kri nĩm tũg nĩ. Kurā kórég tó sór ag tóg tĩ gé, festa kar, kysā tãg ke gé, vėnh kăn ke kurā ke gé. ¹⁷ Vāsỹ ke ja vē, vėnh jykre tag, Cristo kătĩg ke jo ke ja vē, tag. Cristo kătĩg kĩ ēg tóg vėnh jykre tãg vėg nỹti ha, kĩ ēg ti si tovănh mũ sir. ¹⁸ Ũ tóg ājag mỹ Topē tỹ jēnē jafā ag tó sór mũ gé. “Topē tỹ jēnē jafā vėg sóg tĩ, tag hā tóg inh mỹ sēr tĩ,” he ag tóg tĩ. “Isỹ tỹ nén ũ tũ (hā) ra sóg vėg tĩ. Kĩ sóg kanhkā tăn tag ag mỹ jãn sór tĩ,” he ag tóg tĩ, ón kĩ. Hā ra ag tóg tag hā to (ag tóg) tỹ ũn mág nỹti sór mũ, ājag kăfór nỹti sór ag tóg mũ. ¹⁹ Ag pi(jé) Cristo jykre han sór mũ'. Cristo jykre hā tóg ā pir mỹ tar nĩ. Ēg krĩ ri ke ti nĩ, Cristo ti, kĩ ēg tóg ti há ri ke nỹti, ēg tỹ ti ki ge kĩ nỹtin kĩ. Ēg krĩ vĩ ēg tỹ nén (ũ) han sór mũ ěn han tĩ, ēg kujē tỹ, ēg mó tỹ ke gé. Kĩ ēg há tóg mog mũ sir, ti tỹ ēg krĩ mré vėnh jykre pir han kĩ. Kĩ ēg tóg Cristo jykre han ke mũ, ti tỹ ēg krĩ ri ke nĩn kĩ. Hā ra ag tóg tag han sór tũ nĩ, ũ tỹ ājag krĩn kónān tĩ ag.

Jesus mré ēg rĩnrĩr nỹtĩnh

²⁰ Hā kĩ ājag tóg Cristo mré ter ri ke han. Krĩg tăn kórég ag pi(jé) ājag tỹ hē ri ke măn mũ ha', nén ũ ũ kar tăn kórég ag ke gé. Kĩ ag jykre ěn vĩ ājag mỹ tũ' hé. Ājag tỹ ne jē han măn sór nē? Ke tũg nĩ. Ājag pi(jé) tỹ ag mré ke nỹti'. Ājag tỹ ne jē ag tỹ ājag mỹ vĩ jēmē sór nē, ag tỹ ón kĩ vējēn há to: ²¹ “tag vóg tũg nĩ, Topē mỹn kórég nĩ, tag ko tũg nĩ, ěn vóg tũg nĩ,” hen kĩ? Ag vĩ tag jēmē tũg nĩ. ²² Ēprā ke ag jykre vē, tag ti. Tag mĩ ke vē, ēg tỹ nén (ũ) vóg mũ ti. Tũg kăn jē tóg ke mũ, kejēn, hā kĩ ēg tóg Topē vĩ hā jēmēg tĩ. ²³ Ag jykre vĩ há nỹ ve nĩ.

Krī há nī ve ag nýtī. Kanhkā tăn to ag há nýtī, ag to ag jăn tī, kŷ ag tóg vēsŷ vênh kar krēm ke nýtī sór ve nī gé, vēsăvîn vóg kónăn ag tóg tī gé. Tag hă to jykrén kŷ ag tóg vēsŷ ũn mág han sór mŭ jăvo. Ājag tŷ nén to én mŭ ên han ag tóg tī, vênh jykre tag han kŷ, hă kŷ ag vī jēmē sór tŭg nī.

3 Ha vé, Cristo mré ājag tóg rīnrīr măn. Hă kŷ ti jykre hă han sórnmī. Kanhkā tá tóg nī nī, Topē pēgia tá ti nī, Cristo ti. Kŷ ti hă mī êkrén nī, ājag tŷ ti mré tá junjun ti jé. ² Ũ tŷ kynhmŷ nī ên jykre hă han sórnmī. Ēpră vênh jykre to jykrén tŭg nī. ³ Ter jé ěg tóg ke mŭ, ěg făr tag ti. Hă ra ěg tóg Cristo mré Topē ki vênh péju ri ke han. Ti tŷ ěg jy nīgăn to ken hă vē, ěg ter pē han tŭ nī jé, ěg tŷ ti mré rīnrīr nýtī jé. ⁴ Kejēn tóg vênh ven ke mŭ, Cristo ti, ěg rīnrīr han mŭ ti. Kŷ vênh kar tóg venh ke mŭ, ěg tŷ ti mré rīnrīr nýtī ti, ěg tŷ tŷ ũn mág nýtī ti.

Ēg jykre si mré ěg jykre tăg

⁵ Ājag jykre si tovănĥ nī, ājag tŷ nén to én mŭ ên mŷ vênh nenĥ nī. Ēg jykre si hă vē, ha mē: ěg prŭ tŭ mré nŷ, ěg mén tŭ mré nŷ, nén vênh mŷ kar han, Topē tŷ nén ũ to: “han tŭg nī,” he mŭ ra to én mŭ, â tŷ nén e hă tŷ văsăn (ka)mē. Vênh kăgră to jăn ên ri ke ti nī, ěg tŷ ěg tŷ nén e hă tŷ văsăn sór kŷ. ⁶ Tag tugrīn Topē tóg ěg to jŭ mŭ, ti vī mranĥ hă vē. ⁷ Tag han ja ājag tóg nýtigtī, văsŷ, ājag tŷ vênh jykre kórég tag mī mŭn kŷ. ⁸ Hă kŷ tag tovănĥ kăn.

Fe gŷv (ka)mē han tŭg nī. Jagnē to krī rŷ han tŭg nī. Ũ to jykrén kónăn tŭg nī. Ũ mŷ vī kónăn tŭg nī, ũ to vī kónăn tŭg nī gé. ⁹ Jagnē mŷ ón tŭg nī gé. Ājag jykre si ên tovănĥ kăn nī, kŷ tóg ěg tŷ ěg kur si nŭnh ri ke nī. ¹⁰ Kŷ vênh jykre tăg hă han kăn nī gé, kŷ tóg ěg tŷ kur tăg tu ri ke nī. Ēg tŷ tóg ũ tăg han sór mŭ, Topē ti, ěg tŷ tŷ ti kănhvég ri ke nýtī jé, ũ tŷ ěg han mŭ kănhmég ên ri ke, ěg tŷ ti ki kanhrăn

pē han jé. ¹¹ Kŷ ěg tóg tŷ ũn pir nýtī ha, fóg ag, Judeu ag, ũ tŷ Judeu jykre han mŭ ag, ũ tŷ ag jykre han tŭ ag ke gé, kanhgág ag, kanhgág jŭ ag, patrăo krēm ke ag, ag patrăo mré hă. Ēg tŷ Cristo ki ge kŷ ěg tóg tŷ ũn pir nýtī, kŷ Cristo hă vŷ tŷ ěg kar krīg mŷ ke nī.

¹² Topē vŷ ājag kuprēg, ājag tŷ tŷ ti tŭ nýtī jé, ti tŷ ājag to há tăvī jēn kŷ. Kŷ ti jykre hă han nī. Jagnē jagăgtăn nī. Jagnē mŷ vī há han nī. Vēsŷ ũn mág han sór tŭg nī. Komēr hă vīmni. Jagnē to fen mág nýtīmni. ¹³ Jagnē to jŭ tŭg nī. Jagnē mŷ vênh pâte fón nī, ũ tŷ ājag mŷ vī kórég han kŷ. Ēg Senhor vŷ ěg mŷ vênh pâte fón tī gé, kŷ jagnē mŷ vênh pâte fón nī, ti ri kén. ¹⁴ Ājag tŷ jagnē fe ri ke nýtīn kŷ tóg há kar tī. Kŷ ājag tóg vênh jykre pir han ke mŭ. ¹⁵ Cristo jé ājag krī kuprăg, kŷ ājag tóg krī kănhvy nýtīnĥ mŭ ha. Ēg krī kupră nīn kŷ ěg tóg jatun mŷ jagnē mré nýtīnĥ mŭ, ěg tŷ Cristo há ri ke nýtī jé. Hă jé tóg ěg jé prēr, Topē ti. Kŷ ti mŷ tag to agradecer hemni. ¹⁶ Cristo vī hă tŷ jagnē mŷ tómnī, hă ki kanhrăn sórnmī. Tag tŷ jagnē jyvēn nī, tag hă to krī há han nī. Kŷ Topē mŷ vī há han nī gé. Ti mŷ jăn nī, ti jé hă tómnī, ti kuprīg tŷ ājag mŷ nén tó mŭ ti. Ti hă mŷ vī há han nī, ti mŷ: “inh mŷ tóg há tī, â tŷ inh mŷ nén han mŭ ti,” hemni. ¹⁷ Ājag tŷ nén ũ han kŷ ěg Senhor mré vēmén kar kŷ han nī, ājag tŷ ti jykre hă han jé. Ājag tŷ nén ũ tó sór kŷ ti hă mŷ tó vén nī gé. Ēg Senhor tŷ Jesus jykre hă han jé ěg tóg ke mŭ, kŷ ěg tóg ti hă tugrīn (ěg tóg) ěg jóg tŷ Topē mŷ vênh vī há tónĥ ke mŭ gé sir, ti mŷ agradecer hen kŷ.

Ēg jykre tăg

¹⁸ Kŷ sóg ũn mén nýtī fag jyvēn sór mŭ. Ājag mén jykre mī mŭmni. Ēg Senhor jykrén hă vē.

¹⁹ Ājag mén jyvēn sór sóg mŭ gé. Ājag prŭ to há tăvī nýtīmni. Fag mŷ vī tar han tŭg nī.

²⁰ Kĩ sóg ājag krē m̃y tag tó sór m̃u gé. Ājag han m̃u fag ṽi jēmēm̃nī. Ēg Senhor ṽy tag ve sór m̃u, ājag ki.

²¹ Kĩ sóg ũn sanh ag m̃y: ājag krē m̃y ṽi tar pē han tūg nī, ag t̃y ājag to jū tū nī jé, he m̃u gé. Krónh ke jé ag tóg ke m̃u, ājag t̃y ag m̃y ṽi tar pē han k̃y.

²² Ājag kāmī ũ tóg patrão m̃y rānhrāj tī, fagrinh m̃y. Ājag jyṽen k̃y sóg ājag m̃y: ājag patrão ṽi ki hā han nī, he m̃u. ũ tóg kejēn ā patrão t̃y ti m̃y ṽi hā han hā jé tóg ā patrão tū ki r̃ir tī, ón k̃y. Tag han tūg nī. Ājag patrão tū ki r̃ir pē han nī, ājag t̃y ěg Senhor kamēg k̃y. Vēnh jykre p̃ir hā han nī, ājag patrão m̃y. ²³ Ti rānhrāj ki r̃ir k̃y m̃y sér ñy t̃im̃nī. Ājag t̃y ěg Senhor t̃y Jesus rānhrāj han ri ke ti nī, ājag patrão rānhrāj han m̃u ti. ²⁴ Ēg Senhor ṽy ājag m̃y ājag rānhrāj kajām ke m̃u, ājag t̃y ti tū kar ag mré tá junjun ken k̃y. Tá ti vin han k̃y ñy t̃i, ti t̃y ājag m̃y nén vin ke m̃u ěn ti. Ājag patrão pē ṽy t̃y ěg Senhor t̃y Cristo nī. Ti hā m̃y ājag tóg rānhrāj tī. ²⁵ ũ t̃y vēnh jykre pāno han m̃u ěn vóg kónān jé tóg ke m̃u, Topē ti, ag t̃y t̃y ũn mág ñy t̃i (hā) ra. Topē m̃y ěg tóg jagnē ri ke kar ñy t̃i, tag ki ũn mág ag mré ũn kāsir ag. Vēnh kar vóg kónān jé tóg ke m̃u, vēnh jykre pāno to, Topē ti.

4 Ājag kāmī ũ ṽy t̃y patrão ñy t̃i, k̃y sóg patrão hā jyṽen sór m̃u ha. Ājag camarada ag ṽy ājag rānhrāj han tī. K̃y ag m̃y vēnh jykre kuryj han nī. Ag ki r̃ir hā han nī. Patrão ũ ṽy t̃y ājag krīg m̃y ke nī, hā ṽy: ěg Senhor, he m̃u, kanhkā tá nī ti. Tag to jykren.

Paulo t̃y ěg jyṽen

² Topē mré vēm̃en tovānh tūg nī. Ti m̃y: “inh m̃y tóg há tī,” hem̃nī gé. M̃umēg nī, ājag t̃y ti mré vēm̃en to krónh ke tū nī jé. ³ K̃y ti mré iso vēm̃en nī gé. Topē ṽi tó sóg tī. K̃y ti m̃y to ṽim̃nī, ag t̃y inh ṽi mē há han jé, s̃y ag m̃y Cristo kāmén k̃y, s̃y ag m̃y Topē t̃y nén han sór m̃u ěn kāmén k̃y. Tag tugr̃in sóg se k̃y jē.

⁴ Hā ra sóg tó há han sór m̃u, Topē t̃y inh m̃y vēnh rānhrāj tag ñim k̃y. Hā jé iso ti mré vēm̃en nī.

⁵ ũ t̃y ěg jāvo Jesus ki ge tū ag m̃y ṽi há han nī. Kurā kren tūg sórm̃nī. ⁶ Nén ũ há t̃y vēm̃en nī, vēnh kar m̃y sér tī jé, ag t̃y ājag ṽi mēn k̃y. K̃y ājag tóg vēnh kar m̃y kāmén há han ki kanhró ñy t̃im̃nī m̃u.

Paulo t̃y ag m̃i ěkrén

⁷ S̃y ājag m̃y Tíquico jēnē vē, ti t̃y ājag m̃y is̃y nén (ũ) vég m̃u kāmén k̃an jé, is̃y nén (ũ) han m̃u ti ke gé. Ēg régre vē, Tíquico ti. Ēg to há tāvī ti nī. Ēg Senhor rānhrāj han ti tī, to krónh ke tū ti ñy t̃i. ⁸ Ti hā ṽy s̃y nén vég m̃u tó k̃an ke m̃u, hā jé sóg ti jēnēg m̃u, ti t̃y ājag fe t̃y m̃rin ke jé. ⁹ Ti mré sóg ājag mré ke t̃y Onésimo jēnēg m̃u gé. Ēg régre vē gé, ěg to há ti ñy t̃i gé, Topē ki rā to krónh ke tū ti ñy t̃i. Ag hā ne ājag m̃y tónh ke m̃u, cidade tag ki nén kutē m̃u ti.

¹⁰ Aristarco ṽy inh mré se k̃y jē gé. Ājag m̃i tóg ěkrég tī. Marcos ṽy ājag m̃i ěkrég tī gé, Barnabé kanhkā ěn ti. Marcos to sóg ājag m̃y vēnh ṽi jēnē huri, ājag t̃y ti m̃y: “hā kārā,” he jé, ti t̃y kejēn ājag tá jun ti k̃y. ¹¹ Josué ṽy ājag m̃i ěkrég tī gé, ag t̃y ũ to: Justo, he m̃u tag ti. Judeu ag vē, Aristarco mré Marcos mré Josué ti. Inh mré ag tóg rānhrāj tī, Topē ṽi ki. Ag jāvo Judeu ũ ag ṽy inh mré rānhrāj jāvānh ñy t̃i gé. K̃y ũ tāgtū tag ag tóg inh fe t̃y m̃rin ke tī, ag t̃y inh mré rānhrāj k̃y.

¹² Epafra ṽy ājag m̃i ěkrég tī gé, ājag mré ke tag ti. Jesus Cristo rānhrāj han k̃y tóg jē nī. Ājag to tóg Topē mré vēm̃en tī, to tóg vāsān tī, to krónh ke tū ti ñy t̃i, ājag t̃y kygnēg tū ñin jé, ājag t̃y Topē t̃y ěg ki nén ve sór m̃u ěn hā han sór jé, ājag t̃y tag hā to tar ñy t̃i jé. ¹³ Ājag hā ki tóg ěkrég tī, tag vég sóg tī, k̃y tóg Laodicéia tá ke ag m̃i ěkrég tī gé, Hierápolis tá ke ag m̃i ke gé. ¹⁴ Lucas ṽy ājag m̃i ěkrég tī gé, médico ěn ti, ũ t̃y ěg to há tāvī ěn ti, kar k̃y Demas ti ke gé.

¹⁵Laodicéia tá ãg régre ag mĩ tómni, sỹ ag mĩ ěkrég mũ ti. Ninfá fi mĩ sóg ěkrég tĩ gé, fi ĩn tá vênh măn jafã ěn ki. ¹⁶Ăjag tỹ vênh rán tag to ke kar kỹ Laodicéia tá Topẽ ki ge kỹ nỹtĩ ag mỹ jẽnẽmni, kỹ tá ke ag tũ to kemni gé, vênh kato, sỹ ag mỹ carta jẽnẽg mũ ti. ¹⁷Kỹ

Arquipo mỹ: ěg Senhor tỹ ã mỹ nén (ũ) tó mũ ěn han nĩ, to krónh ke tũg nĩ,” hemni.

¹⁸Vãhã sóg vėsóg ki ăjag mỹ rán ke mũ ha', ĩnh, hã vỹ: Paulo, he mũ. Isỹ se kỹ jẽ tag kã jatu' he tũg nĩ. Topẽ jẽ ăjag tar han tĩ. Hã vẽ.

PAULO TỠ CARTA HAN: TESSALÔNICA TÁ KE AG MỠ CARTA VE

1 Paulo tỡ rá vễ. Isỷ cidade tỡ Tesselônica tá ke ag mỡ rán hã vễ. Tesselônica tá ajag tóg vễnh măn tĩ, Topễ vĩ mẽ jế. Topễ tũ vỹ tỡ ajag nỹtĩ, ẽg jóg mág ti. Jesus Cristo tũ vỹ tỡ ajag nỹtĩ gế, ẽg Senhor ti. Sỷ ajag mỡ vễnh rá jẻnẻ vễ, kỡ Silas vỹ jẻnẻg mủ gế inh mẻ, Timoteo ke gế. Topễ mỡ sóg to vĩ ti, ti tỡ ajag tar han jế, ti tỡ ajag mỡ vễnh jykre kusa nĩm jế.

Vễnh kar tỡ Tesselônica tá ke ag jykre vếg tĩ

² Kurã kar ki sóg ajag to Topễ mẻ vỹ ti. Ti mỡ sóg: “há ti nĩ, ả tỡ ag krĩn há han kỡ,” he tĩ, kurã kar ki. ³Sỷ ti mẻ vĩn kỡ sóg ajag mỡ ẻkrẻg tĩ. Ajag tỡ ti ki ge kỡ nỹtĩn kỡ ajag tóg nẻn ử há kar han mủgtĩ. Ajag tỡ ti to há nỹtĩn kỡ ajag tóg rănhrạj mág han mủgtĩ. Ajag tỡ ẽg Senhor tỡ Jesus Cristo ve sớ kỡ ajag tóg to krónh ke tũ nĩgtĩ. Tag mỡ sóg ẻkrẻg tĩ, kurã kar ki, sỷ Topễ mẻ vĩn kỡ, ẽg jóg mág mẻ.

⁴ Inh kanhkỏ, tỡ ẽg tóg Topễ fe nỹtĩ, ti tỡ ẽg kuprẻg ja nĩn kỡ. Tag ki kanhrỏ ẽg tóg nỹtĩ. ⁵Sỷ ajag mẻ nĩn kỡ sóg ajag mỡ Topễ vỹ sẻr tó ja nĩgtĩ. Inh pi(jẻ) inh jykre tỡ vẻmẻn ja nĩgtĩ. Topễ jykre hã tỡ sóg vẻmẻn tĩ, Topễ kuprỉg tỡ inh krĩn kỡ. Ti hã vỹ ẽg tar han tĩ. Ki hã tó sóg mủ ajag mỡ, tag ki kanhrỏ ajag tóg nỹtĩ. Isỷ ajag mẻ nĩn kỡ ajag tóg inh ve ja nĩgtĩ, hã kỡ ajag tóg inh jykre ki kanhrỏ nỹtĩ. Sỷ ajag to há nĩn kỡ, hã kỡ sóg ajag mỡ tó ja nĩ. ⁶ Inh ri ke han sớ ajag tóg mủ, ẽg Senhor ri ke ke gế. Sỷ ajag mỡ nẻn tó ja ẻn kri fig ajag tóg tĩ. Kỡ ajag tóg to vễsỷrẻnh jagy han tĩ, ửri, pỏ'i ag tỡ ajag to kỏrẻg nỹtĩn kỡ. Hã ra Topễ kuprỉg vỹ tỡ ajag jagrẻ nĩ, hã kỡ ajag krỉ tóg kỏnhvỹ he mủ, ajag

vễsỷrẻnh mủ (hã) ra, ẻprỏ. ⁷ Hã kỡ vễnh kar tóg ajag tỡ nẻn han mủ mẽg mủ sir, ga tỡ Macedônia tá, ga tỡ Grẻcia tá ke gế, ag tỡ ajag kỏm han kỏn jẻ sir, ử tỡ Jesus ki ge kỡ nỹtĩ kar ag ke gế. ⁸ Vễnh kar vỹ ajag tỡ nẻn han mủ mẽgmẻ kỏn huri. Topễ vỹ tó ajag tóg mủ, hã kỡ ag tóg ga tỡ Macedônia tá mẽgmẻ, ga tỡ Grẻcia tá ke gế, ẻmỏ kar mỡ hã. Ajag tỡ Topễ ki ge mủ mẽgmẻ kỏn ag tóg huri. Isỷ ag mỡ tó sớ kỡ ag tóg: “mẻ ẻg huri,” he tĩ. ⁹ Kỡ ag tóg inh mỡ kỏmẻn mủ, sỷ ajag mỡ Topễ vỹ tó ja ẻn ti. “Ả vỹ kri fig ag nẻji mủ, Tesselônica tá ke ag,” he ag tóg tĩ inh mỡ, ajag to. “Topễ ki ge kỡ ag nẻji nỹtĩ, vễnh kỏgrỏ tỡ topễ tovỏnh kỡ, ag tỡ Topễ vỹ hã han jẻ sir, ửn rỉr mủ vỹ ti, hã vỹ: Topễ pẻ, he mủ,” he ag tóg tĩ ajag to. ¹⁰ “Ti kỏsin nẻji vỹn kẻnh ke mủ, kanhkỏ tá. Ti kỏtủg jỏvỏnh ag nẻji mủ,” he ag tóg tĩ. “Topễ nẻji ti rỉn mỏn, ti ter kar kỡ, Jesus ti. ẻn nẻji ẻg kẻnkrẻn han mủ, ẻg tỡ Topễ jủ vếg tũ nĩ jẻ, Jesus kỏtủg jỏvỏnh ag nẻji mủ, Tesselônica tá ke ag,” he ag tóg tĩ ajag to.

Paulo tỡ ag mỡ Topễ vỹ tó há han

2 Inh kanhkỏ, inh ve ajag tóg, isỷ ajag mẻ nĩ ja nĩn kỏ. Isỷ ajag mỡ Topễ vỹ tó kỡ ajag tóg Topễ ki rá. Tó há han ja sóg nĩ. ² Cidade tỡ Filipos tá ag tóg inh vóg kỏnỏn ja nĩgtĩ. Tá ag tóg iso ẻ he ja nĩgtĩ. Tá kỏkutẻ kỡ sóg ajag tá jun ja nĩgtĩ. Tag ki kanhrỏ ajag tóg nỹtĩ. Ge ra sóg ajag mỡ tó, Topễ vỹ sẻr ti. Ajag kamẻg ja tũ sóg nĩ, Topễ tỡ isar han kỡ, sỷ inh jagtar jagy ẻn ve ja ra. ³ Sỷ ajag jyvẻn kỡ sóg ajag mỡ ki hã tó ja nĩgtĩ, kygnẻ ja tũ inh nĩ. Nẻn ử vẻnhmỡ tó ja tũ sóg nĩgtĩ gế. Ajag tỡ nẻn ử to ẻn ja tũ sóg nĩgtĩ gế. ⁴ Topễ hã ne inh jykre ve kỡ inh mỡ: “hã inh vỹ ti tó,” he ja nĩ. Hã kỡ sóg tó mủ sir. ẻprỏ ke ag tỡ iso vỹ há han tũ ra tóg inh mỡ tỡ nẻn ử tũ nỹ. Topễ tỡ iso vỹ há han ke tag hã tóg inh mỡ há nĩ. Hã jẻ

sóg ti vĩ hã ki króm sór mũ. Ti hã ne ãg jykre ve kũ ãg ki kanhró nĩ, Topẽ ti.

⁵ Hã kũ sóg ãgag mũ ón kũ: “há ãgag tóg nĩtĩ,” he ja tũ nĩgtĩ. Tag ve ãgag mũr. ãgag tũ nén ũ to ẽn ja tũ sóg nĩgtĩ gé. ãgag ki sóg ganho ve sór ja tũ nĩ gé. Topẽ hã ne tag vé'. ⁶ Kũ ẽprã ke ag tũ iso vĩ há han tũ ra tóg inh mũ tũ nén ũ tũ nĩ mũr. ãgag tũ inh mũ vĩ há han tũ ra tóg inh mũ tũ nén ũ tũ nĩ gé. ⁷ Cristo hã vĩ inh jẽnẽ ja nĩ, hã kũ tóg, sũ ãgag mũ vĩ tar han há tóg tĩ vē. Hã ra sóg ke ja tũ nĩ. Komẽr hã sóg vĩ ja nĩgtĩ. Ẽg tũ ẽg krẽ kãsir mrẽ vĩ ri ke han ja sóg nĩgtĩ. Gĩr mũnh fi tũ komẽr hã vĩ ẽn ri ke han ja sóg nĩgtĩ. ⁸ ãgag to sóg há tãvĩ nĩ, hã kũ sóg ãgag mũ Topẽ vĩ sér tó kãn sór ja nĩgtĩ. Kũ tóg inh mũ tũ nén ũ tũ nĩ gé, sũ ãgag jagfy ter ke ti.

⁹ Inh kanhkã', inh rãnrãj to jykrén nĩ. Inh rãnrãj vĩ inh kutãn tĩ. Kutỹ ki sóg inh rãnrãj han tĩ, kurã ki ke gé, isũ vẽnẽn comprar he jẽ. Hã kũ sóg ãgag jẽn ko ja tũ nĩgtĩ. Topẽ vĩ hã tó ja sóg nĩ, ãgag kanhrãn kũ. Tag to jykrén. ¹⁰ Isũ nén han mũ ve kãn ãgag tóg, kũ Topẽ vĩ inh vég tĩ gé. Topẽ jykre hã han isóg tĩ, vẽn jykre kuryj ti, nén ũ vẽnhmũ han vãn sóg nĩgtĩ. ãgag rĩnve sóg han, ãgag tũ Jesus ki ge kũ nĩtĩn kũ. ¹¹ Gĩr panh vĩ ã kósin jyvẽn tĩ, kũ tóg kejẽn ti jyvẽn tar han tĩ gé. Kũ tóg kejẽn vĩ há han tĩ gé, ti fỹn kũ. Ti ri ke han ja sóg mũr, ãgag mũ. ¹² Hã kũ sóg ãgag fe tar han. ãgag jyvẽn ja sóg nĩgtĩ, kũ sóg ãgag jyvẽn tar han ja nĩgtĩ gé kejẽn, kũ sóg ãgag fe tũ há' he ja nĩgtĩ gé, sũ ãgag jyvẽn tar han kar kũ. ãgag tũ Topẽ jykre ki króm jẽ, hã jẽ sóg ãgag mũ ke ja nĩgtĩ. Ti hã ne ãgag kuprẽg', ãgag tũ ti tũ tũ ẽg pã'i nĩ ve jẽ, ãgag tũ ti jykre mág ve jẽ, ti jykre tũ ẽg kãfór nĩ ẽn ti. ¹³ ãgag tũ Topẽ vĩ mẽ kũ ãgag tóg to: “hej,” he ja nĩgtĩ. ãgag mũ sóg tó, ti vĩ ti, kũ tóg ãgag mũ há ja nĩgtĩ. Tag to sóg Topẽ mũ: “ã hã ne tóg ag krĩn', kũ tóg inh mũ sér tĩ,” he tĩ. Kurã kar ki sóg ti mũ tó tĩ. Isũ ãgag mũ Topẽ vĩ tó kũ ãgag

tóg to: “Topẽ vĩ vē,” he ja nĩgtĩ. Hã ra tóg ge nĩ. Hã kũ tóg ãgag jykre kugrynh mũ sir, Topẽ vĩ ti, ãgag tũ ti vĩ kri fin kũ.

¹⁴ Inh kanhkã', ga tũ Judéia tá ke ag kóm ãgag tóg vẽnẽrẽnh mũ. Tá ũ ag tóg vẽnẽn mãn tĩ, Topẽ vĩ mẽ jẽ, ag tũ Jesus Cristo ki ge kũ nĩtĩn kũ. Kũ ag mrẽ ke ag tóg ag vóg kónãn tĩ, Israel ag. Ge ti nĩ gé, ãgag mrẽ ke ag tũ ãgag vóg kónãn ti. Hã kũ ãgag tóg ag kóm vẽnẽrẽnh mũ gé. ¹⁵ Israel pã'i ag vĩ Jesus tẽn, ẽg Senhor ti. Topẽ vĩ tó ti ag kãgtẽn ag tóg tĩ gé. Kũ ag tóg ẽg vóg kónãn tĩ gé sir. Hã ki ag tóg Topẽ jũ han tĩ. Ẽprã ke kar ag kato vãsãn-sãn ag tóg tĩ. ¹⁶ Hã kũ ag tóg inh mũ: “ker fóg ag mũ vĩ hẽ',” he tĩ. “Ker kanhgág ag mũ Topẽ vĩ tó hẽ', ag krenkren tũ nĩ jẽ,” he ag tóg tĩ inh mũ. Hã ki ag tóg Topẽ vĩ mrynhmrãn kãn tĩ. Kũ ag tóg ti vĩ mranh kãn kũ nĩtĩ ha. Hã kũ Topẽ tóg ag to jũ mũ sir. Kũ tóg ag vóg kónãn kãn ke mũ gé sir, vẽnẽn kaja jẽ.

Paulo krĩ kufy

¹⁷ Inh kanhkã', isũ ãgag vég tũ nĩn kũ tóg inh mũ e tĩ. Hã kũ sóg fe kaj nĩ. Tãg ti tĩ ver, sũ ãgag ve ja ti. Hã ra inh pi(jé) ãgag kã jatu' he mũ'. ãgag ve sór tãvĩ inh nĩ, kũ sóg ãgag to kãtig kren. ¹⁸ Isũ ãgag to kãtig ke vē vē, hã ra Satanás vĩ inh kato tẽ. Kar kũ sóg to jykrén mãn, hã ra Satanás vĩ inh kato tẽ mãn. Hã kũ sóg ãgag to jun ja tũ nĩ, inh, hã vĩ: Paulo, he mũ. ¹⁹ ãgag hã to sóg jykrén mũ, Jesus tũ ãgag hã ki inh jykre ve jẽ, ti kãtig mãn kũ, ẽg Senhor ti. ãgag tũ ti vĩ ki króm kũ tóg vég mũ, inh rãnrãj ti, Jesus ti. ãgag hã to inh fe tóg mryn ke mũ, ãgag hã ki sóg tũ ãn mág nĩnh mũ, Jesus mũ. Hã kũ sóg ãgag to jykrén tĩ. ²⁰ ãgag hã tugrĩn sóg tũ ãn mág nĩ, ãgag hã tugrĩn tóg inh mũ sér tĩ.

3 ãgag to jykrén mág sóg tĩ, hã kũ sóg Timóteo jẽnẽ ja nĩ, ti tũ ãgag ve jẽ, ẽg tũ cidade tũ Atenas tá nĩtĩn kũ. Ti mũ sóg: “hã inh ré kũ tig,” he ja nĩ, “sũ inh

pir mý tag kã nĩ jé,” he ja sóg nĩ. “Ag hýn ne han mũ’? he sóg mũ, ký ag venh tĩg, inh mý,” he ja sóg nĩ ti mý, isý ājag to krĩ kufy ja nĩn ký. ² Timóteo vỹ tỹ Jesus mré ke nĩ. Topē camarada ri ke tóg nĩ. Cristo kāmén ti tĩgtĩ, inh ri ke. Ký tóg ājag tá jun ký ājag jyvẽn ja nĩ, ājag fe tỹ há’ he ja tóg nĩ, ājag tỹ Jesus ki rã tovãnh tũg jé. Hã jé sóg ti jẽnē ja nĩ. ³ “Hẽn ri ke mũn ag hýn krĩ kufy nýtĩ, ag jagāgtar mũn ký,” he ja sóg nĩgtĩ ājag to. “Ag mré ke ag ne tóg ag vóg kónãn mũ’, Topē jykre to’,” he ja sóg nĩgtĩ. Hã ra sóg ājag mý tó ja nĩ, ěg jagāgtar ke ti, Topē jykre to. ⁴ Isý ājag mré nĩ mũ ěn kã sóg ājag mý tó, ěg jagāgtar ke ti, ti tugrĩn. Hã ra tóg ge nĩ. Hã to ājag tóg jagāgtar tĩ, vēsýrénh tĩ sir. ⁵ Hã ký sóg Timóteo jẽnē, isý ājag to krĩ kufy ja nĩn ký. “Ag mý Topē tovãnh tũ nĩ vỹ?” he ja sóg nĩ. “Ěg krĩn kónãn ti ěn mý ag krĩn tũ nĩ vỹ, Japo ti?” he ja sóg nĩ mýr. “Ti tỹ ag krĩn kónãn ký sóg tagrĩnh mý ag mý tó ja nĩ mýr’,” he ja sóg nĩ ājag to. Hã ký sóg Timóteo jẽnē ja nĩ.

Timóteo tỹ Paulo krĩ kuprãg

⁶ Hã ra tóg sir inh ki jun mãn mũ, Timóteo ti, ājag ve kar ký. Ũri tóg jun. Ājag kāmén tóg mũ, tó há han tóg mũ, ký inh fe tóg mĩn ke mũ sir. “Jesus ki ge to tar ag nýtĩ,” he tóg mũ. “Jagnē to há ag nýtĩ, ě mĩ ěkrég ag tóg tĩ. Ā ve sór ag tóg tĩ. Ā tỹ ag ve sór ri ke han ag tóg tĩ,” he tóg mũ inh mý, Timóteo ti. ⁷ Ký inh krĩ tóg kãnhvy’ he mũ sir ājag to. Inh jagtar mũ ra inh fe tóg há’ he mũ sir, ājag tỹ Jesus ki ge ký nýtĩn ký. ⁸ Ājag tỹ ti to tar nýtĩn ký tóg inh mý inh rĩr mãn ri ke nĩ, ký sóg mĩn ke ri ke han mũ sir. ⁹ Topē mý sóg vĩ há han mũ sir ājag to. Inh fe vỹ mĩn ke mũ, sý ājag tỹ nén han mũ ěn mē ký. Hã ký sóg Topē mý vĩ há han mũ sir, ājag tỹ inh fe tỹ mĩn ken ký. ¹⁰ Kutý kar ki sóg ti mré vēmén tĩ, kurã kar ki ke gé. Sý ājag ve sór nĩn ký sóg

Topē mý isĩg ke to vĩ tĩ, sý ājag tar han sór ký, ājag tỹ ti ki rã to tar nýtĩ jé.

¹¹ Topē tỹ kejẽn inh mý: “ha ag venh tĩg,” hen ký tóg inh mý sér tĩnh mũ, ěg jóg mág tỹ inh mý tag tó ký, Jesus ti ke gé, ěg Senhor ti. ¹² Ěg Senhor mý sóg to vĩ tĩ, ti tỹ ājag tỹ jagnē to há tãvĩ han jé. Jagnē to há ājag nýtĩ, ký sóg ti mý to vĩ tĩ, ti tỹ tag to ājag tar tãvĩ han jé, ājag tỹ vẽn kar to há nýtĩ to tar nýtĩ jé gé, isý ājag to há nĩ ri ke. ¹³ Ký sóg ti mý to vĩ tĩ gé, ti tỹ vẽn jykre há to ājag tar han jé. Kejẽn ěg Senhor tỹ Jesus vỹ kãtig mãn ke mũ, ě tũ kar ag mré. Ěg jóg tỹ Topē tỹ ũri ājag tar han ký ājag tóg kurã ěn kã ti rĩnja tá jãnhkri nýtĩnh mũ, ājag tỹ kygnē ja tũ nĩn ký.

Jesus jykre mĩ ěg mũnh ke mũ

4 Inh kanhkã’, vãhã sóg ājag mý nén ũ tó sór mũ gé. Ěg Senhor tỹ Jesus rĩnve sóg ājag jyvẽn sór mũ. Ājag mý sóg ti jykre tó huri, ājag tỹ ti japry jagma, ti jamĩn jagma mũ há han jé, ājag tỹ Topē mý há nýtĩ jé. Tag han ājag tóg mũgtĩ. Gemnĩ. To tar nýtĩmnĩ. ² Tag kāmén sór isóg mũ ājag mý, ěg Senhor tỹ Jesus tỹ inh mý: “tag tómnĩ,” he ja nĩn ký. ³ Topē vỹ ājag to jykrén, ājag tỹ ti jykre hã han jé. Ký ājag prũ tũ fag mré nỹ tũg nĩ, ājag mén tũ ag mré nỹ tũg nĩ gé. ⁴ Ājag tỹ ājag prũ fi mré nỹ ký fi mré nỹ há han nĩ, Topē jykre han jé. Ký ěprã ke ag vỹ ājag to jykrén kónãn ke tũ nĩ gé. Fi tỹ prũg kónãn tũg nĩ. ⁵ Fi to ěn kónãn tũg nĩ gé, ājag prũ fi to. Ũ tỹ Jesus ki rã tũ ag jykre han tũg nĩ. Ũ tỹ Topē jykre ki kagtĩg nýtĩ ag jykre han tũg nĩ, ājag prũ fi to. Fi tỹ prũg há han nĩ.

⁶ Ājag régre tỹ nén ũ to ěn tũg nĩ. Ti tũ vē mýr, ký ti tũ ki Topē vỹ mranh tũg nĩ. Topē hã ne tag to jũ tĩ. Ký ājag régre tỹ nén ũ vóg tũg nĩ. Ājag tỹ ti tũ vóg ký Topē vỹ ājag vóg ke mũ gé, ti kajãm jé. Tag tó sóg huri ājag mý, tag to sóg ājag mý vỹ tar han huri, hã ra sóg ājag mý tó

mãn mũ gé. ⁷ Ëg tỹ vènh kavénh kỹ ãg tóg Topê jykre han tũ nĩgtĩ mỹr. Ti jykre vỹ kuryj nỹ. Ëg tỹ tỹ ti tũ nỹtĩ hã jé tóg ãg kuprêg. ⁸ Ëprã ke vĩ pijé', sỹ ãjag mỹ nén tó mũ tag ti'. Topê vỹ vè mỹr. Æjag tỹ inh vỹ tag han tũ nĩn kỹ ãjag tóg Topê vỹ mranh mũ. Ti hã ne tóg ã kuprĩg tỹ inh jagrê han ja nĩ', kỹ tóg tỹ ãjag jagrê han ja nĩ gé.

⁹ Nén ù to ãjag tar nỹtĩ, hã vỹ: jagnê to há, he mũ. Hã kỹ sóg tag to ãjag mỹ rán mág han ke tũ nĩ. Topê vỹ ãjag kanhrãn, ãjag tỹ jagnê jagãgtãn ken ki. Ki hã han ãjag tóg ti'. ¹⁰ Ga tỹ Macedônia tá ke kar ag to ãjag há nỹtĩ, Jesus mré ke kar ag to ke gé. To tar nỹtĩmnĩ, to krónh ke tũg nĩ, ãjag tỹ tỹ Jesus mré ke nỹtĩn kỹ. Hã jé sóg ãjag jyvên mũ.

¹¹ Vãsãn nĩ, ãjag tỹ jatun mỹ nỹtĩ jé, jatun mỹ ãjag rãnrãj hyn han jé. Æjag rãnrãj pẽ ên to tar nỹtĩmnĩ, hã jé sóg ãjag jyvên ja nĩ. Kỹ sóg to ãjag jyvên mãn mũ, ãjag rãnrãj to. ¹² Kỹ nén ù vỹ ãjag mỹ tũ' henh ke tũ pẽ nĩ. Hã ki vènh kar tóg ãg jykre há ki kanhró nỹtĩn mũ. Æjag tỹ ãjag rãnrãj to nén ù kar ve kỹ tóg há ti, ù tỹ ãjag mỹ nén ù nĩm tũ nĩ jé, fagrĩnh mỹ.

Jesus mré ke ter kỹ fỹ mág tũg nĩ

¹³ Inh kanhkã', sỹ nén ù ki ãjag kanhrãn há tóg ti gé, ha mẽ. Ëg mré ke ù ag tóg kãgter kỹ nỹtĩ. Kỹ fỹ mág tũg nĩ ag jé. Jesus ki ge tũ ag ri ke han tũg nĩ. Ag ter kỹ ag tóg nén ù há venh ke tũ nĩ. Hã kỹ ag tóg fỹ mág ti, Jesus ki ge tũ ag. Hã ra tóg ãg mỹ ge tũ nĩ. ¹⁴ Jesus vỹ ter ja nĩ, kar kỹ tóg rĩr mãn ja nĩ. Tag ki kanhró ãg tóg nỹtĩ. Hã ri ke ti nĩ, Jesus ki ge mũ ag kãgter ti. Topê vỹ ãg han mãn ke mũ, Jesus tugrĩn, ãg tỹ ti mré nỹtĩ jé sir. ¹⁵ Ëg Senhor vỹ inh kanhrãn, hã kỹ sóg tó mũ. Ti jẽnky ki tóg kutê, sỹ tónh ke tag ti, ha mẽ. Ver ãg rĩnrĩr nỹtĩ. Hên ri ke mũn ãg kãgter kãn ke tũ nĩ, ti kãtĩg ken jo. Kỹ ãg tóg ti kãtĩg venh mũ sir. Hã

ra ãg tóg ùn kãgter mũ ag jo mũnh ke tũ nĩ. Ag hã mré ãg tóg mũnh ke mũ.

¹⁶ Ti kãtĩg vỹ ge nĩnh mũ, ha mẽ. Tére jé tóg ke mũ, ãg Senhor ti, kanhkã tá. Kỹ vènh vỹ tóg mẽ há tĩnh mũ. Topê tỹ jẽnê jafã ag pã'i mág vỹ prêr ke mũ sir. Topê tỹ vãykn jafã vỹ mẽ há tĩnh mũ, trombeta ên ti. Kỹ ùn kãgter mũ ag vỹ rĩnrĩr mãn mũ sir, Jesus mré ke ag. ¹⁷ Kar kỹ ãg tóg ag mré jãprynh mũ gé, ãg tỹ ti kãtĩg ke jo ter tũ há ra. Ag mré ãg tóg jãprynh mũ, ùn rĩnrĩr mãn mũ ag mré. Kanhkã góg kãmĩ ãg tóg jãprynh mũ, kỹ ãg tóg ãg Senhor kato tẽgtẽnh mũ sir, kanhkã krẽm. Hã kỹ ãg tóg ti mré nỹtĩn mũ sir, ãg Senhor mré, ãg tỹ kanhkã ra mũn kỹ. Ti ré kỹ ãg mũ mãn ke tũ nĩ sir. ¹⁸ Tag tómnĩ jagnê mỹ, ãjag krĩ tỹ kãnhvỹ' he jé, ùn kãgter mũ ag to.

Jesus tỹ kãnhmar kãtĩg mãn ke

5 Inh kanhkã', ti kãtĩg ke ki kanhró ãg tóg nỹtĩ, hã ra ãg tóg ti kurã hã ki kãtĩg nỹtĩ, ti prỹg ke gé. Tag mẽ ãjag tóg huri, hã kỹ sóg ãjag mỹ tó mág ke tũ nĩ ha. ² Vãhãn kãtĩg, ãg Senhor ti, hã ra tóg tỹ nén ù pēju mé kãtĩg ri ke nĩnh mũ, ti kãtĩg ti. Ëg vatánh tá tóg ãg tũ mág ti, nén ù pēju mé ti. Kỹ tóg ge nĩnh mũ, ãg Senhor kãtĩg ti. ³ Ti to há tũ ag vỹ: "jatun mỹ ãg nỹtĩ," henh ke mũ. "Ù vỹ ãg vóg ke tũ nĩ," he jé ag tóg ke mũ. Ag tỹ tag tó mũ ra tóg vãhã kãtĩ mũ, ãg Senhor ti. Kỹ ag tóg nũgme ki vár mũ sir. Ag tỹ to jykrén tũ hã ra ti kãtĩg kỹ ag tóg krenkren ke tũ pẽ nĩ, ha vemnĩ.

⁴ Inh kanhkã', ãjag hã ne tóg tỹ Jesus mré ke nỹtĩ'. Hã kỹ tóg ãjag ki kuty tũ nĩ. Kỹ ãjag tóg ki kanhró nỹtĩ, kỹ ti kãtĩg vỹ ãjag mỹ nén ù pēju mé kãtĩg ri ke tũ nĩ, ãjag tỹ ti ki kanhró nỹtĩn kỹ. ⁵ Ti krê vỹ tỹ ãjag nỹtĩ, hã kỹ tóg ãjag ki kurã nĩ, ãjag tỹ ki kanhró nỹtĩn kỹ. Kuty tũ ti nĩ, ãg ki. Ti kãtĩg ke ki kanhró ãg tóg nỹtĩ, hã kỹ tóg ãg ki kurã nĩ sir.

⁶ Kĩ ti kătĩg ke kã jatu ke tũg nĩ. Vêso jykren nĩ, ajag tĩ ti kătĩg ke to vênh preparar ken jé, ajag tĩ kã jatu ke tũ nĩ jé. ⁷ Ũn nũgnũr mũ ag vỹ kuty kĩ nũgnũr tĩ, kĩ ag tóg ti kătĩg ke kã jatu nỹtĩ. Kĩ ũn kronkron mũ ag vỹ kuty kĩ pénmév nỹtĩ, kãgter ag nỹtĩ gé. Kĩ ag tóg vëso jykren tũ nỹtĩ. Kuty tá vênh jykren hã vë. ⁸ Ēg jé kurã tá vênh jykre há ên ti han jãvo. Ēg jé vëso jykren kĩ ti ki rã to krónh ke tũg. Ēg jé jagnê to há to krónh ke tũg gé.

Kĩ Ēg tóg vênh génh jafã ag tar ri ke nỹtĩ. Kĩ tóg Ēg mỹ soldado kur ri ke nĩ sir, ti ki rã ti, jagnê to há ti ke gé. Soldado tỹ camisa tỹ ferro ri ke ti nĩ, Ēg tỹ ti ki rã kĩ jagnê to há to tar nỹtĩn kĩ. To tar nỹtĩn kĩ Ēg krenkren ke mũ, nũgme ki vár ke tũ Ēg nĩ. Tag mĩ êkren nĩ. Kĩ tóg Ēg mỹ soldado tỹ sãpe tỹ ferro ri ke nĩ sir, Ēg tỹ ti ve sór mũ to tar nĩ ti. To tar nỹtĩn kĩ Ēg tóg vênh preparar ke kĩ nỹtĩ, vênh kãn kĩ Ēg nỹtĩ, ti kătĩg ke to. ⁹ Topê vỹ Ēg kuprêg, Ēg tỹ ti jũ vég tũ nĩ jé, Ēg krenkren jé, Ēg tỹ nũgme ki vár tũ nĩ jé, Jesus Cristo tugnĩn, Ēg Senhor ti. ¹⁰ Ti hã ne Ēg jagfy ter ja nĩ, Ēg tỹ ti tugrĩn rĩnrĩr nỹtĩ jé, ti mré nỹtĩ jé sir. Ēg tỹ ti kătĩg ke jo kãgter mũ ra Ēg tóg ti mré nỹtĩnh mũ, ti kătĩg kĩ. Ēg kãgter tũ ra Ēg tóg ti mré tá nỹtĩnh ke mũ gé, ti kătĩg kĩ. Jagnê ri ke Ēg nỹtĩnh mũ. ¹¹ Tag tómnĩ jagnê mỹ. Tỹ jagnê krĩ tỹ kãnhvy' hemnĩ gé, ũn ter mũ to. Kĩ tỹ jagnê jyvên nĩ gé, ajag tar nỹtĩ jé. Tó ajag tóg mũgtĩ, kĩ tó há han nĩ.

Vênh jykre há ti

¹² Inh kanhkã', nén ũ tó jé sóg ke mũ gé. Ājag kãmĩ ũ ag tóg tỹ ajag pã'i nỹtĩ, igreja to, Jesus mré ke ũ ag. Ājag jyvên ag tóg tĩ, ajag to ag tóg vãsãn tĩ. ¹³ Ēn ag kamêg nĩ. Ag mỹ vĩ há han nĩ, ag to há tãvĩ nỹtĩmnĩ, ag tỹ ajag ki rĩr kĩ. Jagnê krĩ rỹg tũg nĩ.

¹⁴ Inh kanhkã', tag ti tó jé sóg ke mũ gé, ha mẽ. Ũ tỹ vênhmỹ mẽ ag jyvên tar

han nĩ. Ũ tỹ kãnhmar krónh ke tĩ ag mré komêr vĩmnĩ. Ũn fe krónhkrój ag fe tỹ tar' hemnĩ. Vênh kar mỹ komêr hã vĩmnĩ. ¹⁵ Ũ tỹ ajag mỹ nén ũ kórég han mũ ra ti mỹ nén ũ kórég han tũg nĩ jãvo, vênh kajãm tũg nĩ. Nén ũ há tãvĩ han nĩ jagnê mỹ, vênh kar mỹ ke gé.

¹⁶ Kurã kar ki ajag fe tỹ mrin kemnĩ. ¹⁷ Kurã kar ki Ēg jóg mág mré vĩmnĩ, ajag tỹ ti to krónh ke tũ nĩn jé. ¹⁸ Nén ũ kar to ti mỹ: “inh mỹ tóg há ti,” hemnĩ gé. Topê jykren hã vë. Jesus Cristo nón Ēg tóg ti jykre han ke mũ. Ēg tỹ nén ũ vég mũ kar to Ēg tóg: “inh mỹ tóg há nĩ,” henh ke mũ, Topê mỹ.

¹⁹ Topê kuprĩg tỹ ajag krĩn sór kĩ ti mỹ: “vó,” he tũg nĩ. ²⁰ Kejên Topê kuprĩg tóg ũ krĩn tĩ, kĩ tóg Topê vĩ tó mũ sir. Ēn to é he tũg nĩ. ²¹ Ũ tỹ ajag mỹ vĩn kĩ to: “vênh vĩ há mỹ?” hemnĩ. Ti tỹ tỹ ajag mỹ vênh vĩ há nĩn kĩ jēmēmĩnĩ. ²² Ti há tũ nĩn kĩ jēmē tũg nĩ, ajag tỹ nén ũ kórég han tũg jé. Nén ũ kórég han sór tũg nĩ.

²³ Topê vỹ ajag krĩ kuprãg tĩ. Ti mỹ sóg to vĩ tĩ, ti tỹ ajag tar han jé, ajag tỹ tỹ ti tũ nỹtĩ to tar nỹtĩ jé. Ti mỹ sóg to vĩ tĩ gé, ti tỹ ajag tỹ kygnê kamêg jé, ti tỹ ajag jykre há han jé, ajag fe ti ke gé, ajag krĩ ti ke gé. Ēg Senhor tỹ Jesus Cristo kătĩg mãn kĩ tóg Ēg jykre tugnỹm ke mũ sir, hã jé tóg Ēg jykre há han sór mũ. ²⁴ Ũ tỹ Ēg kuprêg mũ vỹ Ēg jykre há han sór mũ, hã vỹ: Topê, he mũ. Fagrĩnh mỹ vĩ vãnh ti nĩgtĩ.

²⁵ Inh kanhkã', iso Topê mré vĩmnĩ gé. ²⁶ Jagnê ki nhun ke ri ke han nĩ, Jesus mré ke kar ki, jagnê nĩgê kãgmĩ kĩ. ²⁷ Ēg Senhor rĩnve sóg ajag mỹ tag tó mũ, ha mẽ. “Jesus ki ge kĩ nỹtĩ kar ag tỹ isỹ nén rãn mũ tag mẽ kãn ke vë,” he sóg mũ mỹr. Hã kĩ sóg: “ag kar mỹ to kemnĩ,” he mũ. ²⁸ Ēg Senhor tỹ Jesus Cristo mỹ sóg to vĩ tĩ, ti tỹ ajag tar han jé.

Hã vë.

**PAULO TỠ CARTA HAN:
TESSALÔNICA TÁ KE
AG MỸ CARTA Ừ**

1 Paulo tỡ rá vễ. Isỹ cidade tỡ Tessalônica t'a ke ag mỹ rán hã vễ. Tessalônica tá ajag tóg Topê vĩ mẽ jé vễnhmãn tĩ. Topê tũ vĩ tỡ ajag nỹtĩ, ẽg jóg mág ti. Jesus Cristo tũ vĩ tỡ ajag nỹtĩ gế, ẽg Senhor ti. Sỹ ajag mỹ vễnh rá jẻnẻ vễ. Kỡ Silas vĩ jẻnẻg mũ gế inh mrẻ, Timóteo ke gế. ² ẽg jóg tỡ Topê mỹ sóg to vĩ tĩ, ti tỡ ajag tar han jẻ, ti tỡ ajag kri kuprẻg jẻ gế. ẽg Senhor tỡ Jesus Cristo mỹ sóg tag to vĩ tĩ gế.

**Cristo tỡ ừ tỡ ẽg vóg kỏnẻn
mũ ag vóg kỏnẻn ke**

³ Inh kanhkỏ, isỹ kurỏ kar ki ajag to Topê mrẻ vĩ vễ, ajag to sóg ti mỹ vĩ há han tĩ. Ajag jykre tóg inh mỹ sẻr tĩ. Ajag hỏ ne tóg ti vĩ to tar tỏvỉ nỹtĩ, kri fi kỡ. Jagnẻ mrẻ ajag tóg há tỏvỉ nỹtĩ gế, ajag kar ti. Hỏ kỡ sóg Topê mỹ vĩ há han tĩ, ajag to. ⁴ Hỏ kỡ sóg Topê tũ kar ag mỹ ajag tó tĩ, ẽg vễnhmãn kỡ. “Ti vĩ kri fi to ag tar nỹtĩ, ag tỡ ag vóg kỏnẻn mũ ra,” he sóg tĩ ajag to. “Ag jagẻgtar mũ ra ag tóg ti to tar nỹtĩ,” he sóg tĩ. Isỹ tag tó tóg inh mỹ sẻr tỏvỉ tĩ. ⁵ Hỏ tugrỉn ẽg tóg Topê jykre kuryj ki kanhrỏ nỹtĩ, ajag tỡ ti tovỏnh tũ nỏn kỡ. Kỡ ti tỡ nẻn han mũ vĩ kugryj kar nỹtĩ, ti tỡ nẻn tó mũ kar ke gế. Jagtar ajag tóg mũ, hỏ ra ajag tóg ti tovỏnh tũ nỏgtĩ. Ti tỡ tỡ ẽg pỏ'i nỏ ve jẻ ajag tóg ke mũ, kanhkỏ tá krẻg he jẻ ajag tóg ke mũ, ti tugnỏn, ha vemnỏ. Hỏ kỡ ajag tóg sir ti tugrỉn jagtar mũ sir. ⁶ Hỏ vẻ, ừ tỡ ajag jagẻgtar han mũ ẻn jagẻgtar han jẻ tóg ke mũ gế, vễnh kỏjỏ jẻ, Topê ti. Hỏ ki ẽg tóg ti jykre kuryj ki kanhrỏn mũ sir. Tag to jykẻn. ⁷ Ag jỏvo tóg ajag tar han mũ sir, ajag jagtar mũ hỏ ra, kỡ tóg sir ajag jagẻgtar tỡ tũg' he mũ gế sir, ẽg kar mỹ, ẽg Senhor tỡ Jesus Cristo tỡ

kanhkỏ tá kỏtỉg kỡ. Kanhkỏ tỏn ag mrẻ tóg kỏtỉg ke mũ, kỡ ẽg tóg ti venh mũ sir. ⁸ Tỡ tóg pi gru ve kỏtỉg ke mũ. Kỡ tóg ừ tỡ Topê ki kanhrỏn jỏvỏnh ag vóg kỏnẻn ke mũ sir, vễnh kỏjỏ jẻ, ừ tỡ ẽg Senhor tỡ Jesus vĩ sẻr mranh mũ ẻn ag. ⁹ Ag vóg kỏnẻn jẻ tóg ke mũ, kỡ ag vẻsẻrẻnh vĩ tũ' henh ke tũ nỏ. ẽg Senhor mrẻ ag nỹtỉnh ke tũ nỏ sir. Ti jykre há ẻn venh ke tũ ag nỏ, ti tỡ tỡ pỏ'i mág pẻ nỏ ẻn ti, ừn mág tỏvỉ ẻn.

¹⁰ ỏ kỏtỉg kỡ tóg ag vóg ag vóg kỏnẻn ke mũ. Kỡ tóg vỏhỏ ỏ tũ ag tỡ ừn mág han ke mũ sir. Kỡ vễnh kar tóg ẽg tugrỉn ti jykre ve kỏn ke mũ, ẽg tỡ ti ki ge kỡ nỹtỉn kỡ. Ajag hỏ tóg inh vĩ kri fi, sỡ ajag mỹ ti vĩ tón kỡ. Hỏ kỡ ajag tóg kurỏ ẻn venh ke mũ. ¹¹ Hỏ jẻ sóg ajag to Topê mrẻ vĩ tĩ, kurỏ kar ki. Ti mỹ sóg: “ag tar han nỏ,” he tĩ. “Nẻn ừ há han sỏr ag tóg mũ, ỏ ki ge kỡ nỹtĩ ag, ỏ jykre han sỏr ag tóg mũ, kỡ ag tar han nỏ, ag tỡ kygnẻg tũ nỏ jẻ. Ag kuprẻg ỏ tóg, ag tỡ kurỏ ẻn ve jẻ, kỡ ag tar han nỏ, ag tỡ kurỏ ẻn tá krẻg jẻ,” he sóg tĩ (mỡr), Topê mỹ. ¹² Ti tỡ ajag kri tỡ ừn mág nỏ jẻ, hỏ jẻ sóg ti mỹ tó mũ. Ti tỡ ẽg kri tỡ ừn mág nỏn kỡ tóg ẽg tỡ ừn mág han mũ gế. Topê tỡ ẽg mỹ ỏ tỡ nẻn ừ há nỏn ẻn hỏ vẻ, ẽg Senhor tỡ Jesus Cristo tỡ ke gế.

Jesus kỏto tẻ mág mũ ẻn tỡ vễnh ke

2 Inh kanhkỏ, sỡ ajag jyvẻn há tóg ti sir. Kỏnhmar ti kỏtỉg mũ, ẽg Senhor tỡ Jesus Cristo ti, kỡ ẽg tóg vễnh mỏn mũ, ti tỡ ẽg gẻ(g) tũg jẻ sir. Kỡ ẽg tóg ti mrẻ nỹtĩ. ² Hỏ ra tóg ver kỏr gy sỏ tĩ, kuvar gy sỏ tĩ nỏ ver. Kỡ ừ tỡ ajag mỹ: “Topê kuprỉg tóg inh mỹ: ừi ke vẻ, hẻ,” he mũ ra kri fi tũg nỏ, ajag fe tỡ jủrủn ke tũg nỏ. Ừ tỡ ajag mỹ: “Paulo vĩ inh mỹ tó, kỡ tóg: ừi ke vẻ, hẻ,” he mũ ra kri nỏn tũg nỏ gế. Ừ tỡ ajag mỹ vễnh rá ven mũ ra, to: “Paulo tỡ rá vẻ mỡr,” he mũ ra kri fi tũg nỏ gế. ³ Ag jykre tugnỏm ra, ừ tỡ ajag krỉn kỏnẻn sỏr mũ ag. Ừi ke

tũ vê ver, ti kâtig ke ti. Û tỹ hên ri ke ag vỹ ti továnh ke mũ ver, ti kâtig ke to hã. Ti kato tẽgtẽ jé ag tóg ke mũ ver. Kỹ ù tóg ver vênh ven ke mũ gé, hã vỹ: ù tỹ Topẽ vỹ mranh tĩ ên, he mũ, ù tỹ nũgme ki kutênh ke mũ ên ti, he mũ. ⁴Ti ve pẽ vẽ, Topẽ vỹ mranh mũ ti, hã kỹ Topẽ vỹ nũgme ki ti fón ke mũ. Ên vỹ tóg Topẽ kato tênh ke mũ ver, vênh kãgrá tỹ topẽ kato ke gé. Nén kar to: topẽ, he mũ kar kato tóg tênh ke mũ ver. “Topẽ kar kãfór vỹ tỹ inh nĩ,” he jé tóg ke mũ. Kỹ tóg vãhã sir Jerusalem tá Topẽ ìn krêm rãnh mũ, Topẽ nĩg ja ên tá tóg nĩnh mũ, kỹ tóg vẽso: “tỹ sóg Topẽ nĩ,” henh ke mũ, ón kỹ.

⁵Isỹ ãjag mré nĩn kỹ sóg ãjag mỹ tag tó ja nĩ. Mĩ êkrén nĩ, sỹ ãjag mỹ tó ja ên ti. ⁶Mĩ êkrén kỹ ãjag tóg ki kanhró nỹtĩ sir, ù tỹ ver ti ki rĩr mũ ên ki. Ti kỹ ti ki rĩr nĩn kỹ tóg ver vênh ven tũ nĩ, ù tỹ ón kỹ: “tỹ sóg Topẽ nĩ,” he mũ ên ti. Ti kurã ki tóg vênh ven ke mũ sir vãhã. ⁷Ûri ù tỹ hên ri ke ag tóg vênh jykre pãno han mũgtĩ, Topẽ vỹ mranh kỹ. Hã ra ag tóg ver vênh pigju kỹ han tĩ, kỹ êg tóg ve hã han tũ nĩ, ag jykre pãno ti. Kỹ Û tỹ ón kỹ: “tỹ sóg Topẽ nĩ,” he mũ ên tóg vênh ven tũ nĩ gé ver. Û tỹ ti ki rĩr nĩ ên tóg ver ti ki rĩr mũ, ti vênh ven tũ nĩ jé ver.

⁸Ti tỹ ti ki rĩr továnh kỹ tóg vênh ven ke mũ sir vãhã, ùn jykre pãno ên ti. Hã ra êg Senhor tỹ Jesus vỹ ti tén ke mũ, ã jẽnger tỹ. Kỹ tóg ti tỹ tũ' he mũ sir, ã vênh ven ti kỹ, Jesus ti. ã jun kỹ tóg ti tỹ tũ' he mũ. ⁹Hã ra ùn jykre pãno ên vỹ tóg Satanás jykre han mũ, Nén-Kórég tỹ ti krĩn kỹ. Kỹ tóg ón kỹ vênh jykre tar hyn han mũ, êg tỹ nén han vãnh ên (mỹr). Kujá ag jykre ri ke han jé tóg ke mũ. ¹⁰Vênh kar lograr he jé tóg ke mũ gé. Jykre kuryj nĩ ve tóg nĩnh mũ, hã ra tóg pãno nỹ. Kỹ ù tỹ nũgme ki vár ke mũ ag vỹ ti vỹ kri fi kãn ke mũ, ag tỹ Topẽ vỹ kri fig tũ nỹtĩn kỹ. Vênh vỹ há to ag tóg há tũ nỹtĩ, hã kỹ ag tóg krenkren

ke tũ nĩ. Hã kỹ ag tóg ki rom ke mũ sir, nũgmen ki, infernon ki. ¹¹Hã jé Topẽ tóg ag mỹ vênh ó jẽnênh ke mũ, ón kỹ vênh jykre ên ti, ag tỹ vênh ó ên kri fi jé, ag tỹ kri nĩm sór nỹtĩn kỹ. ¹²Topẽ tỹ ag jykre tugnỹm kỹ tóg nũgme ki ag vãm ke mũ. Vênh vỹ há kri fi jãvánh ag tóg nỹtĩ (mỹr). Vênh jykre pãno há to ag tóg hã tãvĩ nỹtĩ (mỹr), hã kỹ tóg ag vãm ke mũ, nũgme ki, Topẽ ti.

Topẽ tỹ êg kuprêg, êg krenkren jé

¹³Jãvo sóg ãjag to Topẽ mré vỹ há han tĩ, kurã kar ki (mỹr). Tỹ ãjag tóg Jesus mré ke nỹtĩ, êg Senhor mré ke ag. Kỹ tóg ãjag to há tãvĩ nĩ. Topẽ vỹ ãjag kuprêg, nén kar há(r) ven ki, ãjag krenkren jé, nũgme to, inferno to. ã kuprĩg tỹ tóg ãjag tỹ ã tũ han ja nĩ. ãjag tỹ tag ve jé ãjag tóg ti vỹ kri fig mũ, vênh vỹ há ên kri. ¹⁴Isỹ ãjag mỹ Jesus vỹ tón kỹ Topẽ vỹ ãjag kuprêg, ãjag tỹ êg Senhor tỹ Jesus Cristo mré tỹ ùn mág nỹtĩ jé.

¹⁵Inh kanhkã', tar nỹtĩmnĩ, sỹ ãjag kanhrân to, ãjag kỹ ti króm jé. Isỹ ãjag mỹ Jesus jykre tó mũ ên to tar nỹtĩmnĩ, sỹ ãjag mỹ nén rán mũ tag to ke gé. ¹⁶Êg Senhor tỹ Jesus Cristo hã vỹ êg to há tãvĩ nĩ, êg jóg tỹ Topẽ ke gé. Kỹ tóg êg krĩ kuprãg mũ sir, êg tỹ to krónh ke tũ nĩn jé. Ti hã ne tóg êg mỹ ã tỹ nén ù há ên ven ke mũ. Hã ve sór êg tóg mũ. ¹⁷Ti mỹ sóg to vỹ tĩ, ti tỹ ãjag fe tỹ há' he jé, ti tỹ ãjag tỹ nén ù há han jé, ãjag tỹ ki hã kãmén jé ke gé.

Topẽ tỹ êg jy nĩgãn

3 Inh kanhkã', vãhã sóg ãjag mỹ nén ù to vỹ mũ gé. Iso Topẽ mré vĩmnĩ, êg Senhor vỹ tỹ vênh kar kri rũm ke jé, kãnhamar (mỹr), vênh kar tỹ ti vỹ to há nỹtĩ jé ke gé, ti mỹ vỹ há han jé (mỹr), ag tỹ ãjag ri ke nỹtĩ jé. ²Ti mỹ to vĩmnĩ, ti tỹ iỹ nĩgãn jé, vênh jykre pãno han mũ ag jo, ùn jykre pãno ag jo ke gé. Û ag tóg

Jesus ki ge jāvānh nýtī, hā kýt ag tóg iso kórég nýtī sir.

³ Hā ra ěg Senhor vỹ ā tỹ nén tó ja ěn han ke mũ. Ājag tar han jé tóg ke mũ. Ājag jy nīgān jé tóg ke mũ gé, Japo jo, Nén-Kórég ěn jo. ⁴ Ājag hỹn inh vỹ han ke mũ, kýt tóg inh mỹ há tí. Topẽ vỹ ājag krĩn ke mũ, ājag tỹ sỹ ājag mỹ nén tó mũ ěn ki króm jé. Ki króm ājag tóg mũ (mỹr), kýt ājag tóg to krónh kenh ke tũ nĩ sir. ⁵ ěg Senhor je ājag krĩn, ājag tỹ ti to há nýtĩ jé, ti tỹ ěg to há ri ke. Ti jé ājag krĩn, ājag tar nýtĩ jé, ājag jagāgtar hā ra. Cristo vỹ ge ja nĩ gé. Kýt ti nón gemnĩ.

Ěg tỹ vãnh rānhrāj to tar nýtinh ke

⁶ Inh kanhkā', vāhā sóg ājag jyvẽn mũ ge sir, ājag jyvẽn tar han sóg mũ gé. ěg Senhor tỹ Jesus Cristo jykre tỹ sóg ājag mỹ tag tó mũ, ha mẽ: Jesus mré ke ũ ag tóg vẽnhmỹ mẽ han sór nýtĩ. Inh vỹ mranh sór ag nýtĩ, sỹ ājag mỹ nén tó ja ěn ti. ěn mré vỹ măn tũg nĩ. ⁷ Sỹ ājag mré nĩn kýt sóg vẽnhmỹ mẽ han ja tũ nĩ. Tag ve ājag (mỹr), kýt ājag tóg inh kóm han ki kanhrān ke mũ. ⁸ Fagrĩnh mỹ sóg ājag mré rāgró ko ja tũ nĩgtĩ (mỹr). Kajām ja sóg nĩgtĩ (mỹr), sỹ ājag mré nén ko ja ti. Kutỹ kar ki sóg rānhrāj ja nĩgtĩ, kurā kar ki ke gé. Kýt sóg inh rānhrāj to ron mág ja nĩgtĩ. Sỹ ājag tũ kagrāg tũ nĩ jé, hā jé sóg rānhrāj mág ja nĩgtĩ. Hā ve ājag mỹr. ⁹ Sỹ ājag tũ konh ke vẽ vẽ, hā ra

sóg ājag tỹ nén han ke mũ ěn han sór ja nĩgtĩ ājag mỹ, ājag tỹ to ki kanhrān jé, ājag tỹ inh kóm han jé sir inh nón. ¹⁰ Isỹ ver ājag mré nĩn kýt sóg ājag mỹ tag tó ja nĩ gé, ha mẽ: “ũn rānhrāj vãnh ěn vỹ ne konh ke tũ nĩ,” he ja sóg nĩgtĩ ājag mỹ. ¹¹ Ājag kāmĩ ũ ag nējĩ tag han vãnh nýtĩ. Rānhrāj vãnh ag nējĩ nýtĩ, hā ra ag nējĩ vãnh kar to vỹ vỹ ti. ¹² ěn jyvẽn sór sóg nĩ, ěg Senhor tỹ Jesus Cristo jykre tỹ. Ag jyvẽn tar han jé sóg ke mũ, ha mẽ: “rānhrāj ra, jatun mỹ. Ājag tũ hā ko ra, ājag rāgró ti. ũ jẽn ko tũg ra,” he sóg mũ sir ājag mỹ.

¹³ Inh kanhkā', nén ũ há tāvĩ han kăn sórmnĩ. To krónh ke tũg nĩ. ¹⁴ Hẽn ri ke mũn ũ tóg isỹ rá tag kri finh ke tũ nĩ. ěn jykre vэг nĩmnĩ, kýt ti mré vēmén tũg nĩ, ti mỹ'āg jé sir, ti tỹ to jykrén măn jé. ¹⁵ Hā ra ti kato vāsān tũg nĩ, ti to kry nĩ tũg nĩ. Jesus mré ke vẽ mỹr, kýt ti jyvẽn nĩ, ti tỹ to jykrén măn jé.

¹⁶ Ha mẽ, ěg Senhor mỹ sóg to vỹ tí, ti tỹ ājag krĩ kuprāg jé, ājag jagtar hā ra. Ti hā ne tóg ěg krĩ kuprāg tí'. ěg Senhor jé ājag mré nĩgtĩ.

¹⁷ Sỹ vāhā vēsóg ki ājag mỹ rán vẽ, ũ tỹ inh vỹ rán ja pāte, inh hā vỹ Paulo nĩ. Isỹ rán mũn hā vẽ. Ge inh nĩgtĩ, isỹ ũ mỹ vãnh rá jẽnèn kýt.

¹⁸ ěg Senhor tỹ Jesus Cristo mỹ sóg to vỹ tí, ti tỹ ājag tar han jé.

Hā vẽ.

PAULO TỠ CARTA HAN: TIMÓTEO MỠ CARTA VE

1 Paulo tỠ rá vễ. Topễ ne inh kuprễg ja nỉ, ẽg kren han tĩ ti. Isỹ tỠ Jesus Cristo apóstolo jẽ jẽ tóg inh fễg ja nỉ. Ti hã ve sỏr ẽg tóg mũ, Jesus Cristo ti.

² Isỹ inh kỏsin tỠ Timóteo mỠ rãn hã vễ. TỠ ả inh kỏsin pễ ri ke nỉ, ả tỠ isugrĩn Topễ vi kri fin kỠ.

Ẽg jóg tỠ Topễ mỠ sỏg to vĩ tĩ, ti tỠ ả tar han jẽ, ti tỠ ả jagãgtãn jẽ, ti tỠ ả kri kuprã han jẽ, ẽg Senhor tỠ Jesus Cristo ti ke gẽ.

Ẽg tỠ vỹrmỠ vễnh vĩ jễmễ sỏr ke tũ

³ Isỹ cidade tỠ Ếfeso tá kãkutẽ kỠ ga tỠ Macedônia ra tĩg kỠ sỏg ả mỠ to vĩ, ả tỠ ver Ếfeso tá ke ag ki rĩr jẽ. ả mỠ sỏg tó, ả tỠ tá nỹtĩ ag jyvẽn jẽ. Ồn kỠ ag tóg Topễ jykre kãmén sỏr tĩ. Tag to ag mỠ: “han tũg nỉ,” hemnỉ. ⁴Topễ jykre tovrãn kỠ ag tóg vỹrmỠ nẻn ừ ừ to jykrẻn sỏr mũ, hã vỹ: kanhkã tãn tỠ ó, he mũ, kar ag tóg gufã ag jiji tó sỏr mũ gẽ. Ag tỠ nẻn tó mũ ẻn tó kãn ke tũ ẻg tóg nỉ. Tag to jagnẻ vĩ kafãn mũ vĩ kutẻ tĩ. Ẽg pi(jẻ) tag tỠ Topễ jykre han tĩ. Topễ jykrẻn hã vễ, hã vỹ: vẻnh kar tỠ ti ki rã, he mũ.

⁵ Ẽg tỠ Topễ jykre han kỠ ẻg tóg jagnẻ to há tãvỉ nỹtĩ, ẻg fe kar tỠ, kỠ ẻg tóg jagnẻ mỠ vẻnh jykre pĩr han tĩ gẽ, ti ki rã há han jẽ ẻg tóg ke mũ gẽ. ⁶ Tá ke ừ ag tóg vẻnh jykre há tag togvãn, kỠ ag tóg vẻkẻ vẻmẻn mũ nỉ ha. Ag tỠ kygnẻn hã vễ. ⁷ Topễ tỠ vẫsỹ ẻg jyvẽn tĩ ẻn tỠ ag tóg ảjag kanhrãn sỏr tĩ, ag tỠ ki kagtĩg (hã) ra. Ồn kỠ ag tóg tó tĩ, ag tỠ ki kagtĩg nỹtĩn kỠ. Topễ vĩ kãmén sỏr ag tóg tĩ, to ag tóg: “tag to ke vễ,” he tĩ, ag tỠ ki kagtĩg nỹtĩn kỠ.

⁸ Ag jãvo ẻg tóg ki kanhrỏ nỹtĩ, Topễ tỠ vẫsỹ ẻg jyvẽn tĩ ẻn há nỉ ti. Ẽg tỠ to jykrẻn há han kỠ ẻg tóg ti há nỉ vẻg tĩ. ⁹ Topễ pi(jẻ) ừ tỠ ti vĩ ki krỏm mũ ag tu-

grĩn ẻg jyvẽn ja nĩgtĩ. Ừ tỠ vẻnh jykre kuryj han vãn ẻn ag tugnỉn ken hã vễ, ừ tỠ ti vĩ han sỏr tũ ag tugrĩn, ừ tỠ Topễ to ẻ he mũ ag tugrĩn, ừ tỠ ti vĩ mranh mũ ag tugrĩn, ừ tỠ ti ki kanhrãn sỏr vãn ag tugnỉn, ừ tỠ vẻnh jykre pãnỏ han mũ ag tugrĩn ke gẽ. Ừ tỠ ge ag vĩ ảjag panh tẻn tĩ, ảjag mỠnh tẻn ag tóg tĩ, jagnẻ kãgtẻn ag tóg tĩ, ¹⁰ ảjag prũ tũ fag mrẻ ag tóg nỹ tĩ, ảjag mẻn tũ ag mrẻ fag tóg nỹ tĩ, jagnẻ ki vỹn ke ag tóg tĩ, jagnẻ vẻne he ag tóg tĩ, jagnẻ mỠ ag tóg ỏn tĩ, jagnẻ to ag tóg ỏn tĩ gẽ, vẻnh jykre pãnỏ kar han ag tóg tĩ, Topễ tỠ nẻn ừ to: “kỏrẻg ti nỉ,” he mũ ẻn han kãn ag tóg tĩ. ¹¹ Ừ tỠ tag han mũ tugnỉn tóg ẻg jyvẽn ja nỉ, Topễ ti, ẻg tỠ han tũg jẽ. Ti hã vỹ ẻg mỠ vẻnh vĩ sẻr tó ja nĩgtĩ, ti hã vỹ inh mỠ to: “ha vẻnh kar mỠ tỏnh tĩg,” he ja nỉ. Topễ hã ne ả pĩr mỠ há nỉ. Jãvo ag tóg ti vĩ tag kato tẻ tĩ.

Topễ tỠ ẻg jagãgtãn sỏr

¹² Ẽg Senhor tỠ Jesus Cristo ne isar han tĩ, hã kỠ sỏg ti hã mỠ vĩ há han tĩ. Ti hã ne iso jykrẻn kỠ inh kuprẻg, sỹ ti rãnhrãj han jẽ, kỠ tóg vẻg mũ, sỹ to tar nỉ ti, ti tỠ isar han kỠ. ¹³ Sỹ tá krỹg ke tũ vễ vễ, isỹ ti rãnhrãj han jẽ. Vẫsỹ sỏg ti mỠ vĩ kỏnãn ja nĩgtĩ, ti vóg kỏnãn ja sỏg nĩgtĩ, ti to jũ pẻ han ja sỏg nĩgtĩ gẽ. Hã ra sỏg ti ki kagtĩg nỉ ja nĩgtĩ, kỠ sỏg ti ki rã sỏr ja tũ nĩgtĩ gẽ. Hã kỠ tóg inh jagãgtãn, sỹ ti ki rã jẽ. ¹⁴ Inh jagãgtãn há tãvỉ han tóg, ẻg Senhor ti, hã kỠ sỏg ti ki rã há han, kỠ sỏg ti to há tãvỉ nỉ gẽ, Jesus Cristo to.

¹⁵ Tag vĩ tỠ vẻnh vĩ há nỉ, ha mễ, kỠ vẻnh kar tỠ tag to há nỹtĩ ran jẽ há tĩ vễ, hã vỹ: Jesus Cristo vĩ ga kri mur, ti tỠ Topễ vĩ mranh tĩ ag kren han jẽ, he mũ. Topễ vĩ mranh tĩ ag kar kỏrẻg kãfỏr vĩ tỹ inh nỉ. ¹⁶ Hã kỠ tóg inh jagãgtãn ja nỉ gẽ. Jesus Cristo tỠ vẻnh kar mỠ ven sỏr vễ, ti tỠ Topễ vĩ mranh tĩ ag jagãgtãn sỏr mũ ti. Hã kỠ tóg inh jagãgtãn, sỹ ừ tỠ ti vĩ mranh mũ ag kãfỏr han ja hã ra. KỠ

vênh kar tóg inh ve ky Topê ty ag to há ki kanhró nýtinh mũ. Vênh kar vỹ êg rĩr krỹg ja tũ venh ke mũ, êg ty ti ki ge ky.

¹⁷Topê hã ne ã pir mỹ ty pã'i mág nĩ'. Æ ty nén kar han to tóg nĩ nĩ, ky tóg ter ke tũ nĩ gé. Ti vég tũ êg tóg nĩgtĩ. Æ pir mỹ tóg ty Topê nĩ. Ky êg tóg ti hã mỹ vĩ há han ke mũ, ti to ke gé. Ti mỹ vĩ há han ke tag tóg tũg' henh ke tũ nĩ gé. Amém.

Timóteo rãnrhāj

¹⁸Timóteo', inh kósin vỹ ty ã nĩ. Sỹ ã mỹ ã rãnrhāj tag nĩm vē. Vāsỹ ã tóg mẽ ja nĩ, Topê vĩ tó tĩ ag ty ã to nén tó ja ti. Ky ag vĩ mĩ êkré. Soldado ty ã rãnrhāj to vāsān ri ke han ky ã jẽ nĩ, Topê vĩ tó ky. Topê vĩ tó tĩ ag vĩ vỹ ã tar han ke mũ, ã ty ã rãnrhāj to vāsān há han jé. ¹⁹Ti ki rã to krónh ke tũg nĩ. Æ fe kavénh sór tũg nĩ. Æ ag tóg ãjag fe kavénh ja nĩgtĩ. Hã ra ag tóg kykũnh sór ja tũ nĩgtĩ, ag fe kavéj ti. Hã ky ag tóg ti ki rã ky tĩ tovānh tĩ, ky tóg êg barco ty goj ki pun ke ri ke nĩ. ²⁰Ag kāmĩ ù vỹ ty Himeneu nĩ, Alexandre ti ke gé. Topê to é he ag tóg mũ ha ũri, hã ky sóg Satanás mỹ ag vĩn, ti ty ag vóg kónān jé. Satanás ty ag vóg kónān tugrĩn ag hỹn ki kanhrān ke mũ, êg ty Topê to é henh ke tũ ti.

Igreja krēm vênh jykre

2 Æ ty ã tũ ag jyvén ky ag mỹ ag ty Topê mré vēmén ke hã tómnĩ. Ag mỹ: “Topê mré vēmén e han nĩ,” hemnĩ. “Ti mỹ nén ù kar to vĩmnĩ, vênh kar jagfy vĩmnĩ, ti mré, ti mỹ nén ù kar to: “há ti nĩ,” hemnĩ gé,” hemnĩ ag mỹ. ²Pã'i mág ag jagfy Topê mré vĩmnĩ gé, pã'i kar ag to ke gé. Ky ag tóg jatu nỹtĩ. Ky êg tóg jatun mỹ ag krēm nỹtĩn ky êg rãnrhāj nón mũnh ke mũ gé, êg ty Topê to há nỹtĩn ky, êg ty jagnē to há nỹtĩn ky ke gé. ³Topê mỹ tóg há nĩ, tag ti, ù ty êg kren han tĩ ti mỹ, ti mỹ tóg sér tĩ. ⁴Ti tỹ tag han sór vē, ha mẽ: êprā ke ag krenkren han sór tóg mũ, vênh kar ty ti tỹ ki hã

tó mũ tag mẽ han kãn jé. ⁵Pir ti nĩ, Topê ti. Pir ti nĩ gé, ù ty Topê mré êg jagfy vĩ mũ ti, hã vỹ: êg mré ke ty Jesus Cristo, he mũ, ù ty êg ri ke mur ja ên ti. ⁶Ti hã ne vênh fêg', ti ty vênh kar kygãm jé. Topê ty ti mỹ kurā nĩm ên kã ke ja vē. Ky vênh kar vỹ mẽnh ke mũ, ù ty ve ja ag vĩ ti. ⁷Hã ky tóg inh mỹ: “ha vênh kar mỹ tónh tũg,” he ja nĩ. Sỹ ty ti apóstolo jẽ jé tóg inh kuprêg, hã ky sóg tó mũ. Ki hã sóg tó mũ. Inh pi(jé) ón mũ'. Fóg ag to tóg inh jẽnē, kanhgág ag to ke gé, sỹ ag mỹ vênh vĩ há tó jé, ag ty Topê ki ge jé gé.

⁸Kỹ tá Jesus ki ge ky nỹtĩ ag mỹ tómnĩ, ag kar ty igreja krēm Topê mré vēmén jé. Hã ra tóg há tũ nĩ, ù ty ã jykre pāno tovānh sór tũ nĩn ky, ti ty Topê mré vēmén mũ (hã) ra. Ag ty Topê mré vēmén ky ag tóg ãjag jũ tovānh ke mũ, ag ty ùn kato tẽ mũ ag tovānh jé ag tóg ke mũ gé. Tag tómnĩ ag mỹ.

⁹⁻¹⁰Kỹ ùn tỹtã fag vỹ ge nỹtinh mũ gé, ãjag ty vênh mǎn ky nỹtĩn ky. Fag sĩnvĩ han jafã vỹ ty fag jykre kuryj nĩ. Fag tũ hã vē. Tag han ky êg tóg vég mũ, fag ty Topê to há nỹtĩ ti. Kur to mỹ'ag tĩ ra rãnh ke tũ fag nĩ hã ra. Fag ty ãjag kur ty vēsĩ tãvĩ han tĩ to ken hã vē, fag gǎnh to ke gé. Pi(jé) há nĩ', fag ty brinco mág ty vēso vĩn ky, jǎnka e ty vēso sa ky, kur kaja e tu ky, fag ty nén kar kaja e gẻnh ky tóg há tũ nĩ, fag ty ty vēsĩ tãvĩ han ky. Fag kur há vỹ há nĩ, kur sĩnvĩ ti.

¹¹Æjag ty vênh mǎn ky nỹtĩn ky fag vỹ vĩnh ke tũ nĩ. Mẽ tãvĩ han jé fag tóg ke mũ, fag ty ty ag krēm ke nỹtĩn ky. ¹²Fag ty ag mỹ vênh jykre nĩm ky tóg há tũ nĩ. Fi ty fi mėn krĩn sór nĩn ky tóg kórég nĩ gé. Fag ty ẽmẽ kã nỹtĩn ky tóg há tĩ. ¹³Tag to jykrén nĩ, ha mẽ. Topê ty ùn han vén mũ vỹ ty Adão nĩ, kar ky Eva fi. Ti ty ty fi kri ke to ken hã vē. ¹⁴Kỹ Japo ty ùn krĩn kónān mũ fi vỹ ty fi nĩ ja nĩgtĩ. Adão pijé'. Fi hã ne Topê vĩ mranh vén', ky tóg fi nón mranh ja nĩgtĩ gé, Adão ti.

Hã kŷ tóg há tũ nĩ, fag tỹ ag krĩn sór kỹ.
¹⁵ Hã ra fag krenkren ke mũ gé, fag krê mré hã. Kỹ tóg há nĩ, fag tỹ Jesus tovãnh sór tũ nỹtĩn kỹ, fag tỹ ti to há nỹtĩn kỹ, jagnê to há ke gé, fag tỹ tỹ ti tũ nỹtĩn kỹ. Fag krĩ há nỹtĩn kỹ tóg há tĩ.

Igreja to pã'i mág

3 Sỹ ke há vê, ha mẽ. Û tỹ igreja to tỹ pã'i mág nĩ sór kỹ tóg vênh rãnhřaj mág han ke mũ. ² Hã ra igreja to pã'i mág vỹ ge jênh mũ, sỹ ã mỹ ti jykre kãmén ke vê, ha mẽ. Û tỹ kygnê tũ vỹ há nĩ, ù tỹ prũ pir han kỹ nĩ, ù tỹ nén ù há to jykrén mũ, ù tỹ vêsô jykrén mũ, ù tỹ kór há tá ke ag mỹ: “inh mré nĩnh kãtĩg,” he tĩ, ù tỹ ag kanhrãn há han tĩ, ³ ù tỹ vinho kron (ka) mẽ tũ, ù tỹ ã fe tỹ gỹm ke vãnh, ù tỹ vênh kar mỹ komêr hã vĩ tĩ, ù tỹ vênh kar krĩ kuprã nĩ ve sór tĩ, ù tỹ rico nĩ sór vãnh, ⁴ ù tỹ ã ãn krêm nỹtĩ fag ki rĩr há han tĩ, ù tỹ ã krê jyvên há han tĩ, ti krê ag tỹ ti kamêg jé. ⁵ Û tỹ ã ãn krêm nỹtĩ fag ki rĩr há han tũ nĩ tóg igreja krêm ke ag ki rĩr há han ke tũ nĩ gé. ⁶ Û tỹ Jesus ki rã tãg tóg tỹ pã'i jênh ke tũ nĩ ver, ke tũ nĩ mũ ra tóg inh mỹ ti tỹ: “tỹ sóg ùn mág nĩ,” henh ha mẽ tĩ, kỹ tóg inh mỹ ti tỹ Japo jykre han ha mẽ tĩ, Japo tỹ ti krĩn kỹ. Kỹ Topê tóg ti vóg kónãn ke mũ. ⁷ Vênh kar tỹ igreja to pã'i to vĩ há han kỹ tóg há tĩ, ù tỹ Jesus ki ge tũ ag mré hã. Kỹ tóg mỹ'ăg ke tũ nĩ, ti tỹ kygnêg tũ nĩn kỹ. Kỹ tóg Japo jykre han măn sór ke tũ nĩ gé. Hã kỹ ùn há tãvĩ vỹ tỹ pã'i jênh mũ.

Igreja to pã'i kāsir

⁸ Kỹ igreja to pã'i kāsir ag vỹ nỹtĩ gé. Û tỹ ge ag vỹ vênh jykre há han kỹ nỹtĩnh mũ gé, vênh vĩ pir han kỹ nĩ, vinho kron mág tũ, nén ù to én ke tũ, rico nỹtĩ sór ke tũ. ⁹ Topê vỹ ěg mỹ vênh vĩ jêñê, ěg tỹ ti ki rã jé, ěg tỹ ti vĩ tag to krónh ke tũ nỹtĩ jé, ěg tỹ ěg fe kavénh tũ nĩ jé gé. Ag tỹ ti vĩ tag to tar nỹtĩnh ke vê, igreja to

pã'i kāsir ag. ¹⁰ Û tỹ Jesus ki rã tãg nĩ kỹ tóg ver tỹ pã'i nĩnh ke tũ nĩ, ěg tỹ ver ti jykre ven jé. Tĩ tỹ kygnêg tũ nĩn kỹ tóg há tĩ, ti tỹ tỹ pã'i nĩnh ke tĩ.

¹¹ Kỹ ag prũ fag vỹ ge nỹtĩnh mũ gé. Fag tỹ nén ù há han kãn kỹ tóg há tĩ. Kỹ tóg há tĩ gé, fag tỹ ù mỹ vĩ kónãn tũ nĩn kỹ, fag tỹ nén ù há kar to jykrén kỹ, fag tỹ fag rãnhřaj ki rĩr há han kỹ.

¹² Igreja to pã'i sĩ vỹ prũ pir han kỹ nĩnh mũ gé, kỹ tóg ã krê kanhrãn há han ke mũ gé, kỹ tóg ã ãn krêm nỹtĩ fag ki rĩr há han ke mũ gé. ¹³ Û tỹ ã rãnhřaj tag ki rĩr há han kỹ tóg tỹ ùn mág jênh mũ. Jesus Cristo ki rã kỹ tóg jênh mũ, kỹ tóg Topê to kanê jur măn ke tũ nĩ, jatun mỹ tóg nĩnh mũ.

Jesus kâme

¹⁴ ã mỹ sóg vênh rá tag han mũ, hã ra sóg kãnhmar ã ve sór mũ. ¹⁵ Hã ra sóg hên ri ke mũn kãtĩg vãnh han ke mũ, kỹ ã tóg Topê jo ãn krêm vênh jykre ki kanhró nĩnh mũ. Hã jé sóg ã mỹ rãn mũ. Topê vỹ rĩr jê. Tĩ tũ vỹ tỹ ěg nỹtĩ, ù tỹ ti ki ge kỹ nỹtĩ ag. ěg hã vỹ vênh vĩ há hã tó tĩ, Topê vĩ to, vênh kar tỹ mẽ jé. ãn nũna tugrĩn ãn vỹ tar jê. Jãvo ěg tugnĩn vênh kar vỹ vênh vĩ há ěn mênh ke mũ. ¹⁶ Ha vé, Topê tỹ ùri ěg mỹ nén tó mũ tag vỹ tỹ nén ù há tãvĩ nĩ. Vãsỹ ag tóg mẽ ja tũ nĩ, ěg tỹ ùri mẽg mũ tag tĩ. Tĩ jykren hã vê, ha mẽ:

Jesus Cristo vỹ ěg ri ke mur, ga kri, kỹ Topê tóg ti tỹ ùn mág han, tá, ti tỹ jykre kuryj nĩn kỹ.

Kỹ tóg ã tỹ jêgnê jafã ag mỹ ti ven, kỹ ti mré mũ ti ag vỹ povo kar mỹ ti tó.

Hã kỹ ga kri mũ ag vỹ ti ki ge mũ, kỹ Topê tóg kanhkã tá ti tỹ ùn mág han. ěg tỹ Jesus kãmén hã vê.

Ón kỹ Topê kãmén tĩ ág

4 Ha vé, Topê kuprĩg vỹ ěg mỹ nén ù jagy tó tĩ, ha mẽ. Jesus kãtĩg măn ke tỹ kakó ěn kã ù ag nêji ti tovãnh ke mũ,

ag tỹ vênh ó hã ki rã jé, Nén-Kórég ag jykre ki, Japo tỹ ag kanhrăn mũn ki. ² Ũ tỹ Japo mré ke ag vỹ un'ón tĩ, hã ra ag tóg ag vỹ jēmē kỹ Jesus továnh ke mũ. Jykre régre han ag tóg tĩ, Japo mré ke tag ag. Ajag fe kygvénh ja ag nỹtĩgĩ, kỹ ag tóg ki kagtĩg nỹtĩ ha, ag tỹ un'ón mũ ti. “Vênh vỹ há vễ,” he ag tóg tĩ, vênh ó to. ³ “Prũg tũg ra, mên tũg ra,” he ag tóg tĩ. “Tag ko tũg ra,” he ag tóg tĩ gé, Topē tỹ nén han ja to. Ēg tỹ Cristo ki ge há han kỹ, Ēg tỹ ti vỹ kri fi kỹ Ēg tóg ti hã mỹ to vỹ há han ke mũ, vễjēn to, kỹ Ēg tóg nén kar konh ke mũ. ⁴ Topē tỹ nén han mũ kar vỹ há nĩ. Kỹ Ēg tỹ ti mỹ: “há ti nĩ, ã tỹ Ēg mỹ vễjēn tag ven mũ ti,” hen kỹ Ēg jatun mỹ konh ke mũ. “Tag konh ke tũ inh nĩ,” henh ke tũ Ēg tóg nĩ. ⁵ Topē vỹ vỹ nén kar jãnhkri han tĩ, kỹ Ēg tóg to Topē mré vēmén tĩ gé, kỹ Ēg tóg jatun mỹ konh ke mũ.

Ēg mré ke kar ag kanhrăn nĩ

⁶ Tag kar tómnĩ, Ēg mré ke kar ag mỹ. Ag mỹ kãmén kỹ ã tóg Jesus Cristo rãnrhãj han há han mũ. Topē vỹ vỹ ã mỹ tỹ vễjēn ri ke nĩnh mũ, kỹ ã tóg tỹ tar jē, ã tỹ ti jykre mĩ tũn kỹ. Ki kanhró ã tóg nĩ, Topē jykre ti, Ēg tỹ ti ki rã kỹ nỹtĩ ti. ⁷ Ũ tóg vỹrmỹ nén ũ to jykrén sór tĩ, tỹ vênh ó han kỹ, Topē vỹ ki rãn kỹ nĩ tũ ěn. Tag jēmē sór tũg nĩ. Vênh jykre kuryj hã mĩ tũg nĩ, tag hã to tar nĩmnĩ. ⁸ Kejēn Ēg tóg vãkrég tĩ. Ēg tỹ vãkre to tar nỹtĩn kỹ tóg há sĩ nĩ. Ēg tỹ jãvo vênh jykre kuryj kar to tar nỹtĩ tag vỹ há tãvĩ nĩ sir. Tag to Ēg tóg tag mĩ mũ há han tĩ, kar Ēg tóg tá mũ há han ke mũ gé. ⁹ Tag vỹ tỹ vênh vỹ há nĩ, vênh jykre kuryj ti. Vênh jykre kuryj tỹ vênh kar mỹ há nĩ ra tóg há tĩ vễ. ¹⁰ Vênh jykre kuryj ve jé sóg rãnrhãj mũ, tag ve jé sóg vãsân mũ. Topē hã ki Ēg tóg nén ũ kar vэг tĩ, hã kỹ sóg ti hã to vãsân mũ. Rĩr ti nĩ, Ēg jóg tỹ Topē ti. Tĩ hã ne Ēg kren han tĩ, vênh kar ag, ũ tỹ ti ki ge kỹ nỹtĩ ag.

¹¹ Tag kãmén nĩ, tag to vênh kar mỹ: “tag han ra,” hemnĩ. ¹² Kyrũ ã tóg jē. Ũ jé ã to é he tũg, ã kyrũ jēn kỹ. Nén kar há ěn han nĩ, ag tỹ ve jé, ag tỹ ã kóm han sór jé, ã vỹ ri ke ěn ti, ã tỹ nén han mũ ri ke, ã tỹ vênh kar to há nĩ ri ke, ã tỹ Jesus ki rã kỹ jē ri ke, ã tỹ nén ũ jãnhkri han ja ri ke ke gé. ¹³ Inh kãtĩg ke to hã ã tỹ nén han tĩ ěn han tĩmnĩ ver. Ag mỹ Topē vỹ rãn to kemnĩ, ag jyvén nĩ, ag kanhrăn nĩ gé. ¹⁴ Ēg jyvén ti ag ne ã mỹ tó, Topē tỹ nén to ã tar han ke ti, Topē kuprĩg tỹ ag krĩn kỹ, igreja to pã'i ag tỹ ajag nĩgē tỹ ã kri fi ja ěn kã. ¹⁵ Ag tỹ ã mỹ nén tó ja ěn továnh tũg nĩ. To jykrén nĩ, to tar nĩmnĩ, vênh kar tỹ ã tỹ to tar nĩ ěn ve jé. ¹⁶ Věso jykrén nĩ, kỹ ã tỹ Topē vỹ tỹ ag kanhrăn ke ěn to jykrén nĩ gé, ã tỹ kygnē tũg jé. Tag to tar nĩmnĩ. ã tỹ tag han kỹ ã kren ke mũ, kỹ ũ tỹ ã vỹ mēg mũ ag vỹ krenkren ke mũ gé.

5 Ũn si há ag mỹ vỹ tar han tũg nĩ. Komēr hã ag jyvén nĩ, Ēg tỹ ũ tỹ Ēg han mũ ěn mré vỹ ri ke han nĩ, ã tỹ ũn si há ag mré vēmén kỹ. ã tỹ kyrũ ag jyvén kỹ Ēg tỹ Ēg jãvy ag jyvén ri ke han nĩ. ² ã tỹ ũn si há fag jyvén kỹ Ēg tỹ Ēg mỹnh fi jyvén ri ke han nĩ. ã tỹ tátãg fag jyvén kỹ Ēg tỹ Ēg ve fi jyvén ri ke han nĩ. ã tỹ fag jyvén kỹ vênh ki rĩrmnĩ, ã tỹ fag to ěn tũ nĩ jé.

Ũ tỹ hẽ nỹ ũn mén ter ja fag ki rĩr ke mũ

³ Ũ fag mén vỹ ter, hã ra tóg tũ tĩ, ũ tỹ fag ki rĩr ke ti. ěn fag ki rĩrmnĩ. ⁴ Ũn mén ter ja ũ fag krē vỹ nỹtĩ, fag krē'krē mré hã. Kỹ fag krē hã vỹ fag ki rĩr ke mũ'. Ag tỹ ajag mré ke fag jagãgtãn kỹ tóg há tĩ, ũ tỹ ag han mũ fag. Ag tỹ gĩr nỹtĩ kã fag tóg ag jē'jēn ja nĩgtĩ, kỹ ag tóg vênh kaja jé fag jē'jēn mũ ha. Topē jykrén hã vễ, tag vỹ ti mỹ há nĩ. ⁵ Hã ra ũn mén ter ja ũ fag vỹ krē tũ nỹtĩ, kỹ ũ tỹ fag jē'jēn ke tóg tũ tĩ gé. Kỹ Jesus ki ge mũ kar ag vỹ fag jē'jēn ke mũ, fag tỹ Topē hã

ki nén ũ kar ve sór kŷ, ti mré vēmén kŷ, ti hã mŷ nén ũ kar to vī kŷ. Fag tŷ tag to krónh kenh ke tũ vĕ, kurã mré hã, kuty mré hã ke gé. ⁶Fag tŷ hã ra ag to kanhir sór kŷ fag tóg vĕnh jykre pãno han mũ, kŷ fag tóg mũ kónãn ke mũ. ⁷Tag tómnĩ, fag mŷ, fag tŷ tŷ prãnh ke tũ nĩ jé.

⁸Ä rãnrãj jafã tá ke ag kãmĩ ũ tóg ke-jĕn ä mré ke fag ki rĩr tũ nĩ, ä ĩn krĕm nŷtĩ fag. Ĕn vŷ Jesus ki rã tovãnh ja nĩ, ti tŷ fag ki rĩr ja tũ tugrĩn. Kórég tãvĩ ti nĩ, tag ti. Ũ tŷ Jesus ki rã ja tũ kórég kãfór ti nĩ.

Ũ tŷ hĕ fag tŷ igreja ki rĩr ke

⁹Tá ũn mén ter ja fag vŷ äjag jiji rãn-rãn sór mũ, fag tŷ igreja ki rĩr jé. Ũn si há fag jiji rãn nĩ, ũ tŷ 60 anos kãfór nŷtĩ fag, ũn mén pir han kŷ nŷtĩ ja fag. ¹⁰Vĕnh kar tŷ fi jykre há ki kanhró nŷtĩn kŷ fi jyjy rãn nĩ, fi tŷ fi krĕ ki rĩr há han ja nĩn kŷ, fi tŷ kór há tá ke fag mŷ: “ĩnh mré nĩnh kãtĩg,” he ja nĩn kŷ, fi tŷ ä ĩn krĕm Topĕ tũ ag ki rĩr há han ja nĩn kŷ, fi tŷ vĕnh kar jagãgtãn ja nĩn kŷ, ũn vĕsŷrĕnh mũ ag, fi tŷ nén ũ há kar to tar ja nĩn kŷ. Ũ tŷ ge fi jiji rãn nĩ.

¹¹Ũn mén ter ja ũ fag vŷ si há tũ nŷtĩ ver, kŷ fag jyjy rãn tũg nĩ. Fag tŷ ũ to ĕn kŷ fag tóg Cristo tovãnh kŷ mén sór mũ. ¹²Kŷ tóg vĕnhmŷ tĩnh mũ, fag tŷ fag jiji rãn ja nĩn kŷ, hã vŷ: “mén mãn ke tũ ĩnh nĩ ha, sŷ Cristo tũ hã ki rĩr jé,” he mũ. Fag mén sór kŷ fag tóg fag vĩ tag mranh mũ sir. ¹³Kŷ fag tóg rãnrãj tũ nŷtĩn kŷ fag tóg ĩn kar mĩ pasa he sór mũ, ha vemnĩ, kŷ fag tóg fagrĩnh mŷ vēmén ke mũ gé sir. Vĕnh kar tŷ nén han mũ tŷ fag tóg vēmén sór mũ, ha vemnĩ. Nén tó vãnh tó jé fag tóg ke mũ gé. Kŷ tóg há tũ nĩnh mũ. ¹⁴Hã kŷ tóg há tĩnh mũ, fag mén mãn kŷ, ũn mén ter ja tŷ gĩr fag. Fag tŷ krĕ ve kŷ tóg há tĩ. Fag tŷ fag ĩn ki rĩr há han kŷ tóg há tĩ gé. Kŷ ũ tŷ ĕg mŷ fag to vĩ sór mũ ra tóg ag mŷ vĕnhmŷ tĩnh mũ, ha vemnĩ. ¹⁵Ha vé, ũ fag vŷ Cristo

tovãnh huri, ũn mén ter ja tŷ gĩr ũ fag, kŷ fag tóg Satanás jykre han mũ sir. Kŷ tóg kórég nĩ.

¹⁶Tá ke fag kãmĩ ũ ĩn krĕm ũn mén ter ja ũ fag vŷ nŷtĩ. Fag hã vŷ fag jĕŷn ke mũ. Fag tŷ fag mŷ: “Jesus ki ge mũ ag tŷ ä jĕŷn kŷ tóg ĩnh mŷ há tĩnh mũ vĕ,” hĕnh ke tũ vĕ. Ke tũ nĩ mũ ra Jesus ki ge kŷ nŷtĩ ag vŷ ũ tŷ hĕn ri ke fag ki rĩr ke mũ, kŷ fag jĕn vŷ fag kã kyn kenh mũ, fag tŷ e nŷtĩn kŷ. Jesus ki ge mũ ag vŷ ũn mén ter ja tŷ ge hã ki rĩr ke mũ, hã vŷ: ũn kanhkã tũ, ũn krĕ tũ, he mũ.

Jesus ki ge kŷ nŷtĩ ag tŷ igreja to pã'i ag jĕŷn ke

¹⁷Tá ke ag kãmĩ ũ tóg tŷ pã'i nŷtĩ, igreja to. Ag tŷ ag rãnrãj ki rĩr há han kŷ ag tóg ĕg mŷ tŷ ũn mág tãvĩ nŷtĩ. Igreja to pã'i ag kãmĩ ũ tóg igreja ki kĕ ag kanhrãn tĩ, Topĕ vĩ tŷ, kŷ ag tóg to krónh ke tũ nĩgtĩ. Tag ag vŷ tŷ ĕg mŷ ũn mág tãvĩ nŷtĩ. Ag tŷ igreja krĕm ũn kanhrãn tĩ ag jé ag mŷ kajãm mág, ũ tŷ ag kanhrãn tĩ ag mŷ. ¹⁸Tag vŷ rãn kŷ nĩ, ag to, ha mĕ: “monh tŷ ĕkrĕ jãnkre ki rãnrãj kŷ ti jĕnky tógfĩn tũg nĩ, ti jĕn kamĕg tũg nĩ,” he ja tóg nĩ, Topĕ vĩ rãn ki. Kŷ tag vŷ rãn kŷ nĩ gé: “ũn rãnrãj mũ ĕn tóg ti kaja venh ke mũ, ä rãnrãj kaja ti,” he ja tóg nĩ gé, Topĕ vĩ rá ki. Ti tŷ ĕg tŷ Topĕ vĩ tó tĩ ag mŷ kajãm to ken hã vĕ, ĕg tŷ Jesus ki ge kŷ nŷtĩn kŷ.

¹⁹Ũ tóg ke-jĕn ä mŷ igreja to pã'i jykre kórég tó sór mũ. Ũn rĕgre ag tŷ ti jykre kórég ve ja nĩn kŷ ä mŷ tó kŷ ag vĩ jĕmĕmnĩ, ke tũ nĩn kŷ ũn tãgtũ ag vĩ ti. Ũn pir vĩ jĕmĕ sór tũg nĩ. ²⁰Pã'i ũ tŷ kygnĕ kŷ vĕnh kar rĩnve ti jyvĕn nĩ, vĕnh kar tŷ ti mré ĕg tŷ kygnĕg tĩ ĕn kamĕg jé.

²¹Tag han ra, ha mĕ. Ker han tũg hĕ'. Topĕ vŷ ä tŷ nén han mũ vég tĩ, Jesus Cristo ti ke gé, Topĕ tŷ jĕnĕ jafã ag ke gé, Topĕ tŷ ũn kuprĕg ja ag. Ti hŷn ä mŷ jagy nŷ, sŷ ä mŷ tó mũ tag. Hã ra vĕnh kar mŷ vĕnh jykre pir han nĩ. Ũ to: “ti tŷ

iso há nîn kŷ sóg ti mŷ vĩ tar han sór tũ nĩ, ti tŷ kygnē ja ra,” he sór tũg nĩ. Ge ra ti jyvēn tar han nĩ. ²² Kŷ kânhamar ũ kri ā nĩgē fi sór tũg nĩ gé. Ti tŷ ā tŷ Topē vĩ mranh ja ēn tovānh kân ja tũ nîn kŷ ā tóg ti mré mranh mũ, ā tŷ ge ra ti kri ā nĩgē fi kŷ, ti vĩ mranh tŷ ver ti kākā nîn kŷ. Kŷ vēso jykren nĩ gé, ā jānhkri kar jē jé.

²³ Goj tāvĩ kron sór tũg nĩ. Sĩn kŷ vinho kron nĩ. Vēnh kagta vē ā mŷ, ā kaga nîn kŷ, ā tŷ fe kórég (ka)mē nîn kŷ.

²⁴ Ũ ag tóg Topē vĩ mranh pē han tĩ, kŷ vēnh kar tóg ag vég tĩ. Topē vĩ ag vóg kónān ke mũ, ag tŷ ti vĩ mranh pē han to. Ũ ag tóg vēnh péju kŷ mranh tĩ. Ag tŷ Topē vĩ mranh mũ ēn vĩ vēnh ven ke mũ gé kejēn, ha vemnĩ. ²⁵ Ge ti nĩ gé, vēnh jykre há mré. Vēnh kar vĩ vég mũ, ũ tŷ vēnh jykre há han mũ ti. Kejēn ũ tóg nēn ũ há han tĩ, hã ra tóg vēnh péju kŷ han tĩ. Vēnh ven jé tóg ke mũ gé, ti tŷ han mũ tag ti.

Patrão camarada jykre

6 Tá ke ag kāmĩ ũ tóg tŷ patrão camarada nŷtĩ. Kŷ ũ ag patrão vĩ Cristo ki kagtĩg nĩ. Ti camarada ag mŷ kemnĩ, ag tŷ ājag patrão kamēg jé, ag tŷ ag patrão tũ ki rĩr há han jé. Kŷ ũ tóg ēg to vĩnh ke tũ nĩ, Topē to, ti vĩ to, ag tŷ vēnh jykre há han kŷ. ² Ũ ag patrão vĩ Cristo ki rã ja nĩ. Ti camarada ag mŷ kemnĩ, ag tŷ ti to é he tũg jé. “Inh mré ke vĩ tŷ ti nĩ, inh patrão ti, ti tŷ Cristo ki rã kŷ. Kŷ inh hŷn ti vĩ han ke tũ nĩ,” he tũg nĩ. Ti tŷ ēg mré Jesus ki rã kŷ Jesus vĩ ti to há nĩ. Kŷ tóg ũn vēsŷrēnh mũ ag jagāgtān tĩ, ag patrão ti. Kŷ tóg há tĩ, ti camarada ag tŷ ti tũ ki rĩr há tāvĩ han kŷ. Tag tómnĩ, vēnh kar mŷ. Tag tŷ ag jyvēn nĩ.

Ōn kŷ Topē kāmén tĩ ag

³ Ũ ag tóg vyrmŷ jykren kŷ nēn ũ tó sór tĩ. Topē vĩ rán kŷ nĩ ēn tó sór tũ ag nŷgtĩ. Ēg Senhor tŷ Jesus Cristo tŷ nēn tó mũ ēn

tovānh kŷ ag nŷtĩ ha, vēnh vĩ há ēn, Topē jykre ēn. ⁴ “Ũn mág vĩ tŷ ēg nŷtĩ,” he ag tóg tĩ. Hã ra ag tóg jykre tũ nŷtĩ. “Topē hŷn tóg tag tó sór mũ, ti tŷ ēn tó kŷ,” he ag tóg tĩ, ōn kŷ, ag tŷ ũ tŷ ag mŷ vēnh vĩ há tó mũ ag kato tē sór kŷ. Kaga ag nŷtĩ, krĩ vēnhmŷ ag nŷtĩ, hã kŷ ag tóg fagrĩnh mŷ vĩ mŷgtĩ. Ag vĩ tugnĩn jagnē tũ ki vēĩ vĩ kutē tĩ, jagnē to jũ ke gé, jagnē to vĩ kónān, jagnē to jykren kónān, ⁵ jagnē to fēfēn ke gé. Krĩ tũ nĩ ve ag nŷtĩ. Vēnh vĩ há ki kagtĩg ag nŷtĩ. Kŷ ag tóg ōn kŷ Topē kāmén to ricon sór nŷtĩ. ⁶ Hŷ, Topē to ēg rico nŷtĩnh mũ, ēg tŷ ēprā ricon sór tũ nŷtĩn kŷ. ⁷ Ha vé, ēg mur kŷ ēg tóg tŷ nēn ũ tũ mur, kŷ ēg ter ken kŷ ēg tóg nēn kar tovānh kŷ tĩg mũ gé. ⁸ Kŷ tóg há tĩ, ēg tŷ ũri vējēn mré ēg kur ven kŷ, tag tāvĩn. ⁹ Ēg tŷ rico nŷtĩ sór kŷ tóg inh mŷ ēg tŷ Topē vĩ mranh ha mē tĩ. Kānhmar ēg tóg nēn ũ to én', nēn ũ to én' he tĩ, kŷ tag tóg inh mŷ ēg kókén ha mē tĩ. Kŷ ēg tag to nŷgme ki vár ke mũ. Pi(jé) há nĩ. ¹⁰ Ēg tŷ jānkamy mág to én kŷ ēg tóg nēn ũ kórég kar han sór tĩ. Ka jāre kórég ri ke ti nĩ, ēg tŷ jānkamy mág ve sór mũ ti. Vēnh jykre kórég vē. Tag to ũ ag tóg Jesus ki rã tovānh huri, kŷ ag tóg vēsŷrēnh mũ ha, ag tŷ jānkamy mág to há nŷtĩ tugnĩn.

Ā rānhraj ki rĩr há han nĩ

¹¹ Ag jāvo ā hã vĩ tŷ Topē tũ nĩ. Kŷ vēnh jykre kórég tag tovānh kân. Ā tŷ nēn han ken hã vē, hã vĩ: vēnh jykre kuryj, he mũ, Topē kamēg mũ, he mũ, ti ki rã kŷ tĩ, he mũ, vēnh kar to há nĩ, he mũ, vēnh kar to fen nĩ, he mũ, komēr hã vĩ, he mũ gé. ¹² Ēg tŷ ti ki rã kŷ ēg tóg ti jykre to vāsānsān ke mũ, ēg tŷ ka kunũnh sór kŷ to vāsān ri ke. To tar nĩmnĩ, ā tŷ ēg rĩr krŷg ja tũ ve jé. Tag hã to tóg ā jé prēr, Topē ti. Kŷ ā tóg vēnh kar mŷ tó ja nĩ gé, kurā ēn kã. Ũn e ag vĩ ā vĩ ēn mēgmē. Kŷ to tar nĩmnĩ.

¹³ Sŷ ā jyvēn sór vē, kŷ Topē vĩ mēnh mũ. Ti hã ne nēn kar rĩnrĩr han tĩ, Topē

ti. Kĩ Jesus Cristo vỹ inh vĩ mênh mũ gé. Ti hã ne vênh kāmén há han', pã'i tỹ Pôncio Pilatos ên mỹ. ¹⁴ Sỹ tag tó sór vễ, ã mỹ, ha mễ: ã rãnhrāj ki rĩr há han nĩ. To krónh ke tũg nĩ, to kygně sór tũg nĩ gé. Tag han kỹ êg Senhor tỹ Jesus Cristo tỹ vỹn ke ên jāvānh nĩ. ¹⁵ Ti kurā ki Topě vỹ ti mỹ: “ha tũg,” henh ke mũ. Topě vỹ ã pir mỹ tỹ nén ũ kar kri ke nĩ. Kỹ êg tóg ti hã mỹ vĩ há han ke mũ. Pã'i kar kri tóg tỹ pã'i nĩ. Ũn mág kar kri tóg tỹ ũn mág nĩ. ¹⁶ Ti hã ne ã pir mỹ ter ke tũ nĩ. Ti hã ne jēngrē kākā nĩ nĩ', tá êg jun ke tũ nĩ. Ēprā ke ũ vỹ ti ve ja tũ nĩ gé, kỹ êg tóg ti venh ke tũ nĩ gé, êg tỹ tỹ ěprā ke nỹtĩn kỹ. Ti hã ne tỹ ũn mág nĩ'. Ti hã ne tar nĩ'. Tũg' he jāvānh ti nĩ, ti tỹ tỹ ũn mág nĩ ti. Amém.

Ēprā ũn rico ag

¹⁷ Ēprā ũn rico ag mỹ tómni, ag tỹ vễso: “tỹ inh ũn rico mág nĩ,” he tũ nĩ jé. Kỹ tóg há tũ nĩ gé, ag tỹ: “isỹ nén ũ kar tỹ tũ nĩn kỹ isóg nén ũ jagy venh ke

tũ nĩ,” hen kỹ. Ag rico vỹ kãnhmar tũg' henh mũ. Ag jé Topě hã ki nén ũ kar ve sór. Ti hã vỹ êg mỹ nén ũ kar nĩm tĩ, êg fe tỹ mĩn ken jé. ¹⁸ Ũn rico ag jé vênh jykre kuryj han, ag jé ãjag tũ tỹ vênh kãpām, ag jé ũn jagāgtar ag jagāgtān to krónh ke tũg. ¹⁹ Ag tỹ nén ũ há kar han kỹ ag tóg kanhkā tá rico nỹtĩn mũ, kanhkā tá ag tóg vĩn han ke mũ, ãjag tũ ti. Kỹ ag tóg êg rĩr krỹg ja tũ venh ke mũ gé. Ā tỹ ěprā ũn rico ag mỹ tónh ken hã vễ.

²⁰ Timóteo', ã tỹ Topě vĩ mẽ ja ên kã jatu tũg nĩ, ki króm nĩ, to jykrén kỹ. Ũ ag tóg fagrĩnh mỹ vēmén mág han sór tĩ, ón kỹ vĩ (ka)mễ han kỹ. Ón kỹ ag tóg: “vênh vĩ há vỹ jagně kato tễ tĩ,” he tĩ, kỹ ag tóg Topě vĩ tỹ jagně kato tễ ên tó sór tĩ. Hã ra ag tóg fagrĩnh mỹ vĩ tĩ. Ag vĩ mẽ sór tũg nĩ. ²¹ “Ki kanhró êg nỹtĩ,” he ag tóg tĩ, hã ra ag tóg Topě ki rã tovānh huri. Kórég ag nỹtĩ.

Topě mỹ sóg to vĩ tĩ, ti tỹ ãjag tỹ ã to tar han jé.

Hã vễ.

PAULO TỠ CARTA HAN: TIMÓTEO MỠ CARTA Ủ

1 Paulo tỡ rá vế. Topê ne inh fêg', isỷ tỡ Jesus Cristo ápótolô jê jê. Inh mỷ tóg tó, isỷ vênh kar mỷ êg tỡ Jesus Cristo tugrĩn rĩnrĩn nỷtĩnh ke tag tó jê. Topê tỡ êg mỷ nén han sớ mũn hã vế.

² Isỷ inh kớsin tỡ Timóteo mỷ rán hã vế, isỷ ủ to há tãvĩ nĩ ên mỷ. Êg jóg tỡ Topê mỷ sóg to vĩ tĩ, ti tỡ ả tar han jê, ti tỡ ả jagăgtăn jê, ti tỡ ả krĩ kuprăg jê ke gé. Êg Senhor tỡ Jesus Cristo mỷ sóg tag to vĩ tĩ gé.

Paulo tỡ Topê mỷ vĩ há han

³ Topê mỷ sóg vĩ há han tĩ. Ti hã mỷ sóg rănhrăj tĩ, inh jóg'jóg ve ag ri kén. To kygnê sớ vãnh inh nĩgtĩ.

Ả tó sóg tĩ, sỷ Topê mrê vêmén kỷ. To krónh ke tũ inh nĩgtĩ, kură kar ki, kuty ki ke gé. ⁴ Isig kỷ ả tóg fỷ ja nĩ. Hã mỷ sóg êkrég tĩ, hã kỷ sóg ả ve sớ tãvĩ nĩ, inh fe tỡ mrin ke jê. ⁵ Jesus ki rả há han ả tóg nĩ, ả fe kar tỡ, ả vóvó tỡ Lóide fi ri ke, ả mỷnh tỡ Eunice fi ri ke. Fag ri ke han kỷ ả tóg ti ki rả gé, ki kanhró sóg nĩ.

⁶ Hã kỷ sóg ả jyvén sớ mũ. Topê vỷ ả mỷ vênh rănhrăj nĩm, isỷ inh nĩgé tỡ ả kri fi ja nĩn kỷ. Ên to tar nĩmnĩ. ⁷ Topê vỷ êg mỷ ả kuprĩg jêñê, êg kanê jur tũ nĩ jê, êg tar nỷtĩ jê, êg tỡ jagnê to há nỷtĩ jê, êg tỡ vếso jykrén jê.

⁸ Hã kỷ êg Senhor to mỷ'ăg tũg nĩ. Ti kămén nĩ, kỷ inh kămén nĩ gé, isỷ ti tugnĩn se kỷ jê tag ti. Kỷ ả tỡ ti tugrĩn vếsỷrénh ke tag kamêg tũg nĩ gé inh mrê. Topê vỹ to êg vếsỷrénh tĩ, hã ra Topê tóg to êg tar han tĩ gé. ⁹ Ti hã ne êg kren han', ti hã ne êg kuprêg', êg tỡ tỡ ti tũ nỷtĩ jê. Êg tỡ vếsóg ki to văsăn pijê'. Ti hã ne to jykrén', kỷ tóg êg jagăgtăn kỷ êg kuprêg', Jesus Cristo tugnĩn. Êg tỡ ti ri ke há nỷtĩ jê tóg êg kuprêg'. Hã ra tóg nén kar han ke to hã tag to jykrén ja nĩgtĩ. ¹⁰ Kỷ tóg

ũri hã êg mỷ tó, êg kren han tĩ tỡ Jesus Cristo jêñên kă. Ên vỷ êg ter ke tag tỡ tũg' hê, kỷ tóg êg rĩnrĩn han mũ sir, êg tỡ êg rĩr krỷg ja tũ ve jê sir, êg tỡ ti vĩ sér kri fi kỷ. ¹¹ Kỷ tóg inh mỷ: “vênh kar mỷ inh vĩ tónh tũg,” he ja nĩ gé, sỷ tỡ ti ápótolô jê jê, sỷ ti vỹ tỡ vênh kar kanhrăn jê. ¹² Hã kỷ sóg se kỷ jê ha. Hã ra sóg mỷ'ăg ke tũ nĩ. Ti ki rả kỷ sóg jê ha, ti ki kanhró sóg nĩ, sỷ ũn ki rả ja ên ti. Nén ũ kar to tóg tar nĩ, hã kỷ tóg inh ki rĩr há han ki kanhró nĩ gé, sỷ ti mỷ vênh fêg kỷ, isỷ kură tỡ êgno pétêm há han jê.

¹³ Isỷ nén tỡ ả kanhrăn ja ên kă jatu tũg nĩ. Vênh vỹ há vế, sỷ ả mỷ nén tó ja ti. Tag ki króm kỷ inh ri kén kămén nĩ. Ti ki rả to tar nĩmnĩ, vênh kar to há nĩmnĩ gé, Jesus Cristo tỡ nén han ja ên ri ke han nĩ. ¹⁴ Ti tỡ ả mỷ vênh rănhrăj nĩm ja ên ki rĩr há han nĩ, ũ tỡ Topê vỹ tỡ ũ han tũ nĩ jê. Topê kuprĩg vỷ êg kăki jamă nĩ. Ên vỷ ả tar han ke mũ, ả tỡ ti vỹ tó há han ke to.

¹⁵ Ha vé, ga tỡ Ásia tá ke kar ag vỷ isovănh kăn, Fígelo ke gé, Hermógenes ke gé. Tag mễ ả hỷn huri. ¹⁶ Topê mỷ sóg to vỹ tĩ, ti tỡ Onesíforo mrê ke fag jagăgtăn jê, ũn tũg mũ ên ti. Iso há tãvĩ ti nĩ ja nĩgtĩ. Iso mỷ'ăg tũ ja ti nĩgtĩ, ise kỷ jê (hã) ra. ¹⁷ Ti tỡ cidade tỡ Roma tag ki jun kỷ tóg inh jăvănh tãvĩ han ja nĩ, kỷ tóg kejên inh ve ja nĩ. ¹⁸ Êg Senhor hỷn ti jagăgtăn ke mũ, ti tỡ kură tỡ êgno ki ti kren han jê, kỷ tóg inh mỷ sér tĩnh mũ. Ki kanhró ả tóg nĩ, ti tỡ Êfeso tá inh ki rĩr há han ja ti. Sỷ ả mỷ Onesíforo jykre tón hã vế.

Êg văsăn ke

2 Inh kớsin', Jesus Cristo ne ả tar han ke mũ', kỷ krónh ke tũg nĩ. ² Inh vỹ mễ ả, sỷ ũn e ag kanhrăn răn kỷ. Tag tómnĩ gé, ũ ag mỷ. Ủ tỡ krónh ke tũ ag mỷ tómnĩ, ũ tỡ ả kóm ag kanhrăn ke to jykre há nỷtĩ ag mỷ.

³ Ëg tỹ Jesus tigrĩn vēsýrénh ke to tar nĩmĩ inh mré, Timóteo'. Jesus Cristo soldado ri ke ãg nỹtĩ. ⁴ Soldado jykre tag to jykrén nĩ. Ag pi(jé) vyr mỹ jykrén tĩ', soldado ag. Ājag pā'i vĩ ki hā han ag tóg tĩ, ājag pā'i tỹ ag to há nĩ jé. Hā kỹ ag tóg vyr mỹ ganho ve sór tũ nĩgtĩ. Soldado ag ri ke han nĩ gé, Timóteo'.

⁵ Kỹ ũ ag tỹ corrida han mũ ag jykre to jykrén nĩ gé. Ag corrida vỹ to vėnh jykre nĩ. Corrida to vėnh jykre ěn hā han ag tĩ, ag tỹ ganhar ken jé. Ũ tỹ corrida han mũ ag ri ke han nĩ, Timóteo'.

⁶ Kỹ ěpỹ ki rĩr tĩ ag vỹ rānrhāj mág han tĩ gé, hā kỹ ag tóg krān kỹ ti kanē ko tĩ. Ag ri kén ā tóg venh ke mũ gé, ā tỹ nén ve sór mũ ti, ā rānrhāj mág kỹ, ha vemnĩ.

⁷ Tag to jykrén há han nĩ, sỹ ā mỹ tó mũ tag to. Kỹ ěg Senhor vỹ ā tỹ to jykrén há tāvĩ han ke mũ sir. ⁸ Jesus Cristo mĩ ěkrén nĩ. Ti ter kar kỹ tóg rĩr mǎn. Ti jóg'jóg ve vỹ tỹ Davi ja nĩgtĩ. Hā tó sóg tĩ, ti kāmén kỹ. ⁹ Hā kỹ sóg se kỹ jē, ferro tỹ mỹr. "Ti hỹn tỹ ũn jykre pāno nĩ," he ag tóg tĩ iso, hā kỹ ag tóg ferro tỹ isé. Hā ra Topē vĩ pi(jé) se kỹ nĩ nĩ'. Tāmĩ tóg tĩ ha. ¹⁰ Hā kỹ sóg ise kỹ jē (hā) ra ti to tar nĩ, Topē tỹ ũn kuprēg mũ ag jagfỹ, ag krenkren jé, ag tỹ Jesus Cristo ki ge tigrĩn, ag tỹ ti tugnĩn kanhkā tá junjun jé. ¹¹ Vėnh vĩ há vė, tag ti, ha mē: ěg tỹ ti tigrĩn kǎgter mũ ra ěg tóg ti mré rĩnrĩr mǎn ke mũ gé. ¹² ěg tỹ ti tigrĩn nén ũ jagy kar to tar nỹtĩn kỹ ěg tóg ti mré tỹ ũn mág nỹtĩnh ke mũ gé. ěg tỹ ti tovǎnh kỹ tóg ěg tovǎnh ke mũ gé. ¹³ ěg tỹ ti to krónh ke tĩ ra tóg ěg to krónh kenh ke tũ nĩ jāvo. Ti pi(jé) ón tĩ', hā kỹ tóg ěg to krónh kenh ke tũ nĩ gé, ti tỹ: "krónh ke tũ inh nĩ," hen kỹ.

Ěg tỹ Topē rānrhāj han há han ke

¹⁴ Tag tómĩnĩ, vėnh kar mỹ. Tỹ ag jyvėn nĩ, kỹ ag jyvėn tar han nĩ gé. Topē vỹ ā vĩ mėnh mũ. Ag mỹ: "ěg kato tē mũ ag vĩ kafān sór tũg nĩ," hemnĩ. "Jagnē vĩ kafān

pi(jé) ěg tar han mũ'. Ũ tỹ tag mē kỹ tóg krónh ke sór mũ," hemnĩ ag mỹ. ¹⁵ Vāsān ra, Topē tỹ ā rānrhāj to: "há ti nĩ," he jé, ā tỹ ā rānrhāj to mỹ'ag tũ nĩ jé. Topē vĩ to vāsān nĩ, ā tỹ ki kanhrān há han jé, ā tỹ vėnh kar mỹ tó há han jé gé. ¹⁶ Ũ tỹ kanhir kỹ nén ũ kórég tó kỹ jēmē sór tũg nĩ, ũn vĩ (ka)mē ěn vĩ ti. Ũ tỹ tag tó mũ ag vỹ Topē to kórég tāvĩ nỹtĩ, kỹ ag vỹ vỹ ag kókén ke mũ, kỹ tóg ag jykre pāno pē han mũ. ¹⁷ Vėnh vĩ tỹ ge vỹ ěg kar kókén ke mũ, komēr hā, ti tỹ vėnh kar kri rũm ken kỹ. Vėnh kaga kórég tỹ vėnh kar kri rũm ke ri ke ti nĩ.

Ũ tỹ vėnh vỹ tỹ ge han mũ vỹ tỹ Himeneu nĩ gé, Fileto ke gé. ¹⁸ Tag ag vỹ un'ón tĩ, Topē vĩ to. "Rĩr mǎn ri ke han ěg huri, ěg tỹ Cristo ki gen kỹ, hā kỹ ěg rĩnrĩr mǎn ke tũ nỹtĩ ha, ěg ter kar kỹ, Jesus kǎtĩg mǎn kỹ," he ag tóg tĩ. Ag tỹ tag tó kỹ ag tóg ũ ag tỹ Jesus to krónh ke han tĩ, kỹ ag tóg Cristo tovǎnh mũ ha ag tigrĩn.

¹⁹ ěg tỹ ĩn han kỹ ěg tóg ti tỹ kri jē jafā ěn tar han tĩ. ěn ri ke ti nĩ, Topē jykre ti. Jesus Cristo kāmē vỹ há nĩ, kỹ tóg tũg' henh ke tũ nĩ, ũ ag tỹ ón kỹ to vĩ mũ (hā) ra. ěg tỹ ti ki ge kỹ nỹtĩn kỹ tag vỹ ěg to rán kỹ nĩ, ha mē: "ěg Senhor vỹ ā tũ ag ki kanhró nĩ," he tóg mũ.

Kar kỹ tag vỹ rán kỹ nĩ gé, ha mē: "vėnh jykre pāno tovǎnh kǎn ra, ājag tỹ: inh Senhor vỹ tỹ ti nĩ, Jesus ti, he jé," he tóg mũ. Cristo jykre to ken hā vė. Ón vǎnh ti nĩgtĩ.

²⁰ Ha vé, ĩn mág krēm kukrũ vỹ e nỹtĩ. Ũ vỹ ouro tỹ há nỹtĩ, ũ vỹ prata tỹ há nỹtĩ. Kỹ ũ vỹ ka tỹ há nỹtĩ gé, ũ vỹ go'or tỹ há nỹtĩ gé. Kukrũ há vỹ tỹ vėjēn né nĩ, kỹ ũn kórég vỹ tỹ vǎfár né nĩ gé. ²¹ Kỹ tóg ge nĩ, ũ tỹ kanhir kỹ nén ũ kórég tó (ka)mē ěn ag. Kukrũ kórég ri ke ag nỹtĩ. Hā kỹ Topē tóg ag mỹ: "inh rānrhāj han ra," henh ke tũ nĩ sir. ěg tỹ ti kórég tovǎnh kǎn kỹ ěg tóg kukrũ há ri ke nỹtĩ, kỹ Topē tóg ěg mỹ: "inh rānrhāj han nĩ,"

henh ke mû gé sir. Ti tũ vỹ tỹ ẽg nỹtĩnh mû, kỹ tóg ẽg mỹ ă rănhrăj nĩm sór mû, ẽg tỹ han jé. Kỹ ẽg tóg vēsýmér han sór mû sir, ti tỹ ẽg mỹ tó kỹ, kỹ tóg Topê mỹ sér tĩ.

²² Kyrũ ag vỹ nén ũ kar to én (ka)mẽ nỹtĩ. Ẽn tovănh kăn. Vẽnh jykre há hã mĩ tĩg sórmnĩ. Jesus ki rã hã to jykren nĩ, vẽnħ kar to há nĩmnĩ, krĩ kuprã nĩmnĩ, ũ tỹ ẽg Senhor mré ke ag to, ũn jãnhkri ag to, vẽnħ kar to ke gé.

²³ ũ ag tóg ón kỹ: “Topê hỹn tag tó sór mû, ti tỹ ẽn tó kỹ,” he sór ti. Topê tỹ nén tó vãnħ ẽn tó sór ag tóg tĩ. Tag tugrĩn jagnê to jũ tóg kutê tĩ, hã kỹ ag mré to jykren sór tũg nĩ. ²⁴ ũ tỹ Topê mỹ rănhrăj tĩ jé vẽnħ kar to há nĩ. Ti tỹ kãnħmar ag to jũn kỹ tóg tỹ ũ nỹ. Ti tỹ komêr hã vĩ kỹ tóg há tĩ, ag kanhrăn jé, vẽnħ kar to fe há nĩn kỹ. ²⁵ ũ tóg ti vĩ kafăn sór mû. Ẽn mỹ tóg vĩ há han ke mû. Komêr hã tóg ag mỹ Topê vĩ tónħ ke mû, Topê tỹ ag jagăgtãn jé, ag tỹ ăjag jykre tovănh kỹ, vẽnħ vĩ há hã nón mû jé. ²⁶ Kỹ ag krĩ há nỹtĩnh mû. Japo tũ vỹ tỹ ag nỹtĩ ja nĩgtĩ, ti tỹ ag se jan kỹ, ag tỹ ti rănhrăj han jé. Ag tỹ ti tovănh kỹ Topê tóg ag krenkren han ke mû. Kỹ tóg ag tỹ Japo jykre tag to vẽnħ nenħ to ag tar han ke mû, ẽg ke gé. Kỹ tóg há tĩ.

Kurã tỹ ẽgno to hã vẽnħ jykre

3 Tag to jykren, ha mẽ. Ga tỹ tũ henh ke to hã ẽg tóg nén ũ jagy ve kăn ke mû. Vẽnħ kar tỹ vẽnħ jykre pãno han mũ ve jé ẽg tóg ke mû. ² ăjag jykre hã han sór jé ag tóg ke mû. Nén ũ kar to én jé ag tóg ke mû, ag rico nỹtĩ jé. “Tỹ inh ũn mág nĩ, tag han inh tĩ, tag han inh tĩ,” he jé ag tóg ke mû. Jagnê to vĩ kónãn jé ag tóg ke mû. ăjag panħ vĩ ki hã han ke tũ ag tóg nĩ. “Kórég ti nĩ,” he jé ag tóg ke mû, ũ tỹ ag mỹ nén ũ há nĩm mũ ra. Topê to ag é henh ke mû gé. ³ Jagnê to jykre kórég ag nỹtĩnh mû, ăjag krê to ke gé. Jagnê mỹ vẽnħ pãte fón ke tũ ag nĩ

gé. Jagnê to ag un'ón ke mû. Vêso jykren ke tũ ag tóg nĩ. Ag tỹ ũ vóg kónãn kỹ tóg ag mỹ sér tĩnh mû. Vẽnħ jykre há kato tê jé ag tóg ke mû. ⁴ ăjag régre ag vatánħ tá ag tóg ag to vĩ kónãn ke mû gé. ũ tỹ ăjag jykre kórég to ag vóg kónãn ke tag kamêg vãnħ ag nỹtĩ. Vêso ag tóg: “vẽnħ kar kăfór vỹ tỹ inh nĩ,” henh ke mû gé. Ag tỹ Topê to há nỹtĩnh ke vê vê, hã ra ag tóg ăjag tỹ nén to én mũ ẽn hã han sór ke mû. ⁵ Ồn kỹ ag tóg Topê to há nĩ ve nỹtĩnh mû, hã ra ag tóg ti jykre han sór ke tũ nĩ, ti tỹ ẽg tar han tĩ tag vỹ ag mỹ há tũ nĩnh mũ. ũ tỹ ge ag tovănh nĩ, vỹ.

⁶ Ag kãmĩ ũ ag vỹ ĩn kar mĩ mũnh mũ, kỹ ag tóg ũn tỹtã jykre tũ fag mré vēmén sór ke mũ, ũ tỹ Topê vĩ mranħ tĩ fag, ũn én sór (ka)mẽ fag. Ẽn fag mỹ ag tóg vĩnh mũ, fag tỹ ag vĩ ki han jé. ⁷ Ồn kỹ fag tóg vẽnħ kanhrăn to tar nỹtĩnh mũ, hã ra fag tóg vẽnħ vĩ há ki kagtĩg nỹtĩ, hã kỹ fag tóg ag vĩ ki han mũ, ũ tỹ fag mỹ ón mũ ag vĩn ki. ⁸ ũ tỹ fag mré vēmén mũ ẽn ag vỹ Topê vĩ kato tê nỹtĩ, vẽnħ vĩ há ẽn kato. Vãsỹ Janes vỹ Moisés vĩ kato tê ja nĩgtĩ, Jambres ti ke gé. Ag ri ke ag nỹtĩ, Topê vĩ kato tê ag tóg tĩ, ũ tỹ fag nón mũ ẽn ag. Vẽnħ jykre pãno han (ka)mẽ ag tóg nỹtĩ, krĩ tũ ag nỹtĩ. Ồn kỹ ag tóg Jesus ki ge nỹtĩ ve nĩ, ag tỹ ón kỹ ti vĩ tón kỹ. ⁹ Hã ra ũn e vỹ ag vĩ kri finħ ke tũ nĩ, ha vemnĩ. Vẽnħ kar vỹ ag krĩ tũ tag venħ ke mũ, ha vemnĩ. Janes mré Jambres ri ke han jé ag tóg ke mũ. Vẽnħ kar vỹ ag krĩ tũ ki kanhró ja nỹtĩgtĩ gé, Janes mré Jambres ti.

Ẽg tỹ Topê to tar nỹtĩn kỹ ẽg nén jagy vẽnħ ke mũ

¹⁰ Ag jãvo ă tóg inh vĩ kri fi há han tĩ, Timóteo'. Isỹ nén han mũ ẽn ri ke han ă tóg tĩ gé. Isỹ nén ve sór mũ ẽn ve sór ă tóg tĩ gé. Isỹ Jesus ki rã ri ke han ă tóg tĩ gé. Isỹ komêr hã vĩ ri ke han ă tóg tĩ gé. Isỹ vẽnħ kar to há nĩ ri ke han ă tóg tĩ

gé. ¹¹ Ag tỹ inh vóg kónān ve ja ā nĩ gé, isỹ nén ũ jagy vэг tĩ ěn ti. Inh vóg kónān tỹ hēn ri ke han ja ag tóg, Antioquia tá, Icônia tá, Lистра tá ke gé. Ter kren pē han inh, tá. Hā ra ěg Senhor tóg inh jy nĩgān.

¹² Ha vé, ěg tỹ Jesus Cristo jykre mĩ mūn kỹ ěg kar tóg ag tỹ ěg vóg kónān venh mū. ¹³ ěg jāvo ũn jykre pāno ag vỹ komēr hā venh jykre pāno han kān kỹ nỹtĩ, ũn un'ón mū ag ke gé. Ũ ag lograr ke ag tóg tĩ, hā ra ag tóg ag lograr ke tĩ gé, vēnh kato.

¹⁴ Ag jāvo isỹ ā mỹ nén tó ja ěn mĩ tĩg nĩ, ā tỹ nén mē ja kar ěn mĩ, ā tỹ ki rā kỹ jē ěn mĩ. Isỹ ā kanhrān ja ěn to tar nĩmnĩ. Inh jykre ki kanhró ā tóg nĩ. ¹⁵ Ā sĩ kā ā tóg Topē vĩ mē, ā kónēg kā. ěn kā ā tóg Topē vĩ tỹ rán kỹ nĩ ěn mē. Topē vĩ tỹ rán kỹ nĩ ěn to jān kỹ ā tóg ki kanhrān mū, ěg tỹ Jesus Cristo ki rā tugnĩn krenkren ke mū ti.

¹⁶ Ũ tỹ hēn ri ke ag vỹ Topē vĩ rán-rán ja nĩgtĩ. Hā ra Topē kuprĩg tóg ag mỹ tó ja nĩgtĩ, ag tỹ nén rán ke ti, hā kỹ ag tóg ránrán. Ti vĩ rán kỹ nĩ to ken kỹ ěg tóg vēnh vĩ há ki kanhrān mū, kỹ ěg tóg kāmén há han ke mū gé. ěg mỹ tóg ěg tỹ kygnē ja ěn ven tĩ, kỹ ěg tóg jagnē mỹ ven tĩ gé. Tỹ Topē tóg ěg jyvēn mū gé, ti vĩ rán kỹ nĩ ki, kỹ ěg tóg jagnē jyvēn ke mū gé. Kỹ ěg tóg vēnh jykre kuryj ki kanhrān tĩ gé, ti vĩ rán kỹ nĩ ki, ěg tỹ jagnē mỹ tó jé. ¹⁷ Topē tũ vỹ tỹ ěg nỹtĩ. Ti pi(jé) ěg tỹ vēnh kygnē ve sór mū'. ěg tỹ kygnēg tũ nỹtĩn kỹ ěg tóg nén ũ kar há han to tar nỹtĩ. Ti tỹ tag ve sór vē, hā jé tóg ěg mỹ ā vĩ jēnē ja nĩgtĩ.

4 Inh kósin', sỹ ā jyvēn ke vē, ha mē, kỹ Topē vỹ mēnh mū, Jesus Cristo ti ke gé, ũ tỹ vēnh kar jykre tugnỹm ke mū ěn ti, ũn rĩnrĩr nỹtĩ ag jykre, ũn kāgter nỹtĩ ag jykre ke gé. Vỹn ke mǎn jé tóg ke mū, ha vemnĩ, kỹ tóg tỹ pǎi mág jēnh mū, ha vemnĩ. ěg Senhor rĩnve sóg ā mỹ: ² “Topē vĩ kāmén ra,” hēnh mū. Kejēn ag tóg mē sór tĩ, kejēn ag tóg mē sór tũ nĩgtĩ.

Ge ra ag mỹ kāmén nĩ. Ag jyvēn nĩ, ag mỹ ag tỹ vēnh kygnē ja ěn tómnĩ, ag jyvēn tar han nĩ, ag tỹ mē jāvānh kỹ. Ag jyvēn to krónh ke tũg nĩ, ag tỹ kejēn Jesus ki rā sór jé. Topē vĩ tó há han nĩ. ³ Kurā tỹ ěgno to hā ag tóg jēmē sór ke tũ pē nĩnh mū, vēnh vĩ há ti, ha vemnĩ. Kỹ ag tóg vēnh vĩ kórég nón mū sór mū, ag tỹ nén to ěn mū ěn ti. Ũ tỹ ón kỹ ag mỹ tónh ke mū ěn vỹ vēmē sér tónh ke mū, kỹ tóg ag mỹ sér tĩnh mū. ⁴ Vēnh vĩ há jēmēnh ke tũ ag nĩ, hā kỹ ag tóg vēnh ó jēmēnh ke mū sir.

⁵ Ag jāvo nén ũ kar to jykren há han nĩ. Ā tỹ nén ũ jagy ve kỹ kato tar nĩmnĩ. Cristo to vēmē sér ěn kāmén nĩ, vēnh kar mỹ. Ā rānrhāj ki rĩr há han nĩ gé.

⁶ Ag hỹn kānhmar isén ke mū, Jesus Cristo tugrĩn. Hā ra tóg inh mỹ tỹ nén ũ tũ nĩ. Jesus tugnĩn ke vē, iser ke ti, hā kỹ tóg inh mỹ tỹ nén ũ tũ nĩ. ⁷ Kejēn ěg tóg rará tĩ, kỹ ěg tóg vāsān tĩ. ěg tỹ rará to vāsān ri ke han inh, Topē rānrhāj han kỹ. ěg tỹ carreira han kỹ ěg tóg vāsān tāvĩ han tĩ gé, ěg tỹ ganhar he jé. Vēnhvó tāvĩ han ěg tóg tĩgtĩ. Tag ri ke han inh, isỹ Topē rānrhāj han kỹ. Ti rānrhāj han kān inh huri. Ti ki rā tovānh ja tũ inh nĩgtĩ. ⁸ Ũ tỹ carreira ki ganhar he mū ěn vỹ ka féj tỹ coroa ganhar he tĩ. ěn ri ke nĩm jé tóg ke mū inh mỹ, Topē ti, inh jykre kuryj to. Nĩm han kỹ tóg nĩ nĩ, Topē tỹ inh mỹ nén nĩm ke mū ti, ag tỹ coroa vэг mū ěn ri ke ti. Kurā ěn kā tóg inh mỹ nĩm ke mū, ěg Senhor ti. Vēnh kar mỹ ti nĩm ke mū gé, ũ tỹ ti kǎtĩg jāvānh kỹ nỹtĩ ag kar mỹ.

Paulo tỹ nén ve ja

⁹ Kuri inh venh kǎtĩg. ¹⁰ Demas vỹ isovānh kỹ vyr. ěprā vēnh jykre han sór ti nĩ, hā kỹ tóg isovānh kỹ Tessalōnica ra vyr. Crescente vỹ Galácia ra vyr, kỹ Tito vỹ Dalmácia ra vyr. ¹¹ Lucas vỹ inh hā inh mré nĩ nĩ. Marcos pére kǎtĩg, ti tỹ inh rānrhāj han jé. Tag to tóg tar

nĩ. ¹² Tíquico jēnē inh, ti tỹ Éfeso ra tĩg jé. ¹³ Kỹ, ã kătĩg kỹ inh mỹ inh capa ma kătĩg. Trôade tá ti nĩ, Carpo ĩn krēm. Kỹ inh mỹ inh livro gé kătĩg gé, livro grĩn-grĩn kỹ nỹtĩ ěn mré hã, nén ũ fár ki rán kỹ nỹtĩ ěn mré. Isỹ livro ěn venh há pē tóg tĩ.

¹⁴ Alexandre, ũ tỹ ferro tỹ nén ũ kar han tĩ ěn vỹ iso kórég tăvĩ nĩ. Ěg Senhor vỹ ti jykre kórég to ti vóg kónăn ke mũ.

¹⁵ Ti kamêg ra. Inh vỹ kato tē mág han tóg.

¹⁶ Fóg tỹ pã'i vỹ inh ki inh jykre jēmē pin huri. Ěn kã ũ tóg inh mré ve ja tũ nĩ. Iso vãn h kãn ag tóg. Topē mỹ sóg to vỹ tĩ, ti tỹ ag mỹ vẽn h pãte fón jé. ¹⁷ Ag jãvo ěg Senhor vỹ isar han, ti tỹ inh mré tag kã jē nĩn kỹ. Hã kỹ vẽn h kar vỹ ti vỹ mē huri, isỹ ag mỹ kãmén kỹ. Povo kar ag vỹ hur mē kãn. Kỹ ěg Senhor tóg inh jy nĩgãn,

ag tỹ mĩg mỹ inh fón tũ nĩ jé. ¹⁸ Inh jy nĩgãn mãn jé tóg ke mũ gé, Nén-Kórég tỹ isỹ hē ri ke tũ nĩ jé. Inh ki tóg rĩr há han ke mũ, sỹ kanhkã ra tĩg há han jé, ti nĩgja ra. Ti hã mỹ ěg vỹ há han ke mũ'. Kỹ tóg tũg' henh ke tũ nĩ, ěg tỹ ti mỹ vỹ há han ke ti. Amém.

¹⁹ Priscila fi mré fi mén tỹ Áquila mĩ sóg ěkrég tĩ, Onesíforo mré ke fag mĩ ke gé. ²⁰ Erasto vỹ Corinto tá nĩ nĩ. Jãvo Trófimo tóg Mileto tá kaga nỹ ja nĩ, isỹ tá kătĩ mũn kã.

²¹ Kur kătĩg mē han, prỹg tỹ kusa tá krỹg tũ ki. Êubulo vỹ ã mĩ ěkrég tĩ, Prudente ti ke gé, Lino ti ke gé, Cláudia fi ke gé, ěg régre kar ag mré hã. Ěn ag vỹ ã mỹ abraços jēnēg tĩ.

²² Ěg Senhor mỹ sóg to vỹ tĩ, ti tỹ ã tar han jé, ti tỹ ãjag kar tar han jé gé.

Hã vẽ.

PAULO TỠ CARTA HAN: TITO MỠ CARTA

1 Paulo tỠ rá vễ. SỠ Tito mỠ rán hã vễ. Topê mỠ sóg rănhrăj tĩgtĩ, kỠ Jesus Cristo vỠ inh fêg, sỠ tỠ ti apóstolo jê jê. Topê tóg êpră ke ù ag kuprêg, ag tỠ ti ki ge jê. KỠ tóg inh mỠ: “ha isỠ ùn kuprêg ja ag mỠ tónh tĩg,” he ja nĩ. “Ag mỠ inh vĩ ti kămén nĩ, sỠ ki hã tó mũ ên ti, ag tỠ ă vĩ jêmê kỠ inh ki ge há han jê,” he ja tóg nĩ. ²Topê vỠ êg mỠ: “rĩr krỹg ja tũ ve jê ăjag tóg ke mũ,” he ja nĩ. Hã ve sór êg tóg mũ. Topê tỠ nén tón hã vễ, văsỹ, hã ra tóg ón tũ nĩgtĩ. ³Văhă tóg êg mỠ ă vĩ tag jênê ja nĩ, ti tỠ êg mỠ jênênh ke kură ki. Jesus tỠ tóg êg mỠ jênê ja nĩ. Hã to Topê tóg inh mỠ: “ha vênh kar mỠ tónh tĩg,” he ja nĩ, êg kren han tĩ ên ti.

⁴Hã kỠ sóg ă mỠ tó mũ, Tito! Inh kósín pê vỠ tỠ ă nĩ, ă tỠ inh mré Jesus ki rã kỠ jên kỠ. Êg jóg tỠ Topê mỠ sóg to vĩ tĩ, ti tỠ ă tar han jê, ă krĩ kupră nĩ jê ke gé. Êg kren han tĩ tỠ Jesus Cristo mỠ sóg tag to vĩ tĩ gé.

Tito tỠ Creta ki ke ag ki rĩr

⁵Ă mỠ sóg: “ha ver goj văsô tỠ Creta tá jê,” he ja nĩgtĩ, ă tỠ tá isỠ nén han kăn ja tũ ên han kăn jê. Hã kỠ sóg ă mỠ: “cidade kar ki igreja to pă'i vĩn,” he ja nĩ. Ă tỠ ù kuprêg kỠ, ti tỠ tỠ pă'i jê jê, kỠ tag to jykrén nĩ, ha mẽ. ⁶Ũn kăme kórég tũ jăvănĥ jê ă tóg ke mũ, ùn prũ pir han kỠ nĩ ti. Ti krê tỠ Jesus ki rã kỠ tóg há tĩnh mũ, ag tỠ nén ù vênhmỠ han tũ nĩn kỠ, ăjag panĥ vĩ jêmên kỠ.

⁷Ha vễ, ù tỠ tỠ igreja to pă'i jê sór kỠ tóg tỠ ùn jykre há jênĥ mũ, ù tỠ Topê tũ ki rĩr há han mũnh ke mũ ti. Ti tỠ ă mré ke ag to: “ag kăfór vỠ tỠ inh nĩ,” henĥ ke tũ vễ. Ũn fe tỠ gỹm ke (ka)mê vỠ há tũ nĩ, ù tỠ vinho kron (ka)mê ti, ùn jũ (ka)mê ti. KỠ tóg ă tỠ rico kenh ke hã to én ke

tũ nĩ gé. ⁸Ti tỠ ù tỠ kuvar há tá kămũ ag mỠ: “inh mré jê,” hen kỠ tóg há tĩ, ti tỠ vênh jykre há to há nĩn kỠ, ti tỠ vêsô jykrén kỠ, vênh jykre kuryj han kỠ, Topê vĩ hã ki króm kỠ, ti tỠ vênh kanhrăn kỠ tĩg kỠ. ⁹Topê vĩ mẽ ja tóg nĩ. KỠ ti tỠ tag kă jatũ tũ nĩn kỠ tóg há tĩ gé. KỠ tóg ù tỠ ă vĩ mẽg mũ ag kanhrăn há han ke mũ gé, ag jyvên há han jê tóg ke mũ gé. Ũ tỠ ti vĩ kafăn mũ mỠ tóg tó há han ke mũ gé, ti tỠ kă jatũ tũ nĩn kỠ.

¹⁰Ha vễ, ù tỠ hên ri ke ag tóg mẽ jăvănĥ nỹti. Véké ag tóg ón kỠ vêmén ti. Ag tỠ ù lograr he sór vễ. Judeu ag vỠ tag to tar nỹti, ha mẽ. ¹¹Êg tỠ ag vĩ tỠ tũg' henĥ ke vễ. Ha vễ, ù fag ne ag vĩ kri fi sór mũ', kỠ fag tóg Topê vĩ tovănĥ sór mũ, fag mén mré hã, fag krê mré hã. Un'ón ag tóg tĩ, ù tỠ fag kanhrăn sór mũ ag. Hã ra ag tóg hã to nén ù ve sór mũ, jănkamy ti, ag tỠ rico nỹti jê. ¹²Ag kămĩ ù vỹ ki hã tó ja nĩ, ag jyvên tĩ ù, ti tỠ ag kato tẽ kỠ tag tón kỠ, ha mẽ: “Creta tá ke ag vỠ tỠ ùn ón mé nỹti,” he ja tóg nĩgtĩ. “Mĩg jũ ri ke ag nỹti. Rănhrăj vănĥ ag nỹti, hã ra ag tóg jên mág tăvĩ han sór tĩ,” he ja tóg nĩgtĩ. ¹³Hã ra tóg ge nĩ. Hã kỠ ag jyvên tar han nĩ, ag tỠ Topê ki rã to tar nỹti jê. ¹⁴Ag mỠ: “Judeu ag tỠ vênh ó tó mũ jêmê sór tũg nĩ,” hemnĩ. KỠ ag tóg ag mỠ êpră ke jykre tó sór mũ gé, ù tỠ Topê vĩ há mẽ vănĥ ag. Êg mré ke ag mỠ ké, ag tỠ ù tỠ ge vĩ jêmê tũg jê. ¹⁵Ha vễ, ù tỠ vênh jykre kuryj han mũ mỠ tóg kuryj kar tĩ, jăvo ù tỠ vênh jykre pănô han mũ mỠ tóg pănô kar tĩ gé, ù tỠ ti ki ge tũ ag mỠ. Ag krĩ vỠ kórég nĩ, kỠ ag tóg ăjag jykre pănô to: “há ti nỹ,” he tĩ, jăvo ag tóg vênh jykre há to: “kórég ti nỹ,” he tĩ gé. ¹⁶“Topê ki kanhrô êg tóg nĩ,” he ag tóg tĩ, ón kỠ. Hã ra ag tóg ti jykre han vănĥ nỹti. Ag tỠ ti jykre han vănĥ ki êg tóg vég tĩ, ag ón mũ ti. Ũ tỠ ge to ti kórég nĩ, Topê ti, ag tỠ ti vĩ ki króm sór tũ pẽ nỹtĩn kỠ. Nén ù há han ki kagtĩg ag nỹti.

Vènh kar jyvèn há han nĩ

2 Ag jãvo Topê vĩ kãmén há han nĩ, ă tỹ ag jyvèn kỹ, Tito'. ²Kófa ag mỹ: “nén ũ há hã to jykrén nĩ,” hemnĩ. “Goj fa kron sór tũg nĩ. Nén há kar hã han sórmnĩ. Vêso jykrén nĩ. Ti ki rã há han kỹ nỹtĩmnĩ. Jagnê to há nỹtĩmnĩ. Ti to vãnh sór tũg nĩ,” hemnĩ, kófa ag mỹ.

³Kỹ kófa fag jyvèn nĩ gé. “Vêso jykrén nĩ,” hemnĩ fag mỹ. “Ũ to vĩ kónãn tũg nĩ. Vinho to én sór tũg nĩ. Vènh jykre há hã han nĩ, vènh kar tỹ ve jé. ⁴Kỹ ăjag tóg tátăg fag kanhrãn há han ke mũ,” hemnĩ fag mỹ. “Fag kanhrãn nĩ, fag tỹ ăjag mén to há nỹti jé, fag krê to, ⁵fag tỹ vêsô jykrén jé, nén ũ vènhmỹ han sór tũg jé, fag tỹ ăjag ĩn ki rĩr há han jé, vènh kar mỹ vĩ há han jé, fag tỹ ăjag mén vĩ mranh sór tũg jé, hemnĩ, tátăg fag mỹ,” hemnĩ, kófa fag mỹ. Fag tỹ tag han kỹ ũ tóg Topê vĩ to é henh ke tũ nĩ, fag tũgrĩn.

⁶Kyrũ ag jyvèn nĩ gé. Ag mỹ: “nén ũ kar to jykrén há han nĩ, ăjag tỹ ăg tỹ nén to én tĩ ĩn han tũ nĩ je,” hemnĩ. ⁷Tag han nĩ gé, Tito', vènh kar tỹ ă jykre há tag ve kỹ ă kóm vènh jykre há han sór jé gé. ă tỹ ag kanhrãn kỹ ki hã tómnĩ. Kanhir kỹ vĩ tũg nĩ. ⁸Topê vĩ tó há han nĩ, ũ tỹ ă to: “kygnê ti huri,” he tũ nĩ jé. Kỹ ũ tỹ ăg kato tê mũ ag vỹ nén ũ tónh ke tũ nĩ. Kỹ tóg ag mỹ'a tĩnh mũ, ag tỹ ón kỹ ăg kato vĩ ja nĩn kỹ.

⁹Ũ mỹ rãnrhãj tĩ ag jyvèn nĩ gé. Ag mỹ: “ăjag patrão vĩ han nĩ,” hemnĩ. “Ti mỹ há ĩn han nĩ, ti tỹ ăjag mỹ vĩ há han jé. Ti vĩ kafãn tũg nĩ. ¹⁰Ti tũ pēju(g) tũg nĩ. Ti tũ ki rĩr há han nĩ, ti tỹ ă to vĩ kónãn tũ nĩ jé. ă tỹ ti tũ ki rĩr há han kỹ tóg Topê vĩ to vĩ há han ke mũ, ăg kren han tĩ ĩn vĩ to, ă patrão ti, ti tỹ Topê vĩ mề kỹ,” hemnĩ, ũ mỹ rãnrhãj tĩ ag mỹ.

¹¹Topê tóg ăg jagăgtãn sór mũ, ăprã ke kar ag, kỹ tóg ăg kren han sór mũ. Hã jé Jesus tóg kătĩg ja nĩ. ¹²Kỹ tóg ăg kanhrãn sór mũ gé, ăg tỹ ti kato tê tũ nĩ

jé, ăg tỹ nén ũ to én sór tĩ ĩn han tũ nĩ jé gé, ăg tỹ ga kri mũn kỹ. ăg kanhrãn sór tóg mũ, ăg tỹ vêsô jykrén jé, vènh jykre kuryj han jé, Topê jykre ti. ¹³Ti kătĩg ve sór ăg nỹtĩ, hã kỹ tóg ăg mỹ sér tĩ. Tỹ ti pã'i mág tăvĩ nĩ, Topê ti. Tar tăvĩ ti nĩ, ăg kren han tĩ tỹ Jesus Cristo ti ke gé. Ti ve jé ăg tóg ke mũ, kỹ tóg sĩnvĩ tĩnh mũ, sér pẽ. Hã kỹ tóg há tĩ, ăg tỹ tag ki mũ há han kỹ. ¹⁴ăg jagfỹ tóg ter ja nĩ, ti tỹ ăg jykre kórég ĩn kókén jé. Kỹ tóg ăg kykũg mũ, ăg jãnhkri nỹti jé. Kỹ ăg tóg tỹ ti tũ nỹtĩn mũ sir, vyr mỹ. ăg pi(jé) tỹ ũ tũ nỹti ha'. Ti tũ vỹ tỹ ăg nỹti, ăg tỹ vènh jykre há to tar nỹti jé.

¹⁵Tag kar tómnĩ, Tito'. Tỹ ag jyvèn tar han nĩ gé kejẽn. ă tũ vẽ mỹr, ă tỹ ag jyvèn ke ti, kỹ ũ jé ă to é he tũg.

Topê jykre

3 Ag mỹ: “governo vĩ jẽmẽmnĩ, ăg pã'i vĩ ti,” hemnĩ. “Ag vĩ ki króm nĩ. Ag tỹ nén ũ há to: han nĩ, hen kỹ han sórmnĩ, vêsýmér,” hemnĩ. ²“Ũ to vĩ kónãn tũg nĩ,” hemnĩ ag mỹ. “Ũ vĩ kafãn tũg nĩ. Vènh kar mỹ vĩ há han nĩ. Vènh kar mỹ komêr hã vĩmnĩ,” hemnĩ ag mỹ. ³Ha vé, vãsỹ ăg tóg kórég nỹti ja nĩgtĩ gé. Ki kagtũg nỹti ja ăg nĩgtĩ. Ti vĩ mranh ja ăg tóg nĩgtĩ gé. Văgfor mũ ja ăg tóg nĩgtĩ, kỹ ăg tóg ũ tỹ ón kỹ ăg mỹ vènh jykre tó mũ ĩn vĩ han ja nĩgtĩ gé. ăg tỹ nén to én mũ ĩn han kãn ja ăg tóg nĩgtĩ, nén ũ vènhmỹ kar ĩn ti. Vènh jykre pãno han ja ăg tóg nĩgtĩ. Jagnê tũ to én ja ăg tóg nĩgtĩ. ăg jykre kórég tag vỹ vènh kar mỹ kórég nĩ ja nĩgtĩ. Jagnê to jũgũ (ka)mẽ (pẽ) ja ăg tóg nỹtĩgtĩ. ⁴Vãhã ăg tóg ki kanhró nỹti, Topê tỹ ăg jagăgtãn kỹ, ăg kren han tĩ ti. Ti tỹ ăg to há nĩ mề ăg tóg vãhã. ⁵ăg pi(jé) vènh jykre kuryj han ja nĩgtĩ'. Hã ra tóg ge ra ăg jagăgtãn ja nĩgtĩ, hã kỹ tóg ăg kren han mũ sir. ăg han mãn ja tóg nĩ, ăg kygpe kỹ nỹtĩn kỹ. ă kuprĩg tỹ tóg ăg han mãn, kỹ ăg tăg nỹti ha. ⁶ăg mỹ tóg ă kuprĩg jẽnê, ti tỹ tỹ ăg jagrẽ nĩ jé. Jesus

Cristo hã tigrin tóg ti jênê, êg kren han tĩ ên hã tigrin. ⁷ Hã kũ tóg êg mĩ vênh pãte fón mũ sir. Ti tĩ êg jagãgtãn hã vê. Kũ tóg êg mĩ ã tũ tovãnh sór mũ. Hã tóg ja ti nĩ. Rĩr krĩg ja tũ ve jê êg tóg ke mũ. Êg tĩ tag ve jê tóg êg mĩ ã kuprĩg jênê.

⁸ Tag vỹ ki hã ke nĩ. Hã kũ vênh kar mĩ tómnĩ, ag jyvên to krónh ke tũg nĩ. Ủ tĩ Topê ki ge mũ ag jyvên há han nĩ, ag tĩ vênh jykre há hã han sór jê. Kũ ag tóg tag hã to vãsãn ke mũ. Tag vỹ há nĩ. Kũ tóg êg mĩ nén ù há han ke mũ gé, vênh jykre há ti.

⁹ Judeu ù ag tóg véké ón kũ vémén sór tĩ. Tag jêmê sór tũg nĩ. Ājag gufã ag jiji tóg sór ag tóg tĩ. Jagnê vĩ kafãn ag tóg tĩ. Kũ ag tóg Topê tĩ vãsỹ êg jyvên tĩ ên to jagnê vĩ kafãn mũ gé. Tag kar vỹ êg mĩ nén ù há han ke tũ nĩ. Nén ù tũ vê, tag ti, hã kũ jêmê sór tũg nĩ. ¹⁰ Ủ tĩ vỹrmỹ vênh jykre han sór kũ ti mĩ: “ke tũg ra,” hemnĩ. “Ke tũg ra,” he régre han nĩ, ti tĩ kãnhmar ã vĩ jêmêg tũ nĩn kũ. Tag pãte ti tovãnh nĩ, ti tĩ mẽ jãvãnh nĩn kũ. ¹¹ Ti jykre vỹ pãno tãvĩ nĩ. Topê vỹ mranh ti tĩ. Topê vỹ ù tĩ ge to: “kórég ti nĩ,” he tĩ.

Tito tĩ ne han ke ti

¹² Kejên sóg ã mĩ Ártemas jênê sór mũ, ke tũ nĩ kũ Tíquico ti. Ti tĩ ã tá jun kũ, vêsĩmér inh kukãm kãtig, cidade tĩ Nicópolis ra. Tá sóg kusa fĩn rãm ke mũ.

¹³ Zenas ki rĩr há han nĩ gé, lei to estudo han tĩ ên ti, kar kũ Apolo ti ke gé. Kũ, ag tĩ mũ mãn ken kũ ag mĩ vin nĩ, jãnkamy tĩ ag mĩ tũg ke mũ ên ti.

¹⁴ Kũ, êg mré ke kar ag jyvên há han nĩ, ag tĩ vênh rãnhřãj há to tar nỹtĩ jê. Kũ ag tóg ùn jagtar ag mĩ vin ke mũ gé, ãjag tĩ nén ù vênh kãpãm kũ. Tag ne há nỹnh mũ'. Êg tĩ Topê jykre han to ken hã vê, kũ tóg êg tĩ Topê mĩ nén ù kanê han ri ke nĩ sir.

¹⁵ Inh mré nỹtĩ kar ag vỹ ã mĩ êkrég tĩ. Kũ êg mré Jesus ki ge mũ kar ag mĩ: “ãjag mĩ ti êkrég tĩ, Paulo ti,” hemnĩ, êg to há nỹtĩ kar ag mĩ.

Topê mĩ sóg to vĩ tĩ, ti tĩ ãjag kar tar han jê.

Hã vê.

PAULO TỠ CARTA HAN: FILEMOM MỸ CARTA

1 Paulo tỡ rá vễ, inh, isỹ se kỡ jẻ ra rá vễ. Kỡ ẻg rẻgre tỡ Timóteo vỹ inh mrẻ rỏn mũ gẻ. Isỹ Filemom mỹ rỏn hỏ vễ. ỏ to hỏ tỏvỉ sỏg nỉ, Filemom'. Inh mrẻ ỏ tỏg Cristo rỏnhrỏj hỏn tỉ gẻ. ²Kỡ sỏg ẻg rẻgre tỡ ỏfia fi mỹ rỏn mũ gẻ, Arquipo mỹ ke gẻ, inh mrẻ Cristo rỏnhrỏj to vỏsỏn tỉ tag ti, kar kỡ sỏg ử tỡ Filemom ỉn krẻm vẻnh mỏn tỉ ag mỹ rỏn mũ gẻ, ử tỡ Topẻ vỉ mẻ jẻ vẻnh mỏn tỉ ag mỹ.

³ẻg jỏg tỡ Topẻ mỹ sỏg to vỉ tỉ, ti tỡ ỏjag tar hỏn jẻ, ti tỡ ỏjag krỉ kuprỏg jẻ, ẻg Senhor tỡ Jesus Cristo panh ẻn ti.

Filemom jykre

⁴Isỹ Topẻ mrẻ vẻmẻn kỡ sỏg ỏ mỉ ẻkrẻg tỉ, Filemom', kỡ sỏg ỏ to Topẻ mỹ vỉ hỏ hỏn tỉ. ⁵ẻg Senhor tỡ Jesus ki rỏ hỏ hỏn kỡ ỏ tỏg nẻji nỉ, hỏ kỡ ỏ tỏg nẻji Jesus ki ge kỡ nỷtỉ ag to hỏ tỏvỉ nỉ gẻ. Tag mẻ inh. ⁶Hỏ kỡ sỏg Topẻ mỹ to vỉ tỉ, ti tỡ ỏ krỉn hỏ hỏn jẻ, ỏ tỡ ti jykre hỏ mỉ tĩg ki kanhrỏ hỏ nỉ jẻ, ỏ tỡ ẻg mrẻ Cristo ki rỏ kỡ jẻn kỡ. Kỡ tỏg ỏ krỉ tỡ hỏ' hẻnh ke mũ, ỏ tỡ komẻ hỏ ti vỉ ki krỏm ki kanhrỏn kỏn jẻ. ẻg tỡ Cristo ki ge kỡ nỷtỉn kỡ ẻg tỏg vẻnh jykre sẻr to tar nỷtỉ.

⁷Jỏvỷ', inh fe tỡ mỏn ke ja ỏ nỉ, inh fe tỡ hỏ' he ja ỏ nỉ, ỏ tỡ iso hỏ tỏvỉ nỉn kỡ. Kỡ Topẻ ki ge kỡ nỷtỉ kar ag vỹ ỏ jykre ki kanhrỏ kar nỷtỉ. Kỡ ag fe tỏg mỏn ke mũ gẻ.

Paulo tỡ Onésimo jagfỷ vỉ

⁸Kỡ sỏg ỏ mỷ: “tag hỏn jẻ ỏ tỏg ke mũ,” hẻnh ke mũ vễ, ⁹hỏ ra sỏg ỏ mỷ vỉ tar hỏn sỏr tũ nỉ. Komẻ hỏ sỏg ỏ mỷ to vỉ sỏr mũ, ỏ tỡ iso hỏ nỉ tugrỉn tag hỏn jẻ, sỡ ỏ mỷ nẻn to vỉ sỏr mũ tag ti. Ha vẻ, kỏfa inh nỉ ha, inh, hỏ vỷ: Paulo, he mũ. Jesus Cristo tugnỉn sỏg se kỡ jẻ ha. ¹⁰ỏ mỷ sỏg inh kỏsin tỡ Onésimo jagfỷ vỉ sỏr

mũ. Inh kỏsin ri ke ti nỉ ha, ti tỡ isugrỉn Cristo ki rỏ kỡ, isỹ tag kỏ se kỡ jẻ hỏ ra. ¹¹Vỏsỡ tỏg ỏ tũ ki rỉr tỉ vẻ, hỏ ra tỏg ỏ mỷ nẻn ử hỏ hỏn ja tũ nỉgtỉ. ửri tỏg hỏ nỉ ha, kỡ tỏg ỏ tũ ki rỉr hỏ hỏn ke mũ ha, ti tỡ inh ki rỉr hỏ hỏn mũ tag ri ke.

¹²Sỡ ỏ mỷ ti jẻnẻnh ke vẻ. Inh fe vỷ tỡ ti nỉ. ¹³Hỏ kỡ sỏg ti jẻnẻ sỏr ja tũ nỉ vẻ, ti tỡ ỏ jẻgja ki inh ki rỉr jẻ, isỹ Jesus kỏme sẻr tugrỉn se kỡ jẻn ki. ¹⁴Hỏ ra sỏg ỏ mỷ ti jẻnẻnh ke mũ, isỹ ỏ mỷ: “mỷ hỏ, ti tỡ inh ki rỉr mũ tag ti?” he ja tũ nỉn kỡ. Isỹ ti tĩg kamẻg mũ ra tỏg ỏ tỡ inh ki rỉr mũ ri ke nỉ vẻ, hỏ ra ỏ tỏg ki kagtĩg nỉ vẻ, ỏ tỡ inh mỷ nẻn ử hỏ hỏn mũ tag ti. Hỏ kỡ sỏg ỏ mỷ ti jẻnẻnh ke mũ, ỏ tỡ ỏ tỡ nẻn hỏn sỏr mũ ẻn hỏn jẻ, vẻnh jykre hỏ ẻn ti.

¹⁵ỏ camarada ja vẻ, Onésimo ti, hỏ ra tỏg ỏ tovỏnh kỡ vẻnh pẻju kỡ vyr. Vẻnh pẻju sỉ hỏn tỏg, hỏ ra tỏg ỏ to vỷn ke mỏn ke mũ ha, isỹ ti jẻnẻn kỡ. Tĩg mỏn ke tũ ti nỉ ha. ¹⁶Ti tỡ vẻnh pẻju kỡ tỉ mũ ẻn kỏ tỏg tỡ ỏ camarada jẻ vẻ, hỏ ra tỏg tỡ ỏ jỏvỷ jẻ ha, ửri. ỏ to hỏ tỏvỉ tỏg jẻ ha, ti tỡ Cristo ki rỏ kỡ jẻn kỡ. Ti to sỏg hỏ tỏvỉ nỉ gẻ, kỡ tỏg ỏ tỡ ti to hỏ nỉ jẻ hỏ tỉ gẻ. ỏ camarada vỷ tỡ ti nỉ, hỏ ra tỏg tỡ ỏ jỏvỷ nỉ gẻ, kỡ tỏg ỏ tỡ ti to hỏ pẻ nỉn kỏn hỏ tỉ.

¹⁷Kỡ, ỏ tỡ iso hỏ nỉn kỡ ti mỷ komẻ hỏ vỉmỏn, ỏ tỡ komẻ hỏ inh mỷ vỉ ẻn hỏ hỏn nỉ, ti mỷ, ti tỡ inh jẻgja ki ỏ to jun kỡ. ¹⁸Ti mỷ ỏ tỡ nẻn ử pẻju kỡ ma vyr? Ti mỷ ỏ mỷ nẻv(e) jẻ? Kajỏm jẻ sỏg ke mũ, ti jagfỷ. ¹⁹Vẻsỏg ki sỏg ỏ mỷ rỏn mũ, inh, hỏ vỷ: Paulo, he mũ. Kajỏm jẻ sỏg ke mũ, ti nẻv(e) ti, ki hỏ sỏg tỏ mũ. Hỏ ra ỏ tỏg inh mỷ nẻv(e) jẻ gẻ, ỏ tỡ isugrỉn Jesus ki ra kỡ. ²⁰Ha vẻ, jỏvỷ'. Inh fe tỡ mỏn kemnỉ, inh mỷ hỏn nỉ, sỡ ỏ mỷ nẻn to vỉ mũ tag ti, ẻg tỡ jagnẻ mrẻ ẻg Senhor ki ge kỡ nỷtỉn kỡ. Inh fe tỡ hỏ' hemnỉ, ỏ tỡ tỡ inh mrẻ ke nỉn kỡ, ỏ tỡ inh mrẻ Cristo ki rỏ kỡ jẻn kỡ.

²¹ Isỹ ã mỹ nén to vĩ mũ tag han já ã tóg ke mũ, ki kanhró sóg nĩ. Hã kỹ sóg ã mỹ rán mũ. Isỹ ã mỹ nén to vĩ mũ tag kãfór han jé ã tóg ke mũ gé, ki kanhró sóg nĩ.

²² Kỹ inh jo inh nũr jafã ti kãn nĩ gé. Topẽ vĩ kãnhmar ãjag vĩ mẽnh ke mũ, hã kỹ sóg ãjag venh kãtĩg ke mũ, ha vemnĩ.

Ủ tỹ Filemom tá ke ag mĩ êkrég tĩ ag

²³ Epafra vĩ ãjag mĩ êkrég tĩgtĩ. Inh mré tóg se kỹ jẽ, Jesus Cristo tu-

grĩn. ²⁴ Marcos vĩ ãjag mĩ êkrég tĩ gé, Aristarco ti ke gé, Demas ti ke gé, Lucas ti ke gé. Inh mré ag tóg rãnhĩaj mũgtĩ, tag ag.

²⁵ Êg Senhor tỹ Jesus Cristo jé ãjag tar han kãn. Hã vẽ.

HEBREU AG MỸ CARTA

Topê kósín

1 Topê vỹ vāsỹ ãg jóg'jóg ve ag mré vēmén (ka)mē ja nĩgtĩ. Ag mỹ tóg tó mǎn', tó mǎn', he ja nĩgtĩ. Tĩ vĩ tó tĩ ag mỹ tóg tó ja nĩgtĩ, vāsỹ, ag tỹ vènh kar mỹ ti vĩ kāmén jé. ² Ūri tóg kakó ti ha, kurā tỹ ãgno ti, kỹ tóg ũri ã kósín jēnē, ti tỹ ãg mỹ Topê vĩ tó jé. Tĩ mré tóg nén ũ kar hyn han ja nĩgtĩ, Topê ti, ã kósín mré. Kỹ tóg ti mỹ nén ũ kar tag vin ke mũ gé. Tĩ hǎ mỹ tóg vin sór mũ, Topê ti, ã tũ kar ěn ti. ³ Ėg tỹ Topê kósín ve kỹ ãg tóg Topê tỹ tỹ ũn mág nĩ ki kanhró nĩtĩ. Tĩ ri ke pē ti nĩ, ti hǎ pē, tỹ ti Topēn hǎ ve nĩ, ti kósín ti. Tĩ vĩ vỹ tar nĩ, tỹ tóg ãg tỹ nén kar vég mũ tag ki rĩr tĩ, ã vĩ tỹ. Tĩ hǎ vỹ ãg tỹ Topê vĩ mranh ěn tỹ tũg' he tĩ, kỹ tóg ãg jǎnhkrig kỹ ãg fēg ke mũ. Ėg jagfy ter kar kỹ tóg Topê pēgja tá nĩ nĩ, ũn tỹ vènh kar tar kǎfór nĩ ěn pēgja tá, ti kósín ti.

Topê kósín tỹ Topê tỹ jēgnē jafǎ ag kǎfór nĩ

⁴ Topê kósín vỹ Topê tỹ jēgnē jafǎ ag kǎfór nĩ, kanhkǎ tǎn ag. Tĩ jiji vỹ ag jygyj kǎfór nĩ gé. Hǎ kỹ ãg tóg vég tĩ, ti tỹ ag kǎfór nĩ ti. ⁵ Topê pi(jé) ã tỹ jēnē jafǎ ag kǎ ũ mỹ: “inh kósín vỹ tỹ ã nĩ,” he ja nĩgtĩ. “Ūri hǎ sóg ã mỹ: tỹ inh ã panh nĩ, he mũ,” he ja tũ ti nĩ, Topê ti, ã tỹ jēgnē jafǎ ag kǎ ũ mỹ. Kỹ tóg ag kǎ ũ to: “tĩ panh vỹ tỹ inh nĩnh mũ, kỹ tóg tỹ inh kósín nĩnh mũ,” he ja tũ nĩ gé. Á kósín hǎ to tóg tag tó ja nĩ, Topê ti.

⁶ Á kósín ve ěn jēnē ja ti nĩ, ěg to, Topê ti. Á tỹ ti jēnēn kỹ tóg tag tó gé, ha mē: “isỹ jēgnē jafǎ ag vỹ ti krēm mũg ke kǎn mũ, ha vemnĩ,” he ja ti nĩ, Topê ti.

⁷ Hǎ ra ti tỹ jēgnē jafǎ ag to vènh jykre tag tóg rán kỹ nĩ, ha mē: “Topê vỹ ã tỹ jēgnē jafǎ ag tỹ kǎka ri ke han, kỹ tóg ag

tỹ pĩ gru ri ke han mũ gé, Topê ti,” he tóg mũ gé, Topê vỹ rán ki, kanhkǎ tǎn ag to.

⁸ Kỹ tóg ã kósín mỹ tag tó, ha mē: “Topê vỹ tỹ ã nĩ. Á tỹ tỹ pǎi mág nĩ vỹ tũg' henh ke tũ pē nĩ. Vènh jykre kuryj han ã tĩ, ã krēm ke kar ag mỹ. ⁹ Vènh jykre kuryj to ã há nĩ. Vènh jykre pǎno to ã jũ nĩ. Hǎ kỹ sóg ã kuprēg, isỹ tỹ Topê nĩn kỹ, isỹ tỹ ã pǎi nĩn kỹ. Á tỹ sóg ũn mág han, ã krēm ke kar ag kǎfór ã tóg nĩ. Á tỹ tỹ pǎi mág nĩ tugrĩn ã fe tóg mrin kenh ke mũ, vènh kar fe tỹ mrin ke kǎfór,” he ja tóg nĩ gé, Topê ti, ã kósín ti mỹ.

¹⁰ Kỹ tóg ti mỹ tag tó gé, ha mē: “ẽg tỹ nén (ũ) kar han ve ki ã tóg ga han, kanhkǎ ti ke gé, ã nĩgē tỹ. ¹¹ Tũg' he kǎn jé tóg ke mũ, ã tỹ nén han ja tag ti, jǎvo ã hǎ tóg tũg' henh ke tũ pē nĩ. Á tỹ nén han ja tóg ã sinsin kỹ kugnǎnh ke mũ, kur ri ke. ¹² Tĩ kǎnhpēn jé ã tóg (ke) mũ, ãg tỹ kur kónhpēn ri ke. Ėg kur kunũg ãg tĩ, ãg tỹ ũ kǎra rǎg jé. Tag ri ke han jé ã tóg ke mũ, ã tỹ han ja kar tag ti tỹ, ã tỹn kókén kỹ. Hǎ ra ã hǎ tóg tũg' henh ke tũ nĩ. Sin ke tũ pē ã tóg nĩ jǎvo, kófǎn ke tũ pē ã tóg nĩ jǎvo,” he ja tóg nĩ, Topê ti, ã kósín ti mỹ.

¹³ Hǎ ra Topê pi(jé) ã tỹ jēgnē jafǎ ag mỹ: “inh pēgja tá nĩ,” he ja nĩ. “Nĩ ra ver, inh pēgja tá, sỹ ã kato vĩ mũ ag tỹ ã krēm vin jé, kỹ ag se vē sir,” he ja tũ ti nĩ, ti tỹ jēgnē jafǎ ag mỹ. Á kósín hǎ mỹ tóg tag tó. ¹⁴ Topê tỹ jēgnē jafǎ ag vỹ vènh kuprĩg ri ke nĩtĩ, hǎ ra ag tóg Topê rǎnhřǎj ti han tĩ. Topê vỹ ag jēgnēg tĩ, ag tỹ ti tũ ag jy nĩgǎn jé, ũn krenkren ke mũ ěn ag jy.

Ėg tỹ Topê vỹ to é henh ke tũ

2 Hǎ kỹ tóg há tĩ, ěg tỹ ti vĩ mē kỹ ti jykre hǎ han kỹ, ěg tỹ tỹ prǎnh ke tũ nĩ jé. ² Topê tỹ jēgnē jafǎ ag vỹ vāsỹ Topê vĩ ma kāmũ ja nĩgtĩ. Hǎ ra ag tóg ki hǎ tó ja nĩgtĩ. Ū tỹ ag vĩ ki krov tũ ěn vóg

kónān ja ti nĩgtĩ, Topẽ ti. “Ũ tỹ ag vĩ mẽ sór tũ ěn ag vóg kónān jé sóg ke mũ,” he ja ti nĩ, hã kỹ tóg hã ra ke ja nĩgtĩ. ³Kỹ ěg tóg ũri kren ke tũ nĩ gé, ěg tỹ ti to é hen kỹ, ti tỹ ěg kren han sór mũ ra. Nén ũ mág pẽ vẽ mỹr, Topẽ tỹ ěg krenkren han sór mũ tag ti. ěg pã'i vĩ ã mré mũ ti ag mỹ tó vẽn, ti tỹ ěg kren han sór mũ tag ti. Ũ tỹ ti vĩ mẽg mũ ag vĩ ěg mỹ tó ja nĩgtĩ gég, ti tỹ ěg kren han sór tag ti, hã kỹ ěg tóg ki kanhró nỹtĩ ha. ⁴Kỹ Topẽ vĩ ũ tỹ ěg mỹ ti vĩ tó mũ ěn ag vĩ to: “há ti nĩ,” he ja nĩ gé, hã kỹ tóg ag tar han, ag tỹ ěg tỹ nén ũ han vãnh ěn hyn han jé, milagre ti, ěg tỹ vėsóg ki nén han ki kagtĩg ěn. Tag to ag tar nỹtĩ, Topẽ tỹ ag tãn kỹ, ũ tỹ ti vĩ tó tĩ ag. Kỹ tóg ag mỹ ã kuprĩg jẽnẽ gé. Ti hã ne to jykrén kỹ: “tag tar han jé sóg ke mũ, ěn to, kỹ sóg ũ ěn tar han ke mũ, ũ ũ to,” he ja nĩ, ti vĩ tó tĩ ag to, Topẽ ti.

Topẽ kósĩn tỹ ěg tỹ ũn mág han ke

⁵Topẽ vĩ nén (ũ) kar ěn han măn ke mũ, kỹ tóg tỹ ũ tãg nỹtĩn mũ. ěn kri pã'i vĩ tỹ ěg nỹtĩn mũ, ěg tỹ tỹ ěprã ke nỹtĩ ra. Ti tỹ jěgnẽ jafã ag pi(jé) tỹ ga tãg kri pã'i nỹtĩn mũ'. ⁶Hã kỹ ti vĩ tó tĩ ũ vĩ tag rán ja nĩ, ti vĩ rán ki, ha mẽ. Topẽ mỹ tóg: “tỹ ěg tóg nén ũ tũ nỹtĩ vẽ, ěg tỹ tỹ ěprã ke nỹtĩn kỹ, hã ra ã tóg ěg ki rĩr tĩ. ⁷Kỹ ã tóg prỹg pipir ki ã tóg ěg tỹ ũn kãsir han ja nĩ, kỹ ěg tóg ěn kã ã tỹ jěgnẽ jafã ag krēm nỹtĩ. Tag pãte ã tóg ěg tỹ ũn mág han ke mũ, ũn tar, pã'i mág tỹ ũn há nĩ ěn ri ke, ěg tỹ vẽn kar kri nỹtĩ jé. ⁸Kỹ ã tóg ěg krēm nén (ũ) kar vin kãn ke mũ,” he ja tóg nĩ, Topẽ mỹ, Topẽ vĩ tó tĩ ti.

Ha vé, Topẽ vĩ ěg krēm nén (ũ) kar vin ja nĩ, ěg tỹ tỹ nén (ũ) kar pã'i nỹtĩ jé. Kỹ nén (ũ) kar vĩ ěg krēm nỹtĩ. ěg krēm nỹtĩ tũ vĩ tũ tĩ. Hã ra ěg tóg ver vэг tũ nĩgtĩ, nén (ũ) kar tỹ ěg krēm nỹtĩ

ti. Ver tóg nén ũ ũ tỹ ěg tũ tũ nỹtĩ ven nĩ. ⁹Hã ra ěg tóg Jesus hã tỹ tỹ ũn mág nĩ ěn vэг tĩ, ũri, ti tỹ tỹ ũn há nĩ ěn, pã'i mág ri ke. Prỹg pipir ki Jesus tóg Topẽ tỹ jěgnẽ jafã ěn ag krēm ke ja nĩ, kanhkã tãn ěn ag krēm, kỹ tóg ěg kar jagfy ter ja nĩ, Topẽ tỹ ěg jagãgtãn kỹ. Kỹ tóg ũri tỹ ũn mág pẽ nĩ nĩ, ti tỹ ěg jagfy ter ja ěn tugrĩn.

¹⁰Topẽ vĩ tỹ nén (ũ) kar kri ke nĩ, kỹ nén (ũ) kar vĩ ti tugrĩn rĩnrĩr nỹtĩ. Hã kỹ tóg vẽnhmỹ tũ nĩ, Topẽ tỹ Jesus mỹ: “ã jagtar tugrĩn ã tóg tỹ ũn há tãvĩ ninh mũ,” hen kỹ. Hã jé Jesus tóg jagtar nĩ ja nĩgtĩ, ti tỹ tỹ ũn há tãvĩ ninh jé. Kỹ tóg ũn e krenkren han mũ sir. ěg jo tóg tĩg mũ sir, Topẽ krē kar ag jo, ěg tỹ ti ri ke há nỹtĩ jé gé, ěg tỹ Topẽ jamã sĩnvĩ ěn tá junjun jé, ti mré.

¹¹Ha vé, Jesus vĩ ěg tar han tĩ, ěg tỹ Topẽ vĩ mranh măn sór tũ nĩ jé. Kỹ ũ tỹ ěg tar han mũ vĩ ěg mré jóg pir nĩ, Jesus ti. Hã kỹ tóg ěg to: “inh jãvy ag, inh ve fag,” he mũ. ěg to tóg mỹ'ãg tũ nĩ. ¹²ěg to tóg: “inh jãvy ag mỹ sóg ã jiji tónh ke mũ, jóg,” he ja nĩ. “Ag rĩnve sóg ã tỹ tỹ ũn há nĩ ěn kãmén ke mũ, ã jé tó jé sóg ke mũ, ag to sóg mỹ'ãg ke tũ nĩ,” he ja tóg nĩ, Jesus ti, ěg to. ¹³Kỹ tóg: “Topẽ ki sóg rã kỹ jẽ,” he mũ gé. Kỹ tóg: “inh mré ke ag hã vẽ, Topẽ tỹ inh mỹ ũn vin mũ ag kar hã vẽ, fag ke gé,” he ja nĩ gé.

¹⁴Jesus mré ke ěn ag hã vĩ tỹ ěprã ke ag nỹtĩ, fag ke gé. Hã kỹ Jesus vĩ ag mré ke tỹ ěprã ke nĩ ja nĩ gé, hã kỹ tóg ěg jagfy ter ja nĩ. Ti tỹ Japo tũg ke vẽ, ã ter tugrĩn. Japo vĩ ěg tén sór to tar nĩ, hã ra Jesus vĩ ti tỹ tũ' henh ke mũ. ¹⁵Kỹ tóg ěg krenkren han ke mũ, ěg tỹ ěg ter ke kaměgměg kỹ. ěg ter ke tugrĩn ěg tóg nén (ũ) tỹ ěg tén ke mũ kar kaměg tĩ, nén (ũ) tỹ ěg vóg kónān tĩ kar ke gé. Hã ra Jesus tóg ěg krenkren han mũ, kỹ ěg tóg nén ũ kaměg măn ke tũ nĩ ha. ¹⁶Ti pi(jé) Topẽ tỹ jěgnẽ jafã ag krenkren han mũ', kanhkã tãn ag'. Abraão krē ag hã

krenkren han tóg mǔ, ag jóg mré hǎ, hǎ kǵ tóg rán kǵ nǐ. ¹⁷ Hǎ jé tóg ǎ jǎvy ag ri ke nǐ ja nǵtǐ, Jesus ti. Tǵ tóg ǎg hǎ pǐ ja nǵtǐ. ǎg tǵ nén (ǔ) kar han mǔ ve kǎn ja ti nǵtǐ, ǎg jagtar mré hǎ. Hǎ kǵ tóg ǎg jagfǵ vǎnh fǐg, kǵ tóg ǎg tǵ Topǐ vǐ mranh tǵ tǔ' he ja nǐ. Topǐ tǔ ki rǐr tǐ to pǎ'i mǎg tǵ vǎnh rǎnhrǎj han mǔ ǎn ri ke han ja ti nǐ, Jesus ti. Tǐ tǵ ǎg jagfǵ Topǐ tǔ ki rǐr nǐn kǵ tóg ǎg jagǎgtǎn tǐ. Ki rǐr hǎ han tóg tǐ gé, tǐ tǵ ǎg mré tǵ ǎprǎ ke ja nǐn kǵ. ¹⁸ ǎg mré tóg jagtar ja nǵtǐ, Jesus ti. Japo vǵ tǐ tǵ Topǐ vǐ mranh han sór ja nǵtǐ gé, ǎg ri ke, hǎ ra tóg mranh ja tǔ nǐ inhhǎ. Hǎ kǵ tóg ki kanhró nǐ, ǎg tǵ nén (ǔ) vég mǔ kar ki. Hǎ kǵ tóg tag kar to ǎg tar han ki kanhró nǐ inhhǎ.

Jesus tǵ tǵ Moisés kri ke nǐ

3 Inh kanhkǎ', Topǐ tǔ vǵ tǵ ǎjag nǵtǐ. Kǵ tóg ǎjag kuprǐg, ǎjag tǵ kanhkǎ tá ve jé. Hǎ kǵ Jesus mǐ ǎkrén nǐ. Topǐ vǵ tǐ fǐg. Kǵ tóg ǎg mǵ Topǐ tǔ ki rǐr tǐ to pǎ'i mǎg ǎn ri ke nǐ, ǎg tǵ tǐ ki rǎ kǵ. Tǐ hǎ kǎmén ǎg tóg tǐ gé. ² ǔ tǵ tǐ fǐg mǔ ǎn rǎnhrǎj han tóg tǐ, Moisés ri ke. Moisés vǵ Topǐ tǔ kar ki rǐr hǎ han ja nǵtǐ gé, Topǐ povo kar ki, tǐ ǐn krǐm ke kar fag ki. ³ Hǎ ra Jesus vǵ Moisés kǎfór nǐ. ǔ tǵ ǐn han tǐ vǵ ǔ tǵ ǐn ki rǐr tǐ ǎn kǎfór nǐ. Ri ke tǐ nǐ, Jesus tǵ Moisés kǎfór nǐ ti. ǎprǎ ke vǵ tǵ tǐ nǐ, Moisés tǐ, kǵ Jesus vǵ tǐ kǎfór nǐ. ⁴ Gǐr kar vǵ panh nǵtǐ gé. ǔ tǵ vǎnh kar han mǔ vǵ tǵ Topǐ tǐ nǐ. ⁵ Moisés vǵ Topǐ tǔ ag ki rǐr ja nǵtǐ, kǵ tóg ki rǐr hǎ han ja nǵtǐ. Topǐ camarada vǵ tǵ tǐ nǐ ja nǵtǐ, kǵ tóg Topǐ ǐn krǐm ke fag ki rǐr nǐ ja nǵtǐ. Hǎ ra tóg Cristo tǵ nén han ke ǎn kǎmén ja nǐ gé, Moisés ti. ⁶ Cristo vǵ tǵ Topǐ kósin nǐ, kǵ tóg Topǐ tǔ ag ki rǐr hǎ han tǐ, hǎ ra ag tóg tǵ tǐ tǔ nǵtǐ, tǐ ǐn krǐm ke kar ǎn ag, ǎ tǵ ǔn ki rǐr tǐ ag, fag ke gé. ǎg hǎ vǐ, tǐ tǔ vǵ tǵ ǎg nǵtǐ, tǐ ǐn krǐm ke vǵ tǵ ǎg nǵtǐ, ǎg tǵ tǐ to tar nǵtǐn kǵ, ǎg tǵ tǐ kǎmén hǎ han kǵ, tǐ tǵ ǎg mǵ sér nǐn kǵ, ǎg tǵ tá nén venh ke tǐ.

ǎg tǵ vǎnhkǎn ke

⁷ Tag tó tóg mǔ, Topǐ tǐ, ǎ kuprǐg tǵ, ha mǐ: “ǎjag tǵ ǔri inh vǐ mǐ kǵ vǎnh kutu han tǔg nǐ,” he tóg. ⁸ “ǎjag jóg'jóg ve ag vǵ vǎnh kutu han ja nǵtǐ, kǵ ag tóg inh kato vǎsǎn ja nǵtǐ, ag tǵ ga kórég ki nǵtǐn kǵ,” he tóg, Topǐ tǐ. ⁹ “En kǎ ag tóg iso vǐ pǎtigtn ja nǵtǐ gé. “ǎg tǵ tǐ vǐ mranh mǔ ra tóg ǎg vóg konǎn ke tǔ nǐ,” he ja ag tóg nǵtǐ, ag tǵ isǵ nén han mǔ ǎn ve ja ra, isǵ prǵg tǵ 40 (ke) ǎn ki ag ki rǐr hǎ han mǔ ra. ¹⁰ Hǎ kǵ sóg ag to jǔ ja nǐ. Ag to sóg: “kórég ag nǵtǐ,” hé. “Vǎnh jykre hǎ to jykrén tǔ ag tóg nǵtǐgtn,” he sóg. “Inh japry ve sór ja tǔ ag tóg nǵtǐ, inh jamǐn tǐ,” he sóg. ¹¹ Kǵ sóg ag to jǔ nǐn kǵ (sóg) ag to vǐ jǔ han kǵ tag tó, ha mǐ. “Sǵ ag vǎnhkǎn han ke vǐ vǐ, hǎ ra ag tóg iso vǐ jǔ han ja nǐ, hǎ kǵ ag tóg vǎnhkǎn han ke tǔ nǐ ha. Hǎ kǵ ag ri ke han tǔg nǐ, ǎjag tǵ ǔri inh vǐ mǐ kǵ, he sóg mǔ,” he tóg, Topǐ tǐ.

¹² Inh kanhkǎ, tag to jykrén, ǎjag tǵ Topǐ kato vǎsǎn sór tǔ nǐ jé, ǎjag tǵ tǐ vǐ mranh sór tǔ nǐ jé gé, ǎjag tǵ Topǐ tovǎnh sór tǔ nǐ jé. Tǐ hǎ ne ǎg rǐnrǐr han ki kanhró nǐ', Topǐ tǐ. Hǎ kǵ tǐ tovǎnh tǔg nǐ. ¹³ Jagnǐ jyvǎn nǐ, kurǎ kar ki, ǔri mǵr. ǎjag tǵ jagnǐ jyvǎn to tar nǵtǐn kǵ ǎjag tóg Topǐ to tar nǵtǐnh ke mǔ gé, ha vemnǐ, kǵ ǎjag kǎmǐ ǔ vǵ vǎnh kutu han ke tǔ nǐ. ǎg tǵ tǐ vǐ mranh kǵ ǎg tóg kutu nǵtǐ, ha mǐ, tǐ vǐ mranh tǵ ǎg mǵ sínvǐ nǐn kǵ. ¹⁴ Ha mǐ, Cristo tǔ vǵ tǵ ǎg nǵtǐ, ǎg tǵ tǐ tovǎnh sór tǔ nǵtǐn kǵ. ǎg tǵ tǐ ki rǎ ve kǎ ǎg tóg tǐ to tar nǵtǐ ja nǵtǐ. ǎg tǵ ǎn ri ke tǐ to tar nǵtǐn kǵ ǎg tóg tǵ tǐ tǔ nǵtǐ. ¹⁵ Hǎ kǵ tóg ǎg mǵ: “ǎjag tǵ ǔri inh vǐ mǐ kǵ vǎnh kutu han tǔg nǐ,” he mǔ. ǎjag jóg'jóg ve ag vǵ tóg vǎnh kutu hyn han' he ja nǵtǐ, kǵ ag tóg inh kato vǎsǎnsǎn, isǵ ag jykre ve sór ja nǐn kǵ. Ag ri ke han sór tǔg nǐ,” he tóg mǔ ǎg mǵ. ¹⁶ ǔ tǵ hǐ nǵ hǐn tǐ vǐ mǐ kǵ tǐ kato vǎsǎnsǎn ja nǵtǐ? ǔ tǵ ga tǵ Egito tá kǎ

pa ja ên ag hã ja vê, ha mẽ, Moisés tỹ tá ag tatĩn kãtig kỹ. ¹⁷ Kỹ Topê hỹn ù tỹ hẽ to jũ ja nĩgtĩ, prỹg tỹ 40 (ke) ên ki? Û tỹ ti vỹ mranh ja ên ag hã to tóg jũ ja nĩ, hã kỹ ag tóg ga kórég ên ki tũ' he kãn. ¹⁸ Kỹ Topê hỹn ù tỹ hẽ to: “vẽnhkãn ke tũ ag nỹti ha,” he ja nĩgtĩ? Û tỹ ti vỹ han sór tũ ên ag to ke ja vê, mỹr, ha mẽ. ¹⁹ Ag tỹ ti továnh kỹ, hã kỹ ag tóg ag tỹ nén ve sór ja ên ve ja tũ nĩ sir, mỹr, ha mẽ.

4 Topê vỹ êg mỹ tag tó ja nĩgtĩ gé. Ti tỹ êg vẽnkhãn han sór vê, kỹ ti vỹ to é he tũg nĩ. Vẽn ki rĩr há han nĩ, ãjag tỹ to krónh ke tũ nĩn jé. ² Mẽ êg huri, Topê tỹ êg mỹ nén han sór mũ ên ti, ù tỹ ga kórég mĩ mũ ên ag tỹ mẽ ri ke han êg tóg huri. Hã ra ag tóg véké mẽ ja nĩgtĩ, kri fi ja tũ ag nỹtĩgtĩ, ag tỹ mẽg mũ ra. Hã kỹ tóg ag mỹ nén ù há han ja tũ nĩ, Topê vỹ ti. ³ Êg tỹ ti ki ge hã kỹ êg tóg vẽnkhánkãn ke mũ. Hã kỹ Topê vỹ tag tó, ha mẽ: “ag to jũ nĩn kỹ sóg ag to vỹ jũ han kỹ tag tó, ha mẽ. “Sỹ ag vẽnkhãn han ke vê vê, hã ra ag tóg vẽnkhãn ke tũ nỹti ha,” he ja ti nĩ. Topê vỹ vãsỹ vẽnkhãn ja nĩgtĩ, ti tỹ nén (ũ) kar pẽ han han ti kỹ. Kỹ nén (ũ) kar vỹ hỹn han kỹ nỹti ha. ⁴ Hã kỹ kurã tỹ 7 (ke) ên to tag tóg rãn kỹ nĩ, ha mẽ. Topê tỹ nén kar hỹn han kãn ja to tag tóg rãn kỹ nĩ, ha mẽ: “kurã tỹ 7 (ke) ki Topê vỹ vẽnkhãn, ã rãnrhãj han kãn kỹ,” he tóg mũ, Topê vỹ rãn ki. ⁵ Hã ra tóg Israel ù ag to tag tó ja nĩ gé, hã vỹ: “kỹ ag tóg vẽnkhánkãn ke tũ nỹti ha,” he mũ gé. ⁶ Hã kỹ ù ag tóg vẽnkhánkãn ke mũ. Vãsỹ Topê tóg êg jóg'jóg ve ag mỹ ag vẽnkhánkãn ke tag tó ja nĩgtĩ vê, hã ra ag tóg ti vỹ jẽmẽ ja tũ nĩgtĩ, hã kỹ ag tóg vẽnkhánkãn ke tũ nỹti ha. Kỹ Topê tóg ù ag kuprẽg ja nĩgtĩ, kỹ tóg ag hã mỹ ag vẽnkhánkãn ke ti nĩm mũ sir, êg hã mỹ. ⁷ Kurã tãg nĩm ja ti nĩ gé, êg vẽnkhãn ke to, hã vỹ: “ũri,” he mũ. Hã kỹ Davi tóg kurã tãg tag to tag rãn ja nĩ, ha mẽ. Ag tỹ ga kórég ên tá kãpa kar kỹ, ag tỹ ga há tá junjun kar kỹ Davi tóg tag rãn ja nĩ

gé, ha mẽ: “ãjag tỹ ũri ti vỹ mẽ kỹ vẽnh kutu han tũg nĩ,” he ja tóg nĩ. Kurã tãg to ken hã vê.

⁸ Josué vỹ Israel ag mré ga há ên ra tĩg ja nĩgtĩ. Hã ra ag tóg tá vẽnkhãn pẽ han ja tũ nĩgtĩ ver, hã kỹ Davi vỹ ag mỹ kurã ù tó ja nĩ, ag vẽnkhãn pẽ han ke ên ti tó ja ti nĩgtĩ. ⁹ Ha mẽ, Topê povo vỹ vẽnkhãn ke mũ, ha vemnĩ, ti tỹ ag mỹ kurã niv ki. ¹⁰ Û tỹ vẽnkhãn pẽ ên vэг mũ vỹ ã rãnrhãj ki vẽnkhãn ke mũ, Topê tỹ ã rãnrhãj ki vẽnkhãn mũ ên ri ke, kurã tỹ 7 (ke) ên ki. ¹¹ Hã kỹ vãsãnsãn, ãjag tỹ tỹ prãnh ke tũ nĩ jé, ãjag tỹ ga kórég kri mũ ja ên ag nón ti vỹ mranh tũ nĩ jé, ãjag tỹ ãjag vẽnkhãn ke ên ve jé.

¹² Topê vỹ hã tũgrĩn êg tóg rĩnrĩr nỹti. ã vỹ hã tỹ tóg nén kar hỹn han ti. Rógro jã régre vỹ nén (ũ) kym há nỹgtĩ. Hã ra Topê vỹ vỹ ti tỹ nén (ũ) kym há kãfór han ti, kỹ ti vỹ tóg êg kãra rã ti, êg nĩ ti kãra, êg kukã ti kãra ke gé, êg krĩ ti kãra ke gé, êg kuprĩg ti kãra tóg rã ti gé. Kỹ tóg êg tỹ nén (ũ) to jykrén mũ kar ki kanhró nĩ, êg tỹ nén (ũ) han sór mũ ki kanhró kar ti nĩ gé, Topê ti. ¹³ Nén (ũ) kar ki kanhró tóg nĩ, Topê ti, ã tỹ nén han mũ kar ki kanhró tóg nĩ. Nén ù tóg ti mỹ vẽnh péju kỹ nĩ tũ pẽ nĩ. Û tóg ti vatánh tá nén ù han ke tũ pẽ nĩ gé. Ki kanhró kar ti nĩ, ù tỹ êg jykre tũgnỹm ke mũ ên ti.

Jesus tỹ êg jagfỹ vĩnh ke

¹⁴ Ti to tar nỹtimnĩ, ha mẽ. Ti ki rã kỹ ãjag nỹti, kỹ ti to tar nỹtimnĩ. Êg jagfỹ Topê tũ ki rĩr ti to pã'i mág vỹ nĩ nĩ, hã vỹ: Jesus, he mũ, Topê kósin, he mũ. Ên vỹ kanhkã tá jun huri. ¹⁵ Ti pi(jé) êg krój nỹti tag ki kagtĩg nĩ. Ki kanhró tóg nĩ mỹr. Êg ri kén tóg jagtar nĩ ja nĩgtĩ gé, kỹ Japo vỹ ti tỹ Topê vỹ mranh han sór ja nĩgtĩ gé, hã ra tóg inhhã mranh ja tũ nĩgtĩ. ¹⁶ Hã kỹ êg tóg Topê mré vẽnén ke mũ, jatun mỹ. Mũmẽg vãn h nỹti jé êg tóg ke mũ. Êg jagãgtãn jé tóg ke mũ, Topê ti,

kỹ tóg ẽg tar han ke mũ gé, ẽg krój nýtĩn kỹ.

5 Ẽprã ke tỹ Topẽ tũ ki rĩr tĩ to pã'i mág jykre vỹ ge nýtĩ, ha mẽ. Ẽ mré ke ag jagfỹ tóg vỹ tĩ, Topẽ mré, kỹ tóg ag jagfỹ Topẽ mỹ nén ù pũn tĩ gé, kỹ tóg ag mẽg tãnh kỹ pũn tĩ gé, ag tỹ Topẽ vỹ mranh ja tugrĩn. ²Hã ra tóg tỹ ẽprã ke nĩ gé, ag mré, ag krój ri ke tóg nĩ gé, hã kỹ tóg ag krój nýtĩ ra ag jagãgtãn há han tĩ, ù tỹ Topẽ vỹ mranh sór tũ ra mranh mũ ẽn ag. ³Mranh tóg tĩ gé, Topẽ tũ ki rĩr tĩ to pã'i mág ẽn ti, hã kỹ tóg ã tỹ mranh mũ ẽn to Topẽ mỹ tãnh kỹ pũn tĩ gé, ã mré ke ag tũ ẽn mré. ⁴Hã ra tóg vëso: “inh hỹn Topẽ tũ ki rĩr sór mũ, kỹ inh hỹn tỹ tag to pã'i mág nĩnh mũ,” henh ke tũ pẽ nĩ. Topẽ hã ne ù to: “isũ ki rĩr tĩ to pã'i mág vỹ tỹ ã nĩnh mũ,” he tĩ, ti tỹ vãsỹ Arão kuprẽg vẽn ẽn ri ke.

⁵Hã kỹ Cristo vỹ vësóg ki tag to jykrén ja tũ nĩ gé. Ti pi(jé) vësỹ pã'i han ja nĩgtĩ, vësỹ Topẽ tũ ki rĩr tĩ ẽn to pã'i mág han sór ja tũ tóg nĩgtĩ. Topẽ hã ne ti mỹ: “inh kósĩn vỹ tỹ ã nĩ,” he ja nĩ. “Ủri sóg ã mỹ: tỹ inh ã panh nĩ, he mũ,” he ja ti nĩ, Topẽ ti, Jesus mỹ. ⁶Kỹ tóg ti mỹ tag tó gé, kỹ tóg rãn kỹ nĩ gé, Topẽ vỹ tỹ rãn kỹ nĩ ki, ha mẽ: “isũ ki rĩr jé ã tóg ke mũ. Tũl henh ke tũ ti nĩnh mũ, ã tỹ isũ ki rĩr nĩ ti, Melquisedeque tỹ isũ ki rĩr mũ ẽn ri ke,” he ja ti nĩ gé, Cristo mỹ, Topẽ ti.

⁷Jesus vỹ, ã tỹ ga mĩ tĩg kỹ jagtar nĩn kỹ (tóg) Topẽ mỹ to vĩ, to vĩ he ja nĩgtĩ, ti tỹ ti kren han jé, ti ter tũ nĩ jé. Kỹ tóg fỹ gé, Topẽ mré vēmén kỹ. Vësỹrẽnh jagy han tóg. Kỹ Topẽ vỹ ti vỹ jēmẽ ja nĩ, Jesus tỹ ti mỹ to vĩn kỹ. Topẽ mỹ tóg tỹ ùn há nĩ, Jesus ti, hã kỹ tóg ti vỹ jēmẽ ja nĩ. ⁸Topẽ kósĩn vỹ tỹ ti nĩ, Jesus ti, hã ra tóg ã jagtar tugrĩn (tóg) Topẽ tỹ nén tó mũ ki kanhrãn kãn ja nĩ, ti tỹ Topẽ vỹ hã han jé. ⁹Ti tỹ vẽnh kanhrãn kãn kỹ tóg ẽg kren pẽ han ki kanhró nĩ ge sir. Ẽg jagfỹ tóg ter ja nĩ, kỹ tóg ẽg kren han mũ, ẽg tỹ ti vỹ ki króm kỹ. ¹⁰Topẽ vỹ ti

mỹ: “inh mỹ isũ ag ki rĩr mĩnĩ, to pã'i mág vỹ tỹ ã nĩ, Melquisedeque ẽn ri ke,” he ja nĩ. Hã kỹ tóg tỹ pa'i nĩ, Jesus ti.

Ẽg tỹ ti to krónh kenh ke tũ

¹¹Sỹ ãjag mỹ tag kãmén kãn sór mũ ra tóg jagy tĩ. Tó jagy ti tĩ, tag ti. Kỹ ãjag tóg mẽ há han tũ nĩgtĩ gé. Ẽjag pi(jé) křĩ há nýtĩ ver'. ¹²Ẽjag tỹ ù ag kanhrãn ke vẽ vẽ, ãjag tỹ vãsỹ Topẽ vỹ mẽ ja nýtĩn kỹ. Hã ra ãjag tóg ver ki kagtĩg nýtĩ. Ẽjag kã ù tỹ ãjag mỹ Jesus kãmén vẽn ẽn tó mãn kỹ tóg há nỹnh mũ vẽ. Gĩr kãsir ri ke ãjag nýtĩ. Gĩr kãsir ag vỹ leite hã kron tĩ, ãjag tỹ ver kãsir nýtĩn kỹ. ¹³Jãvo ùn sanh ag hã vỹ vễjẽn kufy ko tĩ. Gĩr tỹ leite kron mũ ri ke ãjag nýtĩ, ãjag tỹ Jesus kãmẻ ẽn ki kanhrãn kãn tũ nýtĩn kỹ ver. ¹⁴Ủ tỹ to jykrén há han mũ ẽn vỹ ùn sanh há ri ke nĩ, kỹ tóg ki kanhró nĩ. “Tag vỹ há nĩ, tag vỹ há tũ nĩ, tag vỹ kuryj nĩ, jãvo tag vỹ kygnẽ kỹ nĩ,” he jé tóg ke mũ, ù tỹ ki kanhrãn há han mũ ẽn.

6 Ẽjag tỹ ver gĩr kãsir ri ke nýtĩ ra sóg ãjag mỹ Jesus kãmén vẽn ja ẽn tó sór tũ nĩ ha. Sỹ ãjag mỹ ùn sanh ag tũ kãmén sór vẽ ha, ãjag tỹ ver to tar nýtĩ tũ ra. Jesus kãmén vẽn jã ẽn hã vẽ, gĩr tỹ ã pafa ja kron ẽn ri ken hã vẽ, ha mẽ: vẽnh jykre kórég to vãnh jé ẽg tóg ke mũ, ẽg tỹ nén to ter ke mũ ẽn to vãnh kãn jé ẽg tóg ke mũ. Topẽ ki rã jé ẽg tóg ke mũ. ²Ủ tỹ ti ki rã mũ ẽn kype jé ẽg tóg ke mũ, kỹ ẽg tóg ti kri ẽg nĩgẻ finh ke mũ gé, ti tỹ ẽg mrẻ Jesus ki rã kỹ jẻ jẻ. Kar kỹ ẽg tóg ẽg ter kar kỹ rĩr mãn ẽn to jykrén ke mũ gé, Topẽ tỹ ẽg jykre tugnỹm ke ẽn to. Vẽnh kãmẻ tag kar vỹ gĩr tỹ ã pafa ja kron ẽn ri ke nĩ. ³Tag tó mãn sór tũ inh nĩ ha, ãjag tỹ vãsỹ mẽ ja tag. Sỹ ãjag mỹ tag pãte Jesus kãmén sór vẽ, kỹ tóg ùn sanh tỹ vễjẽn kufy ko ẽn ri ke nĩ. Topẽ tỹ tag to isar han kỹ sóg ãjag mỹ kãmén há han ke mũ.

⁴Ha mẽ, ẽg kãmĩ ù ag tóg ag tỹ Topẽ ki rã kar kỹ (ag tóg) ti to vãnh pẽ han ja

nĩgtĩ. Kĩ ag tóg ti ki ge mǎn ke tũ nĩtĩ ha. Ēg tỹ Topē ki ge kũ tóg ěg kanhrǎn ke mũ, vėnh jykre há ki. Topē vỹ ěg mỹ kanhkǎ tá vėnh jykre há ěn nĩm mũ. Ēg mỹ tóg ǎ kuprĩg jėnėg mũ gé. ⁵ Topē vỹ há nĩ ěn vėg ěg tóg tĩ. Ēg tỹ kanhkǎ tá nėn venh ke ěn ve sĩ han ěg tóg tĩ, ěprǎ, ěg tỹ Topē ki ge kũ. ⁶ Ũ tỹ ti jykre tag ve kar kũ ti tovǎnh pė han kũ tóg vėnhmỹ nĩ. Kũ tóg ti ki rǎ mǎn ke tũ nĩ ha, ǎ jykre kórėg tovǎnh mǎn ke tũ ti nĩ ha, ũ tỹ ti tovǎnh pė han mũ ěn ti. Ha vé, ěg tỹ ti ki rǎ há han kar kũ ti tovǎnh kũ ěg tóg ti tỹ cruz to sa mǎn ri ke han mǎn mũ sir, Topē kósın ti. Ēg tỹ vėnh kar tỹ ti to é he han mǎn vė sir.

⁷ Ēpỹ ri ke ti nĩ, ha mẽ. Ta tỹ ti kri kutė kũ ga mrǎn kũ ěg jakré tóg mog há han tĩ, ěg tỹ ga há ki ti krǎn ti kũ. Ēg tỹ ěpỹ há ri ke nĩtĩn kũ, ěg tỹ Topē mỹ vėnh jykre há han kũ tóg ěg ve há han mũ, Topē ti. ⁸ Ēpỹ ũ tóg hǎ ra kórėg nĩ. Kũ sónh hǎ tóg ki munmur tĩ, vǎnh ti ke gé, kũ tóg mogmog kónǎn tĩ sir, ěg jakré ti. Ēg tỹ ěpỹ kórėg ěn ri ke nĩtĩn kũ Topē vỹ ěg tovǎnh ke mũ sir, kũ tóg ěg mỹ vỹ kónǎn han ke mũ, kũ ěg kejėn pũr ke mũ, kurǎ ěn kǎ.

⁹ Ha mẽ, vỹ tar han inh huri. Hǎ ra ǎjag tóg ti jagy tag venh ke tũ pė nĩ, ki kanhró inh nĩ. ǎjag to sóg há nĩ. Krenkren jė ǎjag tóg ke mũ, ki kanhró inh nĩ. ¹⁰ Rǎnhrǎj há han ǎjag tóg tĩ. Ti to ǎjag há tǎvĩ nĩtĩ. Ti tũ ki rĩr há han ǎjag tóg tĩ gé. Topē vỹ tag vėg tĩ, ǎjag rǎnhrǎj há tag. Ti pi(jé) kǎ jatu nĩgtĩ. Vėnh jykre vėnhmỹ han tũ pė ti nĩgtĩ, Topē ti. ¹¹ Hǎ ra sóg ǎjag mỹ tag tó, ǎjag tỹ ti to tar tǎvĩ nĩtĩ jė, ǎjag tỹ ti to krónh ke tũ nĩ jė. Kũ ǎjag tóg venh ke mũ, ǎjag tỹ nėn (ũ) ve sór mũ ěn ti. ¹² ǎjag tỹ ti to krónh ken kũ tóg kórėg nĩ. Ũ tóg ěg jo Topē ki rǎ ja nĩgtĩ, hǎ ra ag tóg ti tovǎnh ja tũ pė nĩgtĩ, kũ ag tóg hur vé, Topē tỹ ěg mỹ nėn ven sór mũ ěn ti. Tag ag ri ke han nĩ, ũ tỹ ěg jo ti tovǎnh jǎvǎnh ěn ag ri ke han nĩ.

Topē tỹ ǎ vỹ ěn han kǎn ke

¹³⁻¹⁴ Topē vỹ Abraão mỹ: “ǎ to vỹ há han jė sóg ke mũ, ǎ krė e han jė sóg ke mũ,” he ja nĩ. Kũ tóg ti mỹ: “ǎ pi(jé) tag venh ke tũ nĩ, inh hǎ vỹ ki kanhró nĩ,” he ja nĩ gé. Ũ tỹ ti kǎfór nĩ ra tóg ěn to: “ti hǎ vỹ ki kanhró nĩ,” henh ke vė vė. Hǎ ra ũ tóg Topē kǎfór nĩ tũ nĩ, hǎ kũ tóg: “inh hǎ vỹ ki kanhró nĩ,” he ja nĩ, Topē ti. ¹⁵ Kũ Abraão vỹ Topē tỹ ti mỹ nėn tó ja tag to tar nĩ ja nĩgtĩ gé. Jatun mỹ tóg ǎ kósın ke ěn jǎvǎnh ja nĩgtĩ, hǎ kũ tóg kejėn ti vé.

¹⁶ Ēprǎ ke ag vỹ, ag tỹ jagnė mỹ vỹ há han sór kũ ag tóg jagnė mỹ: “inh kri nĩ ěn vỹ ki kanhró nĩ, sĩ ǎ mỹ nėn han ke ti,” he tĩ. Tag tó kũ ag tóg jagnė jũ tỹ tũ he tĩ. Ũ tỹ tag tó kũ ag tóg ki kanhró nĩtĩ, ti tỹ ki hǎ tó ja ti. Ēprǎ ke ag jykre hǎ vė. ¹⁷ Vėnh jykre tag han ja ti nĩ, Topē ti, ti tỹ ěg mỹ ǎ vỹ jėnėn kũ. Ti tỹ ěg mỹ nėn tó ja ěn ve jė ěg tóg ke mũ. Ēg tỹ tag ki kanhrǎn há han hǎ jė tóg ěg mỹ: “ki kanhró inh nĩ,” he ja nĩ. Tó ũ han mǎn ke tũ ti nĩ ha. ǎ tỹ tó ja ěn hǎ han jė tóg ke mũ, ti tỹ: “ki kanhró inh nĩ,” henh kũ. ¹⁸ Ti vỹ régre to ěg tóg ki kanhrǎn há han tĩ. Ēg mỹ tó kar kũ tóg: “ki kanhró inh nĩ,” he ja nĩ gé. Ti vỹ régre hǎ vė. Hǎ kũ ěg tóg venh ke mũ, ti tỹ ěg mỹ nėn tó ja ti. Tó ũ han mǎn ke tũ ti nĩ ha, hǎ ra tóg ón ja tũ nĩ gé, ti tỹ ón ki kagtĩg nĩn kũ. Ti tỹ ěg mỹ nėn tó ja ěn ve sór ěg tóg mũ, hǎ vỹ: kanhkǎ, he mũ, hǎ kũ tóg ěg hǎ mỹ tó ja nĩ, Topē ti. ¹⁹ Ēg tỹ kanhkǎ ve sór kũ ěg tóg to krónh ke tũ nĩgtĩ. Ēg tỹ kanhkǎ tá ũn ve sór mũ hǎ vỹ ěg tar han tĩ, ěg tỹ tỹ prǎnh ke tũ nĩ jė. Tá jun jė ěg tóg ke mũ, ha vemnĩ, Topē jamǎ tá. ²⁰ Jesus vỹ tá jun vén, ěg jo, kũ tóg ěg mỹ Topē to ěpřy ti han, Topē to ěmĩn ti. Ēg jagfỹ tóg tỹ Topē tũ ki rĩr tĩ to pǎi mág nĩ, Melquisedeque ěn ri ke. Kurǎ krỹg ja tũ ti nĩ, ti tỹ tỹ pǎi nĩ ti. Kũ

tóg êg jo Topê rinja tá nĩ nĩ, êg tĩ ti nón tá junjun jé gé.

Melquisedeque kãme

7 Melquisedeque ên vỹ tỹ pã'i mág nĩ ja nĩgtĩ, cidade tỹ Salém kri, kỹ tóg Topê tũ ki rĩr nĩ ja nĩgtĩ gé, ù tỹ vênh kar kri ke nĩ ên tũ ki. Abraão vỹ pã'i tỹ 4 (ke) ên mré vênh génh han ja nĩ. Ti tỹ ag kãgtén kar kỹ Melquisedeque ên vỹ ti kato tẽ, kỹ tóg ti mỹ: “Topê vỹ ã ve há han, kỹ tóg ã ve há han măn ke mũ gé,” he mũ. ²Kỹ Abraão vỹ ti mỹ dízimo ên nĩm mũ sir, ã tũ tỹ 10 (ke) kar ki tóg ùn pir nĩm mũ sir, Melquisedeque mỹ, ti tỹ ùn kato tẽ mũ ên ag tũ măn ja tỹ dízimo ên ti. Ti jiji to ken hã vẽ, hã vỹ: vênh jykre kuryj to pã'i, he mũ, hã vỹ: Melquisedeque, he mũ. Kỹ tóg tỹ cidade tỹ Salém to pã'i nĩ, hã vỹ: ùn krĩ kuprã ên ag pã'i, he mũ. ³Panh tũ ti nĩ, mỹnh tũ ke gé, jóg'jóg ve tũ ti nĩ gé. Û ki mur já tũ ti nĩ, kỹ tóg ter ja tũ nĩ gé. Topê kósín ri ke ja ti nĩ. Topê tũ ki rĩr kỹ tóg nĩ nĩ, ti kurã vỹ krỹg ja tũ nĩ, Melquisedeque kurã ti.

⁴Pã'i mág pẽ vẽ, Melquisedeque ti, hã kỹ Abraão vỹ ti mỹ ã tũ tỹ dízimo nĩm ja nĩ gé. Hã ki êg tóg ki kanhró nỹtĩ, ti tỹ Abraão kãfór nĩ ti, Melquisedeque ti. ⁵ Û tỹ Israel ag kãmĩ dízimo mág ti ag vỹ tỹ Levi krê nỹtĩ, ù tỹ Topê tũ ki rĩr tĩ ên ag. Ājag mré ke ki ag tóg dízimo ên mág tĩ, ag kar tỹ tỹ Abraão krê'krê nỹtĩ ra. ⁶Hã ra Melquisedeque pi(jé) tỹ Abraão mré ke nĩ ja nĩgtĩ. Ge ra Abraão tóg ti mỹ dízimo ên nĩm ja nĩ, kỹ tóg ti mỹ: “Topê vỹ ã ve há han,” he mũ gé, Melquisedeque ti, Abraão mỹ, Topê tỹ Abraão mré vēmén kar kỹ, Topê tỹ ti mỹ: “ã kófa ra ã kósín ke mũ,” he kar kỹ. ⁷Kỹ tóg Abraão kãfór nĩ, Melquisedeque ti, ti tỹ ti mỹ: “Topê vỹ ã ve há han,” hen kỹ. Ti kri ke vỹ tỹ ti jẽ.

⁸Levi krê'krê ên vỹ tỹ êprã ke nỹtĩ gé, ù tỹ ājag mré ke ki dízimo mág ti ên

ag. Hã ra Melquisedeque vỹ ter ja tũ nĩ nẽji, hã kỹ tóg rán kỹ nĩ, Topê vỹ tỹ rán kỹ nĩ ki. Ûn ter tũ vỹ Abraão ki dízimo măn ja nĩ, hã vỹ: Melquisedeque, he mũ. ⁹Kỹ, Abraão tỹ ti mỹ dízimo nĩm ên kã tóg ã krê'krê kósín tỹ Levi jagfy ti mỹ dízimo nĩm ja nĩ gé, Melquisedeque mỹ. Hã kỹ Levi krê'krê ag vỹ ājag mré ke ag ki dízimo ve ja nĩgtĩ gé sir. ¹⁰Abraão tỹ Melquisedeque mỹ dízimo nĩm ên kã Levi vỹ mur ja tũ nĩ ver, hã kỹ ti jóg'jóg ve tỹ Abraão vỹ ti jagfy dízimo nĩm ja nĩ. Nĩm kar kỹ tóg kejên Levi vovo han mũ sir, Abraão ti, Melquisedeque tỹ ti mré vēmén kar kỹ.

¹¹Topê tỹ Levi krê'krê ag mỹ: “isũ ki rĩrmnĩ,” he ên kã tóg ag mỹ tag to vênh jykre nĩm ja nĩgtĩ gé, ag tỹ ki rĩr ke to. Ag hã tỹ ki rĩr há han ke vẽ vẽ, hã ra ag tóg ki rĩr kãn já tũ nĩ, hã kỹ Topê tóg ù tỹ ki rĩr ke mũ ù jênẽ ja nĩ, ù tỹ Melquisedeque ri ke ên, hã vỹ: Jesus Cristo, he mũ. Ag tỹ ki rĩr há han ja nĩ ra Topê hỹn ti jênẽnh ke tũ nĩ vẽ, kỹ Arão krê'krê ên ag hã vỹ ki rĩr nỹtĩnh ke vẽ vẽ. ¹²Kỹ, Jesus tỹ Topê tũ ki rĩr kỹ Topê vỹ ti mỹ tag to vênh jykre tãg han ja nĩ gé. ¹³⁻¹⁴Hã kỹ tóg ki rĩr nĩ sir. Ti pi(jé) tỹ Levi krê'krê ag kã ù nĩ, êg Senhor tỹ Jesus ti. Judá krê'krê ag kã ù vỹ tỹ ti nĩ. Ge ra tóg Topê tũ ki rĩr mũ. Judá krê'krê ù tóg Topê tũ ki rĩr ke tũ ti vẽ, ag tỹ Topê mỹ nén ù pũn ke tũ vẽ vẽ. Ag rãnrãj tũ vẽ vẽ, tag, Judá krê'krê ag, kỹ Moisés tóg ag to nén ù tó ja tũ nĩ gé, ti tỹ Topê tũ ki rĩr ke tag rán kỹ. Hã ra Jesus tóg Topê tũ ag ki rĩr jẽ, ti tỹ tỹ Judá krê'krê ag kã ù nĩ ra. Topê tỹ ti mỹ vênh jykre tãg nĩm hã vẽ.

Jesus tỹ Melquisedeque ri ke nĩ

¹⁵Levi krê'krê ag vỹ Topê rãnrãj han kãn ki kagtĩg ja nĩgtĩ. Hã kỹ Topê tóg ã tũ ki rĩr ke ù jé prēr, ù tỹ Melquisedeque ri ke ên, hã vỹ: êg Senhor tỹ Jesus, he mũ. Hã ki êg tóg vég tĩ, Levi krê'krê ag tỹ ti rãnrãj han ki kagtĩg nỹtĩ ti. ¹⁶Kỹ êg

Senhor tỹ Jesus pi(jé) êprã ke ag jykre ri ke han kỹ Topê tũ ki rĩr mũ', kỹ êprã ke ù vỹ: “ha ki rĩr,” he ja tũ nĩ gé. Topê tỹ ti mỹ nén tó jan hã vẽ. Ter măn ke tũ ti nĩ ha, hã kỹ tóg ki rĩr há han mũ ha. ¹⁷ Ti to tag tóg rãn kỹ nĩ, Topê vỹ tỹ rãn kỹ nĩ ki, ha mẽ: “isũ ki rĩr jé ã tóg ke mũ. Tũ' henh ke tũ (pê) ti nĩ, ã tỹ isũ ki rĩr nĩ ti, Melquisedeque tỹ isũ ki rĩr nĩ ên ri ke,” he ja ti nĩ. ¹⁸ Tag tó kỹ tóg Moisés jykre ên tỹ tũ' he mũ, ti krój nĩn kỹ, ti tỹ êg há han măn ki kagtĩg nĩn kỹ. ¹⁹ Hỹ, Moisés jykre ên vỹ êg tar han ki kagtĩg ja nĩgtĩ, êg tỹ Topê vỹ ki króm han ki kagtĩg ja tóg nĩgtĩ, kỹ êg ti jykre han sór mũ ra kanhkã tá jun ke tũ nĩ, êg tỹ Moisés jykre han mũ ra. Vãhã Topê tóg êg mỹ vẽnħ jykre tãg nĩm ja nĩ, ù tỹ Moisés jykre kãfór nĩ ên, hã vỹ: Jesus jykre, he mũ. Kỹ êg tóg Jesus tugrĩn Topê nĩgja tá junjun ke mũ.

²⁰ Tag to Topê tóg vỹ kãfór han ja nĩ. Moisés tỹ Levi krê'krê mỹ: “Topê tũ ki rĩrmnĩ,” hen kỹ tóg vỹ kãfór han ja tũ nĩ. ²¹ Hã ra Topê tóg Jesus mỹ tag tó. Ti mỹ tóg: “isũ ag ki rĩr jé ã tóg ke mũ,” he ja nĩ. “Tũg ke tũ ti nĩ, ã tỹ isũ ag ki rĩr tĩ ên ti. Vỹ kãfór han inh mỹr. Tó ù han măn ke tũ sóg nĩ, vẽnħ jykre ù han măn ke tũ sóg nĩ,” he ja tóg nĩ, êg jóg mág ti, ã kósĩn mỹ. ²² Hã kỹ Jesus jykre vỹ Moisés jykre kãfór nĩ, Jesus tỹ êg mỹ vẽnħ jykre tãg nĩm mũ ên. ²³ Nén ù ki tóg sir Moisés jykre ri ke tũ nĩ, Jesus jykre ti, ha mẽ. Moisés jykre ki Topê tũ ki rĩr tĩ ag vỹ e ja nỹtĩgtĩ. Ājag kã ù ter kỹ ag tóg jagnẽ jẽgja kã ù fẽg' he ja nĩgtĩ, ti tỹ Topê mỹ ti tũ ki rĩr jé. Hã kỹ ag tóg e ja nỹtĩgtĩ, Moisés jykre ki Topê tũ ki rĩr tĩ ag. ²⁴ Hã ra Jesus vỹ ter măn ke tũ nĩ inhhã, Topê tũ ki rĩr tóg nĩ nĩ, ù tóg ti jẽgja kã jẽnħ ke tũ nĩ. ²⁵ Hã kỹ tóg ã tỹ ùn ki rĩr nĩ mũ ag kar krenkren han tĩ, ù tỹ ti tugrĩn Topê jamã tá junjun ke mũ ên ag kar. Rĩr tóg nĩ nĩ, kỹ tóg êg jagfy Topê mré vēmén tĩ. Kurã krỹg ja tũ ti nĩ, Jesus ti.

²⁶ Êg to ti há nĩ, Jesus ti, ti tỹ êg jagfy Topê tũ ki rĩr nĩn kỹ. Topê kósĩn vỹ tỹ ti nĩ. Kygnẽ ja tũ pẽ ti nĩ. Nén ù kórég venħ ke tũ êg nĩ, ti ki. Topê vỹ mranh tĩ ag mré ke tũ vẽ. Kỹ tóg tỹ kanhkã tãn kar ag kri ke nĩ gé sir, ùri. ²⁷ Êprã ke ag tỹ Topê tũ ki rĩr nỹtĩn kỹ ag tóg ājag tỹ Topê vỹ mranh ja tugrĩn Topê mỹ nén ù pũn vén tĩ, kurã kar ki, kar kỹ ag tóg ājag mré ke ag tỹ Topê vỹ mranh tugrĩn ag jagfy Topê mỹ nén ù pũn tĩ gé sir. Jesus vỹ Topê vỹ mranh ja tũ nĩ inhhã. Hã kỹ tóg, ã tỹ vẽnħ fẽg kỹ tóg ag tỹ Topê mỹ nén ù pũn ri ke han. Vẽnħ fẽg pir han tóg, kỹ tóg ã tỹ vẽnħ fẽg pir ên ki êg tỹ Topê vỹ mranh e ja ên tỹ tũ' he kãn. ²⁸ Moisés tỹ êprã ke ag mỹ: “Topê tũ ki rĩr,” hen kỹ ag tóg ki rĩr mũ, hã ra ag tóg kygnẽ mág kỹ nỹtĩ ja nĩgtĩ gé, ag tỹ tỹ êprã ke nỹtĩn kỹ. Hã ra Topê tóg vẽnħ jykre tãg han kỹ tóg ã kósĩn mỹ: “ki rĩr jé ã tóg ke mũ, tag to sóg vỹ kãfór han mũ,” he ja nĩ. Û tỹ kygnẽ ja tũ pẽ ên mỹ tóg tag tó ja nĩ, hã kỹ tóg kygnẽnħ ke tũ pẽ nĩ gé.

Jesus hã tỹ êg jagfy Topê tũ ki rĩr

8 Ha mẽ, sỹ ājag mỹ nén kãmén ja ti. Tag tó sór ja inh nĩ, ha mẽ. Êg jagfy Topê tũ ki rĩr tĩ to pã'i mág hã vỹ nĩ nĩ. Topê pẽgja tá tóg nĩ nĩ, kanhkã tá. ² Topê nĩg jafã pẽ tá tóg ti tũ ki rĩr mũ. Topê nĩgja pẽ ên pi(jé) tỹ êprã ke ag tỹ há nĩ'. Topê hã tỹ há vẽ, ên ti. Ên tá tóg nĩ nĩ, êg jagfy, Topê tũ ki rĩr nĩ ên ti.

³ Topê tũ ki rĩr tĩ to pã'i mág jykren hã vẽ, ha mẽ. Topê mỹ ag tóg nén ù nĩ pũn tĩ, nén ù ù ke gé. Kỹ ù tỹ êg jagfy Topê tũ ki rĩr tĩ to pã'i mág tag vỹ Topê mỹ nén (ũ) nĩm ke mũ gé, Jesus ti, hã vỹ: vẽnħ fẽg, he mũ. ⁴ Ti tỹ ver tag mĩ ga kri mũ ag mré ga kri tĩ ra Topê tóg ti mỹ vẽnħ rãnhrãj tag nĩm ke tũ nĩ vẽ, ti tỹ Topê tũ ki rĩr jé. Êprã ù tỹ Topê tũ ki rĩr mũ ag vỹ nỹtĩ ver, ù tỹ Judeu ag jykre ki Topê tũ ki rĩr mũ ù ag. ⁵ Topê jo ĩn krēm ag tóg nén ù nĩ pũn tĩ, Moisés tỹ ag mỹ vẽnħ

jykre nĩm kŷ. Topē vŷ Moisés mŷ tó ja nĩ, ti tŷ kur tŷ Topē jo ĩn han jé. Ti mŷ tóg: “ã mŷ sóg ã tŷ nén han ke mũ ěn ti ven kãn huri,” he mũ. “Ã tŷ pãnónh kri nĩ ěn kã sóg ã mŷ ven kãn. Sŷ ã mŷ nén ven mũ ěn hã han nĩ,” he ja tóg nĩ, Topē ti, Moisés mŷ, hã kŷ tóg han. ĩn ěn krēm ag tóg ũri nén ũ ũ pũn tĩ, Judeu ag jykre ki, Topē tũ ki rĩr tĩ ag. Hã ra tóg tŷ kanhkã tá vėnh jykre tag hã pē tũ nĩ ver. Nén sĩ ki tóg ri ke nĩ, ag tŷ nén han mũ ti, kanhkã tá vėnh jykre ri ke sĩ ti nĩ. Jesus hã vŷ kanhkã tá vėnh jykre pē ěn han kãn mũ.

⁶ Hã kŷ Jesus rãnrhãj vŷ ěprã ke ag rãnrhãj kãfór nĩ. Topē vŷ ěg mŷ Jesus jēnē, ti tŷ ěg mŷ vėnh jykre tãg nĩm jé, kŷ tóg ti tŷ Moisés tŷ ěg mŷ vėnh jykre há nĩm ěn há kãfór nĩ. Kŷ tóg ěg mŷ nén ũ há tãvĩ han ke mũ, Topē ti, ti tŷ Jesus jēnēn kŷ. Hã kŷ Jesus rãnrhãj vŷ Moisés rãnrhãj kãfór nĩ, Jesus tŷ ěg mŷ vėnh pãte fón ken kŷ. ⁷ Topē mŷ tóg pãgsĩ ja nĩ, ã tŷ Moisés mŷ vėnh jykre nĩm ja ěn ti, hã kŷ tóg vėnh jykre tãg han to jykrén ja nĩ. ⁸ Ā povo jykre ve kŷ tóg ti mŷ kórég nĩ, hã kŷ tóg tag tó, ha mẽ. “Kãnhmar sóg povo tŷ Israel mŷ vėnh jykre tãg nĩm ke mũ, Judá krē'krē ag mŷ ke gé,” he ja tóg nĩ, ěg jóg mág ti. ⁹ Vėnh jykre tãg tag vŷ isŷ ag jóg'jóg ve ag mŷ vėnh jykre nĩm ja ěn ri ke tũ ninh mũ. Ag jóg'jóg ve ag mŷ sóg vėnh jykre ũ nĩm ja nĩ gé, isŷ ga tŷ Egito tá ag kãpan kŷ. Ag nĩgé kãgmĩ kŷ sóg ag tatĩn kãtĩ mũ, ag ga pē ra. Hã ra ag tóg isŷ ag mŷ vėnh jykre nĩm ja ěn mranh, hã kŷ sóg sir ag togvãnh ja nĩ,” he tóg, ěg jóg mág ti. ¹⁰ “Hã ra sóg vãhã ag mŷ vėnh jykre tãg han sór mũ, povo tŷ Israel ag mŷ, ha mẽ,” he tóg, ěg jóg mág ti. “Ājag krĩ tŷ ag tóg isŷ ag jyvėn mũ ěn ki kanhrãn ke mũ, kŷ ag tóg han sór ke mũ gé, ti tŷ ag fe kãkã nĩn kŷ. Ag Topē vŷ tŷ ĩnh ninh mũ, kŷ ag tóg tŷ ĩnh krē nŷtĩnh ke mũ gé, ěn kã. ¹¹ Kŷ ũ tóg ã mré ke ag kanhrãn mãn ke tũ nĩ ha. “Ěg

jóg mág vŷ ge nĩgtĩ, ge ti nĩgtĩ,” he mãn ke tũ ag nŷtĩ ha, jagnē mŷ. Ag kar vŷ ĩnh ki kanhró nŷtĩnh mũ, ěn kã, ũn kãsĩr ag, ũn mág ag ke gé, ěn kã. ¹² Ag tŷ ĩnh vĩ mranh mũ (hã) ra sóg ge ra ag jagãgtãn ke mũ. Vėnh pãte fón jé sóg ke mũ, ag tŷ ĩnh vĩ mranh ja ěn ti,” he ja tóg nĩ, Topē ti.

¹³ Kŷ, Topē tŷ vėnh jykre tãg han kŷ vėnh jykre ve ěn vŷ ti mŷ tŷ vėnh jykre sĩ nĩ sir. Hã ra nén (ũ) sĩ kar ěn vŷ kejėn tũ' henh ke mũ, kãnhmar.

Vãsŷ Topē jykre mré ũri Topē jykre

9 Topē tŷ ag mŷ vėnh jykre ve ěn nĩm kŷ tóg ag mŷ ag tŷ nén han ke ěn kãmén ja nĩ. Ag tŷ ti jo ĩn han tó ja ti nĩ, kar kŷ tóg ag tŷ ti jo ĩn krēm ti mré vēmén ke tó ja nĩ gé, ag tŷ ti mŷ nén (ũ) pũn ke ti ke gé. ² Kŷ ag tóg kur tŷ ĩn ěn han, ti tŷ tŷ Topē jo ĩn jē jé. Hã ra tóg vėnh kãpãm kŷ nĩ, kur tŷ ke gé, kŷ ag tóg ĩn vãfynyn ki jun vén mũ ěn to ag tóg: “Topē mré vĩ jafã,” he tĩ. ěn tá mesa kri vela tŷ kri vin jafã vŷ jē, kar kŷ mesa ti ke gé, mesa tŷ kri pão vin jafã ěn. ³ Tag pãte tóg kur nĩ, jãnkã tŷ kur, kŷ kur ěn pãte ĩn vãfynyn ũ vŷ nĩ gé, ũn sĩ. ěn to ag tóg: “Topē nĩg jafã,” he tĩ, ĩn vãfynyn ěn to. ⁴ Tá tóg Topē mŷ kri nén (ũ) pũn jafã nĩ, ouro tŷ há ti. Kri ag tóg nén ũ ger há pũn tĩ, ouro ěn kri. Kar kŷ Topē caixa vŷ tá nŷ gé. Ti to tĩr hã vŷ tŷ ouro nĩ. Caixa ěn kãkã ouro tŷ pėnky vŷ nĩ, kŷ kanhkã tá vėjėn vŷ pėnky ěn ki nĩ, Topē tŷ ag mŷ pão jēnē ěn ti, ag tŷ ga kórég kri mũn kŷ. Kar kŷ Arão vãtó vŷ kã nŷ gé, ti kãtó ti, kãtó fėj mũ ěn ti. Caixa ěn kãkã tóg nŷ nĩ, vãtó ěn ti. Kar kŷ Topē tŷ Moisés mŷ vėnhrá nĩm ja ěn vŷ kãki nŷtĩ gé, caixa ěn kãki. Pó régre ki tóg rãnrán ja nĩ, Moisés ti, Topē tŷ ěg jyvėn mũ ěn ti. Pó régre ěn tóg caixa kãki nŷtĩ gé. ⁵ Caixa ěn kri tóg nŷtĩ, Topē tŷ jėgnē jafã régre ag kãggrã, querubim he mũ ěn, ũ tŷ Topē rĩnja tá nŷtĩ ěn. Fěr ag nŷtĩ, kŷ ag fěr tóg krŷg

he kŷ nŷtĩ. Ag fêr fênja krêm Topê vŷ ěg mŷ vênh pête fón tĩ, ěg tŷ ti vĩ mranh ja ti. Hã ra sóg tag kâmén kân sór tũ nĩ ver.

⁶Kŷ tóg vâfynyn régre nĩ, ĩn tŷ kur ěn ti, Topê tũ ěn ti. Ti vâfynyn ve ki ag tóg kâra ge tĩ, Topê tũ ki rĩr tĩ ag, kurã kar ki. Tá ag tóg ajag rânhrãj ti han tĩ. ⁷Ti vâfynyn ũ ěn tá tóg kâra rã pin' he tĩ, prŷg kar ki, ag to pã'i mág ti, ti tãvĩ. Ag mēg kyvénh ma tóg ti tĩ, Topê mŷ ven jé, Topê tŷ ti mŷ vênh pête fón jé, povo kar mŷ ke gé, ag tŷ Topê vĩ mranh ja ěn ti, ag tŷ mranh sór tũ ra mranh ja ěn ti.

⁸Topê kuprĩg vŷ ěg mŷ kâmén mũ, ũri, vênh jykre si ěn ti. Kur tŷ ĩn vâfynyn vŷ ge nĩ, ha mē. Ti vâfynyn ve ěn tŷ ver ĩn krêm nĩn kŷ ěg tóg ti vâfynyn ũ tá jun ke tũ nĩ ver, Topê nĩgjafã tá. ⁹Ěg tŷ ũri vég mũ tag ki kanhrãn jé, hã jé Topê tóg vênh jykre tag han ja nĩgtĩ, ěg tŷ to comparação han jé. Topê jo ĩn ěn tá ag tóg Topê mŷ nén ũ pũn tĩ, kŷ ag tóg ag mēg ti tãnh kŷ pũn tĩ gé. Ag tŷ Topê mŷ sĩnvĩ nŷtĩ sór vē, hã jé ag tóg ti mŷ nén (ũ) pũn tĩ. Hã ra ag tóg ti mŷ pũn mũ ra (ag tóg ti mŷ) sĩnvĩ tũ nŷtĩ, ag jykre tŷ ver kórég nĩn kŷ. ¹⁰Kŷ, ag tŷ ti mŷ pũn há han jé ag tóg vênh jykre tŷ ge han tĩ gé, ha mē: vĕjĕn to ag tóg jykren tĩ, kŷ ag tóg vĕjĕn ũ to: “tag konh ke tũ ěg nĩ, tag kron ke tũ ěg nĩ,” he tĩ, ti tŷ ag mŷ tó kŷ nĩn kŷ. Kŷ ag tóg goj tŷ vênh kygpe tŷ hĕn ri ke han han tĩ gé. Tag ki vênh jykre kar vē, ěprã. Kŷ Topê tŷ vênh jykre tãg han kŷ ěn vŷ tóg tũ' he mũ sir.

¹¹Vãhã Cristo vŷ hur kãtĩg, kŷ tóg tŷ ěg jagfŷ Topê tũ ki rĩr to pã'i mág nĩ ha, kŷ tóg ěg kren pē han mũ. Ti tŷ Topê jo ĩn kâra rã vŷ ĩn si ěn mág kãfór nĩ gé. Há tãvĩ ti nĩ, Jesus tŷ hĕ tá Topê tũ ki rĩr nĩ ěn ti. Ěprã ke tŷ ĩn há pijé', tag ki ĩn pijé', kanhkã tá ke vē. ¹²Kŷ, Jesus tŷ ěn kâra rã kŷ tóg rã pir han, Topê nĩgjafã pē ěn kâra, Topê tŷ ěg mŷ vênh pête fón jé. Kŷ tóg, ã tŷ kâra rã kŷ ti pi(jé) ag mēg kyvénh ma vyr', cabrito ěn, monh tăgy

ěn. Ā kyvénh hã tŷ tóg ěg kren pē han, Jesus ti.

¹³Ũ ter kŷ ũ tŷ ti va mũ mũ ěn ag vŷ, ag tŷ Topê jo ĩn kã ra ge sór kŷ ag vŷ Topê tũ ki rĩr tĩ ag mŷ: “hã ěg to tŷ kó kó hé, ěg mēg kyvénh tŷ,” he tĩ. Ag tŷ ag to tŷ kó kó he kar kŷ ag tóg jãnhkri nŷtĩ sir, ag tŷ cabrito kyvénh tŷ ag to tŷ kó kó hen kŷ, ke tũ nĩn kŷ monh kyvénh tŷ, ke tũ nĩn kŷ monh fi pũr tŷ mrĕj tŷ. Ag tŷ ag jãnhkri han jan hã vē. ¹⁴Hã ra Cristo vŷ ã kyvénh hã tŷ ěg jãnhkri pē han. Topê kuprĩg tŷ ti krĩn kŷ tóg Topê mŷ vênh fĕg, Cristo ti. Kygnĕ ja tũ pē ti nĩ, hã kŷ tóg há kar nĩ, ti tŷ vênh fĕg kŷ. Ti kyvénh vŷ ěg jãnhkri pē han mũ, ěg jykre mrĕ tóg ěg kuryj han mũ, kŷ ěg tóg vênh jykre kórég han măn ke tũ nĩ sir, ěg tŷ ěg jykre si tugrĩn ter ke mũ ěn ti. Vãhã ěg tóg Topê tũ han há nĩgtĩ, ũn rĩr nĩ ěn tũ ti.

Cristo tŷ ěg mŷ vênh jykre tãg ma kãtĩg

¹⁵Hã kŷ Cristo vŷ ěg mŷ vênh jykre tãg ma kãtĩg. Ter ja tóg nĩ, Topê tŷ ěg mŷ vênh pête fón jé, ěg tŷ ti jykre ve mranh ěn ti. Ti ter kar kŷ Topê tóg ũ ag kuprĕg huri, ag tŷ Topê tŷ kanhkã tá ěg mŷ nén ven ke ěn ki kanhrãn jé. Jesus tŷ ěg mŷ han hã vē.

¹⁶Kejĕn ũ tóg ã ter ke to hã: “iser kar kŷ ěn vŷ isũ tag măn ke mũ, ũ ěn vŷ isũ ũ măn ke mũ gé,” he tĩ. Rãn tóg tĩ, tag, kŷ tóg tógfĩg tĩ, vênh rá ti. Kŷ ag tóg ag tŷ vênh rá ěn ve sór mũ ra ag tóg ti ter kar kŷ hã vég tĩ. ¹⁷Ti tŷ ver ter tũ nĩn kŷ ag tóg vênh rá ěn venh ke tũ nĩ. “Iser kar kŷ,” he tóg, hã kŷ ũ tóg ver ti tũ mǎg tũ nĩ, ti tŷ ver ter tũ nĩn kŷ, ũ tŷ rãn mũ ěn ti. ¹⁸Ri ke ti nĩ, Topê tŷ ěg mŷ vênh jykre nĩm ja ěn ti, ti si mrĕ hã. Ag mēg ter kar kŷ ke ja vē. ¹⁹Hã kŷ Moisés vŷ povo kar mŷ Topê tŷ ti mŷ nén tó ja ěn kâmén, Topê tŷ nén to ag jyvĕn mũ ěn ti. Ti tŷ ag mŷ kâmén kar kŷ tóg monh tăgy

tānh kŷ ti kyvénh mǎn ja nī, cabrito tānh kŷ ke gé. Goj mǎn kŷ tóg ki kujēn ja nī gé, kŷ tóg tŷ kujājāg mŭ, goj mré tóg ti kujājāg mŭ sir, carneiro kyki kusŭg mré hǎ tóg tŷ kujājāg mŭ sir, re no fej mré hǎ. Kŷ tóg livro kri tŷ kó he mŭ, to tŷ krig ke tóg mŭ gé, povo kar to tóg tŷ kó kó he mŭ gé, ag tŷ jānhkri kŷ nŷtī jé. ²⁰ Ag to tŷ krig ke kar kŷ tóg ag mŷ: “Topē tŷ ěg mŷ nén han ke mŭ to vēnh kyvénh hǎ vē,” he mŭ, “Topē tŷ ěg mŷ vēnh jykre nīm mŭ to vēnh kyvénh hǎ vē,” he tóg mŭ, Moisés ti. ²¹ Kar kŷ tóg ĩn tŷ kur to tŷ krig ke mŭ gé, pénky kar to tóg tŷ kó he mŭ gé, ag tŷ Topē tŭ han jafǎ kar to. Vēnh kyvénh ěn tŷ tóg kri tŷ kó he kǎn mŭ, ag kar jānhkri nŷtī jé. ²² Ha vé, ag tŷ vāsŷ Topē jykre ěn ki nén ũ tŷ jānhkri' he sór kŷ ag tóg nén ũ kyvénh hǎ tŷ jagnē jānhkri' tŷ. Pir ti nī, ag tŷ nén ũ kyvénh tŷ ra tŷ jānhkri' ke mŭ ti. Hǎ kŷ ěg tóg ki kanhró nŷtī. ěg tŷ Topē vī mranh kŷ tóg ěg mŷ ěg mēg ter hǎ tugrīn vēnh pāte fón ja nīgtī, vāsŷ vēnh jykre ěn ki.

Cristo tŷ ěg jagfy ter pir han

²³ Vēnh jykre ěn vŷ kanhkā tá vēnh jykre ri ke sī nī, hǎ kŷ vēnh mēg kyvénh vŷ nén kar ěn jānhkri han ja nīgtī. ěg tŷ hǎ ra kanhkā ve jé tóg há tŭ nī, ěg mēg tŷ ěg jagfy ter mŭ ti. ěg mēg vŷ ěg tŷ kanhkā tá jun han ki kagtŷ nī. ²⁴ Cristo hǎ vŷ ěg tŷ tá jun han ke mŭ. Kŷ tóg ěprǎ ke tŷ Topē jo ĩn kǎra rǎ ja tŭ nīgtī gé, kanhkā jykre ri ke sī ěn kǎra rǎ ja tŭ ti nī. Kanhkā pē ra tóg vyr, kŷ tóg Topē rīnja tá nī nī, Topē mré vēmén jé, ěg jagfy. ²⁵ Kŷ ěprǎ ke ěn tóg ěprǎ Topē tŭ ki rīr tŷ to pǎ'i mág ěn tóg prŷg kar ki ag tŷ ĩn vǎfynyn to: Topē nīgjafǎ, he mŭ ěn kǎra tóg rǎ tŷ, ag mēg kyvénh mǎn kŷ tóg ra rǎ tŷ. Hǎ ra Cristo vŷ vēnh fēg pir han. ²⁶ Ti tŷ prŷg kar ki vēnh fēg mŭ ra tóg ter tŷ hēn ri ke han ke vē vē, Topē tŷ ga han kar kŷ. Hǎ ra tóg vāsŷ vēnh ven ja tŭ nī. Ūri, kurǎ tŷ ěgno to hǎ tóg vēnh

ven pir han, kŷ tóg vēnh fēg pir han, ěg tŷ Topē vī mranh ěn tŷ tŭ' he jé, ǎ ter tugrīn. ²⁷ ěprǎ ke ag vŷ ter pir han tŷ gé. ěg ter kar kŷ Topē vŷ ěg jykre tugnŷm ke mŭ. ²⁸ Tag ri ke ti nī, Cristo tŷ vēnh fēg mŭ ti. Vēnh fēg pir han tóg, ǎ tŷ ũn e tŷ Topē vī mranh tŷ tŭ' he jé. Kejēn tóg kǎtig mǎn ke mŭ. Hǎ ra tóg ěg tŷ Topē vī mranh ja tugrīn ter mǎn ke tŭ nī, ti kǎtig mǎn kŷ. ěg jé prēr jé tóg kǎtig ke mŭ, ti tŷ ũ tŷ ti kǎtig jāvǎnh mŭ ag jé prēr jé.

10 ěg tŷ Judeu ag jykre ve kŷ ěg tóg ve sī han tŷ, Topē tŷ ěg mŷ nén han sór mŭ ti. Prŷg kar ki ag tóg Topē mŷ tānh kŷ pŭn', tānh kŷ pŭn' he tŷ. Hǎ ra ag mēg tŷ ag jagfy ter mŭ ra tóg ag jykre há han ki kagtŷ ja nīgtī. ² Ag tŷ Topē mŷ nén (ŭ) pŭn mŭ ra ag tóg Topē vī mranh mǎn', mranh mǎn' he tŷ. Ag tŷ mranh tŷ nī ra ag tóg ti mŷ pŭn mǎn ke tŭ nī vē, ti tŷ ag mŷ vēnh pāte fón jé. Hǎ ra ag tóg ki kanhró nŷtī, ag tŷ ti vī mranh tŷ tag, hǎ kŷ ag tóg ti mŷ nén pŭn tovǎnh tŷ pē nīgtī, ti tŷ ag mŷ vēnh pāte fón tovǎnh tŷ nī jé. ³ Prŷg kar ki ag tóg Topē mŷ pŭn tugrīn (ag tóg) ag tŷ ti vī mranh ja ěn mī ěkrég tŷ. ⁴ Hŷ, monh kyvénh vŷ ěg tŷ Topē vī mranh tŷ tŭg' henh ke tŷ pē nī, cabrito tŷ ěg jagfy ter mŭ ěn ti ke gé. ⁵ Hǎ kŷ Cristo tóg, ǎ tŷ ga kri mur ken kŷ (tóg) Topē mŷ: “ag tŷ ājag mēg tānh kŷ pŭn mŭ ra tóg tŷ nén ũ tŭ nī ǎ mŷ,” he ja nī. “Ag tŷ ǎ mŷ nén ũ ũ pŭn mŭ ra tóg ǎ mŷ tŷ nén ũ tŭ nī gé. Hǎ ra ǎ tóg ĩnh mŷ ĩnh fǎr ti nīm, isŷ ag jagfy ter jé. ⁶ Ag tŷ ǎ mŷ ag mēg pŭn mŭ ra tóg ǎ mŷ sér tŭ nī, ag tŷ ǎ mŷ nén ũ ũ pŭn mŭ ra. Ag tŷ ǎ vī mranh tag tŷ tŭ' he ki kagtŷ tóg nī, ag tŷ ǎ mŷ nén pŭn mŭ tag. ⁷ Hǎ kŷ sóg ǎ mŷ: “ha vé, sŷ ǎ mŷ vēnh fēg ke vē,” he mŭ, “isŷ ǎ tŷ ĩnh ki nén ve sór mŭ ěn tŷ ǎ mŷ han jé,” he sóg mŭ. Hǎ kŷ tóg rán kŷ nī, iso, ǎ vī rá ki,” he tóg, Cristo ti, Topē mŷ.

⁸ Ti mŷ tóg tag tó vén, ha mē. “Ag tŷ ājag mēg tānh kŷ pŭn mŭ ra tóg tŷ nén

ũ tũ nĩ ã mỹ. Ag tỹ ã mỹ ãjag mễg pũn mũ ra tóg ã mỹ sér tũ nĩ, ag tỹ ã mỹ nén ũ ũ pũn mũ ra. Ag tỹ ã vĩ mranh tag tỹ tũg' he ki kagtĩg tóg nĩ, tag,” he vén tóg. Hã ra tóg rán kỹ nĩ, Judeu ag tỹ Topê mỹ tag pũn jé. Ge ra Jesus tóg tag to: “nén ũ tũ vễ,” he ja nĩ. ⁹Tag tó kar kỹ tóg Topê mỹ: “hã vé, sỹ ã mỹ vễnh fễg ke vễ, isỹ ã tỹ inh ki nén ve sór mũ ên tỹ ã mỹ han jé,” he mũ gé, Topê mỹ. ã tỹ tag tó kỹ tóg vễnh jykre si ên tỹ tũ' he mũ, ũn tăg han jé. ¹⁰Jesus tỹ Topê vĩ ki króm ja tugrĩn ẽg tóg ũri tỹ Topê krẽ nỹti ha. Jesus Cristo vĩ ẽg jagfỹ ter ja nĩ, vễnh fễg kỹ. Ti ter pir ki tóg ẽg név(e) kajãm kãn, kỹ Topê tóg ẽg mỹ vễnh pãte fón kãn mũ sir.

¹¹Êprã ke ag tỹ Topê tũ ki rĩr tĩ ag vĩ kurã kar ki ãjag rãnrãj han tĩ, Topê tũ ki rĩr jé. Kurã kar ki ag tóg Topê mỹ ãjag mễg tãnh kỹ pũn tĩ, hã ra ag tỹ Topê mỹ nén pũn mũ ên pi(jé) ag tỹ Topê vĩ mranh tỹ tũ' he ja nĩgtĩ. ¹²Ag jãvo Jesus Cristo vĩ vễnh fễg pir han, ã ter tugrĩn tóg ẽg tỹ Topê vĩ mranh ên tỹ tũ' he kãn. Tag han kar kỹ tóg Topê pễgja tá nĩ nĩ. ¹³Tá tóg nĩ nĩ. Topê vĩ ti kato vãsãnsãn mũ ag tỹ ti pẽn krẽm vin ke mũ. Ag sigse kỹ nỹti to ken hã vễ. Tag hã jãvãnh tóg nĩ nĩ, Jesus ti. ¹⁴Ti tỹ vễnh fễg pir ên tugrĩn tóg Topê krẽ kar ag krenkren han kãn huri, kỹ ẽg Topê mỹ sinvi nỹti. ¹⁵Topê kuprĩg vĩ ẽg mỹ tag tó tĩ gé. Tag tó tóg mũ, ha mẽ. ¹⁶“Tag pãte sóg ag mỹ vễnh jykre tăg han ke mũ,” he tóg, ẽg jóg mág ti. “Vễnh jykre tăg ên hã vễ, ha mẽ. Isỹ nén to ag jyvẽn mũ ên tỹ sóg ag fe kãkã nĩm ke mũ, kỹ tóg sỹ ag krĩ ki rán ri ke nĩnh mũ sir, kỹ ag tóg han sór ke mũ,” he tóg. ¹⁷Tag tó kar kỹ tóg tag tó gé, ha mẽ. “Ag tỹ inh vĩ mranh ja ên mĩ êkrẽn mãn ke tũ inh nĩ ha, ag jykre pãno ên mĩ êkrẽn mãn ke tũ pẽ inh nĩ ha,” he tóg mũ gé. ¹⁸Ha vé, Topê tỹ ẽg mỹ vễnh pãte fón kỹ ẽg tóg ti mỹ nén ũ pũn mãn

ke tũ nĩ ha, ti tỹ ẽg mỹ vễnh pãte fón kãn kỹ nĩn kỹ, ẽg tỹ ti vĩ mranh ja kar ên ti.

Êg tỹ Topê to krónh ke tũ

¹⁹Inh kanhkã, Jesus tỹ ẽg jagfỹ ter tugrĩn ẽg tóg jatun mỹ Topê nĩgjafã tá jun ke mũ. ²⁰Jesus tỹ ẽg jagfỹ ter ên tóg ti tỹ kur tỹ jãnkã ên fĩn rãm ri ke nĩ, ẽg tỹ ti nón fĩn rãm ri ke han jé, ẽg rĩnrĩr nỹti jé. Topê jo ĩn krẽm kur tỹ jãnkã nĩfe ên vĩ jaran ke kỹ sa nĩ, Jesus ter kỹ. Kỹ ẽg tóg rã genh hã nỹti ha. ²¹Êg jagfỹ Topê tũ ki rĩr tĩ to pã'i mág vĩ nĩ nĩ, hã vĩ: Jesus, he mũ. Topê jamã tá ke ên ag kar kri ke vĩ tỹ ti nĩ. ²²Kỹ jatun mỹ Topê mrẻ vẻmẻn nĩ. Ti ki rã há han nĩ, ãjag fe tỹ ti ki gemnĩ, ãjag tỹ ti nĩgjafã tá junjun jé. Ón kỹ ti ki ge sór tũg nĩ. Êg jãnhkri han tóg, ẽg jykre pãno kar tỹ tóg tũ' hé, ẽg tỹ to jykren mãn tũ nĩ jé. Êg tỹ jãnhkri han tóg, ẽg tỹ goj jãpri tỹ vễnh kype ên ri ke, kỹ ẽg há nỹti. ²³Ti tỹ ẽg mỹ nén tó mũ ên mĩ êkrẽn nĩ, to krónh ke tũg nĩ, sỹ ãjag mỹ nén tó mũ ên to. Ve jé ẽg tóg ke mũ, ti tỹ ẽg mỹ nén tó mũ ên ti. ũ tỹ ẽg mỹ tó ja ên vĩ ón vãnh nĩgtĩ, hã kỹ to krónh ke tũg nĩ.

²⁴Jagnẻ mĩ êkrẽn nĩ, ãjag tỹ jagnẻ jyvẽn jé. “Vễnh kar to há nĩmni,” hemnĩ jagnẻ mỹ. “Nén ũ há kar han nĩ,” hemnĩ gé jagnẻ mỹ. ²⁵ũ ag tóg culto venh kãmũ vãnh nỹtigĩ. Tag han tũg nĩ. Culto venh kãmũmni. Kỹ jagnẻ jyvẽn nĩ, ãjag tar nỹti jé. Kakó ti nĩ, ti kãtig mãn ke kurã ti. Ve há ti ti ha, tag.

²⁶Ha vé, Topê vĩ mẽ kãn ẽg huri. Êg tỹ ti ki rã kar kỹ culto venh kãtig tũ nĩ' hen kỹ, ẽg tỹ ge ra Topê vĩ mranh sór kỹ mranh tĩ kỹ tóg ũ tỹ ẽg jagfỹ kajãm mãn ke tóg tũ tĩ. ²⁷Hỹ, ẽg tỹ mranh sór kỹ mranh kỹ Topê vĩ ẽg vóg kónãn pẽ han ke mũ. Pĩ tỹ tóg ag tỹ tũ' henh ke mũ, Topê ti, ũ tỹ ti kato vãsãnsãn mũ ag. ²⁸ũ tỹ Moisés tỹ ẽg jyvẽn mũ ên mẽ jãvãnh nĩ ên tén ja ag tóg nĩgtĩ, Israel ag, ũn rẻgre ag tỹ ti jykre pãno ve ja tag tugrĩn, ke

tũ nĩn kŷ ũn tăgtũ ag. Ti jagăgtân ja tũ ja ag nĩgtĩ, ũn jykre pãno ên. ²⁹ Hã ki êg tóg vэг mũ, Topê tŷ êg vóg kónân pẽ han ke mũ ti, êg tŷ Topê kósın to é he kŷ, êg tŷ ti vĩ mranh sór kŷ. Êg tŷ mranh sór kŷ êg tóg ti kyvénh to é he tĩ, ti jykre to. Ti tŷ êg jãnhkri han ja ên to é he êg tóg tĩ sir. Êg mŷ tóg tŷ nén ũ tũ nĩ sir, Topê kuprĩg tŷ êg jagăgtân ja ên ti. Ũ tŷ tag han mũ vóg kónân jé tóg ke mũ, Topê ti, ha vemnĩ. ³⁰ Hã kŷ tóg tag tó, ha mẽ: “ũn jykre pãno ag vóg kónân jé sóg ke mũ, ag tŷ kajãm jé, ag tŷ nén ũ kórég han mũ kar,” he tóg, Topê ti. Ũ tŷ tag tó mũ ki kanhró êg tóg nĩ mŷr. Hã ra tóg tag tó gé, ha mẽ. “Á mré ke ag jykre tugnŷm jé tóg ke mũ, êg jóg mág ti,” he ja tóg nĩ gé. ³¹ Rĩr ti nĩ, Topê ti. Ti tŷ êg to jũ nĩn kŷ tóg jagy tăvĩ tĩ, nén ũ jagy kar kăfór ti nĩ.

Êg tŷ to tar nŷtĩnh ke

³² Ājag tŷ văsŷ ti mŷ vėnh fėg vén ja ên kură mĩ ěkrén nĩ. Ēn kă ag tóg ājag kato văsănsăn mág, kŷ ājag tóg ag to vėsŷrėnh, kysă tŷ hėn ri ke ki, ājag tŷ Topê vĩ mẽ vén ěn kă. Hã ra ājag tóg to krónh krónh ke ja tũ nĩgtĩ. ³³ Ājag kă ũ to ag tóg vĩ kónân mág' he ja nĩgtĩ, ěn kă, Topê kato văsănsăn mũ ag, kŷ ag tóg ājag vóg kónân gé, hã ra vėnh kar vŷ vé, ag tŷ ājag vóg kónân ja ti. Ājag kă ũ vóg kónân ja ag tóg nĩgtĩ, kŷ tóg ājag kar mŷ jagy tĩ ja nĩgtĩ, ag mré, ājag tŷ tŷ ag mré Jesus ki ge nŷtĩn kŷ. ³⁴ Kŷ ag tóg ājag kă ũ sigse ja nĩ gé. Kŷ ājag tóg ũn sigse kŷ nŷtĩ ěn ag jagăgtân ja nĩgtĩ, ag tŷ ājag mré Jesus ki ge kŷ nŷtĩ kŷ. Păĩ ag tŷ ājag tŷ nén gég mũ ra tóg ājag mŷ sér nĩ ja nĩgtĩ. Ājag tŷ kanhkă tá nén ũ há tăvĩ ěn venh ke hã mĩ ājag tóg ěkrén ja nĩgtĩ, ag tŷ ājag tŷ nén génh kŷ, Jesus tugrĩn. Ājag tŷ kanhkă tá nén venh ke ěn vŷ tũ' henh ke tũ pẽ nĩ. ³⁵ Kŷ ũri to krónh ke tũg nĩ gé. Ājag tŷ ti to tar nŷtĩn kŷ ājag tóg nén ũ há tăvĩ venh ke mũ, ha mẽ.

Ājag vėsŷrėnh ja ěn kaja ri ke ve jé ājag tóg ke mũ. ³⁶ Ēg tŷ ti tũ han to tar nŷtĩnh ke vė, êg tŷ ti tovănh ke tũ pẽ nŷtĩnh ke vė. Tag hã vŷ há nĩ. Kŷ ājag tŷ Topê tŷ êg mŷ nén tó mũ ěn han kăn kŷ nŷtĩn kŷ ājag tóg venh ke mũ, ti tŷ êg mŷ nén (ũ) ven ke mũ ěn ti. ³⁷ Hã kŷ tag vŷ răn kŷ nĩ, Topê vĩ răn ki, ha mẽ: “kănhmar pẽ ti jun ke mũ, ũn kătĩg ke mũ ěn ti. Kătĩg mé han jé tóg ke mũ, ha vemnĩ. ³⁸ Kŷ ũ tŷ inh ki ge kŷ nŷtĩ ěn ag hã vŷ krenkren ke mũ, inh mré ke ěn ag, isŷ ũn mŷ vėnh păte fón mũ ěn ag. Jăvo ũ tŷ isovănh mũ ěn vŷ inh mŷ kórég nĩnh mũ,” he tóg, Topê ti. ³⁹ Ēg pi(jé) ti tovănh ke mũ', kŷ êg tóg ũ tŷ ti tovănh mũ ěn ag văgfor ěn ri ke han ke tũ nĩ gé. Ti ki ră kŷ êg tóg nŷtĩ, hã kŷ êg krenkren ke mũ.

Ũ tŷ êg jo Topê ki ge kŷ nŷtĩ ag

11 Topê ki ră to ken hã vė, hã vŷ: ti tŷ êg mŷ nén tó mũ ěn kri nĩm, he mũ. Ti tŷ nén ũ to: “ve jé ājag tóg ke mũ,” he mũ ěn kri fi jé êg tóg ke mũ, êg tŷ ver vэг tũ ra. ² Ti si ag vŷ kri nĩm kŷ ti ki ge ja nĩgtĩ gé. Hã kŷ ag tóg Topê mŷ tŷ ũn há ja nŷtĩgtĩ, văsŷ ke ag, ha mẽ.

³ Ēg tŷ Topê ki ră kŷ êg tóg ki kanhró nŷtĩ, ti tŷ ģ vŷ tŷ êg tŷ nén vэг mũ kar hyn han ja ti. Ti vŷ vэг tũ ěg tóg nĩgtĩ, kŷ tóg êg tŷ nén vэг tũ tŷ tóg êg tŷ vэг mũ hyn han ja nĩgtĩ, Topê ti, ģ vŷ tŷ tóg nén kar hyn han ja nĩgtĩ.

⁴ Kŷ Abel vŷ Topê ki ră kŷ nĩ ja nĩgtĩ gé, hã kŷ tóg Topê mŷ pũn há han, ti tŷ ti mŷ ģ męg pũn kŷ. Jăvo ti kăke tŷ Caim vŷ ti ki ră ja tũ nĩ, kŷ tóg Topê mŷ nén ũ pũn tĩ (hă) ra (tóg) ti mŷ pũn kónân. Abel tŷ Topê ki ră kŷ tóg Topê mŷ pũn há han ja nĩ, Abel tŷ ti mŷ pũn mũ ěn ti. Topê tŷ Abel to: “inh mŷ tóg tŷ ũn jykre kuryj nĩ,” he ja vė, hã kŷ ti tũ tóg pũr há han. Ter ti huri, Abel ti, hã ra ěg tóg ti tŷ nén han ja tugrĩn Topê ki ge ki kanhrăn mũ sir.

⁵ Enoque vỹ Topê ki rã kỹ nĩ ja nĩgtĩ gé, hã kỹ Topê vỹ ti jé prêr, ti tỹ kanhkã ra tĩg jé, ti rĩr ra, ti ter tũ ra. Ti ve măn tũ ag tóg, Topê tỹ ti jé prêr kar kỹ, hã ra tóg ã ter tũ ra kanhkã ra vyr. Topê tỹ ti jé prêr to hã tag vỹ ti to rãn kỹ nĩ Topê vỹ tỹ rãn kỹ nĩ ki, ha mẽ: “Topê tỹ ti jykre ve kỹ ti fe tóg mrin ke mũ,” he ja ti nĩ, Enoque to. ⁶ Ēg tỹ Topê ki ge tũ nỹtĩn kỹ tóg ěg to há nĩnh ke tũ nĩ, Topê ti. Ēg tỹ Topê ra mũ sór kỹ ěg tóg tag to jykren ke mũ, ha mẽ. “Topê vỹ nĩ,” he jé ěg tóg ke mũ. Kỹ ěg tóg ti to: “ěg tỹ ti to mũ kỹ tóg ěg mỹ nén ù há ěn nĩm ke mũ, ti tỹ ěg mỹ nén tó ja ěn ti,” henh ke mũ gé. Tag tó kỹ ěg tóg ti to mũnh ke mũ, kỹ tóg ěg mỹ han ke mũ, ha vemnĩ.

⁷ Noé vỹ Topê ki rã kỹ nĩ ja nĩgtĩ gé, hã kỹ Topê vỹ ti mỹ tó ja nĩ, ag kar tỹ kar kỹ ti jagy venh ke ti, hã vỹ: ta kutẽ, he mũ. Kỹ tóg Topê vỹ kri fi kỹ canoa mág ěn han mũ, kỹ tóg han kãn kar kỹ (tóg) ki rã kỹ (tóg) kren mũ, ti prũ fi mré, ti krê mré ke gé. Topê ki rã kỹ tóg ù tỹ Topê kato vāsānsān mũ ag mré tĩg măn ja tũ nĩ. Hã kỹ Topê vỹ ti mỹ ùn jykre kuryj ag tỹ nén venh ke ěn ven, ti tỹ ù tỹ ti ki rã kỹ nỹtĩ ag mỹ nén ven ke ěn ti.

⁸ Abraão vỹ Topê ki rã kỹ nĩ ja nĩgtĩ gé, hã kỹ tóg Topê vỹ kri nĩm ja nĩgtĩ. Topê tóg ti mỹ: “hã tĩg,” he mũ, kỹ tóg tĩg ja nĩ, ga ù ra, Topê tỹ ti mỹ ga nĩm ke mũ ěn ra. Ā tỹ ki kagtĩg ra tóg ra tĩg ja nĩ. Ā jamã tá kãkutẽ kỹ tóg ã tỹ ki kagtĩg ěn ra vyr, Abraão ti. ⁹ Topê ki rã kỹ jẽ kỹ tóg ga ěn mĩ tĩg ja nĩgtĩ. Topê tỹ ti mỹ ga ěn nĩm sór ja vẽ, hã ra tóg tỹ ã tũ tũ ra tóg mĩ tĩg ja nĩgtĩ, tá. Kur tỹ ĩn krēm ěmãn kỹ tóg ga ěn mĩ tĩg ja nĩgtĩ, ti kósĩn tỹ Isaque mré, Isaque kósĩn tỹ Jacó mré ke gé. Ti krêkrê ag vỹ ti mré ga ěn venh ke ja nỹtĩ gé, hã kỹ Topê tóg Abraão mỹ tó ja nĩ, hã ra ag tóg ver vég tũ nĩ. ¹⁰ Ge ra tóg tovãnh ja tũ nĩgtĩ. Cidade tỹ Topê tũ ěn ve sór ja ti nĩ, ù tỹ tũg ke tũ pẽ ěn. Topê hã vỹ cidade ěn han. To jykren kỹ

tóg han. Ti pi(jé) ěprã ke ag cidade ri ke nĩ. Ēn ve sór kỹ tóg ti tovãnh ja tũ pẽ nĩ, hã kỹ tóg vé, Abraão ti.

¹¹ Sara fi vỹ Topê ki rã kỹ nĩ ja nĩgtĩ gé, hã kỹ fi tóg ã kófa pẽ ra (fi tóg) kufyg ja nĩgtĩ, Topê tỹ fag tỹ tag to tar han kỹ, Sara fi, fi mên tỹ Abraão mré. Ũ tỹ fag mỹ: “kósĩn ve jé ājag tóg ke mũ,” he mũ ěn vỹ kri fi kỹ fag tóg ve ja nĩgtĩ. ¹² Hã kỹ ùn pir ěn, ùn kófa pẽ ěn krêkrê vỹ e tãvĩ nỹtĩ, krĩg e ěn ri ke, goj fyr mĩ rỹnhryj e ěn ri ke, goj kafã tũ fyr ěn mĩ rỹnhryj e ěn ri ke.

¹³ Topê ki ge kỹ nỹtĩn kỹ ag kãgter, Abraão, Isaque, Jacó. Topê vỹ ag mỹ ga ěn tó ja nĩ, hã ra ag tóg ve ja tũ nĩ ver. Ājag tỹ ve pẽ han tũ ra ag kãgter. Ve sĩ han ja ag tóg nỹtĩgtĩ, Topê tỹ ag mỹ ga tó ja ti, hã ra ag tóg ve pẽ han ja tũ nĩ kỹ tóg ag mỹ ěg tỹ kór há tá nén ù vég mũ ri ke nĩ ja nĩgtĩ. Ag tỹ venh ke to tóg ag mỹ sér gy tĩ hã ra. “Tag ki, ga kri ěg tóg ùn pygsa mũ ěn ri ke han tĩ, ěg jamã vỹ tỹ tag ki ke tũ nĩ,” he ag tóg tĩ. ¹⁴ Ag jamã pẽ jãvãnh kỹ ag tóg ga kri mũ ja nĩgtĩ, hã kỹ ag tóg: “ěg jamã pẽ tũ vẽ, tag ki,” he ja nĩgtĩ. ¹⁵ Ag pi(jé) ājag jamã sĩ ěn ra vỹn vỹn ke sór ja nĩgtĩ, hã kỹ ag tóg vỹn vỹn ke ja tũ nĩ. ¹⁶ Ēmã há pẽ ěn ve sór ja ag tóg nĩgtĩ, kanhkã tá. Hã kỹ ag tóg Topê mỹ há ja nỹtĩ, ti pi(jé) ag to mỹ’ag ke mũ. Hã kỹ tóg veso: “Abraão Topê, Isaque Topê, Jacó Topê vỹ tỹ ĩnh nĩ,” he tĩ, Topê ti. Cidade han tóg, ag mỹ, kanhkã tá.

¹⁷ Abraão vỹ Topê ki rã kỹ nĩ ja nĩgtĩ gé, hã kỹ tóg Isaque nenh ja tũ nĩgtĩ. Topê mỹ tóg ti fẽg, Topê tỹ ti mỹ ti kósĩn to vĩn kỹ. Ti kósĩn pir ja vẽ, hã ra tóg ti tãnh kren, Topê mỹ. ¹⁸ Topê tóg Abraão mỹ: “ã kósĩn tỹ Isaque krê vỹ e nỹtĩnh mũ,” he ja nĩgtĩ. ¹⁹ Kỹ tóg, ti tỹ ti tãnh kren kỹ tóg: “Topê hỹn ti rĩn mãn ki kanhró nĩ, isỹ ti tén kỹ,” he mũ. Hã kỹ tóg ti ve mãn gé. Ti tỹ ti tãnh kren kỹ tóg Topê mỹ ti tỹ ti tãnh ri ke nĩ ja nĩgtĩ,

hã ra tóg ti ve măn, Topê tỹ ti mỹ: “ti tãnh tũg ra,” hen kỹ.

²⁰ Isaque vỹ Topê ki rã kỹ nĩ ja nĩgtĩ gé, hã kỹ tóg Jacó mỹ vĩ há han, Esaú mỹ ke gé, ti tỹ ag mỹ ag tỹ nén venh ke ên tó kỹ.

²¹ Jacó vỹ Topê ki rã kỹ nĩ ja nĩgtĩ gé, hã kỹ tóg ă ter ke to hã (tóg) José krê régre ên ag mỹ vĩ há han gé. Kỹ tóg ă vătó to jê kỹ (tóg) Topê krêm mũg ke mũ, kỹ tóg Topê mỹ: “Topê vỹ tỹ ă nĩ,” he ja nĩ.

²² José vỹ Topê ki rã kỹ nĩ ja nĩgtĩ gé, hã kỹ tóg ă ter ke nỹ ra tóg ă ter ken jo (tóg) Israel ag mỹ kămén ja nĩgtĩ, ag krê'krê ag tỹ ga tỹ Egito tá kãpanh ke ên ti. Kỹ tóg ag tỹ kãpanh ke ên tó kỹ (tóg) ag mỹ to vĩ ja nĩ, ag tỹ ti kuka gé kãmũnh jé, ag kãmũnh ken kỹ.

²³ Moisés han mũ fag vỹ Topê ki ge kỹ nỹti gé, hã kỹ fag tóg Moisés péju, ti mur kar kỹ, kysă tăgtũ ki. Fag mỹ tóg sĩnvĩ nĩ ja nĩgtĩ, gĩr sĩ ti. Kỹ fag tóg pã'i mág kamêg sór ja tũ nĩ, pã'i mág tỹ: “gĩr gré ag kãgtén kãn nĩ,” he mũ ra.

²⁴ Moisés vỹ Topê ki rã kỹ nĩ ja nĩgtĩ gé, hã kỹ tóg, ă mog kar kỹ (tóg): “inh pi(jé) tỹ Faraó kósin fi kósin nĩ,” he ja nĩgtĩ. ²⁵ Ti tỹ Topê povo ag mré jagtar nĩ ra tóg ti mỹ tỹ nén ũ tũ nĩ ja nĩgtĩ. Hã ra tóg Egito tá ke ag mré rico nĩ sór ja tũ nĩgtĩ. Topê vĩ mranh kỹ ag tóg ón kỹ rico nỹti ja nĩgtĩ, Egito tá ke ag. ²⁶ Êg tỹ Cristo tugrĩn jagtar nỹti tag tóg ti mỹ êg rico nỹti tag há kãfór nĩ ja nĩgtĩ, hã kỹ Egito tá ke ag rico tag tóg ti mỹ kórég ja nĩgtĩ, Moises mỹ. Topê tỹ kanhkã tá êg mỹ nén ũ há nĩm ke ên hã to tóg jykrén ja nĩgtĩ.

²⁷ Moisés vỹ Topê ki rã kỹ nĩ ja nĩgtĩ, hã kỹ tóg ga tỹ Egito tá kãkutê ja nĩgtĩ, pã'i jũ kamêg vãnħ nĩn kỹ. Topê vég tũ êg tóg nĩgtĩ, hã ra tóg Topê hã ki êkrén kỹ nĩ ja nĩgtĩ. Ti vĩ tóg ti mỹ ti tỹ ti vég nĩ ri ke nĩ ja nĩgtĩ. Hã kỹ tóg krónħ ke ja tũ nĩgtĩ, Moisés ti.

²⁸ Moisés vỹ Topê ki rã kỹ nĩ ja nĩgtĩ, hã kỹ tóg Israel ag mỹ festa tỹ Páscoa ên nĩm. Ag mỹ tóg: “ĩn jãnkă to tĩn, ovelha kyvénħ tỹ,” he mũ, “Topê tỹ jênê jafă tỹ ăjag krê ve ag kãgtén tũ nĩ jé,” he ja tóg nĩgtĩ, Moisés ti, Israel ag mỹ. Hã kỹ ag tóg festa tỹ Páscoa ên han tĩ, ũri.

²⁹ Israel ag vỹ Topê ki ge kỹ nỹti ja nĩgtĩ gé, hã kỹ ag tóg goj kusũg he mũ ên kă rêgrêg hã han inhă, êg tỹ ga kri mũ ên ri ke han ag tóg. Mrinmrér ja tũ ag tóg nĩgtĩ. Egito tá ke ag tỹ ag nón kă rêgrêg sór mũ ra tóg ag kri rũm ke mũ sir, goj ên ti, kỹ ag tóg nỹgnỹr kỹ kãgter kãn mũ sir.

³⁰ Israel ag vỹ Topê ki ge kỹ nỹti ja nĩgtĩ gé, hã kỹ cidade tỹ Jericó jy ró ên vỹ vêsóg ki kórég kãn ja nĩgtĩ. Ag tỹ pénĩn mũ tỹ 7 (ke) han kar kỹ tóg vêsóg ki kórég ja nĩ, ag tỹ kură tỹ 7 (ke) ki pénĩn mũ kar kỹ.

³¹ Raabe fi vỹ Topê ki rã kỹ nĩ ja nĩgtĩ gé. Ũn mén (ka)mê vỹ tỹ fi nĩ ja nĩgtĩ, hã ra fi tóg Topê ki rã. Hã kỹ fi tóg Israel ag mỹ: “ha kăge jêg,” he ja nĩ, ũ tỹ fi jamă venh kãmũ mũ ag. Hã kỹ ag tóg fi tén ja tũ nĩ gé. Cidade tá ke kar kãgtén ja ag tóg nĩgtĩ, ag tỹ Topê vĩ mẽ sór ja tũ tugrĩn, hã ra fi tóg inhă kren ja nĩgtĩ.

³² Inh hỹn ũ tónħ ke mũ gé ver'. Isỹ ag tó kãn sór mũ ra tóg inh mỹ vênħmỹ tĩ. E ag nỹti, e tăvĩ, Gideão ti, Baraque ti, Sansão ti, Jefté ti, Davi ti, Samuel ti, Topê vĩ tó tĩ kar ag. ³³ Topê ki ge kãn kỹ ag nỹti, hã kỹ ag tóg pã'i ag mré vênħ génh han, hã ra ag tóg pã'i ên ag tỹ hên ri ke kãn. Vênħ jykre kuryj han ag tóg tĩ, vênħ kar mỹ. Kỹ Topê tóg ag mỹ ă tỹ ag mỹ vênħ jykre há tó mũ ên tỹ ag mỹ ven mũ sir. Mĩg tỹ ũ măn sór mũ ra tóg ti tỹ hê ri ke ja tũ nĩgtĩ gé, mĩg ti. ³⁴ Pĩ gru jagy ên vỹ ag tỹ hê ri ke ja tũ nĩgtĩ gé, ũ tỹ Topê ki ge kỹ nỹti ag. Ũ tỹ rógro tỹ ag tén sór mũ ra tóg ag tỹ hê ri ke ja tũ nĩgtĩ gé. Ag krój nỹti ra ag tóg tar gy nỹti ja nĩgtĩ. Vênħ génh han kỹ ag tóg rará há

han, kŷ ag tóg ag kato vāsānsān mŷ ag tŷ pétē han gé. ³⁵ Ūn tŷtá ũ fag vŷ, ājag krē ter kar kŷ fag vŷ ag ve măn, ag tŷ ag rīn măn kŷ, Topē ki ge kŷ nŷtī ēn ag.

Hā ra ag kato vāsānsān mŷ ag vŷ ag to jū mág, kŷ ag tóg ag kāmī ũ ag vóg kónān gé. Kŷ ag tóg ag kygrēg gé, ũ tŷ Topē ki ge kŷ nŷtī ag, ag tŷ Topē to jū kŷ, ũ tŷ ag kygrēg mŷ ag. Ag mŷ ag tóg: “ājag tovānh jé ēg tóg ke mŷ, ājag tŷ Topē tovānh kŷ,” he ja nŷgtī, hā ra ag tóg Topē tovānh sŷr ja tŷ nī. Ag tŷ kanhkā tá rīnrīr nŷtī sŷr ja vē, hā kŷ ag tóg Topē tovānh ja tŷ nī. ³⁶ Ag kāmī ũ ag to ag tóg é he mŷ gé, kŷ ag tóg ag mrānmrān gé, ag sigse ag tóg, ke gé, kŷ ag tóg vēse jafā kātá ag vām gé. ³⁷ Pó tŷ ag pin kŷ ag tóg ag kăgtén gé, ránran jafā tŷ ag tóg ag ránran gé, serrote tŷ. Rógro tŷ ag tóg ag kăgtén gé, Topē ki ge kŷ nŷtī ag. Ag tŷ hē mī mŷn kŷ ag tóg carneiro fār tŷ kur rīnh ja nŷgtī, cabrito fār tŷ kur ke gé, ag tŷ Topē ki ge tŷgrīn jagtar nŷtīn kŷ. Vējēn ve ja tŷ ag tóg nŷgtī kejēn, jagāgtar ag tóg nŷtī, ag vóg kónān ja ag tóg nŷgtī gé. ³⁸ Ag mré ke ag vŷ kórég pē nŷtī ja nŷgtī, hā kŷ ag tóg ūn há tag ag to kórég nŷtī ja nŷgtī. Kŷ ag tóg ga kórég kri mŷ ja nŷtŷgtī, ag jo pétē kŷ, sŷr kri ag mŷgtī, kŷ ag tóg pānónh nor kăki nŷtī ja nŷgtī gé, ga nor kăki ke gé, ũ tŷ Topē ki ge kŷ nŷtī ag. Ēprā ke ag vŷ ag to jū mág nŷtī ja nŷgtī.

³⁹ Ag tŷ Topē ki ge kŷ nŷtīn kŷ tóg hā ra ag to há nī, Topē ti. Hā ra ag tóg tag ki ve ja tŷ nī ver, ag tŷ nén ve sŷr mŷ ēn ti, Topē tŷ ag mŷ nén tó ja ēn ti. ⁴⁰ Topē vŷ ēg to jykrén ja nī gé, hā kŷ tóg ver ag mŷ ven ja tŷ nī. Ti tŷ ēg mré ag mŷ ven sŷr vē, ēg tŷ jagnē mré kanhkā tá junjun jé.

Topē tŷ ēg kanhrān sŷr mŷ

12 Ha vé, e tāvī ag nŷtī, ũ tŷ ēg jo Topē tovānh tŷ ag. Ēg pénīn ag e nŷtī, ēg ve kŷ. Kŷ tóg há tī, ēg tŷ Topē

japry jagma mŷ há han ke ti, ti jamīn jagma. Ēg tŷ corrida han ri ke ti nī. Ēg tŷ tŷ vaj kŷ corrida han ken kŷ ēg tóg vēnhkán há han ke mŷ. “Sŷ tag han kŷ inh mŷ corrida to krónh kenh ke tŷ nī vŷ?” he ēg tī. “Ne nŷ isar han mŷ, corrida to?” he ēg tóg tī gé. Ēg tŷ nén han ke mŷ ēn tovānh ēg tóg tī, ēg tŷ corrida to krónh ke tŷ nī jé. Topē jykre ri ke ti nī, tag ti. “Tag mŷ Topē to isar han mŷ vŷ?” hemnī, ājag tŷ nén han ke mŷ ēn kar to. Ājag tŷ nén han ke mŷ tŷgrīn ti to tar nŷtīn kŷn há tī. Ājag tŷ nén han ke mŷ ēn tŷgrīn ti to krónh kenh ha mē tīn kŷ han tŷg nī, tovānh nī. Ti vī mranh sŷr tŷg nī gé. Tag vŷ ēg kókén pē han tī. Ājag tŷ nén han tī tag kar tovānh kŷ ājag tóg ti jykre hā to krónh kenh ke tŷ pē nī. ² Jesus hā mī ēkrén nī, ti jykre hā tŷ krīn kŷ nŷtīmī. Ti hā vŷ ēg tŷ Topē ki rā han, kŷ tóg ēg tŷ ti tovānh ke tŷ han ēn ki kanhró nī gé. Cruz to sa kŷ tóg ter mŷr, ag tŷ ti to é he mŷ ra tóg ti mŷ tŷ nén ũ tŷ tī. Ti tŷ kar kŷ nén venh ke ēn mī tóg ēkrén ja nī, nén tŷ ti mŷ sér nīnh ke ēn mī. Hā kŷ tóg ūri Topē pēgja tá nī nī.

³ Jesus mī ēkrén nī. Ēprā ke kar ag vŷ ti kato vī ja nŷgtī, ũ tŷ Topē vī mranh mŷgtī ēn ag, ge ra tóg Topē to krónh ke ja tŷ nŷgtī, Jesus ti. Ti ki ēkrén kŷ to krónh krónh ke tŷg nī, to: “ron inh mŷ,” he tŷg nī gé.

⁴ Ha vé, Topē vī mranh tŷg nī. Ājag tŷ ti vī mranh sŷr mŷ tag kato vāsānsān nī, ke tŷ nī (mŷ) ra ājag tóg to ter mŷ. ⁵ Ājag mŷ Topē tŷ ēg jyvēn ēn kă jatŷ? Ēg jyvēn kŷ tóg tag tó, ha mē. Ā krē mŷ tóg tag tó, Topē ti, ha mē: “inh kósīn, isŷ ā vóg kónān kŷ inh mŷ vēnh nenh tŷg nī,” he tóg. “Isŷ ā mŷ vī tar han mŷ ra to krónh ke tŷg nī. ⁶ Isŷ ā to há nīn kŷ, hā kŷ sŷg ā mŷ vī tar han tī. Ā kanhrān jé ke vē. Isŷ ā mŷ: “inh kósīn vŷ tŷ ā nī,” hen kŷ sŷg ā mrānmrān tī gé, ā kanhrān ti jé,” he tóg, Topē vī tŷ rán kŷ nī ki.

⁷ Hã kÿ ti tÿ ājag mrānmrān tag to tar nÿtīmñi. Ājag kanhrān jé ke vē. Topē tÿ ājag mÿ: “inh krē,” he vē. Ēg panh vÿ ēg mrānmrān kÿ ēg kanhrān ja nĭgti gé. Vēnh kar jykren hã vē. Topē vÿ ā krē kar mrānmrān kÿ ag kanhrān ti. ⁸ Kÿ, ti tÿ ājag mrānmrān tũ nĩ ra ājag pi(jé) tÿ ti krē pē nÿtĭnh mũ vē'. ⁹ Ha vé, ēg han mũ fag vÿ ēg mrānmrān ti, ēg kanhrān jāvānh nĭn kÿ, kÿ ēg tóg fag kamēg ti. Kÿ ēg tóg Topē kamēg kāfōr han ke mũ, ũ tÿ ēg rĭnrĭr han mũ ti, ēg jóg mág ti. ¹⁰ Kÿ ũ tÿ ēg han mũ tóg ēg to ā jykre fi ja nĭgti. To jykren kÿ tóg ēg mrānmrān ti kejēn, ēg sĭn kã. Kejēn tóg ā tÿ kygnē kÿ nĩ ra ēg kanhrān sór ti gé, ēg panh ti. Hã ra Topē tÿ ēg mrānmrān kÿ tóg to jykren há han ti inhã. Ti tÿ ēg kãnhān há han sór vē, ēg tÿ ti ri kén kygnég tũ nĩ jé, ēg tÿ ti ri kén há tãvĩ nÿti jé. ¹¹ Ti tÿ ēg mrānmrān ēn kã tóg ēg mÿ sér tũ nĩ ver. Ēn kã tóg ēg mÿ jagy ti. Kar kÿ ēg tóg vāhã vég ti, ti há nĩ ja ti, ēg tÿ kanhrān há han kar kÿ. Ti tÿ ēg mrānmrān hã kÿ ēg tóg vēnh jykre há han ēn ki kanhrān mũ sir, jagnē krĭ kuprāg ki ēg kanhrān mũ gé sir.

Ēg tÿ jagnē tar han ke

¹² Krónh ke ve ājag tóg nĩ, kÿ ājag tóg tÿ ũn kaga tĭg kórég ēn ri ke nÿti. To tar' he mǎn nĩ, ājag tÿ mũ há han mǎn jé. ¹³ Topē japry kuryj hã jagma ēvānh nĩ, kÿ ũ tÿ ājag mÿ to krónh ke ha mē ēn ag vÿ ājag mré to tar' he mǎn mũ gé. Topē jykre tovānh sór nĩ ve ājag nÿti, hã ra tóg ājag tar han mǎn sór mũ.

¹⁴ Vēnh kar mré vēnh jykre kuryj han sórmiñi. Kÿ Topē vĩ ki króm kÿ kygnē sór tũg nĩ. Ēg tÿ tag to vāsān tũ nĭn kÿ ēg pi(jé) ēg jóg mág venh ke mũ'. ¹⁵ Vēnh ki rĭr há han nĩ, ājag kāmĩ ũ tÿ Topē tÿ ēg jagāgtān mũ tag to é he tũg jé. Ājag kāmĩ ũn pir tÿ vēnh jykre kórég to tar nĭn kÿ tóg ēg mÿ ti tÿ ũn e ag krĭn kónān ha mē ti, ag tÿ ti jykre kórég ēn ri ke nÿti

jé. Kÿ tóg ēg jakré kāmĩ vānh jagy ri ke nĩ. Ēg jakré kókég ti tĩ, vēnh jykre kórég tÿ ēg kókén ri ke. ¹⁶ Vēnh ki rĭr há han nĩ gé, ājag kāmĩ ũ tÿ Esaú jykre kórég ēn ri ke han tũ nĩ jé, ũ tÿ Topē kato vāsān tũ nĩ jé. Esaú vÿ Topē to é he ja nĭgti, kÿ tóg vējēn tugrĭn ā panh tÿ ti mÿ vĩ há han ke ēn kren. Ā jāvy mÿ tóg tovānh, ti panh tÿ ti mÿ vĩ há han ke ēn ti, ā jēn ke pir tugrĭn mÿr. Ti tÿ ā panh tÿ ti mÿ vĩ há han ke ēn to é he há vē. ¹⁷ Kar kÿ tóg mē sór ja nĩ, ti panh tÿ ti mÿ vĩ há han ke ti, hã ra tóg mēg tũ nĩ sir. Kÿ tóg fÿ ja nĭgti, ti panh tÿ ti mÿ vĩ há han jé, vāhã tóg ti mÿ e nĩ ja nĭgti, hã ra tóg sir rāké ja nÿ. Mēg tũ tóg nĩ sir, ti panh tÿ ti mÿ vĩ há han ke ti. Tag ri ke han sór tũg nĩ.

Topē jũ tÿ jagy pē

¹⁸ Vāsÿ Topē vÿ ēg jóg'jóg ve ag mÿ ā jykre nĭm ja nĭgti. Pānónh tÿ Sinai tá ag tóg junjun ja nĭgti. Pĩ ve ag tóg, tá, kÿ tóg tá kuty nĩ ja nĭgti gé, kuty pē, kóho jũ ke gé. ¹⁹ Kÿ trombeta ēn vÿ kyr ja nĭgti gé. Kÿ Topē vÿ ag mÿ vĩ ja nĩ gé. Ag tÿ ti vĩ mē kÿ ag tóg jūrĭn ke ja nĭgti, kÿ ag tóg ti mÿ to vĩ mũ, ti tÿ ag mÿ vēmén tũ nĩ jé, ti tÿ ag kãhmÿ Moisés hã mré vēmén jé, ēgno ki. ²⁰ Ag mÿ tóg: “ājag mēg ũ tÿ pānónh tag rā hã jun kÿ ti tén nĩ,” he ja nĩ, “pó tÿ ti pin kÿ, ājag krē ke gé, ājag prũ fag ke gé, ājag tÿ tá nēn vég mũ kar ēn ti. Ti tÿ pānónh tag vóg tugrĭn ti tén nĩ,” he ja tóg nĩ, Topē ti. Hã tóg ag mÿ e ja tĭgti. ²¹ Topē tÿ ag mré vēmén kÿ tóg ag mÿ e tãvĩ nĩ ja nĭgti, Moisés mré hã, hã kÿ tóg: “jūrĭn ke inh, mũmēg kÿ,” he mũ gé, Moisés ti.

²² Hã ra tóg ag tÿ nēn ve ja ēn ri ke tũ nĩ, ēg tÿ ũri Topē rĭnja tá jun ke ti. Pānónh ēn ri ke tũ ti nĩ, ēg tÿ kanhkā tá nēn venh ke ti. Ēg tÿ kanhkā tá jun ken kÿ ēg ter mǎn ke tũ nĩ gé, ēg tÿ kanhkā tá pānónh tÿ Sião he mũ ēn tá jun ken kÿ. Topē jamā tá ke vē, ũn rĭr mũ ēn jamā tá ke vē, hã vÿ: Jerusalém, he mũ, kanhkā

tá cidade ên ti. Topê tỹ jëgnê jafã ag vỹ tá nỹtĩ. E tâvĩ ag nỹtĩ, e tâvĩ, ti tỹ jëgnê jafã ag. Festa mág pẽ vê, tá. ²³Kỹ Topê krê sanh kar ag vỹ tá nỹtĩnh ke mũ gé, ùn tỹ Jesus ki ge kỹ nỹtĩ ag kar. Ag jygyj vỹ kanhkã tá rán kỹ nỹtĩ. Kỹ Topê vỹ tá nĩ gé, ù tỹ vênh kar jykre tugnỹm ke ti. Kỹ ù tỹ ãg jo Topê ki ge kỹ nỹtĩ ag kuprĩg vỹ tá nỹtĩ gé, ù tỹ ãg jo tá junjun mũ ên ag. ²⁴Kỹ Jesus vỹ tá nĩ gé, ù tỹ ãg mỹ vênh jykre tăg nĩm mũ ên ti, ù tỹ ãg jagfy ter mũ ên ti, kỹ ãg tóg ti kyvénh tugrĩn jãnhkri nỹtĩ, Topê tỹ ãg mỹ vênh pãte fón ti kỹ. Topê tỹ Abel kyvénh ven kỹ tóg jũ mũ, ù tỹ ti tén ja ên to. Topê tỹ Jesus kyvénh ven kỹ tóg jãvo ãg mỹ vênh pãte fón mũ. ãg tũn hã vê, Jesus tỹ ãg mỹ vênh jykre nĩm jan hã vê, hã kỹ tóg Moisés jykre kãfór nĩ, Jesus ti.

²⁵Hã kỹ jẽmê há han nĩ. ù tỹ ãgag mỹ Topê vĩ tó mũ ên vĩ jẽmê há han sórmnĩ. ãg jóg'jóg ve ù ag vỹ Topê vĩ mẽ sór ja tũ nĩgtĩ, ti tỹ ag jyvên mũ ra. Hã kỹ ag krenkren ja tũ nĩ. Kỹ ãg krenkren ke tũ nĩ gé, ãg tỹ ù tỹ kanhkã tá nĩ ên to ãg mré vēmén sór mũ ên vĩ jẽmê sór tũ nĩn kỹ, ti tỹ ãg jyvên mũ ti. ²⁶Vãsỹ tóg, ã tỹ ãg jóg'jóg ve ag mré vēmén kỹ tóg ga tỹ ragra ke han ja nĩgtĩ. ùri tóg ãg mỹ tag tó, ha mẽ. “Ga tỹ ragra ke pir han măn jé sóg ke mũ,” he tóg. “Ên kã kanhkã vỹ ragra ke mũ gé, ha vemnĩ,” he tóg. ²⁷Ti tỹ: “ke pir han măn jé sóg ke mũ,” hen kỹ ãg tóg ki kanhró nỹtĩ, ti tỹ ã tỹ nén han ja tag tỹ tũ' he sór mũ ti, ti tỹ ga tỹ ragra kenh ken ki. Nén ù tỹ ragra kenh ke tũ ên hã tóg nĩnh ke mũ inhhã, hã vỹ: “Topê jamã, he mũ. ²⁸Kỹ tóg há ti, ãg tỹ Topê mỹ: “há ti nĩ, ã tỹ ãg mỹ nén han mũ ti,” hen kỹ. ãg jamã tăg vỹ inhhã ragra kenh ke tũ pẽ nĩ, ti tỹ ãg mỹ ãg jamã nĩm ke ên ti. Kỹ tóg há nĩnh mũ gé, ãg tỹ Topê rãnhraj han há han kỹ, ti tỹ ti mỹ sér nĩ jé. Ti kamẽg jé ãg tóg ke mũ gé, ãg tỹ tóg jũrũn kenh mũ. ²⁹Topê vỹ pĩ tỹ nén ù kar kugprũg mũ ri ke nĩ.

Topê tỹ ãg jyvên

13 Jesus ki ge kỹ nỹtĩ ag tỹ jagnê to há nỹtĩ to krónh ke tũg nĩ. ² ù tỹ kuvar há tá ãgag to pasa ken kỹ ti mỹ: “inh mré jẽ,” hemnĩ. ãg jo ke ù ag tóg, ag tỹ ù ag to: “inh mré nỹtĩ,” hen kỹ (ag tóg) Topê tỹ jënê jafã ag mỹ: “inh mré nỹtĩ,” he ja nĩgtĩ, ag tỹ ag ki kagtũg (hã) ra. Hã kỹ tag han nĩ. ³ ùn sigse kỹ nỹtĩ ag ki rĩrmnĩ. ãgag tỹ kejên Jesus tugrĩn sigse kỹ nỹtĩnh ke tag mĩ êkrén nĩ, hã kỹ jagnê ki rĩr há han nĩ. Ag tỹ ùn vóg kónãn mũ ag ki rĩrmnĩ gé. Kejên ag tóg ãgag vóg kónãn ke mũ gé, Jesus tugrĩn, hã kỹ ag ki rĩr há han nĩ.

⁴ ù prũ fi to én tũg nĩ, ù mén to én tũg nĩ gé. ãgag prũ nỹtĩn kỹ ù fi mré nỹ sór tũg nĩ, ãgag mén nỹtĩn kỹ ù mré nỹ sór tũg nĩ gé. Topê vỹ ù tỹ vênh jykre kórég han (ka)mẽ ên ag to jũnh ke mũ, ù tỹ fag mré nỹ sór (ka)mẽ ên ag to, fag tỹ ag mré nỹ sór (ka)mẽ ên fag to ke gé.

⁵ Rico nỹtĩ sór tũg nĩ gé. ãgag tỹ nén vэг mũ ên vỹ há nĩ. Topê vỹ ãg mỹ tag tó, ha mẽ: “ãgag kã jatũ' henh ke tũ pẽ sóg nĩ, ãgag ki sóg rĩr nĩ nĩ,” he tóg, Topê ti. ⁶ Hã kỹ tag tómnĩ, ha mẽ: “ãg jóg mág vỹ inh ki rĩr ke mũ,” hemnĩ. “Ti hã kamẽg isóg mũ. Êprã ke ù vỹ inh vóg ke tũ pẽ nĩ, ti tỹ inh ki rĩr nĩn kỹ,” hemnĩ, Topê vĩ kri fi kỹ.

⁷ ù tỹ ãgag mỹ Topê vĩ tó vén mũ ên mĩ êkrén nĩ. Ga kri mũn kỹ ag tóg Topê tovãnh ja tũ pẽ nĩgtĩ, ãgag tỹ ti tovãnh tũ ra ag tóg kãgter ja nĩ. Ag ri ke han sórmnĩ, ti ki rã ên tovãnh sór tũg nĩ gé, ag ri ke han nĩ. ⁸ Jesus Cristo hã vỹ ter tũ nĩ. Ti tỹ vãsỹ nén to jykrén mũ ên hã han ti tĩ, ùri, kỹ tóg hã han măn ke mũ gé. Tỹ ù han ke tũ ti nĩ, kỹ tóg kurã krỹg ja tũ nĩ gé. ⁹ ù tỹ ón kỹ ãgag mỹ nén ù ù tó sór mũ ên vĩ jẽmê tũg nĩ, ag tỹ ón kỹ Topê to nén ù ù tó mũ ra. ãgag krĩn kónãn jé ag tóg ke mũ. ãgag tỹ tỹ prãnh ke han sór jé ag tóg ke mũ. Topê vỹ ãgag

tar han ki kanhró nĩ, ājag jagāgtān kŷ. Ũ tóg: “ā tŷ vējēn tag kon kŷ ā tóg Topē jykre to tar nĩ,” he tĩ. Ag ón vē. Vējēn vŷ ěg tŷ ti jykre to tar nĩ han ke tũ pē nĩ. Topē hā ne ěg tar han ki kanhró nĩ’.

¹⁰ Ha mē, Moisés jykre ki Topē mŷ nén ũ pũn tĩ ag pi(jé) ěg mré Jesus jamĩn ěn konh ke mũ’. ¹¹ Ag tŷ Topē tũ ki rĩr tĩ to pāi mág ěn vŷ ag mēg ũ tānh kŷ ti kyvénh ma tĩ tĩ, ag tŷ to: “Topē nigjafā,” he mũ ěn ra. Tĩ tŷ ag mēg kyvénh ěn tŷ ěg tŷ Topē vĩ mranh mũ tŷ tũg’ he sór vē. Hā ra ag tóg ājag jamā jy ró pānĩ to ag tóg ājag mēg tānh kŷ pũn tĩ. ¹² Hā kŷ Jesus tóg cidade jy ró ěn pānĩ to ter ja nĩ gé, ti tŷ ěg jagfy ter kŷ, ěg jānhkri han jé. ¹³ Kŷ ěg tóg ti jagtar ri ke han ke mũ gé. Ũ tŷ ti ki ge jāvānh ag jykre han tũ ěg tóg nĩ, kŷ ěg tóg ag mré han ke tũ nĩ gé. Jesus tŷ cidade jy ró pānĩ to ter ja ěn mĩ ěg tóg ěkrén kŷ nŷtĩ, kŷ ěg tóg ũ tŷ ti ki ge tũ ag mré ag jykre han ke tũ pē nĩ. ¹⁴ Tag ki, ga kri ěg tóg ěg jamā pē venh ke tũ nĩ. Kanhkā tá ěg tóg ve sór mũ, ěg jamā ti.

¹⁵ ěg tŷ Jesus tigrĩn Topē mŷ vĩ há han kŷ tóg há tĩ. ěg tŷ nén vég mũ kar to ěg tóg ti mŷ: “ěg mŷ tóg há tĩ, ěg mŷ tóg sér tĩ,” henh ke mũ. ěg tŷ ti mŷ nén ũ pũn mũ ri ke tóg nĩ, presente ri ke tóg nĩ, ěg vĩ tag. “Ěg jóg vē,” he jé ěg tóg ke mũ gé, ti to. Tĩ mŷ vĩ há han ke to krónh ke tũg nĩ. ¹⁶ Jagnē ki rĩrmnĩ gé, jagnē mré nén kar han kŷ. Tag to krónh ke tũg nĩ gé. ěg tŷ Topē mŷ nén ũ pũn ri ke ti nĩ, ěg tŷ ti mŷ presente han ri ke ti nĩ, ěg tŷ jagnē ki rĩr tĩ ti, kŷ tóg ti mŷ sér tĩ.

¹⁷ Ũ tŷ ājag kanhrān tĩ ěn ag vĩ jēmēmni, ag tŷ ājag mŷ nén tó mũ ěn ki króm nĩ. Ājag ki rĩr ag tóg nigti, ājag tŷ Topē tovānh tũ nĩ jé, kŷ Topē vŷ ag rānrhāj tugnŷm ke mũ. Ājag tŷ ag vĩ

jēmēn kŷ tóg ag mŷ kufy tũ ninh mũ, ag rānrhāj ti, kŷ tóg ag mŷ sér tĩnh mũ. Tĩ tŷ ag mŷ kufy ninh kŷ tóg há tũ nĩ gé, ājag mŷ.

Ěg tŷ Topē mré vēmén ke

¹⁸ Inh jagfy Topē mré vēmén nĩ. Nén ũ kórég han ja tũ inh nĩ, ki kanhró sóg nĩ. Isŷ nén ũ kuryj han sór vē mŷr, tag hā to sóg jykren tĩ. ¹⁹ Kŷ inh jagfy Topē mré vēmén nĩ, Topē tŷ kānhmar ājag to inh jēnē mān jé. Tĩ mŷ tag to vĩn kŷ krónh ke tũg nĩ.

²⁰ Topē mré sóg vēmén tĩ ājag to. Ěg krĩ kuprāg ti tĩ. Kŷ tóg Jesus tĩ, ěg Senhor ti rĩn mān ja (ti) nĩ gé, ti tŷ ěg jagfy ter kar kŷ. Ěg jagfy ter kŷ tóg ũ tŷ mé ki rĩr tĩ ěn ri ke nĩ, hā ra tóg ěn kāfór nĩ gé, ti tŷ ěg ki rĩr há han ninh kŷ. Ěg jagfy ter kŷ tóg ěg mŷ vēnh jykre tág ěn nĩm ja nĩ, ũ tŷ tũ’ he vānh ěn. ²¹ Topē hā mŷ sóg to vĩ mũ, ti tŷ ājag tar han jé, ājag tŷ nén (ũ) tŷ ti mŷ há nĩ ěn hā han jé. Tĩ há vŷ Jesus Cristo mŷ: “ag tar han nĩ,” he ja nĩ. Tĩ hā mŷ ěg tóg vĩ há han ke mũ, Jesus Cristo mŷ, kŷ tóg tũ’ henh ke tũ nĩ, ěg tŷ ti mŷ vĩ há han ke ti. Amém.

²² Inh kanhkā, sŷ ājag mŷ tag tó sór ja vē. Jatun mŷ mē sórmnĩ, sŷ ājag jyvēn mũ tag. Inh pi(jé) vēnh rānrān mág han. Vēnh rānrān sĩ han sóg ājag mŷ.

²³ Ha mē, ěg régre tŷ Timóteo vŷ se kŷ jē mān tũ nĩ ha. Tĩ kava ag huri. Tĩ tŷ kānhmar ki jun kŷ tóg inh mré ājag venh kātĩg ke mũ.

²⁴ Ājag pāi’ kar ag mĩ sóg ěkrég tĩ, Topē ki ge kŷ nŷtĩ kar ag mĩ ke gé. Tag ki ke ag, ga tŷ Itália ki Topē ki ge kŷ nŷtĩ ag vŷ ājag mĩ ěkrég tĩ gé.

²⁵ Topē jé ājag tar han kān.

Hā vē.

TIAGO TỸ CARTA

1 Tiago tỹ rá vê. Isỹ Israel ag mỹ rán hã vê. Ëg povo tỹ 12 (ke) vỹ tỹ ãjag nỹtĩ. Povo kar mĩ ãjag tóg mũgtĩ, fóg ag kar mĩ, kanhgág ag mĩ ke gé. Sỹ ãjag mỹ vênh rá jênê vê. Tỹ sóg Topê mỹ rãnrãj tĩ nĩ, ãg Senhor tỹ Jesus Cristo mỹ. Hã kỹ sóg ãjag mỹ rán kỹ jênêg mũ sir. ãjag mĩ sóg êkrég ti.

Ëg tỹ Topê vĩ to: hỹ mỹ vỹ? henh ke tũ

² Inh kanhkã', ãjag tỹ Jesus tugrĩn nén ù jagy ve kỹ to vênhmỹ nỹtĩ tũg nĩ. Mỹ sér nỹtĩmĩ hã ra. ³ Topê tỹ ãjag tỹ ti ki rã há han ja ve sór vê, hã kỹ ãjag tóg tag kar végtĩ. Kỹ ti tovãnh sór tũg nĩ, kỹ ãjag tóg ti to tar nỹtĩnh mũ, ãjag tỹ nén ù jagy végtĩ mũ ra ti tovãnh tũ nĩn kỹ. Tag to jykrén. ⁴ ãjag tỹ nén ù jagy végtĩ mũ ra to tar nỹtĩmĩ, ãjag tỹ komêr hã há nỹtĩ jé, Topê jykre ki króm há han kỹ. Komêr hã ãjag tóg kygnênh ke tũ nĩ, nén ù kar ki, ãjag tỹ ti to krónh ke tũ nĩn kỹ.

⁵ ãjag tỹ nén ù to jykrén tũ nĩn kỹ Topê mỹ to vĩmĩ, ti tỹ ãjag kanhrãn jé. Ëg kanhrãn jé tóg ke mũ, Topê ti. To tóg: “han ke tũ inh nĩ,” henh ke tũ nĩ, vĩ tar han ke tũ ti nĩ, ãg tỹ ti mỹ nén ù to vĩn kỹ. Ëg to tóg fe há nĩ, hã kỹ tóg ãg kanhrãn tag to há nĩ. ⁶ ãjag tỹ ti mỹ nén ù to vĩn kỹ: “ãg mỹ tóg han tĩ, Topê ti,” hemnĩ. “Tĩ mỹ inh mỹ han mũ vỹ?” he tũg nĩ. ãjag tỹ: “tĩ mỹ inh mỹ han mũ vỹ?” henh kỹ ãjag tóg vênh ke tũ nĩ, ãjag tỹ ti mỹ nén to vĩ mũ ên ti. Kỹ ãjag tóg goj ri ke nỹtĩ. Goj tóg kejên fagrĩnh mỹ krém krém ke tĩ, kãka tỹ ti kã nĩ kỹ. Kỹ tóg ra tĩg, tá kãtig ke mũ. Ên ri ke tóg nĩ, ù tỹ Topê vĩ kri fig tũ ên ti. ⁷⁻⁸ Fagrĩnh mỹ tóg Topê mỹ nén ù to vĩ tĩ, ti tỹ: “tĩ mỹ inh mỹ han mũ vỹ?” henh kỹ. Vênh ke tũ tóg nĩ sir. Krĩ régre ti nĩ. Nén ù to jykrén kỹ tóg kãnhmar nén ù hã to jykrén mãn mũ gé, vênh jykre pir han vãnh nĩn kỹ.

Ki kagtĩg tóg nĩ, hã kỹ tóg vênh ke tũ nĩ gé sir.

Ûn jagtar ag mré ùn rico ag jykre

⁹ Ëg Senhor tỹ Jesus mré ke ù ag tóg jagãgtar nỹtĩ. Hã ra ag tóg ãg Senhor ki ge kỹ nỹtĩn kỹ ùn rico ri ke nỹtĩ, ag tỹ tỹ Topê krê nỹtĩn kỹ. Kỹ tag to jykrén nĩ, ãjag mỹ sér tĩ jé, ãjag jagtar nỹtĩn kỹ. ¹⁰ Kỹ ãg Senhor tỹ Jesus mré ke ù ag tóg rico nỹtĩ hã ra. Ag tỹ ãg Senhor ki ge kỹ nỹtĩn kỹ ag tóg ùn jagãgtar ri ke nỹtĩ, Topê mỹ. “Ter jé ãg tóg ke mũ, kỹ tóg ãg mỹ há tĩ, Topê tỹ ãg jagãgtãn ken kỹ, ùn jagtar ag ri ke,” hemnĩ, ãjag rico nỹtĩn kỹ. Re fej ri ke ãg tóg nỹtĩ, ãg kar. ¹¹ Rã tỹ jun ke kỹ tóg rỹ jagy tĩ. Kỹ tóg tugtóg tĩ, re ti, kỹ ti fej tóg kógungun tĩ gé. Kỹ ti sĩnvĩ ên tóg tũ' henh mũ sir. Ên kãgter ri ke ãg tóg nỹtĩ gé. Kỹ ùn rico ag tóg ke tĩ gé, kãgter kỹ. Kỹ ag há ên tóg tũ' he mũ gé sir, ag rãnrãj tỹ ag mỹ sér nĩ ra.

Ëg tỹ Topê vĩ mranh sór mũ

¹² Kejên ù tóg Jesus tugrĩn ãg to jũ nĩ. Ëg tỹ hã ra Topê tovãnh tũ nĩn kỹ tóg há tĩ. Kỹ ãg Senhor tóg ãg mỹ ãg rĩr krỹg ja tũ ven ke mũ, ãg tỹ ãg jagãgtar mũ ra ti tovãnh tũ nĩn kỹ. Kỹ tóg ãg tỹ carreira ki ka féj tỹ coroa ganhar he mũ ên ri ke nĩ sir. Ëg Senhor vỹ ãg mỹ: “rĩr krỹg ja tũ ve jé ãjag tóg ke mũ, ãjag tỹ iso há nỹtĩn kỹ,” he ja nĩgtĩ, hã kỹ tóg ãg mỹ tỹ presente han ke mũ.

¹³ ãjag tỹ Topê vĩ mranh sór mũn kỹ to: “Topê vỹ inh krĩn, sỹ ti vỹ mranh jé,” he tũg nĩ. Topê pi(jé) vênh jykre pãno han ja nĩgtĩ. Kỹ ù pi(jé) to Topê krĩn kónãn tĩ gé. Kỹ tóg ãg krĩn kónãn tũ nĩgtĩ gé (mỹr), Topê ti. ¹⁴ ãg tỹ Topê vĩ mranh sór kỹn ge nĩ, hã nỹ ve nĩ, kỹ ãg tóg to éntĩ. ¹⁵ ãg tỹ to éntĩ kỹ ãg tóg to jykrén mág nĩ. Kỹ ãg tóg sir han sór mũ. Ëg tỹ han sór kỹ ãg tóg han mũ. Kỹ ãg tỹ ti vỹ mranh vê sir. Kar kỹ ãg tóg mranh mãn', mranh mãn', he mũ gé, vênh jykre pãno

vê sir. Hã ra ãg tóg to nũgme ki vár ke mũ, inferno ki.

¹⁶ Inh kanhkã', ãjag to sóg há tâvĩ nĩ. Hã kũ sóg ãjag mĩ: "kygnẽ tũg nĩ, Topẽ to," he mũ. ¹⁷ Topẽ hã ne ã pin kũ ãg mĩ nẽn ù há kar han tĩ'. Nẽn ù há tâvĩ han tóg tĩ, Topẽ ti, ãprã ke ag mĩ, hã vỹ: ãg, he mũ. Ti hã tóg jẽngrẽ hyn han'. Rã tỹ ãg ki kupũn tũ nĩn kũ tóg fẽnja tĩ. Hã ra Topẽ tóg tag han tũ nĩgtĩ (mỹr). Ti pi(jé) kejẽn ãg ki rĩr tũ nĩgtĩ'. ãg ki rĩr tóg nĩ nĩ hã ra. ¹⁸ Ti hã tóg ãg han mãn', ãg tỹ ti ki ge kũ. Ti tỹ ãg han mãn sór kũ tóg ãg han mãn. ãg to tóg ã vĩ há jẽnẽ. Vẽn h vĩ há tag tỹ tóg ãg han mãn mũ sir. Ti tỹ ãg han mãn kũ ãg tóg ti tỹ nẽn han mũ kar kri ke nỹtĩ, ãg tỹ tỹ ti krẽ nỹtĩn kũ.

ãg tỹ Topẽ vĩ ki króm ke

¹⁹ Inh kanhkã', tag to jykrén mág nĩ. Û tỹ nẽn ù há kãmén kũ jẽmẽ há han nĩ. Kãnhmar vĩ tũg nĩ. Kãnhmar jũ tũg nĩ gé. ²⁰ ãg jũ nỹtĩn kũ ãg tóg Topẽ jykre han tũ nĩgtĩ (mỹr), ti jykre kuryj ti. Hã kũ jũ tũg nĩ. ²¹ Hã kũ nẽn tỹ ãg kavénh tĩ ẽn tovãnh kãn nĩ, vẽn h jykre pãno mré hã. ãg kókég tóg tĩ, ãg fãn tóg tĩ, vẽn h jykre pãno ti. Tovãnh ra. Jatun mĩ Topẽ vĩ mêmni. Topẽ hã ne ã vĩ tỹ ãg kanhrãn'. ãg tỹ kri fi kũ ãg tóg krenkren ke mũ. ²² Kũ Topẽ vĩ han kũ nỹtĩmni. ãjag tỹ mẽg mũ (hã) ra ki króm tũ nĩn kũ ãjag tóg krenkren ke tũ nĩ. Ón kũ ãjag tóg: "kren jé sóg ke mũ," henh ke mũ. ²³ ãg tỹ jẽmẽg mũ (hã) ra ki króm tũ nĩn kũ ãg tóg tag ri ke nỹtĩ, ha mẽ. Kejẽn ù tóg vẽn h vég mũ, ki vẽn h ve jafãn ki (mỹr, ha mẽ). Kũ tóg ã kakã vég mũ sir. ²⁴ ã kakã ve kar kũ tóg to jykrén mãn tũ nĩ. Kũ tóg ki kagtĩg' he mũ. Tĩg tóg mũ, kũ tóg ã kakã ki kagtĩg' he mũ. Kũ tóg fagrĩnh mĩ vẽn h ven ja nĩ sir. Ge ãg nỹtĩ, ãg tỹ Topẽ vĩ jẽmẽg mũ (hã) ra ki króm tũ nĩn kũ. Kũ ãg tóg fagrĩnh mĩ mẽ ja nĩ sir. ²⁵ ãg tỹ ti vĩ to jykrén mág kũ tóg hã ra ãg mĩ sér tĩnh mũ. Topẽ vĩ vỹ há nĩ,

ti jykre ti. ãg jykre pãno tỹ tũg' he tóg tĩ, ãg tỹ han mãn tũ nĩn jé. Kũ ãg tóg ãg tỹ ti vĩ jẽmẽ kũ nỹtĩn kũ to jykrén ke mũ. Kã jatun ke tũ ãg tóg nỹtĩ sir. Kũ ãg tỹ ki króm kũ Topẽ tóg ãg mĩ vĩ há han ke mũ sir, ãg tỹ nẽn han mũ kar to.

²⁶ Û ag tóg Topẽ to: "ti to sóg há nĩ," he tĩ. Hã ra ag tóg ù to vĩ kónãn tĩ, ãjag vĩ to jykrén tũ nĩn kũ. Kũ ag tóg ón kũ: "ti to sóg há nĩ," he ja nĩgtĩ. Kygnẽg ãg tóg tĩ, ãg tỹ gen kũ. Hã kũ ãg tóg ón kũ: "ti to sóg há nĩ," he tĩ, ãg tỹ ù to vĩ kónãn kũ. ²⁷ ãg tỹ ãg jóg tỹ Topẽ to há nỹtĩn kũ, kũ ãg tóg tag han mũ, ha mẽ: ùn panh ter mũ kar jagãgtãn kãn ãg tóg tĩ, ùn mẽn ter ja fag ke gé, ùn jagãgtar fag. Fag ki rĩr jé ãg tóg ke mũ, fag mĩ há tĩ jé. Kũ ãg tóg nẽn ù vẽn hmĩ han ke tũ nĩ gé sir. Topẽ kato tẽ mũ ag jykre han ke tũ ãg tóg nĩgtĩ gé. Hã kũ ãg tóg ti mĩ kavéj tũ nỹtĩ sir. Hã kũ ãg tóg ón kũ: "Topẽ to sóg há nĩ," he tũ nĩgtĩ gé.

ãg tỹ jagnẽ to vẽn h jykre pir han ke

2 Inh kanhkã', ãg Senhor tỹ Jesus Cristo ki ãjag ge mũ mĩr. Pã'i kar kãfór vẽ (mỹr), ãg Senhor tỹ Jesus Cristo ti. Ge ra ãjag ne tóg ùn rico ag to há nỹtĩ', kũ ùn jagãgtar ag tóg ãjag mĩ tỹ nẽn ù tũ nỹtĩ. Ke tũg nĩ. ² Hẽn ri ke mũn ùn rico vỹ Topẽ vĩ jẽmẽn kãtig mũ, ãjag vẽn hmãn kũ. Ti kur vỹ há tâvĩ nĩ, kũ ti nĩgẽ kãnĩm ja vỹ tỹ ouro nĩ. Kũ ùn jagtar vỹ kãtig ke mũ gé, kur kórég tu kũ. ³ Kũ ãjag hỹn tóg ùn rico mĩ: "ha tag kã nĩ, vẽn h nĩg ja há kri," he tĩ. Jó ùn jagtar mĩ ãjag hỹn tóg: "ha tâ tá jẽ," he tĩ, ke tũ nĩn kũ: "ha inh mré nĩ, hã ra ãprã nĩ, gan kri," he ãjag hỹn tĩ. ⁴ Hã ki ãjag tóg ùn rico to há nĩ ve nĩ, ti tũ tugrĩn. Jãvo ãjag tóg ùn jagtar to é he mũ ve nĩ, ti jagtar nĩn kũ. Ke tũg nĩ. ãjag tỹ jagnẽ ri ke nỹtĩ to jykrén nĩ, ke tũ nĩ mũ ra ãjag tóg vẽn h jykre pãno han mũ.

⁵ Inh kanhkã', jẽmẽ há han ra. ãjag to sóg há nĩ (mỹr), hã kũ sóg ãjag jyvẽn mũ.

Topê vỹ ùn jagăgtar ag kuprêg, ag tỹ ti to ricon jé, ti ki ge kỹ. Ga mĩ mũn kỹ ag tóg jagăgtar nỹtĩ. Ēg Senhor ki ge kỹ ag tóg há nỹtĩ jăvo. Topê tỹ tỹ ěg pă'i nĩ ve jé ag tóg ke mũ, ag tỹ ti to há nỹtĩn kỹ. Topê hă ne tag tó ja nĩgtĩ, ěg tỹ ti venh ke ti, kỹ tóg han ke mũ, ă tỹ tó ja ěn ti. ⁶ Jăvo ăjag tóg ùn jagăgtar ag to é he tĩ. Ûn rico ag to ăjag tóg vĩ há han tĩ. Hă ra ùn rico ù ag tóg ăjag to kórég nỹtĩ gé. Kỹ ag tóg ăjag fóg mỹ ăjag to vĩ kónăn tĩ, ăjag fóg tỹ ăjag jé prêr jé. Kỹ ăjag tóg to jagtar nỹtĩ sir, ag tỹ ăjag to vĩ kónăn tĩ ěn to. Hă kỹ tóg sir vênhmỹ nỹ, ăjag tỹ ùn jagăgtar to é he ti. ⁷ Kỹ ùn rico ù ag tóg ěg Senhor to é he tĩ gé. Ti to ag tóg vĩ kónăn tĩ gé, hă ra ěg tóg tỹ ti mré ke nỹtĩ. Hă kỹ ag tóg ěg to vĩ kónăn mũ gé, ti to vĩ kónăn kỹ.

⁸ Topê tỹ văsỹ ěg mỹ vênh jykre nĩm ja ěn ki króm nĩ, hă vỹ: “ă régre to há nĩmnĩ, ă tỹ vêsô há nĩ ri ke nĩmnĩ, ă régre tỹ,” he ja tóg nĩgtĩ ěg mỹ, Topê ti. Kỹ tóg rán kỹ nĩ. ăjag tỹ tag han kỹ tóg há nĩ. ⁹ ăjag tỹ hă ra ùn rico to há nỹtĩn kỹ, ùn jagtar to kórég nỹtĩn kỹ, kỹ ăjag tóg ti vĩ mranh mũ sir, ti tỹ ěg jyvên ja ti. Kỹ Topê tóg ăjag to jykrén kónăn mũ, ăjag tỹ ti vĩ mranh kỹ.

¹⁰ Ha vé, hên ri ke mũn ěg kămĩ ù tóg Topê tỹ ěg mỹ vênh jykre nĩm ja kar ki króm tĩ. Hă ra tóg sir nén pir ki ti vĩ mranh mũ. Kỹ ti tỹ ti vĩ mranh kăn vê sir, ti vĩ pir mranh kỹ. ¹¹ Topê tóg ěg mỹ: “ă prũ tũ fi mré nỹ tũg nĩ, kỹ ă mén tũ mré nỹ tũg nĩ gé,” he ja nĩgtĩ. Kỹ tóg ěg mỹ: “jagnê tén tũg nĩ,” he ja nĩgtĩ gé. Hên ri ke mũn ěg tóg ěg prũ tũ fag mré nỹ tũ nĩgtĩ. Ēg tỹ hă ra jagnê tén kỹ ěg tóg ti vĩ mranh kăn mũ, ti tỹ ěg jyvên ja ti. ¹² Kỹ tag to jykrén nĩ, ăjag tỹ nén ù han ke to jykrén kỹ. Ēg Senhor vỹ ěg jykre kar vég tĩ, ti tỹ ěg tỹ ti jykre ki króm mũ ve sór kỹ. Kỹ ăjag jykre to jykrén nĩ, ăjag vĩ to ke gé. ¹³ Ēg tỹ jagnê jagăgtăn tũ nĩn kỹ tóg ěg jagăgtăn ke tũ nĩ gé, ěg Senhor

ti, ti tỹ ěg jykre tugnỹm ken kỹ, kură ěn kă. Ēg tỹ hă ra jagnê jagăgtăn kỹ tóg ěg jagăgtăn ke mũ gé, ti tỹ ěg jykre tugnỹm ken kỹ. Kỹ ti pi(jé) ěg vóg kónăn mũ sir’.

Ti ki ră hă

¹⁴ Inh kanhkă, ù tóg kejên: “ti ki sóg ră kỹ nĩ,” he tĩ, Topê to. Hă ra tóg ti vĩ han tũ nĩgtĩ. Kỹ tóg ón kỹ ti ki ră kỹ nĩ ja nĩ. Kren ke tũ tóg nĩ sir. ¹⁵ Kejên Jesus mré ke ù tóg kur vég tũ nĩgtĩ, vėjên vég tũ tóg nĩgtĩ gé, Jesus mré ke ù fi ke gé. ¹⁶ Kỹ ăjag kămĩ ù tóg hên ri ke mũn ti mỹ, fi mỹ tóg: “tăg’,” he mũ. “Ha tĩg, jatun mỹ. ă jé kusa męg tũ nĩ, ă jé kókĩr tũ nĩ,” he tóg mũ. Hă ra tóg fag mỹ nén ù nĩm tũ nĩ. Kỹ tóg fagrĩnh mỹ fag mỹ: “ă jé jagtar tũ nĩ,” he ja nĩ. ¹⁷ Ge ti nĩ, ěg tỹ ón kỹ: “ti ki ră kỹ sóg jé,” hen kỹ. Ēg tỹ ti vĩ han tũ nĩ kỹ ěg tóg fagrĩnh mỹ: “ti ki sóg ră kỹ nĩ,” he mũ sir. Nén ù tũ vê.

¹⁸ ăjag kămĩ ù tóg hên ri ke mũn: “ũ tóg Jesus ki ră kỹ nĩ, jăvo ù tóg ti jykre han tĩ,” he sór mũ, ăjag tỹ ti jykre han sór tũ nỹtĩn kỹ. Tag to sóg ăjag mỹ: “inh hỹn ne tugrĩn ki kanhrăn mũ, ă tỹ ti ki ră ja ti?” he mũ. “ă tỹ ti jykre ki króm vánh kỹ sóg ki kagtĩg nĩ. “Tĩ mỹ Jesus ki ră kỹ jě nĩ vỹ?” he jé sóg ke mũ ă to. ă jăvo sóg ti jykre han tĩ inhhă. Hă to ă tóg ki kanhró nĩ, sỹ ti ki ră kỹ jě ti,” he jé sóg ke mũ, ăjag tỹ inh ki jêmên kỹ.

¹⁹ “Topê vỹ tỹ ùn pir nĩ,” he ăjag tóg tĩ gé. ăjag tỹ ki hă tó vê. Kỹ Japo ag vỹ tag tó tĩ gé. “Pir tóg nĩ, Topê tĩ,” he ag tóg tĩ gé, Nén-Kórég ag. Ag tỹ ti pir ki kanhró (hă) ra ag tóg krenkren ke tũ nĩ, ag tỹ ti jykre han tũ nĩn kỹ. Hă kỹ ag tóg kamêgmęg kỹ jũrũn ke tĩ sir, ag tỹ Topê to jykrén kỹ, Japo ag. Hă kỹ ěg tóg ěg tỹ Topê kămén há (hă) ra krenkren ke tũ nĩ gé, ěg tỹ ti jykre han tũ nĩn kỹ. ²⁰ ăjag tỹ tag to jykrén tũ nĩn kỹ ăjag tóg krĩ tũ (pê) nỹtĩ (mỹr). Ēg tỹ ti vĩ ki króm tũ nĩn kỹ ěg tóg ón kỹ ti ki ge kỹ nỹtĩ. Nén ù tũ

vê sir, êg tỹ ti ki ge kỹ nỹtĩ tag ti. Êg mỹ tóg nén ũ há han ke tũ nĩ.

²¹ Êg jóg'jóg ve tỹ Abraão to jykrén nĩ. Topê tóg ti mỹ: “ã kósın tỹ Isaque tânkh kỹ pũn, inh mỹ,” he ja nĩ. Kỹ tóg ti mỹ: “hej,” he ja nĩ sir, Abraão ti. Hã kỹ tóg Topê mỹ há nĩ sir, Abraão ti, ti tỹ ti vĩ ki króm to há ja nĩn kỹ. Kỹ tóg ti to: “inh ki rã há han ja ti nĩ,” he mũ, Topê ti, Abraão to. ²² Ve ra ha. Ti tỹ Topê ki rã kỹ jẽn kỹ, hã kỹ tóg ti mỹ: “hej,” he ja nĩ, Abraão ti. Kỹ tóg, ti tỹ ti mỹ: “hej,” hen kỹ (tóg) ti ki rã kỹ jẽn to tar nĩ sir, Topê vĩ ki króm ke to. Ge ti nĩ (mỹr). ²³ Rãn kỹ tóg nĩ gé, Abraão ti, kỹ tóg: “Topê vĩ kri tóg fi, Abraão ti,” he mũ, Topê vĩ tỹ rãn kỹ nĩ ki. “Hã kỹ êg jóg mág tóg ti to: “inh ki rã há han ja ti nĩ,” he ja nĩtĩ. Kỹ Topê tóg ti to: “ũ tỹ iso há nĩ ên,” he tĩ,” he tóg, Topê vĩ tỹ rãn kỹ nĩ ki, Abraão to. ²⁴ Hã ki ajag tóg vég mũ. Êg tỹ ti vĩ han kỹ tóg êg to: “inh ki rã há han ja ti nĩ,” henh ke mũ gé. Êg tỹ ón kỹ ti ki rã kỹ nỹtĩn kỹ êg tóg hã ra ti mỹ há tũ nỹtĩ, Topê mỹ, êg tỹ ti vĩ ki króm tũ nĩn kỹ.

²⁵ Raabe fi to jykrén nĩ gé, ũn mén jafã ên fi to. Êg povo vỹ ũ ag jěgně ja nĩ, ag tỹ fi jamã ve jé, cidade mág ên ti. Kỹ fi tóg ag mỹ: “kãge jěg ra,” he ja nĩ. Kỹ fi tóg ag kanhrãn ja nĩ sir, fi jamãn ki, ag tỹ êpřy ũ mĩ kãpa jé, ěmĩn ũ mĩ, ag kato tẽ ag tỹ ag vég tũ nĩ jé. Tag to fi tóg kren mũ (mỹr), fi tỹ tag han to. Kỹ Topê tóg fi to: “inh ki rã há han fi,” he ja nĩ sir, fi tỹ ti vĩ kri fi to.

²⁶ Ge ti nĩ gé, êg mỹ. Êg tỹ ti ki ge kỹ nỹtĩn kỹ êg tóg ti vĩ kri fig mũ, Raabe fi ri ke. Êg tỹ ti vĩ han tũ nĩn kỹ tóg êg mỹ nén ũ há han ke tũ nĩ gé, êg tỹ ón kỹ ti ki ge mũ tugřĩn, êg făr tỹ kupřĩg tũ ra ter kỹ nỹ ên ri ke ti nĩ.

Êg tỹ êg nũně tỹ Topê vĩ mranh ke tũ

3 Inh kanhkã', kãnhmar jagně mỹ: “sỹ ã kanhrãn há tóg tĩ, ã tỹ kygně to,” he tũg nĩ. Êg kar vỹ kygněg tĩ. Kỹ Topê

vỹ êg tỹ kygně to êg vóg kónãn mág mũ, êg tỹ kãnhmar êg mré Jesus ki ge kỹ nỹtĩ ag kanhrãn sór kỹ.

² Êg kar vỹ kygně (ka)mě nỹtĩ. Ũ tỹ ã vĩ ki kygněg tũ pẽ nĩn kỹ tóg kuryj kar nĩ sir. Êg pi(jé) ne ki kygněg tĩ', êg tỹ êg vĩ ki kygněg tũ nĩn kỹ. ³ Cavallo to jykrén nĩ. Freio tỹ êg tóg ti jẽn kãra fig tĩ. Kỹ êg tóg tỹ ti vóg tĩ sir, cavallo ti, kỹ tóg ã tĩg ke ên ra ti mũ sir, ũ tỹ cavallo kri nĩ ên ti. ⁴ Kỹ canoa mág to jykrén nĩ gé. Éhé tóg nỹ, hã ra kãka vỹ ti tĩn tĩ. Kỹ ag tóg ti vóg jafã tỹ ti vóg tĩ. Kỹ tóg ag mỹ ki ke tĩ. Ti vóg mũ ag mũnh ke ra tóg tĩ mũ sir. Ti vóg jafã sĩ ra tóg ki ke mũ, canoa mág ti. ⁵ Ge tóg nĩ, êg nũně ti. Sĩ ti nĩ (mỹr), hã ra êg tóg tỹ vĩ mág han tĩ gé.

Pĩ ri ke tóg nĩ. Ti sĩ ra tóg kejẽn vãnkh pũn tĩ (mỹr), nẽn kar ti. ⁶ Ên ri ke tóg nĩ, êg nũně ti. Tỹ êg tóg vẽnkh jykre pãno tó tĩ. Kỹ êg tóg êg vĩ tag to kavěj kar nỹtĩ, êg tỹ êg vĩ tag to ti vĩ mranh kỹ. Êg kãsir nỹtĩ ra êg tóg vẽnkh jykre pãno tó tĩ, êg sanh há nỹtĩ ra ke gé, êg kófa ra ke gé. Japo tỹ êg krĩn hã vẽ, êg tỹ êg vĩ ki Topê vĩ mranh jé.

⁷ Ha mẽ, bicho kar vỹ tỹ êg męg nỹtĩ. Ũ ag vỹ mĩg tỹ męg nỹtĩ, kỹ ũ ag vỹ sēsĩ tỹ męg nỹtĩ, ũ ag vỹ pỹn tỹ męg nỹtĩ, ũ ag vỹ goj ki ke kar tỹ męg nỹtĩ gé. Ti kar kanhrãn êg tóg tĩ mỹr, ha mẽ. ⁸ Hã ra êg pi(jé) êg nũně kanhrãn tĩ'. Ti kanhrãn ki kagtĩg êg nỹtĩ. Vẽnkh jykre pãno tãvĩ tó sór êg tóg tĩ. Kỹ tóg veneno ri ke nĩ, êg vĩ ti. Tỹ êg tóg jagně kãgtén ri ke han tĩ, êg nũně tỹ, jagně mỹ vĩ kónãn kỹ. ⁹ Tỹ êg tóg Topê mỹ vĩ há han tĩ, êg jóg mág mỹ, êg nũně tỹ. Kỹ êg tóg tỹ êpřã ke ag mỹ vĩ kónãn tĩ gé. Hã ra Topê tóg êg han, êg tỹ ti ri ke nỹtĩ jé. Kỹ êg tỹ jagně mỹ vĩ kónãn kỹ êg tỹ Topê mỹ vĩ kónãn ri ke vẽ sir. ¹⁰ Êg jẽn kãtã tóg kãkutě tĩ, êg vĩ há ti, êg vĩ kónãn ti ke gé. Pĩ ri nĩ, êg jẽnky ti, hã ra êg tóg tỹ vĩ régre han tĩ. Tag vỹ kórég tãvĩ nĩ, inh kanhkã'. ¹¹ Goj tỹ vẽnkh kaně to jykrén nĩ, êganě to. Ti

há nîn kŷ tóg há nĩ, goj ti. Ti kajă nîn kŷ tóg kajă nĩ. Ti pi(jé) tŷ goj régre nĩ, goj tŷ ěg kanē ti. Pir tóg nĩ. ¹²Kŷ ka kanē to jykrén nĩ gé. Ka tŷ pēnva ki ěg tóg jymi vég tũ nĩgtĩ (mŷr). Kŷ ěg tóg vānh tŷ jóhó ki pēnva vég tũ nĩgtĩ gé. Pir ti nĩ, ka kanē ti. Ge ti nĩ gé, goj ti. Ti kajă nîn kŷ tóg kajă nĩ gé. Kŷ gemnĩ gé, ājag nūnē tŷ. Vĩ pir han nĩ.

Topē tŷ ěg mŷ krĩ há nĩm

¹³Ājag mŷ krĩ há nŷtĩ? Ājag mŷ Topē vĩ ki kanhró nŷtĩ? Kŷ tóg há ti. Kŷ vēnh jykre há kar han kŷ nŷtimnĩ. Hă ki vēnh kar vŷ ājag krĩ há venh ke mũ sir. Hă ra tŷ vĩ mág han tũg nĩ. Tŷ vēnh kăfór han tũg nĩ gé.

¹⁴Ājag tŷ ũ to fe kórég nîn kŷ tóg tŷ ũ nŷ jāvo, ājag tŷ jagnē kăfór nŷtĩ sór kŷ, jagnē to jũ (ka)mē nŷtĩn kŷ, ājag tŷ vēsŷ ũn mág han sór kŷ. Ājag tŷ tag han kŷ vēso: “krĩ há inh nĩ, Topē vĩ ki kanhró inh nĩ,” he tũg nĩ. Vēnh ó vē, tag ti. ¹⁵Topē tŷ ěg kanhrān ja pijé', ěg tŷ ũ to fe kórég nĩ ti, jagnē kăfór han sór mũ ti, jagnē to jũ (ka)mē ti ke gé. Ēpră vēnh jykre vē (mŷr), Topē kato tē ti. Japo jykre vē (mŷr), ěg fe jũ tag ti. ¹⁶Ēg tŷ jagnē kăfór han sór kŷ ěg tóg jagnē kato tēgtē mũ sir, ěg tŷ vēsŷ ũn mág han sór kŷ. Kŷ ěg tóg vĩ mē han kŷ jagnē to vēnh jykre pāno han kân mũ sir.

¹⁷Ēg tŷ hă ra Topē tŷ ěg kanhrān mũ han kŷ ěg tóg tag han tĩ, ha mē: jānhkri ěg nŷtĩ, kavéj tũ (mŷr). Jagnē to ěg tóg krĩ kusa nŷtĩ. Jagnē mŷ ěg tóg komēr hă vĩ tĩ gé. Ũ tŷ ěg mré vīn kŷ ěg tóg ti vĩ mēnh mũ, ti vĩ há nîn kŷ. Jagnē jagăgtān ěg tĩ sir. Nén kar há han ěg tĩ. Topē vĩ to ěg tar nŷtĩ. Jykre régre tũ ěg nŷtĩ. ¹⁸Ēg tŷ ti jykre tag han kŷ ěg tóg jagnē krĩ kuprăg mũ sir, ěg tŷ jykre kuryj nŷtĩ jé sir, ha mē.

Ēg pi(jé) tŷ Topē kato tēgtē mũ ag mré ke nŷtĩ'

4Ājag hă ne tóg jagnē to jũgũ nŷtĩ'. Hē ri ken kŷ hŷn'? Ājag tŷ nén ũ vēnhmŷ han sór nŷtĩn kŷ, hă kŷ ājag tóg jagnē to krĩ rŷ nŷtĩ. Jykre pāno ājag tóg nŷtĩ (mŷr), kŷ ājag tóg vēnh jykre há kato tē nŷtĩ sir. ²Nén ũ to én mũ (hă) ra ājag tóg măn sór mũ, hă kŷ ājag tóg vég tũ nĩ (mŷr). Hă kŷ ājag tóg jagnē kăgtén sór mũ sir, jagnē tŷ nén ũ măn jé. Jagnē tŷ nén ũ to én kŷ ājag tóg jagnē kato tēgtē ti. Ājag tŷ Topē mŷ to vĩ tũ nîn kŷ, hă kŷ ājag tóg vég tũ nĩgtĩ. ³Ājag tŷ ti mŷ to vĩ mũ ra ājag tóg venh ke mũ vē, hă ra ājag tóg vĩ há han tũ nĩgtĩ gé, hă kŷ tóg ājag mŷ han tũ nĩgtĩ sir, Topē ti. Ti mŷ ājag tóg to vĩ mũ, ājag tŷ nén to én mũ ěn măn jé. Hă ra tóg ti mŷ tŷ ũ nŷ, ājag tŷ nén to én mũ ěn ti. Hă kŷ tóg ājag mŷ han tũ nĩ sir, Topē ti.

⁴Ēg tŷ Topē ki ră kar kŷ vēnh jykre pāno to én kŷ ěg tóg ti kato tē mũ sir. Ũn tŷtă kórég fi ri ke ěg nŷtĩ, ěg tŷ ge kŷ. Ā mén kavénh fi tóg tĩ, ũ to én kŷ. Ēg tŷ ěpră vēnh jykre to én kŷ ěg tóg Topē kato tē mũ sir. Tag ki kanhrān nĩ, to jykrén mág han nĩ. ⁵Topē vĩ tag to jykrén nĩ, ũ tŷ vāsŷ rán kŷ nĩ ěn to, ha mē: “Topē kuprīg vŷ tŷ ěg jagrē nĩ, Topē tŷ tŷ ěg jagrén kŷ. Kŷ tóg ěg ki rĩr mũ sir. Kŷ ěg tŷ nén ũ vēnhmŷ to há nîn kŷ tóg fe kaj nĩ, Topē kuprīg ti,” he tóg, Topē vĩ rá ki. Ti pi(jé) véké tag tó ja nĩ'. Kŷ tag to jykrén nĩ. ⁶Hă ra tóg ěg tar han tĩ, Topē kuprīg ti, ěg tŷ nén ũ vēnhmŷ han sór tag kato tē jé. Ēg jagăgtān kŷ tóg ěg tar han tĩ. Kŷ tóg tag tó mũ sir, ha mē: “Topē vŷ ũ tŷ: “ũn mág vŷ tŷ inh nĩ,” he mũ ěn ag to kórég nĩ, hă ra tóg ũ tŷ: “nén ũ tũ vŷ tŷ inh nĩ,” he mũ ěn ag jagăgtān tĩ,” he tóg, ti vĩ rá ki. ⁷Hă kŷ Topē mŷ: “hej,” hemnĩ, ti tŷ ājag krĩn kŷ. Japo mŷ: “nejé,” hemnĩ, ti tŷ ājag krĩn sór kŷ. Kŷ

tóg ājag tovănh ke mŭ sir, Japo ti, ājag tŷ ti mŷ: “nejé,” hen kŷ.

⁸Topē mré vŷ kŷ nŷtīmni, kŷ tóg ājag to há nŷ sir, ājag mré ti nŷ nŷ gé, ěg jóg mág ti. Ti vŷ mranh tŷ vŷ tŷ ěg nŷtŷ. Kŷ ti vŷ mranh tovănh nŷ. Jykre régre ěg nŷtŷ gé. Kŷ vėnh jykre pir han kŷ nŷtīmni, hā vŷ: Topē jykre, he mŭ. ⁹Ājag tŷ Topē vŷ mranh kŷ mŷ jagy nŷtīmni. Vėsŷrėnh nŷ, fŷmni, ny măn tŷg nŷ. Fe kaj nŷtīmni. To krŷ kufy nŷtīmni. Mŷ sér tŷ nŷtīmni, ājag tŷ Topē vŷ mranh kŷ. ¹⁰Ēg Senhor mŷ: “kórég inh nŷ, isŷ vėnh jykre pāno han kŷ,” hemni. Kŷ ti hā vŷ ājag mŷ vŷ há han ke mŭ sir, kŷ ājag fe vŷ mŷn ke mŭ sir.

Ēg tŷ jagnē to vŷ kónān ke tŷ

¹¹Inh kanhkā', jagnē to vŷ kónān tŷg nŷ. Ājag tŷ jagnē to vŷ kónān kŷ ājag tóg Topē jykre to vŷ kónān mŭ sir, kŷ ājag tóg to: “nén ũ tŷ vė,” he mŭ sir, Topē tŷ ěg mŷ vėnh jykre nŷm ja ěn to. Ājag tŷ hā ra ti jykre to vŷ kónān kŷ ājag tóg ti ki króm ke tŷ pē nŷ sir. ¹²Ū tŷ ěg mŷ ā jykre nŷm ja ěn vŷ pir nŷ, kŷ tóg ěg jykre tugnŷm ke mŭ gé sir. Ti hā tóg: “ėn vŷ kren ke mŭ, ěn vŷ kren ke tŷ nŷ,” henh ke mŭ, ā pir mŷ, Topē ti. Hā kŷ tóg vėnhmŷ nŷ, ājag tŷ jagnē to vŷ kónān kŷ.

Ēg tŷ vėsŷ ũn mág han sór ke tŷ

¹³Ājag kāmŷ ũ tóg vėsóg ki ājag tŷ nén han ke to jykren sór tŷ, Topē ki jēmē sór tŷ nŷn kŷ. “Hėn ri ke mŷn sóg vaj kŷ ěn ra tŷ mŭ, ke tŷ nŷn kŷ vaj ũn kŷ,” he ājag tóg tŷ. “Cidade ěn ra sóg tŷg mŭ, tá sóg nŷnh mŭ. Tá sóg prŷg pir tŷg' he mŭ. Kŷ sóg negociar henh ke mŭ, sŷ rico nŷ jé,” he ājag tóg tŷ (mŷr). ¹⁴Hā ra ājag pi(jé) ājag tŷ nén venh ke ki kanhró nŷtŷ, ha mē. Ne ve jé ěg ke mŭ, vaj kŷ? Ha'. Ki kagtŷ ěg nŷtŷ. Ēg mŷ vaj kŷ ter ke tŷ nŷ vŷ? Ha'. Krŷj sŷ ri ke ěg nŷtŷ. Ve sŷ han ěg tŷ, krŷj sŷ ti. Ēg tŷ ki ěvănh măn mŭ

ra tóg tŷ he mŭ sir. Ge ěg nŷtŷ. Kānhmar ěg tóg tŷg' he tŷ, ěg ter kŷ.

¹⁵Ājag tŷ ājag tŷ nén han ke to jykren kŷ Topē mŷ ěkren nŷ, ũ tŷ ěg mŷ ěg ter ke kurā tónh ke ěn mŷ. “Ti mŷ sŷ nén han ke to há nŷ vŷ?” hemni. ¹⁶Hā ra ājag tóg vėsŷ ũn mág han sór mŭ, ājag tŷ: “tag han jé sóg ke mŭ,” hen kŷ. Há tŷ ti nŷ, ěg tŷ vėsŷ ũn mág han sór kŷ.

¹⁷Kŷ tag tóg vėnhmŷ nŷ gé, sŷ tónh ke tag, ha mē. Kejėn ěg tóg nén ũ há to jykren tŷ, ěg tŷ han jé. Hā ra ěg tóg han tŷ nŷgtŷ. Kŷ ěg tŷ Topē vŷ mranh ũ vė gé sir, ěg tŷ nén ũ há han sór mŭ (hā) ra han tŷ nŷn kŷ.

Ūn rico ag vėsŷrėnh ke

5Vāhā sóg ũn há ag to tag tó mŭ sir, ũn rico ag to, ũ tŷ Jesus ki ge jāvănh ěn ag to, ha mē. Ag mŷ sóg: “ha mē,” he mŭ. “Kygŷ ra. Vėsŷrėnh mág han ra. Vėnh jagtar jagy ve jé ājag tóg ke mŭ. ²Ājag tŷ nén ũ vŷ vag kăn ke mŭ. Ājag kur sŷnvŷ ěn vŷ tāryj kăn ke mŭ gé, ti ga tŷ kon kŷ. ³Kŷ ājag jānkamy vŷ vėsó jāgfanh ke mŭ. Ājag tŷ ũn jagāgtān vānh ja tugrŷn tóg vėsó jāgfanh ke mŭ. Tag ve kŷ vėnh kar vŷ ājag jykre kórég venh ke mŭ. Kŷ ājag tóg to jagtar ke mŭ, kŷ tóg pŷ tŷ ěg pŷn ri ke nŷ, ājag jagtar ke ti, ājag vėsŷrėnh ke ti. Ājag hā ne tóg ājag tŷ nén ũ génh mág', ěg tŷ kānhmar kurā tŷ ěgno tá krŷg he mŭ (hā) ra, Topē tŷ ěg jykre tugnŷm ke kurā ěn tá. ⁴Ājag camarada ag vŷ ājag jakré tá rānhāj mŷ, hā ra ājag tóg ag mŷ kajām tŷ nŷgtŷ. Hā ra ěg Senhor vŷ vėg tŷ. Ājag camarada vėsŷrėnh mē ti (mŷr). Vėnh kar pā'i vė (mŷr), ěg Senhor ti, nén kar pā'i vė gé. ⁵Ājag tŷ nén ve sór mŭ kar ve ājag huri, vėjėn mág, kur sŷnvŷ, ājag tŷ nén to ěn mŭ kar ěn ti. Tag tāvŷ to ājag tóg jykren tŷ, ājag tŷ ga kri mŷn kŷ. Tāg gy ājag nŷtŷgtŷ, ěg tŷ ěg mēg jėn há han tŷ ri ke, ěg tŷ ti tānh jé. Kakó ti nŷ, Topē tŷ ājag tānh ke ti, mŷr, ha mē. ⁶Kŷ ājag tóg ũn jykre kuryj

ag vóg kónān tĩ gé. Ag kăgtén ājag tóg tĩ, hă ra ag tóg ājag kato tē tũ nĩgtĩ, ājag kato vĩ tũ ag tóg nĩgtĩ gé. Jykre kórég ājag nĩtĩ,” he sóg mũ, ũn rico ag mĩ.

Ēg tỹ ěg Senhor kătĩg măn jăvănĥ ke

⁷ Inh kanhkă', ěg Senhor kătĩg ke jăvănĥ nĩ, jatun mĩ, ag jăvo. Ēg tỹ ěkrăn kar kỹ ěg tóg ti mog jăvănĥ tĩgtĩ, jatun mĩ. Kĩ ta tóg kri kutē mũ, kỹ tóg kri kutē măn mũ gé sir. Kĩ văhă ěg tóg ti kanē vэг mũ. ⁸ Tag ri ke han nĩ, jatun mĩ ti kătĩg jăvănĥ nĩ, ěg Senhor ti. Ti jăvănĥ to tar nĩtĩmnĩ. Kănhmar ti kătĩ mũ, ěg Senhor ti, ha vemnĩ.

⁹ Inh kanhkă', jagnē vĩ to vĩ vĩ he tũg nĩ. Ke tũ nĩ mũ ra ěg Senhor tóg ājag jykre ve kỹ ājag vóg kónān ke mũ. Ha vé, văhă ti vĕnh ven ke kătĩg mũ kănhmar, ũ tỹ ěg jykre tugnỹm ke mũ ěn ti.

¹⁰ Văşy Topē vĩ tó ti ag to jykren. Topē vĩ tó ag tóg tĩ, kỹ ũ tỹ mē jăvănĥ ja ěn ag tóg ag vóg kónān. Ge ra ag tóg jatun mĩ Topē vĩ tó ja nĩgtĩ, ag tỹ ag vóg kónān mũ ra. Ag ri ke han nĩ, văşy Topē vĩ tó ti ag ri ke. ¹¹ Ag jykre to jykren nĩ. Ājag jagtar nĩtĩ ra ag tóg to krónĥ ke ja tũ nĩgtĩ gé. Hă kỹ Topē tóg ag mĩ vĩ há han mũ sir, ti vĩ tó ti ag mĩ.

Topē mré ke tỹ Jó kăme mē ājag huri. Ā jagtar ra tóg to krónĥ ke ja tũ nĩ gé. Kỹ văhă Topē tóg ti ki rĩr há han mũ, ti jagtar kỹ. Hă ki ājag tóg ěg Senhor jykre vэг mũ sir. Ēg jagăgtăn tóg mũ, ti tỹ ěg jagtar nĩtĩ ven kỹ. Kỹ tóg sir ěg jagăgtăn tovănĥ tũ nĩgtĩ.

¹² Inh kanhkă', ón kỹ vĩ tũg nĩ. Ón kỹ: “hej,” he tũg nĩ. Ki hă tómnĩ, ājag tỹ: “hej,” hen kỹ, Topē tỹ ājag vóg kónān tũ nĩ gé. Kỹ ón kỹ: “Topē vỹ ki kanhró nĩ,” he tũg nĩ gé. Ón kỹ: “ũ tỹ kanhkă tá nĩ ěn vỹ ki kanhró nĩ,” he tũg nĩ gé. Ón kỹ: “ũ tỹ ga kri nĩ ěn vỹ ki kanhró nĩ,” he tũg nĩ gé. Ki hă tómnĩ. Ón tũg nĩ, jagnē mĩ.

Ēg tỹ ũn kaga ag to Topē mré vĩnh ke

¹³ Ājag tỹ nén ũ jagy ven kỹ Topē mré vĩmnĩ. Ājag mỹ sér tĩn kỹ Topē mỹ jăn nĩ, kỹ ti jé tómnĩ. ¹⁴ Ājag kaga nĩtĩn kỹ igreja to pă'i ag jé prĕrmnĩ, Jesus tũ ki rĩr ti ag. Ēn ag vỹ ũn kaga to Topē mré vĩnh ke mũ, kỹ ag tóg azeite tỹ ũn kaga to tĩn ke mũ, ěg Senhor jiji tó kỹ. ¹⁵ Ag tỹ ěg Senhor mré vĩn kỹ tóg ũn kaga ěn tỹ há' henh ke mũ sir, ěg Senhor ti, ag tỹ ti tỹ há' henh ke to: “hỹ mỹ vỹ?” he tũ nĩn kỹ. Ēg Senhor vỹ ti tỹ há' henh ke mũ sir. ũn kaga tỹ ti vĩ mranĥ kỹ Topē vỹ ti mỹ vĕnh păte fón ke mũ gé sir. ¹⁶ Hă jé jagnē mỹ tó, ājag tỹ Topē vĩ mranĥ ja ti. “Ti vĩ mranĥ inh, tag han kỹ,” hemnĩ jagnē mỹ. Kỹ jagnē to Topē mré vĩmnĩ gé, ti tỹ ājag tỹ há' he jé, ti tỹ ājag kaga tỹ tũg' he jé. Ēg tỹ vĕnh jykre kuryj han kỹ tóg ěg vĩ mē kỹ han mũ sir, Topē ti, ěg tỹ ti mỹ nén to vĩ', to vĩ' hen kỹ. Nén há kar ve jé ěg tóg ke mũ sir, ěg tỹ ti mỹ to vĩn kỹ, ěg Senhor mỹ.

¹⁷ Topē mré ke tỹ Elias mĩ ěkrén nĩ. Ēg mré tóg ěpră ke ja nĩgtĩ, Elias ti. Hă ra tóg Topē mré vĩ', vĩ' he ja nĩgtĩ, ta kutē tũ nĩ jé. Kỹ tóg kutē tũ ja nĩgtĩ, ta ti, prỹg tăgtũ kri kysă tỹ 6 ki. ¹⁸ Kỹ tóg Topē mré vĩ măn ja nĩgtĩ, Elias ti, kỹ tóg kutē ja nĩ sir, ta ti. Kỹ nén kar tóg gan kri mur măn ja nĩ, kỹ tóg kanĕn măn ja nĩgtĩ gé sir. Topē tỹ ti vĩ han hă vĕ. Tag mĩ ěkrén nĩ.

¹⁹ Inh kanhkă', kejĕn ěg mré ke ũ tóg prănĥ ke tĩ, vĕnh vĩ há tovănĥ kỹ. Kỹ ti jyvĕn nĩ, ti tỹ kygnē măn tũ nĩ jé. ²⁰ Kỹ ũ tỹ ti mré vĩ mũ ěn tóg ti kren han mũ sir, nũgme to, ti tỹ Ā jykre kygnē ja ěn tovănĥ kỹ. Kỹ Topē vỹ ti tỹ Ā vĩ mranĥ ja ěn tỹ vĕnh păte fón mũ sir. Tag to jykren nĩ.

Hă vĕ.

PEDRO TỸ CARTA HAN VÉN

1 Pedro tỹ ājag mỹ carta rán hã vê, Jesus Cristo tỹ inh fêg hã vê, sỹ tỹ ti apóstolo jê jé. Sỹ Topê tỹ ũn kuprêg mũ ag mỹ rán hã vê. Ēg mré ke tũ ag kāmĩ ājag tóg mũgtĩ, ũ tỹ Jesus ki ge tũ ag kāmĩ, Ponto tá, Galácia tá, Capadócia tá, Ásia tá, Bitínia tá ke gé. ²Topê vỹ ājag kuprêg. Vāsỹ tóg to jykrén ja nĩ, ājag kuprêg ke to, ěg jóg tỹ Topê ti. Ājag mỹ tóg ā kuprĩg jênê, hã kỹ ājag tóg tỹ ti tũ nỹtĩ, ājag tỹ Jesus Cristo vĩ kri fi jé, ti tỹ ā kyvénh tỹ ājag kygpe jé, ājag tỹ ti ri ke há nỹtĩ jé. Topê jé ājag tar han mǎn', han mǎn' hé, kỹ ājag jé krĩ kǎnhvy nỹtĩ.

Topê tỹ ěg mỹ nén ũ há ven ke

³Topê mỹ sóg vĩ há han tĩ, ěg Senhor tỹ Jesus Cristo panh mỹ. Ēg jagāgtǎn tǎvĩ han tóg tĩ. Jesus Cristo rĩn mǎn tóg, ti ter kar kỹ, kỹ tóg Jesus tugrĩn ěg mur mǎn ri ke han tĩ gé. Kỹ tóg ěg mỹ sér tĩ, ⁴ěg tỹ kanhkā mĩ ěkrén kỹ. Tá ěg tóg nén ũ sĩnvĩ kar venh ke mũ. Tá ěg tũ vỹ tũ' henh ke tũ pē nĩ. Kómóg ke tũ tóg nĩ, tá ěg tũ ti, tá ũ tóg ti kókén ke tũ nĩ gé. ⁵Topê ki ājag tóg ge kỹ nỹtĩ, kỹ tóg ājag ki rĩr há han nĩ nĩ. Nén ũ kar han há tóg nĩ, kỹ tóg ěg ki rĩr há han tĩ gé, Topê ti. Ājag krenkren han jé tóg ke mũ, ājag tỹ ti tỹ ěg mỹ nén nĩm ke mũ ěn ve jé. Nĩm han kỹ tóg nĩ nĩ, ti tỹ ěg mỹ nén ven ke ěn ti. Kurā tỹ ěgno ki ěg tóg ěn venh ke mũ.

⁶⁻⁷Ver tóg ājag mỹ jagy tĩ. Ge ra mỹ sér nỹtĩmĩ. Kǎnhmar tóg tũ' henh ke mũ, nén tỹ ěg mỹ jagy nĩ tag ti. Topê tỹ ěg jykre ve sór vê, hã kỹ ěg tóg ver nén ũ jagy ve vén tĩ. Ēg tỹ ti jagy to tar nỹtĩn kỹ tóg vég mũ, ěg tỹ ti ki rǎ há han kỹ nỹtĩ ti. Ha vé, ouro rỹg ěg tóg tĩ, pĩ rỹ jagy ki, ěg tỹ ti há nĩ ěn ve jé. Ge ti nĩ, ěg mré. Tũ' he jé tóg ke mũ, ouro ti. Ouro kǎfór ti nĩ, ěg tỹ ti ki rǎ ti. Ēg tỹ nén ũ

jagy ve to tar nỹtĩn kỹ tóg ve há tĩ, ěg tỹ ti ki rǎ há han kỹ nỹtĩ ti. Kỹ tóg ěg to vĩ há han ke mũ, Cristo ti. Ēg tỹ tóg ũn mág han ke mũ, ũn tar, Jesus tỹ vėnh kar mỹ vėnh ven ke kurā ěn kǎ. ⁸⁻⁹Ti to há ājag nỹtĩ, ājag tỹ ti ve ja tũ (hã) ra. Ti ki ge kỹ ājag nỹtĩ, ājag tỹ ti vég tũ ra. Hã kỹ ājag tóg krenkren ke mũ. Ājag krenkren ke ěn hã tóg ājag mỹ sér pē tĩnh mũ, sér gy ti tĩnh mũ, ha vemnĩ. Ājag fe tóg mrin ke tǎvĩ han ke mũ, kurā ěn kǎ, ha vemnĩ.

¹⁰⁻¹¹Topê vĩ tó tĩ ag tóg vāsỹ tó ja nĩgtĩ, Topê tỹ ũri ěg krenkren han mũ tag ti. Topê kuprĩg vỹ ag kanhrǎn ja nĩ. Ag mỹ tóg Cristo tỹ ěg jagfy jagtar jagy han ke kāmén ja nĩ. Kỹ tóg ag mỹ ti tỹ kar kỹ tỹ ũn mág jėnh ke tó ja nĩ gé, ti tỹ ěg jagfy vėsỹrėnh kar kỹ tỹ ũn mág nĩnh ke ti. Kỹ ag tóg tag ve sór ja nĩgtĩ, vāsỹ Topê vĩ tó tĩ ag. “Kurā tỹ hē kǎ kenh ke nē hỹn?” he ja ag tóg nĩgtĩ, Cristo jagtar ke to. “Ti tỹ hē ri kenh ke nē?” he ja ag tóg nĩgtĩ gé. Tag ve sór tǎvĩ ja ag tóg nỹtĩgtĩ. ¹²Hã ra Topê tóg ag mỹ: “inh pi(jé) ājag hã mỹ tag ven ke mũ,” he ja nĩ. “Ājag nón ke ag hã mỹ ke vê, ag hã ne ājag tỹ nén tó mũ venh ke mũ,” he ja tóg nĩ, Topê ti, vāsỹ ti vĩ tó tĩ ag mỹ. Ti tỹ ag mỹ ājag tó jan hã vê. Hã kỹ ājag tóg hur mē, ti mré ke ũ ag tỹ ājag mỹ Jesus kǎme sér kāmén kỹ. Topê kuprĩg vỹ ag tar han ja nĩ, Topê tỹ ag mỹ ā kuprĩg jėnėn kỹ, kanhkā tá, hã kỹ ag tóg ājag mỹ ti kāmén kāmũ ja nĩ. Ha vé, Topê tỹ jėnē jafǎ ag tỹ ki kanhrǎn há tóg tĩ, ājag tỹ ti kǎme mēg mũ tag ti, hã ra ag tóg ki kagtĩg nỹtĩ.

Ēg tỹ Topê vĩ ki króm kǎn ke

¹³Hã kỹ Topê tỹ ěg mỹ nén tó mũ hã han sórmnĩ. Vėnh ki ěmėmnĩ, Jesus tỹ ěg mỹ nén nĩm ke mũ ěn hã mĩ ěkrén nĩ. Jesus tỹ vėnh ven ke kurā ěn kǎ ěg tóg venh ke mũ sir, ti tỹ ěg mỹ nén nĩm ke mũ ěn ti. ¹⁴Vāsỹ ājag tóg ājag tỹ nén to ěn mũ ěn han ja nĩgtĩ, ājag tỹ Topê vĩ mē

ja tũ nýtĩn kŷ. Ũri Topê vĩ hã ki króm nĩ, ājag tŷ vāsŷ nén han ja ěn tovānh kãn nĩ. ¹⁵Topê jykre hã han nĩ, kŷ tóg vėnh ven mũ, ājag tŷ tŷ ti tũ nýtĩn ti. Ājag tŷ ti jykre hã han jé Topê tóg ājag kuprėg. Há tãvĩ ti nĩ, Topê ti, kŷ ti jykre ri ke han nĩ. ¹⁶Tag tó ja ti nĩ, ha mē: “ũn há pē vŷ tŷ inh nĩ, kŷ inh ri ke nýtĩ sórmnĩ, vėnh jykre há hã han kŷ nýtĩmnĩ,” he ja tóg nĩ, Topê ti.

¹⁷Ēg tŷ Topê mré vėmén kŷ ěg tóg ti mŷ: “ěg jóg,” he ti. Hã kŷ ěg tóg ti kamėg ke mũ, ti tŷ tŷ ěg jóg nĩn kŷ. Ha vé, ěg kar tŷ nén han mũ vėg ti nĩgtĩ, kŷ tóg vėnh kar jykre ki kanhró kar nĩ, Topê ti, kŷ tóg vėnh kar jykre tónh ke mũ. Ver ěg tóg ũ tŷ ti ki kagtĩg ag kãmĩ mũgtĩ. Ēg tŷ ag kãmĩ mũn kŷ ěg tóg Topê vĩ ki króm há han ke mũ. ¹⁸Kaja e to tóg ěg kygĵãm ja nĩ, ki kanhró ājag tóg nýtĩ. Ājag jo ke ag vŷ ājag jo vėnh jykre kórég han ja nĩgtĩ, ājag tŷ ag nón han jé. Hã ra tóg kaja e to ājag kygvān ja nĩgtĩ, ājag tŷ vėnh jykre kórég ěn han mãn tũ nĩ jé. Kaja e to tóg ěg kygĵãm. Ouro to ke pijé'. Prata to ke pijé', ti kaja ěn ti. Tũ' he jé tóg ke mũ, ouro mré prata ti. ¹⁹Hã ra tóg ā kyvénh hã to ěg kygĵãm, kŷ tóg tũ' he ĵāvānh nĩ, ti kyvénh ti. Nén ũ kaja kãfór kar ti nĩ, ti kyvénh ti. Ũn há tãvĩ vŷ tŷ ti nĩ, ũ tŷ ā kyvénh tŷ ěg kygĵãm mũ ěn ti, hã vŷ: Cristo, he mũ. Kynė ja tũ pe ti nĩ. Kŷ tóg ovelha hã tãvĩ ri ke nĩ, ti tŷ ěg jagfŷ ter kŷ. ²⁰Topê vŷ ti kuprėg, ti tŷ ěg jagfŷ ter jé. Ā tŷ nén ũ kar han tũ ki tóg ti kuprėg, vāsŷ. Hã ra tóg ũri ga kri mur ja nĩ, ājag tŷ ti vĩ mē jé, kurã tŷ ěgno to hã. ²¹Ti tugrĩn ājag tóg Topê ki ge kŷ nýtĩ. Ti rĩn mãn ja tóg nĩ, Topê ti, kŷ tóg ti tŷ ũn mág han ja nĩ gé, kanhkã tá. Kŷ Topê ki rã há han nĩ. Ājag krenkren han jé tóg ke mũ, ha vemnĩ.

²²Topê vĩ pē ki króm ājag tóg tĩ, hã kŷ ājag tóg ĵānhkriĵ kŷ nýtĩ ha, ũri. Ājag mré ke kar ag to ājag tóg há tãvĩ nýtĩ gé. Kŷ jagnė to há nýtĩ to tar nýtĩmnĩ gé. Őn

kŷ jagnė to há nýtĩ tũg nĩ. ²³Topê vŷ ājag han mãn, kŷ tóg ěg mur mãn ri ke nĩ. Ā vĩ tŷ tóg ěg han mãn ja nĩ. Rĩr ti nĩ, ũn vĩ mũ ti, hã vŷ: Topê, he mũ. Tũ' henh ke tũ ti nĩ. Ti tŷ ěg han mãn kŷ tóg tŷ ěg panh pir nĩ, ũn ter ke tũ ěn ti. Ēg panh ter mũ ěn ri ke tũ ti nĩ. ²⁴Hã kŷ tag tóg rán kŷ nĩ, ha mē: “ěprã ke ag vŷ re ri ke nýtĩ, re fej sĩnvĩ ěn ri ke. Hã ra tóg kãnhmar tóg tĩ, re ti, kŷ ti fej tóg kãgter kãn ti. Kŷ ěprã ke ag tóg kãnhmar kãgter tĩ gé, re fej ri ke. ²⁵Ĵãvo Topê vŷ vŷ tũ' henh ke tũ pē nĩ,” he tóg, Topê vŷ tŷ rán kŷ nĩ ki. Tag mē ājag. Topê vŷ sér to ken hã vē.

Jesus tŷ pó há ri ke nĩ

2 Hã kŷ ājag jykre kórég tovānh kãn nĩ. Őn mãn tũg nĩ. Ũ lograr he mãn tũg nĩ. Ũ tũ to ěn mãn tũg nĩ. Ũ to vĩ kónān mãn tũg nĩ gé. ²Nėnē vŷ leite kron (ka)mē nĩgtĩ. Topê vŷ vŷ ěg mŷ ĵĩr sĩ pafa mũ ěn ri ke nĩ. Kãnhmar vėnh vĩ há ěn mē mãn', mē mãn' hemnĩ. Kŷ ājag tóg mog há han ke mũ, ājag krenkren jé. ³Hã kŷ tag tóg ti to rán kŷ nĩ, ha mē: “ki kanhrān sĩ han ājag tóg huri, ěg Senhor tŷ tŷ ũn há tãvĩ nĩn ki,” he ja tóg nĩ, Topê vĩ rá ki.

⁴Ēg Senhor to kãmũ ĵėg. Pó ri ke ti nĩ, ĩn han mũ ag tŷ pó fón mũ ěn ri ke ti nĩ. Hã ra tóg rĩr jé, ěg Senhor ti. Ag tŷ ti fón mũ ra tóg Topê mŷ há tãvĩ nĩ, pó kar ag há kãfór. ⁵Kŷ ěg tóg pó ri ke nýtĩ gé. Kŷ Topê kuprĩg vŷ ěg tŷ Topê jo ĩn ri ke han ke mũ, pó tŷ ĩn ěn ri ke. Kŷ ti tŷ ājag mŷ nén han sór mũ ěn to ti mŷ vėnh nenh tũg nĩ, ti mŷ: “hej,” hemnĩ. Jesus Cristo vŷ ājag tar han sór mũ, ājag tŷ ti tũ ki rĩr há han jé. Vāsŷ Topê tũ ki rĩr tĩ ag tŷ ti mŷ nén ũ kar pũn ja ěn ri ke tóg nĩ sir, ěg tŷ Jesus tũ han kŷ. Ājag tŷ ti tũ ki rĩr há han kŷ tóg ti mŷ há tĩnh mũ. ⁶Hã kŷ tag tóg rán kŷ nĩ, ha mē. “Pó há kuprėg inh, kŷ sóg tŷ ĩn nũna ri ke han, Sĩa tá. Ũ tŷ ti ki rã kŷ tóg venh ke mũ, Topê tŷ nén tó mũ ěn ti,” he tóg, Topê vŷ rá ki.

⁷ Ājag hã to tóg rán kŷ nĩ, ti vĩ tag, ājag tỹ ti ki ge kŷ nỹtĩn kŷ. Ũ tỹ ti kato vāsān-sān mũ ag to tag tóg rán kŷ nĩ gé, ha mẽ. Ag to tóg: “pó tỹ ĩn han jafã fón ag tóg, pó tỹ ĩn han tĩ ag,” he mũ. “Ag mỹ tóg kórég ja nĩ, pó ěn ti. Hã ra Topẽ tóg pó ěn hã tỹ ĩn nũna han mũ,” he tóg, Topẽ vĩ rá ki. ⁸ Kŷ tag tóg rán kŷ nĩ gé, ha mẽ. “Pó ěn tỹ ag tóg krĩm ke tĩ. Pãrô vẽ sir, pó ěn ti, kŷ ag tóg pãrô tỹ krĩm krĩm ke kŷ văr mũ sir,” he tóg mũ gé, Topẽ vĩ rá ki. Ũ tỹ Topẽ vĩ kri fi sór tù ag hã vĩ tỹ krĩmkrĩm ke tĩ. Topẽ tỹ nén han hã vẽ gé.

⁹ Ājag hã kupręg tóg, Topẽ ti, ājag tỹ tỹ pã'i mág nỹtĩ jé, ti tù ki rĩr ti to, ājag tỹ tỹ ti povo nỹtĩ jé, vyr mỹ. Ājag kupręg tóg, Topẽ ti, ājag tỹ ti tỹ nén han mũ kāmén jé, ti jykre tar ti, ājag tỹ tỹ ti tù nỹtĩn kŷ. Vāsỹ ājag tóg kutỹ mĩ mũ ja nĩgtĩ, hã ra tóg ājag tatĩ kãtĩg, ājag tỹ ũri kurã mĩ mũ jé, ti tỹ ājag mỹ jęngrẽ nĩm kŷ. ¹⁰ Ājag pi(jé) vāsỹ tỹ ũ tù ja nỹtĩgtĩ. Ũri ājag tóg tỹ Topẽ povo nỹtĩ, ti tù. Ājag pi(jé) vāsỹ Topẽ tỹ ājag jagãgtãn sór mũ tag mẽ ja nĩgtĩ. Ũri tóg hã ra ājag jagãgtãn, Topẽ ti.

Jesus tỹ vãnh jykre pãno to ěg kygvãn

¹¹ ĩnh kanhkã', tag ki ěg tóg ěg mré ke tù ag jamã mĩ mũgtĩ. ěg jamã pijé', ga tag ti'. Hã kŷ sóg ājag jyvẽn mũ. Ājag tỹ nén ũ to ěn mũ ěn han sór tũg nĩ. Ājag kókén jé tóg ke mũ, kŷ ājag tóg ěg Senhor tovãnh sór ke mũ, ha vemnĩ. ¹² Jesus ki ge kŷ nỹtĩ tù ag kãmĩ ājag tóg nỹtĩ, hã kŷ vãnh jykre há tăvĩ han nĩ. Ājag to ón sór ag tóg tĩ, ājag to ag tóg: “jykre pãno ag nỹtĩ,” he sór tĩ. Kŷ vãnh kar tỹ ājag jykre há ve kŷ ag ón ěn tóg ve há tĩnh mũ. Ājag jykre há ve kŷ ag tóg: “Topẽ jykre vĩ há nĩ,” henh ke mũ, hên ri ke mũn, Topẽ tỹ ag kutãn kŷ.

¹³ ěg Senhor to há ājag tóg nỹtĩ. Ti to há nỹtĩn kŷ ěprã ājag pã'i ag vĩ ki króm nĩ gé. Pã'i mág pẽ tỹ imperador ěn vĩ ki

króm nĩ, vãnh kar ag mỹ tỹ ũn mág ěn vĩ ti. ¹⁴ Ti krēm pã'i ag vĩ ki króm nĩ gé, governador ag. Pã'i mág pẽ ěn tỹ vin mũ ag vẽ, governador ag, ag tỹ ũn jykre pãno ag vóg kónãn jé, ag tỹ ũn jykre há ag to vĩ há han jé gé. ¹⁵ Ũ tỹ ki kagtĩg ag vĩ ājag to vĩ kónãn tĩ. Kŷ nén ũ há tăvĩ hã han nĩ, kŷ ag tỹ ājag kato ne tónh ke vĩ tù tĩnh mũ, ha vemnĩ. Tag vĩ há nĩ, Topẽ mỹ. ¹⁶ Cristo vĩ ěg kygvã, vãnh jykre pãno to. Kŷ vãnh jykre pãno han mãn sór tũg nĩ. To: “ĩnh kava ti huri, Cristo ti, hã kŷ sóg jatun mỹ han ke mũ, isỹ nén to ěn mũ kar ti,” he tũg nĩ. Topẽ tù vĩ tỹ ěg nỹtĩ, kŷ ti jykre há han nĩ. Hã jé tóg ěg kygvã, ěg tỹ tỹ ti tù nỹtĩ jé. ¹⁷ ěprã ke ũ to é he tũg nĩ. ěg mré Jesus ki ge kŷ nỹtĩ ag kar to há nỹtĩmĩ. Topẽ kamęg nĩ. ěprã ke tỹ pã'i mág tỹ imperador ěn kamęg nĩ gé.

ěg tỹ Cristo ri kén jagtar nỹtĩnh ke

¹⁸ Ājag kãmĩ ũ ag tóg patrão mỹ rãnrhãj tĩ, fagrĩnh mỹ. Ājag patrão vĩ ki króm nĩ, ag kamęg nĩ. Ājag kãmĩ ũ patrão vĩ há nĩ, komẽr hã tóg vĩ tĩ, ājag to jykrén há han tóg tĩ. Ājag tỹ ti to há nỹtĩn kŷ tóg há tĩ. Ājag kãmĩ ũ patrão tóg kórég nĩ. ěn to vĩ há han nĩ gé, ti kamęg nĩ gé. ¹⁹ Kejẽn tóg fagrĩnh mỹ ājag to jũnh ke mũ, ājag patrão kórég ti. Ājag tỹ Topẽ jykre han sór mũ to tóg ājag to jũnh ke mũ. Ge ra ti to jũ tũg nĩ, kŷ Topẽ tóg ājag mỹ vĩ há han ke mũ. ²⁰ Kejẽn ājag patrão tóg ājag tỹ kygnẽ to ājag mrãnmrãn tĩ. Tag vĩ tỹ nén ũ tù nĩ. Ti tỹ ājag jykre há to ājag mrãnmrãn kŷ Topẽ tóg ājag mỹ vĩ há han ke mũ. ²¹ Hã jé Topẽ tóg ājag kupręg.

Cristo vĩ ěg jagfỹ vęsỹrénh gé, mỹr, ha mẽ. Ti vęsỹrénh tugrĩn ěg tóg ti kóm tar nỹtĩnh mũ, ěg tỹ kejẽn ti kóm jagtar nỹtĩnh ken kŷ. ²² Nén ũ kórég han ja tù ti nĩ. Ũ pi(jé) ti ón venh mũ', ti ón vãnh nĩn kŷ. ²³ Ag tỹ ti mỹ vĩ kónãn mũ ra tóg ag mỹ vĩ kónãn ja tù nĩ. Ag tỹ ti

vēsýrénh han mǔ ra tóg ag mý vī ja tǔ nī gé. Topē hā mī tóg ēkrén ja nīgtī. “Ti hā ne ag jykre tugnǔm ke mǔ, inh jykre ti ke gé,” he ja ti nī. “Ti hā ne ag vóg kónān ke mǔ,” he ja ti nī, Cristo ti. ²⁴ Ha vé, Cristo vỹ ēg tỹ Topē vī mranh ja ěn kajām ja nīgtī, cruz to tóg ter ja nīgtī. Hā tigrin ēg jykre si tóg tǔ ti ha, ti tỹ ēg jykre si tỹ tǔ' hen kỹ. Vēnh jykre há hā han jé ēg tóg vēnh fēg kỹ nýtī. Ti vēsýrénh tigrin ēg tóg tỹ ũn há nýtī. ²⁵ Vāsý ēg tóg vēnh mēg tỹ carneiro vāgfor ri ke nýtī ja nīgtī. Hā ra tóg hur ēg tatín, ēg vāgfor ja ra, Jesus ti. Kỹ ēg tóg ti mré mǔ mǔ sir, carneiro fag tỹ pastor mré mǔ ri ke. Ti hā ne ēg ki rír nī ha'.

Fag tỹ ag mré vēnh jykre há han ke

3 Sý ũn týtá fag jyvēn hā vē, ha mē. Ājag mén vī han nī. Ājag kāmī ũ fag mén ag vỹ ver Topē ki rā sór ja tǔ nī. Ge ra ti mré ti vī ki króm nī, ti tỹ tỹ ā mén nīn kỹ. Ti tỹ ā jykre há ve kỹ tóg hēn ri ke mǔn ti ki rā sór ke mǔ, ā tỹ ti mý nén ũ tó tǔ ra. ² Topē kamēg kỹ ti jykre hā han nī, ājag jānhkri nýtī jé. Kỹ ājag mén ag vỹ ājag jykre há venh ke mǔ. ³ Vēsīnvī han sór tǔg nī, ājag gānh tỹ, pó sīnvī kaja e tỹ ke gé, kur kaja e tỹ ke gé. Ēg tỹ vēsīnvī han sór ke tǔ vē. ⁴ Ājag jykre hā sīnvī han nī, hā vỹ: komēr hā vī, he mǔ, vī mág tǔ, he mǔ. Vēnh jykre sīnvī tag vỹ há nī, Topē mý, kỹ tóg tǔ' hēnh ke tǔ nī gé. ⁵ Gen kỹ fag tóg nýtī ja nīgtī gé, ēg mýnh'mýnh ve fag, Topē tǔ fag, ũ tỹ Topē ve sór ja fag. Fag mén jykre hā mī fag tóg mǔ ja nīgtī, ⁶ Sara fi ke gé. Abraão jykre mī fi tóg tǔ ja nīgtī, hā kỹ fi tóg ti to: “inh pā'i vē,” he ja nīgtī. Kỹ vēnh jykre há hā han nī. ũ tỹ ājag tỹ vēnh jykre há han kamēg mǔ ra ge ra han nī. Kỹ ājag tóg tỹ Sara fi krē'krē fag ri ke nýtī.

⁷ Kỹ sóg ag jyvēn sór mǔ gé. Ājag prǔ fag ki rír há han nī, ha mē. Fag pi(jé) ājag tar ri ke nýtī. Hā ra Topē tóg fag mý rír

krýg ja tǔ ěn nīm ke mǔ gé, ti tỹ ājag mý rír krýg ja tǔ nīm ěn ri ke. Ājag tỹ ājag prǔ fag ki rír há han kỹ ājag tóg jatun mý Topē mré vēmén ke mǔ.

Ēg tỹ kejēn Cristo jykre to jagtar ke

⁸ Vāhā sóg ājag mý tag tó sór mǔ, ha mē. Jagnē mré vēnh jykre pir han nī. ũ fỹ kỹ ti mré fýmñī, ũ mý sér tǔn kỹ ti mré mý sér nýtīmñī. Jagnē to há tǎvī nýtīmñī. Jagnē mré komēr hā vīmñī. Jagnē kǎfór han sór tǔg nī. ⁹ ũ tỹ ājag mý nén ũ kórég han mǔ ra ti mý nén ũ kórég han tǔg nī. ũ tỹ ājag mý vī kónān mǔ ra ti mý vī kónān tǔg nī gé. Vēnh kajām sór tǔg nī. Hỹ, vēnh kar to Topē mý: “ag ve há han nī,” hemñī. Topē vỹ ājag ve há han sór mǔ, hā jé tóg ājag kuprēg. ¹⁰ Hā kỹ tag tóg rán kỹ nī, ha mē: “ājag mý jatun mý nýtī sór mǔ, nén ũ kar tỹ ājag mý sér tǔ jé? Kỹ vī kónān mǎn tǔg nī. Őn mǎn tǔg nī gé. ¹¹ Vēnh jykre pāno han mǎn tǔg nī, vēnh jykre há hā han nī, vēnh kar krī tỹ kǎnhvy' he sórmmñī gé, tag hā to vāsān nī, ti tỹ ājag mý sér tǔ jé. ¹² Ēg Senhor vỹ ũ tỹ vēnh jykre kuryj han mǔ ag ki rír há han mǔ. Ag tỹ ti mý nén ũ to vīn kỹ tóg ag vī mēg mǔ, Topē ti. Hā ra tóg ũ tỹ vēnh jykre pāno han mǔ kato tē tǔ, Topē ti,” he tóg, Topē vī rá ki.

¹³ ũ vỹ ājag mý nén ũ kórég han ke tǔ nī, ājag tỹ vēnh kar mý nén ũ há han sór kỹ. ¹⁴ Kejēn ājag tóg hā ra vēnh jykre há tigrin vēsýrénh ke mǔ, Topē vī tigrin. Kỹ mý sér jagy nýtīmñī. Ēprā ke ag kamēg tǔg nī. Ag vī jēmē sór tǔg nī, ag tỹ ājag tỹ ti tovānh han sór mǔ ra. ¹⁵ “Cristo vỹ tỹ inh pā'i nī, kỹ sóg ti hā kamēg nī,” hemñī. Tag hā mī ēkrén nī. Kejēn ũ tóg ājag mý: “ne to ke nē, hā vỹ: Cristo ki rā, he mǔ?” he tǔ. Ēn mý kāmén kǎn nī. ¹⁶ ũ tỹ ge mý komēr hā vīmñī. Topē vỹ vég nī nī, ājag tỹ ti mý nén tó mǔ ěn ti. Fe kavēj nýtī sór tǔg nī. Kỹ ājag tóg ũ tỹ Cristo jykre to vī kónān sór mǔ ag vī tỹ tǔ' hēnh ke mǔ, ha vemñī. ¹⁷ Kejēn ājag

tóg vènh jykre há to jagtar ke mû, Topê tỹ tag to jykrén kỹ. Hã ra tóg há nĩ. Ājag tỹ vènh jykre kórég to jagtar nỹtĩn kỹ tóg kórég nĩ.

¹⁸ Cristo hã to jykrén nĩ, ha mē. Ter ja tóg nĩ, ěprã ke ag tỹ Topê mỹ név(e) nỹtĩ tugrĩn. Ā ter pir ki tóg kajãm kãn. Jykre kuryj tóg nĩ, Jesus ti, hã ra tóg ùn jykre pãno ag jagfy ter ja nĩ. Ti tỹ Topê mỹ ěg tatĩn tĩg sór vē. Ti tén ja ag tóg nĩ, hã ra Topê kuprĩg vỹ ti rĩn mãn. ¹⁹ Topê kuprĩg vỹ ti tar han, kỹ tóg vènh kuprĩg ag jamã ra vyr gé, ag mỹ Topê vĩ sér tó jé, vènh kuprĩg sigse kỹ nỹtĩ ag mỹ. ²⁰ Vãsỹ ag tóg ti vĩ mē sór ja tũ nỹtĩ, vènh kuprĩg sigse kỹ nỹtĩ ěn ag. Noé tỹ ga kri tĩg kỹ, ti tỹ barco mág han mũ ěn kã ke ja vē. ěn kã Topê tóg ver ag to fe nĩ ja nĩ, kỹ tóg ag vóg kónãn jãvãnh ja nĩ ver. Noé tỹ barco han kãn ja ra tóg ag vóg kónãn mũ sir, Topê ti. Kỹ ù tỹ 8 (ke) ag tãvĩ vỹ krenkren mũ, barco ěn kãki. Goj var kỹ barco tóg kri tĩ nĩ, kỹ tóg ag krenkren han, barco ti. ²¹ Goj tỹ ājag tóg kyge kỹ nỹtĩ, ājag krenkren jé. Barco tỹ goj kri tĩg ri ken hã vē, hã vỹ: batismo, he mũ. Ājag mro pijé'. Vènh jykre to ken hã vē. Topê tỹ ěg tỹ ěg fe kavéj tỹ jãnhkri han to ken hã vē. ěg tỹ Topê mỹ vènh fēg to ken hã vē, hã vỹ: batismo, he mũ. Topê vỹ Jesus Cristo rĩn mãn ja nĩ, hã kỹ tóg ěg krenkren han ke mũ gé. ²² Kanhkã tá tóg nĩ nĩ, Jesus ti, kỹ tóg Topê pēgja tá nĩ nĩ. Tá tóg tỹ ùn mág nĩ, Topê tỹ jēgnē jafã ag kri, ùn tar kar ag kri, ěg tỹ kanhkã tá ùn vég tũ kar ěn ag mré hã. Vènh kar kri ke vỹ tỹ ti nĩ, Jesus ti.

Vènh jykre tăg

4 Ha vē, Cristo vỹ jagtar nĩ ja nĩ, vēsýrénh kỹ. Kỹ tag to tar nỹtĩmnĩ gé, ājag tỹ ti kóm jagtar nỹtĩn kỹ. Tag vỹ ki hã ke mũ, ha mē: ù tỹ ěprã jagtar kỹ tóg Topê vĩ mranh tũ nĩgtĩ. ² Hã kỹ ùri Topê vĩ hã han sórmnĩ, ti vỹ továnh tũg nĩ, ājag tỹ ga kri mũn kỹ. Ājag tỹ nén to

én mũ ěn han sór tũg nĩ. ³ Vãsỹ ājag tóg ù tỹ Topê ki kagtĩg ag jykre han ja nĩgtĩ, prỹg tỹ hēn ri ke ki, mỹr, ha mē. ěn kã ājag tóg ājag prũ tũ fag to én (ka)mē han ja nĩgtĩ, ājag mén tũ ag to ke gé. Ājag tỹ nén to én mũ ěn han ājag tóg nĩgtĩ. Kronkron mũ ja ājag tóg nĩgtĩ, krĩ tũ ja ājag tóg nỹtĩgtĩ. Vènh mãn kỹ ājag tóg kronkron kỹ kãgter mũ ja nỹtĩgtĩ gé, vènh kãggrã mỹ festa kórég ěn han ja ājag tóg nĩgtĩ gé. ⁴ Ûri ājag tóg tag han mãn sór tũ nỹtĩ ha, hã kỹ tóg ag mỹ e tĩ, ù tỹ vènh jykre kórég to tar nỹtĩ ag mỹ. Ag mỹ tóg e tĩ, ājag tỹ ag mré ag jykre pãno han mãn sór tũ nỹtĩn kỹ, ājag tỹ ag krĩ tũ jãvo krĩ há nỹtĩn kỹ. Hã kỹ ag tóg ājag to vĩ kónãn tĩ, ùri. ⁵ Hã ra Topê tóg ag jykre vég nĩ nĩ. Vènh kar jykre tugnỹm ti tĩ mỹr, kỹ tóg ag mỹ ag jykre to: “tag vỹ há nĩ, ěn vỹ kórég nĩ,” henh ke mũ, ùn rĩr mũ ag jykre to, ùn kãgter mũ ag jykre to ke gé.

⁶ Û tỹ hēn ri ke ag tóg Jesus mur ke to hã kãgter ja nĩgtĩ. ěn ag mỹ tóg vènh vĩ sér tónh vyr gé, Cristo ti, vènh kuprĩg ag jamã ra, ag krenkren jé. Ag tỹ han ja to Topê tóg ag vóg kónãn, ag tỹ ājag tỹ ga kri mũgtĩ kã vènh jykre han mũ ěn to. Hã ra Topê tóg ag rĩnrĩn mãn sór ja nĩ gé, hã kỹ tóg ag kãgter mũ ra ag mỹ vènh vĩ jēnēg mũ gé, ag tỹ kanhkã tá junjun jé.

⁷ Kakó ti tĩ ha, ga tag tỹ tũg' henh ke kurã ti. Vēsō jykrén nĩ, krĩ há han nĩ, ājag tỹ Topê mré vēmén há han jé. ⁸ Kỹ jagnē to há tãvĩ nỹtĩmnĩ. Tag to krónh ke tũg nĩ. ěg tỹ jagnē to há nỹtĩn kỹ ěg tóg jagnē mỹ vènh pãte fón ke mũ, ěg tỹ Topê vĩ mranh mũ ti, ti e nỹtĩ hã ra. ⁹ Û tỹ kuvar há tá ājag to pasa kỹ ti mỹ: “inh mré jē,” hemnĩ. Ti to vỹ tũg nĩ, ti to mỹ sér nỹtĩmnĩ. ¹⁰ Kỹ, Topê vỹ ěg tar han tĩ. Û tóg nén ù to tar nĩ, jãvo ù tóg nén ù ù to tar nĩgtĩ gé. ěn ki rĩrmnĩ, ājag tỹ nén ù to tar nỹtĩ ěn hã ki rĩrmnĩ, vènh kar tỹ ājag tugrĩn tar nỹtĩ jé. ěg tỹ Topê tỹ nén to ěg tar han mũ ěn ki rĩr há han ke vē, tag vỹ Topê mỹ há nĩ. ěg tar pē han ti tĩ,

Tope ti. ¹¹ Ājag kāmī ū vēmén kŷ Topē vī hā tŷ vēmén nī. Ū tóg Topē tū ag ki rīr tūgtī, kŷn jé Topē mŷ to vī, ti tŷ to ti tar han jé. Ājag tŷ ājag rānhrāj tag ki rīr há han kŷ Jesus ki ge kŷ nŷtī kar ag vŷ Topē mŷ vī há han ke mŷ. Jesus Cristo hā vŷ tŷ ūn mág nī, ti hā vŷ tar nī, kŷ tóg tūg' henh ke tū pē nī. Amém.

Ag tŷ Jesus tugrīn ěg vóg kónān ke

¹² Inh kanhkā', ājag to sóg há tāvī nī. Nén ū jagy pē vég ājag tóg mŷ. Ge ti nŷgtī, kŷ to jŷkrén tūg nī. ěg kar vŷ tag vég tī, Jesus tugrīn. ¹³ Mŷ sér nŷtīmni. Ājag jagtar kŷ ājag tóg Cristo tŷ ěg jagfy jagtar mŷ ěn ri ke vég tī. Ājag tŷ ti ri ke jagtar kŷ ājag tóg ti mré tŷ ūn mág nŷtính ke mŷ gé, ti tŷ tŷ ūn mág nính ke kurā ěn ká. ěn ká tóg ājag mŷ sér gy tính mŷ, ha vemni. ¹⁴ Hŷ, tá tóg ājag mŷ sér tāvī tính mŷ, ag tŷ ūri ājag mŷ vī kónān han mŷ ra, ājag tŷ Cristo ki rā kŷ nŷtī tugrīn. Ag tŷ ājag to vī kónān tugrīn ājag tóg ki kanhró nŷtính ke mŷ, Topē kuprīg tŷ tŷ ājag jagrē nī ti. Ti kuprīg vŷ ājag tŷ ūn mág han ke mŷ, Topē tŷ tŷ ūn mág nī ěn ri ke. ¹⁵ Ū ag tóg ājag tŷ ū tén tugrīn jagtar nŷtī, ājag tŷ ū tū péju tugrīn ke gé. Kŷ ū ag tóg ājag tŷ crime han tugrīn jagāgtar nŷtī gé, ājag tŷ vėnh kar to vī tugrīn ke gé. Ājag tŷ ag mré vėnh jŷkre pāno tugrīn jagtar kŷ tóg Topē mŷ há tū nī. Ājag tŷ ti vī mranh ke tū vė vė. ¹⁶ Ājag tŷ hā ra Cristo tugrīn jagtar kŷ tóg ti mŷ há tī. Tag to mŷ'āg tūg nī. Tag to Topē mŷ vī há han nī, ājag tŷ tŷ Cristo mré ke nŷtín kŷ.

¹⁷ Topē vŷ vėnh kar jŷkre tugnŷm kán ke mŷ, kurā kakó ki. Hā ra tóg ū tŷ ti ki ge kŷ nŷtī ag jŷkre tugnŷm vén ke mŷ. Ti tŷ ěg jŷkre tugnŷm kŷ ěg tóg nén ū jagy ve kren ke mŷ. Kŷ ū tŷ ti ki ge tū ag vŷ nén ū jagy pē ěn ve kán ke mŷ, ha vemni, ū tŷ ti vī kato tē mŷ ag. ¹⁸ Hā kŷ tag tóg rán kŷ nī, ha mē: “ŭ tŷ Topē vī há han sór mŷ ag vŷ ter kren ke mŷ. Kŷ

ŭ tŷ ti vī mranh tī ag vŷ kren ke tū pē nī, ŭ tŷ ti kato tē mŷ ag,” he ja tóg nī, Topē vī tŷ rán kŷ nī ki. ¹⁹ Topē tŷ ěg to: “tag vŷ ti jagy vėnh ke mŷ,” hen kŷ ěg tóg vėnh ke mŷ. Kŷ, ěg jagtar mŷ ra ěg vėnh jŷkre há hā han kŷ nŷtính ke mŷ. Ū tŷ ěg han mŷ ěn to jŷkrén jé ěg tóg ke mŷ, Topē to. Ti pi(jé) ěg tovānh ke mŷ'. ěg mré tóg nī nī.

Pedro tŷ ěg jyvėn

5 Vāhā sóg ū tŷ Jesus ki ge kŷ nŷtī ag to pā'i ag jyvėn sór mŷ, ha mē. Ājag ri ke inh nī, isŷ tŷ ājag kóm ū tŷ Jesus ki ge kŷ nŷtī ag to pā'i jėn kŷ. Cristo jagtar ve ja inh nī gé hā ra. Ti vėnh ven mán ke kurā ěn ká sóg tŷ ūn mág jėnh ke mŷ gé. ² Kŷ sóg ājag mŷ tag tó sór mŷ, ha mē. Ājag krēm ke ag ki rīr há han nī. Ū tŷ carneiro ki rīr tī ěn tŷ ā mēg ki rīr há han tī ěn ri ke han nī. Topē tŷ ājag mŷ vėnh rānhrāj nīm jan hā vė. Ājag rānhrāj tŷ ājag mŷ sér tīn kŷ tóg há tī. Ājag tŷ ājag rānhrāj han sór tū nín kŷ tóg ū tī. Kŷ ājag ganho mī ěkrén sór tūg nī gé. Topē tū vė, ājag rānhrāj tī, hā kŷ ki rīr há han sórmni. ³ Kŷ ājag krēm ke ag ki rīrmni, ag mŷ komēr hā vīmni. Ag rīnve vėnh jŷkre há hā han kŷ nŷtīmni, ag tŷ ājag jŷkre há ve kŷ ājag kóm han sór jé. ⁴ Kānhmar ti kātīg mán ke mŷ, ěg pā'i mág tī, ěg ki rīr tī ti. Kŷ tóg ājag tŷ ūn mág han ke mŷ. Ājag mŷ tóg krī tógfi ri ke vīn ke mŷ, ājag tŷ tŷ ūn mág nŷtín kŷ, hā ra tóg kórég vānh nī, ěg krī tógfi ěn ti.

⁵ Kŷ sóg kyrū ag jyvėn sór mŷ. Ājag mŷ sóg: “ŭn sanh tŷ ājag mŷ nén ū tó mŷ ěn han nī,” he sór mŷ.

Kŷ sóg vėnh kar jyvėn sór mŷ gé. Vėnh kar mŷ sóg: “jagnē to é he tūg nī,” he mŷ. “Jagnē ki rīr há han nī, jagnē mŷ nén ū há kar han nī,” he sór mŷ. Tag vŷ rán kŷ nī, Topē vī rá ki, ha mē. “Topē vŷ ū tŷ jagnē to é he mŷ ag kato tē tī. Hā ra tóg ū tŷ: “ŭn sī vŷ tŷ inh nī,” he mŷ ěn to há

nĩ,” he tóg, Topẽ ví rá ki. Hã kỹ vēsỹ ùn mág han sór tũg nĩ. ⁶Topẽ vỹ tar nĩ, kỹ tóg kejẽn ãg mỹ nén ù jagy jẽnẽg tĩ. Tĩ kato tẽ tũg nĩ hã ra, ti tovãnh sór tũg nĩ gé. Kỹ tóg ã kurã ki ãjag tỹ ùn mág han mãn ke mũ, ha vemnĩ. ⁷Ãjag krĩ kufy nĩn kỹ ti hã mỹ tómni, kỹ tóg ãjag mỹ ãjag krĩ kuprãg ke mũ. Tĩ hã vỹ ãg ki rĩr nĩgtĩ.

⁸Vẽnĩ ki rĩrmnĩ. Nũr ri ke han tũg nĩ. Ha vé, ãg kato vãsãn tĩ ẽn, Japo ẽn tóg ãg to vājig tĩgtĩ. Mĩg kókĩr ri ke ti nĩ, ti tỹ ãg mãn sór kỹ. ⁹Hã kỹ ti kato vãsãnsãn nĩ, Jesus Cristo ki rã tovãnh tũg nĩ gé, ù tỹ ãjag tỹ ti tovãnh han sór mũ ra. Ha vé, ãg kanhkã kar ag vỹ jagtar tĩ, ãjag kóm, ga kri ke kar ag. Ag mĩ êkrén kỹ tar nỹtĩmni.

¹⁰Kurã pipir ki ãjag tóg jagtar tĩ. Kar kỹ Topẽ vỹ ãjag tỹ ùn há tãvĩ han ke mũ, ãjag tỹ kygnẽ mãn tũg jé. Tĩ hã vỹ ãg tar han tĩ, ãg tỹ ti to krónh ke tũ nĩ jé. Tĩ hã vỹ ãjag tỹ ùn há han ke mũ gé, kỹ ãjag tóg ti tovãnh ke tũ pẽ nĩ. ãg to há pẽ ti nĩ,

Topẽ ti. ãg kuprẽg tóg mỹr, ãg tỹ Cristo tugrĩn kanhkã ve jé, ẽmã sĩnvĩ pẽ ẽn ti, ù tũg vãnĩ ẽn ti. ¹¹Topẽ hã vỹ ã pir mỹ tar nĩ. Tĩ hã vỹ tũ' henh ke tũ nĩ. Amém.

Pedro tỹ ag mĩ êkrén

¹²Tó sĩ han sóg ãjag mỹ, kỹ Silas tóg inh mỹ ãjag mỹ rán mũ, inh vĩ ti. ãg kanhkã vỹ tỹ ti nĩ, Silas ti, Jesus tovãnh jãvãnĩ ti nĩgtĩ, kỹ tóg iso há nĩ gé. Isỹ ãjag tar han sór vẽ, hã kỹ sóg ãjag mỹ inh vĩ jẽnẽg mũ. Sỹ ãjag mỹ: “Topẽ vỹ ãg tar han ke mũ mỹr,” he mũ gé. Tĩ to krónh ke tũg nĩ. ¹³Cidade tỹ Babilônia tá ãg nỹtĩ, kỹ tag ki ù tỹ ãjag mré Jesus ki ge kỹ nỹtĩ ag vỹ ãjag mĩ êkrég tĩ. ãjag mré tóg ãg kuprẽg, Topẽ ti. Kỹ inh kósin tỹ Marcos vỹ ãjag mĩ êkrég tĩ gé. ¹⁴Jagnẽ ki nhun ke ri ke han nĩ, jagnẽ nĩgẽ kãgmĩ kỹ, ãjag tỹ tỹ jagnẽ mré ke nỹtĩn kỹ.

Cristo mré ke vỹ tỹ ãjag nỹtĩ. Topẽ jé ãjag krĩ tỹ kãnhvy' hé. Hã vẽ.

PEDRO TỠ CARTA HAN MÃN

1 Simão Pedro tỡ ăjag mỷ carta rán hă vễ. Jesus Cristo tỡ inh fễ vễ, sỡ ti rănhrăj han jế, sỡ tỡ ti apốstolo jễ jế. Isỷ ừ tỡ inh mrế Jesus Cristo ki ge kỡ nỷtỡ kar ag mỷ rán hă vễ. Topễ vỷ ềg kuprềg, ừn jykre kuryj ền vỷ ềg kuprềg, ềg tỡ ềg krenkren han mỷ tỡ Jesus Cristo ki ge jế. Nén ừ sớ vễ, ti ki ge mỷ ti.

² ăJag to sớg Topễ mrế vỷ tỡ, ăjag tỡ ềg Senhor tỡ Jesus Cristo ki kanhrăn há han jế, Topễ ki ke gế, ăjag tỡ komễr hă ti ki kanhrăn kăn jế. Kỡ tóg ăjag tar han ke mỷ. Kỡ tóg ăjag krỡ tỡ kănhvy' henh ke mỷ gế.

Topễ tỡ ềg kuprềg

³ Topễ ki kanhró ềg tóg nỷtỡ. Ềg kuprềg tóg, ti tỡ ềg tar han jế, ti tar nỡ ền ri ke. Kỡ tóg ềg tỡ ừn mág han ke mỷ gế, ti tỡ tỡ ừn mág nỡ ền ri ke. Ềg tỡ tag ki kanhró há han kỡ ềg tóg ti to tar nỷtỡ, ềg tỡ ti jykre jagma mỷ há han jế. ⁴ Kỡ Topễ tóg ềg mỷ nén ừ há tó ja nỷtỡ gế. Ừ tóg ềg mỷ vễnh vỷ há tỡ ge tónh ke tỡ nỡ. Topễ tỡ ềg mỷ vỷ há han ri ke venh ke tỡ ềg tóg nỡ. Tag tó ti ềg mỷ, ha mễ. Ềpră ke kar vỷ nũgme ki văr ke mỷ, ăjag tỡ nén to ền mỷ ền han tugrỡn. Ag jăvo ềg tóg krenkren ke mỷ, kỡ ềg tóg Topễ ri ke nỷtỡnh ke mỷ, mỷr, ha mễ. ⁵ Hă kỡ văsăn, ăjag tỡ ti ki ră to tar nỷtỡ jế, ăjag tỡ ti ki ră tugrỡn vễnh jykre há hă han jế. Vễnh jykre há han kỡ vễnh kanhrăn kỡ mỷmnỡ gế. ⁶ Vễnh kanhrăn kỡ mỷ kỡ vễso jykren nỡ gế. Vễso jykren kỡ ti tovănh tũg nỡ gế. Ti tovănh tỡ nỡn kỡ ti jykre hă mỷ mỷmnỡ gế. ⁷ Ti jykre hă mỷ mỷn kỡ jagnễ to há tăvỷ nỷtỡmnỡ gế, ềg kanhkă kar ag to. Ềg kanhkă to há nỷtỡn kỡ ềpră ke kar ag to há nỷtỡmnỡ gế. ⁸ ăJag tỡ tag han kăn kỡ tóg há tỡ. Kỡ ăjag tóg ềg Senhor tỡ Jesus Cristo ki kanhrăn há han ke mỷ gế, kỡ ăjag tóg vễnh jykre há to krónh ke tỡ nỡ

gế. Kỡ ăjag tóg komễr hă ti ki kanhrăn kăn ke mỷ, ha vemnỡ. ⁹ Ừ tỡ vễnh jykre há han sớ tỡ nỡn kỡ tóg ừn kyvó ri ke nỡ, ừn ềvănh kórềg, ừn kutu ri ke ti nỡ sớ. Ền vỷ ềg Senhor ki kagtỡg nỡ. Văsỷ Topễ vỷ ti kykũnh ja nỡ, ti tỡ Topễ vỷ mranh ja ền to. Hă ra tóg kă jatun kỡ nỡ ha, hă kỡ tóg ti kórềg han măn sớ mỷ.

¹⁰ Inh kanhkă', Topễ vỷ ăjag kuprềg. Kỡ văsănsăn, vễnh kar jế ăjag jykre há tugrỡn ki kanhró nỷtỡ jế, ti tỡ ăjag kuprềg mỷ ền ti. Kỡ ăjag tóg tỡ prănh kenh ke tỡ nỡ, ha vemnỡ. ¹¹ Kanhkă ve jế ăjag tóg ke mỷ, ha vemnỡ, ềg Senhor tỡ Jesus Cristo tỡ ti, ềg krenkren han tỡ ền tỡ ti. Tỡ' henh ke tỡ ti nỡ, ti tỡ tá tỡ ừn mág nỡ ti.

¹² Hă kỡ sớg ăjag mỷ tó măn', tó măn' he mỷ. Ki kanhró ăjag tóg nỷtỡ, vễnh vỷ há to tar ăjag tóg nỷtỡ, ăjag tỡ mễg mỷ ền to. ¹³ Ge ra sớg ăjag jyvễn măn sớ mỷ, ăjag tỡ kă jatu tỡ nỷtỡ jế. Isỷ ăjag mrế nỡ mỷ ền kă sớg ăjag mỷ tag tó, ăjag jyvễn mág inh. Kỡ kă jatun nỷtỡ tũg nỡ. ¹⁴ Ha vé, kănhmar sớg iser kỡ inh făr tovănh kỡ tũg ke mỷ, ki kanhró sớg nỡ. Ềg Senhor tỡ Jesus Cristo vỷ inh mỷ isỷ kănhmar tũg ke ti tó. ¹⁵ Hă kỡ sớg vễnh rán tag to fũrũn mỷ, ăjag tỡ iser kar kỡ kă jatun tỡ nỷtỡ jế.

Pedro tỡ Jesus ve ja

¹⁶ Ha vé, inh pi(jế) ăjag mỷ ỏn mỷ', isỷ ăjag mỷ ềg Senhor tỡ Jesus Cristo kătỡg vên mỷ ền tón kỡ, isỷ ti jykre tar tón kỡ. Ti ve inh, sỡ ăjag mỷ nén tó mỷ ti. Ti ve inh, ti tỡ tỡ ừn mág pẽ nỡ ti. ¹⁷⁻¹⁸ Ti jóg tỡ Topễ vỷ ti tỡ ừn mág han. Ti tỡ tóg ừn tar han gế. Ềg tỡ Jesus mrế pănónh kri nỷtỡ ền kă ềg tóg kanhkă tá vễnh vỷ ền mễg mỷ, ềpră nỷtỡn kỡ. Kỡ tóg ti to tag tó, ừ tỡ vễnh kar kri ke ền ti, Topễ ti, ha mễ. “Inh kósın pir hă vễ,” he ja tóg nỡ, Topễ ti, Jesus to. “Inh fe pẽ vễ,” he ja tóg nỡ. Topễ tỡ pănónh ki kătẻre mỷ ền kri ke ja vễ. Ền tá sớg Jesus tỡ tỡ ừn mág jế vé.

¹⁹ Hã kÿ êg tóg ù tÿ vāsÿ Topê vî tó tî ag vî kri fig mû, tovānh tû êg nÿtî. Kri nîmnî gé, ājag. Lampiāo grug ri ke ti nî êg mÿ, ag vî ti. Lampiāo grug vÿ êg mÿ kuty tá jēngrē han ti. Kurā ke kâtá êg tóg lampiāo grug ve măn sór tû nîgtî. Kurā ke kâtá krīg mág hã vÿ êg fe tÿ mrin ke tî. Jesus to ken hã vê, hã vÿ: krīg mág, he mû. ²⁰ Kÿ, ājag tÿ Topê vî rá to ken kÿ tag to jykrén nî, ha mē: êg pi(jé) vēsóg ki to jykrén ke mû, Topê vî rá to', Topê tÿ ā vî tó tî ag mÿ nén tó mû ên to'. Topê hã ne to êg krín ke mû. ²¹ Kÿ Topê vî tó tî ag pi(jé) vēsóg ki ājag kri ki to jykrén kÿ rán ja nîgtî gé'. Topê kuprīg tÿ ājag krín mû ên hã rán ja ag tóg nîgtî, hã kÿ tóg tÿ Topê vî nî, vēnh rán ki.

Ón kÿ Topê vî tó tî ag

2 Hã ra ù ag tóg ón kÿ Topê vî tó ja nîgtî gé, vāsÿ, Israel ù ag. Tag ve jé ājag tóg ke mû gé. Û ag tóg ón kÿ ājag mÿ Topê vî kāmén sór ke mû, ha vemnî. Ên ag vî vÿ ón kÿ ājag mÿ mē há tî mē tînh ke mû, hã ra tóg ājag kókén ke mû. Êg Senhor tovānh jé ag tóg ke mû, ù tÿ êg kygjam ja ên ti. Hã ra Topê vÿ vāhã ag tÿ tû' henh ke mû. ² Ge ra ù tÿ hēn ri ke ag tóg ag jykre pāno han ke mû, ag mré. Kÿ ù tÿ ag mré vēnh jykre pāno han mû ên ag tigrín Topê jykre kato vî vî henh ke vê, tag tÿ mē há' henh ke vê sir, ti tÿ ki hã tó mû ra. ³ Ag tÿ jänkamy mág ve sór vê, hã kÿ ag tóg ón kÿ vême sînvî tó sór mû, ag tÿ ājag lograr he jé. Hã ra ù tÿ ag vóg kónān ke mû ên tóg ag vэг tî. Ag tÿ tû' he jé tóg ke mû, kānhmar, ha vemnî.

⁴ Topê tÿ jēgnē jafā ù ag vÿ Topê vî mranh. Ên ag vóg kónān tóg huri, Topê ti. Ag pi(jé) krenkren'. Nūgme ki tóg hur ag vām, Topê ti. Tá ag tóg sigse kÿ nÿtî, ferro tÿ corrente tÿ. Tá tóg kuty nÿ. Tá ag tóg Topê tÿ vēnh kar jykre tugnÿm ke kurā ên jāvānh nÿtî. ⁵ Kÿ Noé mré ke ag vÿ nÿtîgtî gé. Topê vÿ ag vóg kónān

ja nî gé. Goj var tÿ tóg ù tÿ ti vî mranh mû ag tÿ tû' he kân. Ag pi(jé) krenkren'. Û tÿ 8 (ke) ag tāvî vÿ krenkren, ên kâ, hã vÿ: Noé, he mû, ù tÿ vēnh kar mÿ: “Topê vî kri fimnî,” he mû ên ti, kar kÿ ti mré ke tÿ 7 (ke) ên ag ke gé. Ti mré ga kri mû ù ag vÿ tû' he kân. ⁶ Topê vÿ cidade tÿ Sodoma tá ke ag, cidade tÿ Gomorra tá ke ag vóg kónān ja (tóg) nîgtî gé, kÿ cidade ên tá in tóg kugpūr kân ja nî. Êg tÿ tag ve kÿ êg tóg Topê tÿ ùn jykre pāno ag vóg kónān ke ên ki kanhró nÿtî gé. ⁷ Cidade ên tá ùn pir vÿ kren, hã vÿ: Ló, he mû. Ên vÿ jykre há nî ja nîgtî, kÿ ti mré ke ag jykre kórég vÿ ti mÿ e nî ja nîgtî, tag to tóg krî kufy han ja nîgtî. ⁸ Kurā kar ki tóg ag kāmî ag jykre pāno ve ja nîgtî, kÿ ti krî tóg kufy jagy nî ja nîgtî, ti tÿ ag jykre kórég ve kÿ, ag vî kórég ke gé. Ên vÿ ā pir mÿ kren, Ló ti. ⁹ Û tÿ Topê to: “ùn mág vÿ tÿ ti nî,” he mû ag krenkren han ki kanhró tóg nî, Topê ti. Hã ra tóg ù tÿ vēnh jykre pāno han mû ag vóg kónān ke mû, ti tÿ vēnh kar jykre tugnÿm ke kurā ên kâ. ¹⁰ Û ag vóg kónān mág pē han jé tóg ke mû, Topê ti, hã vÿ: ù tÿ ājag tÿ nén to én mû han tî ên ag, he mû, ùn vēnh kavénh tî ag, he mû, ù tÿ: “Topê pi(jé) tÿ êg Senhor nî,” he mû ên ag, he mû.

Ón kÿ Topê vî tó tî tag ag vÿ êg vî kafān tî. “Inh hã tóg ki kanhró nî,” he ag tóg tî. Kÿ ag tóg kanhkā tăn ag kamēg vānh nÿtî gé. Ag to ag tóg vî kónān tî, kanhkā tăn ag to, ón kÿ Topê vî tó tî ag. ¹¹ Topê tÿ jēgnē jafā ag vÿ tag han tû nîgtî, ha mē. Kanhkā tăn ag to ag tóg vî kónān tû nîgtî, Topê rînve, Topê tÿ jēgnē jafā ag. Ag tÿ ù tÿ ón kÿ Topê vî tó tî ag tar káfór nÿtî ra ag tóg kanhkā tăn ag to vî tû nîgtî. ¹² Ag jāvo ù tÿ ón kÿ Topê vî tó tî ên ag vÿ krî tû nÿtî, vānh kāmî sē ag jykre tû ri ke ag nÿtî. Vānh kāmî tóg tîgtî, sē ti, êg tÿ ti to vājig kÿ ti tén jé. Hã jé tóg mur tî. Tag ri ke ag nÿtî, ù tÿ ón kÿ Topê vî tó tî ag. Ājag tÿ kanhkā

tân ag ki kagtīg nýtīn kŷ ag tóg ag to vī kónān tī. Hā kŷ Topē tóg ag tŷ tūl' henh ke mŭ, ěg tŷ sē tén tī ěn ri ke. ¹³ Ag tŷ ājag jykre pāno kajām hā vē. Kurā ki ag tóg ag tŷ nén to ěn mŭ ěn han tī, mŷr, ha mē. Kŷ ag tóg ājag mré jĕg tī gé, ājag tŷ festa han kŷ. Ha ra ag tóg nén tŷ ěg mŷ'a han tī ěn hā han tī, ag tŷ ājag mré jĕn kŷ. Ājag kavénh ag tóg tī. Jykre régre ag nýtī, ón kŷ ag há nī ve nýtī. ¹⁴ Ūn tŷtá fag kar to ěn ag tóg tī, fag ki ěvānh kŷ. Topē vī mranh sór ag tóg tī, ti vī mranh to ag tóg krónh ke tū nĭgtī. Ūn krój ag krīn kónān ag tóg tī, ag tŷ ag mré mranh jé. Ag topē vŷ tŷ jānkamy nī. Topē vŷ ag vóg kónān ke mŭ, ha vemnī. ¹⁵ Topē japry tī, ti jamīn ti tovānh ag tóg, vāgfor kŷ ag nýtī. Beor kósīn tŷ Balaão ěn ri ke han ag tóg tī. ěn vŷ jānkamy to há tāvī nī ja nĭgtī. Hā kŷ tóg ā jykre kórég ěn to jānkamy ve sór mág ja nī. ¹⁶ Hā ra Topē tóg ti mŷ vī tar han, ti tŷ ti vī mranh kŷ. Hā kŷ ti mĕg fi tóg ā vī vānh ra ti mŷ vī ja nĭgtī, ěg tŷ jagnē mré vēmén ri ke han ja fi tóg nĭgtī, ti mĕg fi. Ti mŷ vī kŷ fi tóg ti tŷ vĕnh jykre kórég han ke mŭ ra tŷ tūl' he mŭ, ti mŷ, ū tŷ Topē vī tó tī ěn mŷ, ti tŷ ón kŷ Topē vī tó tī sór mŭ ěn ká.

¹⁷ Ón kŷ Topē vī tó tī ag vŷ goj nĭhŷg ja ki goj tū ěn ri ke nýtī. Kanhkā góg ri ke ag tóg nýtī gé, kākā tŷ vējo kanhkā góg ag vóg kŷ tŷ tūl' he ěn ri ke ag nýtī, ū tŷ ón kŷ Topē vī tó tī ag. Topē vŷ kuty tāvī tá ag vĭn han ke mŭ. ¹⁸ “Ūn mág vŷ tŷ inh nī,” he ag tóg tī, ón kŷ. Krī tū ag nýtī. Nén ū vĕnhmŷ kar to ěn ag tóg tī, nén ū tŷ ěg kavénh tī ěn to ěn ag tóg tī. Vĕnh jykre pāno han kŷ ag tóg ū tŷ ūri Topē ki ge sór mŭ ag krīn kónān tī, ū tŷ ūri ěg tŷ kygnē kŷ han tī ěn tovānh sór mŭ ag. ¹⁹ “Jatun mŷ ěg tóg ěg tŷ nén han sór mŭ ěn han kān ke mŭ,” he ag tóg tī, ón kŷ. “Topē vŷ ěg to jūnh ke tū nī,” he ag tóg tī, ón kŷ. Hā ra ag tóg ěprā vĕnh jykre hā mī mŭgtī, nén tŷ ěg kavénh tī ěn hā han ag tóg tī. Kŷ tóg tŷ ag jagrē nī, ěprā

vĕnh jykre tī. ěg tŷ nén ū tovānh sór mŭ ra tovānh ki kagtīg nýtī ěn vŷ tŷ ěg jagrē nī sir, mŷr, ha mē. ²⁰ ěg Senhor tŷ Jesus Cristo ki kanhró ja ag tóg nýtī vē, ěg kren han mŭ ěn tī. Tī tugrīn ag tóg ěprā vĕnh jykre kavéj kar tovānh ja nĭgtī vē, ěg tŷ nén tugrīn ter ke mŭ tovānh ja ag tóg nĭgtī vē. Hā ra ag tóg ājag tŷ nén tovānh mŭ ěn han mán mŭ, kŷ tóg tŷ ag jagrē nī mán mŭ sir. Kŷ tóg ūri kórég káfór nī, ag mŷ. ²¹ Ag tŷ Topē japry ěn, ti jamīn ěn sán ja tū nī ra tóg há tī vē. Hā ra ag tóg ti sán sī han kar kŷ kyrāgrā mŭ. Topē tŷ ag mŷ vĕnh vī há jĕnĕg mŭ ěn tovānh ag tóg. ²² Ag to ěg tóg tag tó tī, ha mē: “cachorro vŷ ā tŭgtŭv ěn ko mán tī,” he ěg tóg tī. “Porco tóg ā vĕnh kype há han kŷ jĕ ra óré mī vĕsīn mán tī, kŷ tóg vĕnh kavénh mán tī,” he ěg tóg tī gé. Ū tŷ vĕnh jykre kórég tovānh kar kŷ han mán tī ag to ken hā vē.

Jesus kătīg mán

3 Inh kanhkā', ājag to sóg há tāvī nī. Ājag mŷ sóg vĕnh rá ū han huri, kŷ sóg ājag mŷ rán mán mŭ ha. Inh vĕnh rá kar ki sóg ājag jyvĕn tī, ājag tŷ nén jānhkri hā to jykren kŷ nýtī jé, ājag tŷ tag ká jatu nýtī tū nī jé. ² Topē vī tó tī ag vŷ vāsŷ Topē vī tó ja nĭgtī. ěn mī ěkrén nī. Kŷ apóstolo ag vŷ ājag mŷ tó ja nĭgtī gé, ěg Senhor tŷ nén to ěg jyvĕn mŭ ti, ěg kren han tī ěn vī ti. ěn mī ěkrén nī gé. ³⁻⁴ Tag to jykren nī, ha mē. Kurā tŷ ěgno to hā ěprā ke ū ag vŷ ājag to é henh ke mŭ, ha vemnī. “Tī mŷ kătīg mán mŭ vŷ?” he jé ag tóg ke mŭ. “Tī tŷ vāsŷ kătīg mán ke vē vē, hā ra ěg jo ke ag vŷ vāsŷ tŭg, ti tŷ ā kătīg mán ke tó mŭ ra ag tóg kăgter. Kătīg ke tū ti nī. Ga vŷ nĭnh mŭ, tūl' henh ke tū ti nī, ga ti, ha vemnī,” he jé ag tóg ke mŭ, ěg to é he kŷ, ha vemnī. Ūn jykre kórég ag vē, ū tŷ tag tó mŭ ag. Ājag tŷ nén to ěn mŭ ěn hā han ag tóg tī. ⁵ Topē tŷ vāsŷ nén han mŭ ěn ki kagtīg ag tóg nýtīgti, ag tŷ ki kanhrán sór tū nýtīn kŷ.

Topê tỹ vāsỹ nén han jan hã vê, ha mẽ. Kanhkã han tóg, vāsỹ, ga ti ke gé. Ǻ vỹ tỹ tóg nén kar hyn han ja nĩtĩ, Topê ti. Ga ên vỹ goj tỹ vênh kâpâm kỹ nỹ ja nĩ, kỹ ù tóg goj kri nỹ ja nĩ gé. ⁶Ga ên kri ke kar ag vỹ hur tũg, goj tỹ, goj var mũ ên tỹ. ⁷Kỹ êg tỹ ùri nén vég mũ tag vỹ tũ' henh ke mũ gé, ha vemnĩ. Topê vỹ ti tỹ tũ' henh ke to kurã nĩm huri, kỹ tóg pĩ tỹ ti tỹ tũ' henh ke mũ, Topê tỹ: “tág’,” hen kỹ. Kurã ên kã Topê vỹ ù tỹ ti vỹ mranh mũ ag tỹ tũ' he kãn ke mũ gé. Ag vóg kónãn ke kurã vê sir.

⁸Inh kanhkã', tag to jykren nĩ, ha mẽ. Topê kurã vỹ êg kurã ri ke tũ nĩ. Kurã pir vỹ ti mỹ prỹg tỹ mil (ke) ri ke nĩ, kỹ prỹg tỹ mil (ke) vỹ ti mỹ kurã pir ri ke nỹtĩ gé. ⁹Kỹ tóg Ǻ tỹ êg mỹ nén tó mũ ên tovãnh ke tũ nĩ, Topê ti. Û tóg: “han sór tũ ti nĩ, hã kỹ êg tóg vég tũ nĩtĩ,” he tĩ, ón kỹ. Hã ra ag tóg hã tũ tó tĩ. Ti tỹ ver êg to fe nĩ vê, hã kỹ tóg kătĩg vãnh han. Ti pi(jé) êg kãmĩ ù tỹ nũgme ki kutê mũ ve sór mũ'. Hã kỹ tóg ver êg mỹ kurã ù nĩm mãn', kurã ù nĩm mãn' he mũ, kỹ vênh kar jé Ǻgag jykre kórég tovãnh, ag krenkren jé.

¹⁰Hã ra tóg kătĩg mãn ke mũ, ha vemnĩ. Vãhã tóg kătĩg ke mũ, kỹ tóg ù tỹ êg tũ péju(g) tĩ tỹ êg vatánh tá kătĩg ri ke nĩnh ke mũ. Ên kã kanhkã tóg tov kỹ kréj ke kỹ vár ke mũ. Kanhkã tá nén kar vỹ jonh ke kãn ke mũ gé, krĩg kar ag, pĩ ên tỹ ag tỹ kréj ken kỹ. Kỹ vãhã ga vỹ tũ' henh ke mũ, ga kri ke kar ag ke gé. ¹¹Ge kỹ nén (ũ) kar vỹ tũ' henh ke mũ. Hã mĩ êkren kỹ vênh kãn sórmnĩ. Topê tỹ êg mỹ nén tó mũ ên hã han nĩ. Topê mỹ vênh vin nĩ. ¹²Topê kurã ên jãvãnh nĩ, Topê rãnrhãr to vãsãnsãn nĩ, ti kurã ên tỹ kãnhmar tá krỹg jé. Kurã ên kã kanhkã vỹ pũr ke mũ, kỹ kanhkã tá nén

kar vỹ jonh ke kãn ke mũ gé, krĩg kar ag. ¹³Topê vỹ Ǻ tỹ êg mỹ nén tó mũ ên han kãn ke mũ. Kanhkã tãg han jé tóg ke mũ, ga tãg ke gé. Tá tóg vênh jykre kuryj tãvĩ nĩ. Êg tỹ ga tãg tag, kanhkã tãg tag vênh ha pẽ tóg tĩ.

¹⁴Inh kanhkã', Ǻgag to sóg há tãvĩ nĩ. Topê kurã tag jãvãnh kỹ Ǻgag tóg nỹtĩ. Kỹ vãsãnsãn nĩ, Ǻgag tỹ kygnê tũg jé. Vãsãnsãn nĩ, Ǻgag tỹ Topê mỹ jãnhkri nỹtĩ jé, Ǻgag tỹ ti há ri ke nỹtĩ jé. Kỹ Ǻgag tóg ti kato vãsãnsãn tũ nĩ. ¹⁵Ha vé, ti tỹ ver êg to fe nĩn hã kỹ êg tóg êg jykre kórég tovãnh kỹ krenkren ke mũ. Tag rán tóg huri Ǻgag mỹ, êg kanhkã tỹ Paulo ti. Ti to sóg há tãvĩ nĩ, Paulo to. Topê vỹ ti mỹ krĩ há tãvĩ nĩm. ¹⁶Kỹ tóg, ti tỹ ù mỹ carta han kỹ tóg isỹ nén rán mũ tag ri ke han tĩ gé. Ti vỹ tóg inh vỹ ri ke pẽ nĩ. Carta e han tóg huri, Paulo ti, kỹ ti carta ù vỹ to jykren jagy tĩ gé. Kỹ ù ag tóg ti carta to ke mũ ra ki kagtũg nỹtũn kỹ ti to vỹ kónãn sór mũ. Û tỹ ki kagtũg ag vê, ùn krój ag vê, ù tỹ Paulo tỹ rá to vỹ kónãn mũ ag. Topê vỹ rá ù to ag tóg vỹ kónãn tĩ gé, ên ag. Tag tugrĩn ag tóg kãgter ke mũ, ha vemnĩ.

¹⁷Inh kanhkã', Ǻgag mỹ sóg rán kãn huri. Hã kỹ vênh ki rĩr há han nĩ. Ker ù tỹ Ǻgag mỹ ón kỹ kri nĩm hẽ'. Ke tũ nĩ mũ ra ag tóg Ǻgag lograr henh ke mũ, ù tỹ Ǻgag fe kavênh sór mũ ag, ùn jykre pãno ag. Ǻgag tỹ ag vỹ kri fi tugrĩn Ǻgag tóg vãgfor ke mũ, ha vemnĩ. Êg tỹ kãgnó ki tĩr ri ke han jé Ǻgag tóg ke mũ, ha vemnĩ. ¹⁸Êg Senhor ki kanhrãn ke hã to tar nỹtimnĩ. Ti tỹ êg tar han mũ tag hã ve sórmnĩ, êg kren han tĩ tỹ Jesus Cristo ti. Ti hã mỹ êg tóg vỹ há han ke mũ, ùri, kar kỹ kanhkã tá ke gé, kỹ tóg tũ' henh ke tũ pẽ nĩ. Amém.

JOÃO TỸ CARTA HAN VÉN

Topẽ vỹ

1 Topẽ tỹ ver nén kar han tũg ki tóg nĩ nĩ, Topẽ vỹ ti, hã vỹ: Jesus Cristo, he mũ. Topẽ tỹ Jesus mré nén ù kar hyn han kỹ tóg rĩr nĩ, Topẽ vỹ ti. Sỹ ājag mỹ Jesus Cristo tag kāmén ke vẽ. Mẽ inh, ti vỹ ti. Ti ve inh ke gé, inh kanẽ tỹ. ² Ēg rĩrĩn tĩ ěn vỹ vẽn ven, hã kỹ sóg ti vé. Ti hã tó sóg tĩ, hã kỹ sóg ājag mỹ ti kāmén mũ. Ā tỹ nén kar han tũg ki tóg kã nĩ nĩ, ù tỹ ti han ja tũ hã ra. Ēn kã tóg ã panh mré nĩ ja nĩ sir. Hã ra tóg ěg mỹ vẽn ven. ³ Kỹ sóg ti vé. Ti vỹ mẽ sóg ke gé. Hã kỹ sóg ājag mỹ ti kāmén mũ ha, ājag tỹ inh mré ti ki kanhrân jé. Ēg jóg tỹ Topẽ mré ke vỹ tỹ ěg nỹtĩ, ti kósin tỹ Jesus Cristo mré ke ke gé, kỹ ěg tóg tỹ jagnẽ mré ke nỹtĩ gé. ⁴ Ājag mỹ sóg tag rán kỹ jẽnẽ sór mũ, ti tỹ ājag mỹ sér tĩ jé, ājag mỹ há tãvĩ tĩ jé ke gé.

Topẽ vỹ jẽngrẽ ri ke nĩ

⁵ Ha vé, ti tỹ ěg mỹ nén tó mũn hã vẽ, ha mẽ. Ti vỹ mẽ kỹ sóg ājag mỹ tó sór mũ, ha mẽ. Topẽ vỹ jykre kuryj nĩ, hã kỹ tóg kurã ri ke nĩ, jẽngrẽ ri ke, ki kuty tũ pẽ ti nĩ, Topẽ ti.

⁶ Kỹ, ěg tỹ: “ti mré ke vỹ tỹ inh nĩ,” hen kỹ ěg tóg kuty ki vẽn jykre kórég ěn han ke tũ nĩ, ke tũ ra ěg ón kỹ: “ti mré ke vỹ tỹ inh nĩ,” he tĩ. Vẽn ó vẽ sir. Kỹ ěg tóg ón kỹ nén ù kar han tĩ gé. ⁷ Ēg tỹ ti kóm kurã ki vẽn jykre há ěn han kỹ ěg tóg jagnẽ to há nỹtĩ. Jagnẽ mré ke vỹ tỹ ěg nỹtĩ, ěg tỹ vẽn jykre há han kỹ. Kỹ ti kósin tỹ Jesus vỹ ěg kykũnh ke mũ sir, ã kyvẽn tỹ, ěg tỹ ti vỹ mranh ja (hã) ra.

⁸ Ũ tóg kejẽn: “inh pi(jé) Topẽ vỹ mranh tĩ,” he sór mũ. Ti ón vẽ. Hã ra tóg ti hã mỹ tỹ vẽn vỹ há mẽ tĩ, ti ón

mũ ti. ⁹ Ēg tỹ Topẽ vỹ mranh kỹ ěg tóg ti mỹ tónh ke mũ. “Ā vỹ mranh inh, tag han kỹ,” he jé ěg tóg ke mũ. Kỹ tóg ěg mỹ vẽn pãte fón ke mũ sir. Tag tó ja ti nĩ, kỹ tóg han ke mũ. Kuryj ti nĩ mỹr. Kỹ tóg ěg kykũnh ke mũ sir, ěg jykre pãno tỹ tũg' he jé. ¹⁰ Ēg tỹ: “inh pi(jé) ti vỹ mranh ja nĩgtĩ,” hen kỹ ěg tóg Topẽ to: “ti ón vẽ,” he mũ. Kỹ ěg pi(jé) ti vỹ ki kanhrân há nỹtĩ’.

Jesus vỹ ěg tar han ke mũ

2 Inh krẽ, sỹ tag rán vẽ ājag mỹ, ājag tỹ ti vỹ mranh sór tũ nĩ jé. Kejẽn ājag kãmĩ ù tóg Topẽ vỹ mranh tĩ hã ra. Kỹ ù tóg ti jagfỹ vẽn ke mũ ha, ěg jóg tỹ Topẽ mỹ, hã vỹ: Jesus Cristo, he mũ, ùn jykre kuryj jẽ ěn ti. ² Ti hã tóg ù tỹ ti tén ke mũ ag mỹ vẽn fẽg', ti tỹ ěg jagfỹ ter jé, ti tỹ ěg tỹ Topẽ vỹ mranh tỹ tũ' hen jé. Hã kỹ tóg ěg mỹ vẽn pãte fón sór mũ. Hã ra tóg ěg tãvĩ mỹ vẽn pãte fón sór tũ nĩ. Ēprã ke kar mỹ ke vẽ, mỹr'.

³ Ha vé, ěg tỹ Topẽ vỹ kri fi kỹ ěg tóg veso: “vãhã inh ti ki kanhró nĩ,” henh ke mũ. ⁴ Ũ tóg kejẽn: “ti ki kanhró sóg nĩ,” he tĩ. Hã ra tóg ti tỹ ěg mỹ nén tó ja ěn han tũ nĩgtĩ. Ti ón vẽ. Ti pi(jé) Topẽ tỹ ki hã tó mũ ki kanhró nĩ'. ⁵ Ēg tỹ hã ra Jesus vỹ kri fi kỹ ěg tóg Topẽ to há nỹtĩ. Kỹ ěg tóg ti to há tãvĩ nỹtĩ ha ke gé. Tag han kỹ ěg tóg ti ki kanhrân mũ, kỹ ěg tóg ti ki ge kỹ nỹtĩ ha, ha mẽ. ⁶ Ũ tóg ti to: “ti ki sóg rã kỹ jẽ,” he tĩ. Kỹ tóg ti jykre han kãn mũ sir. Jesus Cristo tỹ nén han ja han kãn tóg mũ. Kỹ tóg ti ki rã kỹ jẽ sir.

Ēg tỹ jagnẽ to há nỹtĩnh ke

⁷ Ājag to sóg há tãvĩ nĩ. Inh pi(jé) ājag mỹ nén ù tãg rán sór mũ'. Nén ù si rán sór inh mũ, ha mẽ. Vãsỹ Topẽ tóg ěg jyvẽn ja nĩgtĩ, ěg tỹ jagnẽ to há nỹtĩ jé. Cristo mur tũg ki tóg ěg mỹ tag tó ja nĩgtĩ, kỹ ājag tóg vãsỹ mẽ ja nĩgtĩ gé. ⁸ Hã ra tóg tãg nĩ gé, sỹ ājag mỹ rán mũ tag ti. Cristo

vỹ ẽg mỹ tó măn ja nĩ, ẽg tỹ jagnẽ to há nỹtĩ jé, kỹ tóg ki króm ja nĩ, kỹ ẽg tóg ti nón ki króm sór mũ gé. Ki hã tó ja ti nĩ, kỹ tóg nén ù tãg ri ke nĩ, Cristo tỹ Topẽ nón tó măn kỹ. Ha vé, komẽr hã tóg kurãg tĩ. Kurã kãtig kỹ ti kuty tỹ tũg' he tĩ, komẽr hã. Jesus tỹ ẽg mỹ: “jagnẽ to há nỹtĩmĩ,” he to ken hã vễ, hã vỹ: kurã, he mũ.

⁹ Û tóg kejẽn: “inh hỹn kurã mĩ tũg mũ ha,” he tĩ, hã ra tóg ã régre to jũ nĩ, ã irmão to. Ẽn vỹ kuty mĩ ti nĩ ver. ¹⁰ Û tỹ ã régre to há nĩ ẽn hã vỹ kurã mĩ tũg ke mũ. Ẽn vỹ ã régre tỹ prãnh ke han ke tũ pẽ nĩ. ¹¹ Û tỹ ã régre to jũ nĩ ẽn vỹ kuty mĩ ti mũ. Kuty to vẽn h jykre han kỹ tóg jẽ nĩ ver. Kỹ tóg ã tỹ hẽ ra tũg ke tag ki kagtĩg nĩ gé. Kyvó ri ke ti nĩ, ti tỹ kuty mĩ tĩn kỹ.

¹² Inh krẽ, sỹ ãjag mỹ rán vễ. ãjag tỹ Topẽ vỹ mranh ja ẽn vỹ vẽn pãte fón kỹ nĩ nĩ, Jesus Cristo tugrĩn. ¹³ ãjag kãmĩ ke ù vỹ sanh há nỹtĩ. Sỹ ãjag mỹ rán vễ gé. Û tỹ ã tỹ nén kar han mũ to hã kã nĩ ẽn ki kanhró ãjag tóg nỹtĩ. ãjag kãmĩ ke ù vỹ kyrũ nỹtĩ. Sỹ ãjag mỹ rán vễ gé. Nén-Kórég vỹ ãjag tỹ hẽ ri ke ja tũ nĩgtĩ.

¹⁴ Inh krẽ, sỹ ãjag mỹ rán vễ. Ẽg jóg mág ki kanhró ãjag tóg nỹtĩ. ãjag kãmĩ ke ù vỹ sanh há nỹtĩ. Sỹ ãjag mỹ rán vễ. Û tỹ ã tỹ nén kar han mũ to hã kã nĩ ẽn ki kanhró ãjag tóg nỹtĩ. ãjag kãmĩ ke ù vỹ kyrũ nỹtĩ. Sỹ ãjag mỹ rán vễ. Tar ãjag nỹtĩ. Topẽ vỹ ki kanhró ãjag tóg nỹtĩ. Nén-Kórég vỹ ãjag tỹ hẽ ri ke ja tũ nĩgtĩ.

¹⁵ Ẽg tỹ tag ki nén ù kórég vég mũ tag ki vễĩ sór tũg nĩ, tag ki vẽn h jykre ki vễĩ sór tũg nĩ gé. Ẽg tỹ tag to há nỹtĩn kỹ ẽg tóg ẽg jóg mág to há tũ nỹtĩ. ¹⁶ Ẽprã vẽn h jykre pi(jé) tỹ Topẽ jykre nĩ. Ẽprã vẽn h jykre hã vễ, ha mẽ: nén ù kar to ẽn ẽg tóg tĩ. Ẽg tỹ nén ù ve kỹ ẽg tóg ẽn măn sór tĩ. Kỹ ẽg tóg: “ũn mág vỹ tỹ inh nĩ, isũ to, isỹ nén ù kar to,” he tĩ gé. Topẽ jykre pijé'. Ẽprã vẽn h jykre hã vễ. ¹⁷ Hã ra tóg kãnhamar tũ' henh ke mũ, ẽg tỹ nén

vég mũ tag ti, ti tũg kỹ ẽg tỹ ne to ẽn ke tóg tũ tĩ gé. Û tỹ Topẽ vỹ han tĩ ẽn vỹ tũ' henh ke tũ nĩ jãvo.

Ủ tỹ Cristo kato tẽ

¹⁸ Inh krẽ', kurã tỹ ẽgno vỹ kakó tĩ ha. Kurã ẽn kakó nĩn kỹ Cristo kato tẽ pẽ ẽn vẽn ven ke mũ. Tag mẽ ãjag huri. Hã ra ag tóg hur vẽn vinven, ù tỹ ti kato tẽ mũ tỹ hẽn ri ke ag. Hã ki ẽg ki kanhró nỹtĩ, kurã tỹ ẽgno kakó nĩ ti. ¹⁹ Ẽg mré ke ag vễ vễ, ù tỹ ti kato tẽ mũ tag ag, hã ra ag tóg ón kỹ tỹ ẽg mré ke ja nỹtĩgtĩ. Ag tỹ tỹ ẽg mré ke pẽ nỹtĩ ra ag tóg ver ẽg mré mũnh ke mũ vễ. Hã ra ag tóg ti tovãnh kỹ ti kato tẽ mũ ha. Hã ki tóg ve há tĩ, ag tỹ tỹ ẽg mré ke tũ nỹtĩ ti.

²⁰ ãjag kar vỹ vẽn vỹ há ki kanhró nỹtĩ. Jagrẽ ãjag nỹtĩ, ùn jykre há ẽn kuprĩg tỹ, hã kỹ ãjag tóg ki kanhró nỹtĩ. ²¹ Hã kỹ sóg ãjag mỹ rán mũ, ãjag tỹ ki kanhró nỹtĩn kỹ. ãjag pi(jé) ki kagtĩg nỹtĩ'. Û tỹ vẽn vỹ há tó mũ ẽn pi(jé) ón tĩ'.

²² Kỹ ùn nỹ hỹn ón tĩ? Ủ tỹ ge vỹ ón pẽ han tĩ, ha mẽ: ù tóg Jesus to: “ti pi(jé) tỹ Cristo nĩ,” he tĩ. “Topẽ tỹ ti jẽnẽ pijé', Topẽ kósĩn pijé',” he ag tóg tĩ gé, Jesus to. Û tỹ Cristo kato tẽ mũn hã vễ. Ẽg jóg to ag tóg ón tĩ, ti kósĩn to ke gé. ²³ Û tỹ Jesus to: “ti pi(jé) tỹ Topẽ kósĩn nĩ,” hen kỹ tóg ẽg jóg mág ki kagtĩg nĩ gé. Kỹ ù tỹ Jesus to: “Topẽ kósĩn vỹ tỹ ti nĩ,” hen kỹ tóg ẽg jóg mág ti ki kanhró nĩ gé.

²⁴ Vãsỹ ãjag tóg ti vỹ mẽ vén. Ẽn kã jatu tũg nĩ, ẽn hã mĩ ẽkrén nĩ. ãjag tỹ tag to tar nỹtĩn kỹ ãjag tóg Topẽ kósĩn ki ge kỹ nỹtĩ, ti panh ki ke gé. Hã kỹ ãjag tỹ nén mẽ vén ja ẽn tovãnh tũg nĩ. ²⁵ Ti hã vỹ ẽg mỹ tó ja nĩ, ẽg tỹ ẽg rĩr krỹg ja tũ venh ke ti.

²⁶ Ủ ag tóg ãjag krĩn kónãn sór mũ, ãjag mỹ ón kỹ, ti vỹ tó kỹ. Hã kỹ sóg ãjag mỹ vẽn rán tag han mũ. ²⁷ Hã ra ãjag tóg jagrẽ nỹtĩ, Topẽ kuprĩg tỹ. Kỹ tóg ãjag kanhrãn mũ sir, Topẽ kuprĩg ti. Ti

hã vỹ ẽg kanhrân tĩ, kỹ ù vỹ ẽg kanhrân măn ke tũ nĩ ha. Nén kar kāmén ti tĩ, ẽg mỹ, ẽg jagrê ti. Vênh vĩ há hã tó ti tĩ. Ti pi(jé) ón tĩ. Ti tỹ ăjag mỹ tó mũ ên hã mĩ mũmnĩ, ti tỹ ăjag mỹ: “Jesus hã ki ge kỹ nỹtĩmnĩ,” hen kỹ.

²⁸ Inh krê', ti ki ge kỹ nỹtĩmnĩ. Kỹ tóg há ti. Kanhmar ti kătĩg ke mũ, kanhmar ti vênh ven ke mũ. Kỹ ẽg tóg mỹ'ag ke tũ nĩ, ti kătĩg kỹ, ẽg tỹ ti ki ge kỹ nỹtĩn kỹ. Ẽg mỹ'ag kỹ ẽg tóg ti kătĩg kỹ vênh pigiu sór mũ. Hã kỹ ke tũg nĩ. ²⁹ Ti hã ne vênh jykre kuryj hã mĩ tĩg ja nĩgtĩ. Kỹ ù tỹ vênh jykre kuryj han mũ vỹ tỹ ti kósín nĩ. Tag mĩ êkrén.

Jesus jăvy ag

3 Ha vé, ẽg jóg mág tóg ẽg to há tăvĩ nĩ, hã kỹ tóg ẽg to: “inh krê,” he mũ sir. Ti krê vỹ tỹ ẽg nỹtĩ, Jesus jăvy. Hã kỹ ẽpră ke ù ag vỹ ẽg jykre ki kagtĩg nỹtĩ. Ag pi(jé) Topê ki kanhró nỹtĩ, hã kỹ ag tóg ẽg jykre ki kagtĩg nỹtĩ gé, ẽg tỹ tỹ ti krê nỹtĩn kỹ. ² ăJag to inh há tăvĩ nĩ. Ừi ẽg tóg tỹ Topê krê nỹtĩ. Kanhmar ẽg tóg ti mré nỹtĩnh mũnh mũ. Kỹ ẽg hỹn hẽ ri ke nỹtĩnh mũ, kanhkă tá? Ha'. Kar kỹ ẽg venh ke mũ, ti kătĩg kar kỹ. Ên kă ẽg tóg tỹ ti hã pẽ nỹtĩnh mũ, ẽg tỹ ẽg kanê tỹ ti ve kỹ. Ti ve pẽ han jé ẽg tóg (ke) mũ, kură ên kă. ³ Ẽg tỹ tag hã ve sór vẽ. Hã kỹ ẽg vênh jănhkrig ke mũ, ẽg tỹ ti jănhkri nĩ ên ri ke nỹtĩ jé, vênh jykre păno tovănh kăn kỹ.

⁴ Ẽg tỹ ti vĩ mranh kỹ ẽg tóg mranh mũ sir, ti tỹ ẽg mỹ nén tó ja ti. Hỹ, mranh kỹ ẽg tóg mranh tĩ, ti tỹ ẽg jyvên ja ti. ⁵ Hã ra Cristo vỹ kătĩg ja nĩ, ti tỹ ẽg tỹ ti vĩ mranh ja tỹ tũg' he jé. Tag ki kanhró ẽg tóg nỹtĩ. Ti pi(jé) mranh ja nĩgtĩ, Topê vĩ ti, inhhă. ⁶ Ẽg tỹ ti ki ge kỹ nỹtĩn kỹ ẽg tóg mranh măn sór tũ nĩ ha. Ừ tỹ ver mranh măn sór kỹ tóg ti ve ja tũ nĩ, ti ki kagtĩg nĩ sir.

⁷ Inh krê', ker ù vĩ jêmê hẽ', ù tỹ ăjag krĩn kónăn sór mũ vĩ ti. Ừ tỹ vênh jykre

kuryj han mũ ên hã vỹ kuryj nĩ, Topê kuryj nĩ ên ri ke. ⁸ Ừ tỹ Topê vĩ mranh mũ ên vỹ tỹ Japo mré ke nĩ. Japo hã ne Topê vĩ mranh tĩgtĩ. Topê tỹ nén ù kar han mũ ên kă Japo ne ti vĩ mranh vén', kỹ tóg ừi ti vĩ mranh tĩ nĩ gé. Hã ra Topê kósín vỹ Japo tỹ nén han mũ kókén ja nĩ, hã jé tóg mur ja nĩ.

⁹ Ẽg tỹ tỹ Topê krê nỹtĩn kỹ ẽg tóg Topê vĩ mranh măn sór vánh nỹtĩ ha, ẽg tỹ Topê kuprĩg tỹ jagrê nỹtĩn kỹ. Topê vĩ mranh măn sór ke tũ ẽg nĩ ha, ẽg tỹ tỹ ti krê nỹtĩn kỹ. ¹⁰ Ẽg tỹ ag jykre tugnỹm kỹ ẽg tóg ù tỹ tỹ Topê krê mré Japo krê ki kanhró nỹtĩ. Ừ tỹ vênh jykre kuryj han jăvánh ên pi(jé) tỹ Topê krê nỹtĩ, ù tỹ ă régre to há tũ nĩ ên pi(jé) tỹ Topê krê nỹtĩ gé'.

Ẽg tỹ jagnê to há nỹtĩnh ke

¹¹ Tag mẽ ăjag tóg, ăjag tỹ Topê vĩ mẽ vén kỹ, hã vỹ: “jagnê to há nỹtĩmnĩ,” he mũ. ¹² Ẽg pi(jé) Caim jykre han ke mũ. Satanás mré ke ja vẽ, Caim ti, hã kỹ tóg ă jăvy tén. Ne nỹ hỹn ti jũ han, kỹ tóg ti tănħ? Jykre kórég ja ti nĩ, jăvo ti jăvy vỹ jykre há ja nĩ. Hã kỹ tóg ă jăvy tănħ, ti jykre há ên to. Hã kỹ jagnê jykre vэг mũ ra jagnê to jũ tũg nĩ.

¹³ Inh kanhkă', ù tỹ Topê ki ră tũ ag pi(jé) ẽg to há nỹtĩnh mũ. Tag jé ăjag mỹ kórég nỹ tũg hã ra. ¹⁴ Ha vé, jykre tăg ẽg nỹtĩ, kỹ ẽg tóg ẽg rĩr krỹg ja tũ venh ke mũ. Ẽg jykre si tovănh ẽg huri. Tag ki kanhró ẽg nỹtĩ, ẽg tỹ ù tỹ ẽg mré ti ki ră kỹ nỹtĩ kar ag to há nỹtĩn kỹ. Ừ tỹ ẽg mré Jesus ki ră mũ to há tũ nĩ ên vỹ venh ke tũ nĩ, ẽg rĩr krỹg ja tũ ti. ¹⁵ Ẽg tỹ ù to kórég tĩ nĩn kỹ ẽg ti tén ri ke han huri. Kỹ ẽg tỹ ù tén kỹ ẽg pi(jé) ẽg rĩr krỹg ja tũ venh ke mũ, tag ki kanhró ăjag nỹtĩ. ¹⁶ Cristo vỹ ẽg tỹ jagnê to há nĩ tag tỹ ẽg kanhrân. Vênh fêg tóg, ù tỹ ti tén ke mũ ag mỹ, ti tỹ ẽg jagfỹ ter jé. Hã kỹ ẽg tóg ẽg mré ke jagfỹ ter ke tag to tar nỹtĩnh ke mũ gé, ù tỹ ag jagfỹ ẽg tén sór kỹ. ¹⁷ Ha

vé, ù tóg tag ki nén ù mág vég tí. Jävo ti mré Jesus ki rã kÿ nĩ ù tóg tÿ nén ù tũ nĩ. Hã ra tóg ti jagãgtãn sór tũ nĩ. Ên vÿ Topê to há tũ nĩ gé.

Kanê jur ke tũ êg nĩ

¹⁸ Inh krê', äjag vĩ tävĩ tÿ jagnê to há nÿtĩ tũg nĩ, krĩg mÿ. Jagnê ki rĩrmnĩ. Jagnê to há tävĩ nÿtĩ to ken hã vê. ¹⁹ Kÿ êg tóg ki kanhró nÿtĩ, êg tÿ tÿ ù tÿ ki há tó mũ ên krê nÿtĩn kÿ. Kÿ Topê tóg êg kanê jun mãn ke tũ nĩ ha. Jatu êg nÿtĩ ha, êg tÿ jagnê to ha pẽ nÿtĩn kÿ. ²⁰ Ke-jên êg tóg êg kygnê ja to êkrég tí. Hã ra Topê tóg ki kanhró kar nĩ. Êg kãfór tóg nĩ, Topê ti, hã kÿ tóg kãnhmar êg vóg kónãn ke tũ nĩ. ²¹ Inh krê', kejên êg tóg Topê jykre ki króm há han tí. Kÿ êg tóg: “inh hÿn kygnê ja tũ nĩ,” he tí. Kÿ êg tóg jatun mÿ Topê mré vēmén tí sir. ²² Kÿ tóg êg mÿ nĩm ke mũ, êg tÿ ti mÿ nén to vĩ mũ ti. Ti tÿ êg mÿ nén tó mũ ên hã han êg tóg tí, nén tÿ ti mÿ há nĩ hã ki króm êg tóg tí, hã kÿ êg tóg jatun mÿ ti mÿ nén ù to vĩ tí. ²³ Ti tÿ êg mÿ nén tó mũn hã vê, ha mē: “inh kósĩn tÿ Jesus Cristo ki gemnĩ, kÿ jagnê to há nÿtĩmnĩ,” he ja ti nĩ êg mÿ. Êg tÿ tag han mũ hã ve sór ti mũ. ²⁴ Êg tÿ ti vĩ ki króm kÿ êg tóg sir ti ki ge kÿ nÿtĩ. Kÿ Topê tóg tÿ êg mré ke nĩ sir. Á kuprĩg jênê ja tóg nĩ êg mÿ, kÿ ti kuprĩg tóg êg mÿ tó tí, Topê tÿ tÿ êg mré ke nĩ ti.

Topê kato tẽ mũ ag kuprĩg ti

4 Äjag to há tävĩ sóg nĩ, ha mē. Kãnhmar ù vĩ jēmē sór tũg nĩ, ti tÿ: “Topê kuprĩg vÿ tÿ inh jagrê nĩ,” he mũ ra. Komêr hã ti vĩ tugnÿm, äjag tÿ ve jé, ti tÿ Topê kuprĩg tÿ jagrê nĩ ti. Ôn kÿ Topê vĩ tó tí ag vÿ mĩ mũgtĩ, ù tÿ hên ri ke ag, ha mē. ² Û tÿ Topê kuprĩg tÿ jagrê nĩ ên vÿ tag tó tí, ha mē: “Jesus Cristo ti, Topê kósĩn ti vÿ êg ri ke han kÿ mur ja nĩ,” he ti tí, ù tÿ Topê ki rã kÿ jê ti. ³ Û tÿ Jesus to tag tó tũ nĩn kÿ tóg Topê kuprĩg

tÿ jagrê tũ nĩ. Cristo kato tẽ tí ên kuprĩg tÿ tóg jagrê nĩ, ha mē. Ên vÿ vênh ven ke mũ, ù tÿ ti kato tẽ mũ ti. Tag mē äjag huri. Hã ra tóg hur jun, kÿ tóg mĩ tí ha.

⁴ Inh krê', Topê tũ vÿ tÿ äjag nÿtĩ. Ôn kÿ Topê vĩ tó tí ag fĩn rãm äjag huri. Ha vé, Topê kuprĩg tÿ êg jagrê vÿ ag jagrê kãfór nĩ. Hã kÿ êg tóg êg kato tẽ ag fĩn rãm kãn huri. ⁵ Topê ki rã tũ ag vê, hã kÿ ag tóg ù tÿ Topê ki ge tũ ag jykre tó tí, kÿ ù tÿ Topê ki ge tũ ag vÿ ag vĩ jēmég tí. ⁶ Ag jävo êg tóg tÿ Topê tũ nÿtĩ. Kÿ ù tÿ Topê ki kanhró nĩ ên vÿ êg vĩ mênh mũ. Ti tũ tũ ag vÿ êg vĩ mē sór tũ nÿtĩ. Hã ki êg tóg ki kanhró nÿtĩ, vênh jagrê tÿ vênh vĩ há tó mũ ti, vênh jagrê tÿ ag tÿ kygnê han tí ên ti ke gé.

Topê vÿ êg to há nĩ vén

⁷ Äjag to sóg há tävĩ nĩ, ha mē. Jagnê to há nÿtĩmnĩ. Êg tÿ jagnê to há nÿtĩn kÿ êg tóg Topê jykre han tí. Ti hã vÿ êg to há nĩ vén. Êg tÿ jagnê to há nÿtĩn kÿ êg tóg tÿ Topê krê nÿtĩ, Jesus jävy, kÿ êg tóg Topê ki kanhró nÿtĩ gé. ⁸ Êg tÿ jagnê to há tũ nÿtĩn kÿ êg tóg Topê ki kagtĩg nÿtĩ, kÿ êg ti ki rã ja tũ nĩ. Topê jykre vê, hã vÿ: êg to há, he mũ, ti tÿ êg to há nĩ sór nĩn kÿ. Hã kÿ êg tóg jagnê to há nÿtĩnh ke mũ gé. ⁹ Tag to êg tóg ki kanhró nÿtĩ, Topê tÿ êg to há nĩn ki, ha mē: ã kósĩn pir jênê ja tóg nĩgtĩ, Topê ti, ti tÿ ga kri mur jé, êg tÿ ti kósĩn tugrĩn rĩr krÿg ja tũ ên ve jé. ¹⁰ Êg pi(jé) ti to há nÿtĩ ja nĩgtĩ. Ti hã ne êg to há nĩ vén', hã kÿ tóg ã kósĩn jênê, ti tÿ êg jagfÿ ter jé, ti tÿ êg tÿ ti vĩ mranh tÿ tũg' he jé. Ti tÿ êg to há nĩn hã vê.

¹¹ Ha vé, inh krê', Topê vÿ êg to há tävĩ nĩ. Hã kÿ tóg há nĩ gé, êg tÿ jagnê to há nÿtĩn kÿ. ¹² Û pi(jé) Topê vég tí. Êg tÿ jagnê to há nÿtĩn kÿ tóg hã ra êg ki êmãn mũ ha, Topê ti. Kÿ êg tóg ti to há tävĩ nÿtĩnh mũ gé sir, êg tÿ jagnê to há nÿtĩn kÿ.

¹³Topê vỹ ã kuprĩg tỹ ãg jagrê han. Ëg jagrê tag to ãg tóg ti tỹ ãg ki ãmãn mũ tag ki kanhró nỹtĩ, ãg tỹ ti ki ge kỹ nỹtĩ tag ti ke gé. ¹⁴Topê vỹ ã kósĩn jẽnê, ti tỹ ga kri mur jé, ti tỹ ãg kren han jé. Tag ve sóg, hã kỹ sóg tó mũ. ¹⁵Ũ tóg Jesus to: “Topê kósĩn vỹ,” he tĩ. Topê vỹ ti kãkã ãmã nĩ, ũ tỹ tag tó mũ ãn kãkã, kỹ tóg Topê ki rã kỹ jẽ nĩ gé. ¹⁶Topê vỹ ãg to há nĩ, tag ki kanhró ãg tóg nỹtĩ. Kỹ ãg tóg ti vĩ kri fig mũ gé, ti tỹ ãg mỹ: “ãjag to sóg há nĩ,” hen kỹ.

Topê vỹ ãg to há nĩ. Kỹ, ãg tỹ ti to há nỹtĩn kỹ ãg tóg ti ki ge kỹ nỹtĩ, kỹ Topê vỹ ãg ki ãmãn ha. ¹⁷Topê vỹ ãg tar han sór mũ, ãg tỹ ti to há tãvĩ nỹtĩn jé. Ëg tỹ ti to há nỹtĩ ki kygnêg tũ nĩn kỹ ãg tóg kurã ãn kã kanê jur ke tũ nĩ, ti tỹ ãg jykre tugnỹm ke kurã ãn kã. Cristo tỹ ga kri tĩg kỹ nén han mũ ãn ri ke han jé ãg tóg (ke) mũ, hã kỹ ãg tóg kanê jur ke tũ nĩ. ¹⁸Ëg tỹ Topê to há nỹtĩn kỹ ãg kanê jur ke tũ pẽ nĩ. Ha vé, ãg tỹ Topê to há nỹtĩn kỹ kygnêg tũ nỹtĩn kỹ ãg tóg mũmêg ki kagtĩg nỹtĩ gé. Topê tỹ ãg vóg kónãn ke to ãg tóg ti kamêg ke mũ. Ëg mũmêg vỹ ãg vỹsỹrenh han mũ.

¹⁹Ti hã vỹ ãg to há nĩ vén inhhã, hã kỹ ãg tóg ũri ti to há nỹtĩ ha. ²⁰Ũ tóg kejẽn: “Topê to sóg há nĩ,” he tĩ. Hã ra tóg ũ tỹ ãg mré Jesus ki rã kỹ jẽ to kórég nĩ. Ti ón vỹ. Ëg régre mré ãg mũgtĩ, gan kri. Ëg tỹ ãg régre to há tũ nỹtĩn kỹ ãg hỹn hẽ ri kenh ke mũ, ãg tỹ Topê to há nỹtĩ jé, ãg tỹ ũn vég tũ ãn to? Ëg tỹ ãg régre to há tãvĩ nỹtĩn kỹ, hã kỹ ãg tóg Topê to há nỹtĩ gé. ²¹Tag tó ja tĩ nĩ, ãg mỹ, ãg tỹ ti vĩ ki króm jé, Topê ti, ha mẽ: “ãjag tỹ Topê to há nĩ sór kỹ ãjag régre to há nỹtĩmĩnĩ gé,” he ja ti nĩ.

Ũ tỹ Jesus ki rã tũ ag jykre fĩn rãm ãg huri

5 Ëg tỹ Jesus to: “Cristo vỹ tỹ ti nĩ, Topê kósĩn vỹ tỹ ti nĩ,” hen kỹ ãg tóg tỹ ti jãvy nỹtĩ. Kỹ ãg tỹ ãg jóg mág to há

nỹtĩn kỹ ãg tóg ti krê ũ ag to há nỹtĩn ke mũ gé, ũ tỹ ãg mré ti ki ge kỹ nỹtĩ ag to. ²Ëg hỹn hẽ ri kenh ke mũ, ãg tỹ Jesus jãvy ũ ag to há nỹtĩ jé? Topê to ãg há nỹtĩn mũ, kỹ ãg tóg ti vĩ ki króm ke mũ gé. Jagnê to há to ken hã vỹ. ³Ëg tỹ Topê to há nỹtĩ sór kỹ ãg tóg ti vĩ ki króm ke mũ gé. Ti to há nĩ to ken hã vỹ. Ti vĩ pi(jé) kufy nĩ, ãg tỹ nén ki króm ke ti. ⁴Jesus jãvy ag ne ũ tỹ ti ki ge tũ ag jykre fĩn rãm tĩ. Ëg hỹn hẽ ri kenh mũ, ãg tỹ ti ki ge tũ ag jykre fĩn rãm jé? Topê ki rã jé ãg tóg ke mũ. Ëg tỹ ti ki rã kỹ ãg tóg hur fĩn rãm. ⁵Ëg tỹ Jesus to: “Topê kósĩn vỹ tỹ ti nĩ,” hen kỹ ãg tóg fĩn rãm ke mũ, ũ tỹ ti ki ge tũ ag jykrén fĩn.

Jesus vỹ tỹ Topê kósĩn nĩ

⁶Jesus Cristo tỹ ga kri tĩg kỹ tóg goj tỹ vẽn kype kỹ jẽ, kỹ ti kyvénh tóg ti ki kãkutê gé, ti ter kỹ. Kỹ tóg nén ũ régre han ja nĩ. Nén ũ pir pijé'. Ti vẽn kype tãvĩ pijé'. Ti vẽn kype vỹ nĩ, kar kỹ ti kyvénh ti ke gé, ti tỹ ãg jagfy ter tag ti. Kỹ Topê kuprĩg vỹ ãg mỹ ti kãmén tĩ gé. Ti pi(jé) ón tĩ, Topê kuprĩg ti. ⁷Kỹ ãg ũ tãgtũ tugrĩn ti tỹ tỹ Topê kósĩn nĩ ki kanhró nỹtĩ, ⁸Topê kuprĩg tugrĩn, kar kỹ ti vẽn kype ja tugrĩn, kar kỹ ti kyvénh tugrĩn ke gé, ti tỹ ãg jagfy ter kỹ. Nén ũ pir hã tó ag tĩ ti to, hã vỹ: “Topê kósĩn vỹ tỹ ti nĩ,” he mũ.

⁹Ëprã ke ag tỹ ãg mỹ nén ũ tó kỹ ãg tóg ag vĩ kri fig tĩ. Topê vỹ ãg ke ag vĩ kãfór nĩ, kỹ ti vĩ vỹ ki hã ke tãvĩ nĩ gé. Kỹ ũ tỹ ãg mỹ Topê kósĩn tó mũ vỹ tỹ Topê ti nĩ, hã kỹ tóg tỹ vẽn vĩ há nĩ. ¹⁰Ëg tỹ Topê kósĩn ki rã kỹ ãg tóg ti ki kanhró nỹtĩ. Ti ki rã kỹ ãg tóg to jykrén há han ke mũ. Topê hã vỹ ã kósĩn kãmén tĩ. Ëg tỹ ti vĩ to: “vẽn vĩ há vỹ,” he sór tũ nĩn kỹ ãg tóg ti to: “tĩ ón vỹ,” he mũ sir, ãg tỹ ti vĩ kri fi sór tũ nĩn kỹ. ¹¹Tag tó ti tĩ, Topê ti, ha mẽ. “ãjag tỹ rĩr krỹg ja tũ venh ke han jé sóg ke mũ. Inh kósĩn ter ja to ãjag tóg rĩr krỹg ja tũ venh ke mũ,”

he tóg, Topê ti. ¹²Ēg tỹ ti kósín ki ge kỹ ěg tóg ěg rĩr krỹg ja tũ venh ke mũ. Ēg tỹ jãvo ti ki ge tũ nĩn kỹ ěg tóg rĩr krỹg ja tũ venh ke tũ nĩ.

Topê vỹ ěg vỹ jẽmẽg tĩ

¹³Ājag hã ne Topê kósín ki ge kỹ nỹtĩ'. Kỹ ājag tóg ěg rĩr krỹg ja tũ venh ke mũ. Sỹ tag tó sór vẽ, ājag mỹ, hã kỹ sóg rán mũ. ¹⁴Ēg tỹ ti mré vẽnħ jykre pir han kỹ ěg tóg jatun mỹ ti mré vẽnħ ke mũ gé. Kỹ ěg tóg ti mỹ nén ũ kar to vỹ tĩ. Nén tỹ ti mỹ há nĩ ěn hã to vỹ jé ěg tóg ke mũ. Ēg tỹ ti mỹ nén tỹ ti mỹ há nĩ ěn hã to vỹ kỹ tóg ěg vỹ mẽnh ke mũ sir. ¹⁵Ti tỹ ěg vỹ mẽ kỹ tóg ěg mỹ han ke mũ gé sir. Ēn kã ti pi(jé) han ke tũ nĩ', ěg tỹ ti mỹ nén to vỹ mũ ti.

¹⁶Kejẽn ěg tóg ěg mré Jesus ki rã kỹ jẽ ũ vég tĩ, hã ra tóg Topê vỹ mranh mũ. Hã ra tóg Topê tovãnh sór tũ nĩ. Topê tovãnh sór tũ ra tóg kygnẽ kỹ mranh mũ, Topê vỹ ti. Kỹ ěg tóg Topê mré vẽnħ ke mũ, ti to, kỹ Topê vỹ ti krĩn ke mũ, ti tỹ ti jykre kórég tovãnh jé, ti tỹ ěg rĩr

krỹg ja tũ ve jé. Ēg kãmĩ ũ tóg kejẽn Topê tovãnh pẽ han mũ. Ēn to sóg ājag mỹ: “ti to Topê mré vẽnħ,” he sór tũ nĩ. ¹⁷Ēg tỹ vẽnħ jykre vẽnħmỹ sĩ han kỹ ěg tóg ti vỹ mranh tĩ. Ēg tỹ sĩn kỹ mranh mũ ra tóg kórég nĩ, kỹ tóg hã ra ěg mỹ vẽnħ pãte fón sór mũ, kỹ ěg tóg ti tovãnh pẽ han ke tũ nĩ. Ēg tỹ ti tovãnh pẽ han kỹ ěg nũgme ki vár ke mũ, infernon ki.

¹⁸Ēg tỹ tỹ Jesus jãvy nỹtĩn kỹ ěg tóg ti vỹ mranh mản sór tũ nĩ. Ēg jy nĩgãn ti tĩ, Topê kósín ti, Satanás tỹ ěg vóg tũ nĩ jé. ¹⁹Ēg hã ne tỹ Jesus jãvy nỹtĩ'. Tag ki kanhró ěg tóg nỹtĩ. Jãvo ěprã ke ũ ag vỹ tỹ Satanás krẽm ke kar nỹtĩ.

²⁰Topê kósín vỹ kãtĩg ja nĩgtĩ. Tag ki kanhró ěg tóg nỹtĩ. Ēg nĩgrẽg róm tóg, ěg tỹ Topê ki kanhrãn jé, Topê pẽ ti. Ti ki ge kỹ ěg nỹtĩ, ěg tỹ ti kósín tỹ Jesus Cristo ki ge kỹ nỹtĩn kỹ. Ti hã vỹ tỹ Topê pẽ nĩ, Jesus Cristo panh ti. Ti hã vỹ ěg tỹ ěg rĩr krỹg ja tũ venh ke han tĩ.

²¹Inh krẽ', vẽnħ kãggrã tỹ topê jykre han sór tũg nĩ. Hã vẽ, sỹ ājag mỹ nén rán sór mũ ti.

JOÃO TỸ CARTA HAN MÃN

1 João kófa tỹ rá vê. Isỹ fi mỹ rán hã vê, Topê tỹ fi kuprêg kỹ, fi krê mỹ ke gé, hã vỹ: Topê ki ge kỹ nỹtĩ kar, he mũ. Ājag to sóg há tăvĩ nĩ, ha mẽ. Kỹ ù tỹ vênh vĩ há kri fig mũ kar vỹ ājag to há nỹtĩ gé inh mré. ² Vênh vĩ há vỹ ěg kākā nĩ nĩ, továnh ke tũ pẽ ěg tóg nĩ. Hã kỹ ěg tóg jagnẽ to há nỹtĩ.

³ ěg jóg tỹ Topê mré sóg vēmén tĩ, ti tỹ ājag jagăgtăn jé, ti tỹ ājag tar han jé, ti tỹ ājag kri kuprăg jé ke gé. Jesus Cristo mỹ sóg tag to vĩ tĩ gé, ěg jóg mág kósın mỹ. Tĩ vĩ kri fig ěg tóg tĩ, vênh vĩ há kri, kỹ ěg tóg jagnẽ to há nỹtĩ gé.

Ěg tỹ jagnẽ to há nỹtĩnh ke

⁴ Ā krê kāmĩ ù vỹ vênh vĩ há nón mũ mũ, jỹ, kỹ tóg inh mỹ sér pẽ tĩ, sỹ tag mẽ kỹ. ěg jóg tỹ ěg mỹ nén tó ja ěn han kăn sóg ag nēji mũ. ⁵ Kỹ sóg Ā mỹ rán mũ, jỹ. Ā mỹ sóg: “jagnẽ to há nỹtĩmĩ,” he mũ. Nén ù tăg pijé’, sỹ Ā mỹ nén rán mũ tag ti. Văsy ěg tóg tag mẽ, ěg tỹ ti ki rã vén kỹ. ⁶ ěg tỹ Topê to há nỹtĩn kỹ ěg tóg Jesus tỹ ěg mỹ nén tó ja ěn han kăn ke mũ sir. Tĩ tỹ ěg mỹ nén tó vén hã vê, hã vỹ: “jagnẽ to há nỹtĩmĩ,” he mũ.

Ũ ag tóg Jesus to ón tĩ

⁷ Ũ tỹ hẽn ri ke ag vỹ mĩ mũgtĩ, hã ra ag tóg Jesus Cristo to ón tĩ. Tĩ to ag tóg:

“tĩ pi(jé) ěg ri ke mur ja nĩ, ěpră ke fi kósın pijé’,” he tĩ. Ag ón vê. Cristo kato tẽ ag vê. ⁸ Vênh ki rĩrmnĩ, ājag tỹ ag vĩ kri fig tũ nĩ jé, ājag rănhrăj tỹ ājag mỹ tũ’ he tũ nĩ jé. Văsăn nĩ, ājag tỹ tá ti kaja ve jé, Topê tỹ ěg mỹ nén nĩm sór mũ ti.

⁹ Ũ tóg Cristo kăme pătén sór mũ, ti vême pâte tóg ù tó sór mũ. Tĩ továnh to ken hã vê. Ũ tỹ ge pi(jé) Topê ki rã kỹ jẽ ha’. ěg tỹ Jesus kăme mĩ mũn kỹ ěg tóg ěg jóg mág ki rã kỹ nỹtĩ, ti kósın ki ke gé. ¹⁰ Kejên ù tóg ājag tá jun tĩ, hã ra tóg tag tó tũ nĩgtĩ. Kỹ ti mỹ: “inh mré nĩnh kătĩg,” he sór tũg nĩ gé. Tĩ mỹ: “Topê vỹ Ā ve há han,” he tũg nĩ gé. ¹¹ ěg tỹ ù tỹ ge mỹ: “Topê vỹ Ā ve há han,” hen kỹ ěg tóg ti jykre to: “há ti nĩ,” he mũ gé. Kỹ tóg ěg tỹ ti mré ón mũ ri ke nĩ sir, ěg tỹ ti mỹ vĩ há han kỹ.

¹² Sỹ ājag mỹ nén rán sór mũ vỹ ver e tĩ, hã ra sóg rán kỹ jẽnẽ sór tũ nĩ. Sỹ ājag ki jun sór vê, kỹ sóg ājag mỹ tó sór mũ, ājag mré vēmén sór isóg mũ, ěg tỹ jagnẽ fe tỹ mrin ke jé.

¹³ Ā régre fi krê vỹ Ā mĩ ěkrég tĩ. Topê tỹ ùn kuprêg mũ fi vê. Hã vê, sỹ ājag mỹ nén rán sór mũ ti.

JOÃO TỸ CARTA Ữ HAN MÃN

1 João kófa tỹ rá vễ. Sỹ inh mré ke tỹ Gaio mỹ rán hã vễ. ² Ầ to sóg há tăvĩ nĩ. Hỹ, há tăvĩ sóg nĩ, ầ to. Ầ to sóg Topê mré vēmén tĩ, ti tỹ ầ mỹ nén há kar nĩm jé, ầ kaga tũ nĩ jé ke gé. Topê to tar ầ tóg jê, tag ki kanhró, sóg nĩ.

³ Ầ mré ke ag tóg inh ki junjun, kỹ ag tóg inh mỹ tó, ầ tỹ vễnh vĩ há nón tĩ mũ ti, ầ tỹ to tar nĩ ti. Kỹ tóg inh mỹ sér pẽ ti. ⁴ Inh krê tỹ vễnh vĩ há nón mũn kỹ tóg inh mỹ sér tăvĩ tĩ, nén ầ tỹ inh mỹ sér nĩ kar kăfór, hã kỹ tóg inh mỹ sér tĩ, ầ tỹ vễnh vĩ há nón tĩg kỹ.

⁵ Ầ to sóg há tăvĩ nĩ, Gaio'. Ềg mré ke ag ki rĩr há han ầ tóg nĩgtĩ, ầ tỹ kór há tá kămũ mũ ag mré hã. ⁶ Tag tó ag tóg tag ki, igreja krêm, ầ mré ke ag. Ag to há tăvĩ ầ nễji nĩ. Ag ki rĩr măn nĩ gé, ag tỹ ầ ki junjun kỹ, kỹ ag mỹ nĩm nĩ, nén ầ tỹ ag mỹ tũ ền ti. ⁷ Topê rănhrăj han ag tóg tĩ. Jesus Cristo jyjy tó kỹ ag tóg hên ra mũgtĩ, kỹ ag tóg ầ tỹ ti ki ge kỹ nỹtĩ tũ ag tũ măn vễnh nĩgtĩ. ⁸ Hã kỹ tóg há tĩ, ềg tỹ ầ tỹ ge ki rĩr há han kỹ, ềg mré ke ag. Ềg tỹ ag ki rĩr há han kỹ tóg ềg tỹ ag mré Topê vĩ há tó mũ ri ke nĩ sir.

⁹ Ầ jamă tá igreja krêm vễnh măn ti ag mỹ sóg vễnh rá jênê, hã ra Diótrefes vĩ inh vĩ mễ jăvăn nĩ. Ag kri tỹ ần mág jê sór ti nĩ, Diótrefes ti. ¹⁰ Isỹ tá jun kỹ sóg

ti mỹ tónh ke mũ, ti jykre pănô ti, vễnh kar rĩnve. Ồn kỹ tóg iso féfén tĩ. Hã ra tóg nén ầ kórég ầ han tĩ gé, hã kỹ tóg ềg mré ke ag tỹ ầjag tă junjun kỹ tóg ag mỹ: “inh mré nĩnh kămũ jêg,” he vễnh nĩgtĩ. Kỹ tóg ầ ag tỹ ag mỹ: “inh mré nĩnh kămũ jêg,” he sór mũ ra tóg ag tỹ ag mỹ vĩ há han kamêg tĩ gé. Ag mỹ tóg: “igreja krêm ầjag tóg rá măn ke tũ nĩ ha,” he tĩ, ag tỹ ềg mré ke ag mỹ vĩ há han sór kỹ. Jykre kórég tăvĩ ti nĩ, Diótrefes ti. Hã kỹ sóg ti kato tễnh ke mũ, ha vemnĩ.

¹¹ Ti jăvo sóg ầ to há tăvĩ nĩ, Gaio'. Ừ tỹ nén ầ kórég han mũ ra ti kóm han sór tũg nĩ. Nén ầ há hã han sórmnĩ. Ềg tỹ nén ầ há kar han kỹ ềg tóg tỹ Topê krê nỹtĩ gé. Ừ tỹ ti kórég han mũ vĩ Topê ki kagtĩg nĩ.

¹² Demétrio vĩ tỹ ần jykre há nĩ, hã ra. Vễnh kar vĩ ti to vĩ há han tĩ. Ki hã ag tóg tó tĩ, ag tỹ ti to vĩ há han kỹ, hã kỹ sóg ag mré tó mũ gé. Isỹ vễnh vĩ há hã tó mũ ki kanhró ầ tóg nĩ.

¹³ Sỹ ầ mỹ nén rán sór mũ vĩ ver e tĩ, hã ra sóg rán kỹ jênê sór tũ nĩ.

¹⁴ Kănhrmar sóg ầ venh ke kătĩg mũ. Kỹ ềg tóg jagnê mré vēmén ke mũ.

¹⁵ Ầ jé jatun mỹ nĩ nĩ. Tag ki inh mré ầ to há nỹtĩ ag vĩ ầ mĩ êkrég tĩ. Kỹ ầ jamă tá inh mré ke kar mỹ: “ầjag mĩ tóg êkrég tĩ,” hemnĩ iso. Vyrmỹ ag mỹ tómnĩ, sỹ ag mĩ êkrég mũ ti.

Hã vễ, sỹ ầ mỹ nén rán sór mũ ti.

JUDAS TỸ CARTA

1 Judas tỹ rá vê, Tiago jãvy ti. Jesus Cristo mỹ sóg rãnhřaj tĩgtĩ. Isỹ ù tỹ ãg jóg tỹ Topẽ tỹ kuprẽg ja ag mỹ rán hã vê, ti tỹ ù to há ag mỹ. Ti tỹ ãjag kuprẽg kỹ tóg ãjag jy nĩgãn tĩ gé, Jesus Cristo tugrĩn. ²Topẽ mrẽ sóg vẽnẽn tĩ, ti tỹ ãjag jagãgtãn pẽ han jé, ti tỹ ãjag krĩ kuprã pẽ han jé, ti tỹ ãjag tỹ jagnẽ to há tãvĩ han jé ke gé.

Ủ tỹ Topẽ to un'ón mũ ag

³Inh krẽ', ãjag mỹ sóg Topẽ tỹ ãg kar kren han tag tónh ke nĩ vê, inh vẽnũ rá tag ti ki. Hã ra vãhã ù ag tóg ãjag krĩn kónãn sór mũ ha, hã kỹ sóg ãjag mỹ: “Topẽ ki rã to tar nỹtĩmĩ,” he mũ. Topẽ tỹ ãg mỹ nẽn tó mũ vỹ pir nĩ, hã vỹ: Topẽ jykre to tar nĩ, he mũ. Æ tũ ag kar mỹ tóg tag tó ja nĩ. Ủ tỹ tag kato vĩ kỹ ti vỹ jẽmẽ sór tũg nĩ. ⁴Ha vé, ù ag tóg Topẽ to un'ón tĩ, ãjag krĩn kónãn jé. Æ jykre pãno ag vê, hã ra ag tóg jykre há nĩ ve nỹtĩ, hã kỹ ãjag tóg ag vỹ kri fi sór mũ. Hã ra ag tóg ón kỹ: “ãg jóg tỹ Topẽ vỹ ãg jagãgtãn mũ, hã kỹ ãg jatun mỹ vẽnũ jykre vẽnũmỹ kar han ke mũ,” he tĩ, ù tỹ ãjag krĩn kónãn mũ ag. Æg Senhor tỹ Jesus Cristo to ag tóg: “tĩ vỹ han ke tũ ãg nĩ,” he tĩ. Tĩ hã ne tỹ ãg kri ke nĩ', Jesus ti. Hã ra ù tỹ tĩ vỹ han sór tũ ag tóg rán kỹ nỹtĩ gé. Vãsỹ ag tóg ag to rán ja nĩgtĩ, Topẽ vỹ rán tĩ ag, kỹ ag tóg Topẽ tỹ ù tỹ ge ag vóg kónãn ke mũ ãn tó ja nĩgtĩ.

⁵Ha vé, vãsỹ ãg Senhor vỹ ga tỹ Egito tá ã povo tỹ Israel mrẽ kãkutẽ ja nĩgtĩ, ag tỹ ãjag ga ra mũ jé. Hã ra ag kãmĩ ù ag tóg tĩ vỹ kri fi vãnũ ja nỹtĩgtĩ. Hã kỹ Topẽ vỹ ag tỹ tũg' he kãn, ù tỹ tĩ vỹ kri fi jãvãnũ ja ag. Tag mẽ ãjag huri. Ki kanhró ãjag nỹtĩ. Hã ra sóg rán mãn sór mũ, ãjag tỹ mũ ãkrẽn jé.

⁶Kỹ kanhkã tãn ag vỹ ge ja nĩgtĩ gé. Ag kãmĩ ù ag tóg Topẽ tỹ ag mỹ nẽn nĩm

ja ãn tovãnũ. Æjag jamã tovãnũ ag tóg. Kỹ Topẽ vỹ ag sigsẽ, kỹ tóg ãmã kuty tá ag vin han. Ag se vỹ tũg' henh ke tũ nĩ. Topẽ tỹ ãg kar jykre tugnỹm ke kurã ãn kã tóg ag jykre tugnỹm ke mũ gé.

⁷Kar kỹ cidade tỹ Sodoma mũ ãkrẽn nĩ gé, cidade tỹ Gomorra mũ ke gé, ti pẽnĩn ãmã kãsir mũ ke gé. Æn tá ke ag ne vẽnũ jykre pãno tãvĩ han tĩ ja nĩgtĩ', kanhkã tãn ag ri ke. Jagnẽ mrẽ nỹ kónãn tãvĩ han ja ag tóg nĩgtĩ, kỹ ag tóg ù ag to ãn ja nĩgtĩ gé, ag mrẽ ke tũ ag, ùn grẽ tỹ ùn grẽ ù mrẽ nỹ sór kỹ. Kỹ Topẽ vỹ pĩ nhyr vãnũ ki ag vãm ja nĩgtĩ, ãg tỹ ag to jykren kỹ to ki kanhró nỹtĩ jé.

⁸Kỹ ù tỹ Topẽ to ón mũ ag vỹ vẽnũ jykre kórẽg han mũ ãn ag ri ke han tĩ gé. Topẽ vỹ mranh kỹ ag tóg nĩgtĩ. Ag vẽnũ pẽti tóg ag mỹ sér tĩ. Hã ra ag tóg vẽnũ kavẽnũ tĩ, ãjag jykre pãno tugrĩn. “Æg pi(jé) tỹ ù krẽm ke nỹtĩ,” he ag tóg tĩ. Kỹ ag tóg ãg tỹ ùn vég tũ ag to vỹ kónãn tĩ gé, ù tỹ kanhkã tá tỹ ùn mág nỹtĩ ag mỹ. ⁹Topẽ tỹ jẽnẽ jafã to pã'i tỹ Miguel vỹ tag han ja tũ nĩgtĩ, ha mẽ. Satanás mrẽ tóg rará, ti tỹ Moisés ter ma tĩg sór kỹ, Miguel ti. Hã ra tóg Satanás mỹ vỹ kónãn ja tũ nĩgtĩ, ti tỹ tỹ pã'i nĩ ra. Tĩ mỹ tóg: “ãg Senhor jé ã vóg kónãn,” he ja nĩgtĩ, Miguel ti. ¹⁰Hã ra ùn ón tĩ tag ag vỹ kanhkã tãn ag to vỹ kónãn tĩ, ag tỹ ag ki kagtĩg (hã) ra. Bicho ri ke ag nỹtĩ, ag tỹ ãjag tỹ nẽn to ãn mũ ãn han mũn kỹ. Krĩ tũ ag nỹtĩ, hã kỹ ag tóg nẽn ù vẽnũmỹ kar han tĩ. Hã ra Topẽ vỹ ag vóg kónãn ke mũ. ¹¹Ag ve kónãn tĩ tĩ, Topẽ ti. Caim tỹ Topẽ vỹ kato tẽ ja ãn ri ke han ag tóg mũ. Ag tỹ rico nỹtĩ sór kỹ ag tóg vẽnũ jykre kórẽg tó tĩ, Balaão tỹ vẽnũ jykre kórẽg tó ja ãn ri ke. Coré ri ke ag tóg Topẽ kato tẽ tĩ, hã ra ag tóg tag to nũgme ki vár ke mũ. ¹²Æjag tỹ Jesus ki ge kỹ jagnẽ to há nỹtĩn kỹ ãjag tóg igreja krẽm festa han tĩ. Æn kã ag tóg ãjag mrẽ jẽn tĩ gé, ù tỹ Topẽ to ón tĩ ag. Hã ra ag tóg ki ãjag kavẽnũ tĩ gé. Jatun mỹ

ag tóg jën mág tí. Mý'äg vānh ag nýtí. Ū to jykrén vānh ag tóg nýtí gé. Ājag jën mág hā mī ag tóg ēkrég tí. Kejën kāka tóg kanhkā góg tatīn kātīg mū, hā ra tóg kutē tū nīgtí. Tag ri ke ag nýtí, véké ag tóg ví tí. Ka ū tóg kanēn vānh nýtí. Ēn kunūg ēg tóg tí, ti jāre mré hā, ký tóg kanēn mān ke tū pē nī sir. Ter ti nī ha. Tag ri ke ag tóg nýtí gé, ū tý Topē to ón mū ag. ¹³ Kejën goj kafā tū tóg krém ke mū, ký tóg jēngéj nī. Tag ri ke ag nýtí gé. Ti jēngéj vỹ tý ag jykre pāno nī. Vēnh ven ti tí. Krīg tí tí ri ke ag tóg nýtí gé. Sīnvī nī ve tóg nī, hā ra tóg ón ký tí tí, krīg tí tí ti. Tag ri ke ag nýtí. Topē vỹ kutý ki ag vām ke mū, ký ag tóg tá kāpa mān ke tū pē nī, ū tý Topē to ón mū ag.

¹⁴ Ag hā to tóg rán ja nī, Enoque ti. Adāo krē tý ki krēm mān tý 7 (ke) vỹ tý ti nī, Enoque ti. Ti hā vỹ ag to: “hā vé, ēg Senhor vỹ jun ke mū, ti tý jēnē jafā ag mré hā,” he ja nī. “E tāvī ag nýtí, ti tý jēnē jafā ag.” ¹⁵ Ti kātīg ký tóg ēprā ke ag jykre tugnỹm kān ke mū. Ký tóg ūn jykre pāno ag vóg kónān ke mū, ag jykre pāno to, ag tý Topē kato tē to, ag tý ti to ví kónān to. Ū tý ti ví mranh tí ag vỹ ti mý ví kónān pē han tí, hā ký tóg ag vóg kónān ke mū,” he ja tóg nī, Enoque ti.

¹⁶ Topē to ón mū ēn ag tý nén ū jagy ve ký tóg ag mý kórég nī, hā ký ag tóg: “Topē ne tóg jykre kórég nī,” he tí. Ājag tý nén to én mū ēn hā han ag tóg tí. Hā ra ag tóg ón ký ví mág tí. Ký ag tóg vēnh kar mý ví há han tí, ón ký, ag tý ājag ví há to nén ū ve jé, ag tý to rico nýtí jé.

Ēg tý apóstolo ag ví jēmēnh ke

¹⁷ Ag jāvo apóstolo ag ví mī ēkrén nī, inh krē'. Ēg Senhor tý Jesus Cristo hā vỹ apóstolo ag vin ja nīgtí, hā ký ag ví mī ēkrén há han nī. ¹⁸ “Kurā tý ēgno to hā

ag tóg ājag to é henh ke mū,” he ja ag tóg nīgtí, apóstolo ag. “Ājag tý nén ū kórég to én mū ēn hā han sór ag tóg mūgtí, ū tý ājag to é henh ke mū ēn ag,” he ja ag tóg nīgtí. Apóstolo ag tý tó jan hā vē. ¹⁹ Ag hā vē, sý ājag mý ūn tó mū ag. Ū tý Topē to ón mū ēn ag hā vē. Ēg tý jagnē kato tē han sór ag tóg mū. Ag tý nén ū to én mū tag hā ne ag mý há tí'. Ag pi(jé) Topē kuprīg tý jagrē nýtí'.

²⁰ Ag jāvo ājag tóg Topē jykre ki ge ký nýtí, Topē tū ki, ký to jagnē tar han nī, inh krē'. Topē kuprīg tý ājag krín ký Topē mré vēmén nī. ²¹ Topē vỹ ājag to há tāvī nī. Ti tovānh tūg nī. Ēg Senhor tý Jesus Cristo tý ājag jagāgtān ke tag hā ve sórmnī, ký ājag tóg ēg rīr krýg ja tū venh ke mū.

²² Ū ag tóg tag to tar tū nýtí ver, “hý mý vỹ?” he ag tóg tí. Tag ag jagāgtān nī. ²³ Ag kren han nī, pī jo ag jy nīgān ký. Ký ū ag tóg ājag tý nén to én mū kar ēn han tí. Ag jagāgtān nī gé. Hā ra vēso jykrén nī gé, ājag tý ag jykre pāno nón mū sór tū nī jé. Kavēj ag nýtí, ag jykre kórég to. Ký ag kavēj tag to én sór tūg nī. Vēso jykrén tāvī han nī.

Topē tý tý ūn mág nī

²⁴ Topē vỹ ēg tý prānh ke tū han ki kanhró nī. Ký tóg ēg tý ūn há tāvī han ki kanhró nī gé, ti tý kejën ēg jé prēr ken ký, ēg tý tí rinja tá nýtí jé. Tá tóg sīnvī pē nī, sér pē. ²⁵ Pir ti nī, Topē ti, ēg kren han tí ti. Ēg Senhor tý Jesus Cristo tugrīn tóg ēg kren han tí. Ti hā ne tóg tar nī', ti hā ne tóg tý ūn mág nī', ti hā ne tóg tý vēnh kar kri ke nī'. Vāsý tóg kā nī nī, nén ū kar han tūg ki, ūri ke gé, hā ra tóg tūg' henh ke tū pē nī gé, ti tý tý ūn mág jē ti.

Amém.

JOÃO TỠ ẼG TỠ NÉN VENH KE MŨ RÁ

1 Topê vỹ Jesus Cristo mỹ nén (ũ) tỹ hên ri ke ven, ẽg tỹ kãnhmar nén venh ke mũ ti, kỹ Jesus vỹ ẽg mỹ ven, ẽg tỹ tỹ ti camarada nỹtĩn kỹ. Kỹ tóg ă tỹ jẽnẽ jafã jẽnẽ, ti tỹ ti camarada tỹ João mỹ tó jẽ gé. ² Ve kãn ja ti nĩ, João ti, Topê tỹ ti mỹ nén ven mũ ti ke ge. Ti tỹ ve kỹ tóg rãn ja nĩ, João ti, hã vỹ nĩ. ³ Ũ tỹ vẽn hã tag to ke mũ ag mỹ tóg vĩ há han ke mũ, Topê ti, ũ tỹ vẽn vĩ tag mẽg mũ ag mỹ ke ge. Topê tỹ tó mũn hã vẽ, ẽg tỹ ti vĩ ki króm jẽ. Kãnhmar ẽg tóg tag ki rãn kỹ nĩ tag ve kãn ke mũ, kakó tãvĩ tóg tĩ ha.

João tỹ ẽmã tỹ 7 (ke) tá Jesus mré ke ag mỹ ti vĩ tó

⁴ João tỹ rá hã vẽ. Isỹ ga tỹ Ásia tá Jesus mré ke ag mỹ rãn hã vẽ, cidade tỹ 7 (ke) ki ke ag mỹ.

Topê jẽ ăjag tỹ tar' hé, kỹ ăjag jẽ kri kãnhvỹ nỹtĩ. Topê vỹ nĩgtĩ. Vãsỹ tóg nĩ ja nĩgtĩ, kỹ tóg ũri nĩ nĩ, hã ra tóg kãtig ke mũ gé. Ti kuprĩg vỹ ti mré nĩ gé, kỹ tóg tỹ ũ tỹ 7 (ke) ve nĩ, ti kuprĩg ti. Topê nĩja tá tóg nỹtĩ, ti kuprĩg tỹ tỹ ũ tỹ 7 (ke) ve ẽn ti. Ti kuprĩg ẽn jẽ Topê mré ăjag kri tỹ kãnhvỹ' hé, ⁵ Jesus Cristo mré ke ge. Jesus vỹ Topê vĩ tó há han ja nĩgtĩ, to tóg krónh ke ja tũ nĩgtĩ. Kỹ tóg ă ter kar kỹ rĩr mãn vẽn ja nĩ. Kỹ ẽg rĩnrĩr mãn ke mũ gé, ti nón. Kỹ Jesus tóg ẽprã pã'i ag kri tỹ ũn mág jẽ gé.

Ẽg to há tãvĩ ti nĩ, Cristo ti. Ti kyvénh tóg ẽg jagfỹ ti ki kãkutẽ, tỹ tóg ẽg krenkren han, ẽg tỹ Topê vĩ mranh ja to. ⁶ Kỹ tóg ẽg tỹ pã'i han ke mũ gé, ti krêm. Topê tũ ki rĩr jẽ ẽg tóg ke mũ gé, ti jóg tũ ki. Ti hã ne ă pir mỹ tỹ ũn mág nĩ, Jesus ti. Ti hã ne ă pir mỹ tar nĩ, ũri, kỹ tóg tũ' henh ke tũ nĩ, ti tar nĩn kỹ. Hã vẽ.

⁷ Ha vé, kãtig mãn jẽ tóg ke mũ, kãnhkã góg kãmĩ. Vẽn kar vỹ ti venh ke mũ, ẽn kã, ũ tỹ ti kusón mũ ag mré hã. Kỹ povo kar vỹ ti tugrĩn jagtar kãn ke mũ. Jagtar jẽ ag tóg ke mũ, vēsỹrénh jẽ ag tóg ke mũ, ha vemnĩ. Hã vẽ.

⁸ “Ũn ve vỹ tỹ inh nĩ, hã ra sóg tỹ ẽgno nĩnh ke mũ gé,” he tóg, ẽg pã'i mág ti. Vãsỹ tóg nĩgtĩ, kỹ tóg ver ũri nĩ gé, kỹ tóg kãtig ke mũ gé, ũ tỹ nén (ũ) kar han ki kãnhrãn mũ ẽn ti.

João tỹ Jesus ve

⁹ ăjag mré ke vỹ tỹ inh nĩ, inh, hã vỹ: João, he mũ. Jesus mré ke vỹ tỹ inh nĩ, ăjag mré. Jagtar inh nĩ gé, ăjag jagăgtar ri ke inh nĩ gé, hã ra sóg ăjag kóm to krónh ke tũ nĩgtĩ gé, kỹ sóg ăjag mré Topê tỹ tỹ ẽg pã'i nĩ venh ke mũ gé. Goj vãso tá inh nĩ nĩ, ti jyjyn hã vỹ: Patmos, he mũ. Ki sóg se kỹ nĩ nĩ, isỹ Topê vĩ tó ja tugrĩn. Jesus vỹ ẽg mỹ ki hã tó ja nĩ. Ti vĩ ẽn tó ja inh nĩ, vẽn kar mỹ, hã tugrĩn isóg se kỹ jẽ.

¹⁰ Domingo ũ kã Topê kuprĩg tóg inh mỹ nén nẽ ven. Inh pãnĩ tá sóg jamã hár(a) vẽn vĩ mẽ, kỹ tóg trombeta kyr mẽ ja nĩ, vẽn vĩ ẽn ti. ¹¹ Kỹ tóg inh mỹ: “rãn nĩ, ă tỹ nén vэг mũ tag ti,” he ja nĩ. “Livro ki rãn nĩ. Inh mré ke ag mỹ livro tag jẽnẽmnĩ, cidade tỹ Éfeso ra, cidade tỹ Esmirna ra, cidade tỹ Pérgamo ra, cidade tỹ Tiatira ra, cidade tỹ Sardes ra, cidade tỹ Filadélfia ra, cidade tỹ Laodicéia ra ke ge,” he ja tóg nĩ, inh pãnĩ tá inh mỹ vẽn vĩ tó mũ ẽn ti.

¹² Kỹ sóg vēsỹjãm ẽvãnh, sỹ ũ tỹ inh mré vĩ mũ ẽn ve jẽ. Isỹ vēsỹjãm ẽvãnh kỹ sóg nėj tỹ kri vin jafã tỹ 7 (ke) vé, vela tỹ kri vin jafã ẽn, ouro tỹ tóg hyn han kỹ nỹtĩ. ¹³ Nėj tỹ kri vin jafã ag kuju kã ũ tóg jẽ nĩ, hã ra tóg tỹ ẽprã ke nĩ ve nĩ. Kur tėj tu kỹ tóg jẽ nĩ, ouro tỹ tóg vēsóg fin kỹ jẽ nĩ gé, ti fe kri, ũ tỹ tỹ ẽprã ke nĩ ve ẽn ti. ¹⁴ Gãn h kupri pẽ tóg jẽ, vẽn męg tỹ carneiro kyki kupri ri ke tóg nĩ,

ti gānh ti, kukryr kó ri ke. Kanē gru tóg jê nĩ, pĩ gru ri ke. ¹⁵ Pên jēngrê tóg jê nĩ, ouro jēngrê ri ke. Ēg tỹ pĩ ki ouro vām kỹ ti tỹ jonh ke kỹ jēngrê sīnvĩ han ên ri ke ti nĩ, ti pên ti. Tĩ vĩ vỹ goj krog tỹ óóh he ên ri ke nĩ. ¹⁶ Krīg tỹ 7 (ke) génh kỹ tóg jê nĩ. Ā pēgja tỹ tóg krīg tỹ 7 (ke) génh kỹ jê nĩ. Kỹ rógro jā vỹ ti jēnkā tá kākutē mũ. Jā régre ti nĩ, rógro ti, jā há. Tĩ kakā vỹ kókov nĩ, rā tỹ ěg nĩno kã sa kỹ kókov ên ri ke ti nĩ, ù tỹ tỹ ěprã ke nĩ ve ên kakā ti.

¹⁷ Sỹ ti ve kỹ sóg ti pên krēm kutē mũ, ga kri. Ter ve han inh. Hã ra tóg ā pēgja tỹ inh mēg mũ, kỹ tóg inh mỹ: “inh kamēg tũg nĩ,” he mũ. “Ũn ve vỹ tỹ inh nĩ, ěgno ke gé. ¹⁸ Rĩr inh jê nĩ. Ter ja inh nĩ, hã ra sóg rĩr jê nĩ, kỹ sóg ter măn ke tũ pē nĩ. Isỹ ù mỹ: “ter jê ā tóg ke mũ,” hen kỹ tóg ter ke mũ. Isỹ ù mỹ: “ter ke tũ ā tóg nĩ,” hen kỹ tóg ter ke tũ nĩ gé, kỹ tóg vēsẽr jamã venh ke tũ nĩ gé,” he tóg. ¹⁹ “Rán nĩ, ā tỹ nén vэг mũ tag ti, ěprã ke ag tỹ ùri nén vэг mũ ti, ag tỹ kar kỹ nén venh ke mũ ti ke gé,” he tóg. ²⁰ “Krīg ag vэг ā tóg jê nĩ, inh nĩgẽ kãki. Kỹ ā tóg néj tỹ kri vin jafã ag vэг mũ gé, ouro tỹ vela tỹ kri vin jafã tỹ 7 (ke) tag ag. Nhỹ ā mỹ kãmén, ā tỹ nén vэг mũ tag ti. Krīg tỹ 7 (ke) tag ri ke ag nỹtĩ, Topẽ tỹ jēgnẽ jafã ag. Inh ki ge kỹ nỹtĩ ag ki ag tóg rĩr tĩ, Topẽ tỹ jēgnẽ jafã tag ag. Sỹ ā mỹ cidade tỹ 7 (ke) tó mũ ên tá ag nỹtĩ, inh mré ke ag, ag tỹ ùn ki rĩr mũ ag. Kar kỹ néj tỹ kri vin jafã ri ke ti nỹtĩ, ù tỹ inh ki ge kỹ nỹtĩ tag ag,” he tóg, ù tỹ tỹ ěprã ke nĩ ve ên ti.

Jesus tỹ Éfeso tá igreja tá ke ag mỹ ā vĩ jēnẽ

2 “Ũ tỹ cidade tỹ Éfeso tá inh mré ke ag ki rĩr mũ ên mỹ tag rán nĩ, ha mẽ,” he tóg, ù tỹ tỹ ěprã ke nĩ ve ên ti. “Ũ tỹ ā mỹ vẽnĩ vĩ jēnẽg mũ vỹ krīg tỹ 7 (ke) génh kỹ jê nĩ, ti pēgja tá ti nĩgẽ kãki, hemnĩ. Kỹ tóg néj tỹ kri vin jafã tỹ 7 (ke) kãmĩ

tĩ mũ gé, hemnĩ. ² Ājag tỹ nén han mũ ki kanhró sóg nĩ, he ti, hemnĩ iso. Vāsã ģag tóg tĩ. Iso krónh ke tũ ģag tóg nỹtĩ. Ũn jykre pãno ag tóg ģag mỹ kórég nỹtĩ. Ājag kãmĩ ù tóg ón kỹ: apóstolo vỹ tỹ ěg nỹtĩ, he ja nỹtĩ. Ag jykre tugnỹm kỹ ģag tóg ag ón mũ tag to ag pan. ³ Iso tar ģag tóg nỹtĩ. Isugrĩn ģag tóg jagtar, ge ra ģag tóg iso krónh ke ja tũ nĩ.

⁴ Hã ra sóg nén ù sĩ tó sór mũ, ģag mỹ. Ājag tỹ nén han mũ ù tóg inh mỹ há tũ nĩ. Ājag tỹ inh ki ge vén kỹ ģag tóg iso há távĩ nỹtĩ ja nĩgtĩ, kỹ tóg há tĩ ja nĩ, hã ra ģag tóg ùri krónh ke mũ. ⁵ Ājag tỹ vāsỹ iso tar ên mĩ ěkrén nĩ. Ājag jykre kórég tovãnh nĩ. Ājag tỹ inh ki ge vén ên ri ke han măn nĩ, iso há távĩ nỹtĩ măn nĩ. Ājag tỹ tag han sór tũ nỹtĩn kỹ sóg ģag ki jun kỹ (sóg) ģag tỹ néj tỹ kri vin jafã ên ma tĩg ke mũ, ha vemnĩ.

⁶ Nén ù tóg hã ra há nĩ, ģag tỹ nén han mũ ù ti. Nicolaĩtas he mũ ên ag jykre to ģag tóg kórég távĩ nỹtĩ, isỹ ag jykre to kórég kóm, he tóg, hemnĩ, Éfeso tá ke ag mỹ, vẽnĩ rán ki,” he tóg inh mỹ, ù tỹ tỹ ěprã ke nĩ ve ên ti.

⁷ “Ũ nĩgrẽg nỹtĩ ag tỹ tỹ jēmẽ jé, Topẽ kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg. “Ũ tỹ isovãnh tũ ên vỹ ka kanẽ há konh ke mũ, ka tỹ ěg rĩnrĩr han mũ ên kanẽ, Topẽ jakré ên kanẽ,” he tóg, ù tỹ tỹ ěprã ke nĩ ve ên ti. Ti tỹ Éfeso tá ke ag mỹ vẽnĩ vĩ jēnẽg mũn hã vẽ.

Jesus tỹ Esmirna tá igreja tá ke ag mỹ ā vĩ jēnẽ

⁸ Kỹ tóg: “ũ tỹ cidade tỹ Esmirna tá inh ki ge kỹ nỹtĩ ag ki rĩr mũ ên mỹ tag rán nĩ, ha mẽ,” he mũ gé, ù tỹ tỹ ěprã ke nĩ ve ên ti. “Ũ tỹ ā mỹ vẽnĩ vĩ jēnẽg mũ vỹ tỹ ùn ve nĩ, hã ra tóg tỹ ěgno nĩ gé, hemnĩ. Ter ja ti nĩ, hã ra tóg rĩr măn, hemnĩ iso. ⁹ Isugrĩn ag tóg ģag to kórég nỹtĩ, kỹ ģag tóg jagãtar nỹtĩ. Ki kanhró sóg nĩ. Ge ra ģag tóg inhã rico ri ke

nýtí. Ājag to ag tóg vī kónān tī, ũ tỹ ón kỹ: “Judeu vỹ tỹ ěg nýtí, Topē tũ vỹ tỹ ěg nýtí,” he mũ ag. Ag pi(jé) tỹ Topē tũ nýtí. Satanás tũ vỹ tỹ ag nýtí. ¹⁰ Ājag jag-tar han jé ag tóg ke mũ, isugrīn. Mũmēg tũg nĩ hā ra. Japo vỹ ājag kato vāsān ke mũ, kỹ ag tóg vēsēja kátá ājag vām ke mũ. Japo tỹ ājag jykre ve sór hā vē. Kurā tỹ 10 (ke) ki ke vē, ag tỹ ājag vóg kónān ke ti. Isovānh tũg nĩ, ag tỹ ājag tén sór mũ ra. Kỹ ājag tóg rīr krỹg (ja) tũ venh ke mũ, kỹ tóg ājag mũ sēr tĩnh mũ, he tóg, hemnĩ, vėnh rán ki,” he tóg, ũ tỹ tỹ ěprā ke nĩ ve ěn ti, inh mỹ.

¹¹ “Ũ nĩgrėg nýtí ag tỹ tỹ jēmē jé, Topē kuprĩg vī ti. Ũ tỹ inh ki ge kỹ nýtí ag hā mỹ tóg tó ti, Topē kuprĩg ti,” he tóg. “Ũ tỹ isovānh tũ ěn vỹ nũgme ki vār ke tũ nĩ,” he tóg, ũ tỹ tỹ ěprā ke nĩ ve ěn ti. Ti tỹ Esmirna tá ke ag mỹ vėnh vī jėnėg mũn hā vē.

Jesus tỹ Pėrgamo tá igreja tá ke ag mỹ ā vī jėnė

¹² Kỹ tóg: “ũ tỹ cidade tỹ Pėrgamo tá inh ki ge kỹ nýtí ag ki rīr mũ ěn mỹ tag rán nĩ, ha mē,” he mũ gé, ũ tỹ tỹ ěprā ke nĩ ve ěn ti. “Ũ tỹ ā mỹ vėnh vī jėnėg mũ vỹ rógro jā rėgre vyn kỹ jē nĩ, ũn jā há ěn, hemnĩ iso. ¹³ Satanás nĩgia tá ājag tóg ěmā nýtí, ki kanhró sóg nĩ. Iso tar ājag tóg nýtí. Ājag rėgre tỹ Antipas tén ja ag tóg nĩ, ti tỹ inh jyjy tó tũgrīn. Ge ra ājag tóg iso: “ti ki kagtĩg sóg nĩ,” he ja tũ nĩ, ājag tỹ Satanás jamā tá nýtí ra.

¹⁴ Hā ra sóg nén ũ tó sór mũ gé, ājag mỹ, ti tỹ inh mỹ há tũ nĩn kỹ. Ājag kāmĩ ũ ag tóg Balaão jykre han sór mũ. Balaão vỹ Balaque mỹ kāmén ja nĩ, ti tỹ Israel krē ag krīn kónān jé, Topē vī mranh ke to. Ti tỹ ag krīn kónān kỹ ag tóg vėnh kăggrá to festa ko ja nĩgtĩ. Ag tỹ ón kỹ vėnh kăggrá to: topē, he mũ ěn mỹ festa ja vē. ěn ko kỹ ag tóg ājag prũ tũ fag mré nỹgnỹ’ he ja nĩgtĩ gé. Tag han sór ag tóg mũ gé, Balaão kóm, ājag kāmĩ ũ ag, kỹ

tóg inh mỹ kórég nỹ. ¹⁵ Kỹ ājag kāmĩ ũ ag tóg Nicolaítas he mũ ěn ag jykre han sór mũ gé. ¹⁶ Tovānh nĩ, ājag jykre tag. Ke tũ nĩ mũ ra sóg ājag ki jun ke mũ, sỹ ũ tỹ vėnh jykre tag han mũ ag kato vāsān jé, rógro tỹ inh jėnkā tá kăkutē mũ ěn tỹ, hemnĩ, vėnh rán ki,” he tóg, inh mỹ, ũ tỹ tỹ ěprā ke nĩ ve ěn ti.

¹⁷ “Ũ nĩgrėg nýtí ag tỹ tỹ jēmē jé, Topē kuprĩg vī ti. Ũ tỹ inh ki ge kỹ nýtí ag hā mỹ tóg tó ti, Topē kuprĩg ti,” he tóg.

“Ũ tỹ isovānh tũ mỹ sóg kanhkā tá vėjėn ěn nĩm ke mũ, vėjėn tỹ pėju kỹ nĩ ěn. Ag mỹ sóg pó kupri nĩm ke mũ gé. Kri vėnh jyjy tăg tóg rán kỹ nĩ. Ũ pi(jé) vėnh jiji tag ki kanhró nĩnh mũ. Ũ tỹ pó kupri ěn măg mũ ěn hā tóg ki kanhró nĩnh mũ, ā pir mỹ, ti jyjy tăg ki, he tóg, hemnĩ,” he tóg, ũ tỹ tỹ ěprā ke nĩ ve ěn ti. Ti tỹ cidade tỹ Pėrgamo tá ke ag mỹ vėnh vī jėnėg mũn hā vē.

Jesus tỹ Tiatira tá igreja tá ke ag mỹ ā vī jėnė

¹⁸ Kỹ tóg: “ũ tỹ cidade tỹ Tiatira tá inh ki ge kỹ nýtí ag ki rīr mũ ěn mỹ tag rán nĩ, ha mē,” he mũ gé, ũ tỹ tỹ ěprā ke nĩ ve ěn ti. “Ũ tỹ ā mỹ vėnh vī jėnėg mũ vỹ tỹ Topē kósín nĩ, hemnĩ,” he tóg. “Ti kanē vỹ pĩ gru ri ke nĩ, ti pėn vỹ ouro jėngrē ri ke nĩ gé, hemnĩ iso. ¹⁹ Ājag tỹ nén han mũ vég sóg ti. Iso há tăvĩ ājag tóg nýtí, inh ki rā pē han kỹ ājag tóg nýtí. Inh rānhřāj han ājag tóg mũgtĩ, to krónh ke tũ ājag tóg nĩgtĩ. Vāsỹ ājag tóg inh jykre to tar nýtí ja nĩgtĩ, kỹ ājag tóg ũri to tar kăfór nýtí gé.

²⁰ Hā ra sóg nén ũ sĩ tó sór mũ gé, ājag mỹ, ti tỹ inh mỹ há tũ nĩn kỹ. Jezabel fi vī kamėg ja tũ ājag tóg nĩgtĩ, hā kỹ fi tóg ón kỹ vī tĩ nĩ. Inh camarada ag krīn kónān fi tóg tĩ, ag tỹ fi mré nỹ jé, ag tỹ vėnh kăggrá mỹ nén (ũ) nĩ pũn mũ ěn ko jé gé. ²¹ Fi tovānh isóg mũ vē, fi tỹ ā jykre tugnỹm jé, hā ra fi tóg ā jykre kórég tovānh sór tũ nĩ. ²² Fi kăgăg jé sóg ke

mũ. Û tỹ fi jykre han mũ ag vóg kónân jé sóg ke mũ gé, ag tỹ fi jykre kórég továnh jāvánh nýtĩn kỹ. ²³ Fi krê kăgtén kân jé sóg ke mũ gé. Kỹ inh ki ge kỹ nýtĩ kar ag vỹ inh jykre ki kanhró nýtĩn mũ. Vênh kar tỹ nén to jykrén mũ ên ve kân sóg tĩ, vênh kar tỹ nén han sór mũ ên ke gé. Ājag tỹ nén han mũ ên ri ke han jé sóg ke mũ, ājag mỹ, ha vemnĩ.

²⁴ Ājag kāmĩ ù ag tóg hã ra fi jykre han ja tũ nigti, ājag tỹ Tiatira tá nýtĩ ra. Ājag pí(jé) fi tỹ vênh jykre han mũ han ja nĩ. Ag tỹ nén to: “Satanás jykre jagy,” he mũ ên han sór ja tũ ājag nigti. Hã kỹ sóg ājag mỹ nén ù jagy tónh ke tũ nĩ gé. ²⁵ Ājag tỹ nén han mũ to tar nýtĩmnĩ, gen kỹ inh kătĩg măn ke tag jāvánh nýtĩmnĩ.

²⁶ Û tỹ isovánh tũ ên ag tỹ sóg pã'i hyn han ke mũ, povo kar kri, ù tỹ inh vĩ ki króm mũ ag tỹ, ù tỹ iso krónh ke tũ ên ag tỹ ke gé. Inh panh vỹ isỹ pã'i han, hã kỹ sóg ājag tỹ pã'i han ke mũ gé, inh kóm, ²⁷ ājag tỹ inh kóm tỹ povo kri pã'i nýtĩ jé. Kỹ ājag tóg ag to vāsân ke mũ, ferro tỹ ag mrânmrân kỹ, êg tỹ go'or tỹ kukrũ gãm mũ ên ri ke. ²⁸ Tar ājag tóg nýtĩn mũ, kỹ sóg ājag mỹ krĩg mág nĩm ke mũ gé, he tóg, hemnĩ, ag mỹ, vênh rán ki,” he tóg, ù tỹ tỹ êprã ke nĩ ve ên ti.

²⁹ “Û nĩgrêg nýtĩ ag tỹ tỹ jēmē jé, Topē kuprĩg vĩ ti. Û tỹ inh ki ge kỹ nýtĩ ag hã mỹ tóg tó tĩ, Topē kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Tiatira tá ke ag mỹ vênh vĩ jēnēg mũn hã vē.

Jesus tỹ Sardes tá igreja tá ke ag mỹ ã vĩ jēnē

3 Kỹ tóg: “ù tỹ cidade tỹ Sardes tá inh ki ge kỹ nýtĩ ag ki rĩr mũ ên mỹ tag rán nĩ, ha mē,” he mũ gé. “Û tỹ ã mỹ vênh vĩ jēnēg mũ vỹ Topē kuprĩg tỹ jagrē nĩ, ti kuprĩg tỹ 7 (ke) nĩ ve ên tỹ, kỹ tóg krĩg tỹ 7 (ke) măn kỹ jē nĩ gé, hemnĩ iso,” he tóg. “Ājag tỹ nén han mũ ki kanhró sóg nĩ. Vênh kar vỹ ājag to:

“há ag nýtĩ, tar ag nýtĩ,” he tĩ, hã ra ājag tóg iso krónh ke ja nĩ, hã kỹ ājag tóg ùn kăgter mũ ri ke nýtĩ. ² Nũr továnh nĩ, tar nýtĩmnĩ, ke tũ nĩ mũ ra ājag kăgter pē han kân ke mũ. Ājag jykre tugnỹm inh, hã ra tóg há tũ nĩ ver. Topē vỹ ājag tỹ nén han mũ to há tũ nĩ ver. ³ Vênh vỹ sér mē ājag mỹr, kỹ to jykrén há han nĩ. To tar nýtĩmnĩ, to vāsân nĩ. Ājag nũgnũr kỹ sóg ājag krĩg mỹ jun ke mũ, ù tỹ êg tỹ nén pēju(g) tĩ tỹ êg nũr krĩg mỹ jun mũ ri ke han jé sóg ke mũ. Inh jun ke kurã ki kagtĩg ājag tóg nýtĩ mỹr.

⁴ Ājag kāmĩ ù ag tóg hã ra vênh kavénh ja tũ nĩ, Sardes tá. Tag ag vỹ kur kupri ên rĩnh ke mũ, inh mré ag nýtĩn ke mũ. ⁵ Û tỹ isovánh tũ ên ag vỹ kur kupri ên rĩnh kân ke mũ. Ag jygiy kykũnh ke tũ inh nĩ, inh livro ki. Ûn rĩnrĩr ke mũ ag jygi vỹ ki ránrán kỹ nýtĩ, inh livro ên ki. Ên ag jygiy tó jé sóg ke mũ, inh panh mỹ, ti tỹ jēgnē jafã kar ag mỹ ke gé, he tóg, hemnĩ, vênh rán ki,” he tóg, inh mỹ, ù tỹ tỹ êprã ke nĩ ve ên ti.

⁶ “Û nĩgrêg nýtĩ ag tỹ tỹ jēmē jé, Topē kuprĩg vĩ ti. Û tỹ inh ki ge kỹ nýtĩ ag hã mỹ tóg tónh ke mũ, Topē kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Sardes tá ke ag mỹ vênh vĩ jēnēg mũn hã vē.

Jesus tỹ Filadélfia tá igreja tá ke ag mỹ ã vĩ jēnē

⁷ Kỹ tóg: “ù tỹ cidade tỹ Filadélfia tá inh ki ge kỹ nýtĩ ag ki rĩr mũ ên mỹ tag rán nĩ, ha mē,” he mũ gé. “Û tỹ ã mỹ vênh vĩ jēnēg mũ vỹ tỹ ùn há pē nĩ, ùn tar tâvĩ, kỹ tóg ki hã tó tĩ, hemnĩ. Davi ên tỹ jänkã róm jafã vyn kỹ tóg jē nĩ, jänkã nón jafã ên ti, chave ên ti, hemnĩ. Ti tỹ jänkã ù róm kỹ ù tóg nĩfénh măn ke tũ nĩ, kỹ ti tỹ jänkã ù nĩfénh kỹ ù tóg nón măn ke tũ nĩ gé, hemnĩ, iso,” he tóg. ⁸ “Ājag tỹ nén han mũ ki kanhró sóg nĩ. Tỹ nén mág tũ ājag nýtĩ. Hã ra ājag tóg isỹ ājag mỹ nén tó mũ ên ki króm kỹ nýtĩgtĩ, isovánh ja

tũ ājag tóg nĩgtĩ. Ājag mĩ sóg ěg tĩ jānkā róm tĩ ěn ri ke han, kĩ ũ tĩ ājag jo nĩfénh ke tóg tũ tĩ. ⁹ Ha mē, sũ nén tónh ke ti. Ājag mĩ sóg ũ ag jēgnēnh mũ, Satanás mré ke ũ ag. Ōn kĩ ag tóg: “Judeu vỹ tĩ ěg nĩtĩ, Topē mré ke vỹ tĩ ěg nĩtĩ,” hēnh ke mũ. Ag ón hā vē. Ag tĩ ke sór tũ ra ag tóg ājag krēm mũg kēnh ke mũ, ājag mĩ: “ěg kǎfór ājag tóg nĩtĩ,” hēnh kĩ, ha vemnĩ. Ājag to há tǎvi sóg nĩ. Hā kĩ ājag kato vāsānsān mũ ag vỹ tag venh ke mũ, ha vemnĩ. ¹⁰ Inh vĩ ki króm ājag tóg mũ mĩr, sũ ājag mĩ: “isovānh tũg nĩ,” hēnh kĩ. Hā kĩ sóg ājag jy nĩgān ke mũ, ga kri ke kar ag tĩ nén ũ jagy venh ke kurǎ ěn kǎ. Ti jagy tǎvi ve jé ag tóg ke mũ, ěprǎ ke kar ěn ag, isỹ ag jykre tugnỹm kēn kĩ. ¹¹ Kǎnhmar inh kǎtĩg ke mũ. Ājag tĩ inh ki ge kĩ nĩtĩ tag tovānh tũg nĩ, ke tũ nĩ mũ ra ũ ag tóg ājag jēgja kǎ jē kĩ nén tĩ ājag mĩ sér tĩnh ke mũ ěn venh ke mũ inhā. ¹² Ũ tĩ isovānh tũ ěn ag tĩ sóg ĩn nũna ri ke han ke mũ, kǎnhkǎ tá, Topē jo ĩn ri ke ěn tá. Tá ag pa mǎn ke tũ nĩtĩ ha. Ag kri sóg Topē jiji rán ke mũ gé, Topē jamǎ jyjy ti ke gé. Cidade tĩ Jerusalém tǎg to kēn hā vē. Kǎnhkǎ tá tóg kǎtērenh kēnh ke mũ, Topē tá, Jerusalém tǎg tag ti. Kar kĩ sóg ag kri inh jiji tǎg rán ke mũ gé, he tóg, hemnĩ, vēnh rán ki,” he tóg inh mĩ, ũ tĩ tĩ ěprǎ ke nĩ ve ěn ti.

¹³ “Ũ nĩgrēg nĩtĩ ag tĩ tĩ jēmē jé, Topē kuprĩg vĩ ti, ũ tĩ inh ki ge kĩ nĩtĩ ag hā mĩ tóg tónh ke mũ, Topē kuprĩg ti,” he tóg, ũ tĩ tĩ ěprǎ ke nĩ ve ěn ti. Ti tĩ cidade tĩ Filadélfia tá ke ag mĩ vēnh vĩ jēnēg mũn hā vē.

Jesus tĩ Laodicéia tá igreja tá ke ag mĩ ā vĩ jēnē

¹⁴ Kĩ tóg: “ũ tĩ cidade tĩ Laodicéia tá inh ki ge kĩ nĩtĩ ag ki rĩr mũ ěn mĩ tag rán nĩ, ha mē,” he mũ gé. “Ũ tĩ ā mĩ vēnh vĩ jēnēg mũ jyjyn hā vỹ: “ki hā tó mũn hā vē,” he mũ, hemnĩ,” he tóg. “Ki há tóg tó tĩ, nén ũ kar ki. Ōn vānh ti

nĩgtĩ, hemnĩ. Ti hā tugrĩn Topē tóg nén (ũ) kar han ja nĩgtĩ, hemnĩ iso,” he tóg. ¹⁵ “Ājag tĩ nén han mũ ki kǎnhró sóg nĩ. Ājag pi(jé) goj rĩ jagy ri ke nĩtĩ, kĩ ājag pi(jé) goj kusa ri ke nĩtĩ gé. Ājag tĩ goj rĩ jagy ěn ri ke nĩtĩ ran há tĩnh mũ vē, ājag tĩ goj kusa ěn ri ke nĩtĩ ran há tĩnh mũ gé vē vē. ¹⁶ Hā ra ājag tóg goj rĩ mē ri ke nĩtĩ, ājag tĩ iso krój nĩtĩn kĩ. Hā kĩ sóg ājag vām sór mũ, ěg tĩ rēĩr tá goj rĩ mē ěn pra kĩ kujēn ěn ri ke han jé sóg ke mũ, ājag tĩ, ha vemnĩ. ¹⁷ Vēsō ājag tóg: “rico ěg nĩtĩ, há ěg nĩtĩ, nén ũ tóg ěg mĩ tũ’ he tũ pē nĩ,” he tĩ. Hā tũ tó ājag tóg tĩ. Jagǎgtar ājag tóg nĩtĩ, mĩr, ha mē. Tĩ nén tũ ājag tóg nĩtĩ, jykre kórég ājag tóg nĩtĩ, kur tũ ājag tóg nĩtĩ, kyvó ājag tóg nĩtĩ, ājag tĩ há nĩtĩ ve ra. Hā ra ājag tóg ki kǎtĩg nĩtĩ, ājag kórég nĩtĩ tag ki. ¹⁸ Hā kĩ sóg ājag mĩ: “inh ki mǎn kāmũ jēg, ouro há ěn ti,” he sór mũ, ājag tĩ rico nĩtĩ jé. Kur kupri kajām nĩ, ājag tĩ kator nĩtĩ tũ nĩ jé, ājag mĩ’āg tũ nĩ jé. Vēnh kǎgta kajām nĩ, ājag kǎnē mĩ, ājag tĩ ve há han mǎn jé. ¹⁹ Isỹ ũ to há nĩ ěn mĩ sóg vĩ tar han tĩ, ti kǎnhrán jé. Vēsō jykrén kĩ ājag jykre kórég togvānh nĩ. ²⁰ Mē há han nĩ, sũ ājag mĩ nén tó mũ tag. Re tá inh jē nĩ, jānkā tá, kĩ sóg tĩ tórón’ tórón’ ke mũ, tĩ tag’ tag’ ke sóg mũ. Ũ tĩ inh vĩ mēg mũ mĩ tóg há tĩ, kĩ tóg inh mĩ nón ke mũ, jānkā ti, kĩ sóg ti ĩn kǎra rǎnh ke mũ. Kĩ sóg ti mré jēn ke mũ, kĩ tóg inh mré jēn ke mũ gé, ha mē. ²¹ Ũ tĩ isovānh tũ ěn mĩ sóg: “inh mré nĩ,” he sór mũ, kĩ tóg inh ri ke tĩ ũn mǎg nĩnh ke mũ. Inh panh mré sóg tĩ ũn mǎg nĩ ha, isỹ ti tovānh ja tũ nĩn kĩ, kĩ tóg tá inh mré nĩnh ke mũ gé, he tóg, hemnĩ, vēnh rán ki,” he tóg, ũ tĩ tĩ ěprǎ ke nĩ ve ěn ti.

²² “Ũ nĩgrēg nĩtĩ ag tĩ tĩ jēmē jé, Topē kuprĩg vĩ ti, ũ tĩ inh ki ge kĩ nĩtĩ ag hā mĩ tóg tónh ke mũ, Topē kuprĩg ti,” he tóg, ũ tĩ tĩ ěprǎ ke nĩ ve ěn ti. Ti tĩ cidade tĩ Laodicéia tá ke ag mĩ vēnh vĩ jēnēg mũn hā vē.

Ag tỹ kanhkã tá Topẽ mỹ vĩ há han

4 Kĩ sóg kynhmỹ êvãnh, kĩ sóg kanhkã jãnkã vế, hã ra tóg róm ke kĩ jẽ nĩ. Kĩ sóg vênh vĩ ên jẽmẽ mãn, vênh vĩ tỹ trombeta kyr ri ke ên, kĩ tóg inh mỹ: “hã kãtãpřy,” he mũ. “Á mỹ sóg ven sór mũ, ãjag tỹ kar kĩ nén venh ke mũ ti,” he tóg, vênh vĩ ti.

² Kĩ vãhã Topẽ kupřig tóg inh krĩn mũ, kĩ sóg nén nén vếg mũ. Kanhkã tá tóg nĩgja sĩnvĩ jẽ nĩ, kĩ ù tóg kri nĩ nĩ. ³ Ti kakã tóg jẽngřẽ nĩ, pó sĩnvĩ jẽngřẽ ên ri ke, pó tỹ jaspe jẽngřẽ ên ri ke, pó tỹ sardônio jẽngřẽ ên ri ke. Nĩgja sĩnvĩ ên vỹ ta no ri ke nĩ, kĩ tóg jẽngřẽ jẽ gé, ta no ên ti, pó tỹ esmeralda jẽngřẽ ên ri ke. ⁴ Nĩgja sĩnvĩ ên pẽnĩn nĩgja sĩnvĩ ù tóg nỹtĩ gé, ù tỹ 24 (ke) ti nỹtĩ. Nĩgja ên kri kófa ag tóg nĩgnĩ kĩ nỹtĩ, kófa tỹ 24 (ke) ag. Kur kupri rĩnh kĩ ag tóg nỹtĩ, ouro tỹ krĩ tógfĩ rĩnh kĩ ag tóg nỹtĩ gé. ⁵ Nĩgja sĩnvĩ ên tá ta tỹ kómkóm ke ri ke ên tóg vênh ven mũ, kĩ ta tỹ tỹrỹr he ri ke ên tóg mẽ há tĩ gé, vênh vĩ ke gé. Ti jo pĩ jónhkó gru tỹ 7 (ke) tóg nỹtĩ gé. Topẽ kupřig to ken hã vế, ù tỹ 7 (ke) nĩ ve ên, hã vỹ: pĩ jónhkó gru tỹ 7 (ke), he mũ. ⁶ Nĩgja sĩnvĩ kakãm nén ù tóg nỹ nĩ, kĩ tóg vidro tỹ goj nĩ ve nĩ, goj jãpri, goj kókov (pẽ).

Kỹ nĩgja sĩnvĩ ên pẽnĩn ù ag tóg nỹtĩ, ù tỹ 4 (ke) ag, ùn kanẽ e tãvĩ ag. Ag kakã ki ag tóg kanẽ e nỹtĩ, kar kĩ ag pãnĩ tá ke gé. ⁷ Ag kãmĩ ù tóg mĩg ve ri ke nĩ, kĩ ù tóg monh tãg ve ri ke nĩ gé, kĩ ù tóg ěg kakã ve ri ke nĩ, jãvo ù tóg kónhkó mág tẽ tĩ ve ri ke nĩ. ⁸ Ag kar vỹ fẽr tỹ 6 (ke) nỹtĩ. Kĩ ag tóg ãjag fẽr ki kanẽ e nỹtĩ gé, fẽr ven ja tá, ti kãtã ke gé. Kurã kar ki ag tóg jãn tĩ, kutỹ kar ki ke gé, jãn to krónh ke jãvãnh ag tóg nỹtĩ. Ag jãn hã vế, ha mẽ: “ũn mág', mág', mág' vỹ tỹ ti nĩ, ěg jóg tỹ Topẽ ti, ù tỹ nén kar han ki kanhró nĩ ên ti. Vãsỹ tóg nĩ ja nĩgtĩ, kĩ tóg ùri nĩ gé, jãvo tóg kãtĩg ke mũ gé,” he

ag tóg tĩ, jãn kĩ, nén nẽ tỹ 4 (ke) ên ag. ⁹ Gen kĩ ag tóg Topẽ mỹ jãn tĩ, ti tỹ tỹ ùn mág nĩ ên hã tỹ ag tóg jãn tĩ. Ti mỹ vĩ há han ag tóg tĩ. Ti mỹ ag tóg: “nén kar hyn han há ã tóg nĩ,” he tĩ. ù tỹ nĩgja sĩnvĩ ên kri nĩ mũ mỹ ag tóg jãn tĩ, ùn rĩr nĩ ên mỹ. Ti rĩr nĩ vỹ tũg' henh ke tũ pẽ nĩ. ¹⁰ Ag tỹ ti mỹ jãn kĩ kófa tỹ 24 (ke) ên ag vỹ mũgmũg ke tĩ, ù tỹ nĩgja sĩnvĩ kri nĩ ên krẽm. Mũgmũg ken kĩ ag tog ti mỹ: “Topẽ vỹ tỹ ã nĩ,” he tĩ, ùn rĩr nĩ ên mỹ. Ti rĩr nĩ vỹ tũg' henh ke tũ pẽ nĩ. Kĩ ag tóg ãjag kri tógfĩ ên vin tĩ, nĩgja sĩnvĩ ên krẽm. ¹¹ Ti mỹ ag tóg tag tó tĩ, ha mẽ: “ěg Senhor vỹ tỹ ã nĩ, Topẽ vỹ tỹ ã nĩ. Nén ù kar hyn han ja ã nĩgtĩ. To jykrén kĩ ã tóg nén ù kar hyn han ja nĩgtĩ, hã kĩ tóg ki nỹtĩ, ã tỹ nén hyn han mũ kar ên ti. Á hã ne ã pir mỹ tá krỹg he mũ', kĩ vênh kar vỹ ã mỹ vĩ há han ke mũ, ã to: “ũn mág vỹ tỹ ti nĩ,” hen kĩ, kĩ ag tóg ã vĩ ki króm tĩ gé,” he ag tóg tĩ, kófa ag, ù tỹ nĩgja sĩnvĩ kri nĩ ên mỹ.

Jesus tỹ livro mãn

5 Kĩ sóg livro vếg mũ, livro ên vỹ grĩn kĩ nỹ. ù tỹ nĩgja sĩnvĩ kri nĩ ên vỹ livro ên mãn kĩ nĩ nĩ, ti pẽgia tỹ. Kãtã tóg rãn kĩ nĩ, ti ven ja tá ke gé. Tógfĩn kĩ tóg nĩ nĩ, livro ti. Tógfĩn ja tỹ 7 (ke) tóg nĩ. Ti tógfĩn kri tóg go'or nĩ gé, ù tỹ kygvãg tũ nĩ jẽ. ² Kĩ sóg Topẽ tỹ jẽnẽ jãfã éhẽ tãvĩ vếg mũ gé. Vĩ tóg mũ, jamã hár(a), kĩ tóg: “ù nỹ hỹn tá krỹg mũ, ti tógfĩn kavãn ti jẽ?” he mũ.

³ Hã ra ag tóg ù tỹ tá krỹg mũ vếg tũ nĩ, kanhkã tá, ěprã, vênh kupřig ag kãmĩ ke gé. Kĩ ù tỹ livro kavãn ke tóg tũ tĩ, ti rá ve jẽ. ⁴ Kĩ sóg fỹ mũ. Inh mỹ tóg e tĩ, ù tỹ livro kavãn ke tũ tĩn kĩ, ěg tỹ ti rá ven jẽ. ⁵ Kĩ kófa ag kã ù tóg inh mỹ: “fỹ tũg ra,” he mũ. “Povo tỹ Judeu kãmĩ ùn pir tóg mĩg tar ri ke nĩ, Davi krẽkrẽ ag kã ùn pir ên vỹ tóg vênh kar tỹ hên ri ke ja nĩ. Ên vỹ ti tógfĩn tỹ 7 (ke) ên kygvãn

ki kanhró nĩ, kŷ tóg livro ki rá ên venh ke mũ,” he tóg inh mŷ, kófa ti.

⁶Kŷ sóg nĩgja sĭnvĩ ên jo cordeiro vég mũ, mé krê ên ti. Nén nê tŷ 4 (ke) ag vŷ ti pénĭn nŷtĩ, kófa ag ke gé, cordeiro ên pénĭn ag nŷtĩ. Kŷ tóg tŷ ag tŷ tânĥ kŷ rĩr măn ên ri ke jê. Nĩka tŷ 7 (ke) ti nĩ, kanê tŷ 7 (ke) ke gé, cordeiro ên ti. Topê kuprĩg to ken hã vê, ũ tŷ 7 (ke) nĩ ve ên ti, hã vŷ: nika tŷ 7 (ke) mré kanê tŷ 7 (ke), he mũ. Topê vŷ ti jênê ja nĩ, ti tŷ ga kar mĩ tũg jé, Topê kuprĩg ti. ⁷Kŷ cordeiro ên vŷ ũ tŷ nĩgja sĭnvĩ kri nĩ ên tá jun mũ, kŷ tóg ti ki livro ên mǎg mũ, ũ tŷ ã pēgja tŷ livro măn kŷ nĩ ên ti ki. ⁸Kŷ nén nê tŷ 4 (ke) ên ag vŷ mũgmũg ke kăn mũ, kófa tŷ 24 (ke) ag ke gé, cordeiro ên krēm ag tóg mũgmũg ke kăn mũ sir. Kófa ag vŷ vākyn jafã tŷ harpa génh kŷ nŷtĩ. Pénky tŷ ouro génh kŷ ag nŷtĩ gé. Pénky ên kãki tóg fór nĩ, ti pũn kŷ ger há han jafã ên tŷ, hã vŷ: êg tŷ Topê mré vēmén tĩ, he mũ. ⁹Cordeiro ên mŷ ag tóg jăn mũ, Jesus jé tag tó ag tóg mũ, ha mē. “Ā hã ne tá krŷg mũ,” he ag tóg mũ. “Ā hã ne livro măn kŷ ti tógfĩ kygvāg mũ ha’. Ā tén ja ag tóg, kŷ ã tóg ter kŷ êprã ke ag kygĵām, Topê mŷ, pã’i ag kar krēm ke ag kāmĩ, vēnh vĩ kar tó ti ag kāmĩ, nação kar ag kāmĩ, povo kar ag kāmĩ ã tóg ũ ag kygĵām ja nĩgtĩ. ¹⁰Ā tŷ ũn kygĵām mũ ag mŷ ã tóg vēnh rānhrāj nĩm ja nĩ gé, ag tŷ ã mŷ ã tũ ki rĩr jé, ag tŷ tŷ Topê camarada nŷtĩ jé. Kŷ ag tóg êprã ke ag krĩg mŷ tŷ ũn mǎg nŷtĩnh mũ,” he ag tóg, kófa ag, jănĵān kŷ.

¹¹Kŷ sóg Topê tŷ jēgnē jafã tŷ hēn ri ke vég mũ gé, mil tŷ mil tŷ hēn ri ke. Ag e tāvĩn ra êg tóg ag nĩgrēn ke tũ nĩ. Nĩgja sĭnvĩ ên jo ag tóg nŷtĩ, nén nê tŷ 4 (ke) ên mré, kófa ag mré ke gé. ¹²Jănĵān kăn ag tóg mũ gé, jamã hár(a), kŷ ag tóg: “cordeiro tag tén ja ag tóg nĩ, hã kŷ tóg ũri tŷ ũn mǎg jê,” he mũ. “Tŷ tóg vēnh kar kri ke jê ha, rico tóg jê ha, ki kanhró tóg jê ha, tar tóg jê ha, tŷ tóg ũn mǎg jê

ha, sĭnvĩ tóg jê ha, vēnh kar vŷ ti mŷ vĩ há han mũ ha,” he ag tóg, Topê tŷ jēgnē jafã ag.

¹³Kŷ vāhã kanhkã tân kar ag vŷ jănĵān mũ, êprã ke kar ag ke gé, vēnh kuprĩg kar ag ke gé, goj ki ke kar ag ke gé. Ag kar vŷ jănĵān mũ ha, jamã hár(a), kŷ ag tóg: “ũ tŷ nĩgja sĭnvĩ kri nĩ mũ ên mŷ êg tóg vĩ há han ke mũ ha, cordeiro ên mŷ ke gé,” he mũ. “Ājag pir mŷ ag tóg tŷ ũn mǎg nŷtĩ, ājag pir mŷ ag tóg sĭnvĩ nŷtĩ, vēnh kar kri ke vŷ tŷ ag nŷtĩ, kŷ ag tóg tũg’ hēnh ke tũ pē nĩ,” he ag tóg mũ sir, vēnh kar pē ti.

¹⁴Kŷ nén nê tŷ 4 (ke) ên ag vŷ tóg vĩ mũ gé sir. “Hã vê,” he ag tóg mũ. Kŷ kófa ag tóg mũgmũg ke kăn mũ sir, “Topê vŷ tŷ ã nĩ,” hēn kŷ.

Jesus tŷ livro tógfĩ kygvān

6 Kŷ sóg cordeiro tŷ ti tógfĩ ve kavān vég mũ sir, ti tógfĩ tŷ 7 (ke) ên ag kã ũn ve ên ti. Kŷ sóg nén nê tŷ 4 (ke) ag kã ũ vĩ mēg mũ gé sir. Ti vŷ vŷ ta tŷ tŷrŷr he ri ke nĩ. “Tág’,” he tóg. ²Kŷ sóg vēsŷĵām ēvānh kŷ cavalo kupri vég mũ. Ũ tŷ kri nĩ vŷ vyj tŷ no rēr tŷ pēg jafã vŷn kŷ nĩ nĩ. Ti mŷ ag tóg krĩ tógfĩ jun mũ, ti tŷ tŷ êprã ke kri ke jēn kŷ. Kŷ tóg vēnh kar ag tŷ ã krēm ke han tĩ mũ.

³Kŷ cordeiro vŷ ti tógfĩ ũ kavāg mũ gé. Ti tógfĩ régre tá krŷg vē sir. Kŷ nén nê ag kāmĩ ũ tóg: “tág’,” he mũ gé. ⁴Kŷ cavalo kusũg vŷ jun mũ. Ũ tŷ kri nĩ mũ ên mŷ ag tóg rógro téj jun mũ, ti tŷ êprã ke ag tŷ jagnē kato vāsānsān han jé, êprã ke ag tŷ jagnē kǎgtén jé sir.

⁵Kŷ cordeiro ên tóg ti tógfĩ ũ kavāg mũ gé. Ti tógfĩ tǎgtũ tá krŷg vē sir. Kŷ nén nê ag kāmĩ ũ tóg: “tág’,” he mũ gé. Kŷ sóg vēsŷĵām ēvānh kŷ cavalo sá vég mũ sir. Ũ tŷ kri nĩ ên vŷ êg tŷ nén ũ kar kufyg jafã măn kŷ nĩ nĩ, êg tŷ nén ũ kar kāmũn jafã ti. ⁶Kŷ sóg nén nê tŷ 4 (ke) ên kã vēnh vĩ ũ jēmēg mũ gé, kŷ tóg: “trigo tŷ quilo pir măn jé ag tóg ke mũ,

por dia kaja to,” he mû, “ke tû nîn kÿ ag tóg cevada tÿ quilo tâgtû mân ke mû, por dia kaja ên to. Azeite vóg tûg nî hã ra, vinho vóg tûg nî gé, ên vÿ kaja pir nînh mû,” he tóg mû, vênh vî ti.

⁷ Kÿ cordeiro ên tóg ti tógfî ù kaväg mû gé. Ti tógfî tÿ 4 (ke) tá krÿg vë sir. Kÿ nén nê ag kãmî ù tóg: “tág’,” he mû gé. ⁸ Kÿ sóg cavalo ù vëg mû, hã ra tóg vëser jógtân ri ke nî. Û tÿ kri nî ên tóg êg tén ti, kÿ vênh kuprîg ag vÿ ti nón kãmî mû gé, ti kâtîg ên kã. Ag tÿ êprä ke ag tÿ vênh kãpóv tÿ 4 (ke) ag kã ti vênh kãpóv pir ag kãgtén ke vë, rógro tÿ, ag kókîr tÿ ke gé, vênh kaga tÿ ke gé, mîg tÿ ke gé.

⁹ Kÿ cordeiro vÿ ti tógfî ù kaväg mû gé. Ti tógfî tÿ 5 (ke) tá krÿg vë sir. Kÿ sóg nîgja sînvî ên krêm êvân timer kÿ êprä ke ag kuprîg vigvég mû, ag tÿ Topê vî tugrîn ùn kãgtén mû ag kar kuprîg ti. Topê vî tó to krónh ke ja tû ag tóg nÿtî, hã kÿ ag tóg ag kãgtén ja nîgtî, ù tÿ ag vî jëmê sór tû ên ag. ¹⁰ Ên ag vÿ jamã hár(a) tag tó mû, ha mē: “kake’,” he ag tóg mû. “Ûn mág vÿ tÿ ã nî. Æ tÿ nén tó mû ên han ã tóg tî. Hã ra êg tóg hur ã tÿ nén han ke mû jãvân timer mág. Æ mÿ kãnhmar êprä ke ag jykre tugnÿm sór tû, ã tÿ ag vóg kónân jé, ag tÿ êg kãgtén ja tag tugrîn?” he ag tóg mû, ag tÿ Jesus tugrîn ùn kãgtén mû ên ag. ¹¹ Kÿ ag tóg ag mÿ kur kupri junjun mû sir, kÿ ag tóg ag mÿ: “toreg ver’,” he mû. “Û ag tóg nÿtî gé, ag tÿ ùn kãgtén mû ù ag. Ag tÿ ãjag kãgtén ja ri ke han ke vë, ãjag mré ke ù ên ag tÿ. Topê vÿ ag nîgkré, kÿ tóg ki kanhró nî, ag tÿ ù tÿ hên ri ke kãgtén ke mûn ki. Ag tÿ ãjag mré ke ên ag kãgtén kãn kar kÿ tóg ag jykre tugnÿm kãn ke mû, ha vemnî,” he tóg, ag tÿ ùn kãgtén mû ên ag mÿ.

¹² Kÿ sóg cordeiro ve mân mû, kÿ tóg livro tógfî ù kaväg mû gé. Ti tógfî tÿ 6 (ke) tá krÿg vë sir. Kÿ ga tóg jürûn ke mû ha. Rã vÿ kuty’ he mû, êg tÿ ù ter kÿ kur sã tu tî kuty ên ri ke. Kysã vÿ kusüg’

he mû gé. ¹³ Kÿ krîg vÿ vár kãn ke mû gé. Kejên kãka tóg ka tÿ vyryn vyryn ke tî, kÿ ti kanê tóg vár kãn tî, ti tánh ra. Ge ti nîgtî, krîg vár kãn ke mû tag ti. ¹⁴ Kÿ kanhkã vÿ tûg’ he mû gé, êg tÿ livro grîn ên ri ke ti nî, kanhkã tûg ti. Pãnónh vÿ tûg kãn mû gé, goj vãso kar ke gé. ¹⁵ Êprä ke ag vÿ pãnónh nor krêm vên timer pigjunh mû, pãró vãso krêm, pãnónh vãso krêm ke gé, pã’i ag, vên timer kri ke ag, soldado ag pã’i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprä ke kar ag mÿr, ha mē. ¹⁶ Kÿ ag tóg pãnónh mÿ vî mû, pãró mÿ ke gé. “Ha êg kri vár, ha êg kri tÿ tam ké,” he ag tóg mû, ón kÿ, pãró mÿ. “Ha êg pigju. Cordeiro ên vÿ êg to jû mû, kÿ ù tÿ nîgja sînvî kri nî ên vÿ êg ki êvân timer mû. Ag jo êg pigju,” he ag tóg mû ón kÿ, êprä ke kar ag, pãnónh kar mÿ. ¹⁷ “Ag tÿ êg to jûnh ke vë. Pétêm ti huri, kurã kórég tag ti. Krenkren ke tû êg tóg nî,” he ag tóg mû, êprä ke kar ag, cordeiro ên jû kamêg kÿ.

Topê tÿ jënê jafã tÿ ùn e ag ránrán

7 Kÿ sóg ga fyr mî êvân timer kÿ Topê tÿ jëgnê jafã tÿ 4 (ke) ag vigvég mû. Ga péno tÿ 4 (ke) ki ag jëg jëg kÿ nÿtî. Kãka tÿ 4 (ke) vÿ tá nÿtî gé. Kÿ ag tóg kãka tÿ 4 (ke) ên ag ki rîr nÿtî, kãka tÿ hê kátã mû tû nî jé. Kÿ kãka tóg tû tî, ga kri, goj kri ke gé, ka kãmî ke gé. ² Rã jur ja tá sóg Topê tÿ jënê jafã ù kâtîg vëg mû gé. Topê tÿ êg ránrán jafã ma tóg kâtî mû. Kÿ tóg kanhkã ra tâpry mû. Kÿ tóg Topê tÿ jëgnê jafã tÿ 4 (ke) ên ag mÿ vî mû. Topê vÿ ag mÿ: “ga mré goj kókén nî,” he ja nî, ù tÿ 4 (ke) ên ag mÿ. ³ Kÿ ù tÿ vên timer rán jafã ma kâtî mû ên tóg ag mÿ: “toreg ver’,” he mû. “Ga vóg tûg nî ver, goj ke gé, ka ke gé,” he tóg. “Êg tÿ ver Topê camarada ag ránrán sór vë, vên timer rán jafã tag ti tÿ, ag kakã ki,” he tóg, Topê tÿ jënê jafã ti, ù tÿ 4 (ke) ên ag mÿ. ⁴ Kÿ tóg ag rán tî mû. Û tÿ 140 mil (ke) ag hã vë, fag mré hã,

ti t̃y Israel krē'krē ag kar kāmī ũn ránrán mū ag. Ti número mē inh. ⁵ Judá krē t̃y 12 mil (ke) tóg rán k̃y ñtī, Rubem krē t̃y 12 mil (ke) ke gé, Gade krē t̃y 12 mil (ke) ke gé, ⁶ Aser krē t̃y 12 mil (ke) ke gé, Naftali krē t̃y 12 mil (ke) ke gé, Manassés krē t̃y 12 mil (ke) ke gé, ⁷ Simeão krē t̃y 12 mil (ke) ke gé, Levi krē t̃y 12 mil (ke) ke gé, Issacar krē t̃y 12 mil (ke) ke gé, José krē t̃y 12 mil (ke) ke gé, Benjamim krē t̃y 12 mil (ke) ke gé. Ēn ag ránrán k̃an tóg mū, Topē t̃y jēnē jafā ti.

Ũn e t̃y Topē m̃y vī há han

⁹ Tag pāte sóg ũn t̃y hēn ri ke ag vigvég mū. E t̃aṽin ag ñtī, e t̃aṽin, k̃y ũ t̃y ag ñgkrén ke tóg tū tī. T̃y ag ēprā ke ja ñtī. Nação kar kāmī ke ũ ag ṽy tá ñtī, p̃ā'i kar krēm ke ũ ag ke gé, povo kar kāmī ũ ag ke gé, vēnh vī kar tó tī ag kāmī ũ ag ke gé. Kur kupri r̃inh k̃y ag tóg ñtī, ũn e ěn ag. Ñgja s̃invī ěn p̃énin ag tóg jēg̃jēg k̃y ñtī, cordeiro r̃inve tá, t̃anh féj génh k̃y ag tóg ñtī. ¹⁰ Ēn ag ṽy jamā hár(a): “Topē h̃a ṽy ěg krenkren han mū,” he mū. “Ũ t̃y ñgja s̃invī kri ñ ěn ṽy ěg krenkren han mū, cordeiro ti ke gé,” he ag tóg mū, jamā hár(a), ũn e ěn ag.

¹¹ Topē t̃y jēgnē jafā kar ag ṽy ñgja s̃invī ěn p̃énin ñtī gé, ũn e ěn ag mré. Kófa ěn ag p̃énin ag ñtī, ñén ñē t̃y 4 (ke) ěn ag p̃énin ke gé. Ñgja s̃invī ěn krēm ag tóg m̃gm̃g ke mū, k̃y ag tóg ũ t̃y kri ñ ěn m̃y: “Topē ṽy t̃y ā ñi,” he mū. ¹² K̃y ag tóg: “ha vé, vēnh kar jé Topē h̃a m̃y vēnh vī há tó,” he mū. “Topē h̃a ṽy s̃invī jē, Topē h̃a ṽy ki kanhró ñi, Topē h̃a m̃y ěg tóg vēnh vī há tó tī. T̃y tóg ũn mág jē, vēnh kar kri tóg jē, tar tóg jē, Topē ti, ũri, k̃y tóg tū' hēnh ke tū ñi gé. H̃a ṽe,” he ag tóg mū, Topē t̃y jēgnē jafā ag.

¹³ K̃y kófa ěn ag k̃a ũ tóg inh m̃y: “ag t̃y hē ri ke ñē h̃yn, h̃a k̃y ag tóg kur kupri r̃inh k̃y ñtī?” he mū. ¹⁴ K̃y sóg ti m̃y: “inh pi(jé) ki kanhró ñi,” he mū. “Ā h̃yn

tóg ki kanhró ñi,” he sóg ti m̃y. K̃y tóg inh m̃y: “ñén ũ jagy mág pē ve ja ag tóg ñtī, cordeiro tugr̃in,” he mū. “Ag vóg kónan jagy han ja ag tóg. Ag kur kygfa ag, cordeiro kyvénh t̃y, k̃y tóg kupri ñtī, ag kur ti. ¹⁵ K̃y ag tóg Topē ñgja s̃invī p̃énin ñtī. Ti r̃anhr̃aj han ag tóg tī, kurā kar ki, kuty ki ke gé, ti ěn krēm. Ũ t̃y ñgja s̃invī kri ñ ěn ṽy ag jy ñgān mū. ¹⁶ Ag pi(jé) kókri m̃an ke mū', ag pi(jé) og'og sór m̃an mū'. R̃a ṽy ag ki hup̃un m̃an ke tū ñi ha, ñén ũ gru ke gé, ¹⁷ cordeiro t̃y ag ki r̃ir k̃y, ũ t̃y ñgja s̃invī tá jē ěn ti. Ag tatī t̃ig jé tóg ke mū, goj ñih̃yg ja ra, goj t̃y ag r̃inr̃ir han mū ěn ra tóg ag tatī t̃ig ke mū. Topē ṽy ag kygf̃y t̃y t̃ug' hēnh ke mū,” he tóg inh m̃y, kófa ti, ũn e ěn ag to.

Jesus t̃y livro tógfī t̃y ěgno kaṽan

8 K̃y cordeiro ṽy livro tógfī t̃y ěgno kaṽag mū. Ti tógfī t̃y 7 (ke) tá kr̃yg h̃a ṽe. K̃y tóg katy' he mū, kanhkā tá, meia hora ki. ² K̃y sóg Topē t̃y jēgnē jafā t̃y 7 (ke) ag vég mū. Ag m̃y ag tóg trombeta t̃y 7 (ke) junjun mū. Topē ñgja s̃invī jo ag tóg ñtī.

³ K̃y Topē t̃y jēnē jafā ũ tóg tá jun mū gé, k̃y tóg ouro t̃y p̃énky ma k̃atī mū, ěg t̃y p̃énky ki Topē m̃y ti ger há p̃un jafā ěn ti. Ñgja s̃invī ěn to tóg jē mū, Topē t̃y jēnē jafā ti. K̃y ag tóg ti m̃y ka jēnjo ger há t̃y hēn ri ke jun mū, ti t̃y Topē m̃y p̃un jé, Topē ñgja to jēn k̃y. Ēprā ke t̃y Topē ki ge k̃y ñtī kar ag tóg Topē mré vēmén ti. Ag ṽi ja ěn mré tóg ti ger há ěn p̃un sór mū, Topē m̃y, Topē t̃y jēnē jafā ti. ⁴ K̃y tóg sir p̃un mū, Topē kato jēn k̃y. K̃y ti ger há ěn tóg kynhm̃y t̃apry mū sir, Topē tū ag t̃y ti mré vēmén ja ěn mré h̃a. ⁵ K̃y Topē t̃y jēnē jafā ěn tóg p̃énky ěn f̃an mū, pr̃anh gru t̃y. Topē m̃y ñén ũ kar p̃un jafā tá tóg pr̃anh gru ěn m̃ag mū, k̃y tóg p̃énky k̃akā ñim mū. K̃y tóg ga kri ti fón mū sir, p̃énky ti, pr̃anh gru t̃y k̃akā ñin k̃y. K̃y ta tóg kómkom ke k̃y

týrýr he mũ, jũ ký tóg mrārān ke mũ gé, ga kri. Ký ga tóg jürũn ke mũ gé sir.

Ag tý trombета kynkyn

⁶ Ký Topê tý jëgnê jafã tý 7 (ke) ên ag tóg vênh kãn mũ sir, ag tý trombета kynkyn jé. ⁷ Ký ùn tóg ã tũ kyn vén mũ. Ký nãfy tóg êprã ke ag kri vár mũ, pĩ mré hã, vênh kyvénh mré hã ke gé. Ký ka vênh kãpów tãgtũ ag kã ti vênh kãpów pĩr tóg kũpũr kãn mũ, ga vênh kãpów pĩr ke gé. Re vỹ pũr kãn pẽ han mũ sir.

⁸ Ký Topê tý jëgnê jafã tý 7 (ke) ên ag kã ù tóg trombета kyn mũ gé. Trombета régre tá krýg vẽ sir. Ký nén ù tóg goj kafã tũ ki kutê mũ, hã ra tóg tý pãnónh gru nĩ ve nĩ, pãnónh mág tãvĩ. Ký goj vênh kãpów tãgtũ ag kã ti vênh kãpów pĩr tóg vênh kyvénh ri ke nĩ ha. ⁹ Goj ga vênh kãpów tãgtũ ag kã ti vênh kãpów pĩr tóg kãgter kãn mũ gé. Goj kri mũ mũ ên, barco ên vênh kãpów tãgtũ ag kã ti vênh kãpów pĩr tóg tũ' he kãn mũ gé, pãnónh ên tugrĩn.

¹⁰ Ký Topê tý jëgnê jafã tý 7 (ke) ên ag kã ù tóg trombета kyn mũ gé. Trombета tãgtũ tá krýg vẽ sir. Ký krĩg mág pẽ tóg kanhkã tá kãtêre mũ, hã ra tóg gru nĩ, pĩ gru ên ri ke. Ký tóg êganê vênh kãpów tãgtũ ag kã ti vênh kãpów pĩr kri kutê mũ, goj nĩhỹg vênh kãpów tãgtũ ag kã ti vênh kãpów pĩr kri ke gé. ¹¹ Krĩg ên jyjyn hã vỹ: “Fa,” he mũ. Ký goj ên tóg fa nĩ sir. Ký êprã ke tý hên ri ke ag kãgter mũ, goj kórég ên kron ký.

¹² Ký Topê tý jëgnê jafã tý 7 (ke) ên ag kã ù tóg trombета kyn mũ gé. Trombета tý 4 (ke) tá krýg vẽ sir. Ký nén ù tóg rã kókég mũ, ký jëngrê tóg sĩ' he mũ ha, kysã jëngrê ti ke gé, krĩg kar jëngrê ti ke gé. Jëngrê vênh kãpów tãgtũ ag kã ùn pĩr tóg tũg' he mũ ha. Ký kurã tóg sĩ nỹ ha, jãvo kuty tóg kuty tãvĩ nỹ ha.

¹³ Ký sóg kónhkó mág vég mũ, ti tẽ tĩn ký, kynhmỹ. Ên vỹ jamã hár(a) prêr mũ. “!...Jagy ti tĩnh mũ, jagy ti tĩnh mũ, jagy

ti tĩnh mũ, êprã ke ag mỹ..! !..Topê tý jëgnê jafã tãgtũ ù ag vỹ ãjag tũ ti kynkyn ke mũ ha, ký tóg kórég tãvĩ nỹnh mũ ha, êprã ke ag mỹ..!” he tóg mũ, kónhkó mág ti.

9 Ký Topê tý jëgnê jafã tý 7 (ke) ên ag kã ù tóg trombета kyn mũ gé. Trombета tý 5 (ke) tá krýg vẽ sir. Ký sóg krĩg vég mũ. Kanhkã tá tóg kãtêre ja nĩ, êprã, krĩg ên ti. Ký ag tóg ti mỹ nũgme nón jafã fig mũ, chave ti, krĩg ên mỹ. ² Ký tóg róm mũ sir, nũgme ti, hã ra nĩja tóg tá tũmtũm ke mũ, nĩja tar pẽ. Ký rã tóg kuty' he mũ, nĩja ên to. Ga kri tóg kuty' he kãn mũ. ³ Nĩja ên kãtã tóg vãhã kãpa mũ, tý ópã tý hên ri ke nỹti ve ti, hã ra tóg pỹn kakrã tar ri ke nỹti, tý ópã nỹti ve ên ti. ⁴ Ti pi(jé) re ko tĩ', ti pi(jé) ka féj ko tĩ', ti pi(jé) êkré ko tĩ gé'. Ti tý êprã ke ag mỹ vênh kaga han kãtig vẽ. Êprã ke ù ag tóg tý Topê tý rágrã tũ nỹti, ag kakã ki. Ên ag mỹ vênh kaga han jé ag junjun mũ, tý ópã nỹti ve ên ag. ⁵ Ag pi(jé) êprã ke ag kãgtén mũ hã ra'. Kysã tý 5 (ke) ki ag tóg êprã ke ag mỹ vênh kaga nĩm mũ. Ag tý ag vóg ký tóg pỹn kakrã tý êg tugtãn ri ke nĩ, ti kaga ti. ⁶ Ký êprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tý 5 (ke) ên ki. Ag tý ter sór mũ ra ag tóg ter ke tũ pẽ nĩ.

⁷ Ópã ên tóg tý cavalo nỹti ve nĩ, cavalo tý vênh génh mũnh ke ri ke tóg nỹti. Ouro tý krĩ tógfĩ ag tóg nỹti. Ag kakã vỹ êg kakã ri ke nĩ. ⁸ Ag gãnh vỹ fag gãnh téj ri ke nĩ gé. Ag jã vỹ mĩg jã ri ke nĩ. ⁹ Ag fe fãr tóg ferro tý camisa ri ke nĩ. Ag fêr tý rãnhrãnh he tóg mẽ há tĩ, ký tóg cavalo tý hên ri ke tý carroça tý hên ri ke nỹgnỹn ri ke nĩ, ag tý vênh génh mũnh ken ký. ¹⁰ Ag my kã tóg nĩ, ag préj ti, pỹn kakrã préj ri ke ti. Ag my tý ag tóg êprã ke ag vóg kónãn tĩ, kysã tý 5 (ke) ki. ¹¹ Û tý nũgme ki rĩr tĩ ên, ù tý Topê tý jënê jafã ri ke nĩ ên vỹ tý ag pã'i mág nĩ, ópã ên ag pã'i mág. Hebreu ag vĩ ki ti jiji vỹ: Abadom, he mũ, ký tóg Grego ag vĩ ki:

Apoliã, he mû, hã vỹ: nén ù kar kókég tĩ, he mû, êg vĩ ki, hã vỹ: Apoliã, he mû.

¹²Nén jagy ve ve inh huri, sỹ nén jagy régre venh ke nê ha.

¹³Kỹ Topê tỹ jëgnê jafã tỹ 7 (ke) ên ag kã ù tóg trombata kyn mû gé. Trombata tỹ 6 (ke) tá krỹg vê sir. Kỹ sóg vênh vĩ mêng mû. Topê mỹ nén ù pũn jafã tỹ ouro tá tóg mê há ti, vênh vĩ ti. Mesa ên péno tỹ 4 (ke) ki, mesa tỹ Topê jo jê ên ki tóg mê há ti, vênh vĩ ti. ¹⁴Vênh vĩ ên tóg ù tỹ ùri kyn mû ên mỹ: “Topê tỹ jëgnê jafã tỹ 4 (ke) ên kygvãn tĩg,” he mû. “Ù tỹ goj mág tỹ Eufates tá sigse kỹ nỹti ên ag kygvãn tĩg,” he tóg. ¹⁵Kỹ tóg ag kygvãn ti mû, ù tỹ 4 (ke) ên ag. Tá ag tóg jãvãn nỹti ja nĩgtĩ, ag tỹ êprã ke tỹ hên ri ke ag kãgtén jé. Topê vỹ ag mỹ ag tỹ prỹg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mû ên nĩm ja nĩ. Êprã ke vênh kãpóv tãgtũ ag kã ùn pir ag kãgtén kãn jé ag tóg ke mû, Topê tỹ jëgnê jafã tỹ 4 (ke) ên ag. ¹⁶Ag krêm soldado ag número mê inh, ù tỹ cavalo kri mũgtĩ ag. 200 mil (ke) ag nỹti, ag krêm soldado ag. ¹⁷Kỹ sóg ag vég mû, soldado tỹ cavalo kri mû mû ag. Ferro tỹ camisa ag nỹti, kỹ ù ag tóg kusũg nỹti, pĩ kusũg ri ke, ù ag tóg tánh nỹti, pó tỹ safir tánh ri ke, ù ag tóg māréro nỹti, pó tỹ enxofre māréro ri ke. Cavalo krĩ vỹ mĩg krĩ ri ke nỹti. Ag jênkã tá pĩ gru tóg kãkutê mû, nĩa ke gé, pó tỹ enxofre nĩa ke gé, vãn pũr nĩa ri ke ên ti. ¹⁸Tag tỹ ag tóg êprã ke ag kãgtén ke mû, pĩ tỹ, nĩa tỹ, pó tỹ enxofre nĩa tỹ ke gé, cavalo ag. ¹⁹Nén tỹ cavalo jênkã tá kãkutê mû ên vỹ êprã ke ag kãgtén ke mû, kỹ ag my vỹ ag kãgtén ke mû gé. Ag my vỹ tỹ pỹn hã ve nĩ, pỹn krĩ. Ên tỹ ag tóg êprã ke ag kókén ke mû gé, ag my tỹ.

²⁰Êprã ke ù ag tóg hã ra krenkren ke mû ver. Ag kãgtén kãn ke tũ ag tóg nĩ ver. Kỹ ùn krenkren mû ag pi(jé) Nén-Kórég ag tovãnh mû', vênh kãggrã tovãnh tũ ag nỹti, ouro tỹ vênh kãggrã

ên, prata tỹ vênh kãggrã ên, ferro kusũg tỹ vênh kãggrã ên, pó tỹ vênh kãggrã ên, ka tỹ vênh kãggrã ên ke gé. Ver ag tóg tag kar to: “Topê vỹ tỹ ti nĩ,” he tĩ gé. Ag tỹ vêsóg ki vênh kãggrã hyn han mû ra tóg ag mỹ tỹ Topê nĩ ve nĩ, ti kanê tũ ra, ti nĩgrêg nor tũ ra, ti tỹ ã pên tỹ tĩg vãn (hã) ra. ²¹Ag pi(jé) ag jykre tovãnh sór mû', êprã ke krenkren mû ên ag. Jagnê kãgtén ag tóg mũgtĩ, kujã jykre han ag tóg mũgtĩ, curandeiro jykre ên ti. Ājag prũ tũ fag mré ag tóg nỹgnỹ mũgtĩ, ājag mén tũ ag mré fag tóg nỹgnỹ mũgtĩ gé, jagnê tỹ nén ù pigju(g) ag tóg mũgtĩ gé, êprã ke ag.

Livro sĩ

10 Kỹ sóg Topê tỹ jênê jafã tar ù vég mû. Kanhkã tá tóg kãtére mû, êprã. Kanhkã góg vỹ ti kri rũm kỹ nỹ nĩ. Ti krĩ kri ta no tóg vênh ven mû. Ti kakã vỹ rã ri ke nĩ, ti fa vỹ pĩ gru ri ke nỹti, ti fa jëngrê ti. ²Livro sĩ mãn kỹ tóg jê nĩ, livro tỹ jén ke kỹ tóg ma jê nĩ. Ā pëgja tỹ tóg goj kafã tũ sãn mû, kỹ tóg ã jakãnh tỹ ga sãn mû. ³Prêr tóg mû sir, jamã hár(a), kỹ tóg tỹ mĩg kyr mê tĩ, ti prêr ti. Kỹ ta tỹ tỹrỹr he tỹ 7 (ke) vỹ ti vĩ kafãn mû, jamã hár(a). ⁴Kỹ sóg ta tỹ tỹrỹr he mû vĩ ên rãn sór mû. Hã ra ù tỹ kanhkã tá vĩ mû tó inh mỹ: “rãn tũg nĩ,” he mû. “Ta tỹ tỹrỹr he mû ên vĩ tó sór tũg nĩ, ù mỹ,” he tóg.

⁵Kỹ Topê tỹ jênê jafã ên, ù tỹ goj mré ga kri jê mû ên tóg ã nĩgê tỹ kanhkã ki ven mû, ã pëgja tỹ. ⁶Kỹ tóg: “sỹ ki hã tónh ke vê,” he mû. “Topê vỹ ki kanhró nĩ, sỹ ki hã tó mũn ki,” he tóg. “Ũn rĩr nĩ ên vỹ ki kanhró nĩ, ùn ter vãn (hã) ên vỹ ki kanhró nĩ, ù tỹ kanhkã han mû ên vỹ ki kanhró nĩ, ù tỹ ga han mû ên ti, ù tỹ goj han mû ên ti, ù tỹ ùn rĩnrĩr nỹti kar ag hyn han mû ên ti. Ên hã vỹ isỹ ki hã tó mû ki kanhró nĩ,” he tóg. “Hã vé, ã tỹ nén han ke mû ên tovãnh mãn ke tũ ti nĩ ha, Topê ti. ⁷Ti tỹ jëgnê jafã tỹ 7 (ke) ên

ag kã ù vỹ trombeta kyn ke mũ, kỹ tóg ù tỹ 7 (ke) tá krỹg ke mũ. Ti tỹ kyn kỹ Topẽ vỹ ã tỹ nén han sór mũ ên han ke mũ ha, ã tỹ vãsỹ to jykrén mũ ên ti. Hã tó ja ti nĩ, ti rãnhraj han ti ag mỹ, ti vĩ tó ti ag mỹ ke gé, Topẽ ti,” he tóg, Topẽ tỹ jẽnẽ jafã ti.

⁸ Kỹ kanhkã tá ke ù tóg inh mré vémén măn mũ. Inh mỹ tóg: “ha tig,” he mũ. “Livro sĩ tỹ jén ke kỹ nĩ ên măn tig,” he tóg. “Ủ tỹ goj mré ga sãn kỹ jẽ ên ki livro măn tig,” he tóg, kanhkã tá ke ên ti. ⁹ Kỹ sóg ti ra ti mũ, kỹ sóg ti mỹ livro to vĩ mũ. Kỹ tóg inh mỹ: “té, ko ra,” he mũ. “Mỹ ri ke ti nĩ, ã tỹn kon kỹ. Ko kar kỹ tóg hã ra fa nĩnh mũ, ha vemnĩ,” he tóg. ¹⁰ Kỹ sóg livro sĩ ên măn kỹ ko mũ. Kỹ tóg mỹ ri ke nĩ. Isỹn ko kar kỹ tóg fa nĩ sir.

¹¹ Kỹ ù tóg inh mỹ: “Topẽ tỹ nén hyn han ke mũ tó măn jé ã tóg ke mũ,” he mũ. “Ti tỹ povo kar ag tỹ nén hyn han ke mũ tó jé ã tóg ke mũ, ti tỹ nação kar ag tỹ nén hyn han ke mũ ên ti, ti tỹ pã'i krêm ke kar ag tỹ nén hyn han ke mũ ên ti, ti tỹ pã'i kar ag tỹ nén hyn han ke mũ ên ti ke gé,” he tóg, vênh vĩ ti.

Ủ tỹ Topẽ vĩ tó ti ag

11 Kỹ ag tóg inh mỹ vãn jun mũ, vãn tỹ nén ù kãmũn jafã ti. Kỹ ù tóg inh mỹ: “tág,” he mũ. “Topẽ jo ìn kãmũn nĩ, Topẽ mỹ nén ù pũn jafã mré hã. Ủ tỹ krêm Topẽ mré vémén kỹ nỹtĩ ên ag nĩgkrén nĩ gé. ² Topẽ jo ìn vãsõ ên kãmũn tũg nĩ hã ra. Fóg ag tũ vẽ, kỹ kãmũn tũg nĩ. Kysã tỹ 42 (ke) ki fóg ag tóg cidade ên kókén ke mũ, Topẽ tỹ cidade ù to: isũ vẽ, he mũ ên ti. ³ Ủ tỹ inh vĩ tó ti régre ag jẽgnẽ jé sóg ke mũ. Ëg tỹ nén ù tỹ ãg mỹ e nĩn kỹ kur kórég rĩg tĩ ên rĩnh jé ag tóg ke mũ, saco ên, ùn régre ên ag. Isỹ ag mỹ nén tónh ke mũ ên tó jé ag tóg ke mũ, kurã tỹ 1260 (ke) ên ki,” he tóg inh mỹ, ag kãmĩ ù ti.

⁴ Topẽ vĩ tó ti régre ên ag vỹ Topẽ vĩ to tar nỹtĩ, ka tỹ oliveira tar nĩ ên ri ke ag nỹtĩ. Topẽ vĩ tó ag tóg tĩ, kỹ ag tóg néj gru ri ke nỹtĩ, néj tỹ kri fẽg jafã ên kri nỹtĩn kỹ. Ủ tỹ ãprã ke ag kri ke ên rã hã ti nỹtĩ, vela tỹ kri fẽg jafã régre ên ag. Tag ri ke ag nỹtĩ, Topẽ vĩ tó ti régre ên ag. ⁵ Ủ tỹ ag kato vãsãn kỹ ag tóg pĩ tỹ ag jẽnkã tá kãkutẽ mũ ên tỹ ag tỹ tũ' he tĩ, ù tỹ ag kato vãsãnsãn mũ ag tỹ. Hã kỹ ag kãgter kãn' he tĩ, ù tỹ ag vóg kónãn sór mũ ag. ⁶ Ag tỹ Topẽ vĩ tón kỹ ag tóg ag tỹ ta kutẽ kamẽg sór kỹ ti kutẽ kamẽg tĩ, kỹ tóg kutẽ tũ nĩgtĩ. Kỹ, ag tỹ goj tỹ vênh kyvênh ri ke han sór kỹ ag tóg tỹ vênh kyvênh ri ke han tĩ gé. Ag tỹ ga kri ke ag vóg kónãn sór kỹ ag tóg ag vóg kónãn tĩ gé. Nén ù jagy tỹ hẽn ri ke han ag tóg tĩ, Topẽ vĩ tó ti régre ên ag.

⁷ Kejẽn ag tóg kãmén kãn mũ sir, Topẽ tỹ ag mỹ nén tó mũ ên ti. Kỹ nũgme tá mĩg tóg kãkutẽ mũ, kỹ tóg ag to rá ke mũ. Ag tỹ hẽ nỹ ri ken kỹ tóg ag kãgtén mũ, mĩg ên ti. ⁸ Ajag kãgter kỹ ag tóg cidade kuju tá vár kỹ nỹtĩ nĩ, ãg Senhor tỹ cidade tá ka to sa ja ên tá. Cidade ên tá ke ag jykre tóg cidade tỹ Sodoma tá ke ag jykre ri ke nĩ, ga tỹ Egito tá ke ag jykre ri ke ti nĩ gé. ⁹ Kurã tãgtũ mré kurã kuju ki ag tóg vësẽr ên vigvẽg mũ. Vênh kar ag vỹ ag vigvẽg mũ, povo kar ag, pã'i krêm ke kar ag, vênh vĩ kar tó ti ag kar ke gé. Ag pi(jé) ga krêm ag pigjunh ke mũ', vësẽr ên ag. ¹⁰ Ëprã ke kar ag mỹ tóg sér tĩ, ag kãgter ti. Festa mág han ag tóg mũ. Jagnẽ mỹ ag tóg presente jẽgnẽg mũ. Topẽ vĩ tó ti tag ag vỹ ãprã ke ag vóg kónãn jagy han ja nĩgtĩ, hã kỹ ag kãgter tóg vênh kar mỹ sér gy tĩ sir.

¹¹ Kurã tãgtũ kri kurã kuju tũg kỹ Topẽ tóg hã ra ag rĩn măn mũ sir, ti kuprĩg tỹ. Kỹ vênh kar ag tóg jũrũn ke pẽ han mũ sir. ¹² Kỹ kanhkã tá vênh vĩ tóg ag mỹ mẽ há tĩ, Topẽ vĩ tó ti régre tag ag mỹ. Kỹ tóg ag mỹ: “kunĩg,” he mũ. Kỹ ag kato vãsãnsãn mũ ag vỹ ag tỹ kanhkã ra jãpry

vég mû sir, kanhkã góg kãmĩ. ¹³Kỹ ga tóg jürün ke mû sir. Cidade tá in kókég tóg mû, ga tỹ jürün ke ti. In vênh kápöv tỹ 10 (ke) ag kã ün pir kókén kân tóg mû. Êprä ke tỹ mĩl tỹ 7 (ke) vỹ kãgter mû, ên kã. Ün kãgter tũ ag kanẽ tóg jur mû. Ag mûmëg vỹ ag kãgtén kren mû. Kĩ ag tóg Topẽ to: “ün mág vỹ tỹ ti nĩ,” he mû vâhã. “Tar ti nĩ, ù tỹ kanhkã tân ag kri nĩ ên ti,” he ag tóg mû vâhã.

¹⁴Nén jagy ù vỹ hur tũ' hé. Nén jagy ù tóg ver kã nĩ nĩ.

Trombeta tỹ êgno kyr

¹⁵Kỹ Topẽ tỹ jëgnẽ jafã tỹ 7 (ke) ên ag kã ù tóg trombeta kyn mû gé sir. Trombeta tỹ 7 (ke) tá krỹg vë. Kĩ kanhkã tá vênh vỹ tỹ hên ri ke tóg mẽ há nỹtĩ. “Vâhã tóg êprä ke kar ag kri tỹ ün mág jẽ, Topẽ ti, êg Senhor ti ke gé,” he ag tóg, ù tỹ kanhkã tá vỹ mû ag. “Vâhã ag tóg nén ù kar ki rĩr nỹtĩ ha, Topẽ ti, ã kósín mré, kỹ tóg tũ' henh ke tũ nĩ, ag rãnrhãj ti,” he ag tóg, ù tỹ kanhkã tá vỹ mû ag.

¹⁶Kỹ kófa tỹ 24 (ke) ên ag, ù tỹ Topẽ mré ajag nĩgja kri nĩgnĩ kỹ nỹtĩ ên ag vỹ ti krêm mûgmüg ke kân mû. Kĩ ag tóg Topẽ mỹ: “Topẽ vỹ tỹ ã nĩ,” he mû sir. ¹⁷Jân ag tóg mû gé sir, ha mẽ. “Topẽ, pã'i mág, nén ù kar han há ã tóg nĩ,” he ag tóg mû, jân kỹ. “Vãsỹ ã tóg nĩ nĩ, kỹ ã tóg ùri nĩ nĩ gé. Êg mỹ tóg sér ti, ã tỹ tỹ pã'i mág nĩn kỹ, ã tỹ vênh kar ki rĩr kỹ tóg sér pẽ tĩ. Á tar nĩ kỹ ã tóg pã'i ù ag pan kân. ¹⁸Ag to jũ jẽ ã tóg ke mû ha. Ün kãgter ja ag jykre tugnỹm kân jẽ ã tóg ke mû ha. Povo kar vỹ ã kato vãsãnsãn ja nĩgtĩ, kỹ ã tóg ag kato vãsãn mû ha. Á kurã vỹ hur jun, kỹ ã tóg ã rãnrhãj han tĩ ag mỹ ag rãnrhãj kaja ti ven ke mû, ã vỹ tó tĩ ag mỹ ke gé, ã tũ kar ag mỹ, ün mág ag mỹ, ün kãsir ag mỹ, ù tỹ ã kamëg nỹtĩ kar ag mỹ ã tóg ag rãnrhãj kaja ven ke mû ha. Á kurã vỹ hur jun, kỹ ã tóg ù tỹ êprä ke ag kókén ja ên ag kókén kân

ke mû ha,” he ag tóg mû, kófa tỹ 24 (ke) ên ag.

¹⁹Kỹ ù tóg Topẽ jo in nón mû, in tỹ kanhkã tá jẽ ên. Kỹ Topẽ jo in jãnkã róm kỹ jẽ kỹ Topẽ caixa ên tóg ve há' he kỹ nỹ nĩ, Topẽ tỹ ã tũ ag mré jykrén kỹ ag mỹ caixa fig mû ên ri ke ti. Kỹ ta tóg kómkóm ke mû, tỹrỹr he ke gé. Ga vỹ ragra ke jagy han mû sir, kỹ nãfy vỹ vár mû gé sir, nãfy mág.

Mĩg fër kãme

12 Kĩ kanhkã tá nén ù vênh mỹ tóg vênh ven mû. Ün týtã fi vỹ tóg vênh ven mû. Kỹ rã tóg fi mỹ tỹ fi kur nĩ. Kysã sãn kỹ fi tóg jẽ nĩ. Fi krĩ tógfi vỹ krĩg tỹ há nĩ, krĩg tỹ 12 (ke) tỹ. ²Kufy fi tóg jẽ nĩ, hã ra fi tóg kaga mû, kỹ fi tóg jagtar nĩ sir.

³Kỹ kanhkã tá nén ù ù tóg vênh ven mû gé. Mĩg fër kusüg tóg vênh ven mû. Á pir ra tóg krĩ tỹ 7 (ke) nĩ, nĩka tỹ 10 (ke) ti nĩ gé. Ti krĩ tógfi tóg nỹtĩ, ti krĩ tỹ 7 (ke) to. ⁴Á mỹ tỹ tóg krĩg tỹ hên ri ke kókég mû, kỹ tóg êprä vár mû, krĩg tỹ hên ri ke ti. Krĩg vênh kápöv tãgtũ ag kã ün pir kókén kân tóg mû. Kỹ tóg ün týtã ên fi jo tá jẽ nĩ, fi kósín tỹ mur ken kỹ, mĩg fër kusüg ên ti. Ti tỹ fi kósín mãn sór vë, ti mur kỹ. ⁵Kỹ tóg mur mû sir, fi kósín ti, hã ra tóg gré nỹ. Tỹ tóg pã'i mág pẽ jênh ke mû, êprä ke kar kri. Ag kri jên kỹ tóg ag mỹ vỹ tar gy han ke mû. Ti mur kỹ ag tóg kanhkã ra ti va mû mû, Topẽ nĩgja sinvĩ ên ra, mĩg fër jo. ⁶Kỹ ün týtã ên fi tóg ga kórég ra vênhvãg tĩ mû, mĩg fër jo vênh pēju kỹ. Tá Topẽ tóg fi mỹ fi tỹ ki vênh pėjunh ke han ja nĩ. Tá ù tóg fi mỹ vëjên vin tĩ, kurã tỹ 1260 (ke) ki.

⁷Kỹ kanhkã tá vênh génh tóg kutẽ mû. Topẽ tỹ jëgnẽ jafã ag to pã'i mág tỹ Miguel vỹ mĩg fër ên kato vãsãn mû, ã krêm ke ag mré. Kỹ mĩg fër ên tóg ã krêm ke ag mré Miguel to rárã mû gé sir. ⁸Hã ra ag tóg ti tỹ hên ri ke mû sir, kanhkã tá ke ag, mĩg fër ên ti tỹ. Kỹ ag tóg kanhkã

tá ti kutēm mū, ti mré ke kar ag mré hã. ⁹Mĩg fēr ěn kutēm ag tóg mū sir. Pŷn ve tŷ ũn ve fag krĭn kónãn ěn hã vĕ, Japon hã vĕ, Satanás hã vĕ, ěprã ke ag tŷ Topĕ kato vãsãnsãn han mū ěn hã vĕ, hã vŷ: mĩg fēr, he mū. Ag tŷ kanhkã tá ti kutēm kŷ ag tóg ga kri ti fón mū sir, ti krĕm ke kar ag mré hã. Kŷ ag tóg ga kri mŭgtĭ ha, Japo ag.

¹⁰Kŷ sóg kanhkã tá vĕnh vĭ ũ mĕg mū gé. Jamã hár(a) tóg vĭ mū, kŷ tóg: “tág,” he mū. “Ěg krenkren han tóg huri, Topĕ ti. Vãhã vĕnh kar tóg vé, Topĕ tŷ tŷ ũn mág pĕ nĭ ti. Vãhã Cristo tóg vĕnh kar mŷ ã tŷ tŷ ũn tar nĭ ěn ven huri. Ag tŷ ũn kutēm mū ěn tóg ěg mré ke ag kato vĭ kónãn ja nĭgtĭ, Topĕ mŷ, kurã ki, kuty tá ke gé. Hã ra tóg kutēm kŷ jĕ ha. ¹¹Ěg mré ke ag vŷ ti tŷ hĕn ri ke ja nĭgtĭ, cordeiro kyvĕnh ěn tugrĭn, vĕnh vĭ há ěn tugrĭn, ag tŷ vĕnh kar mŷ Topĕ vĭ tó tĭ ěn tugrĭn. Ag kã ũ kãgtĕn ja ag tóg nĭgtĭ, hã ra tóg ag mŷ tŷ nĕn ũ tũ nĭ ja nĭgtĭ, ag tŷ Jesus tugrĭn ag kãgtĕn mū ra. Hã kŷ ag tóg Japo tŷ hĕn ri ke ja nĭ. ¹²Ti kutēm kŷ jĕn kŷ tóg kanhkã tãn kar mŷ sér tĭ ha. Hã ra tóg ga kri mū ag mŷ jagy tĭnh mū, goj kri mū ag mŷ ke gé. Japo vŷ ag mré jĕ ha, ga kri, ag tŷ kanhkã tá ti kutēm kŷ. Kŷ tóg jũ jagy han kŷ kãnĕ tĭ. Ti kurã vŷ kakó nĭ ha. Tag tugrĭn tóg jũ jagy han kŷ kãnĕ tĭ nĭ, Japo ti,” he tóg, ũ tŷ kanhkã tá vĭ mū ti.

¹³Kŷ mĩg fēr ěn tóg ěprã jĕ mū. Kŷ tóg ũn tŷtã ěn fi vóg kónãn sór mū, ũ tŷ gĭr vég mū ěn fi. ¹⁴Kŷ ag tóg fi mŷ fēr mág junjun mū, kónhkó mág fēr ěn ri ke. Kŷ fi tóg tŷ ga kórég ěn ra tĕ tĭ mū. Tá fi tóg vĕnh péju kŷ nĭ nĭ, prŷg tăgtũ kri prŷg kuju ki. Kŷ pŷn kórég ěn tóg tá fi vóg tũ nĭ ha, fi vĕnh péju ja tá. ¹⁵Kŷ tóg goj var ri ke han mū, pŷn ti. Ti jĕnkã tá tóg kãkutĕ mū, goj var ti. Ti tŷ ũn tŷtã ěn fi nãr han sór vĕ. ¹⁶Hã ra ga tóg fi mŷ goj ěn tŷ gym ke mū, goj tŷ mĩg fēr jĕnkã tá kãkutĕ mū ěn tŷ, kŷ fi tóg ga tugrĭn kren

mū sir. ¹⁷Kŷ mĩg fēr tóg jũ kŷ tĭ mū, ũn tŷtã ěn fi tovãnh kŷ. Kŷ tóg fi krĕ kato vãsãn jĕ tĭ mū gé, hã vŷ: ũ tŷ Topĕ vĭ ki króm mū ag, he mū, fi krĕ ag, hã vŷ: ũ tŷ Jesus to krónh ke tũ ag, he mū, ũn tŷtã ěn fi krĕ ag.

¹⁸Kŷ mĩg fēr ěn tóg goj fyr ra tĭ mū.

Mĩg régre ag kãme

13 Kŷ mĩg ũ tóg goj mág kãtã kãkutĕ mū. Ā pir ra tóg krĭ tŷ 7 (ke) nĭ, nĭka tŷ 10 (ke) ti nĭ gé. Ti krĭ tógfĭ tóg ti nĭka kri nŷtĭ, kŷ ti jygji tóg ti krĭ kri ránrán kŷ nŷtĭ, ti tŷ tŷ pã'i mág nĭn kŷ, goj kãtã mĩg ěn ti. Hã ra Topĕ to vĭ kónãn vĕ sir, ti kri to ránrán kŷ nŷtĭ ěn ti. ²Goj kãtã mĩg ěn tóg mĩg rá ri ke nĭ. Ti pĕn tóg urso pĕn ri ke nŷtĭ. Ti jĕnky tóg mĩg kusŷg jĕnky ri ke nĭ. Kŷ mĩg fēr ěn tóg goj kãtã mĩg tŷ pã'i mág pĕ han mū, ti tŷ ag nĭgja kri nĭ jĕ, ti tŷ ã jykre tar ěn han jĕ ke gé, mĩg fēr jykre ěn ti. ³Ti krĭ ũ fŷnh ja ag tóg nĭ, kŷ tóg ter kren, hã ra tóg há' he mãn, goj kãtã mĩg ěn ti. Ěprã ke kar ag vŷ ti vég mū, kŷ tóg ag mŷ e kar tĭ. Ti vĭ kri fig ag tóg mū. ⁴Mĩg fēr ěn to ag tóg: “Topĕ vĕ,” he tĭ, ěprã ke kar ag, ti jykre tar tugrĭn, ti tŷ goj kãtã mĩg ěn tar han ja tugrĭn. Goj kãtã mĩg ěn to ag tóg: “Topĕ vĕ,” he tĭ gé. “Ũ tóg ti ri ke tũ pĕ nĭgtĭ,” he ag tóg tĭ. “Ũ tóg ti tar kãfór tũ nĭ,” he ag tóg tĭ gé, ěprã ke ag, mĩg ěn to.

⁵Goj kãtã mĩg ěn vŷ vĭ vĕnhmŷ han jĕ nĭ. Ā vĭ tŷ tóg Topĕ kato vãsãn mū. Kysã tŷ 42 (ke) ki tóg tar jĕ nĭ, vĕnh kar kri. ⁶Kŷ tóg Topĕ to vĭ kónãn mū, Topĕ jyjy to ke gé, ti jo ĩn to ke gé, kanhkã tãn kar ag to tóg vĭ kónãn mū gé. ⁷Kŷ tóg Topĕ tŷ ũn kuprĕg mū ag kãgtĕn to vãsãn mū gé, kŷ tóg ag tŷ hĕn ri ke mū gé sir, goj tãn tŷ mĩg ěn ti. Hã ra Topĕ tóg ver ti to fen nĭ. Kŷ povo kar ag, nação kar ag, pã'i krĕm ke kar ag, ũ tŷ vyr mŷ vĭ nŷtĭ ěn ag kar vŷ mĩg ěn vĭ hã jĕmĕg mū. ⁸Ěprã ke kar ag vŷ ti to: “Topĕ vĕ,” he' he tĭ. Ag

jávo ũ ag jyggi tóg ránrán kŷ nŷtī, Topē livron ki. Ũ tŷ rŷr krŷg ja tũ venh ke mũ ěn ag vŷ ki ránrán kŷ nŷtī. Topē tŷ nén ũ kar han ke to hã tóg ag jyggi ránrán ja nŷgtī, livro ěn ki. Cordeiro tŷ ag jagfy ter ja ěn tũ vĕ, livro ěn ti. Ũ tŷ ki ránrán kŷ nŷtī ag vŷ mŷg ěn jykre han tũ nŷgtī.

⁹ Ũn nŷgrĕg nŷtī ag tŷ tŷ jĕmĕ jĕ.

¹⁰ Topē tŷ ă ki ge kŷ nŷtī ũ ag to: “nŷgĕnh kŷ ag nŷtŷnh mũ, isugrŷn,” hen kŷ ag tóg nŷgĕnh kŷ nŷtŷnh mũ, cadeia ki. Ti tŷ ag to: “rógro tŷ ag tóg ag kăgtĕn ke mũ,” hen kŷ ag tóg rógro tŷ ag kăgtĕn ke mũ sir. Ũ tŷ Topē mŷ vĕnh vin mũ ěn ag jĕ to krónh ke tũg, ag jĕ Topē tovănh tũg.

¹¹ Kŷ sóg mŷg ũ vĕg mũ gé. Ga kătá tóg kăkutĕ mũ. Nŷka régre ti nŷ, cordeiro nŷka ri ke. Ti vŷ tóg hã ra mŷg fĕr ěn vŷ ri ke nŷ. ¹² Goj kătá mŷg ěn rŷnve tóg ă tŷ han mũ kar hyn han tŷ, ă jykre tar ěn ti, ga kătá mŷg ti. Kŷ tóg ěpră ke kar ag to văsăn mũ, ag tŷ goj kătá mŷg ěn to: “Topē vĕ,” he jĕ, ũn ter kren mũ ěn to.

¹³ Ga kătá mŷg tag vŷ nén ve vănh tŷ hĕn ri ke hyn han mũ. Pŷ tŷ kănhkă tá kătĕre han tóg tŷ, ěpră ke kar ag rŷnve. ¹⁴ Ti tŷ ěg tŷ nén han vănh tŷ hĕn ri ke hyn han kŷ tóg ěpră ke kar mŷ ón mũ, ag tŷ ti kamĕg jĕ. Goj kătá mŷg ěn rŷnve tóg milagre tŷ hĕn ri ke hyn han mũ. Kŷ tóg ěpră ke ag mŷ ke mũ, ag tŷ goj kătá mŷg kăggră han jĕ. Ag tŷ mŷg ěn fŷnh mũ ra tóg ter ja tũ nŷ, hã kŷ tóg vĕnh kar mŷ: “ha ti kăggran,” he mũ, ga kătá mŷg ěn ti. ¹⁵ Kŷ tóg goj kătá mŷg kăggră ki hu he mũ, kŷ tóg rŷr mũ, ti kăggră ti, kŷ tóg vŷ mũ gé. Kŷ tóg ũ tŷ ti to: “Topē vĕ,” he jăvănh ěn ag kăgtĕn kăn mũ sir, ti kăggră rŷr jĕ ěn ti. ¹⁶ Ga kătá mŷg ěn tóg tŷ ěpră ke kar ag kri ke nŷ, ũn mág ag kri, ũn kăsir ag kri ke gé, ũn rico ag kri ke gé, ũn jagăgtar ag kri ke gé, ũ tŷ tŷ camarada nŷtī ag kri ke gé, ag patrăo ag kri ke gé. Kŷ tóg ag kar to văsăn mũ, ag tŷ ăjag pĕgja tá ăjag nŷgĕ pănŷ ki ti jiji răn-

răn jĕ, ke tũ nŷ kŷ ti nũmero ti. ăjag kakă ki ag tóg ti jygy ránrán mũ gé. ¹⁷ Ũ tŷ gen kŷ ránrán kŷ nŷtī ag hã tóg nén ũ comprar he tŷ, nén ũ vender he tŷ gé inhă. Ũn rá tũ ag vŷ nén ũ comprar he măn ke tũ nŷtī ha. Vĕnh rá tag vŷ tŷ ga kătá mŷg ěn jygy nŷ, ke tũ nŷn kŷ ti nũmero ti. Ti nũmero vŷ ti jiji tó tŷ gé.

¹⁸ Ũn krŷ há ag hã tóg ti nũmero to jykren há han ke mũ. Ũn krŷ tũ ěn ag pi(jĕ) to jykren ke mũ, ti nũmero to. ěpră ke jygy vĕ, ti nũmero ti, hã vŷ: 666, he mũ.

Ũn krenkren kŷ nŷtī ag jăn

14 Kŷ sóg ki ěvănh kŷ cordeiro ěn ve măn mũ. Pănónh kri tóg jĕ nŷ, pănónh tŷ Siăo he mũ ěn kri, cordeiro ěn ti. Ũn e ag tóg ti mrĕ tá nŷtī, ũ tŷ 144 mil (ke) ag. Cordeiro ěn jygy tóg ag kakă ki rán kŷ nŷ, ũ tŷ ti mrĕ tá nŷtī ag kakă ki. Cordeiro ěn jóg jiji vŷ ag ki rán kŷ nŷ gé. ² Kŷ sóg kănhkă tá nén ũ mĕg mũ. Tŷ tóg sa krog mĕ tŷ, tŷ tóg ta tŷ tŷrŷr he ri ke tŷ gé. Kŷ tóg tŷ ag tŷ văkyn jăfă tŷ harpa kyn ěn ri ke tŷ gé, ti kyr ti. ³ Vĕjăn tăg tó ag tóg mũ gé, nén nĕ tŷ 4 (ke) ěn ag rŷnve, kófa ag rŷnve ke gé, nŷgja sŷnvŷ ěn tá. Ũ tŷ 144 mil (ke) ag vŷ Topē jĕ tăg tag tó há nŷtī, ěn ag tăvŷ. ěpră ke ja ag vĕ, hã ra ag tóg krenkren kŷ nŷtī, ũ tŷ ti jăn tăg tó mũ ěn ag. ⁴ Jănhkri ag nŷtī. Ag pi(jĕ) fag vóg ja nŷgtŷ, cordeiro mrĕ mũ ja ag tóg nŷgtŷ, ag tŷ tŷ ěpră ke ra. ěpră ke ag kămŷ tóg ag kygĵăm ja nŷ, cordeiro ti. Kŷ ag tóg tŷ Topē tũ nŷtī, cordeiro tũ ke gé. Ag mŷ ag tóg há pĕ nŷtī. ⁵ Ag pi(jĕ) ũ mŷ ón ja nŷgtŷ. Kygnĕ ja tũ pĕ ag tóg nŷgtŷ.

Topē tŷ jĕnĕ jăfă tăgtũ ag

⁶ Kŷ sóg Topē tŷ jĕnĕ jăfă ũ vĕg mũ gé. Kănhkă krĕm tóg tĕ tŷ mũ. Kŷ tóg Topē vŷ ma kătŷ mũ, Topē vŷ ěn vŷ tũg' hĕnh ke tũ nŷ. Ti tŷ ěpră ke kar ag mŷ Topē vŷ tónh ke vĕ, nação kar ag mŷ, povo kar

mỹ ke gé, pā'i krēm ke kar ag mỹ, vyr mỹ vī nýtī kar ag mỹ ke gé. ⁷ Kĩ tóg prēr mū sir. “Topē hā kamēg nī, ti hā to: ũn mág vỹ tỹ ti nī, hemnī,” he tóg, Topē tỹ jēnē jafā ěn ti. “Ti kurā vỹ hur jun. Ěprā ke ag jykre tugnỹm jé tóg ke mū ha. Ũ tỹ kanhkā han mū mỹ: “Topē vỹ tỹ ā nī,” hemnī, ũ tỹ ga han mū ěn mỹ, ũ tỹ goj han mū ěn mỹ, goj nĩhỹg mré hā. Ěn hā mỹ: “Topē vỹ tỹ ā nī,” hemnī,” he tóg, Topē tỹ jēnē jafā ěn ti.

⁸ Ti nón Topē tỹ jēnē jafā ũ tóg jun mū gé, kĩ tóg: “kókén kĩ tóg nỹ nī,” he mū. “Cidade tỹ Babilônia vỹ kókén kĩ nỹ ha,” he tóg. “Ěprā ke kar to tóg vāsān ja nī, Babilônia to pā'i ti, ag tỹ ti mré ājag prũ tũ fag mré nỹgnỹ jé, fag tỹ ti ri ke ājag mén tũ ag mré nỹgnỹ jé, kĩ tóg vēnh kar tỹ ti mré vinho fa pē kron ri ke nī,” he tóg, Topē tỹ jēnē jafā ũ ěn ti.

⁹ Kĩ Topē tỹ jēnē jafā ũ tóg ag nón kātī mū gé. Ěn vỹ prēr kĩ: “!..ěprā ke ũ ag tóg mĩg to: topē vē, he ja nĩgte..!” he mū, prēr kĩ. “!..Ti kăgrá to ag tóg: topē vē, he ja nĩgte..! Ājag kakā ki ag tóg ti rá han ja nĩgte..! Ag nĩgé pānī ki ag tóg ránrán kĩ nýtī gé..!” ¹⁰ Ěn ag vỹ Topē tỹ ag to jũ jagy han venh ke mū ha..! Kĩ tóg ag tỹ vinho kron ri ke nỹ nī ha..! Topē vỹ jũ jagy han kĩ jē ha..! Kĩ ti tỹ ag to jũnh ke tóg kar kĩ nỹ ha..! Kĩ tóg ěg tỹ vinho tỹ copo fān kĩ fēg ěn ri ke nī ha..! ti tỹ ag to jũnh ke ti..! Topē tỹ vēnh kăn kĩ jē to ken hā vē..! Ũ tỹ mĩg to: topē vē, he ja ěn ag vỹ jagăgtar mág venh ke mū ha..! cordeiro rĩnve..! Topē tỹ jēgnē jafā ag kar rĩnve ag jagtar kăn kĩ nýtī ha..! Pĩ ki ag tóg jagăgtar ke mū ha..! pó tỹ enxofre pũr nĩja ki ke gé, vān pũr nĩja ri ke ěn ki..! ¹¹ Ag tỹ pĩ ki jagăgtar mū ěn nĩja tóg kanhkā to tăpřy mū ha..! Tũg' hēnh ke tũ ti nī, pĩ ěn ti..! Ũ tỹ mĩg to: topē vē, he mū ěn ag vỹ vēnhkánkán ke tũ pē nī..! ũ tỹ ti kăgrá to: topē vē, he mū ěn ag kar ti..! ũ tỹ ti jyjy tỹ ránrán kĩ nýtī ěn ag kar ti..! Vēnhkán ke tũ ag

nýtī ha..! kurā ki, kuty mré hā..!” he tóg, prēr kĩ, Topē tỹ jēnē jafā ũ ěn ti.

¹² Ũ tỹ Topē ki ge kĩ nýtī ag jé ti to krónh ke tũg, ag jé Topē tovānh tũg, ũ tỹ Topē vī kri fig mū ag, ũ tỹ Jesus to tar nýtī ag.

¹³ Kĩ sóg kanhkā tá vēnh vī ũ mēg mū gé. Kĩ tóg: “tag rán nī, ha mē,” he mū, ũ tỹ kanhkā tá vī mū ti. “Ũ tóg ěg Senhor ki ge kĩ nýtī, gen kĩ ag tóg kăgter ja nī. Ěn ag mỹ tóg sér tăvī tĩ ha,” he tóg, ũ tỹ kanhkā tá vī mū ti. Kĩ Topē kupřig tóg: “hỹ,” he mū gé. “Ag rānhřāj kaja vég ag tóg mũgtĩ, kĩ ag tóg ag rānhřāj to vēnhkán kĩ nýtī ha,” he tóg, Topē kupřig ti, ũn kăgter mū ag to, ũ tỹ ěg Senhor ki ge kĩ nýtī ag to.

Topē tỹ jēnē jafā ag tỹ ěprā ke ag vóg kónān

¹⁴ Kĩ sóg kanhkā góg kupri vég mū gé sir. Ũ tóg kanhkā góg ěn kri nī nī, tỹ tóg ěprā ke nī ve nī. Hā ra tóg krĩ tógfĩ tỹ ouro nī nī, kĩ tóg ěg tỹ tỹ trigo kre jafā vyn kĩ nī nī gé. Jukén kĩ tóg nỹ, trigo kre jafā ěn ti. ¹⁵ Kĩ Topē tỹ jēnē jafā ũ tóg kātī mū gé, Topē jo ĩn kátá. Kĩ tóg ũ tỹ kanhkā góg kri nī ěn mỹ: “trigo kre jafā tỹ krenh tĩg nī,” he mū. “Tỹ ti krenh ke kurā vē. Vēnh kăn kĩ ag nýtī nī, ěprā ke ag,” he tóg. ¹⁶ Kĩ ũ tỹ kanhkā góg kri nī ěn tóg trigo kre jafā ěn tỹ krenh tĩ mū.

¹⁷ Kĩ sóg Topē tỹ jēnē jafā ũ vég mū gé. Topē jo ĩn kátá tóg kăkutē mū. Uva kre jafā vyn kĩ tóg tá kăkutē mū. ¹⁸ Kĩ Topē tỹ jēnē jafā ũ tóg jun măn mū gé. Topē jo ĩn kátá tóg kăkutē mū gé, Topē mỹ nén ũ pũn jafā ěn tá. Topē tỹ jēnē jafā tag vỹ pĩ ki rĩr tĩgtĩ. Kĩ tóg ũ tỹ uva kre jafā văg mū ěn mỹ: “uva kre jafā tỹ krenh tĩg,” he mū. “Ga kri ti nýtī, uva kanē ti. Ěn krenh tĩg. Rā há ti nýtī ha,” he tóg. ¹⁹ Kĩ tóg tĩ mū, Topē tỹ jēnē jafā ěn ti. Uva kanē krég tóg mū sir. Kĩ tóg uva jēgmĩ jafā ki ag vām mū, hā vỹ: Topē tỹ vēnh kar to jũ, he mū, hā vỹ: uva jēgmĩ jafā, he

mũ. ²⁰ Cidade fyr tá tóg jê nĩ, uva jëgmĩ jafã ên ti, k̃y ag tóg uva jëgmĩg mũ sir, Topê t̃y jênê jafã ên ag. K̃y ag tóg tá ag kyvénh kujêg mũ, êprã ke ag kyvénh ti, k̃y tóg târa tĩ mũ, 300 (ke) quilômetros ra, ag kyvénh ti. T̃y tóg goj mág ñy ve nĩ, ag kyvénh ti. Cavalo t̃y kã jê ra tóg pun kenh ke mũ vê.

**Topê t̃y jênê jafã ag t̃y êprã
ke ag vóg kónân măn**

15 K̃y sóg kanhkã tá nén ù vég mũ gé. Inh m̃y tóg e tĩ, is̃y nén nê ên ve k̃y, k̃y tóg inh kanê jun mũ. Topê t̃y jênê jafã t̃y 7 (ke) ag vigve inh. Ga kri ke ag vóg kónân jé ag tóg ke mũ, vógvóg t̃y 7 (ke) ki. Ag t̃y ga kri ke ag vóg kónân kar k̃y Topê tóg jũ măn ke tũ nĩ ha. ² K̃y sóg goj t̃y vidro kãki pĩ gru vég mũ. K̃y sóg ù ag vigvég mũ gé, ù t̃y mĩg ên kato vāsānsān mũ ên ag. Ag pi(jé) ājag t̃y t̃y êprã ke ñy tĩ ra mĩg kãggrã ên to há ñy tĩ ja ñy tĩ, ag pi(jé) vênh ki ti número rán ja ñy tĩ, ti jyjy tĩ. Ag pi(jé) mĩg vĩ kri nĩm ja ñy tĩ. Hã k̃y ag ṽy goj t̃y vidro jo ñy tĩ, k̃y ag tóg vākyn jafã t̃y harpa vyn k̃y ñy tĩ nĩ, Topê t̃y ag m̃y harpa vin mũ ên. ³ K̃y ag tóg Topê m̃y rānhraj̃ t̃y t̃y Moisés t̃y jé ên tó mũ, ti t̃y jān ti. Cordeiro ên m̃y ag tóg jān mũ, ha mē: “Topê kósín ṽy t̃y ā nĩ, pāl̃ mág ṽy t̃y ā nĩ, vênh kar kri ke ṽy t̃y ā nĩ,” he ag tóg mũ, cordeiro m̃y, jān k̃y. “Nén ù há tãvĩ han ja ā tóg nĩ, ge ve ja tũ ěg tóg ñy tĩ. Ā jykre ṽy kuryj tãvĩ ñy, ki hã tó ā tóg tĩgtĩ. Povo kar kri ā tóg jê nĩ. ⁴ Vênh kar ag ṽy ā kamēg tĩ, pāl̃ mág kar ag. Vênh kar ag ṽy ā jiji to: “ũn mág ṽy t̃y ti nĩ,” he tĩ. Ā hã ne ā pir m̃y há nĩ. Povo kar tóg ā tá junjun ke mũ, k̃y ag tóg ā m̃y: “Topê ṽy t̃y ā nĩ,” henh ke mũ. Ā jykre kuryj ên ve kãn jé ag tóg ke mũ, povo kar ag,” he ag tóg mũ, jānjān k̃y, ù t̃y mĩg kato vāsānsān mũ ên ag.

⁵ Kar k̃y sóg kanhkã tá Topê jo ĩn vég mũ. Ti jānkã nón ag tóg mũ, kur t̃y ĩn ên róm k̃y, Topê nĩg jafã ên. ⁶ K̃y Topê

t̃y jëgnê jafã t̃y 7 (ke) ên ag tóg tá kãpa mũ, ù t̃y ga vóg kónân ke mũ ên ag. Kur kupri jānhkri rĩnh k̃y ag tóg kāmũ mũ, pyrfê t̃y kur rĩnh k̃y, k̃y ag tóg ouro t̃y vēsógfin k̃y ñy tĩ gé, ājag fe kri. ⁷ K̃y nén nê t̃y 4 (ke) ên ag kāmĩ ù tóg ag m̃y ouro t̃y pénky junjun mũ, Topê t̃y jëgnê t̃y 7 (ke) ên ag m̃y. Pénky t̃y 7 (ke) junjun ag tóg mũ, ag m̃y. Fór ti ñy tĩ, pénky ti, Topê jũ t̃y. Topê ṽy tũ' henh ke tũ pê nĩ. Ti jũ t̃y tóg fór ñy tĩ, pénky ti. ⁸ K̃y Topê jo ĩn ên krēm tóg nija nĩ. Topê tá tóg tũmtũm ke kãtĩ mũ, nija ên ti, Topê t̃y t̃y ũn mág ñn k̃y, ti tar ñn k̃y. Topê t̃y jëgnê jafã t̃y 7 (ke) ên ag t̃y ga vóg kónân ke to há ù tóg Topê jo ĩn ên kãra rānh ke tũ nĩ.

Topê jũ

16 K̃y sóg vênh ṽy ù jëmēg mũ, Topê jo ĩn ên kãtã. Topê t̃y jëgnê jafã t̃y 7 (ke) ên m̃y tóg ṽy mũ, ũn ṽy mũ ên ti, k̃y tóg: “pénky t̃y funfór ên t̃y ga kri kugjēn m̃y jēg,” he mũ.

² K̃y Topê t̃y jênê jafã ù tóg tĩ mũ, ti pénky ki nĩ ên t̃y ga kri kujēn jé. K̃y ù t̃y mĩg ên jiji t̃y ránrán k̃y ñy tĩ ên ag kar ṽy fugfóm jagy han mũ, kaga jagy. ù t̃y mĩg kãggrã to: “Topê ṽy t̃y ti nĩ,” he mũ ag kar ṽy fugfóm kãn mũ.

³ K̃y Topê t̃y jênê jafã ù tóg goj kafã tũ ki ā pénky ki nĩ ên kujêg mũ gé. K̃y goj tóg vênh kyvénh ri ke nĩ ha, ag t̃y ù tãnh mũ kyvénh ên ri ke. K̃y goj kāmĩ mũ kar ag ṽy kãgter mũ ha.

⁴ K̃y Topê t̃y jênê jafã ù tóg ā pénky ki nĩ ên kujêg mũ gé, pénky tãgtũ vê sir. Goj mág mré goj kāsir kar ki tóg kujêg mũ, ti tũ ti, goj nĩh̃ỹg kar ki ke gé. K̃y tóg vênh kyvénh kar ñy tĩ ha, goj kar ti. ⁵ K̃y ù t̃y goj ki rĩr tĩ ên tóg: “ũn há ṽy t̃y ā nĩ,” he mũ, Topê m̃y. “Vās̃y ā tóg nĩ ja ñy tĩ, k̃y ā tóg ũri nĩ nĩ gé,” he tóg mũ, Topê m̃y. “Vênh jykre há han k̃y ā tóg nĩ nĩ. ⁶ ù t̃y ā ki ge k̃y ñy tĩ ag kãgtén ag tóg, ù t̃y ā ṽy tó ti ag mré hã. K̃y ā tóg ag m̃y vênh kato vênh kyvénh nĩm mũ sir, ag t̃y

kron jé. Ag tỹ ag tỹ ag kăgtén kajâm hă vê,” he tóg, Topê mỹ, Topê tỹ jênê jafă ti.

⁷ Kĩ sóg vênh vĩ ù jêmêg mũ gé. Topê mỹ nén ù pũn jafă tá tóg vĩ mũ, ùn vĩ mũ ti, kĩ tóg: “Topê vĩ tỹ ă nĩ, păi vĩ tỹ ă nĩ, vênh kar kri ke vĩ tỹ ă nĩ,” he mũ. “Kuryj ti nĩ, ă jykri ti, kĩ ă tóg ki hă tó ti, kĩ ă tóg ki hă ag vóg kónân tĩ gé,” he tóg mũ, ùn vĩ mũ ên ti.

⁸ Kĩ Topê tỹ jênê jafă ù tóg ă pénky ki nĩ ên kujêg mũ gé. Pénky tỹ 4 (ke) vê sir. Ră ki tóg ă tũ kujêg mũ. Kĩ ră tóg vênh kar kri hupũn jagy han mũ, kĩ ag jagtar mũ. ⁹ Kĩ ag tóg kugpũr mũ sir, vênh kar, rỹ jagy tỹ. Kĩ ag tóg Topê to vĩ kónân mũ sir, ti tỹ ag vóg kónân tugrĩn. Ge ra ag tóg ăjag jykri tovănh sór tũ nỹti, Topê mỹ ag tóg vênh vin sór tũ nỹti.

¹⁰ Kĩ Topê tỹ jênê jafă ù tóg ă tũ kujêg mũ gé. Pénky tỹ 5 (ke) vê sir. Mĩg ên nĩgja kri tóg ă tũ kujêg mũ. Kĩ tóg kuty nỹ, mĩg ên krêm ke kar ag mỹ. Kĩ tóg vênh kar mỹ e tăvĩ ti. Kaga jagy han ag tóg mũ, ag fugfóm to. ăjag kaga jagy tugrĩn ag tóg ăjag nũnê kyprăg mũ. ¹¹ Kĩ ag tóg Topê tỹ kanhkă tá nĩ ên mỹ vĩ kónân mũ, ag kaga to, ag tỹ ti jagy vэг mũ kar to. Ge ra ag tóg ăjag jykri kórég tovănh sór tũ nỹti.

¹² Kĩ Topê tỹ jênê jafă ù tóg ă tũ kujêg mũ gé. Pénky tỹ 6 (ke) vê sir. Goj tỹ Eufates ki tóg ă tũ kujêg mũ. Kĩ tóg tóg kăn mũ, goj tỹ Eufates ti. Hă kĩ păi tỹ ră jur ja tá kămũ ên ag tóg kămũ mũ ha, kĩ goj tóg ja ên vĩ tỹ ag japry nỹ ha, ag jamĩn. ¹³ Kĩ sóg vênh kuprĩg tăgtũ vэг mũ, hă ra tóg tỹ pépo ve nỹti, vênh kuprĩg ag. Û tóg mĩg fêr ên jênkă tá kăkutê mũ, ù tóg goj kătă mĩg ên jênkă tá kăkutê mũ, ù tóg ón kĩ Topê vĩ tó ti ên jênkă tá kăkutê mũ gé. ¹⁴ Japo ag vê, vênh kuprĩg tỹ tỹ pépo nỹti ve ên ag, hă ra ag tóg êg tỹ nén han vánh hyn han mũ. Kĩ ag tóg êpră ke to păi kar ag mré vémén mũ gé, ag tỹ vênh gênh ke to vênh

măn jé, Topê tỹ ag mỹ kură nĩv ên ki. Topê hă ne tỹ ùn mág nĩ’.

¹⁵ “Ha vé, ăjag tỹ nén ù péju(g) tĩ ên kătĩg ri ke ti nĩnh mũ, inh kătĩg măn ke ti. ăjag nũgnũr tũ nỹtin kĩ tóg há ti, ăjag kur kynkar kĩ nỹtin kĩ tóg há ti. Kĩ mỹ sér nỹtimnĩ. Kĩ ăjag tóg kator nỹtĩnh ke tũ nĩ. Mỹ’ăg’ăg ke tũ ăjag nỹti, ù ag tỹ ăjag vэг mũ ra,” he tóg, êg Senhor ti, êg mỹ.

¹⁶ Japo tag ag vĩ păi kar tỹ vênh măn han mũ, êmă tỹ Armagedom tá, Hebreu vĩ ki êmă ên jyjy vê.

¹⁷ Kĩ Topê tỹ jênê jafă ù tóg ă tũ kujêg mũ gé. Pénky tỹ 7 (ke) hă vê. Kanhkă krêm tóg ă tũ kujêg mũ. Kĩ nĩgja sĩnvĩ ên tá, Topê jo ĩn kăkă nĩgja ên tá vênh vĩ tóg mê há ti, kĩ tóg: “nén kar tóg kar kăn kĩ nỹ ha,” he mũ, vênh vĩ ti. ¹⁸ Kĩ ta tóg kómkóm ke mũ, tỹrỹr he tóg mũ gé, kĩ ga vĩ ragra ke jagy han mũ gé. Ga tỹ ragra ke tỹ ge ve ja tũ êg tóg nỹti. Êg tỹ ga mĩ mũn kă tóg ragra ke tỹ ge han ja tũ nĩ. ¹⁹ Cidade mág ên tóg vênh kăpóv kĩ nỹ ha, vênh kăpóv tăgtũ tỹ. Kĩ ga kar mĩ cidade tóg kókén kĩ nỹti nĩ. Topê pi(jé) cidade tỹ Babilônia kă jatũ ja nĩgtĩ’. Cidade ên ki ke ag to tóg jũ tăvĩ han mũ, Topê ti, ag to tóg fe gỹv han mũ. Hă kĩ tóg ag vóg kónân jagy han mũ, kĩ tóg êg tỹ vinho kron ri ke nĩ. ²⁰ Kĩ goj văso kar tóg tũ nỹti ha ke gé, pănónh kar tóg tũ nỹti gé. ²¹ Kĩ năfy tóg văr mũ gé. Éhé tăvĩ ti nĩ, năfy ên ti, ùn pir tóg quilo tỹ hên ri ke nĩ, kukryr tỹ năfy ên. Êpră tóg văr mũ. Kĩ êpră ke ag tóg Topê mỹ vĩ kónân mũ gé sir, năfy tag to, ti jagy tăvĩ nĩn kĩ.

Ủn tỹtă kórég fi

17 Kĩ Topê tỹ jênê jafă ù tóg inh ki jun mũ, ù tỹ pénky măn mũ ja ên ag kă ù. Kĩ tóg inh mỹ: “kunĩg,” he mũ. “Nhỹ ă mỹ cidade mág ti ven, cidade tỹ goj tỹ hên ri ke tá nỹ ên ti. Cidade ên ki ke ag vĩ ùn mén (ka)mê fi ri ke nỹti,

kỹ Topê vỹ ag vóg kónān ke mǔ, ũn mén (ka)mē fi ri ke ěn ag. ²Pǎ'i kar vỹ fi mré nỹ ja nĩgtĩ, ũn mén (ka)mē ěn fi mré. Ēprā ke kar mỹ tóg sér tĩ, fi jykre ti, kỹ tóg ag tỹ kronkron kỹ kǎgter ri ke nĩ, ag tỹ ũn mén (ka)mē ěn fi mré nỹ ti,” he tóg inh mỹ, Topê tỹ jēnē jafā ti.

³Kỹ Topê kuprĩg tóg inh krĩn mǔ, kỹ sóg nén nē ve kỹ ga kórég ra tĩ mǔ. Topê tỹ jēnē jafā ěn vỹ inh pére ti mǔ. Tá ũn týtá fi tóg nĩ nĩ. Fi mēg tỹ mĩg kri fi tóg nĩ nĩ, hǎ ra tóg kusũg jē, fi mēg ti. Vēnh jygyi tóg fi mēg kri ránrán kỹ nỹtĩ, kỹ tóg vēnh kri tỹ rǔm ke kỹ jē, vēnh jygyi rágrá tỹ. Vēnh jygyi ěn tóg Topê to vĩ kónān kỹ nỹtĩ. Fi mēg vỹ ǎ pir ra krĩ tỹ 7 (ke) nĩ, nĩka tỹ 10 (ke) ti nĩ gé. ⁴Ũn týtá ěn fi vỹ kur kusũg tu kỹ nĩ nĩ, kur kósóg pē. Ouro tu fi tóg nĩ gé, pó sĩnvĩ, pérولا. Ouro tỹ copo mǎn kỹ fi tóg nĩ nĩ. Hǎ ra tóg nén ũ kórég kar tỹ fór jē, nén ũ kavéj kar tỹ, copo ti. Fi tỹ vēnh jykre pāno han mǔ to ken hǎ vē. ⁵Fi jiji vỹ fi kakā ki rán kỹ nĩ, ũ tóg ǎ vĩ ki fi jygy tag mē ja tũ nĩ ver. Hǎ ra tóg: “Babilônia hǎ vē,” he mǔ, fi jiji ti. “Ũn mág vỹ tỹ inh nĩ,” he tóg. “Ũn mén (ka)mē kar fag mǎnh vỹ tỹ inh nĩ, ũ tỹ nén ũ kavéj kar han tĩ ag mǎnh vỹ tỹ inh nĩ, ěprā, ag tỹ inh jykre han kỹ,” he tóg mǔ, fi jygy ti. ⁶Hǎ ra fi tóg kron kỹ ter nĩ, fi tỹ ũ tỹ Topê ki ge kỹ nỹtĩ ag kyvénh kron kỹ. Ũ tỹ hēn ri ke ag kǎgtén ja ag tóg nĩgtĩ, Jesus tũgrĩn, ag tỹ Jesus tovǎnh sór tũ tũgrĩn, hǎ ra fi tóg ag kyvénh kron kǎn ja nĩ.

Inh mỹ tóg e tĩ, sỹ fi ve kỹ. ⁷Kỹ Topê tỹ jēnē jafā tóg inh mỹ: “mỹ ǎ mỹ e?” he mǔ. “Nhỹ ǎ mỹ fi kǎmén, fi mēg tỹ mĩg ti ke gé, fi mēg krĩ tỹ 7 (ke) ěn, fi mēg nĩka tỹ 10 (ke) ěn, fi tỹ kri nĩ jafā ěn ti,” he tóg, Topê tỹ jēnē jafā ti. ⁸“Fi mēg tag vỹ vǎsỹ jē ja nĩgtĩ. Ũri tóg ki tũ nĩ, hǎ ra tóg kǎnhmar nũgme tá kǎkutēnh ke mǔ, Topê tỹ ti kókén pē han jē. Kỹ tóg ěprā ke ag mỹ e tĩnh mǔ, ag tỹ fi mēg tag venh ken kỹ, ũn jygyi tỹ Topê livro ki rán kỹ

nỹtĩ tũ ag mỹ. Topê tỹ nén (ũ) kar han to hǎ tóg ag rán ja tũ nĩ, kỹ ag tóg rĩnrĩr ke tũ nỹtĩ. Ēn ag mỹ tóg e tĩnh mǔ, ag tỹ fi mēg tỹ mĩg ven kỹ. Vǎsỹ tóg nĩ ja nĩgtĩ, kỹ tóg ver ki tũ nĩ, hǎ ra tóg kejēn kǎtĩg mǎn ke mǔ ha.

⁹Topê tỹ ũn kanhrǎn mǔ ěn ag hǎ vỹ fi mēg to jykrén ke mǔ. Ti krĩ tỹ 7 (ke) vỹ tỹ pānónh tỹ 7 (ke) nỹtĩ. Pānónh ěn kri fi tóg nĩ nĩ, ũn týtá kórég ěn fi. Pǎ'i tỹ 7 (ke) to ke vē gé, hǎ ra, ti krĩ tỹ 7 (ke) ěn ti. ¹⁰Pǎ'i tỹ 5 (ke) vỹ hur tũg, ũn pir vỹ ũri nĩ nĩ, ũn pir ũ vỹ kar kỹ kǎtĩg ke mǔ gé. Ti kǎtĩg ken kỹ tóg nĩg sĩ pē han ke mǔ, ũ tỹ ěgno ěn ti. ¹¹Fi mēg tag, ũ tỹ vǎsỹ nĩ ja kar kỹ ũri kǎ nĩ tũ ěn vỹ tỹ pǎ'i ũ nĩ gé. Pǎ'i tỹ 8 he mǔ vỹ tỹ ti nĩ. Pǎ'i tỹ 7 (ke) ěn mré ke vỹ tỹ ti nĩ gé. Topê vỹ ti tỹ tũ hēnh ke mǔ gé.

¹²Ti nĩka tỹ 10 (ke) vỹ tỹ pǎ'i tỹ 10 (ke) nỹtĩ gé. Ēn ag vỹ ver kǎmũ tũ nỹtĩ. Fi mēg mré ag tóg tỹ pǎ'i nỹtĩnh ke mǔ, hǎ ra ag tóg nĩg sĩ pē han ke mǔ gé. ¹³Jagnē mré ag tóg vēnh jykre pir han ke mǔ, pǎ'i tag ag, fi mēg ěn mré. Fi mēg mỹ ag tóg vēnh vin ke mǔ. ¹⁴Cordeiro ěn kato ag tóg vǎsǎnsǎn ke mǔ. Hǎ ra cordeiro tóg ag tỹ hēn ri kēnh ke mǔ, ti mré ke ag mré, ũ tỹ ti tovǎnh ja tũ ag mré, ũn kuprēg kỹ nỹtĩ ag mré. Kỹ cordeiro ěn vỹ tỹ pǎ'i kar kri ke jē. Pǎ'i mág ag kar kri tỹ pǎ'i ti jē mỹr,” he tóg inh mỹ, Topê tỹ jēnē jafā ti.

¹⁵Kỹ tóg inh mỹ: “goj ve ja ǎ nĩ gé,” he mǔ. “Goj ěn tá fi tóg nĩ, ũn týtá kórég ěn fi. Povo kar to ken hǎ vē, hǎ vỹ: goj, he mǔ, ěprā ke kar to ken hǎ vē, naçāo kar to ken hǎ vē, vyrmỹ vĩ nỹtĩ ag kar to ken hǎ vē gé, hǎ vỹ: goj, he mǔ,” he tóg. ¹⁶“Kỹ fi mēg vỹ ti nĩka tỹ 10 (ke) ěn mré (tóg) fi to kórég tǎvĩ nỹtĩnh ke mǔ. Fi tũ kunũnh kǎn jē ag tóg ke mǔ, fi kur mré hǎ, kỹ fi tóg kator nĩnh ke mǔ, ũn kórég ěn fi. Fi nĩ ko jē ag tóg ke mǔ gé, kỹ ag tóg fi pũn ke mǔ gé. ¹⁷Ag tỹ ki kǎtĩg ra Topê tóg ag krĩn tũ, ag vatǎnh tá, kỹ ag tóg Topê tỹ ag mỹ fi to vēnh jykre nĩv ěn

hã han tĩ. Topê tỹ ag krĩn kỹ ag tóg jagnê mré vênh jykre pir hã han tĩ, kỹ ag tóg fi mēg mỹ vênh vin tĩ gé, pã'i tỹ 10 (ke) ên ag. Gen kỹ ag tóg nén kar kãnkã ke mũ ên pétēm ke mũ, Topê tỹ vãsỹ tó ja ên kar ti," he tóg, Topê tỹ jênê jafã ti.

¹⁸ "Kỹ ùn týtã kórég ên fi, ã tỹ ùn vэг mũ ên fi vỹ tỹ cidade mág ên nĩ. Ėprã pã'i kri ke kar fi nĩ," he tóg inh mỹ, Topê tỹ jênê jafã ên ti.

Babilônia tỹ tũ' he

18 Kar kỹ sóg Topê tỹ jênê jafã ù vэг mũ gé. Kanhkã tá tóg kãtére mũ. Tar pẽ tóg jẽ, jẽngrẽ tóg jẽ gé, kỹ ti jẽngrẽ tóg kurã han mũ, Ėprã, Topê tỹ jênê jafã ên ti. ² Ėn vỹ prẽr mũ. "!.Kókén kỹ ti nỹ ha..!" he tóg mũ, prẽr kỹ. "!.Babilônia vỹ kókén kỹ nỹ, cidade mág ên ti..!" he tóg. "!.Japo ag, vênh jagrẽ kórég ag vỹ tá ěmã nỹti ha..! Jēsĩ kavėj kar, sēsĩ kórég kar vỹ tá nỹti ha, cidade jy ró ên kãmĩ..! ³ Ėprã ke kar vỹ cidade ên jykre han ja nĩgte..! Kỹ tóg ag tỹ ù mré nỹ kónãn ên ri ke ne..! Vinho kron mág ri ke ti ne..! cidade ên jykre ti..! Ėprã pã'i ag vỹ tá vênh jykre han ja nĩgte..! Kỹ tóg ùn týtã kórég fi mré nỹ ri ke nĩ, ag jykre kórég ti..! Nén ù vender he tĩ ag vỹ cidade ên tugrĩn rico nỹti ja nĩgte..! tá ke ag tỹ rico tãvĩ ja nỹtĩn kã..! Hã ra tóg kókén kỹ nỹ ha..!" he tóg, prẽr kỹ, Topê tỹ jênê jafã ti.

⁴ Kỹ sóg kanhkã tá vênh vỹ ù mēg mũ gé, ù tỹ Topê ki ge kỹ nỹti ag mỹ tóg: "mũ jé ha," he mũ, ù tỹ kanhkã tá vỹ mũ ên ti. "Cidade tá kãpamnĩ, ke tũ nĩ mũ ra ãjag tóg ag mré Topê vỹ mranh ke mũ, kỹ Topê tóg ag mré ãjag vóg kónãn ke mũ gé, ti tỹ cidade kókén ken kỹ," he tóg, ù tỹ kanhkã tá vỹ mũ ti, ù tỹ Topê ki ge kỹ nỹti ag mỹ. Cidade ên kókén ke to hã tóg ag mỹ tó mũ. ⁵ "Topê vỹ ag jykre pãno ve kãn, kỹ tóg kã jatu tũ nĩ. Ag tỹ Topê vỹ mranh vỹ e tãvĩ nỹti, kỹ ti pãnfi tóg kanhkã pétēm mũ, ag tỹ Topê vỹ mranh

pãnfi ti. ⁶ Ag tỹ ãjag mỹ nén han ja ên ri ke han nĩ, ag mỹ," he tóg, ù tỹ Topê ki ge kỹ nỹti ag mỹ. "Ag tỹ ãjag mỹ ti kórég pir han kỹ ag mỹ ti kórég régre han nĩ, vênh kato. Ĥag mỹ ag tóg ti kron jafã kórég ven ja nĩ. Ag mỹ ti kron jafã kórég ven régrég nĩ. ⁷ Sinvĩ ja ag nỹti, tỹ nén ù mág ja ag nỹti. Ag jagtar han nĩ, ag sinvĩ tag to. Ag jagtar han nĩ, ag tỹ nén ù mág tag to, ù tỹ nén ù mág tũ ag jagtar han nĩ gé, ag mré. "Ũn mág vỹ tỹ ěg nỹti," he ag tóg mũ. "Ũ pi(jé) ěg jagtar han ke mũ," he ag tóg mũ. ⁸ Hã ra ag tóg vãhã venh ke mũ, ag jagãgtar ke ti, ag vēsỹrénh ke ti, ag vãnhrãg ti, kỹ tóg ag tỹ vênh kaga jagy han ri ke nĩ sir. Kurã pir ki ag tóg tag ve kãn ke mũ, kỹ ag tóg pĩ ki kãgtar ke mũ. Topê hã vỹ ag vóg kónãn ke mũ, pã'i mág ti. Tar pẽ ti jẽ nĩ mỹr, Topê ti," he tóg, ù tỹ kanhkã tá vỹ mũ ti, ù tỹ Topê ki ge kỹ nỹti ag mỹ.

⁹ Kỹ ěprã pã'i ag vỹ venh ke mũ, cidade nĩja ti. Cidade ki ke ag mré tóg ag mỹ sér nĩ ja nĩgtĩ. Ag mré ag tóg nén (ũ) kar vigve ja nĩgtĩ, kỹ tóg ag tỹ fag mré nỹ ri ke nĩ ja nĩ, ag tũ mág ên ti. Cidade pũr nĩja ve jé ag tóg ke mũ ha, kỹ ag tóg fỹnh mũ, jagtar ke mũ. ¹⁰ Kuvar há tá ag tóg nỹtĩnh ke mũ, ag kanẽ jur kỹ, ag tỹ cidade ki ke ag vãnhrãg jagy mē kỹ. Kỹ ag tóg jagtar kỹ: "jagy tãvĩ tóg ti," henh ke mũ sir, pã'i ag. "Ėhé tãvin ja ti nĩ, cidade tỹ Babilônia tag ti, tar pẽ ja ti nĩ. Hã ra ag tóg hora pir ki ti kókén kãn," he jé ag tóg ke mũ, pã'i ag.

¹¹ Kỹ nén (ũ) vender he nỹtĩgtĩ ag vỹ jagtar kỹ fỹnh ke mũ gé, cidade tũ to. Tá ag tóg nén (ũ) tỹ hên ri ke ve ja nĩgtĩ, ¹² ouro ti, prata ti, pó sinvĩ ti, pérola ti, pyrfé tỹ kur ti, kur tỹ seda ti, kur kusüg ti, kur kusüg sã ti, ka kaja e ti, elefante jã tỹ nén han mũ ti, ka sinvĩ tỹ nén han mũ ti, ferro tỹ nén han mũ ti, ferro kusüg tỹ nén han mũ ti, pó tỹ mármore tỹ nén han mũ ti, ¹³ canela ti, vėjẽn ger há ti, ka jẽnjo pũn kỹ ger há tỹ incenso ti, ka jẽnjo

pün ky ger há tỹ mirra ti, vênh mĩ tĩn jafã ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ùn gré ag, ùn tỹtã fag mré hã. Tag kar tỹ ag tóg negocio hyn han tĩ ja nĩgtĩ, vender he nỹtĩgtĩ ag, hã ra tóg tũ tĩ ha. ¹⁴Kỹ nén ù vender he nỹtĩgtĩ ag tóg jagtar ky tag tónh ke mũ, ha mẽ. “Nén kar ve ja ěg tóg nĩgtĩ, cidade tá, ky tóg ěg mỹ sér nĩ ja nĩgtĩ. Riqueza ěn tóg tũ he kãn. Û tóg nén kar ěn to ěn mãn ke tũ nĩ ha. Ve mãn ke tũ ěg tóg nĩ ha, nén (ũ) kar ěn ti,” he jé ag tóg ke mũ, nén (ũ) vender he nỹtĩgtĩ ag. ¹⁵Kỹ ag tóg kuvar há tá nỹtĩnh mũ. Cidade ěn tá negocio han to ag tóg vênh han ja nĩgtĩ, hã ky tóg ag mỹ e ti. Tãtã nỹtĩn ky ag tóg jũrũn ke mũ, ag tỹ cidade tá ke ag jagãgtar ve ky. Fỹ jé ag tóg ke mũ, vēsỹrénh jé ag tóg ke mũ. ¹⁶Kỹ ag tóg: “jagy tãvĩ tóg nĩ,” henh ke mũ. “Hã tãvĩ ja ag nỹtĩ, cidade tag ki ke ja ag. Kur sĩnvĩ rĩnh ja ag tóg nỹtĩ, pyrfé tỹ kur, kur kusũg, kur kusũg sã. Ouro rĩnh ja ag tóg nỹtĩ, pó sĩnvĩ, pérola. ¹⁷Hora pir ki ag tóg tũ he kãn ja nĩ, ag tỹ nén (ũ) kar mré hã,” he jé ag tóg ke mũ gé, nén ù vender he nỹtĩgtĩ ag.

¹⁸Kỹ barco to pã'i ag vỹ nỹtĩnh ke mũ gé, goj kri mũ mũ kar ag, barco ki rĩr tĩ kar ag, ù tỹ goj kri rãnhřãj mũ kar ag ke gé. Tãtã nỹtĩ ky ag tóg cidade nĩja ěn ve ky (ag tóg) prẽnprẽn mũ sir. “Cidade ěn ri ke ve mãn ke tũ ěg tóg nĩ ha,” he jé ag tóg ke mũ. ¹⁹Kỹ ag tóg ga funfur tỹ vênh kri vãm ke mũ sir, ag mỹ e tĩn ky. Fỹ jé ag tóg ke mũ, vēsỹrénh jé ag tóg ke mũ. “Jagy tãvĩ tóg tĩ,” he jé ag tóg ke mũ. “Hã tãvĩ ja ag nỹtĩ, cidade tag ki ke ja ag. Vênh kar vỹ ag tũ mãn ky vênh hyn han ja nĩgtĩ, ù tỹ barco kãmĩ goj kri mũgtĩ ag. Kĩ tóg jagy tãvĩ tĩ. Hora pir ki tóg tũ he kãn ja nĩ,” he jé ag tóg ke mũ gé, goj kri mũgtĩ ag.

²⁰“Kanhkã tá nỹtĩ kar'. Mỹ sér nỹtĩmnĩ. Topẽ ki ge ky nỹtĩ kar', mỹ sér nỹtĩmnĩ. Apóstolo kar', Topẽ vĩ to

tĩ kar', mỹ sér nỹtĩmnĩ. Tũ he kãn ag huri, cidade ěn tá ke kar ag. Topẽ vỹ hur ag vóg kónãn, ag tỹ ajag vóg kónãn ja tugrĩn.”

²¹Kỹ Topẽ tỹ jẽnẽ jafã tar ù tóg pó mág vãng mũ. Kra tỹ pó ri ke ti nĩ, pó mág ěn ti. Kĩ tóg goj nig ki ti fón mũ, jũ ky, ky tóg: “isỹ pó fón mũ tag ri ke ti ninh mũ, cidade tỹ Babilônia kókén ti,” he mũ. “Kókén kãn ky tóg nĩ. Û tóg ti ve mãn ke tũ nĩ ha, cidade ti. ²²Kãki ag tóg harpa kyn mãn ke tũ nỹtĩ ha, tỹnh mãn ke tũ ag nĩ ha, vãn tỹ vãykr ěn kyn mãn ke tũ ag nĩ ha, trombeta ti ke gé. Vãykr mẽ mãn ke tũ ěg nĩ ha, cidade tỹ Babilônia tá. Û tóg ki rãnhřãj mãn ke tũ nĩ ha, ù tóg ki nĩ mãn ke tũ nĩ ha. Û tóg ki tynyn mãn ke tũ nĩ gé. ²³Û tóg ki lampiãio grug mãn ke tũ nĩ ha. Û tóg ki vênh prũg to festa han mãn ke tũ nĩ gé. Hã tãvĩ ja ag nỹtĩ, tá nén (ũ) kar vender he nỹtĩgtĩ ěn ag, ky vênh kar vỹ ag vĩ jẽnẽ ja nĩgtĩ. Povo kar krĩn kónãn ja ag tóg nĩgtĩ, kujã tỹ ěg mỹ ón tĩ ěn ri ke han ja ag tóg nĩgtĩ. ²⁴Topẽ vĩ to tĩ ag kãgtén ja ag tóg nĩgtĩ, cidade ěn tá ke ag, Topẽ ki ge ky nỹtĩ ag kãgtén ja ag tóg nĩgtĩ. ěn hã tá tóg vênh ven ja nĩ, ag tỹ ùn kãgtén mũ kyvénh kar ti. Hã ky ag tóg ag kar kyvénh kajãm kãn ke mũ,” he tóg mũ, Topẽ tỹ jẽnẽ jafã tar ěn ti.

19 Kĩ sóg kanhkã tá nén ù mẽg mũ gé sir, hã ra tóg ù tỹ hẽn ri ke ag jãn mẽg nĩ. Jãn ky ag tóg cidade ěn to tag to mũ, ha mẽ. “Topẽ mỹ vĩ há han nĩ. Topẽ ne ěg krenkren han ki kanhró nĩ. Ti hã ne tỹ ùn mág nĩ. Ti hã ne tar jẽ. ²Ti tỹ nén han mũ vỹ kuryj kar nỹ. Ûn tỹtã kórég ěn fi vóg kónãn tóg huri. ěprã ke kar kókén ja fi tóg nĩ, fi jykre pãno tỹ. Topẽ vỹ fi vóg kónãn, fi tỹ ti rãnhřãj han tĩ ag kãgtén ja ninh ky,” he ag tóg, kanhkã tãn ag, cidade tỹ Babilônia to.

³Kỹ ag tóg jãn mãn ky tag to mũ gé, ha mẽ. “Topẽ mỹ vĩ há han nĩ. Cidade ěn pũr nĩja vỹ kanhkã ra tãpny mũ. Tũ

henh ke tũ ti nĩ, nĩja ěn,” he ag tóg mũ gé, jãn kũ, kanhkã tân ěn ag. ⁴ Kĩ kófa tỹ 24 (ke) ěn ag tóg mũg ke kãn mũ, nén nẽ tỹ 4 (ke) ěn ag mré hã. Topẽ mỹ ag tóg: “Topẽ vỹ tỹ ă nĩ,” he mũ, ù tỹ nĩgia sĩnvĩ kri nĩ ěn mỹ. Kĩ ag tóg: “hã vẽ,” he mũ gé. “Topẽ mỹ vĩ há han nĩ,” he ag tóg mũ, jamã hár(a).

Cordeiro vênh prũg

⁵ Kĩ nĩgia sĩnvĩ ěn tá vênh vĩ tóg mẽ há tí gé. “Ủ tỹ Topẽ mỹ rãnrãj tĩ,” he tóg. “Ủ tỹ Topẽ kamẽg tĩ,” he tóg. “Ủn mág’,” he tóg. “Ủn kãsir’,” he tóg. “Topẽ mỹ vĩ há han, ăjag kar,” he tóg, vênh vĩ ěn ti.

⁶ Kĩ sóg ù tỹ hẽn ri ke ag jãn mẽg mũ gé. Tỹ tóg sa krog vĩ mẽ tĩ, tỹ tóg ta tỹ tỹrỹr he mẽ tĩ gé, ag jãn ti. Jãn kũ ag tóg tag tó mũ, ha mẽ. “Topẽ mỹ vĩ há han nĩ,” he ag tóg. “Ủ tỹ nén ù kar han ki kanhró nĩ ěn tóg tỹ pãĩ mág pẽ jẽ, ěg pãĩ mág ti, Topẽ ti. ⁷ Kĩ tóg ěg mỹ sér tãvĩ tĩ. Vĩ sér han jé ěg tóg ke mũ ha. “Tỹ ti ùn mág pẽ jẽ,” he jé ěg tóg ke mũ gé. “Cordeiro tỹ vãhã prũg ke nẽ ha. Ti prũnh ke fi vỹ vênh kãn huri. ⁸ ă kur kupri ěn tu kũ fi tóg jẽ nĩ, fi kur jẽngrẽ ěn,” he ag tóg, ùn e ag, jãnjan kũ. Fi jykre tãg to ken hã vẽ, hã vỹ: fi kur kupri jẽngrẽ, he mũ, fi tỹ Topẽ jykre há ěn han kũ nĩ hã vẽ. Ủ tỹ Topẽ ki ge kũ nỹtĩ kar ag to ken hã vẽ, hã vỹ: cordeiro prũnh ke, he mũ.

⁹ Kĩ Topẽ tỹ jẽnẽ jafã tóg inh mỹ: “inh vĩ tag rãn nĩ,” he mũ. “Ủ tỹ hẽn ri ke ag tóg cordeiro prũg tỹ festa konh ke mũ. Topẽ vỹ ù tỹ ti festa ko mũ ag kar ve há han mũ,” he tóg. Kĩ tóg: “Topẽ tỹ tón hã vẽ,” he mũ gé. “Hã ra Topẽ tóg ón vãnh nĩgtĩ,” he tóg, Topẽ tỹ jẽnẽ jafã ti.

¹⁰ Kĩ sóg ti krêm mũg ke mũ, sỹ ti mỹ: “Topẽ vỹ tỹ ă nĩ,” he jé. Hã ra tóg inh mỹ: “ke tũg ra,” he mũ, Topẽ tỹ jẽnẽ jafã ěn ti. “Topẽ mỹ rãnrãj han jafã vỹ tỹ inh nĩ, ă ri ke, ă kanhkã ag ri ke, ù tỹ Jesus

tỹ ki hã tó mũ ki króm mũ ěn ag kar ri ke sóg nĩ, Topẽ rãnrãj han kũ,” he tóg. “Topẽ hã mỹ: Topẽ vỹ tỹ ă nĩ, hemnĩ,” he tóg inh mỹ, Topẽ tỹ jẽnẽ jafã ěn ti.

Topẽ vĩ tó tĩ ag vỹ Jesus tỹ ki hã tó mũ ěn hã kãmén tĩ.

Ủ tỹ cavalo kupri kri nĩ

¹¹ Kĩ sóg kanhkã róm kũ nỹ vég mũ. Cavalo kupri vỹ tá jẽ nĩ. Ủ tỹ ti kri nĩ jyjyn hã vỹ: “ũn ón vãnh,” he mũ. “Ủ tỹ nén (ũ) há to krónh ke vãnh,” he tóg mũ gé, ti jiji ti. Ti hã vỹ jykre kuryj nĩ, ù tỹ cavalo kupri kri nĩ ěn ti, kũ tóg ki hã tó tĩ gé. Nén ù há hã to tóg vãsãn ti gé. ¹² Ti kanẽ vỹ tỹ pĩ gru ve nĩ. Ti kri tógfi vỹ e nỹtĩ. Ti kri ti jyjy tóg rãn kũ nĩ, hã ra ù pi(jé) ti jiji ki kanhró nỹtĩ. Ti hã vỹ ă pir mỹ ă jyjy ki kanhró nĩ. ¹³ Ti kur vỹ kyvênh nĩ. Ti to ag tóg: “Topẽ vỹ,” he tĩ. ¹⁴ Kanhkã tá soldado ag tóg ti nón kãmũ mũ. Cavalo kupri kri ag tóg kãmũ mũ, kanhkã tân ag, ti soldado ag. Kur kupri rĩnh kũ ag tóg kãmũ mũ. ¹⁵ Ủ tỹ ag jo tĩ mũ ěn jẽnã tá rógro jã régre tóg kãkutẽ mũ. Rógro tag tỹ tóg povo kar ag tỹ hẽn ri kenh ke mũ. Tỹ ag kri jẽ kũ tóg vênh jykre tar han ke mũ, ag to. Uva jẽgmĩ jafã tá tóg jẽgmĩnh ke mũ, uva ti, hã vỹ: Topẽ tỹ vênh kar to jũ jagy han mũ, he mũ, hã vỹ: uva jẽgmĩ, he mũ. ¹⁶ Ti kur ki tag tóg rãn kũ nĩ, ha mẽ. “Pãĩ kar ag kri pãĩ,” he tóg, vênh rãn ki. “Ủn mág kar ag kri ke,” he tóg mũ gé, vênh rãn ki. Ti kre ki tóg rãn kũ nĩ gé.

¹⁷ Kĩ sóg Topẽ tỹ jẽnẽ jafã ù vég mũ gé. Rã kri tóg jẽ nĩ. Kĩ tóg sēsĩ kar jé prẽr mũ, jēsĩ tỹ kanhkã krêm tẽgtẽ tĩ ag kar. Jamã hár(a) tóg ag mỹ: “!..kuneg..!” he mũ. “!..Vênh mãn kãmũ jeg..!” he tóg. “!..Topẽ tỹ festa konh kãmũ jeg..!” ¹⁸ Pãĩ kãgter konh kãmũ jeg..! Soldado to pãĩ ag, soldado ag, cavalo ag, ù tỹ cavalo kri mũgtĩ ag, ù tỹ tỹ camarada nỹtĩ ag, ag patrão ag, ùn mág ag, ùn kãsir ag, ěprã ke kar ag kãgter mũ nĩ konh kãmũ jeg..!”

he tóg, Topê tỹ jênê jafã ti, sēsĩ ag kar jê prêr kỹ.

¹⁹ Kỹ sóg goj kátã mĩg ên ve măn mũ gé, êprã pã'i kar ag ke gé, ag soldado ag mré hã. Vênh măn kỹ ag tóg nỹtĩ, ag tỹ ù tỹ cavalo kupri kri nĩ ên kato vāsānsān jé, ag tỹ ti krēm ke ag kato vāsānsān mág han jé. ²⁰ Kỹ ag tóg mĩg ên ség mũ, ù tỹ ón kỹ Topê vĩ tó ti ên ag mré hã, ù tỹ mĩg rĩnve nén ve vánh tỹ hên ri ke hyn han ja ên ti. Ti tỹ milagre hyn han tũgrĩn ù tỹ hên ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vê, ù tỹ ti rá tỹ ránrãn kỹ nỹtĩ kar ag, ù tỹ ti kãggrã to: “Topê vê,” he mũ kar ag. Kỹ ù tỹ mĩg ên ség mũ ag tóg pĩ gru fir ki ti fón mũ, pĩ mág pẽ ki, ù tỹ ón kỹ Topê vĩ tó ti ên mré hã. Ag rĩnrĩr hã ra ag tóg pĩ grub fir ên ki ag vãm mũ, ag sigse kỹ. Pó tỹ enxofre pũr nĩja ên ki ag tóg vãm mũ, vãn pũr nĩja ri ke ên ki. ²¹ Ag soldado ag kãgtén ag tóg mũ gé sir, rógro tỹ, rógro tỹ ù tỹ cavalo kupri kri nĩ ên jênkã tá kãkutê mũ ên ti. Kỹ jēsĩ kar ag tóg vênh fãn mũ sir, ùn kãgter mũ ag nĩ kon kỹ.

Satanás tỹ prỹg tỹ mil (ke) ki se kỹ jê

20 Kỹ sóg Topê tỹ jênê jafã ù vég mũ gé sir. Kanhkã tá tóg kãtêre mũ, Topê tỹ jênê jafã ti. Nũgme jãnkã nĩfênh jafã vyn kỹ tóg kãtêre mũ, ti chave ti. Ferro tỹ corrente vãg tóg mũ gé. ² Ên vỹ mĩg fêr ên ség mũ, hã vỹ: pỹn ve tỹ ùn ve fag krĩn kónãn mũ, he mũ, hã vỹ: Japo, he mũ, hã vỹ: Satanás, he mũ, mĩg fêr ên ti. Ên se kỹ tóg ferro tỹ ti mrĩnh mũ sir. Kỹ tóg se kỹ jê nĩ, prỹg tỹ mil (ke) ki. ³ Nũgme ki tóg ti fón mũ sir, mĩg fêr ti tỹ, Topê tỹ jênê jafã ên ti, kỹ tóg nũgme jãnkã nĩfênh há han mũ sir, chave tỹ. Kỹ mĩg fêr ên tóg povo ag krĩn kónãn mãn ke tũ nĩ ha ver, prỹg tỹ mil (ke) ki. Prỹg tỹ mil (ke) tag tỹ tũ' hen kỹ ag tóg ver ti kavãn sĩ han mãn ke mũ, mĩg fêr ti.

⁴ Kỹ sóg nĩgja sĩnvĩ tỹ hên ri ke vigvég mũ. Û tỹ kri nĩgnĩg kỹ nỹtĩ ag vỹ tỹ pã'i

nỹtĩ, ag tỹ vênh kar jykre tugnỹm ke to pã'i. Kỹ sóg êprã ke kuprĩg tỹ hên ri ke ag vigvég mũ gé, ag tỹ ùn kãgtén ja ên ag kuprĩg. Ag tỹ vênh kar mỹ Jesus kãmén ja tũgrĩn ag tóg ag kãgtén ja nĩ, ag tỹ Topê vĩ tó tũgrĩn. Mĩg ên to ag tóg: “Topê vê,” he ja tũ nĩgtĩ, ti kãggrã to ke gé. Mĩg rá ên tỹ ag tóg vênh rãn ja tũ nĩ gé, ag kakã ki, ag nĩgé pãnĩ ki ke gé. Ên ag vỹ tỹ Cristo mré pã'i nỹtĩnh ha, prỹg tỹ mil (ke) ên ki. ⁵ Vêser ù ag vỹ ver rĩnrĩr mãn ke tũ nĩ. Prỹg tỹ mil (ke) ên tỹ tũ' hen kỹ ag tóg kejên rĩnrĩr mãn kãn ke mũ. Û tỹ Cristo mré tỹ pã'i nỹtĩ tag ag vỹ rĩnrĩr vén ke mũ. ⁶ Û tỹ rĩnrĩr vén mũ mỹ tóg vĩ há han ke mũ, Topê ti. Topê tũ vỹ tỹ ag nỹtĩ. Kãgter mãn ke tũ ag tóg nỹtĩ ha. Topê tũ ki rĩr jé ag tóg ke mũ, Cristo tũ ki ke gé. Prỹg tỹ mil (ke) ki ag tóg tỹ pã'i nỹtĩnh mũ, Cristo mré hã.

Satanás kutê

⁷ Kejên prỹg tỹ mil (ke) ên tóg tũ' he mũ. Kỹ ag tóg Satanás ên kavãn sĩ han mãn ke mũ. ⁸ Kỹ tóg tĩ mũ, povo tỹ Gogue ag mré Magogue ag krĩn kónãn jé, tãtã, ga fyr tá, Satanás ti. E tãvĩ ag nỹtĩ, goj fyr tá rỹnhryj ri ke ên ag, goj kafã tũ fyr tá rĩnrĩr ri ke ên ag. Ag vênh mãn kãn han jé tóg ke mũ, Satanás ti. ⁹ Kỹ ag tóg tá kãmũ mũ, ùn e tãvĩ ên ag. Û tỹ Topê ki ge kỹ nỹtĩ ag kato ag tóg kãmũ mũ, cidade ên kato, Topê tỹ cidade to há nĩ ên kato. Ag tỹ ag tỹ tũ' he kãn sór vê. Hã ra pĩ tóg kanhkã tá kãtêre mũ, kỹ tóg ag kãgtén mũ. Û tỹ Topê ki ge kỹ nỹtĩ ag tỹ tũ' he sór mũ ên ag kãgtén tóg mũ, pĩ ti. ¹⁰ Japo ên, ù tỹ ag mỹ ón mũ ên fón pẽ han ag tóg mũ, pĩ grub fir ên ki, pĩ mág pẽ ên ki, pó tỹ enxofre pũr nĩja ên kãki, vãn pũr nĩja ri ke ên kãki. Goj kátã mĩg ên vỹ tá nĩ ha, pĩ grub fir ên kãkã, kar kỹ ón kỹ Topê vĩ tó ti ên ti ke gé. Pĩ grub fir ên kãki ag tóg nỹtĩ, tá kãpa mãn ke tũ pẽ ag tóg nỹtĩ ha. Tá ag jagtar tãvĩ nỹtĩ ha.

Vēnh kar jykre tugnỹm ke kurã

¹¹ Kĩ sóg nĩja mág pē vég mũ gé, nĩja kupri. Ũ tóg kri nĩ nĩ. Ti rĩnve ga tóg tũ' he mũ vãhã, kanhkã ti ke gé. Vēnh ven mãn tũ tóg nỹti ha, kanhkã mré ga ti. ¹² Kĩ sóg vēsēr kar vigvég mũ, ũn mág ag, ũn kãsir ag ke gé. Nĩja kupri ěn jo ag tóg nỹti. Kĩ livro vỹ tá nỹti gé. Livro ěn kygvãg ag tóg mũ. Vēnh kar jykre vỹ livro ěn ki rãnrán kĩ nỹti. Kĩ livro ũ vỹ tá nĩ gé, ěn kavãg ag tóg mũ gé. Ũ tỹ rĩr krỹg ja tũ venh ke mũ ag jygyj vỹ livro ěn ki rãnrán kĩ nỹti. Kĩ Topē tóg vēsēr kar jykre tugnỹm ke mũ, kĩ tóg ag mỹ ag tỹ nén venh ke mũ ti tónh ke mũ. Ag tỹ ãjag tỹ nén han ja kajãm ke vë, ag tỹ ãjag jykre tỹ livro ki rãnrán kĩ nỹti ěn kajãm kãn ke vë. ¹³ Ũ tỹ goj ki kãgter mũ ag vỹ tá nỹti gé, ũ tỹ vēsēr jamã tá nỹti ag kar ti. Vēnh kar vỹ tá nỹti. Ag tỹ nén han mũ kar kajãm kãn jé ag tóg ke mũ ha. ¹⁴ Kĩ ũ vỹ ter mãn ke tũ nĩ ha. Ēg ter ke tag vỹ hur tũg. Ũ tỹ pĩ grug fir ěn kãki vár ke tag ag vỹ kãgter ri ke han ke mũ, kĩ tóg ag kãgter pē han ri ke nĩ sir, ag tũg pē han tũ ra. ¹⁵ Kĩ ũn jygyj rãn kĩ nỹti tũ ěn ag vỹ pĩ grug fir ěn kãki vár kãn ke mũ, ũn jygyj tỹ Topē livro ki rãnrán kĩ nỹti tũ ěn ag.

Kanhkã tãg mré ga tãg

21 Kĩ sóg kanhkã tãg vég mũ gé, ga tãg ke gé. Kanhkã ve ěn tóg hur tũg, ga ve ěn ke gé, goj ti ke gé. ² Kĩ sóg Topē tỹ cidade tag, Jerusalém tãg tag vég mũ gé. Kanhkã tá tóg kãtère mũ, Topē tá, cidade tãg tag ti. Cidade sĩnvĩ han ja ag tóg nĩgtĩ, kĩ tóg ag tỹ tá vēnh prũg to festa han ke nĩ ve nĩ. Cidade sĩnvĩ tóg ũn prũnh ke fi sĩnvĩ ri ke nĩ, fi tỹ ã mén ke ti jãvãnh kỹ. ³ Nĩja kupri ěn tá vēnh vỹ tóg mē há tĩ, kĩ tóg: “Topē jamãn hã vë,” he mũ. “Topē tỹ ěprã ke ag mré ěmãn hã vë,” he tóg. “Ag mré tóg nĩ nĩ ha, ti tũ vỹ tỹ ag nỹtĩnh ke mũ ha. Topē

vỹ ag mré nĩnh mũ ha, kỹ tóg tỹ ag Topē nĩ sir. ⁴ Ag kanē var tỹ tũ' he kãn jé tóg ke mũ ha. Ũ tóg ter mãn ke tũ pē nĩ ha, hã kỹ ũ tóg fe kaj nĩ mãn ke tũ nĩ gé, jagtar ke tũm, kaganh ke tũm. Tũg ti nĩ ha, vēnh jykre si kar ti. Vēnh ven mãn ke tũ ti nĩ ha, vēnh jykre si ti,” he tóg, vēnh vĩ ěn ti.

⁵ Kĩ ũ tỹ nĩja kupri kri nĩ ěn tóg: “nén (ũ) kar han mãn jé sóg ke mũ ha,” he mũ. Kĩ tóg inh mỹ: “inh vỹ tag rãn nĩ,” he mũ gé. “Sỹ ki hã tó vë. Vēnh ven kãn jé tóg ke mũ, sỹ ã mỹ nén tó mũ tag ti,” he tóg. ⁶ Kĩ tóg: “hỹ, vēnh ven kãn ti huri,” he mũ gé. “Ũn ve vỹ tỹ inh nĩ, kỹ sóg tỹ ěgno nĩ gé. Isỹ nén (ũ) kar han to hã sóg nĩ nĩ, kỹ sóg nén (ũ) kar tũg mũ ra nĩnh mũ gé. Ũ tóg goj kron sór mũ. Ēn mỹ sóg goj ven tĩ, kaja tũ ra. Isỹ ti mỹ goj ven mũ ěn vỹ ti ter tũ han ke mũ. ⁷ Ũ tỹ isovãnh tũ ěn mỹ sóg nĩm ke mũ, presente tag ti, ha mē: ti Topē vỹ tỹ inh nĩnh mũ, kỹ tóg tỹ inh kósin nĩnh mũ gé,” he tóg inh mỹ, ũ tỹ nĩja kupri kri nĩ ěn ti.

⁸ Hã ra ũ ag tóg pĩ grug fir kãki, pĩ mág pē ěn kãki vár ke mũ, hã vỹ: ũn mũmēg (ka)mē ag, he mũ, ũ tỹ isovãnh mũ ag, he mũ, ũ tỹ vēnh jykre pãno tỹ vēnh kavénh tĩ ag, he mũ, ũ tỹ ũ tén tĩ ag, he mũ, ũ tỹ ã prũ tũ fag mré nỹgnỹ mũ ag, he mũ, ũ tỹ ã mén tũ mré nỹgnỹ mũ fag, he mũ, kujã ag, he mũ, curandeiro ag, he mũ, ũ tỹ vēnh kãggrã jykre mĩ mũ mũ ag, he mũ, ũn ón mũ ag, he mũ gé. Pĩ grug fir ěn kãki tóg ag vãm kãn ke mũ, pó tỹ enxofre pũr nĩja ěn kãki, vãm pũr nĩja ri ke ěn kãki. Kĩ tóg ag kãgtén pē han ri ke nĩ sir,” he tóg, ũ tỹ nĩja kupri kri nĩ ěn ti.

Jerusalém tãg

⁹ Kĩ Topē tỹ jēñē jafã ũ tóg inh ki jun mũ, ũ tỹ pénky kãkã nĩ ěn tỹ ga kri ke ag vóg kónãn mũ ěn ag kã ũ. Inh mỹ tóg: “kunĩg,” he mũ. “Cordeiro prũnh ke fi venh kãtũg,” he tóg inh mỹ.

¹⁰ Kĩ Topē kuprĩg tóg inh krĩn mũ sir, kĩ sóg nén nē vég mũ. Topē tỹ jēnē jafā ěn tóg inh pére tĩ mũ, pānónh téj (gy) kri. Pānónh kri jē kĩ tóg inh mỹ Topē tỹ cidade tág ven mũ sir, cidade tỹ Jerusalém, he mũ tag ti, ũ tỹ kanhkā tá kátēre mũ tag ti, Topē tá. ¹¹ Sínvĩ pē tóg nĩ, Topē sínvĩ ěn ri ke ti nĩ, kókov tóg nĩ gé, pó tỹ jaspe kókov ri ke. Pó tỹ tonh vỹ tỹ ti nĩ, jaspe ti, kĩ tóg pó kókov fin ěváj ěn ri ke nĩ. ¹² Cidade jy ró tóg téj gy nỹ, vėnh ra hā tóg téj gy jē gé. Ró ki jänkā tỹ 12 (ke) vỹ nỹtĩ. Kĩ Topē tỹ jėgnē jafā tỹ 12 (ke) ag vỹ ki rĩr nỹtĩ, jänkā ki. Ki vėnh jygy tóg ránrán kĩ nỹtĩ, jänkā ki, Israel jóg'jóg ve tỹ 12 (ke) ěn ag jygy ti. ¹³ Rā jur ja kátá tóg jänkā tǎgtũ nĩ. Rā pur ja kátá tóg jänkā tǎgtũ ũ nĩ gé, kanhkā tǎpér kátá tóg jänkā tǎgtũ ũ nĩ gé, kanhkā tǎpér ũ kátá tóg jänkā tǎgtũ ũ nĩ gé. ¹⁴ Pó tỹ 12 (ke) kri tóg hyn han kĩ nĩ nĩ, cidade ti. Pó ěn ki vėnh jygy tóg ránrán kĩ nỹtĩ gé, apóstolo tỹ 12 (ke) ěn ag jygy ti, cordeiro tũ ěn ag jygy ti.

¹⁵ Kĩ ũ tỹ inh mré vĩ mũ ěn, Topē tỹ jēnē jafā ěn tóg ti kāmũn jafā vyn kĩ jē nĩ, ti kāmũn jafā tỹ ouro ti. Kĩ tóg cidade kāmũn sór mũ, cidade jy ró ti, ti jänkā ti ke gé. ¹⁶ Péno tỹ 4 (ke) ti nĩ, cidade ti, kĩ ti tǎpér vỹ ti téj ri ke nĩ. Kĩ Topē tỹ jēnē jafā ěn vỹ kāmũn mũ sir, cidade ti, ti kāmũn jafā tỹ. Quilômetro tỹ 2 mil kri 200 (ke) ti nĩ, ti tỹ téj e kĩ nỹ ki, ti tǎpér ki ke gé, ti tỹ vėnh ra jēn ke gé. Vėnh ri ke kar ti nĩ, ti kāmũr ti. ¹⁷ Kĩ tóg cidade jy ró ěn kāmũn mũ gé. Ti tǎpér vỹ metro tỹ 64 (ke) nĩ. Metro tag vỹ tỹ ěprā ke ag kāmũn jafā nĩ, hā ra Topē tỹ jēnē jafā vỹ kāmũn mũ, ěprā ke ag kāmũn jafā tỹ. ¹⁸ Ró vỹ pó tỹ tonh tỹ jaspe tỹ han kĩ nỹ. Kĩ cidade vỹ ouro tỹ han kĩ nĩ, hā ra tóg fin ěváj nĩ, vidro fin ěváj ri ke. ¹⁹ Cidade jy ró tóg pó tỹ tonh mág kri han kĩ nĩ. Pó ěn to pó tỹ tonh ũ tóg nỹtĩ gé, ũn e ag. Pó tỹ tonh mág ũ tóg tỹ jaspe nĩ, kĩ ũ tóg tỹ safira nĩ, kĩ ũ tóg tỹ ágata nĩ, jo ũ tóg tỹ

esmeralda nĩ, ²⁰ jo ũ tóg tỹ sardônio nĩ, jo ũ tóg tỹ sárdio nĩ, ũ tóg tỹ crisólito nĩ, ũ tóg tỹ berilo nĩ, ũ tóg tỹ topázio nĩ, ũ tóg tỹ crisópraso nĩ, ũ tóg tỹ jacinto nĩ, ũ tóg tỹ ametista nĩ gé. ¹² (ke) ti nỹtĩ, pó mág ti. ²¹ Kĩ ti jänkā tỹ 12 (ke) vỹ pérola tỹ hyn han kĩ nỹtĩ. Jänkā pir vỹ pérola pir nĩ mỹr, ha mē. Kĩ ěpry mág ěn, ěmĩn mág ěn vỹ ouro tỹ han kĩ sa, hā ra tóg fin ěváj nĩ, vidro fin ěváj ri ke.

²² Hā ra sóg Topē jo ĩn vég tũ nĩ, cidade ěn tá. Topē vỹ vėnh kar kri nĩ, kĩ tóg nén (ũ) kar han ki kanhró nĩ gé. Topē hā vỹ cidade ěn tá ěmā nĩ, cordeiro ti ke gé, hā kĩ tóg tá ag jo ĩn tũ nĩ. ²³ Kĩ rā tóg tá tũ nĩ gé, kysā ke gé. Topē tỹ jėngrē vỹ ki kurā han tĩ, kĩ tóg tá kutyg vǎnh nĩ sir. Cordeiro ěn vỹ cidade ěn tá rā ri ke nĩ. ²⁴ Kĩ vėnh kar tóg Topē tỹ cidade ki jėngrēg ěn tugrĩn ěvǎnh há han tĩ, povo kar ag. ěprā pā'i kar ag vỹ ājag tỹ nén (ũ) kar gé kāmũnh mũ, ag tỹ tá vin han jé. ²⁵ Jänkā vỹ nugnón kĩ nỹtĩ, kurā kar ki. Kutyg tũ nĩn kĩ ag tóg jänkā nĩgfénh tũ nĩgtĩ. ²⁶ Povo kar ag vỹ ājag tỹ nén (ũ) gé kāmũnh ke mũ, cidade ěn mĩ. ²⁷ Hā ra nén ũ kórég vỹ kǎrǎnh ke tũ pē nĩ. ũ tỹ vėnh jykre pāno han mũ ag vỹ rā genh ke tũ nĩ, ũn ón mũ ag ke gé. ũn jygy tỹ livro ki ránrán kĩ nỹtĩ ěn ag hā vỹ ra genh ke mũ. ũ tỹ rĩr krỹg ja tũ vég mũ ěn ag jygy vỹ ránrán kĩ nỹtĩ, cordeiro tỹ livro ěn ki.

22 Kĩ Topē tỹ jēnē jafā tóg inh mỹ goj mág ven mũ. Goj ěn vỹ ěg rĩn-rĩr han tĩ. Kómkóm ke ti tĩ, goj ěn tĩ, pó kupri fin ěváj tỹ kómkóm ke ěn ri ke, goj ti. Goj ěn nĩhỹg vỹ Topē nĩgja tá nĩ, cordeiro nĩgja ěn tá. ² Kĩ tóg cidade kũu mĩ tĩ mũ, ěpry mág jagma, ěmĩn mág ěn jagma, goj ti. Ti fyr tá ka tóg nỹtĩ, ti fyr ũ tá ke gé. Ka kanē ěn vỹ ěg rĩnrĩr han tĩ gé. ěn vỹ prỹg pir ki kanē tỹ 12 (ke) han tĩ. Kysā kar ki tóg ā kanē hyn han tĩ. Ti féj vỹ tỹ vėnh kagta kar nĩ, vėnh kaga kar tỹ tóg hághá' he kǎn tĩ. ³ Topē tỹ nén

ũ to jũ vỹ tá nĩnh ke tũ pẽ nĩ, cidade ên tá.

Topẽ nĩgja vỹ cidade ên tá nĩ nĩ, cordeiro nĩgja ên ti, kỹ vênh kar vỹ ti to: “Topẽ vẽ,” henh ke mũ, Topẽ rânhrăj han tĩ ag kar. ⁴Topẽ ve jé ag tóg ke mũ, kỹ ti jiji vỹ ag kakă ki rân kỹ nĩnh mũ. ⁵Tá tóg kutyg vánh nỹgtĩ, hã kỹ ag tóg tá lampião grudg ke tũ nĩ. Rã vỹ tá tũ nĩ gé. Topẽ vỹ ag mỹ tỹ jẽngrê han tĩgtĩ, êg pã'i ti. Kỹ tá nỹtĩ ag tóg tỹ pã'i nỹtĩnh ke mũ gé. Ag tỹ tỹ pã'i nỹtĩnh ke tag vỹ tũ' henh ke tũ nĩ.

Jesus kătĩg măn

⁶Kỹ Topẽ tỹ jẽnẽ jafă ên tóg inh mỹ: “inh vỹ vỹ tỹ ki hã ke nĩ,” he mũ. “Vênh ó pijé,” he tóg. “Êg jóg tỹ Topẽ vỹ ù tỹ ã vỹ tó tĩ ag mỹ ã kuprĩg jẽnẽ, ti tỹ ag kanhrăn jé. Hã kỹ tóg ã tỹ jẽgnẽ jafă ag kã ù jẽnẽ, ti tỹ ti mỹ rânhrăj ti ag mỹ tó jé, nén tỹ kãnhmar kutênh ke mũ ti,” he tóg, inh mỹ, Topẽ tỹ jẽnẽ jafă ti.

⁷Jesus vỹ tag tó mũ, ha mẽ. “Ha vé, inh kătĩg măn ke nẽ ha. Nén tỹ livro tag ki rân kỹ nĩ tag to jykrén há han nĩ, kỹ Topẽ tóg âjag mỹ vỹ há han ke mũ,” he tóg, Jesus ti.

⁸Tag kar ve inh, mẽ inh ke gé, inh, hã vỹ: João, he mũ. Isỹ ve kãn kar kỹ sóg ù tỹ inh mỹ tag ven mũ ên krêm mũg ke mũ, sỹ ti mỹ: “Topẽ vỹ tỹ ã nĩ,” he jé. ⁹Hã ra tóg inh mỹ: “ke tũg nĩ,” he mũ. “Ă ri ke sóg nĩ, isỹ Topẽ rânhrăj han kỹ. Ă régre ag ri ke sóg nĩ, ù tỹ Topẽ vỹ tó tĩ ag ri ke sóg nĩ, ù tỹ livro tag ki nén rân kỹ nĩ mẽg mũ ag ri ke sóg nĩ gé. Topẽ hã mỹ: “Topẽ vỹ tỹ ã nĩ,” hemnĩ,” he tóg, inh mỹ, Topẽ tỹ jẽnẽ jafă ti.

¹⁰Kỹ Jesus vỹ tag tó mũ gé, ha mẽ. “Livro tag ki nén rân kỹ nĩ tag pēju sór tũg nĩ,” he tóg, inh mỹ. “Kakó ti nĩ ha, âjag tỹ nén tỹ ki rân kỹ nĩ tag venh ke mũ ti. ¹¹Û tỹ vênh jykre pãno han mũ ên jé han kỹ nĩ nĩ. Û mỹn hỹn há tĩgtĩ, ti jykre kavéj ti. Ti jé ã jykre kórég hã mĩ

tĩg. Û tóg vênh jykre kuryj han tĩ. Ti jé to tar nĩ. Û ag tóg tỹ Topẽ tũ nỹtĩ. Ag jé ti to krónh ke tũg,” he tóg, Jesus ti.

¹²“Ha vé, inh kătĩg măn ke nẽ ha. Ăjag kaja ma sóg kătĩg ke mũ, ha vemnĩ. Vênh kar vỹ ve kãn ke mũ, ag tỹ nén han mũ kaja ti. ¹³Topẽ vỹ kar han sóg tĩ. Ûn ve vỹ tỹ inh nĩ, ùn tỹ êgno vỹ tỹ inh nĩ gé. Isỹ nén kar han vén to hã sóg nĩ, kỹ sóg nén kar tỹ tũ' he mũ ra êgno kã nĩnh ke mũ gé,” he tóg, Jesus ti.

¹⁴“Û ag tóg âjag jykre kugrynh sór tĩ, hã kỹ ag tóg êg tỹ êg kur kygfa ri ke han tĩ. Ên ag mỹ tóg vỹ há han ke mũ, Topẽ ti. Ka kanẽ tỹ êg rĩnrĩr han tĩ ên ko jé ag tóg ke mũ, kỹ ag tóg cidade ên jãnkă ra genh ke mũ gé. ¹⁵Hã ra ù ag tóg ên ra genh ke tũ nĩ, hã vỹ: ù tỹ vênh jykre pãno tỹ vênh kavénh tĩ ag, he mũ, kujá ag, he mũ, curandeiro ag, he mũ, ù tỹ ã prũ tũ fag mré nỹgnỹ mũ ag, he mũ, ù fag tỹ âjag mén tũ ag mré nỹgnỹ mũ fag, he mũ, ù tỹ ù tén mũ ag, he mũ, ù tỹ vênh kăggră jykre mĩ mũ mũ ag, he mũ, ùn ón mũ ag, he mũ, ù tỹ ù ag lograr he mũ ag, he mũ gé. Ên ag vỹ cidade ra genh ke tũ pẽ nĩ,” he tóg, Jesus ti.

¹⁶“Isỹ jẽnẽ jafă jẽnẽ inh, inh, hã vỹ: Jesus, he mũ. Ti jẽnẽ inh, ti tỹ âjag mỹ âjag tỹ nén venh ke mũ kar tó jé, ù tỹ inh vỹ jẽmẽ jé vênh măn tĩ ag kar mỹ. Davi krê'krê ag kã ù ên vỹ tỹ inh nĩ. Krĩg mág hã sóg nĩ,” he tóg, Jesus ti.

¹⁷Kỹ Topẽ kuprĩg vỹ Jesus mỹ: “kur kătĩg,” he mũ. Û tỹ ti ki ge kỹ nỹtĩ kar ag vỹ ti mỹ tag tó tĩ gé, ag tỹ tỹ ti prũnh ke fi ri ke nỹtĩn kỹ. Û tỹ ag tỹ ti jé prêr mẽg mũ ag jé ti mỹ: “kur kătĩg,” he kãn.

Kỹ Jesus tóg: “ù tỹ goj kron sór mũ ên jé iso kătĩ,” he mũ, “sỹ ti mỹ goj jun jé, fagrĩnh mỹ. Goj ên vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

¹⁸Văhă sóg tag tó sór mũ, inh, hã vỹ: João, he mũ, ha mẽ. Û tóg kejên isỹ nén

rán mũ tag ve kỹ pãte ù rán măn sór ke mũ gé hên ri ke mũn. Ên vóg kónãn tăvĩ han jé tóg ke mũ, Topẽ ti, kỹ tóg sỹ nén ù jagy tó mũ ên ve kãn ke mũ, ha mẽ.

¹⁹ Kejen ù tóg hên ri ke mũn isỹ nén rán mũ ù sỹ nén ù tũ han sór mũ. Ên tũ mág sỹ tóg tũ' henh ke mũ gé, Topẽ ti, kỹ tóg ka kanẽ sỹ êg rĩnrĩr han mũ ên konh ke tũ nĩ. Topẽ sỹ cidade nĩv ên ra rãnh ke tũ tóg nĩ gé, sỹ cidade kãmén mũ ên ra.

²⁰ Û sỹ inh mỹ tag kar ven mũ ên vỹ: “inh kãtĩg măn ke nẽ ha, sỹ ki hã tó vẽ,” he mũ.

Hỹ, kur kãtĩg, êg Senhor sỹ Jesus'.

²¹ Êg Senhor sỹ Jesus jé ãjag kar tar han. Hã vẽ.

Êg sỹ Topẽ vĩ rá venh ke

Êg sỹ Topẽ vĩ rá ve kỹ ki kanhrãn kỹ ki krov kỹ êg hã han ke mũ. Kurã kar ki êg tóg to sĩ han ke mũ, kỹ êg tóg kãnhmar fin rãm ke mũ. Kỹ tóg há tĩ gé, êg sỹ prỹg kar ki Novo Testamento tag fin rãm kỹ, êg sỹ sỹ vênh kanhrãn há han jé. Êg sỹ fin rãm jé êg tóg gen kỹ to kenh mũ, ha vé: